


Testament Cobə de'en choe' dižə' ɟhe ancho

Jesocristən'



New Testament in Zapotec, Yatzachi (MX:zav:Zapotec,
Yatzachi)

Testament Cobə de'en choe' dižə' che ancho Jesocristán' New Testament in Zapotec, Yatzachi (MX:zav:Zapotec, Yatzachi)

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
d439ce34-67af-5db7-b82c-f44ad9932db2

Contents

SAN MATEO	1
SAN MARCOS	48
SAN LUCAS	77
SAN JUAN	124
HECHOS	158
ROMANOS	203
1 CORINTOS	225
2 CORINTOS	247
GÁLATAS	261
EFESIOS	269
FILIPENSES	277
COLOSENSES	282
1 TESALONICENSES	287
2 TESALONICENSES	291
1 TIMOTEO	294
2 TIMOTEO	301
TITO	306
FILEMÓN	309
HEBREOS	311
SANTIAGO	327
1 PEDRO	333
2 PEDRO	340
1 JUAN	344
2 JUAN	349
3 JUAN	350
JUDAS	351
APOCALIPSIS	353

Dižə' Güen Dižə' Cobə De'en Bzoj Sam Mtion'

Ẅaxta'o Jesocrisṭən'

¹ Nga cho'en dižə' che de'e Ẅaxta'o Jesocrisṭən' dezd gan' gwxete dia che'enə'. Na' nyoj la yoguə'əte de'e Ẅaxta'ogüe' ca' gwzolaozən len de'e Ẅaxta'ocho Abraanṅə' xte na'a. Jeso'osən' naque' xi'in dia che de'e Rei Dabin', na' de'e Dabin' naque' xi'in dia che de'e Abraanṅə'.

² Abraanṅə' naque' Ẅa Isaac, na' Isaaquən' naque' Ẅa Jacob, na' Jacobən' naque' Ẅa Joda len beṅə' biše'e ca' yelə'.

³ Jodan' na' Tamar zjənaque' Ẅaxna' Fares na' Sara. Na' Faresən' naque' Ẅa Esrom, na' Esronṅə' naque' Ẅa Aram.

⁴ Aranṅə' naque' Ẅa Aminadab, na' Aminadabən' naque' Ẅa Naason, na' Naasonṅə' naque' Ẅa Salmon.

⁵ Salmonṅə' na' Raab zjənaque' Ẅaxna' Boos. Na' Boosən' na' Rot zjənaque' Ẅaxna' Obed. Na' Obedən' naque' Ẅa Isai.

⁶ Na' Isain' naque' Ẅa Rei Dabin', na' Rei Dabin' naque' Ẅa Salomon. Na' xna' Salomonṅə' goque' xo'olə de'e Orias antslə ze'e yeca'a Rei Dabin' lē' par gaque' xo'ole'.

⁷ Na' Salomonṅə' naque' Ẅa Roboam, na' Roboanṅə' naque' Ẅa Abias, na' Abiasən' naque' Ẅa Asa.

⁸ Na' Asan' naque' Ẅa Josafat, na' Josafatən' naque' Ẅa Joram, na' Joranṅə' naque' Ẅa Osias.

⁹ Na' Osiasən' naque' Ẅa Jotam, na' Jotanṅə' naque' Ẅa Acas, na' Acasən' naque' Ẅa Esequias.

¹⁰ Na' Esequiasən' naque' Ẅa Manases, na' Manasesən' naque' Ẅa Amon, na' Amonṅə' naque' Ẅa Josias.

¹¹ Josiasən' naque' Ẅa Jeconias na' biše'e ca'. Beṅə' ca gwnita' ca tyempən' catə' beṅə' Babilonia ca' besyə'əche'əxaxje' de'e Ẅaxta'o chio'o beṅə' Izrael Babilonian'.

¹² Gwde besyə'əche'əxaxje' lega'aque' Babilonian', goljə Salatiel xi'in Jeconiasən'. Na' Salatielən' naque' Ẅa Sorobabel.

¹³ Na' Sorobabelən' naque' Ẅa Abiod, na' Abiodən' naque' Ẅa Eliaquim. Na' Eliaquinṅə' naque' Ẅa Asor.

¹⁴ Asorən' naque' Ẅa Sadoc, na' Sadoquən' naque' Ẅa Aquim. Aquinṅə' naque' Ẅa Eliod.

¹⁵ Na' Eliodən' naque' Ẅa Eleasar, na' Eleasarən' naque' Ẅa Matan. Na' Matanṅə' naque' Ẅa Jacob.

¹⁶ Nach Jacobən' naque' Ẅa Jwse ben' naquə be'en che Marian'. Na' Marian' naque' xna' Jeso'os ben' nzi' Crist, zeje dižə' ben' gwlej Diozən' par gaqualene' beṅəçən'.

¹⁷ Na' tyemp che de'e Abraanṅə' xte tyemp che de'e Dabin' goc žda' dia che'enə'. Na' goszolaon tyemp che de'e Dabin' xte catə'an beṅə' Babilonia ca' besyə'əche'əxaxje' de'e Ẅaxta'o chio'o beṅə' Izrael Babilonian' gozac yežda' dia che'enə'. Na' lēcə dezd tyemp catə'an besyə'əche'əxaxje' lega'aque' Babilonian' xte catə'an bžin žan' goljə Cristən' gozac yežda' dia che'enə'.

Catə' goljə Jeso'osən'

¹⁸ Na' quingan' goquə catə'an goljə Jesocrisṭən'. Banaquən gwšagna' Marian' len Jwsen', na' ze'e ca'a Jwsen' lē' par gaque' xo'ole', gwsa'ache'ine' banoa' Marian' bdao'. Goc ca' çhedə' Spirit che Diozən' benən par niç bgüendao' bda'onə' lo'o lē'enə'.

¹⁹ Na' Jwsen' ben' banaquən si'e Marian' par gaque' xo'ole', goque' to beṅə' çon de'e güen lao Diozən'. De'e na'ana' bene' xbab cuejyichje' Marian' šizizə sin cui no gacbe'i par niç cui əgwsi'e lē' zto'.

²⁰ Žlac chone' xbab gone' ca', to angl che Ẅancho Diozən' blo'elaogüe'e lē' lao bišgal. Na' gože'ene': —Jwse, lē' naco' xi'in dia che de'e Dabin'. Bito žebo' si'o Marian' par gaque' xo'olo'. Spirit che Diozən' benən par niç no'e bda'onə'.

²¹ Na' sane' to bi'i byo, na' əgwsi'o labo' Jeso'os çhedə' yebeje' beṅə' gwlaž çhele ca' xni'a de'e malən' beṅə' se'ejl'e' che'.

²² Na' de'en goquə yoguə' de'e ca' goc complir can' gwna Diozən' de'en bzoj to profet beṅə' be' xtižə' Diozən' cana', gwne':

²³ To no'ol güego' beṅə' nenaplažə'əchgua cuine' güe'e to bi'i byo dao' na' sane'ebo'.

Na' si' labo' Emanuel.

Na' Emanuel zeje dižə': Zoczə Diozən' len chio'o.

²⁴ Na' catə' beban Jwsen' beyož gwneine' yelən' ca', beteyo bene' can' gož angl che Ẅancho Diozən' lē'. Jəxi'e Marian' liže'ena' par goque' xo'ole'.

²⁵ Pero Jwsen' gwdapəcze' lē' respet xte catə'an gwxane' to bi'i byo dao', xi'inə' nech. Na' gwxi' labo' Jeso'os.

2

Magos ca' jāsā'alane'e Jeso'osān'

¹ Ca tyemp can' gwnabia' Rei Erodān', goljə Jeso'osān' Belennə', to yež gan' mbane Jodean'. Na' goquān' besə'əzin to čhəpə magos Jerosalennə', beṇə' za' ac galān' chla' bgüižān'.

² Na' gosə'əṇabene' beṇə' lao' syodan' gwse'e: —Č Gan' rei che beṇə' Izrael ca', be'en bagoljənə'? Nezeto' bagolje'ena' cheda' bable'ito' beljw che'ena' catə'an bla'an lažto'ona' galān' chla' bgüižān'. Na' za'ato' par nič güe'ela'oto'one'.

³ Catə' bene Rei Erodān' xtižə'əga'aque'ena', de'e juisy de'e goquene', na' leczə ca' yoguə'əloj beṇə' lao' syoda Jerosalennə'.

⁴ Nach btob Rei Erodān' yoguə'əloj bχoz əblao che chio'o beṇə' Izrael na' leczə yoguə' beṇə' ca' choso'osed choso'olo'ilei de'en bzoj de'e Moizezān', con beṇə' nita' syodan'. Na' gwnabene' lega'aque' gan' naquān galjə Cristān' ben' gwlej Diozān' par gaqualene' nasyon chechon'.

⁵ Nach gwse' beṇə' ca' Erodān': —Belen nan' galje', gan' mbane Jodea, la' can' na to part Xtižə' Diozān' de'en bzoj to profet beṇə' be' xtiže'ena' cana'. Quinga nan:

⁶ Ca naquə yež Belen gan' mbane Jodea, naquəczān yež de'e zaquə'əchgua enṭr yež əblao ca' de'en zjəchi' Jodean', chedə' to beṇə' Belennə' gaque' beṇə' gwnabia', na' le' əggüia əgwye' chio'o beṇə' Izrael.

⁷ Nach Erodān' bene' mendad ja'ac magos ca' laogüe'ena' bgašə'əzə par nič gwnabene' lega'aque' tcho'a tšao' batə'əquān' besə'əle'ine' bla' beljōn'.

⁸ Nach bsele'e lega'aque' Belennə', gože' lega'aque': —Le'e žja'ac Belennə' na' le'e žjəyediljyožə bida'ona'. Na' catə' yeže'lebo' na' deyedixjue'ile nada' par nič leczə ša'a əžje'ela'ogua'abo'.

⁹ Beyož boso'ozenag magos ca' can' gož rein' lega'aque', nach gwsa'aque' əzja'aque'. Na' ca naquə' beljōn' de'en besə'əle'ine' gan' chla' bgüižān' catə' cuinə' sa'ac lažga'aque'ena', zdan le'e yoban' žialaon laoga'aque'ena' bžintən gwzon gan' zo bida'ona', na' gwleczān.

¹⁰ Na' besyə'əbeine' xte juisy ca de'en besə'əle'ine' beljōn' de'e yoblə.

¹¹ Nach catə' gwso'e lo'o yo'ona' na' besə'əle'ine' bida'ona' len xna'abo' Marian'. Nach bosə'əzo xibga'aque' gwso'elaogüe'ebo'. Na' bosə'əsaljo caj chega'aque' ca' na' gosə'əbeje' or, yal na' to xnižə' yag de'en chla' zix de'en ne' mirra par gwso'əbo'on.

¹² Pero na' Diozān' gwduxjue'ine' magos ca' lao bišgal de que bito yesyə'ədie' gan' zo Rei Erodān'. De'e na'ana' besyə'əaque'e yetolə nez par jəya'aque' lažga'aque'ena'.

Jwsen' len Marian' na' len Jeso'osān' ja'aque' Egipton'

¹³ Na' catə' babesa'ac magos ca', to angl che Xancho Diozān' bloe' laogüe' Jwsen' lao bišgal, na' gože'ene': —Gwyas, gwche' bida'ona' na' xna'abo'ona' le'e žja'ac Egipton' na' sole xte catə'əch əni'a' le'e batə'əquə' guaquə yesa'acle, cheda' Erodān' banž'i'e bia' yejiljə' bida'ona' par gote'ebo'.

¹⁴ Nach nencial gwyas Jwsen', gwche'e bida'ona' len xna'abo'ona' zja'aque' Egipton'.

¹⁵ Nach gwnite'e Egipto na'azə xte catə'əch got Erodān'. Na' de'en gwso'one' ca' goc complir de'en bzoj to profet beṇə' be' xtižə' Diozān' cana'. Quinga bzoje' de'en gwna Xancho Diozān': “Čixjue'ida' Xi'ina'anə' yeze'e Egipton'.”

Erodān' bsele'e soldad par gwso'ote' yoguə' bi'i byo dao'

¹⁶ Na' lao bazja'aque' Egipton' Erodān' lechgualə bžejene' catə' gocbe'ine' gosə'əxoayag magos ca' le' de'en cuich besyə'ədie' gan' zo'ena'. Na' segon can' gwyejmi'ine' catə' gwnabene' lega'aque' antslə do batə'əquān' bla' beljōn', bsele'e soldad che' ca' par jse'ete' yoguə'əloj bi'i byo che'en dao' zelao bi'i čhəp ize, bi'i ca' gwsa'aljə Belennə' na' yeziquə'əchlə yež ca' zjənyechj zjəmbi'i Belennə'.

¹⁷ Na' laogüe' de'en gwso'ote' bi'i byo dao' ca', goc complir can' bzoj de'e profet Jeremiasān', ben' be' xtižə' Diozān' cana', gwne':

¹⁸ Gaquə bgüine bgüezān' yež de'en nzi' Rama.

No'ol ca' zjənaquə xi'in dia che de'e Raquelān'

lechgualə yesyə'əyašə' yesyə'əgüinlaže'e che yoguə' xi'in da'oga'aque' ca' əsa'at.

Na' bito se'enene' par no yeyo'exen lega'aque'.

¹⁹ Lao ne'e nita' Jwse ca' Egipton' got Erodān'. Nach to angl che Xancho Diozān' bloe' laogüe' Jwsen' lao bišgal.

²⁰ Na' gože'ene': —Gwyas, beče' bida'ona' len xna'abo'ona' na' le'e žjəya'ac Izraelān'. Bagwsa'at beṇə' ca' besyə'əyilj bida'ona' par so'ote'ebo'.

²¹ Nach gwyas Jwsen' beče'e bida'ona' len xna'abo'ona' jəya'aque' lažga'aque' Izraelān'.

²² Pero Jwsen' catə' benene' de que Arquelaon' bedie' belane' xlatjə de'e xē' Erodān', bžebe' žjəya'aque' gan' mbane Jodean'. Na' Diozān' gwduxjue'ine' le' lao bišgalān' de que bito žjəya'aque' Jodean' sino que žjəya'aque' gan' mbane Galilean'.

²³ De'e na'anə' besyə'əžine' syoda Nasaretən' na' jəsyə'ənite'e. Na' de'en jəsyə'ənite'e Nasaretən' goc complir de'en bosə'ozoj de'e profet ca' cana' gosə'əne' che Jeso'osən' de que beṇə' yesə'əsi'ene' beṇə' Nasaret.

3

Juan ben' bchoa beṇə' nis gwdixju'e dižə' güen dižə' cobə che Diozən'

¹ Na' gwde zan iz, Juan ben' bchoa beṇə' nis gwyeje' latjə dašən' gan' mbane Jodean'.

² Na' gwdixju'e'ine' beṇə' gože' lega'aque': —Le'e yedinje xtolə'əle ca', chedə' babžin ža catə' Diozən' ben' zo yoban' nabi'e con notə'ətezə beṇə' əso'e latjə.

³ De'e profet Isaiazən' ben' be' xtižə' Diozən' cana' bzoje' che Juanṇə', gwne':

To beṇə' əne' zižjo latjə dašən', əne':

“Le'e so probnid par əgwzenagle che Xancho' catə'an yide'.

Na' šə sole probnid par əgwzenagle che' catə'an yide', de'en gonle ca' gwxaquə'əleben can' chonle chxi' chloale nez ca' catə' chidə to beṇə' blaö.”

⁴ Na' Juanṇə' gwyaze' lachə' de'en gwso'one' len yišə' xa cameyən'. Na' par dobey che' bchine' to pedas yid. Na' gwdaogüe' bišə'əzo, na' leczə gwdaogüe' š'in bia ser, bia nita' yižə'.

⁵ Beṇə' Jerosalenṇə', na' beṇə' ca' ža' yoguə' yež ca' gan' mbane Jodean', na' leczə beṇə' ža' yež ca' nyechj mbi'i yao Jordannə' gwsa'aque' ja'aque' gan' zo Juanṇə' par bosə'ozenague' xtiže'enə'.

⁶ Na' bosə'əxoadole'e lao Diozən', na' Juanṇə' bchoe' lega'aque' nis lo'o yao Jordannə'.

⁷ Na' leczə ja'ac zan beṇə' Izrael beṇə' ca' zjənchoj zjənzi' fariseo, na' beṇə' ca' zjənzi' sadoseo. Ja'aque' par bchoa Juanṇə' lega'aque' nis. Nach Juanṇə' gože' lega'aque': —Le'e nacle beṇə' goxoayag na' naljele. ¿Echaquele de que guaquə yexonjele castigon' de'en əselə' Diozən' par le'e?

⁸ Cheyalə' gonle de'en naquə güen par niç əsa'acbe'i beṇə' yoblə de que baboša' yichjla' ažda'olen'.

⁹ Na' bito gonle xbab de que Diozən' bito gone' le'e castigw che xtolə'əlen' laogüe de'en nacle xi'in dia che de'e Abraannə'. Bito nacho de que lechgualə chyažje Diozən' le'e. Guaquə gone' par niç yej quinga yesyə'əyaquan xi'in dia che de'e Abraannə'.

¹⁰ Ca naquə le'e šə cui chonle can' chazlažə' Diozən', gwxaquə'əlebele ca to yag frot de'e cui bi frot chbian. Na' ca naquə yoguə'əte yag frot de'e cui bi frot chon, chəsə'əchog beṇə' len na' chəsə'əzeye'en.

¹¹ Na' ca naquə le'e chedinjele xtolə'əle ca', nada' de'e li chcho'a le'e nis. Na' ze'e yidə ben' gon par niç so Spirit che Diozən' lo'o yichjla'ažda'ochon' na' nabi'an chio'o. Na' Spiritən' naquən ca yi' na' gwxi' gwloan yichjla'ažda'ochon' len bitə'ətezə de'e mal. Ben' yidə zaquə'əche' ca nada' na' bito zaca'a par gaca' xmoše'.

¹² Be'enan' gone' len chio'o can' choncho catə' chdecho trigon' rner, na' chzeycho yix bebən'. Na' šə chonlilažə'əcho Diozən', yotobe' chio'o par niç socho txen len le', na' beṇə' ca' cui chso'onlilažə' le', əsele'e lega'aque' lao yi' gabilən' de'en cuiczə cheyol.

Catə' gwchoa Jeso'osən' nis

¹³ Na' gwza' Jeso'osən' gan' mbane Galilean' na' gwyeje' gan' zo Juanṇə' cho'a yao Jordannə' par niç Juanṇə' bchoe' le' nis.

¹⁴ Na' Juanṇə' benczə yichjlaogüe' caguə gone'ene' gwchoe' Jeso'osən' nis. Gože'ene': —Chyažjləda' əgwcho' nada' nisən' na' nadə'əlan' zedenabdo' gwchoa' le' nisən'.

¹⁵ Nach Jeso'osən' gože' Juanṇə': —Gone'e bchoa nada' nisən'. Cheyalə' goncho ca' par niç gaquə complir yoguə'əlo' de'en non Diozən' mendad gaquə.

Nach gwcheb Juanṇə' bcho'ene' nisən'.

¹⁶ Na' catə' beyož gwchoa Jeso'osən' nisən', le'e bechojte' lo'o nisən', na' le'e byaljwte le'e yobanə' na' ble'i Jeso'osən' gan' zo Diozən'. Ble'ine' Spirit che Diozən' betjən ca to ngolbexə na' bžinən gwzon len le'.

¹⁷ Na' gwse'enene' gwna Diozən' ben' zo yoban': —Bengan' Xi'ina', ben' chacda' chei, lechgualə cheba chezaquə'əlažə'a le'.

4

Gwlo'oyelə' gwxiye'enə' Jeso'osən' gone' de'e mal

¹ Na' Spirit che Diozən' bebən par niç gwyej Jeso'osən' latjə dašən', par niç gwlo'oyelə' gwxiye'enə' le' gone' de'e malən'.

² Na' bitobi gwdao Jeso'osən' lao choa ža choa yel, na' catə' gwde de'e choa žanə' gwdone'.

³ Na' gwxiye'enə' bgüiguə'an gan' zo Jeso'osən', gožə'an le': —Šə len' naco' Xi'in Diozən', gož yej quinga yesyə'əyaquan yetxtil.

⁴ Nach gož Jeso'osən' len: —Nyojczə Xtizə' Diozən' nan: “Caguə yelə' guao na'azən' əbane chio'o be'nach sino leczə chyažjecho yoguə'əlöl dižə' de'en na Diozən' par əbancho.”

⁵ Na' gwche' gwxiye'enə' le' yichjo' yo'odao' əblao che chio'o be'nə' Izrael de'en zo Jerosalennə' na' gwlequan le' gan' le'ezelaogüe naquə siba.

⁶ Na' gožan le': —Šə len' naco' Xi'in Diozən' bexita' nga par che'elə, la' nyojczən le'e Xtizə' Diozən' nan:

Esələ' Diozən' angl che' ca' par əsa'aclene' le', na' əso'oxe'e le' par nič bito əchego'o no yej.

⁷ Na' gož Jeso'osən' gwxiye'enə': —Leczə can' nyojan le'e Xtizə' Diozən', nan: “Bito con goncho Xancho Diozən' prueb šə leine' can' ne'enə'.”

⁸ Na' gwxiye'enə' gozche'en le' to lao ya'a de'e naquə lechguale siba, na' blo'in le' yoguə' nasyon de'en zjəchi' lao yežlyon' ca naquə dechgua yelə' chnabia' chega'aquənnə'.

⁹ Nach gožan le': —Yoguə' de'e quinga chle'ido' nga gona'an le' šə gwzo xibo' laogua' nga par güe'elaogo'o nada'.

¹⁰ Nach gož Jeso'osən' len: —Gwchi'izə' ca'alə nga Satanas. Nyojczən le'e Xtizə' Diozən' nan: “Cheyalə' šejni'alazə'əcho tozə Xancho Diozən' na' tozə le' güe'ela'ochə.”

¹¹ Na' bebi'izə' gwxiye'enə len le', nach besə'əžin balə angl ca' jse'eclene'ene'.

Jeso'osən' gwzolaogüe' chyixjui'e dižə' güen dižə' cobə che Diozən'

¹² Na' Jeso'osən' gwze'e Jodean' par gwyje' Galilean' catə' benene' de que bade Juannə' ližyan'.

¹³ Na' gwze'e Nasaretən' jsoe' syoda Capernaum de'en chi' cho'a nisda'onə' do gan' chi' distrit de'en nzi' Sabolon na' Neftali.

¹⁴ Na' de'en jəyezoe' syodan' goc complir can' bzoj de'e profet Isaiazən', ben' be'e Xtizə' Diozən' cana' gan' nan:

¹⁵ Le'e gwzenag, le'e be'nə' Galilea, le'e cui nacle be'nə' Izrael, na' nitə'əle distrit Sabolon na' Neftali de'en mbane yešla'alə nisda'onə' na' yao Jordannə'.

¹⁶ Nchol yichjla'ažda'olen' pero Diozən' əsele'e to be'nə' cue'e be'eni' xen lo'o yichjla'ažda'olen'. Nacle ca be'nə' guat len yichjla'ažda'olen' por ni che de'e malən' chonle, pero be'ena' əselə' Diozən' yocobe' yichjla'ažda'olen'.

¹⁷ Na' dezd tyemp na', Jeso'osən' gwzolao gwdixjui'e gwne': —Le'e yedinje xtolə'alen', cheda' babžin za' nabia' Dioz ben' zo yoban' con notə'ətezə be'nə' əso'e latja.

Jeso'osən' gwleje' tap be'nə' gwxen bel par gwsa'aque' disipl che'

¹⁸ Na' goquən' lao zda Jeso'osən' cho'a Nisdao' Galilean' ble'ine' chopə be'nə' gwxen bel, choso'ozale'e yixjw bel chega'aque'ena' lo'o nisən'. Zjənaquə chopə biše'e. Toe' le' Simon Bed, na' yetoe' Ndres.

¹⁹ Nach gože' lega'aque': —Le'e da len nada'. Le'e nacle be'nə' gwxen bel, na' na'a əgwzejni'ida' le'e par nič gonle ca so'ombia' be'nə' nada'.

²⁰ Na' le'e gosə'əbejyichjtega'aque' yixjw bel chega'aque' ca' nach ja'aclene' Jeso'osən'.

²¹ Nach gwsa'aque' yelatə' na' jəsyə'ədi'e Jacob len Juan chopə biše'e, len xaga'aque' Sebedeo. Že'e to lo'o barcw chesyə'əyone' yixjw bel chega'aque'ena'. Na' leczə gw'nabe Jeso'osən' Jacoban' len Juannə' par žja'aclene' le'.

²² Na' le'e bosyo'ocua'anlentie' xaga'aque' Sebedeon' barcon' na' ja'aclene' Jeso'osən'.

Jeso'osən' bsd blo'ine' be'nə' zan

²³ Na' gozac catə' Jeso'osən' gwyje' yoguə' yež ca' zjəchi' gan' mbane Galilean', gwzolaogüe' bsd blo'ine' be'nə' ca' zjəža' lo'o yo'odao' ca' gan' gwso'elao' be'nə' Izrael ca' Diozən'. Na' gwdixjui'e dižə' güen dižə' cobən' de que Diozən' nabi'e con notə'ətezə be'nə' əso'e latja. Na' Jeso'osən' beyone' yoguə' be'nə' ca' chse'i gwde gwde yizgüe'.

²⁴ Na' gosə' gwlałja yoguə' de'en ben Jeso'osən' doxenlə nasyon Siria. Nach be'nə' Siria ca' jso'e yoguə' be'nə' ca' chsa'acšene laogüe'ena', be'nə' ca' chse'i zan clas yizgüe' na' be'nə' ca' chse'ey chesə'əla, na' len be'nə' ca' zjəyo'o zjəyaz de'e xio' yichjla'ažda'oga'aque', na' len be'nə' ca' chsa'az šon, na' be'nə' ca' zjənat to part cuerp chega'aque'ena'. Na' beyone' yoguə'atega'aque'.

²⁵ Na' zan be'nə' za'ac distrit che Galilea, na' be'nə' za'ac yež ca' gan' nzi' Decapolis, na' be'nə' za'ac syoda Jerosalennə', na' be'nə' za'ac yež ca' yela' distrit che Jodea, nach be'nə' za'ac yešla'a yao Jordannə' jəsə'ənaogüe' le'.

5

Dižə' de'en bsd blo'i Jeso'osən' to lao ya'a blo'ine' non' zjəzo mbalaz

¹ Na' Jeso'osən' catə' ble'ine' be'nə' zan zjənžag, gwlo'e gwchi'e to lao ya'a. Na' gosə'əbiguə' disipl che' ca' gan' chi'ena'.

² Nach gwzolao bsd blo'ine' lega'aque', gwne':

³ —Le'e chache'ile de que chyažjele gaquālen Diozān' le'e, zole mbalaz chedā' bacho'ele latjā chnabia' Diozān' le'e.

⁴ Na' le'e zole trist lo'o yichjla'ažda'olen' por ni che xtolā'āle ca', mbalaz sole chedā' Diozān' yeyonxenlāže'e le'e.

⁵ Na' le'e laogüe de'en chzexjw yichjle len Diozān' na' len beñachān', mbalaz sole chedā' Diozān' gone' par niçh gaquā güen chele can' baben Diozān' lyebe.

⁶ Na' le'e chzelažā'achgualē gacle beñā' güen lao Diozān', zole mbalaz chedā' Diozān' bachaclene' le'e par niçh gacle beñā' güen laogüe'ena'.

⁷ Na' le'e cheyašā'ālažā'āle beñā' yoblā, mbalaz zole chedā' leczā ca' Diozān' cheyašā' cheži'ilaže'e le'e.

⁸ Na' le'e banacle beñā' la'aždao' xi'ilažā', zole mbalaz chedā' žjāyezole txen len Diozān'.

⁹ Na' le'e chogo'ole yelā' chxenlāžā' che beñā' ljuežje ca' chesā'ādilā, mbalaz zole chedā' la' Diozān' bagwcue'e le'e ca xi'ine'.

¹⁰ Na' le'e choso'ochi' choso'osaquā' beñā' le'e laogüe de'e chontezle de'en naquā güen lao Diozān', zole mbalaz chedā' cho'ele latjā chnabia' Diozān' le'e.

¹¹ Na' catā' chesā'āzi'ichižā' beñā' le'e na' chesā'asaquā'āzi'e le'e na' chso'e yoguā' claste dižā' güenlāžā' contr le'e por ni che de'en chonlilažā'āle nada', bia'aczā sole mbalaz.

¹² Cheyalā' yeba yezaquā'ālažā'achgualē la'anā'āczā za'ac de'e ca' contr le'e chedā' Diozān' gone' par niçh gaquāchgua de'e güen chele catā' yežinle gan' zo'e'ena'. Can' chso'one beñā' ca' le'e leczā can' gwso'one de'e xaxta'ocho ca' de'e profet ca' beñā' ca' gwso'e xtižā' Diozān' cana'.

Naccho ca zedā' na' ca be'eni' par len beñā' žā' yežlyo nga

¹³ Ca zedā' chaclenān par niçh caguā cuiyai' no yid belā, le'egatezā ca' le'e chaclenle par niçh beñachān' cui chso'ontegue' de'e mal. Na' šā zedā'an bitoch bi zxi' naquan, nezecho bito bi gac goncho par niçh yeyaquān zxi' de'e yoblā. Na' bitoch bi zaquā'an lete goschon fuerlā na' āgwlej āgwšošj beñā' len. Can' gaquā len le'e šā cuich gonle can' chene'e Diozān'.

¹⁴ Ca be'eni' chaclenān beñā' par chāsā'āneze' gan' cheyalā' žjā'aque', ca'aczān' chaclenle beñā' par chāsā'āneze' nac chene'e Diozān' so'one'. Na' can' notā'ātežā beñā' chac chle'ine' to syoda xen de'en chi' to lao ya'a, ca'aczān' notā'ātežā beñā' chac chle'ine' de'e güenñā' chonle.

¹⁵ Catā' chgualā'āle to yi' bito chdosā'ālen žomā sino chda'alēn le'e ze'e par chse'eni'in len yoguā' beñā' žā' lo'o yo'onā'.

¹⁶ Na' ca naquā le'e žā, cheyalā' sotežā sole gonle de'e güenñā' par niçh yesā'āle'i beñā' len na' āso'elaogüe'e xacho Diozān' ben' zo yoban'.

Jeso'osān' bsd blo'ine' can' na lei de'en bzoj de'e Moizezān'

¹⁷ Bitō gonle xbab de que nada' za'a zedeyena' par niçh lei de'en bzoj de'e Moizezān' na' de'en boso'ozoj de'e profet ca' cana' cuich so'onān žin. Za'a par niçh gaquā complir yoguā'ālo de'en bsi' Diozān' xneze gaquā ca de'en boso'ozoj beñā' ca'.

¹⁸ De'e li chnia' le'e, xte ca te che yežlyo nga len de'e ca' chle'icho le'e yoban', ni to letr dao' ni to asento de'en nyoj le'e lein' cui ten ca'azā xte que gaquā yoguā'ālo de'en chene'e Diozān' gaquā.

¹⁹ De'e na'anā' yoguā' de'e ca' zjānyoj de'en chene'e Diozān' gonle, la'anā'āczā šā lebeyožā to de'e dao', legonān. Notā'ātežle šā āchoele cui gonle can' none' mendadān', na' šā leczā āgwlo'ile beñā' yoblā cui so'one' can' none' mendadān', Diozān' bito gone' le'e yelā' bala'an catā' yežinle yoban' gan' chnabi'ena'. Na' notā'ātežle šā gonle can' none' mendadān' na' šā leczā gwlo'ile beñā' yoblā so'one' can' none' mendadān', Diozān' gone' le'e yelā' bala'an catā' yežinle yoban' gan' chnabi'ena'.

²⁰ Echnia' le'e, beñā' fariseo ca' na' beñā' ca' choso'osed choso'olo'i lein' bito zjānaquā yichjla'ažda'oga'aque'ena' güen lao Diozān'. Na' šā yichjla'ažda'olen' bito gaquāchān güen lao Diozān' cle ca chēga'aque'ena', bito yežinle yoban' gan' zo Diozān' chnabi'e.

Choncho de'e mal šā chžā'a ljuežjcho

²¹ Na' leczā bsd blo'i Jeso'osān' lega'aque' gwne': —Banezele can' gož de'e Moizezān' de'e xaxta'ocho ca': "Cui no gotle. Na' šā no got ljuežj beñache', jostis ca' choglaogüe'en che' de que cheyalā' gate'."

²² Na' nada' chnia' le'e notā'ātežle šā chžā'a ljuežj beñachle zaquā'āczān par gatle ca to castigw chele žalā' ca', na' notā'ātežle šā chžā'a chniti'āle ljuežje zaquā'āczān par so'on beñā' golā blao ca' chāsā'anabia' nasyon Izraelān' castigw chelen'. Na' notā'ātežle šā cholgüiž ljuežje dižā' pesad, zaquā'āczān par yoselā' Diozān' le'e lao yi' gabil.

²³ Cheyalə socho binlo len ljuežj benəchcho. Na' la'ənə'əczə catə' bazole lo'o yo'odao' par əgwnežjwle bi de'en əgwnežjwle güe'ela'ole Diozən', šə žjsa'aləžə'əle de que babenle contr to benə' ljuežjlen',

²⁴ na'azə cheyalə' yocua'anle šlož de'en noxə'alen'. Zgua'atec žjəyeye'exenle benə' ljuežjlen', nach guaquə žjəyenežjwle de'en bagwlejlə par güe'ela'ole Diozən'.

²⁵ Catə' to benə' gonle xya che' na' əche'e le'e lao jostisən'. Šə bito gonle ca' ža, catə' əžinle lao jostisən' gone' le'e lao na' polsian' par yosə'əže'e le'e ližya.

²⁶ Echnia' le'e, bito yebeje' le'e xte catə' čhixjwle doxen de'en čhalə'alen'.

De'e malən' choncho šə chgo'o xtocho

²⁷ Baņezele can' gwna de'e Moizezən': "Bito co'o xtole na' bito cuejyichjle be'en čhele o no'ol čhele par solenle benə' yoblə."

²⁸ Na' nada' čhnia' le'e de que notə'ətezle šə chgüiale to no'olə na' chzelažə'əle solenlene', banaple dolə' čhedə' tozəczə ca malən' bachonle lo'o la'ažda'olen' len de'en chon benə' chgo'o xtoe'.

²⁹ Na' de'e na'anə' əchnia' le'e, šə de'en chle'ile len jəlaole chonən par nič əxople gonle de'e malən', nca'alə xņeze žalə' cui žia jəlaolen'. Len nca'alə xņeze cuejlen cle ca cuiayi'ile lao yi' gabilən' por ni che len.

³⁰ Na' šə de'en chonlenle na'ale ca' chonən par nič əxople gonle de'e malən', nca'alə xņeze žalə' cui žia na'ale na'anə'. Len nca'alə xņeze čhogga'aclen cle ca cuiayi'ile lao yi' gabilən' por ni che lega'aquən.

Benə' csad ca' bito cheyalə' yesyə'ala'a ljuežjga'aque'

³¹ Leczə ņezele can' gwna de'e Moizezən': "Notə'ətezə benə' ye'e no'ol čhe'enə', cheyalə' čhas to act ga güe'en dižə' de que besyə'ale'ena'."

³² Na' nada' əchnia' le'e de que notə'ətezle yela'ale no'ol čhelen', šə bito naque' to no'olə go'o xtoi, gonle par nič gaque' ca to no'olə go'o xtoi. Na' notə'ətezle yosagna'ale len to no'olə benə' belə'a ben' čhei le', leczə tozəczə ca malən' chonle len benə' ca' chesə'əgo'o xtoi.

Jeso'osan' bzejni'ine' che jorament ca'

³³ Na' leczə baņezele can' gož de'e Moizezən' de'e xaxta'ocho ca': "Bito əgwzole jorament lao Xancho Diozən' catə' ənale to de'en gonle šə cui gonle complir can' nalənə'. Catə'an chzole jorament lao Xancho Diozən', cheyalə' gonle can' chonle lyeben' laogüe'ena'."

³⁴ Pero na' nada' čhnia' le'e, cuat əgwzole joramentən' por bitə'ətezə, nic por yoba čhedə' na'anə' zo Diozən' čhna'bi'e.

³⁵ Na' nic əgwzole joramentən' por yežlyon' čhedə' den xni'a Diozən'. Na' nic əgwzole joramentən' por syoda Jerosalenna' čhedə' naquən syoda che Diozən' ben' naquə'le'eze'laogüe Rei bla.

³⁶ Na' nic gon yichjlen' testigw de que cho'ele dižə' li, čhedə' bito gaquə gonle par nič yiš' yichjlen' yeyaquən šyiš o yeyaquən gasj.

³⁷ Cheyalə' güe'ele por dižə' li nič cui əyazjən əgwzole jorament par se'ejle'e benə' čhele. Šə čhyažjən bichlə dižə' de'e ənale par se'ejle'e čhele, nachia' gwxiye' nan' čhna'bia'an yichjla'ažda'olen'.

Bito co'oləžə'əcho benə' contr čhecho

³⁸ Šə to benə' gone' zi' jəlaolenə' ņezele de que lei de'en bzoj de'e Moizezən' nan de que guaquə gonle zi' jəlaogüe'ena'. Na' šə to benə' əxope' to leyle leczə ņezele de que lein' nan guaquə əxople to čhe'ena'.

³⁹ Pero na' nada' əchnia' le'e, bito əgwzole gon benə' de'e mal len le'e. Šə to benə' cape'e šla'a xaguə'alen', le'e güe' latjə cape'e de'en yešla'a.

⁴⁰ Šə to benə' chene'ene' aqwe'e xcamislen' laogüe de'en čhalə'əle latə' xmeche', güe'etele latjə aqwe'e len xadon čhelen'.

⁴¹ Na' šə to benə' blaogone' byen šejlenlene' gua'ale yoa' čhe'ena' to kilometro, le'e šejlene' gua'alen yeto kilometro.

⁴² Na' šə bi de'en čhna'be benə' le'e, le'e güe'en. Na' le'e cueje šə bi de'e čhna'be' cuejlene'.

Cheyalə' gaquecho che benə' contr čhecho

⁴³ Na' leczə baņezele can' čhasə'əne': "Cheyalə' gaquele che benə' migw čhele na' gue'ile benə' contr čhele."

⁴⁴ Pero nada' əchnia' le'e, le'e gaque che benə' contr čhelen', le'e ņabe Diozən' gaquə de'e güen che benə' ca' choso'ožia choso'onitə' le'e. Na' le'e gon de'e güen len benə' ca' čhasə'əgue'i le'e, na' le'e gon orasyon lao Diozən' par benə' ca' čhsa'adə' le'e dižə', na' par benə' čhasə'əsaquə'əzi' le'e.

⁴⁵ Ša gonle ca' na'achən' əsa'acbe'i beṇə' de que nacle xi'in Xacho Diozən' ben' zo yoban'. Le'enə' chone' ca chla' bgüižən' par yoguə'əlol beṇə' la'anə'əczə šə chso'one' de'e güen o šə chso'one' de'e mal. Na' leczə chone' par nič hac yejw par yoguə'əlol beṇə' ža' yežlyon' la'anə'əczə šə zjənaque' beṇə' güen o šə zjənaque' beṇə' mal.

⁴⁶ Šə porzə chaquele che beṇə' ca' chsa'aque chele žbixa zedegua'atguan par le'enə'? Le'egatezə can' chso'on beṇə' gočixjw ca', beṇə' ca' nale zjənaque' beṇə' malchgua.

⁴⁷ Na' šə can chguaple diox beṇə' ljuežjle ca'azə žəchonle xbabən' de que chonchle güen cle ca beṇə' yoblə? Bito chonchle güen. Can' chso'on beṇə' ca' cui zjənombia' Diozən', con beṇə' ljuežjga'aque' na'azə chesə'əguape' diox.

⁴⁸ Cheyalə' gacle beṇə' šao' ca beṇə' šao' beṇə' güennə' naquə Xacho Diozən' ben' zo yoban'.

6

Jeso'osən' blo'ine' naquən' cheyalə' goncho caridan'

¹ Le'e gon de'en naquə de'e güen pero caguə parzə nič yesə'əle'i beṇə' can' chonlen' na' so'elaogüe'e le'e, čhedə' šə chonle ca' bito güe'elao' Xacho Diozən' ben' zo yoban' le'e.

² De'e na'anə' šə bi de'en chene'ele əgwnežjwle to beṇə' par gaquəlenlene', le'e əgwnežjon pero caguə parzə nič yesə'əneze beṇə' can' chonlen' na' əso'elaogüe'e le'e. Beṇə' goxoayag ca' chəsə'ənežjue' bi de'en chəsə'ənežjue' beṇə' do lo'o yo'oda'onə' na' do lao lcue' parzə nič əso'elao' beṇə' lega'aque'. De'e li chnia' le'e, bagwyejlaozczəga'aque'enə' pero Diozən' bito güe'elaogüe'e lega'aque'.

³ Pero na' le'e ža, šə bi de'en əgwnežjwle to beṇə' par gaquəlenlene', bito co'ole be' lban ca de'en chonle.

⁴ Gonlen ca cui əsa'acbe'i beṇə' na' cui so'elaogüe'e le'e. Xacho Diozən' ben' chle'i yoguə' de'en choncho güe'elaogüe'e le'e.

Bsed blo'i Jeso'osən' nac cheyalə' goncho orasyon

⁵ Catə' gonle orasyon bito gonlen can' chso'on beṇə' goxoayag ca'. Lega'aque' chəsyə'əbeine' chəsə'əzeche' chso'one' orasyon lo'o yo'odao' čhega'aque' ca' gan' chso'elaogüe'e Diozən' na' do squin lquey, chso'one' orasyonnə' par chəsə'əle'i beṇə' can' chso'one'enə'. De'e li chnia' le'e, bagwyejlaozczəga'aque'enə' na' Diozən' bito güe'elaogüe'e lega'aque'.

⁶ Na' catə' gonle orasyon le'e yeyo'o lo'o yo'o čele na' əgwseyjwle puertan', na' gonle orasyonnə' lao Xacho Diozən' ben' cui chle'icho. Na' Xacho Diozən' ben' chle'i yoguə' de'e choncho le' güe'elaogüe'e le'e.

⁷⁻⁸ Ca naquə beṇə' ca' cui zjənombia' Diozən', catə' chso'one' orasyon chso'echgüe' dižə'. Chso'one' xbab laogüe' de'en chso'echgüe' dižə' Diozən' əgwzenague' čhega'aque'. Bito gonle can' chso'one'enə'. Ca naquə Xacho Diozən', bañezzene' bi de'en chyažjele ze'e ŋablelenen.

⁹ Quingan' gonle orasyonnə':

Xato' beṇə' zo yoba, čnabto' yoguə'əlol beṇə'ən' əso'elaogüe'e le'e.

¹⁰ Čnabto' gono' par nič beṇə' zan əso'e latjə ŋabi'o lega'aque'.

Gaquəšga can' che'endo'onə' lao yežlyo nga, can' hac yoban'.

¹¹ Beṇšga ŋa'a de'e gaoto' tza tza.

¹² Na' bezi'ixenšga čheto' čhedə' leczə chezi'ixento' che sa'aljuežj beṇə'čto'onə' bitə'ətežə de'en chso'onene' neto'.

¹³ Na' bito go'o latjə gaquə de'e ŋabia' neto' len xbab čheto'onə' par gonto' de'e malən', mas bcuasə' bcue'ej neto' len gwxiye'enə'.

Le'enə' čnabi'o na' napo' yelə' guac

na' napo' yelə' bala'an par zejlicane. Amen.

¹⁴ Na' šə chezi'ixenle xtolə' sa'aljuežj beṇə'čhlen' bitə'ətežə de'en chso'onene' le'e, leczə gozi'ixen Xacho Diozən' ben' zo yoban' xtolə'əlen'.

¹⁵ Pero na' šə le'e bito chezi'ixenle che sa'aljuežj beṇə'čhlen', leczə ca' Xacho Diozən' bito yezi'ixene' čhlen'.

Jeso'osən' bzejni'ine' naquən' cheyalə' goncho catə' socho sin cui ye'ej gaocho par güe'ela'ochio Diozən'

¹⁶ Na' catə'an chzole sin cui che'ej chaole par nič cho'ela'ole Diozən' bito gon cho'alaolen' ca cho'alaol beṇə' čegüinchgüei can' chso'on beṇə' goxoayag ca'. Lega'aque' chso'onližəga'aque' ca beṇə' čhegüine'e parzə nič chsa'acbe'i beṇə'ən' de que nite'e cui zjəne'ej zjənaoga'aque'. De'e li əchnia' le'e bagwyejlaozczəga'aque'enə' na' Diozən' bito güe'elaogüe'e lega'aque'.

¹⁷ Pero na' le'e catə' zole sin cui ne'ej naole par cho'ela'ole Diozən', le'e əgwpa'a yičhje na' xala'anle.

¹⁸ Legon ca' par ničh cui əsa'acbe'i beⁿaçhən' de que zole sin cui ne'ej naole. Tozə Xacho Diozən' ben' cui chle'icho nezene' can' chonle. Na' Xacho Diozən' ben' chle'i yoguə' de'e choncho güe'elaogüe'e le'e.

Quingan' cheyalə' goncho par ničh gatə' checho de'en cui te chei gan' chnabia' Diozən'

¹⁹ Bito gwtooble de'e zan de'e zaque'e na' de'e xoche lao zole yežlyo nga, la' yesə'əbiayi'in. Bałən chsa'aljən bia dao' na' chsa'ob lega'aquən, na' yebałən chzen no xçhe'i, na' leczə' chaš beⁿə' bguan na' so'e yesə'əque'e bi de'en deilen'.

²⁰ Le'e gon par ničh gon Diozən' de'e šao' de'e güençhlə çhele de'e cui te chei catə' yežinle yoban' gan' zoe'enə', çhedə' na' bito galjə bia dao' par əsa'ob len, na' nic sen xçhe'i par cuiayi'in, na' nic gaquə' šo'o beⁿə' bguan par əque'en.

²¹ Gan' de de'en chaquele çhei nan' zo yichjla'ažda'olen'.

Žia jelaochon' par chle'icho

²² Žia jelaochon' par chle'icho. Con šə bito bi chaquən chle'iczecho binle.

²³ Pero šə nçhol jelaochon' bito chle'icho. Ca'aczən' naquan len yichjla'ažda'olen' šə nacle beⁿə' la'aždao' güen yo'o be'eni' çhe Diozən' yichjla'ažda'olen', pero šə nacle beⁿə' mal nçhol yichjla'ažda'olen'. De'e li leçhualə nçhol yichjla'aždao' le'e cui chzenagle çhe Diozən'.

Bito gaquə gaquecho çhe Diozən' na' gacteicho çhe bien chechon' tš'i'izə

²⁴ Notono no gaquə so liž çhopə xan žin par gaque' xmosga'aque' tš'i'izə, çhedə' la' šə gone' ca' gue'ine' to xan žinⁿə' na' gaquene' che yetoe', o gone' žin che toe' do yichj do laže'e na' bito bi respet gape' par xane'en yeto par gone' xšine'enə'. Leczə can' le'e bito gaquə gonle xšin Diozən' do yichj do lažə'əle na' gonte xšinle par gacle beⁿə' gwni'a.

Diozən' chgüia chye' chio'o naccho xi'ine'

²⁵ De'e na'ana' chnia' le'e, bito cuec yichjle tlaozə de'en ye'ej de'en gaole lao mbanle. Na' leczə ca' cuerp çhelen' bito cuec yichjle tlaozə de'en guacwlen'. Zaquə'əch yelə' mban çhelen' ca yelə' guanon'. Le'egatezə ca' cuerp çhelen' zaquə'əchan ca xala'anlen'.

²⁶ Legontoš xbab çhele, ca naquə bia ca' zjəžia xile'e bito chsa'azəb na' bito çhəsyə'əlapəb na' nic bi da'a xoa' çhega'aquəb zo, pero na' chguaoczə Xacho Diozən' ben' zo yoban' lega'aquəb. Naquəchxen' zaquə' le'e ca bia ca' zjəžia xile'enə'.

²⁷ Na' ni tole bito gaquə yoston cuinle gašjə metr šə con cue'e yichjle ətonle.

²⁸ Na' žbixçhen' çhbec yichjle çhe xala'anle? Legontoš xbab ca naquə yej sosennə' çhesə'əcha'oczən, len bitobi žin chso'onən, nic chsa'aljən do.

²⁹ Na' əchnia' le'e, Salomonⁿə' goque' lachə' xoche juisy, pero bito bžinlaže'e xala'ane'enə' ca yelə' xoche çhe yej sosen ca'.

³⁰ Diozən' none' xoche yixə' de'en ze yoba len to termzə zen nach choso'ozeye'en, naquəchxe gon Diozən' len le'e, güe'eczə yichje' gone' yoguə'əte de'en chyažjele, le'e cui chejle'eteclə de que gone' de'en chyažjele.

³¹ Le'e ža, bitoch cuec yichjle çhe bi de'en chyažjele ənalizle: "žBin' ye'ej gaocho na' bin' gacwcho?"

³² Con por de'e ca'azən' zjəchi' yichj beⁿə' ca' cui chso'onližə' Diozən', çhe de'en əse'ej əsa'ogüe' na' çhe xala'anga'aque'. Pero na' Xacho Diozən' ben' zo yoban', nezczene' yoguə' de'e ca' chyažjele.

³³ De'en güe'elažə'əle, güe'ele latjə par ničh Diozən' nabi'e le'e, na' güe'elažə'əle gonle de'en na Diozən' naquə güen. Na' yoguə' de'e ca' de'en chyažjelen' gonczə Diozən' len, de'en ye'ej de'en gaolen', na' xala'anle.

³⁴ Le'e gon xbab çhe de'en chac tza tza. Bito cuec yichjle çhe bi de'en gaquə gwxe güižj, la' guatə'əczə de'e zan de'e cuec yichjcho çhei catə' əžin žan'.

7

Bito zaquə'əcho par ənacho çhe beⁿə' de que zjənapə' dolə'

¹ Bito gonle xbab de que zaquə'əle par ənale çhe beⁿə' de que zjənapə' dolə'. Šə ənale çhega'aque' de que zjənapə' dolə' leczə ca' əna Diozən' çhele de que naple dolə'.

² Can' chosbague'ele beⁿə' de que zjənapə' dolə' le'egatezəczə can' yosbague'e Diozən' le'e de que naple dolə'. Con can' chonle len beⁿə', le'egatezə can' gon Diozən' len le'e.

³ Chle'ile güe' dao' de'en žia cožə' beⁿə' ljuežjle, na' cabi chele'ile güe' xen de'en žia cožə'əlen'.

⁴ Che' beⁿə' ljuežjle: "Be'e latjə gona' rmech güe' daon' de'en žia cožə'onə'", na' bito chonle rmech güe' xen de'en žia cožə'əlen'.

⁵ jBeⁿə' goxoayag le'e! Zgua'atec le'e gon rmech güe' xennə' de'en žia cožə'əlen' na' techlə əpezele naquan' gonle rmech güe' daon' de'en žia cožə' beⁿə' ljuežjlen'.

⁶ Pero na' bito güe'etezle xtižá' Diozán' len beñá' ca' chso'onczá yichjlaoga'aque' cui chse'enene' yoso'ozenague' chei, cheda' la' guacte so'onene' le'e znia can' chon beco' cata'an cho'exaxjchob de'en cui cho'olažá'ab. Na' šá güe'etezle xtižá' Diozán' len beñá' ca' chso'onczá yichjlaoga'aque' cui chse'enene' yoso'ozenague' chei, con yosá'alej yoso'ošošje' dižá' de'en güe'elenga'aclene'ena' can' chso'on coš ca' len de'en cui chse'ene'eb asa'ob.

Le'e nabe Diozán' bi de'en anabelene' la' gonczé'en

⁷ Bitá'atezá de'en chene'echo gaqua, de de'e goncho par niçh gaquan. Šá to de'e chene'echo so'on beñá' chio'o, chñabchon. Šá to de'e chene'echo ázelecho, chyiljchon. Šá puert de'en chene'echo asaljo beñá', chñecho cho'a puertán' par niçh chsaljue'. Na' ca'aczán' cheyalá' ye'echo Diozán' cata'an de de'en chene'echo gaqua.

⁸ Na' nota'atezcho šá bi de'e chñabechone' gone', la' de'e gonczé'ena'. Na' nota'atezcho šá bi de'en chñabechone' agwzejni'ine' chio'o, agwzejni'iczene'. Na' nota'atezcho šá chñabechone' gaqua to de'en chene'echo gaqua can' chon beñá' chne' cho'a puertán', la' de'e gaquaczán'.

⁹ Na' le'e nacle xa bidao', šá xi'inlen' anabebo' le'e yetxtil žagwnežjwlebo' to yej?

¹⁰ Na' šá anabebo' le'e to bej ya'a žagwnežjwlebo' to bej bia nxoba le'i? Cle bito gonje ca'.

¹¹ Le'e nacle beñá' mal pero nezele chnežjwle xi'inlen' de'e güen. Naquachxe güen gon Xacho Diozán' ben' zo yoban' len beñá' chñab laogüe'ena' bi de'en chyažjjene'.

¹² Na' can' naquan, con yoguá' de'e güen de'e chene'ele so'on beñachán' len le'e ca'atezaczán' cheyalá' gon le'e len lega'aque', cheda' can' na lei de'en bzoj de'e Moizezán' na' de'en bosó'ozoj de'e profet ca' beñá' ca' gwso'e xtižá' Diozán' cana'.

Nezán' de'en yežin yoban' gwxaqua'áleben ca to nez las

¹³ Lao yelá' mban chechon' chopé nez nan' de. To nez las, na' to nez laguá'. Cheyalá' goncho byen šo'ocho to nez šao' to nez güen la'ana'eczá naquan ca to nez las de'e cane áželan na' de'e chaquecho naquan zdebá par tachon. Na' nez malán' gwxaqua'áleben ca to nez yo nez laguá' cheda' chpein chio'o par niçh yežincho gabilán' gan' saqua'ázi'icho zejlicane. Pero beñá' zan bazjýo'e nez laguá'ana'.

¹⁴ Nezán' de'en yežin yoban' gan' abancho zejlicane len Diozán' gwxaqua'áleben ca to nez las de'e cane áželan na' de'e chaquecho naquan zdebá par tachon. De'e na'ana' balga beñá' chasyá'ázelene'en par chjásá'anaogüe'en.

Segon can' naqua' frot de'e chbia to to yaguán' nezecho bi clas yaguán'

¹⁵ Cheyalá' gapcho cuidad par niçh cui šejle'echo xtižá' beñá' ca' chso'onlaže'e chasá'áne' de que xtižá' Diozán' chasá'ayixjui'e. Xochechguan' chso'e dižá'ana' par choso'opeine' chio'o, chse'enene' goncho xbab de que zjánaque' beñá' güen. Pero lega'aque' zjánaque' beñá' la'aždao' mal na' chse'enene' yoso'ožiyai'e chio'o.

¹⁶ Segon can' naqua' frot de'e chbia to to yaguán' nezecho bi clas yaguán'. Ca'aczán' gache'iczecho de que beñá' ca' chasá'áxoayague', segon can' chso'one' na' bin' choso'osed choso'olo'ine' beñá'. Ca naqua' yag yešán' bito chbian obas, na' nic yag bcho'onán' chbian yixgüio.

¹⁷ Na' de'en naqua' yag güen, frot güenczá chbian na' de'e cui naqua' güen leczá bito chbian frot güen.

¹⁸ Yag frot güenna' bito chbian frot de'e cui naqua' güen, na' leczá to yag frot de'en cui naqua' güen bito chbian frot güen.

¹⁹ Na' yoguá' yag frot de'e cui chesá'ebian frot güen, yesá'achogue'en na' yesá'ázeye'en.

²⁰ Na' gache'icho non' chasá'áxoayag, segon can' chso'one' na' bin' choso'osed choso'olo'ine' beñá'.

Caguá yoguá' beñá' yesyá'ážine' yoban' gan' zo Diozán' chnabi'e

²¹ Beñá' zan chse'e nada: "Naco' Xana'", pero caguá yogue'e yesyá'ážine' yoban' gan' chnabiá' Diozán'. Beñá' ca' chso'on can' chazlažá' Xa' Diozán' ben' zo yoban', lega'acze'ena' yesyá'ážine' yoban' gan' zo'ena'.

²² Catá' ážin ža yoso'odie' cuent lao Diozán' beñá' zan ase'e nada: "Xana', goclen neto' na'a, la' beñá' zan gwdixjue'ito' xtižá'ona'. Na' leczá be'eto' la'ona' par bebejto' de'e xio' ca' zjýo'o zjýaz yichjla'áždao' beñá'. Na' leczá be'eto' la'ona' par bento' de'e zan miłagr."

²³ Pero na' clar yapá'ega'aca'ane': "Bito nombi'a le'e. Ležjýa'ac ca'alá le'e beñá' güen de'e mal."

Chopá beñá' na' yo'o de'en gwso'on to toe'

²⁴ Beñá' chzenag xtižá'ana' na' chone' can' nanná', gwxaqua'álebene' ca to beñá' sin' beñá' ben liže' na' gwleque' lanen' len yej gual.

²⁵ Na' goc yejw zil juisy na' bchojchgua yaona' na' gwyechjén liže'ena'. Na' lei bdbobán be' bdon'. Pero bito gosá'əzoin par yoso'ochixán len, cheda' gwleque' lanen' de'e gual.

²⁶ Na' beṇə' chzenag xtiža'ana' pero bito chone' can' nannə', gwxaquə'əlebene' ca to beṇə' fals beṇə' ben liže'ena' fals bzo'e'en lao yox.

²⁷ Na' goc yejw zil juisy, gwyečjy be' bdon' na' bchojchgua yao na' beyožan gan' zo liže'ena'. Nach bebixan gwziayi'in. Na' cata' gwže'ena' xte gwñin.

²⁸ Na' cata' beyož be' Jeso'osan' dižə' ca', beṇə' zan ca' gwse'ene xtiže'ena' besyə'əbanchgüeine' can' bsed blo'ine'.

²⁹ Na' can' bzejni'ine' lega'aque' nachbia' de que napəche' yełə' chnabia' cle ca beṇə' ca' choso'osed choso'olo'i lei de'en bzoj de'e Moizezan'.

8

Jeso'osan' beyone' to beṇə' che'iyižgüe' de'en ne' lepr

¹ Beṇə' zan zesya'anaogüe' Jeso'osan' cata' beyetje' ya'ana'.

² Nach to beṇə' che'iyižgüe' de'en ne' lepr bgüigue'e lao Jeso'osan' na' bzo xibe' laogüe'ena' gože'ene': —Xana' gonšguei' ben par ničh yeyacda'.

³ Nach Jeso'osan' bli ne'ena' gwdane'ene' gože'ene': —Guaquəczə, beyaque.

Na' le'e beyactei be'ena'.

⁴ Nach Jeso'osan' gože'ene': —Ni tozə cui no güe'eleno' dižə' ca naquə nga babena' len le'. Gwey lao bxožan' ničh le'ine' bačh beyacdo'. Na' bnežjue' bia yiχə' gote' lao Diožan' can' non de'e Moizezan' mendad par ničh yesə'əneze beṇə' de que babeyacdo'onə'.

Jeso'osan' beyone' xmos capitan beṇə' Roma

⁵ Na' cata' bežin Jeso'osan' Capernaunnə' le'e bšagte to capitan beṇə' Roma le'. Na' gotə'əyoine' Jeso'osan'

⁶ gože'ene': —Xana', xmosa'an die' liža'ana', chacšenchgüeine'. Nat cuerp che'ena' na' lechguale chžaglaogüe'.

⁷ Nach Jeso'osan' gože' capitannə': —Sa'alena' le' na' yeyona'ane'.

⁸ Pero na' capitannə' gože'ene': —Xana', bito zaca'a par sa'o liža'ana'. Ngatezə ben mendad yeyaque xmosa'ana' nach yeyaque'ne'.

⁹ Rein' chnabi'e nada' pero lecžə nitə' soldad chia' ca' na' chnabi'aga'aca'ane' na' choso'ozenague' chia'. Cata' chapa'a toe': “Gwey”, na' cheje', na' cata' chapa'a yetoe': “Da nga”, na' chide'. Nach cata' chapa'a xmosa'ana': “De'e nga gono’”, na' chone'en. Con benšga mendad na' nežda' gaquə can' na'onə'.

¹⁰ Na' Jeso'osan' bebanene' cata' benene' xtižə' capitannə', na' gože' beṇə' ca' nao le'ena': —De'e licžə əchnia' le'e, notono beṇə' ne'e žjəti'a beṇə' gonliža'stec nada' ca benga. Ni tozə beṇə' Izrael cui chonližažə nada' ca le'.

¹¹ Echnia' le'e, beṇə' zan ža' doxenlə yežlyon' so'onližaže'e nada, na' lega'aque' žjəsyə'ənite'e txen len de'e xaxta'ocho Abraannə' na' de'e xaxta'ocho Isaaquan', na' de'e xaxta'ocho Jacoban' yoban' gan' zo Diožan' chnabi'e.

¹² Na' ca naquə nasyon Izrael chechon' le'en gwlej Diožan' par nabi'e, əchoj beṇə' zan bito so'e latjə nabi'e lega'aque'. De'e na'ana' əsele'e lega'aque' lao yi' gabilan' gan' yesə'əbežyaše'e na' sa'oyejə leyga'aque'ena'.

¹³ Gwde gwna Jeso'osan' ca' nach gože' capitannə': —Guaquə yeyejo'. Babeyona' xmoso'onə', čhedə' chejli'o chia'.

Na' xmos capitannə' lao or na' le'e beyacteine'.

Jeso'osan' beyone' taobin' che Bedən'

¹⁴ Na' gwey Jeso'osan' liž Bedən' na' ble'ine' taobin' che Bedən' die' lao camən', na' yo'e de'e lan'.

¹⁵ Jeso'osan' bexe'e ne'ena' na' le'e bechojte' de'e lan'. Nach le'e gwyaste no'olan' bene' de'e gwsa'ogüe'.

Jeso'osan' beyone' beṇə' zan

¹⁶ Na' cata' gwχen, besə'əžin beṇə' gan' zo Jeso'osan' zjənche'e beṇə' zan zjəyo'o zjəyaz de'e xio' yichjla'ažda'oga'aque'ena'. Jeso'osan' con bene' mendad na' besyə'əchoj de'e xio' ca'. Na' beyone' yoguə' beṇə' ca' chsa'acšenena'.

¹⁷ Can' bene' par ničh goc complir can' bzoj de'e profet Isaiazan' che' cana, nan: “Le'ena' yeque'e de'en chžaglaochə' na' gone' ca yeyaquecho che yoguə' yižgüe'!”

Can' gož Jeso'osan' beṇə' ca' gwse'ene žja'aclen le'

¹⁸ Gwde na' ble'i Jeso'osan' babesə'əžin beṇə' zan zjənyechje' le', nach bene' mendad len disipl che' ca' yesə'əlague'e yešla'alə nisdə'onə'.

¹⁹ Na' bchoj to ben' chsed chlo'i lei de'en bzoj de'e Moizezan' nach bgüigue'e lao Jeso'osan' na' gože'ene': —Maestr, gwza'alena' le' gatə'ətežə šejo'.

²⁰ Na' par ničh be'ena' benyane'e xbab šə de'e liczə che'enene' šejlene' le', na' Jeso'osən' gože'ene': —Zjəde liž becoyo'o ca' na' lecza zjəde liž bia ca' zo xile'e bia chaš yoba, pero nada' bitobi xlatja' de gan' gona' dezcanz la'anə'əcza bsele' Diozən' nada' golja' beñačh.

²¹ Na' bchoj yeto ben' nao de'en chsed chlo'i Jeso'osən' na' gože'ene': —Xana', gwza'alena' le' pero zgua'atec be'ešga latja yega'anlena' xa'anə' xte catə'əch əžin ža gate' na' əgwcuasa'ane'.

²² Jeso'osən' gože'ene': —Da len nada'. Beña' ca' zjənaquə len yichjla'ažda'oga'aquen' ca beña' guat gwaquə yesə'əcuəše'e beña' guat ca'.

Jeso'osən' gwlecžie' to be' gual lao nisdəon'

²³ Gwde be' Jeso'osən' dižə' ca', gwyo'e lo'o barcon' len disipl che' ca'.

²⁴ Na' lao zda barcon' gwtaš Jeso'osən'. Na' gwzolaə gwyečhj to be' gual lao nisdə'ona', na' gwzolaə chož nisən' lo'o barcon'.

²⁵ Nach bosyo'osbane' Jeso'osən' gwse'ene': —jXanto! jBosla chio'o! jBačh chbiayi'icho!

²⁶ Nach Jeso'osən' gože' lega'aque': —Bito žeble. Le'e šejle'ech chia'.

Nach gwyaše' ne'e chas chatə' nisdə'ona' nach bene' mendad besyə'əbe'ežin nisdə'ona' len be'ena', na' le'e besyə'əbe'ežiten.

²⁷ Na' disipl che' ca' besyə'əbanene' can' bene'ena', nach gwse' ljuəzjga'aque': —Bitolja naquə bengə con to beñačhza, la' žnacxa gon to beñačh par yebecžie' be' gualən' len nisdə'ona'?

Chopə beña' Gadara zjəyo'o zjəyaz de'e xio' yichjla'ažda'oga'aquen'

²⁸ Na' besə'əžine' yešla'alə nisdə'ona', laž beña' Gadara ca'. Na' catə' besyə'əchoje' barcon', besə'əšag chopə beña' Jeso'osən', beña' zjəyo'o zjəyaz de'e xio' lo'o yichjla'ažda'oga'aquen'. Beña' quinga banitə'əte' capsant na' chesə'əchoje' chaše' do tnezən' galə'əzə capsantən' chso'one' znia juisy len beña' chesə'əžague', na' caguə no chac ta tnezən'.

²⁹ Na' de'e xio' ca' gwso'osya'an gwse'en Jeso'osən': —Partlə le', na' partlə neto', Jeso'os Xi'in Dioz. žEza'o par əgwčhi'i əgwsaco'o neto' catə' cuiņə' əžin ža əžin or par si'tio' castigw'?

³⁰ Na' galə'əzə chaš beña' choso'oye' coš zan.

³¹ Nach de'e xio' ca' gwsa'atə'yoin Jeso'osən' gwse'en le': —Šə yebejo' neto' yichjla'aždao' beña' quinga, güe'ešgo' latja žjəyežə'oto' lo'o la'aždao' coš ca'.

³² Nach gož Jeso'osən' lega'aque': —Leyečhoj.

Nach besyə'əchojən yichjla'aždao' beña' ca' na' jəsyə'əžə'on lo'o la'aždao' coš ca'. Nach besyə'ədinses coš ca' le'e ya'a gan' chašəbən' na' jəsyə'əxopəb lo'o nisdə'ona', na' gwsa'atəb gwse'ejəb nisən'.

³³ Na' beña' ca' chosə'əye' coš ca' besa'acdoe' na' besyə'əžine' syodan', jəsyə'ədixjue'ine' beña' lao' syodan' yoguə' can' bagoc na' can' babesyə'əyaque beña' ca' zjəyo'o zjəyaz de'e xio'ona' yichjla'ažda'oga'aque'ena'.

³⁴ Nach yoguə' beña' ca' ža' syodan' ja'aque' gan' zo Jeso'osən'. Na' catə' besə'əžague' Jeso'osən' gwsa'atə'yoine' le' yeze'e lažga'aque'ena'.

9

Beyon Jeso'osən' to beña' nat to part cuerp che'ena'

¹ Nach Jeso'osən' beyo'e to lo'o barcw len disipl che' ca' na' besyə'əlague'e yešla'alə nisdə'ona' par besyə'əžine' Capernaum gan' bazocze'.

² Na' besə'əžin xonj beña' na' zjənlene' to beña' nat to part cuerp che'ena', zjənxo'e'ene' to lao cam dao'. Ca' naquə gočbe'i Jeso'osən' de que gwso'onližə'ene', nach gože' beña' güe'ena': —Bebei, xi'indaogua'a. Babezi'ixena' xto'lo'ona'.

³ Na' bałə beña' ca' choso'osed choso'olo'i lei de'en bzoj de'e Moizezən' gwse'enene' de'en gož Jeso'osən' beña' güe'ena', na' gwso'one' xbab lo'o yichjla'ažda'oga'aque'ena' gosə'əne': —Bengə chžia chnite'e Diozən' laogüe de'en chon cuine' ca Diozən'.

⁴ Jeso'osən' gočbe'ine' xbabən' chso'one'ena', nach gože' lega'aque': —žBixčhen' chonle xbab malan' ca' lo'o yichjla'ažda'olen'?

⁵ Šə con yapa'ane' de que babezi'ixena' xto'le'ena', bito nezele šə napa' yelə' gwnabia' par yezi'ixena'an. Pero šə yapa'ane': “Gwyas na' gwda”, guatə'əbia' šə napa' yelə' gwnabia' par gwaquə can' nia'ana'.

⁶ Diozən' bsele'e nada' golja' beñačh na' de'en ngan' gona' par ničh ənezele de que napa' yelə' gwnabia' lao yežlyo nga par yezi'ixena' xto'le' beñačhən'.

Nach gože' beña' güe'ena': —Gwyas beyoa xcamo'ona' na' beyej ližə'ona' to šao' to güen.

⁷ Na' beyas be'ena', beze'e zjəyede' liže'.

⁸ Na' beña' ca' besə'əle'i can' goquən', lechgualə besə'əžebe'. Na' gwso'elaogüe'e Diozən' ca naquə bene' yelə' guac par ničh Jeso'osən' goc bene' de'e ca' zjənac ca'.

Jeso'osən' gwleje' Mation' par goque' disipl che'

⁹ Gwde na' beza' Jeso'osən' na' ble'ine' to beṇə' gočhixjw na' le' Matio, chi'e latjə gan' chčhixjue'ena'. Na' Jeso'osən' gože'ene': —Da len nada'.

Na' Mation' le'e gwzoža'ate' gwyejlene' le'.

¹⁰ Na' goquən' chi' Jeso'osən' liž Mation' len disipl che' ca' chsa'ogüe'. Na' nitə' beṇə' zan beṇə' gočhixjw ca' na' nochlə beṇə' güen de'e mal ca' chsa'olene' lega'aque'.

¹¹ Na' beṇə' fariseo ca' cata' besə'əle'ine' chi' Jeso'osən' txen len beṇə' güen de'e mal ca', gwse'e disipl che' ca': —Malən' chon maestr chelen' che'ej chaogüe' txen len beṇə' gočhixjw ca' na' nochlə beṇə' güen de'e mal beṇə' cui chonlento' txen.

¹² Na' cata' Jeso'osən' benene' xtižə'əga'aque'ena', na' gože' lega'aque': —Beṇə' cui chsa'acšene bito chəsə'əyazjene' beṇə' güen rmech. Beṇə' ca' chsa'acšene lega'aque'ena' chəsə'əyazjene' beṇə' güen rmech.

¹³ Lešej na' legwsed bi zeje Xtižə' Diozən' de'en nyojən nan: “Che'enda' yeyašə' yeži'ilažə'əle beṇə', caguə' tlaozə' gotle bia yixə' par güe'ela'ole nada'.” Za'a zedəyena' par ničh beṇə' ca' zjəneze' de que zjənaque' beṇə' güen de'e mal yesyə'ədinjene' xtolə'əga'aque'ena', pero bito zedəyena' par ničh beṇə' ca' chsa'aque' bazjənaque' beṇə' güen yesyə'ədinjene' xtolə'əga'aque'ena'.

Chəsə'ənabene' Jeso'osən' bixchen' disipl che' ca' cui chəsə'ənite'e sin cui əse'ej əsa'ogüe'

¹⁴ Nach disipl che Juan ben' bchoa nis gosə'əbigue'e lao Jeso'osən', na' gwse'ene': —Zan las beṇə' fariseo ca' na' neto' chzoto' sin cui che'ej chaoto' par cho'ela'oto' Diozən'. Pero disipl chio' ca' chse'ej chsa'ogüe'. ¿Bixchen' ža?

¹⁵ Nach Jeso'osən' gože' lega'aque': —Cata' chac to yelə' gošagna' beṇə' migw che be'ena' chšagna'anə' bito chəsya'əgüine'ene' sino chse'ej chsa'ogüe'. Na' ca'aczən' naquən len nada' na' len disipl chia' ca', chse'ej chsa'ogüe' lao ne'e zoa' len lega'aque'. Cata'əchən' əžin ža yesə'əche'əxaxj beṇə' contr chia' ca' nada' cana'achən' əchoj cata' cuich əse'ej əsa'o disipl chia' ca'.

¹⁶ Noto no beṇə' zo beṇə' chchine' to pedas lachə' cuinə' xoə nis par yoda' xa gole'ena' de'en bačh chyoe. Šə can' gone', cata' chib xe'ena' yebe' lachə' cobən' na' əčhezəchən len.

¹⁷ Na' leczə' notono zo beṇə' chgue'e bino cobən' lo'o yid golən'. Šə gone' ca', bino cobən' əchezə'ən yid golənə' na' laljə binon' na' cuiayi' yidən'. Cle la' cheyalə' que'e lalno cobən' lo'o yid cobə, par ničh ca' bito cuiayi' binon' na' yidən'.

Gože' lega'aque' ca' par ničh bzejni'ine' de que bito gaquə' yesə'ənaogüe' costumbr gola' chega'aque'ena' na' yesə'ənaotie' de'en chsed chlo'ine'.

Jeso'osən' beyone' xi'in' Jairon' na' no'olən' gwdan lox xadon' che'ena'

¹⁸ Na' ne'e cho'ete Jeso'osən' dižə' quinga, bžin to beṇə' gwnabia' bzo xibe' lao Jeso'osən' na' gože'ene': —Ze'e gotte to xi'inə' no'ola. Yo'ošga cano'obo', na' yebambo'.

¹⁹ Na' le'e gwzoža'ate Jeso'osən' na' txen len disipl che' ca' ja'aclene' beṇə' gwnabian'.

²⁰ Na' lao zja'aque' liž beṇə' gwnabian' jənao to no'olə' lega'aque', beṇə' bagoc šižin iz chzoe' bgua'a. Na' bene' byen bgiugue'e cobə' Jeso'osən' gwdane' lox xadon' che'ena'.

²¹ La' bene' xbab lo'o yičh'jla'azda'ogüe'ena', gwne': “Con cana' xadon' che'ena', goy'acczadə'.”

²² Na' gwyechj Jeso'osən', ble'ine' no'olən', na' gože'ene': —Bebei xi'in'indaogua'a. Babeyacdo' chedə' chonlilažo'o nada'.

Na' le'e bega'ate yizgüe' de'en che'i no'olən'.

²³ Cata' bžin Jeso'osən' liž beṇə' gwnabian', na' ble'ine' beṇə' zan zjəža' na' nitə' beṇə' chəsə'əcuēž ca bžejo, na' beṇə' ca' ža'anə' chəsə'əbežchgüe'.

²⁴ Na' gože' lega'aque': —Le'e yechoj ngala. Bito nacho' bi'i guat, con chtasbo'onə'.

Pero na' beṇə' ca' gwso'onle'e che'.

²⁵ Na' beyož besyə'əbeje' beṇə' ca' fuerlə, nach gwyo'o Jeso'osən', bexe'e na' bi'i no'olə' guat da'onə', na' beyasbo'.

²⁶ Na' ca' naquə' de'e güenṇə' de'en ben Jeso'osən' gosə' gwłaljə dižə'əna' yoguə' yež ca' zjəchi' do na'.

Jeso'osən' beyone' chopə' beṇə' lchol

²⁷ Na' cata' beza' Jeso'osən' len disipl che' ca', jəsə'ənao chopə' beṇə' lchol lega'aque'. Na' gwsa'atə'əyoine' le' gosə'əne' zizjo gosə'əne': —Le' naco' xi'in' dia che de'e Rei Dabi. Beyašə'əlažə'əsguei neto'.

²⁸ Na' cata' bežin Jeso'osən' len disipl che' ca' liže'ena' na' besyə'əyo'e, na' leczə' gwso'o beṇə' lchol ca'. Nach Jeso'osən' gože' lega'aque': —¿Echejle'ele de que guac gona' par ničh yele'ilen'?

Nach gwse'ene': —Chejle'eto' Xanto'.

²⁹ Nach Jeso'osən' gwdane' jlaoga'aque'ena', na' gože' lega'aque': —Yele'ile, chedə' chonlilažə'əle nada'.

³⁰ Nach besyə'əle'ine'. Na' Jeso'osən' bene' mendad cui no əso'elene' dižə' ca naquə bene' par niç besyə'əle'ine'.

³¹ Bixa na' besa'aque' na' gatə'ətezə ja'aque' doxen Galilean' jəsyə'əye'elene' beṇə' dižə' ca naquə de'en baben Jeso'osən' len lega'aque'.

Jeso'osən' beyone' to beṇə' mod

³² Na' catə' besa'ac beṇə' ca' babesyə'əle'inə', le'e besə'əžinte beṇə' yoblə zjəṇche'e to beṇə' mod, na' yo'o yaz de'e xio'onə' yichjla'ažda'ogüe'enə'.

³³ Jeso'osən' bebeje' de'e xio'onə' na' le'e benete be'enə'. Na' beṇə' zan ca' besa'əle'i can' goquən' besyə'əbanchgüeine', na' gosə'əne': —Chio'o beṇə' Izrael de'e nechən' bable'icho ca naquə miagr de'en chon bengə.

³⁴ Pero na' beṇə' fariseo ca' gosə'əne': —Gwxiiye' de'en chnabia' de'e xio' ca'anə' chaclenən le' par niç chebeje' de'e xio'onə'.

Jeso'osən' cheyašə' cheži'ilaže'e beṇə'chən'

³⁵ Na' Jeso'osən' len disipl che' ca' ja'aque' yo'odao' che to to yež na' to to syoda gan' mbane Galilean' na' gwdixjue'ine' beṇə' dižə' güen dižə' cobən' can' nabia' Diozən' notə'ətezə beṇə' so'e latjə. Na' beyone' yoguə beṇə' ca' chsa'acšene len bitə'ətezə yižgüe' de'en chse'ine'.

³⁶ Na' Jeso'osən' ble'ine' beṇə' zan ca' zjəsə'ənao le' na' beyašə' beži'ilaže'e lega'aque' cheda' gocbe'ine' chsa'acžejlaže'e naclən' so'one' na' gocbe'ine' caguə no zo no gaquəlen lega'aque' len yoguə' de'en chəsə'əžaglaogüe'enə'. Gwsa'aque' ca' xilə' bian' cui no xanga'acquəb zo par əgwyə' lega'acquəb.

³⁷ Nach gože' disipl che' ca': —Nita' beṇə' zan beṇə' yoso'ozenague' che Diozən' catə' se'enene' xtiže'enə'. Na' gwxaquə'əlebəga'aque' ca' to cwseš xen de'en chetoba'. Na' chyažjda' beṇə' zan əsa'aclene' nada', la' to chəpogale nita'.

³⁸ De'e na'anə' leṇabe Xancho Diozən' əselə'əche' beṇə' zanch par əsa'aclene' chio'o yetobcho cwseš che'enə'.

10

Jeso'osən' gwleje' beṇə' šižin ca' par əsa'aque' apostol

¹ Jeso'osən' betobe' disipl che' ca' šižin na' bnežjue' lega'aque' yelə' guac par niç əsa'aque' yesyə'əbeje' de'e xio' zjəyo'o zjəyaz lo'o yichjla'aždao' beṇə', na' par niç əsa'aque' yesyə'əyone' beṇə' bitə'ətezə yižgüe' de'en chse'ine' na' bitə'ətezəchlə de'e chsa'acquene'.

² Quinga zjəle beṇə' šižin ca': Simon ben' leczə le' Bed, na' Ndres beṇə' bišə' Bedən', na' xi'in Sebedeon' Jacob len juannə',

³ na' Lip na' Bartolome, na' Tomas, na' Matio ben' goquə beṇə' gochixjw, na' Jacob xi'in Alfeo, na' Lebeo, ben' leczə le' Tadeo,

⁴ na' Simonṇə' ben' ben txen len partid Cananistən', na' Jod Iscariot ben' bdie' Jeso'osən' lao na' beṇə' contr ca'.

Jeso'osən' bsele'e disipl che' ca' šižin jəsə'ədixjui'e xtiže'enə'

⁵ Na' catə' Jeso'osən' bsele'e beṇə' šižin quinga jəsə'ədixjui'e xtižə' Diozən', gože' lega'aque': —Chselə'a le'e žje'ele xtižə' Diozən' len yeziquə'əchlə beṇə' Izrael ca'. Na' bito əžja'acle laž beṇə' ca' cui zjənaquə beṇə' Izrael, na' nic əžja'acle yež ca' zjəchi' Samarian'.

⁶ Le'e žja'ac porzə gan' ža' beṇə' Izrael beṇə' bazjəmbiayi' cheda' bitoṇə' so'ombi'e Diozən'.

⁷ Le'e žja'ac na' le'e žjətxijue'e de que babžin ža' Diozən' ben' zo yoban' nabi'e con notə'ətezə beṇə' əso'e latjə.

⁸ Le'e yeyon beṇə' chsa'acšene, na' le'e yeyon beṇə' ca' chse'i yižgüe' de'en ne' lepr, na' le'e yosban no beṇə' bagwsa'at, na' le'e yebej de'e xio' zjəyo'o zjəyaz lo'o yichjla'aždao' beṇə'. Diozən' babene' le'e yelə' guac che'enə' dadzə par gonle de'e quinga, de'e na'anə' le'e gaclen beṇə' ca' dadzə.

⁹ Bitobi gonle probnid gua'ale, ni mech de or, de plət, o de cobr lo'o bols mech chelen' lao co'ole nezən'.

¹⁰ Na' nic gna'ale bsod, o yeto xcamisle, nic gua'ale yel, na' nic goxə'əle garrot. Ca naquə le'e chonle xšina'ana' zaquə'əle par gon beṇə' de'e ye'ej gaole gan' selə'a le'enə'.

¹¹ Na' gatə'ətezə syoda o yež gan' əžinle, leṇab šə zo to beṇə' güen beṇə' yebei əgüialaogüe'e le'e liže'enə'. Na' na'atezə sole xte catə'əch yesa'acle.

¹² Na' catə' əžinle liže'enə', le'e gguape' diox, na' le'e nabləžə' so cueze' binlo len yichjla'ažda'ogüe'enə'.

¹³ Na' šə na' nita' beṇə' chse'enene' yesə'əzo yesə'əbezəga'aque' binlo len yichjla'ažda'oga'aque'enə', na' gaquə can' ənabləžə'əle par yesə'əzo yesə'əbezəga'aque' binlo. Pero šə bito no zo no chon ca so cueze' binlo len yichjla'ažda'ogüe'enə', bito gaquə ca de'en bagwnabləžə'əlen'.

¹⁴ Na' gata' a'tezə əžinlə ga cui nono yebei əgüialao le'e, na' nic əgwzenague' chele, le'e yesa'ac liž be'ena' o yežan'. Na' cata' yesa'ac len', əgwsil'ins ni'alen' par yežib bišten' de'en gwžianə, niç əgwlo'ile beñə' ca' de que de'e malən' chso'one' cui chesə'əzenague' xtižə' Diozən' de'en cho'elen'.

¹⁵ Diozən' bene' par byinj yi' na' sofr lao syoda Sodomān' na' syoda Gomorran' por ni che de'en cui boso'ozenague' che'. Na' de'e li əchnia' le'e, cata' əžin ža gon Diozən' castigw zejlicane che yogua' beñə' chso'on de'e malən', beñə' ca' cui yosə'əgüialao le'e yesə'əzaquə'əzi'iche' clezə ca beñə' ca' gwnitə' Sodomān' na' Gomorran'.

Gaquə de'e saquə'əzi'icho

¹⁶ Le'e gon xbab de que nada' əsela'a le'e žjətixjue'ele xtižə'anə' len beñə' ca' gwxaquə'əlebe ca bež, na' le'e gwxaquə'əlebele ca xilə' dao' ladjoga'aque'ena', chedə' beñə' ca' se'enene' so'ote' le'e can' chso'on bež ca' chso'otab xilə' dao'. Pero le'e cheyalə' gacle lechguale beñə' xenləžə' na' lechguale beñə' bib par len lega'aque'.

¹⁷ Nitə' beñə' so'one' le'e lao na' beñə' gwnabia' ca' por ni che de'en chonliləžə'əle nada' na' yesə'əyine' le'e lo'o yo'oda' chega'aque' ca'. De'e na'anə' le'e čhiləžə' naclən' gonle par niç cui gacle lao na' beñə' contr ca'.

¹⁸ Nach leczə por ni che de'en chonliləžə'əle nada' nitə' beñə' yesə'əche'əxaxje' le'e lao no gubernador, na' lao no rei. Na' cata' gaquə' ca' güe'ele xtižə'anə' lao beñə' gwnabia' ca', beñə' Izrael len beñə' cui žjənaquə beñə' Izrael.

¹⁹ Pero cata' yesə'əche'əxaxje' le'e lao beñə' ca', bito cuec yichjle nac yoži'ile xtižə'əga'aque'ena'. Lao or na'atezə Diozən' əgwzejni'ine' le'e bin' cheyalə' ənale.

²⁰ La' caguə le'ezən' güe'ele xtižə'anə', Spirit che Xacho Diozən' əgwzejni'in le'e bin' cheyalə' nale.

²¹⁻²² Na' yogua' beñə' ca' cui žjənombia' Diozən' yesə'əgue'ine' le'e chedə' chonliləžə'əle nada', na' xte no bišə'əle na' no xale so'one' le'e lao na' beñə' par niç so'ote' le'e, na' leczə xte no xi'inle so'one' le'e lao na' beñə' ca' so'ot le'e. Pero šə sotezə sole gonliləžə'əle nada' xte cata'əch əžin ža gatle, nachən' žjəyezole len Diozən'.

²³ Šə beñə' nitə' to yež yesy'əlague' le'e, le'e yesa'acte le' žjəya'acle ga yoblə. Diozən' bsele'e nada' golja' beñəch, na' de'e li čhnia' le'e bitonə' yeyož güe'ele xtižə'a lao yogua' beñə' Izrael ca' catə'an yida' de'e yoblə.

²⁴ Nezele can' naquən catə' to beñə' chsede' len to maestr, bito ənacho naque' beñə' blaoch ca maestrən', na' to mos bito naque' blaoch ca xane'ena'.

²⁵ Na' ben' chsed bito cheyalə' gone' xbab so'on beñə' güench len le' cle ca chso'one' len maestr che'ena'. Le'egatezə ca' mosən' bito cheyalə' gone' xbab so'on beñə' güench len le' cle ca chso'one' len xane'ena'. Nitə' beñə' chesə'əne' chona' txen len de'en čhnia' de'e xio' ca' de'en le Beelsebo. Nadan' naca' Xanle na' naquəchxe yesə'əne' che le'e nacle disipl čhia'.

Cheyalə' žebcho castigw de'en gon Diozən' čho'o

²⁶ Na' la'anə'əczə yoso'ochi' yoso'osaquə' beñə' le'e laogüe de'en cui chse'ejni'ine' de que chonle can' chene' Diozən' bito žeble lega'aque'. Guaquə can' na' dicho de'en na: "Yogua'əlo de'en ngašə' na'a gwžin ža la'alaon, na' yogua' əlo de'e cui no gwse'ejni'i antslə leczə gwžin ža se'ejni'i beñə' len."

²⁷ De'e zan de'en chsed chlo'ida' le'e de'en cui chsed chlo'ida' yeziquə'əchlə beñə'. Na' le'e ža, legwsed legwlo'in yogua'əlo beñə', na' le'e gon par niç beñə' zan se'ejni'ine'en.

²⁸ Bito cheyalə' žeble beñə' ca' so'ot le'e, chedə' lega'aque' bito gaquə bi so'onene' yichjla'ažda'olen'. Cheyalə' žeble Diozən', la' len' nape' yelə' čhnia' par əgwžiai'i'e cuerp chelen' len yichjla'ažda'olen' lo'o yi' gabilən'.

²⁹ Nezecho de que byinj dao' ca' bitobi žjəzaquə'ətequəb, pero bito nacho tob gat sin cui əneze Xacho Diozən'.

³⁰ Na' ca naquə čho'o ža, de'e tant chaque Diozən' checho xte nezene' balə yišə' yichj to tocho žia la'anə'əczə nezecho bito bi žjəzaquə' yišə' yichjchon'.

³¹ De'e na'anə' bito žeble, chedə' zaquə'əch le'e cle ca bia zan byinj dao'.

Cheyalə' güe'echo dižə' len beñə' de que nombi'acho Jesocrisən'

³² Na' notə'ətezle šə cho'ele dižə' len beñəchən' de que chejle'ele čhia', leczə ca' nada' gua'a dižə' len Xa'anə' ben' zo yoban' de que nacle xi'inə'.

³³ Na' notə'ətezle šə cho'ele dižə' len beñəchən' de que bito chejle'ele čhia', leczə ca' nada' gua'a dižə' len Xa'anə' ben' zo yoban' de que bito nacle xi'inə'.

Yesə'ədilə beñə' por ni che de'en bidə Jeso'osən'

³⁴ Bito gonle xbab de que beñə' ža' yežlyo nga yesə'əzo yesə'əbeze' binlo len ljuežjga'aque' laogüe de'en bida'. Bito yesə'əzo yesə'əbeze' binlo len ljuežjga'aque' laogüe de'en bida' sino yesə'ədilə'.

³⁵ Laogüe de'en babida yediłə beñə byo len xē'enə' na' no'olan' len xne'enə', na' yediłə xo'oliž beñə' len taobin' che'enə'.

³⁶ Entr lo'o yo'ozəga'aque' yesyə'ənite'e contr.

³⁷ Notə'ətezle šə chaquēle che xale o che xna'ale mazəchlə can' chaquēle chia' nada' bito zaquə'əle par gacle disipl chia'. Le'egatezə ca' šə chaquēle che xi'inle mazəchlə can' chaquēle chia' leczə bito zaquə'əle par gacle disipl chia'.

³⁸ Na' notə'ətezle šə laogüe de'en chaquēle yoso'oči' yoso'osaquə' beñə' le'e o so'ote' le'e to le'e yag coroz de'e nan' bito chonlilažə'əle nada', bito zaquə'əle par gacle disipl chia' šə ca'.

³⁹ Notə'ətezə beñə' chaquene' gone' par nič cui chi' saque'e o par nič cui no so'ot le', be'enan' cuiayi'. Na' notə'ətezə beñə' chsanlažə' cuine' chi' saque'e o so'ot beñə' le' por ni čhia', be'enan' əbane' zejlicaņe.

Beñə' ca' nita' mbalaz catə' yesyə'əžine' yoban'

⁴⁰ Notə'ətezə beñə' yebeine' güialaogüe' le'e nacle disipl chia', nadə'əczan' yebeine' güialaogüe' šə ca'. Na' šə yebeine' güialaogüe' nada' leczə Dioz na'anə' əgüialaogüe', Dioz ben' bsełə' nada'.

⁴¹ Beñə' ca' chso'e xtižə' Diozən', mbalaz gaquə' chēga'aque' catə'an yesyə'əžine' yoban', na' notə'ətezə beñə' yebeine' güialaogüe' lega'aque', leczə mbalaz soe' catə'an yežine' yoban'. Na' mbalaz gaquə' che beñə' ca' chso'on can' chazlažə' Diozən' catə'an yesyə'əžine' yoban'. Na' notə'ətezə beñə' yebeine' güialaogüe' lega'aque', leczə mbalaz soe' catə'an yežine' yoban'.

⁴² Notə'ətezə beñə' chnežjue' la'anə' tbaszə nis ye'ej be'enə' chonlilažə' nada', de'e liczə' gona' ca soe' mbalaz catə'an yežine' yoban', la'anə'əczə ben' bnežjue' nisən' cuitec bi zaque'e len beņəčan'.

11

Juannə' bsele'e čhopə disipl che' gan' zo Jeso'osən'

¹ Catə' beyož ben Jeso'osən' mendad can' so'on disipl che' ca' šižin, beze'e latjən'. Na' gwyeje' yež ca' zjəchi' do na' jəsəd jəlo'ine' xtižə' Diozən' len beñə' ca' ža'anə'.

² Na' ca naquə' Juannə' ben' bchoa beñə' nis, lao die' ližyan' benene' dižə' ca naquə' yoguə' de'en chon Jeso'osən' ben' bsełə' Diozən' par chaclene' nasyon Izraelən', nach Juannə' bsele'e čhopə disipl che' ca' gan' zo Jeso'osən',

³ jse'eže'ene': —čElen' ben' naquən əselə' Diozən' o šə soto' lez yidə beñə' yoblən'?

⁴ Nach Jeso'osən' gože' lega'aque': —Le'e žjəya'ac na' le'e žjəyeyež Juannə' doxen can' chenele na' can' chle'ile chona'.

⁵ Bable'ile chona' par nič bałə beñə' lchoł chesyə'əle'ine', na' bałə beñə' coj chesyə'əde', na' yebałə beñə' cuež chesyə'əyene'ne'. Na' leczə bable'ile beñə' par nič bałə beñə' gwse'i yizgüe' de'en ne' lepr babesyə'əyaquene'. Bable'ile bosbana' bałə beñə' guat, na' babenele cho'a dižə' güen dižə' cobə' čhia'anə' len beñə' yašə' ca'.

⁶ Mbalaz zo beñə' chejle'e de que Diozən' bsele'e nada'.

⁷ Nach catə' besyə'asa'ac disipl che' Juannə', nach Jeso'osən' be'elene' beñə' ca' zjəndobən' xtižə' Juannə', gože' lega'aque': —čNacxa naquə' ben' jəle' itgüiczele latjə dašən'? čEšəyechə šayen chaquē'? Bito.

⁸ čNacxan' goque' catə' jəle'ilene'? čEnyaze' lachə' šao'? čEšə bito? la' beñə' ca' zjənyaz lachə' šao' nite'e yo'o güenchgua ca no liž rei.

⁹ čNoxan' jəle'ilen' ža? čEto profet ben' cho'e xtižə' Diozən'? De'e li' naque' to profet. Pero əchnia' le'e, caguə' con to profetən'.

¹⁰ Čhe bengan' nyojan le'e Xtižə' Diozən' nan:

Nada' Dioz əselə'a to beñə' cuialaogüe' gü'e xtižə'ona'

par nič nita' beñə' probnid par əso'elaogüe'e le' catə'an yido'.

¹¹ De'e li' əchnia' le'e, notono no beñəč ne'e so beñə' naquəč beñə' blaoc ca Juan ben' chchoa beñə' nis. Na' notə'ətezəchlə beñə' gü'e latjə nābia' Diozən' le', la'anə'əczə bito naque' beñə' blaoc, gwžin ža catə' šejni'ichene' čhia' clezə ca Juannə'.

¹² Dezd catə'an gwzoloa Juannə' gwđixjui'e xtižə' Diozən' na' bcho'e beñə' nis xte ža neža beñə' zan choso'ozenague' xtižə' Diozən' na' chəsə'əyiljažə'e naclə so'one' par nič nābia' Diozən' lega'aque'.

¹³ Catə' cuiņə' solao gwzene Juannə' xtižə' Diozən', con lei de'en bzoj de'e Moizezən' na' de'en boso'ozoj yoguə' profet ca', de'e ca'azən' bzejni'in chio'o che Diozən'.

¹⁴ Xtižə' Diozən' de'en nyojan nan de que yeto beñə' yedəyen can' ben Liazən' ben' be' xtižə' Diozən' cana'. Na' che Juan na'anə' boso'ozoje' žalə' šejle'ele.

¹⁵ Le'e žia nagle de'e chene, legwzenag xtižə'anə'.

¹⁶ čNac əgwsaquə'əlebetgüēida' le'e mbanle na'a? Egwsaquə'əlebeda' le'e ca bidao' čhedə' cuiczə bi de žleb čhele. Ca naquə' bidao' ca' catə' nita'əbo' do gan' chac ya'a chse' ljuēžjə'acbo':

17 “Bento’ legr, bito gwyo’olažə’ale, na’ babento’ bgüine bgüez, peor.”

18 Juannə’ bide’ laole nga. Bito güe’ej gwdaošaogüe’e can’ chse’ej chsa’o beṇə’ yoblə. Nach gwnale che’: “Yo’o yaz de’e xio’ona’ yichjla’aždaogüe’ena’.”

19 Na’ nada’, Diozən’ bsele’e nada’ golja’ beṇəç. Na’ chle’ile che’ej chaogua’ can’ che’ej chaole. Na’ nale chia’ de que naca’ beṇə’ lia na’ beṇə’ güe’ezo, na’ leczə’ nale de que naca’ migw che beṇə’ goçhixjw ca’ na’ migw che yeziqə’əchlə beṇə’ ca’ chso’on de’e mal. Pero na’ nachbia’ de que Dioz na’anə’ naque’ le’ezelaogüe beṇə’ sin’ por ni che can’ chso’on beṇə’ ca’ choso’ozenag che’.

Yež ca’ gan’ cui boso’ozenague’ che Jeso’osən’

20 Nach Jeso’osən’ be’e xtižə’ beṇə’ ca’ ža’ yež ca’ gan’ bene’ de’e zan de’e zaquə’ yesyə’əbanene’, na’ gwđile’ lega’aque’ chedə’ bito besyə’ədinjene’ xtolə’əga’aque’. Nach gwne’:

21 —iProbchguazə le’e beṇə’ Corasin! iProbchguazə le’e beṇə’ Betsaida! Beṇə’ ca’ nita’ Tiro na’ Sidon le’e besyə’ədinjiteine’ xtolə’əga’aque’ena’ žalə’ blo’iga’acda’ane’ yelə’ guac chia’anə’ ca de’en bablo’ida’ le’e. Žalə’ goquə’ ca’, sa’azlje’ lachə’ zešə’ na’ zosə’əža’alja cuinga’aque’ de par niç sa’acbe’i beṇə’ de que babesyə’ədinjene’ xtolə’əga’aque’ena’.

22 Echnia’ le’e saquə’əzi’ichle clezə ca beṇə’ ca’ nita’ Tiro na’ Sidon catə’ əžin ža gon Diozən’ castigw zejlicəṇe che yogua’ beṇə’ chso’on de’e malən’.

23 Le’e nita’əle Capernaunnə’, chonle xbabən’ de que Diozən’ gonchgüe’ le’e yelə’ bala’an, pero bito gone’ le’e yelə’ bala’an, sino gone’ le’e castigw zejlicəṇe de’en cui chejle’ele chia’. Žalə’ bena’ de’e zaquə’ yesyə’əbane beṇə’ ca’ gwnita’ Sodoman’ can’ babena’ laole nga, besyə’ədinjene’ xtolə’əga’aque’ena’ žalə’ ca’ na’ ne’e chi’ syodan’ žalə’ ca’.

24 Echnia’ le’e, saquə’əzi’ichle clezə ca beṇə’ ca’ gwnita’ Sodoman’ catə’ əžin ža gon Diozən’ castigw zejlicəṇe che yogua’ beṇə’ chso’on de’e malən’.

Beṇə’ ca’ so’onlilažə’ Jeso’osən’ nite’e mbalaz

25 Na’ lao orən’ Jeso’osən’ bene’ orasyon lao Diozən’ gwne’: —Xa’, len’ chnabi’o beṇə’ ža’ yoban’ na’ yežlyon’. Na’ chona’ yelə’ choxwlen chio’ de que babzejni’ido’ balə beṇə’ can’ che’endo’ so’e latjə nabi’o yichjla’ažda’oga’aque’ena’. Bzejni’ido’on beṇə’ ca’ gwsa’acbe’i chəsə’əyazjene’ no əgwsed əgwlo’i lega’aque’ na’ bito bzejni’ido’on beṇə’ ca’ chso’on xbab de que zjənaque’ beṇə’ sin’ na’ beṇə’ zjənyejni’i.

26 Beno’ ca’ ža Xa’, chedə’ can’ gwyazlažo’o.

27 Nach gože’ beṇə’ ca’ ža’anə’: —Xa’anə’ babene’ lao na’a chona’ par niç chombia’ beṇə’ le’. Le’ nombi’ayəne’e nada’, na’ nada’ nombi’ayəna’a le’. Na’ beṇə’ ca’ bagwleja’ par zjənombi’e Xa’anə’, chona’ par niç zjənombi’ene’ na’ notono no nochlə zjənombia’ Xa’anə’ na’ ni nada’.

28 Legonlilažə’ nada’, le’e zole trist tant pesad chaquele chonle yogua’ de’e ca’ chəsə’əne’ chene’e Diozən’ gonle. Nada’ gona’ ca sole mbalaz.

29 Legon can’ nona’ mendad gonle na’ legwzenag de’en əgwzejni’ida’ le’e. Nada’ naca’ beṇə’ xenlažə’ na’ bena’ gaxjwlažə’ na’ gona’ ca sole mbalaz lo’o yichjla’ažda’olen’.

30 Na’ de’en nona’ mendad gonle bito naquən pesad, na’ de’en chsed chlo’ida’ bito naquən zdeba.

12

Boso’olechj disipl ca’ trigon’ ža dezcanzən’ par gwsa’ogüe’en

1 Na’ gozaquən to ža dezcanzə Jeso’osən’ gwđie’ len disipl che’ ca’ gan’ nyaž trigon’, na’ disipl che’ ca’ gosə’ədone’, nach gosə’əlechje’ trigon’ na’ gwsa’ogüe’en.

2 Na’ besə’əle’i balə beṇə’ fariseo ca’ can’ gwso’on disipl ca’, na’ gwse’e Jeso’osən’: —Bgüiašč can’ chso’on disipl chio’ ca’ žin de’e cui de’ ləns goncho ža dezcanzən’.

3 Nach gož Jeso’osən’ beṇə’ fariseo ca’: —žEcabi za’alazə’əle de’en bablable can’ ben de’e Rei Dabin’ catə’ le’ na’ beṇə’ ljuežje’ ca’ gosə’ədone’?

4 Gwyeje’ lo’o yo’odao’ əblaonə’ nach gwdaogüe’ yetxtil de’en bazjəncua’ bəxoz ca’ par Diozən’, na’ Dabin’ bnežjue’en gwsa’o beṇə’ ljuežje’ ca’ la’əṇə’əczə cui zjənaque’ bəxoz. Na’ yetxtilən’ cui de’ ləns par gač con to beṇə’ len letg bəxoz ca’ chac sa’ogüe’en.

5 žEna’ cabi za’alazə’əle ca de’en bablable le’e lei de’en bzoj de’e Moizezən’ can’ chso’oncəzə bəxoz ca’ mendad che yo’oda’ona’ yogua’ ža dezcanzə na’ bito chso’omba’əne’ žanə’. Na’ bito ṇacho de que zjənapə’ dolə’ por ni che de’en chso’one’ mendadən’ ža dezcanzən’.

6 Echnia’ le’e, nada’ zoa’ nga zaquə’əcha’ cle ca yo’odao’ əblaonə’.

7 Xtižə’ Diozən’ de’en nyojən nan: “Che’enda’ yeyašə’ yeži’lilažə’əle beṇə’, caguə’ tlaozə’ gotle bia yixə’ par güe’ela’ole nada’.” Žalə’ chejni’ile bi zejennə’ bitolja əṇale che disipl chia’ quinga de que zjənapə’ dolə’ por ni che šə bin’ bagwso’one’ ža dezcanzən’.

8 Echnia’ le’e de que Diozən’ bsele’e nada’ golja’ beṇəç na’ naquən lao na’a əṇia’ bin’ naquən güen goncho ža dezcanzən’.

Beyaque to beṇə' mbižə šla'a ne'enə'

⁹ Na' catə' Jeso'osən' beze'e latjən', na' gwyo'e to lo'o yo'odao' chechon'.

¹⁰ Na' lo'o yo'odao' na' zo to beṇə' bambižə šla'a ne'enə', nach beṇə' fariseo ca' gwse'e Jeso'osən': —¿Ede lsens par yeyoncho beṇə' xinj lao ža dezczanzən'?

Gwse'ene' ca' nič əžel de'en yesə'əde'ine' par əsa'ogü'e xya contr Jeso'osən'.

¹¹ Nach Jeso'osən' gože' lega'aque': —Šə nitə' xilə' dao' chele na' əxopə tob lo'o yech zitjw lao ža dezczanzən', ¿əcabi le'e yebejteleb lo'o yechən' lao žanə'?

¹² Na' lechguale zaquə'əch to beṇə' cle ca to xilə' dao'. Na' əchnia' le'e de lsens gaquəlene' beṇə' lao ža dezczanzən'.

¹³ Nach Jeso'osən' gože' be'enə' mbižə ne'inə': —Bli na'onə'.

Nach catə' bli na' be'enə' le'e beyacten can' naquə de'en yešla'a.

¹⁴ Na' beṇə' fariseo ca', catə' besa'aque' yo'oda'onə' bosə'oxi'e naclə so'one' par so'ote' Jeso'osən'.

To de'en bzoj de'e profet Isaiazən' che Jeso'osən'

¹⁵ Gocbe'i Jeso'osən' can' bosə'oxia' beṇə' fariseo ca', na' gwze'e gwyeye' ga yoblə. Beṇə' zan jəsə'ənaogü'e'ene' nach Jeso'osən' beyone' beṇə' ca' chsa'acšene.

¹⁶ Na' bene' mendad cui no əso'elene' dižə' de que Dioz nan' bsele'ene' par gaquəlene' nasyon chega'aque'enə'.

¹⁷ Bene' ca' par nič goc complir can' bzoj de'e profet Isaiazən' che' nan':

¹⁸ Bengan' naque' xmosa', ben' gwleja' par gone' can' chazlaža'anə'.

Chacchgüeida' che', na' cheba chezaquə'əlaža'a len le'.

Na' nada' əselə'a Spirit chia'ana' sotezə son len le'.

Na' beṇə' zjənaquə beṇə' Izrael len beṇə' cui zjənaquə beṇə' Izrael chixjue'ine' lega'aque' naquən' cheyałə' so'one'.

¹⁹ Bito gaquəyože' beṇə', nic gosye'e,

na' nic əne' zižjo lao lqueyən' par əse'ene beṇə' bin' ne'.

²⁰ Gwnežjue' fuers balor che beṇə' ca' chsa'acbe'i cui bi fuers balor chega'aque' de par so'one' de'e güen,

na' yezi'ixene' che beṇə' ca' chsa'aquene' cui no yezi'ixen chega'aque'.

Yoguə' de'e can' gone' par nič əžin ža so'on beṇə'chən' can' chazlaže'enə'.

²¹ Na' beṇə' zjənaquə beṇə' Izrael len beṇə' cui zjənaquə beṇə' Izrael yesə'əbeze' gaquəlene' lega'aque'.

Gosə'əne' de que Jeso'osən' bebeje' de'e xio' ca' len yelə' guac che Beelsebo

²² Na' zo to beṇə' Ichol, na' nacte' beṇə' mod, na' yo'o yaz de'e xio'onə' lo'o yichjla'ažda'ogü'e'enə' na' jso'ene' lao Jeso'osən'. Na' Jeso'osən' bebeje' de'e xio'onə' yo'o yaz yichjla'aždao' be'enə' na' le'e bele'iteine' na' gocte bene'.

²³ Na' yoguə' beṇə' ca' besə'əle'i can' goquə lechguale besyə'əbanene'. Nach gwse' ljuežjga'aque': —¿Enaqualizə be'enga ben' chbezcho yidə lao dia che de'e Rei Dabin'?

²⁴ Na' catə' gwse'ene beṇə' fariseo ca' dižə' quinga gwse'e bałə beṇə' ca': —Bitobi yelə' guac napə benga. Con chebeje' de'e xio' ca' len yelə' guac che Beelsebo de'en chnabia' de'e xio' ca'.

²⁵ Gocbe'i Jeso'osən' can' gwso'on beṇə' fariseo ca' xbabən', nach gože' lega'aque': —Šə beṇə' ža' to nasyon əsa'aque' choplə na' yesə'ədile' entr lega'aque', əgwžiyai' nasyon chega'aque' na'anə' šə ca'. Na' leczə ca' šə beṇə' nitə' to syoda əsa'aque' choplə na' yesə'ədile' entr lega'aque', leczə cuiyai' syoda chega'aque' na'anə' šə ca'. Na' šə to family əsa'aque' choplə na' yesə'ədile' entr lega'acze' leczə yenit family chega'aque' na'anə' šə ca'.

²⁶ Le'egatezə ca' šə Satanasan' yebej cuiinei lo'o yichjla'aždao' beṇə' leczə cuiyai' yelə' chnabia' chei na'anə' chedə' chdiləlen cuiinei žalə' ca'.

²⁷ Le'e nale de que nada' chebeja' de'e xio' ca' yo'o yaz yichjla'aždao' beṇə' len yelə' guac che Beelsebon'. Žalə' naquən can' nalena', leczə zejen de que beṇə' ljuežjle ca' chasyə'əbeje' de'e xio' ca' zjəyo'o zjəyaz yichjla'aždao' beṇə' len yelə' guac chei žalə' ca'. Beṇə' ljuežjle ca' se'e le'e de que clelən' nale chia' nada' can' chebeja' anṇə'.

²⁸ Na' de'en chebeja' de'e xio' ca' len yelə' guac che Spirit che Diozən', chlo'in de que babžin ža chene'e Diozən' güe'ele latjə nabi'e le'e.

²⁹ Nezecho notono no gaquə šo' liž to beṇə' gual par žjəlane' šinlaze' ca' sin cui əgwcheje' xan yo'onə' to do. Con šə əgwcheje'ene' guaquə cuane' šinlaze' ca'.

³⁰ Šə cui chonle' txen len nada', chonle' contr nada'. Na' šə cui chonle' ca' se'ejle' beṇə' chia' zeje dižə' de que chonle' par nič cui yoso'ozenague' chia'ana'.

³¹ De'e na'anə' əchnia' le'e, bitə'ətezə de'e mal de'en chonle, na' bitə'ətezə dižə' mal de'e cho'ele, Diozən' yezi'ixene' chele šə yediñjelen, pero notə'ətezle šə gü'e'ele dižə' contr Spirit che Diozən' cuat yezi'ixen Diozən' chele.

³² Na' notə'ətezle šə gü'e'ele dižə' contr nada', la'ana'əczə Diozən' bsele'e nada' golja' benəç, gozi'ixencze' chele šə yediñjele can' nale, pero šə gü'e'ele dižə' contr Spirit che Diozən', cuat yezi'ixen Diozən' chele na'a na' batə'ətezə.

Segon can' naquə frot de'e chbia to yaguən' nezecho nac naquə yaguən'

³³ Nezecho de que to yag frot naquən yag güen o cui naquən yag güen segon nac naquə frot cheinə'. Ca'acžən' nacbia' šə naquən' nacle.

³⁴ Lechguale beņə' mal nacle. Bitoczə gaquə gü'e'ele dižə' güen çhedə' nacle beņə' la'aždao' mal. Yoguə'əte dižə' de'e chchoj cho'achon' la' lo'o yichjla'ažda'ocho na'anə' za'an.

³⁵ To beņə' la'aždao' xi'ilažə' cho'e dižə' güen, çhedə' la' can' nan lo'o yichjla'ažda'ogü'e'enə' nan' cho'e dižə'. Na' to beņə' la'aždao' mal cho'e dižə' mal la' can' nan lo'o yichjla'ažda'ogü'e'enə'.

³⁶ Na' əchnia' le'e, catə'an əžin ža gon Diozən' castigw zėjicane che yoguə' beņə' ca' chso'on de'e malən', cana' yoguə'əloj beņə' yesə'ədie' cuent che yoguə' dižə' de'en bagwso'e de'e bitobi žəzaquə'an.

³⁷ Na' segon dižə' de'en cho'ele Diozən' çhoglaogü'e'en chele šə naple dolə' o šə cui naple dolə'.

Beņə' mal ca' chəsə'ənabe' gon Jeso'osən' to miłagr

³⁸ Nach balə beņə' ca' choso'osed choso'olo' i lei de'en bzoj de'e Moizežən', na' beņə' fariseo ca' gwse'e Jeso'osən': —Maestr, che'enetə' gono' to miłagr par niç ənezeto' šə de'e ličzə Dioz nan' bsele'e le'.

³⁹ Nach Jeso'osən' gože' lega'aque': —Le'e mbanle na'a, naquəchguale beņə' yichjla'aždao' mal, na' bito chzenagle che Diozən'. Na' chñable gona' to miłagr par niç ənezele šə le Dioz nan' bsele'e nada'. Pero bito gona' can' chñablenə'. De'en gon Diozən' len nada' par niç ənezele de que le'enə' bsele'e nada', gwxaquə'əleben ca de'en bene' len de'e profet Jonəsən'.

⁴⁰ Antslə ze'e šeje' Niniben' Diozən' bene' par niç to beļ ya'a xen gwdebob le', na' šonə ža šonə yel gwyo'e lo'o le'ebən' cata' beyebəb le' mbancze'. Na' ca naquə nada', gata' na' əgaša'a, na' te šonə ža šonə yel yebana' ladjo beņə' guat ca' par niç ənezele de que Diozən' bsele'e nada' golja' benəç.

⁴¹ Na' catə' əžin ža gon Diozən' castigw che yoguə' beņə' chso'on de'e malən', ža na' yesyə'əban de'e beņə' Ninibe ca' na' lao Diozən' yesə'əcuiše' le'e mbanle na'a, çhedə' besyə'ədinjene' xtolə'əga'aque'ens' catə' de'e Jonəsən' gwdixjue'ine' lega'aque' can' na Diozən'. Le'e gonšč xbab de que nada' zoa' nga naquəcha' beņə' blaoch cle ca' de'e Jonəsən', na' bito chzenagle chia'.

⁴² Na' leczə žan' gon Diozən' castigw che yoguə' beņə' chso'on de'e malən', de'e no'olən' gwnabia' beņə' ca' gwnita' galən' chla' bgüižən' cuiten lichalə yebane' len yeziquə'əchla beņə' guat ca' na' lao Diozən' əgwcuise' le'e mbanle na'a. Ca naquə le' ža, gwze'e Seba gan' naquə zita'əchgua na' bide' nga par bzenague' dižə' sin' de'en be' de'e Rei Salomonə' len le'. Na' nada' zoa' nga naquə'əcha' beņə' blaoch cle ca de'e Salomonə', na' bito chzenagle chia'.

De'e xi'onə' yeyo'on de'e yoblə lo'o yichjla'aždao' beņə'

⁴³ Na' šə to de'e xio' de'en yo'o yaz yichjla'aždao' beņə' yeçhojən nach lažə'an nil na'alə yeyiljən ga son mbalaz. Na' šə bitobi latjə želən, nach ənan:

⁴⁴ "De'e yobləczə žjəyežə'a yichjla'aždao' be'enə' gan' gwyo'o gwyaza' antslə." Na' yeyejən de'e yoblə gan' zo ben'. Catə' le'in de que bacheyone' xbab güen na' bazoche' binloç na' caguə nochlə yo'o yaz yichjla'aždaogü'e'ens' de'en əgwžon yeyo'on de'e yoblə, nach yeyo'on.

⁴⁵ Nach žjəyetobən yegažə de'e xio' ca' de'en zjənaquə maləç ca len na' txenņə' so'on lo'o yichjla'aždao' be'enə'. Na' šə bagwso'onən ca', bachaquəç mal che be'enə' clezə can' goc che' antslə. Can' goquə len bengə leczə ca'anə' gaquə che le'e mbanle na'a de'en nactecle beņə' la'aždao' mal.

Xna' Jeso'osən' na' biše'e ca' besə'əžine' gan' zoe'

⁴⁶ Necho'ete Jeso'osən' dižə' chsed chlo'ine' beņə' zan quinga, catə' bžin xne'enə' len biše'e ca'. Na' zita'ələ gosə'əbeze' gosə'ənabe' so'elene' le' dižə'.

⁴⁷ Entr beņə' ca' nita' choso'ozenague' xtižə' Jeso'osən', to'e gože' Jeso'osən': —Bablə xna'onə' len bišo'o ca' na' nite'e na'ate chse'enene' əso'elene' le' dižə'.

⁴⁸ Nach Jeso'osən' gože' ben' gwna ca': —Nite' beņə' yoblə beņə' zjənaque' ca xna'anə' na' ca biša'a.

⁴⁹ Nach bli' na' Jeso'osən' blo'e disipl che' ca' na' gože' be'enə': —Beņə' quinga bazjənaque' ca xna'a, na' zjənaque' ca biša'a.

⁵⁰ Can' naquæn len notá'atezə beṇə' chso'one' can' chazlažə' Xa' Diozən' ben' zo yoban', zjənaque' ca xna'a na' ca biša'a na' ca zana'.

13

Jempl che beṇə' gozən'

¹ Na' lao ža na'atezə gwza' Jeso'osən' yo'onə' jəchi'e cho'a nisdə'onə'.

² Nach tant beṇə' zan juisy besə'ədobə gan' chi'ena' xte benən byen gwyo'e gwchi'e to lo'o barcon'. Na' yoguə' beṇə' ca' besə'ədobən' gosə'anite'e lao yoxən'.

³ Nach Jeso'osən' bsed blo'ine' lega'aque' len zan jempl. Na' be'elene' lega'aque' to jemplan', bsaquə'əlebene' xtižə' Diozən' ca trigon'. Nach gwne': —To beṇə' gwze'e zde' güen trigw.

⁴ Na' lao chosə' trigon' baḷən jəsə'əchazən cho'a nez, na' bia žia xile'e bia chaš le'e yoban' gwsa'ob len.

⁵ Na' yebaḷən' jəsə'əchazən ga naquə' lao yej, na' bitotec bi yo žia lao yejən', de'e na'ana' le'e bla'acten.

⁶ Pero na' catə' beža'achgua besə'əcuadən na' le'e gosə'əbižten, la' bitobi loi gwso'on.

⁷ Na' yebaḷən' besə'əgo'onən lao yo ga nchixə xsa yešə' na' bla'aquæn txen len xsa yešə'anə', na' besə'əlolə' yag yešə' ca' lega'aquæn'.

⁸ Na' yebaḷən' besə'əgo'onən lao yo šao' na' bla'aquæn'. Baḷən gosə'əbian to gueyoa güeja, na' yebaḷən' gosə'əbian gyon gueja, na' yebaḷən' gosə'əbian šichoa güeja.

⁹ Le'e žia nagle de'e chene, legwzenag.

Beṇə' ca' cui gwse'ejle'e che Jeso'osən' bsed blo'ine' lega'aque' len jemplan'

¹⁰ Nach gosə'əbiguə' disipl che Jeso'osən' laogüe'ena' na' gwse'ene': —¿Bixchen' chsed chlo'ido' beṇə' quinga len jempl?

¹¹ Na' Jeso'osən' gože' lega'aque': —Diozən' chone' par nič le'e nezele de'en cui no gwneze antslə de que le' nabi'e con notá'atezə beṇə' soe' latja. Pero beṇə' cui chse'ejle'e xtižə'anə' bito chac se'ejni'ine' de que nabi'e beṇə' soe' latja.

¹² Notá'atezə beṇə' choso'ozenague' ca de'en bachzejni'i Diozən' lega'aque', Diozən' gwzejni'ichene' lega'aque' par nič sanch de'en se'ejni'ine'. Pero na' notá'atezə beṇə' cui choso'ozenague' che Diozən' ca de'en chsed chlo'ine' lega'aque', Diozən' yeque'e de'en chse'ejni'ine'ena' la'ana'əczə lata'alasza de'en bagwse'ejni'ine'.

¹³ De'e na'ana' chsed chlo'ida' beṇə' quinga len jemplan' chedə' chesə'əle'ine' de'en chona' pero bito chsa'acbe'ine' bi zejen, na' la'ana'əczə chse'ene' xtižə'anə', bito chse'ejni'ine'en.

¹⁴ Len beṇə' quinga bachac complir can' bzoj de'e profet Isaiazən', gan' nan:

De'e li yenele, pero cabi šejni'ile bi zeje de'en yenele.

Na' de'e li le'ile, pero cabi gacbe'ile bi zejen de'en le'ilen'.

¹⁵ Beṇə' Izrael quinga cuiczə bi rson chsa'aze', bač nažjoczə yichjla'ažda'oga'aque' na'ana'.

Chse'ene' pero bito chse'ejni'ine' bin' zeje de'en chse'ene'.

Na' chesə'əle'ine' pero cabi chsa'acbe'ine' bi zeje de'en chəsə'əle'ine'ena' chedə' bazjanaque' beṇə' la'aždao' žod.

Žala' bito zjanaque' beṇə' la'aždao' žod, gwse'ejni'ine' bi zejen de'en chse'ene'ena', na' sa'acbe'ine' bi zeje de'en chesə'əle'ine'ena'.

Gosyə'ədinjljei xtolə'əga'aque'ena', na' gwso'elje' latja yocobə Diozən' yichjla'ažda'oga'aque'ena' žala' chse'ejni'ine'en na' žala' chsa'acbe'ine'en.

¹⁶ Pero na' le'e ža, lechgualə mbalaz zole chedə' chle'ile de'e ca' chona' na' chacbe'ile bi zejen, na' chzenagle xtižə'anə' na' chejni'ilen.

¹⁷ De'e li achnia' le'e, zan de'e profet na' zan de'e beṇə' ca' yeziquə'əchlə beṇə' boso'ozenag che Diozən' cana' gwse'ene' yesə'əle'ine' de'en chle'ile, pero bitoch goḷə' yesə'əle'ine'en. Na' gwse'ene' əse'ene' de'en chenele pero bito goḷə' se'ene'ena'.

Jeso'osən' gwne' bi zeje jempl che beṇə' güen trigon'

¹⁸ Na' le'e legwzenag, quingan' zeje jempl che beṇə' güen trigon'.

¹⁹ Xtižə' Diozən' gwxaquə'əleben ca de'en byažən'. Nita' beṇə' chse'ene' dižə' can' chon Diozən' chnabi'e con notá'atezə beṇə' chso'e latja, pero bito chse'ejni'ine'en, na' chžin gwxiye'ena' chonən par nič cuič choso'ozenague' che xtižə' Diozən'. De'e na'ana' gwxaquə'əlebəga'aque' ca trigon' de'en jesə'əchaz cho'a nezən'.

²⁰⁻²¹ Na' nita' beṇə' chse'ene' xtižə' Diozən' na' šložga chesyə'əbeine' chso'one'en chega'aque'. Na' catə' choso'ochi' choso'osaquə' beṇə' lega'aque' par nič cui se'ejle'e xtižə' Diozən', le'e chesyə'əbejyichjtie' cuič choso'ozenague' chei. Na' de'en chso'one'en gwxaquə'əleben ca de'en chac che trigon' de'en besə'əgo'onən lao yej.

²² Le'egatezə ca' naquæn len beṇə' ca' chse'ene' xtižə' Diozən', pero na' lao mbanga'aque' yežlyo nga, chesyə'əlal chesyə'əžejene' chso'on xmendadga'aque' por ni che chse'ene' yesə'əni'e. Pero yoguə' de'en chso'one' chxoayaguæn lega'aque', chonən par nič cui čha'oxen

xtižə' Diozən' lo'o yichjla'ažda'oga'aque'ena'. Ca de'en chso'one'ena' gwxaquə'əleben ca de'en chac che trigon' de'en besə'əgo'onən lao yo gan' nchixə xsa yešə'.

²³ Pero yebałə beŋə' chse'enene' xtižə' Diozən' na' chse'ejni'ine'en na' choso'ozenague' chei. Na' de'en choso'ozenague' che xtižə' Diozən' gwxaquə'əleben ca trigon' de'en besə'əgo'onən lao yo šao'. Bałən gosə'əbian to gueyoa güejə, na' yebałən gosə'əbian gyon güejə, na' yebałən gosə'əbian šichoa güejə.

Jempl che trigon' na' bgüeyxtil

²⁴ Gwde na' Jeso'osən' gozo'elene' beŋə' ca' yeto jempl, goze'e lega'aque': —Yełə' gwnabia' che Dioz ben' zo yoban' gwxaquə'əleben ca de'e nga goquə. To beŋə' jeze' trigw biŋnə' yoba che'ena'.

²⁵ Na' do še'elə' catə' cui no gwsa'acbe'i gwyej to beŋə' contr che' jeze' xsa bgüeyxtil gan' banazə xan' yežlyon' trigon', na' beyož goze' bgüeyxtilən' beze'e.

²⁶ Na' tš'i'izə' bla'aquan', na' trigon' gwzolaon chbian. Na' catə' ja'ac xmos xan trigon', gwsa'acbe'ine' nchixə trigon' len bgüeyxtil.

²⁷ Nach jəya'aque' gan' zo xanga'aque'ena' par jəsyə'əyeže'ene': "Señor, ¿acagua trigw biŋnə' gozo' yoba chio'onə'?" ¿Bixchen' nchixən len bgüeyxtilən'?"

²⁸ Nach xanga'aque'ena' gože' lega'aque': "To beŋə' contr chia'anə' jen ca'." Nach xmoše' ca' gwse'ene': "¿Eche'endo' əlazə'əto' bgüeyxtilən'?"

²⁹ Nach xanga'aque'ena' gože' lega'aque': "Bito əlazə'əlen. La' nxož əlazə'əlente trigon'.

³⁰ Ljovennə' par na'a. Guaquə yesə'əcha'on txen, pero na' chona' mendad catə' bagolə yetoble cwsešan', cana' zgua'atec yebele bgüeyxtilən' na' gonlen bnoj par əse'eyən. Nach te na' žjəyetoble trigon' əgwcua'aša'olen."

Jempl che xsa moztas

³¹ Gwde na' gozo'elene' beŋə' ca' yeto jempl, gože': —Yełə' gwnabia' che Dioz ben' zo yoban' gwxaquə'əleben ca to xsa moztas de'en gozə to beŋə' yežlyo che'ena'.

³² Xsa moztasən' naquan le'ebeyožə de'e dao' rizə' lao bitə'əchlə semiy. Pero na' catə' chla'an, chcha'ochən ca bichlə yižə' cuan na' chaquan yag cha'o dao'. Na' xte bia ca' žjəzo xile'e chjse'en ližda'oga'aquəb lao xoze'e ca'.

Jempl che xna' cuazin'

³³ Nach gozoe' yeto jempl, gozne': —Yełə' gwnabia' che Diozən' ben' zo yoban' gwxaquə'əleben ca xna' cuazin' de'en gwlec no'olən' len to rob yezj par nič becha'o doxenən.

Jeso'osən' bzejni'ine' beŋə' porzə len jempl

³⁴ Yoguə' de'e quinga bsed blo'i Jeso'osən' beŋə' ca' besə'əžag gan' zo'ena'. Bsed blo'ine' lega'aque' porzə len jempl, bitobi bichlə gwne' par bzejni'ine' lega'aque'.

³⁵ Ca' ben Jeso'osən' par nič goz complir can' bzoj de'e profetən' che', gan' nan:

Egwsed əgwlo'iga'acda'ane' porzə len jempl,

na' əgwzejni'iga'acda'ane' de'en cui no gwneze antslə de'en bgaša' dezd catə'an gwxe yežlyon'.

Jeso'osən' bzejni'ine' bi zeje jempl che trigon' na' bgüeyxtilən'

³⁶ Na' catə' beyož bsed blo'i Jeso'osən' beŋə' ca' žjəža' gan' zo'ena', bese'e lega'aque', na' beza' le' len disipl che' ca'. Na' catə' besyə'əžine' yo'o gan' nite'ena' besyə'əyo'e lo'ina'. Nach gosə'əbiguə' disipl che' ca' cuite'ena' gwse'ene': —Bzejni'išguei neto' bi zejen jempl che xsa bgüeyxtilən'.

³⁷ Nach Jeso'osən' gože' lega'aque': —Quingan' zejen: Diozən' bsele'e nada' golja' beŋəch na' gwxaquə'əlebeda' ca ben' gozə trigw biŋnə'.

³⁸ Na' doxen yežlyo nga gwxaquə'əleben ca yoba gan' goze' trigw biŋnə', na' beŋə' ca' chso'e latjə chnabia' Diozən' lega'aque' gwxaquə'əlebəga'aque' ca trigw biŋnə'. Na' beŋə' ca' chso'e latjə chnabia' de'e gwxiye'ena' lega'aque' gwxaquə'əlebəga'aque' ca xsa bgüeyxtilən'.

³⁹ Gwxiye'ena' gwxaquə'əleben ca beŋə' contrən' gozə xsa bgüeyxtilən' gan' banyaž trigw biŋnə'. Na' žan' gaquə juisyən' gwxaquə'əleben ca tyempən' yosyo'otobe' trigon'. Na' anglən' žjənaque' ca beŋə' ca' yosyo'otobe' cwsešan'.

⁴⁰ Na' can' gac che bgüeyxtilən' yosyo'otobe'en šeyən', can' gaquə che beŋə' ca' chnabia' de'e gwxiye'ena' lega'aque' catə' əžin ža gaquə juisyən'.

⁴¹ Diozən' bsele'e nada' golja' beŋəch na' catə' əžin žan', nada' əsełə'a angl chia' ca' par yosyo'otobe' yoguə' beŋə' ca' chesə'əgo'oyele'e beŋə' yoblə so'one' de'e malən', na' yosyo'otobte' yeziqə'əchlə beŋə' ca' chso'on de'e malən'. Na' angl ca' yesyə'əbeje' lega'aque' nič cuich nite'e txen len beŋə' ca' bagwso'e latjə chnabia' Diozən' lega'aque'.

⁴² Nach yosə'əsele'e lega'aque' lao yi' gabił gan' se'eye' zejlicəne. Na' lao yesə'əžaglaogüe'ena' yesə'əbežyaše'e na' sa'oyejə leyga'aque'ena'.

⁴³ Na' cana'ach Xancho Diozən' gone' par niçh beṇə' ca' chso'on de'e güennə' nite'e len le' na' əsa'aque' ca yela' chey che'eni' che bgüizən' cata' yesyə'əžine' yoban' gan' chnabia' Diozən'. Le'e žia nagle de'en chene, legwzenag.

Jempl che mech xen de'en ngašə' to lao yežlyo

⁴⁴ Yelə' chnabia' che Diozən' ben' zo yoban' gwxaquə'əleben ca de'e nga goquə. To beṇə' jəyedi'e mech xen de'e ngašə' to lao yežlyo. Nach bocuaše'en de'e yoblə. Na' de'e tant bebeine' de'en jəyedi'e mechən' nach jəyete'e yogua'əloł bi de'e de che' par niçh gwxi'e yežlyon' gan' ngašə' mechən'. Ca mbalazən' gwzo be'ənə' can' mbalazən' nita' beṇə' ca' chso'e latjə chnabia' Diozən' lega'aque'.

Jempl che to perla de'en lechgualə zaque'e

⁴⁵ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Zo to comersyant beṇə' cha'o chsi' na' cheyote'e perlas de'en lechgualə naquən xoche.

⁴⁶ Na' bželene' to perla de'e lechgualə zaquə'ən. Na' leczə beyote'e yogua'əlołte de'en de che' na' gwxi'e perlan'. Ca'aczan' gwxaquə'əlebe beṇə' ca' chsa'acbe'i de que de'e žialao əso'e latjə nabia' Diozən' lega'aque'.

Jempl che yixjw bel

⁴⁷ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Nita' balə beṇə' gwxen bel' ca' na' bosozalə'e yixjw bel' chega'aque'ənə' lo'o nisdə'onə' na' gwxenən yogua' clas bel' ya'a ca'.

⁴⁸ Nach catə' bagwža' bia zannə' lo'o yixjon', besyə'əbeje' yixjon' yobižlə, na' gosə'əbi'e bia ca' zjənaquə güen par əsa'ogüe', na' gosə'əgüe'eb lo'o žomə ca'. Na' bia ca' cui zjənaquə güen, gosə'oçho'one'eb.

⁴⁹⁻⁵⁰ Ca'aczan' gaquə che yogua' beṇə' catə'ən əžin ža gaquə juisyən'. Angl ca' yesə'əbeje' beṇə' mal ca' na' yosə'əzale'e lega'aque' lo'o yi' gabiłən' gan' yesə'əbežyasa'e na' sa'oyejə leyga'aque'ənə' tant yesə'əžaglaogüe'.

⁵¹ Nach Jeso'osən' gože' disipl che' ca': —žEzyejni'ile yogua' de'e ca' bablo'ida' le'e?

Nach gwse'ene': —Zyeyni'ito'on Xanto'.

⁵² Nach Jeso'osən' gože' lega'aque': —Notə'ətezle šə chac chsed chlo'ile Xtižə' Diozən' de'en byoj cana', na' šə leczə chzenagle can' chsed chlo'ida' de que cheyalə' güe'ele latjə nabia' Diozən' le'e, nachən' guac əgwəž əgwlo'ile beṇə' chopten. Na' gwxaquə'əlebele ca to xan yo'o beṇə' napə yogua' de'en chyažj chçhine family che'ənə'.

Jeso'osən' beyejə Nasaretən'

⁵³ Nach catə' beyož be'elen Jeso'osən' disipl che' ca' jempl ca', beze'e latjən' len disipl che' ca'.

⁵⁴ Na' beyejə' Nasaretən' gan' gwcha'ogüe'. Na' jəyeseđ jəyelo'ine' beṇə' ca' lo'o yo'odao' chega'aque'ənə'. Na' lechgualə besyə'əbanene' len xtiž'e'ənə', na' gwse'e ljuəžjga'aque': —žNacxa goquan' nezene' de'e ca' de'en naquə de'e sin'? na' žnacxa chac chone' miłagr ca' chone'?

⁵⁵ Nombi'achone', la' naque' xi'in carpinterən'. Na' xne'ənə' naque' no'olən' le' Maria. Nombi'acho beṇə' biše'e Jacobən', Jwsen', Simonna' na' Jodasən'.

⁵⁶ Na' leczə beṇə' zane' ca' nita' lažcho nga. žNacxa chaquən' cho'e dižə' ca' ža, na' chacte choe' miłagr?

⁵⁷ Na' de'en gwso'one' xbab de que Jeso'osən' naque' con to beṇə' gwlaž chega'aque', de'e na'ana' bito gwse'ejle'e che'. Nach gože' lega'aque': —La'anə'acza beṇə' zan chse'ejle'e che beṇə' ca' chso'e xtižə' Diozən' na' chso'e lega'aque' yelə' bala'an, beṇə' gwlaž chega'aque' ca' na' family chega'aque' ca' bito chse'ejle'e chega'aque'.

⁵⁸ Na' Jeso'osən' bene' con to chopzə miłagr Nasaretən' chedə' bito gwse'ejle'e che'.

14

Quingan' goquə got Juan ben' bçhoa beṇə' nis

¹ Na' ca nan' Erodən' ben' naquə goberṇador che Galilean', benene' dižə' ca' naquə yogua'əloł de'e güen de'en chon Jeso'osən'.

² Nach gože' xmosə' ca': —Bengan' de'e Juannə' ben' bçhoa beṇə' nis. Babebane' ladjo beṇə' guat ca' na' de'e na'anə' chac chone' miłagr ca'.

³⁻⁴ Quingan' goquə gwso'ote' Juannə': Erodən' beque'e Erodiasən' ca xo'ole', len Erodiasən' naque' xo'olə Lip biše'ənə'. Na' Juannə' gože' Erodən': “Malan' beno' beca'o no'ol che beṇə' bišo'on par naque' xo'olo'.” Na' de'en gož Juannə' Erodən' ca' de'e na'anə' Erodən' bene' mendađ gosə'əzene' Juannə' na' gosə'əgüe'ene' ližya na' bosə'əcheje' ni'ane'e ca' gden.

⁵ Erodən' gone'ene' gote' Juannə', pero bitobi benene' le' chedə' bžebe' bi so'on beṇə' ca' gwse'ejle'e che Juannə' de que cho'e xtižə' Diozən'.

⁶ Pero na' catə' gwso'one' lni ža la Erodən', bi'i no'ol che Erodiasən' bya'abo' lao beṇə' ca' gwniṭə' lniṇə'. Na' lechgualə bebei Erodən' can' bembo'onə'.

⁷ Na' tant beyazlažə' Erodən' can' bya'a no'ol güegon', bzoe' jorament de que aḡwnežjue'ebo' bitə'ateza əṇabebo' le'.

⁸ Na' por consejw che xna'abo'onə' gožbo' Erodən': —Beṇ nada' ṇa'atec ṇa'a yichj Juannə' ben' chchoa beṇə' nis žian to lao plat.

⁹ Na' gwzo Erodən' trist catə' beyož gož no'ol güegon' le' ca', pero na' ca naquə babzoe' jorament len lebo' lao beṇə' ca' zjənaquə combidən', benšaze' mendad gaquə can' gwṇabe no'ol güegon' le'.

¹⁰ Ca' goquan' bene' mendad jəsə'əchogue' yen Juannə' lo'o ližya gan' yo'enə'.

¹¹ Na' bosə'ožie' yichj de'e Juannə' to lao plat par jso'en lao bi'i no'olən' na' bnežjwbo'on xna'abo'onə'.

¹² Nach disipl che de'e Juannə' jəsya'əxi'e cuerp che'enə' na' jəsə'əcuəše'en. Gwde na' ja'aque' gan' zo Jeso'osən' na' jse'eže'ene' can' bagoquan'.

Jeso'osən' bguaogüe' gueya' mil beṇə'

¹³ Na' cata' bene Jeso'osən' can' goquə che de'e Juannə', beze'e latjən' len disipl che' ca' na' besya'əyo'e to lo'o barcw par jəya'aque' latjə dašən' de'en de yešl'a'alə nisdə'onə'. Na' beṇə' ca' ža' yež ca' zjəchi' gałə'əzə nisdə'onə' gwse'enene' rson galən' bazjəda Jeso'osən'. Na' gwsa'aque' lažga'aque'enə' ja'aque' yobižlə jəsə'əšague' Jeso'osən' yešl'a'alə nisdə'onə'.

¹⁴ Na' cata' bžin Jeso'osən' cho'a nisdə'onə', ble'ine' beṇə' zan ca' na' beyaša' beži'ilaže'e lega'aque'. Na' beyone' yoguə beṇə' ca' chsa'acšene.

¹⁵ Na' cata' bachal, gosə'əbiguə' disipl che' ca' laogüe'enə', na' gwse'ene': —Zocho to latjə ga cui no nla', na' bagwde or par gaocho xgüe. Bselə' beṇə' quinga yež ca' de'en zjəchi' gałə'əzə par nič žjəsə'ədilje' de'e se'ej əsa'ogüe'.

¹⁶ Na' Jeso'osən' gože' lega'aque': —Bitə cheyałə žjəya'aque'. Le'e güe'ega'aque' de'e se'ej əsa'ogüe'.

¹⁷ Nach gwse'ene': —Chopga beł ya'a chechon' de na' gueya'əga yetxtil.

¹⁸ Nach Jeso'osən' gože' lega'aque': —Le'e žjəxi'in ni.

¹⁹ Nach ben Jeso'osən' mendad gosə'əbe' beṇə' zan ca' lao yixye daquə'anə'. Na' gwxi'e yetxtil ca' gueya' na' beł ya'a ca' chopə. Na' bgüie' yobalə be'e yelə' choxcwlen che Diozan'. Gwde na' bzoxje'en nach bnežjue'en disipl che' ca' par gosə'əyise' che che beṇə' ca'.

²⁰ Na' yogue'e gwsa'ogüe'en xte ca gwse'eljene'. Nach pedas ca' de'en besya'əga'anə', bosyo'otobe'en, na' goquan šižin žomə.

²¹ Na' beṇə' ca' gwsa'o yetxtilən' naquə ca do gueya' mil beṇə' byo cui cuent no'olə na' cui cuent bidəo'.

Jeso'osən' gwze'e tlaə nisdə'onə'

²² Gwde na' Jeso'osən' bene' mendad yesya'əyo'o disipl che' ca' lo'o barcon' par yesya'əbialəogüe' yesya'əlague' e yešl'a'alə nisdə'onə' žlac bega'an le' bzeine' beṇə' zan ca' dižə'.

²³ Na' beyož bzei Jeso'osən' beṇə' ca' dižə', gwlo'e' to lao ya'a par jene' orasyon toze'. Dezd gołte gwzo tozə Jeso'osən' lao ya'anə'.

²⁴ Na' ca naquə barcon' gan' zesya'əyo'o disipl che' ca', bazdan gwcholte nisdə'onə', nžiguə'əxaxj nisan' len chedə' chas chatə' nisdə'onə' por ni che chečj be'enə' clelə.

²⁵ Na' do šbal' beyetj Jeso'osən' ya'anə' na' gwze'e tlaə nisdə'onə' par gweyje' galən' zja'ac disipl che' ca'.

²⁶ Na' catə' besə'əle'i disipl che' ca' le' zde' lao nisdə'onə', lechgualə besa'əžebe' xte gwso'osye'e gosə'əne': —Ito beṇə' guat chle'icho chda tlaə nisan'!

²⁷ Na' le'e bolgüižte Jeso'osən' lega'aque', gože': —Leyebel. Nada'anə'. Bitə žeble.

²⁸ Nach Bedən' gože'ene': —Xantə', šə le le'enə', gwna nada' sa'a tlaə nisdə'onə' yida' gan' zo'onə'.

²⁹ Nach gož Jeso'osən' le': —Da Bed.

Na' le'e bchojte Bedən' lo'o barcon' na' gwzoləo gwze'e tlaə nisdə'onə' par zde' gan' zo Jeso'osən'.

³⁰ Pero na' catə' gocbe'ine' ca fuertən' chečj be'enə', bžebe' na' gwzoləo chyiše'e lo'o nisan'. Nach bisye'e gože' Jeso'osən': —Xana', bosla nada', bachetjə' xan nisan'.

³¹ Na' le'e blite na' Jeso'osən' bexe'ene'. Nach gože' Bedən': —Bixchen' gocžejlažo'o? Gweyje'ech chia'.

³² Na' catə' beyo'o Jeso'osən' len Bedən' lo'o barcon', le'e gwlezte be'enə'.

³³ Na' beṇə' ca' ža' lo'o barcon' gwso'elaogüe'e Jeso'osən', gwse'ene': —De'e liczə len' naco' Xi'in Diozan'.

Jeso'osən' beyone' beṇə' chsa'acšene beṇə' nita' Genesaret

³⁴ Nach gwza'ach barcon' xte bžinən cho'a nisdə'onə' to latjə de'en nzi' Genesaret. Na' besyə'əchoje' lo'o barcon'.

³⁵ Na' beṇə' ža' do Genesaretən' besyə'əyombi'e Jeso'osən', na' bosə'əsəle'e rson yoguə' yež ca' de'en zjəchi' galə'əza de que Jeso'osən' babžine' lažga'aque'enə'. Na' beṇə' ca' ža' yež ca' gosə'əče'e yoguə' beṇə' chsa'acšene lao Jeso'osən'.

³⁶ Nach gosə'əṇabene' Jeso'osən' šə güene'ene' yesə'əgane' lox xadoṇ che'enə'. Na' yoguə' beṇə' ca' gosə'əgan len besyə'əyaquene'.

15

Dižə' de'en chchoj cho'achon' chonən manch la'ažda'ochon'

¹ Na' bałə beṇə' fariseo ca' na' beṇə' ca' choso'osed choso'olo'i lei de'en bzoj de'e Moisezən' gwsa'aque' Jerosalennə' na' besə'əžine' gan' zo Jeso'osən', na' gwse'ene':

² —žBixchen' disipl chio' ca' bito chesə'ənaogüe' costombr ca' de'en bosyo'ocua'anlen de'e xaxta'ochə ca' chio'o? žBixchen' cui chosyo'one'e zan las antslə ze'e sa'ogüe' can' chonto'?

³ Nach Jeso'osən' gože' lega'aque': —Ca naquə le'e ža, žbixchen' chbejyichjle cui chonle can' non Diozən' mendad goncho na' con naozechle costombr chelen'?

⁴ Diozən' none' mendad can' goncho, gwne': "Le'e gwnežjo yełə' bala'an xaxna'ale", na' "Notə'ətezle šə chžia chniti'əle xaxna'ale cheyalə' gatle."

⁵ Pero le'e nale de que šə beṇə' əne' de que babnežjue' Diozən' mech o bien de'en cheyalə' əgwnežjue' xaxne'enə' par gaqualene' lega'aque', na' bitoch bi cheyalə' əgwnežjue' xaxne'e.

⁶ Na' de'en chonle ca', bachonle lei che Diozən' ca to de'e cui bi bi zaquə'e ničh ca' naozechle costombr chelen'.

⁷ Le'e nacle beṇə' goxoayag. Chonle cayanə'an bzoj de'e profet Isaiazən' chele, gan' nan:

⁸ Beṇə' Izrael ca' chesə'əne' de que nada' Diozən' chso'elaogüe'e,

pero caguə do lažə'əga'aque'en chso'elaogüe'e nada'.

⁹ Bitoi zejen de'en chso'elaogüe'e nada'

čhedə' la' choso'osed choso'olo'ine' beṇə' costombr de'en gwsa'aljlažə' beṇə'achən'.

¹⁰ Nach Jeso'osən' bozolgüiže' beṇə' zan ca' zjənžaguən' par ničh gosə'əbigue'e laogüe'enə', na' gože' lega'aque': —Legwzenag de'e nga ənia' le'e ničh šejni'ilen'.

¹¹ Bito ṇacho de que de'en che'ej chaochon' chonən manch la'ažda'ochon'. Echnia' le'e, dižə' de'en chchoj cho'alen', lenṇə' chonən manch la'ažda'olen'.

¹² Nach gosə'əbiguə' disipl che Jeso'osən' laogüe'enə' gwse'ene': —žEbito goche'ido' de que beṇə' fariseo ca' lechguale besə'əže'e cata' gwse'enene' xtižo'onə'?

¹³ Na' Jeso'osən' gože' lega'aque': —Gwžin ža cata' Xa' Diozən' ben' zo yoban' gwžiyai'e yoguə'əloł beṇə' cui choso'ozenag che'. Egwžiyai'e lega'aque' can' choncho cata' chlāžə'əcho yixə' ca' chla'ac lo'o yel.

¹⁴ Ljosə'əye beṇə' fariseo ca'. Zjənaquəga'aque' ca to beṇə' lchol beṇə' chene'ene' cue'e nez yeto beṇə' lchol. Chso'onczə yichjlaoga'aque' cui choso'ozenague' che Diozən' na' choso'osedene' beṇə' de'en cui naquə de'e li. Nezeche de que beṇə' lcholən' bito gaquə cue'e nez yeto beṇə' lchol la' txennə' žjəšə'əbixə' to lo'o yech.

¹⁵ Nach Bedən' gože' Jeso'osən': —Bzejni'išguei neto' bi zejen de'en gwnao' de que de'en che'ej chaochon' bito chonən manch la'ažda'ochon'.

¹⁶ Nach gož Jeso'osən' lega'aque': —žElecə lenle bito chejni'ile de'e quinga bagwnia' le'e?

¹⁷ žEcabi nezele de que yoguə' de'en che'ej chaochon' chjche'en lo'o le'echon' na' chžin or cheden'?

¹⁸ Pero əchnia' le'e, yoguə' dižə' de'en cho'echon' chsə'əchojən yichjla'ažda'ochon', na' šə cho'echo dižə' malən', len chso'onən manch yichjla'ažda'ochon'.

¹⁹ Na' lo'o yichjla'aždao' beṇə'ch na'anə' chchoj yoguə' xbab mal quinga, ca de'en nan so'ote' beṇə', na' nan yoso'ogo'o xtoga'aque', na' nan yesə'əbejyichj'no'ol chega'aque' o ben' čhega'aque' par yesyə'əzolene' beṇə' yoblə na' nan yesə'əbanga'aque' bi de che beṇə', na' nan so'onlažə'əga'aque', na' nan yoso'ožia yoso'onite'e ljuežj beṇə'chga'aque'.

²⁰ Xbab mal ca' zjənac ca' chso'onən manch yichjla'ažda'ochon'. Na' bito əṇacho de que de'en cui chona'cho zan las antslə ze'e gaoch chonən manch yichjla'ažda'ochon'.

To no'olə cui naque' beṇə' Izrael chonlilaže'e Jeso'osən'

²¹ Beza' Jeso'osən' latjan' len disipl che' ca' par ja'aque' galə'əza gan' mbane Tiro na' Sidon.

²² Na' to no'olə beṇə' cui naquə beṇə' Izrael, gwze'e gan' mbane Tiro na' Sidon par jašague' Jeso'osən'. Na' gwne' zižjo gože' Jeso'osən': —Xana', le' naco' xi'in dia che de'e Rei Dabin'. Beyašə'əšguei neto'. To bi'i no'olə chia' yo'o yaz to de'e xio' lo'o yichjla'ažda'obo'onə' na' lechguale chžaglaobo'.

²³ Pero Jeso'osən' bito boži'e xtižə' no'olən'. Nach disipl che Jeso'osən' gosə'əbigue'e cuite'ena' na' gwsa'atə'əyoine' le' gwse'ene': —Bosa'aşa no'olən' la' con naogüe' chio'o na' chatə'əyoine' le' zizjo par gaqualeno'one'.

²⁴ Nach Jeso'osən' gože' lega'aque': —Diozan' bsele'e nada' gaqualena' nasyon Izrael na'azən', la' lega'aque' gwxaqua'əlebəga'aque' ca xilə' dao' bia zjənaquəžeje.

²⁵ Nach no'olən' bgüigüe'e bzo xibe' lao Jeso'osən', na' gože'ene': —Xana' go'onšguei goclen neto'.

²⁶ Na' Jeso'osən' gože'ene': —Bito naquən güen yeca'acho yelə' guao che xi'incho na' agwnežjwchon gao xicoda'ocho.

²⁷ Na' gocbe'i no'olən' bsaqua'əlebe Jeso'osən' beṇə' ca' cui zjənaquə beṇə' Izrael ca beco', nach gože'ene': —Leiczədo' Xana'. Pero xicocho ca' guaqua' əsa'ob pedas de'e chesə'əxopə lao yon'.

²⁸ Nach Jeso'osən' gože'ene': —No'olə, lechguale chonlilažə'o nada'. Guaqualencza' le' can' che'endo'.

Na' lao or na' beyaque xi'in no'olən'.

Jeso'osən' beyone' beṇə' zan beṇə' chsa'acsene

²⁹ Gwde na' Jeso'osən' na' disipl che' ca' besa'aque' latjən' na' gwso'e nezən' de'en zda tcho'a nisdəo' Galilean'. Nach gwse'epe' to lao ya'a na' jesə'əchi'e lao ya'anə'.

³⁰ Na' besə'əžin beṇə' zan lao ya'a gan' zo Jeso'osən' len disipl che' ca'. Zjanche'e no beṇə' coj, na' no beṇə' lchol, na' no beṇə' mod, na' no beṇə' nchog ni'ana'aga'aque', na' zjəlen beṇə' chse'i gwde gwde yižgüe' na' bosonite'e lega'aque' lao Jeso'osən'. Na' Jeso'osən' beyone' yogue'e.

³¹ Na' lechguale besyə'əbane beṇə' ca' catə' besə'əle'ine' can' ben Jeso'osən' beyone' beṇə' ca'. Besyə'əbanene' can' besyə'əne beṇə' mod ca', na' besyə'əyague beṇə' ca' zjənchog no ni'ana'aga'aque'ena', na' besyə'əda beṇə' coj ca', na' besyə'əle'i beṇə' lchol ca'. Nach yoguə'əlo beṇə' ca' gwso'elaogüe'e Diozan'.

Jeso'osən' bguaogüe' tap mil beṇə'

³² Gwde na' Jeso'osən' goxe' disipl che' ca' na' gože' lega'aque': —Lechguale cheyašə'əda' beṇə' quinga. Bagoc šonə ža nite'e nga len chio'o, na' bitobi de de'e sa'ogüe'. Na' bito che'enda' yosa'aga'aca'ane' sin cui sa'ogüe' par ničh cui yesyə'əcho'lene' tnezən'.

³³ Nach disipl che' ca' gwse'ene': —Gan' zocho nga naquən to latjə ga cui nono nla'. ¿Gaxa əželecho de'e əsa'o yoguə' beṇə' zan quinga?

³⁴ Nach Jeso'osən' gože' lega'aque': —¿Balə yetxtil chechon' de'?

Nach gwse'ene': —Gažga yetxtil dao' zjəde na' to chopga bel ya'a dao'.

³⁵ Nach Jeso'osən' bene' mendad yesə'əbe' beṇə' ca' lao yon'.

³⁶ Na' gwxi'e yetxtil dao' ca' gažə na' len bel ya'a dao' ca', nach be'e yelə' choxcwlen che Diozan'. Gwde na' bzojje'en bnežjue'en disipl che' ca' par gwso'e che yoguə' beṇə' ca'.

³⁷ Na' yogue'e gwsa'ogüe' xte ca' gwse'eljene'. Nach pedas ca' de'en besyə'əga'anə' bosy'o'toba disipl ca' len, na' goquən gažə žomə.

³⁸ Na' beṇə' ca' gwsa'o yetxtilən' naquə tap mil beṇə' byo, bito cuent no'olə na' bito cuent bidəo'.

³⁹ Nach Jeso'osən' bose'e beṇə' ca'. Gwde na' gwyo'e to lo'o barcw len disipl che' ca' na' ja'aque' distrit gan' nzi' Magdala.

16

Gosə'ənabene' Jeso'osən' gone' to de'e yesə'əle'ine' le'e yoban'

¹ Na' goquan' balə beṇə' fariseo ca' na' beṇə' sadoseo ca' gosə'əbigue'e gan' zo Jeso'osən'. Na' gosə'ənabe' gone' to miłagr de'en yesə'əle'ine' le'e yoban' de'en gwsa'aque'ne' cui gaquə gone'.

² Nach Jeso'osən' gože' lega'aque': —Catə' chle'ile nlatjəcha le'e yoban' še'elə nach nale: “Goža'a gwxe chedə' nlatjəcha.”

³ Na' šə chi' bejw catə'an che'eni' nach nale: “Guaquə zag, la' chi'ichgua bejw.” Beṇə' goxoayag le'e. Nezele šə guaquə zag o šə guaquə zeyə' catə'an chle'ile nac naquə le'e yoban', pero cabi chache'ile bi zeje de'e ca' chon Diozən' tyemp nga zocho na'a.

⁴ Le'e mbanle na'a lechguale beṇə' la'aždao' mal nacle, na' bagwlejyichje Diozən'. De'e na'anə' chnəble gona' to de'e le'ile le'e yoban' par ničh ənezele šə Diozən' bsele'e nada'. Pero bito gona' can' chnəblenə'. De'en gon Diozən' len nada' par ničh ənezele de que le'ena' bsele'e na' gwxaqua'əleben ca' de'en bene' len de'e Jonasan' ben' be' xtižə' Diozən' cana'.

Na' beyož gwna Jeso'osən' ca', beze'e len disipl che' ca' gan' nitə' beṇə' ca'.

De'en chsed chlo'i beṇə' fariseo ca' na' beṇə' sadoseo ca' gwxaqua'əleben ca' xna' cuazin'

⁵ Na' catə' besə'əžine' yešl'a'alə nisdəo' Galilean', disipl che' ca' gwsa'acbe'ine' de que gwsa'anlaže'e yetxtil de'en asa'ogüe'.

⁶ Nach Jeso'osən' gože' lega'aque': —Legəpə cuidad len xna' cuazi che beṇə' fariseo ca' na' che beṇə' sadoseo ca'.

⁷ Pero disipl che' ca' bito gwse'ejni'ine' bi zeje de'en gože' lega'aque' ca', nach gwse' ljuežjga'aque': —Gwne' ca' cheda' gonlažə'əcho gua'acho yetxtilən'.

⁸ Na' Jeso'osən' goche'ine' xbab de'en chso'one', nach gože' lega'aque': —ĴBixčhen' chonle xbab che yetxtilən' de'en gonlažə'əle? ĴEcabi ne'e šejle'ele de que napa' yeļə' guac par guaogua' le'e?

⁹ ĴEbito chejni'ile bi zeje miļagr ca' chona'? na' Ĵəbagonlažə'əle can' bguaogua' gueya'a mil beṇə' byo len gueya'əzə yetxtil dao'? ĴEna' lecza bito za'alaza'əle do balə žomə pedas yetxtil ca' betoble de'en besya'əga'an?

¹⁰ Na' Ĵchexa tapa mil beṇə' byo ca' bguaogua' len gažə yetxtil dao'? ĴEza'alaza'əle balə žomə pedas yetxtil can' betoble gwde besya'ədaogüe'enə'?

¹¹ ĴBixčhen' con benle xbab che yetxtilən' catə'an gwnia' le'e gaple cuidad len xna' cuazi che beṇə' fariseo ca' na' che beṇə' sadoceo ca'?

¹² Nach disipl che' ca' gwsa'acbe'ine' de que Jeso'osən' caguə bi'e dižə'an ca' che xna' cuazin' de'en chəsə'əchine' par checha'o yetxtilən' sino bi'e dižə'an ca' par ničh cui yoso'ozenague' che de'en choso'osed choso'olo'i beṇə' fariseo ca' na' beṇə' sadoseo ca'.

Bedən' gwne' che Jeso'osən' de que Diozən' bsele'ene' par gaqualene' nasyon Izraelən'

¹³ Jeso'osən' len disipl che' ca' ja'aque' gan' mbane to syoda de'en nzi' Sesarea de Filipo. Nach Jeso'osən' gože' lega'aque': —De'e li Diozən' bsele'e nada' golja' beṇəčh. Pero Ĵbi chesə'əna beṇə'? Ĵnon' naca' nada'?

¹⁴ Nach gwse'ene': —Baļe' chesə'əne' de que naco' de'e Juan ben' bchoa beṇə' nis. Na' yebaļe' chesə'əne' de que naco' Liaz ben' be' xtižə' Diozən' cana'. Na' yebaļe' chesə'əne' de que naco' de'e profet Jeremias, o de que naco' yeto' beṇə' be' xtižə' Diozən' cana'ate.

¹⁵ Nach gože' lega'aque': —Chexa le'e, Ĵbi nale non' naca' nada'?

¹⁶ Simon Bedən' gože'ene': —Len' naco' Crist ben' gwlej Diozən' par gaqualeno' nasyon chechon', na' naco' Xi'in Dioz ben' zo zejlicane.

¹⁷ Nach Jeso'osən' gože'ene': —Simon xi'in Jonas, mbalaz zo' de'en gwnao' de'e ca'. Notono beṇəčh bzejni'i le' de'e ca', tozə Xa' Diozən' ben' zo yoban', le'ena' babzejni'ine'en le'.

¹⁸ Na' nada' ania' de que len' lio' Bed na' zejen dižə' yej. Na' can' nao' chejli'o chia' gwxaquə'əleben ca to yej gual de'e gaquə gwčhinchō par lan yo'o. Na' nada' yetoba' beṇə' zan beṇə' se'ejle'e de que naca' Xi'in Dioz can' chejli'o chia' par ničh ca' əsa'aque' tozə yoso'ocoda' ljuežje' so'elaogüe'e nada'. Na' bitobi gaquə so'on de'e xio' ca' par ničh əžin ža cats' cuich no so'elao' nada'.

¹⁹ Na' gona' lao na'o zgua'atec le' go'o xtižə'anə' len beṇə' zan par ničh əso'e latja nabia' Diozən' lega'aque', Dioz ben' zo yoban'. Na' lecza gaquən lao na'o yo'o beṇə' ca' yoso'ocoda' ljuežje' so'ela'ogüe'e nada' bin' naquə güen so'one' na' ye'ega'aco'one' bi de'e ca' cui naquə güen so'one'. Na' Diozən' əgwzejni'ine' le' naquən' ye'ega'aco'one' par ničh ca' yediļən len de'en na Diozən'.

²⁰ Nach Jeso'osən' bene' mendad len lega'aque' de que ni toe' cui əso'e dižə' de que le' na'anə' naque' Crist ben' gwlej Diozən' par gaqualene' nasyon chechon'.

Jeso'osən' gwdixjue'ine' disipl che' ca' de que so'ot beṇə' le'

²¹ Na' ža na' Jeso'osən' gwzolaogüe' bsd blo'ine' disipl che' ca' de que cheyaļə' šejje' Jerosalenna' na' gaque' lao na' beṇə' golə blao che nasyon Izrael chechon', na' lao na' bxož əblao checho ca', na' lao na' beṇə' ca' choso'osed choso'olo'i lei de'en bzoj de'e Moizezan'. Na' gwne' de que yogua' beṇə' ca' de'e zan de'e yosə'əchi' yosə'əsaque'e le' na' əso'ote' le'. Pero na' yeyon ža yebane' ladjo beṇə' guat ca'.

²² Nach Bedən' gwleje' Jeso'osən' lata' dao' ca'alə na' gože'ene': —Xana', Diozən' gaqualene' le'. Bitoczə gac chio' de'e quinga nao' nga.

²³ Pero na' Jeso'osən' gwyečhe' bgüie' Bedən' na' gože' gwxiye'enə' de'en chnabia' yichjla'aždao' Bedən': —Gwchi'ižə' ca'alə Satanas.

Nach gože' Bedən': —Bito che'endo' gona' can' non Diozən' mendad gona'. Chono' xbab che de'en chacdo' gaquən güen na' bito chono' xbab naquən' chene'e Diozən' gaquə.

²⁴ Gwde na' Jeso'osən' gože' disipl che' ca': —Notə'ətezle šə che'enele gonlilažə'əle nada' na' gwzenagle chia' cheyaļə' əchoj yichjle de'en chene'ele gon cunle par ničh gonle con can' chene'e Diozən' na' bitobi gaquele che de'en chi' saquə'əle, la'anə'əczə šə so'ot beṇə' le'e to le'e yag coroz con gonlilažə'əle nada'.

²⁵ Notə'ətezə beṇə' chaquene' gone' par niḥ cui chi' saque'e o par niḥ cui no so'ot le', be'enan' cuiayi'. Na' notə'ətezə beṇə' chsanlažə' cuine' chi' saque'e o so'ot beṇə' le' por ni chia', be'enan' əbane' zejlicane.

²⁶ Bitobi de'e güen gaquə che to beṇə' la' ana'əczə nabi'e doxen yežlyon' šə cuiayi'e zejlicane, la' bitə'ətezə de'e gatə che', bito gaqualenən le' par niḥ cui cui'ayi'e zejlicane.

²⁷ Diozən' bsele'e nada', golja' beṇəḥ, na' cata' yida' yežlyo nga de'e yoblə nsa'a yelə' chey che'eni' che Xa' Diozən' na' chi'a angl' chia' ca', cana'ach gona' par niḥ to to beṇəḥan' nite'e mbalaz o yesə'əzi'e castigw segon de'e gwso'on to toga'aque'.

²⁸ Diozən' bsele'e nada' golja' beṇəḥ. Na' de'e li chnia' le'e, baḷle cabinə' gatle catə'an le'ile nada' yida' de'e yoblə par yedəlo'a yelə' gwnabia' chia'anə'.

17

Jeso'osən' goque' ca to de'e chey che'eni'

¹ Gwde xop ža gwna Jeso'osən' de'e ca', gwche'e Bedən' len Jacobən' na' Juan beṇə' bišə' Jacobən', ja'aque' to lao ya'a siba.

² Na' lao nite'e lao ya'anə' beža' can' goquə Jeso'osən', beža'ateczə cho'alaogüe'enə' na' gwye' gwye'eni'in ca'acžən' chac bgüižən', na' xalane'enə' beyaquən šyiš xilə' ca'acžə be'eni'.

³ Na' goquan lao nite'enə' conczə besə'əle'ine' de'e Moizežən' len profet Liažən' ben' gwzo cana', na' chso'elene' Jeso'osən' dižə'.

⁴ Nach Bedən' gože'ene': —Xantə', güenchgua zocho nga na'a. ĺEgüe'endo' gonto' šonə ranš? ton par le', na' ton par Moizežən' na' yeton par Liažən'.

⁵ Ne'e cho'ete' dižə'anə' catə'əczla to bejw de'en chactit bcuašə'an lega'aque', na' lo'o bejon' gwse'enene' gwna Diozən': —Benga Xi'ina' ben' chacchgüeida' chei. Cheba chezaquə'əlažə'a len le'. Che le'enə' le'e gwzenag.

⁶ Na' cata' gwse'ene' disipl ca' dižə' ca' lechgualə besə'əžebe', xte jesə'əchaze' goscho'alə lao yon'.

⁷ Nach bgüigua' Jeso'osən' bxoə ne'enə' yichjga'aque'enə', na' gože': —Leyeyas. Bitə žeble.

⁸ Na' cata' besyə'əgüie'enə', notono no nochlə besə'əle'ine' sino tožə Jeso'osən'.

⁹ Na' gwde na' lao chesyə'əyetje' ya'anə', gož Jeso'osən' lega'aque': —Ni tole cui güe'ele dižə' che de'en bable'ile xte catə'əch bagwso'ot beṇə' nada' na' yebana' ladjo beṇə' guat ca', nada' naca' ben' bselə' Diozən' golja' beṇəḥ.

¹⁰ Nach disipl che' ca' gwse'ene': —Beṇə' ca' choso'osed choso'olo'i lein' choso'osedene' neto' de que zgua'atec profet Liaž ben' gwzo cana' cheyalə' yide' lao yežlyo nga de'e yoblə antslə ze'e yidə ben' əselə' Diozən' par gaquəlene' nasyon chechon'. ĺBixchen' chəsə'əne' ca' ža?

¹¹ Nach Jeso'osən' gože' lega'aque': —De'e ĺiczə chəsə'əne' de que zgua'atec yidə profet Liažən' de'e yoblə ben' gwzo cana' par yeyone' yoguə'əloł de'e cheyalə' yeyac.

¹² Pero na'a chnia' le'e de que babidə ben' bedəyən can' ben profet Liažən', na' beṇə' Izrael gwlaž checho ca' bito gwsa'acbe'ine' de que le' naque' ben' naquən yidə. Na' gwso'onene' le' con can' gwse'enene' na' gwso'ote'ene'. Na' ca'acžən' so'one' len nada', Diozən' bsele'e nada' golja' beṇəḥ.

¹³ Nach gwsa'acbe'i disipl che' ca' de que Jeso'osən' cho'e dižə' che de'e Juannə' ben' bchoə beṇə' nis.

Jeso'osən' beyone' to bi'i chaz šon

¹⁴ Na' cata' besə'əžine' gan' zjanžag beṇə' zan, to beṇə' bšague' Jeso'osən' na' bzo xibe' laogüe'enə'. Na' gože'ene':

¹⁵ —Xana' beyašə'əlažə'əšgüie xi'ina' nga. Chazbo' šon na' lechgualə chžaglaobo' len ĺen. Na' zan las bajchazbo' lao yi' na' leczə ca' zan las babxopbo' lo'o nis.

¹⁶ Bajoa'abo' lao disipl chio' ca', pero bito gwsa'aque' yesyə'əyone'ebo'.

¹⁷ Nach Jeso'osən' gože' beṇə' ca' ža'anə': —Le'e chonle clelə na' naljele. ĺBixchhexaczan' cui chejle'ele chia'? Bachac šša zoa' napa' yelə' chxenlažə' len le'e. ĺBatxan' šejle'ele chia'?

Nach gože' xa bida'onə': —Doa' bi'i chio'on ni.

¹⁸ Jeso'osən' gwdiļe' de'e xio'onə' yo'o yaz yichjla'aždao' bida'onə' par niḥ bechojən yichjla'ažda'obo'onə'. Na' lao or na' beyaquebo'.

¹⁹ Na' gwde goc de'e ca', gosə'əbiguə' disipl che Jeso'osən' gan' zoe' toze', na' gwse'ene': —ĺBixchhexaczan' cui goquə yebejto' de'e xio'onə' yichjla'aždao' bida'onə'?

²⁰ Jeso'osən' gože' lega'aque': —Bitə goquə yebejlen chedə' bitə gwyejle'ele de que Diozən' gaquəlene' le'e. Xsa yag moztasən' naquən de'e dao' riza'. Na' de'e li chnia' le'e la' ana'əczə šə de'en chonlilažə'əle Diozən' gwxaquə'əleben ca to xsa moztasən' laogüe de'en cuiṇə' gonlilažə'əchgualene' guac ye'ele ya'a nga: “Gwde gwzo de'e na'ate”, na' gaquə can' chonle mendadən'. Bitə bi bi de de'e cui gaquə gonle con šə chejle'ele de que Diozən' chaclene' le'e.

²¹ Na' par niçh yebejle de'e xio' ca' de'en zjənaquə ca de'en bebeja' yichjla' aʒdao' bi'inə', cheyalə' co'o gwçhejle cui ye'ej gaole na' gonteza gonle orasyon.

De'e yoblə gwdixjue' e Jeso'osən' de que so'ot beṇə' le'

²² Na' lao zjezda' Jeso'osən' len disipl che' ca' do gan' mbane Galilean', Jeso'osən' boszenene' lega'aque' de'en ze'e gac che', gwne': —Diozən' bsele'e nada' golja' beṇəçh, na' gaca' lao na' beṇə'

²³ na' so'ote' nada'. Pero na' yeyon' ʒa yosban Diozən' nada' ladjo beṇə' guat ca'.

Nach disipl che' ca' cata' gwse'ene' xtiže'ena', leçgualə gwnite'e trist.

Jeso'osən' gwdixjue' impuest che yo'odao'

²⁴ Na' cata' besyə'əzine' Capernaunnə', balə beṇə' ca' chəsə'əçhixjue' impuest de'en chəsə'əyixjw to to beṇə' byo Izrael ca' par gast che yo'odao' əblaonə' ja'aque' lao Bedən'. Na' gwse'ene': —Ca naquə maestr chelena', çəgwyixjue' impuest che yo'oda'ona'?

²⁵ Nach gož Bedən' lega'aque': —Gwyixjue'en.

Gwde na' Jeso'osən' len disipl che ca' gwsə'ə lo'o yo'ona'. Nach Jeso'osən' le'e gožte' Bedən': —çBi xbab chono', Bed? Ca naquə rei ca' nitə' yežlyo nga chesə'anabi'e na' chso'one' byen chesə'əyixjw beṇə' che impuest. çNon' chəsə'əçhixjue'en ʒa? çəfamily çhega'aque' o šə beṇə' yoblə?

²⁶ Nach Bedən' gože'ene': —Chəsə'əçhixjue' beṇə' yoblə.

Nach Jeso'osən' gože' Bedən': —Beṇə' zjənaquə family çhega'aque' ca' bitobi chəsə'əyixjue'. Na' ca naquə chio'o ʒa, naccho xi'in Rei ben' zo yoban' na' bito cheyalə çhixjwcho impuest che yo'oda'ona'.

²⁷ Pero na' par niçh notono no so'on xbab de que choncho contr yo'odao' əblaonə', çhixjwcho impuestən'. Gwyey cho'a nisdə'ona', na' gwzalo'o yixjw bel çhio'ona', na' bel nech bian' senə' lo'o cho'ab na' əželdo' to mech. Na' yeyoxon' ʒjatixjo' impuest çhechon'. Gwdiləczən par çhixjwcho impuest che çhopcho.

18

Gwsə'acyožə disipl che' ca' noe' naquəch blaoch

¹ Na' ca orən' gosa'əbigus' disipl che Jeso'osən' cuite'ena', na' gwse'ene': —Entr neto' çnoto' gaquəçhto' blao cata'ən Diozən' ben' zo yoban' gone' par niçh solao nabi'o?

² Na' Jeso'osən' goxe' to bidao' na' bzeche'əbo' laoga'aque'ena'.

³ Na' gože' lega'aque': —De'e li əchnia' le'e, notə'ətezle šə bito əgwša' xbab chelen' par əgwzəxjw yichjle lao Diozən' can' chon bidao' nga chzəxjw yichjbo' lao xaxna'abo', bito gaquə sole len nada' cata' Diozən' ben' zo yoban' gone' par niçh solao nabi'a.

⁴ Na' notə'ətezle šə babeyacle ca bidao' nga laogüe de'en chzəxjw yichjle lao Diozən', banacle beṇə' blao len nada' cata' Diozən' ben' zo yoban' gone' par niçh solao nabi'a.

⁵ Na' notə'ətezle šə chonle güen len notə'əteza bidao' ca bi'i nga laogüe de'en chaquəle çhia', choncze güen len nada'.

Nxož əxopcho goncho de'e mal

⁶ Probçhguazə ben' chon par niçh əxopə to beṇə' chonlilažə' nada' gone' de'e mal, la'əṇə'əczə ben' əxopə bitotec bi zaquə'e len beṇəçhən'. Nca'alə xneze ʒalə əgwçhej yene'ena' to yey yišə na' ʒjəxope' lo'o nisdə'ona' na' gate', cle ca soe' əxope' beṇə' gone' de'e malən'.

⁷ Probçhguazə le'e de'e zan de'e zjəde yežlyo nga de'e chso'on par niçh gonle de'e mal. Bito nəcho de que bitobi de de'e so'on par niçh əxopə le'e bachonlilažə'əle nada'. Pero probçhguazə beṇə' chon ca əxopə beṇə' yoblə gone' de'e malən'.

⁸ Na' de'e na'ana' əchnia' le'e, šə de'en chonle len ni'ana'alen' chonən par niçh əxople gonle de'e malən' güenchlə ʒalə əçhog ni'ana'ale ca' na' cho'onlen cle ca əxople gonle de'e malən'. Nca'alə xneze nacle beṇə' na' çhog o beṇə' coj yežinle lao Diozən' na' əbanle zejlicane cle ca cuiayi'ilenlen txen lao yi' gabilən'.

⁹ Na' šə de'en chle'ile len jelaole chonən par niçh əxople gonle de'e malən' yejni'alə ʒalə' cuejlenə' na' cho'onlen, çhedə' nca'alə xneze nacle beṇə' lçhol yežinle yoban' gan' zo Diozən' na' əbanle zejlicane, cle ca' cuiayi'ilenlen txen lao yi' gabilən'.

Jempl che xilə' bian' goquəžeje

¹⁰ Le'e gon xbab che beṇə' chso'onlilažə' nada' beṇə' cuitec bi zjəzaquə' len beṇəçhən', par niçh cui gonle len notə'əteze' ca beṇə' cui bi zjəzaquə'e. Čhnia' le'e, angl ca' chapə chye' lega'aque' nitə'əteza nite'e lao Xa' Diozən' yoban' gan' zo'ena'.

¹¹ Na' ca naca' nada', Diozən' bsele'e nada' golja' beṇəçh par niçh zedəlo'ida' beṇə' ca' bachəsə'əbiayi' de que nzi'ilažə'a lega'aque'. Bsele'e nada' par gona' ca cui zjəya'aque' lao yi' gabilən' šə so'onlilažə'e nada'.

¹² Na' chnia' le'e, ša nitə' to gueyoa xilə' chele na' gaquəžeje tob, ɬəcabi yocua'anle bia ca' taplalj tɢualj do lao ya'a gan' zjəža'ab na' zjəyediljle bian' goquəžejenə' xte ca yeželeleb?

¹³ Na' achnia' le'e, cata' yeželeleb, yebeichele de'en beželobən' cleza can' chebeile len bia ca' taplalj tɢualj cui gwsa'aczeje.

¹⁴ Ca'aczə naquən len beņə' ca' chso'onlilažə' nada' beņə' cuitec bi zjəzaquə' len beņəçən'. Xəcho Dioz ben' zo yoban' bito chene'ene' cuiayi' ni toga'aque'.

Cheyałə' yezi'ixencho che beņə' bišə'əcho beņə' chso'onlilažə' Diozən'

¹⁵ Šə to beņə' bišə'əle beņə' bachonlilažə' Diozən' chone' de'e malən' contr to le'e, tozle šejle žje'elenlene' dižə' can' naquə de'en chone'ena' par niçh yedinjene'en, na' šə çhaze' rson çhe dižə' de'en žje'elenlene' yezoe' binlo len Diozən' de'e yoblə.

¹⁶ Pero na' šə bito çhaze' rson ca dižə' de'en žje'elenlene', güenç əche'ele yeto o yechopə beņə' bišə'əle par niçh əsa'aque' testigw de que dižə' šao' bagotə'əyoile ben' yoša' xbab che'ena'.

¹⁷ Na' šə bitoczə gwzenague' chele, le'e güe' dižə' ca naquə de'en chone' lao yoguə'əle ncodə' ljuežjle cho'ela'ole Diozən'. Na' šə ni que gwzenagcze' chele, cuiçh gonlene' cuent entr le'e ncodə' ljuežjle cho'ela'ole Diozən'. Pero leğon cuent de que naque' txen beņə' ca' cui chso'onlilažə' Diozən', na' naque' txen len yeziquə'əchlə beņə' ca' chso'on de'e malən' can' chonle xbab che beņə' goçhixjw ca'.

¹⁸ De'e li chnia' le'e, bitə'ətezə de'e əgwixia' le'e ncodə' ljuežjle cho'ela'ole Diozən' par ənale naquən güen so'on beņə' ca' əsa'ac txen len le'e, leczə can' əna Diozən' ben' zo yoban'. Na' bitə'ətezə de'e əgwixiale ənale cui naquən güen so'one', leczə can' əna Diozən' ben' zo yoban'.

¹⁹ Na' leczə ca' chnia' le'e, šə çhople gwixiale bin' ənable lao orasyonnə', le'e nitə'əle yežlyo nga, Xəcho Diozən' ben' zo yoban' goncze' de'en ənabləna'.

²⁰ Na' gan' nžag çhopə šonle cho'ela'ole nada', zoczə' txen len le'e.

²¹ Nach Bedən' bgüigüe'e gože' Jeso'osan': —Xəna', šə beņə' ljuežja' chone' de'e mal len nada' tapteli, žbał las cheyałə' yezi'ixena' che'? ɬəzelao do gaž las?

²² Nach Jeso'osan' gože'ene': —Bito nia' de que cheyałə' yezi'ixenle che' zelao do gaž las. Pero de'en chnia' le'e, bito gonle cuent do bał las yezi'ixenle che beņə' ljuežjlen', con le'e yezi'ixentežə che' yoguə' laste.

Jempl che mosən' ben' cui bezi'ixen che de'en chałə' ljuežje'

²³ Na' a ža, yelə' gwnabia' che Diozən' ben' zo yoban' gwxaquə'əleben ca de'e nga goquə. Zo to rei ben' chsa'alə' xmosə' ca' xmeche'ena'. Na' gone'ene' gone' cuent len leğa'aque'.

²⁴ Na' cata' gwzolaogüe' bezi'e cuent çhe to toga'aque', zgua'atec bžin to xmosə' ben' chałə' zan millon pes.

²⁵ Na' mosən' bito bi xmeche' gotə' par yonežjue'en rein'. De'e na'anə' bene' mendad ta'oga'aque' len xo'olen', na' len xi'inga'aque' ca' na' len doxen de'e zjədeine' par niçh gaquə yosyo'onežjue' de'en chsa'ale'e che rein'.

²⁶ Nach mosən' bzo xibe' lao rein' gotə'əyoine' le', gože'ene': “Xəna', gwdapašga yelə' chxenlažə' len nada', na' yeyona' de'en chałə'a çhio'onə'.”

²⁷ Nach rein' beyaše'ene' le' na' bezi'ixene' che doxen de'en chałə'ena' na' bsane' le'.

²⁸ Pero na' cata' bechoje' liž rein', le'e bežagte' yeto mos beņə' chałə' che' to çhop pes. Nach le'e bnizte' yene'ena' gože'ene': “Yeyono' de'en chałə'o çhia'anə' na'atec n'a'a.”

²⁹ Nach mos ljuežjen' bzo xibe' laogüe'ena', gože'ene': “Gwdapašga yelə' chxenlažə' çhia' na' yeyona' doxen de'en chałə'a çhio'onə'.”

³⁰ Pero na' mos nečan' bito bzenague' che mos ljuežje'ena', le'e gwyejte' jene' mendad gosə'əyixjue'ene' ližya xte ca gatə' de'en yonežjue' che'ena'.

³¹ Na' mos ca' yelə' cata' besə'əle'ine' can' ben mos nečan', leçhɢualə gwnite'e trist. Na' ja'aque' lao rein' jse'eže'ene' yoguə'əloł can' goquə.

³² Nach rein' goxe' mos nečan' laogüe'ene' de'e yoblə, na' gože'ene': “Le' naco' to mos malçhua. Nada' bezi'ixena' che doxen de'en chałə'o çhia'anə' la' gotə'əyoido' nada' yezi'ixena' çhio'.

³³ ɬBixçhen' cui beyašə'əlažə'o mos ljuežjo' ben' chałə'e çhio'onə' can' beyašə'əlažə'a le'?”

³⁴ Na' de'e tant bža'a rein' bene'ene' lao na' beņə' ca' par gosə'əyixjue'ene' ližya gan' əžaglaogüe' xte cata'əch bade de'en chałə'e che rein'.

³⁵ Nach Jeso'osan' gože' disipl che' ca': —Can' gon Xə Diozən' ben' zo yoban' gone' castigw che nota'ətezle cui chezi'ixenle che ljuežjle do yičj do lažə'əle bitə'ətezə de'en chso'onene' le'e.

19

Bito yelə'əcho be'en çecho o no'ol çecho par solencho beņə' yoblə

1 Na' Jeso'osən' catə' beyoʒ gwne' de'e ca', beze'e Galilean' na' gwlague'e yao Jordannə' par beyeje' gan' mbane Jodean'.

2 Na' beṇə' zan jəsə'ənaogüe'ene', na' beyone' beṇə' ca' chsa'acšene.

3 Na' beṇə' fariseo ca' ja'aque' gan' zo'eno' chedə' gwse'enene' yesə'əbeje'ene' dižə' de'e yesə'əchine' contr le', nach gwse'ene': —ǀEde lšens par to beṇə' nšagna' yele'e xo'ole' šə bitə'ətežə de'en chone' cui cho'olažə' be'en che'enə'?

4 Nach gože' lega'aque': —Bablabczle can' nyoj Xtižə' Diozən' nan de que catə'an gwxe yežlyon' Diozən' bene' beṇə' nech ca' beṇə' byo na' no'olə.

5 Na' gwna Diozən': "Beṇə' byonə' le'e xaxne'e par əgwšagne'e si'e to no'olə na' beṇə' ca' yoso'ošagna'anə' əsa'aque' tozə."

6 Bitoch əsa'aque' chopə beṇə', sino que əsa'aque' tozə beṇə'. De'e na'anə' notono zaquə' yole'e lega'aque' la' Dioz nan' banone' lega'aque' tozə cuerp.

7 Nach gwse'ene': —Šə ca' ža, ǀbixchexan' ben de'e Moizežən' mendad catə' to beṇə' yele'e no'olə che'enə', cheyałə' chas to act ga güe'en dižə' de que besyə'ələ'ena'?

8 Jeso'osən' gože' lega'aque': —De'e Moizežən' be'e latjə yela'a no'ol chelen' chedə' nacle beṇə' yičhja'azdao' žod. Pero catə' Diozən' bene' beṇə' nech ca', bito ṇacho gwyazlaže'e yesyə'ələ'aga'aque'.

9 Echnia' le'e, notə'ətežə beṇə' chela'a no'ol che'enə' par yeque'e no'olə yoblə, len nezene' de que no'ol che'enə' bito naque' to no'olə go'o xtoi, tozəczə ca malən' chon be'enə' len de'en chon beṇə' chgo'o xtoe'. Na' notə'ətežə beṇə' yošagna'alene' to no'olə beṇə' belə'a ben' chei le', leczə tozəczə ca malən' gone' len de'en chon be'enə' chgo'o xtoe'.

10 Nach disipl che' ca' gwse'ene': —Šə can' naquan che beṇə' byon' na' no'olən' naplən cuent cui no no gwšagna'.

11 Jeso'osən' gože' lega'aque': —Caguə' yoguə' beṇə' chse'ejni'ine' de'e ngran' sino beṇə' ca' babzejni'i Diozən' lega'aque' bi zejen.

12 Nita' beṇə' cui nan yosə'əšagne'e chedə' gwsa'alje' zjənaque' beṇə' güiž, na' leczə nita' beṇə' cui yosə'əšagne'e laogüe de'en bazjənon beṇə' lega'aque' güiž. Na' leczə ca' nita' beṇə' cui chesə'əšagne'e par nich əso'elažə'əche' so'one' ca əsa'anch beṇə' ca' əso'e latjə ṇabia' Dioz ben' to yoban' lega'aque'. Le'e gwzenag che de'en bagwni'anə' šə baben Diozən' par nich chejni'ilen.

Jeso'osən' bene' orasyon par bidao' ca'

13 Na' ja'ac beṇə' əjsə'e bidao' lao Jeso'osən' par nich əxoa ne'enə' yičhja'acbo'onə' na' gone' orasyon par lega'acbo'. Pero disipl che' ca' gosə'ədile' beṇə' ca' zjənche' bidao'.

14 Nach Jeso'osən' gože' disipl che' ca': —Le'e güe' latjə la'ac bidao' ca' laogua' nga, na' cui əgwžonle. Na' achnia' le'e beṇə' ca' chəsə'əzəxjw yičhja'aque' lao Diozən' ca' bidao' ca' chəsə'əzəxjw yičhja'acbo' lao xaxna'aga'acbo', lega'acze'enə' chso'e latjə chnabia' Diozən' lega'aque'.

15 Na' catə' beyoʒ gwxoə na' Jeso'osən' yičhja'acbo'onə', bene' orasyon par lega'acbo', nach gwyaje' ga yoblə.

Beṇə' güego' ben' goquə beṇə' gwni'a be'elene' Jeso'osən' dižə'

16 Na' goquan' to beṇə' güego' bžine' gan' zo Jeso'osən', na' gože'ene': —Maestr, le' naco' beṇə' güen, gwna nada' bi de'e güennə' cheyałə' gona' par gatə' yelə' mban zejlicane chia'.

17 Jeso'osən' boži'e xtiže'ena', gože'ene': —ǀBixchen' nao' de que beṇə' güen nada'? Dioz nan' naque' le'ezelaogüe beṇə' güen. Pero na' šə che'endo' gatə' yelə' mban zejlicane chio'onə', cheyałə' gono' can' na le' de'en bzoj de'e Moizežən'.

18 Nach be'enə' gože' Jeso'osən': —ǀNoxan' de'e ca' nan ža?

Nach Jeso'osən' gože'ene': —Cui gotle beṇə', cui co'o xtole na' cui cuejyicj be'en chele o no'ol chele par solenle beṇə' yoblə, cui cuanle, bito gacle testigw falš contr sa'aljuežjle.

19 Le'e əgwnežjo yelə' bala'an xaxna'ale, na' legaue che sa'aljuežjle can' chaquele che cuinle.

20 Nach beṇə' güegon' gože' Jeso'osən': —Yoguə'əlo de'e quinga chzenaga' chei dezd xcuidə'ətia'. ǀBixa de'en chaquach falš gona' ža?

21 Jeso'osən' gože'ene': —Šə de'e liczə che'endo' gaco' cayanə'an chene'e Diozən', jəyeyetə' bi de'e de chio', na' mech de'en le'ido' che de'e ca' bnežjon beṇə' yašə' nach da len nada'. Na' catə' yežino' yoban' gan' zo Diozən', so' mbalaz.

22 Pero na' beṇə' güegon' beyoʒ benene' can' gož Jeso'osən' le', beza'achoe' trist chedə' la' to beṇə' gwni'achguan'.

23 Gwde na' gož Jeso'osən' disipl che' ca': —De'e li chnia' le'e, zdebəchgua naquan par to beṇə' gwni'a güe'e latjə ṇabia' Diozən' le'.

²⁴ Na' leczə chnia' le'e, zdebəchlə naquən che to beṇə' gwni'anə' güe'e latjə nābia' Diozən' le' cle ca to camey teb to lo'o nag yešə'.

²⁵ Na' besyə'əbanchgüei' disipl' che' ca' can' gwne'enə', nach gosə'əne': —Notono gaquə yechoj xni'a de'e malən' šə ca'.

²⁶ Jeso'osan' bgüie' lega'aque' nach gože': —Ni to beṇəch cui gaquə yebej cuine' xni'a de'e malən', pero Diozən' chaque'. Le' chac chone' bitə'əteza.

²⁷ Nach Bedən' gože' Jeso'osan': —Neto' bagwlejšyichjto' family cheto' ca' na' len yoguə'əloj de'en deito' par chzenagto' chio'. ¿Bi de'e güen gaquə cheto' laogüe de'en bagwlejšyichjto' family cheto' ca' na' len de'en deito'?

²⁸ Jeso'osan' gože' lega'aque': —De'e li chnia' le'e Diozən' bsele'e nada' golja' beṇəch na' catə' yocobe' yežlyon', nada' cui'a gan' chey che'eni' na' nabi'a, na' yoguə' le'e chonlilažə'əle nada' cue'ele cuita'anə' na' nabi'ale txen len nada'. Na' le'e šižinle nabi'ale family ca' šižin, beṇə' ca' zjənaquə xi'ın dia che de'e Izraelən'.

²⁹ Na' nota'ətezle šə de'en chzenagle chia' bagwlejšyichjle ližle, o bišə'əle, o zanle, o xaxna'ale, o xo'olle, o xi'ınle, o yežlyo chele, Diozən' gone' le'e de'e zaquə'əche cleza ca de'e ca' na' beṇə' ca' gwlejšyichjle. Na' leczə gon Diozən' par ničh əbanle zejlicane.

³⁰ Na' beṇə' zan beṇə' zjənaquə blao na'a gwžin ža catə' cuich əsa'aque' beṇə' blao. Na' beṇə' zan beṇə' cui zjənaquə blao na'a, gwžin ža catə' əsa'aque' beṇə' blao.

20

Jempl che beṇə' güen žin ca'

¹ Nach bossed boslo'i Jeso'osan' lega'aque', gwne': —Yełə' gwnābia' che Diozən' ben' zo yoban' gwxaquə'əleben ca de'e nga goquə. To beṇə' napə to güert gan' ža'achgua yag obas. Na' gwze'e liže'en to zil tempran gwyeye' gan' chac ya'anə', jtijle' mos par so'one' žin lo'o güert che'ena' žana'.

² Na' catə' beyož gosə'əxenlažə' mos ca' de que to denario chixjue' to toga'aque' con ca chac mosan' tza žin, nach bsele'e lega'aque' lo'o güert gan' so'one' žinnə'.

³ Nach do cheda ga gozeje' gan' chac ya'anə', na' ble'ine' nitə'əch beṇə' cui bi bi žin de so'one'.

⁴ Na' gože' lega'aque': “Ležja'ac lo'o güert chia'anə' ležjen žin na' chixjwca' le'e.” Nach ja'ac beṇə' ca'.

⁵ Na' gozeje' de'e yoblə gan' chac ya'anə' do gobiž, nach yeto do cheda šonə, na' bezle'ine' nita' beṇə' cui bi bi žin de so'one'. Nach bozsele'e lega'aque' par so'one' žin lo'o güert che'ena'.

⁶ Na' ca do cheda gueyə' še'elə gozeje' de'e yoblə. Na' bezle'iczene' beṇə' zeznite'e cui bi bi žin de so'one', nach goze'e lega'aque': “¿Bixchen' cui ja'acle güen žin?”

⁷ Nach gwse'ene': “Notono no gwna neto' güen žin.” Nach goze'e lega'aque': “Le'e žja'ac le'e gon žin lo'o güert chia'anə'. Na' chixjwca' le'e.” Nach ja'ac beṇə' ca'.

⁸ Na' catə' bžin or yosa'a xan güertən' xmose' ca', nach gože' mos əblao che'enə': “Beyax beṇə' güen žin ca' par chixjwga'aco'one', solaoteco' chixjo' beṇə' ca' bla'ac bzebe, na' yeyožlo' len beṇə' ca' bla'ac nechte.” Nach ben mos əblaon' can' ben xane'enə' mendad.

⁹ Gwdixjue' zgua'atec beṇə' ca' gosə'əzolaogüe' gwso'one' žin cheda gueyə' še'elə tgüejə denario to toga'aque'.

¹⁰ Na' catə' gwdixjue' beṇə' ca' gosə'əzolaog chso'on žinnə' temprante, gwsa'aque' beṇə' ca' de que chixjoch' lega'aque' de'e scha'och laogüe de'en gosə'əzolaogüe' chso'one' žinnə' temprante. Pero tozəczə can' gwdixjue' yoguə'əlojtega'aque'.

¹¹ Na' catə' beyož gosa'əzi' laxjw beṇə' ca' gosə'əzolaog žinnə' temprante, gwsa'ade'e xan žinnə' dižə'.

¹² Na' de'e tant chesə'əloque' toe' gože' xan žinnə': “Bedo žana' bžaglaochguato' lao de'e zeyə'an bento' žin chio'onə'. Na' tozəczə can' gwdixjo' neto' len beṇə' ca' bla'ac bzebe, len yetor güejgan' gwso'one' žinnə'.”

¹³ Pero na' xan žinnə' gože' be'enə': “Migw chia', bitobi de'e mal chona' contr le'e. ¿Ecaguə tratən' bencho de que to denario chixjua' to tole?”

¹⁴ Laxjon' bagwxio, gwaquə yeyejo'. Bagwdixjua' beṇə' ca' con can' go'onda' la'anə'əczə bla'aque' bzebe.

¹⁵ ¿Bixchen' chacxi'ido' nada' ni che de'en naca' beṇə' güen? Lao na'an naquən gona' con can' che'enda' len de'en deida'.”

¹⁶ Nach Jeso'osan' gože' beṇə' ca' bosə'əzenag jemplan': —Can' naquən, nita' beṇə' bito zjənaque' beṇə' blao na'a pero gwžin ža catə' əsa'aque' beṇə' blao. Na' nita' beṇə' zjənaque' beṇə' blao na'a, pero leczə gwžin ža catə' lega'aque' bitoch əsa'aque' beṇə' blao. Diozən' chaxe' yoguə'əloj beṇə' par se'ejle'e che', pero balgue'en choso'ozenague' che', na' lega'acze' chque'e ca xi'ine'.

De'e yoblə gosyixjue'e Jeso'osən' de que so'ot beṇə' le'

¹⁷ Jeso'osən' na' zan disipl che' ca' zja'aque' par Jerosalennə'. Na' lao zjəngüe'e nezən' Jeso'osən' gwleje' partlə disipl che' ca' šižinnə' na' gože' lega'aque':

¹⁸ —Diozan' bsele'e nada' golja' beṇəçh, na' na'a šejcho Jerosalennə' gan' gaca' lao na' bχoz əblao ca' na' lao na' beṇə' ca' choso'osed choso'olo'i lein', na' yesə'əçhoglaogüe'en chia' de que so'ote' nada'.

¹⁹ Na' leccəə so'one' nada' lao na' beṇə' ca' cui zjənaquə beṇə' Izrael gwlaž checho par so'one' nada' borl, na' yesə'əyine' nada' yid sot, nach tenə' yosə'əde'e nada' le'e yag corozən', pero na' yeyon' ža yebana' ladjo beṇə' guat ca'.

Xna' Jacobən' na' Juannə' gwnabe' yesə'əbe' xi'ine' ca' cuit Jeso'osən' gan' nabi'ena'

²⁰ Na' ja'ac xi'in' Sebedeor' Jacobən' len Juannə' na' len xna'aga'aque'ena' lao Jeso'osən'. Na' xna'aga'aque'ena' bzo xibe' lao Jeso'osən' gože'ene': —Chṇabda' le' to goclen.

²¹ Nach Jeso'osən' gože'ene': —žBi goclenṇə' che'endo' gona'?

Nach xna'aga'aque'ena' gože'ene': —Che'enda' gono' par niçh xi'ina' quinga yesə'əbi'e šļa'a güeja' cuito'on catə' əžin ža nabi'o ṇasyon chechonə'.

²² Jeso'osən' gože' Jacobən' len Juannə': —Bito chache'ile bi de'en chṇabele nada'. žEguaquə saquə'əzi'ile can' saquə'əzi'anə'? žEgwzoile gaquə' chele can' gaquə' chia'anə'?

Nach bosyo'oži'e xtiže'ena' gwse'ene': —Gwzoiito'.

²³ Nach Jeso'osən' gože' lega'aque': —De'e liçzə' chi'i saquə'əle can' chi'i saca'anə', na' de'e liçzə' gaquə' chele can' gaquə' chia'anə', pero bito naquən' par əṇia' nada' non' cue' cuitan' catə'an əžin ža nabi'a. Tozə' Xa' Diozan' bagwleje' beṇə' ca' yesə'əbe' cuita'anə'.

²⁴ Nach disipl ca' yeši' catə' gwse'ene' can' gosə'əna' disipl ca' chopə' besə'əže'e lega'aque'.

²⁵ Nach Jeso'osən' goxe' yogue'e par niçh gosə'əbigue'e laogüe'ena', na' gože' lega'aque': —Nezecho nita' beṇə' gwnabia' na' beṇə' blao che to ṇasyon, na' la fuers chesə'ənabi'e beṇə' nita' xni'aga'aque'.

²⁶ Pero caguə' can' cheyalə' gonle. Šə no le'e chene'ele gacle beṇə' blao, cheyalə' əgwzəxjw yichjle gaquə'leṇe ljuežjle.

²⁷ Na' šə no le'e chene'ele gacle xen entr' ljuežjle, cheyalə' gon cuinle ca xmos beṇə' ca' yeļa'.

²⁸ Diozan' bsele'e nada' golja' beṇəçh, na' caguə' bida' par niçh beṇəçhən' sa'aclene' nada', sino que bida' par gaquə'lena' beṇəçhən', na' par əgwnežjo' cuina' çhixjua' xtolə' yoguə'əloj beṇəçhən' catə'an so'ote' nada'.

Jeso'osən' bene' par niçh chopə' beṇə' lchol' besə'əle'ine'

²⁹ Na' beṇə' zan jəšə'ənaogüe' Jeso'osən' len disipl che' ca' catə'an besa'aque' syoda Jericon'.

³⁰ Na' chopə' beṇə' lchol' zjəchi' cho'a nezən' galən' zjəyeda Jeso'osən'. Catə' gosə'ənezene' de que Jeso'osən' chedie' laoga'aque'ena' nach gosə'əne' zizjo, gwse'e Jeso'osən': —Xanto', len' naco' xi'in' dia che de'e Rei Dabin'. Beyašə'əlažə'əšgüei neto'.

³¹ Nach beṇə' ca' chesyə'əde laoga'aque'ena' gosə'ədile' lega'aque' par niçh nite'e žiza. Pero nachle gosə'əne' zizjochlə' gosə'əne': —Xanto', len' naco' xi'in' dia che de'e Rei Dabin'. Beyašə'əlažə'əšgüei neto'.

³² Jeso'osən' gwleze' gan' nite'ena', nach goxe' lega'aque' par gosə'əbigue'e laogüe'ena'. Nach gože' lega'aque': —žBin' chene'ele gona' len le'e?

³³ Nach gwse'ene': —Xanto' benšga par niçh ye'ito'.

³⁴ Jeso'osən' beyašə'əlažə'ə' lega'aque' na' gwdane' jlaoga'aque'ena', nach le'e besyə'əle'iteine', na' jəšə'ənaogüe' Jeso'osən'.

21

Gwso'elaogüe'e Jeso'osən' cata' beyo'e Jerosalenna'

¹ Na' lao zja'ac Jeso'osən' len disipl che' ca' Jerosalennə' besə'əžine' Betfage, gan' zo ya'a de'en nzi' Olibos galə'əza Jerosalennə'. Na' Jeso'osən' gwleje' chopə' disipl che' ca',

² na' gože' lega'aque': —Le'e žja'ac yež' dao' de'en chi' de'e na' na' žjət'ile to borr bia no'olə' da'ab' yag na' nche'ete to xi'inda'ob. Na' gwsežle xna'abən' na' ače'eleb nga len xi'inda'obən'.

³ Na' šə bi ye'e beṇə' le'e, na' ye'elene': —Xanto' nan' chyažjene' lega'aque'əb." Na' le'e desyə'əasantecze'eb len le'e.

⁴ Goc ca' par niçh goc complir can' bzoj de'e profet Zequerian' ben' be' xtižə' Diozan' cana' gwne':

⁵ Gož beṇə' ca' nita' Jerosalennə':

“Le'e ggüiašc baza' Rei çhelen'.

Žie' cožə' borr da'onə' ca to beṇə' cui naquə' beṇə' blao.”

⁶ Na' ja'ac disipl ca' yež' dao' de'en gož Jeso'osən' lega'aque' ca', na' gwso'one' can' ben' Jeso'osən' mendad.

7 Na' besya'əche'e borran' len xi'inqəbən' lao Jeso'osən', na' besə'əxoə no xaga'aque' cožə'əga'acquəbən', nach gwz'ia Jeso'osən' bia da'onə' par gwyeje' Jerosalennə'.

8 Na' lao nez gan' zde'enə' beṇə' zan gwso'ela'ogü'e Jeso'osən' bosə'ošiljue' no xaga'aque'enə' par nich blej borran' len na' leczə gosə'əchogue' no xozə' yag de'e nita' tcho'a nezən' na' bosə'anite'en lao nezən'.

9 Na' beṇə' zan gosə'əbialao lao Jeso'osən' na' leczə beṇə' zan jəsə'ənao le'. Nach yogue'e gosə'əgü'e be' lban che' gosə'əne': —İlechguale beṇə' güen be'enga, naque' xi'inq dia che de'e Rei Dabin'! Sošga Rei chechon' mbalaz ben' baza' nga bselə' Xancho Diozən' le'. Ledoye'ela'oche' txen len beṇə' ca' nita' gan' zo Diozən'.

10 Na' cata' bžin Jeso'osən' Jerosalennə' yogua' beṇə' ca' ža' syodan' besya'əbanene', na' gosə'əne': —İNoxa bengə bla' nga?

11 Na' beṇə' ca' nžag Jeso'osən' cata'ən bežine' lao' syoda Jerosalennə' bosyo'oži'e xtižə'əga'aque'enə' gwse'e: —Bengə Jeso'os beṇə' za' Nasaret gan' mbane Galilean' na' cho'e xtižə' Diozən'.

Jeso'osən' bebeje' beṇə' ca' chso'on ya'a yo'odao' əblao che beṇə' Izrael ca'

12 Na' gwyeje' Jeso'osən' yo'odao' əblao che chio'o beṇə' Izrael na' bebeje' yogua' beṇə' ca' chso'on ya'a chyo'onə'. Nach gwlo'on'iane'e mes che beṇə' ca' choso'oša' mech, na' leczə ca' bene' len yag siy che beṇə' ca' chso'otə' ngolbexə.

13 Gwde beyož bene' ca' gože' lega'aque': —Nyojczən can' gwna Diozən' gwne': “Che'enda' yesə'əna beṇə' de que ližə'an naquən to latjə gan' so'on beṇə' orasyon”, pero na' le'e baben'len ca to latjə gan' ža' beṇə' bguan.

14 Na' beṇə' lchöl ca' na' len beṇə' coj ca' gosə'əbigue'e lao Jeso'osən' žlac gwzoe' lo'o yo'odao'onə'. Nach beyone' lega'aque'.

15 Pero na' bžoz əblao ca' na' beṇə' ca' choso'osed choso'olo'i lei de'en bzoj de'e Moizezən' lechguale besə'əže'e cata' besə'əle'ine' miłagr ca' de'en ben Jeso'osən'. Na' leczə besə'əže'e cata' gwse'enene' can' gwso'elao' bi'i xcuidə' ca' Jeso'osən' yo'odao' əblaona', de'en gosə'ənabo': “İlechguale beṇə' güen be'enga, naque' xi'inq dia che de'e Rei Dabin'!”

16 Nach gwse'e Jeso'osən': —İEzendo' bin' gosə'əna bi'i xcuidə' ca'?

Jeso'osən' boži'en gože' lega'aque': —Zenda'. İEcabi za'alažə'əle can' nyoj Xtižə' Diozən' de'en gož de'e Rei Dabin' Diozən', nan:

Le' babeno' par nich bi'i xcuidə' na' bi'i cho'a nižə' ca' chso'ela'obo' le' can' chazlažo'o?

17 Nach bechoje' gan' nita' beṇə' ca', na' beze'e syodan'. Na' že' na' jəyega'əne' Betania len disipl che' ca'.

Ben Jeso'osən' par nich bgüiž yag yixgüion'

18 Na' zil beteyo besa'aque' Betanian' jəsyə'aque' Jerosalennə' de'e yoblə. Na' lao zesya'əngü'e nezən' gwdon Jeso'osən'.

19 Na' ble'ine' to yag yixgüio zon cho'a nezən' na' gwyeje' jəgüie' šə žian yixgüion'. Pero bitobi bželene', con zlega xlague'e žia. Nach gože'en: —Caneque cuich bi bi yixgüion' cuio'.

Na' lao or na' le'e bgüižten.

20 Cata' besə'əle'i disipl che' ca' can' goquən', besya'əbanene', nach gwse'ene': —İBixchen' le'e bgüižte yaguən'?

21 Na' Jeso'osən' gože' lega'aque': —De'e li əchnia' le'e, šə do yichj do lažə'əle chonjilažə'əle Diozən' na' bito chac chop lažə'əle, guaquə gonle can' babena' par nich bgüiž yaguən'. Na' leczə ca' guaquə gonle par nich ya'a nga žjəyazon lo'o nisdə'onə'.

22 Na' šə chonjilažə'əcho Diozən' do yichj do lažə'əcho, bitə'ətežə de'en ənabechone' lao orasyonə', goncze'en chio'o.

Yelə' gwnabia' che Jeso'osən'

23 Nach, Jeso'osən' gozeje' yo'odao' əblaona' de'e yoblə par jəsəd jəlo'ine' beṇə' ca'. Na' balə beṇə' fariseo ca' na' yebalə beṇə' choso'osed choso'olo'i lein' gosə'əbigue'e cuit Jeso'osən'. Nach gwse'e Jeso'osən': —İNac goquən' gwxi'o yelə' gwnabia'anə' na' non' ben le' yelə' gwnabia'anə' par gono' de'e ca' chono'?

24 Nach Jeso'osən' gože' lega'aque': —İLeczə de to de'e nabda' le'e. Šə gwnale nada' de'en nabda' le'e nach ənia' le'e non' beṇə' nada' yelə' gwnabia' par gona' de'e ca' chona'.

25 Lənašc nada': İnon' bselə' de'e Juannə' bide' bchoe' beṇə' nis? İDioz nan' bselə'ene' o šə beṇə' yoblən'?

Nach bosə'oxi'e gosə'əne': —Šə ye'echone' de que Dioz nan' bselə'e de'e Juannə' par bchoe' beṇə' nis, na' ye'e chio'o: “İBixchexan' bito gwyejle'ele che'?”

26 Na' šə ye'echone' de que to gwłazzen' bide', cuili biczən' so'one beṇə' quingan' chio'o, chedə' chse'ejle' de que Diozən' bselə'e de'e Juannə' par be'e xtižə'enə'.

27 Nach gwse'e Jeso'osən': —Bito nəzeto' non' bselə' de'e Juannə'.

Nach gož Jeso'osən' lega'aque': —Leczə ca' nada' bito ənia' non' beṇ nada' yeḷə' gwnabia'anə' par gona' de'e ca' chona'.

Jempl che chopə xi'in beṇə'

²⁸ Le'e gon xbab bi zeje jempl nga: Gwzo to beṇə' gwnitə' chopə xi'ine'. Na' gože' tobo': "Xi'ina' neža che'enda' šejo' güen žin gan' ža' yag obas chia' ca'."

²⁹ Nach xi'ine'ena' gožbo' le': "Bito ša'a." Pero gwdeḷə' beyombo' xbab, nach gwyejbo'.

³⁰ Nach gozeje' gan' zo xi'ine'en yeto, na' ježe'ebo' can' gože' bi'i bišə'əbo'onə'. Na' le'e gožte bi'in le': "Guaquəczə, na' ša'a." Pero bito gwyejbo'.

³¹ Le'e našč nada': ;nobo' bi'i ca' chopə boso'ozenagbo' che xaga'acbo'onə'?

Nach gwse'ene': —Bi'i nech na'.

Nach Jeso'osən' gože' lega'aque': —Leiczelen'. Na' de'e li chnia' le'e beṇə' gochixjw ca' na' no'olə' zargat ca' yobəch yoso'ozenagbe' che Diozən' cle ca le'e na' yobəch əso'e latjə' nabia' Diozən' lega'aque'.

³² Ca naquə' Juannə' ben' bchoa beṇə' nis bide' laolen' na' gwdirjue'ine' le'e naquən' cheyalə' gonle' par nič yebei Diozən' le'e. Pero bito gwyejle'ele che'. Letga beṇə' gochixjw ca' na' no'olə' zargat ca' gwse'ejle'e che'. Na' catə' goche'ile de que beṇə' ca' bagwse'ejle'e che', bito bedinjele xtolə'əle ca' par šejle'ele che de'e Juannə'.

Jempl che mos mal ca'

³³ Le'e gwzenag yeto jempl nga. Gwzo to beṇə' na' lao to pedas yežlyo čhen' goze' zlezə' yag obas na' gwlo'e le'ej doxenən. Na' na'atezə' bene' to tanc gan' boso'osi'e obasan' par bechoj xisein'. Na' leczə' bene' to campnary gan' yesə'əcua'a beṇə' əsa'ape' güertən'. Nach bene' güertən' lao na' beṇə' par boso'ogüia boso'oye'en, na' gwde na' gwze'e jəzoe' ga yoblə.

³⁴ Catə' bžin tyemp par yosyo'otobe' cwsešən', bsele'e to chopə xmosə' gan' ža' beṇə' ca' chsa'apə' yag obas che'ena' par žjəsyə'xi'e to tlacw cwsešən' de'en cheyalə' yezi'e.

³⁵ Pero na' beṇə' ca' chsa'apə' yag obas che'ena' bito bosə'əgüialaogüe' mos čhe' ca'. Gosə'əyine' toe', na' yetoe' boso'ošizə'ene' yej, nach yetoe' gwso'ote'.

³⁶ Nach bosselə' xan yag obasan' mos zanch clezə' ca beṇə' ca' bsele'e nech, pero leczə' can' gwso'onene' beṇə' nech ca' leczə' can' gwso'onene' lega'aque'.

³⁷ Nach xan yag obasan' bsele'e cuinczə' xi'ine'ena', goquene' əsa'ape'ene' respet na' yosyo'onežjue'ene' cwsešən'.

³⁸ Pero na' beṇə' ca' chsa'apə' güertən' catə' besə'əle'ine' xi'ine'ena', nach gosə'əne' entr lega'acze': "Be'engan' xi'in xan yag obasan', na' le'ena' yega'anlen biennə'. Leda gotchone' par nič yega'anlencho yežlyo che xe'ena'."

³⁹ Nach boso'onize'ene', besyə'əbeje'ene' fuerlə güertən' na' gwso'ote'ene'.

⁴⁰ Beyož be' Jeso'osən' jempl nga, gože' beṇə' ca' ža'anə': —¿Nac chactgüeile gon xan güertən' len beṇə' ca' bocua'anlene' güert che'ena' catə' yežin cuine'?

⁴¹ Nach gwse'ene': —Gote' lega'aque' yeḷə' beṇə' mal čhəga'aque'ena', na' yegüe'e güertən' lao na' beṇə' yoblə. Yegüe'en lao na' beṇə' so'on complir yosyo'onežjue'ene' to tlacw cwseš che'ena' catə' əžin ža par yesyə'ətobe'en.

⁴² Jeso'osən' gože' lega'aque': —Ca'aczən'. Na' žəcabinə' šejni'ile bi zejen de'en nyoj Xtižə' Diozən' gan' nan:

Yej de'en cui gwso'olazə' mues güen yo'o ca',

lenṇə' banaquən yej squin.

Xancho Diozən' babzoe' yejən' gan' cheyalə' son

na' de'e zaquə' yebanecho can' bene'ena'.

⁴³ De'e na'anə' chnia' le'e de que Diozən' cuejyichje' cuich nabi'e nasyon čhelenə' na' cueje' beṇə' yoblə beṇə' yoso'ozenag che' par nabi'e lega'aque'.

⁴⁴ Na' ca' naquə' yejən' ža, yogua' no cui šejle' chia' gwxaquə'əlebene' ca beṇə' əxopə' lao yejən' na' cue'ežozje'. Na' yogua' no cuiṇə' šejle' chia' catə' babžin žan' gaquə' juisyən', gwxaquə'əlebene' ca beṇə' əxopə' yej laogüe'ena' na' əgwšə'šjan' le'.

⁴⁵ Na' bəxoz əblao ca' na' beṇə' fariseo ca', catə' gwse'enene' jempl ca' de'en be' Jeso'osən', gwsa'acbe'ine' de que be'e jempl ca' por ni che de'en cui chse'ejle'e che'.

⁴⁶ Nach gwse'enene' yesə'əzene'ene' pero bitobi gwso'onene' le'. Besə'əžebe' šə bi so'one beṇə' ca' nžague'ena' lega'aque', čhedə' yogue'e gwse'ejle'e de que Diozən' bsele'e Jeso'osən' par cho'e xtižə'ena'.

22

Jempl che to yeḷə' gošagna'

¹ Na' de'e yoblə bseḷə' blo'i Jeso'osən' beṇə' ca' len jemplən', gozne':

² —Yeḷə' gwnabia' che Diozən' gwxaquə'əleben ca de'e nga goquən'. Zo to rei, beṇə' ben gast catə' bšagna' xi'ine'ena'.

³ Na' bene' combid beṇə' zan əʒja'aque' liže'enə' par əsa'ogüe'. Na' catə' bžin or par solao ḷnin', rein' bsele'e xmore' ca' par jəsə'əxi'e beṇə' ca' babene' combidən'. Pero notono no gwse'ene əʒja'ac lao yelə' gošagna' che xi'ine'enə'.

⁴ Nach gože' yexonj xmore' ca': "Le'e žjež beṇə' ca' zjənaquə combidən' de que babsi'ini'a de'en gaochonə'. Babeta' xco'ona' ca' na' xme'edaogua'a ca' bia ca' chsa'ana', na' yoguə' de'e ca' yelə' babsi'ini'a par gaocho. Na' ye'ega'aclene' sa'aque' gaocho de'en babsi'ini'ana'." Nach ja'ac mos ca' jse'eže' lega'aque' ca'.

⁵ Pero beṇə' ca' bito gwso'one' cas. Toe' gwyeye' jəgüie' yežlyo che'enə', na' yetoe' gwyeye' jene' negosy.

⁶ Na' yebale' bosə'əniže' mos ca' bselə' rein' na' gosə'əzi'ičiže'e lega'aque' na' gwso'ote' baļe'.

⁷ Na' lechgualə bža'a rein', na' bsele'e soldad che' ca' jse'ete' lega'aque' na' bosə'əzeye' syoda chega'aque'enə'.

⁸ Nach rein' gože' xmore' ca': "Babsi'ini'a de'en gaocho lao ḷnin', pero ca' naquə beṇə' ca' bēna' combidən' nachbia' bito zjəzaquə'e par la'aque' liža' nga əsa'ogüe'.

⁹ Le'e žja'ac yež ca' yelə' na' le'e žjəta yoguə' lquey ca' na' gonle combid yoguə' beṇə' chaš par da'aque' sa'ogüe'."

¹⁰ Na' mos ca' ja'aque' yoguə' nez ca' na' jəsə'ətobe' con yoguə' beṇə' besə'əžague', no beṇə' naquə beṇə' güen na' no beṇə' naquə beṇə' mal, par nič beža' liž rein' xte cuich bi latjə gotə'.

¹¹ Pero na' catə' gwyo'o rein' jəgüie' beṇə' ca' bazjənžaguən', na' entr' lega'aque' ble'ine' to beṇə' cui nyaze' lachə' de'en chnežjo rein' de'en chsa'aze' lao ḷnina'.

¹² Nach gož rein' le': "Migw chia' žnac goquən' gwyo'o nga? la' bito nyazo' lachə' de'en cheyalə' chazo'." Na' be'enə' bito bželene' bi ye'e rein'.

¹³ Nach rein' bene' mendad yoso'očhej xmore' ca' ni'ana' be'enə' na' yesyə'əbeje'ene' fuerlə, gan' lechgualə naquə žchol, gan' cuežyaše'e na' gan' gaoyeja leye' zejlicane.

¹⁴ Can' naquən, Diozən' chaxe' yoguə' beṇə' par əse'ejle'e che', pero balgue'en choso'ozenague' che', na' chque'e lega'aque' ca' xi'ine'.

Gosə'əbanəbe' Jeso'osən' šə naquən güen yesə'əyixjue' impuest che gobiern

¹⁵ Nach beṇə' fariseo ca' besə'əžague' par bosə'əxi'e naclə so'one' par nič yesə'əcujee' Jeso'osən' diža' de'en yesə'əchine' par əsa'ogüe' xya che'.

¹⁶ Na' beṇə' fariseo ca' bosə'osele'e balə beṇə' zjənaquə cuent len lega'aque' lao Jeso'osən' na leczə bosə'osele'e balə beṇə' chso'on txen len Erodən' par jse'eže'ene': —Maestr, nezeto' de que cho'o diža' li. Nezeto' de'en chsed chlo'ido' beṇə' can' chene'e Diozən' goncho naquən diža' li. Na' nezeto' bito chžebo' bin' yesə'əna beṇə', la' bito chono' cuent che beṇə' šə naque' blao o šə bito naque'.

¹⁷ De'e na'anə' zedenəbeto' le' par ənao' neto' naquən' cheyalə' gonto'. žEnaquən güen chixjwto' impuest che gobiern roman', o šə bito cheyalə' chixjwto'on?

¹⁸ Jeso'osən' gocbe'ine' caguə do lažə'əga'aque'enə' gwse'ene' ca', nach gože' lega'aque': —jNacle beṇə' goxoayag! žBixchen' chene'ele cuejle nada' diža' de'en gwchinle contr nada'?

¹⁹ Le'e gwlo'i nada' xmechlen' de'en chyixjwle che impuestən'.

Nach bosə'olo'ine' le' to denario.

²⁰ Jeso'osən' gože' lega'aque': —žNo diboj cheina' da' laogüennə', na' no lein' nyoj laogüennə'?

²¹ Nach gwse'ene': —Čhe Rei Sesar.

Nach Jeso'osən' gože' lega'aque': —Le'e əgwnežjo Sesarən' de'en naquə che' ža, na' le'e əgwnežjo Diozən' de'en cheyalə' əgwnežjwlene'.

²² Nach beṇə' ca' catə' gwse'enene' xtižə' Jeso'osən' besyə'əbanene'. Na' besa'aque' gan' zoe'enə'.

Catə' yesyə'əban beṇə' guat ca'

²³ Na' le'e ža na'atežəczə besə'əžžin balə beṇə' sadoseo beṇə' ca' cui chse'ejle' de que yesyə'əban beṇə' guat ca', na' de'e na'anə' jse'eže'ene':

²⁴ —Maestr, de'e Moizežən' bzoje' de que šə to beṇə' byo beṇə' nšagna' gate' na' yega'an no'olə che'enə' sin cui no xi'ine' gwzo, beṇə' bišə' be'enə' bagotən' cheyalə' yeque'e no'olənə' par nič nitə' xi'in dia che de'e beṇə' biše'enə'.

²⁵ Bač bemb'i'ato' gažə bišə'əga'aque'. Na' beṇə' nechən' bšagne'e, na' gote', na' notono xi'ine' gwzo. Na' biše'e əgwchopən' beque'e no'olən'.

²⁶ Na' leczə got beṇə' əgwchopən' na' notono xi'ine' gwzo. Nach le'egateza ca' goquə len beṇə' biše'e əgwyone, nach beṇə' bišə'əga'aque' ca' yelə', xte besyə'əyatega'aque' besyə'aque'e no'olən' na' besyə'əyatega'aque' gwsa'at, na' notoczə no xi'inga'aque' gwnitə'.

²⁷ Na' gwde gwsa'at beṇə' ca' leczə got no'olən'.

²⁸ Na' catə' yesyə'əban beṇə' guat ca', žnoe' entr' beṇə' gažə ca' gaquə be'en che no'olən'? la' yogue'en bosyö'osagna'alene' le'.

²⁹ Nach gož Jeso'osən' lega'aque': —Bito chonle xbab šao' de'en nale ca', la' bito nezele can' na Xtižə' Diozan' de'en nyojan na' nic nezele naquan' naqua yelə' guac che Diozan'.

³⁰ Catə'an yesyə'əban beṇə' guat ca', bito gacbia' šə zoso'ošagne'e o šə cui, na' cana' caguə no yosyo'ošagna'ach. Lebzen' əsa'aque' len angl che Diozan' beṇə' ca' nita' yoban'.

³¹ Na' ca' naquan' chaquele bito yesyə'əban beṇə' guat ca', çəbito za'aləžə'əle can' nyoj Xtižə' Diozan', nan:

³² “Nada' naca' Dioz che de'e xaxta'ole Abraannə', na' Dioz che de'e xaxta'ole Isaaquən', na' Dioz che de'e xaxta'ole Jacoban'.” Na' nezecho beṇə' ca' nite'e len Diozan' çhedə' Diozan' bito naque' Dioz che beṇə' guat, sino naque' Dioz che beṇə' ca' zjəmban.

³³ Na' beṇə' zan ca' zjənžaguən' besyə'əbanene' catə' gwse'enene' dižə'an de'en bsd blo'ine' lega'aque'.

De'en naqua de'e blaoch de'en non Diozan' mendad goncho

³⁴ Na' catə' gwse'ene beṇə' fariseo ca' de que Jeso'osən' bzožie' beṇə' sadoseo ca', nach jeza'aque' lao Jeso'osən'.

³⁵ Na' to ben' chsd chlo'i lein' lecə gone'ene' cueje' Jeso'osən' dižə' de'e gwçhine' contr le'. Na' gože'ene':

³⁶ —Maestr, lao lei che Diozan' çnon' de'en none' mendad goncho naquan de'e blaoch?

³⁷⁻³⁸ Jeso'osən' gože'ene': —De'en naqua de'e žialaoch na' de'e blaoch lao de'e ca' none' mendad goncho nan: “Cheyalə' gaquecho che Xancho Diozan' do yichj do lažə'əcho do fuers balor checho.”

³⁹ Na' de'e əgwchopen' lebze nan len de'e nechen': “Cheyalə' gaquecho che sa'aljuežjcho catg chaquecho che cuincho.”

⁴⁰ Çhopə de'e ca' non Diozan' mendad goncho zjənoçə'an doxen de'en bzoj de'e Moisezən' na' de'en bosə'ozoj beṇə' ca' gwso'e xtižə' Diozan' cana'.

Cristən' naque' xi'in dia che de'e Rei Dabin'

⁴¹ Na' lao ne'e zjənžag beṇə' fariseo ca' lao Jeso'osən',

⁴² gože' lega'aque': —çBin' chontgualə xbab che Cristən' ben' əselə' Diozan' par gaquəlene' nasyon chechon'? çNo xi'in dia chei gaque'?

Na' gwse'ene': —Gaque' xi'in dia che de'e Rei Dabin'.

⁴³⁻⁴⁴ Nach Jeso'osən' gože' lega'aque': —De'e Dabin' bzoje' can' blo'i Spirit che Diozan' le'. Gwne' de que Cristən' naque' Xane'. Quinga bzoje':

Xancho Diozan' gože' Xana'an:

“Gwche'edo' cuita' nga nabi'acho txen,

Na' gona' par niç nita' de'e ca' chso'on contr le' na' beṇə' contr çhio' ca' xni'onə'.”

⁴⁵ Na' de'en gwna de'e Rei Dabin' de que Cristən' naque' Xane', çəcabi zejen de que Cristən' naque' mazəchlə ca xi'in dia che' na'anə' ža?

⁴⁶ Na' notoch no goqua yosyo'oži'i xtiže'enə'. Na' dezd ža na' bitoch besyə'əyaxjene' bi yesə'nabene' Jeso'osən'.

23

Xtolə' beṇə' fariseo ca' na' beṇə' ca' choso'osed choso'olo'i lein'

¹ Nach Jeso'osən' gwzola be'e dižə' len disipl che' ca' na' len beṇə' zan ca' nita' gan' zo'enə', gwne':

² —Beṇə' ca' choso'osed choso'olo'i lein' na' beṇə' fariseo ca' bazjənlanə' xlatjə de'e Moisezən' par choso'ozejni'ine' beṇə' lei che Diozan'.

³ Na' de'e na'anə' le'e gwzenag chega'aque' catə' choso'ozenene' le'e can' na lein', na' le'e gon can' nannə', pero bito gonle can' chso'on lega'aque', çhedə' lega'aque' bito chso'one' de'en çəsə'əne' cheyalə' gonle.

⁴ Lega'aque' çesə'əzanche' can' na lein', na' chso'one'en ca to yoa' de'e cuiczə no do'i na' chse'enene' soa' beṇə' yoblə len, na' bito chse'ene' lega'aque' əso'en.

⁵ Ca' naqua beṇə' ca' yoguə' de'en chso'one'enə', chso'one'en parzə niç yesə'əle'i beṇə' can' chso'one'enə', na' so'elaogü'e lega'aque'. Nchej na'aga'aque'enə' na' nchej lao xgaga'aque'enə' caj dao' gan' ža' part güejə Xtižə' Diozan' na' chso'one' caj dao' ca' de'e çha'odao'. Na' lecə chso'one' lox xadoṇ' chega'aque'enə' de'e tonə.

⁶ Çesyə'əbeine' çesə'əbi'e gan' çəsə'əbe' beṇə' blao ca' catə' çhja'aque' gan' chac no lni, na' catə' çhja'aque' yo'odao' chega'aque'.

⁷ Çesyə'əbeine' catə' beṇə' ca' çesə'əguape' lega'aque' diox na' catə' çesə'ənope'e na'aga'aque'en do lao lquey, na' chse'enene' yoso'osi' beṇə' lega'aque' maestr.

⁸ Pero achmia' le'e, bito gonle byen ye'e beṇə' le'e “maestr” laogüe de'en chsd chlo'ile xtižə'anə', çhedə' nadə'əzan' gwlej Diozan' par naca' maestr chele, nadan' bselə'e par gaquəlena' beṇə'çənan'. Na' yoguə' le'e chonlilažə'əle nada' chaque bišə'əljuežjle tole yetole.

⁹ Na' leccəzə bito nale che notə'ətezə beṇə' de que naque' "Padrecito". Tozə Dioz ben' zo yoba naque' Xacho.

¹⁰ Na' bito gonle byen ye'e beṇə' le'e "Xana", chedə' leccəzə tozə nada' Cristən' gwlej Diozən' par naca' Xanle.

¹¹ Šə no le'e nacle beṇə' blaoch, cheyalə' əgwzewxjw yichjle gaqulenle ljuežjle.

¹² Notə'əteze cho'elao' cunle Diozən' gone' par nich gacbe'ile de que bitobi zaquə'əle. Na' notə'əteze chonle xbab de que bitotec bi zaquə'əle, Diozən' gone' le'e yelə' bala'an.

¹³ Probchguazə le'e chsed chlo'ile lein', na' probchguazə le'e beṇə' fariseo. Chxoayagle beṇə' par nich cui so'e latjə ṇabia' Diozən' lega'aque' na' leccəzə le'e bito cho'ele latjə ṇabia' Diozən' le'e.

¹⁴ Na' probchguazə le'e chsed chlo'ile lein', na' probchguazə le'e beṇə' fariseo. Chxoayagle no no'olə gozebə par nich no'ol ca' chso'one' le'e ližga'aque' na' len bichlə de'en de chega'aque'. Nach cata' chonle orasyon cho'echgualə dižə' par nich əxoayagle beṇə' əsa'aque' nacle beṇə' güen. Goscha'och Diozən' castigw chelen' clezə ca che beṇə' ca' cuitec zjənezene' can' na lein'.

¹⁵ Probchguazə le'e chsed chlo'ile lein' na' probchguazə le'e beṇə' fariseo. Nacle beṇə' goxoayag. Chja'actezə chja'acle chjətijle beṇə' zita' beṇə' yesə'ənao de'en chsed chlo'ile. Na' cata' chželga'aquele'ne' chzejni'iga'aquele'ne' par nich əsa'aque' lechgualə beṇə' maləch clezə ca le'e.

¹⁶ ¡Probchguazə le'e! Nacle ca beṇə' lchol beṇə' chsa'aque'ne' guaquə yesə'əgü'e nez beṇə' yoblə. Nale de que notə'ətezə beṇə' chzoe' joramentən' por yo'oda' əblaona', bitobi zeje jorament che'ena'. Pero šə chzoe' joramentən' por oro de'en de lo'o yo'oda'onə', nachən' zejen de que cheyalə' gone' can' chone' lyebe.

¹⁷ Le'e nacle ca beṇə' lchol na' bitobi chejni'ile. Oron' bitotec bi zaquə'an. Yo'oda'onə' gan' yo'o oron' lenṇə' zaquə'əchən, la' de'en yo'o oron' lo'ina' de'e na'ana' oron' naquan che Diozən'.

¹⁸ Na' leccəzə nale de que šə to beṇə' chzoe' joramentən' por mes de yej gan' choso'ozeye' bia yixə'an par chso'elaogü'e Diozən', bitobi zeje jorament che'ena'. Pero na' šə chzoe' joramentən' por de'en xoa lao mes de yejən', cheyalə' gone' can' chone' lyebe.

¹⁹ Le'e nacle ca beṇə' lchol na' bitobi chejni'ile. De'en choso'ozeye' par chso'elaogü'e Diozən' bitotec bi zaquə'an. Mes gan' chxoa de'en chosə'ənežjue' Diozən' lenṇə' zaquə'əchən, la' de'en choso'oxoe' de'e ca laogüen, de'e na'ana' chsa'aque'ne' che Dioz.

²⁰ Šə beṇə' chzoe' joramentən' por mes de yejən' lenccəzə por de'en xoa laogüenṇə' chzoe'en.

²¹ Na' šə beṇə' chzoe' joramentən' por yo'oda'onə', lenccəzə por Dioz nan' chzoe' joramentən' chedə' yo'oda'onə' naquə che Diozən' na' nan' zoe'.

²² Na' šə beṇə' chzoe' joramentən' por yoban', por Dioz nan' chzoe'en, chedə' la' nan' chi' Diozən' chnabi'e.

²³ Probchguazə le'e chsed chlo'ile lein', na' probchguazə le'e beṇə' fariseo. ¡Nacle beṇə' goxoayag! La'ana'əccəzə chnežjwle Diozən' to part lao ši part che yixgüej chele, che niz chele, na' che comin chele, bitobi zejen, chedə' bito chzenagle che de'e ca' zjənaquə de'e žialaoch de'en na lein'. Bito chonle de'en naquə güen lao Diozən'. Bito cheyašə'əlažə'əle sa'aljuežj beṇəchle. Bito chonle complir can' nale. De'e quinga zjənaquə de'e žialaoch gonle; pero bito cheyalə' cuejyichjle cui əgwnežjwle de'e ca' chnežjoczlene'.

²⁴ Nacle ca beṇə' lchol beṇə' chsa'aque'ne' guaquə yesə'əgü'e nez beṇə' yoblə. Gwx-aquə'əlebele ca to beṇə' chebej bizə beb dao' nchixə yelə' guao che'ena', pero bito chache'ine' šə nchixə'əchlən to de'e xen de'e zaquə' yebeje'.

²⁵ Probchguazə le'e chsed chlo'ile lein' na' probchguazə le'e beṇə' fariseo. ¡Nacle beṇə' goxoayag! Gwxaquə'əlebele ca tas plat de'en chchin beṇə' na' cui cha'a chyibe' lo'ina' binlo. Chonle par nich chsa'aque beṇə' de que nacle beṇə' güen pero lechgualə chzelažə'əle bi de'e de che beṇə' na' chebeichgüeile chca'alen.

²⁶ Le'e beṇə' fariseo, nchol yichjla'ažda'olen'. Le'e yedinje xtolə'əle ca' par nich de'e licza gacle beṇə' güen can' chene'ele so'on beṇə' xbab nacle.

²⁷ Probchguazə le'e chsed chlo'ile lein' de'en bzoj de'e Moizezən', na' probchguazə le'e beṇə' fariseo. ¡Nacle beṇə' goxoayag! Gwxaquə'əlebele ca to ba de'en zjənone' xochechgua laogüena' pero lo'ilei ža' žit beṇə' guat na' chi'ichgua de'e zban.

²⁸ Chene'ele so'on beṇə' xbab chele de que nacle beṇə' güen, pero len yichjla'ažda'olen' nacle beṇə' goxoayag na' beṇə' malchgua.

²⁹ ¡Probchguazə le'e chsed chlo'ile lein'! na' ¡probchguazə le'e beṇə' fariseo! Nacle beṇə' goxoayag. Chonle monoment lao ba che de'e profet beṇə' ca' gwso'e xtižə' Diozən' cana', na' chonle xochechgua lao ba che yeziquə'əchlə beṇə' gwso'on de'e güen.

³⁰ Na' nale: "Žalə' chio'o bazocho ca tyemp che de'e xaxta'ocho ca', bito bencho txen len lega'aque' ca de'en gwso'one' gwso'ote' profet ca' beṇə' ca' gwso'e xtižə' Diozən' cana'."

³¹ Pero na' yoguə'əlojte de'en chonle chlo'in de que tozəczə can' nacle len de'e xaxta'ole ca' beṇə' ca' gwso't de'e profet ca'.

³² Ša de'e tant chebeile chonle de'e malən', le'e gwza'alao legon biquə'əchlə de'e mal de'en bito golə' so'on de'e xaxta'ole ca'.

³³ Le'e nacle beṇə' goxoayag na' naljele. ¿Echaquele de que guaqua yexonjele castigon' de'en gon Diozən' le'e ca de'en əsele'e le'e lao yi' gabilən'?

³⁴ Na' de'en gona' nada' əsele'a beṇə' so'e xtiža'anə' na' no beṇə' sin' laolənə', na' nochlə beṇə' yoso'osedene' le'e xtiža'anə'. Na' bale' gotle əgwda'aga'aclene' to le'e yag coroz, na' yebale' chinle do lo'o yo'odao' chele ca', na' yebale' yolagzejə yolagzida'aga'aclene' gata'ətezə yež'zja'aque'.

³⁵ Na' de'en gonle ca' gaple dolə' che yelə' got che yoguə' beṇə' ca' gwso'on de'e güen, beṇə' ca' gwso'ot de'e xaxta'ole ca', gwzolaozən len de'e Abelən' xi'in beṇə' nech ca' ben' naquə beṇə' güen lao Diozən' na' beyožen len de'e Zequeria xi'in de'e Berequias. Zequeria na'anə' ben' gwso'ote' entr yo'odao' əblaonə' na' entr mes de yej gan' choso'ozeye' bia yixə' par chso'elaogü'e Diozən'.

³⁶ Na' de'e li le'e mbanle na'a si'ile castigw che yelə' got che yoguə' beṇə' ca' gwso'ot de'e xaxta'ole ca'.

Begüine'e Jeso'osən' por ni che xtolə' beṇə' Jerosalen ca'

³⁷ Prob le'e beṇə' Jerosalen! Chotle beṇə' ca' chso'e xtižə' Diozən' na' beṇə' ca' chselə' Diozən' par chso'elene' le'e xtiže'eno' chšizə'əga'aclene' yej. Zan las bago'onda' yotoba' le'e can' chon to jeid cheyež xi'inəb, pero bito be'ele latja.

³⁸ Na' na'a cuejyichj Diozən' le'e. Bitoch gone' cas chele.

³⁹ Na' əchnia' le'e, bitoch le'ile nada' xte cata'əch əžin ža əṇale: “Cho'ela'oto' ben' za' nga, babselə' Xancho Diozən' le'!”

24

Jeso'osən' gwne' de que gwžin ža yosyo'ochinje' yo'odao' əblaonə'

¹ Na' cata' beza' Jeso'osən' yo'odao' əblaonə' par šeje' ga yoblə gosə'əbiguə' disipl che' ca' gan' zo'enə' na' lao chəsə'əgü'e yo'odao' əblaonə' gwso'e dižə' catec xoche naquən na' leczə ca' yo'o ca' zjənyechjən.

² Nach Jeso'osən' gože' lega'aque': —Bable'ile catec xochen' naquə yoguə' de'e quinga. Na' de'e li chnia' le'e ca' naquə de'en chle'ile na'a, gwžin ža yosyo'ochinj beṇə' doxenən, na' notoch no le'i lega'aquən.

De'en gaquə' cata'ən bazon baözə šo'o fin che yežlyon'

³ Na' ja'aque' ya'a Olibosən' na' Jeso'osən' gwchi'e lao ya'anə' toze'. Na' gosə'əbiguə' disipl che' ca' laogü'e'ena' na' gwse'ene': —Xanto', ždo batə'əquən' gaquə' de'e nga nao' nga? Na' žnac gaquən' gache'ito' de que bazon baözə yido' de'e yoblə par šo'o fin che yežlyon'?

⁴ Nach Jeso'osən' gože' lega'aque': —Le'e gon xbab par nič notono əxoayag le'e.

⁵ Gwžin ža cata' zan beṇə' goxoayag ša' lao yežlyo nga beṇə' se'ene'ene' yoso'olane' xlatja' nga. Na' yesə'əne': “Nada'an Cristən' ben' gwlej Diozən' par gaquə'lena' le'e.” Na' beṇə' zan yesə'əxoayague'.

⁶ Na' yene'ele dižə' de que chac gwdiə, o de que guaqua gwdiə, pero na' bito žeble, chedə' zgua'atec cheyalə' gaquə' ca'. Na' bito le'e žinte žan' par šo'o fin che yežlyon'.

⁷ Na' yesyə'ədilə' yež contr yež, na' nasyon contr nasyon. Na' leczə zan yež de'e zjəchi' doxenlə yežlyon' gaquə' bgua bgüin na' cue'e yizgü'e', na' leczə xo'ochgua.

⁸ Na' te gaquə' ca' ne'e yesə'əžaglaoch beṇə' ža' yežlyon'.

⁹ Nach beṇə' ca' ža' doxen yežlyo nga yesə'əgue'ine' le'e chedə' chonlilažə'əle nada'. Na' so'one' le'e lao na' beṇə' contr ca', na' yesə'əsaquə'əzi'e le'e, nach so'ote' le'e.

¹⁰ Cana' ža, beṇə' zan beṇə' bachso'onlilažə' nada' yesə'əbejyichje' cuich so'onlilaže'e nada'. Na' lega'acteze' yesə'əgue'ine' ljeužjga'aque' beṇə' ne'e chso'onlilažə' nada' na' so'one' lega'aque' lao na' beṇə' contr ca'.

¹¹ Na' beṇə' zan so'onlilaže'e yesə'əne' de que xtižə' Diozən' chəsə'əyixjui'e na' yesə'əxoayague' beṇə' zan.

¹² Na' laogü'e de'en sanch beṇə' ca' so'on de'e malən', beṇə' zan juisy beṇə' bachso'onlilažə' nada' cuich əsa'əquene' che yeziquə'əchlə beṇə' chso'onlilažə' nada'.

¹³ Pero na' notə'ətezle ša co'o gwchejlažə'əle len de'en chi' saquə'əle par gonlilažə'əle nada' na' gwzenagle chia' xte cata'əch əžin ža gatle, gožjəyazole len Diozən'.

¹⁴ Na' žja'ac beṇə' doxen lao yežlyon' yesə'əyixjui'e dižə' güen dižə' cobən' de que ṇabia' Diozən' con notə'ətezə beṇə' əso'e latja. Na' cata' bazjəneze beṇə' ža' yoguə' nasyonnə' len, cana'achən' əžin ža šo'o fin che yežlyon'.

¹⁵⁻¹⁶ Bablable can' bzoj de'e profet Daniel ben' be' xtižə' Diozən' cana'. Na' de'en bzoje' nan de que beṇə' mal so'one' de'en naquə de'e zban juisy de'e chgue'i Diozən' lo'o yo'oda' əblao che chio'o beṇə' Izrael na' yo'oda'onə' bitoch gonən žin. Na' catə' le'ile gaquə de'e quinga, canan' le'e nita'əle Jodean' cheyalə' əgwɔxɔnjle na' žja'acle do ya'ada'ote. Le'e chlable de'en nga le'e šejni'in.

¹⁷ Na' šə zo to beṇə' chone' dezcanz lao sotea che' liže'enə', bito galə' yotobe' šinlaze' ca' ža' liže'enə', con cuejyichje'en.

¹⁸ Na' leczə ca' beṇə' zda do yoba bito galə' yebi'e par žjəyexi'e xadoṇ che'enə' liže'.

¹⁹ Na' ca tyempən' lechguale zdebə gaquən len no'olə ca' žjənoa' bdao' na' no'ol ca' chesə'əguazə' bdao'.

²⁰ Le'e gon orasyon par ničh cui cheyalə' əgwɔxɔnjle tyemp catə' chi' de'e zag o lao ža dezcanz.

²¹ Cata' gaquə de'e ca' lechguale čhi' saquə' beṇə' Izrael gwlaž checho ca'. Na' dezd catə'ən gwxe yežlyon' xte ža neža bito ənacho bagwdi' bagwxaquə' beṇə' can' čhi' saquə' beṇə' Izrael gwlaž checho ca', na' bito əžinlaže'e gaquə ca' len beṇə' de'e yoblə.

²² Žalə' nžia Diozən' bia' yesə'əžaglaogüe' šša ni yeto beṇə' cuich žjəmban catə'ən yeyož yesə'əžaglaogüe' enə' žalə' ca'. Pero por ni che de'en chaque Diozən' che beṇə' ca' chso'onlilaža' le', beṇə' ca' bagwleje' par əsa'aque' xi'ine', de'e na'anə' cui güe'e latjə yesə'əžaglaogüe' šša.

²³ De'e na'anə' šə no əye'e le'e: "Bğüäšč nga zo Cristən' ben' gwlej Diozən' par gaquəlene' chio'o", o šə əye'e le'e: "Na'alə zoe'", bito šejle'ele che'.

²⁴ Zan beṇə' goxoayag ša' lao yežlyo nga əse'e le'e de que žjənaque' Cristən' o de que chso'e xtižə' Diozən'. Na' so'one' miłagr na' so'one' de'e naquə yelə' goban par ničh yesə'əxoayague' beṇə' ca' bagwlej Diozən' par əsa'aque' xi'ine' žalə' gaquə yesə'əxoayague' lega'aque'.

²⁵ Baņezele can' gaquə' ala' bagwdixjue'ida' le'e che de'e ca' ze'e gaquə.

²⁶ De'e na'anə' šə əse'e le'e: "Zo Cristən' latjə dašən'", bito gwzenagle chega'aque' par əžja'acle. Na' šə əse'e le'e de que zo Cristən' lo'o yo'onə', bito šejle'ele chega'aque'.

²⁷ Can' chac catə' chep yesən' chse'eni'in doxenlə le'e yoban' to de repentzə, leczə can' gaquə catə'ən əžin ža yida' de'e yoblə. Diozən' bsele'e nada' golja' beṇəčh, na' yida' to de repentzə na' yoguə'əlol beṇə' yesə'əle'ine' nada'.

²⁸ Ngale'en chonen che ben' ne': "Gan' de bia guat nan' chesə'əžag šod ca'."

Can' gaquə catə' yida' Jesocristən' de'e yoblə

²⁹ Na' cate yeyož čhi' saquə' beṇə'ən' lao ža ca', bğüžən' bitoch əgwse'eni'in, na' leczə ca' bio'onə'. Na' beljw ca' žəžia le'e yoban' yesə'əxopən čhedə' Diozən' əgwsi'inse' yogu' de'e ca'.

³⁰ Na' cana'ach beṇə' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bsele' Diozən' golja' beṇəčh. Yida' nsa'a yelə' guac xen čhia'anə' na' yelə' chey che'eni' čhia'anə'. Na' beṇə' ža' yoguə' nasyon che yežlyon' yesə'əbežyaše'e, beṇə' cui gwso'onlilaža' nada'.

³¹ Na' catə'ən yida' to trompetən' cuežən žižjo, na' əselə'a angl čhia' ca' doxenlə yežlyon' par yesə'ətobe' beṇə' ca' bagwlej Diozən' par žjənaque' xi'ine' gata'ətezə žjanasəläse'.

³² Nezele can' chac do nga len yag yixgüion', catə' bačh chzolao chebia xlague'e, chache'ile de que bačh zon yela' yeyon'.

³³ Na' leczə can' catə'ən le'ile gaquə de'e mal ca' bagwnia' gaquə, cana'ach ənezele de que bazon əžin ža šo'o fin che yežlyon'.

³⁴ De'e li əchnia' le'e, bitonə' gat le'e nita'əle lao tyemp nga na'a catə' solao gaquə yoguə'əlol de'e ca'.

³⁵ Ca naquə de'e ca' chle'icho le'e yoban' na' yežlyon', yesə'əde čhei, pero ca naquə xtiža'anə' caguə de'e te cui gaquə can' nannə'.

³⁶ Pero ca naquə bi ža bi orən' šo'o fin che yežlyon', notono no neze, ni que žjəneze angl ca' nita' yoban', na' ni que nežda' nada' naca' Xi'in Diozən'. Tozə Xə' Dioz nan' neze.

³⁷ Diozən' bsele'e nada' golja' beṇəčh, na' can' goquə ca tyemp che de'e Noenə', leczə can' gaquə catə'ən nada' yida' de'e yoblə.

³⁸ Beṇə' ca' gwnitə' ca tyemp che de'e Noen' gwža'azeche' gwse'ej gwsa'ogüe' na' gwso'elaozechga'aque' bosə'ošagne'e na' bosə'əšague' na' no xi'inga'aque'. Ne'e chso'onte' ca' catə'ən bžin ža gwyo'o Noen' lo'o barcon' len family che' ca'.

³⁹ Bitə gwsa'acbe'ine' bin' gaquə xte catə'əčən' goc yejw sio' juisyən' na' bia' nisən' yoguə'əlolga'aque'. Ga'atežəczən' bito sa'acbe'i beṇə' bin' gaquə xte catə'əčən' yida' de'e yoblə.

⁴⁰ Quingan' gaquə catə'ən yida' de'e yoblə, čhopə beṇə' nite'e do yoba, toe' yezi' yeca' Diozən', na' yetoe' yocua'əne'.

⁴¹ Na' čhopə no'olə nite'e chso'ote', toe' yezi' yeca' Diozən', na' yetoe' yocua'əne'.

⁴² De'e na'anə' le'e so probnid par catə'an yida' de'e yoblə, chedə' bito nezele bi ža bi orən' yida' de'e yoblə, nada' naca' Xanle.

⁴³ Le'e gon xbab che de'e nga, žalə' neze xan yo'onə' do bi or lao yelən' əžin beŋə' bguannə' liže'ena', la' gwnaze' par nič bito güe'e latjə šo'o be'ena' liže'ena' par cuane' šinlaze'ena'.

⁴⁴ De'e na'anə' ža, le'e so probnid par catə'an yida' de'e yoblə chedə' catə'an cui chonle xbab yida' ca nan' yida' de'e yoblə, nada' naca' ben' bselə' Diozən' golja' beŋəch.

Mos ben' chon güen na' mos ben' cui chon güen

⁴⁵ Notə'atezle šə zotezə zole probnid dote tyemp, gwxaquə'əlebele ca to mos beŋə' naque' beŋə' sin' na' beŋə' chon complir can' cheyalə' gone'. Na' gwxaquə'əlebele ca to mos ben' gwlo'o xane'ena' lao ne'e liže'ena' catə'an gwze'ena' par nič chnežjue' de'e chsa'o yoguə' mos che' ca' yela' catə' chžin or chsa'ogüe'.

⁴⁶ Šə to beŋə' mosən' chontezə chone' can' non xanən' mendad, mbalaz socze' catə' yežin xane'ena'.

⁴⁷ De'e li chnia' le'e, xane'en cue'e lao na' xmose'ena' yoguə'əlo de'en deine'.

⁴⁸ Pero šə mosən' naque' beŋə' mal na' gone' xbab əne': "Bagwžei xanan".

⁴⁹ Nach šə solaocle' čhine' mos ca' yela' na' ye'ej gaoxatteze' len no beŋə' güe'e zo,

⁵⁰ nach xane'ena' yežine' to ža senyale' le' to or cui nache'ine'.

⁵¹ Na' por ni che de'en cui chon mosən' can' cheyalə' gone', xane'ena' chinchgüe' le' yid sotən' xte ca gate'. Gaquə' che' can' chac che notə'atezə beŋə' goxoayag, chjəya'aque' gabilən' gan' chesə'əbežyašə' beŋə' na' chsa'oyeje' leyga'aque'ena'.

25

Jempl che ši no'ol güego' ja'aque' to yelə' gošagna'

¹ Nach Jeso'osan' goze'e disipl che' ca': —Yelə' gwnabia' che Diozən' ben' zo yoban' gwxaquə'əleben ca de'e nga goquə. Goc to yelə' gošagna' na' bazjəxi' beŋə' gošagna'anə' xo'ole'ena'. Na' nita' ši no'ol güego' zjənaque' migw che beŋə' ca' chesə'əšagna'anə'. Na' zjənxobe' lintern čhega'aque'en ja'aque' jəsə'əleze' catə' yesyə'əchoj beŋə' ca' liž no'olən' par nič əžja'aque' liž beŋə' byon' txen.

² Na' gueyə' no'ol ca' gwnite'e probnid, na' no'ol ca' yegueyə' bito gosə'anite'e probnid.

³ Catə' gwsa'aque' ližga'aque'ena', zjənxobe' lintern čhega'aque'ena' pero bito gwso'oxe'e lmet gan' yožə petroly de'en yoso'ochine' catə' yebiž de'en yožə lo'o lintern čhega'aque'ena'.

⁴ Na' no'ol ca' gueyə' catə' gwsa'aque' ližga'aque'ena', gosə'əxobe' lintern čhega'aque'ena' na' gosə'əbecyichje' gwso'oxe'e lmet gan' yožə petroly de'en yosə'əchine' catə' yebiž de'en yožə lo'o lintern čhega'aque'ena'.

⁵ Na' gosə'əžei beŋə' gošagna' ca', na' yoguə' beŋə' ca' gosə'əbezə lega'aque' gosə'ətase' lao chesə'əbeze'ena'.

⁶ Na' do chel, to beŋə' gwne' zižjo, gože' lega'aque': "Bachesyə'əchoj beŋə' gošagna' ca'. Le'e šo'o žjəšagga'acchone'."

⁷ Na' catə' gože' lega'aque' ca', yoguə' no'ol ca' gosə'əzeche' na' gosa'əque'e bao' de'en zo lao meš che lintern čhega'aque'ena'.

⁸ Na' no'ol ca' cui gosə'anita' probnid gwse'e no'ol ca' yegueyə': "žEbito gon latə' petroly čhelen' neto'? la' bachebiž čheto'onə'."

⁹ Nach no'ol ca' gwse'e lega'aque': "Bito gaquə gonlatə'əto' chele la' de'en de čheto' bito gaquen par yoguə'əcho. Le'e žja'ac le'e žjəxi' chelen' gan' chso'ote'enna'."

¹⁰ Nach no'ol ca' cui gosə'anita' probnidən' ja'aque' jəsə'əxi' petrolyən'. Na' lao zja'aque' gwxi' petrolyən' besyə'əžin beŋə' ca' choso'ošagna' liž beŋə' byon'. Na' no'ol ca' gosə'anita' probnid gwso'e lo'o yo'onə' gan' chso'one' gastən' txen len beŋə' ca' chosa'əšagna'anə'. Nach mos ca' bosə'oseyue' puertən'.

¹¹ Na' catə' besə'əžin no'ol ca' jəsə'əxi' petrolyən' na' gosə'əne' cho'a puertən', gwse'e ben' zo cho'a puertən': "Señor, bsaljwšga puertən' par nič šo'oto'."

¹² Pero na' ben' zo cho'a puertən' gože' lega'aque': "De'e li chnia' le'e, bito saljua' par šo'ole la' bito nombi'a le'e."

¹³ Nach goze' Jeso'osan' disipl che' ca': —Ca'aczən' cheyalə' sole probnid batə'əquən' yida', chedə' bito nezele bi ža bi orən' yida' yežlyo nga de'e yoblə, nada' naca' ben' bselə' Diozən' golja' beŋəch.

Jempl che ben' bocua'anlene' xmose' ca' mechan'

¹⁴ Na' yelə' gwnabia' che Diozən' ben' zo yoban' gwxaquə'əleben ca de'en nga. To beŋə' gwyeje' nasyon zita'. Na' ze'e se'e goxe' mos che' ca' na' gwlo'e lao na'aga'aque' xmeche'ena' par gwso'onene'en negosy.

¹⁵ Toe' bocua'anlene' gueya' mil pes. Na' yetoe' bocua'anlene' chopa mil. Na' yetoe' bocua'anlene' tmlil. Bnežjue'en lega'aque' segon can' chac so'on to toga'aque'. Beyož bene' ca' gwze'e.

¹⁶ Ben' bocua'anlene' gueya' mil le'e gwzolaote chone' negosy len mechən' na' bene' gan yegueya' mil pes.

¹⁷ Le'egatezə ca' ben ben' bocua'anlene' chopa mil. Le'e gwzolaote chone' negosyən' len mechən' na' bene' gan yechopa mil.

¹⁸ Na' ben' bnežjue' tmlil gwyeje', jəcuaše'e xmech xane'ena' to lo'o yech de'e əgwche'ene' lo'o yon'.

¹⁹ Goc sša gwza' xan mos quinga catə' bežine' nach bene' mendad ja'ac xmore' ca' laogüe'ena' par bosyo'odie' cuent.

²⁰ Na' mosən' ben' bocua'anlene' gueya' mil pes bžine' laogüe'ena' na' gože'ene': "Xana', ni de de'e gueya' mil de'en beņo' nada'. Na' babena' gan yegueya' mil."

²¹ Na' xane'ena' gože'ene': "Babeno' de'e güen. Naco' mos güen na' syempr chono' complir can' cheyałə' gono'. Beno' can' cheyałə' gono' len de'e daon' bocua'anlena' le', na' na'a gona' lao na'o de'e xenchla. Gwyo'o na' gona' par niçh so' mbalaz len nada'."

²² Nach catə' bžin ben' bocua'anlene' chopa milən' gože'ene': "Xana', ni de de'e chopa mil pes de'en bocua'anleno' nada', na' babenən' gan yechopa mil."

²³ Nach gož xane'en le': "Babeno' de'e güen. Naco' mos güen na' syempr chono' complir can' cheyałə' gono'. Beno' can' cheyałə' gono' len de'e daon' bocua'anlena' le', na' na'a gona' lao na'o de'e xenchla. Gwyo'o na' gona' par niçh so' mbalaz len nada'."

²⁴ Nach catə' bežin ben' bocua'anlene' tmlil, nach gože' xane'ena': "Nga de xmecho' de'en bocua'anleno' nada'. Nežda' de que le' naco' to beņə' znia. Chelapo' de'en gwsa'az beņə' yoblə, na' chotobo' cwseš gan' gwso'on beņə' yoblə žin.

²⁵ De'e na'ana' gwy'a'a jəche'ena' to yech na' bcuaša'a xmecho'onə', cheda' bžeba' šə əgwnitla'an. Na' na'a bezi'šgan'."

²⁶ Nach xane'en gože' le': "iNaco' mos mal, na' naco' xagüed! Chacdo' de que chelapa' gan' gwsa'az beņə' yoblə, na' chotoba' cwseš gan' gwso'on beņə' yoblə žin.

²⁷ Na' šə chacdo' chona' ca', žbixchen' cui gwlejo' xmecha'an beņə' yoblə žlac cui gwzoa'? na' na'a babela'a yezi'an len yichjei žala' ca'."

²⁸ Nach gože' xmore' ca' yela': "Yeca'ale mechən' de'en bocua'anlena' be'ena' na' əgwnežjwlen ben' banoxə' ši mil pes.

²⁹ Can' naquən, ben' chon güen len de'en chnežjo xane'en le', xane'en gwnežjochcze' che', niçh gata' de'e scha'och che'. Pero na' be'ena' cui chgon žin de'en chnežjo xane'en le', yeca'a xane'en de'e da'on bnežjue' le'.

³⁰ Na' ca' naquə mos mal nga le'e yebeje' fuerlə gan' lechgualə naquə žcho! na' cuežyaše'e na' gaoyeja' leye'ena'."

Can' gaquə catə' Jeso'osən' gone' yelə' jostis che yoguə' nasyon

³¹ Diozan' bsele'e nada' golja' benach, na' catə' yida' de'e yoblə nsa'a yelə' chey che'eni' chia'anə', na' chi'a angl chia' ca' na' cui'a gan' chey che'eni' na' nabi'a.

³² Yoguə' beņə' ban na' yoguə' beņə' guat che yoguə' nasyon gona' mendad da'aque' laogua'ana'. Na' catə' banitə' yogue'e na' la'aga'aca'ane' can' chon to beņə' goye xilə' catə' chbeje' partlə xilə' ca' na' partlə šib ca'.

³³ Na' beņə' ca' zjənaquə beņə' güen lao Diozan' de'en baboso'ozenague' chia' əgwnitə'əga'aca'ane' cuitan' licha. Pero beņə' mal ca' əgwnitə'əga'aca'ane' cuitan' yeglə.

³⁴ Na' nada' naca' Rei yapa'a beņə' ca' ni'tə' šla'a lichan': "Baben Xa' Diozan' par niçh le'e zole mba. Le'e da nga par niçh gona' ca' nabi'ale txen len nada' can' banžia Diozan' bia' dezd gwxe yežlyon'.

³⁵ Gona' ca' nabi'ale cheda' catə' gwdona' le'e beņle de'en gwdaogua'. Na' catə' bgüilda' nis, le'e beņle de'e güe'aja'. Na' catə' goca' ca' beņə' zita' le'e bebeile bgüialaole nada' ližlen'.

³⁶ Na' catə' cui gotə' de'e chaza', le'e beņle de'e gwyaza'. Na' catə' gocšenda' le'e bedətiple laža'a. Na' catə' gotə'a ližya, le'e bedəlaņə'ale nada'."

³⁷ Na' yoguə' beņə' güen ca' əse'e nada': "Xanto' žbatən' ble'ito' le' gwdono' na' beņto' de'e gwdaogo'? Na' žbatən' bgüildo' na' beņto' de'e güe'ejo'?"

³⁸ Na' žbatən' goco' ca' beņə' zita' na' bebeito' bgüialaoto' le'? Na' žbatən' ble'ito' le' cui gotə' de'e chazo' na' beņto' de'e gwyazo'?"

³⁹ Na' žbatən' gocšendo' o goto'o ližya na' bedelaņə'ato' le'?"

⁴⁰ Na' nada' naca' Rein' yapə'əga'aca'ane': "De'e li chnia' le'e, laogüe de'en beyašə'alažə'ale beņə' ca' zjənaquə ca' biša'a na' ca' zana' por ni che de'en chso'onliža'e'e nada', la'añə'əczə' cuitec bi zjažaque'e par len beņaçhən', lencza' nada'an beyašə'alažə'ale."

⁴¹ Nach beṇə' ca' n̄itə' yeglə, beṇə' mal ca', yapə'əga'aca'ane': "Le'e cui'izə' ca'alə. Ban-choglaon chele cuiayi'ile yelə' güen de'e mal chelen'. Le'e žja'ac lo'o yi' gabil' de'en cui chyol, yi' de'en bxn Diozən' gan' yesə'əzi' de'e gwxiye'enə' len angl bzelaol chei ca' castigw zejlicane.

⁴² Le'e žja'ac gabilən' cheda' cata' gwdonə' bito beṇle de'en gaogua'. Cata' bgüilda' bito beṇle de'e ye'ēja'.

⁴³ Cata' goca' ca' beṇə' zitə' bito bebeile ggüialaole nada' ližle. Cata' cui gotə' de'e chaza' bito beṇle de'e chaza'. Cata' gocšenda' na' cata' gota'a ližya, bito bedəlanə'ale nada'."

⁴⁴ Nach lega'aque' yosyo'ozi'e xtiž'a'a yesə'əne': "Xantə', žbatən' gwdonə'?, žbatən' bgüildo'? na' žbatən' goco' beṇə' zitə'?, žbatən' cui gotə' de'e chazo'?, žbatən' gocšendo'? na' žbatən' gotə'o ližya na' bito beyaše'eto' le'?"

⁴⁵ Na' cata' yeyož'əsi'e nada' ca', yapə'əga'aca'ane': "Laogüe de'en cui beyašə'alažə'ale beṇə' ca' zjənaquə ca' biša'a na' ca' zana' por ni che de'en chso'onjilaž'e'e nada', la'anə'əczə cui tec bi zjəzaque'e par len beṇəchən', lencza' nada'an cui beyašə'alažə'ale."

⁴⁶ Nach beṇə' mal ca' yesə'əzi'e castigw che xtolə'əga'aque'enə' zejlicane. Pero beṇə' güen ca' yesə'əzoe' len nada' zejlicane.

26

Boso'oxi'e can' so'one' yesə'əzene' Jeso'osən'

¹ Cata' beyož' be' Jeso'osən' dižə'an ca', gože' disipl che' ca':

² —Banəzele de' go yečopə žazən' galə' lni pasw chechon', na' ca' na' gaca' lao na' beṇə' contr chia' ca' nič so'ote' nada' yosə'əde'e nada' to le'e yag coroz, nadan' naca' ben' bselə' Diozən' golja' beṇəch.

³ Nach bχoz əblao ca' na' beṇə' ca' choso'osed choso'olo'i lei de'en bzoj de'e Moisezən' na' beṇə' golə blao che chio'o beṇə' Izrael besə'ədobe' chy'o'o che beṇə' gwnabia' che bχoz ca', ben' le Caifas.

⁴ Na' boso'oxi'e naclən' so'one' par yesə'əzene' Jeso'osən' bgašə'əzə na' so'ote'ene'.

⁵ Na' gosə'əne': —Bitə gotchone' ža l̄inə', par nič cui yesə'ədopə beṇə' ca' banitə' lao syodan' na' yesə'ədiləlene' chio'o.

To no'olə bcuase' set zix'yichj Jeso'osən'

⁶ Nach Jeso'osən' len disipl che' ca' ja'aque' Betania, liž to beṇə' le' Simon. Na' Simon nan' güe'ine' yizgüe' de'en ne' lepr antsla.

⁷ Na' cata' besə'əžine' liž Simonnə' gwche' Jeso'osən' cho'a mes che'enə'. Na' ca' chi'e cata'əczlə bžin to no'olə noxe'e to lmet de' yej fin de'e yožə to set de'e lechgualə zaque'e de'e chl'a' zix. Na' no'olən' bcuase' setən' yichj Jeso'osən'.

⁸ Na' disipl ca' cata' besə'əle'ine' can' ben' no'olən' besə'əže'e na' gwse'e ljuežjga'aque': — žBixchen' con benditjeine' setən'?

⁹ Güenchlə žalə' bete'en na' mech xennə' de'en le'ine' chei əgwnežjue'en beṇə' yašə'.

¹⁰ Na' cata' bene Jeso'osən' xtižə'əga'aque'enə', nach gože' lega'aque': — žBixchen' chnele che no'olən'? Güenchgua babene' len nada'.

¹¹ Ca' naquə beṇə' yašə' ca' syempr nitə'əcze' len le'e, pero ca' naca' nada' yešložgan' soa' len le'e.

¹² De'en bcuasə no'olən' setən' yichja'anə' bene' de'e non gone'ene' nada' žan' so'ote' nada' na' əgaša'a, can' choncho len cuerp che beṇə' guatən'.

¹³ De'e l̄i chnia' le'e, cata' chixjue'ile dižə' güen dižə' cobə chia'anə' gasə' laljən doxenlə yežlyo nga, na' leczə guasə' gwłaljə dižə'an can' ben' no'olən' nga len nada', na' beṇə' zannə' so'one' xbab ca' güennə' bene'.

Jod Iscariotən' bene' Jeso'osən' lao na' beṇə' contr ca'

¹⁴ Gwde de'e quinga, Jod Iscariotən' ben' goquə txen len disipl ca' šižin gwyeje' lao bχoz əblao ca'

¹⁵ par ježe' lega'aque': — žja'aque'ətə' gonle nada' na' gona' Jeso'osən' lao na'ale?

Nach boso'oxia' beṇə' ca' boso'onežjue'ene' šichoa mech plāt.

¹⁶ Nach Jodən' lao orzə gwzolao gwche'enaogüe' batə'əquən' so latjə gone' Jeso'osən' lao na'aga'aque'enə'.

Lao gwsa'ogüe' xše' Jeso'osən' blo'ine' lega'aque' naquən' žjəsyə'əzalaž'e'e ca' de'en əgwnežjo cuine' so'ot beṇə' le'

¹⁷ Na' ža nech ža l̄in' cata'an chsa'ogüe' yetxtil sin cui bi xne'i nchižə, ja'ac disipl ca' gan' zo Jeso'osən' na' gwse'ene': — žGa che'endo' žje'eni'ato' de'en gaocho xše' l̄ni pascon'?

¹⁸ Nach Jeso'osən' gože' lega'aque': —Le'e žja'ac lao syodan' liž to beṇə' yežagle na' ye'elene': "Maestrən' ne' de que bazon əžin ža so'ote'ene' na' ližo' nga chene'ene' gaolento'one' xše' lṇi pascon'."

¹⁹ Nach gws'o'on disipl ca' can' ben Jeso'osən' mendad, jesə'asi'ini'e de'en gwsa'olene' le' xše' lṇi pascon'.

²⁰ Na' catə' beyož gwṅen, Jeso'osən' len disipl che' ca' šižin gosə'abi'e cho'a mesən' gwsa'ogü'e'.

²¹ Na' lao chsa'ogü'e'ena' gož Jeso'osən' lega'aque': —De'e lṇi achnia' le'e, to le'e gonḷe nada' lao na' beṇə' contr ca'.

²² Nach de'e juisy de'e gwsa'aquene' catə' beyož gwne' ca', nach to toe' gwse'e le': —Xana', žanada'an gona' le' lao na' beṇə' contr ca'?

²³ Nach gože' lega'aque': —To ben' babne' ne'ena' txen len nada' lo'o platən', le'ena' gone' nada' lao na' beṇə' ca'.

²⁴ Banaquəczən so'ot beṇə' nada' can' nyoj Xtižə' Diozən' nan gaquə chia', pero probchguazə be'ena' gon nada' lao na' beṇə' contr ca'. Nca'alə xneze žalə' cuiclə golje'ena'.

²⁵ Nach Jodən', ben' bene' Jeso'osən' lao na' beṇə' contr ca', gože'ene': —Maestr, žanadan' gona' le' lao na' beṇə' contr ca'?

Jeso'osən' gože'ene': —Nezczado' šə le'ena'.

²⁶ Na' lao chsa'ogü'e'ena' gwxi' Jeso'osən' yetxtilən', be'e yelə' choxcwlen che Diozən'. Gwde na' bzoxje'en nach be'en disipl che' ca', gože' lega'aque': —Le'e gaon. Lṇnə' cuerp chia'anə'.

²⁷ Nach leczə bexe'e basən' gan' yožə nis oban', na' lao noxe'en be'e yelə' choxcwlen che Diozən' nach boznežjue'en lega'aque' gože'e: —Yoguə'əle le'e ye'ej de'en yožə lo'o bas nga.

²⁸ Lṇnə' xchena'anə'. Na' xchena' na'anə' laljə par ničh yezi'ixen Diozən' xtolə' beṇə' zan, na' de'en laljənṇə' solao gaquə de'e cobə de'en ben Diozən' lyebe gone' par gaquəlene' beṇəchən'.

²⁹ Echnia' le'e na'a zelao che'eja' nis oban'. Pero de yeto de'e yebeichecho mazəchlə can' chebeicho nis oban', lṇnə' de'en socho mbalaz zejlicane catə'an socho txen gan' nabi'a len Xa' Diozən'.

Jeso'osən' gwne' de que Bedən' cui chebe' šə nombi'ene'

³⁰ Na' beyož gwse'ej gwsa'ogü'e' gwso'ole' to immo nach besə'əchoje' ja'aque' ya'a de'en nzi' Olibos.

³¹ Na' lao žəngü'e'e nezən' Jeso'osən' gože' disipl che' ca': —Neže' yoguə'əle cuejyichjle nada' por ni che de'en gaquə chia'. Gaquə can' nyoj Xtižə' Diozən' nan: "Gota' beṇə' goye xilə'anə' na' xilə' che' ca' sa'asə'əlasəb'."

³² Pero na' catə' yosban Diozən' nada' ladjo beṇə' guat ca', yobəchda' nada' yeya'a Galilean' cle ca' le'e.

³³ Nach Bedən' gože' Jeso'osən': —Nada' cuat cuejyichja' le' la'anə'əczə šə yoguə' beṇə' yeziquə'əchlə yesə'əbejyichjle' le'.

³⁴ Jeso'osən' gože'ene': —Bed, achnia' le' bito cuež lecon' neže' antslə ze'e gaquə šon las cui chchebo' de que nombi'o nada'.

³⁵ Nach Bedən' gože'ene': —La'anə'əczə šə chonclən byen guatlencza' le', bito əṇia' de que bito nombi'a le'.

Na' leczə ca' əgwse' yoguə' disipl che' ca' le'.

Jeso'osən' bene' orasyon lo'o güert de'en nzi' Getsemani

³⁶ Na' catə' Jeso'osən' len disipl che' ca' besə'əžine' latjən' gan' nzi' Getsemani, na' gože' lega'aque': —Ngazə lecue' žlac ša'a de'e na' žjena' orasyon.

³⁷ Na' gwche'e Bedən', len čopə xi'in Sebedeon' Jacobən' len Juannə'. Na' Jeso'osən' gwzolao gwzochgü'e' trist, na' de'e juisy de'e goquene' lo'o yichjla'ažda'ogü'e'ena'.

³⁸ Nach gože' lega'aque': —Tristchgua zo yichjla'ažda'ogua'anə' xte bachonən yelə' got. Lecuezə nga na' sole əṇa'azle len nada'.

³⁹ Nach gwdie' gwyeje' yelata' delant na' jete'e goscho'alə lao yon' nach bene' orasyonṇə' gwne': —Xa', žəguaquə te ca'azə de'en čhi' saca'anə'?, pero bito che'enda' gaquə de'e ṇia' nada', sino gaquə con can' əṇao' le'.

⁴⁰ Catə'əczlə bežine' gan' nita' disipl ca' šonə jəyedi'e lega'aque' chəsə'ətase'. Na' gože' Bedən': —Čeni to or bito bchejele əṇa'azle len nada'?

⁴¹ Le'e na', na' le'e gon orasyon ničh cui co'o gwxiye'en le'e nez mal. Nezda' chene'ele əṇa'azle len nada', pero cui chzoile.

⁴² Na' gosze'e gan' nite'ena' de'e yoblə, jezene' orasyonṇə', gwne': —Xa', šə cui gaquə te ca'azə de'en čhi' saca'anə', con can' che'endo' le' gaquə.

⁴³ Na' bežine' gan' nite'ena' de'e yoblə jeyezdi'icze' bachəsə'ətase' tant bachac šə tasga'aque'.

44 Na' gwze'e de'e yoblə gan' nite'enə' jene' orasyonnə' de'e əgwyon lase, na' gwnacze' can' bagwne'.

45 Nach bezžine' gan' nitə' disipl ca' šonə nach gože' lega'aque': —ǰEne'e chtasle? ǰEne'e chonle dezcanz? Diozan' bsele'e nada' golja' beṇach na' na'a baḅ bžin or chia' par gaca' lao na' beṇə' mal ca' par so'ote' nada'.

46 Le'e secha. Le'e šo'o. Baza' ben' gon nada' lažə' na' beṇə' contr ca'.

Jodən' bdie' Jeso'osən' lao na' soldad ca'

47 Necho'ete Jeso'osən' dižə' ca' cata' bžin Jodən' ben' naquə cuent lao disipl ca' šižin. Na' žague' zan beṇə' bososele' bḅoz əblao ca' na' beṇə' golə blao che chio'o beṇə' Izrael. Na' zjanale'e spad na' zjanlene' no yag.

48 Na' Jodən' babzejni'ine' lega'aque' can' gone' par əgwdie' Jeso'osən' lao na'aga'aque'ena', gože' lega'aque': —Ben' gaogua' bxidən', le'ena' senle.

49 Na' cata' bžine' gan' zo Jeso'osən' le'e bgüigüə'əte' cuite'ena' na' gože'ene': —Padiox Maestr. Na' gwdaogüe'ene' bxidən' pero caguə do laže'en bene' ca'.

50 Jeso'osən' gože'ene': —Migw chia', žbixchen' za'o nga?

Beyož gwne' ca' le'e gosə'əbigüə'əte beṇə' ca' gwso'oxe'ene'.

51 Na' to ben' naquə txen len Jeso'osən' gwlej spad chen' gwidine'en mos che beṇə' gwnabia' che bḅoz ca', gwchogtechgüe' šla'a nague'ena'.

52 Nach Jeso'osən' gože'ene': —Bego'o spad chio'onə' lo'o liže, la' yoguə' beṇə' chso'ot beṇə' len spad, leczə len chsa'atene'.

53 ǰEbito nezdo' de que gaquə naba' lao Xa'anə' par le'e selə'əte' mazlə gyon šižina mil angl beṇə' əsa'aclen nada'?

54 Šə le'e tišalenle beṇə' quinga par yoslale nada', žnaxa gaquən gaquə complir can' nyoj Xtižə' Diozan' nan can' cheyalə' gaquən'?

55 Na' lao bazžənoxe'e Jeso'osən', gože' lega'aque': —ǰEca to beṇə' bguannə' chsaquə'əlebele nada' za'acle len spad len yag zedexenle nada'? Yoguə' ža gwchi'a len le'e na' bsd blo'ida' beṇə' lo'o yo'odao' əblaon' na' cui gwzenle nada'.

56 Pero laogüe de'en chac yoguə' de'e quinga chac complir Xtižə' Diozan' de'en bosozož de'e profet ca' beṇə' ca' gwso'e xtiže'ena' cana'.

Na' lao or na' bosyo'oxonj yoguə' disipl che' ca' gosə'əbejyichje'ene'.

Gosə'əche'e Jeso'osən' lao beṇə' golə beṇə' blao che Izraelən'

57 Na' beṇə' ca' gosə'əzen Jeso'osən' gosə'əche'ene' lao Caifasan' ben' naquəch bḅoz əblao che chio'o beṇə' Izrael gan' bazžəndobə beṇə' ca' choso'osed choso'olo'i lei de'en bzoj de'e Moizezan' na' len yeziquə'əchlə beṇə' golə blao ca' chəsə'ənabia' nasyon chechon'.

58 Nach Bedən' jənaogüe' Jeso'osən' zita' zita'ələ xte bžintə' liž bḅoz əblaonə', na' gwyo'e chy'o'onə' na' jəchi'e len beṇə' ca' zjanaquə xə'ag che yo'odao' əblaonə', chedə' gone'ene' le'ine' naquən' zelao gaquə len Jeso'osən'.

59 Nach yoguə' bḅoz əblao ca' na' yeziquə'əchlə beṇə' golə blao ca' chəsə'ənabia' nasyon Izrael chechon' chəsyo'əyilje' beṇə' so'e dižə' contr Jeso'osən' parzə niḅ so'ote'ene' la'anə'əczə šə dižə' güenlažə'ənə'.

60 Pero goc šša bito besyo'əželene' čopə beṇə' əso'e dižə' de'en yedile la'anə'əczə beṇə' zan gosə'ənitə' testigw fałs contr le'. Gwde na' besə'əchoj yəčopə testigw fałs ca' na' bedile can' gosə'əne'.

61 Na' gosə'əne': —Benga gwne': “Nada' guaquə yochinja' yo'odao' əblao gan' cho'ela'ocho Diozan', na' lao šonə žazə yeyona'an.”

62 Nach gwzoža' ben' naquəch bḅoz əblao gože' Jeso'osən': —ǰEbito bi de bi nao' ca naquə de'e nga chosə'əcuiš beṇə' quinga le'?

63 Jeso'osən' bitobi gwne'. Nach gož bḅoz əblaonə' le': —Echnia' le' gwna neto' na' bzo Dioz ben' zo zejlicane gague' testigw šə le len' Crist Xi'in Diozan' ben' gwleje' par gaquəlene' nasyon chechon'.

64 Jeso'osən' gože'ene': —Le ben' nao' na' nada'. Diozan' bsele'e nada' golja' beṇach. Na' əchnia' le'e, gwžin ža le'ile nada' chi'a cuit Diozan' ben' napə le'ezelaogüe yelə' guac xen, na' nabi'a txen len le', na' le'ile nada' yetja' yoban' to lo'o bejw.

65 Cate bene bḅoz əblaonə' xtižə' Jeso'osən' gwšo' gwčhezə' xe'ena' la' par le' de'e mal juisyən' gwna Jeso'osən', nach gwne': —Babenecho na'a babžia bnite'e Diozan'. ǰNochxa testigon' chyažjecho?

66 Na' žnaquən' ənale che'?

Nach beṇə' ca' bosyo'oži'en gwse'ene': —Babžia bnite'e Diozan' na' cheyalə' gate'.

67 Nach bosozoža' xene'e cho'alao Jeso'osən', na' gosə'əbaže'ene', na' balə' gosə'əgape'e xague'ena'.

68 Nach gwse'ene': —Šə len' naco' Cristən' ben' gwleĵ Diozən' par gaquəleno' nasyon chechon', gwneya'ašc gwna neto', ĵnon' chgapə' le'?

Bedən' bito gwchebe' šə nombi'e Jeso'osən'

69 Na' lao chac de'e quinga, chi' Bedən' chyo'onə' catə' bžin to no'ol criad che Caifasən' gože'ene': —Leczə leno' le' naco' txen len Jeso'os beṇə' Galilean'.

70 Na' lao yoguə' beṇə' ca' ža'anə', Bedən' bito gwchebe' šə naque' txen len Jeso'osən' na' gože' no'olən': —Bito nezdə' bi dižə'an cho'o.

71 Gwde beyož gože' no'olən' ca' gwyeje' cha'ašilan', na' bezle'i yeto no'ol criadən' le', na' goze'e beṇə' ca' ža'anə': —Benga naque' txen len Jeso'os beṇə' Nasaretən'.

72 De'e yoblə bito gwchebe' šə le' naque' txen len Jeso'osən' nach bzoe' joramentən' lao Diozən' gože' no'olən': —Bito nombi'a be'enə' nao' ca'.

73 Na' chacczə šlož, gosə'əbiguə' beṇə' ca' ža'anə' gosə'əze'e Bedən': —De'e liczə, chono' txen len beṇə' ca' chedə' ca nga chnio' ngazə nachbia'.

74 Nach Bedən' gože' lega'aque': —Diozən' gone' nada' castigw šə chonlaža'an nia' bito nombi'a be'enə'. Chzoa' jorament lao Diozən', bito nombi'ane'.

Na' le'e gwchežte to lecw.

75 Nach jəza'alaza' Bedən' can' gož Jeso'osən' le': “Šon las gaquə cui chchebo' šə nombi'o nada' cata' cuež lecon'.” Nach beza' Bedən' lechguəle gwchežyaše'e tant de'e goquene'.

27

Gosə'əche'e Jeso'osən' lao Pilatən'

1 Na' catə' gwye'eni' beteyon', yoguə' bχoz əblao ca' na' yeziquə'əchlə beṇə' golə blao ca' chasə'anabia' nasyon chechon' besə'ədope' jont na' gosə'əchoglaogüe'en de que so'ote' Jeso'osən'.

2 Nach bosə'ocheje'ene' na' le'e gosə'əche'ete'ene' jse'ene'ene' lao na' Gobernador Ponsio Pilatən'.

Jodən' beyot cuine'

3 Na' Jodən' ben' bdie' Jeso'osən' lao na' beṇə' ca', catə' goche'ine' de que bagosə'ochoglaogüe'en so'ote' Jeso'osən', beyejene' de'en bdie' le' lao na' bχoz əblao ca' na' beṇə' golə blao ca'. Nach gwyeje' laoga'aque'enə' par bonežjue' lega'aque' šichoa mech plātən'.

4 Nach gože' lega'aque': —Malən' bena' bdia' lao na'alən' to beṇə' cui napə dolə'.

Na' gwse'ene': —Bitobi dolə' napə neto' de'en beno' ca', la' de'e nezzədo'on beno'.

5 Nach Jodən' bozəle'e mech ca' lo'o yo'odao' əblaonə', nach beze'e, na' jəyelo'o don' yene' par beyot cuine'.

6 Beyož beza' Jodən', bχoz əblao ca' besyə'ətobe' mechən'. Na' gwse'e ljuējžga'aque': —Bito de lsens co'ochon lo'o caj gan' yo'o mech che yo'oda'onə', chedə' la' naquən mech de'en gwdixjwcho par nič gotcho be'enə'.

7 Na' bosə'oxi'e yesə'əzi'e to yežlyo de'en de che to beṇə' güen yesə' len mechən'. Na' gosə'əzi'en par to capsant gan' yesə'əcuəše'e beṇə' zita'.

8 Na' yezylonə' nzi'in “Capsant Chen” xte ža neža chedə' gosə'əzi'en len mech de'en gosə'əyixjue' par gwso'ote' Jeso'osən'.

9 Can' goquə par nič goc complir can' bzoj de'e profet Jeremiasən' ben' be' xtižə' Diozən' cana', gan' nan: “Besyə'əzi'e šichoa mech plātən', de'en gwsa'aque balə beṇə' Izrael zaquə' ben' besə'əgue'ine'enə'.

10 Na' len mechən' gosə'əzi'e yežlyo che to beṇə' güen yesə', can' gwna Xancho Diozən' nada' gaquə'.”

Bosə'əcuiše' Jeso'osən' lao Pilatən'

11 Na' bžin Jeso'osən' gwzeche' lao gobernadorən', nach gobernadorən' gože'ene': —ĵElen' naco' Rei che beṇə' Izrael ca'?

Nach Jeso'osən' gože'ene': —Le ben' nao' na' nada'.

12 Na' bito bi gwna Jeso'osən' ca de'en bosə'ocuiš bχoz əblao ca' le' na' beṇə' golə blao ca'.

13 Nach Pilatən' gože'ene': —ĵEbito chendo' catec de'e zan xya nga chsa'ogüe' contr le'?

14 Pero Jeso'osən' ni to xtiže'enə' bito boži'e, xte bebanchgüeicze gobernadorən'.

Gosə'əchoglaogüe'en so'ote' Jeso'osən'

15 Na' de to costombr de que ža lni pascw əgwsan gobernadorən' to pres, con beṇə' yesə'əṇab beṇə' lao' syoda ca'.

16 Na' ližya na' de to pres beṇə' zechgua chei naque' beṇə' mal na' le' Barrabas.

17 Nach Pilatən' gože' beṇə' ca' žəndobən': —ĵNoe' beṇə' quinga chene'ele gwsana'? ĵEBarrabas na' o šə Jeso'os na' ben' chesə'əne' naquə Crist chele?

¹⁸ Gone'ene' əgwsane' Jeso'osən' la' nezene' ni che de'e zjəziague'i bχoz əblao ca' Jeso'osən', de'e na'anə' bos'o'odie' le' lao ne'ena'.

¹⁹ Ca' chi' Pilatən' gan' chone' yelə' jostisən', bžin to rson de'e bselə' no'ol che'enə' gože'ene': "Bitobi non ben' par bi castigon' əgwnežžo'one', zdaczə ben' licha. De'e zan de'e bžaglaochgua' bišyele len yel de'e gwneida' por ni che de'en chac che be'ena'."

²⁰ Na' bχoz əblao ca' na' beṇə' gola blao ca' gosə'əgo'oyele'e beṇə' ca' ža'anə' par yesə'əṇabe' əgwsane' Barrabasən' na' yesə'əṇabe' gone' mendad so'ote' Jeso'osən'.

²¹ Nach goberṇadorən' gože' lega'aque' de'e yobla: —iNoe' beṇə' quinga čhopə chene'ele gwsana'?

Nach gwse'ene': —Barrabas na'.

²² Pilatən' gože' lega'aque': —iBixa gona' len Jeso'os, ben' chesə'əne' naquə Crist čhele?

Na' yogue'e gwse'ene': —Bde'e le'e yag corozən'.

²³ Nach gož goberṇadorən' lega'aque': —iBixa de'e mal babene'ena'?

Na' lega'aque' gwso'osye'e zižjoch gosə'əne': —Bde'e le'e yag corozən'.

²⁴ Gocbe'i Pilatən' cuiczə bi de gone'. Bachyalə'əch chso'one' scandl juisy. Nach bselə'e to beṇə' jəxi'e nis par bone'e lao beṇə' ca' ža'anə' na' gože' lega'aque': —Zdaczə bengə licha. Bitobi xbagə'a naquən ca de'en gate', čhedə' de'en nezze le'ena' gate'.

²⁵ Nach yogua' beṇə' ca' gosə'əne': —Xbagua' neto' na' xbagua' xi'into' naquən che yelə' got čhe bengə.

²⁶ Nach bsan Pilatən' Barrabasən'. Gwde na' bene' mendad gosə'əyin sołdad ca' Jeso'osən', nach bene' le' lao na'aga'aque' par yosə'əde'ene' le'e yag corozən'.

²⁷ Nach sołdad čhe goberṇadorən' gosə'əche'e Jeso'osən' lo'o yo'o čhe goberṇadorən', nach bosyo'otobe' yogua' sołdad ljuzejžga'aque' ca'.

²⁸ Na' gosə'əyine' xala'an Jeso'osən' na' bosə'əguacue'ene' to lachə' color əxṇa ca de'en chsa'az rei ca'.

²⁹ Na' gwso'one' to coron de yeša' bos'o'ožine'en yichje'ena', na' ne'e ličan' bos'o'ogoxe'ene' to ya. Na' bos'o'ozo xibe' laogü'e'ena' par gwso'one'ene' borl, nach gwse'ene': —iBiba Rei čhe beṇə' Izrael!

³⁰ Nach bosə'əža' xene'e le', na' besyə'əque'e yanə' de'en noxe'ena' na' gosə'əyine'en yichje'ena'.

³¹ Na' beyož gwso'one' le' borlən', besyə'əyine' lachə' color əxṇanə' de'en bosə'əguacue'ene'ena', na' besyə'əguacue'ene' xaczə'. Nach gosə'əche'ene' par jəsə'əde'ene' le'e yag corozən'.

Boso'ode'e Jeso'osən' le'e yag corozən'

³² Na' catə' besə'əchoje' syodan' besyə'əžague' to beṇə' Sirene le Simon na' la fuers bosə'əgü'e'ene' coroz čhe Jeso'osən'.

³³ Na' besə'əžine' to latjə gan' nzi' Golgota, zejen dižə' latjə čhe yichj beṇə' guat.

³⁴ Na' bosə'ənežjue' Jeso'osən' bino corrient de'e nčhixə to rmech zla' par ye'eje', pero le' con bnixe'en bito güe'ejə'en.

³⁵ Na' catə' beyož bosə'ode'ene' le'e yag corozən', sołdad ca' gwso'one' xe'ena' rif par gotə'əbia' noe' yechelan. Na' de'en gwso'one' ca' goc can' bzoj de'e profetan' ben' be' xtizə' Diozən' cana', gwne': "Yosyo'ol'e' xalana'anə' entr' lega'aque', so'one'en rif."

³⁶ Nach gosə'əbi'e gwsa'ape'ene'.

³⁷ Na' yichj yag corozən' gan' de'ena' bos'o'ozoje' de'en bcuiš le', na' nan: "Bengan' Jeso'osən' Rei čhe beṇə' Izrael ca'."

³⁸ Na' leczə cana' bosə'ode'e čhopə beṇə' bguan le'e yəčhopə yag coroz. Toe' gwda' cuit Jeso'osən' licha na' yetoe' cuiten' yeglə.

³⁹ Na' beṇə' ca' chse'ej chəsə'əde' gan' da' Jeso'osən' chəsə'əlolə' yichje'ena' gwso'onene' borl,

⁴⁰ gwse'ene': —Len' gwnao' yochinjə' yo'odao' əblaona' na' šonə žazə yeyono'on, bosla cuino'. Šə len' naco' Xi'in Diozən', beyetj le'e yag corozən'.

⁴¹ Na' len bχoz əblao ca' na' len beṇə' ca' choso'osed choso'olo'i lei de'en bzoj de'e Moizezən' na' len beṇə' fariseo ca', na' len beṇə' golə blao ca', yogue'e gwso'one'ene' borl, na' gosə'əne':

⁴² —Yeziquə'əchlə beṇə' bosle' na' cabi chac yosla cuine'. Šə len' naque' Rei čhe chio'o beṇə' Izrael, yoletj cuine' le'e yag corozən' na'a na' šejle'echo čhe'.

⁴³ Le' chonlilaže'e Diozən', la' gwne': "Xi'in Dioz nada'." Na' le'icho yosla Diozən' le' na'a šə chaquene' che'.

⁴⁴ Na' beṇə' bguan ca' zjəda' le'e yag corozən' cuite'ena' čhopə la'a, leczə gwso'one'ene' borl.

Can' goquə catə'an got Jeso'osən'

⁴⁵ Na' do gobiz goc žčhol doxen yežlyon' bžinte cheda šonə.

⁴⁶ Na' do cheda šonə Jeso'osən' gwne' zižjo gwne': —Eli, Eli, žlama sabactani? —zejen dižə': Dioz čhia', žbixčhen' bagwlejyichjo' nada'?

⁴⁷ Na' catə' gwse'enene' xtizə'enə', baļə beņə' nitə' galə'əzə gosə'əne': —Chaxe' profet Liazən' ben' be' xtizə' Diozən' cana'.

⁴⁸ Nach bchoj to beņə' gwsa'adoe' jəxi'e to sponj na' bosgaže'en bino corrient de'en cui bi nchiḡə, na' bzo'en to lao ya dao' na' bosšine'en cho'a Jeso'osən' par niḡ güe'eje'en.

⁴⁹ Na' yebale' gwse'e be'enə': —Gwleza. Yešc šə yidə Liazən' par yosle'ene'.

⁵⁰ Nach bisya'a Jeso'osən' zižjo na' be'e latjə bchoj grasy che'enə' gote'.

⁵¹ Na' lao orən' catə'an got Jeso'osən', ca naquə lachən' de'en ze lo'o yo'odao' əblaonə' gwchezə gwcholən gwza'azə yichjei bechojte che'elə. Na' lechguale gwxo' xte gwso'oxj yej ca'.

⁵² Na' leczə xte besyə'əyaljo bloj ba ca'. Na' zan de'e beņə' ca' gwso'onlilažə' Diozən' besyə'əbane' ladjo beņə' guat ca'.

⁵³ Nach catə'an beban Jeso'osən' ladjo beņə' guat ca', besyə'əchoje' lo'o ba chega'aque' ca', na' jəya'aque' Jerosalennə' gan' naquə syoda che Diozən'. Na' jəsyə'alo'e laoga'aque' lao zan beņə' lao' syodan'.

⁵⁴ Na' leczə lao orən' catə'an got Jeso'osən', capitannə' len soldad che' ca' nite'e chsa'ape' Jeso'osən'. Na' besə'əžebchgüe' catə' besə'əle'ine' can' gwxo' na' bichlə de'e ca' goquə, na' gosə'əne': —De'e ličzə benga naque' Xi'in Dioz.

⁵⁵ Na' leczə nitə' zan no'olə latjən' beņə' gosə'əzecha zitə'ələ na' besə'əle'ine' can' goquən'. No'ol quinga gosə'ənaogüe' Jeso'osən' catə' beze'e Galilean' par chsa'aclene' le' len bi de'e chyažjene'.

⁵⁶ Na' len no'ol quinga gwzo Maria beņə' Magdala, na' leczə len Maria ben' naquə xna' Jacob na' Jwse, na' leczə ca' xna' Jacob na' Juan xi'in Sebedeon'.

Bosə'əcuəše'e Jeso'osən'

⁵⁷ Na' zo to beņə' gwni'a beņə' Arimatea le' Jwse, leczə goque' disipl che Jeso'osən'. Na' catə' bachzolo chexjw ž'e'enə'

⁵⁸ Jwsen' gwyeye' lao Pilatən' jəyənabe' cuerp che Jeso'osən'. Nach Pilatən' bene' mendad bosyo'onežjue'ene' cuerp che Jeso'osən'.

⁵⁹ Nach Jwsen' bego'o lao ne'e cuerp che'enə' na' blaže'ene' to lachə' de'e nyach.

⁶⁰ Ca' naquə Jwsen' bazo to bloj ba che' de'e cobə de'e gwche'ene' le'e yej, na' lo'o ba che' na' gwlo'e cuerp che Jeso'osən' na' blole' to yej xen de'e bseyjue'ene' cho'a ban'. Nach beze'e.

⁶¹ Na' Maria beņə' Magdalan', na' yeto Maria yoblə, jesə'əchi'e cho'a banə'.

Boso'ozoe' beņə' chsa'ape' ba che Jeso'osən'

⁶² Na' beteyo, gwde žan' catə'an choso'osi'ini'e de'en chse'ej chsa'ogüe' ža lni pascon', besə'ədobə bχoz əblao ca' na' beņə' fariseo ca' par ja'aque' gan' zo Pilatən'.

⁶³ Na' gwse'ene': —Señor, bajəyēza'alazə'əto' can' gwna de'e beņə' goxoayaguən' can' nembane' gwne': “Yeyon ža yebana' ladjo beņə' guat ca'.”

⁶⁴ Bselə'əšga beņə' žjəsə'ədape' cho'a banə' lao šonə ža, niḡ cui žja'ac disipl che' ca' še'elə žjəsyə'əleje' cuerp che'enə' na' əse'e beņə' de que babebane' ladjo beņə' guat ca'anə'. La' šə əsa'aque beņə' de que bebane' ladjo beņə' guat ca', gonchən mal cle can' benən antslə catə'an bχoayague' beņə' par gwsa'aque'ne' de que Diozən' bsele'ene'.

⁶⁵ Nach Pilatən' gože' beņə' ca': —Gona' le'e soldad ca'. Le'e che'ega'aque' par əsa'ape'en ga zelao yesə'əzaque'ene'.

⁶⁶ Nach ja'aque' len soldad ca' na' boso'očiše'e sey le'e yejən', na' boso'onite'e soldad ca' gwsa'ape' ban'.

28

Jeso'osən' bebane' ladjo beņə' guat ca'

¹ Na' catə' gwde ža dezcanz chechon', baļ dmiḡw Maria beņə' Magdalan', na' Maria ben' yeto, ja'aque' jəsə'əgüie' cho'a banə'.

² Na' goquən' lechguale gwxo' chedə' angl che Xanchon' betje' yoban', na' bžine' gwcu'e yej de'en nseyjw cho'a ban', na' gwchi'e lao yejən'.

³ Na' anglən' lechguale chactit cho'alaogüe'ənə' caczə ga chep yes na' xala'ane'enə' naquən šyiš xilə' juisy caczə be'eyə'.

⁴ Na' catə' besə'əle'i beņə' gop ca' le', lechguale besə'əžebe' xte gosə'əxize' na' gosə'əbiḡe' gwsa'ate' šlat.

⁵ Pero na' anglən' gože' no'ol ca': —Bito žeble. Nada' nezdə' de que Jeso'osən' ben' boso'ode'e le'e yag coroz nan' cheyilje'.

⁶ Notoch no nla' nga. Babebane' ladjo beņə' guat ca', can' gwnacze'. Na' le'e da le'e ggüia latjə ga nga bosə'əxoe' cuerp che'enə'.

⁷ Ležjəya'acdo le'e žjəyediŋjue'i disipl che' ca' de que babebane' ladjo beŋə' guat ca'. Na' ye'ega'aclene' de que gwyobe Jeso'osən' yežine' Galilean' cle ca le'e na' Galilea na' le'ilene'. Can' ben Diozən' mendad detiŋjue'ida' le'e.

⁸ Nach no'ol ca' besa'aque' cho'a banə' do chesə'əžebe' pero lechguale chesyə'əbeine', zjəya'acdoe' zjəsyə'ədiŋjue'ine' disipl ca' dižə' cobən' de'en gož anglən' lega'aque'.

⁹ Na' lao zjəya'aque' zjəsyə'ədiŋjue'ine' apostol ca' can' goquən', besyə'əžague' Jeso'osən' tnez. Nach gože' lega'aque': —Dioxei.

Na' no'ol ca' gosə'əbigue'e gan' zo Jeso'osən', boso'ozo xibga'aque' laogüe'ena', na' gosə'əyele'e ni'ena' tant besyə'əbeine', na' gwso'elaogüe'ene'.

¹⁰ Jeso'osən' gože' lega'aque': —Bito žeble. Le'e žjəyediŋjue'i beŋə' ljuežjcho ca' de que cheyałə' əžja'aque' Galilean' nič na' yesə'əle'ine' nada'.

Beŋə' gop ca' jəsyə'ədiŋjue'ine' bχoz ca' can' bagoc

¹¹ Na' catə' beza'ac no'ol ca' cho'a ban', bałə soldad ca' beŋə' ca' gwsa'apə ba che Jeso'osən' ja'aque' syodan' jəsyə'ədiŋjue'ine' bχoz əblao ca' can' bagoquən'.

¹² Nach besyə'ədobə bχoz əblao ca' len beŋə' golə blao che nasyon chechon' bosə'əxi'e naclə so'one' ca' naquə' de'en əgwse' soldad ca' lega'aque'. Na' beyož bosə'oxi'ena', bosə'onežjue' soldad ca' de'e sčha'o mech.

¹³ Gwse'e lega'aque': —Šə no əŋabe le'e bin' goquən', na' ye'ega'aclene' de que še'elə lao chtasle, disipl che' ca' besyə'əbeje' cuerp che'ena' lo'o ban' na' besyə'əyo'en ga yobla.

¹⁴ Na' šə goberŋadorən' yenene' dižə' quinga, neto' žjəyeye'exento'one' par nič cui əže'e le'e na' par nič cui gone' le'e castigw.

¹⁵ Na' soldad ca' gosə'əzi'e mechən' de'en bosə'ənežjue' lega'aque', nach gwso'one' con can' gwse' bχoz əblao ca' na' beŋə' golə blao ca' lega'aque'. Na' yoguə' can' gosə'əna soldad ca' gosə' gwłaljən doxen gan' nita' beŋə' Izrael gwlaž chechon'. Na' xte ža neža beŋə' gwlaž chechon' chse'ejle'e xtižə' soldad ca'.

Jeso'osən' bene' mendad əso'e xtiže'ena' yoguə' nasyon

¹⁶ Nach disipl che Jeso'osən' beŋə' ca' šnej ja'aque' Galilean' par jəsyə'əšague' Jeso'osən' to lao ya'a gan' bene' mendad yesyə'əžague'.

¹⁷ Na' catə' besə'əle'ine' Jeso'osən', gwso'elaogüe'ene'. Pero bia'aczə to čope' gwsa'acžejlaže'e šə le'ena'.

¹⁸ Nach bgüiguə' Jeso'osən' gan' nite'ena' na' gože' lega'aque': —Baben Diozən' par nič chnabi'a doxen yoban' na' yežlyon'.

¹⁹ De'e na'ana', le'e žja'ac le'e žjəsed le'e žjəlo'i beŋə' ca' ža' yoguə'əloj nasyon par nič əsa'aque' disipl čhia'. Na' le'e gwčhoaga'aque' nis par nič yesə'əlo'e de que chso'onlilaže'e Xacho Diozən', na' nada' Xi'ine', na' Spirit che'ena'.

²⁰ Na' əgwšed əgwlo'iga'aqueline' par nič so'one' yoguə'əloj de'en babena' mendad gonle. Nada' zocza' len le'e yoguə' ža xte ca te che yežlyon'.

De'e na'azan' chzoja'.

Dižə' Güen Dižə' Cobə De'en Bzoj San Marcosən'

Juan ben' bchoa beṇə' nis be'e xtižə' Diozən' latjə dašən'

¹ De'en nga chzoja' naquən dižə' güen dižə' cobə de'en chzejni'in che Jesocrstən' ben' naquə Xi'in Diozən'. Na' ṇa'a solaogua' gua'a xtiže' enə'.

² De'e profet Isaiazən' ben' be' xtižə' Diozən' cana' bzoje' can' gož Diozən' Xi'ine' enə', gože' ene':

Eseļa'a to beṇə' güe'e xtižo'onə'

par niç ṇitə' beṇə' probnid par yoso'ozenague' çhio' catə'an əžino' yežlyon'.

³ Le' əne' zizjo latjə dašən', ne':

"Le'e so probnid par əgwzenagle che Xanchon' catə'an yide'.

Na' šə sole probnid par əgwzenagle che' catə'an yide',

de'en gonle ca' gwxaquə' əleben can' çhonle chxi' chloale nez ca' catə' chidə to beṇə' blaο."

⁴ Na' goquən' catə' Juannə' ben' bchoa beṇə' nis gwyeye' latjə dašən', na' gwzolaogüe' gwduxjue'ine' beṇə' de que cheyalə' yesyə'ədinjene' xtolə'aga'aque' enə' na' yesə'əṇabene' Diozən' əgwnitlaogüe'en, na' yesə'əçhoe' nis.

⁵ Na' beṇə' ca' za'ac yoguə' yež gan' mbane Jodean' na' beṇə' Jerosalen ca' gwsa'aque' ja'aque' yao Jordannə' gan' zo Juannə' par boso'ozenague' xtiže' enə'. Na' boso'oxoadole' laο Diozən', na' Juannə' bchoe' lega'aque' nis lo'o yao Jordannə'.

⁶ Juannə' gwyaze' lachə' de'en gwso'one' len yišə' xa camey. Na' par dobey che' bchine' to sint de yid. Na' gwdaogüe' bišə'əzo, na' lecçə gwdaogüe' š'in bia ser bia nitə' yiçə'.

⁷ Na' gwduxjue'ine' beṇə' gwne': —Yidə yeto beṇə' zaquə'əche ca nada', na' nada' bito zaca'a par gaca' xmoše'.

⁸ Nada' babçhoa' le'e nis, pero na' be'enə' yidə gone' ca so Spirit che Diozən' lo'o yiçhja'ažda'ochon' na' ṇabi'an chio'o.

Can' goquə catə'an gwchoa Jeso'osən' nis

⁹ Na' ca tyemp catə'an bchoa Juannə' beṇə' nis, Jeso'osən' gwze'e Nasaret gan' mbane Galilean', na' gwyeye' gan' zo Juannə' cho'a yao Jordannə' na' Juannə' bcho'ene' nisən'.

¹⁰ Na' catə' beyož gwchoa' Jeso'osən' nisən' bechoje' lo'o nisən'. Na' le'e ble'iteine' byaljo le'e yoban' na' ble'ine' Spirit che Diozən' betjən ca to ngolbexə na' bžinən gwzən len le'.

¹¹ Na' benene' gwna Diozən' ben' zo yoban': —Le' naco' Xi'ina', na' çacchgüeida' çhio'. Leçhguəle cheba chezaquə' əlaža'a le'.

Gwlo'oyelə' gwxiye' enə' Jeso'osən' gone' de'e mal

¹² Na' Spiritən' le'e berten par niç gwyey Jeso'osən' latjə dašən'.

¹³ Na' Jeso'osən' gwzoe' latjə dašən' çhoa ža gan' chsa'aš bia znia ca'. Na' laο çhoa žan' Satanəsən' de'en çhnabia' de'e xio' ca' gwlo'oyelə'an le' gone' de'e malən'. Na' gwde cui gwzoin co'oyelə'an le' angl ca' besə'əžine' gwsa'aclene' le'.

Jeso'osən' gwzolaogüe' bsed blo'ine' beṇə' Galilea ca'

¹⁴ Na' gwde goso'ogüe'e Juannə' ližyan', Jeso'osən' gwyeye' gan' mbane Galilean' gwduxjue'ine' dižə' güen dižə' cobə can' ṇabia' Diozən' con notə'ətezə beṇə' əso'e latjə.

¹⁵ Na' gwne': —Babžin ža bžin or gaquə can' babžia Diozən' bia' gaquə. Na' babžin ža ṇabia' Diozən' con notə'ətezə beṇə' soe' latjə. Le'e yedinje xtolə'əle ca' na' lešejle' dižə' güen dižə' cobə che' enə'.

Jeso'osən' gwleje' tap beṇə' gwxen bel' par əsa'aque' disipl' che'

¹⁶ Na' Jeso'osən' gwyeye' cho'a nisdə' Galilean', na' laο zde' cho'inə' ble'ine' çhopə beṇə' gwxen bel, choso'ozələ'e yiçjw bel chega'aque' enə' lo'o nisdə'onə'. Žjənaquə çhopə biše'e. Toe' le' Simon na' ben' yeto le' Ndres.

¹⁷ Nach gož Jeso'osən' lega'aque': —Le'e da len nada'. Le'e nacle beṇə' gwxen bel. Pero ṇa'a gwzejni'ida' le'e par niç gonle ca so'ombia' beṇə' nada'.

¹⁸ Na' le'e gosə'əbeyjichjtega'aque' yiçjw bel chega'aque' enə' nach ja'aclene' Jeso'osən'.

¹⁹ Nach gwsa'aque' yelatə' na' jasyə'ədi'e Jacobən' len Juannə' na' len xaga'aque' Sebedeon'. Že'e to lo'o barcw çesyə'əyone' yiçjw bel chega'aque' enə'.

²⁰ Nach le'e gwṇabtei Jeso'osən' Jacobən' na' Juannə' par žja'aclene' lega'aque'. Na' bosyo'ocua'əne' xaga'aque' len xmosga'aque' en lo'o barcon' na' ja'aclene' Jeso'osən' na' beṇə' ca' banžague'.

Jeso'osən' bebeje' de'e xio' de'en yo'o yaz yiçhja'aždao' to beṇə'

²¹ Nach Jeso'osən' len disipl che' ca' ja'aque' syoda de'en nzi' Capernaum, na' ža dezcanzən' ja'aque' yo'odao' che neto' beṇə' Izrael na' Jeso'osən' bsed blo'ine' beṇə' ca' ža'anə'.

²² Na' beṇə' ca' besyə'əbanene' ca' naquə' de'en bsed əblo'ine' lega'aque' la' can' bzejni'ine' lega'aque' nacbja' de que napache' yelə' chnabia' cle ca beṇə' ca' choso'osed choso'olo'ine' lei de'en bzoj de'e Moizezən'.

²³ Na' lo'o yo'odao' na' zo to beṇə' yo'o yaz de'e xio' yichjla'aždaogüe'enə'. Na' bgosya'an be'enə' gwnan:

²⁴ —Partlə le', partlə neto' Jeso'os beṇə' Nasaret. ¿Ezedežiayi'o neto'onə'? Nezczeto' no le'. Le' naco' beṇə' la' aždao' xi'ilažə' juisy na' Diozən' bsele'e le'.

²⁵ Jeso'osən' gwdile' de'e xi'onə' na' gože'en: —Sšago'. Bechoj yichjla'aždao' benga.

²⁶ Na' de'e xi'onə' benən par gwyaz be'enə' šon, na' bgosya'aten le' zizjo nach bechojən yichjla'aždaogüe'enə'.

²⁷ Na' yogua' beṇə' ca' ža'anə' lechgualə besyə'əbanene', nach gwse' ljuěžjga'aque': —Nža' can' chzejni'ine' beṇə', na' nacbja' nape' yelə' chnabia' de'en chone' mendad yesyə'əchoj de'e xio' ca' lo'o yichjla'aždao' beṇə' na' chesyə'əchojən.

²⁸ Na' xtižə' Jeso'osən' le'e gosə' gwłaljten doxen Galilean'.

Jeso'osən' beyone' taobin' che Simon Bedən'

²⁹ Nach catə' beza' Jeso'osən' yo'oda'onə' len tapte disipl che' ca' jəya'aque' liž beṇə' ca' čhopə, liž Simonṇə' na' Ndrešan'.

³⁰ Na' taobin' che Simonṇə' die' lao camən' yo'e de'e la, nach gwse'e Jeso'osən' de que chacšenene'enə'.

³¹ Jeso'osən' bgüigue'e bexe'e na' no'olən' na' bcose'ene'. Na' le'e bechojte de'e lan', nach le'e gwzoža'ate no'olən' bene' de'e gwsa'ogüe'.

Jeso'osən' beyone' beṇə' zan

³² Baben bgüižən' catə' jso'e yogua' beṇə' ca' chsa'acšenena' na' beṇə' ca' zjəyo'o zjəyaz de'e xio' yichjla'ažda'oga'aque'enə' gan' zo Jeso'osən'.

³³ Na' yogua' beṇə' ža' yežən' jəsə'ədobe' cho'a puert liž Simonṇə'.

³⁴ Na' Jeso'osən' beyone' zan beṇə' chse'i gwde gwde yižgüe', na' bebeje' de'e xio' ca' zjəyo'o zjəyaz yichjla'aždao' beṇə' zan. Na' bito be'e latjə bi yesə'əna de'e xio' ca' čhedə' zjənezen de que naque' Xi'in Diozən'.

Jeso'osən' gwde' doxenlə Galilea bsed blo'ine'

³⁵ Ža beteyo, nencal catə' gwyas Jeso'osən' beze'e na' gwyeye' fuerlə syodan' to latjə ga cui no nla', jene' orasyon.

³⁶ Na' Simonṇə' len beṇə' ljuěžje' ca' ja'aque' jəsyə'ədilje' Jeso'osən'.

³⁷ Na' catə' besyə'əželene' le' gwse'ene': —Yogua' beṇə' ža' syodan' chesyə'əyilje' le'.

³⁸ Jeso'osən' gože' lega'aque': —Šejcho yež ca' zjəchi' galə'əza, par nič leczə čixjui'a xtižə' Diozən' len beṇə' ca' ža'anə', la' par na'anə' bsele' Diozən' nada'.

³⁹ Ca' goquən' Jeso'osən' len disipl che' ca' ja'aque' to to yež gan' mbane Galilean', na' lo'o yo'odao' che neto' beṇə' Izrael de'en nitə' to to yež əbsed əblo'ine' beṇə', na' bebeje' de'e xio' ca' zjəyo'o zjəyaz yichjla'aždao' beṇə'.

Jeso'osən' beyone' to beṇə' che'i yižgüe' de'en nzi' lepr

⁴⁰ Na' goquən' bgüigua' to beṇə' lao Jeso'osən', beṇə' che'i yižgüe' de'en nzi' lepr, na' be'enə' bzo xibe' lao Jeso'osən' gože'ene': —Gonšguei ben par nič yeyacda'.

⁴¹ Jeso'osən' beyaše'ene' le', na' bli ne'enə' gwdane'ene' na' gože'ene': —Guaccza, beyaque.

⁴² Na' le'e beyactei be'enə'.

⁴³⁻⁴⁴ Nach Jeso'osən' bene' mendad len be'enə' gože'ene': —Bzenagšga. Ni tozə cui no güe'eleno' dižə' ca' naquə' nga babena' len le'. Gwyej lao bxožən' nič le'ine' bačh beyacdo', na' bnežjue' bia yižə' gote' lao Diozən' par nič yexi' yeyacho' can' na lei de'en bzoj de'e Moizezən' na' par nič yesə'əneze beṇə' de que babeyacdo'onə'.

⁴⁵ Pero na' be'enə' beze'e gan' zo Jeso'osən' na' be'e dižə' len yogua' beṇə' bežague' ca' naquən' beyon Jeso'osən' le'. Nach gosə' gwłaljə dižə'anə' xte benən ca' cuich goquə' šo' Jeso'osən' yež ca' na' cuich goquə' te' con ca nla'əza. Gwde' fuerlə yež ca' gan' cui no beṇə' chaš. Pero bia'acəzə zan beṇə' za'ac yogua' yež ca' yelə' ja'aque' gan' zoe'enə'.

2

Jeso'osən' beyone' to beṇə' nat to part cuerp che'ena'

¹ Na' goc to čhopə ža gwza' Jeso'osən' Capernaunnə' catə' beyeye' de'e yoblə, na' gwse'ene beṇə' de que babežin Jeso'osən' liže'enə'.

2-3 Na' lgüegwə besə'əžag beṇə' zan liže'ena' xte bitoch bi latjə gotə' lo'o yo'o che'ena' nic cho'a puertan' par šo'loch beṇə'. Na' lao chsed chlo'i Jeso'osan' lega'aque' xtižə' Diozən', besə'əžin tap beṇə' zjən'lene' to beṇə' nat to part cuerp che'ena', zjən'xoe'ene' to lao cam dao'.

4 Na' cata' gwsa'acbe'ine' cui gaquə yesə'əžin'lene' beṇə' güe'ena' gan' zo Jeso'osan' tant beṇə' zan ža'ana', gwse'epe' yichjo'ola. Na' bosə'osaljue' yichjo'onə' zaquə' gan' to Jeso'osan' nach bosə'oletje' be'ena' len xcome'ena'.

5 Na' gobce'i Jeso'osan' de que gwso'onlilažə' beṇə' ca' zjən'len beṇə' güe'ena', nach gože' beṇə' güe'ena': —Xi'indaogua'a, babezi'ixena' xtolo'onə'.

6 Pero baḷə beṇə' ca' choso'osed choso'olo'i lei de'en bzoj de'e Moizezən' zjəchi'e lo'o yo'onə'. Na' cata' gwse'ene' dižə' ca' be' Jeso'osan', gwso'one' xbab lo'o yichjla'ažda'oga'aque'ena':

7 —žBixchen' choe' benga dižə' quinga? Chžia chnite'e Diozən' ca de'en ne' de que chezi'ixene' xtola' beṇə'čan'. Notono gaquə yezi'ixen xtola' beṇə'čan' šə caguə tozə Diozən'.

8 Jeso'osan' le'e gobce'iteine' bi xbabən' gwso'one'ena', nach gože' lega'aque': —žBixchen' chonle xbabən' ca' lo'o yichjla'ažda'olena'?

9 Šə can yapa'ane' de que babezi'ixena' xtola'ena', bito ņezele šə napa' yelə' gwnabia' par yezi'ixena'an. Pero šə yapa'ane': “Gwyas beyoa' xcamo'onə' na' beyej ližo'onə' to šao' to güen”, guataš'abia' šə napa' yelə' gwnabia'anə' par gaquə can' nia'anə'.

10 Na' ņa'a gona' par nič ņezele de que napa' yelə' gwnabia' lao yežlyo nga par yezi'ixena' xtola' beṇə'čan', nadan' naca' ben' bsələ' Diozən' golja' beṇə'č.

Nach gože' beṇə' güe'ena':

11 —Nada' əchnia' le', gwyas beyoa' xcamo'onə' na' beyej ližo'onə' to šao' to güen.

12 Nach le'e gwyasseste be'ena', na' beyoa' xcame'ena' beze'e zjəyede' liže', chosə'əgüiate' beṇə' ca' nite'ena'. Na' yoguə' beṇə' ca' ža'ana' besyə'əbanene' na' gwso'elaogüe'e Diozən' gosə'ane': —Bitona' le'icho gaquə ca de'e nga bagoc.

Jeso'osan' gwleje' Lebin' par gwlene' disipl che' ca'

13 Gwde na' Jeso'osan' gwyeye' cho'a nisda'onə' de'e yoblə na' beṇə' zan besə'əžag gan' zoe'ena' nach bsd blo'ine' lega'aque'.

14 Na' cata' beyož bzejni'i Jeso'osan' lega'aque' beze'e na' lao zjəyede'ena' ble'ine' to beṇə' gočhixjw, beṇə' le Lebi xi'in to beṇə' le' Alfeo, chi'e latjə gan' chesə'əčhixjue'ena'. Na' Jeso'osan' gože'ene': —Da len nada'.

Nach Lebin' gwzože'e jənaogüe'ene'.

15 Na' goquən' chi' Jeso'osan' liž Lebin' len disipl che' ca' chsa'ogüe'. Na' nitə' beṇə' zan beṇə' gočhixjw ca' na' nochlə beṇə' güen de'e mal ca' chsa'olene' lega'aque'. Nitə' beṇə' zan čhedə' zane' choso'ozenague' che' na' chso'onlilaže'ene'.

16 Na' beṇə' ca' choso'osed choso'olo'i lei de'en bzoj de'e Moizezən' na' len beṇə' fariseo ca' cata' besə'əle'ine' chi' Jeso'osan' chaolene' beṇə' gočhixjw ca' na' yebaḷə beṇə' güen de'e mal ca', gwse'e disipl che' ca': —Malən' chon maestr' chelen' che'ej chaogüe' txen len beṇə' gočhixjw na' nochlə beṇə' güen de'e mal beṇə' cui chonlento' txen.

17 Na' cata' bene Jeso'osan' xtižə'əga'aque'ena', gože' lega'aque': —Beṇə' cui chsa'acšene bito chesə'əyazjene' beṇə' güen rmech. Beṇə' ca' chsa'acšene lega'aque'ena' chesə'əyazjene' beṇə' güen rmech. Nada' za'a zedəyena' par nič beṇə' ca' zjəneze de que zjanaque' beṇə' güen de'e mal yesyə'ədiŋjene' xtola'əga'aque'ena', pero bito zedəyena' par nič beṇə' ca' chsa'acquene' bazjanaque' beṇə' güen yesyə'ədiŋjene' xtola'əga'aque'ena'.

Gosə'əbanene' Jeso'osan' bixchen' bito gwleje' tgüejə catə' cui əse'ej əsa'o disipl che' ca'

18 Na' goquən' to ža cata' disipl che Juannə' na' disipl che beṇə' fariseo ca' nite'e sin cui chse'ej chsa'ogüe'. Na' ja'ac baḷə beṇə' lao Jeso'osan' na' gwse'ene': —Disipl che Juannə' na' leczə disipl che beṇə' fariseo ca' chnite'e zan las sin cui chse'ej chsa'ogüe' par chso'ela'oche' Diozən'. Pero disipl čhio' ca' chse'ej chsa'ogüe'. žBixchen' ža?

19 Nach Jeso'osan' gože' lega'aque': —Cata' chac to yelə' gošagna' beṇə' migw che be'ena' chžagna'anə' chse'ej chsa'ogüe'. Na' ca'aczən' naquən len nada' na' len disipl čhia' ca', chse'ej chsa'ogüe' lao ņe'e zoa' len lega'aque'.

20 Cata'əčan' əžin ža yesə'əče'əxaxj beṇə' contr čhia' ca' nada', cana'əčan' əchoj catə' cuich əse'ej əsa'o disipl čhia' ca'.

21 Notono beṇə' zo beṇə' čhchine' to pedas lachə' cuiŋə' xoa nis par yoda' xa gole'ena' de'en bač chyoə. Šə can' gone', catə' čhib x'e'ena', yobe' lachə' cobən' na' əčhezəčan' len.

22 Na' leczə ca' notono zo beṇə' čhgue'e bino cobən' lo'o yid golən'. Šə gone' ca', bino cobən' əčhezən' yid golən' na' laljə binon' na' cuiayi' yidən'. Cle la' cheyalə' que'e bino cobən' lo'o yid coba.

Jeso'osan' gwne' ca' par bzejni'ine' lega'aque' de que bito gaquə yesə'ənaogüe' costombr gol člega'aque'ena' na' yesə'ənaotie' de'en chsed chlo'ine'.

Boso'olechj disipl ca' trigon' za dezcanzən' par gwsa'ogüe'en

²³ Na' gozaquan' to za dezcanz Jeso'osan' gwäie' len disipl che' ca' gan' nyaž trigon', nach disipl che' ca' gosə'əleche' trigon' lao gosə'ədi'enə'.

²⁴ Nach besə'əle'i balə beṇə' fariseo ca' can' gwsə'on disipl ca' na' gwse'e Jeso'osan': — Bgüiašc can' chso'on disipl chio' ca' žin de'e cui de lsens goncho ža dezcanzən'.

²⁵⁻²⁶ Na' Jeso'osan' gože' lega'aque': — žEcabi za'alaza'əle de'en bablable can' ben de'e Rei Dabin' ca' tyemp catə'ən goc Abiatarən' bəxoz əblaoch? Nan de que to ža cui gotə' de'e əsa'o de'e Dabin' len beṇə' ljuežje' ca' na' gosə'ədone'. Nach gwyeye' lo'o yo'oda'o əblao che chio'o beṇə' Izrael. Na' gwxi'e yetxtil de'en bazjəncua' bəxoz ca' par Diozən', na' gwsa'ogüe'en len beṇə' ljuežje' ca' la'anə'əczə' cui zjənaque' bəxoz, len yetxtilən' bito de lsens par gao notə'əteza beṇə' len, letga bəxoz ca' chac əsa'ogüe'en.

²⁷ Na' leca' gwna Jeso'osan': — Diozən' bene' beṇə'chan' na' techlə gwleje' to ža lao xman par niç beṇə'chan' gaquə' so'one' dezcanz. Bito gwleje' Diozən' ža dezcanzən' parzə niç so'omba'əne'en.

²⁸ Naquən lao na'a əṇia' bin' naquən güen goncho ža dezcanzən', nada' naca' ben' bsele' Diozən' golja' beṇə'ch.

3

Beyaque to beṇə' mbižə šla'a ne'enə'

¹ Na' gozej Jeso'osan' to lo'o yo'oda'o che neto' beṇə' Izrael yeto ža dezcanz. Na' lo'o yo'oda'onə' zo to beṇə' bambižə šla'a ne'enə'.

² Na' beṇə' fariseo ca' ža' yo'oda'onə' chosə'əgüiateze' Jeso'osan' chesə'əbeze' šə goyone' be'enə' ža dezcanzən' par niç əsa'ogüe' xya contr le'.

³ Jeso'osan' gože' ben' mbižə ne'inə': — Gwzoža' na' da ngalə.

Nach bgüiguə' ben' gwzeche' laogüe'enə'.

⁴ Jeso'osan' gože' beṇə' ca' ža' lo'o yo'oda'onə': — žEna lein' goncho de'e güen ža dezcanzən', o šə nan goncho de'e mal? žEnan goncho par niç cui sa'at beṇə', o šə nan goncho par niç sa'ate'?

Pero beṇə' ca' ža'anə' bitobi gosə'əne'.

⁵ Nach Jeso'osan' bgüie' lega'aque' znia tant gwzoe' trist chedə' cui chse'enene' se'ejni'ine' bin' chene'e Diozən' so'one'. Nach Jeso'osan' gože' be'enə': — Bli' na'onə'.

Nach bli' na' be'enə' na' beyaquen.

⁶ Nach beṇə' fariseo ca' catə' besa'aque' yo'oda'onə' bosə'əxi'e len beṇə' ca' chso'on txen len Erodən' naclə so'one' par so'ote' Jeso'osan'.

Beṇə' zan besə'əžag cho'a Nisdao' Galilean'

⁷⁻⁸ Jeso'osan' len disipl che' ca' gwsa'aque' yo'oda'onə' na' ja'aque' cho'a nisda'onə'. Na' beṇə' zan jəsə'ənaogüe'ene' chedə' gwse'enene' dižə' che Jeso'osan' can' chone' de'e zan de'e zaque'e. Na' beṇə' ca' za'aque' do gan' mbane Galilean', na' do gan' mbane Jodean', na' do Jerosalenə', na' do Idomea, na' do yešl'a yao Jordannə', na' do gan' mbane Tiro na' Sidon. Za'aque' chedə' gwse'enene' yesə'əle'ine' Jeso'osan'.

⁹⁻¹⁰ Babeyon Jeso'osan' zan beṇə' chsa'acšene' na' yogua' beṇə' ca' ne'e chsa'acšene' besyə'əyiljaže'e naclə so'one' par niç yesə'əlapə na'aga'aquen' le'. Tant beṇə' zan gosə'əbiadi'ene' xte boso'ochi'izoje'ene'. De'e na'anə' Jeso'osan' bene' mendad so'on disipl che' ca' probnid to barcw par le'.

¹¹ Na' beṇə' ca' zjəyo'o zjəyaz de'e xio'on lo'o yichjla'ažda'oga'aquen' catə' besə'əle'ine' Jeso'osan' besə'əzo xibga'aque' laogüe'enə' na' de'e xio' ca' gwsə'osya'an gosə'ənan: — Le' naco' Xi'in' Dioz.

¹² Pero Jeso'osan' bene' mendad len lega'aquan' cui so'en dižə' non' naque'.

Jeso'osan' gwleje' šizən beṇə' bsi'e apostol

¹³ Na' gwde' na' Jeso'osan' gwloe' to lao ya'a na' goxe' yogua' disipl che' ca' par niç cueje' beṇə' ca' əsa'ac apostol che'enə', nach yogue' gosə'əbigue'e gan' zoe'enə'.

¹⁴ Na' gwleje' šizən beṇə' par yesə'ədalene' le' na' par niç əsele'e lega'aque' žjəsə'ədixjue'ine' beṇə' can' na' Diozən'.

¹⁵ Na' bnežjue' lega'aque' yełə' gwnabia'anə' par niç besyə'əyone' beṇə' ca' chse'i yižgüe' na' par niç goc besyə'əbeje' de'e xio' ca' zjəyo'o zjəyaz yichjla'aždao' beṇə'.

¹⁶ Gwleje' Simon ben' bsi'e Bed,

¹⁷ na' Jacobən' len Juan biše'enə' xi'in' Sebedeon'. Jeso'osan' bsi'e Jacobən' na' Juannə' Boanerges, chedə' zjənaque' beṇə' loc.

¹⁸ Na' gwleje' Ndrešan', na' Lipən', na' Bartolomen', na' Mtion', na' Tomasən', na' Jacob xi'in' Alfeon', na' Tadeon', na' Simon ben' chon txen len beṇə' ca' zjənzi' cananistas.

¹⁹ Nach gwleje' Jod Iscariotən' ben' bdie' Jeso'osan' lao na' beṇə' contr ca'.

Gosa'ane' de que Jeso'osan' bebeje' de'e xio' ca' len yela' guac che Beelsebon'

Gwde gwleje' disipl che' ca' beyeje' liže'ena' len lega'aque'.

²⁰ Nach de'e yoblə besə'adobə beṇə' zan gan' nite'ena' xte nic goquə latjə əsa'ogüe'.

²¹ Catə' gwse'ene family che Jeso'osan' de que cui de latjə chega'aque' ni par əsa'ogüe', ja'aque' gan' zo Jeso'osan' par yesyə'əche'əxaxje'ene' chedə' gosə'ana beṇə' de que chactontə'ena'.

²² Na' leczə baļə beṇə' Jerosalennə' beṇə' choso'osed choso'olo'i lei de'en bzoj de'e Moizezan' bla'aque', na' gosə'ane': —Beelsebo de'en chnabia' de'e xio' ca' yo'o yazən yichjla'aždao' benga, na' chebeje' de'e xio' ca' len yela' guac cheina'.

²³ Nach Jeso'osan' goxe' beṇə' ca' par yesə'əbigue'e gan' zoe'ena' na' be'e jemplan' len lega'aque', gože': —Satanasan' de'en chnabia' de'e xio' ca' bito gaquə yebej cuinei lo'o yichjla'aždao' beṇə'.

²⁴ Šə beṇə' ža' to nasyon əsa'aque' choplə na' yesyə'ədile' entr lega'aque', əgwžiai' nasyon chega'aque' na'ana' šə ca'.

²⁵ Na' šə to family beṇə' əsa'aque' choplə na' yesyə'ədile' entr lega'acze', leczə yenit family chega'aque' na'ana' šə ca'.

²⁶ Na' leczə ca' šə Satanasan' len de'e xio' chei ca' əsa'aquan choplə na' yesyə'ədilan, cuiayi' yela' chnabia' chega'aquanṇə' šə ca'.

²⁷ Nezecho notono no gaquə šo' liž to beṇə' gual par žjəlane' šinlaze' ca' sin cui əgwčheje'ene' to do. Pero šə əgwčheje'ene' gwaquə cuane' šinlaze' ca'.

²⁸ De'e li chnia' le'e, bitə'ətezə de'e mal de'en chso'on beṇəchan' na' bitə'ətezə dižə' mal de'e chso'e contr Diozan', Diozan' yezi'ixene' chega'aque' šə yesyə'ədinjene'en.

²⁹ Pero notə'ətezə beṇə' soe' dižə' contr Spirit che Diozan' cuat yezi'ixen Diozan' chega'aque'. Zejlicane yesə'əzi'e castigw chei.

³⁰ Can' gwna Jeso'osan' chedə' beṇə' ca' choso'osed choso'olo'i lein' gosə'ane' de que cho'o chaz de'e xio'onə' lo'o yichjla'ažda'ogüe'ena'.

Xna' Jeso'osan' na' biše'e ca' besə'əžine' gan' zoe'ena'

³¹ Gwde de'e ca' xna' Jeso'osan' len biše'e ca' besə'əžine' gan' zo Jeso'osan'. Na' chy'ola gosə'əbeze' gosə'əṇabe' so'elene' le' dižə'.

³² Na' beṇə' zan ca' zjəchi' tcuit tcue'ej Jeso'osan' gwse'ene': —Xna'on len beṇə' bišo'o ca' zjəzeche' chy'ola na' chse'enene' əso'elene' le' dižə'.

³³ Pero Jeso'osan' gože' lega'aque': —Nitə' beṇə' yoblə beṇə' bazjanaquə ca xna'a na' ca biša'a.

³⁴ Nach Jeso'osan' blo'e beṇə' ca' zjəchi' tcuit tcue'eje'ena', gwne': —Beṇə' quingan' bazjanaque' ca xna'a na' bazjanaque' ca biša'a.

³⁵ Can' naquan len notə'ətezə beṇə' chso'one' can' chazlažə' Diozan', zjanaque' ca xna'a na' ca biša'a na' ca zana'.

4

Jempl che beṇə' gozan'

¹ Na' de'e yoblə gwzo Jeso'osan' cho'a nisdə'ona' na' goszolaogüe' chsed chlo'ine'. Na' tant beṇə' zan besə'adobə gan' zo'ena' xte benən byen gwyo'o Jeso'osan' gwchi'e to lo'o barcw de'en chi' galə'əzə cho'a nisdə'ona'. Na' yogua' beṇə' ca' besə'adobən' gosə'anite'e lao yoxən'.

² Nach Jeso'osan' bsd blo'ine' lega'aque' len zan jempl. Na' be'elene' lega'aque' to jempl bsaquə'əlebene' xtižə' Diozan' ca trigw.

³ Nach gwne': —Le'e gwzenag de'e nga. To beṇə' gwze'e zde' güen trigw.

⁴ Na' lao chose' trigon' baļən jəsə'əchazən cho'a nez na' bia žia xile'e bia chaš le'e yoban' gwsa'ob len.

⁵ Na' yebaļən jəsə'əchazən ga naquə lao yej ga cuitēc žia yo. De'e na'ana' le'e bla'acten.

⁶ Pero na' catə' beža'achgua besə'əcuadən na' le'e gosə'əbižten chedə' bitobi loi gwso'on.

⁷ Na' yebaļən besə'əgo'oṇən lao yo ga nchixə xsa yešə' na' bla'aquan txen len xsa yešə'əna'. Na' besə'əlolə' yag yešə' ca' lega'aquan, na' bitobi gosə'əbian.

⁸ Na' yebaļən besə'əgo'oṇən lao yo šao' na' bla'aquan, na' gosə'əcha'on na' baļən gosə'əbian šichoa güejə, na' yebaļən gosə'əbian gyon güejə, na' yebaļən gosə'əbian to gueyoa güejə.

⁹ Nach gož Jeso'osan' lega'aque': —Le'e žia nagle de'e chene legwzenag.

Jeso'osan' bzejni'ine' bixchen' cho'elene' beṇə' jempl

¹⁰ Na' cata' cuich nita' beṇə' zan len Jeso'osan', disipl che' ca' šižin' na' len yeziquə'əchlə beṇə' ca' zjəsə'ənao le', gosə'əṇabene' le' bi zejen jemplan'.

¹¹ Nach gože' lega'aque': —Diozan' chone' par nich le'e ənezele de'en cui no gwneze antslə de que le' nabi'e con notə'ətezə beṇə' soe' latjə. Pero beṇə' yeziquə'əchlə cho'elenga'aca'ane' jempl chedə' bito chse'eje'le' čhia'.

¹² Chona' ca' par nič yesə'ələ'ine' de'en chona' na' bito sa'acbe'ine' bi zejen, na' par nič əse'enene' xtižə'anə' na' cui se'ejni'ine'en, chedə' bazjanaque' beṇə' la'aždao' žod. Žalə' bito zjanaque' beṇə' la'aždao' žod, gwse'ejni'ine' bi zejen de'en chse'enene'enə', na' yesyə'adinjene' xtolə'əga'aque'enə' na' Diozən' yezi'ixene' chega'aque'.

Jeso'osən' bzejni'ine' bi zeje jempl che beṇə' güen trigon'

¹³ Nach Jeso'osən' gožə' lega'aque': —čEbitonə' šejni'ile jempl nga? Šə bito chejni'ilen' čnacxa šejni'ile jempl ca' yelə'?

¹⁴ Quingan' zejen jempl che beṇə' güen trigon'. Xtižə' Diozən' gwxaquə'əleben ca de'en gozə be'enə'.

¹⁵ Na' nitə' beṇə' choso'ozenague' xtižə' Diozən' na' le'e chžinte Satanasən' de'en chnabia' de'e xio' ca' chebejən xtižə' Diozən' lo'o yichjla'aždaoga'aque'enə'. Na' chac chega'aque' can' goquə' len trigon' de'en jəsə'əchaz cho'a nezən'.

¹⁶ Na' leczə' nita' beṇə' choso'ozenague' xtižə' Diozən' na' le'e chesyə'əbeiteine'en pero chac chega'aque' can' goquə' len trigon' de'en jəsə'əchaz lao yo de'en žia lao yejən'.

¹⁷ Zjanaque' ca to de'e cui bi loi chon, šložga chse'ejle'e che xtižə' Diozən'. Na' cata' chesə'əgüe'i beṇə' lega'aque' na' choso'oči' choso'osaque'e lega'aque' laogüe de'en chse'ejle'e xtižə' Diozən', nach le'e chesə'əbejyichjte'en.

¹⁸ Na' nitə' beṇə' choso'ozenague' xtižə' Diozən' na' chac chega'aque' can' goquə' len trigon' de'en jəsə'əchaz lao yo de'en nchixə' xsa yešə'anə'.

¹⁹ Chesyə'alə' chesyə'əžejene' len bi de'en chso'one' na' chse'enene' yesə'əni'e, na' chesə'əzelažə'e gata' bi de'en gata' chega'aque' chedə' bazjənxoayague' chsa'aque' de que naquən de'e žialao. Na' de'e ca' chso'one'enə' choso'olə'an xtižə' Diozən' de'en bayo'o yichjla'aždaoga'aque'enə', na' de'e na'ana' cui chso'one' can' chazlažə' Diozən'.

²⁰ Na' leczə' nita' beṇə' choso'ozenague' xtižə' Diozən' do yichj do lažə'əga'aque', na' chso'one' yoguə'əlo' can' chazlažə' Diozən'. Chac chega'aque' can' goquə' len trigon' de'en jəsə'əchaz lao yo güennə'. Baḷən gosə'əbian šichoa güeja, na' yebaḷən gosə'əbian gyon güeja, na' yebaḷən gosə'əbian to gueyoa güeja.

Jempl che de'en choncho len to yi'

²¹ Nach Jeso'osən' be'elene' disipl che' ca' yeto jempl, bsaquə'əlebene' de'en chsed chlo'ine'enə' ca to yi', gwne': —Notono no ggualə' to yi' na' gwdose'en to žomə na' nic no gwcušaš'an xan xcamei. Syempr chde'e yi'inə' le'e ze'e par nič əgwse'eni'in lo'o cuartən'.

²² Guaquə' can' na dicho de'en na: “Yoguə'əlo' de'en ngašə' na'a, gwžin ža la'alaon, na' yoguə'əlo' de'en cui no gwse'ejni'i antslə, leczə' gwžin ža se'ejni'i beṇə' len.”

²³ Le'e žia nagle de'e chene, legwzenag.

²⁴ Na' leczə' gož Jeso'osən' lega'aque': —Le'e gon xbab che de'en nga chnia' le'e. Con can' chzenagle xtižə'anə' leczə' can' gona' par nič šejni'ilen, na' ca'aczə' ča'oxen de'en šejni'ile.

²⁵ Šə chzenagle xtižə'anə' əgwzejni'ichda' le'e. Pero na' šə bito chzenagle chei, de'e daon' banezele ganlažə'əlen.

Jempl che xoa' bin

²⁶ Yelə' gwnabia' che Diozən' ben' zo yoban' gwxaquə'əleben ca de'e nga: To beṇə' chjeze' xoa' binna' lao yežlyo che'enə'.

²⁷ Čde na' cheyeje' chjəyətase' na' cata' chžin or chase' na' chase'. Na' ca'azə' chac chesə'əde ža ca' na' yel ca'. Na' chla'ac yel dao' ca' na' chesə'əcha'on. Pero bito neze be'enə' nac chaquən' chesə'əcha'o yel dao' ca'.

²⁸ Yežlyo na'anə' chonən par nič chla'ac yel dao' ca' na' chesə'əcha'on na' chəsə'əbian za'a nach chaquən yez.

²⁹ Na' cata' babgüiž yezən', be'enə' gozə' len chelape'en chedə' banaquə' tyemp par chetobe' cwsešən'.

Yelə' gwnabia' che Diozən' gwxaquə'əleben ca xsa moztasən'

³⁰ Nach gwna Jeso'osən': —Na'a əgwlo'ida' le'e par nič ənezele naquən' gwxaquə'əlebe yelə' gwnabia' che Diozən'.

³¹ Gwxaquə'əleben ca to xsa moztas de'en chaz to beṇə' lao yežlyo che'enə'. Xsa moztasən' naquən le'ebeyožə de'e dao' rizə' lao bitə'ətezəchlə semiy.

³² Pero na' cata' chla'an chcha'on na' chaquən to yag ča'odao' na' chesə'əcha'o xoze'e ca' xte bia ca' zjəzo xile'e chso'on ližga'aquəb lo'o xoze'e ca'.

Jeso'osən' bzejni'ine' beṇə' porzə len jempl

³³ Jeso'osən' bsed blo'ine' beṇə' zan ca' besə'əžag gan' zo'enə' porzə len jempl ca de'e quinga babzoja', bzejni'ine' beṇə' xte ga zelao gwse'ejni'ine'en.

³⁴ Bitobi bichlæ gwne' par bzejni'ine' lega'aque' sino porzæ len jempl bzejni'ine' lega'aque'. Pero na' disipl che' ca' bzejni'ine' lega'aque' clar bi zejen to to jempl ca'.

Jeso'osæn' bcueze' be' gualæn' lao nisdæ'ona'

³⁵ Na' le'e ža na'atezæ do chxentg catæ' Jeso'osæn' gože' disipl che' ca': —Elağa'æcho yešla'ala nisdæ'ona'.

³⁶ Nach disipl che' ca' bosyo'ocua'ane' beņæ' ca' nita'ænæ' na' bosyo'ose'e barcon' gan' bayo'o Jeso'osæn'. Nach yebaļæ barcon' gan' ža' beņæ' ca' jæsæ'anaon lega'aque'.

³⁷ Na' lao zda barcon' gwzolaogwyečj to be' gual lao nisdæ'ona'. Na' barcon' gwyejæn nil na'alæ por ni che be'ena', na' chas chatæ' nisæn' xte gwzolaogwyož barcon' nisæn'.

³⁸ Pero na' Jeso'osæn' bachtase' xni'ate barcon' lao to lmad, tant chjxaque'ene'. Nach bosyo'osbane'ene' gwse'ene': —jMaestr! žEbitobi chacdo' de'en bačh chbiayi'ichon'?

³⁹ Nach Jeso'osæn' gwjase' lao ne'e chas chatæ' nisdæ'ona', nach gwdile' be'ena', na' bene' mendad len nisdæ'ona' gože'en: —Bebe'eži.

Nach le'e besyæ'æbe'ežite be'ena' len nisdæ'ona'.

⁴⁰ Nach Jeso'osæn' gože' disipl che' ca': —Bito žeble. Le'e šejle'ech čhia'.

⁴¹ Na' lega'aque' besyæ'æbančgüeine' na' gwse' ljeužjga'aque': —Bitolja naquæ bengæ con to beņaçzæ, la' žnacxa gon to beņaç par yebecžie' be' gualæn' len nisdæ'ona'?

5

To beņæ' Gadaran' yo'o yaze' de'e xio'

¹ Jeso'osæn' na' disipl che' ca' besæ'æžine' yešla'ala nisdæ'ona' gan' naquæ laž beņæ' Gadara ca'.

² Na' catæ' bechoj Jeso'osæn' lo'o barcon', beza' to beņæ' Gadaran' capsantæn' jæsague' le'. Na' be'ena' yo'o yaz de'e xio' ca' yichjla'aždaogüe'ena'.

³ Bengæ con gwzoe' do capsant. Na' notoch no goquæ gwčhej le' ni len do gual nic len gden.

⁴ Zan las bosyo'ochje' ni'a ne'e ca' gden, pero syempr de'e xio' ca' gwso'onæn ca bzoxjbtine' gdenņæ', na' notono goquæ ņabia' le'.

⁵ Do ža do yel gwde' do lao ya'a ca' na' do capsantæn' bisye'e na' bene cuine' zi' len yej.

⁶ Na' catæ' ble'ine' zda Jeso'osæn' zita'alæ na' gwsa'adoe' jæsague'ene' na' bzo xibe'en lao Jeso'osæn' be'elaogüe'ene'.

⁷ Nach de'e xio' ca' yo'o yaz yichjla'aždaogüe'ena' gosæ'ænæn zizjo gosæ'anan: —Partlæ le', partlæ neto' Jeso'os Xi'in Dioz ben' naquæ le'ezelaogüe beņæ' blaog. Diozæn' naque' testigw čheto' chatæ'ayoito' le' cui ačgwčhi' ačgwsaco'o neto'.

⁸ Gosæ'anan ca' čhedæ' Jeso'osæn' bene' mendad gože' lega'aquan: —De'e xio' le'e yechoj yichjla'aždao' bengæ.

⁹ Nach gož Jeso'osæn' lega'aquan: —žBi lele?

Na' gosæ'anan: —Legionņæ' leto' čhedæ' naquæ zanto'.

¹⁰ Na' be'ena' gotæ'ayoine' Jeso'osæn' par cui æsele'e de'e xio' ca' fuerlæ laž be'ena'.

¹¹ Na' to ya'a de'e zo galæ'æzæ čhaš beņæ' choso'oye' coš zan.

¹² Na' de'e xio' ca' gwsa'atæ'ayoine' le' gwse'en: —Be'ešga latjæ žjeyežo'oto' yichjla'aždao' coš ca'.

¹³ Nach Jeso'osæn' be'e latjæ. Na' besyæ'æchoj de'e xio' ca' yichjla'aždao' be'ena' na' jæsyo'æžo'on yichjla'aždao' coš ca'. Nach besyæ'ædiņsesæb le'e ya'ana' na' jesyæ'æxopæb lo'o nisdæ'ona' na' gwsa'atæb gwse'ejab nisæn'. Na' ca' do čhopa mil coš can' zjænaquæ.

¹⁴ Na' beņæ' ca' chosæ'aye' coš ca' besæ'ale'ine' de'en bagoquan' na' de'en besæ'æzēbchgüe' besæ'acdoe' nach jæsyo'ædiņxjue'ine' beņæ' lao' syodan' na' beņæ' nita' do yoba. Na' beņæ' ca' catæ' gwse'enene' xtižæ' beņæ' goye coš ca' ja'aque' jæsæ'ägüe' de'en bagoquan'.

¹⁵ Na' catæ' besæ'æžine' gan' zo Jeso'osæn' besæ'ale'ine' be'ena' gwyo'o gwjase' de'e xio' ca' yichjla'aždaogüe'ena', bach'i'e nyaz xalane'e, na' babežo'ao' yichjla'aždaogüe'ena', na' besæ'æžebe' de'en goquan'.

¹⁶ Na' beņæ' ca' besæ'ale'i de'en goquan', gwse'e beņæ' ca' yeļæ' can' beyaque ben' gwyo'o de'e xio' ca' yichjla'aždaogüe'ena' na' can' goquæ len coš ca'.

¹⁷ Nach beņæ' ca' ža' gan' mbane Gadaran' jse'etæ'ayoine' Jeso'osæn' yeze'e lažga'aque'ena'.

¹⁸ Na' catæ' Jeso'osæn' beyo'e lo'o barcon' par yeze'e len disipl che' ca', ben' bechoj de'e xio' ca' yichjla'aždaogüe'ena' gotæ'ayoine' Jeso'osæn' šejlene' le'.

¹⁹ Pero Jeso'osæn' bito be'e latjæ, gože'ene': —Beyej ližo' gan' ža' family čhio' ca' na' jæyediņxjue'iga'aquene' catec de'e mban' baben Xancho Diozæn' len le', na' can' bacheyašæ' čeži'ilazē'e le'.

²⁰ Nach beza' be'ena' gwzolaogüe' jæyede' yoguæ' syoda ca' gan' mbane Decapolisæn' jæyeezenene' catec de'e mban' baben Jeso'osæn' len le'. Na' yogue'e besyæ'æbanene'.

Jeso'osæn' beyone' xi'in Jairon' na' yeto no'olæ beņæ' gwdan lao xadon' che'ena'

²¹ Na' catə' beslaḡuə' Jeso'osən' len disipl che' ca' yešlā'alə nisdə'onə' besyə'əchoje' lo'o barcon'. Na' besə'əžin beṇə' zan gan' nite'e cho'a nisdə'onə', na' besyə'əga'ane' na'aza.

²² Nach bžin to beṇə' le Jairo, naque' to beṇə' gwnabia' che yo'odao' che neto' beṇə' Izrael. Na' catə' ble'ine' Jeso'osən' bzo xibe' laogüe'ena'.

²³ Na' gotə'əyoichgüeine' le', gože'ene': —Xi'ina' no'olən' bachatbo'. Yo'ošga cano'obo' par nič yeyaquebo' na' par nič əbambo'.

²⁴ Nach Jeso'osən' txen len disipl che' ca' ja'aclene' beṇə' gwnabian'. Na' beṇə' zan jəsə'ənaogüe' lega'aque' xte bosə'oçhi'izojene'.

²⁵ Na' entr beṇə' ca' len to no'olə beṇə' bagoc šižin iz chzoe' bgua'a.

²⁶ Na' babžaglaogüe' gwyeje' lao zan beṇə' güen rmech ca' na' babenditjei zgade xmechen' len lega'aque' na' notono goquə yeyon le'. Con byalə'əch yižgüe' che'ena'.

²⁷ Na' no'olən' babenene' xtižə' Jeso'osən', na' bgüigüe'e coža' Jeso'osən' gan' zde' ladjo beṇə' ca' jəsə'ənao le' nach gwdane' xadoṇ che'ena'.

²⁸ Bene' xbab lo'o yichjla'aždaogüe'ena', gwne': —Šə con cana' xadoṇ che'ena', goyaccəda'.

²⁹ Na' le' e gwlezte bgua'a de'en chzo'ena' na' gocbe'ine' de que babeyaquene'.

³⁰ Nach Jeso'osən' leczə gocbe'ine' de que babeyone' to beṇə' len yelə' guac che'ena', na' gwyechje' bgüie' beṇə' ca' zjəsə'ənao le', nach gože' lega'aque': —čNon' bagwdan xadoṇ čhia'ana'?

³¹ Nach disipl che' ca' gwse'ene': —Chle'ido' nitə' beṇə' zan nga, na' choso'oçhi'izojə' le'. Na' nao': “čNon' gwdan nada'?”

³² Pero na' Jeso'osən' bgüie' yogue'e par nič le'ine' non' gwdan le'.

³³ Na' no'olən' de'en gocbe'ine' babeyaquene' na' do čaž čžebze' bgüigüe'e bzo xiben' lao Jeso'osən' par gože'ene' dołol can' bagoc che'.

³⁴ Nach Jeso'osən' gože'ene': —Xi'indaogua'a, babeyacdo' čhedə' chonlilažo'o nada'. Beyej to šao' to güen na' Diozən' gone' par nič cuich gue'ido' yižgüen' nac ca'.

³⁵ Ne'e cho'ete Jeso'osən' dižə'an ca' catə' besə'əžin beṇə' gwsa'ac liž Jairon' ben' naquə xə bi'i no'olən' jse'eže'ene': —Bagot bi'i no'ol dao' čhio'ona'. Bitoch gondo' maestrən' zed.

³⁶ Pero Jeso'osən' bito bene' cas che de'ena' jež be'ena', con gože' Jairon': —Bito žebo'. Con benlilaža' nada'.

³⁷ Na' bito be' Jeso'osən' latjə əžja'acquəch beṇə' ca' len le', sino Bedən' len Jacobən' na' Juan beṇə' bišə' Jacob na'azən' ja'ac len le'.

³⁸ Na' catə' besə'əžine' liž beṇə' gwnabian', Jeso'osən' ble'ine' de que beṇə' ca' ža' ča'ašilən' bachso'one' scandl na' bachesə'əbežchgüe'.

³⁹ Nach catə' gwyo'e ča'ašilən', gože' lega'aque': —čBixchen' bachonle scandl na' chbežle? Bito nachbo' bi'i guat, con čhtasbo'ona'.

⁴⁰ Na' gosə'əzi'ičižə' beṇə' ca' ža'ana' le'. Nach Jeso'osən' bebeje' yoguə' beṇə' ca' ža'ana', na' gwche' e xaxna' bi'i guatən' na' beṇə' ca' zja'aclen le' na' gwsə'o lo'o cuartən' gan' debo'ona'.

⁴¹ Nach bexe'e na' bi'i no'olə guat da'onə' na' bolgüiže'ebo' gože'ebo': —Talita comi—, zeje dižə': “No'ol dao', əchnia' le', beyas.”

⁴² Nach le'e beyaste bi'i no'ol daon' na' bedabo'. Nachbo' bi'i šižin ize. Nach xaxna'abo'on len beṇə' ca' yelə' ža' lo'o cuartən' besyə'əbanchgüeine'.

⁴³ Jeso'osən' bene' mendad cui əso'e dižə' can' goquən', na' leczə bene' mendad len xaxna'abo'on əso'ebo' de'e gaobo'.

6

Bežin Jeso'osən' Nasaretən'

¹ Na' Jeso'osən' len disipl che' ca' besa'aque' Capernaunnə' na' jəya'aque' Nasaret gan' gwcha'o Jeso'osən'.

² Na' ža dezcanžən' gwyeje' yo'odao' che neto' beṇə' Izrael na' gwzoloa bsed əblo'ine' beṇə'. Na' beṇə' zan beṇə' ca' gwse'enene' xtiže'ena', besyə'əbanene' na' gwse'e ljuəžjga'aque': —čNaxca goquan' neze bengə yoguə' de'en čhsed chlo'ine'en ža? čNo bzejni' le' de'en naquə de'e si'innə'?, na' čnac čačuan' chone' miłagr?

³ Nombi'acho bengə. Le'ena' carpinter xi'in' Marian', na' beṇə' bišə' Jacob, na' Jwse, na' Jodas, na' Simon. Nach zane' ca' nitə' lažcho nga.

Na' de'en gwsə'one' xbab de que Jeso'osən' naque' con to beṇə' gwlaž čhega'aque', de'e na'ana' bito gwse'ejlə'e che'.

⁴ Na' gož Jeso'osən' lega'aque': —La'ana'əczə beṇə' zan chso'e yelə' bala'an' che beṇə' ca' chso'e xtižə' Diozən', pero beṇə' gwlaž čhega'aque' ca' na' family čhega'aque' ca' na' beṇə' ca' nitə' ližga'aque' bito chso'e lega'aque' yelə' bala'an'.

⁵ Na' laogüe' de'en cui gwse'ejlə'e che Jeso'osən', bito bene' zan miłagr Nasaretən' con de'e bene' bxoə ne'ena' to čhopə beṇə' na' besyə'əyaquene'.

⁶ Na' bebane Jeso'osan' de'en cui gwse'ejle'e che'. Na' gwdechla gwyeje' len disipl che' ca' na' bzejni'ine' beṇa' ca' ʒa' yež ca' de'en zjächi' galä'äza.

Jeso'osan' bsele'e disipl che' ca' šižin jäsä'adixjui'e xtiž'ena'

⁷ Jeso'osan' botobe' disipl che' ca' šižin na' bnezjue' lega'aque' yelä' guac par niç äsa'aque' yesyä'abeje' de'e xio' ca' zjəyo'o zjəyaz yichjla'aždao' beṇa'. Na' bsele'e çhopä güeğaga'aque' jäsä'adixjui'e xtiž'ena'.

⁸ Na' bene' mendad len lega'aque' bitobi äso'oxe'e tnezän', sino tozä garrot. Gože' lega'aque' de que bito cheyalä' äso'e bsod, ni yet, ni mech.

⁹ Be'e latjä yoso'oleje' šcue' yel, na' äsa'aze' tozä camis.

¹⁰ Na' ze'e sa'aque' cata' gože' lega'aque': —Cata' äžinle liž beṇa' yesyä'abei yoso'ogüialao' le'e, na'atezä sole na' na'atezä yesa'acle par žja'acle ga yoblä.

¹¹ Na' gata'atezä äžinle ga cui nono yebei ägüialao' le'e, na' nic yoso'ozenague' chele, le'e yesa'ac latjän'. Na' cata' yesa'aclen', ägwsi'ins ni'alēn' par yežib bišten' de'en gwžianä', niç ägwlo'ile beṇa' ca' de que de'e malän' chso'one' cui choso'ozenague' xtižä' Diozän' de'en cho'elen'. Diozän' bene' par niç byinj yi' na' sofr lao' syoda Sodomän' na' syoda Gomorran' por ni che de'en cui boso'ozenag beṇa' ca' che'. Na' de'e li achnia' le'e cata' äžin ža gon Diozän' castigw zejlicane che yoguä' beṇa' ca' chso'on de'e malän', beṇa' ca' cui yoso'ogüialao' le'e yesä'azäquä'äzi'iche' clezä ca beṇa' ca' gwnitä' Sodomän' na' Gomorran'.

¹² Nach gwsa'ac disipl ca' na' jäsä'adixjui'e de que beṇačän' cheyalä' yesyä'adinjene' xtölä'äga'aque'ena'.

¹³ Na' lecza besyä'abeje' zan de'e xio' de'en zjəyo'o zjəyaz yichjla'aždao' beṇa' na' boso'ošone' set lao cuerp che zan beṇa' ca' chsa'acšene na' gwsö'one' par niç besyä'äyaquene'.

Can' goquä got Juan ben' bchoa beṇa' nis

¹⁴ Na' Erodän' ben' chnabia' beṇa' Galilea ca' benene' dižä' ca naquä yoguä'älöl de'e güen de'en ben Jeso'osan', la' beṇa' zan gosä'änezene' de'e ca' ben Jeso'osan'. Nach gwna Erodän': —Bengan' de'e Juannä' ben' bchoa beṇa' nis. Babebane' ladjo beṇa' guat ca', na' de'e na'anä' chac chone' milagr quinga.

¹⁵ Nach yebälä beṇa' gosä'äne': —Naque' profet Liazän' ben' be' xtižä' Diozän' cana'.

Nach yebale' gosä'äne': —Naque' to profet ben' choe' xtižä' Diozän' can' gwsö'on de'e profet beṇa' ca' gwnitä' cana'.

¹⁶ Pero cata' bene Erodän' xtižä' beṇa' ca' na' gwne': —Bengan' de'e Juannä' ben' bena' mendad gosä'ächogue' yene', na' na'a babebane' ladjo beṇa' guat ca'.

¹⁷⁻¹⁸ Quinga goquä got Juannä'. Erodän' beque'e Erodiasän' ca xo'ole, len Erodiasän' naque' xo'olä Lip biše'ena'. Na' Juannä' gože' Erodän': “Malän' beno' beca'o no'ol che beṇa' bišo'onä' par naque' xo'olo.” Na' de'en gož Juannä' Erodän' ca', de'e na'anä' Erodän' bene' mendad gosä'azene' Juannä' na' gosä'ägüe'ene' ližyan', na' boso'ocheje' ni'a ne'e ca' gden.

¹⁹ Erodiasän' gwlo'oläze'e Juannä' por ni che de'en gože' Erodän' ca', na' gone'ene' gote'ene', pero bito goquä.

²⁰ Erodän' gocbe'ine' de que Juannä' zdacze' licha na' de que naque' to beṇa' güen. De'e na'anä' bžeb Erodän' gone' mendad so'ote' Juannä' na' de'e na'anä' bito be' Erodän' latjä bi gone no'olan' Juannä'. Na' la'anä'eczä bitotec gwyejni'i Erodän' bi de'en gwna Juannä', bebeine' bzenague' xtiž'e'ena'.

²¹ Pero na' gotä' to latjä par got Erodiasän' Juannä'. Cata'an gwye'i Erodän' iz, bene' to lni par beṇa' gwnabia' che' ca', na' par beṇa' gwnabia' che soldad ca', na' par beṇa' blao ca' nita' Galilean' gan' chnabi'ena'.

²² Bi'i no'ol che Erodiasän' gwyo'obo' lo'o quart gan' chsa'o beṇa' ca' na' bya'abo'. Na' lechguale bebei Erodän' na' len beṇa' ca' chsa'olen le' txen can' bya'abo'. Nach Rei Erodän' gože'ebo': —Gwnab bitä'etezä de'en che'endo' na' gona'an.

²³ Na' bene' lyebe len lebo' bzo'e' jorament de que ägwnežjue'ebo' bitä'etezä de'e äṇabebo' le' la'anä'eczä šä gašjä nasyon gan' chnabie'ena'.

²⁴ Nach bechojbo' na' gožbo' xna'abo'onä': —¿Bin' äṇabda'ane' gone'?

Nach xna'abo'onä' gože'ebo': —Gwnabene' gone' le' yichj Juannä' ben' bchoa beṇa' nis.

²⁵ Nach le'e beyo'oseste bi'i no'olan' gan' chaolen rein' beṇa' ca' yela', na' gožbo' rein': —Ben nada' na'atec na'a yichj Juannä' ben' bchoa beṇa' nis bžian to lao plat.

²⁶ Nach rein' gwzochgüe' trist cata' beyož gož bi'i no'olan' le' ca', pero na' bačhlä bzo'e' jorament len lebo' lao beṇa' ca' zjənaquä combidän'. De'e na'anä' benšaze' can' gwṇabe bi'i no'olan' le'.

²⁷ Nach le'e bente rein' mendad šej to soldad žjəchogue' zelao yen Juannä' na' ägwžie' yichje'ena' to lao plat.

²⁸ Nach gwyej soldadän' ližya gan' de Juannä' jəchogue' yene'ena' na' bži'en to lao plat. Nach beyože'en jəyenežjue'en bi'i no'olan', na' bi'i no'olan' bnezjwbo'on xna'abo'on.

²⁹ Catá' gwse'ene disipl che de'e Juanná' de'en goquán', jəsyə'əxi'e cuerp che'ená' na' jəsa'əcuəše'en.

Jeso'osən' bguaogü'e gueyá' mil bená' byo

³⁰ Na' catá' besyá'əžin disipl che Jeso'osən' gan' zoe'ená' gwso'elene'ene' dižá' can' jse'ene'ená', na' can' jəsa'ədixjui'e can' na' Diozán'.

³¹ Jeso'osən' gože' lega'aque': —Le'e da, šejcho to latjə ga cui no nla' žjencho šlož dezczanz.

Gwne' ca' cheda' bená' zan chsa'aš gan' nite'ená', na' cui goquə latjə par gao Jeso'osən' len disipl che' ca'.

³² Nach Jeso'osən' len disipl che' ca' gwso'e to lo'o barcw na' gosə'əlague'e nisdá'oná' par besá'əžine' to latjə ga cui no nla'.

³³ Pero bená' zan besá'əle'ine' lega'aque' catá'ən gwsa'aque', na' besyá'əyombi'e Jeso'osən'. Nach gwsa'acdo bená' ca' ža' yoguə' yež ca' zjəchi' galá'əžə əzja'aque' zaquə' galán' əžin Jeso'osən' len disipl che' ca' na' byobəch besá'əžine' cle ca' Jeso'osən' len disipl che' ca'.

³⁴ Na' catá' besá'əžine' cho'a nisdá'oná' Jeso'osən' ble'ine' bená' zan ca' na' beyašə'alazə'e lega'aque', cheda' gocbe'ine' de que zjənaque' ca xilə' ca' bian' cui no xane de. Na' Jeso'osən' bzejni'ine' lega'aque' de'e zan.

³⁵ Na' catá' bachexjw že'ená' gosə'əbiguə' disipl che' ca' laogü'e'ená' na' gwse'ene': —Bachal nla'a na' zocho to latjə ga cui no nla'.

³⁶ Bitobi de che bená' quinga par əse'ej əsa'ogü'e'. Bzeišgueiga'aque'ne' dižá' nič žjəya'aque' yež ca' de'en zjəchi' galá'əžə par nič žjəsa'əxi'e de'e se'ej əsa'ogü'e'.

³⁷ Nach Jeso'osən' gože' lega'aque': —Le'e gwnežjo de'e sa'ogü'e'.

Na' gwse'ene': —Žeche'endo' šejcho žjəxi'icho tml pes yetxtilən' par əgwnežjwchon əsa'o bená' quinga?

³⁸ Nach Jeso'osən' gože' lega'aque': —ŽBalə yetxtil chechon' de? Le'e güiašc.

Na' catá' gosə'əneze'ne', gwse'ene': —Gueyá' yetxtil na' čopə bel ya'a.

³⁹ Nach ben Jeso'osən' mendad gosə'əbe' bená' zan ca' lao yixye daquə'əná', xonj güeje'.

⁴⁰ Na' besá'ədobə to gueyoa güeje' na' šiyon güeje' gosə'əbi'e lao daquə'əná'.

⁴¹ Na' Jeso'osən' gwxi'e yetxtil ca' gueyá' na' bel ya'a ca' čopə, na' bgüie' yobalə be'e yelə' choxčwlen che Diozán' na' bzoxye' yetxtilən'. Na' bnežjue'en disipl che' ca' par gwso'e che čhe bená' ca'. Lecəə ca' bene' len bel ya'a ca' čopə, na' gwso'e che yoguə' bená' ca'.

⁴² Yogue'e gwsa'ogü'e'en xte ca' gwse'eljene'.

⁴³ Na' pedas yetxtil ca' na' bel ya'aná' besyá'əga'an bosyo'otobe'en, na' gwsa'acquən šizjən žomə.

⁴⁴ Na' bená' ca' gwsa'o yetxtilən' na' bel ya'aná' zjənaquə' gueyá' mil bená' byo cui cuent no'olə na' cui cuent bidao'.

Jeso'osən' gwze'e lao nisdá'oná'

⁴⁵ Gwde na' Jeso'osən' bene' mendad yesyá'əyo'o disipl che' ca' lo'o barcon' par yesyá'əbialaogü'e' yesyá'əlague'e yešlā'alə nisdá'oná' par yesyá'əžine' Betsaidan', žlac ne'e bega'an' le' bzeine' bená' zan ca' dižá'.

⁴⁶ Na' catá' beyož bzei Jeso'osən' bená' ca' dižá', gwlo'e' to lao ya'a par jene' orasyon.

⁴⁷ Na' catá' gol, barcon' gan' zesyá'əyo'o disipl che' ca' bazdan gwcholte nisdá'oná', na' yetozə Jeso'osən' bega'ane' lao ya'aná'.

⁴⁸ Na' ble'ine' de que naquən zdebə par yesá'əžiguə'əche' barcon' cheda' chečj be'ená' clelə. Na' do šbal beyetj Jeso'osən' ya'aná' na' gwze'e tla'o nisdá'oná' na' gweyje' galán' zja'ac disipl che' ca'. Na' bene' ze te yešlā'alə galán' zja'aque'.

⁴⁹ Pero na' catá' besá'əle'ine' le' zde' lao nisdá'oná' gwsa'aque'ne' de que naque' to bená' guat, na' gwso'osye'e.

⁵⁰ Yogue'e besá'əle'ine' le' na' besá'əžebchgü'e'. Pero na' le'e bolgüižte' lega'aque' na' gože': —Leyebei, nada'aná'. Bitó žeble.

⁵¹ Nach beyo'e lo'o barcw čhega'aque'ená' na' le'e gwlezte be'ená'. Na' lechguale besyá'əbanene',

⁵² la' bito gwsa'acbe'ine' non' naquə Jeso'osən' la'anə'əczə bguaogü'e' bená' zan ca' len gueyá'əžə yetxtilən' cheda' nežjənčhol yichjla'aždaoga'aque'ená'.

Jeso'osən' beyone' bená' chsa'acšene bená' nitə' Genesaretən'

⁵³ Na' catá' beyož besyá'əlague'e nisdá'oná', besá'əžine' gan' mbane Genesaretən'. Na' besá'əchoje' barcon' na' bosó'ocheje'en cho'a nisdá'oná'.

⁵⁴ Na' ze'e besyá'əchoje' barcon' catá'əczlə besyá'əyombia' bená' ca' ža' Genesaretən' Jeso'osən'.

⁵⁵ Na' gwsa'ašdoe' yogua' yež ca' zjəčhi' doxen gan' mbane Genesaretən', na' gosə'əche'e yogua' beṇə' ca' chsa'acšene zjəxoateze' lao xcamga'aque'ena' par jso'ene' gan' gwse'ene' rson zo Jeso'osan'.

⁵⁶ Na' gata'əteza gwey Jeso'osan' šə lao' syoda, o šə lao' yež ca', con boso'onite'e beṇə' ca' chsa'acšene do cho'a nezən' na' gwsa'ata'əyoine' Jeso'osan' šə güe'e latjə yesə'əgane' lačga lox xadoṇ che'ena'. Na' yogua' beṇə' ca' gosə'əgan len besyə'əyaquene'.

7

De'e mal de'en chchoj yichjla'azda'ochon' chonən manch la'azda'ochon'

¹ Baḷə beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwsa'aque' Jerosalenna' na' besə'əžine' gan' zo Jeso'osan'.

² Na' cata' besə'əle'ine' de que baḷə disipl che Jeso'osan' bito bosyo'one'e zan las ze'e sa'ogüe', na' gwsa'ogüe' xya contr disipl ca' lao Jeso'osan'.

³ Ca naquə costombr che yogua' neto' beṇə' Izrael na' mazəchlə che beṇə' fariseo ca' beṇə' ca' lečza zjənaquə beṇə' gwlaž cheto', bito chsa'ogüe' šə cuiṇə' yosyo'one'e zan las, la' can' naquə costombr de'en gosə'ənao de'e xaxta'oto' ca'.

⁴ Cata' chja'aque' gan' chac ya'ana' na' cata' chesyə'əžine' ližga'aque' bito chsa'ogüe' xte cata'əch bagwsa'a gosə'əyib cuingaque'. Na' dech de'e zan costombr de'e chəsə'ənaogüe' ca de'en chso'one' xi'ilažə' tas plat čhega'aque' ca' na' yesə' de ya, na' no mes čhega'aque' segon can' na costombr golən'.

⁵ De'e na'ana' beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwse'e Jeso'osan': —čBixchen' disipl chio' ca' bito chesə'ənaogüe' costombr ca' de'en bosyo'ocua'anlen de'e xaxta'ocho ca' chio'o? čBixchen' cui chosyo'one'e zan las antsłə ze'e sa'ogüe' can' chonto'?

⁶ Nach Jeso'osan' gože' lega'aque': —Naquən de'e li can' bzoj de'e profet Isaiazən' ben' be' xtižə' Diozən' cana' che le'e beṇə' goxoayag. Bzoje'en nan:

Beṇə' Izrael ca' chəsə'əne' de que nada' Diozən' chso'elaogüe'e pero lo'o yichjla'azdaoga'aque'ena' chesə'əgüe'ine' nada'.

⁷ Bitobi zejen de'en chəsə'əne' chso'elaogüe'e nada',

chedə' la' choso'osed choso'olo'ine' beṇə' costombr de'en gwsa'aljlažə' beṇə'chən'.

⁸ Le'e chbejyichjle de'en non Diozən' mendad gonle na' con naozechle costombr golə de'en əbxe beṇə'chən', ca de'en chi'ichgua yichjle cheyible no yesə' na' no tas plat chele zan las ze'e gwchīnlen na' chi'ichgua yichjle gonle de'e zan de'e zjənac ca'.

⁹ Na' goze'e Jeso'osan' lega'aque': —čEchaqule güenchguan' chonle chbejyichjle de'en non Diozən' mendad gonle parzə nič naole costombr chelen'?

¹⁰ Le'e nale de que chzenagle che de'en bzoj de'e Moizezən'. De'e Moizezən' bzoje' can' gož Diozən' le', nan: "Le'e gwnežjo yełə' bala'an xaxna'ale." Na' lečza bzoje': "Notə'əteze šə čžia chnitə'əle xaxna'ale cheyalə' gatlə."

¹¹ Pero na' le'e nale de que notə'əteza beṇə' guac ye'e xaxne'ena': "Bitoch gaquələna' le'e čhedə' yogua' mech o bien de'en naquə goṇa' par gaquələna' le'e naquan Corban" (zeje dižə' naquan che Diozən').

¹² Na' šə ca' ye'e xaxna' be'ena', le'e natele de que bitoch cheyalə' gaquələne' xaxne'ena'.

¹³ Na' de'en naozechle costombr golə chele de'en nale naquə de'e žialaoch, bachonle lei che Diozən' ca to de'e cui bi bi zaque'e. Na' de'e zan de'e zjənaquə ca de'e quinga chonle.

¹⁴ Nach Jeso'osan' bolgüize' beṇə' ca' zjənžaguən' par gosə'əbigüe'e laogüe'ena', na' gože' lega'aque': —Yogua'əle le'e gwzenag de'en nga əṇia' le'e nič šejni'ilen.

¹⁵ Bito nacho de que de'che'ej chaochon' chonən manch la'azdaochon'. De'e mal de'en chchoj yichjla'azda'olen' lenṇə' chonən manch la'azda'olen'.

¹⁶ Le'e žia nagle de'e chene, legwzenag.

¹⁷ Cata' beza' Jeso'osan' gan' nita' beṇə' ca' na' beyo'e liže'ena' disipl che' ca' gosə'əṇabene' le' bi zejen jemplan'.

¹⁸ Nach gože' lega'aque': —čEleza lenle bito chejni'ile de que de'en che'ej chaochon' bito gaquə gonən manch la'azda'ochon'?

¹⁹ De'en che'ej chaochon' bito cho'on yichjla'azda'ochon' sino que chjche'en lo'o le'e'echon' na' čžin or cheden.

(Can' gwne' blo'e de que yogua' yełə' guaon' zjənaquən güen par gaochon.)

²⁰ Na' gwne': —De'en chchoj yichjla'azda'olen' lenṇə' chonən manch la'azda'olen'.

²¹ Na' lo'o yichjla'azdao' beṇə'ch na'ana' chchoj yogua' xbab mal quinga, ca de'en nan yesə'əgo'o xtoga'aque' na' yesə'əbejyichje' no'ol čhega'aque' o be'en čhega'aque' par yesyə'əzolene' beṇə' yoblə, na' ca de'en nan so'ote' beṇə'.

²² Na' leczə lo'o yichjla'azdao' beṇač na'anə' chchoj xbab mal de'en nan yesə'əbanga'aque' bi de'e de che beṇə', na' yesə'əzelaže'e bi de'e de che beṇə', na' so'one' de'e mal, na' yesə'əxoayague' beṇə', na' so'onlene' cuerp čhega'aque'enə' de'en naquə de'e yelə' zto', na' sa'acxi'i ljuežjga'aque', na' yoso'ožia yoso'onite'e ljuežjga'aque', na' sa'alaze'e na' nan so'one' de'en cui zaque'e.

²³ Yogua' de'e mal ca' de'en zjanac ca' chchojən yichjla'azdao' beṇə', na' chac manch la'azda'oga'aque'enə'.

To no'olə cui naque' beṇə' Izrael chonlilaže'e Jeso'osən'

²⁴ Beza' Jeso'osən' latjən' len disipl che' ca' par ja'aque' galə'əzə gan' mbane Tiro na' Sidon. Na' gwsə'e to lo'o yo'o na' bito gone'e Jeso'osən' no əneze gan' nite'enə', pero bia'aczə bito goquə yesə'əcuaša' cuinga'aque'.

²⁵⁻²⁶ Na' zo to no'olə Sirofenisia beṇə' chšil dižə' griego na' zo to bi'i no'ol che' yo'o yaz de'e xio'on yichjla'azda'obo'onə'. Na' lguəgwə bene no'olən' rson gan' zo Jeso'osən', na' gwyeye' bzo xibe' lao Jeso'osən'. Na' gotə'əyoine' Jeso'osən' yebeje' de'e xio' ca' yo'o yaz yichjla'azdao' xi'ine' no'olən'.

²⁷ Pero na' Jeso'osən' gože'ene': —Cheyalə' güe'echo latjə zgua'atec əsa'o bi'i čecho ca' na' techlə əgguaə xico'ochon', čhedə' bito naquən güen yeca'acho yelə' guao che xi'inčhon' na' əgwnežjwchon gao xico'ochon'.

²⁸ Na' gocbe'i no'olən' bsaquə'əlebe Jeso'osən' beṇə' ca' cui zjanaquə beṇə' Izrael ca beco', nach gože'ene': —Leiczadon' Xana'. Pero xico'ochə ca' bian' nita' xan mesən' guaquə əsa'ob pedas yelə' guaon' de'en choso'osan xi'inčo ca' lao yon'.

²⁹ Nach Jeso'osən' gože'ene': —No'olə, güenčhuan' bagwnao'. Guaquə yeyejo' ližə'. Babečoj de'e xio' de'en gwyo'o gwyaz yichjla'azdao' xi'ino'onə'.

³⁰ Na' catə' bežin no'olən' liže'enə', xi'ine'enə' debo' lao xcambo'onə' na' babečoj de'e xio'onə' gwyo'o gwyaz yichjla'azda'obo'onə'.

Jeso'osən' beyone' to beṇə' ncuež nague' na' leczə bito goquə əne' binlo

³¹ Gwde na' Jeso'osən' len disipl che' ca' besa'aque' latjən' gan' mbane Tiro na' besyə'ədie' gan' mbane Sidonə' na' yež ca' zjəchi' gan' mbane Decapolis par besyə'əžine' nisdə' Galilean'.

³² Na' galə'əzə nisdə'onə' besyə'əžague' beṇə' ca' zjanče'e to beṇə' cuež na' leczə bito goquə əne' binlo, na' gwsa'atə'əyoine' Jeso'osən' əxoə ne'enə' be'enə' par nič yeyaquene'.

³³ Jeso'osən' gwče'ene' partlə gan' cui no beṇə' nita' na' bzeb xbene'enə' lo'o nag be'enə' čopə' la'a, na' btop xene'enə' xbene'enə' nach gwđane' ložə' be'enə'.

³⁴ Nach Jeso'osən' bgüie' yobalə, na' gwcua'alaze'e gwne': —[Fatal! —zeje dižə' "iByaljo!"]

³⁵ Nach byaljo nag be'enə', na' leczə lože'enə' beyaquen, na' goc gwne' binlo.

³⁶ Na' Jeso'osən' bene' mendad len beṇə' ca' cui so'e dižə' che de'en babene', pero mazəchlə gwso'one' gwso'e dižə' čei.

³⁷ Na' lechgualə besyə'əbane beṇə' ca' na' gwse'e ljuežjga'aque': —Chac chone' yoguə'əlo' na' yoguə' de'en chone' chone'en binlo. Chone' par nič chesyə'əyene beṇə' cuež ca' na' par nič chesyə'əne beṇə' mod ca'.

8

Jeso'osən' bguaogüe' tapa mil beṇə'

¹ Na' goquən' besə'əžag beṇə' zan gan' zo Jeso'osən', na' bito bi de čhega'aque' par əsa'ogüe'. Nach Jeso'osən' goxe' disipl che' ca' na' gože' lega'aque':

² —Lechgualə cheyaša'əda' beṇə' quinga. Bagoc šonə ža nite'e nga len chio'o, na' bitobi de de'e əsa'ogüe'.

³ Šə yosa'aga'aca'ane' sin cui bi əgwnežjua' əsa'ogüe', gosyə'əčholene' tnezən', la' balə' za'aque' zita'.

⁴ Nach disipl che' ca' gwse'ene': —Gan' zocho nga naquən to latjə ga cui nono nla'. žGaxa əželecho de'e əsa'o yoguə' beṇə' zan quingan'?

⁵ Nach Jeso'osən' gože' lega'aque': —žBalə yetxtil čechon' de?

Nach gwse'ene': —Gažən.

⁶ Nach Jeso'osən' bene' mendad yesə'əbe' beṇə' ca' lao yon'. Na' bexe'e yetxtil dao' ca' gažə na' be'e yelə' choxcwlen che Diozən'. Nach bzoxje'en bnežjue'en disipl che' ca' par gwso'e che yoguə' beṇə' ca'.

⁷ Na' leczə de to čopə' bel' ya'a dao', na' Jeso'osən' be'e yelə' choxcwlen che Diozən' por lega'aque'b, nach bene' mendad len disipl che' ca' əso'e che che beṇə' ca'.

⁸ Na' yogue'e gwsa'ogüe' xte ca gwse'eljene'. Nach pedas ca' de'en besyə'əga'aṇnə' bosyo'otobə' disipl ca' len, na' gwsa'acquən gažə žomə.

⁹ Na' beṇə' ca' gwsa'o yetxtilən' len beḷ ya'anə' zjənaquə do tapa mile'. Gwde na' bosa' Jeso'osən' lega'aque'.

¹⁰ Nach le' gwyo'e to lo'o barcw len disipl che' ca' na' ja'aque' distrit gan' nzi' Dalmanota.

Benə' fariseo ca' gosəṇabene' Jeso'osən' gone' to de'e yesə'əle'ine' le'e yoban'

¹¹ Na' besə'əžin baḷə beṇə' fariseo gan' zo Jeso'osən' na' gwzolaogwsa'acyože'ene'. Na' gosə'əṇabene' le' gone' to miḷagr de'e yesə'əle'ine' le'e yoban' gwsa'acquene' šə cui gaquə gone'enna'.

¹² Jeso'osən' gwcua'alaže'e na' gože' lega'aque': —Le'e mbanḷe na'a chṇable gona' to de'e le'ile le'e yoban' par nich ənezele šə Diozən' bseḷe'e nada'. Pero de'e li chnia', le'e, bitobi bi gona' de'e le'ile le'e yoban'.

¹³ Na' beyoż gwna Jeso'osən' ca' beze'e len disipl che' ca' gan' nitə beṇə' ca', na' besyə'əyo'e lo'o barcon' na' besyə'əlague'e yešḷa'ala nisdə'ona'.

De'en chsed chlo'i beṇə' fariseo ca' gwxaquə'əleben ca xna' cuazin'

¹⁴ Na' disipl che' ca' gwsa'ache'ine' de que gwsa'anḷaže'e əso'oṅe'e yetxtil de'en əsa'ogüe'. Toga yetxtilən' de čhega'aque' lo'o barcon'.

¹⁵ Nach Jeso'osən' bene' mendad len lega'aque' gože': —Legapə cuidad len xna' cuazi čhe beṇə' fariseo ca' na' čhe beṇə' ca' chso'ən t xen len Erodən'.

¹⁶ Pero disipl che' ca' bito gwse'ejni'ine' bi zejen de'en gože' lega'aque' ca', nach gwse' ljuēžjga'aque': —Gwne' ca' chedə' gonlažə'əcho gua'acho yetxtilən'.

¹⁷ Jeso'osən' gocbe'ine' can' gwse'e ljuēžjga'aque', nach gože' lega'aque': —čBixčhen' chonḷe xbab che yetxtilən' de'en gonlažə'əlen'? čEcabiṇə' šejni'ile bi zeje de'en gwnia' le'e? čəna' bito chonḷe xbab čhei? čEbia'acza ṇe'e nchoḷ yichjla'ažda'olen'?

¹⁸ čEbito chle'ile de'en chona'? na' čəbito chenele de'en chzejni'ida' le'e? čEbito za'alažə'əle miḷagr de'en babena'?

¹⁹ Catə'ən bguaogua' gueya'a mil beṇə' byo len gueyə'əza yetxtil dao' čbaḷə žomə pedas yetxtilən' botoble de'en besyə'əga'an'?

Nach gwse'ene': —Šižin žomən'.

²⁰ Na' gozna Jeso'osən': —Catə' bguaogua' tapa mil beṇə' byo len gažə yetxtil čbaḷə žomə pedas yetxtil ca' botoble de'en besyə'əga'an'?

Nach gwse'ene': —Gažə žomən'.

²¹ Nach gože' lega'aque': —čEbia'acza bitonə' šejni'ile bi zejen de'en gwnia' le'e?

Jeso'osən' beyone' jelao to beṇə' lchoḷ yež de'en nzi' Betsaida

²² Gwde de'e ca' besə'əžine' Betsaidan'. Na' beṇə' Betsaida ca' jso'e to beṇə' lchoḷ lao Jeso'osən', na' gwsa'atə'əyoine' le' cane'ene' par nich yele'ine'.

²³ Na' Jeso'osən' beṅe'e na' be'ena' na' gwche'ene' fuerlə yežən' na' gwdeb xene'ena' jḷao be'ena' nach gwdane'ene'. Nach gwnabene' le' šə bachac le'ine' lata'.

²⁴ Beṇə' lchoḷən' bgüie' na' gože' Jeso'osən': —Chle'ida' beṇə' can' chle'icho yag ca', pero chesə'əde'.

²⁵ Nach Jeso'osən' gwdane' jḷao be'ena' de'e yoblə, nach be'ena' bgüiayane'e, na' beyaque jelaogüe'ena' na' bele'ine' binḷo.

²⁶ Nach Jeso'osən' gože'ene': —Bito šejo' lao' yežən', na' nic no yo'o can' babena' len le'.

Na' bose'ene' beyej liže'ena'.

Bedən' gwne' che Jeso'osən' de que Diozən' bseḷe'ene' par gaquəlene' beṇə' ca' bagwleje' par zjənaque' nasyon che'ena'

²⁷ Na' Jeso'osən' len disipl che' ca' gwsa'aque' ja'aque' yež ca' de'en zjəchi' gan' mbane Sesarea de Filipino. Na' lao zja'aque' tnezən' Jeso'osən' gože' disipl che' ca': —čBi chesə'əna beṇə', non' naca' nada'?

²⁸ Nach gwse'ene': —Baḷe' chesə'əne' de que naco' de'e Juan ben' bchoa beṇə' nis. Na' yebale' chesə'əne' de que naco' profet ḷiaz ben' be' xtižə' Diozən' cana'. Na' yebale' chesə'əne' de que naco' yeto profet beṇə' lecza be' xtižə' Diozən' cana'.

²⁹ Nach gože' lega'aque': —čChexa le'e? čbi nale non' naca' nada'?

Nach Bedən' gože'ene': —Le' naco' Cristən' ben' gwlej Diozən' par gaquəleno' neto' bagwleje' par naquəto' nasyon che'ena'.

³⁰ Nach Jeso'osən' bene' mendad len lega'aque' de que ni toe' cui əso'e dižə' de que len' naque' Cristən' ben' gwlej Diozən' par gaquəlene' beṇə' ca' zjənaquə nasyon che'ena'.

Jeso'osən' gwdixjue'ine' disipl che' ca' de que gate'

³¹ Nach gwzolaogwsa'osən' bsed blo'ine' disipl che' ca'. Na' bzenene' lega'aque' de que de'e zan cheyaḷə' čhi' saquə' le' naque' ben' bseḷə' Diozən' golje' beṇə'ach. Na' gwne' de que beṇə' golə beṇə' blaog čhe nasyon Izrael čheton' na' beṇə' gwnabia' čhe bḷoz čheto' ca' na' beṇə' ca'

choso'osed choso'olo'i lei de'en bzoj de'e Moizezən' bito se'ejle'e che'. Nach gože' disipl che' ca' de que beṇə' blao ca' so'ote'ene', pero na' yeyon ža yebane' ladjo beṇə' guat ca'.

³² Yoguə' de'e ca' gož Jeso'osən' disipl che' ca' clar. Nach Bedən' gwleje' Jeso'osən' latə' dao' ca'alə' par gwdile'ene'.

³³ Pero na' Jeso'osən' gwyechje' na' bgüie' disipl che' ca' na' gwdile' Bedən', gože' gwxiye'ena' de'en chnabia' yichjla'aždao' Bedən': —Gwchi'izə' ca'alə' Satanās.

Nach gože' Bedən': —Chono' xbab che de'en chacdo' gaquən güen na' bito chono' xbab naquən' chene'e Diozən' gaquə.

³⁴ Nach Jeso'osən' gože'e disipl che' ca' na' yeziqwa'achlə beṇə' ca' zjənžaguan' gože': —Notə'atezle šə chene'ele gonlilažə'ale nada' na' gwzenagle chia', cheyalə' əchojyichje' de'en chene'ele gon cuinle' par nič gonle' con can' chene'e Diozən', na' bitobi gaquəle che de'en chi' saquə'ale la'aṇə'əczə šə so'ot beṇə' le'e to le'e yag coroz, con gonlilažə'ale nada' na' gwzenagle chia'.

³⁵ Na' notə'atezə beṇə' chaquene' gone' par nič cui chi' saque'e o par nič cui no so'ot le', be'enan' cuiayi'. Na' notə'atezə beṇə' chsanlažə' cuine' chi' saque'e o so'ot beṇə' le' chedə' chonlilažə'ale nada' na' chedə' chejle'e dižə' güen dižə' cobə' chia'anə', be'enan' əbane' zejlicane.

³⁶ Bitobi de'e güen gaquə che to beṇə' la'aṇə'əczə nabi'e doxen wežlyon' šə cuiayi'e zejlicane.

³⁷ La' bitə'atezə de'e gata' che' bito gaqualenən le' par nič cui cuiayi'e zejlicane.

³⁸ Notə'atezle šə cheto'ile chia' na' che xtižə'anə' lao beṇə' güen de'e mal ca' beṇə' ca' cui chso'elao' Diozən', leczə ca' nada' yeto'ida' chele, nada' naca' ben' bselə' Diozən' golja' beṇə'ch. Yeto'ida' chele catə'an yida' de'e yoblə' nsa'a yelə' chey che'eni' che Xa' Diozən' na' nchi'a angl chia' ca'.

9

¹ Nach gože'e Jeso'osən' lega'aque': —De'e li əchnia' le'e de que balə' cabinə' gatle catə'an le'ile can' gon Diozən' əgwlo'e yelə' guac xen che'ena' par nabi'e beṇə'chən'.

Jeso'osən' goque' ca to de'e chey che'eni'

² Gwde xop ža gwna Jeso'osən' de'e ca', gwche'e Bedən' len Jacobən' len Juana', con lega'acze' ja'aque' to lao ya'a sibə. Na' lao nite'e lao ya'anə' besə'ale'ine' beža' can' goquə Jeso'osən'.

³ Na' xalane'ena' goctitan na' beyaquən šyiš xilə' juisy. Beyaquən šyiš xilə' juisyəch cle ca che notə'atezə'achlə beṇə' chac chib lachə' yežlyo nga.

⁴ Na' besə'ale'ine' Liazən' ben' be' xtižə' Diozən' cana' na' leczə besə'ale'ine' de'e Moizezən' chso'elene' Jeso'osən' dižə'.

⁵ Nach gož Bedən' Jeso'osən': —Xantə', güenchgua zocho nga ṇa'a. iEgüe'endo' gonto' šonə ranš?, ton par le', na' ton par Moizezən' na' yeton par Liazən'.

⁶ Gože'ene' ca' chedə' bito bene' xbab che de'en gože' tant besə'əžebe'.

⁷ Nach betj to bejw bcuašə'n lega'aque', na' lo'o bejən' gwse'enene' gwna Diozən': —Benga Xi'ina' ben' chacchgüeida' chei. Che le'ena' le'e gwzenag.

⁸ Na' choso'ogüiate' ca' catə'əczla con cuich no no besə'ale'ine' sino yetoza Jeso'osən'.

⁹ Na' gwde na' lao chesyə'əyetje' ya'anə', Jeso'osən' bene' mendad len lega'aque' cui no no əso'elene' dižə' che de'en babesə'ale'ine'ena' xte catə'əch so'ot beṇə' ca' Jeso'osən' ben' bselə' Diozən' golje' beṇə'ch na' yebane' ladjo beṇə' guat ca'.

¹⁰ De'e na'anə' bito bi dižə' gwso'elene' yeziqwa'achlə beṇə'. Pero bito gwse'ejni'ine' bi zejen xtižə' Jeso'osən' de'en gwne' yebane' ladjo beṇə' guat ca' na' gosə'əṇabe' lježjga'aque' bi zejennə'.

¹¹ Nach gwse'e Jeso'osən': —Beṇə' ca' choso'osed choso'olo'ine' lein' choso'osedene' neto' de que zgua'atec profet Liazən' ben' gwzo cana' cheyalə' yide' lao yežlyo nga de'e yoblə' antslə ze'e yidə' ben' əselə' Diozən' par gaquəlene' nasyon chechon'. iBixchen' chesə'əne' ca' ža?

¹² Nach Jeso'osən' gože' lega'aque': —De'e liczə can' chesə'əne' de que profet Liazən' ben' gwzo cana' leteque' yide' de'e yoblə' par yeyone' yoguə'əlo' de'en cheyalə' yeyac. Na' leczə ca' nyoj Xtižə' Diozən' nan de que ben' əselə' Diozən' galje' beṇə'ch na' de'e zan de'e chi' saque'e. Beṇə'chən' so'onene' le' ca'aczə to beṇə' cui bi bi zaque'e.

¹³ Pero na' əchnia' le'e de que babidə' ben' bedəyən can' ben Liazən' na' beṇə' Izrael gwlaž checho ca' gwso'onene' le' con ca gwse'enene' can' nyoj Xtižə' Diozən' gaquə.

Beyon Jeso'osən' to bi'i yo'o yaz de'e xio'

¹⁴ Na' catə' besyə'əžine' gan' besyə'əga'an disipl ca' yelə', besə'ale'ine' beṇə' zan, zjənyechje' disipl ca'. Na' leczə nitə' beṇə' ca' choso'osed choso'olo'i lei de'en bzoj de'e Moizezən' chsa'acyože' disipl che Jeso'osən'.

¹⁵ Nach catə' besə'ale'i yoguə' beṇə' ca' nžaguən' Jeso'osən' besyə'əbanchgüeine'. Nach gwsa'acdoe' jəsa'əšague'ene' na' gwsə'olgüize'ene'.

¹⁶ Nach Jeso'osən' gože' disipl che' ca': —ǀBi dižə'an cho'elenle beṇə' ca' choso'osed choso'olo'i lein'?

¹⁷ Nach entr beṇə' ca' zjənžaguən' toe' gože'ene': —Xana', nchi'a xi'ina' nga. Yo'o yaz de'e xio'on yichjla'ažda'obo'onə' na' chonan par nič nachbo' mod.

¹⁸ Na' gata'ətezə zobo' catə' chnizən lebo' chchixən lebo' lao yon', na' chla' bžin' cho'abo'onə', na' chaoyejə leybo'on na' chatbo' šlat. Bagotə'yoida' disipl chio' ca' par nič yesya'əbeje' de'e xi'onə' yo'o yaz yichjla'ažda'obo'onə', pero bito gwsa'aque' yesya'əbeje'en.

¹⁹ Nach gož Jeso'osən' beṇə' ca' ža'anə': —Le'e nitə'əle nga, ǀbixchexan' cui chejle'ele chia'? Bachac šša zoa' napa' yelə' chxenlažə' len le'e. ǀBatxan' šejle'ele chia'?

Nach gože' xa bida'onə': —Doa' xi'ino' nga.

²⁰ Na' catə' zjso'ebo' lao Jeso'osən', ble'i de'e xio'onə' Jeso'osən' na' bnizən bida'onə', na' benən par nič lechguale gwyazbo' šonə', na' bchix btolan lebo' lao yon', xte bla' bžin' cho'abo'onə'.

²¹ Nach Jeso'osən' gože' xabo'onə': —ǀšna bagoc chachbo' ca'?

Nach xabo'onə' gože' Jeso'osən': —Dezd bida'otebo'.

²² Zan las ben de'e xi'onə' par jechazbo' do lao yi' na' bχopən lebo' do lo'o nis par gatbo'. Šə bi de'e guac gono' par gaquəleno' neto', beyašə'əlažə'əšgwei neto'.

²³ Jeso'osən' gože'ene': —Šə chejli'o chia', goyona'abo', la' chac chona' bitə'ətezə, con šə chejli'o chia'.

²⁴ Nach xabo'onə' le'e gožte' Jeso'osən': —Chejli'a chio'. Goclenšga nada' par nič šejle'echa' chio'.

²⁵ Na' catə' Jeso'osən' ble'ine' bachesə'əžag beṇə' zan, nach gwdile' de'e xio'onə', gože'ene': —De'e xio', chono' par nič bi'i nga nachbo' mod na' ncuežbo'. Chona' mendad yechoj' yichjla'aždao' bi'i nga na' cuatəch yeyo'o yeyazo' de'e yoblə.

²⁶ Nach de'e xio'on bgosya'an lebo' na' benən par nič lechguale fuert gwyazbo' šonə' de'e yoblə nach bechojən lebo' na' bocua'anən lebo' ca'aczə to bi'i guat. Na' beṇə' zan gosa'əne' de que gotbo'onə'.

²⁷ Pero na' Jeso'osən' bexe'e na'abo'onə' par bezoža'abo'.

²⁸ Nach Jeso'osən' gwyo'e to lo'o yo'o na' disipl che' ca' gosa'əbigue'e gan' zo toze', na' gwse'ene': —ǀBixchexacxan' cui goquə yebejto' de'e xi'onə' ža?

²⁹ Nach gože' lega'aque': —Par nič gaquə yebejle de'e xio' ca' de'en zjanaqua ca de'en bebeja' yichjla'aždao' bi'i nga, cheyalə' co'o gwchejle cui ye'ej gaole nič gontezə gonle orasyon.

De'e yoblə gwdixjue'e Jeso'osən' de que gate'

³⁰ Na' catə' besa'aque' latjən' besya'adie' gan' mbane Galilean', pero Jeso'osən' bito gone'ene' yesə'əneze beṇə' gan' zoe'.

³¹ Con disipl che' ca'azə əbsed əblo'ine'. Na' gože' lega'aque' de que le' naque' ben' bselə' Diozən' golje' beṇəch. Na' gaque' lao na' beṇə' na' so'ote'ene', nach yeyon ža yebane' ladjo beṇə' guat ca'.

³² Pero na' disipl ca' bito gwse'ejni'ine' dižə' de'en be' Jeso'osən' na' besə'əžebe' par yesə'ənabene' le' bi zejen de'e gože' lega'aque'ena'.

Gwsa'acyožə disipl che' ca' noe' naquə blaoch

³³ Jeso'osən' len disipl che' ca' besyə'əžine' liž Jeso'osən' de'en zo Capernaunnə', na' lao bazjanite'e liže'ena' gože' lega'aque': —ǀBi porən' chacyožle tnezən'?

³⁴ Nach disipl che' ca' bito bosyo'oži'e xtiže'ena', chedə' gwsa'acquene' zto' de'en gwsa'acyože' entr lega'aque' noe' naquə blaoch.

³⁵ Gocbe'i Jeso'osən' xbab chega'aque'ena' na' gwchi'e na' goxe' disipl che' ca' par gosə'əbigue'e laogüe'ena', na' gože' lega'aque': —Notə'ətezle šə chene'ele gacle beṇə' blaoch, cheyalə' gonle xbab che cunle de que bitobi zaquə'əle, na' cheyalə' gaquəlen ljuəžjle ca to mos.

³⁶ Nach goxe' to bidao' na' bzeche'ebo' laoga'aque'ena' nach gwlene'ebo', gože' lega'aque':

³⁷ —Šə chonle güen len bidao' nga o nota'ətezachlə bidao' laogüe de'en chaquele chia', choncze güen len nada'anə'. Na' catə' chonle güen len nada', leczə choncze güen len Diozən' ben' bselə' nada'.

Ben' cui chon contr chio'o txenczən' chone' len chio'o

³⁸ Nach Juannə' gože'ene': —Maestr, babežagto' to beṇə' cho'e la'onə' par chebeje' de'e xio' de'en yo'o yaz yichjla'aždao' beṇə' na' bžonto' gone' ca' chedə' bito chone' txen len chio'o.

³⁹ Nach Jeso'osən' gože'ene': —Bito gwžonle gone' ca', chedə' notə'ətezə beṇə' cho'e la'anə' par gone' to miłagr, bito gaquə bi əne' contr nada'.

⁴⁰ Šə to beṇə' cui chone' contr chio'o, txenczən' chone' len chio'o.

⁴¹ Na' notə'ətezə beṇə' gaqulen le'e laogüe de'en naole nada' la'anə' tbaszə nis gonē' ye'ejle, be'enə' gon ca' de'e liczə gona' ca soe' mbalaz catə' yežine' yoban'.

Bito cheyalə' goncho ca əxopə beṇə' yoblə gone' de'e mal

⁴² Probhguazə ben' gon par niç əxopə to beṇə' chonlilažə' nada' gone' de'e mal, la'anə'əczə ben' əxopən' cuitec bi zaque' par len beṇəčan'. Nca'alə xneze žalə' yoso'oçheje' yen ben' chon ca' to yej yišə' na' žžəsə'əzalə'ene' lo'o nisdə'onə' par gate' cle ca soe' gone' ca əxopəch beṇə' so'one' de'e malən'.

⁴³ Šə de'en chonle len na'alənə' chonən par niç əxople gonle de'e malən', güençhlə žalə' əchog na'alən' cle ca əxople gonle de'e malən'. Nca'alə xneze nacle beṇə' na' chog yežinle lao Diozən' na' əbanle zejlicane cle ca cuiayi'ilenlen txen lao yi' gabilən' de'en cui chyol.

⁴⁴ Zejllicane yesə'əžaglaochgua beṇə' ca' yesyə'əžin lao yi' gabilən' chedə' cuat yol yi'inə'.

⁴⁵ Na' šə de'en chonle len ni'alənə' chonən par niç əxople gonle de'e malən', güençhlə žalə' əchog ni'alən' cle ca əxople gonle de'e malən'. Nca'alə xneze yežinle lao Diozən' nacle beṇə' coj na' əbanle zejlicane cle ca cuiayi'ilenlen txen lao yi' gabilən' de'en cui chyol.

⁴⁶ Zejllicanen' yesə'əžaglaochgua beṇə' ca' yesyə'əžin lao yi' gabilən' chedə' cuat yol yi'inə'.

⁴⁷ Na' šə de'en chle'ile len jelaolen' chonən par niç əxople gonle de'e malən' yejni'alə žalə' cuejlen, chedə' nca'alə xneze nacle beṇə' lçhol yežinle yoban' gan' zo Diozən' chnabi'e na' əbanle zejlicane, cle ca cuiayi'ilenlen txen lao yi' gabilən'.

⁴⁸ Zejllicanen' yesə'əžaglaochgua beṇə' ca' yesyə'əžin lao yi' gabilən' chedə' cuat yol yi'inə'.

⁴⁹ Bxoz ca' chso'ose' zedə' lao xpela' bia ca' choso'ozeje' chso'elaogüe'e Diozən' par niç belə'an chaquan xi'ilažə'. Na' de'en chsi' Diozən' xneze chyi' chzaquə'əcho, chone' ca' par niç chaquəch yichjla'azdao' chio'o chonlilažə'əchone' xi'ilažə'.

⁵⁰ Nezecho de que zedə' naquan güen na' chonən par niç cui chbiayi' yid belə'an, pero šə zedə'an bitoch bi zxi' naquan, bitoch bi zaquə'an na' bito gaquə goncho ca yeyaquan zxi' de'e yoblə. Na' par niç gacle ca zedə' de'en naquə zxi' cheyalə' gacle beṇə' la'azdao' xi'ilažə', na' so cuezle binlo len ljuəžjle.

10

Bito yela'acho be'en checho o no'ol checho par solencho beṇə' yoblə

¹ Jeso'osan' len disipl che' ca' besa'aque' Capernaunnə' na' ja'aque' yež ca' zjəchi' gan' mbane Jodean' na' yež ca' zjəchi' yešla'alə yao Jordannə'. Na' besa'əžag beṇə' zan gan' zoe'enə', na' de'e yoblə bzejni'ine' lega'aque' con can' chzejni'iczene' lega'aque'.

² Nach balə beṇə' fariseo ca' gosa'əbigue'e gan' zo Jeso'osan' par niç yesə'əbejene' dižə' de'e yesə'əchine' contr le', na' gosa'əṇabene' le' šə de'lsens par beṇə' nšagna' yele'e xo'ole'.

³ Jeso'osan' gože' lega'aque': —čNaquan' nyoj lei de'en bzoj de'e Moizezən'? čBin' bene' mendar gonle'?

⁴ Nach beṇə' fariseo ca' gwse'e Jeso'osan': —De'e Moizezən' be'e latjə əgwcos ben' nšagna'ana' to act ga güe'en dižə' de que besyə'əle'ena', nach cuejyichje' no'ol che'ena'.

⁵ Jeso'osan' gože' lega'aque': —De'e Moizezən' be'e latjə yela'a no'ol chele chedə' nacle beṇə' yichjla'azdao' žod.

⁶ Bablabczle can' nyoj Xtizə' Diozən' nan de que catə'an gwxe yežlyon' Diozən' bene' beṇəčan' beṇə' byo na' no'ola.

⁷ Na' lecəzə nan: “Beṇə' byonə' le'e xaxne'e par əgwšagne'e si'e to no'ola.

⁸ Nach beṇə' ca' yoso'ošagna'ana' əsa'aque' tozə.” De'e na'anə' bitoch əsa'aque' çhopə beṇə', sino que əsa'aque' tozə beṇə'.

⁹ De'e na'anə' notono cheyalə' yola'a lega'aque' la' Dioz nan' banone' lega'aque' tozə beṇə'.

¹⁰ Na' catə' Jeso'osan' len disipl che' ca' besyə'əžine' yo'o gan' gosa'ənitə' disipl che' ca' gosa'əṇabene' le' bi zejen de'en gože' beṇə' fariseo ca'.

¹¹ Na' Jeso'osan' gože' lega'aque': —Notə'ətezə beṇə' chela'a no'ol che'ena' par yeque'e no'olə yoblə tozəczə ca malən' chone' len de'en chon beṇə' chgo'o xtoi.

¹² Na' notə'ətezə no'olə yele'e be'en che'ena' par yeque'e beṇə' yoblə, lecəzə tozəczə ca malən' chon no'olan' len de'en chon beṇə' chgo'o xtoi.

Jeso'osan' bene' orasyon par bidao' ca'

¹³ Na' ja'ac beṇə' əjsə'e bidao' lao Jeso'osan' par niç əxoə ne'enə' yichjga'acbo' na' gone' orasyon chega'acbo'. Pero disipl che' ca' gosa'ədile' beṇə' ca' zjsə' bidao' ca'.

¹⁴ Catə' ble'i Jeso'osan' can' chso'on disipl che' ca', bže'e nach gože' lega'aque': —Le'e güe' latjə la'ac bidao' ca' laogua' nga, na' cui əgwžonle. Na' əchnia' le'e, beṇə' ca' choso'ozexjw yichjga'aque' lao Diozən' ca' bidao' ca' choso'ozexjw yichjga'acbo' lao xaxna'aga'acbo' lega'acze'ena' chso'e latjə chnabia' Diozən' lega'aque'.

¹⁵ Bidao' ca' bito chso'on cuinga'acbo' xen, na' de'e li chnia' le'e, nota'atezle šə cui yeyacle ca bidao' par güe'ele latjə nabia' Diozən' le'e, bito gaquə yežinle yoban' gan' zo Diozən' chnabi'e.

¹⁶ Nach Jeso'osən' gwłene' bidao' ca' na' gwᵛxoə ne'enə' yichjga'acbo'onə', na' bene' orasyon par lega'acbo'.

Beᵛə' güego' ben' goquə beᵛə' gwni'a be'elene' Jeso'osən' dižə'

¹⁷ Na' ze'e yesa'aque' latjən' to beᵛə' güego' gwsa'adoe' bžine' gan' zo Jeso'osən' na' bzo xibe'en lao Jeso'osən'. Na' gože'ene': —Maestr, le' naco' beᵛə' güen, gwna nada' bi de'en cheyałə' gona' par gatə' yelə' mban zejlicane chia'.

¹⁸ Na' par nich gonch be'enə' xbab che de'en gwne', Jeso'osən' gože'ene': —¿Bixchen' nao' de que beᵛə' güen nada'? Dioz nan' naque' le'ezelaogüe beᵛə' güen.

¹⁹ Nezdə' bin' na lein': "Cui co'o xtole, na' cui cuejyichjle be'en chele o no'ol chele par solenle beᵛə' yoblə; cui gotle beᵛə'; cui cuanle; bito gacle testigw fałs contr sa'aljuežjle; bito xoayagle sa'aljuežj beᵛə'chle; legwnežjo yelə' bala'an ᵛaxna'ale."

²⁰ Nach beᵛə' güegon' gože' Jeso'osən': —Maestr, yogua'əłəł de'e ca' chzenaga' chei dezd xcuidə'ətia'.

²¹ Jeso'osən' bgüie' be'enə' na' goquene' che' na' gože'ene': —Tozə de'en ne'e chac fałt gono'. Jəyeyetə' yogua'əłəł de'en de chio', na' mech de'en le'ido' che de'e ca' bnežjon beᵛə' yašə'. Nach da denao nada' la'anə'əczə šə gonclən byen gato' to le'e yag coroz. Na' catə' yežino' yoban' gan' zo Diozən', so' mbalaz.

²² Pero na' beᵛə' güegon' beyož gož Jeso'osən' le' ca', lechguale trist gwzoe' chedə' la' to beᵛə' gwni'achguan' naque', na' beza'achoe' trist.

²³ Nach Jeso'osən' bgüie' beᵛə' güegon', na' gože' disipl che' ca': —Zdebəchgua naquən par to beᵛə' gwni'a güe'ele latjə nabia' Diozən' le'.

²⁴ Na' besyə'əbanchgüei disipl che' ca' can' gože' lega'aque' che beᵛə' gwni'anə', nach de'e yoblə goze'e Jeso'osən' lega'aque': —Xi'indaogua'a, de'e li šə to beᵛə' zoe' lez gaquəlen yelə' gwni'a che'enə' le' zdebəchgua naquən par žjəyēzoe' yoban' gan' zo Diozən' chnabi'e.

²⁵ Zdebəchlə naquən che to beᵛə' gwni'anə' güe'ele latjə nabia' Diozən' le' cle ca' to camey teb to lo'o nag yešə'.

²⁶ Nach disipl che' ca' catə' gwse'enene' xtiže'enə' besyə'əbanchgüeine' na' gwse' ljuēžjga'aque': —Notono gaquə yechoj xni'a de'e malən' šə ca'.

²⁷ Jeso'osən' bosgüie' lega'aque' na' gože'e: —Beᵛə'chən' bito gaquə so'one' ca' yesyə'əchoje' xni'a de'e malən', pero Diozən' gaquə yebeje' beᵛə' xni'a de'e malən'. Diozən' chac chone' bitə'ətezə.

²⁸ Nach Bedən' gože' Jeso'osən': —Xanto', neto' bagwlejyichjto' family cheto' ca' na' len yogua'əłəł de'en deito' par chonliłažə'əto' le' na' chzenagto' chio'.

²⁹ Nach gož Jeso'osən' lega'aque': —De'e li əchmia', šə nole bagwlejyichjle' ližle, beᵛə' bišə'əle, beᵛə' zanle, ᵛaxna'ale, xo'olle, xi'inle, o yežlyo chele chedə' chzenagle chia' na' chedə' chejle'ele che dižə' güen dižə' cobə' chia'anə',

³⁰ Diozən' gone' le'e de'e zaquə'əche lao yežlyo nga clezə ca beᵛə' ca' na' de'e ca' gwlejyichjlen'. Na' leczə gon Diozən' par nich əbanle zejlicane. Gone' le'e de'e ca' la'anə'əczə lao yežlyo nga de de'e zan de'e chi' saquə'əle.

³¹ Beᵛə' zan zjənaquə beᵛə' blao na'a pero gwžin ža catə' cuich əsa'aque' beᵛə' blao. Na' beᵛə' zan beᵛə' cui zjənaquə beᵛə' blao na'a, pero gwžin ža catə' əsa'aque' beᵛə' blao.

De'e yoblə gosyixjue'e Jeso'osən' de que gate'

³² Nach Jeso'osən' na' zan disipl che' ca' ja'aque' Jerosalenna'. Na' lao žjəngüe'e nezən' Jeso'osən' gwžialaogüe' laoga'aque'enə', na' besyə'əbanchgüei disipl che' ca' de'en šeje' Jerosalenna' gan' nita' beᵛə' ca' chse'ene so'ot le'. Na' do chesə'əžebze' jəsə'ənaogüe'ene'. Nach partlə gwlej Jeso'osən' disipl che' ca' šižin na' gwzolaogüe' be'elene' lega'aque' dižə' che de'e ca' gaquə che'.

³³ Na' gože' lega'aque': —Diozən' bsele'e nada' golja' beᵛə'ch, na' na'a šejcho Jerosalenna' gan' gaca' lao na' beᵛə' gwᵛnabia' che bᵛoz ca' na' lao na' beᵛə' ca' choso'osed choso'olo'i lein'. Yesə'əchoglaogüe'en chia' de que cheyałə' gata', na' leczə so'one' nada' lao na' beᵛə' ca' cui zjənaquə beᵛə' Izrael.

³⁴ Na' so'one' nada' borl na' soe' nada' golp na' yoso'əza' xene'e cho'alaogua'anə'. Nach so'ote' nada', pero yeyon ža yebana' ladjo beᵛə' guat ca'.

Jacobən' na' Juannə' gosə'ənabe' yesə'əbi'e cui Jeso'osən' gan' nabi'enə'

³⁵ Nach xi'in Sebedeon' Jacobən' len Juannə' gosə'əbigue'e lao Jeso'osən'. Na' gwse'ene': —Xanto', zedəᵛabeto' le' to goclen.

³⁶ Nach Jeso'osən' gože' lega'aque': —¿Bi goclenᵛə' chene'ele gona'?

³⁷ Nach gwse'ene': —Chene'eto' gono' par nich cue'eto' cuito'onə' šla'a güeja catə'an əžin ža nabi'o nasyon chechonə'.

³⁸ Nach Jeso'osan' gože' lega'aque': —Bito chache'ile bi de'en chnabele nada'. ĆEgwaquə saquə'əzi'ile can' saquə'əzi'anə'? ĆEgwzoile gaquə chele can' gaquə čhia'anə'?

³⁹ Nach bosyo'oži'e xtiže'ena' gwse'ene': —Gwzoito'.

Jeso'osan' gože' lega'aque': —De'e liczə čhi' saquə'əle can' čhi' saca'anə', na' de'e liczə gaquə chele can' gaquə čhia'anə'.

⁴⁰ Pero bito naquən par ənia' nada' non' cue' cuitan' catə'an əžin ža nabi'anə'. Xa' Diozən' bagwleje' beṇə' yesə'əbe' cuita'anə'.

⁴¹ Nach disipl ca' yeši, catə' gwse'enene' de'en gwse' Jacobən' na' Juanṇə' le', besə'əže'e lega'aque'.

⁴² Pero Jeso'osan' goxe' yogue'e par nich gosə'əbigue'e laogüe'enə', na' gože' lega'aque': —Nezele nita' beṇə' gwnabia' na' beṇə' blaō che to to nasyon, na' la fuers chesə'anabi'e beṇə' ca' nita' xni'aga'aque'enə'.

⁴³ Pero caguə can' cheyaḷə' gonle. Šə no le'e chene'ele gacle beṇə' blaō, cheyaḷə' əgwzəxjw yichjle na' gaquəlenle ljuəžjle.

⁴⁴ Na' šə no le'e chene'ele gaquəchle blaōch ca beṇə' ljuəžjle ca', caguə can' cheyaḷə' gonle sino que cheyaḷə' gon cuiṇle ca xmos beṇə' ca' yela'.

⁴⁵ Diozən' bsele'e nada' golja' beṇəch, na' caguə bida' par nich beṇəchən' əsa'aclene' nada', sino que bida' par gaquəlena' beṇəchən, na' par əgwnežjo cuina' čhixjua' xtoḷə' yoguə'əloḷ beṇəchən' catə'an so'ote' nada'.

Jeso'osan' beyone' to beṇə' lchoḷ le Bartimeo

⁴⁶ Jeso'osan' len disipl che' ca' na' len beṇə' zan ca' jəsə'ənao Jeso'osan' besə'əžine' syoda Jericon'. Na' catə' besə'aque' syodan' to beṇə' lchoḷ le Bartimeo, xi'in to beṇə' le' Timeo, čhi'e cho'a nezən' chnabe' carida.

⁴⁷ Na' catə' bene Bartimeon' de que Jeso'osan' be'ena' naquə beṇə' Nasaretan' bazon əžine' gan' čhi'enə', nach gwzolao gwṇə' zižjo gwne': —Jeso'os, len' naco' xi'in dia che de'e Rei Dabin'. Beyašə'əlažə'əšguei nada'.

⁴⁸ Beṇə' zan gosə'ədile' beṇə' lchoḷən' par nich zoe' žizə, pero nachlə gwṇə' zižjochlə gwne': —Jeso'os, len' naco' xi'in dia che de'e Rei Dabin'. Beyašə'əlažə'əšguei nada'.

⁴⁹ Nach Jeso'osan' gwleze' na' gože' beṇə' ca' zjəsə'ənao le': —Le'e gax be'ena'.

Nach gwsa'axe' beṇə' lchoḷən' par bigue'e lao Jeso'osan', na' gwse'ene': —Bebē, gwzecha čhedə' chaxe' le'.

⁵⁰ Nach beṇə' lchoḷən' bzala' xadon che'enə' na' bxite'e bgüigue'e lao Jeso'osan'.

⁵¹ Jeso'osan' gože'ene': —ĆBin' che'endo' gona' len le'?

Nach beṇə' lchoḷən' gože' Jeso'osan': —Xana', benšga par nich yele'ida'.

⁵² Jeso'osan' gože'ene': —Guaquə yeyejo'. De'en chonḷilažə'o nada' bačh goc can' che'endo'onə'.

Na' le'e bele'itei be'ena' na' gwnaogüe' Jeso'osan' lao zja'aque' Jerosalennə'.

11

Gwso'elaogüe'e Jeso'osan' cata' beyo'e Jerosalennə'

¹ Jeso'osan' len disipl che' ca' na' len beṇə' ca' zjəsə'ənao lega'aque' besə'əžine' galə'əzə Jerosalennə'. Na' galə'əzə Jerosalennə' zjəchi' čhopə yež, ton Betfage na' yeton Betania. Zjəchi'in frent to ya'a de'en nzi' Ya'a Olibos. Nach Jeso'osan' gwleje' čhopə disipl che' ca'.

² Na' gože' lega'aque': —Le'e žja'ac yež dao' de'en čhi' delant, na' catə' šo'ole lao' yežən', le'ile to borra dao' bia cui noṇə' cuia da'ab yag. Na' əsežleb na' əche'eleb ngala'.

³ Na' šə no nabe le'e bixchen' chsežleb, na' ye'elene' de que nada' Xanle chyažjda'ab, na' de que lğüegwza žjəyesana'ab.

⁴ Nach beṇə' ca' bseḷə' Jeso'osan' gwsa'aque' zja'aque' na' lao zja'aque'enə' besə'əle'ine'eb da'ab yag cuit puert che to yo'o de'en zo cho'a nezən'. Nach bosə'oseže'eb.

⁵ Na' nita' baḷə beṇə' na' gwse'e disipl ca': —ĆBin' chonle? ĆBixchen' chsežle borra da'onə'?

⁶ Nach disipl ca' gwse'e beṇə' ca' can' gož Jeso'osan' lega'aque' yesə'əne', nach gwso'e latjə bosə'oseže'eb.

⁷ Nach gosə'əche'eb lao Jeso'osan', na' bosə'oḷəo xadon čhega'aquən' cožə'əbən', nach gwžia Jeso'osan' leb.

⁸ Na' lao nez gan' zde'enə' beṇə' zan gwso'elaogüe'ene' na' bosə'ošiljue' xaga'aque'enə' gan' zde' žie' borra'n na' yebaḷə' gosə'əchogue' xozə' yag de'en ze tcho'a nezən', na' bosə'anite'en lao nezən'.

⁹ Na' beṇə' zan gosə'əbɪalao lao Jeso'osən' na' leczə beṇə' zan jəsə'ənao le'. Nach yogue'e gosə'əgüe'e be' lban che' gosə'əne': —Sošgo' mbalaz le' za'o nga, babselə' Xancho Diozən' le'. Goclenšga neto'.

¹⁰ Catec mba gaquə checho de'en baza' ben' nabia' chio'o can' gwnabia' de'e Rei Dabin' cana'. Lenczə le'e nita'əle gan' to Diozən' ledoye'ela'oche'.

¹¹ Ca' goquə bežin' Jeso'osən' Jerosalenna', na' leczə cata'ən gwyo'e yo'odao' əblaonə'. Na' beyož bgüie' yogua' de'en chac lo'o yo'odao' əblaonə' besa'aque' len disipl che' ca' šižin' na' ja'aque' Betanian', čhedə' bagol'.

Ben Jeso'osən' par nič bgüiž yag yixgüion'

¹² Ža beteyo cata' besa'aque' Betanian' par jəsyə'aque' Jerosalenna' de'e yoblə, gwdon Jeso'osən'.

¹³ Na' zita'ələ ble'ine' to yag yixgüio žia xlague'e. Na' gwyeje' jəgüie' šə žian yixgüion', pero bitobi bželene', con zlega xlague'e žia, čhedə' ca orən' bito naquə tyemp chei.

¹⁴ Nach Jeso'osən' gože' yag yixgüion': —Caṇeque cuich bi frot cui'o'.

Na' gwse'encze disipl che' ca' can' gwne'enə'.

Jeso'osən' bebeje' beṇə' ca' chso'on ya'a chyo'o yo'odao' əblao che beṇə' Izrael ca'

¹⁵ Gwde na' besə'əžine' Jerosalenna' na' cata' gwyo'o Jeso'osən' chyo'o yo'odao' əblaonə' gwzolaogüe' bebeje' yogua'əloj beṇə' ca' chso'on ya'a chyo'onə'. Nach gwlo'oni'ane'e mes che beṇə' ca' choso'osa' mech, na' leczə ca' bene' len yag siy che beṇə' ca' əgwso'ota' ngolbexə.

¹⁶ Na' Jeso'osən' bito be'e latjə par yesə'əde notə'ətezə beṇə' chyo'o yo'odao' əblaonə' šə žjənoe' yoa'.

¹⁷ Nach bzejni'ine' lega'aque', gože': —Nyojczə Xtizə' Diozən' gan' nan: “Che'enda' yesə'əna beṇə' de que liža'an naquən to latjə gan' so'on beṇə' orasyon beṇə' ža' yogua' nasyon ca'.” Pero na' le'e babenlen ca to latjə gan' ža' beṇə' bguan.

¹⁸ Na' beṇə' gwnabia' che bžoz ca' na' leczə beṇə' ca' choso'osed choso'olo'i lei de'en bzoj de'e Moizežan' gwse'enene' can' be' Jeso'osən' dižə'ənə' na' besyə'əyiljlaže'e naclə so'one' par əso'ote'ene'. Besə'əžebe' cuich yoso'ozenag beṇə' chega'aque' čhedə' yogua'əte beṇə' bosə'ozenague' xtiže'enə' na' besyə'əbanene' ca güenna' bzejni'ine' lega'aque'.

¹⁹ Na' cata' bazon gal' Jeso'osən' len disipl che' ca' besa'aque' syodan' na' jəsyə'əga'ane' Betanian'.

Bgüiž yag yixgüion'

²⁰ Žil beteyo besa'aque' Betanian' par jəya'aque' Jerosalenna' besyə'ədie' gan' zo yag yixgüion' de'en əgwnablažə' Jeso'osən' əbiž. Na' besə'əle'i disipl che' ca' babgüiž do loi.

²¹ Nach Bedən' jsa'alazə'e can' goquən' na' gože' Jeso'osən': —Xana', bgüiašč yag yixgüion' de'en əgwnablažo'o əbiž neje babgüižən.

²² Jeso'osən' gože'ene': —Le'e gonlilažə' Diozən' na' gaquə can' ənabelene'.

²³ De'e li əchnia' le'e, šə do yičhj do lažə'əle chonlilažə'əle Diozən' guaquə ye'ele ya'a nga: “Boša' xišna'onə' na' jəyeyzo' lo'o nisda'onə'”, na' gaquə can' chonle mendadən' de'en chejle'ele sin cui chac čop lažə'əle.

²⁴ De'e na'anə' chnia' le'e de que bitə'ətezə de'en chnabele Diozən' cata'ən chonle orasyonə', šə chejle'ele de que gone' can' chnabelene'enə' na' guaquəczən'.

²⁵ Na' cata' solao gonle orasyonə', šə yosa'alazə'əle bi de'en baben to beṇə' contr le'e, leyze'i'ixen che', par nič leczə Xacho Diozən' ben' zo yoban' yezi'ixene' xtolə'əlen'.

²⁶ Pero šə le'e bito chezi'ixenle che sa'aljuežj beṇə'chlen' leczə ca' Xacho Diozən' ben' zo yoban' bito yezi'ixene' xtolə'əlenə'.

Yelə' gwnabia' che Jeso'osən'

²⁷ Na' besyə'əžine' Jerosalenna' de'e yoblə. Na' cata' balažə' Jeso'osən' chyo'o yo'odao' əblaonə', ben' naquəch bžoz əblaoch na' beṇə' ca' choso'osed choso'olo'i lein', na' len beṇə' golə blao che neto' beṇə' Izrael gosə'əbigue'e lao Jeso'osən'.

²⁸ Na' gwse'ene': —Žnac goquən' gwxi'o yelə' gwnabi'anə', na' non' beṇ le' yelə' gwnabia'anə' par gono' de'e ca' chono'?

²⁹ Jeso'osən' boži'e xtižə'əga'aque'enə' gože': —Leczə de to de'e nabda' le'e. Šə gwnale nada' de'en nabda' le'e nach ənia' le'e non' beṇ nada' yelə' gwnabia' par gona' de'e ca' chona'.

³⁰ Leṇəšč nada': žnon' bselə' de' gojunnə' bide' bčhoe' beṇə' nis? žDioz nan' bsele'ene' o šə beṇə' yoblən'?

³¹ Nach bosə'oxi'e entr lega'aque' gosə'əne': —Šə ye'echone' de que Dioz nan' bsele'e de'e Juanna' par bčhoe' beṇə' nis, na' ye'e chio'o: “žBixčhexan' bito gwyejele'ele che'?”

³² Na' nic gac ye'echone' de que beṇə' yoblən' əbselə' de'e Juanna'.

Gosa'əne' ca' čhedə' besə'əžebe' bi so'on beṇə' ca' žžənžaguən', la' yogue'e gwse'ejle'e de que de'e liczə Diozən' bsele'e de'e Juanna' par be'e xtiže'enə'.

³³ De'e na'anə' gwse'e Jeso'osən': —Bito nezeto' non' bselə' de'e Juannə'.

Nach gož Jeso'osən' lega'aque': —Leczə ca' nada' bito ənia' non' beṇ nada' yeḷə' gwnabia'ana' par gona' de'e ca' chona'.

12

Jempl che mos mal ca'

¹ Nach Jeso'osən' gwzolao be'e jempl nga bzejni'ine' lega'aque' de que nota'atezə beṇə' šə chso'onczə yichjlaoga'aque' cui choso'ozenague' che' yesə'əbi'ayi'e. Na' gwne': —To beṇə' goze' zan yag obasən' yežlyo che'enə'. Na' gwlo'e le'ej doxenən. Na' na'atezə bene' to tanc gan' boso'osi'e obasən' par bchoj xisein'. Na' leczə bene' to campnary gan' yesə'əcua'a beṇə' əsa'ape' güertən'. Nach bene' güertən' lao na' beṇə' par bosə'əgüia boso'oye'en, na' gwde na' gwze'e gwyeje' zita'.

² Catə' bžin tyemp par yosyo'otobe' cwsešən', bselə'e to mos che' par žjəyexi'e to tlacw cwsešən' de'en cheyalə' yezi'e.

³ Pero na' beṇə' ca' chsa'apə yag obas che'enə' boso'onize' mosən', na' gosə'əyine'ene' nach bosyo'ose'ene' sin cui bi bi bosyo'onežjue'ene'.

⁴ Nach xan yag obasən' bselə'e yeto mosən', na' beṇə' ca' boso'ošize'ene' yej, na' gwso'one' güe' yichje'ena' na' boso'ožia boso'onite'ene'.

⁵ Nach bosseḷə' xan yag obasən' yeto mosən', na' beṇə' ca' chsa'apə yag obasən' gwso'ote' le'. Na' gwdechlə xan yag obasən' bosseḷe'e mos zanch na' beṇə' ca' chsa'apə yag obasən' gosə'əyine' balə' na' yebalə' gwso'ote'.

⁶ Na' zo xi'in tlišə' xan yag obasən', na' chacchgüine' che'. Nach le'ezelaogüie bselə'e le'. Lo'o yichjla'aždaogüie'ena' goquene': “Gwsa'apəlje' xi'inan' respet yosyo'onežjue'ebo' cwsešən'.”

⁷ Pero na' beṇə' ca' chsa'apə güertən' catə' besə'əle'ine' xi'inə'ena' nach gwse' ljuěžjga'aque': “Bengan' xi'in xan yag obasən', na' le'ena' yega'aṇ len bienṇə'. Leda gotchone' par nič yega'aṇlencho bien che xə'enə'.”

⁸ Nach bosyo'onize'ene', gwso'ote'ene', na' besyə'əbeje' cuerp che'enə' fuerlə güertən'.

⁹ Beyož be' Jeso'osən' jempl nga, gože' beṇə' ca' ža'ana': —čNac chactgüieile gon xan güertən' len beṇə' ca'? Žjəyeni'tlaogüie' lega'aque', na' yegüie'e yaguən' lao na' beṇə' yoblə.

¹⁰ čEcabinə' šejni'ile bi zejen de'en nyoj Xtizə' Diozən' gan' nan:

Yej de'en cui gwso'olazə' mues güen yo'o ca', lenṇə' banaquən yej šaban.

¹¹ Xancho Diozən' babzoe' yejən' gan' cheyalə' son na' de'e zaquə' yebanecho can' bene'ena'.

¹² Nach beṇə' fariseo ca' na' beṇə' ca' choso'osed choso'olo'i lein' len beṇə' golə' blao ca' gwse'enene' yesə'əzene' Jeso'osən' chedə' gwse'ejni'ine' de que Jeso'osən' be'e jempl nga contr lega'aque' por ni che de'en cui chse'ejle' che'. Pero bito bi gwso'one' chedə' besə'əzebe' bi so'on beṇə' ca' ža'ana'. De'e na'ana' con besa'aque' gan' zo Jeso'osən'.

Gosə'əṇabene' Jeso'osən' šə yesə'əyixjue' impuest che gobiernən'

¹³ Na' gwde de'e ca' bosyo'osele'e balə' beṇə' fariseo ca' len yebalə' beṇə' ca' chso'on txcen len Erodən' lao Jeso'osən' par yesə'əbe'enaogüie' əchoj dižə' cho'enə' de'en yesə'əchine' par əsa'ogüie' xya contr le' lao beṇə' gwnabia' che gobiernən'.

¹⁴ Nach catə' besə'əžin beṇə' can' lao Jeso'osən' na' gwse'ene': —Maestr, nezeto' de que cho'o dižə' li na' bito chžebo' bin' yesə'əna beṇə' yoblə, chedə' bito chono' cuent che beṇə' šə naque' blao o šə bito naque'. Nezeto' can' chsed chlo'ido' beṇə' de'en chene'e Diozən' goncho naquən dižə' li. De'e na'ana' zedenabeto' le' par əṇao' neto' naquən' cheyalə' gonto'. čEnaquən güen chixjwto' impuest che gobiernən' roman' o šə bito cheyalə' chixjwto'on?

¹⁵ Jeso'osən' le'e goche'iteine' cagua do lažə'əga'aque'ena'. Con chse'enene' ye'e lega'aque' to de'e yesə'əchine' contr le'. Nach gože' lega'aque': —čBixchen' chene'ele cuejle nada' dižə' de'e əgwchinle' contr nada'? Le'e gwlo'i nada' to xmechlen'.

¹⁶ Nach bosyo'olo'ine' le' ton na' catə' ble'i Jeso'osən' len gože' lega'aque': —čNo diboj cheinə' da' laogüenṇə', na' no lein' nyoj laogüenṇə'?

Nach gwse'ene': —Čhe Rei Sesar na'ana'.

¹⁷ Jeso'osən' gože' lega'aque': —Le'e əgwnežjo Sesarən' de'en naquə che' ža, na' le'e gwnežjo Diozən' de'en cheyalə' əgwnežjwlene'.

Nach beṇə' ca' catə' gwse'enene' xtižə' Jeso'osən' besyə'əbanene' can' gože' lega'aque'.

Gosə'əṇabe' naquən' yesyə'əban beṇə' guat ca'

¹⁸ Na' leczə besə'əžin balə' beṇə' sadoseo ca' lao Jeso'osən'. Na' beṇə' sadoseo ca' choso'osed choso'olo'ine' de que bito yesyə'əban beṇə' guat ca'. Nach gosə'əṇabene' Jeso'osən' gwse'ene':

¹⁹ —Maestr, de'e Moizezən' bzoje' de que šə to beṇə' byo beṇə' nšagna' gate' na' yega'aṇ no'ol che'enə' sin cui no xi'inə' gwzo, beṇə' bišə' be'enə' bagotən' cheyalə' yequ'e no'olana' par nič ničə' xi'in dia che de'e beṇə' biše'ena'.

²⁰ Na' goquən' gwnitə' gažə bišə'əga'aque', na' beṇə' nechən' bšagne'e na' catə' gote' notono xi'ine' gwzo.

²¹ Na' beṇə' biše'e əgwchopen' beque'e no'olən', na' lecəzə got beṇə' əgwchopen' na' notono xi'ine' gwzo. Nach le'egateza ca' goqua len beṇə' biše'e əgwyonən'.

²² Nach lecəzə ca' goqua len bišə'əga'aque' ca' yelə' xte besyə'əyatega'aque' besyə'əque'e no'olən' na' besyə'əyatega'aque' gwsa'at na' notoczə no xi'inga'aque' gwnitə'. Na' gwde gwsa'at beṇə' ca' lecəzə got no'olən'.

²³ Na' catə' yesyə'əban beṇə' guat ca', ζnoe' entr beṇə' ca' gažə gaqua be'en che no'olən'? La' yogue'en bosyo'ošagna'alene' le'.

²⁴ Na' Jeso'osən' gože' lega'aque': —Bito chonle xbab šao', la' bito nezele naquən' nyoj Xtižə' Diozən', na' nic nezele naquən' naquə yelə' guac che Diozən'.

²⁵ Catə'an yesyə'əban beṇə' guat ca' bito gachia' šə zoso'ošagne'e o šə cui. Na' cana' cagua no yosyo'ošagna'ach. Lebze əsa'aque' len angl che Diozən' beṇə' ca' nitə' yoban'.

²⁶ Na' ca' naquən' chaquele bito yesyə'əban beṇə' guat ca', ζəbito za'alažə'əle can' nyoj Xtižə' Diozən' de'en bzoj de'e Moisezən' can' gož Diozən' le'. Moisezən' ble'ine' to yi' bel de'e chdoljən to lo'o xis yesə'. Na' gož Diozən' de'e Moisezən': “Nada' naca' Dioz che de'e xaxta'ole Abraanə', na' Dioz che de'e xaxta'ole Isaaquən', na' Dioz che de'e xaxta'ole Jacobən'.”

²⁷ Na' nezecho beṇə' ca' nite' len Diozən' chedə' Diozən' bito naque' Dioz che beṇə' guat, sino naque' Dioz che beṇə' ca' zjamban. De'e na'anə' lechgualə cledən' chejni'ile na' chsed chlo'ile Xtižə' Diozən' cledə.

De'en naquə de'e blaoch de'en non Diozən' mendad goncho

²⁸ Nach bžin to beṇə' chsed chlo'i lei de'en bzoj de'e Moisezən' lao Jeso'osən', chedə' benene' rson can' gwsa'acyožə beṇə' ca' Jeso'osən' na' gwnezene' de que binlo boži' Jeso'osən' xtižə'əga'aque'enə'. Nach gože' Jeso'osən': —Maestr, lao lei che Diozən' ζnon' de'en none' mendad goncho naquən de'e blaoch?

²⁹ Jeso'osən' gože'ene': —De'en naquə de'e žialaoch lao de'e ca' none' mendad goncho nan: “Le'e gwzenag le'e beṇə' Izrael. Toza Xancho Diozən' zaque'e par güe'ela'ochə.

³⁰ De'e na'anə' cheyalə' gaquecho che Xancho Diozən' do yichj do lažə'əcho, do fuers balor checho”, lennə' naquən de'e žialaoch.

³¹ Na' de'e əgwchopen' lebze nan len de'e nechən': “Cheyalə' gaquecho che sa'aljuežjcho catg chaquecho che cuincho.” Bito bi de de'en non Diozən' mendad goncho de'en naquəch de'e žialaoch ca de'e ca' čopə.

³² Nach be'enə' chsed chlo'i lein' gože' Jeso'osən': —De'e güen can' nao' maestr. Naquən de'e li can' nao'onə' de que tozə Diozən' zo be'enə' zaquə' par güe'ela'ochə.

³³ Na' cheyalə' gaquecho che Diozən' do yichj do lažə'əcho do fuers balor checho. Na' lecəzə cheyalə' gaquecho che sa'aljuežj benačcho catg chaquecho che cuincho. Na' de'e li zaquə'əchən goncho can' na de'e ca' non Diozən' mendad goncho cle ca gotcho bia yixə' na' gwzeychob par güe'ela'ochone'. Zaquə'əchən cle ca' bitə'ətezəchlə de'e chnežjwcho Diozən' cho'ela'ochone'.

³⁴ Jeso'osən' gocbe'ine' boži'i be'enə' xtiže'en len dižə' sin', nach gož Jeso'osən' le': —Bazon go'o latjə nabia' Diozən' le'.

Na' dezd ža na' bitoch no besyə'əyaxje bi de'e yesə'əṇabene' Jeso'osən'.

Cristən' naque' xi'in dia che de'e Rei Dabin'

³⁵ Na' lao ne'e chsed chlo'i Jeso'osən' beṇə' ca' ža' lo'o yo'oda'onə', gože' lega'aque': —ζBixčhen' chesə'əna beṇə' ca' choso'osed choso'olo'i lein' de que Cristən' naque' xi'in dia che de'e Rei Dabin'?

³⁶ Cuin de'e Dabin' bzoje' can' blo'i Spirit che Diozən' le' gan' nan:

Xancho Diozən' gože' Xana'an:

“Gwche'edo' cuita' nga nabi'əcho txen,

na' gona' par nič nita' de'e ca' chso'on contr le' na' beṇə' contr chio' ca' xni'onə'.”

³⁷ Na' de'en gwna de'e Dabin' de que Cristən' naque' Xane', ζəcabi zejen de que Cristən' naque' mazəchlə ca xi'in dia che' na'azən' ža?

Nach beṇə' zan ca' besyə'əbeine' bosə'ozenague' che'.

Xtola' beṇə' ca' choso'osed choso'olo'i lein'

³⁸ Na' Jeso'osən' lao bzejni'ine' beṇə' ca' gože' lega'aque': —Le'e gon xbab nič cui gonle can' chso'on beṇə' ca' choso'osed choso'olo'i lei de'en bzoj de'e Moisezən'. Lega'aque' chesyə'əbeine' chəsə'əlaže'e zjənyaze' lachə' tonə' na' chesyə'əbeine' catə' beṇə' chəsə'əguape' lega'aque' diox na' chəsə'ənopə'e na' aga'aque'ene' do lao lquey.

³⁹ Lega'aque' chse'enene' yesə'əbi'e gan' chəsə'əbe' beṇə' blao catə' chja'aque' yo'odao' na' catə' chac lni.

⁴⁰ Na' choso'oxoayague' no'olə gozeb ca' par nič no'ol ca' chəsə'ənežjue' lega'aque' ližga'aque'en len bichlə de'en de chega'aque'. Na' cata' chso'one' orasyonnə' chso'echgüe' dižə' par nič chəsə'əxoayague' beñə'. Mazəchlə castigw chega'aque' əgwnežjo Diozən' clezə ca che beñə' yeziquə'əchlə chedə' chso'one' de'e mal ca' zjənac ca' len zjənezene' can' na' lein'.

To no'olə gozebə be'e Diozən' xmeche'enə'

⁴¹ Na' goquan' to žlas cata' chi' Jeso'osən' lo'o yo'odao' əblaonə' gan' nitə' caj ca' gan' chgo'o xmech neto' beñə' Izrael par yo'odao' əblaonə'. Na' ble'ine' beñə' ca' catə' gosə'əgüe'e xmechga'aque'enə' lo'inə', na' leczə ble'ine' beñə' gwni'a ca' de'e scha'o mechan' gosə'əgüe'e.

⁴² Na' lao chgüie' beñə' ca', bžin to no'olə gozebə no'olə yašə' na' gwlo'e čhopə sentab dao' che'enə' lo'o cajan'.

⁴³ Nach Jeso'osən' goxe' disipl che' ca' na' gože' lega'aque': —De'e li əchnia' le'e, no'olə gozebən' naque' beñə' yašə', pero bagwlo'e de'e zaquə'əch lao Diozən' ca yoguə' beñə' ca' yela'.

⁴⁴ Lega'aque' gosə'əgo'o xmechga'aque' de'e checho'ənən lao yelə' gwni'a chega'aque'enə', pero no'olə nga lao yelə' yašə' yelə' zi' che'enə' bagwlo'e yoguə' ca ga de'e dao' de che'.

13

Jeso'osən' gwne' de que gwžin ža yosyo'ochinjə' yo'odao' əblaonə'

¹ Na' cata' beza' Jeso'osən' yo'odao' əblaonə', to disipl che'enə' gože'ene': —Xantə', bgüiašc catg xoche zjənone' yo'odao' əblao nga, na' catg xoche yej quinga zjənonene'en.

² Nach gož Jeso'osən' be'enə': —Chgüiale catec xoche naquə' yoguə' de'e ca'. Pero ca naquə' de'en chle'ile nga na'a, gwžin ža yosyo'ochinj beñə' doxenən na' notoch no'le'i lega'aquan.

De'en gaquə' cata'ən bazon baozə šo'o fin che yežlyon'

³ Na' ja'aque' ya'a Olibosən' de'en zo yešla'alə bdiñjən' ze frent yo'odao' əblaonə'. Na' cata' besə'əžine' lao ya'ana' gwche' Jeso'osən'. Nach Bedən', Jacobən', Juanñə' len Ndrešən' gosə'əbigue'e lao Jeso'osən' na' bgašə'əzə gwse'ene':

⁴ —Chene'eto' ənezeto' do batə'əquan' gaquə' de'e nga nao' nga. Na' žnac gaquə' gache'ito' cata' bazon baozə gaquə' can' na'onə'?

⁵ Jeso'osən' gože' lega'aque': —Le'e gapə cudad par nič notono əxoayag le'e.

⁶ Gwžin ža cata' zan beñə' goxoayag ša' lao yežlyo nga yesə'əne' de que zjənaque' Cristən' ben' gwlej Diozən' par gaquə'lene' le'e. Na' beñə' zan yesə'əxoayague'.

⁷ Pero na' le'e bito žebə cata' yenele dižə' de que chac gwđilə, o de que guaquə' gwđilə, chedə' can' cheyalə' gaquə'. Na' la'ana' əczə šəbachac ca' bitonə' əžin ža par šo'o fin che yežlyon'.

⁸ Ze'e əžin žan' yesyə'ədiłə yež contr yež, na' nasyon contr nasyon. Na' leczə zan yež de'e zjəchi' doxenlə yežlyon' xo'ochgua, na' gaquə' bgüin na' gaquə' bichlə de'en yesə'əzaquə'əzi'e. Na' te gaquə' de'e quinga ne'e za aquə'chczə de'en yesə'əzaglao beñə' ža' yežlyon'.

⁹ Na' ca naquə' le'e ža, cheyalə' ənezele de que beñə' contr chelen' so'one' le'e lao na' beñə' gwnabia' ca', na' yesə'əyine' le'e lo'o yo'odao' chega'aque' ca'. Yesə'əche'əxaxje' le'e do lao gobernador ca' na' do lao rei par əsa'ogüe' xya contr le'e de'en chonlilažə'əle nada'. Can' gaquə' güe'ele xtižə'anə' lao beñə' gwnabia' ca'.

¹⁰ Na' leczə ze'e əžin žan' šo'o fin che yežlyon', žja'ac beñə' doxen lao yežlyon' yesə'əyixjui'e dižə' güen dižə' cobə de'en chzejni'in chia' len beñə' ca' ža' yoguə' nasyon.

¹¹ Na' cata' no yesə'əche'əxaxje' le'e lao beñə' gwnabia' ca' bito cue' yichjle nac yoži'ile xtižə'əga'aque'enə'. Lao or na' Spirit che Diozən' əgwzejni'in le'e bin' ye'ega'aclene'. De'e na'ana' le'e ye'ega'aclene' con can' əgwzejni'i Spiritən' le'e, chedə' caguə' le'enə' güe'ele xtižə'anə' sino que Spirit na'ana' güe'en len.

¹²⁻¹³ Yoguə' beñə' cui zjənombia' Diozən' yesə'əgue'ine' le'e chedə' chonlilažə'əle nada'. Na' xte no bišə'əle na' no xale so'one' le'e lao na' beñə' par nič so'ote' le'e na' leczə xte no xi'inle so'one' le'e lao na' beñə' ca' so'ot le'e. Pero šə sotezə sole gonlilažə'əle nada' xte catə'əchan' əžin ža gatle, nachən' žjəyezole len Diozən'.

¹⁴ Bablabczle can' bzoj de'e profet Danielən' ben' be' xtižə' Diozən' cana'. Na' de'en bzoje' nan de que beñə' mal ca' so'one' de'en naquə' de'e zban juisy de'en chgue'i Diozən' lo'o yo'odao' əblao che chio'o beñə' Izrael na' yo'oda'ona' bitoch gonan žin. Na' cata' le'ile gaquə' de'e quinga, cana' le'e nitə'əle Jodean' cheyalə' əgwxonjle na' žja'acle do ya'ada'ote. (Le'e chlable de'e nga le'e šejni'in.)

¹⁵ Na' šə zo to beñə' chone' dezcanz lao sotea che liže'enə' catə' gaquə' de'e ca' bagwnia' gaquə', bito galə' yotobe' šinlaze' ca' ža' liže'enə', con cuejyichje'en.

¹⁶ Leczə ca' beñə' zda do yoba bito galə' yebi'e par žjəyexi'e xadoñ che'enə' liže'enə'.

¹⁷ Na' ca tyempən', lechgualə zdebə gaquan len no'ol ca' zjənoa' bdao', na' no'ol ca' chesə'əguzə' bidao'.

¹⁸ Le'e gon orasyon par nič cui cheyalə' əgwxonjle tyemp catə' chi' de'e zag.

¹⁹ Catə' gaquə de'e ca' lechguale chi' saquə' beṇə' Izrael ca' ža'anə'. Na' dezd catə'an gwxe yežlyon' xte ža neža bito ənacho bagwdi' bagwxaquə' beṇə' can' čhi' saquə' beṇə' Izrael ca', na' bito əžinlaže'e gaquə' ca' len beṇəčən' de'e yoblə.

²⁰ Žalə' nžia Diozən' bia' yesə'əžaglaogüe' šša ni yeto beṇə' cuich zjəmban catə'an yeyož yesə'əžaglaogüe'əno' žalə' ca'. Pero por ni che de'en chaque Diozən' che beṇə' ca' chso'onlilažə' le', beṇə' ca' bagwleje' par zjənaque' xi'ine', de'e na'anə' cui güe'le latjə yesə'əžaglaogüe' šša.

²¹ Na' ža, šə no əye'e le'e: "Bgüiašč nga zo Cristən' ben' əbselə' Diozən' par gaquəlene' chio'o", o ša ye'e le'e: "Na'alə zoe'", bito šejle'ele che'.

²² Zan beṇə' goxoayag ša' lao yežlyo nga əse'e le'e de que zjənaque' Cristən' o de que chso'e xtižə' Diozən'. Na' so'one' miłagr na' so'one' de'e naquə yelə' goban, par ničh yesə'əxoayague' beṇə' ca' bagwlej Diozən' par əsa'aque' xi'ine' pero bito gaquə yesə'əxoayague' lega'aque'.

²³ Baṇezele can' gaquə, la' bagwdixjue'ida' le'e che de'e ca' ze'e gaquə. De'e na'anə' le'e so probnid par ničh cui xoayagle.

Can' gaquə catə' yida' Jesocristən' de'e yoblə

²⁴ Pero na' lao ža ca' cate yeyož čhi' saquə' beṇəčən', bgüižən' bitoch əgwse'eni' in na' leczə ca' bio'onə'.

²⁵ Na' beljw ca' zjəžia le'e yoban' yesə'əxopən, chedə' Diozən' əgws'i'inəse' yoguə' de'e ca'.

²⁶ Na' cana'ach beṇə' ca' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bselə' Diozən' golja' beṇəčh. Yida' nsa'a yelə' guac xen čhia'anə' na' yelə' chey che'eni' čhia'anə'.

²⁷ Na' əselə'a angl čhia' ca' doxenlə yežlyon' par yosyo'otobe' beṇə' ca' bagwlej Diozən' par zjənaque' xi'ine' gata'ətezə zjənasəlese'.

²⁸ Nezele can' chac do nga len yag yixgüion'. Catə' bachezolao chebia xlague'e, chache'ile de que bačh zon yela' yejon'.

²⁹ Na' leczə can' catə'an le'ile gaquə de'e mal ca' bagwnia' gaquə, cana'ach ənezele de que bazon əžin ža šo'o fin che yežlyon'.

³⁰ De'e li əchnia' le'e, bitonə' gat le'e nitə'əle tyemp nga na'a catə' solao gaquə yoguə'əloj de'e ca'.

³¹ Ca' naquə de'e ca' chle'icho le'e yoban' na' yežlyon' yesə'əde čhei, pero ca' naquə xtižə'anə' caguə de'e te cui gaquə can' nannə'.

³² Pero na' ca' naquə bi ža bi orən' šo'o fin che yežlyon' notono no neze, ni que zjəneze angl ca' nitə' yoban', na' ni que nežda' nada' naca' Xi'in' Diozən'. Tozə Xə' Dioz nan' neze.

³³ De'e na'anə' le'e so probnid, le'e gac ca' beṇə' nchoj bišgal čhei na' le'e gon orasyonə' čhedə' bito nezele batən' yida' de'e yoblə.

³⁴ Na' de'en cuezle batən' yida' de'e yoblə gwxaquə'əleben can' chac che to beṇə' chej zita'. Antslə ze'e se'e liže'ənə', che'e xmose' ca' bi de'en so'on to toe' na' leczə ca' che'e ben' chapə puertən' gape'en do tyempə par ničh ca' chapəcze'en catə'an yežine'.

³⁵ Ca'acžən' naquən len le'e, le'e so probnid čhedə' bito nezele batən' yida' de'e yoblə, nadan' gwxaquə'əlebeda' ca' xan yo'onə'. Bito nezele šə yida' do bagoj o šə do chel o do šbał xen o šə do che'eni'.

³⁶ Le'e so ca' beṇə' nchoj bišgal čhei, ničh sole probnid na' cui senyala' le'e catə'an yida' de'e yoblə.

³⁷ Na' de'e ca' bagwnia' le'e taple leczə əchnia'an par yoguə' beṇə' chso'onlilažə' nada'. Ləso probnid par catə'an yida' de'e yoblə.

14

Boso'oxi'e can' so'one' yesə'əzene' Jeso'osən'

¹ Na' goquan' ne'e chac falt yečhopə ža par galə' lni pascw che neto' beṇə' Izrael Jerosalennə' catə'an chaoto' yetxtil de'en cui bi xne'i nčhixə. Na' beṇə' ca' chsə'ənabia' bəxoz ca' na' len beṇə' ca' chos'osed choso'olo' i lei de'en bzoj de'e Moizežən' besyə'əyilje' naclə so'one' par yesə'əzene' Jeso'osən' bgašə'əzə na' so'ote'ene'.

² Na' gosə'əne': —Bito gotchone' lao lɪnina' par ničh cui yesə'əadopə beṇə' ca' banitə' lao' syodan' na' yesə'ədiləlene' chio'o.

To no'olə bcuase' set zix yichj' Jeso'osən'

³ Na' goquan' zo Jeso'osən' Betanian' liž to beṇə' le Simon be'ənə' güe'le yižgüe' de'en nzi' lepr. Na' lao čhi' Jeso'osən' cho'a mesən' chaogüe', bžim to no'olə noxe'e to lmet de yej fin de'e yožə to clas set de'e nzi' nardo. Na' setən' lechguale zix čhla'an na' lechguale le'eyə' zaquə'an. Na' no'olan' gwle'e lmetən' gan' yožə setən' na' bcuase'en yichj' Jeso'osən'.

⁴ Nach bałə beṇə' ca' nitə' len Jeso'osən' liž Simonə' besə'əže'e na' gwse' ljuēžjga'aque': —žBixčhen' con benditjeine' setən' noxe'ena'?

⁵ Güenclhə žalə' bete'en la' mazlə tmlil gueyə' gueyoa le'ine' čhei žalə' ca', na' mech de'en le'ine' čhei əgwnežjue'en beṇə' yašə' par gaquələne' lega'aque'.

Na' gosə'ədile' no'olən'.

⁶ Nach Jeso'osən' gože': —Ljoye'enə'. ĵBixchen' chdillene'? Güenchguan' babene' len nada'.

⁷ Ca' naquə' beṇə' yašə' ca' syempr nitə'əcze' len le'e, na' gvaquə' gaquələnga'aclene' batə'ətezə' chene'ele. Pero ca' naca' nada' yešložgan' soa' le'ue.

⁸ De'en bcuasə' no'olən' setən' yichja'anə' na' bežonən' lao cuerp čhia'anə' bene' de'en non gone' len nada' žan' yoso'ocuaše'e nada', can' chonle chyeble set zixən' cuerp čhe beṇə' guatən'.

⁹ De'e li əchnia' le'e gatə'ətezə' čhixjue'ile dižə' güen dižə' cobə' de'en chzejni'in čhia'anə' lecza' čhixjue'ile can' ben no'olə' nga' len nada'. Na' šanch beṇə' əso'e dižə' ca' güennə' bene'.

Jod Iscariotən' bene' Jeso'osən' lao na' beṇə' contr ca'

¹⁰ Gwde de'e ca' Jod Iscariotən' ben' goquə' txen len disipl ca' šižin, gwyeje' lao beṇə' ca' chsa'ənabia' bəzož čhe neto' beṇə' Izrael par gože' lega'aque' de que əgwdie' Jeso'osən' lao na'aga'aque'enə'.

¹¹ Na' beṇə' ca' cata' gwse'enene' xtižə' Jodən' lechgualə besyə'əbeine'. Na' gwso'one' lyebe yosə'ənežjue'ene' mech. Nach Jodən' gwzolao gwche'enaogüe' batə'əquən' so latjə gone' Jeso'osən' lao na'aga'aque'enə'.

Lao gwsa'ogüe' xše' Jeso'osən' blo'ine' lega'aque' can' so'one' par žjesyə'əzaləže'e bi zejen ca' de'en gate'

¹² Na' ža' nech čhe lni pascon' cata'ən chsa'ogüe' yetxtil de'en cui bi xne'i nchixə' na' lecza' chso'ote' xilə' dao' par chjasyə'əzaləže'e can' bebej Diozən' de'e xaxta'oga'aque'enə' Egipton'. Na' ža' na'anə' gwse' disipl čhe Jeso'osən' le': —ĵGan' che'endo' žje'eni'ato' de'en gaocho xše' lni pascon'?

¹³ Nach gwleje' čopə' disipl čhe' ca' na' bsele'e lega'aque' lao' syodan' gože': —Le'e žja'ac lao' syodan' na' na' yežagle to beṇə' byo beṇə' noa' che'e nisan' ya'ayene'. Na' le'e žjənaotelene'.

¹⁴ Na' šo'ole len be'enə' na' ye'ele xan yo'onə': “Maestrən' ne' gonšgo' to cuart gan' güe'eni'ato' de'en gaolento'one' xše' lni pascon', neto' disipl čhe'.”

¹⁵ Nach əgwlo'ine' le'e to cuart xen de'e zo žcuia' la'alə, na' lo'o cuartən' zo to mes, na' nitə' ga' cue'ele na' bichlə de'e chyažjele. Lo'o cuart na'anə' əgwsi'ini'ale de'en gaocho lao lni pascon'.

¹⁶ Nach gwsa'ac disipl čhe' ca' na' cata' besə'əžine' syodan' yogua'əlo' can' gože' lega'aque'enə' goquə. Nach boso'osi'ini'e de'en gwsa'ogüe' xše' lni pascon'.

¹⁷ Na' cata' beyož gwxen, Jeso'osən' len disipl čhe' ca' šižin besə'əžine' yo'onə' gan' baboso'osi'ini'e de'en asa'ogüe'enə'.

¹⁸ Na' lao žəchi'e cho'a mesən' chsa'ogüe', Jeso'osən' gože' lega'aque': —De'e li əchnia' le'e, entr to le'e chaolənle nada' txen gonle nada' lao na' beṇə' contr ca'.

¹⁹ Nach de'e juisy de'e gwsa'aquene' cata' beyož gwne' ca', nach tgüejə' tgüejə' gwse'e le': —Xana' žanada'an gona' le' lao na' beṇə' contr ca'?

²⁰ Jeso'osən' gože' lega'aque': —Entr le'e šižinle tole chne' na'alən' lo'o platən' txen len nadan', gonle nada' lao na' beṇə' ca'.

²¹ Banaquəczən so'ot beṇə' nada' can' nyoj Xtižə' Diozən' nan gaquə' čhia' nadan' naca' ben' bsele' Diozən' golja' beṇəč. Pero probchguazə' be'enə' gon nada' lao na' beṇə' contr ca'. Nca'alə xneze žalə' cuiclə golje'enə'.

²² Na' lao chsa'ogüe'enə' gwxi' Jeso'osən' yetxtilan', na' be'e yelə' choxcwlen čhe Diozən'. Gwde na' bzojxe'en, nach be'en disipl čhe' ca', gože' lega'aque': —Le'e gaon. Lennə' cuerp čhia'anə'.

²³ Nach lecza' bexe'e basən' gan' yožə' nis obasən', na' lao noxe'en be'e yelə' choxcwlen čhe Diozən' nach bosnežjue'en lega'aque' na' yogue'e gwse'eje'en.

²⁴ Nach gože' lega'aque': —Lennə' xchena'anə'. Na' xchena' na'anə' laljə por ni čhe xtolə' beṇəčan'. Na' de'en laljənnə' solao gaquə' de'e cobə' de'en ben Diozən' lyebe gone' par gaquələne' beṇəčan'.

²⁵ De'e li chnia' le'e na'a zelao che'eja' nis oban'. Pero de' yeto de'e yebeichecho mazəchlə can' chebeicho che'ejcho nis oban', lennə' de'en socho mbalaz zejlicane' cata'ən socho txen gan' ŋabi'a len Diozən'.

Jeso'osən' gwne' de que Bedən' cui chebe' šə nombi'ene'

²⁶ Na' beyož gwse'ej gwsa'ogüe' gwso'ole' to immo, nach besə'əchoje' ja'aque' ya'a de'en nzi' Olibos.

²⁷ Na' lao zjəngüe'e nezən' Jeso'osən' gože' disipl čhe' ca': —Neže' yogua'ale cuejyichjle nada' por ni čhe de'en gaquə' čhia'. Gaquə' can' nyoj Xtižə' Diozən' nan: “Gota' beṇə' goye xilə'anə' na' xilə' čhe' ca' əsa'əsələsəb.”

²⁸ Pero na' catá' yeyas yebana' ladjo beṇá' guat ca', yobəchda' yeya'a Galilean' cle ca le'e.

²⁹ Nach Bedən' gože' Jeso'osən': —Nada' cuat cuejəyichja' le' la'əṇá'əczá šə yogua' beṇá' yeziquá'əchlə yesá'əbejyichjle' le'.

³⁰ Jeso'osən' gože'ene': —De'e li əchnia' le' neže' antslə ze'e cuež lecon' chop las, gaquə šon las cui chchebo' de que nombi'o nada'.

³¹ Nach Bedən' gože' Jeso'osən': —La'əṇá'əczá šə chonclən byen guatlencza' le' bito əṇia' de que bito nombi'a le'.

Na' leczá ca' əgwse' yogua' disipl che' ca' le'.

Jeso'osən' bene' orasyon lo'o güert de'en nzi' Getsemani

³² Na' catá' Jeso'osən' len disipl che' ca' besá'əžine' latjən' gan' nzi' Getsemani, gože' lega'aque': —Ngazá lecue' žlac ša'a de'e na' žjena' orasyon.

³³ Na' gwche'e Bedən' len Jacobən' na' Juannə', gwsa'aque' gan' nita' disipl ca' yela'. Na' Jeso'osən' gwzolaogwzochgü'e' trist, na' de'e juisy de'e goquene' lo'o yichjla'ažda'ogü'e'ena'.

³⁴ Na' gože' lega'aque': —Tristchgua zo yichjla'aždaogua'ana' xte bachonən yelə' got. Lecueza nga na' sole əṇa'azle len nada'.

³⁵ Nach gwdie' gwyeje' yelata' delant na' jete'e goscho'alə lao yon'. Nach bene' orasyonṇá' gwnabene' Diozən' šə guac te ca'azá de'en čhi' saque'e.

³⁶ Na' gože' Xe'ena': —Xa' Dioz, le' chac chono' yogua'əloj. Benšga ca te ca'azá de'en čhi' saca'ana', pero bito che'enda' gaquə de'e əṇia' nada', sino gaquə con can' ənao' le'.

³⁷ Nach beyeje' gan' nita' disipl ca' šonə, na' jəyedi'e lega'aque' chəsə'atase'. Na' gože' Bedən': —Simon žəchtaso? žEni to or bito bchejdo' əna'azo' len nada'?

³⁸ Le'e na', na' le'e gon orasyon nič cui co'o gwxyie'en le'e nez mal. Nezdá chene'ele əṇa'azle len nada', pero cui chzoile.

³⁹ Na' gozse'e gan' nite'ena' de'e yoblə, jəzene' orasyonṇá', na' gwnacze' can' bagwne'.

⁴⁰ Na' catá' bežžine' gan' nite'ena' de'e yoblə, jəyedi'icze' disipl ca' šonə chəsə'atase', tant cuich chəsə'əzoine' bišgalən'. Na' xte bito zjəneze' bi əse'e le'.

⁴¹ Na' gwze'e de'e yoblə gan' nite'ena' jene' orasyonṇá' de'e gwyon lase, na' catá' bežžine' gan' nita' disipl ca' šonə, na' gože' lega'aque': —žEn'e chtasle? žEne'e chonle dezczanz? Bač goc na'a. Diozən' bsele'e nada' golja' beṇəch na' na'a bač bžin or gaca' lao na' beṇə' mal ca' par so'ote' nada'.

⁴² Le'e secha, le'e šo'o. Baza' ben' gon nada' lažə' na' beṇə' contr ca'.

Gosə'əzene' Jeso'osən'

⁴³ Ne'e cho'ete Jeso'osən' dižə'an ca' catá' bžin Jodən' ben' naque' cuent len disipl ca' šižin. Na' žague' zan beṇə' bosə'oselə' beṇə' ca' chəsə'əṇabia' bəxoz che neto' beṇə' Izrael na' beṇə' ca' choso'osed choso'olo'i lei de'en bzoj de'e Moizezən', na' beṇə' golə' blao che ṇasyon čheto'onə'. Beṇə' ca' zjanžag Jodən' zjana'le'e spad na' zjən'lene' no yag.

⁴⁴ Jodən' babžejni'ine' lega'aque' can' gone' par əgwdie' Jeso'osən' lao na'aga'aque'ena', gože' lega'aque': —Be'ena' gaogua' bxidən', le'ena' senle' na' gwchejlene' par əche'elene'.

⁴⁵ Nach catá' bžine' gan' zo Jeso'osən' le'e bgüiguə'ate' cuite'ena' na' gože'ene': —Maestr.

Na' gwdaogü'e'ene' bxidən', pero caguə do laže'ena' bene' ca'.

⁴⁶ Nach beṇə' ca' əzja'ac len Jodən' gwsə'o'xe'e Jeso'osən' na' gosə'əche'əxəxje' le'.

⁴⁷ Na' to beṇə' zecha galə'əzə gwlečhj spad che'ena' gwdine'en šla'a nag xmos bəxozən' ben' naquəch əblao, gwčhogtechgü'e'en.

⁴⁸ Nach Jeso'osən' gože' beṇə' ca': —Za'acle len spad na' len yag zedəxənle nada' ca to beṇə' bguan.

⁴⁹ Yogua' ža gwchi'a len le'e bsd blo'ida' beṇə' lo'o yo'odao' əblaonə' na' bito gwxenle nada'. Pero chac de'e quinga par nič chac complir can' na' Xtizə' Diozən' de'en nyojən' gaquə čhia'.

⁵⁰ Na' lao or na' bosyo'oxonj yogua' disipl che' ca' gosə'əbejyichje'ene'.

Beṇə' güegon' ben' bexonj

⁵¹ Na' to beṇə' güegon' jənaogü'e' Jeso'osən', na' nyaze' to lachə' de'e naquə ca to sabana.

⁵² Na' ca gwsə'o'xe'ene' gwsə'o'xe'e slezə xe'ena' na' le'e bchojte' lo'inə' na' bexonje' ga'alýide'.

Gosə'əche'e Jeso'osən' lao beṇə' golə' beṇə' blao ca' chəsə'əṇabia' ṇasyon Izraelən'

⁵³ Na' beṇə' ca' gosə'əzen Jeso'osən' gosə'əche'ene' lao Caifasən' ben' naquəch bəxoz əblao che neto' beṇə' Izrael. Nach besə'ədobə yogua' beṇə' ca' choso'osed choso'olo'i lei de'en bzoj de'e Moizezən' na' len yeziquə'əchlə beṇə' golə' blao ca' chəsə'əṇabia' ṇasyon čheto'onə'.

⁵⁴ Nach Bedən' jənaogü'e' Jeso'osən' zita' zita' xte bžinte' liž bəxoz əblaonə' na' gwyo'e chyo'onə'. Na' beṇə' ca' zjənaquə xə'ag yo'oda'onə' zjəchi'e cho'a yi'inə' par chəsə'əže'ine'. Nach Bedən' jəchi'e len lega'aque' cho'a yi'inə'.

⁵⁵ Na' yogua' b̄xoz əblao ca' na' yeziqə'əchlə beṇə' golə blao ca' chesə'ənabīa' n̄asyon Izrael çeto'ona' gosə'əyilje' beṇə' əso'e dižə' contr Jeso'osən' par niçh yesə'əçhoglaogüe'en che' de que gate', pero notono besə'əželene'.

⁵⁶ Beṇə' zan gwso'e dižə' güenlažə' contr Jeso'osən' pero xtižə'əga'aque'ena' bito besyə'ədilən.

⁵⁷ Nach balə beṇə' gosə'əzeche' na' gwso'e dižə' güenlažə' contr le' gosə'əne':

⁵⁸ —Beneto' cata' gwne': “Yoçhiñja' yo'odao' əblao nga gwso'on beṇə', na' lao šonə žazə gona' yeto yo'odao' əblao de'en cui gon beṇəçən'.”

⁵⁹ Pero bia'aczə bito bedile' de'en gosə'əne'ena'.

⁶⁰ Nach gwzoža' ben' naquəç b̄xoz əblao gwzeche' gwçolga'aque'ena' gože' Jeso'osən': —
 ¿Ebito bi nao' ca naquə de'e nga chosə'əcuiš beṇə' quinga le'?

⁶¹ Na' Jeso'osən' bitobi gwne'. Nach gož ben' naquəç b̄xoz əblao le': —¿Ele len' Cristən' ben' gwlej Diozan' par gaquəleno' n̄asyon chechon'? ¿Elen' Xi'in Dioz ben' cho'ela'ocho?

⁶² Jeso'osən' gože'ene': —Le ben' nao' na' nada'. Diozən' bsele'e nada' golja' beṇəçh na' əchnia' le'e gwžin ža le'ile nada' chi'a cuit Xa' Diozən' ben' napə le'ezelaogüe yelə' guac xen na' nabi'a txen len le'. Na' le'ile nada' yetja' yoban' to lo'o bejw.

⁶³ Cata' bene ben' naquəç b̄xoz əblao xtižə' Jeso'osən' gwšo' gwçezə' xe'ena' goquene' de'e mal juisy can' gwna Jeso'osən', na' gwne': —¿Nochxa testigon' chyažjecho?

⁶⁴ Babenecho chžia chnite'e Diozən' de'en ne' naque' Xi'in Dioz len naque' con to beṇəçhə. ¿Bi nale? ¿Nac gonchone'?

Nach yogua' beṇə' ca' ža'anə' gosə'əçhoglaogüe'en che' de que cheyalə' gate'.

⁶⁵ Nach balə' bosə'oža' xene'ena' cho'alao Jeso'osən', na' bosə'ocuaše' cho'alaogüe'ena' len to lachə' na' gosə'əbaže'ene', gwse'ene': —Gwñeya'ašc žnon' chbažə' le'?

Nach xa'ag yo'odao' ca' leczə gosə'əgape'e xague'ena'.

Bedən' bito gwçhebe' šə nombi'e Jeso'osən'

⁶⁶ Na' lao chac de'e quinga Bedən' chi'e chy'o' che ben' naquəç b̄xoz əblaoc na' na' chi'e cata' bžin to no'ol criad che ben' naquəç b̄xoz əblaon'.

⁶⁷ Na' cata' ble'ine' chi' Bedən' cho'a yi'inə' par cheže'ine', no'olan' bgüiayane'ene' na' gože'ene': —Leczə leno' le' naco' txen Jeso'os beṇə' Nasaretən'.

⁶⁸ Pero Bedən' bito gwçhebe' šə naque' txen len Jeso'osən'. Gože' no'olan': —Bito nombi'ane' na' nic nežda' bi dižə'ən cho'o.

Na' gwyje' jəzeche' cho'a puert saguanə'. Nach le'e gwchežte to lecw.

⁶⁹ Nach bezle'i no'olan' le' de'e yoblə na' gože' beṇə' ca' ža'anə': —Benga naque' txen len beṇə' ca'.

⁷⁰ Na' de'e yoblə bito gwçhebe' šə nombi'e Jeso'osən'. Na' chaczə šlož beṇə' ca' ža'anə' gosə'əze'e Bedən': —De'e liczə le' naco' txen len beṇə' ca' çhedə' ca nga chnio' ngazə nacbia' de que naco' beṇə' Galilea.

⁷¹ Nach Bedən' bzoe' Diozən' testigw gwne': —Diozən' gone' nada' castigw šə chonlaža'an ənia' bito nombi'a ben' nale ca'. Chzoa' jorament lao Diozən', bito nombi'ane'.

⁷² Na' le'e gwchežte lecon' de'e yoblə. Nach jsa'alaza' Bedən' can' gož Jeso'osən' le' de que ze'e gaquə çhop las cuež lecon' cata' gaquə šon las cui chçhebe' de que nombie'ene'. Na' cata' bene' xbab che de'ena' gwchežyaše'e tant de'e goquene'.

15

Gosə'əçhe'e Jeso'osən' lao Pilatən'

¹ Na' cata' gwy'e'eni'ina' b̄xoz əblao ca' na' yeziqə'əchlə beṇə' golə blao ca', na' len beṇə' ca' chosə'osed chosə'olo'i lein', na' len yeziqə'əchlə beṇə' ca' chesə'ənabīa' n̄asyon Izraelən' besyə'ədobə' par niçh bosə'oxi'e naclən' so'one' len Jeso'osən' na' bosə'ocheje'ene' na' gosə'əçhe'ene' jse'ene'ene' lao na' Pilatən'.

² Pilatən' gože' Jeso'osən': —¿Elen' naco' rei che beṇə' Izrael ca'?

Nach Jeso'osən' gože'ene': —Le be'en nao' nan' naca'.

³ Na' de'e zan de'e gosə'əna beṇə' gwnabia' che b̄xoz ca' par bosə'ocuiše' Jeso'osən'.

⁴ Nach Pilatən' gože'e Jeso'osən': —¿Ebito choži'o xtižə'əga'aque'ena'? ¿Ecabi chendo' catec de'e zan xya nga chsa'ogüe' contr le'?

⁵ Pero Jeso'osən' ni to xtižə'əga'aque'ena' bito boži'e, xte bebanchgüeicze Pilatən'.

Gosə'əçhoglaogüe'en so'ote' Jeso'osən'

⁶ Na' de to costombr çhega'aque' de que ža lni pascon' əgwsan Pilatən' to pres, con beṇə' yesə'əṇab beṇə' Izrael ca'.

⁷ Na' ližya na' de to pres beṇə' le' Barrabas txen len beṇə' ca' bosə'oxe gwdiłə lao syodan' na' žənaque' beṇə' güet beṇə'.

⁸ Na' beṇə' zan ca' bazjənžag gosə'əbigue'e lao Pilatən' na' gosə'əṇabene' le' əgwsane' to pres can' naquə costomb' chega'aque'ena'.

⁹ Nach Pilatən' gože' lega'aque': —čEchene'ele əgwsana' ben' naquə rei che le'e beṇə' Izrael?

¹⁰ Gwne' ca' cheda' nezene' beṇə' ca' chesə'ənabia' bχoz ca' zjəziague'ine' Jeso'osən', de'e na'anə' bosə'odie' le' lao ne'ena'.

¹¹ Na' beṇə' ca' chəsə'ənabia' bχoz ca' gosə'əgo'oyele'e beṇə' zan ca' ža'anə' par yesə'əṇabe' əgwsane' Barrabasən' lgu'a'a Jeso'osən'.

¹² Nach Pilatən' gože' lega'aque': —čBixa gona' len Jeso'osən' ben' nale naque' rei che le'e beṇə' Izrael?

¹³ Nach gwso'osye'e gwse'e Pilatən': —Bde'e le'e yag corozən'.

¹⁴ Pilatən' gože' lega'aque': —čBixa de'e mal babene'ena'?

Pero beṇə' ca' gwso'osye'e yelata' zižjoch gosə'əne': —Bde'e le'e yag corozən'.

¹⁵ Na' Pilatən' gone'ene' soe' güen len beṇə' zan ca'. De'e na'anə' bsane' Barrabasən'. Na' beyož gosə'əyin soldad ca' Jeso'osən', Pilatən' bene'ene' lao na'aga'aque' par yoso'ode'ene' le'e yag corozən'.

¹⁶ Nach gosə'əche' soldad ca' Jeso'osən' chy'o' che yo'o gan' chi' Pilatən' na' bosyo'otobe' yogua' soldad ca' yela'.

¹⁷ Nach gosə'əyine' xa Jeso'osən' na' bosə'oguaque'ene' to lachə' morad na' gwso'one' to coron de yešə' na' bosə'ožine'en yichje'ena'.

¹⁸ Na' gwso'onene' borl gosə'əne': —Biba rei che beṇə' Izrael.

¹⁹ Nach soldad ca' gosə'əyine' yichje'ena' to ya, na' bosə'oža' xene'en le' na' bosə'ozo xibga'aque'ena' laogüe'ena' chso'one' ca' cho'elao' le'.

²⁰ Na' cata' beyož gwso'one'ene' borlən' besyə'əyine' lachə' moradən' bosə'oguaque'ene' na' bosyo'oguaque'ene' xacze'. Nach gosə'əche'ene' par yoso'ode'ene' le'e yag corozən'.

Boso'ode'e Jeso'osən' le'e yag corozən'

²¹ To beṇə' Sirene le' Simon xa Ljandr na' Rofo ze'e zeze'e yoba cata' bežague' beṇə' ca' zjənche'e Jeso'osən' par yoso'ode'ene' le'e yag corozən'. Na' la fuers bosə'ode'e yag coroz che Jeso'osən' coža' Simonə'.

²² Na' gosə'əche'e Jeso'osən' to latjə de'en nzi' Golgota, zejen dižə' latjə che yichj beṇə' guat.

²³ Na' bosə'onežjue'ene' bino corrient de'en nchixən len to rmech zla' de'en nzi' mirra. Pero Jeso'osən' bito güe'eje'en.

²⁴ Nach bosə'ode'ene' le'e yag corozən'. Na' soldad ca' gwso'one' xala'ane'ena' rif enr lega'aque' par gosə'ənezene' bi partən' yechelə to toga'aque'.

²⁵ Na' do cheda ga lsil bosə'ode'e Jeso'osən' le'e yag corozən'.

²⁶ Na' yichj yag coroz che'ena' bosə'ozoje' de'en bcuiš le', nan: "Bengan' Rei che beṇə' Izrael ca'."

²⁷ Na' leczə cana' bosə'ode'e čhopə beṇə' bguan le'e yəčhopə yag coroz, toe' gwda cuit Jeso'osən' lica na' yetoe' cuite'en yeglə.

²⁸ Na' de'en goc ca' goc complir can' nyoj Xtizə' Diozən' gan' nan: "So'onene' le' caczən' chso'onene' beṇə' güen de'e mal."

²⁹⁻³⁰ Na' beṇə' ca' chse'ej chəsə'əde' gan' da' Jeso'osən' chəsə'əlolə' yichjga'aque'ena' gwso'onene' borl gwse'ene': —Len' gwnao' guaquə yochinjo' yo'odao' əblaona' na' šonə žaza yeyono'on, bosla cuino' na' beyetj le'e yag corozən'.

³¹ Na' leczə ca' beṇə' gwnabia' che bχoz ca' na' beṇə' ca' choso'osed choso'olo'i lei de'en bzoj de'e Moizezən' gwso'one'ene' borl gosə'əne': —Yeziqə'əchlə beṇə' bosle' na' cabi chac yosla cuine'.

³² Šə len' naque' Cristən' ben' gwlej Diozən' par gaquəlene' nasyon chechon', na' nacte' rei che chio'o beṇə' Izrael, yoletj cuine' le'e yag corozən' na'a par nich le'icho na' šejle'echo che'.

Na' beṇə' ca' zjəda' le'e yag corozən' cuite'ena' čhopə la'a, leczə gwso'onene' borl.

Can' goquə catə'an got Jeso'osən'

³³ Na' do gobiz goc žchol doxen yežlyon' bžinte cheda šonə.

³⁴ Na' do cheda šonə cata' gwne' Jeso'osən' zižjo gwne': —Eli, člama sabactani? —zeje dižə: "Dioz chia', čbixchen' bagwlejyichjo' nada?"

³⁵ Na' beṇə' nita' galə'əzə gwse'enene' can' gwne'ena' nach gosə'əne': —Le'e gwzenagšč, chaxe' Liazən' ben' be' xtižə' Diozən' cana'.

³⁶ Nach bchoj to beṇə' gwsa'adoe' jəxi'e to spong na' bosgaže'en bino corrient de'en cui bi nchixə, na' bzo'en to lao ya dao' na' bosšime'en cho'a Jeso'osən' par nich güe'eje'en na' be'ena' gwne': —Cuezcho yešč šə yidə Liazən' na' yoletje'ene'.

³⁷ Jeso'osən' bisye'e zižjo nach gote'.

³⁸ Na' ca naquə lachə'ən de'en ze lo'o yo'odao' əblao che neto' beṇə' Izrael le'e gwchezə'ate gwcholən' gwza'əzə yichjei bechojte che'ela.

³⁹ Na' lao orən' got Jeso'osən', capitan che soldad ca' ben' zecha lao Jeso'osən' benene' can' bisya'a Jeso'osən' na' ble'ine' can' gote' na' gwne': —De'e licza benga naque' Xi'in Dioz.

⁴⁰ Na' leczə nitə' zan no'olə latjən' beṇə' gosə'zecha zita'ələ par besə'əle'ine' can' goquən'. Na' entr lega'aque' zjəlen no'ol quinga: Maria beṇə' Magdala, na' Maria xna' Jwsen' na' Jacob bi'in naquəch bi'i xcuidə', na' leczə len Salmē.

⁴¹ No'ol ca' gosə'əzolao chso'onlilažə' Jeso'osən' catə'an gwzoe' Galilean' na' gwsa'aclene' le' len bi de'en byažjene', lega'aque' na' yezan no'olə ca' besya'ənaogüe' Jeso'osən' catə'an beze'e Galilean' par bežine' Jerosalennə'.

Boso'ocuaše'e Jeso'osən'

⁴² Na' ne'e da' Jeso'osən' le'e yag corozən' catə' gwzoloa chexjw že'enə', na' ža na'anə' catə'an choso'osi'ini'e che lni pascon', na' bachžin or so'omba'ane' ža dezcanzən'.

⁴³ Na' gwzo to beṇə' le Jwse na' naque' beṇə' Arimatea, na' nacte' to beṇə' blao entr beṇə' ca' chesə'anabia' nasyon Izrael cheto'onə'. Na' Jwsen' gwzoe' lez əžin ža selə' Diozən' beṇə' nabia' nasyon cheto'onə'. Na' laogüe de'en bachexjw že'enə' benchechlaže'e gwyeye' lao Pilatən' jəṇabe' cuerp che Jeso'osən'.

⁴⁴ Pilatən' bebanene' de'en byob got Jeso'osən', nach goxe' capitannə' gwṇabene' le' šə le bagote'enə'.

⁴⁵ Catə' capitannə' gože'ene' de que bagote', nach Pilatən' be'e latjə žjəyeltj Jwsen' cuerp che Jeso'osən' par yeyo'ene'.

⁴⁶ Na' Jwsen' gwxi'e to lachə' fin nach gwyeye' gan' da' Jeso'osən' na' beletje'ene' le'e yag corozən' nach bolaže'ene' lachə'anə', na' gwlo'ene' to lo'o bloj ba de'e bagwche'ene' to le'e yej. Na' beyož bene' de'e ca' blələ' to yej xen de'e bseyjuene' cho'a banə'.

⁴⁷ Na' Maria beṇə' Magdalan' na' Maria xna' Jwsen' yeto, besə'əle'ine' gan' boso'ocuaše'e cuerp che Jeso'osən'.

16

Jeso'osən' bebane' ladjo beṇə' guat ca'

¹ Na' catə' gwde ža dezcanzən' Maria beṇə' Magdalan', na' Maria xna' Jacobən' na' len Salmen' jəsə'axi' set zix de'e yoso'oguazje' cuerp che Jeso'osən'.

² Na' zil dmigw tempran gwsa'aque' zja'aque' cho'a ban' na' besə'əžine' cho'a ban' do chla'atg bgüižən'.

³ Na' lao zja'aque'enə' gwse'e ljuežjga'aque': —ĭNo gaquə yeca'a yejən' de'en da' cho'a ban' par nich šo'ocho?

⁴ Na' ca ne'e zja'aque' zita'ələ gan' zo bloj ban' besə'əle'ine' de que yej xennə' de'en da' cho'a ban' bach bega'an.

⁵ Catə' besə'əžine'enə' gwso'e lo'o blojən' na' besə'əle'ine' to beṇə' xcuidə' chi'e lo'inə' šla'a lichalə na' nyaze' to lachə' šyiš tonə, na' no'ol ca' besə'əžebe' catə' besə'əle'ine'ene'.

⁶ Na' gože' lega'aque': —Bito žeble. Nada' nezda' de que cheyiljle Jeso'osən' ben' naquə beṇə' Nasaret ben' bosə'ode'e le'e yag corozən'. Babebane' ladjo beṇə' guat ca'. Notoch no nla' nga. Legüia latjə ga nga bosə'əxoe' cuerp che'enə'.

⁷ Le'e žjəya'ac le'e žjəyedixjue' i Bedən' len disipl ca' yela' de que gwyobe Jeso'osən' yežine' Galilean' ca le'e na' Galilea na' gwle'iczelene', can' gwnacze' le'e.

⁸ Nach besya'əchoje' lo'o ban' besa'acdoe' xte gosə'əxize' tant besə'əžebe'. Na' notono gwse'e bin' goquə chedə' besə'əžebe'.

Jeso'osən' blo'e laogüe' Maria beṇə' Magdalan'

⁹ Na' zil dmigw tempran catə'an beban Jeso'osən' ladjo beṇə' guat ca' zgua'atec blo'e laogüe' Maria beṇə' Magdalan' ben' bebeje' gažə de'e xio' zjəyo'o zjəyaz yichjla'azdaogüe'enə'.

¹⁰ Le' jəyedixjue'ine' yeziquə'achlə beṇə' ca' de que beban Jeso'osən' ladjo beṇə' guat ca'. Catə' bžin Marian' chəsə'əbežyaša' beṇə' ca' na' chasyə'əgüine'ene' chedə' gwso'ot beṇə' mal ca' Jeso'osən'.

¹¹ Na' catə' gwse'enene' de que babeban Jeso'osən' ladjo beṇə' guat ca' na' de que Marian' bable'ine' le', bito gwse'ejl'e.

Blo'e lao Jeso'osən' chopə disipl che' ca'

¹² Na' blo'e lao Jeso'osən' chopə disipl che' ca' lao zja'aque' yoba, pero nža'alə can' besə'əle'ine' le'.

¹³ Na' jəya'aque' jəsyə'ədixjue'ine' beṇə' ljuežjga'aque' ca' pero beṇə' ca' leczə bito gwse'ejl'e che lega'aque'.

Jeso'osən' bene' mendad əso'e xtiže'enə' yoguə' nasyon

¹⁴ Na' gwdechlä blo'e lao Jeso'osan' disipl che' ca' šnej lao chsa'ogüe'. Na' gwdiļe' lega'aque' de'en zjənaque' beṇə' la'aždao' žod na' de'en cui gwse'ejle'e de que bebane' ladjo beṇə' guat ca' la'anə'acza beṇə' ca' besə'äle'i lē' gwse'e lega'aque' ca'.

¹⁵ Nach gože' lega'aque': —Le'e žja'ac le'e žjased le'e žjəlo'i beṇə' ca' ža' yoguə'əloļ nasyon dižə' güen dižə' cobə de'en chzejni'in čhia'.

¹⁶ Na' beṇə' ca' so'onļilažə' nada' na' yesə'əchoe' nis bito žjəya'aque' lao yi' gabiļən'. Na' beṇə' ca' cui so'onļilažə' nada' yesə'əbiayi'e lao yi' gabiļən'.

¹⁷ Na' beṇə' ca' so'onļilažə' nada' gwnežjoga'aca'ane' yeļə' guac par so'one' de'e quinga: Len yeļə' guac čhia'anə' yesyə'əbeje' de'e xio' ca' zjəyo'o zjəyaz yičhja'aždao' beṇə', na' əso'e gwde gwdele dižə' de'en cui no chac.

¹⁸ Guaquə əso'oxe'e no beļ bia benen na' bitobi gaquə čhega'aque'. Na' šə əse'eje' benen bitobi gonən len lega'aque'. Guaquə yesə'əxoa' na'aga'aque'enə' yičhj beṇə' ca' chsa'acšene, na' yesyə'əyaque beṇə' ca'.

Jeso'osan' beyepe'yoban'

¹⁹ Na' catə' beyož be'e Xancho Jeso'osan' dižə'an ca' len lega'aque', bezi' beca'a Diozən' lē' yoban' gan' chi'e chnabi'e txen len Xacho Diozən'.

²⁰ Na' disipl che' ca' ja'aque' doxenļə jəsə'ədixjue'ine' dižə' güen dižə' cobə de'en chzejni'in che Jeso'osan', na' lē' goclene' lega'aque' na' bene' par nič gwso'one' no miļagr len yeļə' guac che'enə' par blo'e de que xtižə'əga'aque'enə' naquən de'e li.

De'e na'azən' chzoja'.

Dižá' Güen Dižá' Cobá De'en Bzoj San Locasán'

De'e nga bzoj Locasán' par Tioflan'

¹⁻⁴ Señor Tiofl, chzoja' le' dižá' quinga par nich na' ənezdo' de'e li ca naquə de'en babendo' na' de'en bagoc. Benə' zan bačh boso'ozoje' che Jeso'osən' ca naquə de'en bagoc complir par neto' chonlilažə'əto'one'. Boso'ozoje'en can' bzejni'i benə' ca' neto', benə' ca' besə'əle'i can' goquə dezd goljte Jeso'osən'. Na' benə' ca' gwse'en besə'əle'ine' can' goquən' boso'osed boso'olo'ine' benə' yoblə dižá' güen dižá' cobə che Jesocristán'. Na' nada' catə' beyož gwəabyoža' can' goquən', na' gwyzazlaža'a gwzoja'an tcho'a tsəo' par nich ənezdo' Señor Tiofl.

Can' goquə gwdixjue' to angl de que galja Juanna'

⁵ Ca tyemp can' gwnabia' Rei Erodən' gan' nzi' Jodea, na' zo to bəxoz che benə' Izrael ca' benə' le Zequeria. Bene' žin len xonj bəxoz benə' zjele Abias. Na' no'ol che Zequerian' le' Čhabet na' naque' dia che de'e bəxoz Ronnə'.

⁶ Na' Zequerian' len Čhabetən' zja'acze' liča par len Diozən', na' gwso'one' yoguə'əloł de'en non Xancho Diozən' mendad de'en zjənyoy le'e lei che'ena'.

⁷ Na' notono xi'inga'aque' nita', chedə' Čhabetən' naque' no'olə güiž, na' čhopte' bazjanaque' benə' gola.

⁸ Na' goquən' beyala' Zequerian' len benə' ljuežje' ca' benə' ca' zjanaquə bəxoz par gwso'one' de'en besyə'əyale'e so'one' par gwso'elaogüe'e Diozən'.

⁹ Na' de costombr che bəxoz ca' chso'one' rif par chata'əbia' noe' əchoj par əgwzeye' yal lo'o yo'oda' əblao chega'aque'ena' gan' chso'elaogüe'e Xancho Diozən' Jerosalenna'. Nach gwso'one' rif na' bchoj Zequerian' par bzeye' yalən' lo'o yo'oda'ona'.

¹⁰ Na' žlac bzeye' yalən' gwnitə' yoguə'əloł benə' zan ca' chyo'olə gwso'one' orasyonna'.

¹¹ Na' to angl che Xancho Diozən' bloe' laogüe' Zequerian', na' gwzecha anglən' cuit mesən' ličalə gan' chəsə'əzeye' yalən'.

¹² Catə' ble'i Zequerian' anglən' benit bechoł goc lo'o yichjla'aždaogüe'ena' na' bžebchgüe'.

¹³ Pero anglən' gože' le': —Bito žebo' Zequeria. Diozən' babzenague' orasyon čhio'ona', na' no'ol čhio' Čhabetən' sane' to xi'ino', na' əgwsi'o le' Juan.

¹⁴ Na' so' mbalaz na' yebeido', na' leczə benə' zan yesyə'əbeine' šə bagolje',

¹⁵ chedə' gague' benə' blao lao Diozən'. Bito ye'eje' bino ni biquə'əchlə de'en chesə'əzože benə', na' catə' galje' yo'o Spirit che Diozən' lo'o yichjla'aždaogüe'ena' par nabi'an le'.

¹⁶ Na' gone' par nich zan benə' Izrael gwlaž che' ca' yesə'əša' yichjla'ažda'oga'aque'ena' na' so'elaogüe'e Diozən' can' cheyalə' so'elaogüe'ene', Dioz ben' naquə Xanga'aque'.

¹⁷ Na' cuialaogüe' lao Xančon' na' gone' par nich benə' ca' cui nita' binlo len xi'inga'aque' yesyə'ənite'e binlo len xi'inga'aque' de'e yoblə. Na' gone' par nich benə' godenag ca' yesə'əzenague' che Diozən'. Gone' ca' par nich yesə'ənita' benə' probnid par əso'elaogüe'e Xančon' catə'an yide'. Na' len xbab de'en yo'o yichjla'aždaogüe'ena' na' len dižá' balə de'en güe'ena' gague' ca' profet Liazən' ben' gwzo cana'.

¹⁸ Nach Zequerian' gože' anglən': —čNacxa gaquə ənezda' de'e nga? Nada' bačh naca' benə' gola na' no'ol čhia'anə' leczə benə' gola.

¹⁹ Nach anglən' gože' le': —Nada' naca' angl Gabryel. Zoa' len Diozən' na' zoa' cho'elaogua'ane'. Na' bsele'e nada' zedetixjue'ida' le' dižá' güen dižá' cobə quinga.

²⁰ Na' le' gaco' mod, cui gaquə ənio' xte que catə'əch əžin ža gaquə de'e nga, chedə' cui chejli' o xtiža'anə'. Na' de'e ličzə gwžin ža gaquə complir can' gwnia'anə'.

²¹ Na' benə' ca' ža' chyo'olə gosə'əbeze' Zequerian', nach besyə'əbanene' chedə' gwžeine' lo'o yo'oda' əblao gan' chso'elao' benə' Izrael ca' Diozən'.

²² Catə' bechoj Zequerian', bene' señy len ne'ena' la' bitoch goquə əne'. Bačh naque' benə' mod. Nach gwsa'acbe'i benə' ca' de que ble'ida'ogüe'ene' lo'o yo'oda'ona'.

²³ Na' catə' bde laze'en de'en bene' žin lo'o yo'oda' əblaona' beyeje' liže'.

²⁴ Gwde na', no'ol che' Čhabetən' bgüendao' bda'ona' lo'o le'ena' na' gueyə' bio' gwzoze'. Na' gwne':

²⁵ —Güenchgua baben Xana' Diozən' len nada', chedə' babžin ža nži'ilaz'e'nda', chone' par nich bitoch so'on beñačən' xbab čhia' de que cui bi zaca'a.

Anglən' gwdixjui'e galja Jesocristən'

²⁶ Goc xop bio' noa' Čhabetən' bda'ona', Diozən' bozsele'e anglən' ben' le Gabryel, gwyeje' to syoda de'en nzi' Nasaret gan' mbane Galilean'.

²⁷ Bsele'ene' gan' zo to no'ol güego' le' Maria. Na' Marian' ne'e naplažə'əchgua cuine'. Na' to benə' le Jwse bačh naquən' gwšagna'alene' par gague' xo'ole'. Na' Jwsen' naque' dia che de'e Rei Dabin'.

²⁸ Na' b'zin anglən' gwyo'e gan' zo Marian' na' gože'ene': —Dioxei. Xancho Diozən' n'zi'ilaže'e le' na' zoe' len le'. Na' gone' par niç socho' mbalaz ca yoguə'əloł no'ol ca' yela'.

²⁹ Cats' ble'i Marian' anglən', benit bechoł goc lo'o yichjla'aždaogüe'ena' por ni che dižə' de'en gože' le'. Na' bene' xbab bi zejen de'en bguape' le' dioxən' ca'.

³⁰ Nach anglən' gože'ene': —Bito žebo' Maria. Diozən' n'zi'ilaže'e le'.

³¹ Na' le' gua' xi'ino', to bi'i byo dao', na' sano'obo', na' əgws'i'olabo' Jeso'os.

³² Na' Jeso'osan' gaque' to beņə' blao na' beņachən' yesə'əsi'ene' Xi'in' Diox, Diox ben' naquə' le'ezełaogüe beņə' blao. Na' Xancho Diozən' gone' par niç nabi'e nasyon Izraelən' can' gwnabia' de'e xaxta'ogüe'e Rei Dabin'.

³³ Na' le' nabi'e nasyon Izraelən' zejlicane. Na' cuat te yelə' gwnabia' che'ena'.

³⁴ Nach gož Marian' anglən': —čNacxa gaquə sana' bdao'? la' bitonə' žaga' nda' beņə' byo.

³⁵ Nach gož anglən' le': —Spirit che Diozən' yidən gan' zo'ona', na' yelə' guac che Diozən' son len le', Diox ben' naquə' le'ezełaogüe beņə' blao. De'e na'anə' bi'i la'aždao' xi'ilaže'an galjəna', yoso'osi'ebo' Xi'in' Diox.

³⁶ Na' beņə' xna'o Chabetən' lecəə baçh bgüenda'obo' lo'o le'ena' la'anə'əczə banaque' beņə' golə. Bagoc xop bio' no'e to bi'i byo dao', len la' gosə'əne' che' de que no'olə güižən'.

³⁷ Bito bi bi de de'e ənacho cui chac gon Diozən'.

³⁸ Nach gož Marian' anglən': —Nga zoa' naca' xmoše', gaquə čhia' con bi na Xana'an. Nach beza' anglən' gan' zo Marian'.

Marian' jalane'e Chabetən'

³⁹ Gwde na' le'e gwyejte Marian' to syoda de'e žia lao ya'a gan' mbane Jodean'.

⁴⁰ Na' b'zine' liž Zequerian', gwyo'e bguape' Chabetən' diox.

⁴¹ Na' goquən' cats' Chabetən' benene' cholgüiž Marian' le' nach gocbe'iteine' chxita' chžia chac bdao' che'ena' lo'o le'ena'. Na' Spirit che Diozən' gwnabi'an yichjla'aždao' Chabetən'.

⁴² Na' gwne' zizjo tant bebeine', na' gože' Marian': —Diozən' babene' par niç zoch'o mbalaz ca yoguə'əloł no'ol ca' yela'. Na' Diozən' gone' par niç gaquə mbalaz che bdao' čhio'ona' no'ona'.

⁴³ Nactecxan' le' naco' xna' Xana'an zedalaño'o nada'.

⁴⁴ Mer cats' bene naga'anə' chguapo' nada' dioxən', bdao' čhia'anə' bebeibo' na' bxitə' bžiabo' lo'o li'anə'.

⁴⁵ Xancho Diozən' bene' par niç anglən' gwne' le' de'en ze'e gaquə na' zo' mbalaz de'en gwyejli'o de que gaquə complir can' gwne'ena'.

⁴⁶ Nach Marian' gwne':

—Cho'elaogua'a Xana' Diozən' do yichj do laža'a.

⁴⁷ Na' lo'o yichjla'aždaogua'an chebeichgüeida' Diox ben' chebej nada' xni'a de'e malən'.

⁴⁸ Babeyaša' beži'ilaže'e nada' naca' xmoše' la'anə'əczə cui bi zaca'a.

Na' dezd na'a žtia žtia beņachən' yesə'əne' de que zoa' mbalaz.

⁴⁹ Diozən' chac gone' de'e cui no zakuə gon, na' babene' de'e güen juisy len nada'.

Le'ena' naque' beņə' la'aždao' xi'ilaže' juisy.

⁵⁰ Na' nota'ətezə beņə' chsa'ape'ene' respet do yichj do lažə'əga'aque',

Diozən' cheyaša' cheži'ilaže'e lega'aque' na' len xi'in' dia čhega'aque'.

⁵¹ Baçh blo'i Diozən' beņachən' yelə' guac che'ena',

na' babene' par niç beņə' ya'alaza' ca' baboso'ozexjw yichjga'aque'ena' laogüe'ena'.

⁵² Babene' par niç beņə' gwnabia' ca' cuich gosə'anabi'e,

na' beņə' ca' cui gwsa'ac beņə' blao, Diozən' bcuie' lega'aque' par gwsa'aque' beņə' blao.

⁵³ Na' beņə' ca' gwsa'acbe'ine' de que chesə'əyazjene' yelə' chaclen che Diozən', bagoclene' lega'aque'.

Na' beņə' ca' gwsa'aque'ne' bitobi chesə'əyazjene',

bose'e lega'aque' sin cui bi bnežjue' lega'aque'.

⁵⁴ Nach bagocwlene' chio'o beņə' Izrael naccho ca xmoše'.

Bablo'ine' chio'o de que bito ganlaže'e par yeyaša' yeži'ilaže'e chio'o can' bene' lyebe.

⁵⁵ Na' de'en beyaša' beži'ilaže'e de'e Abraannə' len xi'in' dia che',

bene' complir can' gože' le' len yebala' xaxta'ocho ca'.

Na' zocze' yeyaša' yeži'ilaže'e xi'in' dia che de'e Abraannə' zejlicane.

⁵⁶ Na' cats' bagoc šon bio' bega'an Marian' len Chabetən' nach beyeje' liže'ena'.

Goljə Juannə' ben' bchoa beņə' nis

⁵⁷ Na' cats' b'zin or par san Chabetən', gwxane' bi'i byo dao' che'ena'.

⁵⁸ Na' cats' gwse'ene beņə' gwliž čhega'aque'ena' na' family čhega'aque'ena' de que Diozən' babeyaša' beži'ilaže'e Chabetən', besyə'əbeichgüeine' len le'.

⁵⁹ Na' ža xon' beṇə' ca' jəsa'əzo'ebo' seṇy de'en ne' sirconsision. Na' zejen de que chse'ejle'e che lyebe de'en ben Diozən' len de'e Abraannə'. Na' gwse'enene' si' labo' Zequeria can' le xabo'onə'.

⁶⁰ Pero xna'abo'onə' gwne': —Nca, cheyalə' si' labon' Juan.

⁶¹ Nach lega'aque' gwse'e le': —Notono family chele nita' beṇə' zjəle ca' na' nic xaxta'ole.

⁶² Nach gwso'one' seṇy gosə'əṇabene' xabo'onə' nac chene'ene' si' la bda'onə'.

⁶³ Nach bene' seṇy gwnəbe' to yag la' dao' gan' bzoje': “Si' labo' Juan.” Nach yogue'e besyə'əbanene'.

⁶⁴ Le'e gocte beṇe Zequerian' na' le'e gwzolaote be'e dižə' be'elaogüe'e Diozən'.

⁶⁵ Na' besə'əžebchgua beṇə' gwliž chega'aque'eno'. Na' xtižə'əga'aque'eno' gosə' gwłaljən doxen yež ca' zjəchi' lao ya'a ca' gan' mbane Jodean'.

⁶⁶ Na' yoguə'əlol beṇə' gwse'enene' dižə'əṇə' gwso'one' xbab lo'o yichjla'ažda'oga'aque'eno' che de'e ca', na' gosə'əne':

—¿Bixa gon bdao' na'anə'?

Gosə'əne' ca' chedə' gosə'əṇezene' de que zoczə Diozən' len lebo'.

Dižə' de'en be' Zequerian'

⁶⁷ Nach gwnabia' Spirit che Diozən' yichjla'aždao' xabo' Zequerian'. Na' Zequerian' be'e xtižə' Diozən' gwne':

⁶⁸ Cho'elaogua' Xanchon' ben' naquə Dioz che chio'o beṇə' Izrael.

Cheyaše'ene' chio'o naccho nasyon' che'

na' babene' par niç gaquə yechojcho xni'a de'e malən'.

⁶⁹ La' babene' par niç zo to beṇə' napə yelə' guac par yebeje' chio'o xni'a de'e malən',

na' za' be'ena' lao dia che de'e Rei Dabin' ben' goquə xmos Diozən'.

⁷⁰ Chac can' gwna Diozən' len cho'a de'e profet ca' beṇə' ca' gwleje' par gwsa'aque' lažə' ne'ena' cana'ate.

⁷¹ Gwne' de que yosle' chio'o lao na' beṇə' contr checho ca'

na' lao na' yoguə' beṇə' chəsə'əgue'i chio'o.

⁷² Na' lecəə gože' de'e xaxta'ocho ca' de que yeyašə' yeži'ilaže'e lega'aque' len xi'in dia chega'aque'.

Na' can' chone' na'a, chone' par niç chac complir ca naquə de'en bene' lyebe gone' par gaqualene' chio'o.

⁷³ Ben Diozən' cuine' testigw lao de'e xaxta'ocho Abraannə'

de que gaquəczə can' bene' lyeben'.

⁷⁴ Na' gwne' de que yosle' chio'o lao na' beṇə' contr ca' par niç ca' gaquə güe'ela'ochone' sin cui žebcho.

⁷⁵ Na' gwne' gone' par niç gaquə la'ažda'ochon' xi'ilažə' par len le'ena'

na' gone' par niç šejcho liča güe'ela'ochone' doxen yelə' mban chechon'.

⁷⁶ Nach Zequerian' gože' bida'onə':

Na' le' xi'ina', beṇəchən' yesə'əne' chio' de que naco' profet beṇə' choe' xtižə' Diozən',

Dioz ben' naquə le'ezełaogüe beṇə' blaο.

Yesə'əne' ca' chedə' le' cuialaogo' lao Xanchon' na' go'o xtiže'ena'

par niç nita' beṇə' probnid par əso'elaogüe'ene' catə'an yide'.

⁷⁷ Egwsed əgwlo'ido' neto' can' chene'e Diozən' yebeje' chio'o xni'a de'e malən'

na' can' chene'ene' yezi'ixene' xtolə'əcho ca',

chio'o naccho beṇə' nasyon che'.

⁷⁸ Diozən' cheyaša' cheži'ilaže'e chio'o na' bachsele'e to beṇə' gaqualene' chio'o.

Na' gwxaquə'əlebe be'ena' ca' be'eni' che bgüižən'.

⁷⁹ Le' gwzejni'ine' chio'o beṇəch naquən' goncho par niç žjəyezochə gan' zo Diozən' catə' gatcho,

na' əgwzejni'ine' chio'o beṇəch naquən' so cuzecho binlo.

Can' gone' cue'e be'eni' lo'o yichjla'aždao' chio'o gwxaquə'əlebecho ca beṇə' chsa'aš lo'o de'e žcholən'.

⁸⁰ Na' Juannə' ca' bcua' chcha'ogüe', zdate chaquəch yichjla'aždaogüe'en can' chene'e Diozən'. Na' Juannə' jsoe' latjə dažən'. Na' nan' ṇezoe' catə'an bžin ža gwzolaogüe' gwđixjui'e xtižə' Diozən' len beṇə' Izrael ca'.

2

Can' goquə catə'an goljə Jeso'osən'

¹ Na' gwde de'e ca', na' ca tyempən' catə'an gwnabia' Sesar Augusto, bene' mendad te cuent na' əsa'ələ' yiš bałə beṇə' ža' to to yež de'e zjəchi' doxen ganə' chnabi'e.

² Na' bguale'e yišən' lao chnabia' Sirenio gan' nzi' Siria. Na' naquən de'e nech de'en bguale'e yiš balə beṇə' ža' to to yež.

³ Nach yogua'əloł beṇə' jəya'aque' lažga'aque' jəsyə'əde cuinga'aque' cuent par gwsa'alə'əga'aque' yiš.

⁴ Nach jwsen' naque' dia che de'e Rei Dabin'. Na' beze'e Nasaret gan' mbane Galilean' par beyeje' syoda che de'e Rei Dabin' de'e nzi' Belen. Na' chi' syoda Belennə' gan' mbane Jodean'.

⁵ Beyeje' jəyede cuine' cuent na' zenche'e no'ol che' Marian', pero bitonə' yəsə'əca'a ljuežje'. Na' Marian' bano'e bda'onə'.

⁶ Na' goquan' lao nite'e Belennə' bžin or par sane'.

⁷ Na' bi'i nechən' gwxxane' goljbo' bi'i byo dao', na' blaže'e'bo' lachə'. Na' gwlo'əbo' to lo'i gan' chsa'o bia yixə', chedə' bito bi latjə gwyo'och mesonnə' par lega'aque'.

Angl ca' boso'ozenene' beṇə' goye xilə' ca' de que bagoljə Goslan'

⁸ Na' lao že' na', le'e yixə' che Belen na'atezəczə ža' beṇə' goye xilə' nečasə'əne'e chsa'ape' xilə' chega'aque' ca'.

⁹ Na' angl che Xanchon' bžine' gan' nita' beṇə' goye xilə' ca', na' yelə' chey che'eni' che Diozən' gwyechjən bse'eni'in gan' nite'enə'. Na' besə'əžebchgüe'.

¹⁰ Na' gož anglən' lega'aque': —Bito žeble, ṇa'a chixjo'ida' le'e to dižə' güen de'e yeba yezaquə'əlažə'əchgua yogua'əloł beṇə'.

¹¹ Lao' syoda che de'e Rei Dabin' bagoljə ṇa'a ben' chac yebej beṇə' xni'a de'e malən'. Naque' Cristən' ben' bselə' Diozən' par gaqualene' beṇəchən' na' naque' Xanchon'.

¹² Par yeželele bda'onə' quinga naquə: Žjəyedi'ilebo' lažə'əbo' lachə' na' debo' lo'i gan' chsa'o bia yixə'.

¹³ Beyož gwna anglən' ca' le'e besə'əžinte angl zanch gan' to angl nechən', za'aque' gan' zo Diozən'. Na' chso'elaogüe'e le', chəsə'əne':

¹⁴ Ledoye'ela'och Diozən' ben' zo yoban'.

Na' lao yežlyon' gata' yelə' so cuełzə binlo entr beṇə' ca' chebei Diozən' lega'aque'.

¹⁵ Na' catə' besyə'əsa'ac angl ca' zjəya'aque' yoban', nach beṇə' goye xilə' ca' gwse' ljuežjəga'aque': —Yeyejcho Belennə' žjəyegüiacho de'en bagoc, ca naquə Xanchon' bselə'e angl quinga bedəsə'ədičjue'ine' chio'o.

¹⁶ Nach besa'acses beṇə' goye xilə' ca' jəya'aque' Belennə', na' jəsyə'ədi'e Marian' len jwsen' na' len bda'onə'. Na' bda'onə' debo' lo'i gan' chsa'o bia yixə' ca'.

¹⁷ Beyož besə'əle'ine' can' bagoquan', na' gwso'e dižə' che bda'onə' len yeziquə'əchlə beṇə' ca naquə de'en gwse' angl ca' lega'aque'.

¹⁸ Na' yogua'əloł beṇə' ca' əgwse'ene dižə' de'en gwsoe' beṇə' goye xilə' ca' besyə'əbanene'.

¹⁹ Na' Marian' leczə gwlo'o yičjhe' yogua'əloł dižə' de'en gwsoe' beṇə' goye xilə' ca' na' bene' xbab lo'o yičhja'əždaogüe'en bi zejennə'.

²⁰ Nach besyə'əsa'ac beṇə' goye xilə' ca' chso'elaogüe'e Diozən' na' chso'e le' yelə' bala'an che yogua'əloł de'en bagwse'enene' na' babesə'əle'ine' ca naquə de'en gož anglən' lega'aque'.

Family che Jeso'osən' jso'əbo' lo'o yo'odao' əblaonə'

²¹ Catə' gwde xon' ža na' jəsə'əzo'əbo' señy de'en ne' sirconsision na' bosə'əsi'e labo' Jeso'os, can' ben anglən' mendad catə' ze'e gua'alə Marian' lebo'.

²² Catə' gwde tyempən' babeyac Marian' xi'ilažə' len bda'onə' segon can' na lein' de'en bzoj de'e Moizezən', nach gosə'əlene'əbo' Jerosalennə' par jso'əbo' lao Diozən'.

²³ Gwso'one' ca' chedə' nyojən le'e lein': "Yogua' bi'i byo dao' bi'i nech cheyalə' gacbo' lao na' Diozən', na' yogua' bia yixə' bia maš dao' bia nech leczə gaquəb lao na' Diozən'."

²⁴ Na' gwso'elaogüe'e Diozən' gwso'one' can' na lei che Xanchon' Diozən', nyojən: "Cheyalə' gotle to csad ngolbexə o čhopə plomxtil."

²⁵⁻²⁶ Na' Jerosalennə' gwzo to beṇə' byo le Simeon. Be'enan' gwyecze' bene' de'e güen lao Diozən' na' be'elaogüe'ene', na' gwleze' batə'əquən' yidə Cristən' ben' gwlej Xanchon' Diozən' par gaqualene' beṇəchən'. Na' Spirit che Diozən' gwzən lo'o yičhja'əždao' Simeonnə'. Na' bzene Spiritən' le' de que antslə ze'e gate' le'ine' Cristən'.

²⁷ Na' Spiritən' benan par nič gwyeye' yo'odao' əblaonə'. Na' zoe' yo'oda'onə' catə' besə'əžin xaxna' Jeso'osən' zjənlene'əbo' par nič so'one' len lebo' can' na lein'.

²⁸ Nach Simeonnə' gwlene'əbo', nach be'elaogüe'e Diozən' gože'ene':

²⁹ Na'a ža Xana' Dioz, bač goc can' gwna'onə'.

Be' latjə yeyeda' binlo gan' zo'onə', nada' naca' beṇə' güen žin čhio',

³⁰ chedə' bable'ida' ben' zedəyelej neto' xni'a de'e malən'.

³¹ Naque' ben' bžio' bia' əgwse'lo'o par yogua'əloł beṇə'.

³² Na' cue'e be'eni' lo'o yičhja'əždao' beṇə' cui zjənaquə beṇə' Izrael par nič se'ejni'ine' xtižə'onə'.

Na' leczə gone' par niç benə' Izrael ca' yesə'əzi'e yelə' bala'an.

³³ Nach xəbo'on len xna'abo'on besyə'əbanene' ca naquə dižə' de'en be' Simeonə' chebo'.

³⁴ Na' Simeonə' gwəbəbene' Diozən' gone' par niç gaquə güen çhega'aque', na' gože' Marian': — Benə' zan benə' Izrael ca' yesə'əbiayi'e çhedə' cui so'onlilaže'e xi'ino' nga, na' zane' yesə'əzi'e yelə' mban zejlicane çhedə' so'onlilaže'ene', na' benə' zan yoso'ožia yoso'onite'ene' cata' yesə'əzene' çhe'.

³⁵ Na' gone' par niç gəchia' non' əgwzenag çhe Diozən' na' non' cui. Na' cəczə ga çaz to cwšiy gaquə lo'o yichjla'aždaogo'onə' tant əžaglaogo' de'en gac çhe'.

³⁶ Na' leczə gwzo to no'olə gwle Añy yo'odao' əblaonə', na' no'olən' cho'e xtižə' Diozən'. Naque' xi'in' de'e Fanuel, na' naque' dia che de'e Aser. Bšagne'e catə'an naque' no'ol güego', pero na' gaž izga bguan be'en çhe'enə'. Na' Añyən' banaque' to benə' gola.

³⁷ Bagoc taplalj tap iz got be'en çhe'enə'. Cuicə chebiže'e yo'odao' əblaonə'. Leçgualə cho'elaogü'e Diozən' do ža do yel, xte gwyaz tgüejə cui gwdaogü'e' par niç benche' orasyon lao Diozən'.

³⁸ Na' goquan' bgüigüə' Añyən' gan' nitə' Jwsen' len Marian', na' be'e yelə' choxcwlen çhe Diozən' de'en baç bsele'e ben' gaquəlen nasyon Izraelən'. Na' be'e dižə' çhe Jeso'osən' len yoguə'əlol benə' ca' ža' Jerosalennə' benə' çesə'əbeze' batə'əquən' əselə' Diozən' ben' gaquəlene' lega'aque'.

Jəya'aque' Nasaretən'

³⁹ Nach Jwsen' na' Marian' cata' beyož gwso'one' yoguə'əlol de'en non lei çhe Diozən' mendad so'one', jəya'aque' lažga'aque' Nasaret gan' mbane Galilean'.

⁴⁰ Na' Jeso'osən' zda chcha'ogü'e' na' zda chdipe'. Na' ca bcua' chcha'ogü'e'enə' zdach chejni'ichene', na' nži'ilažə' Diozən' le'.

Can' ben Jeso'osən' lo'o yo'odao' əblaonə'

⁴¹ Na' xaxne'e ca' yoguə' iz chja'aque' lni pascw de'en çhalə' Jerosalennə'.

⁴² Šižin' ize Jeso'osən' cata' gosə'əche' xaxne'e ca' le' ja'aque' Jerosalennə'. Segon ca costombr çhe benə' Izrael ca' chja'aque' catə' çhalə' lnin'.

⁴³ Na' cata' gwde lninə' xaxne'e ca' besa'aque', pero Jeso'osən' bega'anə' Jerosalennə'. Na' xne'enə' len Jwsen' bito gwsa'acbe'ine'.

⁴⁴ con gwso'one' xbab šə bazjəyede' len bəna' ca' nžagga'aque' txennə'. Na' tža nez babesa'ac xaxne'e ca' gwzola chəsyə'əyilje'ene' entr family na' migw çhega'aque' ca'.

⁴⁵ Pero bito besyə'əželene' le', nach besyə'əbi'e jəya'aque' Jerosalennə' de'e yoblə par žjəsyə'ədilje'ene'.

⁴⁶ Na' goquan' beyon žach besyə'əželene' Jeso'osən' lo'o yo'odao' əblaonə', chi'e gwçol benə' ca' choso'osed choso'olo'i lei de'en bzoj de'e Moizezən'. Jeso'osən' chzenague' xtižə'əga'aque'enə' na' de'e zan çhəbəbene' lega'aque'.

⁴⁷ Na' yoguə'əlol benə' ca' choso'ozenag xtiže'enə' chəsyə'əbanene' çhe yelə' chejni'i çhe'enə' na' can' choži'e xtižə' benə' ca' choso'osed choso'olo'i lein'.

⁴⁸ Na' cata' besə'əle'i xaxne'en le' besyə'əbanene', na' gož xne'en le': —Xi'indaogua'a, žbixçhen' chondo' neto' ca'? Xəo' nga na' nada' bagwdato' beyiljto' le' na' de'e juisy de'e chaqueto'.

⁴⁹ Nach Jeso'osən' gože' lega'aque': —žBixçhen' cheyilje nada'? žEcu'i nezele de que cheyalə' gona' de'en na Xə'anə' gona'anə'?

⁵⁰ Pero xaxne'e ca' bito gwse'ejni'ine' bi zeje de'en gože' lega'aque'enə'.

⁵¹ Na' beyeje' Nasaretən' len xaxne'e ca', bzenague' çhega'aque'. Na' gwlo'o yichj xne'enə' yoguə'əlol de'en goquan'.

⁵² Na' ca naquə' zda gwyejəni'iche Jeso'osən' na' zda gwçha'oche', na' Diozən' zda bebeichene' le' na' leczə ca' benəçhən' zdach besyə'əbeichene' le'.

3

Juan ben' bçhoa nis gwduxju'e dižə' güen dižə' cobə çhe Diozən'

¹ Cata' goc šino' iz çhnabia' Sesar Tiberion', goc Ponsio Pilatən' gubernador çhe Jodean'. Na' goc Erodən' gubernador çhe Galilean', na' goc benə' biše'e Lipən' gubernador çhe Itorea na' çhe Traconite. Na' goc Lisaniə gubernador çhe Abilinia.

² Nach Anas na' Caifas gwsa'əquəche' bçoz əblao çhe benə' Izrael ca'. Iz na' xi'in' Zequerian', ben' gwle Juan, gwzoe' latjə dašən' na' Diozən' be'elene' le' dižə'.

³ Nach Juannə' gwyeje' yoguə'əlol yež de'e zjənyechj zjəmbi'i yao Jordannə', jətxjue'ine' yoguə' benə' de que cheyalə' yesyə'ədinjəne' xtolə'əga'aque'enə' na' yesə'əbanəbene' Diozən' əgwñitlaogü'e'en, na' yesə'əchoe' nis.

⁴ Juannə' bene' can' bzoj de'e profet Isaiazən' ben' be' xtižə' Diozən' cana'. Quinga nan:

To beṇə' əne' zižjo latjə dašan, əne': "Le'e so probnid par əgwzenagle che Xançon' catə'an yide'.

Na' šə sole probnid par əgwzenagle che' catə'an yide',

de'en gonle ca' gwxaquə'əleben can' chonle chxi' chloale nez ca' catə' chidə to beṇə' blao.

⁵ Le'e yoša' yichjla'azda'olen'

par niç gaquan ca to nez güen gan' baboso'ochixe' ya'a yao ca' par beyaquən to leli.

Na' gaquan ca to nez gan' baboso'oxi' baboso'oloe',

na' bagosə'əchogue' xiše'en par beyaquən licha.

⁶ Na' gwšin ža catə' yoguə'əlol beṇə' yesə'əle'ine' ben' selə' Diozən' par yebeje' beṇə' xni'a de'e malən'."

⁷ Na' beṇə' zan ja'aque' gan' gwzo Juannə' par niç bchoe' lega'aque' nisən'. Na' Juannə' gože' lega'aque': —Le'e nacle beṇə' goxoayag na' naljele. ¿Echaquele de que guaquə yexonjele castigon' de'en əselə' Diozən' par le'e?

⁸ Cheyalə' gonle de'en naquə güen par niç sa'acbe'i beṇə' yoblə de que baboša' yichjla'azda'olen'. Na' bito gonle xbab de que Diozən' cui gone' le'e castigw che xtolə'olen' laogüe de'en nacle xi'in dia che de'e Abraannə'. Bito nacho de que lechguale chyažje Diozən' le'e. Guaquə gone' par niç yej quinga yesyə'əyaquən xi'in dia che de'e Abraannə'.

⁹ Ca naquə le'e šə cui chonle can' chazlažə' Diozən', gwxaquə'əlebele ca to yag frot de'e cui bi frot chbian'. Na' ca naquə yoguə'əte yag frot de'e cui bi frot chon, chəsə'əchog beṇə' len na' chasə'əzeye'en.

¹⁰ Nach beṇə' ca' chəsə'əzenag xtiže'enə' gosə'ənabene' Juannə' gwse'ene': —¿Bi ca de'e cheyalə' gonto'?

¹¹ Nach gože' lega'aque': —Ben' napə' chopə xadon, cheyalə' əgwnežjue' ton che beṇə' cui bi bi de che'. Na' leczə ca' ben' de de'e gaogüe', cheyalə' əgwnežjue' che beṇə' cui bi bi de de'e gaogüe'.

¹² Na' catə' beṇə' gochixjw ca' leczə jəsə'əbigue'e par gwchoa Juannə' lega'aque' nis na' gwse'ene': —Maestr; ¿bi ca de'e cheyalə'əch gonto'?

¹³ Na' gože' lega'aque': —Bito əgwchixjwle de mazəchlə ca de'en cheyalə' əgwchixjwle.

¹⁴ Na' beṇə' ca' zjanaque' soldad leczə gosə'ənabene' le' gwse'ene': —¿Chexa neto' ža? ¿Bi ca de'e cheyalə'əch gonto'?

Nach Juannə' gože' lega'aque': —Bitoch əca'ale la fuers de'en de che beṇə', na' nic gacle testigw falš contr beṇə' yoblə par əca'ale xmechga'aque'. Le'e gon banez len laxjwlen'.

¹⁵ Na' beṇə' Izrael ca' gwnitə' lez yidə Cristən' ben' gwlej Diozən' par gaquəlene' nasyon chega'aque'enə', gwsa'aque'ne' lo'o yichjla'az daoga'aque' šə Juannə' naque' be'enə'.

¹⁶ Na' Juannə' goche'ine' xbab chega'aque'enə' na' gože' yoguə'əga'aque': —Nada' de'e li chchoacza' beṇə' nis, pero na' ze'e yidə ben' gone' par niç so Spirit che Diozən' lo'o yichjla'azda'ochon' na' nabi'an chio'o. Na' Spiritən' naquan ca yi' na' gwxi' gwloan yichjla'azda'ochon'. Ben' yida zaquə'əche' ca nada' na' bito zaca'a par gaca' xmoše'.

¹⁷ Be'enan' gone' len chio'o can' choncho catə' chdecho trigon' rner na' chzeycho yix bebən'. Na' šə chonlilažə'əchone' yotobe' chio'o par niç socho txen len le', na' beṇə' ca' cui chso'onjilažə' le' əsele'e lega'aque' lao yi' gabilən' de'en cuiczə cheyol.

¹⁸ Na' de'e zanch de'e gwna Juannə' gwduxjue'ine' lega'aque' dižə' güen dižə' cobən' na' gwneyoine' lega'aque' se'ejle'en.

¹⁹ Nach Juannə' be'e dižə' che gobernador Erodən' ca naquə de'e mal de'en babene'enə' beque'e Erodiasən' ca xo'ole'. La' Erodiasən' naque' xo'olə Lip beṇə' bišə' Erodən'. Na' leczə be'e Juannə' dižə' ca naquə yoguə' de'e malən' babene'.

²⁰ Na' catə' Erodən' benene' can' choe' Juannə' xtiže'enə' na' bene' yeto' de'e mal, gwlo'e Juannə' ližya.

Can' goquə catə'an gwchoa Jeso'osən' nis

²¹ Na' žlac ne'e chchoa Juannə' beṇə' nis, beṇə' zan ja'ac laogüe'enə' par bchoe' lega'aque' nisən' na' len Jeso'osən' gwchoe' nisən'. Na' lao orən' Jeso'osən' bene' orasyon na' le'e byaljwte yoban' na' ble'ine' gan' zo Diozən'.

²² Na' betj Spirit che Diozən' bžinən gwzon len le' na' ca orən' naquan ca to ngol-bexə. Na' gož Diozən' Jeso'osən': —Le' naco' Xi'ina', na' chacchgüeida' chio'. Cheba chezaquə'əlažə'əchgua' le'.

Dia che Jeso'osən'

²³ Na' ca do šichoa ize Jeso'osən' catə' gwzolaogüe' bene' yoguə'əlol de'en zedeyene'. Na' beṇə' ca' gwnitə' na' gwso'one' xbab de que xi'in Jwse na' Jeso'osən'. Na' Jeso'osən' naque' xesoa Eli.

²⁴ Na' Elin' naque' xi'in Matat, na' Matatən' naque' xi'in Lebi, na' Lebin' naque' xi'in Melqui, na' Melquin' naque' xi'in Jana, na' Janan' naque' xi'in Jwse.

²⁵ Na' Jwsen' naque' xi'in Matatias, na' Matatiasen' naque' xi'in Amos, na' Amosen' naque' xi'in Naom, na' Naonnə' naque' xi'in Esli.

²⁶ Na' Eslin' naque' xi'in Nagai, na' Nagain' naque' xi'in Maat, na' Maaten' naque' xi'in Matatias, na' Matatiasen' naque' xi'in Semei, na' Semein' naque' xi'in Jwse, na' Jwsen' naque' xi'in Joda.

²⁷ Na' Jodan' naque' xi'in Joana, na' Joanan' naque' xi'in Resa, na' Resan' naque' xi'in Sorobabel, na' Sorobabelen' naque' xi'in Salatiel.

²⁸ Na' Salatielen' naque' xi'in Neri, na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosannə' naque' xi'in Elmodam, na' Elmodannə' naque' xi'in Er.

²⁹ Na' Erən' naque' xi'in Josue, na' Josuen' naque' xi'in Elieser, na' Elieseren' naque' xi'in Jorim, na' Jorinnə' naque' xi'in Matat.

³⁰ Na' Mataten' naque' xi'in Lebi, na' Lebin' naque' xi'in Simeon, na' Simeonnə' naque' xi'in Joda, na' Jodan' naque' xi'in Jwse, na' Jwsen' naque' xi'in Jonan, na' Jonannə' naque' xi'in Eliaquim.

³¹ Na' Eliaquinnə' naque' xi'in Melea, na' Melean' naque' xi'in Mainan, na' Mainannə' naque' xi'in Matata, na' Matatan' naque' xi'in Natan.

³² Na' Natannə' naque' xi'in Dabi, na' Dabin' naque' xi'in Isai, na' Isain' naque' xi'in Obed, na' Obedən' naque' xi'in Boos, na' Boosen' naque' xi'in Salmon, na' Salmonnə' naque' xi'in Naason.

³³ Na' Naasonnə' naque' xi'in Aminadab, na' Aminadaben' naque' xi'in Aram, na' Arannə' naque' xi'in Esrom, na' Esronnə' naque' xi'in Fares. Na' Faresən' naque' xi'in Joda,

³⁴ na' Jodan' naque' xi'in Jacob, na' Jacobən' naque' xi'in Isaac, na' Isaaquən' naque' xi'in Abraam, na' Abraanna' naque' xi'in Tare, na' Taren' naque' xi'in Nacor.

³⁵ Na' Nacorən' naque' xi'in Serog, na' Seroguən' naque' xi'in Ragau, na' Ragaun' naque' xi'in Peleg, na' Peleguən' naque' xi'in Eber.

³⁶ Na' Eberən' naque' xi'in Sala, na' Salan' naque' xi'in Cainan, na' Cainannə' naque' xi'in Arfacsad, na' Arfacsaden' naque' xi'in Sem, na' Sennə' naque' xi'in Noe, na' Noen' naque' xi'in Lamec.

³⁷ Na' Lamequən' naque' xi'in Matosalen, na' Matosalennə' naque' xi'in Enoc, na' Enoquən' naque' xi'in Jared, na' Jaredən' naque' xi'in Maalaleel.

³⁸ Na' Maalaleelen' naque' xi'in Cainan, na' Cainannə' naque' xi'in Enos, na' Enosen' naque' xi'in Set, na' Setən' naque' xi'in Adan, na' Adannə' naque' xi'in Dioz.

4

Gwxıye'ena' gwlo'oyelə'an Jeso'osən' gone' de'e mal

¹ Na' Spirit che Diozan' gwnabia'an yichjla'azdao' Jeso'osən'. Na' Jeso'osən' beze'e cho'a yao Jordannə', na' Spiritən' benən par niçh gwıyeje' latjə daşən'.

² Cho'a za gwzoe' latjə daşən', na' lao choa žan' gwıye'ena' gwlo'oyelə'an Jeso'osən' gone' de'e malən'. Na' lao de'e choa žan' bitobi gwdaogüe', na' catə' gwde choa žan' gwdone'.

³ Na' gož gwıye'ena' le': —Šə len' naco' Xi'in Diozan', gož yej nga yeyaquən yetxtil.

⁴ Nach gož Jeso'osən' len': —Nyojczə Xtižə' Diozan' nan: “Caguə yelə' guao na'azən' əbanə chio'o beñach sino leczə chyažjecho yoguə'əlo' dižə' de'e na Diozan' par əbancho.”

⁵ Na' gwçhe' gwıye'ena' le' to lao ya'a sibə, na' žalnez blo'in le' yoguə' nasyon de'e zjəchi' lao yežlyon'.

⁶ Nach gožən le': —Doxen yelə' chnabia' de'e de lao yežlyo nga naquən lao na'a. Na' əgwnežjua'an con no che'enda'. Gona' le' yelə' chnabia' chia'anə' na' len' yoguə' de'en naquə güen na' yoguə' de'e naquə de'e žialao chia' ca naquə chnabia'a nasyon ca' de'en zjəchi' yežlyo nga.

⁷ Šə le' güe'elaogo'o nada' yoguə'əlo' de'e quinga əsa'aguən chio'.

⁸ Nach Jeso'osən' gože' gwıye'ena': —Gwçhi'izə' ca'alə nga, Satanas. Nyojczən le'e Xtižə' Diozan' nan: “Cheyalə' šejni'alažə'əcho Xancho Diozan', na' tožə le' güe'ela'ochə.”

⁹ Nach gwıye'ena' gožche'en le' yichjo'o yo'odao' əblao de'en zo Jerosalennə', na' gwlequən le' gan' naquə le'ezelaogüe sibə, na' gožen le': —Šə len' naco' Xi'in Diozan' bexitə' nga par che'elə,

¹⁰ la' nyojczən le'e Xtižə' Diozan':

Eselə' Diozan' angl che' ca' par əsa'aclene' le' na' əsa'ape' le'.

¹¹ Na' leczə ca' nan:

Eso'oxe'le' par niçh bito əçhego'o no yej.

¹² Nach Jeso'osən' gože'en le': —Lezczə ca' nyojczən le'e Xtižə' Diozan': “Bitə con goncho Xancho Diozan' prueb šə leine' can' ne'ena'.”

¹³ Beyoż gotə'əbia' de que cui gwzoi gwxiye'enə' co'oyelə'an Jeso'osən' gone' de'e malən', bebi'izə'an šlož len le'.

Jeso'osən' gwzolaogü'e chyixjui'e dižə' güen dižə' cobə che Diozən'

¹⁴ Nach Jeso'osən' beyeje' Galilean', na' goclen Spirit che Diozən' le' len yelə' guac cheina'. Na' yoguə'əlol beñə' ža' yež de'en nychj mbi'i Galilean' gwse'enene' che Jeso'osən'.

¹⁵ Nach Jeso'osən' bsd blo'ine' lega'aque' lo'o yo'odao' chega'aque' ca' na' yoguə'əlol beñə' ca' gwso'elaogü'e Jeso'osən'.

Bežin Jeso'osən' Nasaretən'

¹⁶ Na' bežin Jeso'osən' Nasaret gan' gwcha'ogü'e, na' ca costombr che' de'e de, gwyo'e yo'oda'onə' ža dezcanzən' na' gwzeche' blabe'.

¹⁷ Na' ben' yo'o lao ne'i yo'oda'onə' bnežjue'ene' rollo gan' nyoj de'en bzoj de'e profet Isaiazən', ben' be' xtižə' Diozən' cana'. Na' Jeso'osən' bsaše' rollon' na' beželene' partən' gan' nyojan:

¹⁸ Zo Spirit che Diozən' len nada',

na' Diozən' gwleje' nada' zedegua'a dižə' güen dižə' cobə len beñə' yašə'.

Na' babselə'e nada' zedeyena' par nič yesyə'əyaclažə' beñə' ca' zjənitə' trist.

Na' zedatixjue'ida' beñə' ca' nita' xni'a gwxiye'enə' de que yebeja' lega'aque' xni'eina'.

Na' zedeyena' par yesə'əle'i beñə' lchol,

na' beñə' chyi' chzaquə', zedeyena' par nič cuich chi' saque'e.

¹⁹ Na' zedetižjui'a de que babžin ža bžin or gaquəlen Diozən' beñə'chən'.

²⁰ Na' hotobə Jeso'osən' rollon' na' bnežjue'en ben' yo'o lao ne'i yo'oda'onə', na' Jeso'osən' gwchi'e. Nach yoguə' beñə' ca' nita' yo'oda'onə' chosə'əgüiachgü'e'ene'.

²¹ Na' gwzola be'e dižə'anə', gwne': —Ža neža bachac can' na Xtižə' Diozən' de'en babenele.

²² Na' yoguə' beñə' ca' gwse'ene dižə' de'en be'enə' besyə'əbanene' catec mba naquə xtižə' Jeso'osən', na' gwso'e dižə' güen che'enə'. Na' gwse' ljuežjga'aque': —Ĵecaguə bengan' xi'in Jwsen'?

²³ Nach gož Jeso'osən' lega'aque': —Šəquə gü'e'ele nada' can' na dicho chelen' de'en na: "Beñə' güen rmech le', beyon cuino'." Na' gü'e'eljalə nada': "De'en babeneto' beno' Capernaum de'e zaquə' yebane beñə', leczə can' cheyalə' gono' lažcho nga."

²⁴ Nach goze'e lega'aque': —De'e li chnia' le'e, beñə' gwlaž che beñə' gü'e' xtižə' Diozən' bito chse'ejle'e che'.

²⁵ Can' goquə ca tyemp che profet Liazən' bito bi bi yejw goquə šon iz yo'o gašja, na' goc bgiin juisy chega'aque' doxen gan' zelao mbane Izraelən'. De'e li chnia' le'e, gwnitə' zan no'olə gozebə Izraelən' cana'.

²⁶ Pero bito bselə' Diozən' Liazən' par gaquəlene' ni to lega'aque'. Bselə'ene' yetolə yež de'en nzi' Sarepta ga mbane Sidon par goclene' to no'olə gozebə.

²⁷ Na' leczə can' goquə tyemp che de'e profet Lesion' gwnitə' zan beñə' Izraelən' beñə' gwsa'acsəne len yizgü'e' de'en ne' lepr. Ni to lega'aque' cui beyon Lesion'. Tozə Naaman beñə' Siria beyon Lesion'.

²⁸ Na' yoguə' beñə' ca' ža' yo'oda'onə' cata' gwse'enene' dižə' quinga besə'əža'achgü'e'.

²⁹ Na' le'e besyə'əzožə'ate' na' besyə'əbeje' Jeso'osən' syodan' na' gosə'əche'ene' to lao ya'a galə'əzə gan' chi' syodan' gwse'ene'ene' yoso'oxope'ene' par che'elə, pero bito goquə bi so'onene' le'.

³⁰ Con beza' Jeso'osən' bedie' gwcholga'aque'enə'.

Jeso'osən' bebeje' de'e xio' de'en yo'o yaz yichjla'aždao' to beñə'

³¹ Na' jsoe' syoda Capernaum gan' mbane Galilean'. Na' yoguə' ža dezcanzən' bsd blo'ine' beñə' ca' ža' lo'o yo'oda'onə'.

³² Na' beñə' ca' besyə'əbanene' ca naquə de'en bsd əblo'ine' lega'aque' chedə bsd blo'ine' lega'aque' ca' aczə to beñə' hansed gažjw gwche'.

³³ Lo'o yo'odao' na' gwzo to beñə' yo'o yaz de'e xio' yichjla'aždaogü'e'enə'. Na' bgosya'an be'enə' gwnan:

³⁴ —Ljoyeto'onə'. Partlə le', partlə neto' Jeso'os beñə' Nasaret. Ĵezedežiaiyo' neto'onə'? Nezczəto' no le': Le' naco' beñə' la'aždao' xi'ilažə' juisy na' Diozən' bselə'e le'.

³⁵ Jeso'osən' gwdile' de'e xi'onə' na' gože'en: —Sšago'. Bechoj yichjla'aždao' bengə.

Na' bchix de'e xi'onə' be'enə' gwchol beñə' ca' zjəžə'ana' nach bechojan, pero bito benen le' zi'.

³⁶ Na' lechguəle besyə'əbane beñə' ca' nach gwse' ljuežjga'aque': —Nactequən' con gwne' ca' na' bechoj de'e xi'onə' de'en yo'o yaz yichjla'aždao' be'enə'. Nacbia' nape' yelə' chnabia' na' yelə' guac de'en chone' mendad yesyə'əchoj de'e xio' ca' na' chesyə'əchojan.

³⁷ Na' ca naquæ de'en ben Jeso'osan' gosæ gwlaļǝ dižæ'anæ doxen Galilean', na' len yež ca' de'en zjanyechj zjæmbi'i galæ'æza Galilean'.

Jeso'osan' beyone' taobi'in che Simonņæ'

³⁸ Na' catæ' beze'e yo'oda'onæ', na' gwyeje' liž Simonņæ'. Na' taobin' che Simonņæ' chacšenene' yo'ochgüe' de'e la na' gwso'olgüize' Jeso'osan' yeyone' no'olan'.

³⁹ Na' Jeso'osan' gwzeche' cuite' gan' de'enæ' na' bcheque'e gwðile' de'e lanæ' par bechojæn no'olan'. Nach taobi'in che Simonņæ' le'e beyaste' na' goclene' beņæ' ca'.

Jeso'osan' beyone' beņæ' zan

⁴⁰ Na' catæ' bachen bgüizæn', yoguæ' beņæ' gosæ'æche'e con beņæ' chse'i gwde gwde yižgüe' jso'ene' lao Jeso'osan'. Na' Jeso'osan' gwxoæ ne'en yichj to toga'aque' na' beyone' lega'aque'.

⁴¹ Na' leczæ bebej Jeso'osan' de'e xio' ca' zjæyo'o zjæyaz lo'o yichjla'adzao' beņæ' zan ca'. Na' besyæ'æchojæn gosæ'anæn zižjo: —Len' naco' Xi'in Diozæn'.

Jeso'osan' gwðile' lega'aquan na' bito be'e latjæ yesæ'anen chedæ' zjæņezcen de que naque' Cristæn' ben' gwlej Diozæn' par gaquælene' beņachæn'.

Jeso'osan' gwde' doxenla Galilean' bsd blo'ine'

⁴² Na' beteyo catæ' gwye'eni', beze'e na' gwyeje' to latjæ gan' notono nla'. Na' beņæ' ca' besyæ'ayilje'ene' na' ja'aque' gan' zoe'enæ'. Na' bito gwse'enene' yeza' Jeso'osan' lažga'aque'ena'.

⁴³ Jeso'osan' gože' lega'aque': —Leczæ beņæ' ca' nitæ' syoda ca' yela' cheyaļæ' žjætixjue'iga'acda'ane' dižæ' güen dižæ' cobæn' de que Diozæn' nabi'e con nota'æteza beņæ' æsoe' latjæ. Diozæn' bsele'e nada' par niç žjætixjue'iga'acda'ane'.

⁴⁴ Ca' goquan' Jeso'osan' gwde' to to yežæn' gan' mbane Galilean' na' lo'o yo'odao' chega'aque' ca' bsd blo'ine' lega'aque'.

5

Jeso'osan' bene' par niç gosæ'æzene' bia zan beļya'a

¹ Na' goquan' lao zecha Jeso'osan' cho'a nisdæon' de'en nzi' Genesaret, gosæ'æbiguæ' beņæ' zan par bosso'ozenague' xtižæ' Diozæn' de'en be'enæ'.

² Na' Jeso'osan' ble'ine' nita' chopæ barcw dao' cho'a nisæn'. Na' beņæ' gwxen beļ ya'a ca' baç besæ'æžaše' lo'o barcw ca' na' bachesyæ'ayibe' yixjw beļ chega'aque'ena'.

³ Na' Jeso'osan' gwyo'e lo'o barcw che Simonņæ' na' gwnabene' le' gocwlen par niç bžigüe'e barcw che'enæ' latæ' lo'o nisæn'. Na' gwche' Jeso'osan' lo'o barcon' nach bsd blo'ine' beņæ' ca'.

⁴ Na' ca beyož be'e dižæ'anæ' nach gože' Simonņæ': —Bžigüæ'æch barcw chio'onæ' gan' naquæ nisæn' zitjoch, na' le'e ægwzala' yixjw chelen' par senle' beļæn'.

⁵ Nach Simonņæ' gože' Jeso'osan': —Maestr, habento' žin bedo yel na' ni to cono no bdole'eto'. Pero laogüe de'e bagwnao' le' ca', yozsala'æchto' yixjw quinga.

⁶ Na' bosæ'azale'e yixjw chega'aque'ena', na' catæ' besyæ'æbejga'aque'en zjænža'achan beļæn' yeza' yesæ'æchezæn'.

⁷ Na' beņæ' ca' gwnita' lo'o barcw che Simonņæ' gwsa'axe' beņæ' ljezežjga'aque' ca' zjæža' lo'o barcon' yeto par æžjse'eclene' lega'aque'. Na' catæ' besæ'æžin beņæ' ca' na' bosyo'osša'ache' barcw ca' xte ca' baç gwzolao chse'tjan xan nisæn'.

⁸ Nach Simonņæ' ben' leczæ le Bed catæ' ble'ine' can' goquan', bzo xibe' lao Jeso'osan' na' gože'ene': —Bebi'izæ'æšga len nada' Xana', chedæ' la' naca' to beņæ' güen de'e mal.

⁹ Gwne' ca' chedæ' le' txen len beņæ' ca' ža'alene' lo'o barcon' besyæ'æbanchgüeine' ca' naquan' gosæ'æzene' beļ zan ca'.

¹⁰ Na' leczæ ca' besyæ'æbane xi'in Sebedeon' chopæ bišæ'æte Jacobæn' len Juanna', beņæ' ca' chso'on žin txen len Simonņæ'. Nach Jeso'osan' gože' Simonņæ': —Bito žebo'. Le' naco' beņæ' gwxen beļ. Pero na'a gaco' beņæ' güe' xtiža'a, na' gono' par niç so'ombia' beņæ' nada'.

¹¹ Na' catæ' besyæ'æžinlene' barcw ca' yo biž, gosæ'æbejyichje'en na' len yoguæ' šinlažga'aque' nach jæsæ'ænaogüe' Jeso'osan'.

Jeso'osan' beyone' to beņæ' che'i yižgüe' de'en nzi' lepr

¹² Na' goquan' catæ' zo Jeso'osan' to syoda, bžin to beņæ' chacšenchgüeine' len yižgüe' de'en ne' lepr. Na' be'enæ' catæ' ble'ine' Jeso'osan' bzo xibe' laogüe'ena', na' belgüize'ene' gože'ene': —Xana', gonšgüei ben par niç yeyacda'.

¹³ Nach Jeso'osan' bli' ne'enæ' gwðane'ene' na' gože'ene': —Guacczæ beyaque.

Na' le'e beyacteine' ca' naquæ yižgüe' de'en che'ine'ena'.

¹⁴ Na' Jeso'osan' bene' mendad ni tozæ cui no no güe'elene' dižæ' ca' naquæ de'en babene' len le', na' gože'ene': —Gwyej lao bxožæn' niç le'ine' de que baç beyacdo'. Na' gwnežjo'one' to bia yixæ' gote' lao Diozæn' ca' de'en non de'e Moizežæn' mendad par niç yesæ'æņeze beņæ' de que babeyacdo'onæ'.

¹⁵ Na' t̄za t̄za gwdach dižā' ca naquā miḷagr ca' de'en chon Jeso'osān'. Na' beṇā' zan besā'adopā besā'əzague' par boso'ozenague' xtižā' Jeso'osān' na' par niḥ beyone' con beṇā' ca' chsa'acšene ca naquā yižgüe' de'en chse'ine'.

¹⁶ Na' t̄ši'i güejā bechoj Jeso'osān' beyeje' latjā dašān' par jāyene' orasyonṇā'.

Jeso'osān' beyone' to beṇā' nat to part cuerp che'ena'

¹⁷ Na' goquān' to ža zo Jeso'osān' lo'o yo'o gan' zoe'ena' chsed chlo'ine' beṇā'. Na' galā'əzā zjāchi' to chopā beṇā' Izrael beṇā' ca' babesā'əchoj zjānzi' fariseo por ni che can' choso'osed choso'olo'ine'. Na' yebaḷā beṇā' choso'osed choso'olo'i lei de'en bzoj de'e Moisezan' zjālene' lega'aque'. Beṇā' ca' ža' na' za'aque' yoguā'əloḷ yež gan' mbane Galilean' len Jodean', na' lecza bāle' za'aque' syoda Jerosalennā'. Na' boso'ozenague' dižā' de'en be' Jeso'osān'. Na' yelā' guac che Xancho Diozān' gwzon len Jeso'osān' par beyone' beṇā' güe' ca'.

¹⁸ Na' besā'əžin xonj beṇā' zjālene' to beṇā' nat to part cuerp che'ena', zjānxoe'ene' to lao cam dao'. Na' gwsa'acḷaze'e yesā'ədie' na' əžjso'ene' lao Jeso'osān'.

¹⁹ Na' tant beṇā' zan ža' caguā goqua yesā'əžinlene' beṇā' güe'ena' gan' zo Jeso'osān'. Na' beṇā' ca' gwse'epe' yichjo'olā par boso'osaljue' na' boso'oletje'ene' len xcame'ena' niḥ bžine' lao Jeso'osān' gwchol beṇā' zan ca'.

²⁰ Ca naquā gocbe'i Jeso'osān' de que gwso'onḷilaže'ene', gože' beṇā' güe'ena': —Babezi'ixena' xtolə'ona'.

²¹ Na' beṇā' ca' choso'osed choso'olo'i lei de'en bzoj de'e Moisezan' na' beṇā' fariseo ca' gwzolaḷ chso'one' xbab: "Benga chžia chnite'e Diozān' de'en chon cuine' ca Dioz. Notono no gaquā yezi'ixen xtolə' beṇā'chān' šā caguā tozā Diozān'."

²² Jeso'osān' gocbe'ine' xbabān' de'en gwso'one'ena' nach gože' lega'aque': —¿Bixčhen' chonḷe xbabān' ca' lo'o yichjla'azda'olena'?

²³ Ša con yapa'ane' de que babezi'ixena' xtolə'ena', bito nezele šā napa' yelā' gwnabia' par yezi'ixena'an. Pero šā yapa'ane': "Gwyas na' gwda", guatā'əbia' šā napa' yelā' gwnabia'ana' par gaquā can' nia'ana'.

²⁴ De'e nga gona' par niḥ ənezele de que napa' yelā' gwnabia' lao yežlyo nga par yezi'ixena' xtolə' beṇā'chān', nadan' naca' ben' bseḷe' Diozān' golja' beṇā'ch.

Nach gože' beṇā' güe'ena': —Gwyas, beyoa' xcamo'ona' na' beyej ližo'ona' to šao' to güen.

²⁵ Na' le'e gwyasseste be'ena', chosā'əgüiate' beṇā' ca' nitā'ana'. Nach beyoa' xcame'ena' gan' xoe'ena' beze'e zjāyede' liže' cho'elaogüe'e Diozān'.

²⁶ Na' yoguā'əloḷ beṇā' ca' ža'ana' besyā'əbanene' na' gwso'elaogüe'e Diozān'. Na' do chžebga'aque' gosā'ane': —Na'a bable'icho to de'e zaquā' yebanecho.

Jeso'osān' gwleje' Lebin' par gwlene' disipl che' ca'

²⁷ Gwde na' beza' Jeso'osān' na' ble'ine' to beṇā' gočixjw beṇā' le Lebi, chi'e latjā gan' chčixijue'ena'. Na' Jeso'osān' gože'ene': —Da len nada'.

²⁸ Nach be'ena' le'e gwzožā'ate' gwlejjichje' yoguā' šinlaze' na' gwyejlene' Jeso'osān'.

²⁹ Nach Lebin' bene' to lni xen liže'ena' par Jeso'osān'. Na' ja'ac beṇā' zan beṇā' gočixjw ca' na' beṇā' yezi'ixena'əchlā na' gosā'əbe'elene' lega'aque' cho'a mesān' par gwsa'ogüe'.

³⁰ Na' beṇā' ca' choso'osed choso'olo'i lei de'en bzoj de'e Moisezan' na' len beṇā' fariseo ca' gwsa'acyože' disipl che Jeso'osān', gwse'e lega'aque': —Malān' chonḷe che'ej chaole txen len beṇā' gočixjw na' nochlā beṇā' güen de'e mal ca' beṇā' cui chonḷento' txen.

³¹ Jeso'osān' gože' lega'aque': —Beṇā' cui chsa'acšene bito chasā'əyāžjene' beṇā' güen rmech. Beṇā' ca' chsa'acšene lega'aque'ena' chasā'əyāžjene' beṇā' güen rmech.

³² Nada' za'a zedayena' par niḥ beṇā' ca' zjāneze de que zjānaque' beṇā' güen de'e mal yesyā'ədinjene' xtolə'əga'aque'ena', pero bito zedeyena' par niḥ beṇā' ca' chsa'aque' bazjānaque' beṇā' güen yesyā'ədinjene' xtolə'əga'aque'ena'.

Gosā'əbanene' Jeso'osān' bixčhen' bito gwleje' tgüejā cui əse'ej əsa'ogüe'

³³ Nach yebaḷā beṇā' gwse'ene': —Zan las neto' disipl che Juannā' na' lecza ca' disipl che beṇā' fariseo ca' chzoto' sin cui che'ej chaoto' par cho'ela'oto' Diozān' na' chonczəto' orasyon. Pero na' disipl čhio' ca' chse'ej chsa'ogüe'. ¿Bixčhen' ža'?

³⁴ Nach gož Jeso'osān' lega'aque': —Cata' chac to yelā' gošagna' beṇā' migw che be'ena' chšagna'ana' chse'ej chsa'ogüe'. Na' ca'aczān' naquān len nada' na' len disipl čhia' ca', chse'ej chsa'ogüe' lao ne'e zoa' len lega'aque'.

³⁵ Cata'əchān' əžin ža yesā'əche'əxāj beṇā' contr čhia' ca' nada', cana'achān' əchoj catā' bito əse'ej əsa'o disipl čhia' ca'.

Jeso'osān' gwne' ca' bsaquā'əlebe cuine' ca beṇā' gošagna', na' disipl che' ca' ca beṇā' migw che beṇā' gošagna'ana'.

³⁶ Na' gozo'elene' lega'aque' to jempl par niḥ gwsa'acbe'ine' de que bito gaquā yesā'ənaogüe' costumbr gol čhega'aque' na' yesā'ənaotie' de'en chsed chlo'ine'. Gože'

lega'aque': —Notono beṇə' zo beṇə' ch̄cheze'e xa cobe'en na' yode'en xa gole'enə'. Šə gone' ca' la' gw̄xinje' xa cobe' na'ana' na' xa gole'en bito gaquən lebe len pedas xa cobe'enə'.

³⁷ Na' lec̄zə ca' notono zo beṇə' ch̄gue'e bino cobən' lo'o yid golə. Šə gone' ca' ža, bino cobən' əcheza'an yid golən' na' laljə binon' na' cuiayi' yidən'.

³⁸ Cle la' cheyaḷə' que'e bino cobən' lo'o yid cobə.

³⁹ Na' ca' naquə beṇə' baḅh yo'olaogüe' che'eje' bino golən' bito yene'ene' ye'eje' bino cobən', cheda' əne': "Bino golən' naquəchən güen." Lec̄zə can' naquən len beṇə' baḅh yo'o yichje' costombr gol che'enə', bito yene'ene' gwzenague' che de'e cobən'.

6

Ža dezcanz boso'olechj disipl ca' trigon' par gwsa'ogüe'en

¹ Na' gozaquən to ža dezcanz Jeso'osən' gwdie' len disipl che' ca' gan' nyaž trigon'. Nach disipl che' ca' gosə'əlechje' trigon', na' gosə'əxobe'en, na' gwsa'ogüe'en.

² Nach besə'əle'i baḷə beṇə' fariseo ca' can' gwso'on disipl ca' na' gwse'e lega'aque': —žBixchen' chonle de'en bito de lsens goncho ža dezcanzən'?

³ Na' Jeso'osən' gože' lega'aque': —žEcabi za'alažə'əle de'en bablable can' ben de'e Rei Dabin' cata' le' na' beṇə' ljuežje' ca' gosə'ədone'?

⁴ Gwyeje' lo'o yo'oda'o əblaonə' na' gwxi'e yetxtil de'en bazjəncua' b̄xoz ca' par Diozən', na' gwdaogüe'en len beṇə' ljuežje' ca' la'anə'əczə cui zjənaque' b̄xoz. Na' yetxtilən' cui de lsens par ga'o con to beṇə' len, letg b̄xoz ca' chac əsa'ogüe'en.

⁵ Na' lec̄zə gwna Jeso'osən': —Naquən lao na'a ənia' bin' naquən güen goncho ža dezcanzən', nada' naca' ben' bseḷə' Diozən' golja' beṇəḅh.

Beyaque to beṇə' mbižə šla'a ne'en

⁶ Na' yeto ža dezcanz gozeje' lo'o yo'oda'onə' na' bsd blo'ine' beṇə' ca' ža'ana'. Na' entr beṇə' ca' ža'ana' len to beṇə' bambižə ne'e lichen'.

⁷ Na' beṇə' ca' choso'osed choso'olo'i lei de'en bzoj de'e Moizezən' na' beṇə' fariseo ca' nite'e na' chosə'əgüiateze' Jeso'osən', chəsə'əbeze' šə goyone' be'enə' ža dezcanzən' par niḅh əsa'ogüe' xya contr le'.

⁸ Na' gocbe'i Jeso'osən' xbab chega'aque'enə' na' gože' ben' mbižə ne'inə': —Da ngalə.

Nach bgüigua' be'enə' gwzeche' laogüe'enə'.

⁹ Na' Jeso'osən' gože' lega'aque': —Le'e gonšc xbab chelen' naquən' na' lein'. žEnan goncho de'e güen ža dezcanzən', o šə nan goncho de'e mal? žEnan goncho par niḅh cui sa'at beṇə' o šə nan goncho par niḅh sa'ate'?

¹⁰ Jeso'osən' bgüie' yogue'e nach gože' be'enə': —Bli na'onə'.

Nach bli na' be'enə', na' beyaquen.

¹¹ Na' beṇə' ca' choso'osed choso'olo'i lein' na' beṇə' fariseo ca' lechgualə besə'əže'e, na' gwzola'o boso'oxi'e entr lega'aque' naclə so'one' len Jeso'osən'.

Jeso'osən' gwleje' šiz̄in beṇə' bsi'e apostol

¹² Na' to ža gozej Jeso'osən' lao ya'an jene' orasyon. Na' bedo yel bene' orasyon lao Diozən'.

¹³ Na' cata' gwye'eni'inə' bolgüiže' disipl ca' par gosə'əbigue'e gan' zoe'enə' nach gwleje' šiz̄ine' na' əbsi'e lega'aque' apostol.

¹⁴ Na' beṇə' quingan' gwleje': Simon ben' bsi'e Bed, na' Ndreš beṇə' bišə' Bedən', na' Jacob, na' Juan, na' Lip, na' Bartolome,

¹⁵ Na' Matio, na' Tomas, na' Jacob xi'in Alfeo, na' Simon Selote,

¹⁶ Na' Jodaš xi'in Jacob, nach Jod Iscariot ben' əbdie' Jeso'osən' lao na' beṇə' contr ca'.

Jeso'osən' bzejni'ine' beṇə' dao' beṇə' zil

¹⁷ Na' beyetje' ya'ana' len lega'aque' na' gwzeche' gan' naquə lašə' len disipl che' ca'. Na' lec̄zə nita' beṇə' zan beṇə' za'ac doxen Jodean', do Jerosalennə' na' do gan' mbane Tiro na' Sidon. Na' Tiron' len Sidonnə' zjəchi'in cho'a nisdə'onə'. Na' entr beṇə' ca' nita' choso'ozenag xtižə' Jeso'osən' zjəlen baḷə beṇə' chse'i yižgüe', na' Jeso'osən' beyone' lega'aque'.

¹⁸ Na' beṇə' ca' zjəyo'o zjəyaz de'e xio' yichjla'aždaoga'aque'enə' Jeso'osən' bebeje' de'e xio' ca' zjəyo'o zjəyaze'.

¹⁹ Na' yogua' beṇə' besə'əyiljlaže'e naclə so'one' par niḅh yesə'əlapə' na'aga'aquen' le' cheda' len yelə' guac che'enə' chone' par chega'a yižgüe' de'en chse'i to toga'aque'.

Non' zo mbalaz na' non' cui zo mbalaz

²⁰ Na' Jeso'osən' gwliš laogüe'enə' bgüie' disipl che' ca' na' gože' lega'aque': —Mbalaz zo le'e beṇə' yašə' cheda' cho'ele latjə chnabia' Diozən' le'e.

²¹ Mbalaz so le'e chdonle na'a, cheda' gwžin ža cata' cuich tonle.

Na' mbalaz so le'e chbežle na'a, cheda' Diozən' gone' par niḅh yebeile.

²² Nada' naca' ben' bselə' Diozən' golja' beṇaḥ. Na' mbalaz sole šə por ni che de'en chonlilaža'əle nada' chəsə'əgue'i beṇə' le'e, na' šə chesyə'əbeje' le'e lo'o yo'odao' chega'aque'enə', na' šə choso'ožia choso'onite'e le'e, na' šə chəsə'əne' de que nacle beṇə' mal.

²³ Leyebichgüei catə'an chac de'e quinga, na' le'e so mbalaz, chedə' Diozən' gone' par niḥ gaquəḥgua de'e güen chele cats' yeziṇle gan' zoe'enə'. Can' chso'onene' le'e ca'aczən' gwsə'one de'e xaxta'oga'aque'enə' de'e profet ca' gwsə'oxtiža' Diozən' cana'.

²⁴ Pero probḥguazə le'e beṇə' gwni'a. Chac güen chele na'a, pero caguə par zejlicənən' gaguə güen chele.

²⁵ Probḥguazə le'e dechgua de'e chaole na'a. Gwžin ža catə' cuich bi gatə' chele.

Probḥguazə le'e zole legr na'a. Gwžin ža catə' yegüine'ele na' cuežyašə'əle.

²⁶ Probḥguazə le'e chso'elao' yoguə'əloḷ beṇə' le'e. Ca'aczən' gwsə'elao' de'e xaxta'oga'aque'n' profet goxoayag ca'.

Cheyala' gaquecho che beṇə' contr checho

²⁷ Pero le'e chzenagle chia', le'e gaque che beṇə' contr chele ca', le'e gontezə le'e gon de'e güen len beṇə' ca' chəsə'əgue'i le'e.

²⁸ Le'e nabtezə le'e nab par niḥ beṇə' ca' chso'on contr le'e nite'e mbalaz. Le'e so le'e gon orasyon par beṇə' ca' choso'ožia le'e xyəḥol.

²⁹ Šə to beṇə' tie' xaguə'əlen' šla'a, le'e güe' de'en yešla'a. Šə to beṇə' əque'e xadon chelen' la fuers, le'güe' latjə chine' len xcamislen'.

³⁰ Notə'ətezə beṇə' bi nabene' le'e, gwnežjwlene'en. Šə to beṇə' əque'e bitə'ətezə de'en de chele, bito yəṇablen.

³¹ Con yoguə' de'e güen de'e chene'ele so'on beṇaḥən' len le'e, con ca'atezəczən' cheyalə' gonle len lega'aque'.

³² Šə porzə chaquele che beṇə' ca' chsa'aque chele, žbixa yejlaotgualen'? Le'egatezə ca' chso'on beṇə' güen de'e mal ca', chsa'aque' che beṇə' ca' chsa'aque chega'aque'.

³³ Leczə šə chonle de'e güen porzə len beṇə' ca' chso'on de'e güen len le'e, žbixa yejlaotgualen'? Le'egatezə can' chso'on beṇə' güen de'e mal ca'.

³⁴ Šə porzə chbejle bi de'en chbejle len beṇə' sole lez yesyə'əyone'en le'e, žbixa yejlaotgualen'? Le'egatezə can' chso'on beṇə' güen de'e malən', chesə'əbeje' bi de'en chesə'əbeje' ljuəžjga'aque' na' nite'e lez yesyə'ənežjue'en.

³⁵ Pero na' le'e ža, le'e so le'e gaque che beṇə' contr chele ca', na' le'e so le'e gon de'e güen. Na' le'e so le'e cuej bi de'en cuejle beṇə' na' bito sole lez yesyə'əyone'en. Šə gonle ca', gwlo'ele de que nacle xi'in Dioz ben' naquə le'ezelaogüe beṇə' blaο, na' Diozən' gone' le'e yelə' bala'an xen. Le'enə' naque' gaxjwlaža' len beṇə' ca' cui chso'e yelə' choxwlen che' na' yeziqusə'əchlə beṇə' güen de'e mal ca'.

³⁶ Cheyalə' yeyašə' yeži'ilaža'əle ljuəžj beṇaḥle ca' Xachon' ben' zo yoban' cheyašə' cheži'ilaže'e yoguə' beṇaḥən'.

Bito cheyalə' nacho che beṇə' de que žjanape' dolə'

³⁷ Bito gonle xbab de que zaquə'əle par ḥoglaolen che beṇə' de que žjanape' dolə'. Šə ḥoglaolen che beṇə' de que žjanape' dolə', le'egatezə ca' Diozən' ḥoglaogüe'en chele de que nape dolə'. Na' bito bi yosbague'ele beṇə' de que žjanape' dolə' par niḥ Diozən' bito bi yosbague'ene' le'e de que nape dolə'. Le'e so le'e yezi'ixen che beṇə' par niḥ Diozən' yezi'ixene' chele.

³⁸ Le'e so le'e gwnežjo beṇə' šə bi de'en chəsə'əyažjene'. Can' chso'on balə beṇə' leḥgualə nale'e choso'ochixə' bi de'en chso'ote'e, chosə'əchšiše'e lao medid chega'aque'en na' choso'osi'inse'en na' chso'one' xte ca chezoya'an, ca'aczən' cheyalə' gonle gwnežjwle bi de'en chəsə'əyažje beṇə' par niḥ leczə ca' gon Diozən' len le'e.

³⁹ Nach Jeso'osan' be'elene' beṇə' ca' ža'anə' yeto jempl. Na' bsaquə'əlebene' beṇə' fariseo ca' na' beṇə' ca' choso'osed choso'olo'i lein' ca beṇə' lḥol chedə' bito gwse'ejni'ine' de'en naquə de'e li na' de'e na'anə' bito goquə yoso'osed yoso'olo'ine'en beṇə' yoblə. Na' gwne' —žEguaquə to beṇə' lḥol cue'e nez yeto beṇə' lḥolən'? Bito gaque'. Nezecho de que txeṇ žjasə'əbiḥe' to lo'o yech.

⁴⁰ Šə to beṇə' chsede' len to maestr, bito nacho gaguə əgwsedene' maestrən'. Na' la'anə'əczə šə ben' chsed ta' yichje' yoguə'əloḷ de'en əgwlo'i maestrən' le', bito gaque' beṇə' si'inch ca maestrən', sino cachozəczə gaque'.

⁴¹ Chle'ile güe' dao' de'en žia cožə' beṇə' ljuəžjle na' cabi chele'ile güe' xen de'en žia cožə'əlen'.

⁴² Che' beṇə' ljuəžjle: "Be' latjə gona' rmech güe' daon' de'en žia cožo'o", na' bito chonle rmech güe' xen de'en žia cožə'əlen'. Beṇə' goxoayag le'e, zgua'atec le'e gon rmech güe' xennə'

de'en žia cožə'əlen' na' techlə ənezele bi rmechən' chyažjele par gonle rmech güe' daon' de'en žia cožə' beṇə' ljuējžen'.

De'en choncho chlo'in bin' yo'o lo'o yichjla'ažda'ochon'

⁴³ Bito načo de que to yag frot güen chbian frot de'e cui naquə güen, na' nic ənačo de que yag frot de'en cui naquə güen chbian frot güen.

⁴⁴ Segon can' naquə frot de'en chbia to to yaguən' nezecho bi cłas yaguən'. Yag yešə' bito chbian yixgüion', nic yag bisga' chbian obas.

⁴⁵ To beṇə' la'aždao' xi'ilažə' chone' de'e güen, chedə' la' can' nan lo'o yichjla'ažda'ogüe' nan' chone'. Na' ben' chon de'e mal chone' ca' chedə' chzenague' che la'ažda'omale'ənə'. Na' yoguə'əte dižə' de'en chchoj cho'achon' la' lo'o yichjla'ažda'ocho na'anə' za'an.

Chopə beṇə', na' yo'o de'en gwso'on to toe'

⁴⁶ Bixchen' che'ele nada' "Xana'", na' cui chonle can' nona' mendadən'?

⁴⁷ Na'a nia' le'e can' gwxaquə'əlebe yoguə' non' nao nada' na' chzenague' xtiža'anə' na' chone' can' nona' mendadən'.

⁴⁸ Gwxaquə'əlebene' ca to beṇə' ben yo'o. Na' gwche'ene' zitjw gwleque' lan yo'onə' de'en naquə de'e gual. Na' catə' bchojchgua yaonə', gwyechjən liže'ənə' na' bito bebixən cuiayi'in, chedə' gwzo chechchguan.

⁴⁹ Na' yoguə' non' cui chzenague' che xtiža'anə' gwxaquə'əlebene' ca yeto beṇə' ben yo'o. Con bene'en lao yo na'azə sin cui bi lanei gwleque'. Na' catə' bchojchgua yaonə' gwyechjən liže'ənə', na' bebixən gwžiyai'iteczən.

7

Jeso'osən' beyone' xmos to capitan

¹ Na' catə' beyož be' Jeso'osən' dižə'an len beṇə' ca', beyeje' Capernaunnə'.

² Na' zo to capitan beṇə' bito naque' beṇə' Izrael, na' zo to xmosə' chacsenchgüeine' na' yezežə gate'. Na' capitannə' chacchgüeine' che'.

³ Na' catə' bene capitannə' dižə' che Jeso'osən', bsele'e bałə beṇə' golə beṇə' blao che beṇə' Izrael ca' par jse'etə'əyoine' Jeso'osən' šeje' liže'ənə' par yeyone' xmosen'.

⁴ Nach catə' besə'əžine' gan' zo Jeso'osən' gwsa'atə'əyoine' le' gaquəlene' capitannə', na' gwse'e Jeso'osən': —Naque' to beṇə' zaque'e par gaquəleno'one',

⁵ chedə' chaquene' che chio'o beṇə' Izrael. Na' le' bene' yo'odao' cheto' nga len xmeche'.

⁶ Nach gwyej Jeso'osən' len lega'aque'. Pero ze'e yesə'əžine' liže'ənə' catə' bsele' capitannə' bałə beṇə' migw che'ənə' lao Jeso'osən', na' gwse'ene': —Capitannə' ne' de que bito gonzi'ilažo'o yido' liže'ənə', chedə' la' nezene' de que bito zaque'e par šo'o liže'ənə'.

⁷ De'e na'anə' bito beyaxjene' deṇabene' le' gaquəleno'one'. Con chene'ene' gonšgo' mendadən' na' yeyaque xmosə'ənə'.

⁸ Capitannə' ne' de que zoe' xni'a rein', pero leczə nitə' soldad che' ca' xni'ənə'. Na' catə' che'e toe': "Gwyej", na' cheje', na' catə' che'e yetoe': "Da", na' chide'. Na' catə' che'e xmosen': "De'e nga gono'", na' chone'en. Na' nezene' de que con ənao' yeyaque xmosə'ənə' na' yeyaquene'.

⁹ Na' Jeso'osən' catə' benene' dižə' de'en əgwse' beṇə' migw che capitannə' le', bebanene' na' beyechje' gože' beṇə' ca' zjəsə'əno' le': —Echnia' le'e, bitonə' želda' beṇə' gonlilažə' nada' ca chonlilažə' capitannə' nada'. Ni to beṇə' Izrael cui chonlilažə' nada' ca bengā.

¹⁰ Nach jəya'ac beṇə' ca' bsele' capitannə', na' catə' besyə'əžine' liže'ənə' babeyaque xmosə'ənə'.

Jeso'osən' bosbane' xi'in to no'olə gozebə

¹¹ Na' gwyej Jeso'osən' to syoda de'en nzi' Nain, nžague' disipl che' ca' na' zan beṇə' yoblə.

¹² Bazja'aque' galə'əza par yesə'əžine' cho'a puert che syodan', na' lei chəsə'əchoj xonj beṇə' cho'a puertən' zjənle'ne' to beṇə' guat. Na' ben' gotən' naque' beṇə' tlišə, na' xne'en naque' beṇə' gozebə. Na' beṇə' zan beṇə' lao' syodan' zjənžague' xna' beṇə' guatən'.

¹³ Na' catə' ble'i Xanchon' no'olən', beyaše'ene' le', nach gože'ene': —Bito cuežo'.

¹⁴ Nach zde' na' jtane' yagant gan' xoa beṇə' guatən', na' beṇə' ca' zjənlen le'əna' gosə'əbeze'. Nach gože' beṇə' guatən': —Beṇə' güego', beyas.

¹⁵ Nach beṇə' guatən' beyase' gwchi'e na' gwzolao chene'. Na' Jeso'osən' beyone' le' lao na' xne'ənə'.

¹⁶ Na' yoguə' beṇə' ca' besə'əžebe' nach gwso'elaogüe'e Diozən' chəsə'əne': —Babla' to profet əblao gan' nga zocho na'a. Na' Diozən' bagocwlene' chio'o naccho nasyon che'ənə'.

¹⁷ Na' ca naquə de'en ben Jeso'osən' gosə' gwłaljə dižə' che'ənə' doxen Jodean' na' yež ca' de'en zjənyechj zjəmbi'i galə'əzə.

Juannə' bsele'e chopə disipl che' gan' zo Jeso'osən'

¹⁸ Nach disipl che Juannə' jəsy'e'eye'elene' le' dižə' yoguə' ca naquə de'e ca' chon Jeso'osən'.

¹⁹ Nach gox Juannə' čhopə disipl che' ca' nach gože' lega'aque': —Le'e žja'ac gan' zo Jeso'osən' na' ye'elene': “¿Elen' ben' naquən əselə' Diozən' o šə soto' lez yida beņə' yoblən'?”

²⁰ Nach disipl ca' cata' besə'əžine' gan' zo Jeso'osən' gwse'ene': —Juan ben' chčhoa beņə' nis bsele'e' neto' laogo' nga par ənbeto' le' šə len' ben' naquən əselə' Diozən' o šə soto' lez yida beņə' yoblən'.

²¹ Lao or na'atezə žlac ne'e nita' disipl che Juannə', Jeso'osən' beyone' beņə' zan beņə' ca' chsa'acšene na' beņə' chse'i yizgüe' gual. Leczə bebeje' de'e xio' ca' de'en zjəyo'o zjəyaz yichjla'aždao' beņə', na' bene' par nich besy'əle'i beņə' lchol.

²² Nach Jeso'osən' boži'e xtižə' beņə' ca' bselə' Juannə' laogüe'enə' gože' lega'aque': —Le'e žjəya'ac na' le'e žjəyeyež Juannə' doxen de'e ca' bable'ile na' de'e ca' babenele. Bable'ile chona' par nich baļə beņə' lchol chesy'ə'əle'ine', na' baļə beņə' coj chesy'ə'de', na' yebaļə beņə' cuež chesy'ə'əyene', na' leczə baļə beņə' gwse'i yizgüe' de'en ne' lepr babesy'ə'əyaquene'. Bable'ile bosbana' baļə beņə' guat na' babenele cho'a dižə' güen dižə' cobə' chia'anə' len beņə' yašə' ca'.

²³ Mbalaz zo beņə' chejle'e de que Diozən' bsele'e nada'.

²⁴ Na' cata' besy'ə'asa'ac disipl che Juannə' nach Jeso'osən' be'elene' beņə' ca' zjəndobən' xtižə' Juannə', gože' lega'aque': —¿Nacxa naquə ben' jəle'itgüecizele latjə dašən'? ¿Ešəyechə šayen chaque'? Bitō.

²⁵ ¿Nacxan' goque' cata' jəle'ilene'? ¿Enyaze' lachə' šao'? ¿əšə bito? la' beņə' ca' zjənyaz lachə' šao' nite'e yo'o güenchgua ca no liž rei, na' bito bi chesə'əyazjene' par yesə'əchoje' ližga'aque'enə'.

²⁶ ¿Noxan' jəle'ilen' ža? ¿Eto profet ben' cho'e xtižə' Diozən'? De'e li naque' to profet. Pero əchnia' le'e caguə con to profetən'.

²⁷ Che bengan' nyojən le'e Xtižə' Diozən' nan:

Nada' Dioz əselə'a to beņə' cuialaogüe' güe'e xtižə'onə', par nich nita' beņə' probnid par əso'elaogüe'e le' cata'ən yido'.

²⁸ Echnia' le'e, notono beņəch ne'e so beņə' naquəch beņə' blaoch ca Juannə'. Na' nota'ətezəchlə beņə' güe'e latjə nabia' Diozən' le', la'anə'əczə bito naque' beņə' blaogwžin ža cata' šejni'ichene' chia' clezə ca Juannə'.

²⁹ Na' baļə beņə' gochixjw ca' na' len yeziquə'əchlə beņə' ca' bčhoa Juannə' nis, gwsa'acbe'ine' de que de'e li zjənaque' beņə' mal lao Diozən' cata' gwse'enene' dižə' de'en be' Juannə' len lega'aque'.

³⁰ Pero na' beņə' fariseo ca' na' beņə' ca' choso'osed choso'olo'i lei de'en bzoj de'e Moizezən' gwso'onczə yichjlaoga'aque' cui besy'ə'ədinjene' xtolə'əga'aque'enə' can' gone'e Diozən' na' bito bčhoa Juannə' lega'aque' nis.

³¹ Nach Jeso'osən' gože' lega'aque': —¿Nac əgwsaquə'əlebetgüeida' le'e mbanle na'a? na' žnacacle'?

³² Egwsaquə'əlebeda' le'e ca bidao' chedə' cuicə bi de žleb chele. Ca naquə' bidao' ca' cata' nita'əbo' do gan' chac ya'a chse' ljuežjga'acbo': “Bento' legr, bito gwyo'olažə'əle, na' babento' bgüine bgüez, peor.”

³³ Juan ben' chčhoa beņə' nis bide' laole nga. Bitō güe'ej gwdaošəogüe'e can' chse'ej chsa'o beņə' yoblə, na' nic güe'ejə' bino. Nach gwnale che': “Yo'o yaz de'e xi'onə' yichjla'aždaogüe'enə'.”

³⁴ Na' nada' ža, Diozən' bsele'e nada' golja' beņəch, na' chle'ile che'ej chaogua' can' che'ej chaole, na' nale čhia' de que naca' beņə' lia na' beņə' güe'e zo. Na' leczə nale de que naca' migw che beņə' gochixjw ca' na' migw che yeziquə'əchlə beņə' ca' chso'on de'e mal.

³⁵ Pero na' Diozən' chone' par nich beņə' ca' choso'ozenag che' chso'one' ca nacbia' de que le' naque' le'ezelaogüe beņə' sin'.

Jeso'osən' gwyeje' liž Simon beņə' fariseo

³⁶ To beņə' fariseo bene' combid Jeso'osən' šeje' liže'enə' par əsa'ogüe'. Na' bžin Jeso'osən' liž be'ena' na' gwchi'e cho'a mesən'.

³⁷ Na' to no'olə beņə' güen de'e mal beņə' lao' syodan' gwnezene' de que Jeso'osən' əžine' liž be'ena'. Na' Jeso'osən' len beņə' ca' yelə' banite'e cho'a mesən' par əsa'ogüe' cata' bgüigua' no'olən' cuit Jeso'osən' noxe'e to lmet de yej de'e yožə to set de'e zaque' de'e čhla' zix.

³⁸ Na' no'olən' jəbigue'e gaļə'əzə xni'a Jeso'osən', na' gwcheže'. Nis əxchež che'enə' bžonən ni'a Jeso'osən' na' bgüisən. Na' bxie' ni'ena' len yišə' yichje'ena', na' bnopə'en, na' gwdebe'en set zixən'.

³⁹ Na' beņə' fariseon' ben' ben Jeso'osən' combid, cata' ble'ine' can' chon no'olən', na' goquene': —Žalə' be'enga naque' profet, guache'ine' de que no'olə nga naque' beņə' güen de'e mal.

⁴⁰ Nach Jeso'osən' gože'ene': —Simon, de to de'e che'enda' ənia' le'.

Nach Simonnə' gože' Jeso'osən': —Gwnan Maestr.

⁴¹ Jeso'osən' gože'ene': —Gwzo to beṇə', na' gwnitə' čopə beṇə' gwsa'ale'e xmeche'. Toe' gole'e gueya' gueyoa mech de'en ne' denario, na' ben' yeto gole'e šiyon denario.

⁴² Na' čopte beṇə' ca' ni toe' cui de čega'aque' par yesyə'əyixjue' xyan', na' ben' gwlej mechən' bñitlaogüe' de'en chsa'ale'e čhe'enə'. Gwnašc nada', ζnoe' entr beṇə' ca' čopə gwsa'aquechene' čhe'?

⁴³ Nach Simonnə' gože'ene': —Šəquə ben' əbñitlaogüe' xya čhein' de'e xench.

Jeso'osən' gože'ene': —De'e li can' bagwna'onə'.

⁴⁴ Nach gwyečhje' bgüie' no'olən' na' gože' Simonnə': —čEchle'ido' no'olə nga? Nada' bagwyo'a ližo' nga, na' bito beṇə' nis čhib ñi'a, pero no'olə nga bagwdibe' ñi'anə' len nis əxčež čhe'enə', na' bxi'en len yišə' yichje'enə'.

⁴⁵ Bito bnopo'o nada', pero na' no'olə nga dezd bla'atia' nga chnopo'e ñi'anə'.

⁴⁶ Bito gwdebo' set yichja'anə', pero no'olə nga bagwdebe' set zixən' ñi'anə'.

⁴⁷ Na' əchnia' le', xtole'enə' gwsa'aque' de'e zan, pero babezi'ixena' che'. De'e na'anə' chacchgüeine' chia'. Ben' bito əžinlažə' xtole'enə' ca xtole' no'olə nga, catə' yezi'ixena' čhe' bito gactequene' chia'.

⁴⁸ Nach gože' no'olən': —Babezi'ixena' xtole'onə'.

⁴⁹ Nach beṇə' ca' chsa'o len Jeso'osən' txen lao mesən' gwzolao chse' ljuəžje': —čNoxa bengā chaclizene' de que le'enə' chezi'ixene' dole'?

⁵⁰ Nach gož Jeso'osən': —De'en chonlilažo'o nada' babezi'ixena' čhio'. Beyej to šao' to güen.

8

No'ol ca' gwsa'aclen Jeso'osən'

¹ Na' techlə gwyej Jeso'osən' to to syoda na' to to yež de'en zjənyechj zjəmbi'i Galilean', na' jitixjui' e dižə' güen dižə' cobə de que Diozən' ṇabi'e con notə'atezə beṇə' soe' latjə. Na' zja'aclen beṇə' sižin ca' le', beṇə' ca' zjənzi' apostol.

² Nach xonj no'olə leczə zja'aclene' Jeso'osən', beṇə' ca' babeyone'. Bałe' babebeje' de'e xio' de'en zjəyo'o zjəyaz yichjla'aždaoga'aque'enə', na' yebale' babeyone' lega'aque' catə' gwsa'acsenene'. Na' entr no'ol ca' len ben' le Maria beṇə' Magdala, bebej Jeso'osən' gažə de'e xio' ca' zjəyo'o zjəyaz yichjla'aždaogüe'enə'.

³ Nach leczə len ben' le Xguan, xo'olə Chosa. Na' Chosan' yo'o lao ne'e chape' liž Erodən' na' yežlyo čhe' ca'. Na' leczə len ben' le San gwyejlene' Jeso'osən', na' yezan beṇə' yeziquə'əchlə. Na' no'ol ca' boso'očhine' bitə'atezə de'en gotə' čega'aque' par bosə'ənežjue' de'en byažje Jeso'osən' len displi čhe' ca'.

Jempl che beṇə' gozən'

⁴ Na' beṇə' zan besə'ədope' gan' zo Jeso'osən' beṇə' za'ac to to syoda ca'. Na' be'e to jempl bzejni'ine' lega'aque' can' gwxaquə'əlebe xtižə' Diozən'. Gwne':

⁵ —To beṇə' gwze'e zde' güen trigw. Na' lao chose' trigon' bałən jəsə'əchazən cho'a nez, na' boso'olej boso'ošošj beṇə' len, na' bia žia xile'e bia chaš le'e yoban' gwsa'ob len.

⁶ Na' bałən jəsə'əchazən ga naquə lao yej, na' catə' bla'aquəṇṇə' gosə'əbižən čhedə' caguə bi gopə' denə'.

⁷ Na' yebałən besə'əgo'onən lao yo ga nchixə xsa yešə' na' bla'aquəṇ txen na' boso'olə'lag' yag yešə' ca' lega'aquəṇ.

⁸ Na' yebałən besə'əgo'onən lao yo šao' na' bla'aquəṇ na' gosə'əbian to gueyoa güeja.

Na' beyož be'e dižə' quinga gwñe' zizjo gwne': —Le'e žia nagle de'e chene, legwzenag.

Jeso'osən' gože' displi čhe' ca' bixchen' bzejni'ine' beṇə' len jempl

⁹ Nach displi čhe' ca' gosə'əṇabene' le' bi zeje jemplən' de'en be'enə'.

¹⁰ Na' gož Jeso'osən' lega'aque': —Diozən' chone' par nič le'e ənezele de'en cui no gwñeze antslə de que ṇabi'e con notə'atezə beṇə' soe' latjə. Pero beṇə' yeziquə'əchlə cho'elenga'aca'ane' jempl čhedə' bito chse'ejle'e chia'. Chona' ca' par nič yesə'əle'ine' de'en chona' na' bito sa'ache'ine' bi zejen, na' par nič əse'enene' xtižə'anə' na' cui se'ejni'ine'en.

Jeso'osən' bzejni'ine' bi zeje jempl che beṇə' güen trigon'

¹¹ Na' ca naquə jempl nga zejen quinga: Ca de'en byažən' naquəṇ xtižə' Diozən'.

¹² De'en jəsə'əchaz cho'a nezən' zejen ca beṇə' ca' chse'ene xtižə' Diozən' pero na' le'e chžinte gwxiye'enə' chebejan xtižə' Diozən' lo'o yichjla'aždaoga'aque'enə' par nič cui so'onlilaže'ene' na' cui yesyə'əchoje' xni'a de'e malən'.

¹³ Na' de'e ca' besə'əgo'on gan' naquə lao yej gwxaquə'əleben ca beṇə' ca' chəsyə'əbei choso'ozenag xtižə' Diozən'. Pero zjənaque' ca to de'e cui bi loi chon, šložga chse'ejle'e čhe xtižə' Diozən'. Na' catə' chac bi de'e mal čega'aque' le'e chəšə'əbejyichjte'en cuich choso'ozenague' čhei.

¹⁴ Na' de'e ca' besə'əgo'əŋən lao yo ga nchiḅə xsa yešə' zejen ca beṇə' ca' bazjənenene' xtižə' Diozən'. Pero lao zjəmbangə'aque' chesyə'alal chesyə'əžejene', na' chse'enene' yesə'ani'e, na' chəsə'əde' legr. Na' de'e quinga chso'one'enə' choso'olə'əŋən xtižə' Diozən' de'en bayo'o yichjla'aždaoga'aque'enə', na' de'e na'anə' cui chso'əŋlilaže'ene' can' cheyałə'.

¹⁵ Na' de'e ca' besə'əgo'əŋən lao yo ša'onə' zejen ca beṇə' la'aždao' güen ca' catə'ən chse'enene' xtižə' Diozən' chəsə'əzi'en chso'onen chęga'aque'. Na' chso'əŋlilaže'ene' na' chesə'əgo'o chesə'əčhejlaže'e len bitə'ətezə' de'en chac chęga'aque' par chso'one' can' chene'e Diozən'.

Bitobi ngašə' de'e nacho cui no yene le'i

¹⁶ Na' Jeso'osən' bsaquə'əlebene' de'en bsdə' əblo'ine'enə' ca to yi', gwne': —Notono no gualə' to yi' na' gwdoše'en to žomə' na' nic no gwcuəšə'ən xan xcamei. Syempr chde'e yi'inə' le'e ze'e par nich əgwse'eni'in len yoguə' beṇə' so'o lo'o cuartən'.

¹⁷ Guaquə' can' na' dicho de'en na: “Yoguə'əlol de'en ngašə' na'a, gwžin ža la'alaon, na' yoguə'əlol de'en cui no gwse'ejni'i antsłə, lecžə gwžin ža se'ejni'i beṇə' len.”

¹⁸ De'e na'anə' le'e co'o yichjle de'en chnia' le'e, chedə' la' šə' chzenagle xtižə'anə' əgwzejni'ichda' le'e. Pero na' šə' bito chzenagle čhei, de'e daon' baņezele ganlažə'əlen.

Xna' Jeso'osən' na' biše'e ca' besə'əžine' gan' zoe'

¹⁹ Na' xna' Jeso'osən' len benə' biše'e ca' besə'əžine' gan' zo Jeso'osən' na' gwsa'acłaze'e yesə'adie' pero tant beṇə' zan ža' caguə' goquə' yesə'əžine' gan' zoe'enə'.

²⁰ Na' gwnita' beṇə' gwse'e Jeso'osən': —Xna'on len beṇə' bišo'o ca' zjəzeche' na'ate, na' chse'enene' əso'elene' le' dižə'.

²¹ Nach Jeso'osən' gože' lega'aque': —Beṇə' ca' choso'ozenag xtižə' Diozən' na' chso'one' can' nan, lencžəga'aque'enə' zjənaque' xna'a na' biša'a.

Jeso'osən' bcueze' be' bdon' lao nisdə'onə'

²² Na' gozac to ža Jeso'osən' gwyo'e to lo'o barcw len disipl čhe' ca', na' gože' lega'aque': —Ełaguə'əcho yešl'alə nisdə'onə'.

Nach bosə'ose'e barcon'.

²³ Lao zda barcon' gwtas Jeso'osən'. Na' gwzolao gwyečj to be' gual lao nisdə'onə' na' barcon' gwzolao gwyožən nisdə'n na' besə'əxožene' yesə'əbiayi'e.

²⁴ Nach bosyo'osbane' Jeso'osən' gwse'ene': —jMaestr! jMaestr! jBačh chbiayi'icho!

Nach catə' gwyase' ne'e chas chatə' nisdə'onə' na' gwdiłe'en len be'enə', na' le'e gosə'əbe'əžiten.

²⁵ Na' gože' lega'aque': —Cheyałə' šejle'echle čhia'.

Nach lega'aque' besə'əžebe' na' besyə'əbanene' na' gwse' ljuēžje': —Bitolja naquə' bengə' con to beṇə'chza, la' žnacxa gon to beṇə'ch par yebecžie' be' gualən' len nisdə'onə'.

To beṇə' Gadara yo'o yaze' de'e xio'

²⁶ Na' besə'əžine' laž beṇə' Gadara ca', to yež de'e chi' delant Galilean' əłaguə'əcho nisdə'onə'.

²⁷ Na' catə' bechoj Jeso'osən' lo'o barcon', to beṇə' lao' syodan' jəšague' le', beṇə' bagwžə' yo'o yaz de'e xio' ca' yichjla'aždaogüe'en. Na' chde' con cui bi bi xe' chazə'che', na' bitoch zoe' yo'o, con bazoe' do capsant.

²⁸⁻²⁹ Na' beṇə' gwłəž čhe' ca' bosə'əčheje' ni'a ne'e ca' gden na' gwsa'ape'ene', pero zan las de'e xio' ca' gwso'onən ca' bzojx btine' gdenṇə' na' lecžə gwso'onən ca' gwyeje' gan' cui no beṇə' zjanla'. Na' be'ena' catə' ble'ine' Jeso'osən' na' bzo xibe' laogüe'enə' na' de'e xio' ca' bosə'ogosya'an le', zižjo gosə'anən: —Partlə le', partlə neto', Jeso'os. Naco' Xi'in Dioz ben' naquə' le'ezelaogüe' beṇə' bla. Chatə'əyoito' le' cui əgwch'i' əgwsaco'o neto'.

De'e xio' ca' gosə'anən ca' chedə' Jeso'osən' bene' mendad yesyə'əchojən lo'o yichjla'aždao' be'enə'.

³⁰ Nach Jeso'osən' gožga'aquen': —žBi lele?

Na' gosə'anən: —Legion leto'.

Gosə'anən ca' chedə' zanən gwso'on yichjla'aždao' be'en'.

³¹ Na' de'e xio' ca' gwsa'atə'əyoin Jeso'osən' cui gone' ca' žjəsyə'ədebən lo'o yech gabilən'.

³² Na' to ya'a de'e zo galə'əza čaš beṇə' choso'oye' coš zan. Nach de'e xio' ca' gwsa'atə'əyoin le' par güe'e latjə žjesyə'əžo'on yichjla'aždao' coš ca'. Na' Jeso'osən' be'e latjə.

³³ Nach besyə'əchoj de'e xio' ca' yichjla'aždao' be'enə' na' jəsyə'əžo'on yichjla'aždao' coš ca'. Na' besyə'ədinses coš ca' le'e ya'anə' na' jesyə'əxopəb lo'o nisdə'onə', na' gwsa'atəb gwse'ejəb nisdə'n'.

³⁴ Na' beṇə' ca' choso'oye coš ca' besə'əle'ine' de'en bagoquən' na' de'en besə'əžebchgüe' besə'acdoe' nach jesyə'ədixjue'ine' beṇə' lao' syodan', na' beṇə' nita' do yoba can' bagoquən'.

³⁵ Na' beṇə' ca' catə' gwse'ene' xtižə' beṇə' goye coš ca' ja'aque' jəsə'əgüie' de'en bagoṇan'. Na' catə' besə'əžine' gan' zo Jeso'osən', besə'əle'ine' be'ena' gwyo'o gwyaz de'e xio' ca' yichjla'aždaogüe'ena' bachi'e gaḷə'əzə' cuit Jeso'osən', nyaz xalane'e, na' babezošao' yichjla'aždaogüe'ena'. Na' besə'əžebe' de'en goṇan'.

³⁶ Na' beṇə' ca' besə'əle'i de'en goṇan' gwse'e beṇə' ca' yelə' can' beyaque ben' gwyo'o de'e xio' ca' yichjla'aždaogüe'ena'.

³⁷ Nach yoguə'əloj beṇə' ca' ža' gan' mbane Gadaran' jse'eta'əyoine' Jeso'osən' yeze'e lažga'aque'ena' cheda' besə'əžebchgüe'. Nach beyo'o Jeso'osən' lo'o barcon' par beze'e.

³⁸ Na' ben' bechoj de'e xio' ca' yichjla'aždaogüe'ena' gota'əyoine' Jeso'osən' šejlene' le', pero Jeso'osən' bito be'e latjə, gože'ene':

³⁹ —Beyej ližo' na' jəyedixjue' e catec de'e mban' baben Diozən' len le'.

Na' beze'e, nach jəyede' doxen lao syodan' jəyeezene' catec de'e mban' baben Jeso'osən' len le'.

Jeso'osən' beyone' xi'in Jairon' na' yeto no'olə beṇə' gwdan lao xadon che'ena'

⁴⁰ Na' catə' bežin Jeso'osən' Capernaunnə' beṇə' zan banitə' chəsə'əbeze'ene' na' besyə'əbeichgüeine' de'e bežine'ena'.

⁴¹ Na' bžin to beṇə' le Jairo, ben' naquə beṇə' gwnabia' che yo'odao' che beṇə' Izrael ca'. Na' bzo xibe' lao Jeso'osən' gota'əyoine' le' šejlene' le' liže'ena'

⁴² cheda' bazon gat bi'i no'ol che'ena'. Nacho' bi'i tlišə'əzə' na' šižin izgueibo'. Na' lao zda Jeso'osən' len le', beṇə' zan gosə'əbiadi'ene' xte boso'ochi'izojene'.

⁴³ Na' len to no'olə bagoc šižin iz chzoe' bgua'a na' babenditjei zgade xmechen' len beṇə' güen rmech ca'. Na' notono goquə gon le' rmech.

⁴⁴ Na' bgüigua' no'olan' cožə' Jeso'osən' na' gwthane' lox xadon che'ena', na' le'e gwlezte bgua'a de'en chzo'ena'.

⁴⁵ Na' gož Jeso'osən' beṇə' ca' zja'aclen le': —;Non' bagwdan nada'?

Na' yogue'e bito gosə'əchebe' de que gosə'əgane' le'. Nach Bedən' len beṇə' ca' zja'aclen Jeso'osən' gwse'ene': —Maestr, beṇə' zan ža' nga, na' chesə'əchi'izoje' le'.

⁴⁶ Nach Jeso'osən' gože' lega'aque': —To beṇə' bagwdane' nada'. Na' chacbe'ida' de que beyaquene' len yelə' guac chia'ana'.

⁴⁷ Nach no'olan' catə' goche'ine' de que cabi bgašə' de'en bene'ena', bgüigue'e lao Jeso'osən' do chaž chžebe', na' bzo xibe' laogüe'ena' be'e dižə' lao yoguə' beṇə' ca' ža'ana' bixchen' gwthane'ene' na' can' goquə le'e beyaceteine'.

⁴⁸ Nach gož Jeso'osən' no'olan': —Xi'in daogua'a, babeyacdo' cheda' chonlilažo'o nada'. Beyej to šao' to güen.

⁴⁹ Ne'e cho'ete Jeso'osən' dižə'an ca' catə' bžin to beṇə' gwza' liž Jairon' ježe'ene': —Bagot bi'i no'ol dao' chio'ona'. Bitoch gondo' maestrən' zed.

⁵⁰ Pero na' catə' bene Jeso'osən' dižə'ana' gože' Jairon': —Bito žebo'. Con benlilažə' nada'.

⁵¹ Na' catə' besə'əžine' liž be'ena' Jeso'osən' bito be'e latjə so'o beṇə' ca' zja'aclen le' sino Bedən' len Juannə' len Jacobən' na' len xaxna' bi'i guat na'azə.

⁵² Na' bačh chachgua scañd' cheda' yoguə' beṇə' ca' ža'ana' chəsə'əbežchgüe', pero gož Jeso'osən' lega'aque': —Bito cuežle. Bito nacho' bi'i guat, con chtasbo'ona'.

⁵³ Na' gosə'əzi'ichi'ize'ene' cheda' zjənezene' de que bagotbo'ona'.

⁵⁴ Pero Jeso'osən' bexe'e na' bi'i no'olə guat da'ona' na' bolgüize'ebo' che'ebo': —No'ol dao' beyas.

⁵⁵ Nach bebambo' na' le'e beyastebo'. Na' ben Jeso'osən' mendadan' əso'ebo' de'e gaobo'.

⁵⁶ Na' besyə'əbanchgüie' xaxna'abo'on, pero Jeso'osən' bene' mendad cui əso'e dižə' can' goṇan'.

9

Jeso'osən' bsele'e disipl che' ca' šižin jəsə'ədixjui'e xtiže'ena'

¹ Jeso'osən' betobe' disipl che' ca' šižin na' bnežjue' lega'aque' yelə' guac par ničh əsa'aque' yesyə'əbeje' de'e xio' zjəyo'o zjəyaz yichjla'aždao' beṇə', na' lecza' par ničh əsa'aque' yesyə'əyoine' beṇə' chsa'acšene.

² Na' lecza' bene' mendad žjəsə'ədixjui'e de que Diozən' nabi'e con nota'əteza beṇə' soe' latjə. Na' bene' mendad yesyə'əyoine' no beṇə' güe'.

³ Na' gože' lega'aque': —Bito bi goxə'əle tnežən'. Bito yeyiljle garot goxə'əle, nic gua'ale bsod, ni yet, ni mech, na' bito gua'ale čhopə xadon.

⁴ Na' gata'əteza əžinle' na' no liže' šo'ole, na'ateza sole na' na'ateza əsa'acle par šejächle.

⁵ Na' gata'əteza yež əžinle' ga cui yesə'əgüialaogüe' le'e, catə' yesa'acle yežən' əgws'i'ins ni'alen' par yežib bište de'en gwžianə'. Gonle' ca' par ničh əgwlo'iga'aque'lene' de que de'e malən' chso'one' cui choso'ozenague' xtižə' Diozən' de'en cho'ele.

⁶ Nach disipl ca' ja'aque' to to yež, jəsə'ədixjui'e dižə' güen dižə' cobən' na' besyə'əyone' no beṇə' güe'.

Bagwso'ote' Juan ben' bchoa beṇə' nis

⁷ Na' gobernador Erodən' goquene' tola catə' benene' yoguə'alol de'en chon Jeso'osən' len disipl che' ca'. Goczejlaže'e čhedə' balə beṇə' gwse'ene' de que babeban de'e Juannə' ladjo beṇə' guat ca' na' chone' de'e quinga.

⁸ Na' yebalə' gwse'ene' de que profet Liazan' babela' yežlyo nga de'e yoblə na' chone' de'e quinga. Yebalə' gosə'əne' de que to profet beṇə' gwzo cana'ate babebane' ladjo beṇə' guat ca' na' chone' de'e quinga.

⁹ Na' Erodən' gwne': —Bena' mendad gosə'əchogue' yen de'e Juannə', pero čnoxa bengababenda' dižə' čhei?

Na' gwđiljlaže'e naclə gone' par le'ine' Jeso'osən'.

Bguao Jeso'osən' gueyə' mil beṇə'

¹⁰ Na' catə' besyə'əžin disipl ca' gan' zo Jeso'osən' gwse'ene' can' jse'ene'ena'. Na' gwčhe'e lega'aque' partlə na' ja'aque' to latjə gan' mbane syoda de'en nzi' Betsaida.

¹¹ Catə' gwsa'acbe'i beṇə' ca' nitə' gan' gwzo Jeso'osən' de que bagwze'e len disipl che' ca' nach jəsə'ənaogüe' lega'aque'. Jeso'osən' bebeine' bgüialaogüe' lega'aque' na' bsed blo'ine' de que Diozan' nabi'e con notə'ətezə beṇə' soe' latjə. Na' beyone' beṇə' ca' chsa'acšene.

¹² Catə' gwzolao chxoə bgüižən' nach disipl ca' šižin gwse'e Jeso'osən': —Bselə' beṇə' quinga yež ca' de'en nyechj mbi'i nga par yesə'əyilje' gan' yesə'ətase' na' par nič yesə'əželene' de'e se'ej əsa'ogüe' čhedə' latjə gan' zocho nga naquən to ga cui no nla'.

¹³ Pero na' gož Jeso'osən' lega'aque': —Le'e gwnežjo de'e sa'ogüe'.

Na' gwse'ene': —Gueyə'əga yetxtil na' čhopga beł ya'a de čecho. Lete šə si'ichchon par gaquən əsa'o yoguə' beṇə' quinga.

¹⁴ Gosə'əne' ca' čhedə' la' ža' ca' gueyə' mil beṇə' byo. Nach Jeso'osən' gože' disipl che' ca': —Le'e gon mendad yesə'əbe' šiyon güeja beṇə' ca'.

¹⁵ Nach disipl ca' gwsə'one' mendad yesə'əbe' yoguə' beṇə' ca'.

¹⁶ Na' Jeso'osən' gwxi'e gueyə' yetxtilən' na' čhopə beł ya'anə', na' bgüie' yobalə be'e yełə' choxčwlen che Diozən', na' bzoxje'en na' bnežjue'en disipl che' ca' par gwso'e che che beṇə' ca'.

¹⁷ Na' yogue'e gwsa'ogüe'en xte ca' gwse'eljene'. Nach pedas ca' besyə'əga'anən' bosyo'otobe'en, na' gwsa'aquən šižin žomə.

Bedən' gwne' de que Jeso'osən' naque' ben' bselə' Diozən'

¹⁸ Na' gozac yeto nitə' disipl che' ca' len le' na' Jeso'osən' chone' orasyon toze'. Nach gože' lega'aque': —čBin' čhəsə'əna beṇə' zan ca', non' naca' nada'?

¹⁹ Na' gwse'e le': —Balə' čhəsə'əne' naco' de'e Juan ben' bchoa beṇə' nis, na' yebalə' čhəsə'əne' de que naco' profet Liazan' ben' gwzo cana', na' yebalə' čhəsə'əne' de que naco' yeto profet beṇə' gwzo cana'ate na' le'ena' babeban ladjo beṇə' guat ca'.

²⁰ Nach gože' lega'aque': —čChexa le'e? čbi nale? čnon' naca'?

Nach gož Bedən' le': —Len' naco' Crist ben' gwlej Diozən' par gaquə'leno' nasyon čhechon'.

Jeso'osən' gwđixjue'ine' disipl che' ca' de que gate'

²¹ Nach Jeso'osən' bene' mendad len lega'aque' de que ni toe' cui əso'e dižə' de que len' naque' Cristan' ben' gwlej Diozən' par gaquə'lene' nasyon čhega'aque'ena'.

²² Na' gože' lega'aque': —Nadan' naca' ben' bselə' Diozən' golja' beṇə'ch. Na' de'e zan de'e chonən byen čhi' saca'a. Na' ca' naquə beṇə' golə blao che nasyon Izrael čhechon' na' beṇə' blao che bxož čhecho ca' na' beṇə' ca' choso'osed choso'olo'i lei de'en bzoj de'e Moizežən', cabi se'ejle'e čhia', na' so'ote' nada', pero na' yeyon ža yosban Diozən' nada' ladjo beṇə' guat ca'.

²³ Nach gože' yoguə' disipl che' ca': —Notə'ətezle šə chene'ele gonjilažə'əle nada' na' gwzenagle čhia', cheyalə' əchojyichje de'en chene'ele gon cuinle par nič gonle con can' chene'e Diozən', na' bito bi gaquele che de'en čhi' saquə'əle, la'anə'əczə šə so'ot beṇə' le'e to le'e yag coroz, con gonjilažə'əle nada' na' gwzenagle čhia'.

²⁴ Notə'ətezle čaquele gonle par nič cui čhi' saquə'əle o par nič cui no so'ot le'e, cuiayi'ile. Na' notə'ətezle čsanlažə' cuinle čhi' saquə'əle o so'ot beṇə' le'e por ni čhia' bade yełə' mban zejlicane čhele.

²⁵ Bito bi de'e güen gaquə che to beṇə' la'anə'əczə nabi'e doxen yežlyon' šə cuiayi'e cui gatə' yełə' mban che' zejlicane.

²⁶ Notə'ətezle šə čheto'ile čhia' na' che xtiza'anə', leczə ca' nada' yeto'ida' čhele, nadan' naca' ben' bselə' Diozən' golja' beṇə'ch. Yeto'ida' čhele catə'an yida' de'e yoblə nsa'a yełə' chey

che'eni' chia'anə' na' yelə' chey che'eni' che Xa' Diozən', na' yelə' chey che'eni' che angl che Diozən'.

²⁷ Echnia' de que balle cabinə' gatle catə' le'ile can' gon Diozən' əgwlo'e yelə' gwnabia' che'ena'.

Jeso'osən' goque' ca to de'e chey che'eni'

²⁸ Na' goc to xman gwna Jeso'osən' ca', gwyeje' to lao ya'a jəne' orasyon, na' gwche'e Bedən' len Juannə' na' Jacobən'.

²⁹ Na' lao bene' orasyonə' goc cho'alaogüe'ena' ca de'e chey che'eni', na' xalane'ena' beyaquən šyiš xilə' xte gwnatitan.

³⁰ Na' lao or na' de'e Moizezən' len profet Liazən' ben' gwzo cana' besya'əžine' gan' zo Jeso'osən' na' Jeso'osən' be'elene' lega'aque' dižə'.

³¹ Gwso'e dižə' ca naquən' bazon gate' Jerosalennə'. Na' yelə' chey che'eni' che Diozən' gwyečhən' lega'aque'.

³² Na' Bedən' len beə' ca' yečhopə' lechguale gwsa'ac šə tasga'aque'. Pero catə' bechoj bišgal čega'aque'ena' besə'əle'ine' Jeso'osən' len yelə' chey che'eni' che'ena', zeche' cho'elene' de'e Moizezən' len profet Liazən' dižə'.

³³ Na' žlac besya'ənitlao de'e Moizezən' len profet Liazən', Bedən' gože' Jeso'osən': —Maestr, güenchgua zočo nga na'a. ĆEguaquə gonto' šonə ranš, ton par le', na' yeton par Moizezən', na' yeton par Liazən'?

Gwne' ca' chedə' bito bene' xbab che de'en gwne'.

³⁴ Na' lao gwne' ca' gwyečh' bejon' lega'aque' na' besə'əžebe' laogüe de'en goc ca'.

³⁵ Na' gwse'enene' gož Diozən' lega'aque': —Bengan' xi'ina', ben' chacchüeida' čei. Če le'ena' le'e gwzenag.

³⁶ Na' catə' beyož gož Diozən' lega'aque' ca', besə'əle'ine' yetozə Jeso'osən'. Na' ca tyemp na' bitobi dižə' gwso'elene' yeziquə'əchlə beə' ca naquə de'en bagwse'en besə'əle'ine'ena'. Con gwnitə'əteze' žizə che de'e ca'.

Beyon Jeso'osən' to bi'i yo'o yaz de'e xio'

³⁷ Na' beteyo catə' bach besya'əyetje' ya'anə', jəsə'əšag beə' zan lega'aque' gan' nite'ena'.

³⁸ Na' entr beə' zan ca' to'e gwne' žizjo na' gože' Jeso'osən': —Maestr, chatə'yoida' le' gaquələnšgo' xi'ina' nga, čhedə' nacbo' xi'ina' tlišə'.

³⁹ Čhiz de'e xi'onə' lebo', na' le'e čgosya'aten lebo', na' chonen par chazbo' šon xte chla' bžin' cho'abo', na' chonən lebo' zi', na' canə chechojən' lebo'.

⁴⁰ Bagota'yoida' disipl chio' ca' par nič yesya'əbeje' de'e xi'onə' cho'o chaz yichjla'ažda'obo'onə', pero bito gwsa'aque' yesya'əbeje' en.

⁴¹ Na' Jeso'osən' gože' beə' ca' ža'anə': —ĆBixčhexan' cui chejle'ele chia'? Clellən' chonle' na' naljele. Bachac šša zoa' napa' yelə' chxenlažə' len le'e. ĆBatxan' šejle'ele chia'?

Nach gože' xa bida'onə': —Doa' xi'ino' nga.

⁴² Na' lao zjso'ebə' lao Jeso'osən' bniz de'e xi'onə' lebo', na' benən par nič lechguale fuert gwyzabo' šonə', na' bchix btolan lebo' lao yon'. Na' Jeso'osən' gwldie' de'e xi'onə' par nič bechojən lo'o yichjla'ažda'obo'onə' na' beyaquebo'. Gwde na' beyone'ebə' lao na' xabo'onə'.

⁴³ Na' yogue'e besya'əbanene' besə'əle'ine' yelə' guac che Diozən'.

De'e yoblə gwduxje'e Jeso'osən' de que gate'

Na' besya'əbanene' che yoguə' de'en chon Jeso'osən'. Na' lao nite'e ca', Jeso'osən' gože' disipl che' ca'azə:

⁴⁴ —Legon par nič dižə' nga šo'on yichjla'ažda'olen', čhedə' la' nada' gaca' lao na' beə', nadan' naca' ben' bselə' Diozən' golja' benəč.

⁴⁵ Pero na' disipl ca' bito gwse'ejni'ine' dižə' de'en be' Jeso'osən' len lega'aque', čhedə' bito gože' lega'aque' clar bi zejen, na' besə'əžebe' par yesə'əbanene' le' bi zejen de'e gože' lega'aque'.

Gwsa'acyožə disipl che' ca' noe' naquə blaoch

⁴⁶ Na' gwsa'acyožə disipl che' ca' entr lega'aque' noe' naquə beə' blaoch.

⁴⁷ Jeso'osən' gocbe'ine' xbab de'en gwso'one'ena' na' goxe' to bidao' na' bso'ebə' cuite'ena'.

⁴⁸ Na' gože' lega'aque': —Šə chonle güen len bidao' nga o len notə'ətezəchlə bidao' laogüe de'en chaquele chia', choncze güen len nada'anə'. Na' catə' chonle güen len nada', leczə choncze güen len Diozən' ben' bselə' nada'. Na' notə'ətezele catə' chonle xbab che cuinle de que cuitec bi zaquə'əle, banaquəczle beə' blaö.

Ben' cui chon contr chio'o txenczən' chone' len chio'o

⁴⁹ Nach Juannə' gože'ene': —Maestr, babežagto' to beə' cho'e la'onə' par chebeje' de'e xio' de'en yo'o yaz yichjla'aždao' beə', na' bžonto' gone' ca' čhedə' bito chone' txen len chio'o.

⁵⁰ Nach Jeso'osən' gože'ene': —Bito gwžonle gone' ca' chedə' šə to beŋə' cui chone' contr chio'o, txenczən' chone' len chio'o.

Jeso'osən' gwdilē' Jacobən' na' Juannə'

⁵¹ Na' laogüe bazon baoza par yezi' yeca'a Diozən' le', gwchoglaže'e šeje' Jerosalennə'.

⁵² Na' bsele'e to čhopə beŋə' gosə'əbialao laogüe'ena'. Na' ja'aque' to yež gan' mbane Samarian' par nič žjəsə'əsi'ini'e gan' so Jeso'osən' len disipl che' ca'.

⁵³ Pero beŋə' Samaria ca' bito besə'əgüialaogüe' lega'aque', chedə' Jeso'osən' len disipl che' ca' chja'aque' Jerosalennə'.

⁵⁴ Na' disipl che' ca' čhopə, Juannə' len Jacobən', catə' besə'əle'ine' can' gwso'on beŋə' Samaria ca' nach gosə'əŋabene' Jeso'osən' gwse'ene': —Maestr, zəche'endo' gonto' can' ben profet Liazən' ben' gwzo cana', ənabeto' Diozən' əsele'e yi' par əgwzeyən beŋə' quinga?

⁵⁵ Pero Jeso'osən' gwyechje' na' gwdilē' lega'aque' gože': —Le'e bito nezele non' chnabia' yichjla'ažda'olen'.

⁵⁶ La' nada' bito bida' par əgwziayi'a beŋəchən', sino bida' par nič gona' ca' cui žjəya'aque' lao yi' gabilən', nadan' naca' ben' bselə' Diozən' golja' beŋəch.

Nach ja'aque' yež yoblə.

Can' gož Jeso'osən' beŋə' ca' gwse'ene' yesə'ənaogüe'ene'

⁵⁷ Lao zja'aque'ena' to beŋə' gože' le': —Sa'alena' le' gatə'ətezə šejo'.

⁵⁸ Nach gož Jeso'osən' le': —Zjəde liž becoyo'o ca' na' leczə ca' zjəde liž bia ca' zo xile'e bia chaš yoba, pero bito bi xlatja' de gan' gona' dezcanz, nadan' naca' ben' bselə' Diozən' golja' beŋəch.

⁵⁹ Na' Jeso'osən' gože' yeto beŋə': —Denao nada'.

Pero be'ena' gože' le': —Xana' be' latjə zgua'atec yega'anlena' xa'anə' xte catə' əžin ža gate' par nič əgwcuša'ane'.

⁶⁰ Na' gož Jeso'osən' le': —Beŋə' ca' zjənaquə len yichjla'ažda'oga'aquen' ca beŋə' guat guaquə yesə'əcuəše'e beŋə' guat ca'. Pero le' jətičjue'e de que Diozən' ŋabi'e con nota'ətezə beŋə' soe' latjə.

⁶¹ Nach leczə yetoe' gože' Jeso'osən': —Sa'alena' le' Xana', pero zgua'atec be'ešga latjə žjəyezeida' family chia' dižə'.

⁶² Jeso'osən' gože' le': —Beŋə' bagwzolao naogüe' nada' šə bito naogüe' do yichj do laže'e, na' šə yo'o yichje' che de'e ca' bocua'ane', bito zaque'e par gone' xšin Diozən'. Na' gwxaquə'əlebene' ca to beŋə' chgüia traslə žlac chgua'ane' go'oŋ.

10

Jeso'osən' bsele'e gyonši beŋə' žjəsə'ədixjui'e xtiže'ena'

¹ Gwde de'e quinga, Xanchon' gwleje' gyonši beŋə'. Na' bene' mendad yesə'əbialaogüe' əžja'ac čhopə güeje' to to syoda na' to to yež gan' ze'e šej le'.

² Na' antsla ze'e žja'aque' gože' lega'aque': —De'en chona'anə' gwxaquə'əleben ca to cwseš xen de'en chotoba'. Na' chyažjda' beŋə' zan sa'aclene' nada', pero to čhopgale nita'. De'e na'anə' leŋəbe Xancho Diozən' əselə'əche' beŋə' zanch par əsa'aclene' chio'o čixjue'echo xtiže'ena'.

³ Na' le'e gon xbab de que nadan' chsela'a le'e žjətičjue'ile xtiža'an len beŋə' ca' gwxaquə'əlebe ca bež, na' le'e gwxaquə'əlebele ca xilə' dao' ladjoga'aque'ena'. Can' chso'on bež ca' chso'otteb xilə' dao', leczə can' se'ene beŋə' so'ote' le'e.

⁴ Bito gua'ale mech, ni xala'anle, ni xelle, na' bito šeile gan' əgguaple beŋə' diox beŋə' yežagle tnez.

⁵ Na' nota'ətezə ližei šo'ole, zgua'atec ənale: “Chŋablažə'əšga so cuezle binlo len xbab de'en yo'o lo'o yichjla'ažda'olen', le'e nita'əle nga'.”

⁶ Šə na' zo to beŋə' chene'ene' so cueze' binlo len xbab de'en yo'o lo'o yichjla'aždaogüe'ena', na' gaquə can' bagwŋablažə'əle par so cueze' binlo. Pero šə bito no zo no chon ca so cueze' binlo len xbab de'en yo'o lo'o yichjla'aždaogüe'en, bito gaquə ca de'en bagwŋablažə'əlen'.

⁷ Na' le'e yo'o na'atezə yega'anle. Bito yeyilje ga yoblə sole. Le'e ye'ej le'e gao bitə'ətezə de'en so'one' ye'ej gaole. Ca to beŋə' güen žin cheyalə' si'e laxjue', le'egatezə ca' le'e zaquə'əle par so'one' de'e ye'ej de'e gaole.

⁸ Na' catə' əžinle to yež ga əso'elaogüe'e le'e, ye'ej gaotezle de'en so'one' le'e.

⁹ Le'e yeyon beŋə' güe' nita' yež gan' əžinlen', na' le'e ye'ega'aque': “Babžin ža chene'e Diozən' güe'ele latjə ŋabi'e le'e.”

¹⁰ Pero na' catə' əžinle to yež ga cui yesə'əgüialaogüe' le'e, ležja'ac lao lqueyən' na' le'e ye'ega'aque':

11 “Bište che lažle nga de'en žia ņi'ato' quinga yosi'insto'on par ničh əgwlo'ito' le'e de que de'e malən' chonle bito chzenagle xtižə' Diozən' de'en cho'eto'onə'. Pero na' chyiḡjue'ito' le'e de que Diozən' chene'ene' güe'ele latjə nabi'e le'e.”

12 Na' gož Jeso'osən' beṇə' gyonši ca': —Diozən' bene' par ničh byinj' yi' na' sofr lao' syoda Sodoman' por ni che de'en cui boso'ozenag beṇə' ca' che'. Na' de'e li əchnia' le'e, žan' gaquə juisyən' beṇə' ca' cui yoso'ogüialao le'e yesə'əzaquə'əzi'iche' clezə ca beṇə' ca' gwnitə' Sodoman'.

Beṇə' ca' cui choso'ozenag xtižə' Jeso'osən'

13 Nach gozna Jeso'osən': —iProbchguazə le'e beṇə' Corazin! iProbchguazə le'e beṇə' Betsaida! Beṇə' ca' nitə' Tiro na' Sidon le'e besyə'ədinjine' xtolə'əga'aque'enə' žalə' blo'iga'acda'ane' yelə' guac čhia'anə' ca de'en bablo'ida' le'e. Žalə' goquə ca' sa'azlje' lachə' zešə' na' zosə'əža'alja cuinga'aque' de par ničh sa'acbe'i beṇə' de que babesyə'ədinjene' xtolə'əga'aque'enə'.

14 Saquə'əzi'ichle clezə ca beṇə' ca' nitə' Tiro na' Sidon catə' əžin ža gaquə juisyən'.

15 Le'e nitə'ale Capernaunnə' chonle xbabən' de que Diozən' gonchgüe' le'e yelə' bala'an. Pero bito gone' le'e yelə' bala'an, sino gone' le'e castigw zejlicane de'en cui chejle'ele čhia'.

16 Nach Jeso'osən' goze'e beṇə' gyonši ca': —Beṇə' gwzenag xtižə'əlen' leczə gwzenague' xtižə'anə', na' beṇə' gonczə yichjlaogüe cui gwzenague' xtižə'əlen', leczə bito gwzenague' čhia' nada'. Na' beṇə' gonczə yichjlaogüe cui gwzenague' xtižə'anə', leczə bito gwzenague' xtižə' Diozən' ben' bselə' nada'.

Besyə'əžin beṇə' gyonši ca'

17 Beṇə' gyonši ca' cata' beyož žəsə'ədiḡjui'e xtižə' Jeso'osən' besyə'əžine' gan' zoe', na' besyə'əbeichgüeine'. Nach gwse'e Jeso'osən': —Xanto', de'e zan miḡagr babento' cho'eto' la'onə' par chebejto' de'e xio' ca' de'en zjəyo'o zjəyaz yichjla'azdao' beṇə' na' choso'ozenaguən čheto'.

18 Na' gože' lega'aque': —Ble'ida' can' gwnit yelə' gwnabia' che Satanasən' to žalnez.

19 Babena' le'e yelə' guac par ničh əgwlej əgwšošje no bel'əznia' na' no hexgoni', na' leczə əgwlej əgwšošje gwxiye'enə'. Na' bito bi de de'e soi gonen le'e zi'.

20 Pero bito yebeitequele de que de'e xio' ca' choso'ozenaguən čhele, sino le'e yebeichgüei de que Diozən' babzoje' lalen' le'e libran' gan' zjənyoj la yoguə'əlol xi'ine' ca'.

Bebeichgüei Jeso'osən'

21 Lao or na'atezə ben Spirit che Diozən' ca bebeichgüei Jeso'osən'. Na' bene' orasyon lao Diozən', gwne': —Xa' len' chnabi'o beṇə' ca' ža' yoban' na' yežlyon'. Na' choṇa' yelə' choxwlen čhio' de que babzejni'ido' balə beṇə' can' che'endo' so'e latjə nabi'o yichjla'azda'oga'aque'enə'. Babzejni'ido'on beṇə' ca' gwsa'acbe'i čəsə'əyazjene' no əgwsed əgwlo'i lega'aque' na' bito bzejni'ido'on beṇə' ca' chso'on xbab de que zjənaque' beṇə' sin' na' beṇə' zjənyejni'i. Beno' ca' ža Xa, čhedə' can' gwyazlažo'o.

22 Nach gože' beṇə' ca' ža'anə': —Xa'anə' babene' lao na'a chona' par ničh chombia' beṇə' le'. Le' nombi'ayane'e nada' na' nada' nombi'ayana'le le'. Na' beṇə' ca' bagwleja' par zjənombi'e Xa'anə', chona' par ničh zjənombi'ene'. Na' notono no nochlə zjənombia' Xa'anə' na' ni nada'.

23 Na' gwyechj Jeso'osən' bgüie' disipl che' ca' na' gože' lega'acze': —Mbalaz zole ca de'en chle'ile nada' na' chle'iteile de'e ca' chona'.

24 Echnia' le'e, beṇə' zan profet na' rei gwse'enene' yesə'əle'ine' nada', pero bitoch golə' yesə'əle'ine' nada'. Na' gwse'enene' yesə'əneze' de'en nezele, pero bitoch golə' yesə'əneze' en.

Jempl che to beṇə' güen beṇə' Samaria

25 Na' gwzecha to beṇə' chsed chlo'i lei de'en bzoj de'e Moisezən'. Gone'ene' gone' Jeso'osən' prueb bin' əne' na' gože'ene': —Maestr, žbi cheyalə' gona' par ničh gatə' yelə' mban zejlicane čhia'?

26 Na' gož Jeso'osən' le': —žBin' nyojan le'e lein'? žNac nan?

27 Na' ben' chejni'ichgüei che lein' boži'e xtižə' Jeso'osən' gože'ene': —Lei chechon' nan: “Cheyalə' gaquecho che Xancho Diozən' do yichj do lažə'əcho, do fuers balor checho, na' gaquecho che ljuežjcho catg chaquecho che cuincho.”

28 Nach gož Jeso'osən' le': —De'e liczə can' bagwnao'. Can' cheyalə' gono' par əbano' zejlicane.

29 Na' be'enə' gone'ene' əgwlo'e de que zdacze' licha can' nanṇə' na' gože' Jeso'osən': —žNon' naquə ljuežja' ben' cheyalə' gaquəda' čhei?

³⁰ Na' Jeso'osən' gože'ene': —To beṇə' beze'e Jerosalennə' par yežine' Jerico na' jasyə'axen beṇə' bguan le'. Na' gosa'əyine' xala'ane'ena' na' gwsə'ot gosa'əyine' le' nach besa'aque' bosyo'ocua'ane'ene' caczə to beṇə' guat.

³¹ Na' goquən' to bχoz gwdie' tnezən' na' catə' ble'ine' ben' de'ena', nach gwdie' yešla'alə nezən'.

³² Lecza can' ben to beṇə' goljə' lao dia che de'e Lebin'. (Beṇə' ca' yo'o lao na'aga'aque' so'one' mendad lo'o yo'odao' əblaonə'.) Zde' tnezən' na' catə' bžine' gan' ble'ine' de be'ena' na' gwdie' yešla'alə nezən'.

³³ Pero to beṇə' Samaria lao ngü'e nezən' nlague' xporren' bžine' gan' de be'ena' na' ca ble'ine' le' beyašə'alaže'ene'.

³⁴ Na' bgüigüe'e gan' de'ena', na' bšone' set na' bino lao güe'ena', na' bčeje'en lachə'. Nach božie'ene' cožə' xporre'ena'. Na' beče'ene' gan' zo to meson gan' bgüia bye'ene'.

³⁵ Na' beteyo gwleje' chopə mech de'en nzi' denario bnežjue'en xan mesonə' na' gože'ene': “Bgüia bye benga na' šə bichlə de'en gono' gast na' chixjua'an catə' zezə'a.”

³⁶ Beyož be' Jeso'osən' dižə' can' goc che ben' jasyə'axen beṇə' bguan ca', nach gože' ben' chsd chlo'i lein': —Zi chacdo'? ?noe' beṇə' ca' goquene' de que beṇə' probən' naquə' ljuēžje' ben' cheyalə' gaquene' chei'?

³⁷ Nach ben' chsd chlo'i lein' gože' Jeso'osən': —Ben' beyašə' beži'ilažə' ben' jasyə'axen beṇə' bguan ca'.

Nach gož Jeso'osən' le': —Lecza can' cheyalə' gono' dezd na'a, yeyašə' yeži'ilažo'o yoguə'əlol beṇə'.

Jeso'osən' jalane'e Martən' na' Marian'

³⁸ Na' lao zja'aque' besyə'əžine' to yež, na' to no'olə le Mart bene' le' combid na' Jeso'osən' gwyeje' liže'en.

³⁹ Na' zo to bile' le' Maria. Na' Marian' gwchi'e cuit Jeso'osən' par bzenague' xtizə'ena'.

⁴⁰ Pero na' Martən' belə'chgüeine' bsi'ini'e de'en sa'ogüe'. Na' gwyeje' lao Jeso'osən' na' gože'ene': —Xana', zəcabi bi chacdo' de que bila'anə' bocua'anlene' nada' mendadən' toza'? Benšga mendad gaquəlene' nada'.

⁴¹ Xanchon' gože' le': —Mart, chi'ichgua yichjo' che xmendado'ona' na' chacžejlažo'o laogüe de'en nyanchguan.

⁴² Maria nga bagwleje' de'en naquəch de'e güen, chi'ichgua yichje' chzenague' chia'. Na' bito gwžoncho gone' ca'. Lecza de'en žialao gonle.

11

Jeso'osən' blo'ine' can' so'one' orasyon

¹ Na' gwzo Jeso'osən' to latjə bene' orasyon. Catə' beyož bene' orasyonə' to disipl che' ca' gože'ene': —Xanto', bsd blo'išgüei neto' naquən' cheyalə' gonto' orasyonə', can' bsd əblo'i de'e Juanna' disipl che' ca'.

² Na' Jeso'osən' gože' lega'aque': —Catə' gonle orasyonə' quingan' nale:

Xato' beṇə' zo yoba, chnabto' yoguə'əlol beṇə' əso'elaogüe'e le'.

Chnabto' gono' par nič beṇə' zan əso'e latjə nabi'o lega'aque'.

Gaquəšga can' che'endo'ona' lao yežlyo nga can' chac yoban'.

³ Benšga na'a de'e gaoto' tza tza.

⁴ Na' beži'ixenšga cheto'

chedə' lecza neto' chezi'ixento' che sa'aljuežj beṇəchto'ona' bitə'ətezə de'e chso'onene' neto'.

Na' bito go'o latjə gaquə de'e nabia' neto' len xbab cheto'ona' par gonto' de'e malən',

mas bcuasə' bcue'ej neto' len de'e malən'.

⁵ Nach gož Jeso'osən' lega'aque': —Legon xbab nac gaquə šə šejle liž beṇə' migw chele do chel na' ye'elene': “Migw chia', benšga nada' šonə yetxtil.

⁶ Babla' to migw chia' beṇə' za' zita', na' bito bi de chia' par əgwnežjua'ane' gaogüe'.”

⁷ Na' migw chelen' yo'e lo'o yo'ote šə yoži'e xtizə'əlen', əne': “Bito gondo' nada' zed, la' banyeyjw puertən' na' badeto' chtasto' len xi'into'. Bito chasa' par gona' de'en chyažjdo'.”

⁸ Echnia' le'e, la'anə'əczə naque' migw chele bito yene'ene' chase' par gone' le'e yetxtilən', pero šə sole yepəyoe nabelen le' na' gwyasšaze' na' gone' bitə'ətezə de'en chyažjele.

⁹ Na' chnia' le'e, bitə'ətezə de'en chene'echo gaquə, de de'e goncho par nič gaquən. Šə to de'e chene'echo so'on beṇə' chio'o, chnabchon. Šə to de'e chene'echo əzelecho, chyljchon. Šə puert de'en chene'echo əsaljo beṇə', chnecho cho'a puertən' par nič chsaljue'. Na' ca'aczən' cheyalə' ye'echo Diozən' catə'an de de'en chene'echo gaquə.

¹⁰ Na' nota'ətezcho šə bi de'en chnabechone' gone', la' de'e gonczə'ena'. Na' nota'ətezcho šə bi de'en chnabechone' əgwzejni'ine' chio'o, gwzejni'iczene'en. Na' nota'ətezcho šə chnabechone' gaquə to de'en chene'echo gaquə can' chon beṇə' chne' cho'a puertən', la' de'e gaquaczən'.

¹¹ Na' le'e nacle xa bidao', šə xi'inlen' ənabebo' le'e yetxtil ɔəgwnežjwlebo' to yej? Na' šə ənabebo' le'e to bel ya'a ɔəgwnežjwlebo' to bel bia nxoba le'?

¹² Na' šə ənabebo' le'e to žit gaobo' ɔəgwnežjwlebo' to hexgoni'? Cle bito gonle ca'.

¹³ Le'e nacle beṇə' mal pero nezele chnežjwle xi'inlen' de'e güen. Naquəchxe güen gon Xacho Diozan' ben' zo yoban' gone' Spirit che'enə' son lo'o yichjla'aždao' notə'tezcho ənabechone' len.

Gosa'əne' de que Jeso'osan' bebeje' de'e xio' ca' len yelə' guac che Beelsebo

¹⁴ Na' Jeso'osan' bebeje' de'e xio' yo'o yaz yichjla'aždao' to beṇə' mod. Na' catə' bechoj de'e xi'onə' yichjla'aždao' be'enə', goc beṇə', na' beṇə' ca' ža'anə' besyə'əbanchgüeine'.

¹⁵ Pero bale' gosa'əne': —Chebeje' de'e xio' ca' len yelə' guac che Beelsebo de'en chnabia' de'e xio' ca'.

¹⁶ Na' yebale' gwse'enene' so'one' le' prueb naclən' gone', gosa'ənabene' le' gone' to de'e yesə'ələ'ine' le'e yoban' de'e zaquə' yesyə'əbanene'.

¹⁷ Pero Jeso'osan' gocbe'ine' xbab de'en gwso'one', na' gože' lega'aque': —Šə beṇə' ža' to nasyon əsa'aque' choplə na' yesyə'ədile' entr lega'aque', əgwžiyai' nasyon chega'aque' na'anə'. Na' šə to family beṇə' əsa'aque' choplə na' yesyə'ədile' entr lega'acze', leczə yenit family chega'aque' na'anə'.

¹⁸ Na' leczə šə Satanasən' len de'e xio' chei ca' əsa'aquən choplə na' yesyə'ədilən, cuiayi' yelə' chnabia' chega'aquennə'. Le'e nale de que chebeja' de'e xio' ca' zjəyo'o zjəyaz yichjla'aždao' beṇə' len yelə' guac che Beelsebon'.

¹⁹ Žalə' naquən can' nale de que chebeja' de'e xio' ca' zjəyo'o zjəyaz yichjla'aždao' beṇə' len yelə' guac che Beelsebon', leczə zejen de que beṇə' ljuežjle ca' chəsyə'əbeje' de'e xio' ca' zjəyo'o zjəyaz yichjla'aždao' beṇə' len yelə' guac chein' žalə' ca'. Beṇə' ljuežjle ca' se'e le'e de que clelən' nale chia' can' chebeja'anə'.

²⁰ Na' de'en chebeja' de'e xio' ca' len yelə' guac che Diozan', chlo'in de que babžin ža catə' Diozan' nabi'e notə'tezle güe'ele latjə.

²¹ Gwxiye'enə' gwxaquə'əleben ca to beṇə' gual, na' nada' naquəcha' beṇə' gualəch. Na' nezele de que catə' to beṇə' gual chape' ližen' len spad, yoguə' de'en de che' naquən segor.

²² Pero catə' əžin to beṇə' gualəch ca le' na' tilələne'ene', na' ben' naquə gualəch len' gon gan. Na' que'e spad che be'enə' de'en zoe' lez gaquəlenən le'. Na' əca'atie' bichlə de'e de che' na' chise'en len migw che' ca'.

²³ Šə cui chonle t xen len nada' chonle contr nada'. Na' šə cui chonle ca se'ejele' beṇə' chia', zeje dižə' de que chonle par nič cui yoso'ozenague' chia'.

De'e xi'onə' yeyo'on de'e yoblə lo'o yichjla'aždao' beṇə'

²⁴ Na' šə to de'e xio' de'en yo'o yaz yichjla'aždao' beṇə' yechojən nach lažə'an nil na'alə yeyiljan ga son mbalaz. Na' šə bitobi latjə želen, nach ənan: "De'e yobləczə žjəyəžo'a yichjla'aždao' ben' gan' gwyo'o gwyaza' antslə."

²⁵ Na' yeyejən de'e yoblə gan' zo ben'. Catə' le'in de que bacheyone' xbab güen nach bazoche' binloč, na' yeyo'on de'e yoblə.

²⁶ Nach žjəyətobən yegažə de'e xio' ca' de'en zjənaquə maləch ca len na' txennə' so'on lo'o yichjla'aždao' be'enə'. Na' šə bagwso'onən ca' bachaquəch mal che be'enə' clezə can' goc che' antslə.

Mbalaz nitə' beṇə' ca' choso'ozenag xtižə' Diozan'

²⁷ Lao be' Jeso'osan' dižə' quinga, gwzo to no'olə gwchoł beṇə' ca' zjəžə' gan' bsed əblo'ine'enə'. Na' no'olən' gwne' zižjo gože'ene': —Mbalaz zo no'olən' gwxa' le' na' bguəže'e le'.

²⁸ Pero na' Jeso'osan' gože'ene': —Naquəchxe mbalaz nitə' beṇə' ca' choso'ozenag xtižə' Diozan' na' chso'one' can' ne'enə'.

Chasa'ənabe' gon Jeso'osan' to miłagr

²⁹⁻³⁰ Na' beṇə' zan beyechj bebi'i cuit Jeso'osan' na' gwne': —Le'e mbanle na'a naquəchguale beṇə' yichjla'aždao' mal. Chnabe gona' to miłagr par nič ənezele šə le Dioz nan' bsele'e nada'. Pero bito gona' can' chnablenə'. De'e gon Diozan' len nada' par nič ənezele de que le'enə' bsele'e nada' gwxaquə'əleben ca de'en bene' len de'e profet Jonasən' par nič gosa'əneze beṇə' Ninibe ca' de que Dioz nan' bsele'ene'.

³¹ Catə' əžin ža gon Diozan' castigw che yoguə' beṇə' chso'on de'e malən', de'e no'olən' gwnabia' beṇə' ca' gwnitə' galən' chlə' bgüižən' cuiten lichalə yebane' len yeziquə'əchlə beṇə' guat ca' na' lao Diozan' gwcuiše' le'e mbanle na'a. Ca naquə le' ža, gwze'e Seba gan' naquə zita'əchgua na' bide' nga par bzenague' dižə' sin' de'en be' de'e Rei Salomonṇə' len le'. Na' nada' zoa' nga naquəcha' beṇə' blaoch cle ca de'e Salomonṇə', na' bito chzenagle chia'.

³² Na' catə' əzin ža gon Diozən' castigw che yoguə' beṇə' chso'on de'e malən, leczə ža na' yesyə'əban beṇə' Ninibe ca'. Na' yesə'əcuišē' le'e nitə'əle lao dia nga cheda' besyə'ədinjene' xtolə'əga'aque'enə' catə' de'e Jonasan' gwdixjue'ine' lega'aque' can' gwna Diozən'. Legonšc xbab de que nada' zoa' nga naquəcha' beṇə' blaoch cle ca de'e Jonasan', na' bito chzenagle chia'.

De'en bsd blo'i Jeso'osan' gwxaquə'əleben ca to yi'

³³ Nach Jeso'osan' bsaquə'əlebene' xtižē'enə' na' len de'en chone'enə' ca to yi'. Gozne': —Notono no gualə' to yi' na' gwdose'en žomə, na' nic əgwcuəše'en ga yoblə ga cui no le'i len. Syempr chde'en le'e ze'e par nič əgwse'eni'in len yoguə' beṇə' so'o lo'o cuartən'.

³⁴ Žia jelaochon' par nič chle'icho. Con šə bito bi chaquen, chle'iczecho binlo. Pero šə nchol jelaochon', bito chle'icho. Ca'aczən' naquən len yichjla'ažda'ochon'. Šə naccho beṇə' la'aždao' güen, yo'o be'eni' che Diozən' yichjla'ažda'ochon', pero šə naccho beṇə' la'aždao' mal, nchol yichjla'ažda'ochon'.

³⁵ De'e na'anə' legon par nič gacle beṇə' la'aždao' güen, na' šo'o be'eni'n yichjla'ažda'olen'. Bito gacle beṇə' la'aždao' mal na' beṇə' yichjla'aždao' žchoł.

³⁶ Šə nye'eni' yichjla'ažda'olen' na' cui bi de'e mal yo'on, gwse'eni'iczan xpezen' can' chse'eni' to lampara gan' naquə žchoł.

Jeso'osan' gože' beṇə' fariseo ca'na' beṇə' ca' choso'osed choso'olo'i lein' de que žjanape' dolə'

³⁷ Cata' beyož be' Jeso'osan' dižə' quinga, to beṇə' fariseo bene'ene' combid šeje' liže'en par əsa'ogüē'. Na' gwyo'o Jeso'osan' liž beṇə' fariseon' na' gwchi'e cho'a mesən'.

³⁸ Na' beṇə' fariseon' bebanene' cata' ble'ine' bito bona' Jeso'osan' antsła ze'e gaogüē' can' chosyo'ona' lega'aque' chsa'aque'ne' yebei Diozən' lega'aque' de'en chso'one' ca'.

³⁹ Xanchon' gože' le': —Le'e beṇə' fariseo gwxaquə'əlebele ca tas plat de'en chchin beṇə' na' cui cha'a chyibe' lo'inə' binlo. Chonle par nič chsa'aque beṇə' de que nacle beṇə' güen, pero chebeile chca'ale bi de'e de che beṇə' na' nacle beṇə' mal juisy.

⁴⁰ Cui bi bi xbab de'e zaque'e yo'o lo'o yichjla'ažda'olen'. Chi' yichjle nac gonle par gacle xi'ilažə' len cuerp chele. Le'egatezə ca' cheyalə' cue' yichjle nac gonle par gacle xi'ilažə' len yichjla'ažda'olen', cheda' Diozən' ben' ben cuerp chechon' leczə le'enə' bene' yichjla'ažda'ochon'.

⁴¹ Le'e gwnežjo beṇə' bi de'en deile, beṇə' chəsə'əyazjene'en. Šə gonle ca' nacia' de que nacle beṇə' la'aždao' xi'ilažə'.

⁴² i'Probchguazə le'e beṇə' fariseo! Lə'anə'əczə chnežjwle Diozən' to part lao ši part che yixgüēj, che yej Sant Maria, nach che rcaod chele, bito bi zejen, cheda' bito chonle de'en naquə güen na' bito chaquēle che Diozən'. De'en naquə de'e žialao gonle, gonle de'en naquə güen na' gaquēle che Diozən'. Pero bito cuejyichjle əgwnežjwle de'e ca' de'en chnežjwle Diozən'.

⁴³ i'Probchguazə le'e beṇə' fariseo! Chzelažə'əle cue'ele lo'o yo'odao' ca' txen len beṇə' golə beṇə' blaoc ca' na' catə' chejle do gan' chac ya'a chene'ele əso'elao' beṇə' le'e.

⁴⁴ i'Probchguazə le'e chsd chlo'ile lei de'en bzoj de'e Moizezən' na' len le'e beṇə' fariseo! Chene'ele so'on beṇə' xbab chele de que nacle beṇə' güen, pero len yichjla'ažda'olen' nacle beṇə' mal. Na' leczə beṇə' ca' zedəsə'ənao le'e əsa'aque' can' nacle sin cui sa'acbe'ine'.

⁴⁵ To beṇə' chsd chlo'i lein' boži'e xtižə' Jeso'osan' na' gože'ene': —Maestr, laogüē de'en nao' de'e quinga leczə chšašo' cheto'onə'.

⁴⁶ Na' gož Jeso'osan' le': —Leczə ca' le'e chsd chlo'ile lein' i'probchguazlen'! Chzanchle can' na lein', chonlen ca to yoa' de'e cuiczə no do'i na' chene'ele soa' beṇə' yoblə len, na' le'e bito chene'ele gua'alēn.

⁴⁷⁻⁴⁸ i'Probchguazə le'e chonle monoment lao ba che de'e profet ca' gwso'e xtižə' Diozən'! Chacle tozə len de'e xaxta'ocho ca' de'en gwso'ote' lega'aque', na' le'e chonle par nič nabči'axejə de que gwso'ote' de'e profet ca' laogüē de'en chonle monoment lao ba che beṇə' ca' gwso'ote'.

⁴⁹ De'e na'anə' lao yelə' sin' che Diozən' gwne' de que əsele'e len le'e profet che' ca' na' apostol che' ca', beṇə' so'e xtižē'en. Na' gwne' de que le'e gotle balə' na' gwchi' gwsaquə'əle yebale'.

⁵⁰ Na' de'e li bachonle can' gwne'. De'e na'anə' si'ile castigw che yelə' got che yoguə' profet ca' gwso'ote' dezd catə'an gwxe yežlyon' xte ža neža, le'e mbanle na'a.

⁵¹ Zan beṇə' gwso'ot beṇə' yoblə lega'aque'. Na' le'e si'ile castigw che yelə' got che yoguə' beṇə' ca' gwzolaozən len de'e Abelən' ben' bet de'e biše'e Cainnə' le' na' zelaon len de'e Zequerian'. Zequeria na'anə' gwso'ote' entr yo'odao' əblaona' na' entr mes de yej gan' chso'ote' bia yixə' par chso'elaogüē'e Diozən'.

⁵² ꞑProbchguazə le'e chsed chlo'ile lein! Ca naquə de'en chzejni'ile beṇə' lei che Diozən', bito chzejni'iga'aquelenen'icha can' naquən, na' nic chzenagle chei. Na' beṇə' chse'ene'e yoso'ozenag chei, nic cho'ele latjə yoso'ozenague'.

⁵³ Na' cata' beyoʒ be' Jeso'osən' dižə' quinga, nach beṇə' fariseo ca' na' beṇə' ca' choso'osed choso'olo'i lein' gwsa'acyoʒəchgüe' le' na' gwse'enene' yesə'əbeje' le' dižə'.

⁵⁴ Na' gosə'əbe'enaogüe' əchoj dižə' cho'enə' de'en yosə'əde'ine' par əsa'ogüe' xya contr le'.

12

Yelə' goxoayag che beṇə' fariseo ca'

¹ Na' goquən' zan mil beṇə' babesə'əʒag gan' zo Jeso'osən' xte bosə'əlej bosə'əšoʒj ni'a ljuəʒjga'aque'. Na' Jeso'osən' gwzolaoteque' be'e dižə' len disipl che' ca' goʒe' lega'aque': —Le'e gapə cuidad niç cui əxoayagle beṇə' par əsa'aquene' nacle beṇə' güen can' chso'on beṇə' fariseo ca'. Yelə' goxoayag chega'aque'ena' gwxaquə'əleben ca xna' cuazin' de'en chlaʒə'an par chaquən yetxtil.

² Bito gonle can' chso'one'ena' cheda' gaquə can' na dicho de'en na: “Yoguə'əloj de'en ngašə' na'a gwžin ʒa la'alaon, na' yoguə'əloj de'en cui no gwse'ejni'i antslə, leczə gwžin ʒa se'ejni'i beṇə' len.”

³ De'e na'anə' bitə'ətezə de'e ənale bgašə'əza, beṇə' zan əse'enene'en, na' de'en ənale žižiza lo'o cuart chelen', leczə beṇə' zan yesə'əneze len.

Non' cheyalə' žebcho

⁴ Migw chia', əchnia' le'e, bito žeble beṇə' ca' əso'ot le'e, cheda' cata' bagotle bitoch bi gaquə so'onene' le'e.

⁵ Choṇa' le'e consejw, cheyalə' žeble Diozən' cheda' cata' baçh beque'e yelə' mban chelen' leczə nape' yelə' guaquən' par yesele'e le'e gabilən'. De'e yoblə əchnia' le'e, cheyalə' žeble Diozən'.

⁶ Nezecho de que byin dao' ca' bitobi zjəzaquə'ətequəb, pero na' Diozən' ni tob cui chanlaže'e.

⁷ Na' ca naquə chio'o ʒa, de'e tant chaque Diozən' checho xte nezene' balə yišə' yichjto tocho ʒia la'ana'əczə bitotec bi zjəzaquə' yišə' yichjchon'. De'e na'anə' bito žeble cheda' zaquə'əch le'e cle ca bia zan byin dao'.

Cheyalə' güe'echo dižə' len beṇə' de que nombi'acho Jesocristən'

⁸ Na' əchnia' le'e, notə'ətezle šə cho'ele dižə' len beṇəçən' de que chejle'ele chia', leczə ca' nada' gua'a dižə' len angl che Diozən' de que nacle xi'ina', nadan' naca' ben' bselə' Diozən' golja' beṇəçh.

⁹ Na' notə'ətezle šə cho'ele dižə' len beṇəçən' de que bito chejle'ele chia', leczə ca' nada' gua'a dižə' lao angl che Diozən' de que bito nacle xi'ina'.

¹⁰ Na' notə'ətezle šə güe'ele dižə' contr nada' naca' ben' bselə' Diozən' golja' beṇəçh, Diozən' yezi'ixene' chele šə yedinjele can' nale. Pero notə'ətezle šə güe'ele dižə' contr Spirit che Diozən', cuat yezi'ixen Diozən' chele.

¹¹ Na' šə yesə'əche'e le'e lao beṇə' gwnabia' che yo'oda'onə' o lao beṇə' jostis ca' o šə lao yeziquə'əchlə beṇə' ca' zjənapə poder, bito cuec yichjle nac yoʒi'ile xtizə'əga'aquən', o šə nacle ənale.

¹² Lao or na'atezə Spirit che Diozən' əgwlo'in le'e bin' cheyalə' ənale.

Bito cheyalə' cuec yichjcho tlaozə bi de'en deicho

¹³ Entr beṇə' zan juisy ca' toe' goʒe' Jeso'osən': —Maestr, gonšgo' mendad par niç gon beṇə' biša'ana' nada' bien che de'e xaxna'ato' de'en cheyalə' si'a.

¹⁴ Pero Jeso'osən' goʒe' le': —Bito naca' nada' juez chele na' bito naca' beṇə' güe'e laze che de'e deile.

¹⁵ Nach goʒe' lega'aque': —Le'e gapə cuidad par niç bito selaʒə'əle bi gata' chele yežlyon', cheda' bito əbancho laogüe šə deczə zan de'e de checho.

¹⁶ Na' be'elene' lega'aque' to jempl gwne': —To beṇə' gwni'a leçgualə goc cwseš che'ena'.

¹⁷ Na' bene' xbab lo'o yichjla'aždaogüe'en gwne': “¿Nacxa gona? cheda' bitoch bi latjə de par cwseš chia'anə'.”

¹⁸ Nach gozne': “Quinga gona', yochinja' yo'o gan' nga ʒa' cwseš chia' quinga na' gona' yo'o xench. Na' gwža'ašaogua'a cwsešan' na' bichlə de'e de chia'.

¹⁹ Na' laogüe bade de'e chyažjda' par zan iz, bitoch gona' žin. Ye'ej gaoteza' con bi che'enda' na' gona' legr.”

²⁰ Pero Diozən' goʒe' be'ena': “Beṇə' tont le'. Neže' bžin or gato', na' ¿nola lao ne'i gaquə yoguə' de'en de chio'onə'?”

²¹ Can' gac che notə'ətezə beṇə' šə con chbec yichje' tlaozə de'en deine' žlac mbane' na' bito chone' ca yebei Diozən' le'.

Diozən' chapə chye' xi'ine' ca'

²² Na' gož Jeso'osən' disipli che' ca': —Echnia' le'e, bito cuec yichje' tlaozə de'en ye'ej de'en gaole lao mbanle. Na' lecza ca' bito cuec yichje' tlaozə de'en gacwlen'.

²³ Zakuə'əch yeļə' mban chelen' ca yeļə' guaon'. Le'egatezə ca' cuerp chelen' zakuə'əchən ca xala'anlen'.

²⁴ Legontoš xbab, ca naquə bechj ca' bito chsa'azəb bito chəsyə'əlapəb, nic zo da'a xoa' chega'əquəb, nic zo gan' ncuə' no guangoš chega'əquəb ga ža' de'e sa'ob. Pero na' Diozən' chguaocze' lega'əquəb. Naquəchxen' zakuə'əle ca bia ca' žia xile'e.

²⁵ Na' ni tole bito gaquə yoston cuinle gašj metr šə con cue'e yichje' ətonle.

²⁶ Nezele bito gaquə yoston cuinle na' nic naquən de'e zaque'e. De'e na'anə' bito gontecle xbab che biquə'əchlə de'e chyažjele.

²⁷ Legontoš xbab ca naquə yej ca' de'en zjəze yixə' chesə'əcha'oczan. Bito bi žin chso'onən, nic chsa'aljən do. Na' əchnia' le'e de'e Rei Salomonṇə' goque' lacha' xoche juisy, pero bito bžinlaže'e xalane'enə' ca yeļə' xoche che yej ca'.

²⁸ Diozən' none' xoche yixə' de'en ze yoba len to termzən' zen nach choso'ozeye'en, naquəchxe gon Diozən' len le'e ggüe'ecza yichje' gone' yoguə'əte de'en chyažjele, le'e cui chejle'etecle de que gone' de'en chyažjele.

²⁹ Le'e ža, bito güe'elažə'əle par gatə' de'e ye'ej de'e gaole. Bito gaquəžejlažə'əle che len.

³⁰ Beṇə' ca' cui chso'elao' Diozən' porza chei de'e can' chso'elažə'əzeche', che de'en əse'ej de'en əsa'ogüe' na' che xala'anga'aque'. Pero Xacho Diozən' nezczene' biquə' de'e ca' chyažjele.

³¹ De'en güe'elažə'əle, güe'ele latjə par nič Diozən' nabi'e le'e. Na' yoguə' de'e ca' de'en chyažjelen' gonczə Diozən' len, de'en ye'ej de'en gaole na' xala'anle.

De'e zakuə'əche gatə' checho catə' yežincho yoban'

³² Bito žeble la'anə'əczə naquə to chopzle. Diozən' chebeine' chnabi'e le'e na' chaclene' le'e.

³³ Le'e yeyotə' de'en deile par nič gatə' de'e əgwnežjwle beṇə' ca' chesə'əyažje. Šə gonle ca' caguə cuiayi' de'en deilen', chedə' la' Diozən' gone' le'e de'e zakuə'əche na' de'e cui te chei catə' yežinle yoban' gan' zo'enə'. Na' bito gac šo'o beṇə' bguan par əque'en, na' niqwe gaquə šo'o bia dao' əgwžiai' len.

³⁴ Gan' de de'en chaquele chei, nan' zo yichjla' ažda'olen'.

Cheyaļə' socho probnid par catə'an yida Cristən' yeto

³⁵⁻³⁶ Nach Jeso'osən' bsed blo'ine' lega'aque' naquən' gaquə catə'an yide' de'e yoblə. Na' gwne': —Le'e so probnid par catə'an yida' yeto, le'e so can' nitə' beṇə' chsa'ape' liž xanga'aque' žlac zde' yeļə' gošagna', zjənyaze' xala'anga'aque' na' chala' yi'. Nach catə' yežine' na' əne' cho'a puertən' le'e yosə'əsaljwite' par yeyo'e.

³⁷ Mbalaz gaquə che mos ca' beṇə' ca' nitə' probnid chəsə'əbeze xanga'aque'en catə'an yežine'. Šə nite'e chəsə'əbeze le' catə'an yežine', nachən' əgws'i'ini'e de'en əsa'ogüe' na' cuine' gwnežjue' lega'aque' de'en əse'ej əsa'ogüe'.

³⁸ Mbalaz gaquə chega'aque' šə chəsə'əbeze batə'əquən' yežine' la'anə'əczə šə yežine' do chel o šə do šbal.

³⁹ Legon xbab che de'e nga. Žala' neze xan yo'onə' do bi or əžin beṇə' bguanṇə' liže'enə', la' gwṇaze' par nič bito güe'ə latjə šo' be'enə' liže'enə' par cuane' šinlaže'.

⁴⁰ Le'e ža, cheyaļə' sole probnid, chedə' catə'an cui chonle xbab yida', ca na'an yida' de'e yoblə, nada' naca' ben' bseļə' Diozən' golja' beṇəch.

Mos ben' chon güen na' mos ben' cui chon güen

⁴¹ Bedən' gože'ene': —Xanto' žəcho'o jempl nga par netə'əzəto'onə' o šə par yoguə' beṇəchən'?

⁴² Nach gož Jeso'osən' Bedən': —Naquən par notə'əteza beṇə' šə chone' can' chon mos əblao beṇə' naquə beṇə' sin' na' beṇə' chon complir can' cheyaļə' gone'. Ben' nac ca' co' xane'enə' lao ne'e liže'enə' par nič əggüia əgwywe' mos ca' yeļə' na' par nič ggone' de'e əsa'o to toe' catə' chžin or əsa'ogüe'.

⁴³ Šə to beṇə' mosən' chontezə chone' con can' non xanen' mendad, mbalaz soe' catə' yežin xane'enə'.

⁴⁴ De'e li əchnia' le'e xane'en cue'e lao na' xmose'ena' yoguə'əloj de'en deine'.

⁴⁵ Pero na' šə mosən' gone' xbabən' na' əne': “Bagwžei xanan'”, na' šə solaocle' chine' mos ca' yeļə' na' ye'ej gaoxatteze' na' sožene',

⁴⁶ nach xane'enə' yežine' to ža senyale' le' to or cui nache'ine'. Na' por ni che de'en cui chon mosən' can' cheyalə' gone', xane'enə' chinchgüe' le' yid sotən' xte ca gate'. Can' chac len notə'ətezə mos ben' cui chon cuaselol can' cheyalə' gone'.

⁴⁷ Na' ca naquə mos beṇə' naquə beṇə' godenag, la'anə'əczə banəzene' can' chene'e xane'enə' gone', pero bito chone' ca'. De'e na'anə' bito zoe' probnid catə' yežin xane'enə', na' xane'enə' chinchgüe'ene' yid sotən'.

⁴⁸ Na' beṇə' cui nezene' bin' non xanen' mendad na' chone' de'e lecəzə zaquə' chine'ene', pero caguə chintequene'. Notə'ətezə beṇə' yo'o lao ne'e gone' de'e zan de'e zaque'e, cheyalə' gone' yoguə'an. Na' ben' yo'o lao ne'e gone' de'e zan de'e zaque'e, chonchən byen gone' mazəchlə can' cheyalə' gon ben' cuitec yo'o lao ne'e de'e zan de'e gone'.

Yesə'ədilə beṇə' por ni che de'en bidə Jeso'osən'

⁴⁹ Nach gwna Jeso'osən': —Ca naquə beṇə'chən' yesə'ədile' na' yesə'əšaše' por ni che de'en zedeyena' yežlyo nga, na' de'en so'one' ca' gwxaquə'əleben ca yi'. ižalə' bagoclə de'en zedeyena'anə'!

⁵⁰ Bida' par chi' saca'a na' gata'. Lechguale yo'o yichja' chei xte catə'an əžin ža gaquən.

⁵¹ iEchonle xaban' de que beṇə' ža' yežlyon' yesə'əzo yesə'əbeze' binlo len ljuəžjga'aque' laogüe de'en bida'? Echnia' le'e, bito yesə'əzo yesə'əbezəga'aque' binlo len ljuəžjga'aque' laogüe de'en bida', sino que yesə'ədile' na' yoso'əšaše'.

⁵² Dezd na'a, šə nitə' gueyə' beṇə' family to yo'o, yesə'ədile' entr lega'aque', chope' contr šone' na' šone' contr chope'.

⁵³ Yedilə beṇə' byon' contr xi'ine', na' xi'ine'en contr le'. Na' no'olən' yedile' contr xi'ine' no'olə, na' xi'ine' no'olən' contr le'ena'. Na' yedilə no'olən' contr xo'olizə' na' xo'olizə'en contr le'.

Bito gwsa'ache'ine' bi zeže de'e ca' chon Jeso'osən'

⁵⁴ Nach lecəzə gož Jeso'osən' beṇə' ca' nitə'anə': —Catə' chle'ile chi' bejw gan' chen bgüizən' na' nale: "Guaquə yejw", na' can' chac.

⁵⁵ Na' catə' chechj to be' de'e za'ate zaquə' galən' chlə' bgüizən' cuiten licha, na' nale: "Guaquə zeyə'", na' chac zeyə'.

⁵⁶ iBeṇə' goxoayag le'e! Catə' chle'ile nac chac le'e yoban' na' lao yežlyon' nezele šə guaquə yejw o šə guaquə zeyə'. iBixchen' cui chache'ile bi zeže de'e ca' chona'?

Cheyalə' goncho regl binlo len beṇə' chene'e əche'e chio'o lao jostis

⁵⁷ iBixchen' cui chonle xbab par nič ənezele naquən' cheyalə' gonle'?

⁵⁸ Catə' to beṇə' gonle' xya che' na' əche'e le'e lao jostis, na' lao ngo'ole nezən' legonlene' regl binlo par nič na' cui che'e le'e lao jostisən'. Šə bito gonle' ca' ža, catə' əžinle lao jostisən' gone' le'e lao na' polsian' par yosə'əže'e le'e ližya.

⁵⁹ Echnia' le'e, bito yebeje' le'e xte catə' chixjwle doxen de'en chalə'əlen'.

13

Šə bito yedinjecho xtolə'əchon' la' cuiayi'ichon'

¹ Na' lao or na'atezə entr beṇə' ca' ža' na' gwnitə' balə beṇə' gwso'elene' Jeso'osən' dižə' can' goquə che xonj beṇə' Galilea. Gwse'ene' de que žlac gwso'ot beṇə' Galilea ca' bia yixə' par cho'sə'elaogüe'e Diozən', soldad che Pilatən' jse'ete' lega'aque' chedə' can' ben Pilatən' mendad.

² Nach boži'i Jeso'osən' xtizə'əga'aque'ena' gože' lega'aque': —iEchonle xbabən' de que beṇə' ca' gwsa'at gwso'onche' de'e maləch cle ca beṇə' Galilea ca' yelə' laogüe de'en goc chega'aque' ca'?

³ Echnia' le'e caguə ca'anə'. Šə bito yedinjele xtolə'əle ca' gwžin ža cuiayi'ile can' gosə'əbiayi' beṇə' ca'.

⁴ Nezele che beṇə' ši'inšon' ca', lao zjənite'e Siloen' bxopə to campnary na' gwdenən lega'aque' na' gwsa'ate'. iLečəzə chonle xbabən' goc ca' laogüe de'e zjənaquəche' beṇə' maləch lao yoguə' beṇə' ca' ža' Jerosalennə'?

⁵ Echnia' le'e caguə ca'anə'. Šə le'e cui yedinjele xtolə'əle ca' gwžin ža cuiayi'ile can' gosə'əbiayi' beṇə' ca'.

Jempl che yixgüion' de'en cui bi frot chbia

⁶ Na' be'elene' lega'aque' jempl nga bzejni'ine' lega'aque' de que cheyalə' yesə'ədinjene' xtolə'əga'aque'ena'. Na' gože' lega'aque': —To beṇə' zo to yag yixgüio che' gan' ža' yag obas che' ca'. Na' gwyeje' lao yaguan' jəgüie' šə zetgua yixgüion' gaogüe', pero bitobi bželene'.

⁷ Na' gože' ben' chapə güert che'ena': "Bachac šon iz chedəgüia' yag nga šə chbian yixgüio, pero bito bi chbian. Gwchoguan. Lašj con zon nlanən na' niqwe bi frot chbiazən."

⁸ Na' gož ben' le': "Xana', ljyennə' zezošgan yetgüizən'. Na' əche'ena' xanein' cueca'an yo beb.

⁹ Na' šə cuian frotən' yetgüiz, bitec de'e güen. Pero šə cuiczə bi cuian nach əçhogchon."

Jeso'osən' beyone' to no'olə ža dezcanz

¹⁰ Na' to ža dezcanz bsd blo'i Jeso'osən' beṇə' ca' ža' to lo'o yo'odao'.

¹¹ Na' zo to no'olə beṇə' bagoc ši'inšon iz yo'o yaz de'e xio'on yichjla'ažda'ogüe'ena'. Na' ben de'e xi'onə' par niç bdobə cuerp che'ena', na' caguə goquəch seche' liča.

¹² Na' catə' ble'i Jeso'osən' le', goxe'ene', nach gože'ene': —No'olə ṇa'a yeyacdo' che yizgüe' chio'onə'.

¹³ Na' bxoə ne'ena' lao cuerp che no'olən', na' le'e bezechate' liča na' be'elaogüe'e Diozən'.

¹⁴ Pero na' beṇə' gwnabia' che yo'oda'onə' bloque' chedə' Jeso'osən' beyone' beṇə' güe'ena' ža dezcanzən', na' gože' beṇə' ca' nita' lo'o yo'oda'onə': —De xop ža par gonle žin. Le'e da lao ža ca' par niç yeyaquēle che yizgüe' chelen', pero bito la'acle ža dezcanzən' par yeyaquēle.

¹⁵ Nach Xanchon' gože'ene': —Je'e beṇə' goxoayag! Žecaguə lao ža dezcanzən' bia'acžə chsežle go'on chele o borř chele gan' zžada'ab na' chgua'aga'acleb güe'ej nis?

¹⁶ No'olə nga naque' xi'in dia che de'e Abraanna' na' ca naquə ben gwxiye'ena' par niç baddobə cuerp che'ena' ši'inšon iz, naquəczən liča babeyona'ane' ža dezcanzən'.

¹⁷ Lao gwne' ca' beṇə' ca' chəsə'əgue'i le' gwsa'aque'ne' zto', na' yogua'əloj beṇə' zan ca' yeja' nita' na' besyə'əbeichgüeine' len yogua' de'en ben Jeso'osən', la' lechguale güen zžanaquə de'en bene'ena'.

Yelə' gwnabia' che Diozən' gwxaquə'əleben ca xsa moztas

¹⁸ Nach gwna Jeso'osən': —Na' əgwlo'ida' le'e par niç ənezele nac gwxaquə'əlebe yelə' gwnabia' che Diozən'.

¹⁹ Gwxaquə'əleben ca to xsa moztas. To beṇə' goze'en, na' catə' bla'an gwcha'on goquən yag cha'odao'. Na' bia ca' zžəzo xile'e gwso'on ližda'oga'aquəb lao xoze'e ca'.

Yelə' gwnabia' che Diozən' gwxaquə'əleben ca xna' cuazin'

²⁰ Nach de'e yoblə gozne': —Žnac əgwsaquə'əlebecho yelə' gwnabia' che Diozən'?

²¹ Egwsaquə'əlebechon ca xna' cuazin' de'en gwlec no'olən' len to rob yezj par niç becha'o doxenən.

Cheyałə' yeyiljlažə'əcho naclə goncho par niç socho binlo len Diozən'

²² Na' gwda Jeso'osən' bsd blo'ine' beṇə' ža' syoda ca' na' yež ca' gan' bedie' par bežine' Jerosalennə'.

²³ Na' to beṇə' gože' Jeso'osən': —Xanto', žacon to çhopzə beṇə'an cui žžəya'ac lao yi' gabilən'?

Nach Jeso'osən' gože' lega'aque':

²⁴ —Echnia' le'e, beṇə' zan se'ene'ene' nite'e binlo len Diozən'. Pero gwžin ža catə' cuich gaquə so'one' par nite'e binlo len le'. De'en naquə žialao gonle, çhiljlažə'əle naclə gonle par niç sole binlo len Diozən',

²⁵ niç cui gone' len le'e can' ben to xan yo'o catə' bžin or par əgwseyjue' na' gwžože'e bseyjue'. Na' gwdechlə besə'əžin beṇə' bososiže' le'e puert che'ena' na' bito bsaljue' par so'e. Na' gwse'ene': "Bsaljwšga par šo'oto'." Na' gože' lega'aque': "Bito nombi'a le'e, nic nežda' gan' za'acle."

²⁶ Can' gaquə len balle. Nach solaole ye'elene': "Güe'ej gwdaoto' len le' na' bsd blo'ido' neto' lao lquey lažto'."

²⁷ Pero na' de'e yoblə əye'e le'e: "Bitoczə nežda' gan' besa'acle. Le'e žžəya'ac yogua' le'e beṇə' güen de'e mal." Can' ye'e le'e.

²⁸ Na' le'ile Abraanna' na' Isaaquən' na' Jacobən' na' yogua' profet beṇə' ca' gwso'e xtižə' Diozən' nite'e yoba gan' zo Diozən' chnabi'e, na' le'e bito gac šo'olena'. Na' cana' cuežyašə'əle na' gaoye'əleylen' catə' gache'ile bito gaquə šo'ole.

²⁹ Beṇə' za'ac doxenlə yezžyon' yesə'əžine' yoba gan' zo Diozən' chnabi'e na' yesə'əbi'e cho'a mes che'ena' sa'ogüe'.

³⁰ Na' ža, nita' beṇə' bito zžənaque' beṇə' blao ṇa'a, pero gwžin ža catə' əsa'aque' beṇə' blao. Na' nita' beṇə' zžənaque' beṇə' blao ṇa'a, pero leczə gwžin ža catə' lega'aque' bitoch əsa'aque' beṇə' blao.

Begüine'e Jeso'osən' por ni che xtolə' beṇə' Jerosalen ca'

³¹ Lao or na'atezə balə beṇə' fariseo ca' besə'əžine' gan' zo Jeso'osən' na' gwse'ene': —Cheyałə' yexonjo' nga gan' chnabia' Erodən' chedə' chene'ene' gote' le'.

³² Jeso'osən' gože' lega'aque': —Erodən' gwxaquə'əlebene' ca to becoyo'o por yelə' goxoayag che'ena'. Ležja'ac na' ye'elene' de que yeto çhopə žazə soa' par yebejəcha' de'e xio' ca' zžəyo'o

zjəyaz yichjla'aždao' beṇə' na' par niçh yeyoncha' beṇə' chsa'acšene, na' caguə sšachən' yeyož gona' de'en cheyaḷə' gona'.

³³ Pero ca naquə de'en chona' nga na'a, goncha'an gwɣe giūizj chedə' Jerosalen na' gan' chso'ote' profet ca' chso'e xtižə' Diozən', caguə ngan'.

³⁴ Le'e beṇə' Jerosalenṇə' chotle profet, na' beṇə' ca' chselə' Diozən' len le'e chšizə'əga'aclene' yej. Zan las go'onda' yetoba' le'e ca to jeid cheyežəb xi'inqəb, pero bito be'ele latja.

³⁵ Na' bagwlejəyichjja' le'e. Na' əchnia' le'e bitoch le'ile nada' xte catə'əch əžin ža əṇale: "Cho'ela'oto' beṇə' za' nga beṇə' babselə' Xancho Diozən'."

14

Jeso'osən' beyone' to beṇə' zo le'enə' yi

¹ Na' to ža dezcanz Jeso'osən' gwyeje' liž to beṇə' blao entr beṇə' fariseo ca' par gwsa'ogü'e, na' beṇə' fariseo ca' nitə'əna' besya'əyatchgüeine' le'.

² Na' laogü'e enə' zecha to beṇə' chacšene, zo le'enə' yi.

³ Na' gož Jeso'osən' beṇə' fariseo ca' na' len beṇə' ca' choso'osed choso'olo'i lein' de'en bzoj de'e Moizezən': —Segon can' na' lein' žade lsens yeyoncho to beṇə' güe' ža dezcanzən' o šə bito de lsens?

⁴ Pero notono boži'i xtiže'enə'. Nach Jeso'osən' beṇə'e na' be'enə' na' beyone'ene', na' gože'ene': —Baguaquə yeyejo'.

⁵ Na' gož Jeso'osən' beṇə' ca' ža' liž beṇə' fariseon': —Le'e šə zo to borr o to go'on chele, na' əxopəb to lo'o pos, žəcabi yebejleb lgüegwzə la'anə'əcza naquan ža dezcanz?

⁶ Na' notono goc yoži'i xtiže' Jeso'osən'.

Beṇə' ca' gwsa'ac combid gan' chac to yelə' gošagna'

⁷ Na' ble'i Jeso'osən' can' chso'on beṇə' ca' zjənaque' combid liž beṇə' fariseon', gosə'əbeje' siyan' gwse'enene' yesa'əbi'e gan' zjəchi' beṇə' blao ca'. Na' Jeso'osən' gože' lega'aque':

⁸ —Catə' to beṇə' gone' le'e combid gan' chac to yelə' gošagna', bito cue'ele gan' cheyaḷə' cue' beṇə' blao ca'. La' šə cue'ele na' de repent yidə beṇə' naquəch beṇə' blao.

⁹ Na' yidə xan yo'onə' ye'e le'e: "Lesoža' niçh cue' benga." Nach do chaquele zto' cue'ele ga yoblə len beṇə' ca' cui bi bi zjəzaquə'.

¹⁰ Pero na' catə' nacle combid, cue'ele len beṇə' ca' cui bi bi zjəzaquə', na' catə' yidə xan yo'onə' na' ye'e le'e: "Beṇə' migw chia', da cui'o len beṇə' blao ca'", nach si'ichle yelə' bala'an lao beṇə' ca' zjəchi' len le'e cho'a mesən'.

¹¹ Notə'ətezcho cho'elao' cuincho, Diozən' gone' par niçh gacbe'icho de que bitobi zaquə'əcho. Na' notə'ətezcho choncho xbab de que bitotec bi zaquə'əcho, Diozən' gone' chio'o yelə' bala'an.

¹² Nach leczə gož Jeso'osən' ben' ben le' combid: —Catə' gono' to lni na' gono' beṇə' combid əsa'ogü'e len le', bito gono' combid porzə beṇə' migw chio' o beṇə' zjənaquə beṇə' gwni'a. Lega'aque' leczə gosya'əyone' le' combid ližga'aque', na' yosyo'ogü'e gwzon laogü'e de'en benga'aco'one' combidən' bla'aque' ližo'onə'.

¹³ Catə' gono' to lni, gono' combid beṇə' yašə' ca' na' beṇə' nchog no ni'a na'aga'aque', beṇə' coj, na' beṇə' lchol.

¹⁴ Šə gono' lega'aque' combid, Diozən' gone' par niçh so' mbalaz, chedə' beṇə' ca' bito gaquə yesya'əyone' le' combid. So' mbalaz catə' Diozən' yosbane' le' ladjo beṇə' guat ca' txen len yeziquə'əchlə beṇə' ca' ja'ac liča lao gosə'əbane'.

Jempl che to beṇə' ben lni

¹⁵ Na' to beṇə' chi' cho'a mesən' txen len Jeso'osən' benene' xtiže'enə' na' gože'ene': —Mbalaz socho gaochi lao lni de'en gaquə catə' bachnabia' ben' əselə' Diozən'.

¹⁶ Nach Jeso'osən' gwne': —To beṇə' bene' to lni xen na' bene' combid əžja'ac beṇə' zan liže'enə' par əsa'ogü'e.

¹⁷ Na' catə' bžin or əsa'ogü'e, xan yo'onə' bselə'e xmosə'enə' par žjətobe' beṇə' ca' bene' combid əsa'ogü'e. Na' catə' jəye' to toga'aque' gože' lega'aque': "Lešo'o, la' babsi'ini'e de'en gaochi."

¹⁸ Na' to toga'aque' gwse'e be'enə' bixchen' cui zjəzoe' latja žja'aque' gan' chone' lnin'. Toe' gwne': "Ze'e gwxi'a to yežlyo. Cheyaḷə' žjəgüia'an. Na' ye'ešgo' xano'on de que bito gac yida'."

¹⁹ Yetoe' gwne': "Ze'e gwxi'a gueya' cue' go'on na' na'a əžjenga'aca'ab prueb. Ye'ešgo' xano'on si'ixene' chia' bito gaquə yida'."

²⁰ Na' yetoe' gože'ene': "Ze'e bšagna'a. De'e na'ana' bito gaquə yida'."

²¹ Na' mosən' beyeje' na' gože' xane'enə' can' gwse' beṇə' ca' le'. Nach xan yo'onə' ben' chon lnin' bže'e, nach gože' xmosə'enə': "Gwyej jtado' yogua' lqueyən' na' yogua' nez lao syodan',

na' əgwɔtobɔ beɲə' yaʂə' ca' na' beɲə' ca' nchog no ɲi'a na'aga'aque', na' beɲə' coj ca' na' beɲə' lɔhol ca' par la'aque' əsa'ogü'e."

²² Gwde bene' ca' nach gože' le': "Xana', bajətoba' beɲə' ca' gwna'onə' na' nedechcəz latjə par beɲə' yoblə."

²³ Nach xane'enə' gože' le': "Gwyey fuer syodan' na' gono' byen da'ac beɲə' ca' nitə' do tnezən' na' žjəxi'o beɲə' ca' zjəža' yixə', gono' byen da'aque' liža' nga əsa'ogü'e' par niç šane' xte ca cuich bi latjə šo'.

²⁴ Na' ca naquə beɲə' ca' bena' combid nechte, bito gua'a latjə əsa'o lega'aque' de'en babsi'ini'anə'."

De'en cheyalə' goncho par niç ɲaacho Jesocrisən'

²⁵ Na' beɲə' zan juisy jəsə'anaogü'e' Jeso'osən'. Na' gwyechje' gože' lega'aque':

²⁶ —Notə'ətezle šə gaquəchele che xale, xna'ale, xo'olle, xi'inle, bišə'ale, zanle na' cuinle mazəchlə can' chaquale chia', bito gaquə ɲaole nada' par gacle disipl chia'.

²⁷ Na' notə'ətezle šə laogü'e' de'en chaquale yoso'ochi' yoso'osaquə' beɲə' le'e o so'ote' le'e to le'e yag coroz de'e nan' bito chonliłazə'əle nada', leczə bito gaquə ɲaole nada' par gacle disipl chia' šə ca'.

²⁸ Šə to le'e chene'ele gonle to campnary, zgua'atec cue'ele nach gonle xbab na' gwzaquə'əle ca do ja'acquə'ətə' chyažjele par gonlen na' šə de mech chelenə' par yeyož campnaryən'.

²⁹ Šə cui əgwchixə əgwɔlə' xbab chelen' ja'acquə'ətə' de'en chyažjele, catə' bagwlecle laneinə' na' gacbe'ile de que bitoch bi mech de par yeyožən. Na' yoguə' beɲə' yesə'ələ'i lanein' so'one' le'e borl.

³⁰ Na' yesə'əne': "Benga gwzoloə bene' to campnary pero bito goquə yesyože' de'en gwzoloəgü'e'."

³¹ Na' šə to rei chone' xbab tile' len yeto rei leczə zgua'atec gongaxje' xbab šə len si mil sołdad che' ca' guaquə gone' gan len rein' yeto ben' yidə len galjə mil sołdad.

³² Na' šə chacbe'ine' cui gone' gan, lao ɲəzo rein' yeto zitə'ələ, əsele'e beɲə' žjəsə'adie' xtiže'en lao rein' yeto yesə'əɲabe' yesyə'anite'e birlo.

³³ Can' naquən len le'e, notə'ətezle šə cui cuejyichje family chele, bia yixə' chele na' yoguə'əlɔl cuantəchlə bi de'e de chele, bito gaquə ɲaole nada' par gacle disipl chia'.

Gwxaquə'əlebecho ca zedə'

³⁴ Zedə'an naquən güenchgua, pero na' šə bitoch naquən xzi', ɔnacxa goncho par niç yeyaquən xzi'?

³⁵ Bitobi zaquə'an, nic gaquəlenən yežlyon', nic gaquə gwchinchon par beb, lete cho'onchon. Can' gwxaquə'əlebele šə bitoch chzenagle chia' do yiçj do lažə'əle. Le'e žia nagle de'e chene, legwzenag.

15

Jempl che xilə' bian' goquəžeje

¹ Na' beɲə' goçhixjw ca' na' yeziqə'əchlə beɲə' ca' chso'on de'e mal, yogue'e gosə'əbigue'e gan' zo Jeso'osən' par gwse'enene' xtiže'enə'.

² Na' beɲə' fariseo ca' na' beɲə' ca' choso'osed choso'olo'i lei de'en bzoj de'e Moizezən' chəsə'əɲəlaogü'e'e, chəsə'əne': —Benga chgüialaogü'e' beɲə' ca' chso'on de'e malən' na' chao-lene' lega'aque'.

³ Nach Jeso'osən' be'e to jempl, gože' lega'aque':

⁴ —Šə nitə' to gueyoa xilə' chele na' gaquəžeje tob, ɔacabi yocua'anle bia ca' taplalj tğualj gan' ža'ab latjə dašən' na' žjəyedilje bian' goquəžejenə' xte ca yezeleleb?

⁵ Na' catə' yeželobən' yebeichgü'eile na' yexəaleb ya'a yenle yeyo'aleb.

⁶ Na' catə' yežinle ližle əgwɔtoble beɲə' migw chele na' beɲə' gwliž chele na' ye'ele lega'aque': "Leyebei len nada', chedə' babežel xilə' chia' bian' goquəžeje."

⁷ Echnia' le'e, gobeiche Diozən' na' angl che' ca' catə' to beɲə' chon de'e mal yedinjene' xtole'enə' clezə can' chəsə'əbeine' len taplalj tğualj beɲə' zjənaquə beɲə' güen lao Diozən' beɲə' bito de xtole'əga'aque' par yesyə'ədinjene'en.

Jempl che mech de'en gwnit

⁸ Na' no no'olən' šə de ši mech plət che' na' šə nit ton, ɔacabi əgguale'e to yi' na' gwlo'e' lo'o yo'o che'enə' na' yeyiljože'en xte ca yeželene'en?

⁹ Na' catə' yeželene'en na' əgwɔtobe' no'olə migw che' ca' na' beɲə' gwliž che' ca', na' ye'e lega'aque': "Leyebei len nada' chedə' babeželda' mech chian' de'en gwnitən'."

¹⁰ Echnia' le'e, leczə chesyə'əba chesyə'əzaquə'əlažə' angl che Diozən' catə' to beɲə' chon de'e mal chedinjene' xtole'enə'.

Jempl che ben' benditjei xi'inen' xmeche'

¹¹ Na' lecza gože' lega'aque'. —Gwzo to beṇə' na' gwnitə' čhopə xi'inə' beṇə' byo.

¹² Na' bžin ža beṇə' xcuidən' gože' xen': "Xa, beṇ nada' de'en cheyaḷə' si'a de'ido." Nach xe'en bnežjue'ene' de'en cheyaḷə' si'enə'.

¹³ Gwde yeto čhopə ža na' beṇə' xcuidən' btobe' yogua'əḷol cuantzə bi de'en de che' na' gwze'e gwyeje' nasyon zitə'. Na' porzə de'e cui zaque'e jene'. Na' lao zdalene' de'e malən' benditjeine' xmeche'ena'.

¹⁴ Na' cata' beya xmeche'ena', goc to bgüin juisy lao doxen nasyonṇə', na' bitoch bi bi gotə' par si'e de'e ye'ej gaogüe' na' bichlə de'e byažjene'.

¹⁵ De'e na'anə' gwyeje' gan' zo to beṇə' nasyonṇə' na' gwṇabe' žin. Na' be'ena' bsele'ene' yixə' gan' ža' bia zan xcoše' par nič jəye'eb.

¹⁶ Na' tant gwdone' xte goclaže'e gaogüe' de'en chsa'o coš ca', pero ni len cui boso'onežjue'ene' gaogüe'.

¹⁷ Na' beyone' to xbab šao' na' gwne': "Nitə' mos zan che xā'anə', na' dechgua de'e chsa'ogüe', na' nada' gatəda' yelə' chdon.

¹⁸ Yeza'a nga na' yeya'a gan' zo xā'anə', na' yapa'ane': Xa, babena' de'e mal lao Diozən' na' laogo' le'.

¹⁹ Na' bitoch zaca'a gono' nada' cuent ca xi'ino', con šə go'o latjə gaca' xmoso'."

²⁰ Nach beze'e beyeje' gan' zo xe'ena'. Na' zitə'əḷ ze'e yežine' cata' ble'i xe'en le', na' gwsa'adoe' jašague'ene', na' gwdele'ene' gwdaogüe'ene' bxič čhedə' beyašə' beži'ilaže'ene'.

²¹ Nach gož xi'inə'ena' le': "Xa, babena' de'e mal lao Diozən' na' laogo' le', na' bitoch zaca'a gono' nada' cuent ca xi'ino'."

²² Na' xe'ena' gože' xmosə'en: "Jəlej tgot lachə' šao' na' guaco'obo'on. Na' jəxi' to niy na' gwdio'on xbembo'on, na' jəxi' šcue' yel na' gwdio'on ni'abo'onə'.

²³ Na' jəxi' go'on da'onə' bian' chaṇə' na' betəb par gaochob, na' goncho lni.

²⁴ La' xi'ina' nga babena'abo' cuent ca to bi'i guat, pero na'a zobo' mbambo'. Gwlejšyčhjbə' čio'o, pero na'a babela'abo'." Na' gwzolač chso'one' lnin'.

²⁵ Na' xi'inə' nechən' zde' yoba catə'an bežin xi'inə'en yeto. Na' cata' zeza' ben' gwyej yoban' bazon yežine' liž xe'ena' cata' benene' choso'ocueže' na' choso'oye'e.

²⁶ Na' goxe' to mosən' na' gwṇabene' le' bixchen' chso'one' lnin'.

²⁷ Na' mosən' gože'ene': "Bi'i bišo'onə' babela'abo' na' xā'onə' babete' go'on dao' bian' chaṇə' čhedə' belə'abo' to šao' to gūen."

²⁸ Nach xi'inə' nechən' bže'e, na' bito gone'ene' yeyo'e liž xe'ena'. Nach bchoj xe'ena' gotə'əyoine' le' yeyo'e.

²⁹ Pero xi'inə' nechən' gože' xe'ena': "Zan iz bachac zoa' nga chonteza' žin con can' chono' mendad. Na' bitonə' gaca' beṇə' godenag. Na' ni tozə šib dao' cuiṇə' goṇə' nada' par gotə'ab gona' lnin' len beṇə' migw čhia' ca'.

³⁰ Na' na'a belə' xi'ino' nga bi'in benditjei yogua'əḷol de'en bnežjo'obo' gwza'alembə' no'olə sargat, na' beto' par lebo' to go'on dao' bian' chaṇə'əch."

³¹ Na' xe'ena' gože'ene': "Xi'inə' daogua'a, le' zotezo len nada', na' yogua'əḷol de'e deida' naquən čio'.

³² Pero cheyaḷə' goncho lni nga na'a tant chebeicho babela' bi'i bišo'onə', čhedə' babena'abo' cuent ca to bi'i guat, pero na'a zobo' mbambo'. Gwlejšyčhjbə' čio'o pero na'a babela'abo'."

16*Jempl che to mos əblao ben' benditjei de'en de che xane'*

¹ Na' lecza gož Jeso'osən' disipl che' ca': —Gwzo to beṇə' gwni'a na' gwzo to moš əblao che' beṇə' gwyo'o lao ne'e bia yixə' che' ca' na' biquə'əchlə de'en de che'. Na' beṇə' gwni'anə' benene' rson de que xmosen' habenditjeine' de'en de che'.

² Nach xane'en goxe' le' na' gože'ene': "Babenda' to dižə' can' chono'. Cheyaḷə' gono' cuent che' yogua'əḷol de'en babčhino' čhia' čhedə' bitoch gaquə' gono' xšina'anə' na'a."

³ Nach mosən' bene' xbabən': "ČBixa gona? Xana'an bacholague' nada' cuich gaquə' gona' xšine'ena', na' nic chac gona' žin gual na' gaquəda' zto' šə naba' carida.

⁴ Nežda' bi gona' par nič nitə' beṇə' yesə'əgüialaogüe' nada' catə' cuich chona' žin che xana'an."

⁵ Na' goxe' yogua' beṇə' ca' chsa'alə' xmech xane'ena' tgüejə' tgüejə'. Na' gože' beṇə' nechən': "Čja' aquə' čhalə'o che xana'anə'?"

⁶ Na' be'ena' gože'ene': "Čhalə'a che tapa mil litr set." Nach gož mosən' be'ena': "Gwche'edo', na' bzoj lao cuentən' de que čhalə'o che čhopa mil litrzə setən'."

7 Gwde na' gože' beṇə' əgwchopen': "¿Ja'aquən' chaḷo'o che xana'anə'?" Nach be'enə' gože'ene': "Che to mil rob trigw." Nach mosən' gože' be'ena': "Gwche'edo', na' bzoj' lao cuent chio'onə' de que chaḷo'o che xon' gueyoa robzə' trigon'."

8 Na' xan' mos goxoayaguan' goche'ine' lechguale' bib' naquə' be'ena' de'en bene' xbab' naclən' gone' par niçh' soe' binḷo' len l'uežje' ca' beṇə' ca' chsa'alə' che xane'en. Nada' chnia' le'e de que beṇə' ca' zjəchi' yichjga'aque' porzə' de'en chac' lao yežlyon' chso'onchgüe' xbab' naclən' so'one' len de'en zjədeine'. Pero zan beṇə' ca' bazjəyo'o be'eni' che Diozən' lo'o yichjla'ažda'oga'aque'ena' bito chso'one' xbab' naclən' yesə'əchine' de'en zjədeine'.

9 Na'a' əchnia' le'e, de'en deile yežlyo' nga de'e te çhein', pero legwçhin' len par niçh' niṭə' migw' chele, na' catə' babeya bi de'en deile yežlyo' nga, niṭə' beṇə' yozene'e le'e catə' yežinle' yoban' gan' sole zejlicane.

10 Šə to beṇə' chone' can' cheyaḷə' gone' len de'e cuitec zaquə' leczə' gone' can' cheyaḷə' len de'e zaquə'əchgüei, na' beṇə' cui chone' can' cheyaḷə' gone' len de'e cuitec zaquə', leczə' bito gone' can' cheyaḷə' len de'e zaquə'əchgüei.

11 Šə le'e cui chonle' can' cheyaḷə' gonle' len de'en deile yežlyo' nga de'e te çhei, bito gon' Diozən' le'e de'e zaquə'əche de'en cui te çhei.

12 De'en deile yežlyo' nga che Dioz' na'anə', caguə' çhelen'. Na' šə bito chonle' can' cheyaḷə' gonle' len de'en naquə' che'ena', bito gone' le'e de'e zaquə'əche de'e cui te çhei.

13 Notono no gaquə' so liž' çopə' xan' žin' par gaque' xmosga'aque' tš'i'izə', çhedə' la' šə gone' ca', gue'ine' to xan' žinnə' na' gaquene' che yetoe', o gone' žin' che toe' do yichj' do laž'e le' na' bito bi respet' gape' che xane'en yeto par gone' xšine'ena'. Leczə' ca' le'e bito gaquə' gonle' xšin' Diozən' do yichj' do lažə'ale na' gonte xšinle' par gacle beṇə' gwni'a.

14 Na' leczə' gwnitə' beṇə' fariseo' ca' gwse'ene' xtižə' Jeso'osən' na' gwso'onene' borl', çhedə' gwso'elažə'əche' əsa'aque' beṇə' gwni'a.

15 Na' gož' Jeso'osən' lega'aque': —Le'e ža, chonle' par niçh' beṇə'çhən' chesə'ane' çhele de que zdacze' liçha, pero Diozən' nez nle'ine' yichjla'ažda'olen'. Zjəde de'en chsa'aque' beṇə'çhən' zjənaquən' de'e žialə' xen pero baḷən' zjənaquən' de'e chgue'i Diozən'.

Lei che Diozən' na' beṇə' ca' chnabi'e

16 Na' gozna' Jeso'osən': —Antslə' con lei de'en bzoj' de'e Moizezən' na' len de'en boso'ozoj' profet' ca' bzejni'in' chio'o che Diozən'. Pero na'a de'e Juanna' bəbedatixjui'e dižə' güen dižə' cobən' de que Diozən' nabi'e con notə'ətezə' beṇə' soe' latja, na' leczə' ca' neto' chyxjue'eto'on. Na' beṇə' zan chesə'əzo' chesə'əbi'e naclə' so'one' par niçh' nabi'a' Diozən' lega'aque'.

17 Ca' naquə' bitə'ətezə' pont' dao' che lei che Diozən' bito te çhei pero ca' naquə' yežlyon' len de'e ca' zjəžia' le'e yoban' yesə'əde' çhega'aquei.

Bito yela'acho be'en çhecho o no'ol çhecho par solencho beṇə' yoblə

18 Notə'ətezə' beṇə' chela'a' no'ol che'ena' par yequ'e' no'olə' yoblə, tozəczə' ca' malən' naquən' len de'en chon beṇə' chgo'o xtoe'. Na' yoguə' no beṇə' yosagne'e' len to no'olə' beṇə' belə'a' ben' çhei le', leczə' tozəczə' ca' malən' naquən' len de'en chon beṇə' chgo'o xtoe'.

Beṇə' gwni'a na' Laçhən'

19 Nach gozna' Jeso'osən': —Gwzo to beṇə' gwni'a, na' lechguale' xoche' goquə' xala'ane'ena', na' lechguale' gwdaošaogüe' e' yoguə' ža.

20 Na' to beṇə' yašə' le' Laçh' yoguə' ža bzo beṇə' le' cho'a' puert' zaguan' che beṇə' gwni'anə' par gwṇəbe' carida. Na' Laçhən' lechguale' gwžia' yežə' doxen' cuerp' che'ena'.

21 Na' tant' gwdone' gone'ene' gaogüe' pedas' dao' yeḷə' guao' che beṇə' gwni'anə' de'en besə'əxopə' lao yon'. Na' beco' ca' ja' aquab' jəsə'əle'eb' yežə'an' gwžia' cuerp' che'ena'.

22 Na' catə' got' beṇə' probən', nach' angl' ca' besyə'əzi' besyə'əque'e' le' yoban' gan' zoe' len de'e xaxta'əcho' Abraannə'. Na' leczə' got' beṇə' gwni'anə' na' bosə'əcuəš'ene'.

23 Na' beyeje' gan' ža' beṇə' ca' bagwsa'at. Na' lao' chžaglaogüe' na' gwḷis' laogüe'ena' na' ble'ine' zitə'ələ' niṭə' Abraannə' lene' Laçhən' yoban'.

24 Na' gwṇə' zizjo' gwne': "Xa' Abraam, beyašə'əlažə'əšguei' nada', na' bselə' Laçhən' par yosbise' ložə'an' len lata' nis' de'en yexopə' xbene'ena' çhedə' la' lechguale' chžaglaogua' lo'o yi' nga."

25 Pero na' Abraannə' gože' le': "Xi'ina' bosə'əlažə' catə' lao' bguano' yežlyon' porzə' de'e šao' de'e güen' gotə' chio'. Na' Laçh' nga' porzə' de'e mal' goc' che'. Na' bazoe' mbalaz' nga' na'a, na' le' chžaglaogo'.

26 Bito gaquə' gone' can' che'endo' çhedə' la' Diozən' bach' bzie' to bdiñj' xen' ga' cui no' zaquə' te' entr' neto' na' le'e par niçh' ca' bito gaquə' yidato' gan' zolen', na' nic' gaquə' da'ac' le'e nga."

27 Nach beṇə' gwni'anə' gože' Abraannə': "Beṇə' gol' dao', chatə'yoida' le', bselə'əšga' Laçhən' liž' xə'anə'.

²⁸ Nita' gueya' beṇə' biša'a, na' che'enda' chixjue'ine' lega'aque' naquən' so'one' par niḥ Diozən' bito əsele'e lega'aque' latjə nga gan' yesə'əzaglaogüe'."

²⁹ Abraannə' gože' le': "Deczə libr de'en bzoj de'e Moizezən' na' libr de'en boso'ozoj de'e profet ca' beṇə' ca' gwso'e xtižə' Diozən'. Cheyalə' yoso'ozenague' che de'e ca' zjənyojən'."

³⁰ Na' gože' Abraannə': "Bito beṇə' gol dao'. Zala' to beṇə' yebane' ladjo beṇə' guat ca' güe'elene' lega'aque' dižə', la' gosyə'adinjene' xtolə'əga'aque'ena'."

³¹ Nach gož Abraannə' le': "Šə bito choso'ozenague' che de'en bzoj de'e Moizezən' na' de'e profet ca', la'anə'əczə šə yeban to beṇə' ladjo beṇə' guat ca', bito se'ejle'e che Diozən'."

17

Bito cheyalə' goncho ca axopə beṇə' yoblə gone' de'e mal

¹ Nach gož Jeso'osən' disipl che' ca': —Syempr de de'en gonən ca yesə'əxopə beṇə' so'one' de'e malən'. Pero probchguaza beṇə' chone' ca yesə'əxope' so'one' de'e malən'.

² Nca'alə xneze Zala' yoso'ocheje' yene'ena' to yej yišə' na' žjesə'əzale'ene' lo'o nisdə'onə' cle ca soe' gone' ca axopə beṇə' gone' de'e malən' la'anə' tozə beṇə' cuitec bi zaquə' len beṇə'chən'.

³ Le'e gon xbab chele, šə to beṇə' bišə'əcho beṇə' bachonlilažə' Diozən' gone' mal contr tole, ben' bene' contr cheyalə' gatə'əyoine' le' yedinjene' xtolə'ena', na' šə yedinjene' xtolə'ena' cheyalə' yezi'ixene' che'.

⁴ La'anə'əczə gaž las lao tža gone' de'e mal contr beṇə' biše'ena', šə gaž laste əne': "Babeyəda' che de'en beṇə', bezi'ixen chia'", na' cheyalə' yezi'ixene' che'.

Gwse'enene' so'onlilažə'əche' Diozən'

⁵ Nach gwse' apostol ca' Xančon': —Gaqualenšgo' neto' par niḥ gonlilažə'əchto' Diozən'.

⁶ Nach gož Xančon' lega'aque': —Xsa yag moztasən' naquən de'e dao' rizə'. Na' la'anə'əczə de'en chonlilažə'əle Diozən' gwxaquə'əleben ca to xsa moztasən' laogüe de'en cuiṇə' gonlilažə'əchgualene', guac ye'ele yag yixgüio nga: "Boša' xišna'o nga na' žjəyeyzo' lo'o nisdə'onə'", na' gwaquacza can' ṇalena'.

De'en cheyalə' so'on mos ca'

⁷ Ca naquə' costombr chelen' šə mos chelen' chgua'əne' go'oṇ o chapə chye' xilə', catə' chele'e goyebən' bito che'elene': "Beyo'o ngalə gwche'edo' gaogo' xše'."

⁸ Cle che'elene': "Bsi'ini'a de'en ye'ej gaogua' na' gwديو' de'en gaogua'anə'. Te yedaogua'anə' nach gaogo'."

⁹ Na' bito cho'elene' yelə' choxcwlen catə' babene' de'en gožlene' gone'.

¹⁰ Na' leczə ca' le'e nacle disipl chia', catə' babenle yoguə'əlo' de'en nona' mendad gonle cheyalə' əṇale: "Bito bi zaquə'əto' par goṇo' yelə' choxcwlen cheto', chedə' de'en babento'onə' la' de'e cheyalə'əczə gonto'onə'."

Jeso'osən' beyone' ši beṇə' chse'i yizgüe' de'en nzi' lepr

¹¹ Lao zda' Jeso'osən' Jerosalennə' len disipl che' ca' na' gwdie' gan' zjəndil distrit che Samaria len Galilean'.

¹² Na' besə'əžine' to cho'a yež dao' na' besə'əchoj ši beṇə' zjesə'əšague' Jeso'osən', beṇə' ca' chse'i yizgüe' de'en nzi' lepr, na' gosə'əzeche' zita'əla.

¹³ Na' gosə'əne' zizjo gwse'ene': —Maestr Jeso'os, beyašə'əlažə'əšguei neto'.

¹⁴ Na' Jeso'osən' catə' ble'ine' lega'aque' gože' lega'aque': —Ležjəy'ac lao bxož ca' niḥ yesə'əgüie' le'e.

Na' goquən' lao zeyə'əngüe'e nezən' besyə'əyaquene'.

¹⁵ Nach toe' catə' gocbe'ine' de que baḥ beyaquene' na' bebi'e na' gwne' zizjo be'elaogüe' Diozən'.

¹⁶ Na' bzo xibe' lao Jeso'osən' na' be'ene' yelə' choxcwlen. Be'ena' ben ca' naque' to beṇə' Samaria.

¹⁷ Nach gwna Jeso'osən': —Ši beṇə' can' beyona'. ¿Gaṇxa beṇə' ca' yegan'?

¹⁸ Tozə beṇə' zita' nga bebi'e par cho'elaogüe' Diozən'.

¹⁹ Nach gož Jeso'osən' be'ena': —Bezəža' na' beyej to šao' to güen. Babeyacdo' chedə' chonlilažə'o nada'.

Yelə' chnabia' che Diozən'

²⁰ Na' goquən' beṇə' fariseo ca' gosə'əṇabene' le' batxan' yidə ben' əselə' Diozən' par ṇabi'e ṇasyon Izraelən'. Nach boži' Jeso'osən' xtižə'əga'aque'ena' gwne': —Ca naquən' ṇabi'ena' bito naquən to de'e le'icho.

²¹ Notono no cheyalə' əne': "Bgüiašc nga chnabi'e", o "Na' chnabi'e", chedə' bazoe' ṇa'a entr le'e chnabi'e.

²² Nach gože' disipl che' ca': —Gwžin ža catə'an nala: "Žalə'əga na'a bačh zocho yoban' gan' chnabia' ben' bselə' Diozən'." Pero bito gaqua can' chnablažə'alena'.

²³ Nita' beŋə' əse'e le'e: "Bgüiašc nga chnabi'e", o "Bgüiašc na' chnabi'e", pero le'e bito naole beŋə' ca' əse'e le'e ca'.

²⁴ Can' chac catə' chep yesən' chse'eni'in doxenlə'le'e yoban' to de repentə, leczə can' gaquə catə'an əžin ža yida' de'e yoblə, nadan' naca' ben' bselə' Diozən' golja' beŋəch yida' to de'e repentə na' yoguə'əlol beŋə' yesə'əle'ine' nada'.

²⁵ Zgua'atec de de'e zan de'e cheyalə' chi' saca'a, na' ŋezda' de que beŋə' ca' ža' na'a bito se'ejle'e chia'.

²⁶ Leczə can' goquə ca tyemp che Noena', leczə can' gaquə catə'an bazon əžin ža yida' de'e yoblə, nadan' naca' ben' bselə' Diozən' golja' beŋəch.

²⁷ Beŋə' gwnita' ca tyemp che Noen' gwža'azeche' gwse'ej gwsa'ogüe' na' gwso'elaozechga'aque' bosə'əšagne'e na' bosə'ošague' na' no xi'inga'aque' xte catə'an bžin ža gwyo'o Noen' lo'o barcon', na' goc to yejw sio' juisy nach gosə'əbiayi' yoguə' beŋə' ca' cui gwso'o lo'o barcon'.

²⁸ Leczə can' goquə ca tyemp che Lotən'. Beŋə' Sodoma ca' gwža'azeche' gwse'ej gwsa'ogüe', gwso'ote'e no bia yixə' čhega'aque' na' bichlə de'e de čhega'aque', na' gosa'əzi'e bi de'en besə'əyazžene' na' gwsa'az gwsa'əne' na' gwso'on ližga'aque'.

²⁹ Pero na' žan' beza' Lotən' Sodoman', Diozən' bene' par ničh lechguale byinj yi' na' sofr yobanə' na' gosə'əbiayi' yogue'e.

³⁰ Can' gaquə catə'an yida' de'e yoblə, nadan' naca' ben' bselə' Diozən' golja' beŋəch, na' yoguə'əlol beŋə' yesə'əle'ine' nada'.

³¹ Na' žan' yida' šə na'aclə zo to beŋə' chone' dezcanz lao sotea che' ližə'ena' na' šinłaze'ena' ža'an lo'o yo'onə', cui yeyetje' par yetobe' šinłaze'ena', con cuejyichje'en. Na' leczə ca' ben' zo do yoba bito gaquene' yeyej ližə'.

³² Le'e žjsa'alažə' can' goc che no'ol che Lotən'.

³³ Notə'ətezə beŋə' chaquene' gone' par ničh cui čhi' saque'e o par ničh cui no got le', be'enan' cuiayi'. Na' notə'ətezə beŋə' chsanłazə' cuine' čhi' saque'e o so'ot beŋə' le' por ni čhia', bade yelə' mban che'ena' zejlicane.

³⁴ Echnia' le'e, quinga gaquə že'ena' catə'an yida' de'e yoblə: Čhopə beŋə' zjədie' čhesə'ətase', toe' yezi' yeca'a Diozən' na' toe' yega'an.

³⁵ Na' čhopə no'olə nita' txen chso'ote', toe' yezi' yeca'a Diozən', na' toe' yega'an.

³⁶ Na' čhopə beŋə' ŋita' do yoba, toe' yezi' yeca'a Diozən' na' leczə yega'an toe'.

³⁷ Cata' gwse'ene' dižə' quinga, gwse'ene': —čGan' gaquə de'e quinga Xantə'." Nach Jeso'osan' gože' lega'aque': —Ŋgale'en chonen che ben' ne': "Gan' de bia guat nan' chesə'əžag šod ca'."

18

Jempl che to no'olə gozebə len to juez mal

¹ Na' be'elene' lega'aque' to jempl par ničh bsd blo'ine' lega'aque' de que cheyalə' so'ontezə so'one' orasyon sin cui žjəxaquə'əlažə'əga'aque'. Na' gože' lega'aque':

² —Gwche' to syoda gan' gwzo to juez. Na' juezən' bito gwdape' Diozən' respet na' nic gwche' yichje' šə chsa'azlažə' beŋəchən' can' chone'ena'.

³ Na' lao syodan' gwzo to no'olə gozebə na' goxjzə cheje' lao juezən' na' che'e le': "Bosla nada' lao na' beŋə' contr čhia'anə'."

⁴ Bagoc šša bito benague' che', pero gwdelə bene' xbabən' na' gwne': "Bito čhapa' Diozən' respet na' nic čhi' yičhja' šə chsa'azlažə' beŋəchən' can' chona'.

⁵ Pero yosla' no'olə nga lao na' beŋə' contr che' la' lechguale zed chone'ene' nada'. Šə bito gona' yelə' jostis che'ena' bitoch soida' tant zed chedeyene' nada'."

⁶ Nach gož Xanchon' lega'aque': —Le'e gon xbab che de'en gwna juezən' ben' cui zda liča.

⁷ Naquəchxe gon Diozən' gwzenague' che beŋə' ca' bagwleje' par zjənaque' xi'ine', beŋə' ca' chso'olgiž le' do ža do yel. Goslacze' lega'aque' lao na' beŋə' contr čhega'aque' ca' la'anə'əczə šə əsa'aquene' de que bachžeine'.

⁸ Echnia' le'e, to žalnezdao' Diozən' yosle' lega'aque' lao na' beŋə' contr čhega'aque' ca'. Pero cata' nada' yida' yežlyo nga yetlas, nadan' naca' ben' bselə' Diozən' golja' beŋəch, cuili ne'e nita' beŋə' ne'e chso'onliłaze'e nada' par yosla' lega'aque' lao na' beŋə' contr čhega'aque' ca'.

Jempl che to beŋə' fariseo len to beŋə' gočixjw

⁹ Na' gwnita' balə' beŋə' zjənapəchgua confyanz cuinga'aque' de que zjənaque' beŋə' güen lao Diozən' ca de'en chso'one'ena'. Beŋə' ca' zjənone'en de que beŋə' yeziquə'əchlə bito bi zjəzaque'e. Na' Jeso'osan' be'e jempl nga par beŋə' ca' zjənapəchgua confyanz cuinga'aque', gwne':

¹⁰ —Чорə бəнə' ja'aque' lo'o yo'odao' əblaonə' jse'ene' orasyon, toe' бəнə' fariseo na' ben' yeto бəнə' gochixjw.

¹¹ Бəнə' fariseon' gwzeche' na' bene' orasyonə' cho'elao' cuine' na' gwne' quinga: “Dioz, chona' yelə' choxwlen chio' chedo' bito chona' can' chso'on yeziqə'əchlə бəнə'. Bito chca'a bi de'e de che бəнə' yoblə, na' bito chona' bichlə de'e mal. Bito naca' бəнə' ggo'o xtoi, nic chbejyichja' no'ol ch'ia' par solena' бəнə' yoblə, na' nic naca' бəнə' mal can' naquə бəнə' gochixjw nga.

¹² Чорə ža lao to xman chzoa' cui chaogua'. Na' yoguə'əloł gan de'en chona', chona'an ši cue'elə na' chnežjua' tcue'en par yo'oda'onə'.”

¹³ Na' бəнə' gochixjon' gwzechateze' zita'əla, na' xte nic cheyaxjene' əlis laogüe'enə' əggüie' yoban', na' chbažə' lcho'enə' gwne': “Dioz, beyašə'əlazə'əšgüei nada' бəнə' güen de'e mal.”

¹⁴ Ca'aza de'e gwna бəнə' gochixjon'. Na' əchnia' le'e, Diozən' bezi'ixene' che бəнə' gochixjon', na' beyeje' liže' sin cui bi xtole'e gotə'. Caguə ca' бəнə' fariseon'. Na' notə'ətezcho cho'elao' cuincho, Diozən' gone' par nič gacbe'icho de que bitobi zaquə'əcho. Na' notə'ətezcho choncho xbab de que bitotec bi zaquə'əcho, Diozən' gone' chio'o yelə' bala'an.

Jsoa' бəнə' bidao' lao Jeso'osən'

¹⁵ Na' ja'ac бəнə' jso'e bidao' lao Jeso'osən' par nič əxoə ne'enə' yichjga'acbo' na' gone' orasyon chega'acbo'. Na' cata' bessə'əle'i disipl ca' can' chso'one'enə', gossə'ədile' lega'aque'.

¹⁶ Pero na' Jeso'osən' goxga'aque'əbo' na' gože' disipl che' ca': —Le'e güe' latjə la'ac bidao' ca' laogua' nga, na' cui əgwžonle. Na' əchnia' le'e, бəнə' ca' chəsə'əzexjw yichjga'aque' lao Diozən' can' chəsə'əzexjw yichj bidao' ca' lao xaxna'aga'acbo', lega'acze'enə' chso'e latjə chnabia' Diozən' lega'aque'.

¹⁷ Bidao' ca' bito chso'on cuinga'acbo' xen, na' de'e li chnia' le'e, notə'ətezele šə cui yeyacle ca bidao' par güe'ele latjə nabia' Diozən' le'e, bito gaquə yežinle yoban' gan' zo Diozən' chnabi'e.

Бəнə' güego' ben' goquə бəнə' gwni'a

¹⁸ To бəнə' gwnabia' gože' Jeso'osən': —Maestr, le' naco' бəнə' güen, gwna nada' bi de'en cheyalə' gona' par nič gata' yelə' mban zejlicəne ch'ia'.

¹⁹ Na' par nič gon be'enə' xbab che de'en ne', Jeso'osən' gože'ene': —čBixchen' nao' de que naca' бəнə' güen? Dioz nan' naque' le'ezelaogüe бəнə' güen.

²⁰ Le' nezdə' bin' na lein': “Cui co'o xtole, na' cui cuejyichjle be'en chele o no'ol chele par solenle бəнə' yoblə; cui gotle бəнə'; cui cuanle; bito gacle testigw fałs contr sa'aljuežjle; gwnežjwle yelə' bala'an xaxna'ale.”

²¹ Nach gož be'en le': —Yoguə'əloł de'e quinga chona'an dezd xcuida'a.

²² Nach cata' bene Jeso'osən' xtiže'en na' gože'ene': —Tozə de'en ne'e chac fałt gono'. Jəyeyeta' yoguə'əloł bi de'e de chio', na' mech de'en le'ido' che de'e ca' bnežjon бəнə' yašə', nach da denao nada'. Na' cata' yežino' yoban' gan' zo Diozən', de'e zaquə'əche gata' chio'.

²³ Pero na' be'enə' cata' beyož benene' dižə' de'en gož Jeso'osən' le', gwzechachoe' trist, chedə' la' goque' to бəнə' gwni'achgua.

²⁴ Na' bgüia Jeso'osən' бəнə' gwni'anə', na' gwne': —Zdebəchgua naquən par to бəнə' gwni'a güe'le latjə par nič nabia' Diozən' le'.

²⁵ Zdebəchlä naquən par to бəнə' gwni'a güe'le latjə nabia' Diozən' le' cle ca par to camey teb to lo'o nag yešə'.

²⁶ Na' бəнə' ca' bosə'ozenague' xtiže'enə' gwse'ene': —čNoxan' yechoj xni'a de'e malən' ža?

²⁷ Na' Jeso'osən' gože' lega'aque': —De'en cui gaquə gon бəнə'chən', bito nacho cui gaquə gon Diozən' len.

²⁸ Nach Bedən' gože' le': —Neto' bagwlejyichjto' family cheto' ca' na' len de'en deito' par chonlilažə'əto' le' na' chzenagto' chio'.

²⁹ Na' gož Jeso'osən' lega'aque': —De'e li chnia', šə nole bagwlejyichjle ližle, xo'olle, bišə'əle, xaxna'ale o xi'inle chedə' cho'ele latjə chnabia' Diozən' le'e,

³⁰ Diozən' gone' le'e de'e zaquə'əche lao yežlyo nga na'a clezə ca de'e ca' na' бəнə' ca' bagwlejyichjle. Na' cata' yežinle yoban' gone' par nič əbanle zejlicəne.

De'e yoblə gosyxjue' Jeso'osən' de que gate'

³¹ Na' gwlej Jeso'osən' apostol ca' šižin ca'ala, na' gože' lega'aque': —Na'a šejcho Jerosalennə' gan' gaquə yoguə'əloł de'en babosə'ozə' de'e profet ca' ch'ia', nadan' naca' ben' bsejə' Diozən' golja' бəнə'ch.

³² Gaca' lao na' бəнə' ca' cui zjənaquə бəнə' Izrael, na' so'one' nada' borl na' yessə'əzi'ichiz'e nada', nach yoso'oža' xene'e cho'alaogua'anə'.

³³ Yessə'əyine' nada' yid sot nach so'ote' nada', pero yeyon ža yebana' ladjo бəнə' guat ca'.

³⁴ Pero disipl che' ca' bito gwse'ejni'ine' de'en gože' lega'aque'. Zjəŋçhol yichjla'ažda'oga'aque'ena', de'e na'anə' bito gwse'ejni'ine'en.

To beŋə' lçhol beŋə' Jerico bele'ine'

³⁵ Nach lao bazon əžin Jeso'osən' Jericon', to beŋə' lçhol chi'e cho'a nezən' çhəbe' carida.

³⁶ Na' benene' chesə'ade beŋə' zan, na' gwŋabe' bin' chac.

³⁷ Nach gwse'ene': —Jeso'os beŋə' Nasaretən' chdie' laogo'onə'.

³⁸ Na' gwŋe' zižjo gwne': —Jeso'os, len' naco' xi'in dia che de'e Rei Dabin', jbeyaša'əlažə'ašgwei nada'!

³⁹ Nach beŋə' ca' zjəžialao lao Jeso'osən' gosə'ədile' beŋə' lçholən' gwse'ene' de que cheyalə' soe' žiza, pero nachle gwŋe' zižjochlə gwne': —Len' naco' xi'in dia che de'e Rei Dabin', jbeyaša'əlažə'ašgwei nada'!

⁴⁰ Jeso'osən' gwleze' nach bene' mendad əžjso'e beŋə' lçholən' laogüe'ena' na' catə' bgüigua' beŋə' lçholən' lao Jeso'osən' nach gože'ene':

⁴¹ —iBi che'endo' gona' len le'?

Nach beŋə' lçholən' gože'ene': —Xana' benšga par niç yele'ida'.

⁴² Jeso'osən' gože'ene': —Bele'i. De'en chonlilažo'o nada' baçh goc can' che'endo'onə'.

⁴³ Na' le'e bele'iteine' na' gwnaogüe' Jeso'osən' be'elaogüe'e Diozan', na' lecza' ca' yogua' beŋə' ca' besə'əle'ine' can' goquən' gwso'elaogüe'e Diozan'.

19

Jeso'osən' na' Saqueon'

¹ Nach Jeso'osən' gwyo'e Jericon' na' gwdeze' yešla'a syodan'.

² Na' zo to beŋə' le' Saqueo. Naque' beŋə' gwnabia' che beŋə' goçhixjw ca', na' naque' beŋə' gwni'a.

³ Gwdiljlaže'e naclə le'ine' Jeso'osən' pero bito goquə, çhedə' nitə' beŋə' zan len Jeso'osən' na' Saqueon' goque' to beŋə' bçhecw dao'.

⁴ De'e na'anə' gwsa'adoe' gwdie' lao beŋə' ca' par jəšepə' to lao yag yixgüio niçh goc ble'ine' Jeso'osən', çhedə' bazon te Jeso'osən' na'.

⁵ Pero na' catə' bžin Jeso'osən' xan yaguən', bgüie' lao yaguən' na' gože'ene': —Saqueo, beyetjdodo', çhedə' cheyalə' yega'ana' ližo'on neže'.

⁶ Nach Saqueon' beyetjdoe' chebeine' nach beçhe'ene' liže'ena' na' be'elaogüe'ene'.

⁷ Pero na' beŋə' ca' zjəžag len Jeso'osən' catə' besə'əle'ine' can' goquən', yogue'e gosə'ənelaogüe'e gosə'əne': —Bazde' liž to beŋə' güen de'e mal par so'ena'.

⁸ Na' Saqueon' gwzeche' nach gože' Xanchon': —Xana', gašjə de'en deida' gwnežjua'an beŋə' yaša', na' de'en bagwcua'a che beŋə' ca' bxoayaga' niçh gosə'əyixjue' mazəchlə ca de'en cheyalə' yesə'əyixjue', yonežjua' lega'aque' tap tantən'.

⁹ Na' Jeso'osən' gože'ene': —Neža babebej Diozan' le' lao de'e malən' len family çhio', na' de'e li banacle xi'in dia che de'e Abraanə' laogüe de'en bachonlilažə'əle Diozan' can' ben de'e xaxta'ocho Abraanə'.

¹⁰ Ca naca' nada', bselə' Diozan' nada' golja' beŋəçh par zedəlo'ida' beŋə' ca' bachasə'əbiayi' de que nži'ilažə'a lega'aque' na' par niçh con noe' so'onlilažə' nada' yebejəga'aca'ane' xni'a de'e malən'.

Jempl che ši beŋə' bnežjw xanga'aque'en lega'aque' çhopə' gueyoa pes güeja

¹¹ Na' žlac nežənžag beŋə' chse'enene' dižə' de'en choe' Jeso'osən', be'elene' lega'aque' to jempl çhedə' banite'e galə'əžə' Jerosalennə' na' gwsa'aque'ne' de que le'e solaote nabi'e nasyon Izraelən'.

¹² Nach gwne': —Lao to family blao bchoj to beŋə' gwyeje' to nasyon zitə' jene' de'en cheyalə' gone' par niçh solao nabi'e nasyon che'ena' catə' yežine'.

¹³ Na' antslə zese'e gwleje' ši mos che'ena' na' bnežjue' to toe' çhopə' gueyoa pes güeja. Nach gože' lega'aque': "Mech nga gonele neğosy lao cui zoa'."

¹⁴ Pero beŋə' gwlaž che' ca' besə'əgue'ine' le'. Nach catə' beyož gwze'e bosə'oselə'e beŋə' lao xane'ena' ben' naquə rein' jse'eže'ene': "Bito chene'to' nabi'a' bengə'neto'."

¹⁵ Nach catə' bežin be'ena' laže'en de'e yoblə gwzolaogwnabi'e, nach bene' mendad əžja'ac xmose' ca' ši laogüe'ena', beŋə' ca' bocua'anlene' mechən'. Gone'ene' əneze'ne' ja'acquə'əta' gwso'one' gan len mechən' de'en bocua'anlene' to toga'aque'.

¹⁶ Beŋə' mechən' bžine' laogüe'ena' na' gože'ene': "Xana', xmecho' de'en bocua'anleno' nada' benən gan ši tant ca de'en bocua'aŋo'."

¹⁷ Nach xane'en gože'ene': "Babeno' de'e güen. Naco' mos güen na' syempr chono' complir can' cheyalə' gono'. Beno' can' cheyalə' gono' len de'e da'on bocua'anlena' le', na' de'e nan' gona' par niçh nabi'o ši syoda'."

18 Na' beṇə' əgwchopen' bžine' lao xane'enə' na' gože'ene': "Xana', xmecho' de'en bocua'anleno' nda' benən gan gueya' tant ca de'en bocua'ano'."

19 Nach gože' le': "Le' nabi'o gueya' syoda."

20 Nach bžin yetoe' lao xane'enə' na' gože'ene': "Xana', nga de xmecho' de'en bocua'anleno' nada'. Bablažə'əčhečə'an bey nga."

21 Bžeba' le' la' naco' to beṇə' znia. Chono' gan de'en cui beno' žin čhei, na' chzi'o cwseš che de'en chsa'az beṇə' yoblə."

22 Nach gož xanen' le': "De'en bagwnao' ca' chlo'in de que napo' dolə'. Naco' mos mal. Chacdo' de que naca' to beṇə' znia, de que chona' gan de'en cui bena' žin čhei, na' chzi'a cwseš che de'en chsa'az beṇə' yoblə."

23 Na' šə chacdo' chona' ca', žbixčhen' cui gwlejo' xmecha'an beṇə' yoblə par nič yezi'an len yičjei na'a babela'a?"

24 Nach gože' beṇə' ca' zžəzəcha cuite'enə': "Yeca'ale xmecha'an de'en bocua'anlena'ane' na' gwnežjwlen ben' banoxə' čhopa mil."

25 Nach gwse'ene': "Xanto', banoxə'əcze' ši tant ca de'en bocua'anleno'one'."

26 Nach gož beṇə' gwnabia'an lega'aque': "Echnia' le'e, ben' chon güen len de'en chnežjua'ane', gwnežjochcz'a' čhe'. Pero na' be'enə' cui chgon žin de'en chnežjua'ane', yeca'a de'e da'on noxə'enə'."

27 Na' ca naquə beṇə' ca' chsə'əague'i nada', beṇə' ca' bito chse'ene nabi'aga'aca'ane', le'e žžxi'iga'aque' na' gotga'aclene' laogua' nga."

Gwso'elaogü'e Jeso'osən' cata' beyo'e Jerosalenna'

28 Na' cata' beyož be' Jeso'osən' jempl nga, gwze'e zde' Jerosalenna'.

29 Na' cata' bgüigue'e yež Betfage na' Betania, gan' zo ya'a de'en nzi' ya'a Olibos, na' gwleje' čhopə disipl čhe' ca'.

30 Na' gože' lega'aque': —Le'e žja'ac yežən' čhi' na', na' cata' šo'ole lao' yežən' le'ile to borrao' da'ab yag, bia cui nonə' cuia. Na' əsežleb na' əche'eleb ngalə.

31 Šə non' ye'le'e: "žBixčhen' chsežleb?" na' ye'elene': "Xanto' nan' chyažjene'eb."

32 Nach beṇə' ca' bselə' Jeso'osən' gwsa'aque' na' besa'əle'ine'eb da'ab gan' gož Jeso'osən' lega'aque' ca'.

33 Nach lao chosə'əseže'eb, xamb ca' gwse'e lega'aque': —žBixčhen' chsežle borrao'ona'?

34 Nach disipl ca' gwse'e lega'aque': —Čhedə' Xanto'on chyažjene'eb.

35 Nach gosə'əche'eb lao Jeso'osən' na' besə'əxoə xadon' čhega'aquən' cožə'əbən', nach boso'ožie' Jeso'osən' cožə'əbən'.

36 Na' lao zde' Jerosalenna' žie' cožə' borraon', lao nez gan' zde'enə' boso'ošiljw xala'an benačən'.

37 Na' gosə'əbigue'e gałə'əzə Jerosalenna' na' besə'əžine' gan' yesyə'əyetje' ya'a Olibosən'. Nach yoguə'əloł disipl zan čhe' ca' zja'aclene' le' gwzolaə lechguale besyə'əbeine' na' gwzolaə gwso'elaogü'e Diozən' zizjo gwso'e dižə' čhe yoguə'əloł de'en babesə'əle'ine' de'e zaquə' yebanecho.

38 Nach gosa'əne': —Sošga Rei čhechon' mbalaz ben' baza' nga bselə' Xancho Diozən' le'. Ledoye'ela'och Diozən' txen len beṇə' ca' nita' gan' zoe'ena' čhedə' babene' par nič benačən' gaquə' nite'e binlo len le'.

39 Na' entr beṇə' zan ca' gwnita' bałə beṇə' fariseo. Nach to čhope' gwse'e Jeso'osən': —Maestr, ben mendad nita' disipl čhio' ca' žizə.

40 Nach boži'i Jeso'osən' xtižə'əga'aque'enə' gwne': —Echnia' le'e, žalə' beṇə' quinga nite'e žizə, yej quinga so'osya'an əso'ela'on nada'.

41 Na' lao bežine' gałə'əzə Jerosalenna' bgüie' syodan' na' bene' xbab čhe beṇə' lao syodan' na' gwchežyaše'e.

42 Na' gwne': —žžalə' bachejni'ile na'a nac gonle par sole binlo len Diozən'! Pero na'a nengašə'an len le'e.

43 Gwžin ža gwžin or cata' beṇə' contr čhele so'one' to yež de yej de'en šechj syodan' par nič notono gac yechoj syodan'.

44 Na' əso'ote' le'e na' xi'inle ca', na' yosyo'ochinje' syodan' na' yesye'eyosləse' yej ca'. Can' gaquə' čhedə' bito čhejle'ele de que Diozən' babselə' nada' laolen' par gaquəlena' le'e.

Jeso'osən' bebeje' beṇə' ca' chso'on ya'a yo'odao' əblaonə'

45 Na' Jeso'osən' bžine' yo'odao' əblaonə' na' gwzolaogü'e bebeje' yoguə'əloł beṇə' ca' chso'on ya'a chy'ona'.

46 Na' gože' lega'aque': —Nyojczən' le'e Xtižə' Diozən': "Ližə'an naquən to latjə gan' so'on beṇə' orasyon", pero na' le'e babenlen ca to latjə gan' ža' beṇə' bguan.

47 Na' bsed blo'ine' beṇə' ca' ža' yo'odao' əblaonə' yoguə' ža. Na' bχoz əblao ca' na' beṇə' ca' choso'osed choso'olo'ine' lei de'en bzoj de'e Moizezən' na' nochlə beṇə' blao che beṇə' Izrael ca' besyə'əyiljlažə'e naclə so'one' par əso'ote' le'.

48 Pero bito besə'əželene' naclə so'one' len le', cheda' yoguə' beṇə' yeziqua'əchla besyə'əbeichgüeine' xtiže'ena'.

20

Yelə' gwnabia' che Jeso'osən'

1 To ža lao bsed blo'i Jeso'osən' beṇə' ca' lo'o yo'odao' əblaonə' na' chyixjui'e dižə' güen dižə' cobə' che Diozən', besə'əžin bχoz əblao ca' na' nochlə beṇə' golə beṇə' blao che beṇə' Izrael ca' na' beṇə' ca' choso'osed choso'olo'i lein'.

2 Na' gwse'ene': —Gwnaşc neto', žnac goquən' gwxi'o yelə' gwnabi'an na' non' beṇ le' yelə' gwnabia'anə' par gono' de'e ca' chono'?

3 Na' boži'e xtižə'əga'aquen' gwne': —Łeczə de to de'e ṇabda' le'e, lenaşc nada',

4 žnon' bselə' de'e Juannə' bide' bchoe' beṇə' nis? žEDioz nan' bselə'e'ene' o šə beṇə' yoblən'?

5 Na' bosə'oxi'e gosə'əne': —žBi ṇacho? La' šə ṇacho de que Diozən' bselə'e de'e Juannə' par bchoe' beṇə' nis, nach əṇe' chio'o: “žBixchen' bito gwyeyje'ele che'?”

6 Na' šə ṇacho de que bide' to gwłazze', nach yoguə' beṇə' quinga yosə'əšiže'e chio'o yej cheda' chse'ejni'ine' de que de'e Juannə' goque' to profet beṇə' bselə' Diozən' par be'e xtiže'ena'.

7 Nach gwse'e Jeso'osən' de que bito zžəneze' non' bselə' de'e Juannə'.

8 Nach Jeso'osən' gože' lega'aque': —Łeczə ca' nada' bito əṇia' non' beṇ nada' yelə' gwnabia' par gona' de'en chona'.

Jempl che mos mal ca'

9 Na' be'e jempl nga bzejni'ine' beṇə' ca' choso'ozenag che' de que notə'ətežə beṇə' šə choncžə yiçhjaogüe' cui chejle'e che' cuiayi'e. Na' gwne': —To beṇə' gože' zan yag obasən' na' bocua'əṇe'en lao na' beṇə' ca' yoso'ogüia yoso'oye'en, na' gwze'e gwyeye' ga yoblə na' jəyega'ane' šša.

10 Catə' bžin ža par yesyə'ətobe' cwsešən', bselə'e to mos che'ena' lao beṇə' ca' chsa'ape' yag obasən' par nich yosyo'onežjue'ene' to tlacw che cwsešən' de'en cheyalə' si' xane'en. Na' beṇə' ca' chsa'apə yag obasən' gosə'əyine' mosən' na' bosyo'ose'ene' sin cui bi bi bosyo'onežjue'ene'.

11 Nach xanga'aque'en bselə'e yeto mosən', na' łeczə gosə'əyine'ene' na' gwso'one'ene' borl, na' bosyo'ose'ene' sin cui bi bi bosyo'onežjue'ene'.

12 Nach bselə' xanga'aquen' mos əgwyoṇe, na' łeczə gwso'otlate'ene' xte gwso'onene' güe' na' besyə'əbeje'ene' fuerlə.

13 Nach xan yag obasən' gwne': “žNacxa gona'? Egwselə'a xi'ina' bi'in chacchgüeida' chei, la' šəquə gwsa'apəlje'ebo' respet.”

14 Pero beṇə' ca' chsa'apə yag obasən' catə' besə'əle'ine' xi'ine'ena' gosə'əne' entr lega'acze': “Bengan' xi'in xan yag obasən' na' len' si' biennə'. Łeda gotchone' par nič si'icho bien che xə'ena'.”

15 Nach besyə'əbeje'ene' fuerlə güertən' na' gwso'ote'ene'. Na' žnacxa bentgua xan yaguən' len lega'aque'ena' ža?

16 jəyənitaogüe' lega'aque', na' begüe'e yaguən' lao na' beṇə' yoblə. Na' beṇə' ca' ža'anə' catə' gwse'ene'ne' dižə' quinga de'en be' Jeso'osən' gosə'əne': —jCatec de'e mal juisy de'e ca' goquən'!

17 Na' Jeso'osən' bgüiachgüe' lega'aque' na' gože' lega'aque': —žBixa zejen ža, de'en nga nyojən' le'e Xtižə' Diozən' chia' de'en gwxaquə'əlebəda' ca yej squin?, nan:

Yej de'en cui gwso'olažə' mues güen yo'o ca',

len banaquən yej squin.

18 Na' yoguə' no cui šejle' chia' gwxaquə'əlebene' ca beṇə' əxopə lao yej na' cue'əžoše'. Na' yoguə' no cuiṇə' šejle' chia' catə' babžin žan' gaquə'juisyən', gwxaquə'əlebene' ca beṇə' əxopə yej laogüe'ena' na' əgwšošjən le'.

Gosə'əṇabene' Jeso'osən' šə yesə'əyixjue' impuest che gobiern'

19 Na' lao or na'atežə beṇə' ca' choso'osed choso'olo'i lein' na' beṇə' gwnabia' che bχoz ca' gwse'ene'ne' yesə'əzene'ene' cheda' gwse'ejni'ine' de que Jeso'osən' be'e jemplən' por ni che de'en cui chse'ejle'e che'. Pero bito bi gwso'one' cheda' besə'əžebe' bi so'on beṇə' ca' ža'anə' beṇə' bachse'ejle'e che Jeso'osən'.

20 Na' dezd or na'atežə gwzolaogüe' Jeso'osən' par əchoj to dižə' cho'ena' de'en yesə'əchine' par əsa'ogüe' xya che' lao beṇə' gwnabia' che gobiernən'. De'e na'anə' bosə'əselə'e beṇə' chso'on txen len lega'aque' lao Jeso'osən' gwsa'aque'ne' yesə'əxoayague'ene'

nich gone' xbab de que do lažə'əga'aque' chse'enene' yesə'ənezene' bi de'en naquən güen so'one'.

²¹ Nach gwse'e le': —Maestr, nezetō' de que cho'o dižə' li, na' naquən liča de'en chsed chlo'ido' beṇə' ca', na' toza can' chono' len notə'ətezə beṇə'. Na' nezetō' de que dižə' lin' cho'o chsed chlo'ido' beṇə' can' chene'e Diozən' goncho.

²² Na' chene'eto' nezetō' žəcheyalə' chixjwto' impuest che gobiernən', o šə cui?

²³ Pero gocbe'i Jeso'osən' caguə do lažə'əga'aque'enə' chse'ene' ca', con chse'enene' yoso'oṅoayague' le', na' gože' lega'aque':

²⁴ —Le'e gwlo'i nada' to xmechlen'. žNo diboj chein' da' laogüen' na' no lein' nyoj laogüen'?

Nach gwse'ene': —Che Rei Sesar na'anə'.

²⁵ Nach gože' lega'aque': —Le'e əgwnežjo Sesarən' de'en naquə che' ža, na' le'e əgwnežjo

Diozən' de'en cheyalə' əgwnežjwlene'.

²⁶ Na' bito gwsa'ac so'one' xtižə'enə' clləlləo beṇə' ca' ža'anə', na' besyə'əbanene' can' boži'e

xtižə'əga'aque'enə', na' bitoch bi gosə'əne'.

Catə' yesyə'əban beṇə' guat ca'

²⁷ Na' leczə besə'əžin balə' beṇə' sadoseo ca' beṇə' ca' cui chse'ejle'e de que yesyə'əban beṇə' guatən', nach gosə'əṇabene' le'

²⁸ gwse'ene': —Maestr, de'e Moizezən' bzoje' can' cheyalə' goncho. Na' gwne': “Šə to beṇə' byo beṇə' nšagna' gate' na' yega'an no'ol che'enə' sin cui no xi'ine' gwzo, beṇə' bišə' ben' bagotan' cheyalə' yequ'e no'oləna' par nich nita' xi'in dia che ben' bagotan'.

²⁹ Na' goquən' gwnitə' gažə bišə'əga'aque', na' to'e bšagne'e na' catə' gote' notono xi'ine' gwzo.

³⁰ Na' beṇə' bišə'e əgwchope beque'e no'olən', na' leczə gote' na' notono xi'ine' gwzo.

³¹ Na' beṇə' bišə'e əgwyoṇe leczə beque'e no'olən', na' leczə ca' goquə len le', nach beṇə' bisə'əga'aque' ca' yetap besyə'əque'e no'olən' na' gwsa'ate' na' notono xi'inga'aque' gwnitə'əczə.

³² Gwdelə leczə got no'olən'.

³³ Na' catə' yesyə'əban beṇə' guat ca', žnoe' entr lega'aque' gaquə be'en che'? la' yogue'e boso'ošagna'alene' le'.

³⁴ Na' Jeso'osən' boži'e xtižə'əga'aque'enə' na' gože' lega'aque': —Beṇə' ca' nita' lao yežlyo nga chosə'əšagne'e na' leczə choso'ošague' na' no xi'inga'aque'.

³⁵ Pero na' beṇə' ca' na' Diozən' čhega'aque' de que zjəzaque'e par yesyə'əbane' ladjo beṇə' guat ca' na' par žjəsyə'əzoe' len le' zejlicaṇe, catə'ən yesyə'əžine' gan' zo Diozən' bito nachbia' šə zjənaque' beṇə' zjənšagna' o šə cui, na' caguə no yesyə'əšagna'ach na'anə'.

³⁶ Bitoch sa'ate'. Lebze əsa'aque' len angl ca'. Na' zjənaque' xi'in Dioz čhedə' babosban Diozən' lega'aque' ladjo beṇə' guat ca'.

³⁷ Na' leczə de'e Moizezən' bzoje' can' goquə ble'ine' to yi' bej de'e chdoljən to lo'o xis yešə' sin cui bzeyən len. Na' gwne' che Xancho Diozən' de que naque' Dioz che de'e xaxta'ocho Abraanna', na' Dioz che de'e xaxta'ocho Isaaquən' na' Dioz che de'e xaxta'ocho Jacobən'. De'e na'anə' nezecho de que beṇə' guat ca' yesyə'əbane'.

³⁸ Na' nezecho beṇə' ca' nite'e len Diozən' čhedə' Diozən' bito naque' Dioz che beṇə' guat, sino naque' Dioz che beṇə' zjəmban. Na' yoguə' beṇə' bagwso'onlilažə' Diozən' ne'e zjəmbane' par chso'elaogüe'ene'.

³⁹ Na' balə beṇə' choso'osed choso'olo'ine' lei de'en bzoj de'e Moizezən' gwse'e Jeso'osən': —Maestr, binlō boži'o xtižə'əga'aque'enə'.

⁴⁰ Na' bitoch besyə'əyaxjene' jbi yesə'əṇabene' le'.

Cristən' naque' xi'in dia che de'e Rei Dabin'

⁴¹ Jeso'osən' gože' lega'aque': —žBixchen' chəsə'əna beṇə' che Cristən' de que naque' xi'in dia che de'e Rei Dabin'?

⁴² Cui de'e Dabin' bzoje' le'e libr gan' žia Salmos, gwne':

Xancho Diozən' gože' Xana'anə':

“Gwche'edo' cuita' nga nabi'acho txen.

⁴³ Na' gona' par nich nita' de'e ca' chso'on contr le' na' beṇə' contr čhio' ca' xni'onə'.”

⁴⁴ Na' de'en gwna de'e Dabin' de que Cristən' naque' Xane', žəcabi zejen de que Cristən' naque' mazəchlə ca xi'in dia che'enə' ža?

Xtolə' beṇə' ca' choso'osed choso'olo'ine' lei de'en bzoj de'e Moizezən'

⁴⁵ Na' gože' disipl che' ca' len yoguə' beṇə' yeziquə'əchlə boso'ozenag che', gože' lega'aque':

⁴⁶ —Le'e gon xbab nich cui gonle can' chso'on beṇə' ca' choso'osed choso'olo'ine' lei de'en bzoj de'e Moizezən'. Lega'aque' chesyə'əbeine' chəsə'əlažə'e zjənyaze' lachə' tonə, na' chesyə'əbeine' catə' beṇə' chəsə'əguape' lega'aque' diox na' chəsə'ənope'e na'aga'aque'enə' do

lao lquey. Lega'aque' chse'enene' yesə'əbi'e gan' chəsə'əbe' beṇə' blao catə' chja'aque' yo'odao' na' catə' chac lni.

⁴⁷ Na' choso'oxoayague' no'olə gozebə ca' par niçh no'ol ca' chəsə'ənežjue' lega'aque' ližga'aque' len bichlə de'en de chega'aque'. Na' catə' chso'one' orasyon, chso'echgüe' dižə' parzə niçh choso'oxoayague' beṇə'. Mazəchlə castigw chega'aque' əgwnežjo Diozən' clezə ca che beṇə' yeziqə'achlə chedə' chso'one' de'e mal ca' zjənac ca' len zjəneze' can' na lein'.

21

To no'olə gozebə be'e Diozən' xmeche'ena'

¹ Jeso'osən' bgüie' gan' bosə'onežjo beṇə' ca' mechən' par yo'odao' əblaonə', na' ble'ine' beṇə' gwni'a ca' gosə'əgüe' e xmechga'aque' lo'ina'.

² Na' leczə ble'ine' to no'olə gozebə no'olə yašə' gwlo'e çhopə sentab dao' che'ena' lo'i gan' gosə'əgüe' e mechən' par yo'oda'ona'.

³ Nach Jeso'osən' gwne': —De'e li əchnia' le'e, no'olə gozebən' naque' beṇə' yašə', pero bagwlo'e de'e zaquə'əch lao Diozən' ca yoguə' beṇə' ca' yelə'.

⁴ Lega'aque' gosə'əgo'o xmechga'aque' de'e checho'onən lao yelə' gwni'a chega'aque'ena', pero no'olə nga lao yelə' yašə' yelə' zi' che'ena' bagwlo'e yoguə' ca ga de'e de che'.

Gwžin ža yosyo'ochinjə' yo'odao' əblaonə'

⁵ Na' ca naquə' balə disipl ca' gwso'e dižə' catec xoche naquə' yo'odao' əblaonə' ca naquə' gwso'one'en de yej xoche de'e zaquə' e na' yo'on bi de'en bosə'onežjo beṇə'.

⁶ Nach gože' lega'aque': —Ca naquə' yo'odao' əblaonə' de'en chle'ile nga, gwžin ža yosyo'ochinj beṇə' doxenə' na' notoch no le'i len.

De'en gaquə' catə'an bazon baozə šo'o fin che yežlyon'

⁷ Na' gosə'əṇabene' Jeso'osən' gwse'ene': —Maestr ždo batə'əquə' gaquə' de'e nga nao' nga? na' žnac gaquə' gacbe'ito' catə' bazon baozə gaquə' can' na'ona'?

⁸ Na' gože' lega'aque': —Le'e gon xbab niçh notono əxoayag le'e par niçh šejle nez yoblə. Beṇə' zan beṇə' goxoayag la'aque' yesə'əne': “Nadan' Cristən' na' bazon gaquə' juisyən'.” Pero le'e bito əgwzenagle xtižə'əga'aque'ena'.

⁹ Na' catə' yene'ele dižə' de que chac gwdiłə o de que guaquə' gwdiłə, bito žeble, chedə' zgua'atec de'e quinga cheyalə' gaquə'. Pero na' bitonə' žin žan' par šo'o fin che yežlyon'.

¹⁰ Nach gože' lega'aque': —Ze'e šo'o fin che yežlyon' yediłə yež contr yež na' ṇasyon contr ṇasyon.

¹¹ Na' leczə zan yež de'e zjəchi' doxenlə yežlyon' xo'ochgua, na' gaquə' bgüin, na' cue'e yižgüe'. Na' yesə'əzəbchgua beṇə'chən' catə' yesə'əle'ine' de'en gaquə' le'e yoban'.

¹² Pero ze'e gaquə' yoguə' de'e quinga catə' yesə'əzene' le'e, na' yoso'ochi' yoso'osaque' le'e, na' so'one' le'e lao na' bxož ca' na' yesə'əyixjwga'aque' le'e ližya. Na' yesə'əche'exaxje' le'e do lao rei na' lao gubernador par sa'ogüe' xya chele chedə' chonjilažə'əle nada'.

¹³ Na' lao chac de'e quinga, le'e güe'ech xtižə'anə'.

¹⁴ Pero na' bito gonle' xbab nac yoži'ile xtižə'əga'aque'en catə' əzinle lao beṇə' gwnabia' ca' gan' sa'ogüe' xya chele.

¹⁵ Nada' gonə' le'e xbab na' yelə' sin' par niçh gaquə' yoži'ile xtižə'əga'aque'ena' sin cui bi yesə'əne' na' bito gaquə' so'one' par se'ejle' beṇə' yoblə de que babenle de'e mal.

¹⁶ Na' tant yesə'əgue'i beṇə' le'e xte xaxna'ale ca' na' beṇə' bišə'əle na' bišə'əljuežjle na' beṇə' migw chele ca' so'one' le'e lao na' beṇə' contr chele ca' na' əso'ote' balə.

¹⁷ Na' casi yoguə' beṇə'chən' yesə'əgue'ine' le'e chedə' chonjilažə'əle nada'.

¹⁸ Na' le'e gon xbab de que chapə chye Diozən' le'e. Na' bito güe' e latjə cuiayi'ile.

¹⁹ Na' gone' yelə' mban zejlicane chelen' šə sole co'o gwchejlažə'əle len yoguə'əlo' de'en so'onene' le'e.

²⁰ Na' catə' le'ile soldad zan zjənyechj zjəmbi'e Jerosalennə', na' ənezele de que bazon cuiayi'in.

²¹ Na'a ža, le'e nitə'əle distrit che Jodean' cheyalə' yexonjle catə'an bachac ca' na' žja'acle do ya'ada'ote. Na' le'e nitə'əle lao' syodan' yesə'acdole, na' le'e nitə'əle fuerlə syodan' bito gonle' xbab yeyo'ole.

²² Cana' gwnežjo Diozən' castigw che beṇə' ca' ža' syodan' por ni che xtolə'əga'aque'ena' par niçh gaquə' can' nyojən le'e Xtižə' Diozən'.

²³ Na' ca tyempən' lechgualə zdebə gaquə' len no'ol ca' zjənoa' bdəo' na' no'ol ca' chəsə'əguažə' bidəo'. Lechgualə çhi' saquə' beṇə' ca' ža' doxenlə Jodean', chedə' Diozən' əžə'achgüe' lega'aque'.

²⁴ Soldad ca' so'ote' baləga'aque' len spad, na' yebalə' yesə'əche'exaxj soldad ca' ṇasyon ca' de'en zjəchi' doxenlə yežlyon'. Na' beṇə' ca' cui zjənaquə' beṇə' Izrael yosyo'ochinjə' yo'o ca'

de'en ža' Jerosalennā' na' yoso'olej yosā'əšošje'en. Pero na' babžia Diozān' bia' əžin ža catā' beņā' ca' cui žjānaquā beņā' Izrael bitoch yesā'əñabi'e nasyon Izraelān'.

Yida Jesocristan' de'e yoblā

²⁵ Ca naquā bgūiž, bio' na' beljw ca', gaquā de'e yebanecho len lega'aquān. Na' beņā' ža' yežlyon' sa'aquene' tolā na' sa'aczejlaže'e tant sšag gon nisda'onā' de'en gwliš be'ena' len.

²⁶ Na' beņā' ža' yežlyo nga sa'ate' šlat tant yesā'əžebe' de'en gaquā, čhedā' Diozān' əgwsi'ınse' yoguā' de'e ca' chle'icho le'e yoban'.

²⁷ Na' canā'ach beņā' ža' yežlyon' yesā'əle'ine' nada' yida' de'e yoblā to lo'o bejw, nadan' naca' ben' bselā' Diozān' golja' beņach. Yida' len yelā' guac xen čhia'anā' par nič gwlo'a de que naca' le'ezeleagüe beņā' blao.

²⁸ Na' catā' solao gaquā de'e quinga, le'e gondiplažā' na' le'e yebei, čhedā' bazon əžin ža catā' yida' de'e yoblā par yosla' le'e lao yoguā' de'e mal.

²⁹ Na' Jeso'osān' be'elene' lega'aque' to jempl na' gože' lega'aque': —Le'e ggüiašč can' chon yag yixgüion' o bitā'əteza yag yoblā.

³⁰ Catā' chle'ile bachebia xlague'e nach nezele de que bač zon yela' yejon'.

³¹ Na' leczā' catā' le'ile gaquā de'e quinga bagwnia' ze'e gaquān', canā'ach ənezele de que bazon əgwloē' Diozān' yelā' gwnabia' čhe'ena'.

³² De'e li achnia' le'e, bitonā' gat le'e nitā'ale tyemp nga catā' solao gaquā yoguā'əlol de'e ca'.

³³ Ca naquā de'e ca' chle'icho le'e yoban' na' yežlyon' yesā'əde čhei, pero ca naquā xtižā'anā' caguā de'e te cui gaquā can' nanna'.

³⁴ Na' le'e gon xbab par nič cui gacle beņā' lia na' beņā' güe'e zo na' par nič cui sole yelal yežejele. Nchoł yichjla'aždao' beņā' ca' žjānaquē' beņā' lia na' beņā' güe'e zo na' beņā' ca' chesya'əlal chesya'əžeje. Bito ni'e'e probnid catā'an selā' Diozān' castigw čhega'aque'.

³⁵ Na' leczā' yoguā' beņā' yeziqū'əchlā ža' yežlyon' beņā' cuinā' so'onlilažā' nada' bito ni'e'e probnid.

³⁶ Pero le'e ža, leso probnid dote tyemp, le'e gon orasyon par nič catā' gaquā de'e quinga Diozān' gaquālene' le'e par nič cui bi gaquele na' par nič yedasole len nada', nadan' naca' ben' bselā' Diozān' golja' beņach.

³⁷ Na' yoguā' ža gwzo Jeso'osān' bsd blo'ine' beņā' ža' lo'o yo'odao' əblaona'. Nach yoguā' že' beyeje' lao ya'a de'en nzi' ya'a Olibos.

³⁸ Na' yoguā' zil tempran besā'əžin beņā' zan par bosozenague' čhe' lao bsd blo'ine' lega'aque' lo'o yo'odao' əblaona'.

22

Boso'oxi'e can' so'one' yesā'əzene' Jeso'osān'

¹ Na' goquān' bazon baözā lni pascon' de'en čhalā' Jerosalennā' catā'an čhsa'ogüe' yetxtil de'en cui bi xne'i nchičā.

² Na' bχoz əblao ca' na' beņā' ca' choso'osed choso'olo'i lei de'en bzoj de'e Moizezān' besyā'əyilje' naclā so'one' par ədolā' Jeso'osān' sin cui no gacbe'i na' əso'ote'ene'. Gwso'one' ca' čhedā' besā'əžebe' šā bi so'one beņā' lega'aque'.

³ Nach gwyo'o gwyaz Satanasān' yichjla'aždao' Jod Iscariotān' ben' naquā cuent len apostol ca' šižin.

⁴ Gwyeje' lao bχoz əblao ca' na' lao beņā' ca' žjānaquā gwnabia' čhe xā'ag yo'odaon' na' bosā'əxi'e naclā so'one' par gone' Jeso'osān' lao na'aga'aque'.

⁵ Na' lechguāle besyā'əbeine', na' gwso'one' lyebe yosā'ənežjue'ene' mech.

⁶ Na' Jodān' gwxenlaže'e len lega'aque' na' gwzolao gwche'enaogüe' batā'əquān' so latjā gone' Jeso'osān' lao na'aga'aquēn' catā' cui ža' beņā' zan len le'.

Gwsa'ogüe' xše' na' Jeso'osān' blo'ine' lega'aque' can' so'one' par žjesyā'əzalaze'e ca de'en gate'

⁷ Na' bžin žan' catā'an čhsa'ogüe' yetxtil de'en cui bi xne'i nchičān. Na' ža na'anā' naquān žan' catā' chso'ote' xilā' dao' par čjāsya'əzalaze'e can' bosla Diozān' de'e xaxta'oga'aque'ena' lao na' beņā' Egipto ca'.

⁸ Nach Jeso'osān' gwleje' Bedān' len Juannā' na' gože' lega'aque': —Le'e žja'ac na' le'e žje'esi'ini'a de'en gaocho lao lni pascon'.

⁹ Nach gwse'ene': —čGan' che'endo' žje'eni'aton'?

¹⁰ Nach gože' lega'aque': —Catā' bagwyo'ole syodan' na' yežagle to beņā' byo ben' noa' che'e nis ya'a yene'. Le'e žjānaotelene' na' šo'ole len le' lo'o yo'ona'.

¹¹ Na' ye'ele xān yo'onā': “Maestrān' ne' gonšgo' to quart gan' güe'eni'ato' de'en gao-lento'one' xše' lni pascon' neto' disipl čhe'.”

¹² Nach əgwlo'ine' le'e to quart xen de'en zo žcuia la'alā, na' lo'o quartān' zo to mes na' bichlā de'e čhyažjecho. Lo'o quart na'anā' əgwsi'ini'ale de'en gaocho lao lni pascon'.

¹³ Nach gwsa'aque', na' yogua'əloł cayanə'anə' gože' lega'aque'enə' goquə. Nach bosə'əsi'ini' de'en gwsa'ogüe' lni pascon'.

¹⁴ Na' cata' bžin or, gwchi'e cho'a mesən' len disipl che' ca'.

¹⁵ Nach gože' lega'aque': —Lechguale gwzelaža'a gaogua' yelə' guao che lni pascon' nga len le'e antslə ze'e čhi' saca'a par gata'.

¹⁶ Čhnia' le'e, zelao na'a gaogua'an. Xte cata'əch babloe' Diozən' yelə' gwnabia' che'enə', cana'ach gaogua'an de'e yobla.

¹⁷ Na' gwxi'e basən', be'e yelə' choxčwlen che Diozən' nach gwne': —Le'e si'in na' le'e ye'ej yogua'ale lata' güejə de'en yožə lo'o bas nga.

¹⁸ Čhnia' le'e zelao na'a che'ėja' bino che oban' nga. Xte cata'əch babloe' Diozən' yelə' gwnabia' che'enə', cana'ach ye'ėja'an de'e yobla.

¹⁹ Nach gwxi'e yetxtilən' na' be'e yelə' choxčwlen che Diozən' na' bzožje'en na' bnežjue'en lega'aque'. Na' gože' lega'aque': —De'e ngan' cuerp čhia' de'en chsanlaža'a por ni che le'e. Quinga gonle par žjəyzalažə'əle bi zejen par le'e ca de'en so'ote' nada'.

²⁰ Na' leczə beže'e basən' cata' babeyož gwsa'ogüe' xšen' na' gože' lega'aque': —De'en yožə lo'o bas nga zejen de'e cobə de'en non Diozən' lyebe gone' par gaquəlene' le'e. Na' solao gone' can' none' lyeben' čhedə' so'ote' nada' na' laljə xčhena'anə' por ni čhele.

²¹ Na' de'e li ben' gone' nada' lao na' beņə' ca' so'ot nada' chaolene' nada' txen nga.

²² Banaquəczən čhia' gata', nadan' naca' ben' bselə' Diozən' golja' beņəč, pero įbrochguazə be'enə' gon nada' lao na' beņə' ca'!

²³ Nach disipl ca' gosə'əzolaogüe' gosə'əņabene' ljuežjə'aque' noe' entr lega'aquen' gon de'e malən' nac ca'.

Gwsa'acyože' entr lega'acze' noen' naquəch blaō

²⁴ Na' leczə gosə'əzolaogüe' gwsa'acyože' entr lega'acze' noen' naquəch beņə' blaō.

²⁵ Na' Jeso'osan' gože' lega'aque': —Nita' rei che to to nasyon ca' na' čhəsə'anabi'e beņə' nita' xni'aga'aque'. Na' beņə' gwnabia' ca' chse'enene' əsoe' beņə' dižə' čhega'aque' de que žjənaque' beņə' güenchgua.

²⁶ Pero caguə can'. Šə no le'e nacle beņə' blaoch, bito cheyalə' yene'ele əso'elao' beņə' le'e. Na' šə no le'e nacle beņə' čgüia chye beņə' chso'elao' Diozən', cheyalə' sole par gaquəlen ljuežjle.

²⁷ Le'e gon xbab non' naquəch beņə' blaō, žəbe'enə' čhi' cho'a mesən', o šə xmoše' ben' chon mendadən'? Clarczən' naquən de que ben' čhi' cho'a mesən' naquəche' blaō. Ca naquə nada' zoa' par gaquəlena' le'e la'anə'əczə naca' Xanle.

²⁸ Le'e bito chbejyichjle nada' lao yogua'əloł de'en chy' chzaca'a.

²⁹ Na' ca naquə Xa'anə' bano'e čhia' par nič nabi'a, leczə nada' bano'a čhele par nič nabi'ale.

³⁰ Na' gona' par nič ye'ej gaole txen len nada' cata' yežinle gan' nabi'a. Na' leczə gona' par nič le'e əggüia əgwyele family ca' šižin, beņə' ca' žjənaquə xi'in dia che de'e Izraelən'.

Jeso'osan' gwne' de que Bedən' cui chebe' šə nombi'ene'

³¹ Nach Jeso'osan' gože' Simon Bedən': —Ben xbab čhio', bagwņab Satanəsən' gaco' lao ne'in par nič gonən le' prueb šə güejyichjo' cuich gonlilažə'o nada'. Na' de'en gonən len le' gwxaquə'əleben ca de'en chon to beņə' cata' čhdie' trigon' rner par čhega'an de'e güen.

³² Pero na' nada' babena' orasyon par le' par nič ca' bito cuejyichjo' can' chonlilažə'o nada'. Na' cata' babedinjdo' xtołə'onə', btiplažə' beņə' bišo'o quinga.

³³ Nach Bedən' gože'ene': —Xana', bagwčhoglaža'a sa'alena' le' caguə ližya na'azə sino xte gatlenca' le'.

³⁴ Na' Jeso'osan' gože'ene': —Bed, əchnia' le' bito cuež lecon' neže' antslə ze'e gaquə šon las cui čhchebo' de que nombi'o nada'.

Jeso'osan' gože' disipl che' ca' de que bazon yoso'očhi' yoso'osakuə' beņə' lega'aque'

³⁵ Na' gože' disipl che' ca': —Ede de'e byažjele cata' bselə'a le'e įtixjue'ile xtiža'anə'? Bselə'a le'e sin cui bi'ale mech na' nic bsod, na' nic bi'ale xelle.

Nach gwse'ene': —Bitobi byažjəto'.

³⁶ Na' gože' lega'aque': —Pero na'a ža šə nape mech cheyalə' gua'alən, na' leczə ca' gua'ale bsod. Na' šə bito bi spad čhelenə' de, le'e gotə' xadon čhelen' par si'ilen.

³⁷ Echnia' le'e gonle ca' čhedə' gaquə čhia' can' nyojczən le'e Xtižə' Diozən', nan: “So'onene' le' can' chso'one' len beņə' chon de'e mal.” Na' bacheyož chac yogua'əloł de'en nyojən čhia'.

³⁸ Na' gwse'ene': —Xanto', bgüiašč nga no'ato' čhopə spad.

Nach gože' lega'aque': —Guaquəczən.

Jeso'osan' bene' orasyon lo'o güert de'en nzi' Getsemani

³⁹ Nach bechoje' yo'onə' na' ca naquə costumbr che' beyeje' ya'a de'en nzi' Olibos nach disipl che' ca' jəsə'ənaogü'e'ene'.

⁴⁰ Na' catə' besyə'əzine' latjən' gože' lega'aque': —Le'e gon orasyonnə' niç cui co'o gwxiye'ena' le'e nez mal.

⁴¹ Na' gwle'e lega'aque' zitə' ca gan' zelao əzin to yej de'e gwzalə' to beṇə', na' bzo xibe' na' bene' orasyonnə'.

⁴² Gwne': —Xa, benšga par niç cui çhi' saca'a šə can' chazlažo'o, pero bito che'enda' de'e nia' nada' gaquə, sino gaquə can' əṇao le'.

⁴³ Na' to angl beṇə' za' yoban' blo'elaogü'e' le' na' be'e le' fuers balor.

⁴⁴ Na' žlac lechgualə chžaglaogü'e' len yičjla'azdaogü'e'ena' gwzolaə chžaglaəche' chone' orasyonnə' xte beyačloje' na' nis yes che'ena' beyaquən ca tlabə güejə chen de'en naquə çhelson besə'əyinjten lao yon'.

⁴⁵ Na' bezeche' na' catə' bežine' gan' nitə' disipl che' ca' jəyedi'e lega'aque' chəsə'ətase' tant nite'e trist.

⁴⁶ Na' gože' lega'aque': —čBixchen' chtasle? Le'e çhas, le'e gon orasyon niç cui co'o gwxiye'en le'e nez mal.

Jodən' bdie' Jeso'osən' lao na' soldad ca'

⁴⁷ Na' ca necho'ete Jeso'osən' dižə'əna' catə' bžin ben' le' Jod, ben' naquə cuent lao disipl ca' šizin, na' nche'e beṇə' zan. Na' bgüigüe'e gan' zo Jeso'osən' na' gwdaogü'e'ene' bxidən', pero caguə do laže'en bene' ca'.

⁴⁸ Nach gož Jeso'osən' le': —Jod, çalen to bxid gono' nada' lao na' beṇə' quinga, nadan' naca' ben' bselə' Diozən' golja' benačh.

⁴⁹ Na' catə' besə'əle'i disipl che' Jeso'osən' can' gaquə che'ena' gwse'ene': —Xanto', çəgwiyinto' beṇə' quinga spad çheto'onə'?

⁵⁰ Na' toe' gwđinen' moš che' beṇə' gwnabia' che' bçoz ca', na' gwçhogtechgü'e' nague' ličan'.

⁵¹ Pero Jeso'osən' gože'ene': —Ljoye'ena'.

Nach gwđane' nag mosən' na' beyone' le'.

⁵² Jeso'osən' gože' bçoz əblao ca' na' beṇə' gwnabia' che' xa'ag yo'odaona', na' beṇə' golə' beṇə' blao ca', beṇə' ca' zja'ac zjəsə'əxene'ene', gože' lega'aque': —čEca to beṇə' bguannə' chsaquə'əlebele nda' za'acle len spad len yag zedexenle' nada'?

⁵³ Yoguə' ža gwchi'a len le'e lo'o yo'odaə' əblaona' na' bito gwxenle' nada'. Pero na'a babžin or par gonele nada' con can' chene'ele, na' babžin or gaquə can' chene'e gwxiye'ena' de'en chnabia' beṇə' ca' chsa'aš lo'o de'e žçholən'.

Bedən' bito gwçhebe' šə nombi'e Jeso'osən'

⁵⁴ Nach gosə'əzene' Jeso'osən' na' gosə'əçhe'ene' liž ben' naquəch bçoz əblao che' nasyon Izraelən'. Nach Bedən' zjənaogü'e' Jeso'osən' zitə' zita'ala.

⁵⁵ Na' bosə'oxene' yi' chy'o' che' bçoz əblaona' na' gosə'əbi'e cho'a yi'ina', na' gwche' Bedən' len lega'aque'.

⁵⁶ Na' to no'olə criad ble'ine' le' chi'e cho'a yi'ina', na' bgüie' le' na' gwne': —Leczə len bengə' naque' txen len Jeso'osən'.

⁵⁷ Pero Bedən' bito gwçhebe' šə nombi'e Jeso'osən', na' gwne': —No'olə, bito nombi'ane'.

⁵⁸ Na' chacczə šlož yeto beṇə' ble'ine' Bedən' na' gože'ene': —Lenczon' naco' txen beṇə' ca'.

Nach Bedən' gože'ene': —Beṇə', bito lena' lega'aque'.

⁵⁹ Gwde to or yetoe' gwne': —De'e liczə naquə bengə' txen len Jeso'osən', çhedə' naque' beṇə' Galilea.

⁶⁰ Na' Bedən' gože'ene': —Beṇə', bito nezda' bi dižə'an cho'o.

Na' lao necho'ete Bedən' dižə'an ca' le'e gwchežte to lecw.

⁶¹ Na' Xanchon' gwyechje' bgüie' Bedən', na' jəsə'alazə' Bedən' dižə' de'en gož Xanchon' le' catə'an gwne': "Bito cuež lecon' neže' antslə ze'e gaquə šon las cui çhebo' de que nombi'o nada'."

⁶² Na' Bedən' bechoje' gan' ža' beṇə' ca' na' gwchežyša'əchgü'e'. Na' de'e juisy de'e goquene'.

Gosə'əzi'ičhiže'e Jeso'osən'

⁶³ Na' xa'ag yo'odaə' ca' beṇə' ca' gwso'oxə' Jeso'osən' gwso'onene' borl na' gwso'ot gosə'əyine' le'.

⁶⁴ Na' bosə'occheje' to lachə' lao Jeso'osən' na' gosə'əyine' le'. Na' gwse'ene': —Gwñeya'ašč çnon' chyin le'?

⁶⁵ Na' gwyanch dižə' de'en gosə'əne' contr le' gosə'əzi'ičhiže'ene'.

Gosə'əçhe'e Jeso'osən' lao beṇə' golə' beṇə' blao che' nasyon Izraelən'

⁶⁶ Na' catá' gwy'e'eni'iná' beṇá' golá beṇá' blao che ṇasyon Izraelán' na' bḥoz áblao ca' na' beṇá' ca' choso'sed choso'olo'i lei de'en bzoj de'e Moisezan' besya'ázague' na' gwso'one' mendad par gwyej Jeso'osán' laoga'aque'ená' gan' chása'anabi'ená'. Nach gwse'ene': —Gwnásc neto' šá len' naco' ben' gwlej Diozán' par gaquáleno' ṇasyon chechon'.

Nach gože' lega'aque':

⁶⁷ —Žalá' nia' de que naca' Cristán' ben' gwlej Diozán' par gaquálena' ṇasyon chechon' bito šejle'ele chia'.

⁶⁸ Na' žalá' bi nabda' le'e nic yoži'ile xtiža'aná'.

⁶⁹ Nadán' naca' ben' bselá' Diozán' golja' beṇá'ch, na' dezd ná'a cui'a cuít Diozán' par nič ṇabi'a txeṇ len le', Dioz ben' chnabia' doxenlá.

⁷⁰ Nach yogue'e gwse'ene': —¿Elen' naco' Xi'in Diozán'?

Na' gože' lega'aque': —Le can' nale nan' naca'.

⁷¹ Nach gosá'áne': —¿Nochxa testigw chyažjecho? Chio'on babenecho ná'a chžia chnité'e Diozán' de'en ne' ca'.

23

Bosá'acuiše' Jeso'osán' lao Pilatán'

¹ Na' yoguá'áloḷ beṇá' zan ca' gosá'ázeche' nach gosá'áche'ene' lao Pilatán'.

² Na' gwzolao bosá'acuiše' Jeso'osán' gosá'áne': —Bagwchoglaoto' che benga de que cheyalá' gate' ca de'en chta chne' ṇasyon Izraelán'. Na' leczá chžone' chixjwto' impuest de'en chṇab Rei Sesarán'. Nach leczá ne' de que le' naque' Cristán' ben' gwlej Diozán' par gaquálene' ṇasyon cheto'oná' na' naque' to rei.

³ Nach Pilatán' gože'ene': —¿Elen' naco' rei che beṇá' Izrael ca'?

Nach Jeso'osán' gože'ene': —Le can' nao' nan' naca'.

⁴ Nach Pilatán' gože' bḥoz ca' na' beṇá' zan ca' nžag laogü'e'ená': —Bitobi chla'alaon šá bi dolá' napá benga.

⁵ Pero na' gosá'áneche' gosá'áne': —Chta chne' yoguá'áloḷ beṇá' ža' Jodea nga len de'en chsed chlo'ine'. Gwzolao bsd blo'ine' Galilean' pero lenczá nga bachsed chlo'ine' ná'a.

Pilatán' bsele'e Jeso'osán' lao Erodán'

⁶ Catá' bene Pilatán' can' gosá'áne', gwnabe' šá Jeso'osán' naque' beṇá' Galilea.

⁷ Na' catá' gočbe'ine' de que Jeso'osán' ze'e Galilean' gan' chnabia' gobernador Erodán', na' bsele'ene' lao Erodán', la' ca or na' zo Erodán' Jerosalenná'.

⁸ Catá' Erodán' ble'ine' le' bebeine' chedá' bagoc sša chene'ene' le'ine'ene'. Babenene' xtižá' Jeso'osán' na' gwzoe' lez le'ine' to de'e zaquá' yebanene'.

⁹ Nach de'e zan gwnabene' Jeso'osán', pero ni to dižá' che'ená' cui boži'i Jeso'osán'.

¹⁰ Bḥoz áblao ca' na' beṇá' ca' choso'sed choso'olo'i lei de'en bzoj de'e Moisezan' gosá'ázeche' galá'ázá na' bosá'acuiše'ene' len zan dižá'.

¹¹ Na' Erodán' len soldad che' ca' gwzolao gosá'ázi'ichiže'ene' na' gwso'onene' borl. Nach catá' beyož bosá'aguacue'ene' to lachá' xoche juisy, bosá'ásele'ene' lao Pilatán'.

¹² Na' dezd ža na' gwsa'ac Erodán' len Pilatán' migw, chedá' antslá besá'águ'e'i ljuežjga'aque'.

Gosá'achoglaogü'e'en gat Jeso'osán'

¹³ Nach Pilatán' betobe' bḥoz áblao ca' na' beṇá' gwnabia' ca' nach len beṇá' ža' gan' chso'one' yelá' jostisán'.

¹⁴ Na' gože' lega'aque': —Le'e bedá'guá'ale benga laogua' nga, na' gwnale che' de que chta chne' beṇá' Izraelán'. Nada' bačh gwnabyožáda'ane' laole nga, na' ca xyan' de'en chaole che', ni to de'e xinj cui chželda' šá bin' none'.

¹⁵ Na' leczá ca' Erodán' bitobi xtóle'e bželene', na' bosselē'ene' laoto' nga. Na' naquán clar bitobi ben benga de'e cheyalá' gate'.

¹⁶ Na' ná'a con gona' mendad yesá'áyine'ene' na' ágwsana'áne'.

¹⁷ Gwne' ca' chedá' gotá' to costombr chega'aque' de que ágwsane' to beṇá' pres lao yoguá' lṇi pascon'.

¹⁸ Na' yoguá' beṇá' ca' ža' na' gwso'osye'e, tozá ca gosá'áne': —¡Echójtega benga gate', na' ágwsano' Barrabasán'!

¹⁹ Na' ca naquá Barrabasán' gosá'áyxjue'ene' ližya chedá' le' bḥxie' gwdilá' lao syodan' na' goque' to beṇá' güet beṇá'.

²⁰ Na' Pilatán' de'e yoblá gwnabene' lega'aque' šá ágwsane' Jeso'osán'.

²¹ Pero gwso'osye'e gosá'áne': —¡Bde'e le'e yag corozán'! ¡Bde'e le'e yag corozán'!

²² Na' de'e ágwyon lase gož Pilatán' lega'aque': —¿Bi de'e mal bene'ená'? Ni to de'e xinj cui cheželda' šá bin' none'. Na' con gona' mendad yesá'áyine'ene' nach ágwsana'áne'.

²³ Pero con gwso'osye'e yelata' zižjoch gosá'anabe' par ágwde'ene' le'e yag corozán'. Na' Pilatán' gwzolaogü'e' bzenague' chega'aque'.

²⁴ Na' gwçhoglaogüe'en de que gaquæ can' gosæ'ænabene' le'.

²⁵ Na' 'hsane' Barrabasæn' ben' zjanyixjue' ližyan' ben' gosæ'ænabe' ægwsane' la'ana'æcza Barrabasæn' goque' ben' bxe gwdilæn' na' beñæ' güet beñæ'. Na' Pilatæn' bene' Jeso'osæn' lao na'aga'aque'ena' par so'one' len le' can' chse'enene'.

Boso'ode'e Jeso'osæn' le'e yag corozæn'

²⁶ Na' lao zjanche'ene' fuerla syodan' besyæ'ážague' to beñæ' Sirene le' Simon, ze'e zeze'e fuerla syodan'. La fuers bosæ'æde'e yag coroz che Jeso'osæn' çože'ena' na' gwnaogüe' Jeso'osæn'.

²⁷ Na' beñæ' zan zjæsæ'ænao le' na' zjælen zan no'olæ. Na' no'ol ca' gwzoloa gwso'osy'e gosæ'æbeze' che'.

²⁸ Pero na' Jeso'osæn' gwyechje' na' gože' lega'aque': —No'olæ lao' syoda Jerosalen, bito cuežle chia', yejni'a lecuez chele na' che xi'inle.

²⁹ Na' de'e li gwžin ža catæ' yesæ'æne': "Mbalaz nita' no'olæ güiž no'olæ cui no gwxa na' cui no bi'i che' zo par æggažæ'e."

³⁰ Ca na' yesæ'ænablaže'e yesæ'æbižæ ya'a ca' par çhenæn' lega'aque', yesæ'ænablaže'e æca'a bdiñj gotæn' lega'aque'.

³¹ Ša so'ot beñæ' nada' len cui bi xtołæ'a de, inaquæchxe so'one' len le'e nacle beñæ' güen de'e malæn'!

³² Na' leczæ gosæ'æche'e çhopæ beñæ' güen de'e malæn' par boso'ode'e lega'aque' le'e yag corozæn' can' gwso'one' len Jeso'osæn'.

³³ Na' catæ' besæ'æžine' latjæ ganæ' nzi' "Yichj Beñæ' Guat", boso'ode'e Jeso'osæn' le'e yag corozæn', na' leczæ boso'ode'e beñæ' mal ca' çhopæ le'e yag corozæn' len le'. Toe' gwda' cuit Jeso'osæn' liča na' yetoe' cuite' yeglæ.

³⁴ Na' Jeso'osæn' gwne': —Xa, bezi'ixen che yoguæ' beñæ' quinga çhasæ'ægue'i nada', la' caguæ zjænezene' bin' chso'one'ena'.

Na' gwso'one' xala'ane'ena' rif par bosyo'ole'en.

³⁵ Na' beñæ' zan gosæ'æzeche' na' besyæ'æyate'ene'. Na' beñæ' gwnabia' çhega'aque' ca' gwso'onene' borl, çhasæ'æne': —Yeziqua'æchlæ beñæ' bosle'. Ša de'e li naque' Cristæn' ben' gwlej Diozæn' par gaquælene' nasyon çhechon', žbixchen' cui chosla cuine'?

³⁶ Nach soldad ca' leczæ gwso'onene' borl gosæ'æbigue'e gałæ'æzæ gan' zo yag corozæn' na' boso'onežjue'ene' binagr.

³⁷ Nach gwse'ene': —Ša len' naco' Rei che beñæ' Izraelæn', bosla cuino'.

³⁸ Na' yichj yag coroz che'ena' gwzo to de'en nyojan ca de'en bcuiš le', na' nan: "Bengan' Rei che beñæ' Izrael ca'." Na' byojæn dižæ' griego, dižæ' latin na' dižæ' ebreo.

³⁹ To beñæ' mal ben' da' le'e yag corozæn' cuit Jeso'osæn' leczæ gwzi'ichiže'ene', gože'ene': —Ša len' naco' ben' gwlej Diozæn' par gaquælene' nasyon çhechon', bosla cuino' na' leczæ bosla neto'.

⁴⁰ Pero na' ben' yeto gwdilæ' le' gože'ene': —žEbito chžebo' Diozæn'? len badacho le'e yag corozæn' par gatcho.

⁴¹ Na' de'en gatcho naquan' liča, çhedæ' na'a chzi'icho castigw che xtołæ'æchon' laogüe naccho beñæ' güen de'e malæn'. Pero benga bitobi dolæ' nape'.

⁴² Nach gože' Jeso'osæn': —Jeso'os, žjasa'alažæ'æšgo' nada' catæ' æžin ža nabi'o.

⁴³ Na' gož Jeso'osæn' le': —De'e li æchnia' le', neža soczo' len nada' gan' zo Diozæn'.

Can' goquæ catæ'æn got Jeso'osæn'

⁴⁴ Na' catæ' bžin do gobiz goc žçhol doxen lao yežlyon' xte do cheda šonæ.

⁴⁵ Bito bse'eni' bgüižæn'. Na' ca naquæ lachæ'æn de'en ze lo'o yo'odao' æblaonæ' gwcheza gwçholen xte goquan' çhopla.

⁴⁶ Nach Jeso'osæn' bisye'e gwne': —Xa, chon cuina' lao na'o. Bezi' spirit çhi'ana'.

Na' beyož gwne' ca' gote'.

⁴⁷ Na' catæ' ble'i capitan che soldad ca' de'e quinga, be'elaogüe'e Diozæn' na' gwne': —De'e ličæ benga naque' beñæ' zda liča.

⁴⁸ Na' beñæ' zan besæ'æžag par besæ'æle'ine' can' chac. Na' yoguæ'æłole' catæ' babesæ'æle'ine'en jæya'aque' gosæ'æbažæ' lcho'oga'aque'ena'.

⁴⁹ Na' yoguæ' beñæ' ca' gwso'ombia' Jeso'osæn' na' zjælen no'olæ ca' jæsæ'ænao le' catæ'æn beze'e Galilean' gosæ'æzeche' zitæ'ælæ besæ'æle'ine' de'e ca' goquan'.

Bosæ'æcuaše'e Jeso'osæn'

⁵⁰ Na' zo to beñæ' lao' syoda Arimatea gan' mbane Jodean' na' le' Jwse. Naque' txen len beñæ' ca' chesæ'ænabia' lao beñæ' Izrael ca'. Jwsen' naque' to beñæ' güen, beñæ' zda liča.

⁵¹ Gwzoe' lez æžin ža selæ' Diozæn' beñæ' nabi'e nasyon Izraelæn'. Bito bene' txen len beñæ' ca' catæ'æn gosæ'æçhoglaogüe'en so'ote' Jeso'osæn'.

⁵² Be'ena' gwyeye' lao Pilatən' na' gwñabe' cuerp che Jeso'osən'.

⁵³ Na' beletje'ene' le'e yag corozən' na' blaže'ene' to lachə' na' gwlo'ene' to lo'o bloj ba. Na' naquən to ba cobə ga cuiczə no no ñe'e šo'o.

⁵⁴ Na' goc de'e quinga žan' catə'ən chso'eni'e che lñi pascon', na' babžin or par so'omba'ane' ža dezcanžən'.

⁵⁵ Na' no'ol ca' za'ac len Jeso'osən' Galilean' jəsə'ənaogüe' Jwsen' par besə'əle'ine' ba che Jeso'osən' na' can' gwxa cuerp che'ena'.

⁵⁶ Nach besa'aque' na' jəsyə'əyənšaogüe' e to de'en chlə' žix de'en none' len mirra na' aloes. Na' ža dezcanžən' gwso'one' dezcanž segon can' na' lein'.

24

Jeso'osən' bebane' ladjo beñə' guat ca'

¹ Na' bal dmiğw no'olə ca' ja'aque' cho'a bloj ban' de'e yoblə na' gwso'oxe'e de'e ca' bagwso'onšaogüe'e de'e chlə' žix.

² Na' catə' besə'əžine'ena' besə'əle'ine' bitoch bi yejan' da' cho'a ban'.

³ Na' gwso'e lo'o blojan' na' bito besyə'əželene' cuerp che Xancho Jeso'osən'.

⁴ Lao chsa'aque'ne' tolə che de'e quinga, besə'əle'ine' čhopə beñə' žjəzecha cuitga'aque'ena' na' žjənyaze' lachə' de'e chactitčgua.

⁵⁻⁶ Na' no'ol ca' besə'əžebe' na' besə'əčhequə' yichjga'aque'ena' besə'əgüe' lao yolə. Nach gwse' beñə' ca' no'ol ca': —žBixčhen' cheyilje Jeso'osən' nga gan' bgaše'e? Notoch no nla' nga. Babebane' ladjo beñə' guat ca' na' mbancze'. Ležjsa'alažə' can' gwne' catə' ñezole Galilean'.

⁷ Gwne' de que le' naque' ben' bselə' Diožən' golje' beñəčh na' cheyalə' gague' lao na' beñə' mal ca' na' so'ote' le' yoso'ode'ene' le'e yag corozən', na' yeyon ža yebane' ladjo beñə' guat ca'.

⁸ Na' no'ol ca' jəsyə'ezalaže'e de que gwne' ca'.

⁹ Na' besyə'əsa'aque' cho'a ban' na' jəsyə'ədixjue'ine' apostol ca' šnej na' len yeziquə'əchlə beñə' ca' nitə' txeñ len lega'aque' yoguə' de'e ca'.

¹⁰ Na' beñə' ca' jəsyə'ədixjue'ine' apostol ca' žjənaque' beñə' quinga: Maria beñə' Magdala, na' Xguan, na' Maria xna' Jacob, na' len yebalə no'olə.

¹¹ Na' apostol ca' bito gwse'ejle'e che no'ol ca', gwsa'aque'ne' con chesə'ənaze'ena'.

¹² Pero na' Bedən' le'e gwzechadote' na' gwsa'adoe' bžine' cho'a ban' na' bcheque'e na' ble'ine' lachə' ca' žjachi' in lao yon', na' beze'e bebančgüeine' che de'e ca' ble'ine'.

Blo'elao Jeso'osən' čhopə disipl čhe' ca' lao zja'aque' Emaus

¹³ Na' leczə ža dmiğw na' ana' čhopə disiplən' ja'aque' yež de'e nzi' Emaus, do šnej kilometros zita' par Jerosalennə'.

¹⁴ Na' boso'ošile' entr lega'aque' che yoguə' de'e ca' bagoquan'.

¹⁵ Na' ñechso'one' xbab na' ñechso'ete' dižə' che de'e ca' catə' Jeso'osən' bgüigue'e len lega'aque' na' gwza'alene' lega'aque' txeñ.

¹⁶ Pero bito gwsa'ache'ine' noxan' zdalen lega'aque'.

¹⁷ Nach gože' lega'aque': —žBi dižə'ən cho'ele entr le'e lao ngo'ole nezən'? žBixčhen' za'acchguale trist?

¹⁸ Na' toe' ben' le' Cleofas boži'e xtize'en gože'ene': —žNacxa chactguan' bagwza'o Jerosalennə' na' cuiñə' gacbe'ido' de'e ca' ze'e goc lao syodan'? žEde'en naco' beñə' zita' ža?

¹⁹ Na' gože' lega'aque': —žBi goquan' nale ca'?

Nach gwse'ene': —De'en goc che Jeso'os beñə' Nasaret. Goque' profet, na' Diožən' len beñəčən' besyə'əbeine' le' can' blo'e yelə' guac che'ena' na' can' be'e dižə'əna'.

²⁰ Pero na' bxož əblao četo' ca' len beñə' gwnabia' četo' ca' gwso'one'ene' lao na' beñə' ca' na' gosə'əčhoglaogüe'en che' de que cheyalə' gate', na' boso'ode'ene' le'e yag corozən'.

²¹ Bachac šonə ža ña'a goc de'e quinga. Na' len neto' gwzoto' lez de que Diož nan' bselə'ene' par yebeje' nasyon četo'ona' xni'a beñə' zita'.

²² Na' no'ol ca' žjənaquə txeñ len neto' balə' gwso'e dižə' de'en chebaneto'. ja'aque' cho'a ban' be'i,

²³ na' bito besyə'əželene' cuerp che'ena'. Catə' besyə'əla'aque' gosə'əne' de que besə'əle'idaogüe'ene' angl ca' beñə' gwse'e lega'aque' de que babebane' ladjo beñə' guat ca'.

²⁴ Na' leczə to čhopə beñə' byo beñə' ca' žjənaquə txeñ len neto' ja'aque' cho'a ban' na' besə'əle'ine' cayanə'ən gosə'əna no'ol ca' naquə, pero bito besə'əle'ine' Jeso'osən'.

²⁵ Na' gož Jeso'osən' lega'aque': —žProb le'e! Cui chejni'ile na' cui chejle'ele yoguə' de'en boso'ozoj profet ca'.

²⁶ Benən byen Crist ben' gwlej Diožən' par gaqualene' beñəčən' gwxaquə'əzi'e yoguə' de'e quinga bagoc, pero na' de'e yoblə yezi'e yelə' chnabia' che'ena' len yelə' bala'an che'ena'.

27 Na' be'e dižə' len lega'aque' gwzolaoteque' len de'en bzoj de'e Moizezən' na' len de'en bosə'ozojo profet ca' yelə', nach bsd blo'ine' lega'aque' yoguə' de'en nyoj che'ena' le'e Xtižə' Diozən'.

28 Na' besə'əžine' galə'əza yežən' gan' zja'aque'. Na' Jeso'osən' bene' ca' šejəche' delant.

29 Pero beṇə' ca' gwso'one' byen yega'aṇe' len lega'aque', gwse'ene': —Yega'aṇczo' len neto' čhedə' bachexjw že'ena' na' bagwde or par šejəcho'.

Na' gwyo'e par yega'aṇlene' lega'aque'.

30 Na' lao zjachi'e cho'a mesən' txen, Jeso'osən' gwxi'e yetxtilən' na' be'e yelə' choxcwlen che Diozən', na' bzoxje'en na' bnežjue'en lega'aque'.

31 Cana'ach besyə'əyacbe'ine' de que le'ena', na' lao ne'e nite'e ca' benitlaogüe'.

32 Nach gwse'e lježjga'aque': —Lechgualə bebei la'azda'ochon' catə' be'elene' chio'o dižə' tnežən' na' cuaselol bsd blo'ine' chio'o can' nyojən che' le'e Xtižə' Diozən'.

33 Na' lao or na'atezə' le'e besyə'əsa'acte' jəya'aque' Jerosalennə', na' besyə'əžine' gan' zjəndopə zjənžag apostol ca' šnej len beṇə' ca' yelə'.

34 Na' beṇə' šnej ca' gwse'e beṇə' ca' ze'e besyə'əžin: —De'e liczə babeban Xančhon'. Bablo'elaogüe' Simonnə'.

35 Nach beṇə' ca' čhopə gwse'e lega'aque' de'en goquə lao zjəngüe'e nezən', na' gwse'e lega'aque' de que besyə'əyacbe'ine' de que le'ena' lao bzoxje' yetxtilən' par sa'ogüe'en.

Jeso'osən' blo'elaogüe' disipl che' ca'

36 Na' ca ne'e chso'ete' dižə' catə'əczla gwzecha Jeso'osən' gwcholga'aque'ena' nach gože' lega'aque': —Leso binlo len xbab de'en yo'o lo'o yičhja'azda'olen'.

37 Pero na' lechgualə besə'əžebe' na' besyə'əbanene' čhedə' gwsa'aque' de que chesə'əle'ida'ogüe'ene' de'e beṇə' guat na'anə'.

38 Nach Jeso'osən' gože' lega'aque': —čBixčhen' chaquəle tolə? na' čbixčhen' chonle xbabən' ca' lo'o yičhja'azda'olen'?

39 Le'e ggüiašč ni'a na'a quinga par nič ənezele de que nada'anə'. Le'e can nada' par nič ənezele. Žalə' naca' beṇə' guat bito naquə žit belə' čhia' ca de'e nga chle'ile nga.

40 Nach lao gwne' ca', blo'ine' lega'aque' ni'a ne'e ca'.

41 Na' ca naquə bitonə' se'ejele'e tant chesyə'əbanene' na' tant chesyə'əbeine', Jeso'osən' gože' lega'aque': —čEde lata' de'e gaogua'?

42 Nach bosə'ənežjue'ene' lata' bel' ya'a gaogüe', nach bosə'ənežjue'ene' to pedas čixə' bia ser de'en yožə š'i'imb.

43 Gwxi'en na' gwdaogüe'en laoga'aque'.

44 Nach gože' lega'aque': —Bagwni'a le'e catə'ən nezolena' le'e de que cheyalə' gaquə yoguə'əloj de'e ca' zjənyoj čhia' le'e lei de'en bzoj de'e Moizezən', na' le'e libr de'en bosə'ozojo de'e profet ca', na' leczə ca' le'e libr gan' žia Salmos ca'. Na' de'e ca' zjənyoj čhia' bach goquən n'a.

45 Nach ben Jeso'osən' par nič gwse'ejni'ine' de'e ca' zjənyojən che' le'e Xtižə' Diozən'.

46 Na' gože' lega'aque': —Benən byen goc can' nyojən de que nada' gata' na' yebana' ladjo beṇə' guat ca' yeyon ža, nadan' naca' ben' gwlej Diozən' par gaquələna' beṇə'čən'.

47 Na' le'e cheyalə' güe'ele xtižə'anə' len beṇə' ža' yoguə' nasyon, na' solaoteclə güe'elen Jerosalennə'. Güe'ele xtižə'anə' de que cheyalə' yesyə'ədinje beṇə'čən' xtolə'əga'aque'ena' par nič Diozən' yezi'ixene' čhega'aque'.

48 Na' le'e nacle testigw na' güe'ele dižə' che de'e quinga bable'ile de'en bagoc čhia'.

49 Na' leczə əselə'a Spirit che Xa' Diozən' yedəson len le'e can' bene' lyebe. Na' le'e yega'aṇ lao' syoda nga xte catə' Xa' Diozən' goṇe' le'e yelə' guac de'en za' yoban'.

Beyep Jeso'osən' yoban'

50 Na' Jeso'osən' gwche'e lega'aque' ja'aque' gan' nzi' Betania, na' gwlis ne'e ca' gwṇabene' Diozən' gone' par nič nite'e mbalaz.

51 Na' goquən' beyož gwṇabe'en, Diozən' bezi' beque'ene' yobanə'.

52 Na' disipl ca' besyə'əga'aṇe' gwso'elaogüe'e Jeso'osən' yešlož dao' na' jəya'aque' Jerosalennə' chesyə'əbeine' xte juisy.

53 Nach gwnitə'ətezə gwnite'e lo'o yo'oda'ə' əblaonə' chso'elaogüe'e Diozən'.

De'e na'azan' chzoja' n'a.

Dižə' Güen Dižə' Cobə De'en Bzoj San Juannə'

Ben' naquə Xtižə' Diozən' golje' goque' beṇačh

¹ Catə' gwxe yežlyonə' bazoczə ben' naquə Dižə'anə'. Zoe' len Diozən' na' ben' naquə Dižə'anə' leczə naque' Dioz.

² Dezd nechte zoe' len Diozən'.

³ Na' Diozən' bene' par ničh ben' naquə Dižə'an bene' yoguə'əloj beṇačh, angl, bia chsa'aš, na' yeziqwa'əchlə de'e zjəde. Bitobi bi de de'e gwxe de'e gwzil de'e cui ben le'.

⁴ Le' nse'e yełə' mban zejlicane. Na' beṇə' ca' zjənapə' yełə' mban zejlicane, yo'o be'eni' lo'o yichjla'ažda'oga'aque'enə'.

⁵ Na' ben' naquə Dižə'anə' nse'e be'eni' par yichjla'aždao' beṇačhən'. Na' la'anə'əczə chacchgua de'e malən' yežlyo nga gan' ble'enə', de'e malən' bito chgapə'an be'eni' che'enə'.

⁶ Diozən' bsele'e to beṇə' le' Juan.

⁷ Bide' bedəye'e dižə' che ben' nsa' be'eni'inə' par ničh yoguə'əloj beṇačhən' guaquə so'onliłaže'e ben' nsa' be'eni'inə' catə' se'enene' xtižə' Juannə'.

⁸ Caguə Juan na'anə' nse'e be'eni'inə', sino bide' bedəye'e dižə' che ben' nsa' be'eni' par beṇačhən'.

⁹ Babžin ža bla' be'eni' che Diozən' yežlyo nga par šo'on lo'o yichjla'aždao' beṇačhən', na' chse'eni'in len notə'əteze'.

¹⁰ Ben' naquə Dižə'anə' gwzoe' yežlyon'. Na' la'anə'əczə len' bene' yežlyon', beṇə' ca' ža' yežlyon' bito gwsa'acbe'ine' non' naque'.

¹¹ Golje' entr neto' naquəto' beṇə' ṇasyon che'enə', na' casi yoguə' neto' naquəto' beṇə' ṇasyon che' bito gwyejle'eto' che'.

¹² Con beṇə' chse'ejle'e che', beṇə' chso'onliłaže'ene', chone' par ničh zjənaque' xi'in' Dioz.

¹³ Zjənaque' xi'ine' caguə' por ni che gwsa'alje' zjənaque' beṇə' belə' chen, na' caguə' por ni che de'en gwzelažə' beṇə' byon' na' no'olə', na' caguə' por ni che gone'e beṇə' byon' so xi'ine'. Dioz nan' bene' xi'ine' lega'aque'.

¹⁴ Na' ben' naquə Dižə'anə' golje' goque' beṇačh na' gwzoe' len neto'. Ble'ito'one' na' gocbe'ito' de que naque' le'ezelaogüe beṇə' zaque'e la' len' naque' Xi'in' tlišə' Xacho Diozən'. Lechguale nži'ilaže'e beṇačhən' na' chzejni'ine' beṇačhən' yoguə'əloj dižə' li che Diozən'.

¹⁵ Juannə' bzejni'ine' che' gwne': —Che be'ena'anə' babi'a dižə' gwnia' de que ben' ze'e ačhoj zakuə'ache' ca nada', chedə' bazoczə le'enə' antslə ze'e soa' nada'.

¹⁶ Na' Xi'in' Diozən' laogüe de'en lechguale nži'ilaže'e chio'o, zotezə zoe' chaclenchgüe' yoguə' chio'o chonliłaže'əchone'.

¹⁷ De'e Moisezən' bzejni'ine' de'e xaxtao' neto' beṇə' Izrael lei che Diozən', na' Jesocristən' bedəlo'e de que nži'ilažə' Diozən' chio'o beṇačh na' chzejni'ine' chio'o yoguə'əloj dižə' li che Diozən'.

¹⁸ Ni to cui nonə' le'i Diozən'. Xi'ine' tlišə'anə' ben' chaquene' chei babzejni'iczene' beṇačhən' can' naquə yichjla'aždao' Diozən'.

Juan ben' bchoa beṇə' nis be'e dižə' che Jeso'osən'

¹⁹ Beṇə' blao che ṇasyon Izrael cheto'on ža' Jerosalennə' bososele'e bałə bχoz lao ben' le Juan len yebałə beṇə' gwsa'aljə lao dia che de'e Lebi beṇə' zjəyo'o lao na'aga'aque' so'one' mendad lo'o yo'odao' əblao che neto' beṇə' Izrael. Bososele'e beṇə' ca' lao Juannə' par ničh gosə'ənezene' non' naque'.

²⁰ Na' gože' lega'aque' clar: —Caguə nandan' Cristən' ben' naquən əselə' Diozən' par gaquəlene' ṇasyon che chio'o beṇə' Izraelən'.

²¹ Na' gwse'ene': —¿Noxa le' ža? žəšə len' Liazən' ben' be' xtižə' Diozən' cana'?

Na' gože' lega'aque': —Caguə nada'anə'.

Nach gosə'əze'ene': —¿Ešə len' ben' naquən yidə par güe'elene' neto' xtižə' Diozən'?

Na' boži'en gwne': —Bitoczə.

²² Nach gwse'ene': —¿Noxacə le'? ničh žjəyeyežto' beṇə' ca' bososelə' neto'. ¿Bi natgo' che cuino'?

²³ Nach gože' lega'aque': —Nada' naca' ben' chne' zizjo latjə dašən', əṇia': “Le'eyoša' yichjla'ažda'olen' par ničh əgwzenagle che Xančon' cata'an yide'enə'”, can' gwna de'e profet Isaiazən' ben' be' xtižə' Diozən' cana'.

²⁴ Na' beṇə' ca' ja'ac lao Juannə' bososelə' beṇə' fariseo ca' lega'aque'.

²⁵ Na' gwse'ene': —¿Bixchen' chcho' beṇə' nis šə cui naco' Cristən', na' šə cui naco' Liazən' na' šə ni ben' naquən yidə par güe'elene' neto' xtižə' Diozən'?

²⁶ Na' Juannə' boži'e xtižə'əga'aque'enə' gože': —Nada' chčhoa' beṇə' nis, pero na' entr'le'e zo to beṇə' cui nombi'ale.

²⁷ Be'enə' ze'e əchoje' na' zaquə'əche' ca nada' na' bito zaca'a par gaca' xmose'.

²⁸ Yoguə' de'e quinga goquan yež de'en nzi' Betabara. Na' yežən' chi'in yešla'alə yao Jordannə' gan' chčhoa' Juannə' beṇə' nis.

Jeso'osən' gwxaquə'əlebene' ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə'

²⁹ Beteyo ble'i Juannə' za' Jeso'osən' gan' zoe'enə' na' gože' neto' ža'ato'onə': —Le'e gūiašč nga za' ben' bselə' Diozən' ben' gwxaquə'əlebe ca xilə' dao' bia ca' chotcho par chnitlao xtolə'əchon'. Le'enə' yeque'e xtolə' beṇə'əchon' con beṇə' so'onližə' le'.

³⁰ Che bengan' bi'a dižə' catə'an gwnia' de que ben' ze'e əchoj zaquə'əche' ca nada', čhedə' bazoczə le'enə' antslə ze'e soa' nada'.

³¹ Bito gocbe'ida' nada' cate non' naque'. Pero ŋa'a za'a chčhoa' beṇə' nis par nič yeziquə'əchlə beṇə' Izrael sa'acbe'ine' non' naque'.

³² Na' Juannə' be'eche' dižə' che Jeso'osən' gwne': —Spirit che Diozən' de'en zo yoban' len Diozən' ble'ida' betjən ca to ngolbexə na' bžinən gwzon len Jeso'osən'.

³³ Bito gocbe'ida' nada' non' naque' žalə' que Diozən' ben' bselə' nada' par chčhoa' beṇə' nis gwne' nada': “Le'ido' yetj Spirit chia'anə' gan' zo ben' gon ca so Spirit chia'anə' lo'o yičjla'ažda'olen' na' nabi'an le'e. Na' catə' əžin Spirit chia'anə' gan' zo be'enə', son len le'.”

³⁴ Nada' bable'ida' goc can' gwne'enə' na' cho'a dižə' de que bengan' Xi'in Diozən'.

Beṇə' ca' gosə'ənaogüe' Jeso'osən' de'e neche

³⁵ Ža beteyo zecha Juannə' len čopə neto' disipl' che'.

³⁶ Na' ble'ine' gwde Jeso'osən', na' gože' neto': —Le'e ggūiašč na' zda ben' bselə' Diozən' ben' gwxaquə'əlebe ca xilə' dao' bia ca' chotcho par chnitlao xtolə'əchon'.

³⁷ Na' čopte neto' gože' ca' jenaoto' Jeso'osən'.

³⁸ Na' beyečj Jeso'osən' na' ble'ine' banaoto'one'. Na' gože' neto': —čBixchen' naole nada'?

Na' gožto'one': —Maestr, čga zo'?

³⁹ Nach gože' neto': —Le'e šo'o na' le'ile.

Na' gwyejleno'one' na' ble'ito' gan' zoe'enə', na' bega'anleno'one' do yeto čop or, čhedə' ca orən' banaquə ca do cheda tap.

⁴⁰ Nada' lena' Ndreš beṇə' bišə' Simon Bedən' beneto' dižə' de'en be' Juannə' na' gwnaoto' Jeso'osən'.

⁴¹ Na' Ndrešən' antslə ze'e gone' bichlə jəyeni'e Simon biše'enə' na' gože'ene': —Babežaglaoto' Mesiasən'—, zeje dižə' Cristən' ben' gwlej Diozən' par gaquəlene' nasyon Izrael četon'.

⁴² Nach Ndrešən' gwče'e Simon biše'enə' gan' zo Jeso'osən'. Na' lao čgūia Jeso'osən' le' gože'ene': —Len' Simon xi'in Jonas. Pero yesə'əsi' beṇə' le' Sefas—, zeje dižə' Bed.

Jeso'osən' gwleje' Lipən' na' Natanaelən' par əžja'aclene' le'

⁴³ Beteyo Jeso'osən' gwchoglaogüe'en yeyeje' Galilean', na' bežague' Lipən' na' gože'ene': —Yo'o len nada'.

⁴⁴ Lipən' naque' beṇə' Betsaida, laž Ndrešən' na' laž Bedən'.

⁴⁵ Nach Lipən' bežague' Natanaelən' na' gože'ene': —Babežaglaoto' ben' bzoj Moizežən' xtiže'e le'e libr ca' gan' leczə bzoje' lein', na' che leczə'en boso'ozoj beṇə' ca' gwso'e xtižə' Diozən' cana'. Len' Jeso'osən' beṇə' Nasaret, xi'in Jwsen'.

⁴⁶ Na' gož Natanaelən' le': —čBat benecho Nasaret na' əchoj beṇə' güen?

Na' gož Lipən' le': —Yo'o nič əneždo'.

⁴⁷ Na' catə' Jeso'osən' ble'ine' bachžin Natanaelən' baozə, gwne' che': —Na' za' to beṇə' Izrael gwlaž čecho ben' naquə beṇə' güen, na' ni latə'əzə cui naque' beṇə' goxoayag.

⁴⁸ Na' gož Natanaelən' le': —čNac chac nombi'o nada'?

Na' Jeso'osən' gože'ene': —Antslə ze'e əne' Lipən' le', catə'an zecha'o xan yag yixgüionə', ble'ida' le'.

⁴⁹ Nach Natanaelən' gože'ene': —Maestr, len' naco' Xi'in Dioz. Len' naco' Rei ben' chbezəto' yedəṇabia' neto' beṇə' Izrael.

⁵⁰ Na' Jeso'osən' gože'ene': —čEpor ni che de'en gwnia' de que ble'ida' le' xan yag yixgüion' čejji'o de que Diozən' gwleje' nada' par gaquəlena' nasyon čechon' ža? De'e zaquə'əche ca de'e nga ze'e za'ac.

⁵¹ Nach Jeso'osən' gože'e neto': —De'e li əchnia' le'e, le'ixexeje yoban' gan' zo Diozən' na' angl' che' ca' əse'ep se'etje' yežlyo nga gan' zoa', la' Dioz nan' bselə'e nada' golja' beṇə'.

2

Got'a to yelə' gošagna' yež de'en nzi' Cana

¹ Gwde šonə ža nach got'a to yelə' gošagna' yež de'enə' nzi' Cana distrit che Galilea, na' gwyej xna' Jeso'osən'.

² Na' leczə gwsa'axe' Jeso'osən' len neto' disipl che' nič gwyejto' gan' chac yelə' gošagna'anə'.

³ Na' caguə goque binon' par əse'ej yoguə' beŋə' ca' ža'anə'. Nach xna' Jeso'osən' gože'ene': —Bito bi bino dech chega'aque'.

⁴ Na' gož Jeso'osən' le': —Nagüe, žbixčhen' chi'o nada' ca'? Ze'e əžin or gaquəlena' beŋə' quinga.

⁵ Na' xne'enə' gože' beŋə' ca' chso'on mendadən': —Le'e gon bitə'ətezə de'e əŋe'.

⁶ Na' nitə' xop yej ga chož nis. Yej ca' zjanac ca' choso'ochin beŋə' Izrael gwlaž četo' ca' par chsa'a chəsə'əyib cuinga'aque' segon can' na lei četo'ona'. Na' to to yej ca' chožən do xon' che'e o do ši che'e nisən'.

⁷ Na' gož Jeso'osən' beŋə' güen mendad ca': —Le'e yosša' yej ca' nisən'.

⁸ Na' gosə'əgue'en xte ca gosə'əža'an.

⁹ Nach gože'e lega'aque': —Le'e gašə' latə'an na'a, na' le'e žžənežjon' be'en chgüe'ej chguaon'. Nach gwsa'aše'en jəsə'ənežjue'en be'en chgüe'ej chguaon'.

¹⁰ Na' bnix be'en nisən' banaquən bino, pero bito gwnezene' ga gwza'annə', con beŋə' ca' gwsa'ašə' len na' zjəneze. Nach goxe' ben' chšagna'anə'.

¹¹ Na' gože'ene': —Yoguə' beŋə' chdie' zgua'atec bino šao', na' catə' beŋə' ca' ža'anə' bazjəne'ejə' zilən', nach cho'e lega'aque' de'e corrient. Pero na' le' bzago'o bino šao' nga xte ŋa'ach.

¹² De'e nga ben Jeso'osən' Cana distrit che Galilean' goquən miłagr nech de'en bene' par blo'e de que nse'e yelə' guac che Diozən'. Na' neto' disipl che' beŋilažə'əto'one'.

¹³ Gwde na' gwyejto' Capernaum len le' na' len xne'enə' na' beŋə' biše'e ca'. Na' jəsoto' na' to čhopə šonə ža.

Jeso'osən' bebeje' beŋə' ca' chso'on ya'a chyo'o yo'odao' əblaonə'

¹⁴ Na' bazon galə' lni pascw che neto' beŋə' Izrael catə'an gwyejto' len Jeso'osən' Jerosalenna'.

¹⁵ Cats' bžinto' chyo'o yo'odao' əblao che neto' beŋə' Izrael na' ža' beŋə' chəsyə'əyotə' go'on na' xilə' na' ngolbexə, na' len beŋə' ca' zjəchi' choso'oše'e mech.

¹⁶ Nach Jeso'osən' bene' to sot de do na' bebeje' yoguə'əlo beŋə' ca' ža' chyo'o che yo'odao' əblaonə' len xilə' ca', len go'on ca'. Na' beslase' xmech beŋə' goša' mech ca', na' gwlo'on'ane'e mes chega'aque' ca'.

¹⁷ Na' gože' beŋə' ca' chso'otə' ngolbexən': —Le'e yebej yoguə'əlo bia quinga nga. Cui gonle ya'a nga liž Xa'anə'.

¹⁸ Nach jəyeza'alazə' neto' disipl che' can' nyoj Xtižə' Diozən' gan' nan: “De'e tant chi' yichja' che ližo'onə' xte cheyožlaža'a.”

¹⁹ Na' beŋə' ca' zjənaquə beŋə' blao che nasyon Izrael četo'on ža'anə' gwse'ene': —ŽBi yelə' guac əgwlo'ido' neto'onə' par nič ənezeto' šə napo' yelə' gwnabia' par bebejo' beŋə' ca'?

²⁰ Na' Jeso'osən' gože' lega'aque': —Le'e yočhinj yo'odao' nga na' šonə žazə yeyona'an.

²¹ Nach beŋə' blao ca' gwse'ene': —Xopeyon iz gwso'one' yo'odao' nga, žəna' le' yeyono'on šonə žazə?

²² Pero Jeso'osən' gwne' ca' che cuerp che'enə', chsa' aquə'əlebene'en ca yo'oda'onə'.

²³ Nach catə' bžin ža bebane' ladjo beŋə' guat ca', neto' disipl che' jəyeza'alazə'əto' can' gwne'enə'. Na' gwyejle'eto' can' na Xtižə' Diozən' de'en nyojən de que Jeso'osən' yebane' ladjo beŋə' guat ca', na' leczə gwyejle'eto' de'en gože' neto'.

Jeso'osən' nezene' bin' yo'o lo'o yichjla'aždao' beŋəčan'

²⁴ Žlac gwzo Jeso'osən' Jerosalenna' lao lni pascon', beŋə' zan gwso'onjilaže'ene' catə' besə'ale'ine' miłagr ca' de'en bene'.

²⁵ Pero na' Jeso'osən' bito ben cuine' lao na' beŋə' ca' čhedə' bəneze nle'ine' yichjla'aždao' beŋəčan'.

²⁶ Na' bito byažjene' no əgwzejni'i le' can' naquə yichjla'aždao' beŋəčan' čhedə' le' nezene' bin' yo'o lo'o yichjla'aždao' to toe'.

3

Jeso'osən' na' ben' le' Nicodemo

¹ Na' zo to beŋə' fariseo ben' le' Nicodemo. Na' naque' beŋə' blao che nasyon Izrael četon'.

² Nicodemon' gwyeje' lao Jeso'osən' še'elə na' gože'ene': —Maestr, ñezetə' de que Diozən' bsele'e le' par chzejni'ido' neto', chedə' la' notono no chac gon ca naquə mīlagr ca' chono' šə cui zo Diozən' len le'.

³ Na' gož Jeso'osən' le': —De'e li əchnia' le' šə non' cui galjə yeto bito gaquə soe' ca ñabia' Diozən' le'.

⁴ Nach gož Nicodemon' le': —¿Nacxa gon to beñə' galje' šə banaque' beñə' golə? ¿Eguaquəch yeyo'e lo'o le'e xne'e na' galje' yeto?

⁵ Nach gož Jeso'osən' le': —De'e li əchnia' le', šə non' cui galjə len nis na' len Spirit che Diozən', bito gaquə soe' ca ñabia' Diozən' le'.

⁶ Beñə' zjənaque' belə' chen chəsə'əzan chəsə'əbeque' xi'ingə'aque' leczə bi'i belə' chen. Beñə' ca' chon Spirit che Diozən' par niç chsa'alje', Spiritən' chnezjən legə'aque' yelə' mban zejlicane.

⁷ Bito yebando' can' gwnia' le' de que chonən byen galjə yoguə'əle yeto.

⁸ Ca naquə be'enə' de'en cheçj, gatə'ətezə chene'en cheçjən, na' chendo' cholən, na' nic ñezdo' gaxa za'anə' na' nic ñezdo' gaxa šejənə'. Can' naquən che yoguə'əlo' beñə' chon Spirit che Diozən' par niç chsa'alje'.

⁹ Nach Nicodemon' gože'ene': —¿Nacxa chactguan' par chac can' na'onə'?

¹⁰ Na' Jeso'osən' gože'ene': —Le' naco' beñə' blao entr beñə' ca' choso'osed choso'olo'i beñə' Izrael gwlaž checho ca' xtižə' Diozən', zəna' cui chejni'ido' de'e ngan'?

¹¹ De'e li əchnia' le', de'e ñezetə'onə' chyixjue'eto' na' de'e bable'ito'onə' cho'eto' dižə' çhei, na' cui chzenagle.

¹² De'en chac yežlyo ngan' bagwnia' le'e na' cui chejle'ele. ¿Nacxa gaquən' šejle'ele šə nia' le'e de'en chac yoban'?

¹³ Ni to beñə' cui zo yežlyo nga beñə' babeyep yoban' par ñezene' can' chac yoban'. Pero ca naca' nada' ža, gwzoa' yoban' len Diozən' na' bsele'e nada' yežlyo nga par golja' beñəçh, na' zotezə zoa' len Diozən' ben' zo yoban'. De'e na'anə' ñezda' can' chac yoban'.

¹⁴ Na' can' gwli'e Moizezan' be' de bronsən' to le'e yag latjə dašən', can' cheyałə' yesə'əlise' nada' to le'e yag, nadan' bsələ' Diozən' golja' b'enəçh.

¹⁵ Na' gaquə çhia' ca' par niç nota'ətezə beñə' gonlilažə' nada' bito cuiayi'e, sino gatə' yelə' mban zejlican' che'.

Chaque Diozən' che beñəçhən'

¹⁶ Leçhualə' chaque Diozən' che chio'o beñəçh na' beñ Xi'ine' tlišə'ənə' par niç na' nota'ətezəch chonlilažə'əchone' bito cuiayi'icho mas de yelə' mban zejlicane checho.

¹⁷ Diozən' bsele'e Xi'inen' yežlyo nga caguə par niç əçhoglaogü'e'en che chio'o beñəçh de que napcho dolə', sino par niç gone' ca cui yeyejcho lao yi' gabilən'.

¹⁸ Chio'o chonlilažə'əcho Xi'in Diozən' bach nchoglaon checho de que bito bi dolə' napcho, pero beñə' cui chso'onlilažə' le' nchoglaon chega'aque' de que zjənapə' dolə' chedə' bito chso'onlilažə'e Xi'in tlišə' Diozən'.

¹⁹ Can' chac, beñə' ca' cui chso'onlilažə' le' banchoglaon chega'aque' de que zjənapə' dolə', por ni che de'en babidə' Xi'in Diozən' yežlyon' nse'e be'eni' par yichjla'aždao' beñəçhən', na' chasyə'əbeichene' de'e žcholən' cle ca be'eni' che'enə' chedə' chso'one' de'e malən'.

²⁰ Beñə' ca' chso'on de'e malən' chəsə'əgue'ine' be'eni' che'enə', na' bito chse'enene' əgwse'eni'in lo'o yichjla'ažda'oga'aque'enə', chedə' bito chse'enene' la'alaon de que de'e malən' chso'one'.

²¹ Caguə ca' chio'o chzenagcho che dižə' li che Diozən' par choncho can' cheyałə' goncho. Chio'o cho'echo latjə chse'eni'in lo'o yichjla'ažda'ochon' chedə' chene'echo goncho ca sa'acbe'i beñə' de que Diozən' chaclene' chio'o len bi de'en chonchon'.

Juan ben' bçhoa beñə' nis be'e dižə' che Jeso'osən' de'e yoblə

²² Gwde na' neto' disipl gwyejto' len Jeso'osən' yež dao' ca' zjəchi' gan' mbane Jodean'. Na' žlac bega'antə'onə' Jeso'osən' bene' par niç neto' bçhoato' beñə' nis.

²³ Na' Juannə' leczə chçhoe' beñə' nis yež de'en nzi' Enon de'en chi' galə'əzə yež Salim, gan' dechgua nis. Na' ja'ac beñə' na' gosə'əchoe' nisən'.

²⁴ Cana' bitonə' gatə' Juannə' ližyan'.

²⁵ Na' gotə' to bzaš entr disipl che Juannə' na' entr yeto çhopə beñə' Izrael gwlaž çheto' ca' che de'en chəsə'əchoe' beñə' nis.

²⁶ Na' disipl che Juannə' ja'aque' laogü'e'enə' na' gwse'ene': —Maestr, ben' gwzo len le' yešla'alə' yao Jordannə', ben' cho'o xtiž'e'e, le' bachçhoe' beñə' nisən' na' yoguə'əzə beñə' chja'ac ga'an zoe'enə'.

²⁷ Nach Juannə' gože' legə'aque': —Notono no əye'elao' šə cui gon Diozən' par niç so'elao' beñə' le'.

²⁸ Le'e ñezele can' bagwnia' de que bito naca' nada' Cristan' ben' bseļə' Diozən' par gaquəlene' nasyon chechon'. Nada' naca' ben' bseļə' Diozən' par cho'a xtižə' Cristan' niç nita' beņə' probnid par yoso'ozenague' che' catə'an yide'enə'.

²⁹ Catə' chəsə'əšagna' beņə', beņə' byo ben' chšagna' le'enə' chzi'e no'olən'. Na' beņə' migw che ben' chšagna'anə', zeche' cuite'enə' chebeichgüeine' chenene' chšil ben' chšagna'anə'. Ca'aczən' chac len nada' ža, lechguəle' chebeida' de'en chso'elao' beņə' Cristan'.

³⁰ La' le'enə' cheyalə' šejəchlə' gaque' beņə' blaο; pero ca naquə nada', šejəchlə' te chia'.

Ben' za' gan' zo Diozən'

³¹ Ca naquə ben' za' gan' zo Diozən', le' naque' blaοch ca notə'ətezəchlə' beņə'. Na' ca naquə notə'ətezəchlə' beņə' ža' yežlyo nga, be'en che yežlyo nga žjənaque' na' xtižə' yežlyo ngan' chso'e. Pero na' ben' za' gan' zo Diozən', le' naque' beņə' blaοch ca notə'ətezəchlə' beņə'.

³² Le' cho'e dižə' che de'en bable'ine' gan' zo Diozən' na' che de'en bābenene' na', na' notono no chzenag xtižə'enə'.

³³ Na' šə non' choso'ozenag xtižə' ben' za' gan' zo Diozən' choso'olo'e de que žjəñeze'ne' Diozən' cho'e dižə' li.

³⁴ Na' Xi'in' Diozən' ben' bseļə'enə' cho'e xtižə' Diozən' chedə' Diozən' chone' par niç zotežə zo Spirit che'enə' len le' dote tyemp.

³⁵ Diozən' chaquene' che Xi'ine'enə' na' babene' ca chejni'ine' yoguə'əloļ par niç le' əgwzejni'ine' beņəchən'.

³⁶ Na' chio'o chonlilažə'əcho Xi'in' Diozən' de yelə' mban zejlicane' checho. Na' beņə' ca' chso'onczə' yichjlaoga'aque' cui chso'onlilažə'ene', bito gatə' yelə' mban zejlicane' chega'aque' sino yesə'azi'e castigw zejlicane'.

4

Jeso'osən' be'e dižə' len to no'olə Samaria

¹ Na' beņə' fariseo ca' gwsa'acbe'ine' de que beņə' zanch jəsə'ənaogüe' Jeso'osən' cle ca Juanna' na' de que beņə' zanch chchoe' nis cle ca Juanna'.

² Pero caguə' cuin Jeso'osən' bchoe' lega'aque' nis sino neto' disipl' che' bcho'ato' beņə' nis.

³ Na' ca naquan' gwneze' Jeso'osən' can' bagwsa'acbe'i beņə' fariseo ca' de que beņə' zan žjəsə'ənao le' nach beza'ato' distrit che Jodean' na' beyejto' distrit che Galilean'.

⁴ Par bežinto' Galilean' bedeto' distrit che Samaria na'alə'.

⁵ Ca' goquən' bežinto' to yež de'e nzi' Sicar distrit che Samarian'. Naquə yežən' galə'əžə len yežlyon' de'en bnežjw de'e Jacoban' de'e xi'ine' Jwsen'.

⁶⁻⁸ Na' žia to pos na' de'e nzi' "Pos che de'e Jacobən'". Jeso'osən' baçh chjxaque'ene' ngüe'e nezən' na' gwch'i'e cho'a posən'. Baçh naquə ca do gobiz'. Na' neto' gwyejto' lao' yežən' par si'ito' de'e gaoto'. Na' bžin to no'olə Samarian' par güe'e nis, na' Jeso'osən' gože'ene': —Doa' lata' nis ye'eja'.

⁹ Na' no'olə Samarian' gože'ene': —¿Nactecxan' le' naco' beņə' Izrael chnabdo' nada' nis ye'ejo'? len no'olə Samaria nada'—. (Ca naquə beņə' Izrael gwlažə' cheto' ca' bito chəsə'əne' beņə' Samaria ca'.)

¹⁰ Na' Jeso'osən' gože'ene': —Žalə' nezdο' de'en chene'e Diozən' goņe' le' na' žalə' chache'ido' non' naca' nada' chapa'a le': "Doa' lata' nis ye'eja'", le' ənabdo'on nada' na' nada' goņa' le' nis de'e choņ yelə' mban zejlicane'.

¹¹ Na' no'olən' gože'ene': —Señor, caguə' noxo'o bi gašə'ədo'onņə' na' pos nga naquan' zitjw. ¿Gaxa si' o nis de'en choņ yelə' mban zejlicane' de'en nao' ca'?

¹² ¿Echacdo' de que zaquə'əcho' le' ca de'e xaxta'ocho Jacobən' ben' bocua'an len neto' pos nga ga güe'eje' na' xi'ine' ca' na' bia yixə' che' ca'?

¹³ Na' gož Jeso'osən' le': —Notə'ətezə beņə' ye'ej nis nga bia'aczə' əbiləchene'en de'e yoblə'.

¹⁴ Pero na' notə'ətezə beņə' ye'ej nisan' de'en əgwnežjua' nada' cuatəch əbilene'en la' gatə' yelə' mban zejlicane' che'enə'. Na' nis de'en əgwnežjua'ane' gaquan lo'o yichjla'aždaogüe'en ca to nis de'e chxita' chžia chaldin na' de'e cuat yebižən'.

¹⁵ Na' no'olən' gože'ene': —Señor, beņə' nada' nisan' nao' ca' par niç cuich əbilda' na' cuich yida' dexia'an nga.

¹⁶ Jeso'osən' gože'ene': —Beyej jəyene' be'en chio'onə' na' le'e da nga.

¹⁷ Nach gož no'olən' le': —Notono be'en chia' zo.

Na' gož Jeso'osən' le': —Leiczədo' can' nao' de que notono be'en chio' zo,

¹⁸ la' gūeyə' be'en chio' bagwnita' beņə' nšagna'aleno', na' ca naquə ben' zoleno' na'a caguə nšagna'aleno'one'enə'. De'e li can' bagwnao'.

¹⁹ Na' gož no'olən' le': —Señor, bachacbe'ida' de que le' chyixjue'ido' bi de'en na Diozən'.

²⁰ De'e xaxta'o neto' beņə' Samaria gwso'elaogüe'e Diozən' ya'an zo na', na' le'e nale de que Jerosalen na'anə' cheyalə' güe'ela'ocho Diozən'.

²¹ Na' gož Jeso'osən' le': —No'olə, gwyejle' chia' de que gwžin ža catə' bitoch gonən byen žje'ela'ole Xacho Diozən' ya'an zo na' na' ni Jerosalennə'.

²² Le'e nacle beṇə' Samaria bito nombia'ale ben' chejṇi'alažə'əle. Neto' beṇə' Izrael nombi'ato' Diozən' ben' chejṇi'alažə'əto'. Na' entr neto' beṇə' Izrael əchoj ben' chac yebej beṇəchən' xni'a de'e malən'.

²³ Gwžin ža na' na'a baza'an beṇə' ca' chse'ejni'alaže'e Xacho Diozən' can' chazlaže'ena' əso'elaogüe'ene' do yichj do lažə'əga'aque' na' segon de'en naquə de'e li, chedə' Xacho Diozən' chylje' beṇə' əso'elao' le' ca'.

²⁴ Diozən' bito naquə beṇə' belə' chen. Na' beṇə' ca' chse'ejni'alaže'e le' cheyałə' so'elaogüe'ene' do yichj do lažə'əga'aque' na' segon de'en naquə de'e li.

²⁵ Na' gož no'olan' le': —Nezda' de que yidə ben' gwlej Diozən' par gaquəlene' chio'o, ben' nzi' Mesias o Crist. Catə' yide' na' chixjue'ine' chio'o yoguə'əloj de'e quinga.

²⁶ Nach Jeso'osən' gože'ene': —Nada'an naca' ben' nao' ca' na' cho'elena' le' dižə'.

²⁷ Na' lei cho'elene' no'olan' dižə' catə' bežin neto' disipl che'. Na' bebaneto' de'en cho'elene' to no'olə dižə' pero ni toto' cui gwṇabeto'one' bi dižə'an cho'elene' no'olan' o bixchen' chšillene'ene'.

²⁸ Nach no'olan' bcua'an che'e che'ena' na' beyeje' yežən' jəyeže' beṇə' gwlaž che' ca':

²⁹ —Leda legüia to beṇə' bagwne' nada' yoguə'əte de'en babena'. žšə bengalizən' Cristən'?

³⁰ Na' besə'əžaše' yežən' ja'aque' gan' zo Jeso'osən'.

³¹ Žlac žjəyeda no'olan' gotə'əyoito' Jeso'osən' che'eto'one': —Maestr, gwdao.

³² Na' Jeso'osən' gože' neto': —Bito nezele de to yelə' guao chia'.

³³ Nach gwnato' entr neto': —žšə nolizə babedegua' de'e gwdaogüe'ena'?

³⁴ Na' gož Jeso'osən' neto': —Par nada' naquən ca to yelə' guao chona' can' chene'e ben' əbselə' nada' ničh gaquə yoguə' de'en chene'ene' gaquə.

³⁵ Le'e nale: “Ne'e dech yetap bio' par yedobə cwsešən'.” Na' nada' əchnia' le'e, de yeto cwseš de'e cheyałə yedobə, beṇə' ca' yoso'ozenag che Diozən' šə güe'elenchga'acchone' xtiže'ena'. Legon xbab de que bagolə gatə'əyoiga'aquechone' yoso'ozenague' che'.

³⁶ Ben' chon par ničh beṇə' choso'ozenague' che Diozən' chaclene' beṇə' par ničh chəsə'əzi'e yelə' mban zejlicane. Na' Diozən' chone' ca zoe' mbalaz por ni che de'en chaclene' lega'aque'. Can' chac, ben' chyxjui'e xtižə' Diozən' de'e neche na' ben' chon par ničh beṇə' choso'ozenague' chei txennə' chəsə'əbeine'.

³⁷ De'e li can' na dižə'an de'en de: “Beṇə' yoblən' chaz na' beṇə' yoblən' chelap.”

³⁸ Nada' bach chselə'a le'e ca beṇə' yesyə'əlapə' gan' cui gwso'one' žin. Beṇə' yoblə bagosə'əyxjui'e xtižə' Diozən' na' le'e gonle par ničh beṇə' ca' gwse'enene' xtiže'ena' yoso'ozenague' chei.

³⁹ Na' zan beṇə' ža' lao' yež Sicarən' gan' mbane Samarian' gwso'onlilaže'e Jeso'osən' por ni che de'en gwna no'olan': “Bagwne' nada' yoguə'əte de'e babena'.”

⁴⁰ Na' catə' besə'əžin beṇə' Sicarən' gan' zoe'ena' gwsa'atə'əyoine' Jeso'osən' yega'ane' len lega'aque', na' bega'ane' čhopə ža.

⁴¹ Na' beṇə' zanch gwso'onlilaže'ene' por ni che dižə' de'en be' cuin Jeso'osən'.

⁴² Na' gwse'e no'olan': —Na'a chonlilažə'əto'one' caguə por ni che de'en gwnao' na'azən' sino por ni che de'en babeneto' cho'e dižə' cuinczəto'. Bañezeto' de que de'e liczə bengan' Cristən' ben' gwlej Diozən' par yebeje' beṇəchən' xni'a de'e malən' con beṇə' se'ejle'e che'.

Jeso'osən' beyone' xi'in to beṇə' blao

⁴³ Na' catə' goc čhopə ža zoto'ona', beza'ato' beyejto' Galilean'.

⁴⁴ Na' cuin Jeso'osən' bagwnacze' de que beṇə' gwlaž che notə'ətezə profet beṇə' cho'e xtižə' Diozən' bito chso'ene' yelə' bala'an na' nic chse'ejle'e che'.

⁴⁵ Pero na' catə' bežinto' Galilean', beṇə' Galilea ca' besyə'əbeine' na' boso'ozenague' che Jeso'osən' chedə' lecžə lega'aque' ja'aque' Jerosalennə' par lni pascon' na' besə'əle'ine' yoguə' de'e güen de'en bene' bedote lao lṇina'.

⁴⁶ Na' gozejto' len Jeso'osən' yetši'i yež Canan' distrit che Galilean' gan' bene' par ničh beyac nisən' bino. Na' yež Capernaunnə' zo to beṇə' blao beṇə' chon žin che rein' na' chacšenchgüei xi'ine'ena'.

⁴⁷ Xa bi'inə' catə' benene' rson bežinto' Galilean' zeza'ato' Jodean', bide' lao Jeso'osən' na' gotə'əyoine' le' šje' žjəyeyene' xi'ine'ena', chedə' bazon gatbo'.

⁴⁸ Na' Jeso'osən' gože'ene': —Šə cui le'ile miłagr na' bichlə de'e zaquə' yebanele, bito šejle'ele chia'.

⁴⁹ Nach ben' chon žin che rein' gože' le': —Señor, yo'ošga antslə cuiṇə' gat bi'i chia'ana'.

⁵⁰ Na' Jeso'osən' gože'ene': —Beyej. Bito gat bi'i chio'ona'.

Nach gwyejle' be'ena' de'en gož Jeso'osən' le' na' beze'e.

⁵¹ Na' lao bazengü'e nezən' jəsə'əšag xmoše' ca' le' na' gwse'ene': —Bacheyaque bi'i chio'ona'.

⁵² Nach gwnabene' lega'aque' bi or gwzolao beša'alazə'əbo'. Na' lega'aque' gwse'ene': —Neje cheda to gobiž bechojbo' de'e lan'.

⁵³ Nach xəbo'onə' gočbe'ine' or na'ana' gož Jeso'osən' le' de que bito gat bi'i che'enə'. Nach benlilaže'e Jeso'osən', le' na' family che'enə' na' yogua' beņə' ža' liže'enə'.

⁵⁴ De'e nga goc čhop las ben Jeso'osən' mīlāgr catə' ze'e beze'e Jodean' na' bežine' Galilean'.

5

Jeso'osən' beyone' to beņə' nat to part cuerp che'enə'

¹ Gwdenə' golə' to lni che neto' beņə' Izrael Jerosalennə' na' gwyej Jeso'osən'.

² Jerosalen na' žia to tanc de'en nzi' Betesda dižə' ebreo. Žian galə'əzə' cho'a puert che sydan de'en nzi' "Che xilə' ca". Na' nyechj mbi'i cuit cue'ej tanquən' gueyə' ca cha'ašil dao'.

³ Na' beņə' zan beņə' güe' zjəde' lo'o cha'ašil da'onə', no beņə' l'čhoj, beņə' coj, na' no beņə' zjənat to part güeja cuerp chega'aque'enə'. Zjədie' chəsə'əbeze' batə'əquan' ta nisən'.

⁴ To angl betje' tgüejə bte' nisən', na' con beņə' chyobe chetj lo'o nisən' catə'an cheyož čhta anglən' len, le'enə' cheyaque che bitə'ətezə' yžgüe' de'e che'ine'.

⁵ Na' entr beņə' ca' len to beņə' byo bagoc š'i'inšonə'choa iz chacšenene'.

⁶ Na' Jeso'osən' ble'ine' be'enə' na' gočbe'ine' de que bagwža de' ca'. Na' gože'ene': —čEche'endo' yeyacdo'?

⁷ Na' beņə' güe'enə' gože'ene': —Señor, caguə no beņə' zo cue'e nada' lo'o tanquən' catə'an chda nisən'. Na' žlacte əzya'a nada' par šo'a, beņə' yoblə chyobene' chetje' lo'o nisən'.

⁸ Nach gož Jeso'osən' le': —Gwyas na' botobə xta'onə' na' gwda.

⁹ Na' le'e beyactei be'enə' na' botobe' xte'enə' na' gwzolao chde'. Goc de'enə' ža dezcanz.

¹⁰ Nach beņə' blao che neto' beņə' Izrael gwse'e ben' beyaquen': —Ža dezcanz ŋa'a. Bito de lsens yeyoa' xta'onə'.

¹¹ Nach gože' lega'aque': —Ben' beyone nada' gože' nada': "Botobə xta'onə', beyoa'an na' gwda."

¹² Na' gwse'ene': —čNoxan' gož le': "Botobə xta'onə' na' gwda"?

¹³ Na' ben' beyaquene' bito ŋezene' non', chedə' Jeso'osən' babebi'ize'e gan' ža' beņə' zan ca'.

¹⁴ Gwdechlə bedil Jeso'osən' le' lo'o yo'odao' əblaonə' na' gože'ene': —Bač beyacdo' ŋa'a. Bitoch bi de'e mal gono' par nič cui gac čhio' to de'e maləch.

¹⁵ Nach beza' be'enə' na' gwdixjue'ine' beņə' blao che ŋasyon Izrael čheto'on de que Jeso'os na'ana' beyone le'.

¹⁶ Na' de'e na'ana' beņə' blao ca' boso'olagzejə boso'olagzide' Jeso'osən' chəsə'əyiljlaže'e naclən' so'one' par so'ote'ene' de'en bene' mīlāgr ca' ža dezcanzən'.

¹⁷ Na' Jeso'osən' gože' lega'aque': —Xa'ana' chelalene' yogua' ža, na' leczə ca' nada'.

¹⁸ Nach beņə' blao che ŋasyon čheto'on mazəchlə gosə'əyiljlaže'e naclən' so'one' par so'ote'ene' por ni che de'en gwne' de que Diozən' naquə X'e', caguə tlaozə de'en cui bembə'aņe' ža dezcanz na'ana'. Na' de'en gwne' de que Diozən' naquə X'e' zejen de que tozəczə can' zaque'e len Diozən'.

Yelə' chnabia' che Xi'in' Diozən'

¹⁹ Na' gož Jeso'osən' lega'aque': —De'e li chnia' le'e, bito gaquə bi gona' to gwłazza', nadan' naca' Xi'in' Diozən'. De'en chle'ida' chon Xa'ana', lennə' chona'. Yogua'əloj de'en chon Xa'ana', leczə lennə' chona'.

²⁰ Xa'ana' chaquene' chia', na' chlo'ine' nada' yogua' de'en chon cuine'. Na' əgwlo'ine' nada' de'e zaquə'əch ca de'e quinga de'e gona' par nič yebanele.

²¹ Xa' Diozən' chbeje' beņə' na' chone' ca chatə' yelə' mban zejlicane' chega'aque' par nič cui əsa'aque' ca beņə' guat len yichjla'ažda'oga'aque'enə'. Na' ca'aczən' chona' nada' naca' Xi'ine', chbeja' beņə' par chnezjua' yelə' mban zejlicane' chega'aque'.

²² Bito chchoglaol Xa' Diozən' che ni to beņə' šə nape' dolə', sino babeņe' nada' yelə' chnabia'ana' par əchoglaogua'an che beņə'chən' šə non' napə dolə'əna', nadan' naca' Xi'ine'.

²³ Xa' Diozən' chene'ene' de que yogua'əloj beņə' so'one' nada' yelə' bala'an can' chso'e le' yelə' bala'an. Ben' cui chon nada' naca' Xi'in' Dioz yelə' bala'an, lente Xa' Dioz na'ana' cui cho'e yelə' bala'an, chedə' len' bsele'e nada'.

²⁴ De'e li chnia' le'e, ben' chzenag xtiža'ana' na' chonlilaže'e Diozən' ben' əbselə' nada' de yelə' mban zejlicane' che'. Na' cuat si'e castigon', chedə' bitoch naquə' len yichjla'aždaogüe'en ca beņə' guat, sino bade yelə' mban zejlicane' che'.

²⁵ De'e li chnia' le'e gwžin ža catə'an beṇə' ca' zjənaque' len yichjla'ažda'oga'aque'enə' ca beṇə' guat əse'enene' xtiža'a nada' Xi'in Dioz, na' beṇə' ca' yoso'ozenag chia' yesə'əbane' zejlicane. Na' bačh chzoloa chac ca' na'a.

²⁶ Xa' Diozan' nse'e yelə' mban zejlicane na' chac gwnežjue'en beṇə'čan', na' ca'aczə babene' par ničh nada' nsa'a yelə' mban zejlicanen' na' chac chnežjua'an che beṇə'čan', nadan' naca' Xi'ine'ənə'.

²⁷ Na' leczə beṇe' nada' yelə' chnabia'anə' par ničh əchoglaogua'an non' napə dolə' čhedə' bsele'e nada' golja' beṇə'čh.

²⁸ Bito yebanele de'e nga. Gwžin ža catə' yoguə'əlol beṇə' guat ca' ža' lo'o ban' əse'enene' ənia' lega'aque'.

²⁹ Na' beṇə' ca' gwso'on de'e güen žlac gosə'əbane' yesyə'əchoje' par yesə'əbanche' zejlicane. Na' beṇə' ca' gwso'on de'e mal žlac gosə'əbane' yesyə'əchoje' par əsa'aque' castigw.

Jeso'osən' bzejmi'ine' de que nape' yelə' chnabia'

³⁰ Bito bi gaquə gona' de'e bia'azəlaža'a. Chzenaga' bin' na Xa'anə' par ničh nezdə' naquən' chchoglaogua'an che beṇə'čan' šə non' napə dolə'. Na' chchoglaogua'an che to toe' can' cheyalə'əczə gaquə čhedə' bito chona'an de'e bia'azəlaža'a. Chona'an can' chene'e Xa'anə' ben' əbsele' nada'anə'.

³¹ Žala' toza' nada' cho'a dižə' non' naca', bito naquən de'e šejle'ele chia'.

³² Pero zo Xa'anə' cho'e dižə' non' naca', na' nezdə' de que dižə' de'en cho'e chia'anə' naquən de'e li.

³³ Bačh bsele'əle beṇə' lao Juannə' par jəsə'ənbene' le' chia'. Na' Juannə' be'e dižə' li non' naca'.

³⁴ Pero ca naca' nada' bito chyažjda' ənezdə' dižə' de'e güe' ni to beṇə'čan' chia'. Parzə ničh le'e šejle'ele chia' na' gona' ca cui yeyejle lao yi' gabilən', de'e na'anə' che'enda' yosa'aləžə'əle de'en gwna Juannə' chia'.

³⁵ Juannə' goque' ca to lampara de'e chse'eni'ichgwa, na' gone'ele bebeile šlož can' bsed əblo'ine'ənə'.

³⁶ De to de'e cho'en xtiža'a de'e zaquə'əche ca dižə' chia' de'en choe' Juannə'. Nada' chona' yoguə'əlol de'en chon Xa'anə' lao na'a gona', na' de'en chona' cho'en dižə' de que le'ənə' bsele'e nada'.

³⁷ Na' leczə Xa'anə' ben' bsele' nada' cuine' babe'e xtiža'a. Na' bitonə' gwzenagle xtiže'ənə' nic ne'e le'ile can' naque'ənə'.

³⁸ Bitonə' gone chele xtiže'ənə' čhedə' bito chonliłažə'əle nada' naca' ben' əbsele'ənə'.

³⁹ Chsedyaṇə'əle Xtižə' Diozan' de'en nyojən, chaquele nape yelə' mban zejlicane laogüe de'en chseden. Na' de'e ca' zjənyojən chso'en xtiža'a.

⁴⁰ Pero cui chene'ele gonliłažə'əle nada' par gaple yelə' mban zejlicane.

⁴¹ Par nada' bito bi nonən šə beṇə'čan' so'oṇe' nada' yelə' bala'an o šə cui.

⁴² Nada' nombi'a le'e na' nezdə' cabi chaquele che Diozan'.

⁴³ Xa'anə' bsele'e nada' na' beṇe' nada' yelə' chnabia' par chona' con can' ne'ənə' na' cabi chejle'ele chia'. Na' šə beṇə' yobla yide' to gwłazze', gwyejle'ele che'.

⁴⁴ Bito gaquə šejle'ele chia' čhedə' la' chi' yichjle chonle ca so'oṇ ljuēžjle ca' le'e yelə' bala'an na' cui cheyiljle naclən' gonle par ničh Diozan' gone' le'e yelə' bala'an. Tozə le'ənə' cho'e yelə' bala'an de'en naquə de'e zaque'e.

⁴⁵ Bito gonle xbab de que nada' gua'a le'e part lao Xa'anə'. De'e Moizežən', ben' zole lez gaquəlen le'e lao Diozan', le'ənə' güe'e le'e part lao Xa'anə'.

⁴⁶ Žala' gwyejle'ele che de'e Moizežən' na' šejle'etele len chia' nada', čhedə' chia' nadan' bzoje'.

⁴⁷ Na' ca naquən' cui chejle'e de'en bzoje'ənə', žnacxa gonczle šejle'ele de'en bagwnia' le'e?

6

Jeso'osən' bguaogüe' gueya' mil beṇə' byo

¹ Gozde de'e ca' gwyejto' len Jeso'osən' yešla'alə Nisdə' Galilean'. Na' nisdə'onə' leczə nzi'in Nisdə' Tiberias.

² Na' beṇə' zan bedəsə'ənao le' čhedə' besə'əle'ine' miłagr ca' de'en chone' cheyone' beṇə' güe' ca'.

³ Na' gwloeto' to lao ya'a len Jeso'osən' na' na' gwche'eto' len le'.

⁴ Na' bazon baozə galə' lni che neto' beṇə' Izrael de'en nzi' lni pascw.

⁵ Na' catə' bgüia Jeso'osən' na' ble'ine' de que baza'ac beṇə' zan gan' zoe'ənə', na' gože' Lipən': —žGaxa si'icho de'e əsa'o yoguə' beṇə' quinga?

⁶ Jeso'osən' gwne' ca' parzə ničh ye' Lipən' nac chaquene' cheyalə' gonto', la' baṇezczene' naquən' gone'.

⁷ Na' gož Lipən' le': —Tmil pes cabi gaquen si'icho de'e əsa'ogüe' latə' güejən.

⁸ Na' zo to disipl çe Jeso'osən', ben' le Ndres, bišə' Simon Bedən'. Na' Ndresən' gože' Jeso'osən':

⁹ —Nga zo to bi'i byo na' de gueyə' yetxtil de sebad çebo' na' yeçhopə bel ya'a. Pero bi de gon de'e quinga la' beṇə' zannə'.

¹⁰ Nach Jeso'osən' gože' neto': —Le'e gon mendad yesə'əbe' beṇə' ca'.

Chi'ichgua yixye daquə' latjən', nach gosə'əbe' beṇə' ca' laogüeinə'. Naquə ca do gueyə' mil beṇə' byo cui cuent no'olə na' cui cuent bidao'.

¹¹ Nach gwxi' Jeso'osən' yetxtil ca'. Na' beyož be'e yelə' choçxwlen çe Diozən' beṇə' çe che neto' disipl par be'eto' çe beṇə' ca' bazjəchi'. Na' leczə ca'atezəczə bene' len bel ya'a ca'. Be'eto' lega'aque' con cata'ətə' de'e gwse'ene'.

¹² Na' cata' beyož gwse'eljene' nach gože' neto': —Le'e yetobə pedas ca' de'en bega'an par niç cui bi cuiayi'.

¹³ Nach botobəto' pedas ca' de'en besyə'əga'an beyož gwsa'o beṇə' ca', na' goquən šižin žomə lao gueyə' yetxtil de sebadən'.

¹⁴ Na' beṇə' ca' cata' besə'əle'ine' miłagr de'en ben Jeso'osən' nach gosə'əne': —De'e liczə bengan' profetən' ben' bagwlezcho selə' Diozən' yežlyo nga par gaquəlene' chio'o.

¹⁵ Na' cata' gocbe'i Jeso'osən' de que gwse'ene' yesə'əche'əxəjəne' par so'onene' rei chega'aque'ena', nach bebi'ize'e gožeje' ya'ada'onə' toze'.

Gwda Jeso'osən' lao nisdə'onə'

¹⁶ Na' cata' beçjw že'ena' neto' disipl çe Jeso'osən' beyetjto' cho'a nisdə'onə'.

¹⁷ Na' beyo'oto' to lo'o barcw par zjəyedato' Capernaunnə'. Bagol, na' Jeso'osən' bitoṇə' yele'e gan' zjəyedato'onə'.

¹⁸ Na' chas chatə' nisdə'onə' la' to be' fuert cheçj.

¹⁹ Ca do çhopə legw babeza'ato' lao nisdə'onə' cata' ble'ito' zezə' Jeso'osən' lao nisən' galən' zda barcon'. Na' bžebto'.

²⁰ Nach gože' neto': —Nada'anə'. Bito žeble.

²¹ Nach neto' chebeito' bego'oto'one' lo'o barcon'. Nach le'e bežinteto' cho'a nisdə'onə'.

Beṇə' zan chasyə'əyilje' Jeso'osən'

²² Na' beteyo beṇə' ca' besyə'əga'an yešla'alə nisdə'onə' bito besyə'əželene' Jeso'osən'. Gwsa'acbe'ine' caguə bi barcw gotə'əch sino yetoga de'en beyo'oto', na' gosə'əneze' bito beyo'o Jeso'osən' lo'o barcon' gan' beyo'o neto'.

²³ Nach besə'əžin to çhopə barcw ca' de'en za'ac syoda de'en nzi' Tiberias, besə'əžinən galə'əzə gan' əgwsa'ogüe' catə'an gwde be' Xancho Jeso'osən' yelə' choçxwlen çe Diozən'.

²⁴ Na' cata' besə'əle'i beṇə' ca' caguə no Jeso'osən' nla'anə', na' ni neto' disipl çe', nach besyə'əyo'e lo'o barcw dao' ca' na' ja'aque' Capernaunnə' chesyə'əyilje'ene'.

Jeso'osən' naque' yelə' guao de'e chnežjon yelə' mban zejlicane çe beṇə' chso'onlilaže'ene'

²⁵ Na' cata' besyə'əželene' Jeso'osən' yešla'alə nisdə'onə' na' gwse'ene': —Maestr, çbata'əquə' bela'o ngan'?

²⁶ Na' Jeso'osən' gože' lega'aque': —De'e li chnia' le'e, cheyilje nada' caguə por ni çe bagwyejni'ile bi zejen miłagr ca' bable'ile beṇə', sino por ni çe de'en gwdaole na' beljele.

²⁷ Bito cue'e yičhje gonle par niç gatə' de'e ye'ej gaole de'en chde çei, sino lecue'e yičhje le'e gon par niç gaquə ye'ej gaole de'en gon le'e yelə' mban zejlicane. Diozən' bsele'e nada' golja' beṇə' na' nada' gona' de'en ye'ej gaole par niç əbanle zejlicane. Na' Diozən' babene' par niç nezele bsele'e nada'.

²⁸ Na' gwse'ene': —ÇBi cheyalə' gonto' par niç yebei Diozən' neto'?

²⁹ Na' gož Jeso'osən' lega'aque': —De'e nga gonle par niç yebei Diozən' le'e, gonlilažə'əle nada' ben' əbsele'ena'.

³⁰ Nach gwse'ene': —ÇBi miłagr gono' par niç gonlilažə'əto' le'? ÇBi gono' le'ito' ža?

³¹ De'e xaxta'ocho ca' gwsa'ogüe' mana latjə dašən', can' nyoj Xtizə' Diozən' nan: “Yelə' guao de'e za' yoban' be'e lega'aque' gwsa'ogüe'.”

³² Nach Jeso'osən' gože' lega'aque': —De'e li əchnia' le'e, caguə de'e Moizezən' bnežjue' lega'aque' yelə' guao de'en za' yoban', sino Xa' Dioz na'anə'. Na' Xa'anə' babsle'e par le'e to yelə' guao de'e zaquə'əche na' de'e li za'an yoban'.

³³ Na' yelə' guao de'en babsle'ə Xa' Diozən', za'an yoban' na' betjən yežlyon' na' chnežjon yelə' mban zejlicane çe nota'ətezə beṇə' çhao len.

³⁴ Nach gwse'ene': —Señor, beṇšga neto' yelə' guaon' nao' ca' yedote.

³⁵ Na' Jeso'osən' gože' lega'aque': —Nada' naca' yelə' guao de'en chnežjon beṇə' yelə' mban zejlicane. Notə'ətezə beṇə' chse'ejle' çhia' yesyə'əbei la'azda'oga'aque'ena' zejlicane, na' de'en chso'onlilaže'e nada', nite'e mbalaz zejlicane.

³⁶ Na' bagwniacza' le'e, la'anə'əczə bable'ile nada' naca' yelə' guaonə', bitoczə chonlilažə'əle nada'.

³⁷ Yoguə' beṇə' ca' chbej Diozən' par əsa'aque' nada' txen, chžin ža catə' chso'onlilaže'e nada'. Na' notə'ətezə beṇə' ca' chso'onlilažə' nada', chebeida' chsa'aque' nada' txen.

³⁸ Nada' za'a yoban' na' betja' yežlyon' caguə par niç gona' de'e bia'azalaža'anə', sino par niç gona' can' chene'e Xa'anə' ben' əbselə' nada'.

³⁹ Na' de'e ngan' de'en chene'e Xa'anə' ben' əbselə' nada', de que yoguə'əlol beṇə' bagwleje' par əsa'aque' nada' txen, ni toe' cui gua'a latjə cuiayi'e sino que yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'.

⁴⁰ Xa'anə' chene'ene' de que yoguə'əlol beṇə' se'ejni'ine' non' naca' nada' na' so'onlilaže'e nada', par niç əgwnežjue' lega'aque' yelə' mban zejlicane' non' nada' yosbanga'aca'ane' ladjo beṇə' guat ca' šə bagwsa'ate' catə'an əžin ža šo'o fin che yežlyon'.

⁴¹ Na' beṇə' blao che nasyon Izrael chton' besə'əže'eše'e che Jeso'osan' de'en gwne': "Nada' naca' yelə' guao de'en za' yoban'."

⁴² Na' gosə'əne': —¿Ecağə bengan' Jeso'os xi'in Jwse ben' nombia'acho na' leczə ca' xne'enə'? ¿Bixchexa nga nalize' de que ze'e yoban' betje' yežlyon'?

⁴³ Nach Jeso'osan' gože' lega'aque': —Bito že'ešə'əle chia' entr le'e.

⁴⁴ Ni to cono no gonlilažə' nada' šə Xa'anə' ben' əbselə' nada' cui gone' ca se'eje'e chia'. Na' beṇə' ca' chse'eje'e chia' yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'.

⁴⁵ Gan' nyoj de'e ca' bosə'ozəj de'e profet ca' beṇə' ca' gwso'e xtižə' Diozən' cana' nan: "Na' yoguə'əlolə' əgwse əgwlo'i Diozən'." Nachən' yoguə'əlol non' neze can' na' Xa'anə' na' choso'ozenag che', yoguə' beṇə' can' chso'onlilaže'e nada'.

⁴⁶ Bitə nachə zo nochlə beṇə' bable'ine' Xa'anə' sino toza' nada', la' nadan' za'a gan' zo Xa' Diozən'.

⁴⁷ De'e li chnia' le'e, beṇə' ca' chso'onlilažə' nada' de yelə' mban zejlicane' chega'aque'.

⁴⁸ Nada' naca' yelə' guao de'en chnežjon beṇə' yelə' mban zejlicane'.

⁴⁹ Xaxta'ocho ca' gwsa'ogüe' manan' latjə dašən', pero bia'aczə gwsa'ate'.

⁵⁰ Nadan' cho'a dižə' de que naca' yelə' guao de'en za' yoban' de'en chnežjon yelə' mban zejlicane' che beṇə' ca' chsa'ogüe'en par niç ca' cuich zjənaque' len yichjla'ažda'oga'aque'ena' ca beṇə' guat.

⁵¹ Nadan' naca' yelə' guao de'en za' yoban'. Nsa'a yelə' mban zejlicane' na' chac chnežjua'an beṇə'chən'. De'e na'anə' beṇə' ca' sa'o yelə' guao nga yesə'əbane' zejlicane'. Na' yelə' guao de'e əgwnežjua' əsa'ogüe' naquən cuerp chia'anə', na' əgwnežjua'an par niç notə'ətezə beṇə'ch guağə yesə'əzi'e yelə' mban zejlicane'.

⁵² Nach gwche' bžəš entr beṇə' blao che nasyon Izrael chton' gosə'əne': —¿Nacxa gone'en gon cuerp che'ena' gaochə?

⁵³ Na' Jeso'osan' gože' lega'aque': —De'e li chnia' le'e, Diozən' bsele'e nada' golja' beṇə'ch, na' šə cuina' gaole cuerp chia'anə' na' šə cuina' ye'eje xchena'anə', bito de yelə' mban chele zejlicane'.

⁵⁴ Beṇə' ca' chsa'o cuerp chia'anə' na' chse'eje' xchena'anə' de yelə' mban zejlicane' chega'aque', na' šə bagwsa'ate' catə' əžin ža šo'o fin che yežlyon', yosbanga'aca'ane' ladjo beṇə' guat ca'.

⁵⁵ Na' cuerp chia'anə' naquən yelə' guao de'e le'ezełaogüe de'e zaque'e, na' xchena'anə' de'en chse'eje'ena' naquən le'ezełaogüe de'e zaque'e.

⁵⁶ Na' beṇə' ca' chsa'o cuerp chia'anə' na' chse'eje' xchena'anə' nite'ətezə nite'e len nada' na' nada' zotezə zoa' len lega'aque'.

⁵⁷ Xa'anə' ben' zo zejlicane' le'ena' bsele'e nada', na' zoa' chedə' le' chone' ca zoa', na' ca'atezəczən' ben' gao cuerp chia'anə' soe' chedə' gona' ca soe'.

⁵⁸ Cuerp chia'anə' naquən yelə' guao de'en za' yoban'. Na' yelə' guao nga bito naquən ca manan' de'en gwsa'o xaxta'ocho ca' na' bia'aczə gwsa'ate'. Beṇə' ca' chsa'ogüe' yelə' guao nga nia' ca' nite'e zejlicane'.

⁵⁹ De'e quinga əbsed əblo'i Jeso'osan' lo'o yo'oda' Capernaunə'.

Xtižə' Jeso'osan' chnežjon yelə' mban zejlicane' che beṇə' ca' choso'ozenag chei

⁶⁰ Na' beṇə' zan beṇə' ca' zjəšə'ənao Jeso'osan' catə' gwse'enene' can' gože' lega'aque' nach gosə'əne': —Zi'ichgua naquə dižə' quinga. ¿Noxacza šejle'e che'?

⁶¹ Na' goche'i Jeso'osan' de que chəšə'əže'eše'e por ni che de'en gože' lega'aque', na' gozne': —¿Epor ni che de'en gwnia' can' chene'ele yebiguə'əle gosxanlə'?

⁶² ¿Naquəchxa gonlen' šə le'ile nada' yeyepa' gan' gwzə' antslə? nadan' bselə' Diozən' golja' beṇə'ch.

⁶³ Caguə por ni che de'en goljle beŋač de yelə' mban zejlicane chele sino šə yo'o Spirit che Diozən' lo'o yichjla'ažda'olen' de yelə' mban zejlicane chele. Dižə' de'en babi'a len le'e zaquə'an par yichjla'ažda'olen' na' əbanle zejlicane šə šejle'ele chei.

⁶⁴ Ne'e nitə' balle cui chonlilažə'əle nada'.

Jeso'osən' gwne' ca' chedə' dezd gwzoloa zjəsə'ənao beŋə' le' nezene' noquə' beŋə' ca' cui gwso'onlilaže'ene' na' non' əgwde le' lao na' beŋə' ca' chəsə'əgue'i le'.

⁶⁵ Na' gože' lega'aque': —Chac can' gwnia'anə' de que notono no chac gonlilažə' nada' šə Xa'anə' ben' əbsejə' nada' cui chone' par ničh gonlilaže'e nada'.

⁶⁶ Nach besyə'əbi'izə' beŋə' zan beŋə' bagosə'adalene' Jeso'osən', bitoch gosə'ənaogüe'ene'.

⁶⁷ Na' Jeso'osən' gože' šižinte neto': —ĴElen le'e chene'ele žjəya'acle'?

⁶⁸ Na' gož Simon Bedən' le': —Xanto', notono nochlə de no zaquə'əgwzenagto' chei. Nezetə' de que le' chono' yelə' mban zejlicane che notə'ətezə neto' chzenagto' xtižə'onə'.

⁶⁹ Neto' bachejle'teto' na' banezeto' de que len' naco' Cristən' ben' bagwlej Diozən' par gaquəlene' nasyon chechon'. Naco' Xi'in Dioz ben' zo zejlicane.

⁷⁰ Na' Jeso'osən' gože' neto': —Nada' gwleja' le'e šižinle na' nežda' de que tole chzenagle che gwxiye'enə'.

⁷¹ Gwne' ca' che Jod Iscariotən' xi'in Simonə' la' Jod nan' əgwdi'ene' lao na' beŋə' ca' chəsə'əgue'i le', len nacte' txen neto' šižinto'.

7

Benə' bišə' Jeso'osən' bito gwso'onlilaže'e le'

¹ Catə' bagwde de'e ca' Jeso'osən' gwdacze' chsed chlo'ine' beŋə' ca' ža' distrit che Galilean'. Bito gone'ene' yeyeje' Jodean' par so'e' na' chedə' beŋə' blao che nasyon Izrael cheton' chəsə'əyiljlaže'e naclən' so'one' par so'ote'ene'.

² Na' bazon galə'əza lni che neto' beŋə' Izrael de'en nzi' "lni che yo'o de lağua'".

³ Na' beŋə' bišə' Jeso'osən' gwse'ene': —Bito yega'ano' nga, sino gwyej Jodean' par ničh disipl chio' ca' ša' na' yesə'əle'ine' de'e ca' chono'onə'.

⁴ Ni to beŋə' cui chone' bgašə'əzə to de'e chone' šə chene'ene' gombia' beŋə' le'. Šə de'e li chono' milagr, ben par ničh yesə'əneze yoguə'aləl beŋə' can' chono'onə'.

⁵ Beŋə' bišə'e ca' gosə'əne' ca' chedə' ni lega'aque' cui gwso'onlilaže'e le'.

⁶ Nach gož Jeso'osən' lega'aque': —Bitonə' žin ža par gwlo'a non' naca', pero ca naquə le'e ža, guaquə žja'acle lnin' batə'ətezən'.

⁷ Beŋə' ca' cui zjənombia' Diozən' bito chəsə'əgue'ine' le'e, pero chəsə'əgue'ine' nada', chedə' chzejni'iga'acda'ane' de que chso'one' de'e malən'.

⁸ Le'e žja'ac lninə'. Nada' bito sa'a na'a chedə' bitonə' žin ža chia'anə' par sa'a lnin'.

⁹ Na' beyož gože' lega'aque' ca' bega'ane' Galilean' yeto čopə ža.

Jeso'osən' gwyeje' Jerosalenna' gan' yo'o lninə'

¹⁰ Nach gwde gwsa'ac beŋə' bišə'e ca' əzja'aque' lninə' leczə gwza' le' zde' lninə', pero caguə zaquə'alao sino bgašə'əza.

¹¹ Na' beŋə' blao che nasyon Izrael cheto'onə' besyə'əyilje' le' lao lninə' na' gosə'əne': —ĴGanxa be'ena'anə'?

¹² Na' beŋə' ca' zjənžag lao lninə' zane' gwso'e dižə' che Jeso'osən' len ljuežjga'aque'. Na' caguə tozə can' gosə'əne' che'. Balə' gosə'əne': —Naque' beŋə' güennə'.

Na' yebałə' gosə'əne': —Abi, chonleizene' beŋə'anə'.

¹³ Pero ni toe' cui gwso'e dižə' che' zaquə'alao chedə' besə'əžebe' beŋə' blao che nasyon cheto'onə'.

¹⁴ Na' do gašjə zda lninə' catə' gwyo'o Jeso'osən' lo'o yo'odao' əblao che neto' beŋə' Izrael na' gwzoloa chsed chlo'ine'.

¹⁵ Na' chasyə'əbane beŋə' blao ca', chəsə'əne': —ĴBixa chejni'i bengan' len caguə babsede' can' nsed chio'onə'?

¹⁶ Nach Jeso'osən' gože' lega'aque': —De'en chlo'ida'anə' caguə de'e chaljəlaža'anə', sino ben' əbsejə' nada' blo'ine'en nada'.

¹⁷ Notə'ətezə beŋə' chene'ene' gone' can' chene'e Diozən', le' ənezene' šə de'en chlo'ida'anə' naquən che Diozən' o šə naquən de'e bia'azəlaža'a.

¹⁸ Beŋə' ca' chso'e dižə' de'e bia'azəlažə'əga'aque' chasyə'əyilje' no so'e lega'aque' yelə' bala'an. Caguə ca' nada' chedə' cheyilja' naclə gona' par ničh Diozən' ben' bsejə' nada' si'e yelə' bala'an. De'e na'anə' guaquə gaple confyans de que nada' cho'a dižə' li, na' bito chxoayaga' beŋə'.

¹⁹ Le'e cho'ela'ole de'e Moizezən' ben' bzojlei che Diozən', len ni tole cui chonle can' nanə'. ĴBixchen' chyljlažə'əle naclən' gonle par gotle nada'?

²⁰ Na' beṇə' ca' zjəṇžaguən' gwse'ene': —Chac tonto'. ¿No chyiljlažə' naclə gone' par gote' le'?

²¹ Jeso'osən' gože' lega'aque': —Tozə miḷagr de'en babena' ža dezczanzən' na' de'e na'anə' yoguə'əle chebenele.

²² De'e Moizezən' bzoje' de que cheyaḷə' socho seŋy de'en ne' sirconsision. Pero caguə gwzolan len le' sino len de'e ɣaxta'ocho ca' beṇə' ca' gwnitə' antslə ca le'. Na' le'e chzole bi'i byo dao' ca' seŋy de'en ne' sirconsision ža dezczanzən'.

²³ Na'a ža, šə chaquele chonan byen gwzole no bidao' seŋy de'en ne' sirconsision ža dezczanzən' par gonḷe complir can' na lei de'en bzoj de'e Moizezən', žibixčhen' chžə'ale nada' de'en beyona' to beṇə' ža dezczanzən' len yoguə'əloj de'en chac che'?

²⁴ Bito con gonḷe xbab de que to de'e chle'ile chon beṇə' naquən de'e mal, sino le'e co'o rson nič ɳezele šə de'e li chone' de'e mal o šə chone' de'e güen.

Jeso'osən' be'e dižə' de que gwze'e gan' zo Diozən'

²⁵ Nach to čhopə beṇə' Jerosalen ca' gosə'əne': —¿Ecaguə bengan' chəsyə'əyilje' par nič so'ote'ene'?

²⁶ Le'e ggüiašc can' cho'e dižə' nga zakuə'əlao na' bitobi chse'ene'. De repentlja beṇə' gwn- abia' ca' bač chso'one' xbab de que naquəcze' Cristən' ben' gwlej Diozən' par gaquəlene' nasyon čhechon'.

²⁷ Pero na' ɳezecho ga beṇə' be'enga, mas catə' yidə Cristən' ni to cono ɳezeze ga be'enə'.

²⁸ Ne'e chsed chlo'i Jeso'osən' lo'o yo'odao' əblao che neto' beṇə' Izrael catə'an gosə'əne' ca'. Nach gwne' zižjo gože' lega'aque': —Nada' nombi'ale na' ɳezeze ga beṇə' nada'. Na' caguə con za'a de'e bia'azəlažə'ana'. De'e li zo ben' əbselə' nada' la'anə'əczə le'e bito nombi'alone'.

²⁹ Nada' nombi'ane' chedə' gan' zoe' nan' gwza'a na' len' bsele'e nada'.

³⁰ Nach chəsə'əyiljlažə'e naclən' so'one' par yesə'əzene' Jeso'osən', pero notono no gwzen le' chedə' bitonə' əžin ža par gague' lao na'aga'aque'ena'.

³¹ Na' beṇə' zan gwso'onḷilažə'e Jeso'osən' na' gosə'əne': —Catə'an yidə Cristən' bitolja gone' miḷagr zanch can' chon benga.

Ʋa'agyo'odao' ca' ja'aque' par žjəsə'əxene' Jeso'osən'

³² Na' beṇə' fariseo ca' gwse'ene' beṇə' zan chso'e dižə' che Jeso'osən'. Nach bosə'oxi'e len bɣoz əblao che nasyon Izrael četon' bosə'osele'e ɣa'agyo'odao' četo' ca' par žjəsə'əxene' le'.

³³ Na' Jeso'osən' chsed chlo'ichene' gwne': —Gwzocha' yeto tyemp dao' len le'e nach yeya'a gan' zo ben' əbselə' nada'.

³⁴ Yeyilje nada' na' cabi yezelele nada', la' gan' soa' nada', le'e bito gaquə yidle.

³⁵ Nach beṇə' blao che nasyon Izrael četon' gosə'əne' entr' lega'aque': —¿Ga yeyej bengan' cui yezelechone'? ¿Ešə šejlene' beṇə' gwlaž čecho ca' zjənaselas entr' beṇə' griego ca' na' žjəsedene' beṇə' griego ca'?

³⁶ ¿Bi zeje dižə' de'e nga gwna benga? Gwne': “Yeyilje nada' na' cui yezelele nada'.” Na' leczə gwne': “Ga'an soa' nada', le'e bito gaquə yidle.”

Jeso'osən' be'e dižə' che Spirit che Diozən'

³⁷ Na' ža le'ezelaogüe na' ža xen che ḷnina' gwzecha Jeso'osən' gan' chsed chlo'ine' na' gwne' zižjo: —Notə'ətezle šə de'e tant chene'ele gata' yelə' mban zejlicane' chele xte banacle ca to beṇə' chbillažə'e, legonḷilažə' nada' na' gona' yelə' mban zejlicane' chele.

³⁸ Le'e chonḷilažə'əle nada', so de'en nabia' yichjla'ažda'olen' can' na Xtizə' Diozən' de'en nyojan, gonən par nič gaquəlenle yeziqə'əchlə beṇə' par yesə'əzi'e yelə' mban zejlicane'. De'e na'anə' saquə'əlebele ca yao ca' de'en chso'onən par nič yežlyon' de tcho'alaoga'aquən chosča'on bitə'əteza.

³⁹ Jeso'osən' gwne' ca' chedə' gwnezene' Spirit che Diozən' yedəson lo'o yichjla'aždao' chio'o chonḷilažə'əcho le' par nič gaquəlencho beṇə' yesə'əzi'e yelə' mban zejlicane'. Na' ca naquə Spiritən' bitonə' yedəson lo'o yichjla'aždao' beṇə' ca orən', chedə' beṇə' ca' chəsə'əgüe' Jeso'osən' bitonə' so'ote'ene', na' bitonə' güe' Diozən' le' yelə' bala'an xen.

Gwsa'aque' choplə por ni che Jeso'osən'

⁴⁰ Beṇə' ca' ža'anə' gwse'ene' chsed chlo'i Jeso'osən' na' baḷe' gosə'əne': —De'e liczə bengan' profetən' ben' naquən yida.

⁴¹ Na' yebəle' gosə'əne': —Bengan' Cristən' ben' gwlej Diozən' par gaquəlene' nasyon čhechon'. Pero baḷe' gosə'əne': —¿Ena' ɳacho de que Galilea na' əchoj Cristən'?

⁴² ¿Ecaguə na Xtizə' Diozən' de'en nyojan de que Cristən' galje' lao dia che de'e Rei Dabin' na' de que galje' yež Belen laž de'e rein'?

⁴³ Na' gotə' bžəš entr' beṇə' ca' ža'anə' na' gwsa'aque' choplə por ni che Jeso'osən'.

⁴⁴ Baḷe' gwsa'aque' cheyaḷə' yesə'əzene'ene', pero bito gwso'one' ca'.

Benə' gwnabia' che benə' Izrael ca' bito gwse'ejle'e che Jeso'osən'

⁴⁵ Na' xa'ag yo'odao' che neto' benə' Izrael besyə'əžine' lao benə' ca' bososele' lega'aque'. Na' hoxoz əblao che nasyon cheton' na' benə' fariseo ca' gwse'e lega'aque': —¿Bixchen' cui əgwche'elene'?

⁴⁶ Na' xa'ag yo'odao' ca' gwse'e lega'aque': —Xte ža neža ni tozə benə' cuinə' ne' güen ca güennə' chne bengan'.

⁴⁷ Nach benə' fariseo ca' gwse'e lega'aque': —¿Elente le'e bagwxoayagle?

⁴⁸ Ni tozə neto' naquəto' benə' blao na' naquəto' benə' fariseo cuinə' šejle'eto' che'.

⁴⁹ Pero benə' zan quinga ža' nga bito zjənombi'e lei de'en bzoj de'e Moizezən', na' bazjəmbi'ayi'e.

⁵⁰ Na' Nicodemon', ben' gwyey lao Jeso'osən' še'elə, lene' benə' blao ca'. Na' Nicodemon' gože' lega'aque':

⁵¹ —Lei chechon' bito cho'en latjə choglaochon che to benə' de que malən' bene' sin cui güe'e dižə' nac goquə na' sin cui əžaš əche'enə bixa bene'enə'.

⁵² Nach gwse' benə' ca' le': —¿Ena' nacho leno' len' naco' benə' Galilea? Bsed na' ənezdo' de que ni to profet cuinə' əchoj Galilean'.

Besyə'ədole'ene' to no'olə len xtoe'

⁵³ Na' besa'aque' jəya'aque' ližga'aque'.

8

¹ Nach Jeso'osən' gwyeye' ya'a de'en ne' Ya'a Olibos.

² Na' beteyo cata' gwyeni' gwyeye' de'e yoblə yo'odao' əblao che neto' benə' Izrael. Na' yogua' benə' ca' ža' na' gosə'əbigue'e laogüe'enə na' Jeso'osən' gwchi'e na' gwzolaogüe' chsed chlo'ine' lega'aque'.

³ Nach benə' ca' choso'osed choso'olo'i lei de'en bzoj de'e Moizezən' na' len benə' fariseo ca' bedəsə'əgüe'e to no'olə benə' besyə'ədole'ene' len xtoe'. Na' bososeche'ene' gwchoj benə' ca' lao Jeso'osən'.

⁴ Na' gwse'e Jeso'osən': —Maestr, no'ol nga babedolə'əto'one' mer delene' to xtoe'.

⁵ Na' lei de'en bzoj de'e Moizezən' chonən mendad gotcho no'ol ca' chso'on ca' əgwšizə'əga'acchone' yey. ¿Bixa ənao' le'? ¿bi cheyalə' gonechone'?

⁶ Gwse'e Jeso'osən' ca' chedə' gwse'enene' yesə'əbeje'ene' dižə' de'e yesə'əchine' contr le'. Nach Jeso'osən' con bcheque'e na' bzoje' lao yon' len xbene'.

⁷ Na' gwnitə'əcheche' chəsə'ənbene' le' naxca əne'enə'. Nach gwche'əša'ogüe'e na' gože' lega'aque': —Guaqua con to le'e benə' cui de xtole'e solaole əgwšizə'əle no'olə nga yejən'.

⁸ Nach bcheque'e de'e yoblə bzoje' lao yon'.

⁹ Na' benə' blao ca' benə' ca' chəsə'əcuiš no'olən' cata' gwse'enene' de'en gož Jeso'osən' lega'aque', gosə'ənezene' lo'o yichjla'ažda'oga'aque'enə' de que yogue'e de xtolə'əga'aque'. Nach gwzolao besyə'əchoj tgüejə' tgüejə', gwzolaotec besyə'əchoj benə' ca' zjəngoləch nach benə' ca' yelə' xte bega'an yetozə Jeso'osən' len no'olən' ladjo benə' ca' choso'ozenag che'.

¹⁰ Na' cata' bebe'əšao' Jeso'osən' caguə no benə' ca' ble'ichene' laogüe'enə' sino yetozə no'olən'. Na' gože'ene': —No'olə, žgan benə' ca' choso'ocuiš le'? ¿Eni toe' cui bej le' castigw'?

¹¹ Nach no'olən' gože'ene': —Ni toe' Señor.

Nach Jeso'osən' gože'ene': —Ni nada' bito gonə' le' castigw. Beyej na' cuich gono' de'e malən'.

Jeso'osən' nse'e be'eni' par yichjla'aždao' benə'chən'

¹² Na' Jeso'osən' gozoe' dižə'an yetš'i'i len benə' ca' ža'ana', gože' lega'aque': —Nada' nsa'a be'eni' par yichjla'aždao' benə'chən'. Benə' ca' chso'onlilaže'e nada' na' choso'ozenague' chia' bitoch chso'ontezə chso'one' de'e malən'. Yo'o be'eni'in lo'o yichjla'ažda'oga'aque'ena' chedə' zjənapə' yelə' mban zejlicane.

¹³ Nach benə' fariseo ca' gwse'ene': —Le'etezə cho'o dižə' che cuino', na' bito naquan de'e se'ejle' benə'.

¹⁴ Na' gož Jeso'osən' lega'aque': —La'anə'əczə cho'a dižə' che cuina', xtiža'ana' naquan de'e li. Nada' nežda' gan' gwza'a na' gan' yeya'a, pero le'e bito nezele gan' gwza'a na' gan' yeya'a.

¹⁵ Le'e con to chosbaga'əle nada' de que napa' dolə' por ni che bi de'en chle'ile chona'. Nada' bito za'a par choglaogua'an che benə' de que zjənapə' dolə'.

¹⁶ Pero na' šə' cata' choglaogua'an che notə'ətezə benə' de que zjənapə' dolə', zaquə'əczə can' əni'a'anə' chedə' bito choglaogua'an che benə' to gwlažza' sino con can' na Xa'anə' ben' bselə' nada'.

¹⁷ Lei chechon' de'en bzoj de'e Moizezən' nyojən nan de que dižə' de'en əso'e chopə' testigw cheyalə' šejle'echo de que naquan de'e li šə' tozə can' yesə'əne'.

¹⁸ Nada' cho'a dižə' che cuina' na' Xa'anə' leczə cho'e dižə' chia', na' le'enə' bsele'e nada'. Neto' naquəto' testigw ca' čhəpə.

¹⁹ Na' gwse'ene': —¿Gaxa zo xa'onə'?

Na' gwna Jeso'osən': —Ni nada' ni Xa'anə' cui nombi'ale. Žalə' nombi'ale nada' leczə nombi'ale Xa'anə'.

²⁰ Dižə' ca' be' Jeso'osən' bsd blo'ine' gan' chəsə'əgü'e mech lo'o yo'odao' əblao che neto' beṇə' Izrael. Na' ni to cono gwxcn le' čhedə' cuiṇə' žin ža par gaque' lao na' beṇə' ca' chəsə'əgue'i le'.

Jeso'osən' gwne': "Gan'yeya'anə' le'e cabi gaquə da'acle"

²¹ Na' gož Jeso'osən' lega'aque' yetši'i: —Nada' yeya'a, na' le'e yeyilje nada', pero gan' yeya'anə' le'e cabi gaquə da'acle, čhedə' le'e gatle catə' cuiṇə' yedinjele xtolə'əle ca'.

²² Na' beṇə' blao che nasyon Izrael čheto'on gosə'əne': —¿Eyeyot cuine'ena' ža, de'en ne' gan' yeyeje' bito gaquə šejcho?

²³ Na' gože' lega'aque': —Le'e chzenagle che gwxiye'ena', na' nada' chzenaga' che Diozən'. Le'e chonle can' chso'on yeziquə'əchlə beṇə' cui zjənombia' Diozən', na' nada' bito chona' ca'.

²⁴ De'e na'anə' gwnia' le'e de que gatle catə' cuiṇə' yedinjele xtolə'əlen'. Šə cui chejle'ele de que nada' naca' doxcn can' gwnia'anə', gatle sin cui yedinjele xtolə'əle ca'.

²⁵ Na' gwse'ene': —¿No naco' le'enə'?

Na' gož Jeso'osən' lega'aque': —Nada' naca' ben' bagwnia' le'e bedote.

²⁶ Ne'e dech de'e zan de'e ənia' chele gwzejni'ida' ca naquə xtolə'əle ca'. Xa'anə' bsele'e nada' par cho'a dižə' len beṇə'chən' de'en babenda' gwne'. Na' Xa' na'anə' cho'e dižə' li.

²⁷ Jeso'osən' be'e dižə' che Xə' Diozən', na' lega'aque' bito gwse'ejni'ine' šə che Dioz nan' cho'e dižə'.

²⁸ Na' Jeso'osən' gože' lega'aque': —Diozən' bsele'e nada' golja' beṇə'ch, na' te gotle nada' le'e yag corozan' cana' ənezele de que naca' ben' gwnia'anə'. Na' leczə ənezele de que cabi bi chona' de'e bia'azəlaža'a, sino con bin' babzejni'i Xa'anə' nada', lenṇə' chnia'.

²⁹ Xa'anə' balsele'e nada' na' zocze' len nada'. Bito chbejyichje' nada' čhedə' do tyempte chona' de'en chazlaže'ena'.

³⁰ Na' žlac choe' Jeso'osən' dižə' quinga beṇə' zan gwso'onlilaže'e le'.

Noquə'n zjənaquə xi'in Dioz na' noquə'n nita' xni'a de'e malən'

³¹ Na' Jeso'osən' gože' baļə beṇə' gwlaž čheto' ca' bachse'ejle'e che': —Šə sotezə sole gonle de'e chnia' le'e gwlo'en de que de'e ličzə banacle disipl chia'.

³² Na' šə sotezə sole gonle de'en chnia' le'e, nach ənezele bi zeje dižə' li čhia'anə', na' šə banezele bi zejen, bitoch gacle ca esclabos.

³³ Na' gwse'ene': —Dia che de'e Abraannə' naquəto' na' xte ža neža bitonə' gacto' ca esclabos. ¿Bixəchen' nao' le' de que bitoch gaquəto' ca esclabos?

³⁴ Na' gož Jeso'osən' lega'aque': —De'e li chnia' le'e, yoguə' beṇə' chso'on de'e malən' nite'e xni'a de'e malən' ca esclabos.

³⁵ Beṇə' naquə esclabo caguə do tyempte gaque' cuent len familyən' gan' naque' esclabo, pero beṇə' golje' lao familyən', do tyempte gaque' cuent len familyən'.

³⁶ Na' šə nada' Xi'in Diozən' gona' ca əchojle xni'a de'e malən' par nič cuich gacle ca esclabos, de'e ličzə əchojlen'.

³⁷ Nežda' de que nacle xi'in dia che de'e Abraannə' pero bia'aczə cheyljlažə'əle naclən' gonle par nič gotle nada', na' chonle ca' čhedə' bito chone chele xtiža'anə'.

³⁸ Nada' cho'a dižə' che de'en bablo'i Xa'anə' nada', na' le'e chonle can' na xalen'.

³⁹ Na' gwse' beṇə' ca' Jeso'osən': —Neto' naquəto' xi'in dia che de'e Abraannə'.

Na' gož Jeso'osən' lega'aque': —Žalə' nacle doalje xi'in dia che de'e Abraannə' gonle can' ben de'e Abraannə' žalə' ca'.

⁴⁰ Na' la'anə'əczə babzejni'ida' le'e dižə' li de'en babsed blo'i Diozən' nada', le'e chene'ele gotle nada'. De'e Abraannə' cabi bene' can' chonlen'.

⁴¹ Tozəczə can' chonle len xalenə'.

Nach gwse'e le': —Tozə Diozən' naque' Xato' na' bito chzenagto' che nochlə beṇə'.

⁴² Na' Jeso'osən' gože' lega'aque': —Žalə' Diozən' naquə xale guaquele chia', čhedə' nada' gwza'a gan' zo Diozən'. Caguə za'a de'e bia'azəlaža'anə'. Len' əbsele'e nada'.

⁴³ ¿Bixəchen' cui chejni'ile de'en chnia' le'e? Bito chejni'ile čhedə' la' bito chene'ele gwzenagle xtiža'anə'.

⁴⁴ Gwxiye' nan' naquə xale. Nachən' chebeile chonle can' chene'enna'. Len naquən güet beṇə' dezd catə'an gwxe yəžlyon', na' cui chdalenən dižə' li che Diozən' čhedə' cui yo'o dižə' lin' lo'o yichjla'azda'ogü'e'enna'. Catə' chnen de'e güenlažə' chnen con can' naquə cuinei čhedə' naquan güenlažə' na' yoguə' dižə' güenlažə' za'an chei.

⁴⁵ Na' cabi chejle'ele chia' nada', chedə' nada' əchnia' le'e dižə' li.

⁴⁶ Ni tole cui gaquə əgwlo'ele de que babena' bi de'e malən'. Nada' cho'a dižə' li, ħbixchen' cui chejle'ele chia'?

⁴⁷ Beṇə' ca' zjənaquə xi'in Dioz choso'ozenague' che xtiže'enə'. Na' ca naquə le'e cui nacle xi'ine', de'e na'anə' bito chzenagle che'.

Ze'e galjə de'e Abraannə' bazocə Cristən'

⁴⁸ Na' beṇə' blao che nasyon Izrael cheton' gwse'ene': —Leiczeto' can' nato' de que le' naco' beṇə' Samaria na' de que chac tonto'onə'.

⁴⁹ Na' gož Jeso'osən' lega'aque': —Bito chac tonta'. Nada' əchnežjua' yelə' bala'an' che Xa'anə' na' le'e chnitle yelə' bala'an' chia'anə'.

⁵⁰ Nada' caguə chylja' no gon nada' yelə' bala'anə'. Xa'anə' choṇe' nada' yelə' bala'an, na' len' əgwlo'e non' napə dolə' na' non' cui napə dolə'.

⁵¹ De'e li chnia' le'e, notə'ətezə beṇə' choso'ozenag xtiža'anə', cuat n̄abia' yelə' gotən' lega'aque'.

⁵² Nach beṇə' blao che nasyon Izrael cheton' gwse'ene': —Na'a babeyož gwnezeteto' de que chac tonto'onə'. De'e xaxta'ocho Abraannə' gote' na' leczə de'e profet ca' beṇə' ca' gwso'e xtižə' Diozən' cana'. Na' le' nao' de que beṇə' ca' choso'ozenag chio' cuat n̄abia' yelə' gotən' lega'aque'.

⁵³ ĸEzaquə'əcho' le' ca de'e xaxta'ocho Abraannə'? Len' gote' na' leczə ca' de'e profet ca'. ĸNoxan' chacdo' naco'?

⁵⁴ Na' gwna Jeso'osən': —Žalə' nada' choe' cuina' yelə' bala'an, cabi zaquə' yelə' bala'anə'. Pero Xa'anə' choṇe' nada' yelə' bala'an, ben' nale naquə' Dioz chelen'.

⁵⁵ Le'e bito nombia'alene', pero nada' nombi'ane'. Žalə' nia' cui nombia'ane' gaca' beṇə' gienlaža' ca le'e. Nada' nombia'ane' ža, na' chzenaga' xtiže'enə'.

⁵⁶ De'e xaxta'ocho Abraannə' bebeine' gwyeyje'le de que le'ine' tyemp ni zoa' yežlyo ni. Na' bable'ine'en na'a na' zoe' mbalaz.

⁵⁷ Na' gwse' beṇə' blao che nasyon Izrael cheton' le': —Ni šiyon iz cuiṇə' žino'. ĸEna' n̄ezle'ido' de'e Abraannə'?

⁵⁸ Na' gož Jeso'osən' lega'aque': —De'e li əchnia' le'e, ca ze'e galjə de'e Abraannə' bazocə' nada'.

⁵⁹ Nach gosə'əzi'e yej par yoso'ošize'ene'en. Na' Jeso'osən' bocuaše'le na' beze'e yo'odao' əblaonə'. Bito gwsa'acbe'ine' cata' bedie' gwcholga'aque'enə' zjəyede'.

9

Jeso'osən' bene' par niĸ ble'i to beṇə' golje' nĸhole'

¹ Na' txen chdato' len Jeso'osən' cata' ble'ito' to beṇə' byo beṇə' golje' nĸhole'.

² Na' gožto'one': —Maestr, ĸno napə dolə' de'en goljə bengan' nĸhole'? ĸəle' o šə xaxne'enə'?

³ Na' Jeso'osən' gože' neto': —Benga golje' nĸhole' caguə por ni che xtole'enə', na' caguə por ni che xtolə' xaxne'enə', sino par niĸ la'alaon can' gon Diozən' len le'.

⁴ Cheyalə' goncho xšin Diozən' ben' bselə' nada' žlac n̄ede latjə. Gwžin cata' cuich gatə' latjə gonchon.

⁵ Žlac n̄ezoa' yežlyo nga chgua' be'eni' lo'o yichjla' aždao' beṇə'.

⁶ Beyož gwne' ca' gwcho'on xene'en lao yon' na' bene' beṇjw len xen' che'enə'. Na' gwdebe' beṇjon' jelao beṇə' lĸholən'.

⁷ Na' gože'ene': —Gwyey jəyedib jelaogo'onə' cho'a tanc de'en nzi' Siloe—. Na' Siloe zejzen dižə' Nselə'.

Na' gwyeyje' na' beyib jelaogü'e ca'. Na' beze'e jəyede' bachle'ine'.

⁸ Na' beṇə' gwliž che' ca' na' beṇə' ca' besə'ale'i le' yogua' las cata' n̄e'e nĸhole' gosə'əne': —ĸEcaquə bengan' bable'icho bedote chi'e chnabe' caridan'?

⁹ Bale' gosə'əne': —Bengan'.

Na' bale' gosə'əne': —Cabi naquə le' sino ca naquə bengan' naque'.

Na' le' gwne': —Nada'anə'.

¹⁰ Na' gwse'ene': —ĸNacxa goquən' gwzolao chle'ido'?

¹¹ Na' gože' lega'aque': —To beṇə' le Jeso'os bene' beṇjw na' gwdebe'en jelaogua'anə' na' gože' nada': “Gwyey cho'a tanc de'en nzi' Siloen' na' jəyedibən.” Na' gwya'a na' beyiba'an, na' gwzolao chle'ida'.

¹² Nach gwse' beṇə' ca' le': —ĸGanxa be'enə'?

Na' gože' lega'aque': —Bito n̄ezda'.

Beṇə' fariseo ca' gosə'əṇabene' be'enə' nac goquən' chle'ine'

¹³ Na' gosə'əche'e ben' goquə beṇə' lĸholən' gan' nitə' beṇə' fariseo ca'.

14 Na' naquə ža dezcanz catə'an ben Jeso'osən' benjon' de'en gwdebe' jelaō be'enə' par ble'ine'.

15 Na' beṇə' fariseo ca' leczə gosə'anabene' le' nac goquən' bachle'ine'. Na' le' gože' lega'aque': —Ben' beyone nada' gwdebe' benjon' jelaogua'anə' na' beyiban' na' gwzolaō chle'ida'.

16 Nach to čhopə beṇə' fariseo ca' gosə'ane': —Nezecho bito zo Diozən' len benga čhedə' bito chomba'anə' ža dezcanzən'.

Na' ba'le' gosə'ane': —¿Nac gon to beṇə' güen de'e mal gone' mi'agr quinga?

Na' gwsa'aque' čhoplə entr' lega'aque'.

17 Nach de'e yoblə gwse'e be'en goljə nčholən': —¿Bi nao' le' čhe ben' ben par ničh chle'ido'?

Na' le' gwne': —Naque' to profet beṇə' bselə' Diozən'.

18 Na' beṇə' blao čhe nasyon Izrael četon' bito gwse'ejle'e čhe ben' šə' len' golje' nčhole' na' n'a' bachle'ine' xte que gwsa'axe' xaxne'ena'.

19 Na' gosə'anabene' lega'aque' gwse'ene': —¿Ebengan' xi'inlen' ben' nale golje' nčhole'/? ¿Nacxa goquən' chle'ine' n'a'?

20 Na' gwse' xaxne'e ca' lega'aque': —Nezeto' de que bengan' xi'into'onə', na' de que golje' nčhole'.

21 Mas nac chaquən' bachle'ine' bito nezeto', nic nezeto' noxa ben par ničh bachle'ine'. Le' bazejəczene'. Lenəbe le', güe'ecze' dižə' naquən' goc čhe'.

22 Xaxne'e ca' gosə'ane' ca' de'en besə'əžebe' beṇə' blao čhe nasyon Izrael četo'onə', čhedə' lega'aque' bach zjənone'en de que notə'ətezə beṇə' güe'e dižə' de que Jeso'osən' naque' Cristən' ben' gwlej Diozən' par gaquəlene' nasyon četon', cabi əso'e latjə šo'oche' lo'o yo'oda'onə'.

23 De'e na'anə' gosə'ana xaxne'e ca': "Bazejəczene'. Lenəbe le'."

24 Nach de'e yoblə gwsa'axe' ben' goljə nčhol gwse'ene': —Be'elao' Diozən' na' gwzo'one' testigw de que clelan' babe'eleno' neto' dižə' bačhe. Neto' nezeto' de que Jeso'osən' naque' to beṇə' güen de'e mal.

25 Na' gwne': —Šə' naque' beṇə' güen de'e mal, bito nezda'. De'en nezda', nada' goca' beṇə' lčhol na' n'a' chle'ida'.

26 Na' de'e yoblə gwse'ene': —¿Bi benene' le'ena'? ¿Nac benen' par ničh bachle'ido'?

27 Na' gože' lega'aque': —Bagwnia' le'e na' cui chzenagle. ¿Bixčhen' chene'ele yenele de'e yoblə? ¿Elen le'e chene'ele gacle disipl čhe'ena'?

28 Na' gwsa'ade'ene' dižə' gwse'ene': —Le' naco' disipl čhe', pero neto' naquəto' disipl čhe de'e Moizezən'.

29 Nezeto' de que Diozən' be'elene' de'e Moizezən' dižə' cho'a, pero benga bito nezeto' gan' ze'ena'.

30 Na' ben' goljə nčholən' gože' lega'aque': —Nactequən' le'e cui nezele ga ze'ena', len babene' par ničh chle'ida'.

31 Na' nezecho de que Diozən' cabi chzenague' čhe beṇə' ca' chso'on de'e mal. Con beṇə' chso'ene' yelə' bala'an na' chso'one' can' chene'ene'ena', lega'acze' chzenag Diozən' čhei.

32 Dezd gwxe yežlyon' ni to conoṇə' yene de que bagwzo beṇə' chone' par ničh chle'i beṇə' goljə nčhol.

33 Žalə' cui zo Diozən' len le' caguə bi mi'agr gaquə gone'.

34 Na' beṇə' blao ca' gwse'ene': —Pendejw, len' goljo' nčholo' yelə' beṇə' mal čhio'onə', čəna le' əgwseddo' neto'onə'?

Na' besyə'əbeje'ene' fuer.

Beṇə' ca' zjənčhol yichjla'ažda'oga'aque'ena'

35 Gočhe'i Jeso'osən' de que habesyə'əbeje' be'ena' fuer, na' jašague'ene' gože'ene': —¿Echonlilažo'o le' Xi'in Diozən'?

36 Na' gož ben' le': —¿Noxa'an ža? señor, par ničh gonlilaža'ane'.

37 Na' gož Jeso'osən' le': —Nada'anə' ben' bable'ido' antsla' na' nada'anə' cho'elena' le' dižə'.

38 Nach be'ena' bzo xibe' be'elaogüe'e Jeso'osən', gwne': —Xana', chonlilaža'a le'.

39 Na' gwnach Jeso'osən': —Nada' za'a yežlyo nga par ničh la'alaon čhe beṇə' non' zjənapə dolə' na' non' cui zjənapə dolə'. Za'a chgua'a be'eni' par beṇə' ca' čhsa'acbe'ine' zjənčhol yichjla'ažda'oga'aque'ena', na' za'a par yeca'a be'eni' čhe beṇə' ca' čhsa'acquene' cui zjənčhol yichjla'ažda'oga'aque'ena'.

40 Na' ba'la beṇə' fariseo ca' nitə' galə'əzə gwse'ene' de'e nga. Na' gwse'e Jeso'osən': —¿Echacdo' len neto' nčhol yichjla'ažda'oto'onə'?

41 Na' gož Jeso'osən' lega'aque': —Žalə' cui čejni'ile bito bi xtolə'əle de. Pero por ni čhe de'en nale de que čejni'ile, de'e na'anə' deczə xtolə'əlen'.

10

Jempl che xle'ej xilə' ca'

¹ De'e li chnia' le'e, be'en cui cho'o cho'a puert xle'ej xilə' ca' na' ga yoblə chepe' par cho'e, beṇə' bguan be'enə'.

² Be'en cho'o cho'a puertən', le'enə' goye xilə'anə'.

³ Na' be'en chapə puert che xle'ej xilə' ca' chsaljue' par niçh cho'o beṇə' goyebən'. Na' xilə' ca' choso'ozenaguəb xtižə'enə' chedə' zjənombia'ab le', na' chaxe'eb cho'e laga'aguəb catə' chbeje'eb.

⁴ Na' catə' bagwleje' yoguə' bia che' ca' lo'o xle'ejga'aguəbən', chbialaogüe' laoga'aguəbən' na' chjəsə'ənaob le' chedə' zjənombi'ab ši'enə'.

⁵ Na' bito žjəsə'ənaob beṇə' yoblə, sino yesə'əxonjəb le' chedə' cui zjənombi'ab ši'enə'.

⁶ Jeso'osən' be'e jempl nga par bzejni'ine' beṇə' ca' ža'anə', pero bito gwse'ejni'ine' bi zejen de'en gože' lega'aque' ca'.

Jeso'osən' chgüia chye' chio'o ca to goye xilə' beṇə' chgüia chye' bia che' ca' binlo

⁷ Nach gozṇe Jeso'osən' gože' lega'aque': —De'e li achnia' le'e, nada' gwxaquə'əlebəda' ca cho'a puert che xle'ej xilə' ca'.

⁸ Yoguə' beṇə' goxoayag ca' babla'ac antslə ca nada' chəsə'əne' de que Diozən' bsele'e lega'aque' pero gwxaquə'əlebəga'aque' ca beṇə' bguan. Na' ca xilə' ca' cui choso'ozenaguəb xtižə' beṇə' cui zjənombi'ab, ca'aczən' beṇə' ca' chso'onlilažə' nada' cui choso'ozenague' che beṇə' goxoayag ca'.

⁹ Nada' gwxaquə'əlebəda' ca cho'a puert che xle'ej xilə' ca'. Xilə' ca' chəsə'yəyo'ob lo'o xle'ejga'aguəb na' chəsə'əchojəb par chəsə'əyiljəb de'e chsa'ob. Na' ca xle'ej xilə' ca' chcue'ejən lega'aque' par niçh cui bi gac chega'aguəb, ca'aczən' chcue'ēja' beṇə' ca' chso'onlilažə' nada' par niçh cui bi gac chega'aque'.

¹⁰ Beṇə' goxoayag ca' gwxaquə'əlebəga'aque' ca beṇə' bguan beṇə' ca' chda'ac lechguale con to de'e yesə'əbane', na' so'ote', na' yesə'ənitlaogüe'. Nada' za'a par niçh chnežjua' yelə' mban zejlicane che beṇə' ca' chso'onlilažə' nada' na' par niçh nite'e mbalaz juisy.

¹¹ Nada' chgüia chya' beṇə' ca' chso'onlilažə' nada' can' chon to beṇə' goye xilə' beṇə' chgüia chye' xilə' che' ca' binlo. Na' de'en chgüia chyega'aca'ane' chsanlažə' cuina' so'ot beṇə' nada'.

¹² Balə beṇə' ca' choso'oye' xilə' chesə'əzi'e laxjwga'aque', la' xilə' ca' bito zjənaquəb bia chega'aque'. De'e na'anə' chəsə'əbejyichje'eb na' choso'oxonje' catə' chəsə'əle'ine' za' no becoyo'o, chedə' bito zjənaque' xan xilə' ca'. Chso'e latjə chṇiz becoyo'onə' xilə' ca' na' choslasəb lega'aguəb.

¹³ Chəsə'əxonje' chedə' bito zjənži'ine' xilə' ca' de'en cui zjənaquəb bia chega'aque', con zjənaque' goyeb.

¹⁴ Nada' chgüia chya' beṇə' ca' chso'onlilažə' nada' ca to beṇə' goye xilə' beṇə' chgüia chye' xilə' che' ca' binlo. Na' nombi'a beṇə' ca' chso'onlilažə' nada', na' lega'aque' zjənombi'e nada'.

¹⁵ Nombi'aga'aca'ane' ca Xa'anə' nombi'e nada' na' nada' nombi'a Xa'anə'. Na' de'en chgüia chyega'aca'ane' chsanlažə' cuina' so'ot beṇə' nada'.

¹⁶ Na' nitə' beṇə' ga yoblə beṇə' cui zjənaquə beṇə' Izrael beṇə' so'onlilažə' nada' na' yoso'ozenague' chia'. Leczə' lega'aque' cheyalə' əgwto'ba' par niçh yoguə'əlo'lo' no so'onlilažə' nada' əsa'aque' toza' len ljuežjga'aque' na' toza' nada' ggüia gwya' yoguə'əlolga'aque'.

¹⁷ Chsanlažə' cuina' so'ot beṇə' nada' pero techlə yebana'. Na' chaquəche Xa'an' chia' de'en chazlažə'a chona' ca'.

¹⁸ Ni to cono yeque'e yelə' mban chia'anə' sino chsanlažə' cuina' so'ot beṇə' nada'. Napa' yelə' gwnabia'anə' par gwsanlažə' cuina' so'ote' nada', na' napa' yelə' gwnabia' par yeyas yebana' ladjo beṇə' guat ca'. Na' Xa'anə' babene' mendad gona' ca'.

¹⁹ Na' de'e yoblə gwsa'ac beṇə' blao che nasyon Izrael cheton' choplə por ni che dižə' ca' de'en gwse'enene' be'e.

²⁰ Zan beṇə' ca' gosə'əne': —Chac tonte'enə', bito chacbe'ine' bi dižə'an cho'e. ¿Bixchen' chzenagle che'?

²¹ Na' balə' gosə'əne': —Dižə' quinga caguə naquən ca che beṇə' chac tontən'. ¿Eguaquə gon to beṇə' chac tont par le'i beṇə' lchol?

Beṇə' blao che beṇə' Izrael ca' cuiczə gwse'enene' se'ejle'e che Jeso'osən'

²² Na' Jerosalennə' chac lni che yo'odao' əblao che neto' beṇə' Izrael de'en ne' "Dedication". Na' naquə tyemp zag.

²³ Na' Jeso'osən' chde' cha'ašil che yo'odao' əblaonə' part de'en chəsə'əne' "Cha'ašil che Salomon".

²⁴ Na' gwse'echj beṇə' blao che ṇasyon Izrael cheton' Jeso'osən' na' gwse'ene': —¿Bixchen' ṇe'e chono' par chaczejlažə'atecto' šə len' Cristən' ben' gwlej Diozən' par gaquəlene' ṇasyon cheton'/? Šə le'enə' Cristən', gwna neto' clar.

²⁵ Na' gož Jeso'osən' lega'aque': —Bagwnia' le'e na' cui chejle'ele. Miagr ca' de'en babena' len yelə' guac che Xa'anə' chəsə'əlo'en de que le'enə' bsele'e nada'.

²⁶ Na' le'e bito chejle'ele chia' chedə' cui nacle txen len beṇə' ca' chso'onjilažə' nada'.

²⁷ Nomb'a beṇə' ca' chso'onjilažə'e nada' na' lega'aque' choso'ozenague' chia'.

²⁸ Na' nada' chnežjoga'aca'ane' yelə' mban zejlicane, na' cuat yesə'əbiayi'e. Ni to cui no no əca'axəxj lega'aque' lao na'anə'.

²⁹ Xa'anə' bagwleje' lega'aque' par nič hğüia chyega'aca'ane'. Na' ni to cui no no gaquə əca'axəxj lega'aque' lao na' Xa'anə' chedə' nape' le'ezeleogüie' yelə' chnabia' xen.

³⁰ Nada' na' Xa'anə' tozə can' naquə yichjla'azda'oto'onə', tozə can' naquə yelə' guac cheto'onə' na' tozə can' chonto'.

³¹ Nach beṇə' blao che ṇasyon Izrael cheton' gosə'əzi'e yej par yoso'ošizə'ene'en.

³² Na' gož Jeso'osən' lega'aque': —De'e zan de'e güen bable'ile bena' len yelə' guac che Xa'anə'. ¿Non' de'e ca' babena' chonən par əgwšizə'əle nada' yejən'?

³³ Na' beṇə' blao ca' gwse'e le': —Caguə por ni che bi de'e güen de'en babeno'on əgwšizə'əto' le' yejən', sino por ni che chžia chnito'o Diozən'. Con beṇəchzə le' na' nao' de que naco' Dioz.

³⁴ Na' gož Jeso'osən' lega'aque': —Le'e chsedle Xtizə' Diozən' de'en nyoj gan' nan: “Nada' gwnia' de que le'e nacle ca Dioz.”

³⁵ Na' Xtizə' Diozən' de'en nyojən caguə de'e te cheina'. Na' lennə' nan de que Diozən' gwne' che beṇə' ca' əbnežjue' xtizə'ena' de que gwsa'aque' ca Dioz.

³⁶ Ca naquə Diozən' gwne' zjənaque' ca cuine', ¿bixchen' nale de que chžia chnita'a Diozən' de'en gwnia' naca' Xi'ine'? Le'enə' gwleje' nada' par gaquəlene' beṇəchən' na' bsele'e nada' yežlyo nga.

³⁷ Žala' de'e ca' chona'anə' bito zjənaquən de'en chon Xa'anə', bito šejle'ele chia'.

³⁸ Pero na' de'en zjənaquən de'en chone'ena', cheyalə' šejle'ele de que naca' Xi'ine' la'anə'əczə cui chejle'ele xtizə'anə'. Šə šejle'ele che de'e ca' chona'anə' na' ənezele de que Xa'anə' zoe' len nada' na' nada' zoa' len le'.

³⁹ Na' de'e yoble bosə'syie' naclən' gaquə ədole'e, pero bito besyə'əželene' naclən' so'one'.

⁴⁰ Na' gwsa'ato' len Jeso'osən' jəsoto' yešla'alə yao Jordannə' gan' gwzo de'e Juannə' antslə catə'an bchoe' beṇə' nis.

⁴¹ Na' zan beṇə' bda'aque' gan' zoto' par boso'ozenague' xtizə' Jeso'osən' na' gosə'əne' che': —La'anə'əczə de'e Juannə' ni to miagr cui bene', yoguə'əlo' de'en gwne' che benga naquən de'e li.

⁴² Na' beṇə' zan beṇə' nita' na' gwso'onjilažə'e Jeso'osən'.

11

Can' goquə catə'an got ben' le Lach

¹⁻² Na' goquən chacšene to beṇə' Betania beṇə' le Lach. Betania nan' naquən laž Maria na' Marta, na' lega'aque'ena' zjənaque' beṇə' zan Lachən'. Maria nga ben' bcuase' set zix ṇi'a Xancho Jeso'osən' na' bxie' ṇi'ena' len yišə' yichje'ena'.

³ Na' beṇə' zan Lachən' boso'osele'e rson gan' zo Jeso'osən' gwse'ene': —Xanto', be'en chacdo' chei chacšenene'.

⁴ Na' catə' gwneze Jeso'osən' na' gwne': —Yižgüe' che'ena' bito naquən de'e gattecze', sino par əye' Diozən' yelə' bala'anən' chacšenene' na' par nič nada' si'a yelə' bala'an, nada' naca' Xi'in Diozən'.

⁵⁻⁶ Gwde gwneze Jeso'osən' de que chacšene Lachən', nebega'ane' yechopə ža gan' zoe'ena' la'anə'əczə chaquene' che Martən', che beṇə' bile'ena' na' che Lachən'.

⁷ Nach gože' neto': —Ləšo'o Jodean' de'e yoblə.

⁸ Nach gožto'one': —Maestr, bi ža na'azən' gwsa'aclačə' beṇə' blao che ṇasyon chechon' yoso'ošizə'e le' yej. ¿Ena' de'e yoblə šejə' na'anə'?

⁹ Na' gwna Jeso'osən': —¿Ecaguə šizjən' orən' naquə težan'? Beṇə' chda teža bito chchegüe'e chedə' la' nye'eni'ina'.

¹⁰ Mas beṇə' chda še'elə chchegüe'e chedə' cuich nye'eni'. Ca'aczə naquən len nada', bito bi bi gaquə chia' žlac cuinə' əžin ža par so'ote' nada'.

¹¹ Gwde gwne' ca' gozne' neto': —Beṇə' migw checho Lachən' bagwtase', na' ša'a žjəyesbana'ane'.

¹² Na' gožto'one': —Xanto', šə bachtase'ena' goyacczene'.

¹³ Jeso'osən' gwne' ca' chedə' gwneze' bagot Lachən', na' neto' bento' xbab de que gwne' ca' che bišgalən'.

¹⁴ Nach Jeso'osən' gwne' neto' clar: —Bagot Laçhən'.

¹⁵ Na' chebeida' cui gwzoa' lao chacšenene', par niçh ña'a gona' ca šejle'echle chia'. Le'e šo'o gan' de'ena'.

¹⁶ Nach beña' lježjto' Tomasən' gože' neto': —Le'e šo'o par niçh len chio'o so'ote' ša bachso'ote' Jeso'osən'.

Tomas na'ana' ben' bososi'e Didimo cheda' naque' beña' cuaš.

Jeso'osən' chosbane' beña' guat ca'

¹⁷ Nach gweyto' len Jeso'osən' Betanian', na' catə' bžinto'ona' gwse' beña' ca' le' de que bagoc tap za bosocuša'e Laçhən'.

¹⁸ Na' Betanian' chi'in gaļa'əzə Jerosalenna' ca do gašjə legw.

¹⁹ Na' beña' zan beña' Izrael gwlaž cheto' ca' za' Jerosalenna' besə'əžine' gan' zo Martən' na' Marian' par chso'e lega'aque' yelə' chxenlažə' de'en got beña' zanga'aque'ena'.

²⁰ Nach Martən' catə' gwnezene' bazon əžinto' na' bchoje' bedəšague' neto', na' Marian' bito bchoje' ližga'aque'ena'.

²¹ Nach Martən' gože' Jeso'osən': —Xana', žalə' gwzo' catə'an gocšene beña' zana'ana' bito gote' žalə' ca'.

²² Pero la'ana' bagote', nezda' de que Diozən' gone' bitə'atezə de'en ənabdo'one'.

²³ Nach gož Jeso'osən' le': —Goban beña' zano'ona'.

²⁴ Nach Martən' gože'ene': —Nezda' de que gobane' catə'an yesyə'əban beña' guat ca' žan' šo'o fin che yežlyon'.

²⁵ Na' gož Jeso'osən' le': —Nada' chac chosbana' beña' guat ca' na' nada' ns'a'a yelə' mban zejlicane par beña' ca' chso'onlilažə' nada'. De'e na'ana' beña' ca' chso'onlilažə' nada' la'ana'əczə sa'ate', de yelə' mban zejlicane čhega'aque'.

²⁶ Na' notə'ətezə beña' chso'onlilažə'e nada' zjanape' yelə' mban zejlicane na' cuat ņabia' yelə' gotən' lega'aque'. ĆEchejli'o de'e nga?

²⁷ Na' gože'ene': —Xana', chejli'a de que naco' Xi'in Dioz. Chejli'a de que naco' Cristən' ben' babselə' Diozən' yežlyo nga par gaquəlene' neto'.

Jeso'osən' gwchežə' cho'a ba che Laçhən'

²⁸ Beyož gwna Martən' ca' nach beyeje' na' jəyeyeže' Maria bile'ena' žizizə: —Baza' Maestrən' na' chne' le'.

²⁹ Na' Marian' catə' benene' can' gož Martən' le' le'e gwzoža'ate' bide' gan' zoto' len Jeso'osən'.

³⁰ Na' caguə babžinto' lao yežən' ca orən', ņenagua'əto' gan' bedəšag Martən' neto'.

³¹ Na' beña' Jerosalen ca' nitə' len Marian' liže'ena', beña' ca' chso'e lega'aque' yelə' chxenlažə', catə' besə'əle'ine' gwza' Marian' nach gosə'ənaogüe'ene' chsa'aque'ene' cho'a ba na'an zde' zjačeže'.

³² Na' Marian' catə' ble'e gan' zoto'ona' ble'ine' Jeso'osən', na' bzo xibe' laogüe'ena' na' gože'ene': —Xana', žalə' le' gwzo' nga catə'an chacšene beña' zana'ana', bito gote' žalə' ca'.

³³ Na' catə' ble'i Jeso'osən' chbež Marian' na' leczə chəsə'əbež beña' Jerosalen ca' nžague'ena', de'e juisy de'e goquene' na' bžaglaogüe' lo'o yiçhja'ažda'ogüe'ena'.

³⁴ Na' gože' lega'aque': —ĆGa əbcuašə'alene'?

Na' lega'aque' gwse'ene': —Xanto', yo'o na' le'ido'.

³⁵ Na' gwchež Jeso'osən'.

³⁶ Na' gosə'əna beña' Jerosalen ca': —Le'e ggüiašč catequan' chaquene' che'.

³⁷ Na' baļa beña' ca' gosə'əne': —Le' nğan' bene' par niçh ble'i beña' lçhoj ca'. ĆEcui gaquan' žalə' bene' par niçh cui gat Laçhən'?

Jeso'osən' bosbane' Laçhən' ladjo beña' guat ca'

³⁸ Na' de'e yoblə de'e juisy de'e goque Jeso'osən' lo'o la'aždaogüe'ena'. Nach yoguə'əto' gweyto' cho'a ban' len Jeso'osən'. Na' ban' naquan to bloj na' da' to yej cho'inə'.

³⁹ Nach gož Jeso'osən': —Leca'a yejən'.

Na' Mart zan de'e beña' guatən' gože'ene': —Xana', bachļa' ben' zban, la' baçh goc tap za ña'a gote'.

⁴⁰ Na' gož Jeso'osən' le': —Bagwnia' le' šə chonlilažo'o nada' nach šejni'ido' bi zeje ca de'en gwlo'e Diozən' yelə' guac xen che'ena'.

⁴¹ Nach beña' ca' gosə'əque'e yejən'. Na' Jeso'osən' gwlis laogüe'en yobalə gwne': —Xa', choxcwleno' babzenago' chia'.

⁴² Nada' nezda' de que syempr chzenago' chia'. Pero ənia' ca' par niçh beña' ca' ža' nga se'ejle'e de que len' əbselə'o nada'.

⁴³ Na' beyož gwne' ca' lao orasyonə', belgüiže' de'e beña' guatən' gwne' zižjo gože'ene': —Laçh bechoj.

⁴⁴ Nach le'e bechojte Laçhən', zjənccheləyoy nī'a ne'e ca' cint de lachə' na' to bey nazjə laogüe'ənə'. Na' gož Jeso'osən' lega'aque': —Le'e yozəše' lachə'ənə' na' le'e gwsane' yeyeje'.

Boso'oxi'e yesa'əzene' Jeso'osən'

⁴⁵ Na' zan beñə' Jerosalen ca' beñə' ca' zja'ac len Marian' besə'əle'ine' miłagr de'en ben Jeso'osən' na' gwso'onlilaže'e le'.

⁴⁶ Pero bale' ja'aque' lao beñə' fariseo ca' jse'eže' lega'aque' can' bene' bosbane' Laçhən'.

⁴⁷ Nach bəxoz əblao che nasyon Izrael çeton' na' beñə' fariseo ca' besə'əto'be' yoguə'əloj beñə' ca' chəsə'ənabīa' nasyon çeton'. Nach boso'oxi'e gosə'əne': —çNaclə gonchon'? la' miłagr zannə' chon benga.

⁴⁸ La' šə gaquecho ljoye'ənə', yoguə' beñə' so'onlilaže'e le', nach da'ac beñə' nasyon Roma na' yoso'oziaye'e yo'odao' əblao checho nga na' len nasyon chechon'.

⁴⁹ Entr beñə' golə beñə' blao ca' toe' le Caifas na' naquache' bəxoz əblao ca izən'. Na' gože' lega'aque': —Le'e caguə bi nezelen'.

⁵⁰ Nic chonle xbab de que napən chio'o cuentən' tozə ben' gotcho lgua'a cuiayi' yoguə'əcho len nasyon checho nga.

⁵¹ Caifasən' naquəche' bəxoz əblao ca izən' na' caguə con gwne' ca' to gwłazze'ənə'. Dīoz nan' bene' par gwđixjui'e de que so'ote' Jeso'osən' por nasyon Izrael çeto'onə'.

⁵² Na' caguə so'ote'ene' par nasyon çeto' na'azənə'. Leczə so'ote'ene' par niç yoguə' beñə' ca' bagwlej Dīozən' par əque'e ca xi'in'e' gatə'ətezə nasyon, yesyə'əyaque' tozə so'elaogüe'ene'.

⁵³ Na' ža na' gwzəloao boso'oxi'e naclən' so'one' par so'ote'ene'.

⁵⁴ Na' de'e nan' bitoch gwđa Jeso'osən' zaquə'əlao entr beñə' gwłaz çeto' ca'. Na' gwzə'ato' gwyejto' to yež de'en nzi' Efrain, chi'in galə'əzə latjə dašən'. Na' gwzoto' na' len le'.

⁵⁵ Na' lni pascw che neto' beñə' Izrael bazon baözə. Na' beñə' zan beñə' za'ac to to yež ja'aque' Jerosalennə' antslə ze'e galə' lni pascon' par gwso'on cuinga'aque' xi'ilazə' can' na lei çeto'onə'.

⁵⁶ Na' besyə'əyilje' Jeso'osən', na' ca nite'e chy'o yo'odao' əblao çeton' gwse'e lježje': —çBī xbab chontgual'e? çəgüide' lni nga?

⁵⁷ Gosə'əne' ca' chedə' bəxoz əblao che nasyon Izrael çeton' na' beñə' fariseo ca' bagwso'one' mendad de que notə'ətezə beñə' əñezene' gan' zo Jeso'osən' gwzenene' lega'aque' par niç yesə'əzene'ene'.

12

Marian' chgüe'e set zix nī'a Jeso'osən'

¹ Na' xop ža antslə lni pascon', gwyejlen'to' Jeso'osən' Betanian' gan' zo Laçhən' ben' bosbane' ladjo beñə' guat ca'.

² Na' balə beñə' Betania ca' boso'osi'ini'e to xše' par Jeso'osən', na' Martən' bdie' de'en güe'ej gwdaoto' len le'. Na' Laçhən' chi'e cho'a mesən' txen len Jeso'osən' na' len neto' na' beñə' ca' yela'.

³ Na' Marian' de tya set zix che' de'e zaquə'əchgüei na' gwlo'en nī'a Jeso'osən'. Na' bxie' nī'ena' len yišə' yichje'ənə'. Na' doxen yo'onə' gwłə'achgua ze set zixən' gwlo'e nī'ena'.

⁴ Na' zo Jod Iscariotən', ben' naquə neto' txen. Le'ənə' banaquən əgwđie' Jeso'osən' lao na' beñə' ca' chəsə'əgue' i le'. Jodən' naque' xi'in' to beñə' le Simon. Na' Jodən' gwne':

⁵ —çBixchen' cui bete'e set zix nga? Zaquə'ən do tmlil gueyə' gueyoya. Na' mechən' de'en le'ine' chei əgwnežjue'en beñə' yašə' žalə' ca'.

⁶ Jodən' bene' xbabən' ca' caguə por ni che beyaše'ene' beñə' yašə' ca' sino por ni che naque' beñə' bguan. Len' bexe'e mech de'en bçhin yoguə'əto' na' gwłejlane' mechən'.

⁷ Nach Jeso'osən' gože'ene': —Ljoye'ənə'. Babene' de'en non gonene' nada' žan' əgaša'ana'.

⁸ Ca naquə beñə' yašə' ca', syempr nitə'əcze' len le'e, pero nada' caguə syempr soa' len le'e.

Bəxoz əblao ca' boso'oxi'e so'ote' Laçhən'

⁹ Na' beñə' zan beñə' Izrael gwłaz çeton' gwsa'acbe'ine' de que Jeso'osən' zoe' na'. Na' ja'aque', pero caguə por ni che Jeso'os na'azən', sino par besə'əle'ine' Laçhən', ben' bosban Jeso'osən' ladjo beñə' guat ca'.

¹⁰ Na' bəxoz əblao che nasyon çeton' leczə boso'oxi'e so'ote' len Laçhən',

¹¹ chedə' beñə' zan beñə' Izrael gwłaz çeton' ja'aque' na' gwso'onlilaže'e Jeso'osən' por ni che le'.

Jeso'osən' beyo'e Jerosalennə'

¹² Na' beteyo gwzə'ato' Betanian' len Jeso'osən' na' gwyejto' Jerosalennə'. Na' ca orən' beñə' zan chəsə'əžag Jerosalennə' beñə' zja'ac lni pascon'. Na' gosə'əñezene' de que Jeso'osən' yežine' Jerosalennə'.

¹³ Na' de'e na'ana' besə'əchoje' bedəsə'əleze' neto', zjənoxe'e no zin, na' chəsə'əgüe'e be' lban che' chəsə'əne': —Le' naco' Rei che nasyon Izrael chechon', goclenšga neto'. Sošgo' mbalaz le' baza'o nga, babselə' Xancho Diozən' le'.

¹⁴ Na' bžel to borrr dao' bia gwžia Jeso'osən' lao zde'. Goc can' nyojczən nan:

¹⁵ Le'e ža'ale Jerosalennə' bito žebel.

Le'e ggüiašč baza' Rei chelen' žie' to borrr dao'.

¹⁶ Na' neto' disipl che' bito gwyejñi'to' categazə de que goc che' con can' bosozoj de'e profet ca' beñə' ca' gwso'e xtižə' Diozən' cana'. Gwde gwso'ot beñə' Jeso'osən' na' Diozən' be'ene' yelə' bala'an xen, na' canan' jəyeza'alazə'əto' dižə' ca' zjənyoj che' na' gocbe'ito' gwso'one'ene' le' can' nyojənnə'.

¹⁷ Beñə' ca' gwnitə' len Jeso'osən' catə'an bolgüiže' Lachən' na' bosbane'ene' par bechoje' lo'o ban' gwso'e dižə' len beñə' ca' ža' syodan' can' bene'enə'.

¹⁸ De'e na'ana' bedəsə'əleze'ene' chedə' gosə'ənezene' ca mlagr de'en bene'.

¹⁹ Na' gosə'əna beñə' fariseo ca' entr lega'aque': —Bachle'ile cuiczə bi de gonchon'. Yoguə' benachən' zjəsə'ənao le'.

To chopə beñə' griego gwse'ene' əso'elene' Jeso'osən' dižə'

²⁰ Na' zjəlen balə' beñə' griego, beñə' ja'ac lñinə' par gwso'elaogüe'e Diozən'.

²¹ Beñə' quinga besə'əžine' gan' zo Lip beñə' Betsaida distrit che Galilean'. Na' gwsa'ata'əyoine' Lipən' gwse'ene': —Gwzi'ixenšga, chene'eto' güe'elento' Jeso'osən' dižə'.

²² Nach gwyej Lipən' jəye' Ndrəsən'. Nach Ndrəsən' len Lipən' jəsə'əye' Jeso'osən'.

²³ Nach Jeso'osən' gože' lega'aque': —Na'a bachžin ža so'ot beñə' nada' par nič Diozən' gone' nada' yelə' bala'an xen. Len' bsele'e nada' golja' beñəč.

²⁴ De'e li əchnia' le'e, šə to trigon' cui yexinjən catə' əxopən lao yon', chega'anczə tozən, pero šə yexinjən na' yela'an, de'e zan trigon' yeyaquən.

²⁵ Notə'ətezə beñə' chaquene' gone' par nič cui chi' saque'e o par nič cui no so'ot le', be'enan' cuiayi'. Na' notə'ətezə beñə' chsanlažə' cuine' chi' saque'e o so'ot beñə' le' por ni chia', bade yelə' mban zejlicane' che'enə'.

²⁶ Na' notə'ətezə beñə' chene'ene' gone' xšina'anə', cheyalə' gonlilaže'e nada' na' gwzenague' chia'. Na' ga'an soa' na' so ben' gon xšina'anə'. Na' beñə' ca' so'on xšina'anə', Xa'anə' güe'e lega'aque' yelə' bala'an.

Jeso'osən' gwduxje'e de que so'ot beñə' le'

²⁷ Bachžaglaogua' lo'o yichjla'aždaogua'anə'. ŽEchaquele nabda' Xa'anə' yosle' nada' lao de'e ca' ze'e gaquə' chia' na'a? Abi. Babida' par nič gaquəczə' chia' ca'anə'.

²⁸ Nach bene' orasyonnə' gwne': —Xa', ben par nič le' si'icho' yelə' bala'an.

Nach Diozən' ben' zo yoban' gwne' gože'ene': —Babena' ca gwxi'a yelə' bala'an, na' ze'e goncha' ca si'icha'anə'.

²⁹ Beñə' zan zjənžague' neto' ca orən' na' catə' gwse'ene' de'en gwna Diozən', balə' gosə'əne' de que gwñinnə'. Na' yebale' gosə'əne': —To anglən' əgwne' le'.

³⁰ Na' Jeso'osən' gože' neto': —Diozən' gwne' nada' zižjo caguə' par nič nada' ənezda' de que chzenague' chia'anə', sino par nič əneze le'enə'.

³¹ Bachžin ža catə' Diozən' əgwnežjue' castigw zejlicane' che beñə' ca' cui zjənombia' le'. Na' bachžin ža catə' gwxiye'ena' de'en chnabia' beñə' ca' cui zjənombia' Diozən' nit yelə' gwnabia' cheina'.

³² Na' catə' gwso'ote' nada' le'e yag corozən', gona' par nič yoguə'əlo' beñə' bagwlej Diozən' par əsa'aque' xi'ine' so'onlilaže'e nada'.

³³ Na' de'e ngan' gwne' chzejni'ine' neto' de que so'ot beñə' le' yoso'ode'ene' to le'e yag coroz.

³⁴ Nach balə beñə' zan ca' ža'anə' gwse'ene': —Neto' babeneto' choso'osed choso'olo'i beñə' can' na' Xtižə' Diozən' de'en nyojən, na' nezeto' nan de que Cristən' ben' gwlej Diozən' par gaquəlene' nasyon chechon' soe' zejlicane'. Na' le' nao' de que Diozən' bsele'e le' goljo' beñəč. ŽBixchen' nao' le' de que so'ot beñə' le' to le'e yag coroz? ŽEbselə' Diozən' le' goljo' beñəč?

³⁵ Nach Jeso'osən' gože' lega'aque': —Nada' za'a par əchgua'a be'eni' lo'o yichjla'aždao' beñəčən'. Na' yeto term da'ogan' soa' par əgwswd əgwlo'ida' le'e. Le'e šejle' xtižə'anə' žlac ne'e de latjə par nič cui cuiayi'ile zejlicane'. Beñə' ca' cui chse'ejle'e xtižə'anə' bito gsa'acbe'ine' de que yesə'əbiayi'e. Zjənaque' ca to beñə' chda gan' naquə' žcho' na' bito chacbe'ine' gan' chde'.

³⁶ Le'e gonlilažə' nada' na'a žlac ne'e de latjə par nič šo'o be'eni' chian' lo'o yichjla'ažda'olen' na' par nič əgwnežjwe be'eni' che yeziquə'əchlə beñə'. Gwde gwna Jeso'osən' ca' beze'e bocuaše'ene' lega'aque'.

Zan beñə' Izrael ca' bito gwso'onlilaže'e Jeso'osən'

³⁷ L̄a'ana'əczə besə'əle'i beṇə' Izrael gwlaḥ ḥeton' ben Jeso'osən' zan miḷagr, casi yogue'e bito gwso'onḷilaže'ene'.

³⁸ Na' de'en goc ca' goc complir can' bzoj de'e profet Isaiazən' ben' be' xtižə' Diozən' cana', nan:

Xanto', casi notono no choso'ozenag dižə' de'en chyixjue'eto'onə'.

Na' casi notono chsa'acbe'i de que babesə'əle'ine' blo'o yelə' guac ḥio'onə'.

³⁹ Bito goquə se'ejle'e, ḥedə' ḥac ḥega'aque' can' na yeto de'en bzoj de'e profet Isaiazən', nan:

⁴⁰ Diozən' babene' par niḥ nažjo yichjla'aždao' beṇə' quinga na' par niḥ zjənaque' beṇə' godenag.

Babene' par niḥ ḥəsə'əle'ine' pero cabi chsa'acbe'ine' bi zejen de'en ḥəsə'əle'ine'enə',

na' ḥse'enene' pero bito ḥse'ejni'ine' bi zejen de'en ḥse'enene'enə'.

Gosyə'ədinḷjei xtola'əga'aque'enə' na' gwso'elje' latjə yocobə Diozən' yichjla'ažda'oga'aque'enə' žalə' ḥse'ejni'ine'en na' žalə' chsa'acbe'ine' bi zejen.

⁴¹ De'e quinga gwna de'e profet Isaiazən' ḥedə' ble'ine' yelə' chey che'eni' ḥe Jeso'osən' na' be'e dižə' ḥe'.

⁴² L̄a'ana'əczə beṇə' zanch lao ṇasyon Izrael ḥeton' bito gwse'ejle'e ḥe Jeso'osən', bia'aczə zane' gwso'onḷilaže'ene', na' len no beṇə' gwnabia' ḥeto' ca'. Pero na' bito gwso'e dižə' de que ḥso'onḷilaže'ene' ḥedə' besə'əžebe' cabich əso'e beṇə' fariseo ca' latjə par so'e lo'o yo'oda'onə'.

⁴³ Gwse'enchene' so'e beṇəḥən' lega'aque' yelə' bala'an cle ca so'one' ca güe' Diozən' lega'aque' yelə' bala'an.

Xtižə' Jeso'osən' zjənaquən de'e žialao xen

⁴⁴ Na' Jeso'osən' gwṇe' zizjo gože' lega'aque': —Beṇə' ca' ḥso'onḷilaže' nada' caguə nada'əzan' ḥso'onḷilaže'e sino lenczə Xa'anə' ben' əbselə' nada'.

⁴⁵ Ben' chle'i nada' leczə chle'ine' Xa'anə' ben' bselə' nada'.

⁴⁶ Nada' za'a yežlyo nga par niḥ ḥgua'a be'eni' lo'o yichjla'aždao' beṇə' ca' ḥso'onḷilaže' nada'. Ḥgua'a be'eni' lo'o yichjla'ažda'oga'aque'enə' par niḥ cuich so'ontezə so'one' de'e malən'.

⁴⁷ Na' notə'ətezə beṇə' ḥse'ene xtižə'anə' na' bito choso'ozenague' ḥei caguə nada' ḥoglaogua'an ḥega'aque' de que zjənapə' dolə, ḥedə' bito za'a yežlyo nga par niḥ ḥoglaogua'an ḥe beṇəḥən' de que zjənapə' dolə' sino par niḥ gona' ca cui žjəya'aque' lao yi' gabilən' šə so'onḷilaže'e nada'.

⁴⁸ Xtižə'anə' de'en babi'ana' len lega'aque' ḥoglaon ḥega'aque' de que zjənapə' dolə' ḥedə' bito ḥse'ejle'e ḥia' na' nic choso'ozenague' ḥe xtižə'anə'. Ḥoglaon ḥega'aque' de que zjənapə' dolə' catə' əžin ža šo'o fin ḥe yežlyon'.

⁴⁹ Dižə' de'en babi'ana' bito bi'an de'e bia'azəlaža'a. Xa'anə' bselə'e nada' na' le'enə' none' mendad bin' cheyalə' nia' na' bin' əgwse' əgwlo'ida' beṇə'.

⁵⁰ Na' notə'ətezə beṇə' yoso'ozenag ḥe xtižə' Xa'anə' de'en none' mendad ḥo'elena' beṇəḥən', əgwnežjue' yelə' mban zejlicəne ḥega'aque'. De'e na'anə' ḥo'elena' le'e dižə' con can' bagwna Xa'anə'.

13

Gwdib Jeso'osən' ni'a disipl ḥe' ca'

¹ Na' ca naquə Jeso'osən', bedote chaquene' ḥe neto' chonḷilaže'əto' le' yežlyo nga. Na' nezene' de que baḥžin ža yeze'e yežlyo nga par yeyeje' gan' zo Xe'enə'. De'e na'anə' catə' ze'e za'alə ḷni pascon' blo'ichene' neto' can' lechguale chaquene' ḥeto'.

² Na' baḥ gwlo'o gwxiye'enə' xbabən' lo'o yichjla'aždao' Jod Iscariot xi'in Simonṇə' par əgwdie' Jeso'osən' lao na' beṇə' contr ḥe' ca'.

³ Na' neze Jeso'osən' de que Xe'enə' babene' par niḥ nape' le'ezeलाogüe yelə' ḥnabia' xen, na' nezene' de que gan' zo Dioz nan' gwze'e na' gan' zo Dioz nan' yeyeje'.

⁴ Na' lao chaoto' xše'enə' Jeso'osən' gwzože'e na' gwcu'a xadon ḥe'enə' na' gwxi'e to lachə' na' bḥeje'en lsine'enə'.

⁵ Nach gwxi'e nisən' gwde'en to lo'o ša' na' gwzolaogüe' gwdibe' ni'ato'onə' ca to mos. Na' bosbiže' ni'ato'onə' len lachən' de'e nchej lsine'enə'.

⁶ Na' catə' bžine' gan' chi' Simon Bedən', Bedən' gože' le': —Xana' žəle' ḥibo' ni'anə'?

⁷ Na' gož Jeso'osən' le': —De'e nga chona' cabi chejni'ido'on ṇa'a, pero gwyejni'ido'on tela.

⁸ Na' gož Bedən' le': —Le' cuat ḥibo' ni'anə'.

Na' Jeso'osən' gože'ene': —Šə cui ga'a ḥiba' le' caguə leno' nada'anə'.

⁹ Na' Bedən' gože'ene': —Xana' caguə ni'a na'azən', sino doxencza'.

¹⁰ Nach gož Jeso'osən' le': —Beṇə' nošə' nazjə, ni'e na'azə chyažje chibe', la' banaquæcə doxen cuerp che'enə' xi'ilažə'. Ca naquə le'e ža, naquæcəle xi'ilažə' la'aṇə'æcə caguə yoguə'ale.

¹¹ Jeso'osən' ņezene' non' əgwde le' lao na' beṇə' contr che' ca', na' de'e na'anə' gwne': "Caguə yoguə'ale nacle xi'ilažə'", na' zejen caguə yoguə'əto' naquəto' beṇə' la'aždao' xi'ilažə'.

¹² Na' catə' beyož gwdibe' ni'ato'onə', na' beyaz xadoṇ che'enə' na' bebi'e de'e yoblə cho'a mesən'. Na' gože' neto': —ĵEchejni'ile bi zejen de'en babena' len le'e?

¹³ De'e nga zejen. Le'e nsi'ile nada' Maestr na' Xanle, na' güenczən' nale chedə' can' naca'.

¹⁴ Na' nada' naca' Xanlen' na' nactia' Maestr chelen' bagwdiba' ni'alen' ca to mos, de'e na'anə' le'e leczə cheyalə' gaquəlen ljuəžjle ca to mos.

¹⁵ Bagwdiba' ni'alen' parzə nič gwlo'ida' le'e de que cheyalə' gonle can' babena'anə'.

¹⁶ De'e li əchnia' le'e notə'ətezə mos bito naque' blaoch ca xane'enə', ni ben' chej mendadən' cui naque' blaoch ca ben' chselə' le'.

¹⁷ Šə chejni'ile de'e quinga na' gonle can' nia'anə', nachən' sole mbalaz.

¹⁸ Caguə nia' ca' che yoguə'alen'. Nada' ņezda' nac naquə yichjda'aždao' le'e bagwleja' par nacle disipl čhia'. Pero na' gwleja' le'e par nič gaquə complir can' na Xtizə' Diozən' de'en nyojən nan: "Be'en gwdaolena' txen bablej bšošje' nada'."

¹⁹ Nada' əchnia' le'e de'e nga na'a antslə cuiṇə' gaquən, par nič catə' gaquən šejle'ele de que nada' naca' ben' bagwnia' le'e.

²⁰ De'e li əchnia' le'e ben' cho'elao' notə'ətezə beṇə' əchselə'a, nada'anə' cho'elaogüe'e. Na' ben' cho'elao' nada', ben' əbselə' nada' na'anə' cho'elaogüe'e.

Jeso'osən' be'e dižə' che ben' naquən əgwde le' lao na' beṇə' ca' chəsə'əgue'i le'

²¹ Beyož gwna Jeso'osən' de'e ca' bachžaglaogüe' lo'o yichjla'aždao'güe'enə', na' gwne' clar: —De'e li əchnia' le'e de que to le'e əgwdele nada' lao na' beṇə' ca' chəsə'əgue'i nada'.

²² Nach neto' bgüia' lao ljuəžjto' chaqueto' noto' chein' ne' ca'.

²³ Nach nada' čhi'a cuite'enə' chedə' chacchgüeine' čhia'.

²⁴ Na' Bedən' bene' seŋy len nada' par nič gwṇabda' Jeso'osən' no' chein' gwne' ca'.

²⁵ Nach bgüiga'a bao goža' Jeso'osən': —Xana', ĵnon'?

²⁶ Nach gož Jeso'osən' nada': —Be'en əgwnežjua' to pedas yetən' catə' bablo'oja'an xožen', le'enə'.

Nach blo'oje' yetən' xožen' na' bnežjue'en Jod Iscariot xi'in Simonṇə'.

²⁷ Na' beyož bnežjue' Jodan' yetən' le'e gwyo'o gwyazte Satanasən' de'en chnabia' de xio' ca' lo'o yichjla'aždao' Jodən'. Nach Jeso'osən' gože'ene': —De'en gono'onə' benən lğüegwə.

²⁸ Na' ni to neto' ža'ato'onə' cui gwyejni'ito' bixchen' gože' le' ca'.

²⁹ Jodən' noxe'e bols mechən' na' de'e na'anə' baləto' bento' xbab de que Jeso'osən' gože' le' šejle' žjəxi'e de'e chyažjeto' lao lnin' o de que cheyalə' əgwnežjue' lata' mechən' beṇə' yaša' ca'.

³⁰ Na' catə' beyož gwdao Jodən' pedas yetən' de'en bnežjw Jeso'osən' le', le'e bchojte'. Na' ca orən' bagol.

To de'e cobə de'e non Jeso'osən' mendad goncho

³¹ Na' gwde bchoj Jodən' Jeso'osən' gwne': —Diozən' bsele'e nada' golja' beṇəčh, na' na'a so'ot beṇə' nada' na' goṇe' nada' yełə' bala'aṇ xen. Na' leczə Diozən' si'e yełə' bala'aṇ xen ca de'en gaquə čhia'.

³² Na' ca naquə Diozən' si'e yełə' bala'aṇ ca de'en gaquə čhia', leczə le'enə' goṇe' nada' yełə' bala'aṇ, na' le'e solaote gone' nada' yełə' bala'annə' na'a.

³³ Xi'indaogua'a, yešlož da'ogan' soa' len le'e. Na' yeyilje nada', na' can' goža' beṇə' blao che nasyon Izrael chechon', leczə can' əchnia' le'e na'a de que gan' yeya'a bito gaquə sa'alenje nada'.

³⁴ Nach to de'e cobə chona' mendad gonle, de que gaque che ljuəžjle tole yetole can' chacda' chele, leczə can' le'e gaque che ljuəžjle tole yetole.

³⁵ Na' yesə'əneze yoguə'əloj beṇə' de que nacle disipl čhia' šə gaquəle che ljuəžjle tole yetole.

Jeso'osən' ne' de que Bedən' cui chebe' de que nombi'ene'

³⁶ Na' gož Bedən' le': —Xana', ĵgan' yeyejo'?

Na' gož Jeso'osən' le': —Gan' yeya'a bito gaquə denaogo' nada' na'a, pero telə denaogo'.

³⁷ Na' gož Bedən' le': —Xana' bixchen' cui gaquə denaogua' le' na'a? Gwsanlažə' cuina' so'ot beṇə' nada' laogüe de'en chacda' čhio' šə chonclən byen.

³⁸ Na' gož Jeso'osən' le': —ĵEchacdo' gwsanlažə' cuino' so'ot beṇə' le' laogüe de'en chacdo' čhia'? De'e li əchnia' le' de que bito cuež lecon' antslə ze'e gaquə šon las cui chchebo' de que nombi'o nada'.

14

Benə' ca' chso'onlilažə' Jesocristən' zjənombi'e Xe' Diozən'

¹ Bito gaquəžejlažə'əle čhia' nada'. Legonlilažə' Diozən', na' leczə legonlilažə' nada'.

² Gan' zo Xa' Diozən' naquən ca to yo'o xen gan' ža' de'e zan cuart. Gwnia' le' žalə' cui bi cuart de par le'e. Na' yeya'a žjəyeyenšaogua'a cuart par to tole.

³ Na' catə'an babeyož žjəyeyenšaogua'a cuart čhelen', yida' yetš'i' na' yečhi'a le'e socho txen par nič gan' soa' na' so le'e.

⁴ Banombi'ale gan' yeya'a na' baņezele naquən' gonle par yeda'acle na'.

⁵ Na' gož Tomasən' le': —Xanto', bito ņezeto' gan' yeyejo'. ŽNa' nacxa gaquən' əņezeto' nac gon'to' par yela'ato' na'?

⁶ Jeso'osan' gože'ene': —De'en cheyalə' gonle gonlilažə'əle nada' par nič yežinle gan' zo Xa'anə'. Nada' ņezda' na' chzejni'ida' yoguə'əlo' de'en naquə de'e li' che Diozən'. Na' nada' nsa'a yelə' mban zejlicəne par beņə' ca' chso'onlilažə' nada'. Ni to cono yežin gan' zo Xa'anə' šə' cui gonlilažə'e nada'.

⁷ Žalə' nombi'ayanə'əle nada', lente Xa'anə' nombi'ale žalə' ca'. Na' dezd ņa'a banombi'alene' na' bable'ile'ne'.

⁸ Na' gož Lipən' le': —Ben par nič le'ito' Xa'onə'. Lezən de'en chene'eto'.

⁹ Jeso'osan' gože'ene': —Lip, šša xen bagwzoa' len le'e, žəna' cuiŋə' gombi'o nada'anə'? Notə'ətezə beņə' bable'i nada' lenczə Xa'anə' bable'ine'. ŽBixčhen' nao' gona' par nič le'ile Xa'anə'?

¹⁰ ŽEcu' chejli'o de que nada' zoa' len Xa'anə' na' Xa'anə' zoe' len nada'? Dižə' quinga cho'a nada', caguə cho'an de'e bia'azəlažə'anə'. Xa' na'anə' zoe' len nada' na' len' chone' par nič cho'a dižə' quinga na' chona' yoguə'əlo' de'en chona'.

¹¹ Le'e šejle' čhia' ca' de'en ənia' de que zoa' len Xa'anə' na' le' zoe' len nada'. Na' šə' cui chejle'ele xtižə'anə', le'e šejle' čhia' por ni che de'en bable'ile chona'anə'.

¹² De'e li' əchnia' le'e ben' chonlilažə' nada', ca de'e ca' chona' leczə gone'en. Na' de'e zaquə'əch ca de'e ca' gone' chedə' nada' yeya'a gan' zo Xa'anə'.

¹³ Na' yoguə' de'e ənabele Xa'anə' gona' laogüe de'en chonlilažə'əle nada', gona'an par nič Xa'anə' si'e yelə' bala'an ca de'en gona' naca' Xi'ine'.

¹⁴ Bita'ətezə de'e ənabele gona' por ni che de'en chonlilažə'əle nada', nada' gona'an.

Jeso'osan' bene' lyebe sele'e Spirit che Diozən'

¹⁵ Šə' chaquele čhia' cheyalə' gonle can' nona' mendad gonle.

¹⁶ Na' nabda' Xa'anə' par əsele'e Spirit che'ena' len le'e par gaquəlenən le'e can' babena' nada'. Na' son len le'e zejlicəne. Spirit che Diozən' əgwzejni'in le'e de'en naquə de'e li'.

¹⁷ Beņə' ca' cui zjanombia' Diozən' bito chso'elaogüe'e Spiritan' chedə' bito chesə'əle'ine'en na' nic zjanombi'en. Pero le'e nombi'alən chedə' zon len le'e ņa'a na' gwžin ža catə' son lo'o la'ažda'olen'.

¹⁸ Bito gwcua'ana'a le'e ca gozebə. Güida' yeto nga gan' zole.

¹⁹ Na' yešlož da'ozə na' beņə' ca' cui zjanombia' Diozən' cabich yesə'əle'ine' nada', pero le'e gwle'ile nada'. Na' laogüe de'en zoa' nsa'a yelə' mban zejlicəne che beņə' chso'onlilažə' nada', de'e na'anə' le'e sole zejlicəne.

²⁰ Na' catə' əžin ža la' Spirit che Diozən' son lo'o la'ažda'olen' canan' əņezele de que nada' zoa' len Xa'anə', na' le'e zole len nada', na' nada' zoa' len le'e.

²¹ Ben' ņeze can' nona' mendad na' chone' can' əni'anə', bena'an chaque čhia'. Na' ben' chaque čhia' leczə chaque Xa'anə' che', na' gwzochcza' gaquəda' che' na' gona' par nič əņezene' de que zotezə zoa' len le'.

²² Na' Jodən' pero caguə Jod Iscariotən' gože' le': —Xanto' žbixčhen' gono' par nič neto' le'icheto' le' na' cui gono' par nič beņə' yoblə yesə'əle'ichene' le'?

²³ Na' Jeso'osan' gože'ene': —Le'e chaquele čhia' chzenagle xtižə'anə'. Na' Xa'anə' leczə chaquene' chele na' neto' desoto' len le'e.

²⁴ Beņə' ca' cui chsa'aque čhia' bito choso'ozenague' xtižə'anə'. Dižə' de'en chenele ənia' le'e, caguə cho'an de'e bia'azəlažə'anə', sino cho'a dižə' de'en chene'e Xa'anə' ben' əbselə' nada'.

²⁵ De'e quinga bagwnia' le'e žlac ņe'e zoa' len le'e.

²⁶ Na' Xa'anə' əsele'e Spirit che'ena' son lo'o la'aždao' le'e chonlilažə'əle nada' nič gaquəlenən le'e. Na' Spiritən' əgwzejni'in le'e yoguə'əlo' de'en cheyalə' əņezele na' gonən ca žjəyaza'aləžə'əle yoguə'əlo' de'en bagwnia' le'e.

²⁷ Chona' par nič so cuezle binlo len xbab de'en yo'o lo'o yichjla'ažda'olen' ca binlo zo chbeza' len xbab de'en yo'o lo'o yichjla'aždaogua'ana'. Nada' chona' ca zo chbezəchle binlo len xbab de'en yo'o lo'o yichjla'ažda'olen' cle ca chso'on beņačən' par so cuezle binlo len xbab de'en yo'o lo'o yichjla'ažda'olen'. Bito gaquəžejlažə'əle, nic žeble.

²⁸ Babenele can' bagwnia' de que yeya'a gan' zo Xa'anə', na' de que yida' de'e yoblə gan' zolen'. Žalə' chaquela čhia' can' cheyałə'əna', gobeile de'en yeya'a, čhedə' Xa'anə' zaquə'əche' ca nada'.

²⁹ Na'a ža bagwnia' le'e de'e ca' antslə cuiṇə' sa'aquən par nič catə' sa'aquən šejle'ele de que naca' ben' bagwnia' le'e.

³⁰ Bitoch gua'a dižə' zan len le'e čhedə' baza' gwxiye' de'en chnabia' beṇə' ca' cui chso'onjilažə' nada' na' tiłalenə nada'. Pero bito soin nada'.

³¹ Chona' con can' non Xa'anə' mendad par nič əneze beṇə'chə' de que chacda' čhe Xa'anə'. Na'a ža lešo'o šejə'chcho.

15

Jeso'osən' gwxaquə'əlebene' ca to yag oba

¹ Nada' gwxaquə'əlebədə' ca to yag oba de'en naquə le'ezelaogüe yag zaque'e. Xa'anə' gwxaquə'əlebene' ca ben' chonš'i' yaguən'.

² Na' le'e chonjilažə'əle nada' gwxaquə'əlebele ca xozə' yaguən'. To to xoze'e ca' cui bi frot chbian, chčhogue'en. Na' to to xoze'e ca' de'e chəsə'əbia frot, chpe'en par nič chbiachən frot zanch.

³ Can' banaquə yichjla'ažda'olen' čhedə' chzenagle xtiž'a'anə' de'en babi'a len le'e.

⁴ Lesotezə leso len nada' par nič nada' gaquə sotezə soa' len le'e. Ca čhe xozə' yag frotən', bito bi frot cuian to gwłazzen šə cui zon nca'an le'e yaguən', can' naquən len le'e, bito gaquə gonle de'en chazlažə' Diozən' šə cui sotezə sole len nada'.

⁵ De'e yoblə əhia' de que nada' gwxaquə'əlebədə' ca yag oban' na' le'e ca xoze'ənə'. Notə'ətezle šə zotezə zole len nada' na' nada' zotezə zoa' len le'e, gonchguale de'en chazlažə' Diozən'. Pero cuiczə gac gonle de'en chazlažə'ənə' to gwłazle.

⁶ Beṇə' cui zotezə zo len nada' əhoje' ca'ałə, ca čhe xozə' yag oban' de'e ca' chčhog ben' chonš'i' yaguən' na' chəsə'əbižən. Nach chtobe'en chade'en yi' par chse'eyən.

⁷ Šə le'e zotezə zole len nada' na' šə yo'o yichjle xtiž'a'anə' do tyempte, bitə'ətezə de'e chene'ele ənable len orasyonṇə' de'e si'icžlenə'.

⁸ Yela' bala'aṇ chzi' Xa'anə' catə'ən chonchguale can' chazlažə'ənə', na' bačh chlo'ele de que chonjilažə'əle nada' na' chzenagle čhia' can' cheyałə' gonle šə bachonchguale de'en chazlažə'ənə'.

⁹ Ca Xa'anə' chaquene' čhia', leczə ca' nada' bachacda' čhele. Le'e so legon ca gacbe'ile de que chacda' čhele.

¹⁰ Šə chonle can' nona' mendadən', nachən' gacbe'ile de que chacda' čhele, ca nada' chona' can' non Xa'anə' mendadən' na' chacbe'ida' de que chaquene' čhia'.

¹¹ Bagwnia' le'e ca' par nič sole mbalaz ca mbalazən' zoa' nada'. Che'enda' sole mbalaz juisy.

¹² De'e nga chona' mendad gonle, gaquela čhe ljuežjle tole yetole can' chacda' čhele.

¹³ Notono nla' beṇə' chaquechene' čhe ljuežje' mazəchlə can' chaque ben' chsanlažə' cuine' so'ot beṇə' le' par gaquəlene' beṇə' migw čhe' ca'.

¹⁴ Le'e nacle migw čhia' šə chonle can' nona' mendadən'.

¹⁵ Bitoch ənia' le'e mos čhia' čhedə' beṇə' zjənaquə mos bito zjəneze' bi chon xanga'aque'ənə'. Bania' le' migw čhia', čhedə' yoguə'əłə de'e ca' babenda' gwna Xa'anə' babzejni'ida'an le'e.

¹⁶ Cagelə le'e gwlejele nada' par naca' Xanle. Nada' bagwleja' le'e par chonjilažə'əle nada'. Na' chselə'a le'e par nič šejə'chle gonchguale can' chazlažə' Xa'anə' na' caguə de'e te čhe de'e ca' gonlen'. Na' šə gonle can' chazlažə'ənə', yoguə'əłə de'en ənabele Xa'anə' laogüe de'en chonjilažə'əle nada', gone'en.

¹⁷ De'e nga de'en chona' mendad gonle, de que gaquela čhe ljuežjle tole yetole.

Beṇə' ca' cui zjənombia' Diozən' chəsə'əgue'ine' beṇə' ca' choso'ozenag čhe Jeso'osən'

¹⁸ Bito yebanele de'en chəsə'əgue'i' beṇə' ca' cui zjənombia' Diozən' le'e. Legon xbab de que zgua'atec nadan' besə'əgue'ine' antslə ca le'e.

¹⁹ Žalə' nacle txen len beṇə' ca' cui zjənombia' Diozən', gwsa'aque'ne' čhele can' chsa'aque'ne' čhe beṇə' ca' zjənaque' txen. Nada' bagwleja' le'e par naole nada', na' bitoch nacle txen len beṇə' ca' cui zjənombia' Diozən', na' de'e na'anə' chəsə'əgue'ine' le'e.

²⁰ Le'e žjsa'alazə' de'en bagwnia' le'e: "Notə'ətezə mos bito naque' blaoh ca xane'ənə'." Can' baboso'olagzejə boso'olagzide' nada', leczə can' yoso'olagzejə yoso'olagzide' le'e. Žalə' boso'ozenague' xtiž'a'anə', leczə gosə'əzenague' xtižə'alen'.

²¹ Na' yoguə' de'e ca' so'one' len le'e čhedə' le'e chonjilažə'əle nada' na' lega'aque' bito zjənombi'e Xa'anə' ben' bselə' nada'.

²² Žalə' nada' cui bida', na' žalə' cui bia'a dižə' len lega'aque', bito zjənapə' dolə' ca naquən' chəsə'əgue'ine' nada'. Na' na'a cuiczə' bi de bi yoso'ode'ine' par yesə'əne' cui bi dolə' zjənapə'.

²³ Ben' chgue'i nada', lenczə' Xa' nan' chgue'ine'.

²⁴ Žalə' cui bena' entr lega'aque' miłagr de'e cuinə' gon ni to benə' yoblə, bito zjənapə' dolə' ca naquən' chəsə'əgue'ine' nada'. Pero na'a babesə'əle'ine' de'e ca' chona' na' bia'aczə' chəsə'əgue'ine' nada' na' len Xa'anə'.

²⁵ Pero na' chac ca' par ničh chac complir can' na Xtizə' Diozən' gan' nyojən nan: "Besə'əgue'ine' nada' sin cui bi bi de'e mal bena'."

²⁶ Bagwnia' le'e de que seła'a Spirit che Xa' Diozən' par gaquəlenən le'e na' par əgwzejni'in le'e de'en naquə de'e li. Spiritən' sa'an gan' zo Xa'anə' la' seła'an par güe'en xtiža'anə'.

²⁷ Na' leczə' ca' le'e güe'ele xtiža'anə', čhedə' bagwzole len nada' dezd catə'an gwzoloə chyxiuji'a xtiža' Xa' Diozən'.

16

¹ Bagwnia' le'e de'e ca' par ničh cui yebiguə'əle gosxanlə.

² Yesyə'əbeje' le'e lo'o yo'odao' čhega'aque' ca'. Na' bazon əžin ža catə' notə'ətezə benə' se'enene' so'ote' le'e so'one' xbab yebei Diozən' lega'aque' de'en so'one' ca'.

³ So'one' ca' len le'e čhedə' cui zjənombi'e Xa'anə' na' ni nada' cui zjənombi'e.

⁴ Na' bagwnia' le'e ca' par ničh catə' əžin ža gac ca' žjəsə'alazə'əle de que bagwnia' le'e can' gaquən.

De'e chon Spirit che Diozən'

Catə'an gwleja' le'e par nacle disipl čhia' bito gwnia' le'e yoguə' de'e ca' gac čhele, čhedə' gwnezdə' socha' len le'e.

⁵ Na' la'anə'əczə' yeya'a na'a gan' zo Xa'anə' ben' əbselə' nada', ni tole cui chnabele nada' bi zejen de'en yeya'anə'.

⁶ Na' de'en bagwnia' le'e de'e ca' bachacchgüeile lo'o la'ažda'olen'.

⁷ Pero de'e li əchnia' le'e napən le'e cuent yeya'a, la' šə cui yeya'a Spirit che Diozən' de'en gaquəlen le'e bito yedəson lo'o la'ažda'olen'. Na' de'en yeya'anə' əselə'an len le'e.

⁸ Na' catə'əch yidə'an əgwzejni'in benəčən' de que zjənapə' dolə', əgwzejni'in lega'aque' de que naca' le'e zelaogüe benə' güen, na' əgwzejni'in lega'aque' de que gatə' castigw zejlicəne che notə'ətezə benə' cui choso'ozenag čhia'.

⁹ Egwzejni'in lega'aque' de que zjənapə' dolə' de'en cui chso'onlilaže'e nada'.

¹⁰ Egwzejni'in lega'aque' de que naca' le'e zelaogüe benə' güen čhedə' yeya'a gan' zo Xa'anə' na' bitoch le'ile nada'.

¹¹ Na' əgwzejni'in lega'aque' de que gatə' castigw zejlicəne che notə'ətezə benə' cui choso'ozenag čhia', čhedə' gwxiye' de'en chnabia' benə' ca' cui zjənombia' Diozən' ban-čhoglaon čhei de que si'in castigw zejlicəne.

¹² Nedech de'e zan de'e ənia' le'e, pero zdebə' naquən na'a par šejni'ilen.

¹³ Pero catə' yedəso Spirit che Diozən' lo'o la'ažda'olen' par əgwzejni'in le'e de'en naquə de'e li, əgwsəd əgwlo'in le'e yoguə'əloł de'en cheyalə' ənezele čhia' nada'. Bito güe'en dižə' de'e bia'azaləže'i sino güe'en bitə'ətezə dižə' de'en chzene Xa'anə' len na' čhixjue'in le'e biquə' de'e ze'e za'ac.

¹⁴ Gožən nada' yełə' bala'an, čhedə' əgwzejni'in le'e čhia' nada'.

¹⁵ Xa'anə' babene' ca' nezdə' yoguə'əloł de'en nezene' na' de'e na'anə' gwnia' de que Spirit čhe'enə' əgwzejni'in le'e de'e ca' nezdə'.

Jeso'osən' gože' disipl che' ca' de que nite'e trist to tyemp dao' na' techlə yesyə'əbeine'

¹⁶ Yeto tyemp dao' le'e bitoch le'ile nada'. Na' techlə yeto tyemp dao' yoblə na' yezle'ile nada' nach yeya'a gan' zo Xa'anə'.

¹⁷ Na' balə'neto' disipl che' gož ljuēžjto': —žBi zejen de'e nga che'e chio'o de que yeto tyemp da'ozə na' bitoch le'ichone' na' de que techlə yeto tyemp dao' yoblə na' yezle'ichone'? žNa' bi zejen de'en ne' yeyeje' gan' zo Xe'enə'?

¹⁸ žBi zejen de'en ne' yeto tyemp da'ozə ža? Cuili bixčhen' ne' ca'.

¹⁹ Na' gočbe'i Jeso'osən' de que chene'eto' nabeto'one' bi zejenə', na' gože' neto': —žEde'e ngan' de'en chnabe ljuēžjle? žEchene'ele ənezele bi zejen ca' de'en gwnia' le'e de que yeto tyemp da'ozə na' bitoch le'ile nada', na' techlə yeto tyemp dao' yoblə na' yezle'ile nada'?

²⁰ De'e li čchnia' le'e de que bazon cuežle na' yegüine'ele na' benə' ca' cui zjənombia' Diozən' yesyə'əbeine'. Yeyašə'alazə'əle pero con to tyemp da'ozən' na' techlə yebeile.

²¹ Šə catə' chzan to no'ola, čžaglaogüe' lao chaque' bes che yełə' sannə'. Pero na' catə' bagoljə bda'onə' bitoch chone' xbab che de'en bžaglaogüe'enə' de'e tant chebeine' de que bagoljə yeto benəčh yežlyo nga.

²² Leczə can' len le'e, na'a sole trist, pero catə' yežagcho de'e yoblə cana' yebeile lo'o la'ažda'olen'. Na' ni to cono yeca'a yelə' chebei chelen'.

²³ Na' cata' babžin ža soa' gan' zo Xa'anə' de'e yoblə bito yažjele bi ənable gona' par le'e. De'e li əchnia' le'e bitə'ətezə de'e ənabele Xa'anə' laogüe de'en chonjilažə'əle nada', goŋe'en par le'e.

²⁴ Xte na'a cuiczə bi ne'e nabele Xa'anə' ye'elene' de que chnablen por ni che de'en chonjilažə'əle nada'. Na' na'a leŋabe Xa'anə' bi de'en ənabelene' ye'elene' ca', na' gone' can' ənabelene' par ničh sole mbalaz juisy.

Jesocristən' babene' par ničh gwxiye'enə' cuich nabi'an chio'o

²⁵ De'e zan de'e ca' bagwnia' le'e babzejni'ida'an len jempl. Ežin žan' catə' bitoch əgwzejni'ida' le'e len jempl sino clar chixjue'ida' le'e che Xa'anə'.

²⁶ Na' catə' babžin ža soa' gan' zo Xa'anə' de'e yoblə, cana'ach ənabele Xa'anə' bi de'en ənabelene' ye'elene' de que chnablen por ni che de'en chonjilažə'əle nada'. Na' bito ənia' le'e de que nada' naba' lao Xa'anə' par ničh gaquəlene' le'e.

²⁷ Cuinczə Xa'anə' chaquene' chele por ni che de'en bachaquele chia' na' de'en bachejle'ele de que gwza'a gan' zoe'enə'.

²⁸ Gan' zo Xa'anə' gwza'a babida' yežlyo nga. Na' na'a yeza'a yežlyo nga na' yeya'a gan' zo Xa'anə'.

²⁹ Na' neto' disipl che' gožto'one': —Na'a cho'o dižə'an clar. Bito cho'o dižə' len jempl de'e cui chejni'ito'.

³⁰ Na' chacbe'ito' de que než nle'ido' xbab che benəchən'. Bito chyažjdo' no əna le' bin' chse'ene'ene' yesə'ənežene'. De'e na'anə' chejle'eto' de que gwza'o gan' zo Diožən'.

³¹ Na' gwna Jeso'osən' neto': —ĴEŋa'a chejle'ele ža?

³² Gwžin or na' na'a baza'an catə' gasə'əlasle. To tole ca'ale xnež che chele na' əgwcu'a'anle toza'. Pero caguə zoa' toza'anə' cheda' Xa'anə' zoe' len nada'.

³³ Bagwnia' le'e ca' par ničh so cuezle binlo len xbab de'e yo'o lo'o yichjla'ažda'olen' laogüe de'en chonjilažə'əle nada'. Yežlyo nga čhi' saquə'əle, pero bito žeble, nada' babena' par ničh gwxiye'enə' cuich nabi'an le'e.

17

Jeso'osən' bene' orasyon par ničh gaquəlen Diožən' disipl che' ca'

¹ Gwde gwna Jeso'osən' ca', bgüie' yobalə na' gwne': —Xa', babžin or par gaquə chia' can' babžio' bia' gaquə. Beŋ nada' yelə bala'an par ničh leczə ca' nada' gona' le' yelə' bala'an, nadan' naca' Xi'ino'.

² Babeŋo' nada' yelə' chnabia' lao yoguə' beŋəch par ničh chnežjua' yelə' mban zejlicəne che yoguə'əlo' noquə' beŋə' ca' bagwlejo' par chso'onjilaže'e nada'.

³ Na' beŋə' ca' zjənapə yelə' mban zejlicənen' zjənombi'e le' ca tozon' zaco'o par güe'ela'oto', na' leczə zjənombi'e nada' Jesocrist ben' əbselə'ona'.

⁴ Babeŋa' le' yelə' bala'an yežlyo nga ca de'en babeyož bena' yoguə'əlo' de'en gwlo'o lao na'a gona'.

⁵ Na'a ža Xa', ben par ničh yezi'a yelə' bala'an chia'anə' catə' yela'a gan' zo'onə' ca yelə' bala'an de'en gwdapa' catə'an gwzoa' len le' antslə ze'e xe yežlyo nga.

⁶ Bagwlejo' balə beŋəch par chso'onjilaže'e nada' na' bablo'iga'acda'ane' naquən' naquə yichjla'aždaogo'ona' na' naquən' chono'. Zjənaque' xi'ino', na' beno' par ničh chso'onjilaže'e nada' na' chso'one' can' nono' mendadən'.

⁷ Na' bazjənežene' de que yoguə'əlo' de'en chona' na' yoguə' dižə' de'en cho'a za'an che cuino'.

⁸ Babe'elena' lega'aque' dižə' de'en beno' mendad güe'elenga'aca'ane', na' bazjənonen čega'aque'. Na' bachsa'acbe'ine' de que de'e liczə gwza'a gan' zo'onə', na' chse'ejle'e de que len' əbselə'o nada'.

⁹ Chnabda' le' gaquəleno' lega'aque'. Caguə chnabda' le' gaquəleno' yoguə' beŋəchən', sino gaquəleno' beŋə' ca' zjənaquə xi'ino', beŋə' ca' gwlejo' par chso'onjilaže'e nada'.

¹⁰ Na' yoguə' beŋə' ca' chso'onjilažə' nada' zjənaque' xi'ino'. Na' ca'aczən' naquən, notə'ətezə beŋə' zjənaquə xi'ino' leczə zjənaque' xi'ina'. Echzi'a yelə' bala'an de'en chso'onjilaže'e nada' na' de'en chso'one' bichlə de'en chso'one'enə'.

¹¹ Na' na'a caguə socha' yežlyo ngan', pero beŋə' quinga ničh'acze' yežlyo nga. Nada' bazeza'a gan' zo'onə'. Xa', naco' le'ezelaogüe beŋə' la'aždao' xi'ilažə'. Na' ca naquə beŋə' ca' gwlejo' par chso'onjilaže'e nada', bcuasə' bcue'ejga'aque' len de'e malən' por yelə' chnabia' chio'onə'. Bcuasə' bcue'ejga'aque' len de'e malən' par ničh əsa'aque' tozə len ljuežjga'aque'enə' ca chio'o naccho toza'.

¹² Bedote žlac zoa' len lega'aque' babcuasə' bcue'ejga'aca'ane' len de'e malə'n' por yelə' chnabia' chio'onə'. De'e na'anə' ni toga'aque' cui gwziayi' sino tozə' ben' banaquəczən cuiayi'e par nič gaquə complir can' na Xtižo'onə' de'en nyojən.

¹³ Na' na'a bazeza'a gan' zo'onə', na' cho'a dižə' quinga lao orasyonna' žlac ne'e zoa' yežlyo nga par nič lega'aque' nitə'əchgüe' mbalaz ca mbalazən' zoa' nada'.

¹⁴ Nada' babe'elenga'aca'ane' xtižo'onə'. Pero na' beņə' ca' cui zjənobbia' le' chəsə'əgue'ine' beņə' ca' chso'onjilažə' nada' por ni che de'en cuich zjənaque' txen len lega'aque', ca nada' cui naca' txen len beņə' ca' cui zjənobbia' le'.

¹⁵ Na' ca naquə beņə' ca' chso'onjilažə' nada', caguə chnabda' le' yeca'aga'aco'one' lao yežlyo ngan', sino chnabda' le' par əgwcuasə' əgwcu'e'ejga'aco'one' len de'en chon gwxiye'ena'.

¹⁶ Bito zjənaque' txen len beņə' ca' cui zjənobbia' le' ca nada' cui naca' txen len beņə' ca' cui zjənobbia' le'.

¹⁷ Ben par nič beņə' ca' chso'onjilažə' nada' so'on cuinga'aque' lažə' na'onə' laogüe de'en bazjənombi'e dižə' li chio'onə'. Yoguə'əlolte de'en babzejni'ido' lega'aque' naquən de'e li.

¹⁸ Len' bseļo'o nada' yežlyo nga par chzejni'ida' beņačan' dižə' li chio'onə', na' lecza ca' nada' bachsela'a lega'aque' par yoso'ozejni'ine' beņačan' dižə' li chio'onə'.

¹⁹ Zoa' chon cuina' lažə' na'onə' chedə' chacda' che beņə' ca' chso'onjilažə' nada'. Na' chona' ca' par nič lega'aque' so'on cuinga'aque' lažə' na'onə' laogüe de'en bazjənombi'e dižə' li chio'onə'.

²⁰ Na' ca naquə chnaba' gaquəleno' beņə' ca', bito chnaba' gaquəleno' lega'acze' sino lecza gaquəleno' beņə' ca' so'onjilažə' nada' catə' əse'enene' dižə' de'en əsoe' beņə' ca'.

²¹ Xa', ben par nič yoguə'əlolte' əsa'aque' tozə' len ljuəzjga'aque' ca le' naco' tozə' len nada' na' nada' naca' tozə' len le'. Ben ca əsa'aque' tozə' laogüe de'en zjəngode'e txen len chio'o, par nič beņə' ca' cui zjənobbia' le' se'eļle'e de que len' əbseļo'o nada'.

²² Babeno' par nič chsa'acbe'i beņə' de que noņo' nada' yelə' bala'aņ, ca'aczən' chona' nada' par nič chsa'acbe'ine' de que chnezjua' lega'aque' yelə' bala'aņ. Na' chona' ca' par nič əsa'aque' tozə' len ljuəzjga'aque' ca chio'o naccho toza.

²³ Lega'aque' zjəngode'e txen len nada' na' nada' ngoda'a txen len le' nič yoguə'əcho gaccho tozə' na' ca' beņə' ca' cui zjənobbia' le' yesə'əņezene' de que len' əbseļo'o nada' na' de que chacdo' che beņə' ca' zjəngodə' txen len nada' can' chacdo' chia'.

²⁴ Xa', bachacdo' chia' antslə ze'e xə yežlyo nga. De'e na'anə' beno' nada' yelə' chey che'eni'inə'. Na' che'enda' de que beņə' ca' bagwlejo' par chso'onjilaže'e nada' nite'e len nada' gan' so'anə' par nič yesə'əle'ine' yelə' chey che'eni' chia'anə'.

²⁵ Xa', le' naco' le'ezelaogüe beņə' güen, na' ca naquə beņə' ca' cui chso'onjilažə' nada' bito zjənombi'e le', pero nada' nombi'a le' na' beņə' ca' bagwlejo' par chso'onjilaže'e nada' bazjəņezene' de que len' əbseļo'o nada'.

²⁶ Na' babena' par nič zjəņezene' can' naquə yichjla'āzdaogo'onə' na' can' chono', na' ne'e gonczca' ca yesə'əņezene'. Chzejni'iga'acda'ane' can' naquə yichjla'āzdaogo'onə' na' can' chono' par nič əsa'acbe'ine' de que chacdo' chega'aque' can' chacdo' chia' nada' na' par nič sotezə' soa' len lega'aque'.

18

Jodən' bdie' Jeso'osən' lao na' soldad ca'

¹ Na' ca beyož gwna Jeso'osən' de'e ca', neto' disipl che' gwza'ato' len le' gwyejto' šļa'a yao Sedron gan' gotə' to güert, na' gwyo'oto' len le'.

² Na' Jodən' ben' banaquən gone' Jeso'osən' lao na' beņə' ca' chəsə'əgue'i le' nombi'e güertən', chedə' zan las bagwyejto' len Jeso'osən' lo'o güertən'.

³ Na' bxož əblao ca' na' beņə' fariseo ca' bosə'osele'e xonj soldad na' len xa'ag yo'odao' ca' zja'aclene' Jodən' par jəsə'əxene' Jeso'osən' lo'o güertən'. Zja'aque' gan' zo Jeso'osən' zjənoxe'e lintern, yi' yech na' spad.

⁴ Jeso'osən' baņezene' yoguə'əlol de'en gaquə che', nach bchoje' jəsague' lega'aque' nach gože': —čNon' cheyiljle?

⁵ Na' gwse'ene': —Jeso'os beņə' Nasaret.

Na' gož Jeso'osən' lega'aque': —Nada'anə'.

Na' len Jodən' lega'aque', ben' banaquən gone' Jeso'osən' lao na'aga'aque'ena'.

⁶ Na' catə' gože' lega'aque': “Nada'anə”, le'e besyə'əbiguə'əte' gosxanlə' na' gosə'əbixə' gwsa'ate'e lao yon'.

⁷ Na' de'e yoblə gože' lega'aque': —čNon' cheyiljle?

Na' lega'aque' gosə'əze'ene': —Cheyiljto' Jeso'os beņə' Nasaret.

⁸ Na' gwna Jeso'osən': —Bagwnia' le'e de que nada'anə'. Na' šə' nadan' cheyiljle, le'e güe' latjə žjəya'ac beņə' quinga.

⁹ Gože' ca' par nič goc complir can' gwne' de que ni to beṇə' ca' bagwlej Diozən' par chso'nlilaže'ene' cui yesə'əbiayi'e.

¹⁰ Na' Simon Bedən' no'e to spad na' golje'en gwchogue' nag licha xmos beṇə' gwnabia' che bχoz ca'. Na' mosən' le' Malco.

¹¹ Na' Jeso'osən' gože' Bedən': —Bego'o spad chio'onə' lo'o liže. ¿Echaquele gonle par nič cui chi' saca'a can' babsi' Xa'ana' xneze chi' saca'a?

Gosə'əche'e Jeso'osən' lao ben' le Anas

¹² Nach sołdad ca' len capitan chega'aque'ena' na' zjəlen xə'ag yo'odao' che nasyon Izrael chton' gosə'əzene' Jeso'osən' na' bosə'ocheje'ene'.

¹³ Na' gosə'əche'ene' zgua'atec lao Anas xta'obin' che Caifasən'. Caifasən' naquəche' bχoz əblao che nasyon chton' ca izən'.

¹⁴ Na' Caifas na'ana' babnežjue' beṇə' blao che nasyon Izrael chton' consejon' de que napən lega'aque' cuent tozə ben' so'ote' lgua'a yesə'əbiayi' yogue'e len nasyon chto'onə'.

Bedən' bito gwchebe' šə lene' Jeso'osən'

¹⁵ Simon Bedən' na' nada' jənaoto' Jeso'osən'. Na' nombia' bχoz əblaonə' nada'. De'e na'ana' goc gwyo'a len Jeso'osən' chyo'o che bχoz əblaonə'.

¹⁶ Na' Bedən' bega'ane' cho'a puertən' fuerlə. Na' bechoja' na' be'elena' no'olən' chapə cho'a puertən' dižə', nach gwlo'o no'olən' Bedən' chedə' nombia' bχoz əblaonə' nada'.

¹⁷ Nach no'olən' chapə cho'a puertən' gože' Bedən': —¿Ecaguə leno' len' naco' disipl che be'enə'?

Na' gwne': —Bito lena' nada'.

¹⁸ Na' mos ca' na' xə'ag yo'odao' ca' bagosə'əbeque' yi' ya'alj chedə' chac zag. Na' zjəzeche' cho'a yi'inə' par chəsyə'əže'ine'. Na' len Bedən' zeche' len lega'aque' cho'a yi'inə' par cheže'ine'.

Gosə'anabene' Jeso'osən' che de'en chsed chlo'ine'

¹⁹ Na' bχoz əblaonə' gwṇabene' Jeso'osən' che neto' disipl che' na' che de'en chsed chlo'ine'.

²⁰ Nach Jeso'osən' gože'ene': —Nada' zaquə'əlao babi'a dižə' len beṇə'chən'. Syempr babsed blo'ida' lo'o yo'odao' checho ca' na' lecza ca' lo'o yo'odao' əblaonə' gan' chəsə'əzəg yoguə' beṇə' Izrael gwlaž chechon'. Bito bi bi dižə' ne'e gua'a bgašə'əzə.

²¹ ¿Bixchen' chnabdo' nada'? Gwṇabe beṇə' ca' bagwse'ene' de'en babsed bablo'ida'. Lega'aque' zjənezene' bi dižə'ən babe'elenga'aca'ane'.

²² Gwde gwna Jeso'osən' ca', to xə'ag yo'odao' beṇə' zechan' gwdape'e xague'ena', nach gože'ene': —¿Eca' choži'o xtižə' ben' naquə bχoz əblaonə'?

²³ Nach gož Jeso'osən' le': —Šə bi de'e mal bagwnia', be' dižə' che bi de'e malən'. Na' šə gwnia' de'e güen, ¿bixchen' chgapo' nada'?

²⁴ Nach Anasən' bdi'e Jeso'osən' ncheje' lao Caifasən' ben' naquəch bχoz əblaonə'.

De'e yoblə Bedən' bito gwchebe' šə lene' Jeso'osən'

²⁵ Na' Bedən' ne'e zeche' cho'a yi'inə' par cheže'ine' na' beṇə' ca' zjəzecha na' gosə'əze'ene': —¿Ecaguə lecza lenon' naco' disipl che be'enə'?

Na' bito gwchebe', na' gwne': —Bito lena' nada'.

²⁶ To xmos beṇə' gwnabia' che bχoz ca' naque' family che ben' əgwchog Bedən' nague', na' gože' Bedən': —¿Ecaguə zle'ida' le' len Jeso'osən' lo'o güertən'?

²⁷ Na' Bedən' de'e yoblə bito gwchebe', na' le'e gwchežte to lecw.

Gosə'əche'e Jeso'osən' lao Pilatən'

²⁸ Na' do che'eni'ilas bχoz əblao ca' gosə'əbeje' Jeso'osən' gan' zo Caifasən' na' gosə'əche'ene' gan' chon Pilatən' yelə' jostisən'. Na' lega'aque' bito gwso'e len Jeso'osən' gan' chon Pilatən' yelə' jostisən' chedə' segon costombr chega'aque' bito gaquə'əsa'ogüe' de'e ca' gwso'one' par xše' lni pascon' šə so'e lo'o yo'o che beṇə' ca' cui chəsə'ənao costombr chega'aque' ca'.

²⁹ De'e na'ana' Pilatən' bchoje' gan' nita' beṇə' blao che nasyon Izrael chton' na' gože' lega'aque': —¿Bi ben bengan'? ¿Ede bi de'e chaole xya?

³⁰ Na' gwse'ene': —Žalə' bengca cui naque' beṇə' mal bito əgwdeto'one' lao na'onə'.

³¹ Na' gož Pilatən' lega'aque': —Le'e yech'e na' le'e gon yelə' jostis che'ena' segon lei chelen'. Na' beṇə' blao che nasyon Izrael chton' gwse'ene': —Bito bi lsens chto' de par no gotto'.

³² Ca goquan' goc complir can' gwna Jeso'osən' bzejni'ine' naquan' gaquə' so'ote'ene'.

³³ Nach Pilatən' beyo'e gan' chone' yelə' jostisən', na' goxe' Jeso'osən' nach gože'ene': —¿Elen' naco' Rei che beṇə' Izrael ca'?

³⁴ Jeso'osən' gože'ene': —¿Econ de'e babidzən yichjo'onə' nao' ca', o šə beṇə' yoblə gosə'əne' le' ca'ana'?

³⁵ Pilatən' gože'ene': —¿Echacdo' naca' nada' beṇə' Izraelən'? Beṇə' gwlaž chio' ca' na' bχoz əblao chele can' bosə'odie' le' lao na'a nga. ¿Bi de'e xinjnən' beno'?

³⁶ Nach Jeso'osən' goze'ene': —Nža'alə can' chnabia' nada' na' nža'alən' chəsə'anabia' notə'ətezəchlə beṇə' gwnabia'. Yelə' gwnabia' chi'ana' bito za'an che beṇə' ža' yežlyo nga. Žala' za'an che beṇə' ža' yežlyo nga beṇə' ca' chəsə'anabi'ana' yesə'ədile' par nich cui gaca' lao na' beṇə' Izrael gwlaž chia' quinga. Pero yelə' chnabia' chia'ana' bito za'an che yežlyo nga.

³⁷ Nach gož Pilatən' le': —ĵEṇa' rein' naco'?

Na' gwna Jeso'osən'. —De'e lin' bagwnao' de que nada' naca' rei. Babida' yežlyo nga golja' par nich nabi'a na' par nich əgwzejni'ida' beṇə'chən' dižə' li che Diozən'. Beṇə' ca' bachoso'ozenag che dižə' li che Diozən' leczə' choso'ozenague' chia'.

³⁸ Nach gož Pilatən' le': —Culli bin' naquə' dižə' lin'.

Gosə'əchoglaogüe'en so'ote' Jeso'osən'

Na' beyož gwna Pilatən' ca' bchoje' yetši'i gan' nitə' beṇə' blao che nasyon Izrael cheton' na' gože' lega'aque': —Bito bi chla'alaon šə' bi dolə'əna' napə' benga.

³⁹ Na' ca' naquə' de costombr chele de que to beṇə' presən' gwsana' lao lni pascon', ĵəchene'ele gwsana' benga naquə' Rei che le'e beṇə' Izrael?

⁴⁰ Nach gwso'osye'e gosə'əne': —Bito gwsano' be'ena'. Barrabas na' əgwsano'.

Len Barrabasən' naque' to beṇə' bguan.

19

¹ Nach ben Pilatən' mendad gosə'əyine' Jeso'osən'.

² Na' soldad ca' gwso'one' to coron de xis yešə' na' bosə'ožine'en yichje'ena'. Na' bosə'oquacue'ene' to clas lachə' morad ca' de'en chəsə'əchin rei ca'.

³ Na' gwo'onene' borl gosə'əne': —Biba Rei che beṇə' Izrael.

Na' gosə'əgape'e xague'ena'.

⁴ Nach Pilatən' bchoje' chyo'onə' de'e yoblə' na' gože' beṇə' Izrael ca' ža'ana': —Na'a cueja'ane' par nich ənezele ca' xyan' de'en chaole che', ni to de'e xinj cui cheželda' šə' bin' none'.

⁵ Na' bchoj Jeso'osən' chyo'onə', zo coron de yešə'ana' yichje'ena', na' nyaze' lachə' moradan'. Na' gož Pilatən' lega'aque': —Le'e ggüia, nga zecha be'ena'.

⁶ Na' bəxoz əblao ca' na' xə'ag yo'odao' ca', cata' besə'ale'ine' le' gwso'osye'e gosə'əne': —ĵBde'e le'e yag corozən'! ĵBde'e le'e yag corozən'!

Pilatən' gože' lega'aque': —Le'e leche'e na' legwde'e le'e yag corozən' chedə' ca' xyan' chaole che', ni to de'e xinj cui cheželda' šə' bin' none'.

⁷ Na' gwse' beṇə' blao che nasyon Izrael cheton' le': —Segon lei cheto' de'en de cheyałə' gotchone' chedə' ne' naque' xi'in Dioz la'ana'əczə' naque' con to beṇə'chzə'.

⁸ Bachžeb Pilatən' ca' de'en bachaquən', na' cata' benene' gosə'əne' ca' che Jeso'osən' nachlə' bžebəche'.

⁹ Nach beyo'o Pilatən' len Jeso'osən' de'e yoblə' gan' chone' yelə' jostisən'. Na' gože' Jeso'osən': —ĵGa beṇə' le'?

Pero Jeso'osən' bito boži'e xtiže'ena'.

¹⁰ Nach Pilatən' gože'ene': —ĵEcu' choži'o xtiža'ana'? ĵEcu' nezdə'ona' nada' napə' yelə' chnabia' par gwsana' le' na' napə' yelə' chnabia' par əgwda' le' le'e yag corozən'?

¹¹ Jeso'osən' gože'ene': —Bito bi yelə' gwnabia' napo' len nada' žala' Diozən' cui noṇe'en le'. Na' ben' əbde nada' lao na'onə' dolə' xench nape' cle ca' le'.

¹² Nach gwdiłjlažə' Pilatən' naclə' gone' əgwsane'ene'. Pero beṇə' blao che nasyon Izrael cheton' gwso'osye'e gosə'əne': —Šə' əgwsano' benga, contr Rei Sesar nan' gono' šə' ca'. Notə'ətezə beṇə' ne' de que naque' rei, contr Rei Sesarən' chone'.

¹³⁻¹⁴ Nach Pilatən' beyož benene' de'en əgwse' beṇə' ca' le', gwleje' Jeso'osən' chyo'onə'. Na' leczə' bchoj le' chyo'onə' gan' nao yej, gan' nzi'in dižə' ebreo Gabata. Na' gwchi'e gan' chbi'e cata' chone' yelə' jostisən'. Nach gože' beṇə' blao che nasyon Izrael cheton': —Nga zo Rei chelen'.

Na' do gobiž cata'ən gože' lega'aque' ca', na' beṇə' Izrael gwlaž cheto' ca' choso'osi'ini'e par lni pascon' žana'.

¹³ Nach lega'aque' gwso'osye'e gosə'əne': —ĵGwcue'le' ĵBde'e le'e yag corozən'!

Na' gož Pilatən' lega'aque': —ĵErei chele nga gona' mendad yoso'ode'ene' le'e yag corozən'?

Nach bəxoz əblao ca' gwse'ene': —Caguə' rei cheto' benga. Tozə' Sesarən' naque' rei cheto'.

¹⁶ Ca' goquən' bdi'e Jeso'osən' lao na'aga'aque'ena' par te'e le'e yag corozən'.

Boso'ode'e Jeso'osən' le'e yag corozən'

¹⁷ Nach gosə'əche'e Jeso'osən' fuerlə' syodan' gan' bosə'oda' soldad ca' le' le'e yag corozən'. Latjan' nzi'in Golgota dižə' ebreo, zejen dižə' latjə' che yichj beṇə' guat. Na' gwze'e zde' noa' coroz che'ena'.

¹⁸ Na' Golgota na' bosə'ode'ene' le'e yag corozən'. Na' len yəchopə' beṇə' yoblə' bosə'ode'e le'e yəchopə' yag coroz tğüje' cuite'ena', Jeso'osən' gwyo'e gwchol'.

¹⁹ Na' Pilatən' bene' mendad byoj to čhopə letr de'e gwda' yichj yag coroz che Jeso'osən', boso'ozoje'en nan: "Jeso'os beṇə' Nasaret, Rei che beṇə' Izrael."

²⁰ Boso'ozoje'en dižə' ebreo, dižə' griego na' dižə' latin. Na' zan beṇə' Izrael gwlaž četon' boso'olabe' de'enə' byojən', čhedə' gan' gwda' Jeso'osən' le'e yag corozən' naquən galə'əza syodan'.

²¹ De'e na'anə' beṇə' ca' zjənaqua bəxoz əblao che nasyon Izrael četon' gwse'e Pilatən': —Bša'an par nič cui nan de que naque' rei che neto' beṇə' Izrael, sino nan de que len' gwne' naque' rei četo'.

²² Na' Pilatən' gwne': —De'en beṇə' mendad boso'ozoje', banyojənnə'.

²³ Nach soldad ca', beyož boso'ode'e Jeo'osən' le'e yag corozən' gosə'əzi'e xalane'e ca' na' gwso'one'en tapla, to part gūejən gosə'əzi'e. Na' leczə ca' gosə'əzi'e xe'enə' de'en naquə ca xadon ča'o. Pero lachə'ənə' naquən de to golizə. Bito bi dia nyazən.

²⁴ Na' gwse'e ljuežje': —Bito əgwzoxjchon' sino gonchon rif. Yeš no yechelən.

²⁵ Na' gwso'one' ca' par nič goc can' nyoj Xtižə' Diozən' gan' nan: "Yosyo'ole'e xalana'anə' entr lega'aque' na' so'one'en rif." Na' ca'anə' gwso'on soldad ca'.

²⁶ Na' cuit coroz che Jeso'osən' zecha xne'enə' len beṇə' bile'enə' na' len Maria no'ol che Cleofas na' Maria beṇə' Magdala.

²⁷ Na' catə' Jeso'osən' ble'ine' zecha xne'enə' galə'əzə na' nada' zecha' cuite'enə', nach gože'ene': —Naogüe, benga gaque' ca xi'no'.

²⁸ Nach gože' nada': —Bži'ilažə' xna'a nga ca xna'onə'.

Na' lao žanə' nada' gwcua'ane' beṇə'ane' ca family čhia'acza'.

Can' goquə catə'an got Jeso'osən'

²⁹ Jeso'osən' nezene' de que bačh goc yoguə'əloj de'en cheyalə' gaquən. Na' par nič gaquə can' na Xtižə' Diozən' de'enə' nyojən gwne': —Chbilda' nis.

³⁰ Na' de latə' bino corrient de'e yoža to lo'o xguaguə dao'. Na' to beṇə' bosgaže'e to sponj len bino corrientən' na' bosšine'en cho'a Jeso'osən' bso'en to lao xis de'en ne' isopo.

³¹ Na' beyož gwxop Jeso'osən' bino corrientən' gwne': —Bačh goc yoguə'əloj de'en cheyalə' gaquən'.

Na' bchequə' yichje'enə' gote'.

To soldadən' gode'e lanz cuit le'e Jeso'osən'

³² Nach beṇə' blao che nasyon Izrael četon' gosə'əzə'abene' Pilatən' gone' mendad yesə'əyišjw soldad ca' ni'a beṇə' ca' zjəda' le'e yag corozən' nič yob sa'ate' par nič ca' yesyə'əque'e lega'aque'. Bito gwse'enene' yesyə'əga'an cuerp ca' le'e yag corozən' xte yeteyo, čhedə' yeteyon' naquən ža dezcanz na' ža lni xen.

³³ Nach Pilatən' bene' mendad ja'ac soldad ca' na' gosə'əyišjue' čhopə la'a ni'a ben' boso'ode'e to šla'a cuit Jeso'osən'. Na' leczə ca' gwso'one' len ben' gwda' le'e yag corozən' cuite'en yešla'a.

³⁴ Na' catə' besə'əžine' gan' da' Jeso'osən', besə'əle'ine' bagote', na' bito gosə'əyišjue' ni'e ca'.

³⁵ Pero to soldadən' gode'e lanzən' cuit le'e Jeso'osən', na' le'e bchojten chen len nis.

³⁶ Nada' ble'ida' can' goquən' na' nezdə' de que dižə' de'en cho'a naquən de'e li. Na' cho'a dižə'ənə' par nič leczə' le'e šejle'ele.

³⁷ Goc ca' par nič goc complir can' na Xtižə' Diozən' de'en nyojən gan' nan: "Ni to žit yo'e cui yesə'əyišjue'."

³⁸ Na' len yeto gan' nan: "Yoso'ogüie' ben' əgwsa'ade'e lanzən'."

Boso'ocuaše'e Jeso'osən'

³⁹ Na' gwde na' Jwse beṇə' Arimatea gwṇabene' Pilatən' gwnežjue' lsens yeque'e cuerp che Jeso'osən'. Na' Pilatən' be'e lsens. Nach gwyej Jwsen' na' beque'e cuerpən'. Jwsen' naque' displ che Jeso'osən' pero bgašə'əzə por ni che bžebe' beṇə' blao che nasyon Izrael četon'.

⁴⁰ Na' leczə gwyeyjen Nicodemon' le' ben' bagwyey antslə gan' zo Jeso'osən' to še'elə. Na' Nicodemon' no'e to de'e chlə' zix' de'e none' len mirra na' aloes, ca do tapa robən'.

⁴¹ Na' boso'ochele' cuerp che Jeso'osən' sint de lachə' na' len de'en chlə' zixən', ca costombr che neto' beṇə' Izrael catə'an chcuasə'əto' beṇə' guat.

⁴² Na' galə'əzə gan' gwso'ote' Jeso'osən' le'e yag corozən' gotə' to güert. Na' lo'o güertən' bazo to bloj ba de'e cobə de'e bagwčhe'en Jwsen' le'e yej ga cuiczə no beṇə' guat ne'e šo'o.

⁴³ Na' boso'ocuaše'e Jeso'osən' lo'o bloj banə' laogüe de'e zon galə'əzə čhedə' chsa'achyenene' por ni che de'e naquə yeteyo ža dezcanz na' ža xen che lni pascon'.

¹ Na' bal dmigw Maria beṇə' Magdalan' gwyeye' cho'a bloj ban'. Na' ble'ine' yejən' da' cho'ina' habga'an.

² Nach beza'adoe' beyede' ga'an zoto' len Simon Bedən', nach gwne' neto': —Babesyə'əbeje' Xanchon' lo'o ban', na' bito nezecho galə besya'əyo'ene'.

³ Nach gwza'ato' len Bedən' gwyejto' cho'a bloj ban'.

⁴ Chopteto' gwsa'adoto' pero nada' gwsa'adocha' ca Bedən' na' zgua'atec nada' bžina'.

⁵ Na' bčheca'a bgüia' lo'o ban' na' ble'ida' lachə' ca' gan' zjəchi'in, pero bito gwyo'a.

⁶ Le'e bla'ate Simon Bedən' na' le' gwyo'e lo'o ban' na' leczə ble'ine' lachə' ca' gan' zjəchi'in.

⁷ Na' bey de'en bosyo'oguzje' laogüe'ena' bito lenən lachə' ca' yelə', ndobən chi'in ca'alə.

⁸ Na' la'anə'əczə nada'əteca' byob bžina', gwdechlə gwyo'a lo'o ban', na' cata' ble'ida' de'e ca' gwyejli'a de que beban Jeso'osən'.

⁹ La' ca oran' bito ne'e šejni'ito' Xtižə' Diozən' de'ena' nyojən nan de que yeban Jeso'osən' ladjo beṇə' guat ca'.

¹⁰ Na' beza'ato' beyej ližto'.

Maria beṇə' Magdalan' ble'ine' de que mbanczə Jeso'osən'

¹¹ Na' Marian' bega'ane' chbeže' cho'a bloj ban'. Na' lao chbeže'ena' bcheque'e bgüie' lo'ina'.

¹² Na' ble'ine' chopə angl zjənyaze' lachə' šyiš zjəchi'e lo'o ban', toe' chi' zda yichjlei na' yetoe' chi' zda xni'alei gan' gotə' cuerp che Jeso'osən'.

¹³ Nach gwse'e no'olən': —čBixchen' chbežo' no'ola'?

Na' le' boži'en gože' lega'aque': —čHedə' babesyə'əyo'e Xana'anə', na' cabi neza' galə jəsyə'əsane'ene'.

¹⁴ Ca beyož gwna Marian' ca', gwyechje' bgüie' traslə na' ble'ine' Jeso'osən' zeche' cože'ena', pero bito beyombia' Marian' le'.

¹⁵ Nach gož Jeso'osən' le': —No'ola' čbixchen' chbežo'? čNon' cheyiljo'?

Na' Marian' bene' xbab de que ben' chapə güert na'anə', na' gože'ene': —Šə le' babeyo'one'ena', gwna nada' galə jəyesano'one'ena' na' nada' yeyo'ane'.

¹⁶ Jeso'osən' gože' le': —Maria.

Na' Marian' gwyechje' de'e yoblə na' gože'ene': —Raboni—, naquan dižə' ebreo na' zejen Maestr.

¹⁷ Jeso'osən' gože' le': —Bito goxo'o nada', la' bito ne'e yeyepa' ga'an zo Xa'anə'. Beyej lao disipl chia' ca' yelə' beṇə' ca' zjanaquə ca biša'a na' zana' na' gožga'aque' de que yeyepa' ga'an zo Xa'anə', ben' leczə naque' Xale. Naque' Dioz ben' cho'elaogua' na' leczə naque' Dioz ben' cho'ela'ole.

¹⁸ Nach beza' Maria beṇə' Magdalan' bedəyedixjue'ine' neto' disipl de que bable'ine' Xanchon'. Na' be'elene' neto' dižə' de'en gož Jeso'osən' le'.

Disipl che Jeso'osən' besə'le'ine' de que mbancze'

¹⁹ Na' ca bexjw že' ža dmigon' neto' disipl che' nžagto' txen. Na' zjənyeyjw puert ca' por ni che de'en bžebto' beṇə' blao che nasyon Izrael cheton'. Cata'əczla gocbe'ito' bazecha Jeso'osən' gwchołto'ona'. Nach gože' neto': —Leso binlo len xbab de'en yo'o lo'o yichjla' ažda'olen'.

²⁰ Ca beyož gwne' ca' blo'ine' neto' lo'o taque'e ca' na' cuit le'ena'. Na' bebeito' ble'ito' Xanchon'.

²¹ Nach gože'e neto' yetši'i': —Leso binlo len xbab de'en yo'o lo'o yichjla' ažda'olen'. Can' bselə' Xa'anə' nada' yežlyo nga par chona' xšine'ena', ca'aczən' əchselə'a le'e par gonle xšina'anə'.

²² Beyož gwne' ca' blobe' neto' nach gože' neto': —Le'e si' Spirit che Diozən'.

²³ Beṇə' ca' yesyə'ədinje' xtolə'əga'aque'ena' naple yelə' chnabia' par ye'ega'aclene' de que bagwniilaon. Pero beṇə' ca' cui yesyə'ədinje' xtolə'əga'aque'ena' naple yelə' chnabia' par ye'ega'aclene' de que bito niłlaon.

Tomasən' ble'ine' de que mban Jeso'osən'

²⁴ Na' Tomas ben' bososi'e Didimo laogüe de'en naque' beṇə' cuaš, lene' neto' šižinto', pero bito zoe' len neto' catə'an bedəyelo'elao Jeso'osən'.

²⁵ Na' neto' gožto'one': —Bable'ito' Xanchon'.

Nach Tomasən' gože' neto': —Xte que le'ida' taque'e ca' na' əgwzebə xbenə'anə' gan' gwdebə clab ca', na' əgwzebə na'anə' cuit le'ena', nach šejli'a.

²⁶ Gozde to xman zezoto' lo'o yo'ona' de'e yoblə, na' zo Tomasən' len neto'. Na' leczə zjənyeyjw puert ca', cata'əczla bezla' Jeso'osən' na' gozzeche' gwchołto'ona', na' gwne': —Leso binlo len xbab de'en yo'o lo'o yichjla' ažda'olen'.

²⁷ Nach gože' Tomasən': —Bgüia' lo'o taca' quinga na' bzeb xbeno'ona'. Na' bzeb na'ona' cuit li'a nga par nič šejli'o. Na' cui gaco' to beṇə' cui chejle'.

²⁸ Nach Tomasən' gože'ene': —Xana', na' Dios chia'.

²⁹ Nach gož Jeso'osən' le': —Xte que ble'ido' nada' nach gwyejli'o. Mbalazach len beṇə' cui yesə'ale'i nada' na' se'ejle'e.

Libr nga nyojan par nich šejle' beṇə' de que Jeso'osən' naque' Xi'in Diox

³⁰ Na' de'e zan miłagr de'e ben Jeso'osən' gan' zoto'onə' pero bito bzojga'aca'an nga.

³¹ Pero zjanyoj de'e quinga par nich sotezə sole šejle'e'le de que Jeso'os na'an Xi'in Dioxən' ben' gwlej Dioxən' par gaquəlene' beṇəchən', na' par nich gatə' yełə' mban zejlicane chele laogüe de'en chonlilažə'əlene'.

21

Jeso'osən' blo'elaogüe' gažə disipl che' ca'

¹ Gwde goc de'e ca', Jeso'osən' bozloe' laogüe' neto' disipl che' yetši'i cho'a nisdao' Galilea de'en leczə nzi' Tiberias. Quinga blo'elaogüe' neto':

² Txen zoto'onə' Simon Bedən', len Tomasən', na' Natanaelən' na' nada' na' beṇə' biša'a na' yechopə disiplən'. Natanaelən' naque' beṇə' Cana, to yež de'e chi' gan' mbane Galilean'. Na' Tomasən' de'en naque' beṇə' cuaš nachən' bososi'ene' Didimo.

³ Simon Bedən' gože' neto': —Ša'ayetošca' gwxen beł.

Na' gožto'one': —Leczə gwza' neto'.

Nach gwza'ato' gwyejto' cho'a nisda'onə' na' gwyo'oto' to lo'o barcw. Pero že'ena' cuiczə no no bdole'eto'.

⁴ Na' che'eni'ilas bla' Jeso'osən' cho'a nisda'onə' pero na' neto' bito beyombi'ato' šə le'ena'.

⁵ Jeso'osən' gwne' zizjo gože' neto': —Xi'inda'ogua'a čgan beł ya'a gaocho?

Na' boži'ito' xtiže'ena' gožto'one': —Notono de.

⁶ Nach gože' neto': —Le'e gwzələ' yixjw beł chelen' cuit barcon' lichalə na' əželeleb.

Nach bzałə'əto' yixjw beł cheto'onə' na' xte caguə gwzoito' yecueto'on lo'o barcon' tant beł zan gwžə' lo'inə'.

⁷ Nach nada' goža' Bedən': —Xancho na'anə'.

Nach Simon Bedən' cate goža'ane': “Xancho na'anə'”, le'e beyacwte' xalane'ena', la' de'e cho'o lo'olzan' nacue' par nich chone' zinṇə', na' le'e bexita'əte' lao nisən' par nich byob bežine' gan' zo Jeso'osən'.

⁸ Na' neto' zeyo'oto' lo'o barcw da'onə' ze'e zenxobəto' yixjw bełən' gan' ža' beł ya'a ca'. Caguə nactequəch zita' cho'a nisda'onə', ca do yeto gueyoa metrzən'.

⁹ Na' cata' bežinto' cho'a nisda'onə' beyetjto' lo'o barcon' na' ble'ito' chi' yi' ya'aljən' na' xoa to beł ya'a laogüen', na' len yet.

¹⁰ Jeso'osən' gože' neto': —Le'e yeyoxə' la' beł ya'a ca' ze'e gwxenle niłə.

¹¹ Na' Simon Bedən' gwyeye' gan' chi' barcon' na' jəyeseže' yixjw bełən' gan' nchejan'. Nach bexobəto'on yo bižlə. Na' ža'an to gueyoa ši'inəyon beł xen. Na' bito gwchezə yixjon' la'anə'əczə bia zannə' gwžə' lo'inə'.

¹² Jeso'osən' gože' neto': —Le'e da gaole xsil.

Na' ni toto' cui beyaxjeto' ye'eto'one': “čNo le'?” la' gocbe'ito' de que Xancho na'aczənə'.

¹³ Jeso'osən' bgüigüe' e gwxi'e yetən' na' bene' che cheto'. Na' leczə ca' bene' len bełən'.

¹⁴ De'e nga beyon' las blo'elao Jeso'osən' neto' disipl che' lao bebane' ladjo beṇə' guat ca'.

Jeso'osən' be'elene' Simon Bedən' dižə'

¹⁵ Na' ca bedaoto'onə' Jeso'osən' gože' Simon Bedən': —Simon xi'in Jonas čəchaquəchdo' chia' can' chsa'aque beṇə' quinga chia'?

Na' boži'en gože': —Xana' le' nezdə de que chacda' čio'.

Jeso'osən' gože' le': —Bsed blo'i beṇə' ca' ze'e gwzolao chso'onlilažə' nada'.

¹⁶ Na' de'e əgwchop lase gože'ene': —Simon xi'in Jonas čəchacdo' čhia'?

Na' Bedən' gože'ene': —Xana' le' nezdə de que chacda' čio'.

Jeso'osən' gože' le': —Bgüia bye beṇə' ca' chso'onlilažə' nada'.

¹⁷ De'e əgwyon lase gože'ene': —Simon xi'in Jonas, čəchacdo' čhia'?

Na' Bedən' gocchügüene' de'e gože'ene' de'e gwyon lase: “čEchacdo' čhia'?” Na' gože' le': —Xana' le' neze nle'ido' yoguə'əloł. Le' nezdə de que chacda' čio'.

Jeso'osən' gože' le': —Bsed blo'i beṇə' ca' chso'onlilažə' nada'.

¹⁸ De'e li'əchnia' le' cata' goco' beṇə' güego' cuino' bochej doxpeyo'onə' na' gwyejo' con ga nazan čio'. Pero cata' gaco' beṇə' gola, əgwli' na'onə' na' beṇə' yoblə yocheje' doxpeyo'onə' na' yesə'əche'e le' ga cui che'endo'.

¹⁹ Na' de'en gože'ene' ca' zeje dižə' de que Bedən' gone' ca si' Dioxən' yełə' bala'an ca de'en gaquə Bedən' lao na' beṇə' mal ca' par so'ote'ene'. Gwde gwna Jeso'osən' can' gaquə che Bedən' nach gože' Bedən': —Da len nada'.

Jeso'osən' goquene' che Juannə'

²⁰ Na' beyechj Bedən' ble'ine' nada' naogua' lega'aque' na' bene' xbab can' chaque Jeso'osən' chia', la' nada'an gwchi'a cuit Jeso'osən' žen' gwdaoto' xše'enə' txen catə'an goža'ane': "Xana, ħnoxaczxən' əgwde le' lao na' beṇə' ca'?"

²¹ Nach Bedən' gože' Jeso'osən': —Xana' ħnac gaquə che benga?

²² Jeso'osən' gože' le': —Šə che'enda' ne'e zoczə benga xte catə'an yida' yetlas ħbixa zedən' chaco'? Con gwzotezə gwzo benĭilažə' nada' na' bzenag chia'.

²³ De'e na'anə' gwditj dižə'anə' entr beṇə' ca' chso'onĭilažə' Cristən' de que nada' bito gata'. Pero Jeso'osən' caguə gože' Bedən' cui gata'anə' sino gože'ene': "Šə nada' che'enda' ne'e zoczə' xte catə'an yida' yetlas ħbixa zedən' chaco'?"

²⁴ Nada'an naca' disiplən' ben' goquene' chei na' nezda' can' goquə yoguə' de'e quinga babzoja'. Na' leczə le'e nezczəle de que dižə' ĭin' cho'a.

²⁵ Zanch de'e de de'e ben Jeso'osən' de'e cui zjənyoj. Žalə' zjənyoj yoguə'an na' tgüejə tgüejən ĭibr zan juisy zjəde žalə' ca'.

De'e na'azən' chzoja'.

De'en Gwso'on Apostol Ca'

Jeso'osən' bene' lyebe sele'e Spirit che Diozən'

¹⁻² Teofilo dao', ca' naquə lib̄r de'en bzoja' de'e nech, bzoja' che yoguə'ə̄l̄l̄ de'e güen de'e ben Jeso'osən' na' de'en bsed blo'ine' dez̄d catə'an gwzolaogüe' bsed blo'ine' xte catə'an beyepe' yoban'. Žlac bsed blo'ine'enə' gwleje' apostol che' ca' na' len yelə' chnabia' che Spirit che Diozən' bene' mendad naquən' so'one'.

³ Nach gwde gwso'ot beṇə' Jeso'osən', jəyelo'e laogüe' apostol che' ca'. Na' de'e zan de'e bene' par niçh gosə'ə̄nezene' de que mbancze'enə', na' gwɔdalene' lega'aque' choa ža na' bzejni'ine' lega'aque' can' chene'e Diozən' nabi'e beṇə' so'e latja.

⁴ Na' žlac ne'e zo Jeso'osən' len apostol che' ca' bene' mendad cui yesyə'ə̄žaše' syoda Jerosalennə' lgüegwzə. Gože' lega'aque' yesyə'ə̄ga'əne' yesə'əbeze' xte catə'an baçh goc can' ben Xe' Diozən' lyebe gaquə, ca de'en bzejni'ine' lega'aque'.

⁵ Jeso'osən' goze'e lega'aque': —De'e zaquə'enə' ca naquə' Juannə' bchoe' beṇə' nis, pero entr yeto çhopə ža, nada' gona' par niçh gaquə to de'e zaquə'əche, gona' par niçh yedəso Spirit che Diozən' lo'o yichjla'azda'olen' nabi'an le'e.

Jeso'osən' beyepe' yoban'

⁶ Na' catə' bazjəndopə zjənzague' len Jeso'osən' gwse'ene': —Xantə' çəbabžin ža gono' ca yeçhoj nasyon Izrael chechon' xni'a beṇə' zitə' ca'?

⁷ Jeso'osən' gože' lega'aque': —Bitə naquən par niçh le'e ənezele bi ža bi orən' gon Xaço Diozən' de'e ca' babži'e bia' gone'.

⁸ Pero na' catə' yedəso Spirit che'enə' len le'e, gaquəlenən le'e len yelə' guac che'enə' par niçh güe'ele xtiž'a'anə' syoda Jerosalen nga, na' doxen ga mbane Jodean', na' Samarian' na' doxenlə lao yežlyon'.

⁹ Beyož gwna Jeso'osən' ca', lao çəsə'əgüia disipl che' ca' le' beyepe' yoban' to lo'o bejw na' bitoch besə'əle'ine' le'.

¹⁰ Na' ne'e çəsə'əgüiachgua disipl che' ca' le'e yoban' gan' besə'əle'ine' beyepe', catə'əczla gwsa'acbe'ine' bazjəzəcha çhopə angl len lega'aque' beṇə' zjənyaz lacha' šyiš.

¹¹ Na' beṇə' ca' çhopə gwse'e lega'aque': —Beṇə' Galilea, çbixchen' chgüiale le'e yoban'? Catezəczən' ble'ile beyep Jeso'os nga yoban' catə'an bechoje' ladjwlen', ca'atezəczən' le'ile yide' de'e yoblə.

Gosə'əbeje' Matias par gaque' apostol lgu'a Jodən'

¹² Nach besa'aque' ya'a de'en nzi' ya'a Olibos jəya'aque' Jerosalennə', na' naquə galə'əza Jerosalennə' to catə'ətə'an de lsens sa'aque' ža dezcanzən' segon costombr che beṇə' Izrael ca'.

¹³ Na' catə' besə'əžine' Jerosalennə' apostol ca' šnej na' beṇə' ca' zjənzague' besyə'əgüie' gan' nite'enə' lo'o quartən' zo žcuia la'ə̄l̄. Apostol ca' šnej beṇə' quinga: Bedən', Jacobən', Juannə', Ndrəsən', na' Lipən', Tomasən', Bartolomen', Mtion' na' Jacob xi'in Alfeo, na' Simon ben' çhon txen len partid de'en nzi' Cananista, na' Jodasən' beṇə' bišə' Jacobən'.

¹⁴ Yoguə' ža gwnitə'ətezə gwnitə' apostol ca' šnej gwso'one' orasyon txen len beṇə' ca' zjənaquə bišə' Jeso'osən' na' len Maria xna' Jeso'osən' na' len yeziquə'əchlə no'ol ca' zjənzague'.

¹⁵ Na' ca tyemp na' Bedən' gwzeche' ladjo to gueyoa galjə beṇə' ljuežj chio'o çonçlilažə'əcho Jesocristən' par be'elene' lega'aque' dižə'an, na' gože' lega'aque':

¹⁶ —Beṇə' bišə', Spirit che Diozən' benən par niçh de'e Rei Dabin' bzoje' na' be'e dižə' che Jodən' ben' gwche'e beṇə' ca' gosə'əzen Jeso'osən' gan' jesə'əšague'ene'. Na' benən byen goc complir can' nyoj Xtižə' Diozən' che'.

¹⁷ Jodən' goque' txen len neto' apostol, na' bene' txen len neto' yoguə'ə̄l̄l̄ de'en gwyo'o lao na'ato' bento'.

¹⁸ Na' Jodən' gwxi'e to pedas yežlyo len laxjue' de'en gwxi'e par de'e malən' bene' bdie' Jeso'osən' lao na' beṇə' ca'. Pero na' bexope' gan' golə'ədite'enə' na' gošj le'enə' na' doxen xjlo'enə' bchoj.

¹⁹ Yoguə'ə̄l̄l̄ beṇə' ža' Jerosalennə' gosə'ənezene' can' goc che'enə' na' de'e na'anə' bosə'əsi'e yežlyon' Aseldama na' xtižə'əga'aque'enə' zeje dižə' yežlyo chen.

²⁰ Na' de'en gwso'one' ca' goc can' nyoj to Salmo nan:

Liže'enə' gaquən to yo'o daš, notono no so' na'.

Na' leczə nyojən nan:

Na' te beṇə' yoblə gwłane' xlatje'enə'.

²¹ Na' nitə' beṇə' entr chio'o nga beṇə' bagwso'on txen len chio'o bedote lao gwdalen Xancho Jeso'osən' chio'o.

²² Bagwso'one' txen dezd catə' de'e Juannə' bchoe' le' nis xte catə'an beyepe' yoban', na' cheyalə' cuejcho toe' gone' txen len neto' apostol güe'eto' dižə' can' beban Xancho Jeso'osən' ladjo beṇə' guat ca'.

²³ Na' gosə'əbeje' čhopə beṇə', toe' Jwse ben' le Barsabas, na' leczə le' Josto, na' ben' yeto Matias.

²⁴⁻²⁵ Nach gwso'one' orasyon gwse'e Diozən': —Xanto' le' nombi'o yichjla'aždao' yogua'əloḷ beṇə'. Entr beṇə' ca' čhopə blo' isgüei neto' noe' bagwlejo' par tie' gwłane' xlatja' Jodən' par gaque' apostol na' gone' xšino'onə' txen len neto', ca' naquə Jodən' gwlejyichje' de'en ngo'o lao ne'enə' gone' na' bazjyede' gabıl gan' naquən yeyeje' yelə' güen de'e mal che'enə'.

²⁶ Nach gwso'one' rif par gosə'ənezene' non' bagwlej Diozən' na' Matiasən' bchoje' na' gwso'onene' cuent len apostol ca' šnej.

2

Can' goquə catə'an bidə Spirit che Diozən'

¹ Na' bžin ža lni de'en ne' Pentecostes, na' apostol ca' na' yogua'əloḷ beṇə' ca' bagwso'onlilažə' Jesocristən' zjəndopə zjənžague' txen tozə latja.

² Na' to de repentza goc to sšag le'e yoban' ca sšag che to be' bdon' gual na' nenxejə lo'o yo'o gan' zjəchi'enə'.

³ Na' besə'əle'ine' to de'en naquə ca yi' bel' na' bžinte lata' güejə de'enə' čhalə'əniṇ gan' zjəchi' to toe'.

⁴ Ca' goquə bedənabia' Spirit che Diozən' yichjla'aždao' to toe', na' Spiritən' benən par nič gosə'əzolaogüe' gwso'e gwde gwdelə dižə' de'e gwse'ejni'i' beṇə' zitə' ca'.

⁵ Na' ca tyempən' beṇə' zan beṇə' Izrael ca' ža' Jerosalennə' beṇə' chso'elao' Diozən', za'aque' zan yež yoblə lao yežlyon'.

⁶ Na' catə' gwse'enene' sšagun' de'en goquə lo'o yo'o gan' ža' apostol ca', zan beṇə' Izrael ca' besə'əžague', na' lechguale besyə'əbanene' čhedə' to toe' gwse'enene' chso'e beṇə' ca' chso'onlilažə' Jesocristən' dižə' de'e čəsə'əne to toe'.

⁷ Bito gwse'ejni'ine' bin' chac na' besyə'əbanene', gosə'əne': —čEcaguə beṇə' Galilea beṇə' quinga chso'e dižə'ənə'?

⁸ čNactexa chaquən' to tocho chenecho chso'e dižə' can' chso'e beṇə' gwlaž čhecho ca' dižə'?

⁹ Bałcho naccho beṇə' Partia na' bałcho beṇə' Media, na' bałcho beṇə' Elam, na' bałcho beṇə' Mesopotamia. Na' yebałcho beṇə' Jodea, na' yebałcho beṇə' Capadosia, yebałcho beṇə' Ponto, yebałcho beṇə' Asia,

¹⁰ yebałcho beṇə' Frigia na' beṇə' Panfilia, na' yebałcho beṇə' Egipto, na' yebałcho za'acho yež Africa ca' de'en zjəchi' delant Sirene. Na' entr chio'o za'acho Roman' bałcho goljcho naccho beṇə' Izrael na' yebałcho ben cuincho beṇə' Izrael.

¹¹ Na' bałcho naccho beṇə' Creta na' beṇə' Arabia. Na' gatə'əteza beṇə' naccho, yogua'əcho chenecho chso'e beṇə' Galilea quinga xtižə'əchon' de'en chaccho, chso'e dižə' čhe de'e zan de'e baben Diozən' de'e zaquə' yebanecho.

¹² Na' yogua' beṇə' ca' besə'ədobə choso'ozenague' besyə'əbanene' na' gwsa'acžejlaže'e che de'en chaquən', na' zane' gosə'əne': —čBi zejen de'e nga chaquən'?

¹³ Na' yebałə' gwso'one' borl gosə'əne': —Beṇə' quinga chesə'əzožene'.

Dižə' de'en be' Bedən' len beṇə' Izrael ca' besə'əžag

¹⁴ Na' Bedən' gwzeche' lao beṇə' ca' txen len apostol ca' yešnej na' be'e dižə'an zizjo gože' beṇə' ca' zjənžaguən': —Le'e beṇə' Jodea na' notə'ətezəchle zole Jerosalennə', che'enda' gwzenagle čhia' na' gonle xbab che de'en ze'e nia' le'e.

¹⁵ Beṇə' ljuežja' quinga bito čəsə'əzožene' can' chaquele, la' ne'e naquə tempran.

¹⁶ Bachac can' bzoj de'e profet Joelən' ben' be' xtižə' Diozən' cana', bzoje' de'en gwna Diozən', nan:

¹⁷ Catə' bazon əžin tyemp par šo'o fin che yežlyon'

nada' Dioz gona' par nič Spirit čhia'anə'

yedəson len beṇə' ža' doxen lao yežlyon'.

Na' gona' par nič xi'inle ca' so'e xtižə'anə'

na' beṇə' byo xcuida' ca' yesə'əle'idaogüe'ene' bi de'en gona' par yesə'əle'idaogüe'ene',

na' güe'elena' beṇə' byo golə ca' dižə' lao bišgal čhega'aque'enə'.

¹⁸ Na' yogua' beṇə' ca' chso'on xšina'anə' la'aṇə' beṇə' byo o la'aṇə' no'ola, yedəso Spirit čhia'anə' len lega'aque' par nič so'e xtižə'anə'.

¹⁹ Gona' par nič gaquə de'en cui nonə' le'i le'e yoban' na' lao yežlyon'.

Gwlo'a yelə' guac chia'anə' len chen, len yi' na' len žen de'en naquə ca bejw.

²⁰ Cuich əgwse'eni' bgüižən',

nach bio'onə' yeyaquən xna ca color che chen antslə ze'e əžin ža yida' de'e yoblə
par choglaogua'an che yoguə'əlol beñə' šə non' napə dolə', nadan' naca' Xanle.

Gaquən to ža žialao xen,

na' gwlo'a yelə' guac xen chia'anə'.

²¹ Na' gaquə de que notə'əteza beñə' yesə'əñab goclen laogua',

nada' naca' Xanle gona' par nič cui žjəya'aque' lao yi' gabil.

Can' gwna Diozən' na' bzoj de'e profet Joelən' len, ben' be' xtižə' Diozən' cana'.

²² Na' le'e beñə' Izrael gwlaž chia', legwzenag chia'. Ca naquə Jeso'osən' ben' naquə
beñə' Nasaretən', Diozən' blo'ine' le'e de que naque' beñə' zaque'e. Diozən' bene' par nič
Jeso'osən' bene' milagr na' bichlə de'e zaquə' yebanecho par ble'ile, can' nezczelena'.

²³ Lao yelə' neze che Diozən' bin' ze'e gaquə che Jeso'osən', bsi'e xneze par nič Jodən'
benene' lao na'alən' na' benle par nič beñə' mal ca' gwso'ote'ene' bosu'ode'ene' le'e yag
corozən'.

²⁴ Pero na' Diozən' bolis bosbane'ene' ladjo beñə' guat ca', chedə' bito gwzoi yelə' gotən'
nabia'an le'.

²⁵ Quinga bzoj de'e Rei Dabin' xtižə' Jeso'osən' gan' nyoj Xtižə' Diozən' nan:

Nezda' de que Xana' Diozən' zoe' len nada' do tyempte

na' chaclene' nada' par nič cui bi chžeba'.

²⁶ De'e na'anə' zoa' mbalaz na' cho'a dižə' can' chebeida'

na' nezda' yolis yosbane' nada' ladjo beñə' guat ca' cata' bagota'.

²⁷ Dioz chia' nezda' bito yocua'ano' nada' gan' ža' beñə' guat ca',

ni que go'o latjə gožə' cuerp chia'anə',

nadan' naca' Xi'inqon' na' naquə la'aždaogua'anə' xi'ilažə'.

²⁸ Bablo'ido' nada' naquən' gona' par nič əbana' zejlicane

na' lechguale mbalaz soa' yedote de'en zoleno' nada'.

²⁹ Beñə' Izrael, nezecho de que de'e xaxta'ocho Rei Dabin' gote' na' bosu'ocuaše'ene'. Na'
nombi'acho yo'o de'en zo gan' bosu'ocuaše'ene'.

³⁰ Na' de'e Rei Dabin' ža be'e dižə' can' bzejni'i Diozən' le' cana'. Gwne' naquən segor can'
ben Diozən' lyebe de que to beñə' galjə lao dia che'enə' nabi'e Izraelən' can' gwnabia' le'ena'.

³¹ Diozən' bene' par nič de'e Rei Dabin' gwnezene' can' gaquə na' de'e na'anə' be'e dižə' che
Cristən' ben' babselə' Diozən' par chaclene' nasyon chechon'. Gwne' de que Cristən' yebane'
na' bito yega'ane' gan' ža' beñə' guat ca' na' nic gožə' cuerp che'ena'.

³² Na'a ža, Diozən' bolis bosbane' Jeso'osən' ladjo beñə' guat ca' na' neto' naquəto' testigw
de que beyas bebane'ena'.

³³ Na' Diozən' len yelə' guac che'ene' bene' par nič beyep Jeso'osən' gan' zoe'ena' na'
chnabi'e txen len le'. Na' Diozən' bnežjue'ene' Spirit che'ena' can' bene' lyebe. Na' Jeso'os
na'anə' babene' milagr nga de'en babenele na' de'en bable'ile, babene' par nič zedəso
Spiritən' len neto'.

³⁴ Caguə de'e Rei Dabi na' ben' beyep yoban', sino de'e Dabin' bzoje' che Jeso'osən' gwne':
Xancho Diozən' gože' Xana'anə':

"Gwche'edo' cuita' nga nabi'acho txen,

³⁵ na' gona' par nič nitə' de'e ca' chso'on contr le'

na' beñə' contr chio' ca' xni'onə'."

³⁶ Na' yoguə' chio'o beñə' Izrael cheyalə' nezecho de'en ngan' che Jeso'osən' ben' betle
bda'alene' le'e yag corozən'. Diozən' gwleje'ene' par nič naque' Xancho' na' naque'
Cristən', zeje dižə' ben' bsele'e par chaclene' nasyon chechon'.

Can' gwna Bedən' gože' beñə' Izrael ca' zjənžaguən'.

³⁷ Na' cata' beñə' ca' zjənžaguən' gwse'ene' xtiže'ena' de'e juisy de'e gwsa'aque'ne' lo'o
la'ažda'oga'aque'ena', nach gwse'e Bedən' na' apostol ca' yelə': —Beñə' gwlaž, žbin' cheyalə'
gonto' ža?

³⁸ Nach Bedən' gože' lega'aque': —Cheyalə' yedinjele xtolə'əle ca' par nič Diozən'
yezi'ixene' chele na' choale nis par yesə'əneze beñə' de que bachonlilažə'əle Jesocristən'.
Nach Diozən' goņe' le'e Spirit che'ena' son lo'o yichjla'ažda'olen'.

³⁹ Diozən' goņe' notə'ətezle Spirit che'ena' can' none' lyebe, le'e na' xi'inqle ca' na' notə'əteza
beñə' zita', la' chnežjue'en yoguə' beñə' chbeje' par chsa'aque' xi'inqe'.

⁴⁰ Nach Bedən' be'elene' lega'aque' dižə' zan, na' gwneyoine' lega'aque' gože': —Leyechoj lao
de'e malən' de'en chso'onchgua beñə' ca' cui zjənombia' Diozən'.

⁴¹ Ca' goquən' beñə' ca' gwse'ejele' che dižə' de'en be' Bedən' gosə'əchoe' nis. Na' lao žana'
šona mil beñə' ca' gwso'onlilažə'e Jeso'osən' na' gwsa'aque' txen len yeziqə'əchlə beñə'
bachso'onlilažə'əcze' le'.

⁴² Yogue'e gwnitə'ətezə gwnite'e gosə'ənaogü'e de'en boso'osed boso'olo'i apostol ca' lega'aque' na' gwsa'aque' tozə len yeziqə'əchlə beñə' gwso'onlilažə' Jeso'osən' na' gwse'ej gwsa'ogü'e txen na' gwnitə'ətezə gwnite'e gwso'one' orasyonñə' txen.

Can' gwso'on beñə' ca' gwso'onlilažə' Cristən' de'e neche

⁴³ Na' yoguə'əzə beñə' besyə'əbanene' can' gwso'on apostol ca' miłagr zan len yelə' guac che Diozən'.

⁴⁴ Na' beñə' ca' bachso'onlilažə' Jesocristən' gwsa'aque' tozə na' gwso'one' tozə yoguə'əloł de'en zjədeine'.

⁴⁵ Na' gwso'ote'e byen čhega'aque'enə' na' bichlə de'e ca' zjədeine' na' mech de'en besə'əle'ine' chein' gosə'əyise'en entr' yoguə'əlołga'aque' segon de'en besə'əyazje to toe'.

⁴⁶ Na' tza tza besə'ədoḡə besə'əžague' yo'oda'ə'əblaonə' na' leczə' gwse'ej gwsa'ogü'e txen liž to toga'aque' na' gwnite'e mbalaz na' besyə'əbeine' gwso'one' txen.

⁴⁷ Gwnitə'ətezə gwnite'e gwso'əlaogü'e Diozən'. Na' gwsa'azlazə' beñə' yeziqə'əchlə can' gwso'one'enə'. Na' tza tza Xancho Diozən' bene' par nič gwyanch beñə' ca' gwso'onlilažə' Jesocristən'.

3

Besyə'əyone' to beñə' coj

¹ Na' to ža Bedən' na' Juannə' ja'aque' yo'oda'ə'əblaonə' do cheda šonə, or catə' chso'on beñə' Izrael ca' orasyon segon costombr čhega'aque'enə'.

² Na' gwzo to beñə' nxiñj ni'enə' dezd goljtie' na' yoguə' ža gosə'əbec beñə' le' cho'a puert che yo'oda'ona' puert de'en nzi' "De'e Xochē", par gwñabe' carida lao beñə' ca' čhja'ac yo'oda'ona'.

³ Nach catə' besə'əžin Bedən' na' Juannə' yo'oda'ona' na' be'enə' nxiñj ni'enə' bolgüiže' lega'aque' yoso'onežjue'ene' mech.

⁴ Nach Bedən' na' Juannə' gosə'əbeze' na' bosə'əgüiachgü'e'ene' na' Bedən' gože'ene': —Bgüia neto'.

⁵ Na' be'enə' bene' xbab yoso'onežjue'ene' mechən'.

⁶ Pero Bedən' gože'ene': —Bito bi mech chia' de gona' le', pero de to de'e gona' gaquale' le'. Por yelə' guac che Jesocristən' ben' naquə beñə' Nasaretən' chona' mendad gwzoža' na' gwda.

⁷ Nach Bedən' bexe'e na' licha be'en bsože'ene', na' le'e gocte gwzeche' na' ni'e ca' le'e besyə'əyacten gual na' leczə ca' bechj ni'e ca'.

⁸ Na' catə' gocbe'ine' babesyə'əyac ni'e ca' gual bxite'e yelə' chebei čhe'enə'. Na' gwyo'e cha'ašil che yo'oda'ona' len lega'aque' chxite'e na' cho'elaogü'e Diozən'.

⁹ Na' beñə' ca' ža' cha'ašilan' besə'əle'ine' can' chde' chxite'e na' cho'elaogü'e Diozən'.

¹⁰ Na' gwsa'acbe'ine' de que naque' ben' chbe' chñab carida yoguə' ža cho'a puert che yo'oda'ona' puert de'en nzi' "De'e Xochē", na' lechguale besyə'əbanene' de que babeyaque ni'enə'.

Bedən' be'e xtižə' Diozən' cha'ašil che yo'oda'ona'

¹¹ Na' to cha'ašil che yo'oda'ona' nzi'in "Che de'e Salomonñə". Cha'ašil na' gwey ben' beyaque ni'enə' len Bedən' na' Juannə'. Bito bsane' lega'aque', con bexe'e na'aga'aque'enə', na' yoguə' beñə' ca' ža' yo'oda'ona' besə'əžagsese' par jasə'əgüie'ene' čhedə' besyə'əbanchgüieine' de'en babeyaque be'enə'.

¹² Na' catə' Bedən' ble'ine' de que bazjənžag beñə' zan gan' nite'enə' nach be'elene' lega'aque' dižə' gože' lega'aque': —Le'e beñə' gwlaž chia' beñə' Izrael, chebanele can' babeyaque be'enga. De repent chaquele de que por yelə' guac četon' bento' par nič beyaque be'enga o šə' chaquele beyaquene' por ni čhe de'en chonchguato' can' chazlazə' Diozən', pero caguə ca'anə'.

¹³ De'e xaxta'ocho Abraannə', Isaaquən' na' Jacobən' gwso'əlaogü'e tozə Diozən' ben' cho'ela'ocho, na' Dioz na'anə' bnežjue' yelə' bala'añ xen che Xi'ine' Jeso'osən'. Pero le'e bdele Jeso'osən' lao na' jostis ca' par gwso'ote'ene' na' bžonle catə' Pilatən' gone'ene' əgwsane'ene'.

¹⁴ Can' beñə' len Jeso'osən' la'añə'əczə' naque' beñə' la'aždao' xi'ilažə' juisy na' naque' le'ezelaogüe beñə' güen. Nach gwñable bosan Pilatən' to beñə' güet beñə' de ližyan' lgu'a Jeso'osən'.

¹⁵ Na' ca naquə Jeso'osən' ben' əbxe yelə' mban zejlicanen', le'enə' betle pero na' Diozən' bolis bosbane'ene' ladjo beñə' guat ca'. Neto' ble'ito'one' na' cho'eto' dižə' de que bebane' ladjo beñə' guat ca'.

¹⁶ Na' chle'ile bengə cui goquə sa' na' nombi'alene', na' cheyałə' ənezele de que Diozən' beyone' ni'enə' čhedə' chonlilažə'əto' Jeso'osən'. De'e yoblə nia' de que de'en chonlilažə'əto' Jeso'osən' de'e na'anə' Diozən' bene' par nič beyacšao' ni'a' bengə can' chle'ilen'.

¹⁷ Benə' bišə' dao', nezda' de que le'e na' benə' golə blao çhele ca' betle Jeso'osən' laogüe de'en cui gweyjni'ile de que Dioz nan' bsele'ene'.

¹⁸ Naque' Cristən' ben' gwlej Diozən' par gaqualene' nasyon çhechon'. Can' goquə goc complir de'e ca' ben Diozən' mendad boso'ozoj de'e profet ca' che Cristən' antslə ze'e sele'ene'. Gwso'e dižə' de que yoso'ochi' yoso'osaquə' benə' le' na' so'ote'ene'.

¹⁹ Na'a ža leyoša' xbab çhelen' na' le'e yedinje xtolə'əle ca' par niç Xancho Diozən' gwnitlaogüe'en na' par niç gone' ca' sole mbalaz.

²⁰ Nach Xancho Diozən' sele'e Jeso'osən' yežlyo nga yetlas ben' gwleje' gwlatte par naque' Cristən'.

²¹ Pero chonən byen yega'an Jesocristən' yoban' xte cata' əžin ža gon Diozən' par niç yežlyon' yeyaguən de'e cobə. La' Diozən' bene' par niç de'e profet ca' benə' ca' gwleje' par gwsa'aque' lažə' ne'ena' na' gwso'e xtiže'ena' cana'ate boso'ozoje' de que yeyaguən de'e cobə.

²² De'e Moizezən' be'elene' de'e xaxta'ocho ca' dižə' gože' lega'aque': "Xancho Diozən' sele'e yeto benə' lao dia çhelen' par güe'elene' le'e xtiže'ena' can' bsele'e nada'. Çhe be'enan' gwzenagle bitə'ətezə əne'.

²³ Na' Diozən' gone' par niç yesə'əbiayi' yoguə' benə' ca' cui yoso'ozenag che be'ena' əsele'e." Can' gož de'e Moizezən' de'e xaxta'ocho ca'.

²⁴ Le'egatezə ca' yoguə'əloj de'e profet ca' benə' ca' gwso'e xtižə' Diozən' cana' gwzolaozən' len de'e Samuelən' na' benə' ca' gwsa'ac gwdechlə gwso'e dižə' che tyemp nga zocho na'a na' che de'e ca' bachac na'a.

²⁵ De'e profet ca' zjənaque' xaxta'ocho na' lyebe de'en ben Diozən' len de'e Abraannə' de que gone' güen len xi'in dia che'eno' naqan par chio'o. Gože' de'e Abraannə': "Por xi'in dia chio' benə' nitə' to to nasyon nite'e mbalaz."

²⁶ Can' chac, Diozən' gwleje' Xi'inən' bsele'ene' por ni çhecho na' gone' par niç to tole sole mbalaz šə yedinjele xtolə'əle ca'.

4

Bedən' na' Juannə' nite'e lao benə' gwnabia' ca'

¹ Ne'e chso'elente Bedən' na' Juannə' benə' ca' dižə' cata' besə'əžin balə bəox che benə' Izrael ca', na' benə' gwnabia' che yo'odao' əblao çhega'aque'ena' na' benə' sadoseo ca' benə' ca' cui chse'ejle' de que yesy'əəban benə' guat ca'.

² Be'nə' sadoseo ca' chəsə'əže'e de'en choso'osed choso'olo'i Bedən' na' Juannə' benə' ca' zjənžaguən', choso'ozejni'ine' lega'aque' de que gwžin ža cata' yesy'əəban benə' guat ca' çhedə' beban Jeso'osən'.

³ Na' benə' blao ca' gosə'əzene' Bedən' len Juannə' na' gosə'əyixjue' lega'aque' ližyan' sin cui gwsa'ogüe' xya çhega'aque' can' cheyalə', çhedə' bachexjw že'ena' na' bito golə'əch so'one' yełə' jostis çhega'aque'ena' že'ena'.

⁴ Na' ca' naquə benə' ca' gwse'ene' choe' Bedən' na' Juannə' xtižə' Diozən' zane' gwso'onlilaže'e Cristən', na' txen len benə' ca' bagwso'onlilaže'ene' antslə gwnitə' gueyə' mil benə' byo cui cuent no'olə.

⁵⁻⁶ Na' beteyo benə' gwnabia' che benə' Izrael ca', benə' golə blao ca' na' benə' ca' choso'osed choso'olo'i lei de'en bzoj de'e Moizezən' besə'ədopə besə'əžague' Jerosalennə' len Anasən' ben' naquəch bəox əblao na' len Caifasən' na' Juannə' na' Ljandr na' nochlə benə' ca' zjənaque' bišə' ljuežj ben' naquəch bəox əblaon'.

⁷ Nach gwso'one' mendad jəsə'əxi'e Bedən' na' Juannə' na' gosə'ənbene' lega'aque': —žNon' ben lsens çhele par beyonle be'ena' nxinjən'? o žnon' ben mendad par beyonlene'?

⁸⁻⁹ Na' ca' naquə Spirit che Diozən' gwnabia'an yichjla' aždao' Bedən' nach benən par niç gože' benə' ca': —Le'e benə' gwnabia' na' benə' golə benə' blao che Izraelən', çhñable nac goquən' beyonto' be'ena' nxinj ni'ena'.

¹⁰ Yoguə'əle cheyalə' gwzenagle na' ənia' le'e, de que le'e betle Jesocristən' be'ena' naquə benə' Nasaret, bda'alene' to le'e yag coroz, pero Diozən' bolis bosbane'ene' ladjo benə' guat ca', na' Jesocrist nan' bene' yełə' guac beyaque bengə.

¹¹ Jesocristən' naque' le'eželaogüe benə' zaque'e, pero bito bzenagle che'. De'e na'ana' gwxaquə'əlebene' ca' to yej de'en naquə le'eželaogüe de'e güen na' le'e gwxaquə'əlebele ca' benə' güen yo'o benə' jəsə'əçho'on yejən' de'e naquəch yej güen, pero yejən' banaquən yej squin na'a.

¹² Tozə Jesocristən' gwaquə yebeje' benə' xni'a de'e malən', na' notono nochlə zo doxen lao yežlyon' benə' gaquə yebej chio'o xni'a de'e malən' sino tozə Jesocristən'.

¹³ Besy'əəbane benə' gwnabia' ca' can' boži'i Bedən' na' Juannə' xtižə'əga'aque'ena' sin cui besə'əžebe', len nachbia' zjənaque' benə' yixə' na' bito zjənsedteque'. Nach gwsa'acbe'ine' de que benə' ca' bito chesə'əžebe' çhedə' bagosə'ədalene' Jeso'osən'.

¹⁴ Na' de'en zecha ben' beyaque ni'enə' txen len Bedən' na' Juannə' bito besyə'əžele beṇə' gwnabia' ca' bi xya sa'ogü'e' chega'aque'.

¹⁵ Nach besyə'əbeje' apostol ca' fuerlə žlac boso'oxi'e' entr ljuēžjga'aque' naclə so'one'.

¹⁶ Na' beṇə' gwnabia' ca' gwse'e' ljuēžjga'aque': —ŽBi goncho len beṇə' quinga? Yoguə' beṇə' ža' Jerosalen nga zjəneze' de que gwso'one' to miłagr xen na' bito gaquə ye'echo beṇə' de que bito gwso'one' miłagrən'.

¹⁷ Letechozə goncho par niçh cui gasa' laljə dižə' de'en chso'enə'. De'e na'anə' cheyałə' ye'echo lega'aque' gata' castigw gual chega'aque' šə so'eche' xtižə' Jeso'osən'.

¹⁸ Nach gwsa'axe' Bedən' na' Juannə' de'e yoblə na' gwse'e' lega'aque' cuich so'e dižə' che Jeso'osən' na' cuich no yoso'osed yoso'olo'ine' che'.

¹⁹ Nach Bedən' na' Juannə' bosyo'oži'en gwse'e' lega'aque': —Legon xbab che de'e nga, žəchaquəle chene'e' Diozən' gwzenagto' chele o šə chene'ene' gwzenagto' che'enə' ža?

²⁰ Bito gaquə cuezəto' cuich güe'eto' dižə' che de'e ca' bable'ito' na' babeneto' che Jeso'osən'.

²¹⁻²² Na' de'e zan de'e gwse' beṇə' gwnabia' ca' lega'aque' par yoso'ošebe' lega'aque'. Pero na' bito besə'əželene' naclə so'one' lega'aque' castigw chedə' beṇə' zan chso'e' yelə' choxçwlen che Diozən' de'en beyaque be'enə'. Mazəchlə choa izene' na' dezd goljtie' cui goquə se'e. Na' beṇə' gwnabia' ca' cui gwse'enene' yoso'oše'e' beṇə' zan ca', de'e na'anə' bosyo'osane' Bedən' na' Juannə'.

Gosa'əḡabene' Diozən' gaquəlene' so'e xtiže'ena' sin cui yesə'əžebe'

²³ Na' Bedən' len Juannə' catə' bosyo'osan beṇə' gwnabia' ca' lega'aque' jəya'aque' gan' nitə' yeziquə'əchlə beṇə' ca' chso'onlilažə' Cristən' na' gwso'elene' lega'aque' dižə' yoguə'əloł can' əgwse' bəxoz əblao ca' na' beṇə' golə blao ca' lega'aque'.

²⁴ Na' beṇə' ca' catə' gwse'enene' dižə'ən tožə can' gwso'one' xbab len lega'aque' na' gwso'one' orasyonṇə' lao Xəcho Diozən' gosə'əne': —Xənto' Dioz, len' beno' yoban' na' yežlyon' na' nisda'onə'. Len' beno' beṇəçh, bia ca' chsa'aš na' biquə'əchlə de'e zjəde, na' len' chnabi'o doxenlə.

²⁵ Na' Spirit çhio'onə' benən par niçh de'e Rei Dabin' bzenague' çhio' na' bzoje' dižə' quinga de'en nan:

Beṇə' ca' cui zjənaquə beṇə' Izrael chsa'ase' contr le' Xənto' Dioz, pero bitocžə gaquə can' chso'one' xbabən'.

²⁶ Beṇə' gwnabia' che ṇasyon ca' na' che yež ca' txennə' zjənaque' chso'one' contr le' Xənto' Dioz,

na' contr Xi'ino' Cristən' ben' bselo'o par gaquəlene' ṇasyon Izrael çheto' nga.

²⁷ Na' lao' syoda ṇgan' besə'ədobə Rei Erodən' na' Ponsio Pilatən' na' beṇə' cui zjənaque' beṇə' Izrael, na' len beṇə' Izrael ca'. Na' yogue'e gwso'one' txen par gwso'ote' Xi'ino' Jeso'osən' ben' naquə beṇə' la'aždao' xi'ilažə' juisy, ben' gwlejo' par gaquəlene' ṇasyon çheto' nga.

²⁸ Gwso'one' can' bsi'o xneze gaquə na' can' gwduxjui'o cana'ate.

²⁹ Na' na'a ža Xənto', bgüia can' chso'on beṇə' gwnabia' ca' chse'enene' yoso'ošebe' neto' beṇə' güen žin çhio', na' goclen neto' par niçh cui žebto' güe'eto' xtižə'ona'.

³⁰ Na' catə' güe'eto' xtižə'ona' blo'ešga yelə' guac che Xi'ino' Jeso'osən' beṇə' la'aždao' xi'ilažə' juisyən' ca' de'en gaquə no miłagr, na' yesyə'əyaque no beṇə' chsa'acšene' na' gaquə bichlə de'e yesyə'əbane beṇə'.

³¹ Na' catə' beyož gwso'one' orasyonṇə' ca' Diozən' bene' par niçh gwxo' gan' zjəndopə zjənžague'enə' na' Spirit che'enə' bedəṇabia'achən yichjla'ažda'oga'aque'enə' na' goclenən lega'aque' par gwso'e xtiže'ena' sin cui besə'əžebe'.

Gwso'one' de'en zjəde chega'aque' tožə

³² Na' yoguə' beṇə' ca' gwso'onlilažə' Cristən' tožə can' goquə yichjla'ažda'oga'aque'enə'. Na' yoguə' bi de'en zjəde chega'aque'ena' gwso'one'en tožə na' notono gwna: "Çhia' de'e nga", o "Çhia' de'e na", la' naquən che yoguə'əga'aque'.

³³ Na' apostol ca' gwnitə'əteza gwnitə'e boso'ozejni'ine' beṇə' de que Jeso'osən' bebane' ladjo beṇə' guat ca'. Na' Diozən' goclenchgüe' lega'aque' len bi de'en gwso'one' na' bene' par niçh beṇə' yeziquə'əchlə gwsa'apəchgüe' lega'aque' respet.

³⁴ Can' goquə bito bi bi goquə fałt bi de'en besə'əyažje beṇə' ca' gwso'onlilažə' Cristən', chedə' beṇə' ca' gotə' yežlyo chega'aque' o ližga'aque' tgüejə gwso'otəga'aque'en.

³⁵ Na' mech de'en besə'əle'ine' che to ton boso'onežjue'en apostol ca' na' apostol ca' gosə'əyise'en len beṇə' ca' yelə' con noe' byažjene'en.

³⁶ Can' ben to beṇə' Çhipre beṇə' le Jwse. Naque' beṇə' goljə lao dia che de'e Lebin' na' apostol ca' bosə'əsi'ene' Bernabe, zejen dižə' ben' chtipe' lažə'əcho.

³⁷ Jwse na'anə' bete'e to yežlyo che'enə' na' mech de'en ble'ine' çheinə' bnežjue'en apostol ca'.

5

De'e mal de'en ben Ananias na' Safira

¹ Na' zo to beṇa' le Ananias na' no'ol che'enə' Safira, na' Ananiasən' bete'e to yežlyo che'enə'.

² Pero na' bosə'oxi'e entr lega'acze' yoso'oxoayague' apostol ca' yoo'onežjue' to partzə mech de'en besə'əle'ine' cheinə' na' se'e lega'aque' de que doxenənə'. Nach gwyej Ananiasən' na' bnežjue' mechən'.

³ Nach Bedən' gože'ene': —Ananias, žbixchen' bzenago' che gwxiye'ena' par chacdo' əxoayago' spirit che Diozən', nao' neto' de que choṇo' doxen mechən' de'en ble'ido' che yežlyon' len bagwlo'oša'ole to partən' par cuinlen'?

⁴ Čhio' yežlyon' catə' cuinə' goto'on, na' čhio' mechən' de'en ble'ido' catə' beto'on na' zaco'o par beno' bi che'endo' len len. De'e malən' benle ca de'en goquale əxoayagle len de'en benle neto'. Caguə contr neto'onə' babenle de'en benlažə'əle sino contr Dioz na'anə'.

⁵ Nach Ananiasən' cata' benene' xtižə' Bedən' to bgüixze' na' gote'. Na' yoguə' beṇə' ca' gwse'enene' dižə' can' goquən' lechgualə besə'əžebe'.

⁶ Na' besə'əžin beṇə' xcuidə' ca' gan' bgüixə' de'e Ananiasən' na' bosyā'əchele' cuerp che'ena' to lachə' na' besyə'əyo'ene' gan' bosə'ocuaše'ene'.

⁷ Na' gwde do šon' or gote' bžin no'ol che'ena' na' gwyo'e yo'onə' sin cui nezene' šə bin' bagoc che de'e be'en che'ena'.

⁸ Na' Bedən' gože'ene': —Ca naquə yežlyon' de'en betə'əlen' žəleine' to ca'atə'ətən' ble'ile chein' ža?

Na' Safiran' gože'ene': —To ca'atə'ətən'.

⁹ Nach Bedən' gože' no'olən': —žbixchen' goco' tozə len be'en čhio'onə' chaquele gonle Diozən' prueb šə leine' can' ne' bito əxoayagcho? Cho'a puert nga zjəzecha beṇə' ca' baboso'ocuašə' be'en čhio'onə' na' ŋa'a so'e le'.

¹⁰ Na' le'e bgüixte Safiran' lao Bedən' na' gote'. Na' catə' gwso'o beṇə' xcuidə' ca' lo'o yo'onə' besə'əle'ine' 'bagote' nach gwso'ene' jəsə'acuaše'ene' cuit de'e be'en che'ena'.

¹¹ Na' yoguə' beṇə' ca' chso'onlilažə' Cristən' besə'əžebe' can' goquən' na' leczə besə'əžeb yeziquə'əchlə beṇə' gwse'ene dižə' can' goquən'.

Gwso'one' de'e zan milagr

¹² Na' apostol ca' gwso'one' de'e zan milagr entr beṇə' ca' ža' Jerosalenna'. Na' beṇə' ca' chso'onlilažə' Xancho Jesocristən' chəsə'ədopə chəsə'əžague' txen cha'ašil che yo'odao' əblaonə' gan' nzi' "Čhe Salomonə'".

¹³ Na' yeziquə'əchlə beṇə' ca' ža' Jerosalenna' lechgualə gwsa'apaga'aque'ene' respet, la'anə'acza besə'əžebe' par yesə'əžague' txen len lega'aque'.

¹⁴ Pero na' zane' gwso'onlilažə'e Xančon' na' besə'əžague' txen, zan beṇə' byo na' no'olə.

¹⁵ Na' catə' no beṇə' gwsa'acšene gosə'əyixjue' lega'aque' tnezan' do lao cam o do lao yagla' gosə'əbeze' catə' te Bedən' na' gwse'enene' nite'e gan' yesə'əchele' bχen che Bedən' par ničh yesyā'ayaquene' šə bi yižgüen' chse'ine'.

¹⁶ Na' beṇə' ca' ža' yež ca' zjəchi' galə'əza Jerosalenna' ja'aque' Jerosalenna' zjənčhe'e beṇə' ca' cha'acšene na' beṇə' ca' zjəyo'o zjəyaz de'e xio' ca'. Na' por yelə' guac che Diozən' apostol ca' gwso'one' par ničh besyə'əyaquene' beṇə' ca' gwsa'acšene na' besyə'əbeje' de'e xio' ca' zjəyo'o yičhjlə'aždao' beṇə'.

Boso'olagzejə boso'olagzide' Bedən' len Juannə'

¹⁷ Nach ben' naquəch bχoz əblao na' yeziquə'əchlə beṇə' sadoseo ca' beṇə' ca' cui chse'eje'e de que yesyā'əban beṇə' guat ca', besə'əgue'ine' apostol ca'.

¹⁸ Na' gosə'əzene' lega'aque' na' gosə'əyixjue' lega'aque' ližyan'.

¹⁹ Na' to angl beṇə' za' gan' zo Xancho Diozən' bžine' ližyan' še'elə na' bsaljue' puert ca' na' bebeje' lega'aque'.

²⁰ Na' gože' lega'aque' žja'aqueche' yo'odao' əblaonə' na' so'eche' dižə' len beṇə' ca' chəsə'əžaguən' naquən' so'one' par yesə'əzi'e yelə' mban zejlicanən'.

²¹ Nach de'en gwse'enene' can' gož anglən' lega'aque', ja'aque' yo'odao' əblaonə' cata' gwye'eni'inə' na' bosə'osed bosə'olo'ine' beṇə' ca' zjənžaguən'.

Na' ben' naquəch bχoz əblao txen len beṇə' golə' blao ca' chəsə'ənabia' ŋasyon Izraelən' besə'ədobe' par gwso'one' jontən' nach gwso'one' mendad žjəsə'əxi'e apostol ca' gan' zjədie' ližyan'.

²² Pero catə' besə'əžin xā'ag yo'odao' ca' ližyan' caguə no apostol ca' nla'. Na' jəya'aque' lao beṇə' gwnabia' ca' jəsyə'ədixju'e.

²³ Chse'e beṇə' ca': —Nyeyw čhech ližyan' na' soldad ca' nite'e cho'a puertən' chsa'ape'en pero catə' bsaljwto' puertən' caguə no apostol ca' ža' lo'o ližyan'.

²⁴ Na' ben' naquæch b̄xoz əblao na' beṇə' gwnabia' che soldad ca' chsa'apə yo'oda'onə', na' b̄xoz gola hlao ca' catə' gwse'enene' rsonṇə' besyə'əbanene' na' gwsa'aczejlaze'e bi zeje ca de'en bagoquan'.

²⁵ Na' lao chsa'aczejlaze'ena' b̄zin to beṇə' gože' lega'aque' de que apostol ca' beṇə' ca' gosə'əyixjue' ližyan' ž'e' cha'ašil che yo'odao' əblaona' choso'osed choso'olo'ine'.

²⁶ Nach beṇə' gwnabia' che soldad gop ca' gwyeje' len x̄a'ag yo'odao' ca' jəsyə'əxi'e apostol ca' dižə' šao'. Bito gwso'one' znia len lega'aque' chedə' besə'əžebe' beṇə' ca' choso'ozenag xtižə' apostol ca' šə yoso'ošiž'e' lega'aque' yej.

²⁷ Na' catə' besə'əžin apostol ca' lao beṇə' gwnabia' ca' beṇə' ca' chso'on jontən' nach ben' naquæch b̄xoz əblao gože' lega'aque':

²⁸ —Bač bento' mendad cui güe'ele dižə' che Jeso'osən' na' cuich əgwsed əgwlo'ile beṇə' che le'ena', na' mazachlə babe'elenle yoguə' beṇə' Jerosalen ca' xtižə'ena'. Na' bachos-baguə'əle neto' che de'en gwso'ote'ene'.

²⁹ Nach Bedən' na' apostol ca' yelə' gwse'e le': —Naquæchan de'e žialao xench gwzenagto' che Diozən' cle ca che benəchan'.

³⁰ Le'e betle Jeso'osən' bda'alene' to le'e yag coroz pero Dioz ben' cho'ela'ocho na' ben' be'elao' de'e xaxta'ocho ca' bolis bosbane'ene' ladjo beṇə' guat ca'.

³¹ Na' na'a Diozən' babnežjue'ene' yelə' bala'an xen na' yelə' gwnabia' xen par nič chnabi'e na' chebeje' beṇə' xni'a de'e malan'. Na' le'ena' chene'ene' gaquəlene' yoguə' chio'o beṇə' Izrael par nič yedinjecho xtolə'əchon' na' yezi'ixene' checho.

³² Neto' nezeto' can' ben Diozən' len Jeso'osən' na' cho'eto' dižə' chei, na' lecžə Spirit che Diozən' nezzen na' cho'en dižə' chei na' Diozən' babsel'e' Spirit che'ena' zon lo'o yichjla'aždao' beṇə' ca' choso'ozenag che'.

³³ Na' lechguəle besə'əž'a beṇə' gwnabia' ca' catə' gwse'enene' can' gož Bedən' lega'aque' na' gwse'enene' so'ote' apostol ca'.

³⁴ Pero na' lao jontən' zo to beṇə' fariseo beṇə' le Gamaliel. Chsed chlo'ine' beṇə' lei de'en bzoj de'e Moizežən' na' gwsa'apəchgua beṇə' le' respet. Na' Gamalielan' gwzeche' lao jontən' na' bene' mendad yesə'əchoj apostol ca' fuerlə žlac güe'elene' beṇə' ca' ža'anə' dižə'.

³⁵ Nach gože' beṇə' ca' ža'anə': —Beṇə' gwlaž, cheyalə' gongaxjcho xbab nac goncho len beṇə' quinga par nič goncho de'en naquə de'e sin'.

³⁶ Le'e yosa'aləžə' can' goquə catə' bchoj ben' le Teudas gwne' de que naque' beṇə' zaque'e. Na' do tap gueyoa beṇə' bosso'ozenag che' na' gwsa'aquene' txen. Pero na' b̄zin ža gwso'ot beṇə' le' na' besyə'əyasələs beṇə' ca' gwsa'aque' le' txen, caguə bi goquæch so'one'.

³⁷ Nach gwdechlə to beṇə' Galilea ben' le Jodas bchoje' ca tyempən' bosso'ogual'e' yiš balə beṇə' ža' to to yež, na' beṇə' zan gwsa'aquene' txen na' lecžə b̄zin ža gwso'ote'ene' na' beṇə' ca' gwsa'aque' le' txen lecžə besyə'əyasələse'.

³⁸ Na' de'e na'anə' choṇə' le'e consejw nga, ljoye' beṇə' quinga, bito bi gonecho lega'aque'. La' šə de'en choso'osed choso'olo'ine'ena' naquan che lega'acze' gwžin ža catə' yenitən.

³⁹ Na' šə de'en choso'osed choso'olo'ine'ena' naquan che Diozən', bito bi gaquə goncho par cui gasələsan. Cheyalə' gapcho cuidad par nič cui tiləlencho Diozən'.

⁴⁰ Na' gwsa'azləžə' beṇə' gwnabia' ca' can' gož Gamalielan' lega'aque'. Nach gwsa'axe' apostol ca' na' gosə'əyine' lega'aque' na' gwso'one' mendad cuich no yoso'osed yoso'olo'ine' che Jeso'osən' batə'ətezəchlə. Nach bosso'osane' lega'aque'.

⁴¹ Na' ca naquə apostol ca' catə' besyə'əchoje' gan' gotə' jontən' chesyə'əbeine' de que Diozən' bsi'e xpeze bosso'ochi' bosso'osaquə' beṇə' lega'aque' por ni che de'en choso'osed choso'olo'ine' che Jeso'osən'.

⁴² Na' yoguə' ža bosso'osed bosso'olo'iche apostol ca' che Jesocristən' do liž beṇə' na' do catə' chja'aque' yo'odao' əblaona'.

6

Beṇə' ca' chso'onliləžə' Cristən' gosə'əbeje' gažə beṇə' par gwsa'aque' comision chega'aque'

¹ Na' ca tyempən' zda chanch beṇə' ca' chso'onliləžə' Jesocristən' na' beṇə' ca' chso'e dižə' griego gwzoloa chasə'əže'eše'e chedə' no'olə gozeb ca' entr lega'aque' bito chasə'əzi'e lebe len no'olə gozeb ca' entr beṇə' ca' chso'e dižə' ebreo catə' chasə'əyise' de'en chse'ej chsa'o to toga'aque'.

² Nach apostol ca' šižin bosyo'otobe' yeziquə'əchlə beṇə' ca' chso'onliləžə' Jesocristən' na' gwse'e lega'aque': —Bito naquan güen par neto' cuežəto' cuich əgwsed əgwlo'ito' beṇə' xtižə' Diozən' par nič chisto' de'en əse'ej əsa'o beṇə'.

³ De'e na'anə' beṇə' bišə', lecuej gažə beṇə' entr le'e, beṇə' chnabia' Spirit che Diozən' yichjla'ažda'oga'aque'ena', beṇə' zjənaquə beṇə' sin' na' beṇə' chso'on de'e güenə', na' le'e gon lao na'aga'aque' yesə'əyise' de'en əse'ej əsa'o beṇə' ca'.

⁴ Na' neto' sotezə soto' gonto' orasyonnə' na' əgwsed əgwlo'ito' beṇə' xtižə' Diozən'.

⁵ Na' gwsa'azlažə' yoguə' beṇə' ca' gwsə'one' can' gwse' apostol ca' lega'aque', na' gosə'əbeje' to beṇə' le Esteban, beṇə' chonlilažə'əchgua Diozən' na' chnabi'achgua Spirit che Diozən' yichjla'aždaogü'e'ena'. Na' lecəzə gosə'əbeje' Lip na' Procoro na' Nicanor na' Timon, na' Parmenas na' Nicolas beṇə' Antioquia, beṇə' ben cuine' beṇə' Izrael.

⁶ Na' bosə'ozoe' lega'aque' lao apostol ca' par niçh apostol ca' gwsə'one' orasyon chega'aque' na' bosə'o'xoə na'aga'aque'ena' yichj beṇə' ca' par gwsə'o' lao na'aga'aque'ena' žinnə' de'en so'one'ena'.

⁷ Na' beṇə' zanch gwse'ene' xtižə' Xancho Jesocristən', na' zan beṇə' Jerosalennə' gwsə'onlilažə'ene' na' lecəzə zan bəxoz ca' bosə'ozenague' na' gwse'ejle'e xtižə'ena' de'en bosə'osed bosə'olo'ine'.

Gosə'əzene' Estebannə'

⁸ Na' ca naquə Estebannə' gwzochgua yelə' guac che Diozən' len le' na' Diozən' goclenchgü'e' le'. De'e na'anə' bene' miłagr na' bichlə de'e zaquə' yesyə'əbane beṇə' lao beṇə' ca' ža' Jerosalennə'.

⁹ Na' zo to yo'oda'onə' de'en chəsə'əne' "Yo'oda' che Beṇə' ca' Gwsa'ac Esclabos". Beṇə' ca' chəsə'ədoṇə chəsə'əžag na' za'aque' Sirene na' Alejandria, na' Silisia na' Asia, na' balə beṇə' ca' gwzə'olao gwsa'acyože' Estebannə'.

¹⁰ Pero na' bito besyə'əzelene' nac yosyo'oži'e xtižə' Estebannə' chədə' Spirit che Diozən' bnežjon le' yelə' sin' na' bzejni'in le' bin' gwne'.

¹¹ Nach gosə'əgo'oyele'e to chopə beṇə' par bosə'o'xoəyague' gosə'əne' de que Estebannə' babžia bnite'e de'e Moizezən' ben' bzoj lei che beṇə' Izrael ca' na' lecəzə gosə'əne' de que babžia bnite' Diozən'.

¹² Na' beṇə' ca' gwsa'acyožə Estebannə' bosə'ota bosə'one' beṇə' lao syodan' na' beṇə' golə blao che beṇə' Izrael ca' na' beṇə' ca' chosə'osed chosə'olo'i lei de'en bzoj de'e Moizezən'. Na' ja'acdoe' gan' zo Estebannə' na' gwsə'o'xe'ene' na' gosə'əche'ene' gan' ža' beṇə' ca' chəsə'ənabia' Izraelən'.

¹³ Nach besyə'əyilje' beṇə' soe' dižə' güenlažə' beṇə' gosə'əne' che': —Benga cuiczə žizə zoe' chžia chnite'e yo'oda' əblao nga na' lei de'en bzoj de'e Moizezən'.

¹⁴ Babeneto' ne' de que Jeso'os beṇə' Nasaretən' yochinjə' yo'oda' əblaonə' na' yoše'e costombr checho ca' de'en ben de'e Moizezən' mendad naəcho.

¹⁵ Na' beṇə' gwnabia' ca' na' notə'ətezəchlə beṇə' ca' zjəchi' gan' chso'one' yelə' jostisən' besə'əgüie' cho'alao Estebannə' na' besə'əle'ine' chactitan ca' cho'alao angl.

7

Choe' Estebannə' dižə'

¹ Nach ben' naquəch bəxoz əblaonə' gože' Estebannə': —žEnaquən ca nga chəsə'əna beṇə' quinga?

² Nach Estebannə' gože' lega'aque': —Le'e beṇə' golə na' le'e beṇə' xcuidə', legwzenag chia' len to chopə de'e ənia' le'e. Diozən' ben' naquə le'ezelaogü'e beṇə' zaque'e bloe' laogü'e' de'e xaxta'ochə Abraannə' catə'ən gwzoe' Mesopotamian' antslə ze'e žjasoe' Arannə'.

³ Na' Diozən' gože'ene': "Bchoj lažə'onə' na' ladjo beṇə' family chio' na' gwyej jəsə' latjə gan' gwlo'ida' le'."

⁴ Nach de'e Abraannə' bchoje' gan' ža' beṇə' Caldea ca' na' jəsəe' Arannə'. Na' bžin ža got de'e xə'ena' na' gwdechlə Diozən' gwche'e de'e Abraannə' nga gan' zocho.

⁵ Diozən' bito bnežjue' de'e Abraannə' yežlyonə' gaquan che', ni to pedas da'ozən', sino bene' lyebe de que gacuan che beṇə' ca' ze'e za'ac lao dia che'ena' catə' bagote', la'anə'əczə cui no xi'ine' ne'e so catə'ən gož Diozən' le' ca'.

⁶ Nach Diozən' lecəzə gože'ene' de que xi'in dia che'ena' žjasə'anite'e laž beṇə' zitə' tap gueyoa iz gan' əsa'aque' esclabos na' yesə'əžaglaochgü'e'.

⁷ Nach Diozən' gože'ene': "Nada' gwnežjua' castigw che nasyonnə' gan' so'one' xi'in dia chio' ca' esclabos na' gona' ca yesyə'əchoj xi'in dia chio'onə' na' da'aque' əso'elaogü'e' nada' nga."

⁸ Nach Diozən' bene' lyebe len de'e Abraannə' de que gone' güen len xi'in dia che'ena'. Na' bene' mendad so Abraannə' to seņy de'en ne' sirconsision, le' na' len beṇə' byo ca' za'ac lao dia che'ena' par gacbia' de que chse'ejle'e che lyebe de'en bene'ena'. De'e na'anə' catə' goljə xi'ine' Isaaquan' bzo'əbo' seņyan' to xmanzebo', na' lecəzə can' ben de'e Isaaquan' catə' goljə xi'ine' Jacobən'. Na' ca'aczə ben de'e Jacobən' len de'e xi'ine' ca' šižinnə' beṇə' ca' gwsa'ac šižin dia che chio'o beṇə' Izrael.

⁹ Na' xi'in de'e Jacobən' be'en le Jwse, beṇə' biše'e ca' gwsa'acxi'ine' le' na' gwsə'ote'ene' gosə'əzi' beṇə' Egipto ca' le'. Pero Diozən' gwzoe' len Jwsen'.

¹⁰ Na' goclene'ene' na' bebeje'ene' lao yoguə'əloł de'en bžaglaogüe'enə'. Na' Diozən' bene' par nič de'e Rei Faraonnə' ben' chnabia' Egipton' bebeine' le' na' gwleje' le' par goque' gobernador che Egipton' na' Faraonnə' bzo'ene' bgüia bye' ližen'.

¹¹ Na' gwche' to bgüin doxen Egipton' na' leczə can' goquə Canaannə' na' de'e ɣaxta'ocho ca' bito besə'əzelene' de'e əsa'ogüe' na' besə'əžaglaochgüe'.

¹² Pero na' bžin ža bene de'e Jacobən' rsonnə' de trigw Egipton' na' bsele'e de'e ɣaxta'ocho ca' tši'i jəsə'əxi'en.

¹³ Na' bechop ši'i ja'aque' catə' ben Jwsen' ca besyə'əyombia' beṇə' biše'e ca' le', na' gwneze Faraonnə' ca zjənaquə family che Jwsen'.

¹⁴ Na' Jwsen' bene' mendad žjəsyə'əxi'e ɣaga'aque' Jacobən' na' yoguə'əloł bišə' ljuēžje' ca', naquə ca do gyonšino'e.

¹⁵ Can' goquə gwyej Jacobən' Egipton' na' Egipto na' gote', na' leczə na' gwsa'at xi'inə' ca' beṇə' ca' zjənaquə ɣaxta'ocho.

¹⁶ Na' gwdechlə besyə'əyo'e cuerp chega'aque'enə' na' jəsyə'əcuəše'ene' to lo'o bloj ba gan' nzi' Siquem, to yežlyo de'en gwxi' Abraannə' de'en gwso'otə' xi'in Amor beṇə' Siquem.

¹⁷ Na' catə' bazon əžin tyemp əgwnežjo Diozən' lega'aque' yežlyon' can' bene' lyebe len de'e Abraannə', bazda chan beṇə' Izrael ca' ža' laž beṇə' Egipto ca'.

¹⁸ Na' ca' chac beža' rei che Egipton' na' rei cobən' bito gwnezene' can' goquəlen Jwsen' nasyon Egipton'.

¹⁹ Na' rei nga gwdiljlaže'e bin' əbde'ine' par bene' mal len de'e ɣaxta'ocho beṇə' Izrael ca', na' bene' mendad žjəsə'əcho'on xi'inga'aque'enə' par nič yenit dianə'.

²⁰ Na' ca tyempən' goljə de'e Moizezən' na' bebei Diozən' le' na' ɣaxne'enə' bosyo'oscha'ogüe' le' šonə bio'.

²¹ Pero na' bžin ža benən byen jəsə'əcho'one'ebo', na' xi'in rein' to no'olə beželene'ebo' na' beyo'ebo' liže'enə' boscha'ogüe'ebo' ca xi'inə'.

²² Ca' goquən' bsed de'e Moizezən' tcho'a tšao' yelə' sin' che beṇə' Egipto ca', na' bene' de'e zaque'na' be'e dižə' de'e zaque'e.

²³ Na' čhoa ize de'e Moizezən' catə' gwnan žjəlane'e beṇə' Izrael gwlaž che' ca'.

²⁴ Na' jəle'ine' to beṇə' Egipton' chchi' chsaque'e to beṇə' Izraelən', na' goclene' beṇə' Izraelən' na' bete' beṇə' Egipton'.

²⁵ De'e Moizezən' bene' xbab se'ejni'i beṇə' Izrael gwlaž che' ca' de que Diozən' gaquəlene'ene' par yosle' lega'aque' lao na' beṇə' Egipto ca', pero na' bito gwse'ejni'i beṇə' Izrael ca'.

²⁶ Na' beteyo gosə'ədilə chopə beṇə' Izrael ca' entr' lega'acze'. Na' bžin de'e Moizezən' goquene' gone' par nič yenite'e binlo, na' gože' lega'aque': "žBixčhen' chdiləlen ljuēžje ca' entr' beṇə' gwlažzle?"

²⁷ Nach ben' napə dolə'anə' bžigue'e de'e Moizezən' ca'alə gože'ene': "žNo gwna le' gaco' beṇə' gwnabia' par gono' yelə' jostis četo'onə?"

²⁸ žElezə che'endo' goto' nada' can' beto' beṇə' Egipton' nejen'?"

²⁹⁻³⁰ Na' catə' bene de'e Moizezən' can' gož be'ena' le', nach bxonje' jəsəe' čhoa iz gan' nzi' Madian la'anə'əczə naque' beṇə' zitə' len beṇə' ca'. Na' bšagne'e na' na' gwnitə' chopə xi'inə'.

Na' goc čhoa iz zoe'ena' catə' bloe' lao to angl le' latjə dašən' galə'əzə ya'a Sinai. Yo'o anglən' to lo'o yi' beł chdoljən to lo'o xis yešə'.

³¹ Na' catə' ble'i de'e Moizezən' can' chaquən' bebanene', nach bgüigue'e yelatə' par ble'iša'ogüe'ene' na' benene' cholgüiž ɣancho Diozən' le' che'ene'.

³² "Nada' naca' Dioz na' de'e ɣaxta'ogo'o Abraannə', Isaaquən' na' Jacobən' gwso'elaogüe'e nada'." De'e Moizezən' bžebe', caguə cheyaxjene' əggüie'.

³³ Na' gož ɣanchon' le': "Gwlečj xelo'onə' par gapo' nada' respet la' latjə gan' zecha'onə' naquən čhia'.

³⁴ Nada' ble'ida' yelə' yašə' yelə' zi'inə' chde nasyon čhia' Izraelən' Egipton' na' babenda' can' chso'onyašə'aga'aque'. De'e na'anə' gaquələnga'aca'ane'. Da nič əsela'a le' Egipton'."

³⁵ Diozən' gože'ene' ca' la'anə'əczə antslə beṇə' Izrael ca' cui gosə'əzi'e che' na' gwse'ene': "žNo gwna le' gaco' beṇə' gwnabia' par gono' yelə' jostis četo'?" Diozən' bsele'e de'e Moizezən' par gwnabi'e de'e ɣaxta'ocho ca' na' par nič bebeje' lega'aque' lao na' beṇə' Egipto ca', na' angl che Diozən' ben' gwyo'o lo'o yi' bełən' gwzoe' goclene'ene'.

³⁶ Na' de'e Moizezən' bebeje' lega'aque' Egipton' bene' zan miləz na' bichlə de'e zaquə' yebanecho Egipton', na' nisdəo' Exnan' na' latjə dašən' lao čhoa iz.

³⁷ Na' de'e Moizez na'anə' gože' de'e ɣaxta'ocho ca': "ɣancho Diozən' sele'e yeto beṇə' lao dia čele par güe'elene' le'e xtiže'ena' can' bsele'e nada'. Che be'enan' əgwzenagle."

³⁸ De'e Moizezən' gwzoe' len de'e ɣaxta'ocho ca' latjə dašən'. Na' anglən' be'elene' le' dižə' lao ya'a Sinaim' gože' le' dižə' de'e zaquə' əgwzenagcho čhei na' de'e cui te čhei. Na' de'e

Moizezən' bzejni'ine'en de'e xaxta'ocho ca' zjəndopə zjənžag galə'əzə ya'anə'. na' Moizezən' bzoje' dižə'ənə' par chio'o.

³⁹ Pero na' de'e xaxta'ocho ca' bito boso'ozenague' che de'e Moizezən', boso'ozo'ene' ca'alə. Gwse'enene' žjəya'aque' Egipton'.

⁴⁰ Na' lao zda de'e Moizezən' lao ya'a Sinain', gwse'e beņə' biše'e Ronnə': "Ben lgu'a lsaquə' de'en šejni'alažə'ocho, de'e yesə'əbialao lao chio'o tnezən'. La' ca naquə Moizezən' ben' bebej chio'o Egipton' cuili bin' bagoc che'."

⁴¹ Nach gwso'one' to me'e go'oŋ dao' de or na' gwso'ote' no bia yixə' par gwso'elaogüe'eb na' gwnite'e chesyə'əbeine' len de'en gwso'one' len ni'a na'aga'aque'ənə'.

⁴² De'e na'anə' Diozən' gwlejyichje' nasyon Izraelən' na' be'e latjə gwse'ejni'alažə'e bgüüzən', bio'onə' na' beljw ca'. Na' nyoj de'en gwna Diozən' can' gwso'one' nan:

Le'e beņə' Izrael, caguə nandan' be'ela'ole catə'an betle bia yixə' latjə dažən' lao čhoa iz.

⁴³ Benle no lgu'a lsaquə'an gwyejni'alažə'əle,

na' bi'ale yo'o de lachə'an gan' gwyejni'alažə'əle lgu'a lsaquə' de'en ne' Moloc,

na' bi'ale beljon' gwyejni'alažə'əle de'en nzi' Renfan.

Na' de'en bagwlejyichje nada' de'e na'anə' cueja' le'e gan' zolen' na' selə'a le'e zitə' gan' nzi' Babilonia.

⁴⁴ Na' žlac čaše' latjə dažən' de'e xaxta'ocho ca' gwso'one' to yo'o de lachə' gan' ža' yej ta'a ca' gan' nyoj lei čega'aque'ənə'. Na' gwso'one'en con can' gož Diozən' de'e Moizezən' na' con can' blo'ine' le'.

⁴⁵ De'e xaxta'ocho ca' boso'osa'ate' yo'o de'e lachə' čega'aque'ənə' na' yej ta'a ca' gan' nyoj lei čechonə' con ga ja'aque', gwzolaozən tyemp che de'e Moizezən' na' gwzelaon tyemp che de'e Rei Dabin'. Na' gwde got de'e Moizezən' de'e Josuen' gwche'e lega'aque' yežlyon' de'en ben Diozən' lyebe gwnežje' lega'aque', na' Diozən' bene' beņə' ca' ža' yež ca' lao na'aga'aque' catə' gosə'ədiələne' lega'aque'.

⁴⁶ Na' Diozən' bebeine' de'e Rei Dabin', na' de'e Dabin' gone'ene' gone' to yo'oda' par Diozən', Dioz ben' leczə gwyejni'alažə' de'e Jacobən' cana'ate.

⁴⁷ Pero na' Diozən' bito be'e latjə gon de'e Dabin' yo'oda'onə', sino de'e xi'ine' Salomonə' bene'en.

⁴⁸ Na' bito ənacho de que Diozən' ben' chnabia' doxenlə zoe' do lo'o yo'o de'e chon beņə'chən', sino chac can' gwna Diozən' de'en bzoj to profet beņə' be' xtiže'ənə' cana' nan:

⁴⁹ Nada' zoa' yoban' chnabia' na' guaqua gona' par nič gaquə con bin' che'enda' lao yežlyon'. žEna' čaquele gonle to ližə'anə' ža?

Nada' bito čyazjda' yo'o gan' gona' dezcanz.

⁵⁰ Nada' bena' yoguə'ate de'e žjəde.

⁵¹ De'en cui chzenagle, de'en cui chejle'ele lo'o la'ažda'olen' naquə'chuale beņə' žod can' gwsa'ac de'e xaxta'ocho ca'. Cuiczə chzenagle che Spirit che Diozən'.

⁵² De'e xaxta'ocho ca' leczə boso'oči' boso'osaque'e de'e profet ca' beņə' ca' gwso'e xtižə' Diozən' cana' na' gwso'ote' lega'aque' catə'an gwso'e dižə' can' selə' Diozən' Xi'ine'ənə' ben' naquə'le'ezelaogüe beņə' güen. Na' catə' bide'ənə' le'e əbdelene' lao na' beņə' ca' gwso'ote'ene'.

⁵³ La'əñə'əczə nombi'ale lein de'en bnežjw angl ca' de'e Moizezən' cana', bitoczə chzenagle čhei.

Gwso'ote' Estebanə'

⁵⁴ Na' catə' Estebanə' gože' lega'aque' ca' lechuale besə'əloque' xte gwsa'oxoə leygə'aque'ənə'.

⁵⁵ Pero na' Estebanə' chnabi'achgua Spirit che Diozən' le', bcos laogüe'en chgüiachgüe' yobalən' na' ble'ine' yelə' chey che'eni' che Diozən' na' ble'ine' zecha Jeso'osən' cuit Diozən' chnabi'e txen len le'.

⁵⁶ Nach Estebanə' gwne': —Le'e ggüiašc nla'axejə yoban' na' nla' zecha Jeso'osən' ben' goljə beņə'ch cuit Diozən' chnabi'e txen len le'.

⁵⁷ Nach beņə' ca' zjənžaguən' chso'osya'adie' na' boso'osejyw nagga'aque'ənə' nach tši'iza ja'acdoe' gan' ze' Estebanə'.

⁵⁸ Nach gosə'əbeje' Estebanə' fuerlə syodan' na' boso'ošize'ene' yej. Na' beņə' ca' boso'ošizə'le' yejən' boso'onežjo xaga'aquen' de'en zjənchele'ənə' to beņə' güego' beņə' le Saul par nič gwdape'en.

⁵⁹ Na' žlac choso'ošize'e Estebanə' yejən', Estebanə' bene' orasyonə' gwne': —Xana' Jeso'os, bezi' nada' yoban'.

⁶⁰ Nach bzo xibe' lao yon' na' gwne' zizjo gwne': —Xana' bito gwnežjo' castigw che beņə' quinga de'en bagwso'onene' nada'.

Na' beyož gwne' ca', gote'.

8

Saulan' blagzejə blagzide' beṇə' ca' chso'onlilažə' Jesocrisṭən'

¹⁻² Na' beṇə' ca' chso'onlilažə' Jesocrisṭən' Jerosalennə' jəsə'əcuasə'e de'e Esteban', na' gosə'əbežchgüe' che'.

Na' ca naquə Saulan' ža, gwyazlaž'e de'en gwso'ote' de'e Estebannə'. Na' gwde gwso'ote' de'e Estebannə' beṇə' blao ca' gosə'əzolaogüe' bosə'olagzejə bosə'olagzide' beṇə' ca' chəsə'ədoṇə chəsə'əžag chso'elaogüe' Jesocrisṭən' Jerosalennə', na' zan beṇə' ca' chso'elao' Jesocrisṭən' besə'əxonje' ja'aque' do Jodean', do Samarian', pero bito len apostol ca'.

³ Na' Saulan' gwzolaogüe' cheje' liž to to beṇə' ca' chso'elao' Jesocrisṭən' chjəxobe' no beṇə' byo na' no no'olə par chche' e lega'aque' ližyan'.

Beṇə' Samaria ca' gwse'enene' dižə' güen dižə' cobə che Jesocrisṭən'

⁴ Pero na' beṇə' ca' chso'elao' Jesocrisṭən' lao besə'əxonje' ja'aque' doxenlə jəsə'ədixjui'e xtižə' Jesocrisṭən'.

⁵ Na' to beṇə' le Lip beṇə' leczə chonlilažə' Jesocrisṭən' bžine' to syoda ga mbane Samarian' na' be'e dižə' che Jesocrisṭən'.

⁶ Na' bene' miłagr na' catə' besə'əle'ine' miłagrən' de'en bene' len lega'aque' beṇə' zan besə'ədobə bosə'ozenague' che'.

⁷ Bebeje' de'e xio' ca' zjəyo'o zjəyaz lo'o yichjla'aždao' beṇə' zan, na' catə' besyə'əchojən' chso'osya'adi'an. Na' zan beṇə' nat to part güejə cuerp chega'aque' enə' beyone' na' beyone' no beṇə' coj.

⁸ Na' lechgualə besyə'əbei beṇə' ca' ža' syodan'.

⁹ Na' lao' syodan' zo to beṇə' goža' beṇə' le Simon'. De'e zan de'e bene' antslə de'e besyə'əbane beṇə' Samaria ca', bxoayague' lega'aque' gože' de que naque' beṇə' zaque'e.

¹⁰ Na' žlac bene' de'e ca' yoguə' beṇə' lao' syodan' bosə'ozenague' che' tcho'a tšao', beṇə' gol ca' na' xte no bi'i xcuidə' na' gosə'əne' che': —Lele bengan' nse'e yelə' guac che Diozən'.

¹¹ Zan iz bosə'ozenagteze' che' chedə' bentontene' yichjla'ažda'oga'aque' enə' len yelə' goža' che' enə'.

¹² Pero catə' Lipən' gwdixjui'e dižə' cobə che Jesocrisṭən' len lega'aque' na' bzejni'ine' lega'aque' can' nabia' Diozən' notə'ətezə beṇə' soe' latjə, na' gwse'ejle'e che', na' gosə'əchoe' nis, beṇə' byo na' no'olə.

¹³ Na' lenczə Simonnə' gwyejle'e che', na' gwchoe' nis na' goque' tozə len Lipən' gwdalene' le', na' bebanene' ca naquə miłagr ca' de'en chon Lipən' na' yeziqə'əchlə de'e zaquə' yebanczecho.

¹⁴ Nach apostol ca' nita' Jerosalennə' gwse'enene' de que beṇə' Samaria ca' ba-choso'ozenague' xtižə' Diozən', nach bosə'osele'e Bedən' len Juannə' Samarian'.

¹⁵⁻¹⁶ Na' catə' besə'əžine' enə' gwso'one' orasyonnə' par niçh so Spirit che Diozən' lo'o yichjla'aždao' beṇə' Samaria ca', chedə' ca orən' bitonə' son lo'o la'ažda'oga'aque' enə' la' aṇə'əczə bagosə'əcho'e nisən' gosə'əne' so'onlilažə'e Jeso'osan'.

¹⁷ Nach bosə'oxoa na' apostol ca' yichjga'aque' enə' par gwzo Spiritən' lo'o yichjla'ažda'oga'aque' enə'.

¹⁸ Na' ble'i Simonnə' can' chso'on apostol ca' choso'oxoa ne'en yichj beṇə' par chzo Spiritən' len lega'aque', na' bšabene' lega'aque' mech.

¹⁹ Gože' lega'aque': —Legon par niçh nada' gaquə xoa na' anə' yichj beṇə' na' so Spiritən' len lega'aque' can' chonle.

²⁰ Nach Bedən' gože'ene': —Cuiayi' ileno' xmecho'onə' de'en chonližo' xbabən' de que guac si'o yelə' chnabia' che Diozən' len mech.

²¹ Bito zaco'o par gono' ca naquə de'e nga chonto' chedə' yichjla'ažda'ogo'onə' naquən mal lao Diozən'.

²² De'en cheyalə' gono', bedinjə ca naquə de'e malən' chono' na' gwnab goclen lao Diozən' par niçh yezi'ixene' chio' ca naquə xbabən' yo'o lo'o yichjla'ažda'ogo'onə'.

²³ Nachbia' chnabia' de'e malən' le' de'en yo'o lo'o yichjla'ažda'ogo'onə' na' ngo'on le' nez malən' gan' cuiayi'o.

²⁴ Nach Simonnə' boži'en gože' le': —Lenab goclen lao Xanchon' par nada' niçh ni to de'e nga baç gwnao' cui gaquəšga chia'.

²⁵ Na' lao zjəya'ac Bedən' len Juannə' Jerosalennə' gwso'eche' xtižə' Diozən' len beṇə' ža' yež zan gan' mbane Samarian' na' gwso'e dižə' can' bagoclen Diozən' lega'aque'.

Lipən' na' beṇə' Etioṇian'

²⁶ Nach Xanchon' bsele'e to angl par gože' Lipən': —Gwey gan' xoa nez de'en chetj Jerosalennə' na' chden latjə dašən' par yež de'en nzi' Gasa.

²⁷⁻²⁸ Nach Lipən' gwlo'e nezən' na' lao zde'enə' ble'ine' to beṇə' Etiopia zeyo'e to lo'o carret zeze'e gwyeye' Jerosalennə' je'elaogüe'e Diozən'. Le' naque' to beṇə' eunoco na' naque' tesorer che no'olə' gwnabia' che beṇə' Etiopia ca' no'olən' le' Candase, na' yo'ote lao na' tesorerən' yoguə'əloṭte byen che no'olə' gwnabia'anə'. Na' lao zeyo'e lo'o carretən' chlab'e' libr de'en bzoj de'e profet Isaiazən' ben' be' xtižə' Diozən' cana'.

²⁹ Nach Spirit che Diozən' gožən' Lipən': —Jəyexen carretən' na' gwyejlene' txen.

³⁰ Nach gwyejdoch Lipən' par jəyexene' carretən' na' benene' chlab ben' libr de'en bzoj de'e profet Isaiazən'. Nach gože'ene': —ĵEchejni'ido' de'en chlabo'onə'?

³¹ Na' tesorerən' boži'en gože' Lipən': —ĵNacxa gaquə' šejni'ida'anə'? la' caguə no nla' no əgwzejni'ine'en nada'anə'.

Nach gotə'əyoine' Lipən' par niç gwloe Lipən' gwche'elene'ene'.

³² Na' part de'en chlab'e'nə' nyojən' nan:

Ca to xilə' bia nxobə beṇə' par gote'eb,
na' ca to xilə' dao' bia cui chosya'a cata' chšibe'eb,
can' gone', bito bi əne' cata'an yesə'əzi'ichizə'ene'.

³³ Na' yesə'əque'e yelə' bala'an che'enə'.

Na' bito so'one' yelə' jostis che' can' cheyaṭə' gaquən.

Na' tant beṇə' mal ša' ca tyempən',
so'ote'ene' la'anə'əczə' bito bi de'e mal none'.

³⁴ Nach tesorerən' gože' Lipən': —Benšga goclen gwna nada' no chein' na profetən' ca', ĵəche cuine'en ne' ca' o šə che beṇə' yoblə'?

³⁵ Nach Lipən' gwzolaogüe' bzejni'ine' bi zejen part gan' chlab tesorerən' na' leczə gož Lipən' le' che dižə' güen dižə' cobə che Jeso'osən'.

³⁶ Na' ca' chac besə'əžine' ga žia nis, nach tesorerən' gože' Lipən': —Nga žia nis. ĵEcabi gaquə' choa' nisən' na'a?

³⁷ Nach Lipən' gože'ene': —Šə chejli'o che Jesocristən' do yichj do lažo'o, guaquə cho' nisən'. Nach gwne': —Chejli'a de que Jesocristən' naque' Xi'in Diozən'.

³⁸ Nach bene' mendad bcuezə ben' chsa' carretən' len, nach betj Lipən' len tesorerən' jəsə'əžo'e lo'o nisən' par niç Lipən' hcho'ene' nis.

³⁹ Na' cata' besyə'əchoje' lo'o nisən', Spirit che Diozən' le'e beçhe'ete Lipən' ga yoblə, na' bitoch ble'i tesorerən' le'. Na' mbalaz beza' tesorerən' beyo'e lo'o carretən'.

⁴⁰ Nach Lipən' bžine' yež de'en nzi' Asoto na' gwzolaogüe' gwduxjui'e dižə' güen dižə' cobə che Jesocristən' to to yež de'e zjəchi' galə'əza xte bžinte' Sesarean'.

9

Diozən' bocobe' yichjla'azdao' Saulən'

¹ Na' Saulən' con chdacze' cho'e dižə' can' chene'ene' gote' beṇə' ca' chso'onlilažə' Xancho Jesocristən' na' chdacze' cheyiljlaže'e naclə gone' gote' lega'aque'. Na' de'e na'anə' gwyeye' lao beṇə' gwnabia' che bxož che nasyon Izraelən'.

² Na' Saulən' gwṇabene' beṇə' gwnabia'anə' to yiš de'e goxe'e yoso'olab beṇə' ža' to to yo'odao' ca' nitə' Damascon' na' güe'en dižə' ənan de que nape' yelə' gwnabia' par sene' beṇə' ca' bachso'onlilažə' Jesocristən' na' gwçheje' lega'aque' par əche'e lega'aque' Jerosalennə', la'anə' beṇə' byo o no'olə'.

³ Na' bnežjue'ene' yišən' nach gwlo'e nezən' na' bazon əžine' Damascon' cata' to de repentza to be'eni' de'e za' yoban' gwyechjən' le'.

⁴ Na' bgüixə' lao yon'. Na' lao de'enə' benene' che' to beṇə' le': —Saul, ĵbixchen' nlagzejə nlagzido' nada'?

⁵ Nach Saulən' boži'en gože': —ĵNo le' Señor?

Nach be'enə' gože'ene': —Nada' Jeso'osən' nlagzejə nlagzido'. Na' de'en chono' contr nada', chone zi' cuino' can' chac che to go'on bia'an chlibə lao ya la de'en zo lao garrošən'.

⁶ Na' do chaž do chžebze' gože': —Xana' Jeso'os, ĵbin' che'endo' gona'?

Nach Xancho' gože'ene': —Beyas na' gwyey syoda Damascon' na' to beṇə' əne' le' de'en cheyaṭə' gono'.

⁷ Na' beṇə' ca' žag Saulən' benit beçol goc lo'o yichjla'azdaoga'aque'enə' de'e tant besə'əžebe' de'en goquan' na' de'en gwse'enene' xnen' na' cui no besə'əle'ine'.

⁸ Nach beyas Saulən', pero cata' bexa jelaogüe'enə' con cuich ble'ine'. Na' beṇə' ca' nžague'enə' gwso'oxe'e ne'enə' gosə'əche'ene' Damascon'.

⁹ Na' šonə ža gwzoe' sin cui ble'ine' na' bito güe'ej gwdaogüe'.

¹⁰ Na' zo to beṇə' chonlilažə' Xancho Jesocristən' Damascon' beṇə' le' Ananias, na' Ananiasən' ble'idaogüe'ene' Xancho'. Na' Xancho' gože'ene': —Ananias.

Na' boži'en gože': —Nga zoa' Xana'.

¹¹ Nach Xanchoŋ gože'ene': —Gwžoža' na' gwyej liž Jodas de'en zo lao lqueyən' de'en nzi' "De'e Licha", na' nabo' to beŋə' le Saul beŋə' Tarso. Bachone' orasyon.

¹² Na' babena' par ble'idaogüe'ene' le' gwyo'o yo'o gan' zoe'enə' na' bxoə na'onə' jela'ogüe'ene' par niçh yele'ine'.

¹³ Nach Ananiasən' boži'en gože': —Xana', babenda' beŋə' zan chso'e xtižə' bengə ca naquə de'e mal juisyn' babene' Jerosalennə' len beŋə' ca' bagwlejo' par zjənaque' lažə' na'onə'.

¹⁴ Na' chəsə'əne' ze'e nga noxe'e yiš che bxož əblao ca' par sene' yoguə'əloł neto' chonto' orasyon cholgižto' le'.

¹⁵ Nach Xancho Jesocristən' gože' Ananiasən': —Gwyej, la' bagwleja' Saulən' par niçh šeje' entr beŋə' Izrael ca' na' beŋə' ca' cui zjənaquə beŋə' Izrael na' do lao rei par əgwzejni'ine' lega'aque' chia' nada'.

¹⁶ Na' gwlo'ida'ane' ca naquə de'e yašə' de'e zi' de'e gaquə che' de'en əgwzenague' chia'.

¹⁷ Nach Ananiasən' gwyeye' gan' zo Saulən' na' gwyo'e lo'o yo'onə' na' bxoə ne'ene' jela' Saulən' gože'ene': —Saul dao', Xancho Jeso'osən' ben' əbloe' laogüe' le' tnez gan' za'onə' babselə'e nada' par zedalaŋa'le' par niçh yele'ido' na' yedəŋabia' Spirit che Diozən' le'.

¹⁸ Nach le'e besyə'əyinjte de'e ca' ža' jelaogüe' ca' zjənaquən ca no yid bdi'ej na' le'e bele'iteine'. Nach le'e gwžoža'ate' par gwyeye' gan' gwchoe' nisən'.

¹⁹ Na' gwdechlə beyaogüe' na' beyaclaže'e. Na' bega'əne' Damascon' yeto çhopə ža len beŋə' ca' chso'onlilažə' Xanchoŋ.

Saulən' be'e xtižə' Diozən' Damascon'

²⁰ Na' lguəgwəzə gwzola' gwyeye' to to yo'odao' par be'e dižə' che Jeso'osən' de que naque' Xi'in' Diozən'.

²¹ Na' yoguə' beŋə' ca' chse'ene' dižə' de'en be'enə' chesyə'əbanene' na' chse' ljuəžjga'aque': —Ĵecaguə bengan' chda choŋit cholane' beŋə' ca' chso'on orasyonnə' lao Jeso'osən' Jerosalennə'? na' Ĵecaguə par na'aczən' bide' nga na'a, par əgwçheje' beŋə' ca' na' žjue' lega'aque' lao bxož əblao ca'?

²² Pero na' Saulən' tža tža goquəch be'e dižə' len yelə' chnabia' che Diozən' na' Diozən' goclene'ene' par be'e dižə' che Jeso'osən' clar de que naque' ben' bselə' Diozən' par chəlene' benəçhan', na' benə' Izrael ca' ža' Damascon' bito besə'əželene' bin' yesə'əne' çhedə' gwsa'acbe'ine' de que de'en che'e lega'aque' naquən de'e li.

Saulən' bito goque' lao na' beŋə' Izrael contr che' ca'

²³ Na' catə' bagoc sša cho'elen Saulən' beŋə' Damasco ca' xtižə' Jesocristən' nach bosə'oxia beŋə' Izrael ca' so'ote' Saulən'.

²⁴ Na' gosə'ənite'e chsa'ape' to to cho'a puert che ze'enə' de'en nyechj syodan' par yesə'əzene' Saulən' so'ote'ene' batə'ətezə yechoje' pero na' Saulən' gocbe'ine' ca naquən' bazjəchi'inaogüe'ene'.

²⁵ Nach beŋə' ca' chso'onlilažə' Jesocristən' besyə'əletje'ene' le'e ze'enə' še'elə besyə'əgüe'ene' to lo'o žomə cuent goc bechoje' lao' syodan'.

Gwyej Saulən' Jerosalennə'

²⁶ Na' catə' bežin Saulən' Jerosalennə' gone'ene' lene' beŋə' ca' chso'onlilažə' Jesocristən' na', pero yoguə'əlole' besə'əžebe' le', bito gwse'ejle' e šə de'e li bachonlilažə'e Jesocristən'.

²⁷ Nach Bernaben' gwçhe'e Saulən' ja'aque' gan' ža' apostol ca' na' be'elene' lega'aque' dižə' can' goquə che Saulən' lao ngüe'e nezən' zde' Damascon' gože' lega'aque' de que Xancho Jeso'osən' be'elene' Saulən' dižə'. Na' leczə gož Bernaben' lega'aque' de que Saulən' babe'e xtižə' Jeso'osən' Damascon' sin cui chžebe'.

²⁸ Nach apostol ca' gwse'ejle'e can' goc che Saulən', nach gwzola' gwda'len Saulən' beŋə' ca' chso'onlilažə' Jesocristən' Jerosalennə'.

²⁹ Na' sin cui bi chaž chžebe' gwzolaogüe' chzejni'ine' beŋə' Izrael ca' dižə' che Xancho Jeso'osən'. Na' be'e dižə' len beŋə' ca' chsa'ac por dižə' griego, bzejni'ine' lega'aque' xtižə' Diozən' clar, pero na' lega'aque' gwse'enczene' so'ote'ene'.

³⁰ Na' gwsa'acbe'i beŋə' ca' chso'onlilažə' Jesocristən' Jerosalennə' de que beŋə' ca' bazjəchi'inaogüe' so'ote'ene', nach gosə'əche'ene' ja'aque' syoda Sesarean' na' bosy'osele'ene' par syoda Tarson'.

³¹ Na' ca naquə beŋə' ca' chəsə'ədoə chəsə'əžague' chso'elaogüe'e Jesocristən' doxenlə Jodean', Galilean' na' Samarian' gosə'ənite'e binlo, notoch no no bosə'oçhi' bosə'osaquə' lega'aque', na' gwyejəch gwso'onlilažə'əche' Xancho Jeso'osən' na' bosə'ozenague' che' con bin' bzejni'ine' lega'aque'. Na' Spirit che Diozən' btipəçhən lažə'əga'aque' na' benən' par gwyanga'aque'.

Beyaque ben' le Eneas

³² Ca naquə Bedən' cheje' to to yež gan' ža' beṇə' ca' bagwlej Diozən' par zjənaque' lažə' ne'ena' par chjalane'e lega'aque', na' to ža gwyje' jəlane'e beṇə' ca' ža' Lida.

³³ Na' yež Lidan' jti'e to beṇə' le' Eneas, beṇə' bachac xon' iz die' camən' čhedə' nat to part cuerp che'ena'.

³⁴ Nach gož Bedən' le': —Eneas, Jesocristən' cheyone' le'. Gwyas na' btob xcamo'ona'.

Nach le'e gwyaste be'ena'.

³⁵ Na' yogua'əloj beṇə' ža' Lidan' na' beṇə' ža' yež de'en nzi' Saron besə'əle'ine' be'ena' babeyaquene', na' gosa'əbejyichje' costombr čhega'aque' de'en zjənaogüe' par gwso'onlilaže'e Xancho Jesocristən'.

Dorcasan' bebane' ladjo beṇə' guat ca'

³⁶ Na' ca tyemp na' to syda de'en nzi' Jope zo to no'olə le Tabita na' leczə le' Dorcas. Na' chonlilaže'e Jesocristən' na' zotezə zoe' chone' de'e güen, chaclene' no beṇə' yašə' beṇə' chyažj chchine.

³⁷ Pero na' gocšene Dorcasən' na' gottechgüe' na' besya'əguazje'ene' na' beyož na' gosa'əxo'ene' lo'o yo'o de'en naquə čhop cuia.

³⁸ Na' gałə'əzə chega'an yež Lidan' len Jopen' na' beṇə' ca' chso'elao' Jesocristən' Jopen' gosa'əņezene' de que Bedən' zoe' Lidan'. Nach boso'osele'e čopə beṇə' jse'eta'əyoine' Bedən' gwse'ene': —Benšga goclen yo'o len neto' na'atec na'a.

³⁹ Nach Bedən' le'e gwza'ate' gwyje' len beṇə' ca', na' catə' besə'əžine' Jopen' gosa'əche'ene' lo'o yo'o gan' xoa beṇə' guatən' na' le'e gosa'əbigua'ate yogua' no'olə gozeb ca' laogüe'ena' chəsə'əbeže' choso'olo'ine' le' lachə' de'en ben de'e Dorcasən' lao bguane', no bestid na' no camis.

⁴⁰ Nach Bedən' gwleje' yogua'əloj beṇə' ca' chy'o'olə na' bzo xibe' bene' orasyon. Na' beyechje' chgüie' cuerp che no'olən' na' gože'ene': —Tabita, gwyas.

Nach le'e beṇə'ate jelao de'e Dorcasən' chgüie' Bedən' na' le'e bebe'ete'.

⁴¹ Nach Bedən' beṇə'e ne'ena' bosože'ene' nach goxe' no'olə gozeb ca' na' yeziqusa'chla beṇə' ca' zjənaque' lažə' na' Diozən' na' blo'ine' lega'aque' de que babeban Dorcasən'.

⁴² Na' yogua'əloj beṇə' Jopen' gwse'ene' rson can' goquan', na' beṇə' zanch gwso'onlilaže'e Xancho Jesocristən'.

⁴³ Na' Bedən' bega'ane' Jopen' zan ža, gwzoe' liž to beṇə' le Simon, beṇə' gocol yid.

10

Bedən' na' Cornelion'

¹ Na' Sesarea na' zo to beṇə' le Cornelio, naque' capitan che to gueyoa soldad, na' zjənzi'e "Beṇə' Italia".

² La'anə'əczə Cornelion' cui naque' beṇə' Izrael, txen len family che' ca' chso'elaogüe'e Diozən' na' Cornelion' zotezə zoe' chape' Diozən' respet na' chaclenteze' beṇə' yašə' beṇə' chyažj chchine, na' chontezə chone' orasyon lao Diozən'.

³ Na' goc che' to ža do cheda šonə ble'idaogüe'ene' to angl čhe Diozən' gwyo'e gan' zo'ena' na' anglən' gože'ene': —Cornelio.

⁴ Nach Cornelion' chgüiachgüe' lao anglən' na' do chžebe' gože'ene': —čBixan' ža Xana'?

Nach gož anglən' le': —Diozən' ņezene' can' zotezə zo' chono' orasyon na' chnežjo' de'en chəsə'əyažje beṇə' yašə', na' Diozən' chene'ene' gaqualene' le'.

⁵ De'e nga gono' na'a, bselə' beṇə' žjəsə'əxi'e to beṇə' zo Jopen' beṇə' le Simon na' leczə le Bed.

⁶ Zoe' liž to beṇə' gocol yid na' be'ena' leczə lie' Simon, na' liž ben' zon cho'a nisdə'ona'. Na' Simon Bedən' əne' le' bin' cheyałə' gono'.

⁷ Catə' beza' anglən' Cornelion' goxe' čopə mos che' ca' na' to soldad beṇə' chaclen le', na' soldadən' leczə čo'elaogüe'e Diozən'.

⁸ Na' Cornelion' bzejni'ine' lega'aque' yogua'əlojte can' goquan' nach bselə'e lega'aque' Jopen'. Na' gosa'əgüe'e nezən' əzja'aque'.

⁹ Na' beteyon' gałə'əzə bazja'aque' par yesə'əžine' lao' syda Jopen' catə' Bedən' gwlo'e yichjo' che yo'o gan' zo'ena' ca do gobiž par jene' orasyon'.

¹⁰⁻¹¹ Na' lao chone' orasyonnə' gwdonchgüe' xte gone'ene' gaogüe' lgüegwzə. Na' žlac chac de'en gaogüe'ena' ble'idaogüe'ene' le'e yoban' chetj ca to lachə' xen na' nchej dap squinten na' chetjən par lao yon'.

¹² Na' lo'inə' zjəža' yogua' claste bia yixə' ža' yežlyon', bia žia tap ni'a ne'i na' bia zjənxbə le'i lao yon', na' len bia žia xile'e bia chaš le'e yoban'.

¹³ Nach benene' gož Diozən' le': —Gwyas Bed na' bet bia ca' gwdao.

¹⁴ Nach Bedən' gože'ene': —Bito gaoga'aca'ab Xana'. Ni šlinzə cuinə' gaogua' bia zban ca' zjənac ca' na' bia cui de lsens len lei čheto'ona' gaoto'.

¹⁵ Nach Diozən' gože' le' de'e əgwchope: —Bian' baç gwnia' gaogo' bito ənao' de que bia əzbanga' aquən'.

¹⁶ De'e gwyon lase gož Diozən' le' ca' nach begüe lachə'an le'e yoban'.

¹⁷ Žlac chacčejlažə' Bedən' bi zejen ca naquə de'en ble'idaogüe'ene'ena' besə'əžin beṇə' ca' əbselə' Cornelion' cho'a puert che Simon gocol yidən' bagosa'əṇabe' gan' zo liže'ena'.

¹⁸ Nach zižjo gosa'əṇabe' šə le na' zo to beṇə' le'cəə le' Simon Bed.

¹⁹ Pero Bedən' nechone' xbab che de'en ble'idaogüe'ene' cata'əcłə gož Spirit che Diozən' le': —Šonə beṇə' chasyə'əyilje' le'.

²⁰ Gwzoža' na' beyetj gwyejlenga'aque' na' bito gaquəžejlažo'o la'ana'əcəə cui zjənaque' beṇə' Izrael la' nada' əbselə'əga'aca'ane'ena'.

²¹ Nach Bedən' beyetje' jašague' beṇə' ca' əbselə' Cornelion' nach gože' lega'aque': —Nga zoa', nadan' Simon Bedən'. ĺBin' cheyilje nada'?

²² Nach gwse' beṇə' ca' le': —To capitan beṇə' le' Cornelio əbselə'e neto'. Le' zdacze' chone' de'e güen na' cho'elaogüe'e Diozən', na' yogua'əloł beṇə' Izrael ca' chso'xtiže'e de que naque' beṇə' güen. To angl che Diozən' gože' le' denabe' šejjo liže'ena' niç əgwzenague' chio' šə bin' yo'one'.

²³ Nach gwlo'o Bedən' lega'aque' yo'o na' besyə'əga'anlene' le' tže'. Nach beteyon' Bedən' gwyase' gwyejlene' lega'aque' na' gwche'e to çhopə beṇə' Jopen' beṇə' chso'onłilažə' Jesocristan'.

²⁴ Na' ža əgwchop žei besə'əžine' Sesarean'. Na' Cornelion' baç ntobe' bišə' lježe'je' na' beṇə' ca' nžaguəche' migw, baže'e liže'ena' chesə'əbeze'.

²⁵ Na' cata' bžin Bedən' liž Cornelion' le'e bchojte Cornelion' bšague'ene' na' bzo xibe' laogüe'ena' be'elaogüe'ene'.

²⁶ Na' Bedən' bos'ože'ene' gože'ene': —Bezoža'. Lecəə beṇə'ch nada'.

²⁷ Na' ne'e cho'elene' le' dižə'an ca' gwyo'e lo'o yo'on na' ble'ine' beṇə' zan baža' lo'o yo'ona'.

²⁸ Nach gože' lega'aque': —Le'e nezczele de que lei che neto' beṇə' Izrael nan de que bito cheyałə' šo'oto' liž beṇə' cui zjənaquə beṇə' Izrael na' nan bito cheyałə' gonto' txen len le'e cui nacle beṇə' Izrael. Pero baç bzejni'i Diozən' nada' de que ni tozə beṇə' cui cheyałə' gona' xbab che' de que naque' beṇə' zban par šo'a liže'ena'.

²⁹ De'e na'anə' cata' bselə'əle beṇə' ca' bedəsə'əxi' nada' bito goquəžejlaža'a šə naclə gona' sino babida' do laža'a na' na'a che'enda' ənezda' ĺbin' gwnio' nada'?

³⁰ Nach Cornelion' gože'ene': —Na'a chac tap ža le'cəə do cheda šonə zoa' sin cui bi naogua', na' chona' orasyon liža' nga, cata'əcłə ble'ida' to beṇə' byo laogua'anə' nyaze' to lachə' de'e chey che'eni'.

³¹ Nach gože' nada': "Cornelio, ca naquə orasyon chio'ona' chono', baç bzenag Diozən' len na' nezene' chnežjo' de'e chyažj chçhine beṇə' yašə'.

³² Bselə' to çhopə beṇə' žjəsə'əxi' to beṇə' zo Jopen' beṇə' le' Simon Bed. Zoe' liž to beṇə' le'cəə le' Simon, to beṇə' gocol yid. Liž beṇə' gocol yidən' zon galə'əzə cho'a nisdə'ona'. Na' cata' la' Bedən' ližo' nga güe'elene' le' dižə'."

³³ Nachən' le'e bselə'ətia' beṇə' ca' par bedə'sə'əxi'e le', na' choxcwlientio' de'en baç bidə'. Na' nezcze Diozən' de que yogua'əto' nitə'əto' əgwzenagto' yogua'əlołte de'en baben Diozən' mendad ənao'.

Bedən' be'e dižə' liž Cornelion'

³⁴ Nach Bedən' gwzolaogüe' be'e dižə'an gwne': —De'e li baç nezcza' notono nłə' beṇə' ənaçho nzo Diozən' le' to šla'azə.

³⁵ Sino que gata'ətezə beṇə' nasyon con beṇə' chso'elao' Diozən' do yichj do lažə'əga'aque' na' chso'one' de'e güen, Diozən' chebeine' lega'aque'.

³⁶ Diozən' bselə'e Jesocristan' par naque' Xan yogua'əloł beṇə', na' bselə'ene' entr neto' beṇə' Izrael, na' gwđixjue'ine' neto' de que guaquə soto' binlo len le' šə gonłilažə'əto' Xi'ine' Jesocristan'.

³⁷ Nezczele can' goquə Galilean' na' doxen Jodean'. De'e Juannə' gwđixjui'e xtižə' Diozən' na' bçhoe' beṇə' nis. Na' gwdechłə Jeso'os beṇə' Nasaretən' gwđixjui'e xtižə' Diozən'.

³⁸ Diozən' gwleje' Jeso'osən' par chaclene' chio'o beṇə'ch na' be'ene' Spirit che'ensə' na' yelə' chnabia'. Na' gwda Jeso'osən' bene' de'e güen na' beyone' yogua'əloł beṇə' ca' chsaquə'əzi' gwxyie'ena', çhedə' Diozən' zoe' len le'.

³⁹ Neto' nezczo' na' cho'əto' dižə' ca naquə yogua' de'e güenna' de'e ben Jeso'osən' na' de'en bsd blo'ine' Jodean' na' Jerosalennə', na' le'cəə ble'ito' can' gwso'ote'ene' bosə'ode'ene' to le'e yag coroz.

⁴⁰ Pero na' Diozən' bolis bosbane'ene' ladjo beṇə' guat ca' beyon ža na' ben Diozən' par niç Jeso'osən' blo'e laogüe' neto'.

⁴¹ Caguá yoguá'əloł beñá' beśə'əle'ine' Jeso'osən' catə'an bebane' ladjo beñá' guat ca', pero Diozən' gwleje' neto' par cho'eto' xtiž'e'ená' na' bene' par ničh ble'ito'one'. Na' neto' gü'e'ej gwdaolento'one' txen gwde bebane' ladjo beñá' guat ca'.

⁴² Na' Jeso'osən' bene' mendad čixjue'ito' beñačhən' de que Diozən' əbzoe' le' par əchoglaogü'e'en čhe yoguá'əloł beñá' šə non' napə dolə', beñá' ca' zjəmban na' beñá' ca' bagwsa'at, na' neto' cho'eto' dižá' de que can' gone'.

⁴³ Na' libr' ca' de'en boso'ozoj yoguá' profet' ca' beñá' ca' gwso'e xtižá' Diozən' cana'ate zjənyojən chesə'anən de que notə'ətezə beñá' so'onlilažá' Jesocristən' Diozən' yezi'ixene' xtola'əga'aque'ená'.

Spirit čhe Diozən' gwyo'on lo'o yichjla'aždao' balə beñá' cui zjənaquə beñá' Izrael

⁴⁴ Ne'e cho'ete Bedən' dižá'an ca' catə' Spirit čhe Diozən' gwyo'on lo'o yichjla'aždao' yoguá' beñá' ca' chso'ozenag dižá' de'en choe'ená'.

⁴⁵ Na' beñá' Izrael ca' chso'onlilažá' Jesocristən', beñá' ca' žag Bedən' catə'an besə'əžine' liž Cornelion', besyə'əbanene' de que Spirit čhe Diozən' gwyo'on lo'o yichjla'aždao' beñá' ca' cui zjənaquə beñá' Izrael.

⁴⁶ Gwsa'ache'ine' gwyo'o Spirit čhe Diozən' lo'o yichjla'aždao' beñá' ca' ža' liž Cornelion' čhedá' gwso'elaogü'e' Diozən' na' gwso'e gwde gwde la dižá' de'en cui gwse'ejni'ine'.

⁴⁷ Nach Bedən' gože' beñá' Izrael ca' žague': —Bito bi de de'e gwžon yesə'əchoa beñá' quinga nisən', la' nacbia' bazo Spirit čhe Diozən' len lega'aque' can' zon len chio'o.

⁴⁸ Nach Bedən' bene' mendad gosə'əchoe' nis par gosə'əneze beñá' de que chso'onlilažá'e Jesocristən'. Na' gwsa'ata'əyoine' le' par bega'ane' yeto čhopə ža.

11

Bedən' gože' beñá' Jerosalen ca' can' goquan'

¹ Na' apostol ca' na' yeziquə'əchlə beñá' ca' ža' Jodean' beñá' ca' chso'onlilažá' Jesocristən' gwse'ene' de que leczə len beñá' ca' cui zjənaquə beñá' Izrael bachso'one čhega'aque' xtižá' Diozən'.

² Nach Bedən' beze'e beyeje' Jerosalennə' gan' nitə' beñá' Izrael ca' chso'onlilažá' Jesocristən' na' gwsa'acyože' le'.

³ Gwse'ene': —čBixčhen' bagwyejo' gan' ža' beñá' ca' cui zjənaquə beñá' Izrael na' jtaolenga'aco'one'? Malən' babeno'.

⁴ Nach Bedən' gwzolaogü'e' be'elene' lega'aque' dižá'an tcho'a tšao' ca' naquan' goquə čhe', gože':

⁵ —Lao zoa' lao' syoda Jopen' chona' orasyon Diozən' bene' par ničh ble'idaogü'e'eda' ca' to lachə' xen nčej dapte squinei ca' četjən le'e yoban' za'an gan' zo'anə'.

⁶ Na' bgüiayanə'an na' ble'ida' lo'ina' ža'an bia yixə' ca' chaš yežlyon' bia žia tap ni'a ne'i, na' ble'ida' bia zjənxobə le'i lao yo, na' bia žia xile'e bia chaš le'e yoban' na' balə bia ca' zjənacob bia əznia.

⁷ Na' benda' gwna Diozən' nada': “Gwyas Bed, na' bet bia ca' gwdao.”

⁸ Nach božia'an gwnia': “Xana', bito gaoga'aca'ab. Ni šlinzə cuiņə' gaogua' bia zban ca' zjənac ca' čhedá' cui de lsens len lei četo'onə'.”

⁹ Na' de'e əgwchop lase Diozən' gwne': “Bian' bačh gwnia' gaogo' bito əņao' de que zjənacob bia zban.”

¹⁰ Šon š'i gože' nada' ca' nach begüe lachə'an le'e yoban'.

¹¹ Ze'e beyož ble'idaogü'e'eda' de'ená' catə' bla'ac šonə beñá' byo gan' zoa'anə' beñá' za'ac Sesarean'.

¹² Na' Spirit čhe Diozən' bzejni'in nada' de que čheyalə' ša'alenga'aca'ane' sin cui gaquəžejlažá'a, na' gwčhi'a beñá' bišə'əcho quinga xop gwyejto', na' bžinto' Sesarean' liž ben' le Cornelio.

¹³ Nach Cornelion' be'elene' neto' dižá' can' blo'e lao to angl le' liže'ená' na' anglən' gože'ene': “Bselə' beñá' əžja'ac syoda Jopen' žjəsə'əxi'e to beñá' le Simon Bed.

¹⁴ Be'ena' əņe' le' na' family čho' nac gonle par ničh yečojle xni'a de'e malən'.”

¹⁵ Nach catə' bžina' liž Cornelion' gwzolaogua' bi'a dižá'an len lega'aque', na' Spirit čhe Diozən' bedəson lo'o yichjla'ažda'oga'aque'ená' can' babedəson len chio'o.

¹⁶ Nach jsa'alaza'a xtižá' Xancho Jesocristən' can' gwne': “De'e zaque'ená' can' ben Juannə' bchoe' beñá' nis, pero de'e zaquə'əche' gac čhele ca' de'en yedəso Spirit čhe Diozən' lo'o yichjla'ažda'olen' năbia'an le'e.”

¹⁷ Na' ca' naquan' baben Diozən' par ničh zo Spirit čhe'ená' lo'o yichjla'aždaoga'aque'ená' can' babene' len chio'o, nacbia' zon len notə'ətezcho čonlilažá'əcho Xancho Jesocristən'. Na' čnoxa naca' nada'anə' par gwžona' gon Diozən' de'en chene'ene' gone'?

¹⁸ Na' ca beyoż boso'ozenague' xtiżə' Bedən' bitoch bi bi gosə'əne' contr Bedən' de'en gwyje' liż Cornelion', sino gwso'e yelə' choxcwlen che Diozən', gosə'əne': —Na'a nezecho de que leczə len beŋə' ca' cui zjənaquə beŋə' Izrael chazlažə' Diozən' yesyə'ədinjəne' xtolə'əga'aque'ena' niç əgwnežjue' yelə' mban zejlicane chega'aque'.

Beŋə' ca' chso'elao' Jesocrisən' Antioquian' gan' mbane Siria

¹⁹ Na' gwde gwso'ot beŋə' blao che beŋə' Izrael ca' Estebannə' gosə'əzolaoga'aque' boso'oçhi' boso'osaquə'əchgüe' yeziquə'əchlə beŋə' ca' chso'onlilažə' Jesocrisən' nach beŋə' ca' chso'onlilaže'ene' gwsa'asələse', balə' ja'aque' do Fenisia, do Çhipre na' do Antioquia ga mbane Siria. Na' lao chesə'ade'ena' boso'osed boso'olo'ine' con beŋə' zjənaquə beŋə' Izrael xtižə' Jeso'osən', bito boso'osed boso'olo'ine'en beŋə' ca' cui zjənaquə beŋə' Izrael.

²⁰ Pero na' to çhopə beŋə' Çhipre na' beŋə' Sirene beŋə' chso'onlilažə' Jesocrisən' catə' leczə besə'əxonje' ja'aque' Antioquian', na' na' gosə'əzolaogüe' gosə'əyixjue'ine' beŋə' ca' cui zjənaquə beŋə' Izrael dižə' güen dižə' cobə che Xancho Jesocrisən'.

²¹ Na' Xançon' goclene' lega'aque' len yelə' guac che'ena' na' beŋə' zan gosə'əbejyichje' costombr chega'aque' de'en zjənaogüe' na' gwso'onlilaže'e Xançon'.

²² Na' catə' gwse'ene beŋə' ca' chso'onlilažə' Jesocrisən' Jerosalennə' ca naquən' bachac Antioquian', nach boso'ose'e Bernaben' par gwyje' Antioquian'.

²³ Na' catə' bžin Bernaben' Antioquian' ble'ine' de que de'e li bagoclenchgua Diozən' beŋə' ca', na' lechgualə bebeine'. Nach gwŋeyoine' lega'aque' nita'ətezə nite'e yoso'ozenague' che Xançon' do yichj do lažə'əga'aque'.

²⁴ Bernaben' naque' to beŋə' güen, na' chonlilažə'əchgüe' Jesocrisən' na' Spirit che Diozən' chnabia'an yichjla'azdaogüe'ena'. Na' de'e na'anə' zanch beŋə' Antioquian' gwso'onlilaže'e Jesocrisən'.

²⁵ Gwde na' Bernaben' gwze'e zde' Tarson' par jəyedilje' Saulən', nach catə' beželene' le', gwçhe'ene' Antioquian'.

²⁶ Na' gosə'anite'e Antioquian' tgüiz gwso'one' txen len beŋə' ca' çəsə'əadopə çəsə'əžag chso'elao' Jesocrisən' na' boso'osed boso'olo'ine' beŋə' zanch. Na' Antioquia na'atequən' gwzolaə boso'osi'e beŋə' ca' chso'onlilažə' Jesocrisən' beŋə' cristian çhedə' choso'ozenague' che Crisən'.

²⁷ Lao nita' Bernaben' na' Saulən' Antioquian' besə'əžin balə beŋə' Jerosalen beŋə' chsa'aš choso'ozenene' de'en bagož Diozən' lega'aque'.

²⁸ Na' entr beŋə' ca' besə'əžinnə' to beŋə' le Agabo gwzeche' lao beŋə' ca' zjəndopə zjənžag chso'elao' Jesocrisən' be'e dižə' can' babzejni'i Spirit che Diozən' le' de que doxenlə yežlyon' gata' to bgüin juisy. Na' catə' bžin ža gwnabia' ben' le Claudio doxen gan' mbane Roma, cana' goc bgüinnə' can' gwna Agabon'.

²⁹ Nach beŋə' ca' çəsə'əadopə çəsə'əžag chso'elao' Jesocrisən' Antioquian' boso'oxi'e yesə'ətobe' mech par niç yosə'əsele'en əsa'aclene' beŋə' ljeužjga'aque' ca' chso'elao' Jesocrisən' gan' mbane Jodean'. Na' boso'oxi'e de que to toe' yoso'onežjue' segon ja'aque'ətə' de'e gaquə yoso'onežjue'.

³⁰ Na' gwso'one' can' boso'oxi'ena' nach boso'osele'e Saulən' len Bernaben' Jodean' par jəsə'ənežjue' mechən' beŋə' ca' zjənaque' comision che beŋə' ca' chso'onlilažə' Jesocrisən' Jerosalennə'.

12

Gwso'ote' Jacobən' na' gosə'əyixjue' Bedən' ližyan'

¹ Na' ca tyempan' Rei Erodən' bene' contr beŋə' ca' chso'onlilažə' Jesocrisən' na' bene' mendad gosə'əzene' balə' na' boso'oçhi' boso'osaquə'e lega'aque'.

² Nach bene' mendad gwso'ote' Jacob beŋə' bišə' Juannə' gosə'əchogue' yene'en len spad.

³ Na' goçbe'i Rei Erodən' chesyə'əbei beŋə' Izrael ca' de'en bene' mendad gwso'ote' Jacobən', nach bene' mendad gosə'əzene' Bedən' catə' bžin tyemp che lni pascon', lnin' catə'an chsa'ogüe' yetxtil de'en cui bi xne'i nçhiçə.

⁴ Nach Erodən' gwdiçjue' Bedən' ližyan' na' bsele'e ši'into sołdad beŋə' gwsa'ape' ližyan', tap güeje' do ža do yel. Erodən' bene' xbab cueje'ene' ližyan' te lni pascon' par gone' yelə' jostis che' lao lcue' na' so'ote'ene'.

⁵ Sołdad ca' gwsa'apə'əchgüe' Bedən' lao die' ližyan', pero na' ca naquə beŋə' ca' chso'onlilažə' Jesocrisən' gwso'onchgüe' orasyon lao Diozən' par Bedən'.

Diozən' bebeje' Bedən' ližyan'

⁶ Na' to že' ca gwgezə ngüia Erodən' cueje' Bedən' ližyan' par so'ote'ene', Bedən' de' chtase' ladjo çhopə sołdad na' ncheje' çhopə gden, na' leczə nita'əte sołdad beŋə' chsa'ape' cho'a puert che ližyan'.

⁷ Catə'əczla to de repentzə to angl beŋə' bselə' Xancho Diozən' bžine' lo'o ližyan' gan' de Bedən', na' gwy'e'eni'ichgua lo'o ližyan'. Anglən' bte' cuit le'e Bedən' bosbane'ene' gože'ene': —Na'atec ŋa'a gwyas.

Na' lao or na' le'e besya'əyežte gdenŋə' zjənchej na' Bedən'.

⁸ Nach gož anglən' le': —Bego'o dobey čhi'o'onə' na' bolej xelo'on.

Nach ben Bedən' ca'. Nach gože' anglən' le': —Bechelə xadoŋ čhi'o'onə' na' beyo'o len nada'.

⁹ Nach bechoj Bedən' zenaogü'e'ene', pero bito gocbe'ine' šə de'e li angl nan' chon ca' len le', con goquene' šə chle'ida'ogü'e'ene'.

¹⁰ Beyož besya'ədie' čhop cuente gan' nitə' soldad ca' chsa'ape' ližyan', besya'əžine' gan' zo puert saguannə' de'en naquə de ya gan' chsa'əchoje' par čhja'aque' lao syodan', con to gwłazzə puertən' byaljon par nič besya'əchoje', na' ca to cuadr babesaque' nach anglən' bocua'ane' Bedən' toze'.

¹¹ Cana'ach gocbe'i Bedən' de que de'e li babechoje' ližyan', nach gwne': —Bacheyacbe'ida' de'e ličzə Xana' Diozən' babsele'e angl che'ena' par bosle' nada' lao na' Erodən' na' lao de'e ca' chsa'aque' beŋə' Izrael gwłaz čhia' ca' so'one' len nada'.

¹² Na' ŋechonte Bedən' xbabən' ca' gwze'e gwyeye' liž Maria xna' Juan ben' leczə le Marcos. Na' liž Maria na' zjəndopə zjənžag beŋə' zan chso'one' orasyon.

¹³ Nach bsiže' cho'a puert saguannə' na' le'e bchojte to bi'i no'olə le Rode par jəgüiabo' no de'ena'.

¹⁴ Na' catə' bžimbo' par əsaljwbo' puertən' beyombia'abo' ši'i Bedən' na' de'e tant bebeibo' bito bsaljwbo' puertən' sino beyejdobo' gan' ža' beŋə' ca' jəyeyežbo' lega'aque' de que Bed nan' zecha cho'a puertən'.

¹⁵ Nach beŋə' ca' gwse'e: —žEcaguə chac tonto'onə'?

Pero lebo' gwzoczbo' segor de que le'ena'. Nach lega'aque' gwse'ebo' de que to angl beŋə' chapə' chye' Bed na'ana'.

¹⁶ Pero Bedən' ŋe'e čsižcze' cho'a puertən'. Nach ja'aque' par bos'o'saljue'. Catə'əczla besə'ale'ine' de que le'ena' besya'əbanene' xte juisy.

¹⁷ Nach Bedən' bene' seŋy len ne'ena' par nič gwnite'e žizə bos'o'ozenague' be'e dižə' can' goquə bebej Xancho Diozən' le' ližyan'. Nach leczə gože' lega'aque' de que cheyałə' yesə'əzenene' Jacobən' na' yeziquə'əchlə beŋə' ljuežjga'aque' ca' can' bagoquən'. Nach beze'e zjəyede' ga yoblə.

¹⁸ Nach catə' gwy'e'eni'inə' yełə goban juisy gwnita' soldad ca' na' gwso'echgü'e' dižə' gosə'ane' bixaczxa goquə len Bed na'ana'.

¹⁹ Na' ca naquə Rei Erodən', bene' mendad jəsyə'ədilje' Bedən' na' gwŋabene' soldad gop ca' nac goquən' bele'. Pero soldad ca' bitobi rson bos'o'onežjue'. Nach bene' mendad gwso'ote' soldad ca'. Nach gwza' Erodən' Jodean' par jzoe' Sesarean'.

Got Rei Erodən'

²⁰ Erodən' ža, čhža'achgü'e' beŋə' Tiro na' beŋə' Sidon ca'. Beŋə' ca' besə'əyažjene' yesə'əzi'e de'en əse'ej əsa'ogü'e' gan' čhnabia' Erodən'. De'e na'ana' bos'o'ocodə ljuežj beŋə' Tiron' na' beŋə' Sidon ca' par jəsə'onežjue' Blaston' to regal, ben' naquə lao ne'i liž Erodən' nach Blaston' gwŋe' fabor lega'aque' lao rein'. Gwso'one' ca' par nič bzenag rein' čhega'aque' catə' ja'aque' laogü'e'ena' jəsə'əŋabe' yesyə'anite'e binlo len le'.

²¹ Nach Rei Erodən' bžie' bia' to ža əgwto'be' lega'aque' par əgwzoe' lban laoga'aque'ena'. Na' catə' bžin žan' rein' gwyaze' xalane'e de'en naquə xoche de'en chaze' catə' chone' yełə' jostisən' nach gwchi'e xišne'e gan' čhnabi'e na' bzoe' lban lao beŋə' ca' že'e ža'ana'.

²² Nach beŋə' ca' gwso'osye'e gosə'ane': —Diozən' cho'e dižə' caguə beŋachən'.

²³ Na' lao or na' bselə' Xancho Diozən' to angl par nič bene' ca' gocšene rein' gwžia beł bia lo'o le'ena' na' gote'. Goc čhe' ca' čhedə' be'e latjə gwso'elao' beŋə' le' lgu'a əso'elaogü'e' Diozən'.

²⁴ Pero ca naquə xtižə' Xancho Jesocrisən' gosə' gwłaljəchən na' beŋə' zanch gwse'ejlə'e čhein'.

²⁵ Na' Bernaben' len Saulən' beyož gwso'one' yoguə' de'en naquə so'one' Jerosalennə' nach besa'aque' jəya'aque' Antioquian'. Na' gosə'əche'e to beŋə' le Juan na' lete' Marcos.

13

Bernaben' na' Saulən' ja'aque' jəsə'ədixju'i'e xtižə' Jesocrisən' yež zitə'

¹ Na' entr beŋə' ca' čəsə'ədopə čəsə'əžag čso'elaogü'e' Jesocrisən' Antioquian' zjəlen beŋə' čəsə'əzenene' beŋə' yoblə bi de'e che'e Diozən' lega'aque', na' zjəlen beŋə' choso'osed choso'olo'ine' xtižə' Diozən'. Na' lega'aque' Bernaben', na' Simon ben' zjənsi'e Negr, na' Losio beŋə' Sirene, na' Saul, na' Manaen. Na' Manaennə' bgolə gwcha'ogü'e' txen len Rei Erodən' ben' gwŋabia' Galilean'.

² Na' to ža cui bi zjәне'ej zjənao beṇə' ca' chso'onlilažə' Jesocristən', zjəndopə zjənzague' chso'one' orasyonṇə'. Cata'aczla gož Spirit che Diozən' lega'aque': —Lecuej Bernaben' len Saulən' par so'one' xšina'ana' con gatə'ətezə selə'əga'aca'ane'.

³ Nach beṇə' ca' gws'o'onche' orasyonṇə' sin cui zjәне'ej zjənaogüe', nach bos'o'oxoa na'aga'aque'enə' yichj Saulən' len yichj Bernaben'. Gws'o'one' ca' par gosə'əgüe'e xšin Diozən' lao na' Bernaben' len Saulən'. Gwde na' bos'o'ozeine' lega'aque' dižə'.

Apostol ca' gws'o'e xtižə' Jesocristən' Čhipre

⁴ Nach Spirit che Diozən' bselə'ən Bernaben' len Saulən' yež gan' nzi' Seleusia. Na' na' gws'o'e lo'o barcon' par besə'əžine' Čhipre. Na' Čhipren' naquən to isla de'en chi' lo'o nisdə'onə'.

⁵ Besə'əžine' yežən' nzi' Salamina gan' mbane Čhipren' na' gosə'əzolaogüe' gosə'əyixjui'e xtižə' Diozən' lo'o yo'odao' che beṇə' Izrael ca'. Na' zjənčhe'e Juan ben' leczə le Marcos par chaclene' lega'aque'.

⁶ Na' ca' gwsa'aše' gosə'ədie' doxen Čhipren' par besə'əžine' gan' ne' Pafos. Na' Pafos na' jəsə'ədie' to beṇə' goža' le' Barjesos. Naque' beṇə' Izrael na' chxoayague' ne' de que chzenene' bi de'en che' Diozən' le'.

⁷ Barjesosən' naque' migw che gubernador ben' le Sergio Paulo. Sergio Paulən' naque' to beṇə' chejni'ichgüei. Na' le' goxe' Bernaben' na' Saulən' chedə' gone'ene' yoso'ozenene' le' xtižə' Diozən'.

⁸ Na' Barjesosən' leczə nzi' yeto le Elimas, zejen dižə' beṇə' goža'. Le' gone'ene' cui šejle' Sergio Paulən' xtižə' Bernaben' na' Saulən'. Nach bžone' par cui yoso'osed yoso'olo'i beṇə' ca' xtižə' Diozən'.

⁹ Na' ca' naquə Spirit che Diozən' chnabia'achguan yichjla'aždao' Saulən', ben' leczə le Pab, nach bcos laogüen' bgüichgüe' Elimasən'.

¹⁰ Nach gože'ene': —Naco' xi'in gwxiye'enə' yełə' goxoayag čhio'onə' na' yełə' beṇə' mal čhio'onə'. Bito chazlažə'o bitə'ətezə de'e güennə' na' bito chbezo' can' chžono' yesə'ənao beṇə' dižə' li che Xantə' Diozən'.

¹¹ De'e na'anə' Xantə' Diozən' gone' castigw čhio' na' əcholo' to tyemp, cui gaquə le'ido' be'eni'ina'.

Nach le'e əgwčholte', gwde ca to bejw lo'o jelaogüe'enə', nach gwzolaogüe' chgan chtobe' cheyilje' no goxə' ne'enə' par yegüe'ene' nez.

¹² Gubernadorən' ble'ine' can' goquən' na' gwyejle'e xtižə' Xancho Jesocristən', na' be-banchgüeine' can' nanṇə'.

Pabən' na' Bernaben' ja'aque' Antioquia gan' mbane Pisidia

¹³ Nach Pabən' len beṇə' ca' nžague'enə' besə'aque' Pafosən' gws'o'e lo'o barcon' par besə'əžine' gan' nzi' Perge distrit che Panfilia. Na' Juan ben' leczə chse'e Marcos gwlejyichje' lega'aque' beyeje' Jerosalennə'.

¹⁴ Na' Pabən' len Bernaben' gwsa'aque' Pergen' na' besə'əžine' Antioquian' distrit che Pisidia. Na' cata' bžin ža dezcanzən' ja'aque' yo'oda'onə' na' jəsə'əchi'enə'.

¹⁵ Na' ca beyož bguab lib' gan' nyoj lei che Diozən' na' de'en bos'o'ozoj de'e profet beṇə' ca' gws'o'e xtižə' Diozən' canə', beṇə' ca' zjənaquə gwnabia' che yo'oda'onə' bos'o'osele'e to beṇə' gan' chi' Pabən' len Bernaben' na' gože' lega'aque': —Beṇə' bišə' šə de bi dižə' chene'ele güe'ele əneyoile beṇə' quinga, guaquə əṇalen ṇa'a.

¹⁶ Nach gwzoža' Pabən' na' bene' señy len ne'enə' par nich nite'e žizə yoso'ozenague', nach gwzolaogüe' gwne': —Le'e beṇə' Izrael na' notə'ətezəchle chaple Diozən' respet, le'e gwzenag.

¹⁷ Ca naquə Diozən' ben' cho'elao' čhio'o beṇə' Izrael gwleje' de'e xaxta'ocho ca' par bene' lega'aque' to nasyon xen cata'ən ne'e nite'e zjənaque' beṇə' zita' Egipton', pero bžin ža bebej Diozən' lega'aque' Egipton' len yełə' guac che'enə'.

¹⁸ Na' ca čhoa iz bguo'o bčhejlaže'e len lega'aque' žlac gwsa'aše' latjə dašən'.

¹⁹ Diozən' bonitlaogüe' gažə nasyon gan' ne' Canaan par nich bnežjue' de'e xaxta'ocho ca' yežlyon'.

²⁰ Diozən' bene' ca gosə'əde tgüeja tgüeja beṇə' gwnabia' ca' gws'o'on yełə' jostis čhega'aque'enə' lao tap gweyua šiyon iz, xte bžinte tyemp che de'e profet Samuelən' ben' be' xtižə' Diozən' canə'.

²¹ Nach gosə'ənabe' so to rei par nabi'e lega'aque' na' Diozən' bnežjue' lega'aque' Rei Saulən' par gwnabi'e čhoa iz. Saulən' goque' xi'in ben' gwle Sis, beṇə' goljə lao dia che Benjamin.

²² Gwde na' Diozən' bocui'ize'e Saulən' nach bzoe' Rei Dabin' xi'in Jese par gwnabi'e. Na' Diozən' gwne' che Rei Dabin': “Bač ble'ida' Dabi xi'in Jesen', yichjla'aždaogüe'enə' naquən tožə len yichjla'aždaogua'anə'. Le' gone' yoguə'əloj can' che'enda'anə'.”

²³ Nach lao dia che Rei Dabin' gwlej Diozən' Jeso'osən' na' bene' par niçh chac yebeje' chio'o beṇə Izrael xni'a de'e malən' can' bene' lyebe.

²⁴ Antslə ze'e solao əgwsed əgwlo'i Jeso'osən', de'e Juannə' gwdixjui'e lao yoguə' beṇə' Izrael ca' de que cheyalə' yesyə'adinjene' xtolə'əga'aque'ena' na' yesə'əchoe' nis.

²⁵ Na' cata' bzin' ža beyoż ben de'e Juannə' yoguə'əlol de'en yo'o lao ne'e gone', gože' beṇə' ca': "Nada' bito naca' ben' chonle xbab naca'. Caguə' nada'anə' ben' chbezle par gaqulene' nasyon chechon'. Ze'e za' be'ena' na' de'e tant zaquə'əche' ca' nada' xte bito zaca' par leçhja' xe'le'ena'."

²⁶ Beṇə' bišə', chio'o naccho xi'in dia che de'e Abraannə' na' entr chio'o nita' yebaḷə beṇə' chsa'apə Diozən' respet la'aṇə'əczə cui zjənaque' beṇə' Izrael. Par chio'ona' bselə' Diozən' dižə' can' gonlilažə'əcho Jeso'osən' par yebeje' chio'o xni'a de'e malən'.

²⁷ Beṇə' Jerosalen ca' na' beṇə' gwnabia' chega'aque' ca' bito gwsa'ache'ine' de que Diozən' bselə' e Jeso'osən'. Bito gwse'ejni'ine' de que che Jeso'os nan' bosə'ozoj de'e profet ca' beṇə' ca' gwso'e xtižə' Diozən' cana' le'e libr ca' choso'olabe' lo'o yo'oda' ca' yoguə' ža dezcanz. Na' de'en gosa'əchoglaogüe'en gwsə'ote' Jeso'osən' goc complir can' nyojan.

²⁸ Sin cui bi xtolə' Jeso'osən' gotə', gosə'əṇabene' Pilatən' gone' mendad so'ote'ene'.

²⁹ Beyoż gwso'one' complir yoguə'əlolte segon can' nyoj Xtižə' Diozən' gaquə' che', besə'əžin beṇə' bosyo'oletje'ene' le'e yag corozən' na' bosə'əcuasə'ene'.

³⁰ Pero na' Diozən' bolis bosbane'ene' ladjo beṇə' guat ca'.

³¹ Na' nita' beṇə' ca' əja'aclen Jeso'osən' Galilean' par Jerosalennə' na' beyoż bebane' ladjo beṇə' guat ca' gwdalene' lega'aque' zan ža. Na' lega'aque'ena' chso'elene' beṇə' dižə' de que de'e li mbancze'ena'.

³² De'e na'anə' leczə neto' chyixjue'ito' le'e dižə' güen dižə' cobə che Jeso'osən' par niçh ənezele de que baçh goc complir lyebe de'en ben Diozən' len de'e xaxta'ocho ca'.

³³ Na' chio'o naccho xi'in dia chega'aque'ena' nezecho baben Diozən' complir lyebe de'en bene' len lega'aque' ca de'en bolis bosbane' Jeso'osən'. Goc can' nyojan' le'e Salmo əgwchopen' nan: "Le' naco' xi'ina'. Neža babena' par niçh solao ṇabi'o len nada'."

³⁴ Na' nyojəchczə Xtižə' Diozən' ga yoblə nan: "Gona' güen len le'e can' beṇə' lyebe len de'e Rei Dabin'." Na' de'en nan ca' zejen de que Diozən' gwne' yolis yosbane' Jeso'osən' ladjo beṇə' guat ca' na' bitoch güe'e latjə gat Jeso'osən' de'e yoblə.

³⁵ Le'egatezə ca' yeto part yoblə che Salmosən' nan: "Nezda' bito go'o latjə goža' cuerp chia'anə', nada' naca' xi'ino' na' naquə' la'əždaogua'anə' xi'ilažə' juisy."

³⁶ Žlac bguan de'e Rei Dabin' ža, goclene' de'e xaxta'ocho ca' con can' gone'e Diozən', na' cata' gote' bosə'ocuasə'ene' ga bazjəngasə' de'e xaxta'ocho ca' bagwsa'at, na' goža' cuerp che'ena'. De'e na'anə' nezecho de que caguə' nyoj Salmosən' che cuine'.

³⁷ Jeso'osən' ben' bolis bosban Diozən', le'ena' cui goža' cuerp che'ena'.

³⁸ Na' cheyalə' ənezele beṇə' bišə', Jeso'osən' ben' cho'a dižə' chei chezi'ixene' xtolə' beṇə' ca' chso'onlilažə' le'.

³⁹ Bito chac nitlao xtolə' chio'o beṇə'ch por ni che choncho bi de'en na lei de'en bzoj de'e Moizezən', pero nota'ətezcho šə chonlilažə'əcho Jesocristən', Diozən' chnitlaogüe' xtolə'əcho ca'.

⁴⁰ Le'e gapə ciudad par cui gac chele can' bosə'ozoj de'e profet ca' beṇə' ca' gwso'e xtižə' Diozən' cana' gan' nan:

⁴¹ Le'e gon xbab, le'e chonle borl, gwžin ža cuiayi'ile por ni che de'e cui chejle'ele.

Le'e yebane, chedə' nada' Dioz ze'e gona' de'e zaquə' yebanele tyemp nga zole ṇa'a, na' bito šejle'ele la'aṇə'əczə šə no əṇa le'e can' gaquən'.

Can' gwna Pabən' bzejni'ine' beṇə' ca' ža' lo'o yo'oda'onə'.

⁴² Beyoż bzejni'i Pabən' beṇə' Izrael ca' nach besyə'əchoje' lo'o yo'oda'onə'. Beṇə' ca' cui gwsa'alje' beṇə' Izrael sino gwso'on cuinga'aque' beṇə' Izrael gwsa'atə'əyoine' Pabən' len Bernaben' par əžja'aque' de'e yoblə yežag xman ža dezcanzən' žjəsə'əzejni'ine' lega'aque' de'e yoblə.

⁴³ Beṇə' zan beṇə' Izrael ca' na' beṇə' zan beṇə' bagwsə'on cuinga'aque' beṇə' Izrael gwse'ejle' de'e en choso'osed choso'olo'i Pabən' len Bernaben' cata'an besyə'əžaše'. Na' Pabən' len Bernaben' gosə'əneyo'ine' lega'aque' par niçh nita'ətezə nite'e so'onlilažə'e Jesocristən' ben' bselə' Diozən' par chaclene' chio'o.

⁴⁴ Na' cata' bežag xman ža dezcanzən', casi yoguə'əlol beṇə' lao' syodan' besə'əžag par bosə'ozenague' xtižə' Diozən'.

⁴⁵ Pero beṇə' Izrael ca' cui chso'onlilažə' Jesocristən' besə'əle'ine' catec beṇə' zannə' nžag na' gwsa'acxi'ine', nach gosə'ənelaogüe' contr Pabən' na' gwso'onle'ega'aque' che dižə'ən chzejni'i Pabən'.

⁴⁶ Nach Pabən' len Bernaben' sin cui chəsə'əžebe' gwse'e beṇə' ca': —Babento' complir can' gone'e Diozən' babzejni'ito' zgua'atec le'e nacle beṇə' Izrael xtiže'ena'. Pero na' de'en cui chene'ele əgwzenagle ža, zeje dižə' de que bito chene'ele gata' yelə' mban zejlicane chelen' na' de'e na'ana' əgwzejni'ito'on beṇə' ca' cui zjənaquə beṇə' Izrael.

⁴⁷ Xanto' Diozən' baġh bene' mendad gonto' can' nyojən nan:
Baġh nzoa' le'e par co'ole be'eni' chia'ana' lo'o yichjla'aždao' beṇə' ca' cui zjənaquə beṇə' Izrael

par niġh beṇə' ca' ža' doxenlə yežlyon' əsa'acbe'ine' naclən so'one' niġh yesyə'əchoje' xni'a de'e malən'.

⁴⁸ Na' beṇə' ca' cui zjənaquə beṇə' Izrael beyož gwse'ene'ene' gwne' ca' besyə'əbeine' nach gosə'əne' güenchguczən' naquə xtižə' Diozən'. Nach yoguə' beṇə' ca' bagwlej Diozən' par gata' yelə' mban zejlicane čhega'aque'ena' gwso'onlilaže'e Jesocristan'.

⁴⁹ Ca' goquə gosə' gwlaļə xtižə' Xancho Jesocristan' doxen distritən'.

⁵⁰ Pero na' beṇə' Izrael ca' cui gwso'onlilaže' Jesocristan' bosota bosota'one' beṇə' blaoc che syodan' na' no'olə əblao ca' zjənaochgucə costumbr che beṇə' Izrael ca' par niġh bosyo'olague' Pabən' len Bernaben' na' besyə'əbeje' lega'aque' fuer syodan' na' distritən'.

⁵¹ Nach Pabən' len Bernaben' bososi'ins ni'aga'aque' par bežib bište yon' de'en žiannə'. Gwso'one' ca' par bosolo'e de que bito zjənapə' doļə' de'en cui chse'ene beṇə' ca' yoso'ozenague' che Diozən', nach besa'aque' jəya'aque' gan' ne' Iconio.

⁵² Pero beṇə' ca' chso'onlilaže' Jesocristan' gwnitə'əchguacze' mbalaz, na' Spirit che Diozən' gwnabia'an yichjla'ažda'oga'aque'ena'.

14

Pabən' na' Bernaben' besə'əžine' Iconion'

¹ Na' goquən' besə'əžin Pabən' len Bernaben' Iconion' na' ja'aque' yo'odao' che beṇə' Izrael ca' par gwso'e xtižə' Jesocristan' len beṇə' ca'. Na' Spirit che Diozən' goclenən lega'aque' par gwso'e dižə'an, na' beṇə' zan beṇə' Izrael ca' gwso'onlilaže'e Jesocristan' na' lecəə zan beṇə' cui zjənaquə beṇə' Izrael gwso'onlilaže'ene'.

² Pero beṇə' Izrael ca' cui gwso'onlilaže' gosə'əgo'oyelə'e beṇə' ca' cui zjənaquə beṇə' Izrael par niġh gwso'one' xbab mal contr Pabən' len Bernaben'.

³ Na' ca' naquə beṇə' zan bagwso'onlilaže' Jesocristan' Iconion', Pabən' len Bernaben' besyə'əga'əne' sša syoda Iconion' par gwso'ecze' xtižə' Xancho Jesocristan' sin cui besə'əžebe'. Na' Xancho Jesocristan' goclene' lega'aque' len yelə' guac che'ena' par niġh gwso'one' miļagr na' bichlə de'e besyə'əəbane beṇə' niġh ca' gwsa'acbeine' de que dižə' lin' chsoe' Pabən' len Bernaben' na' de que lechgualə nži'ilažə' Xancho Jesocristan' benaġhən'.

⁴ Na' beṇə' ca' ža' lao' syodan' gwsa'aque' ġhoplə. Baļe' gosə'əde'e beṇə' Izrael ca' na' baļe' gosə'əde'e apostol Pabən' len Bernaben'.

⁵ Nach yoguə' beṇə' ca' cui gwsa'azlažə' can' choso'osed choso'olo'i apostol ca', beṇə' Izrael ca' na' beṇə' ca' cui zjənaquə beṇə' Izrael, gosə'anite'e yelə' goxia' len jostis ca' par so'one' contr Pabən' len Bernaben' na' yoso'ošiže'e lega'aque' yej.

⁶ Pero ca' naquə Pabən' len Bernaben' gwsa'acbeine' can' bazjəngüia beṇə' ca' so'one' len lega'aque', nach besyə'əsa'aque' jəya'aque' gan' ne' Lистра na' Derbe, na' yeziquə'achlə yež ca' gan' mbane Licaonia.

⁷ Na' bosozentezene' dižə' cobə che Jesocristan' gata'ətezə ja'aque'.

Boso'ošiže'e Pabən' yej lao zoe' Listran'

⁸ Na' Lистра na' jəsyə'ədie' to beṇə' nxinje' dezd goljte', con cui bi bi fuers balor əgwsa'ate'e ni'e ca' par se'e.

⁹ Na' chi'iteze' chzenague' choe' Pabən' dižə'əna'. Nach Pabən' bgüie'ene' na' gocbe'ine' chejle' be'ena' de que Diozən' nape' yelə' guac par gone' ca' gaquə se'e.

¹⁰ Nach Pabən' bolgüiže'ene' clar gože'ene': —Gwzoža'.

Nach le'e gwzoža'ate be'ena' na' gwzoloac chde'.

¹¹ Beṇə' zan ca' ža'ana' choso'ogüie' can' ben Pabən' na' gosə'əne' dižə' Licaonia: —Baġh gwse'etj Xancho ca' chejni'alažə'əcho gan' zocho nga na' lega'aque'en zjənaquə' ca' beṇaġh.

¹² Na' gosə'əne' de que Bernaben' naque' xanga'aque' Jopiter ben' chse'ejni'alaže'e, na' de que Pabən' naque' xanga'aque' ben' nzi' Mercurio chedə' len' choe' dižə'.

¹³ Na' yo'odao' gan' zo xanga'aque' Jopiter ben' chse'ejni'alaže'e zon catezə chso'e lao' syodan'. Nach bxož che Jopiterən' gwze'e nche'e go'on ca' na' bazjanone'eb xoche len yej. Nach bxožən' len beṇə' ca' ža'ana' besə'əžine' gan' nitə' apostol ca' gwse'enene' so'ote' go'on ca' par se'ejni'alaže'e lega'aque'.

¹⁴⁻¹⁵ Pero apostol Bernaben' len Pabən' catə' gwsa'acbe'ine' can' so'on beṇə' ca', gosə'əcheze' xaga'aque'ena' chedə' bito gwse'enene' so'on beṇə' lao' syodan' ca'. Gwse'ebe'

ladjo beṇə' ca' gwse'e lega'aque' zižjo: —Beṇə' bito gonle ca'. Lecza beṇə'ch neto'. Za'ato' par chyixjue'ito' le'e de que cheyalə' gwša' yichjla'ažda'olen' na' cuejyichjle costombr quinga de'en naole la' lega'aquen bito bi zjəzaquə'an. Cuejyichjga'acden niç güe'ela'ole Diozən' ben' zo zejlicane, ben' ben'yoban', yežlyon', nisdə'onə', beṇə'ch, bia ca' chsa'aš, na' bitə'atezə de'en chle'icho le'e yoban', lao yežlyon' na' lo'o nis.

¹⁶ Ca naquə tyemp ca' de'en bagosə'ade, Diozən' gwdape' yelə' chxenlažə' ca de'en gosə'ada beṇə' gwža' to to ṇasyon gwso'one' con can' gwse'enene'.

¹⁷ Pero Diozən' syempr zocze' chone' güen len yoguə'alol beṇə'chən' par niç yesə'əneze' de que zocze' naque' dioz. Le'enə' chone' par niç chac yejon' niç ca' chac de'en chazcho, na' chata' de'en che'ej chaocho par niç socho mbalaz.

¹⁸ Na' la'ana'əczə gwse' Pabən' len Bernaben' beṇə' Lистра ca' de'enə', canə gosə'əzoinə' par niç cui gwso'ot beṇə' ca' go'on ca' par se'ejni'alaze'e lega'aque'.

¹⁹ Ca' chac xonj beṇə' Izrael beṇə' nitə' Iconio na' Antioquian' gan' mbane Pisidia, besə'əžine' Listran', nach gosə'əgo'oyele'e beṇə' Lистра ca' par gwsa'aque' txeṇ bosə'ošize'e Pabən' yej. Na' gwsa'aquene' šə baç gwso'ote'ene' nach gosə'əxobe'ene' fuerlə syodan'.

²⁰ Pero beṇə' ca' chso'onlilažə' Jesocristan' jəsə'ədobe' gan' de'ena' nach beyase' na' beyeje' lao syodan' de'e yoblə. Nach beteyo beza' Pabən' len Bernaben' par jəya'aque' Derben'.

²¹ Na' lecza gosə'əyixjui'e dižə' güen dižə' cobə che Jesocristan' lao' syoda Derben' na' beṇə' zan gwso'onlilažə'e Jesocristan'. Gwde na' besyə'əsa'aque' jəsyə'aque' Listran', Iconion' na' Antioquian' de'e yoblə.

²² Na' to to syoda ca' gan' jəya'aque'enə' bosə'otipe' lažə' beṇə' ca' chso'onlilažə' Jesocristan' na' gosə'əneyoine' lega'aque' par niç nitə'atezə nite'e so'onlilažə'e Jesocristan'. Na' lecza bzejni'ine' lega'aque' de que notə'atezcho šə chene'echo ṇabia' Diozən' chio'o, de'e zan de'e gaquə de'e chi' saquə'əcho.

²³ Na' to to yež can' besyə'ədie'enə' gosə'əbeje' beṇə' golə beṇə' blao par bosə'ogüia bosə'oye' beṇə' ca' chəsə'ədopə chəsə'əžag chso'elaogüe'e Jesocristan'. Na' Pabən' len Bernaben' ze'e yesə'aque' to to yež gwso'one' orasyonṇə' txeṇ len beṇə' ca' chəsə'ədopə chəsə'əžaguan' sin cui gwsa'ogüe', gosə'əṇabe' lao Xancho Jesocristan' gaquəlene' yoguə' beṇə' ca' baç chso'onlilažə'ene'.

Pabən' na' Bernaben' jəya'aque' Antioquian' gan' mbane Siria

²⁴ Gwde na' besə'ac Pabən' len Bernaben' na' besyə'ədie' distrit che Pisidia par besə'əžine' distrit che Panfilia.

²⁵ Na' gosə'əyixjui'e dižə' che Jesocristan' yež de'en nzi' Perge gan' mbane Panfilian'. Beyož na' gwsa'aque' ja'aque' gan' ne' Atalia.

²⁶ Na' Atalian' besə'aque' besyə'əyo'e lo'o barcw par besyə'əžine' Antioquian' gan' mbane Sirian' gan' gwsa'aque'. Na' ca' naquə beṇə' Antioquia ca' lega'aque' gosə'əṇabene' Diozən' gaquəlene' Pabən' len Bernaben' par žjse'ene' xšin Diozən' catə' cuiṇə' əsa'aque' žja'aque' yež ca' par žjse'ene' xšin Diozən' de'en babeyož gwso'one' na'a.

²⁷ Na' catə' besyə'əžin Pabən' len Bernaben' Antioquian', bosyo'otobe' beṇə' ca' chso'elao' Jesocristan' nach gwso'e dižə' yoguə'alol can' goquəlen Diozən' lega'aque' žlac jəsə'ədise' dižə' güen dižə' cobə che Jesocristan' na' can' ben Diozən' par niç beṇə' ca' cui zjanaquə beṇə' Izrael gwso'onlilažə'e Jesocristan'.

²⁸ Šša besyə'əga'ane' gosə'ənite'e len beṇə' ca' chso'onlilažə' Jesocristan' Antioquian'.

15

Apostol ca' bosə'oxi'e len beṇə' Jerosalen ca' naclə cheyalə' so'on beṇə' catə' so'onlilažə'e Jesocristan'

¹ Ca tyempən' to çhopə beṇə' gwsa'ac Jodean' besə'əžine' Antioquian' na' gosə'əzolaogüe' bosə'osed bosə'olo'ine' beṇə' ca' chso'onlilažə' Jesocristan' de que cheyalə' yesə'əzoe' seṇy de'en ne' sirconsionṇə' can' na lei de'en bzoj de'e Moizezən' par niç cui žjəya'aque' lao yi' gabilən'.

² Pero Pabən' len Bernaben' gwsa'acyože' beṇə' Jodea ca' de'en choso'osed choso'olo'ine' ca'. Nach beṇə' Antioquia ca' beṇə' ca' baçso'onlilažə' Jesocristan' gosə'əçhoglaogüe'en de que Pabən' len Bernaben' na' len yeto çhopə beṇə' ljeužjga'aque' ca' əžja'aque' Jerosalenṇə' par žjəsyə'anite'e yelə' goxi'a len apostol ca' na' beṇə' golə blao che beṇə' chso'onlilažə' Jesocristan' Jerosalenṇə' naclə cheyalə' so'one' che de'en choso'osed choso'olo'i beṇə' ca'.

³ Nach beṇə' ca' chəsə'ədopə chəsə'əžag chso'elaogüe'e Jesocristan' bosə'osele'e lega'aque' əžja'aque' Jerosalenṇə'. Na' gosə'adie' Fenisia na' Samaria na' gwso'elene' beṇə' ca' chso'onlilažə' Jesocristan' dižə' de que ca' naquə beṇə' ca' cui zjanaquə beṇə' Izrael babosə'oša' yichjla'ažda'oga'aque'ena' par choso'ozenague' che Diozən'. Nach beṇə' Fenisia ca' na' beṇə' Samaria ca' besyə'əbeichgüeine'.

⁴ Na' catá besə'əžin Pabən' len Bernaben' Jerosalennə' beṇə' ca' chəsə'ədopə chəsə'əžag chso'ə'laō Jesocrisṭan' nach beṇə' golə beṇə' blao čhega'aque' ca' na' apostol ca' besə'əšaglaoga'aque'ene' choso'oguape' lega'aque' diox. Nach Pabən' len Bernaben' gwse'e lega'aque' yogua'ə'lol can' bagoclen Diozən' lega'aque'.

⁵ Na' balə beṇə' ca' chso'onlilažə' Jesocrisṭan' zjənaque' beṇə' fariseo nach gosə'əzože'e gosə'əne': —Ca naquə beṇə' ca' chso'onlilažə' Jesocrisṭan', cheyałə' nita'əga'aque' seṇy de'en ne' sirconsionnə' na' cheyałə' so'one' can' na' lei de'en bzoj de'e Moizezən' la'əṇə'əczə' cui zjənaque' beṇə' Izrael.

⁶ Nach besə'ədopə apostol ca' na' beṇə' golə blao ca' par bosə'oxi'e naclə gaquəczən'.

⁷ Sša bagoc chso'e dižə' catá'əczla gwzožə' Bedən' gože' lega'aque': —Benə' bišə', le'e nezczele de que cana'ate gwlej Diozən' nada' par jətixjui'a dižə' güen dižə' cobə che Jesocrisṭan' len beṇə' ca' cui zjənaquə beṇə' Izrael nič gwso'onlilažə'ene'.

⁸ Na' ca naquə Diozən' ža, nombi'e yichjla'azdao' yogua'ə'lołte beṇə'. Na' de'en bsele'e Spirit čhe'ena' zon lo'o yichjla'azdao' balə beṇə' cui zjənaquə beṇə' Izrael can' zon lo'o yichjla'azdao' chio'o, blo'ine' chio'o de que chazlaže'e can' chso'onlilažə'e Jesocrisṭan'.

⁹ Na' bito nacho de que nža' bene' len chio'o na' nža' chone' len lega'aque', sino beya'a beyibcze' la'azdaoga'aque'ena' catá'ən gosə'əzolaogü'e chso'onlilažə'e Jesocrisṭan'.

¹⁰ Na' ža, čbixčhen' cui chejle'ele che de'en bagož Diozən' nada'? Čbixčhen' čhonlene' prueb šə'leine' can' ne'ena'? Čhene'ele gonle byen yesə'ənao beṇə' ca' cui zjənaquə beṇə' Izrael costombr čhecho ca'. Tant zdebə zjənaquən xte ni chio'o na' ni xaxta'ocho ca' cui goquə so'one' yogua'ə'loł can' nannə'.

¹¹ De'e na'anə' bito naquən güen ye'ega'acchone' yesə'ənaogü'e costombr ca', čhedə' cuin Xancho Jeso'osən' babene' par nič cui žjəya'aque' lao yi' gabilən' laogü'e de'en nzi'ilažə'e lega'aque' ca'aczən' babene' len chio'o, na' bito nacho de que zaquə'əcho par bene' ca' len yogua'ə'lołcho.

¹² Nach yogua' beṇə' ca' ndopə nžaguən' gwnite'e žizə par bosə'ozenague' gwsoe' Bernaben' len Pabən' dižə' ca' naquə ben Diozən' par nič gwso'one' miłagr na' yeziquə'əchlə de'e zaquə' yebanecho entr beṇə' ca' cui zjənaquə beṇə' Izrael.

¹³ Na' catá beyož gwsoe' Bernaben' len Pabən' dižə'əns', lao ne'e nita' beṇə' ca' žizə gwzožə' Jacoban' gože' lega'aque': —Benə' bišə' le'e gwzenag dižə' nada' gua'a.

¹⁴ Simon Bedən' bač be'e dižə' can' bablo'e Diozən' yełə' guac čhe'ena' len beṇə' ca' cui zjənaquə beṇə' Izrael na' can' bagwleje' bale' par chso'ə'laogü'e'ene'.

¹⁵ Na' de'en chon Diozən' ca' čhotilən' de'e ca' bosə'ozoj profet ca' beṇə' ca' gwso'e xtižə' Diozən' cana' can' na' de'e nga:

¹⁶ Te na' yida' de'e yoblə na' gona' par nič ṇabia' xi'inq dia čhe de'e Rei Dabin', la'əṇə'əczə' na'a cui no xi'inq dia čhe'ena' chesə'əṇabia' na' gona' par nič socze' ṇabi'e.

¹⁷ Na' zan beṇə' ca' cui zjənaquə beṇə' Izrael so'onlilažə'e nada' Xanga'aque'.

Beṇə' ca' ža' yogua' nasyonṇə' so'ombi'e nada', con noga'aque'ena' gwleja' par so'ombi'e nada'.

¹⁸ Can' gwna Xancho Diozən', ben' čhejni'i chio'o can' gaquə dezđ ža gwlasda'ote.

¹⁹ Na' laogü'e de'en nyoj Xtiže'ena' nan ca', nada' əchnia' le'e de que cabi cheyałə' gonecho beṇə' ca' cui zjənaquə beṇə' Izrael bichlə zed, beṇə' ca' bagosə'əbejyichj costombr čhega'aque'ena' de'en gosə'ənaogü'e' par chso'onlilažə'e Diozən'.

²⁰ Con gwzožga'acchone' ye'ega'acchone' de que bito sa'ogü'e' no yełə' guao de'en chəsə'əne' naquən čhe lgu'a'a lsaquə'ən chse'ejni'alažə' beṇə', na' bito sa'ogü'e' bia ca' chso'ote' choso'osə'que' do lba'abən', na' bito sa'ogü'e' čhen čhega'acəban'. Na' bito yesə'əzolene' no'ola cui naquə no'ol čhega'aque' na' nic no'ol ca' yesə'əzolene' beṇə' cui naquə be'en čhega'aque'.

²¹ Dezđ gwłalte nita' beṇə' to to syodan' choso'ozejmi'ine' can' na' lei de'en bzoj de'e Moizezən', na' choso'olabe'en lo'o yo'odao' əblao čhechon' yogua' ža dezczanz. De'e na'anə' čheyałə' goncho mendas so'on beṇə' ca' cui zjənaquə beṇə' Izrael ca cui əsa'aque beṇə' ca' chəsə'ənao de'en na' lein' de que malən' chso'on beṇə' ca'.

²² Na' apostol ca' len beṇə' golə blao ca' na' yeziquə'əchlə beṇə' ca' chəsə'ədopə chəsə'əžag chso'ə'laogü'e' Jesocrisṭan' gwsa'azlaže'e can' gwna Jacoban', na' bosə'oxi'e əchoj čhopə beṇə' entr lega'aque' par əžja'aclene' Pabən' len Bernaben' Antioquian'. Nach gosə'əbeje' Jodas Barsabasən' na' Silasən' beṇə' zjənaquə beṇə' blao entr beṇə' ca' chso'onlilažə' Jesocrisṭan' Jerosalennə'.

²³ Na' bosə'ozoje' to cart de'e gwso'oxə' beṇə' ca' na' le'e cartən' gwse'e lega'aque':

"Neto' apostol, na' beṇə' golə blao, na' nochlə neto' čhonlilažə'əto' Jesocrisṭan' čhguapto' le'e diox, le'e nacle beṇə' lježjto' čhonlilažə'əchone', le'e nita'əle Antioquian' na' do gan' mbane Siria na' Silisia.

²⁴ Bagwnezetə' de que to čhopə beṇə' besə'əchoj entr neto' babla'aque' gan' nita'əlen' chso'one' šejlažə'əle len dižə'ən baboso'ochixə' bosə'oniže' yichjla'azda'olen' chəsə'əne' de que

cheyalə' sole seŋy de'en ne' sirconsisionə' na' gonle yoguə'əlol can' na lei de'en bzoj de'e Moizezan'. Bito ɳezeto'onə' gwsa'aque' na' cagua mendad cheto'onə' bedəsə'əyeže' le'e ca'.

²⁵ Topə txen naquəto' gwyazlažə'əto' gwlejšto' chopə beŋə' quinga chselə'əga'acto'one' gan' nitə'alen' len apostol ca' chacchgüeito' chei Bernaben' na' Pabən'.

²⁶ La' lega'aque' baboso'osanlažə' yelə' mban chega'aque'enə' par chso'one' xšin Xancho Jesocristán'.

²⁷ Chselə'əto' Jodasən' na' Silasən' na' lega'aque' yoso'ozejni'ine' le'e dižə' cho'a che yoguə' de'en nato' le'e cart nga.

²⁸ Chazlažə'əto' de'en babzejni'i Spirit che Diozən' neto' de'en ənato' cui gonle, na' de'e ca' chonən byen cui gonle zjənaquə tapzən.

²⁹ Bito cheyalə' gaole yelə' guao de'en chəsə'əne' che lgua'a lsaquə'ən chse'ejni'alažə' beŋə'. Na' bito gaole bia ca' chso'ote' choso'ošoquē' do lba'abən'. Na' bito gaole chen chega'acobən'. Na' bito solenle no'olə' cui naquə no'ol chele na' nic no'olən' solene' beŋə' cui naquə be'en che'. Šə bito chonle de'e quinga chonto' mendad cui gonle, güennə' gonle šə ca'. De'e na'azən' chzojto' le'e cart nga."

³⁰ Nach boso'ozei beŋə' ca' chso'onlilažə' Jesocristán' apostol ca' na' beŋə' ca' yechopə dižə' nach gwsa'aque' əzja'aque' Antioquian'. Na' catə' besə'əžine' Antioquian' bosyo'otobe' yoguə' beŋə' ca' chso'onlilažə' Jesocristán' na' boso'onežjue' lega'aque' cartən' zjənoxe'enə' par boso'olabe'en.

³¹ Na' beyož boso'olabe' cartən' besyə'əbeine' ca' naquə consejw de'en nyoj le'inə'.

³² Na' ca' naquə Jodasən' na' Silasən' leczə' choso'ozenene' beŋə' bi de'en bagož Diozən' lega'aque'. Nach gwso'elene' beŋə' Antioquia ca' dižə' na' boso'otipe' lažə'əga'aque' par ničh nitə'ətezə' nite'e so'onlilažə'e Jesocristán'.

³³ Zan ža gwnite'e Antioquian' na' catə' bžin ža par yesa'aque' žjəya'aque' gan' nitə' beŋə' ca' boso'oselə' lega'aque', beŋə' Antioquia ca' boso'ozeine' lega'aque' dižə' gwse'e de que to šao' to güen yesyə'əžine'.

³⁴ Pero na' ca' naquə Silasən' gwchoglaže'e yega'əne' na'azə'.

³⁵ Nach leczə' Pabən' len Bernaben' gwnitə'əcze' Antioquia na'azə', na' txen len zan beŋə' Antioquia ca' boso'osed boso'olo'ine' beŋə' xtižə' Diozən' na' boso'ozejni'ine' lega'aque' bi zejen.

Pabən' gwyeye' de'e yoblə gan' bajətxjui'e xtižə' Diozən'

³⁶ Na' catə' bagwde to tyemp Pabən' gože' Bernaben': —Šejcho yoguə'əlol syoda ca' gan' bach jtičjue'echo xtižə' Xancho Jesocristán' par zjəyecho nac chsa'ac beŋə' ca' chso'onlilažə'ənə'.

³⁷ Nach Bernaben' goclaže'e yesə'əche'e Juan ben' leczə' le' Marcos.

³⁸ Pero Pabən' bene' xbab bito naquən güen yesə'əche'ene', chedə' Juan Marcosən' gwlejšjchje' lega'aque' Panfilian', bito bega'anlene' lega'aque' par so'one' xšin Diozən'.

³⁹ Na' gotə' to bžəš gual entr Pabən' na' Bernaben' xte gosə'əbejyichj ljuēžjga'aque'. Bernaben' gwze'e gwche'e Marcosən' gwso'e to lo'o barcw par ja'aque' Chipren'.

⁴⁰ Nach Pabən' gwze'e gwche'e Silasən', na' beŋə' ca' chso'onlilažə' Jesocristán' Antioquian' gosə'ənabe' lao Xancho Diozən' gaquəlene' Pabən' na' Silasən' gatə'ətezə' žja'aque'.

⁴¹ Nach Pabən' len Silasən' gosə'ədie' Sirian' na' Silisian' par boso'otipe' lažə' beŋə' ca' chso'onlilažə' Jesocristán' to to yežh.

16

Temtion' gwzolaogüe' chonlene' Pabən' len Silasən' xšin Diozən'

¹ Na' catə' Pabən' na' Silasən' besə'əžine' Derben' na' gosə'ədie' par besə'əžine' Listran'. Na' Listra na' zo to beŋə' chonlilažə' Jesocristán' na' le' Temtio. Xna' Temtion' naque' beŋə' Izrael na' chonlilažə'e Jesocristán', na' xə'ena' naque' beŋə' griego.

² Na' beŋə' ca' chso'onlilažə' Jesocristán' Listran' na' Iconion' gwso'e xtižə' Temtion' de que zocze' chone' güen.

³ Nach Pabən' gwnabe' šejlen Temtion' lega'aque', nach gwčhi'ene' gan' boso'ozo'ene' seŋy de'en ne' sirconsision par ničh gwsa'azlažə' beŋə' Izrael ca' ža'ana' əche'ene' gone' xšin Diozən'. Bzo'ene' seŋyən' chedə' la' yogue'e zjənezene' de que xə'ena' bito naque' beŋə' Izrael.

⁴ Nach gwsa'aque' zja'aque' to to syoda na' chəsə'əyixjue'ine' beŋə' ca' chso'onlilažə' Jesocristán' noquə'ənnə' cui cheyalə' so'one' can' gosə'əchoglaio apostol ca' na' beŋə' golə' blao che beŋə' ca' chso'onlilažə' Jesocristán' Jerosalennə'.

⁵ Nach beŋə' ca' chəsə'ədoṗə chəsə'əžag chso'elaogüe'e Jesocristán' gwnitə'ətezə' gwnite'e gwso'onlilažə'əche' Jesocristán' na' gwyanche' tža tža.

Pabən' ble'idaogüe'ene' to beŋə' Masedonia chatə'əyoine' le' šjeje' laže'ena'

⁶ Ca naquə Spirit che Diozən' bito be'en latjə šej Pabən' na' Silasən' na' Temtion' Asian' žjəsə'ədixju'i'e xtižə' Diozən', de'e na'ana' ja'aque' Frigia na' Galasia.

⁷ Na' besə'əžine' galə'əzə gan' mbane Misia. Na' gwsa'aclašə'e əžja'aque' gan' nzi' Bitinia, pero leczə bito be'e Spiritan' latjə əžja'aque'enə'.

⁸ Nach gosə'ədie' Misian' xte besə'əžinte' gan' nzi' Troas.

⁹ Na' žə' na' Pabən' ble'idaogüe'ene' zecha to beņə' byo beņə' Masedonia laogüe'enə' na' be'enə' gotə'əyoine' le' gože'ene': "Yo'o Masedonian' par gaquəleno' neto'."

¹⁰ Nach bsi'ini'a cheto' par gwza'ato' gweyeto' Masedonian' la' gweyeni'ito' de que Diozən' chene'ene' žjezeneto' beņə' ca' dižə' güen dižə' cobə che Jesocristən', na' nada' Locas gwyə'alena' Pabən' len Silasən' na' Temtion'.

Pabən' na' Silasən' ja'aque' Filiposən'

¹¹ Troas na' gwza'ato' gwyo'oto' lo'o barcon' zdato' liča par galən' ne' Samotrasia, nach beteyo bžinto' gan' nzi' Neapolis.

¹² Nach Neapolis na' gwza'ato' par bžinto' gan' ne' Filipos gan' mbane Masedonian'. Filiposən' naquan to syoda blao gan' ža' beņə' Roma. Na' gwzoto' na' to chopə ža.

¹³ Na' catə' bžin ža dezczanzən' bchojto' fuerlə syodan' par gweyeto' cho'a yaon' gan' chja'aque' chjse'ene' orasyonə', nach gwche'eto' par be'elento' no'ol ca' bazjənžaguən' dižə' güen dižə' cobə che Jesocristən'.

¹⁴ Na' entr' no'ol ca' choso'ozenaguən' len to beņə' le Lidia. Naque' beņə' syoda Tiatira na' chote'e lachə' fin de color morad. Lidian' cho'elaogüe'e Diozən' na' Xancho Diozən' bene' par nič gone'ene' bzenague' tcho'a tšao' ca naquə dižə' de'en be' Pabən'.

¹⁵ Na' le'e gwchoate' nis len family che' ca'. Nach gwdenə' gotə'əyoine' neto' gwne': —Šə de'e ličzə chejle'ele de que chonliłažə'a Xancho Jesocristən', le'e šo'o yega'anle ližə'ana'.

Nach gweyeto' jəyega'anto' ližə'enə' chedə' bencze' byen.

¹⁶ Na' goquən to žlas lao zdato' gan' chac orasyonə' bežagto' to no'ol güego' no'olə yo'o yaz de'e xio' lo'o yichjla'azda'obo'onə' na' chonən par nič chac chņeya'abo', na' gan xen chombo' par xambo' ca' de'en chņeya'abo'.

¹⁷ Nach bedənaobo' neto' nžagto' Pabən' chosya'abo' nabo': —Beņə' quinga žjənaque' beņə' güen xšin Diozən' ben' chnabia' doxenlə. Na' lega'aque' choso'olo'ine' naquan' cheyalə' goncho par nič cui yeyejcho lao yi' gabilən'.

¹⁸ Zan ža gwnaobo' neto' nabo' ca' xte bžin ža goque Pabən' zed nach gweyechje' gože' de'e xio'onə': —Por yelə' guac che Jesocristən' chona' mendad yechojo' lo'o yichjla'azdao' bi'i nga.

Nach le'e bechojten.

¹⁹ Catə' gwsa'acbe'i xambo'onə' cuich bi gan so'one' len lebo' nach gosə'əzene' Pabən' len Silasən' na' jso'e lega'aque' gan' ža' beņə' gwnabia' ca' galə'əzə gan' chac ya'a.

²⁰ Nach catə' besə'əžinlene' lega'aque' lao beņə' gwnabia' ca' nach gwse'e: —Beņə' Izrael quinga chsa'aše' chəsə'əbeque' de'e zed lao' syoda nga.

²¹ Na' choso'olo'ine' costumbr de'e cabi cheyalə' nao neto' naquəto' beņə' Roma.

²² Na' beņə' ca' ža' lao ya'ana' leczə gwsa'ase' contr Pabən' len Silasən', nach beņə' gwnabia' ca' gwso'one' mendad gosə'əlechje' xaga'aque'enə' par gosə'əyine' lega'aque' xis.

²³ Beyož gosə'əyinchgüe' lega'aque', nach boso'ože'ene' ližyan' nach gwse'e ben' chapə ližyan' de que gapəchgüe' cuidad len lega'aque'.

²⁴ Catə' gwse'e ben' chapə ližyan' ca' nach be'enə' bže'e lega'aque' lo'o cuart ližyan' de'en zo le'ezelaogüe' gan' naquə bižə'əte na' bchide'e ni'aga'aque'enə' len yag sep.

²⁵ Na' do chelyana' Pabən' len Silasən' nite'e chso'one' orasyon na' chso'ole' no imno chso'elaogüe'e Diozən' na' pres ca' yeziquə'əchlə choso'ozenague'.

²⁶ Na' to de repentzə gwxo'ochgua, na' bse'esə'əchguan lan yo'o ližyan' xte bsaljon yogua' puert ca'. Nach yogua' pres ca' ža'ana' beņə' ca' žjənchej gdenņə' besyə'əyež gdenņə' na'aga'aque'enə' nach yag sepən' bosanən ni'aga'aque'enə'.

²⁷ Nach ben' chapə ližyan' bebanene' na' ble'ine' žjənyaljo puert ca' nach le'e goljte' spad che'enə' goclaže'e yeyot cuine', goquene' bač besyə'əxonj pres ca'ana'.

²⁸ Nach bisya'a Pabən' gože'ene': —Bito bi gone' cuino'. Nga zoczə yogua'əto'.

²⁹ Nach ben' chapə ližyan' gwñabe' to yi' nach gwyo'odoe' žjəgüie' gan' de Pabən' len Silasən' na' do chałə' chxize' bzo xiben' laoga'aque'enə'.

³⁰ Na' le'e bebejte' lega'aque' ližyan' nach gože' lega'aque': —¿Bi cheyalə' gona' par nič cui yeya'a lao yi' gabilən'?

³¹ Nach gwse'ene': —Benjilažə' Xanto' Jeso'osən' le' na' family chio' na' gone' ca' cui yeyejle lao yi' gabilən'.

³² Nach le'e gwzolaote Pabən' len Silasən' gwso'elene' be'enə' na' family che' ca' xtižə' Xancho'.

³³ Nach lao or na'atezə be'enə' gwdibe' lao güe' che Pabən' na' che Silasən'. Nach bosə'əcho'e be'enə' nis len family che' ca'.

³⁴ Nach gwche'e Pabən' len Silasən' liže'enə' par bye'ej bguaogüe' lega'aque'. Na' do family be'enə' besyə'əbeichgüeine' de'en bachso'onlilaže'e Jesocristən'.

³⁵ Cats' gwyeni'ina' be'nə' gwnabia' ca' bosə'osele'e polsia par jse'eže' ben' chapə ližyan' de que yosane' be'nə' ca' žjəya'aque'.

³⁶ Nach gož be'enə' chapə ližyan' Pabən': —Ca naquə be'nə' gwnabia' ca' bačh bosə'osele'e rson yosana' le'e. Na' baguaquə žjəya'acle to šao' to güen.

³⁷ Nach Pabən' gože' polsia ca': —Bagosə'əyine' neto' lao lcue' sin cui gwso'one' yelə' jostis šə bi nonto'onə', len naquəto' be'nə' nasyon Roma. žEna' na'a chse'enene' yosyo'osane' neto' žizizənə'? Da'ac cuinga'aque' desye'eleje' neto'.

³⁸ Nach polsia ca' jesyə'əyeže' be'nə' gwnabia' ca' can' gož Pabən' lega'aque'. Na' be'nə' ca' besə'əžebchgüe' catə' gosə'ənezene' de que Pabən' na' Silasən' zjənaque' be'nə' nasyon Roma.

³⁹ Nach ja'ac be'nə' gwnabia' ca' gan' zjəde Pabən' na' Silasən' jesyə'əyexene' lega'aque' na' besyə'əbeje' lega'aque' dižə' šao' nach gwsa'atə'əyoine' lega'aque' yesa'aque' syodan'.

⁴⁰ Cats' bechoj Pabən' len Silasən' ližyan' nach ja'aque' liž Lidian' de'e yoblə par jesy'e'tipe' lažə' be'nə' ca' chso'onlilažə' Jesocristən', nach besa'aque'.

17

Benə' mal ca' bosə'ota bosə'one' be'nə' Tesalonica ca' so'one' contr apostol ca'

¹ Cats' besyə'əsa'ac Pabən' len Silasən' besyə'ədie' gan' ne' Anfipolis na' Apolonia. Na' le'e besyə'əžinte' to syoda de'en nzi' Tesalonica ga zo to yo'odao' ga chja'ac be'nə' Izrael ca'.

² Na' Pabən' ca' costumbr checze' gwyeye' lo'o yo'oda'onə' na' lao šonə ža dezcanz ca' bzejni'ine' lega'aque' xtižə' Diozən'.

³ Bzejni'ine' lega'aque' de que Xtižə' Diozən' de'en bosə'ozoj de'e profet ca' be'nə' ca' gwso'e xtižə' Diozən' cana' cho'en dižə' che Cristən' nan de que yosə'ogchi' yosə'osaquə' be'nə' le' na' so'ote'ene' na' techlə yeyas yebane' ladjo be'nə' guat ca'. Nach leczə gože' lega'aque': —Jesə'osən' ben' cho'a dižə' chei, le'enə' Cristən' ben' bselə' Diozən' par chaclene' chio'o.

⁴ Beyož be'e dižə'anə' zan be'nə' Izrael ca' gwse'ejle'e che' na' gwsa'aque' txen len Pabən' na' Silasən', na' zan be'nə' griego be'nə' gwso'elao' Diozən' na' zan no'olə blao leczə gwse'ejle'e che'.

⁵ Pero na' be'nə' Izrael ca' cui gwse'ejle'e xtižə' Diozən' gwsa'acxi'ine' Pabən' len Silasən' nach bosə'otobe' xonj be'nə' mal chsa'aš lao lqueyən' na' txen zjənaque' bosə'ota bosə'one' be'nə' ca' ža' lao' syodan'. Nach ja'acyalcze' liž ben' le Jason chsəyə'əyilje' Pabən' len Silasən' par yesə'əche'e lega'aque' na' so'one' lega'aque' lao na' be'nə' syodan'.

⁶ Pero cats' besə'əžine'ena' notono Pabən' len Silasən' nita'anə'. Nach gosə'əxobe' Jasonnə' lene' yeto čhopə be'nə' ca' chso'onlilažə' Jesocristən' jso'e lega'aque' lao be'nə' ca' chəsə'anabia' syodan'. Na' cats' besə'əžine' lao be'nə' gwnabia' ca' gwse'e lega'aque' zizjo: —Ca naquə be'nə' quinga chsa'aše' chəsə'əbeque' de'e zed doxenlə na' na'a baba'aque' gan' nga zochə nga.

⁷ Na' Jason ni babgüialaogüe' lega'aque' liže'enə', na' yogue'e chso'one' contr lei che Rei Sesar de'en naocho na' chəsə'əne' de que zo yeto rei be'nə' le Jeso'os.

⁸ Besə'əža'achgua be'nə' lao' syodan' na' be'nə' gwnabia' čhega'aque' ca' cats' gwse'enene' can' chəsə'əna be'nə' ca'.

⁹ Nach Jasonnə' len be'nə' ljuežje' ca' bosə'ožie' mech par ničh bosyo'osan be'nə' gwnabia' ca' lega'aque'.

Pabən' na' Silasən' ja'aque' Berean'

¹⁰ Nach be'nə' ca' chso'onlilažə' Jesocristən' lgüegwzə lao že' na' bosyo'ose'e Pabən' len Silasən' par jəya'aque' gan' ne' Berea. Na' cats' besyə'əžine'ena' ja'aque' lo'o yo'odao' che be'nə' Izrael ca'.

¹¹ Be'nə' Berea ca' zjənaquəche' be'nə' šao' cle ca be'nə' Tesalonica ca' na' besyə'əbeine' bosə'ozenague' xtižə' Jesocristən' de'en bosə'ozejni'i Pabən' len Silasən' lega'aque', na' tža tža besyə'əyilje' gan' nyoj de'e ca' bosə'ozejni'ine' par ničh gosə'ənezene' šə le can' nan.

¹² Na' zanga'aque' gwso'onlilažə'e Jesocristən', na' leczə zan be'nə' griego ca' na' zan no'olə blao.

¹³ Nach be'nə' Izrael ca' ža' Tesalonican' be'nə' ca' cui chso'onlilažə' Jesocristən', gwse'enene' rson de que Pabən' len Silasən' banite'e Berean' choso'ozenene' xtižə' Diozən'. Nach gwsa'aque' ja'aque' Berean' par jəsə'əta jəsə'əne' be'nə' lao' syodan'.

¹⁴ Pero be'nə' ca' chso'onlilažə' Jesocristən' Berean' le'e bosə'osa'ate' Pabən' gwyeye' cho'a nisdə'onə' pero na' besyə'əga'an Silasən' len Temtion'.

¹⁵ Na' be'nə' ca' gosə'əgo'o lao ne'e jso'e Pabən' syoda Atenas de'en chi' gan' nzi' Gresia. Na' cats' besa'aque'ena' Pabən' bene' mendad əžja'ac Silasən' len Temtion' lgüegwzə gan' zoe'ena'.

Pabən' bsd blo'ine' beṇə' Atenas ca'

¹⁶ Na' lao zoe' Atenasən' chbeze' beṇə' ca', cuili biczən' chaque yichjla'aždaogüe'enə' chgüie' catequən' že'e ža' lguā'a lsaquən' chse'ejni'alažə' beṇə' Atenas ca'.

¹⁷ De'e na'anə' bzejni'ine' beṇə' Izrael ca' lo'o yo'oda'o' čhega'aque'enə' len yeziqū'a'čhlə beṇə' ca' chso'onlilažə' Diozən'. Na' leczə' yoguə' ža' gwyeye' gan' chac ya'a par je'e xtižə' Diozən' len beṇə' ca' ža'anə'.

¹⁸ Na' beṇə' ca' bazjənao de'en choso'osed choso'olo'i epicoreo ca' na' estoico ca' gosə'əzolaogüe' gwso'elene' Pabən' dižə'. Nach baļe' gosə'əne': —Ži nga əṇa de'e güe' dižə' nga chio'o?

Nach yebale' gosə'əne': —Zedəzenļejine' chio'o che yeto čhopə beṇə' cobən' šejni'alažə'əcho.

Gosə'əne' ca' čhedə' Pabən' bzejni'ine' lega'aque' dižə' che Jeso'osən' na' bzejni'ine' lega'aque' can' beban Jeso'osən' ladjo beṇə' guat ca'.

¹⁹ Nach gosə'əche'e Pabən' to latjə gan' ne' Areopago gan' chesə'ədobe' par chso'e consejw na' catə' besə'əžine'enə' nach gwse'ene': —Chene'eto' əgwzejni'ido' neto' bi de'e cobən' chsd chlo'ido'.

²⁰ La' dižə' de'e cuiczə ne'e yeneton' cho'o, na' chene'eto' əņezetə' bi zejennə'.

²¹ Na' ca costumbr che beṇə' Atenas ca' na' che beṇə' zita' ca' ža' Atenasən' con čaše' no güe' dižə' o gozenag dižə' šə bi de'e cobə de'e de.

²² Nach Pabən' gwzeche' gwcholga'aque'enə' gan' ne' Areopagon' na' gože' lega'aque': —Le'e beṇə' Atenas, chache'ida' de que chejni'alažə'əchguale lguā'a lsaquə' ca'.

²³ Catə' gwdia' tnezən' ble'ida' latjə gan' nita' de'e ca' chejni'alažə'əlen'. Na' entr latj ca' gan' nita' de'e ca' chejni'alažə'əlen' ble'ida' to latjə gan' nyojən nan: “Par Xancho be'enə' cui no nombia’”. Ca naquə be'enə' chejni'alažə'əle sin cui nombi' alene' che be'ena'anə' əchyixjue'ida' le'e.

²⁴ Dioz ben' ben yežlyon' na' yoguə'əte de'e de laogüen', len' chnabi'e yoban' na' yežlyon'. Bitə zoe' do lo'o yo'o de'e ben beṇə'čən' par se'ejni'alažə'e le'.

²⁵ Bitə de'e əṇacho gon beṇə'čən' par gaqualene' Diozən' žalə' na'aclə bi chyažjene'. Dioz na'anə' cho'e yeļə' mban che yoguə'əlol beṇə', chgüe'e lega'aque' biš na' cho'e lega'aque' yoguə'əte de'e zjənapə'.

²⁶ Na' tozə chen bene' beṇə'čən' beṇə' ža' doxen lao yežlyon'. Na' bsi'e xņeze bat nita' to to beṇə' na' gan' nite'e.

²⁷ Diozən' bnite'e yoguə' beṇə'čən' lao yežlyon' par nič ca' yesyə'əyilje' naclə so'one' par nič ca' so'ombi'ene' na' so'onlilažə'e tozə le'. De'e li Diozən' bitə zoe' zita' len to to chio'o.

²⁸ Le'enə' chone' par nič zocho na' par mbancho na' par chdacho, can' gwnaczə to beṇə' poeta čhele ben' be' dižə' xoche gwne': “De'e li naccho dia che Diozən'.”

²⁹ Na' əchnia' le'e de'en naccho xi'īn dia che Diozən' bitə cheyalə' gonližcho xbab de que le' naque' ca no lguā'a lsaquə' de or, de plat o de yej, de'e ca' čsa'aljlažə' beṇə'čən' chso'one'.

³⁰ Antslə Diozən' be'e latjə gwso'on beṇə'čən' con can' gwna xbab čhega'aque'enə' yeļə' cui chejni'i čhega'aque'. Pero na'a Diozən' chone' mendad de que yoguə'əlol beṇə' ža' doxenlə yežlyon' yesyə'ədinjene' xtolə'əga'aque'enə'.

³¹ La' Diozən' bambeje' Jesocristən' par əchoglaogüe'en che chio'o beṇə'čən' šə nocho napcho dolə'. Na' Diozən' banžie' bia' batən' čhoglaogüe'en che chio'o beṇə'čən'. Na' de'en bosban Diozən' Jesocristən' ladjo beṇə' guat ca' ņezecho de que de'e li čhoglaogüe'en che chio'o beṇə'čən' na' zdacze' liča ca de'en gone' ca'.

³² Catə' beyož gwse'enene' gwna Pabən' de que yesyə'əban beṇə'čən' ladjo beṇə' guat ca' baļe' gwso'onene' borl na' yebale' gwse'ene': —Na' gwzenagyetš'i'ito' can' cho'o dižə'ənə' yetola ža'.

³³ Ca' goquə beza' Pabən' Areopagon' gan' ža' beṇə' ca'.

³⁴ Pero na' baļə beṇə' Atenas ca' gwsa'aque' Pabən' txen na' gwso'onlilažə'e Jesocristən'. Na' entr beṇə' ca' gwsa'ac Pabən' txen, len to beṇə' byo le Dionisio na' yeto no'olə le Damaris. Na' Dionisio' naque' to beṇə' gwnabia' ca' chso'e consejon' Areopagon'.

18

Can' goquə žlac gwzo Pabən' Corinton'

¹ Gwde goc de'e ca' Pabən' beze'e Atenasən' par gwyeye' gan' ne' Corinto gan' leczə mbane Gresian'.

² Catə' bžine' Corinton' bežague' to beṇə' Izrael le Aquila beṇə' yež Ponto, na' no'ol che'enə' le' Prisila. Ze'e besyə'əžingale' Corinton' zeya'aque' Italia, čhedə' Rei Claudion' ben' chnabia' Italian' bene' mendad besyə'əžaš yoguə'əlol beṇə' Izrael ca' ža' Roman'.

³ Nach gwyey Pabən' ližga'aque'enə' na' gwzoe' len lega'aque'. Na' txen gwso'one' yo'o de lachə' čhedə' leczə chac gon Pabən' len na' lēnnə' naquə žin che Aquilan' na' Prisilan'.

⁴ Na' yoguə' ža dezcanz Pabən' gwyje' yo'oda' che beŋə' Izrael ca' na' jəzejni'ine' lega'aque' che Jesocristən' par niĉh so'onlilaže'ene' na' lenczə beŋə' cui zjənaquə beŋə' Izrael chja'ac yo'oda'onə'.

⁵ Na' catə' gwsa'ac Silasən' len Temtion' Masedonian' par besə'əžine' gan' zo Pabən' besə'əle'ine' can' chon Pabən' cho'eczə laže'e chyixju'i'e xtižə' Jeso'osən' na' chzejni'ine' beŋə' Izrael ca' de que Jeso'osən' naque' Cristən' ben' chəsə'əbeze' əselə' Diozən' par gaquələne' lega'aque'.

⁶ Pero beŋə' Izrael ca' besə'əže'e apostol Pabən' na' boso'ožia boso'onite'ene'. Nach Pabən' bse'esə xē'enə' par blo'e de que bito bi dolə' nape' che de'e malən' chso'one', na' gože' lega'aque': —Bito bi dolə' napa' nada' de'en cuiayi'ile zejlicane. Le'e naple dolə'anə'. Na' dezd na'a zjəsəd žjəlo'ida' beŋə' ca' cui zjənaquə beŋə' Izrael.

⁷ Nach bechoje' lo'o yo'oda'onə' na' beze'e bežine' liž to beŋə' le Josto. Josto na'anə' zotezə zo'e cho'elaogüe'e Diozən' na' liže'ena' zon cuit yo'oda'onə'.

⁸ Na' zo to beŋə' le Crispo beŋə' naquə beŋə' gwnabia' che yo'oda'onə'. Na' Crispon' len yoguə'əlol family che'enə' gwsə'onlilaže'e Xancho Jesocristən'. Le'egatezə ca' beŋə' zan beŋə' Corinto ca' boso'ozenag che de'en əbsed blo'i Pabən' gwsə'onlilaže'e Jesocristən' na' gosə'əchoe' nis.

⁹ Na' goquən' to že' ble'idaogüe'e Pabən' Xancho Jesocristən', na' Xancho' gože' Pabən': —Bito žebo'. Gwzotezə gwzo be' xtižə'anə' na' bito so' žiza.

¹⁰ Nada' zocza' len le' na' bito gua'a latjə no bi gone le', chedə' beŋə' zan ža' lao' syda nga beŋə' so'onlilaže' nada'.

¹¹ Ca' goquən' bega'an Pabən' tğüiz yo'o gašjə Corinton' par bsd blo'ine' lega'aque' xtižə' Diozən'.

¹² Na' ca tyempən' be'enə' le Galion naque' gubernador na' chnabi'e gan' nzi' Acaya. Nach beŋə' Izrael ca' ža' Corinton' beŋə' ca' cui chso'onlilaže' gwsə'aque' tozə par gwsə'one' contr Pabən'. Nach gosə'əche'ene' jso'ene' gan' chon gubernadorən' yelə' jostisən'.

¹³ Na' catə' besə'əžine'ena' gwse'e gubernadorən': —Ca naquə benga ža, chde' chgo'oyele'e to to beŋə' par niĉh so'one' bi de'e cobə par se'ejni'alazaže'e Diozən' na' nža'alən' na lein' šejni'alaza'əchone'.

¹⁴ Baĉh zotequən' əne Pabən' catə'əczla gož Galionnə' beŋə' Izrael ca': —Ca naquə de'e nga chaole xya nga, žalə' naquən' to no falt o to no de'e malchgua, gona'an yelə' jostis.

¹⁵ Pero naquən' che dižə'əzə na' che la beŋə' na' che lei chelen'. Le'e gwy'e naclə gonle. Nada' bito co'o lao na'a gona' yelə' jostis che de'en nac ca'.

¹⁶ Nach bošaše' lega'aque' gan' chone' yelə' jostisən'.

¹⁷ Nach beŋə' ca' cui zjənaquə beŋə' Izrael boso'onize' Sostenesən' be'enə' naquə beŋə' gwnabia' che yo'oda'onə'. Na' gwso'ot gosə'əyine' le' lao Galionnə' pero bito bi cas ben Galionnə' lega'aque'.

Pabən' beyeje' Antioquian' par jətxju'i'e xtižə' Diozən' de'e gwyone

¹⁸ Gwde goc ca' yezan ža gwzoch Pabən' Corinton' nach catə' beze'enə' bzeine' beŋə' ca' bachso'onlilaže' Jesocristən' dižə' nach beze'e beyo'e to lo'o barcw. Na' beyeje' Sirian' na' gwche'e Prisilan' na' be'en che' Aquilan'. Na' catə' besə'əžine' Sencrean' besyə'əchoje' lo'o barcon' par ja'aque' lao yežən'. Na' antslə ze'e yesa'aque' Sencrean' bšib yičhj Pabən' par blo'e de que baĉh bene' complir to de'en bene' lyebe lao Diozən'.

¹⁹ Nach besyə'əyo'e lo'o barcon' par besyə'əžine' Efeson' gan' besyə'əga'an Aquilan' na' Prisilan'. Na' Pabən' gozeje' lo'o yo'oda' che beŋə' Izrael ca' par be'elene' lega'aque' xtižə' Diozən'.

²⁰ Na' beŋə' ca' ža' lo'o yo'oda'onə' gwsa'atə'əyoine' le' yega'anəche' len lega'aque', pero bito gone'ene'.

²¹ Nach bzeine' lega'aque' dižə' gože': —Chonən byen soa' lni de'en šo'o Jerosalennə', pero güidachcza' delaŋa'a le'e yetš'i'i šə Diozən' güe'e latjə.

Nach beze'e Efeson'.

²² Catə' bžine' Sesarean' nach gwdie' gwyje' Jerosalennə' na' bguape' diox beŋə' ca' chəsə'ədoəpə chəsə'əžag chso'elaogüe'e Jesocristən' na', nach beze'e beyeje' Antioquian' gan' mbane Sirian'.

²³ Gwde to tyemp gwzoe' Antioquian', nach gwyje' gan' mbane Galasian' na' Frigian' jətipē lažə' beŋə' ca' chəsə'ədoəpə chəsə'əžag chso'elao' Jesocristən' to to yež.

Apolosən' gwdižju'i'e xtižə' Diozən' Efeson'

²⁴ Na' tyemp na' bžin to beŋə' Izrael Efeson' na' le' Apolos. Apolosən' naque' beŋə' Alejandria, na' chac cho'e dižə' lao' lcue' na' bansede' binlo can' na xtižə' Diozən' de'en nyožen'.

²⁵ Apolosən' gwnezene' che de'e güen ca' ben Xancho Jeso'osan' na' de'e ca' bsd blo'ine'. Na' do yichj do laže'e be'e diža' bzejni'ine' tcho'a tšao' de'en nezene' che Jeso'osan' la'ana'ecza con de'en əbsed əblo'i de'e Juanna' na' can' bchoe' beṇə' nis na'azən' nezene'.

²⁶ Nach Apolosən' sin cui chaž chžebe' gwzoloa be'e diža' che Xancho' lo'o yo'oda' che beṇə' Izrael ca'. Na' gwse'ene' Prisilan' na' be'en che' Aquilan' can' chzejni'i Apolosən' nach gosə'əche'e le' partlā na' bosozzejni'ichene' le' cuaselol can' na' Diozən' che Jeso'osan'.

²⁷ Na' ca' naquə Apolosən' gone'ene' šeje' gan' ne' Acaya, na' beṇə' ca' chso'onlilaža' Jesocrisən' Efeson' besyə'əbeine' de'en gone'ene' šeje' na' bosozzoje' to cart de'e beṇə'e par beṇə' ca' chso'onlilaže'e Jesocrisən' Acayan' par niç yoso'ozenag beṇə' ca' che' na' so'one' güen len le'. Na' cata' bžin Apolosən' Acayan' goclenchgüe' beṇə' ca' bagoclen Diozən' par chso'onlilaže'e Jesocrisən'.

²⁸ Na' lao lcue' bsd blo'ine' beṇə' Izrael ca' de que clelən' chso'one' xbab che Jeso'osan', na' bzejni'ine' lega'aque' can' nyoj Xtizə' Diozən' de que Jeso'osan' naque' Cristən' ben' chəsə'əbeze' yidə par gaqualene' lega'aque'. Na' Diozən' goclene' Apolosən' par niç cui bi gosə'əna beṇə' Izrael ca' ca diža' de'en be'enə'.

19

Can' goquə žlac gwzo Pabən' Efeson'

¹ Na' žlac zo Apolosən' Corinton', Pabən' beze'e na' bedie' yež ca' zjəchi' do ya'ada'onə' na' bežinte' Efeson'. Efeso na' bežague' balə beṇə' ca' bachso'onlilaža' Jeso'osan'.

² Nach gože' lega'aque': —čEzedəso Spirit che Diozən' lo'o yichjla'ažda'olen' cata'ən gwzoloa chonlilaža'əle Jesocrisən'?

Nach beṇə' ca' gwse'ene': —Bito ne'e yeneto' šə zo Spirit che Diozən'.

³ Nach goze'e lega'aque': —čNacxan' gwchoale nisən' ža?

Nach gwse'ene': —Gwchoato' nisən' can' bzejni'i de'e Juanna'.

⁴ Nach gož Pabən' lega'aque': —De'e Juanna' bchoe' beṇə' ca' besyə'ədinje xtołə'əga'aque'ena' nis pero na' leczə gože' lega'aque' de que cheyałə' so'onlilaže'e be'enə' ze'e sełə' Diozən' par gaqualene' nasyon Izraelən', na' be'enə' ne' ca' le'ena' Jeso'osan'.

⁵ Beyož bosozzenague' can' gwna Pabən' nach gosə'əchoe' nisən' de'e yoblə par besə'əlo'e de que chso'onlilaže'e Xancho Jeso'osan'.

⁶ Nach Pabən' gwxoə ne'ena' yichjga'aque'ena' na' Spirit che Diozən' bedəson lo'o yichjla'aždao' to toga'aque' na' benən par niç gosə'əne' gwde gwdełə diža' na' leczə gosə'əyixjui'e bi de'en gož Diozən' lega'aque'.

⁷ Na' entr yoguə'əga'aque' zjənaquə ca do šižine'.

⁸ Na' ca do šon bio' bsd blo'i Pabən', na' sin cui chaž chžebe' be'e xtižə' Diozən' len beṇə' ca' chəsə'ədoṇə chəsə'əžag lo'o yo'oda'ona' chzejni'ine' lega'aque' par niç gwse'ejle' zane' de que Diozən' chnabi'e con notə'ətezə beṇə' chso'e latjə.

⁹ Pero besə'əchoj balə beṇə' zjənaquə yichjla'aždao' žod beṇə' cui gwse'ejle'eczə na' delant beṇə' ca' ža'ana' bosozžia bosozonite'e de'en əbsed əblo'i Pabən' che Jesocrisən'. Pabən' bechoje' gan' že'ena' na' leczə bebeje' beṇə' ca' bachso'onlilaža' Jesocrisən', na' gwche' lega'aque' gan' zo to yo'o'one' che to beṇə' le Tiranno na' lo'o yo'o'one' scuelən' bsd əblo'ichene' lega'aque' yoguə' ža.

¹⁰ Na' lao čop iz ben Pabən' ca', yoguə'əloł beṇə' ža' Asian' beṇə' zjənaquə beṇə' Izrael na' beṇə' cui zjənaquə beṇə' Izrael gwse'ene' xtižə' Xancho Jeso'osan'.

¹¹ Na' Diozən' bene' par niç Pabən' bene' miłagr de'e besyə'əbanchgüeine'.

¹² No bey na'aza na' no lacha' na'aza šə babchelən cuerp che Paban' nach chjəsyə'əsane'ən gan' zjəde beṇə' güe' ca' na' le'e chəsə'əyacteine' che yižgüe'ən chse'ine', na' beṇə' ca' yo'o' yaz no de'e xio' yichjla'ažda'oga'aque'ena' leczə chesə'əchojən.

¹³ Nach balə beṇə' Izrael ca' beṇə' ca' chsa'aš chso'one' rmech len yelə' goža' člega'aque'ena' na' leczə chəsə'əbeje' de'e xio', gwsa'acłaze'e yesə'əchine' la Xancho Jeso'osan' par yesə'əbeje' de'e xio' ca' zjəyo'o' zjəyaz beṇə' ca' na' gosə'əne': "Chonto' mendad yechojle por yelə' chnabia' che Jeso'osan' ben' choe' Pabən' xtiže'ena'."

¹⁴ Zo to beṇə' Izrael na' le Esea na' naque' beṇə' gwgnabia' che bxož ca'. Na' nitə' gažə xi'ine' na' xi'ine' ca' gažən' choso'ozetje' la Jeso'osan' gwse'ene' yesə'əbeje' de'e xio' ca'.

¹⁵ Na' to šlas cata' gwse'e to de'e xio'on ca' na' boži'in xtižə'əga'aque'ena' gožən lega'aque': —Nezda' non' Jeso'osan' na' nombi'a Pabən', pero le'e bito nacle txen len lega'aque'.

¹⁶ Nach de'e xio'onə' benən par niç be'ena' bxite'e bnize' beṇə' ca' na' benene' lega'aque' con can' chene'ennə, xte gosə'əbi'e güe' na' xte gwsa'acquene' zi', nach bosyo'oxonje' liž be'ena' ga'alyidga'aque'.

¹⁷ Na' yoguə'əloł beṇə' ca' nitə' Efeson' beṇə' Izrael ca' na' beṇə' ca' cui zjənaquə beṇə' Izrael gosə'ənezene' can' goquən'. Nach yoguə'e besə'əžebe' na' gwso'eche' yelə' bala'an che Xancho Jeso'osan'.

18 Na' zan beṇə' ca' bachso'onḷilažə' Jesocristən' gosə'əḡoadole'e lao beṇə' ca' chəsə'ədopə chəsə'əžag chso'elaogü'e Jesocristən' gwse'e lega'aque' ca malən' bagwso'one' antslə.

19 Nach zan beṇə' bagwsa'ac beṇə' goža' na' beṇə' gone ya'a bosə'otobe' ḷibr chega'aque'ena' na' gwsə'oḡe'en bosə'ozeje'en delant beṇə' ḷjuežjga'aque' ca' bachso'elao' Jesocristən', na' besyə'əbeje' cuent ca do ja'aquə'ətə' zjənyeyjue' ḷibr ca' na' bžinən šiyon mil mech plat.

20 Na' ca naquə xtižə' Xancho Jesocristən' gosə' gwlaḷjəchən' na' gwyanch beṇə' bosə'ozenague' chei.

21 Gwde goc de'e ca' Pabən' bene' xbab yeyeje' Jerosalennə' catə' yeyož šeje' gan' mbane Masedonian' na' Acayan'. Na' leczə gwne' de que catə' yežine' Jerosalennə' cheyaḷə' šeje' Roman'.

22 Nach bsele'e čhopə beṇə' ca' chsa'aclen le' Masedonian', Temtion' len Eraston', žlac bega'anəch le' Asian' yeto čhopə ža.

Beṇə' ca' gwsə'on contr Pabən' gwsə'onchgü'e scandl Efeson'

23 Na' zan beṇə' Efeso ca' besə'əže'e Pabən' de'en bsdə əblo'ine' che Jeso'osən', nach gwsə'aš gwsə'olje' lao' syodan' gwsə'onchgü'e scandl.

24 Quingan' goquə. Zo to beṇə' le Demetrio na' chone' yo'odao' dao' de plat de'en naquə ca yo'odao' gan' zo xnax Diana ben' chse'ejni'alaže'e, na' chda'ochguan na' gan xen chone' na' leczə ca' beṇə' ca' chso'on žin txen len le'.

25 Nach btobe' beṇə' ca' chso'on žin txen len le' na' yeziqə'əchlə beṇə' leczə zjənḷan chso'on žinnə' nac ca' nach gože' lega'aque': —Nezele de que ca naquə žin nga nḷancho choncho, chonḷenchguachon gan.

26 Na' habenczele na' bable'iczele can' chonḷizə to de'e le Pab chsd chlo'ine' beṇə' lao' syoda Efeso nga na' casi yoguə' beṇə' ža' doxente Asian' che'e lega'aque' de que yoguə'əḷolte lguə'a lsaquə' de'e chso'on beṇəchən' bito zjəzaquə'ən par šejni'alaže'əchon. Na' beṇə' zan bachosə'ozenag che'.

27 Le'e gonšc xbab naclə goncho la' nxož bin' yesə'əne' checho por ni che žin de'e nga choncho, na' caguə ležən, sino leczə nxož so'one' par ničh yo'odao' che xnax Diana chechon' yega'anən ca to de'e cui bi bi zaque'e na' leczə ca' yelə' xoche che'ena' na' yelə' zaquə' che'ena'. Xož gac che' ca' la'anə'əczə beṇə' ža' doxenḷə Asia nga na' doxen yežlyon' chse'ejni'alaže'e le'.

28 Beyož gwse'enene' gwna Demetrio' ca' besə'əlocchgü'e che de'en chsd chlo'i Pabən', nach gwsə'osye'e gosə'əne': —Beṇə' zaquə'əchgüei xnax Diana chechon', la' le'ena' xnax che chio'o beṇə' Efeso.

29 Nach to scandl juisy bachac lao' syodan' de'en gwsə'aque' tozə bosə'əniže' beṇə' ca' zjəle Gayo na' Aristarco, na' gosə'əxobe' lega'aque' xte besə'əžinte' gan' chəsə'ədobə yoguə' beṇə' lao' syodan'. Gayon' na' Aristarcon' zjənaque' beṇə' Masedonia na' chsa'aše' txen len Pabən'.

30 Pabən' goclaže'e šo'e gan' zjəndobə beṇə' ca' par gūe'elene' lega'aque' dižə' pero beṇə' Efeso ca' chso'onḷilažə' Jesocristən' bito gwsə'e latjə šeje'.

31 Na' yebaḷə beṇə' migw che Pabən', beṇə' zjənaquə beṇə' gwnabia' Asian', bosə'osele'e rson gwse'e Pabən' de que bito šeje' gan' zjəndobə beṇə' ca'.

32 Na' beṇə' ca' zjəndopə zjənžaguən' chso'one' to scandl juisy. Gwde gwde chso'osya'a to toga'aque', niqə nejni'a bin' chəsə'əne'. Na' caguə yoguə'əga'aque' zjəneze'ne' bi parən' zjəndobe'.

33 Na' beṇə' ca' besə'əža'a Pabən' leczə besə'əže'e notə'ətezechlə beṇə' Izrael. Nach beṇə' Izrael ca' zjənžaguən' bosə'ožigü'e to beṇə' le Ljandr par gwzeche' lao beṇə' ca' ža'anə' par güe'e dižə' cuent cuich yesə'əže'e lega'aque'. Na' Ljandrən' gwḷis ne'ena' par bene' seņy nite'e žizə yosə'ozenague' rsonnə' de'en gwzoe' laoga'aque'ena'.

34 Pero catə' besə'əle'ine' le' gwsə'acbe'ine' de que naque' to beṇə' Izrael, nach tš'i'izə besyə'əzolaogü'e gwsə'osye'e gosə'əne': —Beṇə' zaquə' juisy xnax Diana che chio'o beṇə' Efeso.

Ca do čhop or gwsə'osye'e gosə'əne' ca'.

35 Nach be'ena' naquə scriban catə'əchgua goc bebec žie' lega'aque' nach gože' lega'aque': —Le'e beṇə' syoda Efeso, yoguə' beṇə' ža' doxenḷə yežlyon' zjəneze'ne' de que naquən lao na'acho əggüia əgwyecho yo'odao' che xnax Diana chechon'. Le'ena' naque' le'ezelaogüe beṇə' zaque'e la' lguə'a lsaquə' che'ena' bxpən yoba na'ate par lao yežlyon'.

36 De'e na'anə' ža bito gaquə no əna de'e yoblə. Na' le'e so žizə, bito bi gonḷe sin cui gongaxjle xbab naquən' gonḷe.

37 Ca naquə beṇə' quinga nche'ele nga, bito ənəcho bi bagosə'əbane' lo'o yo'odao' checho ca' na' niqə ənəcho chosə'ožia chosə'onite'e xnax Diana chechon'.

³⁸ Na' Demetron' nga len beṇə' ljuežje' ca' yela', šə chac bi de'e chac čhega'aque' len beṇə' yoblə, nita'əczə beṇə' gwnabia' so'one' yelə' jostis čhega'aque'ena' šə žja'aque' par ničh əžjse'e lega'aque' part.

³⁹ Na' šə bichlə de'e chnable gaquə, partlə gaquə jont čhei par choglaon.

⁴⁰ Ca naquə scandl de'e nga chac na'a nxožčhua əbague'echo de que choncho contr gobiern ca de'en nga že'e ža'acho nga, na' nic bi bi de ye'ega'acchone' šə yesə'əṇabene' chio'o čhe scandl juisyən' choncho.

⁴¹ Beyož gože' lega'aque' ca' bene' mendad besyə'əžaše'.

20

Pabən' gwyėjəche' Masedonian' na' Gresian'

¹ Nach catə' beyož gwche' ži de'e zedən', Pabən' goxe' beṇə' Efeso ca' chso'onlilažə' Jesocrisṭən' gan' zo'enə' na' lao banite'ena' btipe' lažə'aga'aque', nach bzeine' lega'aque' dižə'. Gwde na' beze'e gwyėjəche' Masedonian'.

² Na' gwdie' to to yež ca' zjəchi' Masedonian' btipčgüe' lažə' beṇə' ca' chso'onlilažə' Jesocrisṭən', nach gwyėjəche' Gresian'.

³ Na' gwzoe' Gresian' šon bio', na' cata' bžin ža yeze'e par yeyo'e lo'o barcon' yeyeje' Sirian', gwṇezene' de que zjəchi'inao beṇə' Izrael ca' le', nach mejor bezdie' doxen gan' mbane Masedonia na'alə, belə'atie' Filiposən' gan' zoa' ca orən'.

⁴ Na' Sopater len Aristarco len Segundo len Gayo len Tiquico len Trofimo na' lecə len Temtion' ja'aclene' le' Asian'. Sopaterən' naque' beṇə' Berea, Aristarcon' na' Segundo zjənaque' beṇə' Tesalonica, na' Gayon' naque' beṇə' Derbe. Na' Tiquicon' len Trofimon' zjənaque' beṇə' Asia.

⁵ Nach gosə'əbialao beṇə' ca' na' jəsə'əleze' neto' Troasən'.

⁶ Gwdech lṇin' catə'an chsa'ogüe' yetxtil de'en cui bi xne'i nchixə, nada' len Pabən' gwza'ato' Filiposən' gan' zo'anə' na' gwyo'oto' lo'o barcon' na' goč gueyə' ža catə' bžinto' Troasən' gan' hanita' beṇə' ca' jəsə'əlezə' neto' nach gwzoto' na' gažə ža.

Can' goquə lao zo Pabən' Troasən'

⁷ Na' catə' bžin ža dmigw besə'ədobə beṇə' ca' chso'onlilažə' Jesocrisṭən' Troasən' gwse'ej gwsa'ogüe' par čhjasyə'əzalaze'e bi zejen par chio'o de'en bsanlažə' cuin Xancho Jesocrisṭən' gwso'ot beṇə' le'. Na' de'en bazon yeza' Pabən' ca gwṇezə be'e xtižə' Diozən' len lega'aque' xte bžinte do chel.

⁸ Na' lo'o yo'o gan' ndopə nžagto' naquən de šon cuia na' cuartən' de'en zo le'ezelaogüe la'alə, zechuan yi' na' lo'i nan' že'eto'.

⁹ Na' to bi'i güego' lebo' Eutico žiabo' cho'a bentannə'. Na' Pabən' zdonžə zda dižə' de'en cho'enə' na' ca' žia bi'in cho'a bentannə' gwtasbo' na' lao chtasbo'on bexopəczlabo' lao yo che'elə. Na' bi'i guatzə besyə'əlise'.

¹⁰ Nach betj Pabən' bžine' gan' jəsyə'ədičjue'ebo'onə' le'e bchequa'əte' laobo'onə' gwdele'ebo'. Nach gože' beṇə' ca': —Bito bi gaquele, mbanczbo'.

¹¹ Na' begüie' de'e yoblə nach gwsa'ogüe' na' bezolaogüe' cho'e dižə'anə' len lega'aque', na' ṇe'e cho'ete'en ca' catə' gwyeni'. Nach beze'e.

¹² Nach catə' besyə'əsa'ac beṇə' ca' besyə'əbeichgüeine' besyə'əche'e bi'i güego'on mbambo'.

Gwsa'aque' Troasən' na' ja'aque' gan' nzi' Mileto

¹³ Nach bxi'ato' len Pabən' de que yebialaoto' yeyejto' lo'o barcon' xte gan' nzi' Ason, na' le' gwyazlažə'əche' yeyede' yo bižlə yela'ate' Asonnə'. Ca' goquan' beyo'oto' lo'o barcon' par bežinto' Asonnə'.

¹⁴ Na' Ason na' bežagto'one' nach txen beyo'olento'one' lo'o barcon' par bežinto' gan' nzi' Mitilene.

¹⁵ Nach na' bessa'ato' besyö'oto' lo'o barcon' na' beteyo bežinto' galə'əžə gana' nzi' Quio. Nach zjəzdato' na' gwde yeto ža bežinto' ganə' nzi' Samos. Na' bechojto' lo'o barcon' na' gwyejto' gan' nzi' Trogilio na' na' bega'antə' tže' bento' dezcanz. Nach beteyo besyö'oto' lo'o barcon' de'e yoblə par bežinto' Mileton'.

¹⁶ Ca' bento' par ničh cui gwdeto' Efeson' la' Pabən' bito gone'ene' šeichene' yež ca' zjəchi' Asian', chedə' bachachyenchgüeine' šə galə' soe' Jerosalennə' par ža lṇi Pentecostesən'.

Pabən' be'e dižə' len beṇə' golə' blao čhe beṇə' ca' chso'elao' Jesocrisṭən' Efeson'

¹⁷ Mileto na' zoto' bselə' Pabən' rson par bda'ac beṇə' golə' beṇə' blao ca' entr beṇə' ca' čhasə'ədopə čhasə'əžag so'elaogüe'e Jesocrisṭən' Efeson'.

¹⁸ Na' catə' besə'əla'aque'ena' Pabən' gože' lega'aque': —Nezczele ca güennə' babena' entr le'e dezd catə'an bida' Asian' de'e neche.

¹⁹ Gwzoa' bena' xšin Diozən' do yichj do laža'a. Bito ben cuina' xen, na' zan las gwchežachgua' chele, na' de'e zan de'e bos'o'ochi' bos'o'saqua' beṇə' Izrael ca' nada'.

²⁰ Bzejni'ida' le'e yogua' de'en byažjele šejni'ile sin cui bžeba'. Bzejni'ida'an le'e catə'an chdopə chžagle na' leczə liž to tole.

²¹ Bzejni'itezada' beṇə' zjənaqua' beṇə' Izrael na' beṇə' cui zjənaqua' beṇə' Izrael can' chene'e Diozən' yesyə'ədiṇjene' xtolə'əga'aque'enə' na' can' cheyalə' so'onlilaže'e Xancho Jesocrisṭən'.

²² Na' na'a yeya'a Jerosalennə' chedə' babzejni'i Spirit che Diozən' nada' de que chonən byen yeya'a, na' bito nezdə' bin' gaqua' chia' na'.

²³ Con de'en nezdə' de'en babzejni'i Spirit che Diozən' nada' de que to to syoda gan' yedia' ədolə'a gaca' pres na' leczə gaqua' bichlə de'e chi' saca'a.

²⁴ Bito chi' yichja' che yogua' de'e ca' chi' saca'a. La'ənə'əczə šə so'ote' nada', chzanczədə' yelə' mban' chia'anə'. Chi' yichja' ša'alao gona' yogua'əlol de'en naqua' lao na'a gona' na' mbalaz zoa' lo'o yichjla'aždaogua'anə' žlac chona'an. Xancho Jesocrisṭən' gwleje' nada' par yo'o lao na'a chyixju'i a dižə' güen dižə' cobə' catequan' nži'ilažə' Diozən' beṇə'chən' na' chixju'i'an žlac ņe'e yo'a biš xṇe.

²⁵ Nadan' bzejni'ida' le'e ca' naquan' chnabia' Diozən' con nota'ətezə beṇə' chso'e latjə pero na'a zoa' segor de que ni tole bitoch le'ile nada' lao yežlyo nga.

²⁶ De'e na'anə' əchnia' le'e de que bito bi dolə' napa' nada' šə nole cuiyai'.

²⁷ La' bač bzejni'ida' le'e yogua'əlol de'en chene'e Diozən' ənezele sin cui bi bcuaša'a.

²⁸ De'e nan' ža cuec yichjle che yogua'əlol de'en babzejni'ida' le'e na' legwsed legwlo'i yežiquə'əchlə beṇə' chəsə'ədoṇə chəsə'əžag chso'elaogüe'e Xancho Jesocrisṭən' de que cheyalə' yoso'ozenague' chei. Legon ca' chedə' Xancho Jesocrisṭən' bnežjw cuine' gwdirxjue' xtolə'əchon' catə'an gwso'ot beṇə' le', na' Spirit che Diozən' bagwleje' le'e par əggüia əgwyele yeziqə'əchlə beṇə' chso'onlilažə' Jesocrisṭən'.

²⁹ Nezdə' catə' cuich zoa' len le'e la'ac beṇə' se'enene' yesə'əxoayague' le'e par nič cuejyichjle cuich gwzenagle che Jesocrisṭən'.

³⁰ Na' entr le'e yesə'əchoj beṇə' yoso'osed yoso'olo'ine' le'e por dižə' güenlažə' lgu'a a dižə' li, se'enene' naole de'en yoso'osed yoso'olo'ine'.

³¹ De'e na'anə' legapə cuidad nič cui no yesə'əxoayag le'e. Na' ležjza'alažə' de que šon iz bagwzoa' bsed blo'ida' le'e na' gwneyoida' le'e teža na' še'elə na' xte bcuežən nada' por le'e.

³² Na'a ža beṇə' bišə', Diozən' gwcuasə' gwcue'eje' le'e len de'e malən' na' xtiže'enə' əgwzejni'ichən le'e can' nži'ilaže'e le'e. Xtiže'enə' gaqualenən le'e sotezə sole gonlilažə'əle Jesocrisṭən' na' leczə gaqualenən le'e par nič žjəyezole len Diozən' txen len yeziqə'əchlə beṇə' ca' bagwlej Diozən' par zjənaque' lažə' ne'enə'.

³³ Bitonə' selaža'a bi de'en de che beṇə', nic xmechga'aque'enə' na' ni xala'anga'aque'.

³⁴ Nezczele ni'a na'a bgona' žin par nič bžel bi de'en byažj de'en bchinda' txen len beṇə' ca' gosə'anitə' len nada'.

³⁵ Na' bena' žinnə' ca' par nič leczə blo'ida' le'e can' gonle gaqualenle beṇə' ca' chac falṭ bi de'en chəsə'əyažjene'. Na' žjsa'alažə'əle xtižə' Xancho Jesocrisṭən' de'en gwne': "Mbalazəch zocho catə' chnežjwcho bi de'en chnežjwcho beṇə' cle ca' catə'an chso'one' chio'o bi de'en chso'one'."

³⁶ Na' beyož be'e Pabən' dižə'an bzo xiben' txen len yogua' beṇə' ca' gwso'one' orasyonnə'.

³⁷ Na' yogua'əga'aque' gosə'əbežchgüe' che Pabən' na' gosə'əyele'ene' na' gwsa'ogüe'ene' bxid.

³⁸ Nach ja'aclene' le' gan' beyo'e lo'o barcon'. De'e juisy de'e gwsa'aque'ne' de'en gože' lega'aque' de que ni yešlasə' cuich yesə'əle'ine' le'.

21

Pabən' beyeje' par Jerosalennə'

¹ Beyož bzeišazə lježjto' dižə' len beṇə' ca', na' beyo'oto' lo'o barcon' zjədato' liča bežinto' gan' ne' Cos. Na' beteyo bežžinto' gan' ne' Rodas. Na' Rodas na' bezsa'ato' na' bežžinto' Patara. Na' bechojto' lo'o barcon'.

² Na' to jəyetilzəto' chza' yeto barcw yoblə chza'an šejən Fenisia na' beyo'oto' lo'ina'.

³ Na' lao zjəyedato' lo'o barcon' ble'ito' isla de'en ne' Čipre, chi'in na'acho yeglə. Na' bedeto' zjəyedato' gan' mbane Siria. Nach catə' bežinto' Tiron' gan' bosyo'oletje' yoa' de'en zonsa'anə' na' beyetjto'.

⁴ Na' jəyediljto' gan' nita' beṇə' ca' chso'onlilažə' Jesocrisṭən', na' catə' beželetə' gan' nite'enə' bega'anlenga'acto'one' to xman. Nach gwsa'atə'əyoine' Pabən' cui šeje' Jerosalennə' chedə' Spirit che Diozən' babzejni'in lega'aque' de que gaqua' de'en gac che' Jerosalennə'.

⁵ Na' catə' beza'ato'onə' do xi'inq do xo'oləga'aque' gwsa'aque' len neto' cho'a syodan', nach bzo xibto' bento' orasyonna' len lega'aque' cho'a nisdə'onə'.

⁶ Beyoż na' bzei ljeużjto' dižə' nach beyo'oto' lo'o barcon'. Na' besa'aque' zjəya'aque' ližga'aque'.

⁷ Na' de'en beza'ato' Tiron' bežinto' gan' ne' Tolemaida na' Tolemaida na'azə bezyetjto' lo'o barcon'. Na' jaləna'əto' beŋə' ca' chso'onlilažə' Jesocristən' Tolemaidan' na' gwzoto' len lega'aque' tža.

⁸ Na' beteyo beza'alento' Pabən' na' bežinto' Sesarean' na' jəyega'anto' liž Lipən' ben' naquə txen len beŋə' ca' yəxop zjənaque' comisyon che beŋə' ca' chso'onlilažə' Jesocristən' Jerosalennə'. Na' Lipən' zoteza zoe' cho'e dižə' che Jesocristən'.

⁹ Lipən' nita' tap xi'inqe' no'ol güego' na' choso'ozenebo' beŋə' bi de'en bagož Diozən' lega'acbo'.

¹⁰ Zan ža gwzoto' liž Lipən' na' lao zoto'onə' bla' to beŋə' Jodean' beŋə' le Agabo. Chzenene' beŋə' bi de'en bagož Diozən' le'.

¹¹ Na' catə' ble'enə' gwŋabe' doxpey Pabən' na' bchejən ŋi'a ne'e ca' na' gože'ene': —Spirit che Diozən' babzejni'in nada' de que beŋə' Izrael ca' ža' Jerosalennə' yoso'ocheje' ŋi'a na'o ca' can' babchej ŋi'a na'anə' len doxpeyo' nga, nach so'one' le' lao na' beŋə' ca' cui zjənaquə beŋə' Izrael.

¹² Catə' beyoż beneto' can' gwna Agabən', neto' len beŋə' Sesarea ca' gotə'əyoito' Pabən' par cui šejəche' Jerosalennə'.

¹³ Nach Pabən' gwne': —Bito cuežle chia' o gonle ca soa' trist. Nada' zocza' par əcheja' na' gata' Jerosalennə' laogüe de'en chyixjui'a xtižə' Xancho Jeso'osan'.

¹⁴ Na' gočbe'ito' bito bi gaquə gonto' par cui šeje' Jerosalennə', na' bitoch bi gožto'one', con gožto'one': —Gaquə con de'en əna Xancho'.

¹⁵ Nach beyo'eni'ato' beza'ato' zjedato' par Jerosalennə'.

¹⁶ Na' gwsa'ac to chopə beŋə' Sesarea ca' chso'onlilažə' Jesocristən' len neto' na' entr lega'aque' len to beŋə' Chipren' ben' le Mnason. Bagoc zan iz chonlilažə'e Jesocristən', na' bazo liže' Jerosalennə'. Nach bxia'ato' zjəsoto' liže'enə'.

Pabən' bežine' Jerosalennə' na' jalane'e Jacobən'

¹⁷ Na' catə' bežinto' Jerosalennə' beŋə' bišə'əcho ca' ža'anə' besyə'əbeichgüeine' na' bosu'oguae' neto' diox.

¹⁸ Na' beteyo gwyejlento' Pabən' jəyeto' Jacobən' na' bžinto'onə' bazjəndopə zjənzag yogua' beŋə' gola beŋə' blao che beŋə' ca' chso'onlilažə' Jesocristən' na'.

¹⁹ Nach bguap Pabən' lega'aque' diox na' beyožən' be'elene' lega'aque' dižə' tcho'a tšao' ca naquən' baben Diozən' par nič zan beŋə' cui zjənaquə beŋə' Izrael bachso'onlilažə'e Jesocristən' gan' be'elene' lega'aque' xtižə' Diozən'.

²⁰ Na' catə' beyoż bosu'ozenague' de'en gož Pabən' lega'aque' nach gwso'elaogüe'e Diozən'. Na' gwse'e Pabən': —Beŋə' bišə' nezdə' de que zan mil beŋə' Izrael ca' bagwso'onlilažə'e Jesocristən' na' yoguə'əlole' chsa'acquene' chonən byen ŋaacho costombr de'en na lei de'en bzoj de'e Moizezən'.

²¹ Na' bazjənenene' rson de que le' chdao' chsed chlo'ido' yogua' beŋə' Izrael ca' že'e zitə' de que cuich cheyalə' yesə'ənaogüe' costombr de'en na lei de'en bzoj de'e Moizezən'. Le'egatezə ca' bazjənenene' rson de que chsed chlo'ido' cuich cheyalə' yoso'ozoe' xi'inqa'aque'enə' seŋy de'en ne' sirconsionnə' can' naquə costombr chechon'.

²² žNacxa gaquan' ža? la' zane' yesə'əžag nga catə' yesə'ənezene' de que bač zo' nga de'e yoblə.

²³ Quinga goncho. Nita' tap beŋə' nga beŋə' zjənon to lyebe lao Diozən' na' ŋa'a chse'enene' so'one' complir ca de'en zjənone' lyebe.

²⁴ Gwche'ega'aque' yo'odao' əblaonə' na' gono' txen len lega'aque' chixjo' bia ca' əgwnežjwle bxožən' gote'. Gono' ca' par nič yexi' yeyachle can' na lein' de'en bzoj de'e Moizezən' na' techlə guaquə əgwžib yichjga'aque'enə' ca costombr checho de'en de yeyoż goncho complir lyeben'. Gono' ca' len lega'aque' par nič yoguə'əloj beŋə' əsa'acbe'ine' de que chono' can' na leinə' na' de que bito chzo'on ca'alə can' chəsə'əne'.

²⁵ Babzojto' beŋə' ca' chso'onlilažə' Jesocristən' ga yoblə beŋə' ca' cui zjənaquə beŋə' Izrael, na' gožga'acto'one' de'en chaqueto' cui cheyalə' so'one'. Gožga'acto'one' cui sa'ogüe' yelə' guao de'en chəsə'əne' naquən che lgua'a lsaquə'ən chse'ejni'alažə' beŋə', na' cui sa'ogüe' chen, na' cui sa'ogüe' bia chat chbe' ši'ib. Na' lecžə gožga'acto'one' cui yesə'əgo'o xtoga'aque'.

Gosə'əzene' Pabən' yo'odao' əblaonə'

²⁶ Beteyo gwza' Pabən' gwche'e beŋə' ca' tap par yesyə'əxi' yesyə'əyache' yo'odao' əblaonə' can' na lei de'en bzoj de'e Moizezən'. Nach Pabən' gwyo'e gan' zo bxožən' gwduxje'ine' le' bi žan' əza'a əsa'aque' xi'ilažə' nič yoso'onežjue' bxožən' bia ca' gote'enə'.

²⁷ Na' bach zon gaquə gažə ža chso'one' de'en chso'one' par chesyə'axi' chesyə'ayache', nach gozej Pabən' lo'o yo'odao' əblaonə'. Na' besə'əle'i baļə beņə' Izrael ca' za'ac Asian' le', nach bosə'ota bosə'one' beņə' ca' nitə'əna'. Nach gosə'əzene' Pabən'.

²⁸ Gwso'osya'adie gosə'əne': —Le'e beņə' Izrael, ledogaquach tozə. Benga chde' doxenlə chsed chlo'ine' beņə' de que bito naccho beņə' güen na' de que bito bi zaquə' lei de'en bzoj de'e Moisezan' na' nic yo'odao' əblao checho nga. Na' na'a yeto de'e mal juisy banone' len yo'odao' əblao nga de'en naquə che Dioz chechon', babž'e'e beņə' ca' cui zjənaquə beņə' Izrael lo'inə'.

²⁹ Gwso'one' xbabən' ca' chedə' antslə besə'əle'ine' Pabən' lao' syodan' chdalene' to beņə' Efeso le Trofimo na' gwsa'aque' gwche'ene' lo'o yo'odao' əblaonə'.

³⁰ Na' gwso'onchgüe' zda žne. Nach le'e besə'ədobte beņə' zan cho'a yo'odao' əblaonə' nach gwso'e gwso'oxe'e Pabən' na' besyə'əxobe'ene' fuerlə yo'odao' əblaonə', na' le'e besyə'əseyjwte puert ca'.

³¹ Na' bachczə chso'ote'ene' catə' bžin rsonnə' lao beņə' gwnabia' che soldad ca' de que doxen lao' syoda Jerosalennə' bachac scandlən'.

³² Nach le'e gwza'ate beņə' gwnabia'anə' gwche'e soldad ca' na' capitan ca', əzja'acese' gan' ža' beņə' zan ca'. Na' catə' beņə' ca' chso'ot Pabən' besə'əle'ine' bachəsə'əžin beņə' gwnabia'anə' len soldad che' ca' gan' nite'enə', nach le'e gosə'əbezte' bitoch gosə'əyine' Pabən'.

³³ Nach catə' bžin beņə' gwnabia'anə' gan' ža' beņə' ca', bene' mendad gwso'oxə' soldad che' ca' Pabən' na' bosə'ocheje'ene' čhopə gden. Nach gwnabene' beņə' ca' ža'anə' bi le be'enə' na' bin' none'.

³⁴ Na' gwso'osya'adia beņə' ca' ža'anə', na' gwde gwde gosə'əna to toe', na' gwdeczə cui gwyejmi'i beņə' gwnabia'anə' bixaczxan' chac tant scandl chso'one'. Nach bene' mendad gosə'əche' soldad che' ca' Pabən' cuartelən'.

³⁵⁻³⁶ Nach yoguə' beņə' zan ca' jəsə'ənaogüe' lega'aque' chso'osye'e chso'one' to scandl juisy. Na' catə' besə'əžine' cho'a scaler che cuartelən' gosə'əlen soldad ca' Pabən' chedə' ne'e gwse'enche beņə' ca' yoso'onize'ene' na' yogue'e gwso'osye'e gosə'əne': —Le'e gote'.

Pabən' be'e dižə' lao beņə' ca' zjənžaguən'

³⁷ Na' bach chso'e len Pabən' lo'o cuartelən' catə'əczla gože' beņə' gwnabia'anə': —čEguaquə güe'elena' le'e to čhopə dižə'?

Nach beņə' gwnabia'anə' gože'ene': —čEchaco' dižə' griego?

³⁸ čEagua len' beņə' Egipto ben' gwda btob tap mil beņə' güet beņə' bat ngazə na' gwche'e lega'aque' latjə dašən' gan' chso'one' contr gobiernən'?

³⁹ Nach Pabən' gože'ene': —Caguə le' nada'. Nada' naca' beņə' Izrael na' lažə'anə' naquən to syoda blao gan' mbane Silisia de'en nzi' Tarso. Benšga goclen be' latjə güe'elena' beņə' quinga dižə'.

⁴⁰ Nach beņə' gwnabia'anə' gože'ene' ya'o. Nach Pabən' gwzeche' lao scalerən' na' bene' seņy len ne'enə' par nite' beņə' ca' žizə yoso'ozenague' xtiže'enə', na' legosə'anitə'ətie' žizə. Nach gwzolaogüe' be'e dižə'ən len lega'aque' dižə' ebreo.

22

¹ Gože' lega'aque': —Beņə' bišə' legwzenag ca naquə rson chia' nga gwzoa' laolen'.

² Catə' gwse'ene'ene' dižə' ebreon' choe' Pabən', gosə'anitə'əche' žizə. Nach Pabən' gože' lega'aque':

³ —Nada' naca' beņə' Izrael. Golja' syoda Tarso gan' mbane Silisian' pero bida' syoda nga na' ni gwcha'ogua'. Na' bseda' len to maestr əblaon' be'enə' le Gamaliel. Le' bzejni'ine' nada' cuaselol can' na lei che de'e xaxta'ochə ca'. Na' godca' lechguale chona' yoguə'əlol can' chene'e Diozən' cayanə'əcžən' le'e chaquele chonle na'a.

⁴ Na' blagzejə blagzida' beņə' ca' chso'onlilažə' Jesocristən'. Go'onda' gotga'aca'ane' na' gwxcena' beņə' byo ca' na' no'ol ca' chso'onlilažə' le' gwche'ega'aca'ane' gwže'e ližyan'.

⁵ Beņə' gwnabia' che bəox ca' na' yoguə'əlol beņə' golə beņə' blao ca' chəsə'anabia' nasyon Izraelən' zjənezene' can' bena'. Lega'aque' gwso'one' yiš de'e bəxa'a əzya'a Damascon' par nič gaquə sena' balteza beņə' chso'onlilažə' Jesocristən' par che'ega'aca'ane' Jerosalen ni gonga'acto'one' castigw.

Pabən' be'e dižə' can' goquə bembie Jesocristən'

⁶ Na' goquən' lao əzya'a Damascon' na' mer do gobiž bazon əžina'anə' catə'əczla to be'eni' juisy de'en za' yoban' gwyečhjan nada'.

⁷ Xte bgüixa' lao yon' na' benda' to beņə' gože' nada': “Saul, čbixchen' nga nlagzejə nlagzido' nada' quinga?”

⁸ Nach božia'an goža'ane': "¿No le Señor?" Nach gwne': "Nada' Jeso'os beṇə' Nasaret. Nadan' nlagzeḷə nlagzido'."

⁹ Beṇə' ca' əzya'alena'anə' besə'əžebchgü'e' besə'əle'ine' be'eni'inə' pero bito gwse'enene' de'en gwna Jeso'osən' nada'.

¹⁰ Nach goža'ane': "¿Bin' cheyaḷə' gona' ža Xana'?" Nach Xana' Jeso'osən' gwne': "Beyas na' gwyejteza Damascon', na' to beṇə' zo na' əne' le' bin' cheyaḷə' gono'."

¹¹ Nach be'eni'inə' xte benən ca gwçhola', nach beṇə' ca' nžaga'anə' gwso'oḷe'ene' na'anə' par bžinto' Damascon'.

¹² Na' Damasco na' zo to beṇə' le Ananias beṇə' cho'elaogü'e' Diozən' do yichj do laže'e can' na lei chechon', na' yoguə'əloḷ beṇə' gwlaž checho ca' ža'anə' chso'e xtižə' Ananiasən' de que naque' beṇə' chon de'e güen.

¹³ Ananiasən' bide' bedəṇie' nda' na' catə' ble'enə' gože' nada': "Saul biša'a, bele'i." Catə' gwne' ca' le'e bele'iteida', nach goc ble'ida' le'.

¹⁴ Nach gože' nada': "Diozən' ben' cho'ela'ocho, ben' leczə' gwso'elao' de'e xaxta'ocho ca', bagwleje' le' par niç bable'ido' Xi'ine'ena' ben' naquə' le'ezelaogü'e beṇə' güen. Bagwleje' le' par niç babendo' be'elene' le' dižə', na' par niç šejni'ido' doxen can' chene'ene' gono'."

¹⁵ Go'o xtiže'ena' len beṇə' zan beṇə' že' lao yežlyo nga na' əgwzejni'iga'acdo'one' de'e ca' babendo' na' bable'ido'.

¹⁶ Na' na'a ža, bito cuezə'cho'. Yo'o par niç cho'o nis. Na' gono' orasyon lao Xancho Jesocristən' ənabdo'one' yeya'a yeyibe' yichjla'ažda'ogo'onə'."

Pabən' be'e dižə' can' goquə' jəsed jəlo'ine' beṇə' ca' cui zjənaquə beṇə' Izrael

¹⁷⁻¹⁸ Nach gwde na' beyeda' Jerosalen nga na' gwya'a lo'o yo'odao' əblaona' jena' orasyon na' lao chona'anṇə' ble'idaogü'e'eda' Jesocristən'. Na' gože' nada': "Na'atec na'a bechoj Jerosalen nga la' bito yoso'ozenag beṇə' quinga çhio' ca naquə' dižə' de'en go'o çhia'."

¹⁹ Nach goža'ane': "Xana', zjənezcə'ga'aquene' de que nada'anə' gwya'a to to yo'odao' ca' na' jeta' jtinə' beṇə' ca' chso'əñlilaža' le' na' bseyjwga'aca'ane' ližya."

²⁰ Le'egatezə ca' lencza' naquə'to' txen na' gwyazlažə'əchgua' catə'ən gwso'ote' de'e Esteban' ben' be'e xtižə'onə', na' nada' gwdapa' xadon' che beṇə' ca' gwso'ot le'."

²¹ Pero Jesocristən' gože' nada': "Bchoj la' əsela'a le' zitə' par go'o xtiža'anə' len beṇə' cui zjənaquə beṇə' Izrael."

Pabən' be'elene' beṇə' gwnabia' che soldad ca' dižə'

²² To ca'ata'əzə' boso'ozenague' che Pabən', nach gwso'osye'e gosə'əne': —Le'e got be'ena'. Bito cheyaḷə' soche' yežlyon'.

²³ Gwso'osya'adie' xte juisy. Na' de'e tant çəsə'əloque' xte boso'ozalə' xaga'aque'ena' lao be' na' leczə' gwsa'aše'e bište yon' na' boso'ozale'en.

²⁴ Catə' ble'i beṇə' gwnabia' che soldad ca' can' chso'one'ena' nach bene' mendad yesə'əyine'ene' yid sot niç gü'e' dižə' bi de'e malən' babene' de'en chso'osya'a beṇə' ca' contr le'.

²⁵ Na' bazjəncheje' Pabən' par yesə'əyine'ene' catə' gože' capitannə' ben' zecha galə'əzə: —Segon can' na lein', bito de lsens çhinle' nada' yid sotən' çhedə' la' naca' beṇə' nasyon Roma na' niquənə' gatə'əbia' šə bin' nonə'.

²⁶ Beyož gože' capitannə' ca' le'e gwyejte' capitannə' lao beṇə' gwnabia' che soldad ca', ježe'ene': —Gapgo' cuidad bin' gonecho ben' bandolə' la' naque' beṇə' nasyon Roma.

²⁷ Nach beṇə' gwnabia' che soldad ca' gwyeje' lao Pabən', gože'ene': —Gwna nda' çəle beṇə' nasyon Roma le'?

Nach Pabən' gože'ene': —Beṇə' nasyon Roma nada'.

²⁸ Nach beṇə' gwnabia' che soldad ca' gože' Pabən': —Mech xen gwxaquə'əda' nada' par niç naca' cuent len beṇə' nasyon Roman'.

Nach Pabən' gože'ene': —Nada' golja' naca' beṇə' nasyon Roman'.

²⁹ Nach beṇə' ca' banitə' probnid par yesə'əyine' Pabən' le'e besyə'əbižə'əte' cuite'ena', na' leczə ca' beṇə' gwnabia' che soldad ca' bžebe' çhedə' gosə'əzene' bito de lsens len lein' par yoso'ocheje' notə'ətezə beṇə' naquə beṇə' nasyon Roman' šə cuiṇə' çhoglaon bi de'e mal none'.

Pabən' zeche' lao beṇə' golə blao ca' çəsə'ənabia' Izraelən'

³⁰ Nach beteyo beṇə' gwnabia' che soldad ca' boseže' Pabən'. Na' bene' mendad besə'ədobə bçoz əblao ca' na' beṇə' golə blao ca' çəsə'ənabia' nasyon Izraelən' par niç ənezene' bi porən' choso'ocuiše' Pabən'. Na' catə' babesə'ədobə beṇə' gwnabia' ca', gwleje' Pabən' nach bzeche' le' delant lega'aque'.

23

¹ Nach Pabən' bgüie' beṇə' golə blao ca' chəsə'anabia' nasyon Izraelən', na' gože' lega'aque': —Beṇə' bišə', xte ža neža zoa' lao Diozən' chona' complir de'en ngüe'e lao na'a gona' na' lo'o la'aždaogua'anə' nezdə' de que chazlaže'e can' chona'anə'.

² Nach Ananias ben' nauqəch bχoz əblaonə' bene' mendad len beṇə' ca' zjəzecha cuit Pabən' yesə'əbaže'e cho'enə'.

³ Nach Pabən' gože'ene': —Diozən' gone' le' castigw, goxoayag. Le' chi'o nga par gono' yelə' jostis chia'anə' can' na' lein', na' chono' contr lein' de'en benlizo' mendad yesə'əbaže'e cho'anə'.

⁴ Nach beṇə' ca' zjanitə' cuite'enə' gwse'ene': —Bito yoži'o xtiže'enə' ca', la' le'enə' bχoz əblaoch.

⁵ Nach Pabən' gože' lega'aque': —Beṇə' bišə' bito nezdə' šə be'enə' nauqəch bχoz əblaoch. Ža'alə nezdə' bito goža'ane' ca', chedə' nyoj Xtižə' Diozən' nan: “Bito yoži'o dižə' pesad len beṇə' gwnabia' chelen'.”

⁶ Na' Pabən' gocbe'ine' de que beṇə' golə blao ca' chəsə'anabia' nasyon Izraelən' zjanaque' choplə. Baļe' zjanzi'e sadoseo na' yebaļe' zjanzi'e fariseo por ni che can' chse'eļle'e na' can' choso'osed choso'olo'ine'. Nach gwne', gože': —Beṇə' bišə' nada' naca' beṇə' fariseo, la' xi'in beṇə' fariseo nada'. Na' zoa' nga chonle yelə' jostis chia' por ni che de'en chejl'i'a de que yesyə'əban beṇə' guat ca'.

⁷ Ca beyoz gwne' ca' gwzolao to bžəš entr beṇə' fariseo ca' na' beṇə' sadoseo ca' na' gwsa'aque' choplə.

⁸ Goc ca' chedə' beṇə' sadoseo ca' chəsə'ane' de que bito yesyə'əban beṇə' guat ca', na' bito chse'eļle'e de que nitə' angl ca' na' spirīt ca', pero na' beṇə' fariseo ca' chəsə'ane' nitə' angl na' spirīt na' leczə chəsə'ane' yesyə'əban beṇə' guat ca'.

⁹ Xte bachso'osya'a beṇə' fariseo ca' len beṇə' sadoseo ca' chəsə'əšaše'. Nach gosa'əzoža' to chopə beṇə' ca' zjansed lein' beṇə' ca' zjanaquə beṇə' fariseo, gosa'ane': —Ni to de'e mal cui non bengə. Na' bito nauqən güen goncho contr le'. žčhexa šə babsed blo'i no spirītən' o no anglən' le'? Caguə əde si'innə' goncho contr Diozən'.

¹⁰ Can' chəsə'ədilə chəsə'əšaše'enə' xte bach chžeb beṇə' gwnabia' che soldad ca' šə yoso'ozoxj yoso'onitlaocze' Pabən'. Nach beṇə' mendad besə'əžin soldad ca' par besyə'əbejxaxje' Pabən' ladjo beṇə' ca' na' besyə'əče'ene' cuartelən' de'e yoblə.

¹¹ Na' že' beteyon' bžin Xancho Jesocristən' gan' de Pabən' na' gože'ene': —Bito žebo' Pab. Can' babi'o xtiža'anə' Jerosalen' ga, ca'aczən' go'on Roman'.

Boso'oxi'e so'ote' Pabən'

¹² Na' beteyon' baļə beṇə' Izrael ca' besə'ədobe' par boso'oxi'e so'ote' Pabən'. Na' boso'ozo'e jorament gosə'əne': —Diozən' gone' chio'o castigw šə ye'ej šə gaocho antslə cuiṇə' gotcho Pabən'.

¹³ Mazlə čhoa beṇə' ca' boso'oxia' so'ot Pabən'.

¹⁴ Nach ja'aque' gan' ža' bχoz əblao ca' na' beṇə' golə blao ca' chəsə'anabia' Izraelən', gwse'e lega'aque': —Neto' bach bzoto' jorament gon Diozən' neto' castigw šə ye'ej šə gaoto' mientrzə cui gotto' Pabən'.

¹⁵ Na' na'a ža, le'e yedopə legon jont par nič le'e len beṇə' lježjle ca' ənabele beṇə' gwnabia' che soldad ca' cueje'ene' gwxe par yide' laolen' na' con gwde'itezele de que par əšaš əche'enəchle šə bi de'e xiṇjən' none'enə'. Na' neto' cue'enaoto'one' tnezən' par gotto'one' antslə ze'e le'e gan' ža'alen'.

¹⁶ Pero na' zo to bi'i byo che beṇə' zan Pabən', na' benebo' ca' nauqən' bazjəngüie' so'one'. Nach gwyejbo' cuartelən' par jəzenebo' Pabən'.

¹⁷ Nach Pabən' goxe' to capitannə' na' gože'ene': —Gwče' bi'i nga lao beṇə' gwnabia' che soldadən'. De to de'e ye'ebə' le'.

¹⁸ Nach capitanna' gwče'e bi'inə' lao beṇə' gwnabia' che soldadən' na' catə' besə'əžine'enə' gože' beṇə' gwnabia'anə': —Ca nauqə Pabən' ben' de pres goxe' nada' na' gwṇabe' goclen laogua'anə' par nič zedəgua'a bi'i nga laogo' nga. De to chopə dižə' güe'elembə' le'.

¹⁹ Nach beṇə' gwnabia' che soldad ca' bexe'e na' bi'in' na' gwče'ebə' ga cui nonə' bene, nach gože'ebə': —žBin' de ənao' nada'?

²⁰ Nach bi'inə' gožbo' le': —Ca nauqə beṇə' blao che beṇə' Izrael ca' bach boso'oxi'e yedəšə'anabene' le' cuejo' Pabən' gwxe par əselə'one' gan' chəsə'ədopə beṇə' gwnabia' ca', na' con yoso'ode'ine' yesə'əne' de que yoso'ošaš yoso'oče'ene' šə bitequən' none'.

²¹ Pero bito šejli'o chega'aque' chedə' mazlə čhoa beṇə' ca' banaquan yesə'əbe'enaə le' tnezən' par so'ote'ene' con šə babnežjw cho'a xtižo' əselə'one', na' beṇə' ca' baboso'ozoe' jorament gon Diozən' lega'aque' castigw šə se'ej šə sa'ogüe' mientrzə cuiṇə' so'ote'ene'.

²² Nach beṇə' gwnabia' che soldad ca' bose'e bi'inə' na' gože'ebo': —Cuidad no güe'eleno' diža' ca naquə rsonṇə' de'en babedəgo'o laogua' nga.

Boso'osele'e Pabən' lao gobernadorən' ben' le Fels

²³ Nach beṇə' gwnabia' che soldad ca' goxe' chopə capitan che' ca' na' gože' lega'aque' de que cheda ga še'ela yesə'anite'e probnid len chopə gueyoa soldad beṇə' əsa'ac nia'aze' na' gyon ši beṇə' yesə'əbia' cabey nach yechopə gueyoaga'aque' əso'o'xe'e lanz par əžja'aque' Sesarean'.

²⁴ Na' lecəə gože' lega'aque' yesə'əyile' cabey bia cuiā Pabən', niç ca' cui bi gaquə che' lao zjso'ene' lao gobernadorən' ben' le Fels.

²⁵ Nach bzoje' to cart de'e əbgoxe'e lega'aque' par gobernadorən' na' nan:

²⁶ “Señor Gobernador:

Nada' Claudio Lisias chzoja' le' gobernador Felix, əchguapa' le' diox.

²⁷ Ca naquə beṇə' Izrael ca' gosə'əzene' bengā na' bazjəngüie' so'ote'ene' ža'aque' gwyā'a na' gwchi'a soldad chia' ca' par jəyesla'ane' chedə' gwnezdə' de que naque' beṇə' nasyon Roma.

²⁸ Na' de'en go'onda' ənezda' bi porən' choso'ocuiše'ene' joa'ane' lao beṇə' gwnabia' chega'aque' ca' gan' chəsə'ədobe'.

²⁹ Nach gwnezdə' de que choso'ocuiše' le' por ni che bizə fałt che' len lei chega'aque'ena', pero bito ənacho bi de'e mal none' par so'ote'ene' o gate'e ližyan'.

³⁰ Nach na'a babla' rson laogua'anə' de que beṇə' Izrael ca' baboso'oxi'e yesə'əbe'enaogüe'ene' par so'ote'ene' na' de'e na'anə' əchseła'ane' laogo'onə' lgüegwə. Na' habena' mendad len beṇə' ca' choso'ocuiš le' da'aque' laogo'onə' par yesə'əne' le' šə bin' chsa'ac chega'aque' len le'. Si'ixenšgo' che yoguə'əłol de'en chneyoišgüida' le'.

Claudio Lisias.”

³¹ Nach soldad ca' besyə'əbeje' Pabən' can' ben beṇə' gwnabian' mendad. Na' bedo yel gosə'əgüe'e nezən' len le' besə'əžinte' gan' nzi' Antipatris.

³² Nach gwy'e'eni'inə' besyə'əbi'i soldad ca' ja'ac con ni'ei jəya'aque' cuartelən', na' porzə beṇə' güiab ca' ja'aclene' Pabən'.

³³ Catə' besə'əžine' Sesarean' boso'onežjue' gobernadorən' cartən' zjəno'xe'ena' nach gwso'one' Pabən' lao ne'e.

³⁴ Na' beyož blab gobernadorən' cartən' gwṇabene' Pabən' ga be'ena'. Gotə'əbia' de que Pabən' naque' beṇə' Tarso gan' mbane Silisia.

³⁵ Nach gože'ene': —Na' ənezda' šə bi'in ənao' catə' la'ac beṇə' ca' choso'ocuiš le'.

Nach bene' mendad boso'oseyjue' Pabən' lo'o yo'o gan' chbe' Rei Erodən' catə'an chone' yelə' jostisan'.

24

Pabən' be'e diža' lao gobernadorən' ben' le Fels

¹ Na' cats' baçh goc gueya' ža zo Pabən' Sesarean', nach bžin be'en naquəch bxož əblao ben' le Ananias na' nche'e to chopə beṇə' golə beṇə' blao na' len to beṇə' le Tertolo beṇə' chac cho'e diža' lao' lcue'. Nach gwsa'ogüe' xya contr Pabən' lao gobernadorən'.

² Nach gobernadorən' bene' mendad gwyej Pabən' laogüe'ena' na' Tertolon' gwzolaogüe' hcuiše'ene', che'e gobernadorən': —Si'ixenšgo' Señor Gobernador ca naquə za'ato' laogo' nga ža, la' de'en zocho binlo juisy naquən por le' na' de'e zan de'e güen de'e bachac por ni che can' chnabi'o neto'.

³ Na' gatə'ətezə zoto' syempr nato' choxcwleno'onə' Señor Gobernador, tant chebeito' can' chnabi'o neto'.

⁴ Na' par niç cui gonšgüeito' le' zedte, chatə'əyoišgüida' le' əgwzenago' šlož dao' ca naquə nga ənato'.

⁵ Ca naquə bengā zo laogo' nga par gono' yelə' jostis che'ena', baçh nezeto' de que naque' to beṇə' güec de'e zed juisy. Na' chde' entr neto' beṇə' Izrael ža'ato' doxenla yežlyon' chta chne' neto' par niç gaquəto' choplə, la' naque' beṇə' blao che beṇə' ca' zjənzi' beṇə' Nasaret por ni che de'en chəsə'ənaogüe' de'en əbsd əblo'i de'e beṇə' Nasaretan' gwle Jeso'os.

⁶ Na' de'e mal juisy ngüie' gone' len yo'odao' əblao cheto'onə' de'en gone'ene' gwže'e beṇə' cui zjanaquə beṇə' Izrael lo'inə'. De'e na'anə' gwxento'one', na' gone'eto' gonto' yelə' jostis che' segon can' na lei cheto'onə'.

⁷ Pero na' gwyaz Lisias ben' naquə beṇə' gwnabia' che soldad ca', na' la fuers beque'ene' lao na'ato'onə'.

⁸ Na' bene' mendad de que notə'ətezəto' chene'eto' əgwcuisto'one' cheyalə' əgwcuisto'one' laogo' nga. Guac ənabdo' Pabən' bin' goquə par niç ənezdo' che de'e ca' hcuišto'one'.

⁹ Nach beṇə' Izrael ca' nžague'ena' gwsa'aque' tozə gosə'əne' de que le can' naquən.

¹⁰ Nach gubernadorən' bene' seŋy len Pabən' par niç əne'. Nach gwzolaogüe' gwne': —Ca naquə nəzda' de que baç goc zan iz chono' yelə' jostis çe nasyon nga, de'e na'anə' ža chebeida' gwzo rson chia'anə' laogo'onə'.

¹¹ Na'a chac šižin žazə gwyə'a Jerosalennə' par əje'elaogua'a Diozən'. Na' gwaquə ənaba'acdo'one' šə le can'.

¹² Na' bito ənacho chayoža' no beŋə' lo'o yo'odao' əblaonə' na' bitonə' yesə'əle'ine' nada' ša'a do lo'o yo'odao' ca' yelə' par žjəta žjənia' beŋə', na' nic lao' syodan'.

¹³ Na' bito bi de so'on beŋə' quinga par yesə'əlo'e de que napa' dolə' can' choso'ocuiše' nada'.

¹⁴ Con nia' le' clar de que cho'elaogua'a Dioz ben' gwso'elao' de'e xaxta'oto' ca', na' naogua' costombr cobə par cho'elaogua'ane' de'en chəsə'əna zan beŋə' gwlaž chia' ca' zjənaquə costombr mal. Pero bito zjənaquən costombr mal, la' chejli'a çe yogua' libr ca' gan' zjənyoj Xtižə' Diozən' de'en bzoj de'e Moizezən' na' yeziqə'əchlə beŋə' gwso'e xtiže'ena' cana'.

¹⁵ Na' zoa' lez de que Diozən' yolis yosbane' beŋə' guat ca'. Yolis yosbane' beŋə' güen na' beŋə' mal, ca'aczən' beŋə' gwlaž chia' ca' nite'e lez gone'.

¹⁶ Na' zotezə zoa' chi' yichja' chona' can' chene'e Diozən' par niç nəzda' lo'o yichjla'aždaogua'anə' de que bito napa' dolə' lao Diozən' na' nic lao beŋə'can'.

¹⁷ Bagoc zan iz zoa' zita', pero ŋa'a ža babeyeda' Jerosalennə' par bnežjua' mech de'en btoba' par beŋə' yašə' ca' chəsə'əyazj chəsə'əchine' na' jua'a de'e jua'a lo'o yo'odao' əblaonə'.

¹⁸ Na' goquən' zoa' lo'o yo'odao' əblaonə' babexi' beyacha' can' na' lei de'en bzoj de'e Moizezən', na' chnežjua' de'e ca' chnežjua' par Diozən'. Ca' chona' cata' to çopə beŋə' Izrael za'ac Asian' bla'aque' gan' zoa'anə'. Bito ənacho nochlə ntopa' na' bitobi scandl chona'.

¹⁹ Na' lega'auen' žala' bda'aque' laogo' nga par yoso'ocuiše' nada' šə bin' chsa'ac çhega'aque' len nada'.

²⁰ O beŋə' quinga nita' nga guac yesə'əne' šə bi de'e malən' nona' cata'əna' bos'o'odie' nda' lao beŋə' gwnabia' çhega'aque' ca'.

²¹ Tozə de'en gwnia' laoga'aque'en, cata'ən gožəga'aca'ane': "Ca naquə nga chonle yelə' jostis chia'anə', chonlen chedə' chejli'a de que gwžin ža yesyə'əban beŋə' guat ca'."

²² Cata' bene gubernador Felsən' gwna Pabən' ca', bitoch gone'ene' gone' yelə' jostis çe Pabən' ca oran', chedə' la' banezczene' çe de'en chejle'e chio'o chonlilažə'əcho Jesocristən'. De'e na'anə' par gwcho'one' çhega'auen' šša gože' lega'aque': —Cata' yidə Lisiasən' ben' naquə beŋə' gwnabia' çe soldad ca', cana' yeyož gwzenaga' ca naquə de'e nga chaole xya nga.

²³ Nach Felsən' bene' mendad len to capitan çe' par beçhe'e Pabən' gaquəche' pres na' gatə' lsens par gone' bitə'ətezə chene'ene' na' gwaquə žjəsə'əlanə' beŋə' migw çe' ca' le' par əso'ene' šə bi de'e chyažjene'.

²⁴ Goc to çopə ža beza' gubernador Felsən' Sesarean' cata' bezžine' len no'ol çe'enə'. Naquə' no'olə Izrael na' le' Drosila. Na' gox Felsən' Pabən' na' bzenague' be' Pabən' dižə' can' cheyałə' gonlilažə'əcho Jesocristən'.

²⁵ Nach Pabən' be'elene' le' dižə' can' cheyałə' goncho par gaccho beŋə' güen lao Diozən' na' can' bito cheyałə' güe'echo latjə nabia' la'azda'omalchon' chio'o, na' can' əžin ža cata' Diozən' çhoglaogüe'en çe to to chio'o beŋə'can' šə nocho napcho dolə'. Na' gubernador Felsən' bžebe' xte juisy ca naquə dižə' de'en choe' Pabən'. Nach gože'ene': —To ca'atə'ətə' gwzenaga' ŋa'a. Guaxcza' le' cata' gata' de' len latjə chia'.

²⁶ Gubernadorən' goquene' cueze' par niç Pabən' əgwnežjue'ene' mech par yosane' le', na' de'e na'anə' goxe'ene' telizə be'elene' le' dižə'.

²⁷ Ca' chac gwde çop iz, na' le'e bžine tyemp gwde ben' le Porsio Festo goque' gubernador. Na' de'en gone'e Felsən' yega'əne' binlə len beŋə' Izrael ca' cata' cuich naque' gubernadorən', de'e na'anə' ze'e yechoje' bene' mendad ze'e deczə Pabən' pres.

25

Pabən' chzo rson çe' lao gubernadorən' ben' le' Festo

¹ Na' cata' bžin Feston' Sesarean' gan' ŋabi'e, gwzoe' šonə ža na' gwze'e gwyeye' Jerosalennə'.

² Nach bžox əblao ca' na' nochlə beŋə' blao çe beŋə' Izrael ca' ja'aque' jesə'əye'ene' par bos'o'ocuiše' Pabən'.

³ Na' gwsa'atə'əyoine' Feston' gone' goclen gaquə can' chəsə'ənabe', gonšgue' mendad əžso'e Pabən' Jerosalennə'. Gwsa'atə'əyoine' le' gone' ca' par niç lega'aque' yesə'əbe'enaogüe' Pabən' par so'ote'ene' tnezən'.

⁴⁻⁵ Nach Feston' gože' lega'aque' de que Pabən' naque' segor Sesarean' na' leczə gože' lega'aque': —Nada' bito yega'əna' Jerosalennə' sino le'e cheza'atia'. Beŋə' ca' zjənaquə blao

entr le'e gwaquə əsa'aque' len nada', na' šə bi de'e xiŋjən' non be'enə', gwaquə yoso'ocuiše' le' Sesarean' gan' chona' yelə' jostisən'.

⁶ Na' gwzoe' len lega'aque' ca do xon' o ši ža na' beyeje' Sesarean'. Nach beteyo gwchi'e gan' chone' yelə' jostisən' na' bene' mendad gwyej Paban' laogüe'enə'.

⁷ Nach catə' bžin Pabən' laogüe'enə' banitə' beŋə' Izrael ca' za'ac Jerosalennə' na' le'e gwse'ečhjte' le' na' gosə'əzolaogüe' chosə'əcuiše'ene' chəsə'əne' de que de'e zan de'e mal juisy de'e chone', pero na' bito bla'alaon šə chso'e dižə' lin'.

⁸ Nach Pabən' bzo rson che'enə' gwne': —Ni tozə' falt cuiŋə' gapa' len lei che neto' beŋə' Izrael, na' ni len yo'odao' əblao cheto'onə' na' nic len Rei Sesar ben' chnabia' doxen nasyon Roman'.

⁹ Nach Feston' ca naquə gone'ene' soe' binlo len beŋə' Izrael ca' gože' Pabən': —ġEgüe'endo' sa'o nič gona' yelə' jostis chio'onə' Jerosalennə' ca naquə yoguə' de'e quinga choso'ocuiš beŋə' quinga le'?

¹⁰ Nach Pabən' gwne': —Laogo' len' zecha', banzo Rei Sesarən' le' par gono' yelə' jostis, na' nga cheyałə' gaquə yelə' jostis chia'anə'. Ca naquə beŋə' Izrael quinga, le' nezcədo' de que bito bi bi ne'e gona' contr lega'aque'.

¹¹ Žala' bi falt bagwdapa' o bichlə de'e babena' de'e cheyałə' gata', bito nia' cui gata'. Pero de'en cui bi bi nona' ca naquə de'en choso'ocuiš beŋə' quingan' nada', notono no zaquə' əgwde nada' laoga'aque'enə'. Na' na'a chŋaba' tia' lao Rei Sesarən' nič cuine' gone' yelə' jostis chia'anə'.

¹² Nach Feston' len beŋə' gwnabia' che' ca' yelə' boso'oxi'e naquən' so'one', nach gože' Pabən': —Lao Rei Sesar na'anə' bagwŋabo' tio', na' laogüe' na'anə' šejo'.

Feston' bdi'e Pabən' lao Rei Agripan'

¹³ Na' ca' chac gwde to čhopə ža catə' Rei Agripa na' no'ol che' Berenise bla'aque' Sesarean' par bedəsə'əguape' Feston' diox.

¹⁴ Na' gwnite'e zan ža, na' be'elen Feston' Rei Agripan' dižə' ca naquən' chac len Pabən', gože'ene': —Zo to beŋə' nyixjw Felsən' pres nga.

¹⁵ Na' catə' gwya'a Jerosalennə' bxož əblao ca' na' len nochlə beŋə' golə beŋə' blao che nasyon Izraelən' gosə'əŋabe' čhoglaogua'an che' de que nape' dolə'.

¹⁶ Pero na' gožaga'aca'ane' ca naquə costombr che chio'o beŋə' nasyon Roma bito gaquə gwdecho beŋə' sa'aque' castigw sin cui yesyə'ədillaogüe' beŋə' ca' choso'ocuiš lega'aque' na' gata' latjə yoso'ozo rson chega'aque' ca naquə de'en choso'ocuiše'ene'.

¹⁷ Na' catə' bla'aque' nga beteyo le'e gwche'etia' gan' chona' yelə' jostisən', nach bena' mendad gosə'əbeje' Pabən'.

¹⁸ Na' beyož boso'ocuiš beŋə' ca' le', ni tozə' de'en chacda' choso'osbague'ene' le' cui bi gosə'əne'.

¹⁹ De'en chaczə chega'aque' len le', cui chejŋi'alažə' Pabən' can' chse'ejŋi'alažə' lega'aque' na' chso'e dižə' che to de'e beŋə' guat beŋə' gwle Jeso'os, na' Pabən' ne' de que mbancze'.

²⁰ Na' nada' ža, cui bežellaža'a bi gona' ca de'en chac chega'aque', nach goža' Pabən' šə chene'ene' yeza'alene' nada' Jerosalennə' par nič gaquə yelə' jostis che'enə' ca naquə de'e ca' choso'osbague'ene' le'.

²¹ Per na' gwŋab Pabən' šeje' gaquə yelə' jostis che'enə' lao Rei Sesarən'. Nach bena' mendad beyejue' mientr gwdi'ane' lao Rei Sesarən'.

²² Nach Rei Agripan' gože' Feston': —Łeczə che'enda' gwzenaga' can' choe' ben' dižə'əna'.

Nach che' Feston' le': —Gwxə əgwzenago'.

²³ Nach beteyon' de'e juisy chacchgua besə'əžin Rei Agripan' na' len Berenise, nach gwso'e gan' chi' gubernadorən', na' łeczə žjəlen beŋə' gwnabia' che soldad ca' na' yeziquə'əchlə beŋə' blao che syodan'. Nach ben Feston' mendad jesə'əxi'e Pabən'.

²⁴ Nach Feston' gwne': —Rei Agripa na' yoguə'əloł le'e ža'ale nga len neto', ca naquə bengə chgüiale nga, beŋə' zan beŋə' Izrael ca' ža' Jerosalennə' na' beŋə' ca' ža' nga bagosə'əne' nada' de que beŋə' mal bengə, chəsə'əŋabe' de que cabich cheyałə' əban bengə yežlyon'.

²⁵ Pero na' chgüia' nada' de que bito bi bi none' par čhoglaogua'an gate', na' bagwŋabe' tie' lao Rei Sesarən' na' bach goža'ane' šeje'ene'.

²⁶ Pero na' cui de bixa de'e gwzoja' rein' par yapa'ane' bin' none'. De'e na'anə' bach gwleja'ane' laole nga, na' catec naco' le' Rei Agripa, par nič na' yeyož əgwzenagcho che' na' gata' de'e gwzoja'.

²⁷ La' chacda' bito bi rson napa' con əgwselə'a to pres sin cui gwzoja' šə de bi de'en none'.

26

Pabən' bzoe' rson che' lao Rei Agripan'

¹ Nach Rei Agripan' gože' Pabən': —Gwaquə ŋio' par əgwzo' rson chio'onə'.

Nach Pabən' bze ne'en lao beṇə' ca' gwzolaogüe' bzo rson che'enə' gwne':

² —De'e mba juisy nga bagoc chia', Rei Agripa, ca naquə nga de to latjə na'a gwzo rson chia'anə' laogo' nga ca naquə de'en choso'ocuiš beṇə' Izrael gwlaž checho ca' nada'.

³ Le' nezdə' ca naquə costombr che chio'o beṇə' Izrael, na' ca naquə beṇə' gwlaž checho ca' chsa'acyože' entr lega'acze'. De'e na'anə' ža chatə'əyoišgüida' le' par gapəšgo' yelə' chxenlažə' əgwzenago' chia'.

Pabən' be'e dižə' can' bene' catə' cuinə' gonlilaže'e Jesocrisṭən'

⁴ Yogua'əlol beṇə' Izrael gwlaž checho ca' zjənezczene' nac gwzoa' dezd gwzolaogüego'otia', gwzoa' Jerosalenna' entr lega'aque'.

⁵ Na' zjənezczene' de que nada' dezd bgüego'otia' naca' beṇə' fariseo, na' neto' beṇə' fariseo naochto' yogua'əlol costombr de'en de ca naquən' chejni'alažə'əcho Diozən' mazachlə ca nota'ətezəchlə beṇə' Izrael.

⁶ Na' beṇə' gwlaž checho ca' bachəšə'əṇabe' gono' yelə' jostis chia' laogüe de'en chejli'a de que gwžin ža catə' Diozən' yosbane' beṇə' guat ca' can' bene' lyebe len de'e xaxta'ocho ca'.

⁷ Beṇə' zan lao šižin family che chio'o beṇə' Izrael nite'e chso'elaogüe'e Diozən' do yichj do lažə'əga'aque' na' do ža do yel nite'e lez gaquə complir ca naquə lyeben'. Na' ni che de'en zoa' lez yosban Diozən' beṇə' guat ca', de'e na'anə' choso'ocuiš beṇə' Izrael ca' nada' Rei Agripa.

⁸ Žbixchexan' chaque le'e caguə de'e no šejle'enə' de que Diozən' cholis chosbane' beṇə' guat ca'?

Antslə Pabən' blagzejə' blagzide' beṇə' ca' chso'onlilažə' Jesocrisṭən'

⁹ Antslə nada' godca' de'e cheyalə' gona'an benteca' contr beṇə' ca' chso'onlilažə' Jeso'os ben' naquə beṇə' Nasaret.

¹⁰ Beṇə' zan beṇə' Jerosalen ca' bagwlej Diozən' par zjənaque' lažə' ne'enə' bseyjua' ližya segon can' na yiš de'en beṇə'a de'en gwso'on bxož checho ca' beṇə' ca' zjənaquə beṇə' blao. Na' catə' bxož əblao ca' gosə'əchoglaogüe'en so'ote' beṇə' ca' chso'onlilažə' Jesocrisṭən' lena' bda' cho'a xtižə'a.

¹¹ Na' de'e zan las gwyə'a to to yo'oda' jəsaquə'əzi'iga'aca'ane' par ničh yoso'ožia yoso'onite'e Jesocrisṭən'. Na' de'e tanttec bgue'iga'acda'ane' gwyə'a blagzejə' blagzida'aca'ane' syoda che nasyon ca' yelə'.

Pabən' be'e dižə' can' goquə bembie Jesocrisṭən'

¹² Na' lecəə güen de'e na' əzya'a Damascon'. Noxa'a yiš de'en gwso'on bxož checho ca' beṇə' ca' zjənaquə beṇə' blao de'en chon mendad gona' ca'.

¹³ Pero na' lao əzya'a ngua'a nezən' ca do gobiz catə'əczla ble'ida' to be'eni' juisy de'e za' le'e yoban' xte bnitlaon be'eni' che bgüžən' na' to gwyechjžən nada' len beṇə' ca' žaga'anə'.

¹⁴ Na' xte bgüixəə yogua'əto' lao yon'. Ca' deto' lao yon' catə' benda' to beṇə' chņe' dižə' ebreo gwne': "Saul, žbixchen' nlagzejə' nlagzido' nada'? De'en chono' contr nada' chone zi' cuino' can' chac che to go'on bian' chlibə' lao ya la de'en zo lao garrošən'."

¹⁵ Nach bolgüizə'ane' chapa'ane': "ŽNo le' Señor?" Nach gwna Xancho Jeso'osən': "Nada' Jeso'osən' nlagzejə' nlagzido'."

¹⁶ Pero na'a beyas la' bach bloe' laogua' le' par ničh gono' xšina'anə' na' go'o dižə' che yogua'əlol de'e quinga bach ble'ido', na' yeziquə'əchlə de'e ze'e le'ichdo' catə' yozloe' laogua' le'.

¹⁷ Na' na'a əselə'a le' gan' ža' beṇə' ca' cui zjənaquə beṇə' Izrael na' bito gua'a latjə no got le', ni beṇə' Izrael na' nic beṇə' ca' cui zjənaquə beṇə' Izrael.

¹⁸ Eselə'a le' par ničh əgwzejni'ido' lega'aque' nac so'one' par ničh šo'o be'eni' chia'anə' lo'o yichjla'azda'oga'aque'ena' na' yesə'əbejyichje' de'e malən'. Na' yesyə'əchoje' xni'a gwxiye'ena' na' yoso'ozenague' che Diozən' na' nitlao xtolə'əga'aque'ena', na' əsa'aque' t xen len yogua'əlol beṇə' ca' yelə' bagwlej Diozən' par zjənaque' lažə' ne'enə' por ni che de'en chso'onlilažə'e nada'."

Pabən' bzenague' can' gož Jesocrisṭən' le'

¹⁹ Na'a ža Señor Rei, bzenaga' ca naquə de'en bzejni' Jeso'osən' nada' len de'en ble'idaogüe'eda'.

²⁰ Zgua'atec Damasco na' gwzolaogua' bzejni'ida' beṇə' ca' ža'anə' che Jesocrisṭən', na' lecəə ca' Jerosalenna' na' doxen gan' mbane Jodean'. Na' lente beṇə' ca' cui zjənaquə beṇə' Izrael gwdixjue'iga'acda'ane' de que cheyalə' yesyə'ədinjene' xtolə'əga'aque'ena' na' yoso'ozenague' che Diozən', na' so'one' ca gachia' de que babesyə'ədinjene' xtolə'əga'aque'ena'.

²¹ Na' por ni che de'en chzejni'ida' beṇə', de'e na'anə' beṇə' Izrael gwlaž checho ca' gosə'əzene' nada' lo'o yo'oda' əblao chechon' na' gwsa'aclaže'e so'ote' nada'.

²² Pero na' Diozən' zocze' chaclene' nada' par ničh zocza' cho'a xtiže'ena' xte ža neža len yogua'əlol beṇə', la'anə' bi'i xcuidə' na' la'anə' beṇə' golə. Bito nacho bilə bagwnia' sino ca

de'en gosə'ənacəə de'e profet ca' beṇə' ca' gwso'e xtižə' Diozən' cana', na' can' gwna de'e Moizezan' che de'en za' gaquə ca tyemp chega'aque'ena'.

²³ Gwso'e dižə' de que Cristən' ben' seļə' Diozən' par gaqualene' ṇasyon chechon' cheyalə' saquə'əzi'e na' le' gague' beṇə' nech yebane' ladjo beṇə' guat ca' na' cuič gate'. Na' lecəə gwso'e dižə' de que Cristən' gwzenene' chio'o naccho beṇə' Izrael na' len beṇə' ca' cui zjənaquə beṇə' Izrael naquən' goncho par nič šo'o be'eni' che Diozən' lo'o yichjla' ažda' ochon'.

Pabən' gone'ene' gone' par nič Rei Agripan' gonlilaže'e Jesocristan'

²⁴ Na' ca' cho'e dižə'əna' par chzo rson che'ena' catə'əczla gwne Feston' zizjo gože'ene': — Chac tonton' Pab. De'e tanttec chsedo' na'ana' bačh chac tonto'.

²⁵ Nach Pabən' gože' Feston': — Bito chac tonta' Señor Gobernador. Dižə' lin' cho'a na' de'e vejni'ana'.

²⁶ Ca naquə Rei Agripa nga, ṇezene' che de'e quinga cho'a dižə' chei na' de'e na'ana' cho'a dižə'an clar laoguē' nga. Zoa' segor cabi nacho cui ṇezene' che' de'e ca', la' caguə goquə de'e ca' do gazə zo bižə' de'e ngašə'əna'.

²⁷ Le' Rei Agripa, əchejli'o ca naquən' bosozoj de'e profet ca' beṇə' ca' gwso'e xtižə' Diozən' cana'? Nada' nežda' de que chejli'o.

²⁸ Nach Rei Agripan' gože' Pabən': — Əchacdo' len to čopə bi'in bagwna'ona' gonlilažə'ətia' Jesocristan'?

²⁹ Nach Pabən' gože'ene': — Chona' orasyon lao Diozən' de que šə to čopə dižə' o šə zan dižə' de'e bagwnia' le', le' na' yoguə'əlo' beṇə' ca' choso'ozenag can' ənia' nga so'onlilaže'e Jesocristan' can' chonlilaža'ane', pero sin cui gacle pres ca nada' nga ncheja' naca' pres.

³⁰ Na' beyoz gwna Pabən' ca' bezoža' Rei Agripan' len no'ol che' Berenisen' na' len gobernador Feston' na' beṇə' ca' gosə'əbe' len lega'aque'.

³¹ Nach bežaše' jəsyə'ədobə' ga yoblə nach gwse'e ljuežje': — Bito ənacho bi chon benga de'e zakuə' gate' o gate'e ližya.

³² Nach Rei Agripan' gože' Feston': — Guaquə yezan benga žalə' cuiṇə' ṇabe' tie' lao Rei Sesarən' par gone' yelə' jostis che'ena'.

27

Boso'osele'e Pabən' Roman'

¹ Nach bosoxi'e yoso'osele'e neto' Italian' tiao nis. Na' Pabən' len yeto čopə pres ca' gwsa'aque' lao na' to capitan beṇə' le Jolio. Naque' capitan che zan soldad che rein' beṇə' zjənzi'e "Batallon Augusto". Na' nada' Locas zoa' len Pabən'.

² Nach gwyo'oto' to lo'o barcw de'e za' Adramitio par əžinən Asia. Na' za'alēn Aristarcon' neto'. Naque' beṇə' syoda Tesalonica de'en chi' gan' mbane Masedonian'.

³ Beteyo bžinto' Sidonə' na' Jolion' bencez' gūen len Pabən' be'e latjə par gwyeye' gan' ža' beṇə' migw che' ca' par bosonežjue'ene' bi de'en byažjene'.

⁴ Na' gozsa'ato'ona' na' zdato' to lcu'e'ej latə' yežlyo de'e nga'an lo'o nisdə'ona' de'en nzi' Čhipre, čedə' be'ena' chečjən clelə, na' yežlyo na'ana' bcue'ejən neto' len be'ena'.

⁵ Na' beyoz gwdeto' lao nisdə'o de'en de cho'i gan' zjəmbane distrit ca' de'en zjənzi' Silisia na' Panfilia nach bžinto' syoda gan' nzi' Mira de'en chi' gan' mbane distrit che Lisia.

⁶ Na' na' bžele capitannə' to barcw de'en za' syoda Alejandria na' chza'an šejən Italian', na' bene' mendad gwyo'oto' lo'ina' na' lenczə le'.

⁷ Nach gwza'ato' zdato' lao nisan' de'e yoblə. Zan ža zdato' šo'olažə' na' do caṇe gwdeto' galə'əzə gan' ne' Gnido. Na' por ni che can' gwyechj be'ena' de'e na'ana' cui be'en latjə šejto' licha na' de'e na'ana' gwcua'ato' zdato' to lcu'e'ej yelatə' yežlyo de'e nga'an lo'o nisdə'ona' de'en nzi' Creta, part de'en zo galə'əzə syodan' de'en nzi' Salmon, la' na' cuiotec gwyechj be'ena' fuert.

⁸ Na' zdato' do caṇe to lcu'e'ejən' na' bžinto' ganə' nzi' Buenos Puertos galə'əzə yež de'en nzi' Lasea.

⁹ Na' gocze gwde zan ža zdato' na' bačh chonən zdebə par šejəchto' lao nisan' čedə' bačh bžin tyemp catə' chečjchgua be' zaguən'.

¹⁰ Na' Pabən' gwṇeyoine' beṇə' ca' che'e lega'aque': — Čgüia' de que ca naquə biaj nga naquən lechguale zdebə na' nxož caguəgazə cuiayi' de'en noa' barcon' sino lenczə len na' len yelə' mban checho šə šejəchcho.

¹¹ Pero na' capitan che soldad ca' bzenaguəche' che ben' nsa' barcon' na' che xan barcon' cle ca che de'en gož Pabən' lega'aque'.

¹² Na' latjə gan' zoto' bito naquən par əgwdeto' tyemp zaguən', na' gwyən beṇə' ca' gwsa'aque'ne' šə gaquə gūenč sa'ato' na' əžinto' yež gan' ne' Fenise par nič na' zoto' te de'e zaguən'. Fenisen' naquən puert che Creta gan' cuiotec chečj be' de'en za' la'alə na' che'elə.

Gwyechj to be' gual lao nisdə'ona'

¹³ Na' gwzolaog chechj to be' gol de'e za'ate che'ela, nach beṇə' ca' choso'osa' barcon' gwsa'aque' de que guaquə can' chse'ene'ene', nach gozsa'ato' zdato' lao nisan', zdato' galə'əzə Cretan'.

¹⁴ Pero na' caguə gwža cata' za' to be' gual de'e nzi' Noreste de'e chechjən contr galən' zda barcon'.

¹⁵ Na' bžigua'əxəxjən barcon', caguə bi goquəch gonto'. Na' gwlejyichjšazə cuinto' len barcon' nžigua'ən neto'.

¹⁶ Na' ca' zdato' to lcue'ej yežlyo dao' de'e nzi' Claudia de'e chi' lo'o nisdə'ona' gan' cuitec gwyechj be'ena'. Na' barcw cha'o gan' yo'oto'ona' nxobən to barcw dao', na' cane goc becueto'on lo'i de'e cha'ona'.

¹⁷ Na' ca beyož becueto' barcw da'ona' lo'i de'e cha'ona', na' bchejto' barcon' ryat par gwlo'oto' fuers chei. Na' laogüe de'e bžebto' gaguə'ato' gan' naquə yox, bletjto' lachə' de'en chon par ničh chza' barcon' ničh cuich bžigua'ətec be'ena' len. Na' zdato' lao nisan' con can' gwyej barcon'.

¹⁸ Pero na' bžaglaochguato' chedə' gwyechjchgua to be' gual juisy nach beteyo boso'ošaššaze' yoa' ca' nsa'anna' boso'ozale'en lo'o nisan'.

¹⁹ Na' ža gwyon žeinə' goclenga'acto'one' besšazəto' šinlaz barcon'.

²⁰ Na' zan ža bito bolo'e lao bgüžən' na' še'elən' ni que zjənla'azə beljw ca'. Na' de'e tant gwyechjchgua be'ena' xte bitoch gwzoto' lez yelato'.

²¹ Na' goquan' bačh gwža cui chaoto', nach Pabən' gwzože'e ladjo beṇə' ca' na' gwne': —Le'e beṇə', žala' əbzenagle chia' cata'ən gnwia' cui sa'acho Cretan' bito chac checho quinga žala' ca' na' bito gwžiyai' šinlazchon'.

²² Pero na' chnia' le'e le'e yebei chedə' ni to le'e cui cuiayi' yelə' mban chelen', lete barcw nga cuiayi'in.

²³ Na' ca naquə cho'elaogua'a Diozən' na' baben cuina' lažə' ne'ena', de'e na'ana' bablo'e lao angl che'ena' nada' neže', na' anglən' gwne' nada'.

²⁴ "Bito žebo' Pab. Syempr cheyalə'əczə tio' lao Rei Sesarən', na' əchnia' le' de que Dioz na'ana' gone' par ničh ni to beṇə' ca' za'ac len le' cui sa'at."

²⁵ Na'a ža, le'e yebei, chedə' nezda' de que Diozən' gone' par ničh gaquə can' bagwna anglən' nada'.

²⁶ Pero bia'aczə yecho'onən chio'o yo biž de'e nga'an latə' lo'o nisan'.

²⁷ Na' že' goc žda'obiž zdato' nilə na'alə lao nisdə'o de'ena' nzi' Adria. Na' ca do chel beṇə' ca' zjənsa' barcon' gwsa'acbe'ine' de que bačh zdato' serczə to yo biž.

²⁸ Nach boso'oletje' to plom lo'o nisan' par boso'ochixə' ca do ja'aque'əta' zitjw naquə nisan', na' beyož boso'ochixə'enna' goquan š'i'intochoa metr. Nach gosə'əzdie' yelata' na' bosə'əzchixə'en de'e yoblə na' ca oran' goquan gažəchoa metr.

²⁹ Na' besə'əzebe' žjti'i barcon' yej lo'o nisan' nach boso'oletje' tap ya xen de'en ne' ancla, boso'ocheje'en zda xni'alei par gwso'oxə'ən barcon' na' bazjzelaže'e še'eni'.

³⁰ Nach beṇə' ca' zjənsa' barcon' gwsa'aclačže'e yesyə'əxonje' na' boso'oletje' barcw da'ona' con chosə'əde'itezene' yoso'oletje' ancla ca' de'en yoso'ocue' laolei.

³¹ Nach Pabən' gože' capitannə' na' len soład ca': —Šə beṇə' quinga cuich ni'te'e lo'i nga, ni tocho cui yelacho.

³² Nach soldad ca' gosə'əchogüe' don' zjənca'a barcw da'ona' na' boso'osane'en.

³³ Nach do šbaļ Pabən' gwzolaog gwneyoine' beṇə' ca' de que cheyalə' sa'ogüe', che'e lega'aque': —Na'a chac žda'obiž zole cui chtasle na' cui chaole.

³⁴ Na'a ža, chatə'əyoišguedia' le'e le'e gao par ničh sole binlo, la' de'e li ni tole cui cuiayi'ile.

³⁵ Na' beyož gwne' ca' bexe'e to yetxtilan' na' be'e yelə' choxcwlen che Diozən' lao yoguə'əloł neto' ža'ato' lo'o barcon' nach gwxi'e to pedasən gwzolaogüe' chaogüe'en.

³⁶ Nach yoguə'əlołto' bebeicheto' na' leczə gwdaoto'.

³⁷ Chopə gueyoa gyonši'intoto'ona' ža'ato' lo'o barcon'.

³⁸ Na' gwde gwdaoto' con ca beljəto' na' ca naquə trigon' de'e ne'e zjənsə'e, gwso'ose'en lo'o nisan' ničh barcon' cuich goctequan zi'i.

Goxj barcon'

³⁹ Na' cata' gwyeni' bito zjənombi'e yežlyon' gan' besə'əžine' pero na' choso'ogüe' de to latjə ga žia nisan' žizə na' bade to lašə' de'e naquə porzə yox. Nach gwsa'aque' tozə par ničh žjəche' barcon' lašə' lao yoxən'.

⁴⁰ Nach gosə'əchogüe' do che ancla ca' na' gosə'əbejyichjgga'aque'en lo'o nisan'. Nach boso'oseže' do de'en boso'ocheje' yag de'en chsa' barcon' liča na' boso'olise' lachə' de'en zo yichjen' par bžigua' be'ena' len, nach əzja'aque' cho'a nisan'.

⁴¹ Pero na' jəsə'adi'e ga chediļ nisdə'ona' len to de'e yoblə, na' jšo'o laogüen' lo'o yoxən' na' caguə goquəch tan. Na' nisan' gwzolaog bzojən xni'eina' de'e tant fuers nsa'an.

⁴² Nach gwsa'aclačə' soldad ca' so'ote' pres ca' niçh ni toe' cui yesyə'əxoe' lao nisən' na' yosyo'oxonje'.

⁴³ Pero na' capitannə' gone'ene' yosle' Pabən' na' bžone' ca' naquən' bachsa'aclačə' soldad ca' so'one', nach bene' mendad len pres ca' šə'noe' chac chxoā' lao nisən', gwaquə'lega'acteque' yesyə'əxite'e' lao nisən' na' yesyə'əchoje' yo biž.

⁴⁴ Na' bene' mendad de que beṇə' ca' cui chac yesə'əxoa' lao nisən' yoso'oçhine' no yagla' o bichlə' šinlaz barcon' par yesyə'əxoe' lao nisən'. Ca' gwsə'one' na' yogue'e' besə'əžine' binlə' yo bižən'.

28

De'en goc che Pabən' žlac zoe' Malta

¹ Na' catə' beyož bžin yoguə'əto' yo bižən' gwṇezeto' de que latjənə' nzi'in Malta na' naquən to yežlyo de'en nga'an latə' lo'o nisən'.

² Na' beṇə' ca' ža'ana' mbachgua gwsə'elaogüe'e' neto', bosə'oxene' to yi' xen na' gwsa'axe' yoguə'əlołto' gan' nite'enə' çhedə' bagwzolao yejon' na' chacchgua zag.

³ Nach Pabən' btobe' xonj xis na' lao chcue'en lao yi'inə' bechojczlə' to beł' bia benen lo'inə' na' gwdi'inəb ne'enə' xte' golə'əditəb.

⁴ Na' choso'ogüia beṇə' ca' nalə'ədit bełən' na' Pabən', nach gwse'e' ljuežje': —De'e' li benga naque' beṇə' güet beṇə'. Baçh bele' lao nisən' pero na' Diozən' bito cho'e' latjə'əbane'.

⁵ Nach bse'esə' ne'enə' lao yi'inə' niçh bexopə' bełən' na' bito bi goquene'.

⁶ Nach beṇə' ca' baçh çhasə'əbeze' bat solao gatə' Pabən' yi' o əbiçə'acle' to de repentzə' gate'. Na' ca' gosə'əbeze' sša' na' choso'ogüie' bito bi bi chaquene' nach gwsə'one' xbab yoblə' çhasə'əne' de que naque' to beṇə' cheyalə' šejni'alažə'əcho.

⁷ Beṇə' blao che doxen Maltan' le' Poblío na' de bien che' galə'əza, na' mbachgua be'elaogüe'e' neto' na' gwzoto' šonə' ža' len le'.

⁸ Na' goquan' xa' Poblion' de' cam chacšenene' yo'e' de'e' la' na' che'ine' yiž' chen. Nach Pabən' gwyo'e' gan' de'enə' na' beyož bene' orasyon gwçxoā' ne'enə' yichj' beṇə' güe'enə' na' beyone' le'.

⁹ Beyož bene' ca' yeziqə'əchlə' beṇə' ca' ža' latjən' beṇə' chsa'acšene' lecžə' bda'aque' na' beyone' lega'aque'.

¹⁰ Na' beṇə' ca' de'e' zan de'e' gwsə'one' çheto'. Na' catə' bžin ža' beza'ato', bosyo'ože'e' lo'o barcon' yoguə' de'e' ca' chyažjeto'.

Pabən' bžine' Roman'

¹¹ Bega'anto' Maltan' šon' bio' nach gwza'ato' zjəzdato' lao nisən' yo'oto' to lo'o barcw de'en za' Alejandria de'e' gwležə' latjən' mientr' gwde' de'e' zaguən'. Na' mben le'e' barcon' lgu'a' lsaquə' ca' zjənzi' Castor na' Polocs.

¹² Na' bžinto' gan' ne' Siracosa na' gwzoto' šonə' ža'.

¹³ Na' gozsa'ato' par bžinto' gan' ne' Regio. Na' na' bega'anto' tžə. Na' gwzolao cheçh' be' de'en za' che'elə, na' beteyo' bezžinto' ganə' nzi' Poteoli na' na' bechojto' lo'o barcon'.

¹⁴ Na' bežagto' beṇə' ljuežjto' ca' chso'onjilažə' Jesocrisən' Poteoli na' gosə'əṇabe' gwzoto' len lega'aque' to xman. Na' gwdenə' gwza' ni'ato' par zdato' Roman'.

¹⁵ Pero na' antslə' ze'e' žinto' Roman' gosə'əneze' beṇə' ljuežjto' ca' ža'ana' de que əžinto' na' bedasə'əleze' neto' latjə' gan' nzi' lao ya'a' che' Apio, na' gan' ne' šonə' Ranš. Na' catə' ble'i' Pabən' lega'aque', be'e' yelə' choçwlen' che' Diozən' na' bebeine' lo'o yichjla' ažda'ogüe'enə'.

¹⁶ Na' ca' bžinto' Roman' capitannə' bene' pres ca' yelə' lao na' beṇə' gwnabia' che' soldad ca', pero na' Pabən' gotə' lsens soe' ca'azə' na' gwzo to soldad gwdapə' le'.

Pabən' be'e' xtižə' Jesocrisən' Roman'

¹⁷ Na' goquan' beyon' ža' Pabən' goxe' beṇə' blao che' beṇə' Izrael ca' ža' Roman' na' catə' beyož besə'ədobe'enə' gože' lega'aque': —Beṇə' bišə', bito' naçho' bi' bena' contr' beṇə' gwlaž' checho' ca' o' contr' costombr' che' de'e' xaxta'ocho' ca'. Pero na' Jerosalen' na'ate' gwsə'one' nada' pres' lao na' beṇə' Roma' ca'.

¹⁸ Na' beṇə' ca' beyož gosə'əṇabyože' gwsa'aclačə'e' yoso'osane' nada' çhedə' cui' bi' bi' xtolə'a' de' par' ənaçho' gata'.

¹⁹ Pero na' beṇə' gwlaž' ca' ža' Jerosalennə' bosə'ožoncze' par yoso'osan' beṇə' ca' nada'. De'e' na'ana' benən' byen' gwṇaba' tia' lao Sesarən', pero bito' naçho' gua'a' part' beṇə' gwlaž' chia' ca'.

²⁰ Na' de'e' nin' chac' baçh' goxa' le'e' par' le'ida' le'e' na' par' güe'elena' le'e' dižə'. Na' çhnia' le'e' por' ni' che' de'en' zocho' lez' yesyə'əban' beṇə' guat' ca', bałə' beṇə' gwlaž' checho' ca' gosə'əzene' nada' na' bosə'oçheje' nada' gden' ni'.

²¹ Nach beṇə' ca' gwse'ene': —Bito bi bi cart ne'e la' laoto' nga de'e za' Jodean' de'e güe' dižə' šə bin' chac len le', na' notono no beṇə' gwlaž ne'e la'ac yesə'əne' mal čhio' o əsa'ogüe' xya contr le'.

²² Pero na' chaqueto' güenczən' yeneto' go'o dižə' ca' naquən' chono' xbabən', la' neto' nezeto' doxenlə čəsə'əne' contr le'e chejle'ele che Jesocrisən'.

²³ Na' bosə'ožie' bia' to ža par žjasə'əye' le' na' beṇə' zan zjənaque' ja'aque' gan' zo'enə'. Nach Pabən' be'e dižə' len lega'aque' can' chon Diozən' chnabi'e notə'ətezə beṇə' chso'e latjə. Na' bzejni'ine' lega'aque' can' na lei de'en bzoj de'e Moisezən' na' can' na de'en bosə'ozoj de'e profet ca' beṇə' ca' gwso'e xtižə' Diozən' cana' par ničh se'ejle'e che Jeso'osən'. Bedo ža be'e dižə'an len lega'aque'.

²⁴ Na' balə beṇə' ca' gwse'ejle'e ca' naquə dižə' de'en be'enə' na' yebale' cabi gwse'ejle'e.

²⁵ Na' ca' chac gwsa'aque' čhoplə, na' bazon yesa'aque' catə' gož Pabən' lega'aque': —De'e li can' gož Spirit che Diozən' de'e profet Isaiazən' ben' be' xtižə' Diozən' cana' gožən le' gwzoje'en par de'e xaxta'ocho ca', nan:

²⁶ Gwey' gož beṇə' gwlaž čhio' ca' de que Diozən' ne':

De'e li yenele pero cabi šejni'ile bin',

na' de'e li gwle'ile pero cabi gache'ile bi zejen.

²⁷ Cuiczə bi rson chazle.

Bač nažjoczə yichjla'ažda'olen' na' bito chzenagle dižə' lin',

bito chonle cas chei, na' nic chejni'ilen, na' ni que chedinjele xtolə'əle ca'.

Na' de'e na'anə' bito yebeja' le'e xni'a de'e malən'.

²⁸ Na' le'e cheyalə' ənezele de que na'a par delant Diozən' chsele'e beṇə' čəsə'əyixjui'e xtiže'enə' len beṇə' ca' cui zjənaquə beṇə' Izrael par ničh yoso'ozenague' che' na' yebeje' lega'aque' xni'a de'e malən'.

²⁹ Beyož gwna Pabən' ca' besyə'əžaš beṇə' Izrael ca' chsa'acyože' xte juisy.

³⁰ Pero na' Pabən' gwzoe' nya' čhop iz to yo'o ga chyixjue' na' gwzoczə' gwleze' yoguə'əlol beṇə' jasə'aləṇə' le'.

³¹ Na' sin cui chaž cui chžebe' na' sin cui no no əbseyjw əbžon gwdixjue'ine' lega'aque' ca' naquən' chnabia' Diozən' notə'ətezə beṇə' chso'e latjə, na' clar bsd blo'ine' lega'aque' xtižə' Xancho Jesocrisən'.

Cart De'en Bzoj San Pabən' Par Benə' Roma Ca'

Pabən' chguape' diox benə' ca' chso'elao' Cristən' Roman'

¹ Nada' Pab naca' benə' güen žin che Jesocristən'. Dioxən' gwleje' nada' par naca' apostol na' bsele'e nada' par nič əchyiɣjui'a de'e güen de'e cobə che'ena'.

² Ca ni'ite ben Dioxən' mendad boso'ozoj profet ca' Xtiže'ena' ca naquə lyebe de'en bene' de que əgwsele'e dižə' güen dižə' cobə che'ena'.

³ De'e güen de'e cobən' cho'en dižə' che Xi'in Dioxən', Xancho Jesocristən'. Jesocristən' golje' yežlyo nga lao dia che de'e Rei Dabin'.

⁴ Na' nezecho de que Jesocristən' leczə naque' doalje Xi'in Dioxən' chedə' bebane' ladjo benə' guat ca'. Na' de'en bebane'ena' nezecho de que nape' yelə' guac che Spirit che Dioxən'.

⁵ Chonlilaža'a Jesocristən' na' de'e na'ana' Dioxən' banoe' čhia' nłana' žin che apostol. Gwleje' nada' par chona' ca ša' benə' so'onlilažə' le' yoguə' nasyon na' so'one' can' ne'ena' par nič si'e yelə' bala'an.

⁶ Na' leczə le'e gwlej Jesocristən' par nič nacle xi'ine', len benə' ca' yelə' benə' leczə chso'onlilažə' le' na' chso'one' can' ne'ena'.

⁷ Nada' Pab chzoja' cart nga par yoguə' le'e nitə'əle Roman' ca le'e chaque Dioxən' chele. Dioxən' gwleje' le'e par nič nacle lažə' ne'ena'. Chona' orasyon par nič Xacho Dioxən' na' Xancho Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yičhja'ažda'olen'.

Pabən' gone'ene' žjəlane'e benə' Roma ca'

⁸ Chona' orasyon cho'a yelə' choɣcwlen che Dioxən' por le'e, na' Jesocristən' chaclene' nada' par chona' orasyonə'. Cho'a yelə' choɣcwlen che' ca naquə doxenlə yežlyonə' chsoe' benə' dižə' de que yoguə' le'e chonlilažə'əle Jesocristən'.

⁹ Dioxən' nezene' yoguə' las cata' chona' orasyonə' chnaba' gaquəlene' le'e. Le'ena' cho'elaogua'a do yičh do lažə'a ca de'en chyiɣjui'a de'e güen de'e cobə de'en chzejni'in che Xi'ine'ena'.

¹⁰ Na' chnaba' lao Dioxən' güe'e latjə par delana'a le'e na'a.

¹¹ La' zelazə'əchgua' delana'a le'e par dezejni'ida' le'e de'en babsed bablo'ine' nada' par nič sole gonlilažə'əchlene'.

¹² Che'enda' delana'a le'e par güe' ljuežjcho balor nga ngalə, chedə' la' le'e na' nada' chonlilažə'əcho Jesocristən'.

¹³ Benə' bišə, che'enda' ənezele de que zan las bago'onda' yida' delana'a le'e pero xte na'a bitonə' gac. Che'enda' yedəyena' par nič gonchle can' chazlažə' Dioxən' can' bajena' entr yeziquə'əchlə benə' cui zjanaquə benə' Izrael.

¹⁴ Nezda' cheyalə' gua'a dižə' güen dižə' cobə che Jesocristən' len benə' ca' ža' syoda, na' len benə' yiɣə' na' leczə ca' len benə' chsa'ac letr na' benə' cui chsa'ac letr.

¹⁵ De'e na'ana' che'enchgüeida' gona' ga zelao saquə'ada' čhixjue'ida' le'e de'e güen de'e cobə che Jesocristən', le'e ža'ale Roman'.

Dižə' güen dižə' cobən' nsa'an yelə' guac che Dioxən' par benə' chse'ejle'e čhei

¹⁶ Dioxən' nape' yelə' guac xen. Na' dižə' güen dižə' cobə che'ena' nsa'an yelə' guac che'ena', par nič ca' benə' chse'ejle' čhei, le' yebeje' lega'aque' xni'a de'e malən'. Dioxən' che'enchgüeine' yebeje' chio'o benə' Izrael xni'a de'e malən' na' leczə chene'ene' yebeje' chio'o cui naccho benə' Izrael xni'a de'e malən'. De'e na'ana' bito cheto'ida' che dižə' güen dižə' cobə che Jesocristən'.

¹⁷ Dižə' güen dižə' cobə che Jesocristən' chzejni'in chio'o de que Dioxən' ne' naccho benə' güen laogüe'ena' chedə' chonlilažə'əcho Jesocristən' na' can' choncze' len notə'əteza benə' chso'onlilažə' le'. Can' nyoj Xtiže'ena', nan: "Šə chonlilažə'əcho Dioxən', le'ena' ne' de que naccho benə' güen laogüe'ena', na' de'e na'ana' guatə'acza yelə' mban čhecho zejlicane šə chonlilažə'əchone'."

De xtolə' benə'chən'

¹⁸ Na' Dioxən' chlo'ine' chio'o benə'ch, zoze' yoba na'ate, can' əgwnežjue' castigw zejlicane che yoguə' benə' ca' cabi chso'elao' le' na' nic chso'one' can' cheyalə' so'one'. Na' yelə' güen de'e mal čhega'aque'ena' bito cho'en latjə yesə'əneze benə' yoble de'en naquə de'e li.

¹⁹ Bazjənezene' de'en de de'e guaquə nezecho che Dioxən' chedə' Dioxən' bablo'ine'en yoguə'əcho.

²⁰ Na' bito bi bi de de'e yoso'ode'i benə' cui chso'elao' Dioxən' yesə'əne' cui zjənezene' šə zoe'ena'. La' gwzolaozan dezd catə'an əbxi'e yežlyonə' xte ža neža chgüiacho benə' ca' na' bia

ca' na' de'e ca' bene'enə'. De'e na'anə' caguə naquən zdebə gombi'acho de'e ca' cui zjənla' che Diozən', ca yelə' gwnabia' che'enə' de'en de zejlicane na' de'en cheyalə' güe'ela'ochone'.

²¹ Na' ca naquə beņə' ca' cui chso'elao' Diozən', zjənezene' de que zo Diozən' pero bito chso'elaogüe'ene', nic chso'e yelə' choxcwlen che'. Ca naquə xbab chega'aque'enə' bito bi zaquə'an na' bazjənchoł' yichjla'ažda'oga'aque'enə'.

²² Chəsə'əne' zjənaque' beņə' sin' pero chso'one' xbab de'e cui bi zaquə'.

²³ Choso'ozoe' Diozən' ca'alə, bito chso'elaogüe'ene', len Dioz nan' naque' le'ezelaogüe beņə' zaque'e na' zoe' zejlicane. Bito chso'elaogüe'ene', chso'onchso'one' de'e yoblə, chso'ela'ozeche' no lgu'a lsaquə' beņəch beņə' te chei, na' leczə chso'elaogüe'e lgu'a lsaquə' bia zo xile'e, bia yixə' bia žia tap ni'a ne'i na' bia zjənxbə' le'i.

²⁴ Ca naquə beņə' ca' chso'on de'e ca' zjənac ca', Diozən' bagwlejyichje' lega'aque' par chso'one' de'e mal can' nan lo'o yichjla'ažda'oga'aque'enə' na' de'e na'anə' chso'onchgüe' yelə' zto' che cuerp chega'aque'enə'.

²⁵ Bagwlejyichje' lega'aque' par chso'one' de'e ca' chedə' lega'aque' bagosə'əbejyichje' dižə' li che'enə' par chse'ejle'e de'e güenlažə'. Chse'ejni'alažə'əzeche' na' chso'ela'ozeche' de'e ca' ben Diozən' na' bito chso'one' cas che Diozən' ben' ben yoguə'əłol beņəch na' yoguə' bia chaš na' yeziquə'əchlə de'e ca' yelə'. Bito chso'one' cas che' la'anə'əczə naque' ben' cheyalə' güe'ela'ochone' zejlicane. La' can' naquən.

²⁶ De'e na'anə' Diozən' bagwlejyichje' lega'aque' par chso'one' yelə' zto' can' nan lo'o yichjla'ažda'oga'aque'enə'. Ca naquə no'ol ca' bito chəsə'əque'e beņə' byo, lete chəsyə'əzolentezə le'e ljuēžj no'olžaga'aque' par nič chso'one' de'e cui cheyalə' so'one'.

²⁷ Na' le'egatezəcə ca' chso'on beņə' byo ca' chəsyə'əzolen ljuēžj beņə' byoga'aque' lgu'a de'e yesə'aca' no'ol chega'aque'. Na' naquən to yelə' zto' de'en chso'on beņə' byo con beņə' byoga'ac, tant chəsə'əzeləžə' ljuēžjga'aque'. Na' de'en chac che cuerp chega'aque'enə' naquən to castigw de'en cheyalə' yesə'əzi'e lao yelə' güen de'e mal chega'aque'enə'.

²⁸ Na' laogüe de'e cui chse'ene' so'one' cas che Diozən', Diozən' bagwlejyichje' lega'aque' len xbab mal chega'aque'enə', na' chso'one' de'e cui cheyalə' so'one'.

²⁹ Por de'e cui cheyalə' so'one'en chso'one'. Zjənaljene'. Chəsyə'əbeine' chso'one' contr beņə'. Chəsə'əzeləžə'e bi de che beņə' yoblə, na' no bia yixə' chega'aque' na' no beņə' nita' ližga'aque'. Zjənaque' beņə' xi'a juisy na' leczə chsa'acxi'i ljuēžje'. Syempr chso'ot ljuēžje', chəsə'ədile', choso'oxoayague', na' chəsyə'əyone' clelələ dižə' de'e chse'ene'ene'. Na' zjənaque' beņə' gočhitj dižə'.

³⁰ Chəsə'əne' mal che beņə' yoblə. Chəsə'əgue'ine' Diozən'. Bitobi respet zjənombi'e par beņə' yoblə. Chsa'aləže'e. Zjənaque' beņə' güe'elao' cuine. Chəsə'əyiljlaže'e na' chəsə'əželene' can' chso'one' de'e mal. Bito choso'ozenague' che xaxna'aga'aque'.

³¹ Bito chse'ejni'ine'. Bito chso'one' complir bi lyebe de'e chso'one'. Bito chsa'aque'ne' che beņə' yoblə. Zjənaque' beņə' ggo'oləže'e. Bito zjənombi'e yelə' cheyaše'e ljuēžje.

³² Zjənezczene' binlo de que Dioz nan' nchoglaogüe'en cheyalə' yeyejcho lao yi' gabilən' šə goncho can' chso'one'enə'. Pero lega'aque' ne'e zja'accze' chso'one' ca' na' chəsyə'əbeine' chso'on beņə' yoblə can' chso'one'enə'. *Pab*

2

Diozən' zdacze' liča ca de'en chone' beņəchən' castigw che xtolə'əga'aque'enə'

¹ De'e nan' notə'ətezə naccho bito gaquə ənacho bito bi xtolə'əcho de cata' choncho xbab che beņə' yoblə de que naque' beņə' mal, chedə' catə'an choncho xbab che beņə' yoblə de que naque' beņə' mal, chio'otezən' chchixə' cuincho. Chache'icho de que beņə' yoblə chone' de'e mal len leczə can' chon chio'o.

² Nezecho šə choncho de'e ca' zjənac ca' Diozən' ne' checho de xtolə'əcho, na' zdacze' liča de'en ne' ca'.

³ De repent chaquecho de que Diozən' bito gone' castigw checho ca de'en choncho xbab che beņə' yoblə de que chso'one' de'e mal len leczə can' choncho. Bito cheyalə' gaquecho de que cui gone' castigw checho, la' gonczə'en.

⁴ De repent bito choncho cas ca naquə de'e güenchgua de'en chon Diozən' len chio'o lao yelə' beņə' güen che'enə' na' yelə' xenlažə' che'enə'. Na' de repent bito choncho cas che' laogüe de'en cui le'e chontie' chio'o castigw. Diozən' chone' güen len chio'o par nič gaquə'chgüeicho lo'o yichjla'ažda'ochonə' che de'e mal de'en choncho par nič ca' yedinjchon.

⁵ Pero nacteccho beņə' žod šə bito chedinjecho do yichj do lažə'əcho ca naquə xtolə'əchon'. Na' šə bito chedinjchon choncho ca gonch Diozən' chio'o castigw catə'əžin ža Diozən' əgwlo'e de que le' zdacze' liča ca de'en gone' castigw zejlicane che xtolə'əchon'.

⁶ Gone' chio'o castigw o gone' par nič gaquə de'e güen che chio'o beņəch segon nac babencho.

⁷ Diozæn' gone' chio'o yelá' mban zejlicane ša zotezə zocho choncho de'e güen, chedə' ša choncho ca' chlo'echo de que cheyiljažə'əcho naclə gaquə par niç yežincho gan' zo'ena', na' par niç gone' chio'o yelá' bala'an, na' par niç socho zejlicane.

⁸ Na' ša chnecho contr Diozæn' na' cabi chzenagcho che diža' li che'ena', chzenagzechcho che de'e malən', lechgualə əža'alažə' Diozæn' chio'o na' gone' chio'o castigw zejlicane.

⁹ Zgua'atec chio'o beņə' Izrael benecho xtižə' Diozæn', na' ša choncho de'e mal chi' saquə'əcho na' əžaglaoch. Na' chio'o cui naccho beņə' Izrael gwdechlə benecho xtižə'ena', pero leczə chi' saquə'əcho na' əžaglaoch ša choncho de'e malən'.

¹⁰ Na' ša choncho de'e güennə' gwžin ža catə' Diozæn' gone' par niç gaccho beņə' blao, na' gone' chio'o yelá' bala'an, na' gone' par niç socho binlo len yichjla'ažda'ochon'. Gone' güen len chio'o beņə' Izrael, pero na' leczə gone' güen len chio'o la'anə'əczə cui naccho beņə' Izrael.

¹¹ Tozə can' chon Diozæn' len yoguə' chio'o beņəch.

¹² Yoguə' chio'o ša babencho de'e mal sin cuiņə' gombi'acho lei de'en bzoj de'e Moizezæn', Diozæn' əchoglaogüe'en checho cuiayi'icho por ni che de'en babencho de'e malən' la'anə'əczə ša cui nezecho can' na lein'. Na' yoguə' chio'o banombi'acho lein', Diozæn' əchoglaogüe'en checho cuiayi'icho por ni che de'en cui bencho can' nanņə'.

¹³ Caguə' con yenecho lei na'anə' na' əņa Diozæn' checho bitobi xtolə'əcho de. Pero ša choncho can' na lein', Diozæn' əne' checho bitobi xtolə'əcho de.

¹⁴ Notə'ətezə beņə' cui naquə beņə' Izrael na' cui nombi'e lei de'en bzoj de'e Moizezæn', zolə catə' chone' to chopə can' na lein' con de'e chidzən lo'o yichjla'aždaogüe'e. La'anə'əczə cui nombi'e lein', de'en chon yichjla'ažda'ogüen' mendad gone' naquən ca to lei.

¹⁵ Ben' chon ca' ža chlo'e de que lo'o yichjla'aždaogüe'e na' yo'o de'en naquə ca lein'. Na' catə' chone' de'en chone', lo'o yichjla'aždaogüe'e na' chone' xbab de que de'e malən' chone' o chone' xbab de que de'e güennə' chone'.

¹⁶ Gwžin ža catə' Diozæn' gone' par niç Jesocristən' əchoglaogüe'en che xbab che chio'o beņəch de'en bencho bgašə'əzə, ša bencho xbab güen o ša bencho xbab mal. Can' chnia' catə' əchixjui'a dižə' güen dižə' cobə che Jesocristən'.

Beņə' Izrael ca' gwsa'aquene' de que gwnite'e binlo len Diozæn' chedə' žjənombi'e lein'

¹⁷ Balle chonle xbab de que zole binlo len Diozæn' chedə' nacle beņə' Izrael na' nsedle lei de'en bzoj de'e Moizezæn'. Cha'alažə'əle de que cho'ela'ole Diozæn'.

¹⁸ Nezele de'en cho'olažə' Diozæn'. Nezele de'en naquə de'e güen. Cho'ele dižə' chei de que naquən de'e güen, chedə' la' lei na'anə' nsedle.

¹⁹ De'e tant chaquele chejni'ile che Diozæn' chonle xbab de que nezele par co'ole beņə' nez na' par əgwzejni'ile beņə' ca' žjənçhol yichjla'ažda'oga'aque'ena'.

²⁰ Na' chonle xbab de que nezele par əgwzejni'ile beņə' cui chse'ejni'i na' par gacle maestr che bi'i xcuidə'. Laogüe de'en nsedle lei de'en bzoj de'e Moizezæn' chaquele chejni'ile na' chaquele nezele de'en naquə de'e li.

²¹ Le'e chsed chlo'ile beņə' yoblə, žbixçhen' cui cholo'i cuiñle? Chsed chlo'ile bito no cuan, len chbanle.

²² Chsed chlo'ile de que bito no co' xtoi na' bito no cuejyichj be'en chei o no'ol chei par solene' beņə' yoblə, len chonczle yoguə' de'en nale cui no gon. Na' chgue'ile lgu'a' lsaquə' ca' de'en chse'ejni'alažə' beņə', len bia'acžə chjelanle bitə'ətezə de'en žjəde do lo'o yo'o gan' žjəža' lgu'a' lsaquə' ca'.

²³ Cha'alažə'əle de'e nsedle lei de'en bzoj de'e Moizezæn', pero laogüe de'e cui chonle can' na lein', chñitle yelá' bala'an che Diozæn'.

²⁴ De'e li chonle can' nyoj xtižə' Diozæn' gan' nan: "De'en chonle de'e mal, zan beņə' cui žjənaquə beņə' Izrael chəšə'əne' contr Diozæn'."

²⁵ Chio'o beņə' Izrael nsa'acho to señy lao cuerp chechon' de'en ne' sirconsision, na' zejen de que Diozæn' gaquəlene' chio'o can' bene' lyebe. Na' señyən' zaquə'an par chio'o ša choncho can' na lein'. Pero ša cui choncho can' na lein', bitobi zaquə' señy de'en zochonə'.

²⁶ Ša cui nsa'acho señy de'en ne' sirconsisionņə' pero choncho can' na lein', gaccho cuent ca beņə' nsa'acžə señy de'en ne' sirconsisionņə' la'anə'əczə cui nsa'achon.

²⁷ Balle bito bi señy de'en ne' sirconsisionņə' nsa'ale, pero chonle complir can' na lein'. Na' laogüe de'en chonle complir can' na lein', chonle ca nachbia' de que deczə xtolə' beņə' ca' žjənsa' señy de'en ne' sirconsisionņə', chedə' nyoj lein' na' žjənombi'en, pero bito chso'one' can' nanņə'.

²⁸ Zan beņə' chsa'alje' lao dia che Izraelən' na' əžja'acžə' chso'one' can' naquə costombr che beņə' Izraelən', pero lao Diozæn' bito žjənaque' beņə' Izrael, na' nic zaquə' señy de'en choso'ozo cuerp chega'aque'ena'.

²⁹ Pero chio'o de'e li naccho beņə' Izrael ša chonlilažə'əcho Diozæn' can' cheyałə' gonlilažə'əchone'. Na' de'en babocobə Diozæn' yichjla'ažda'ochon' gwxaquə'əleben ca señy

de'en ne' sirconsision, na' zejen de que bagwleje' chio'o par naccho xi'ine'. Babše'e yichjla'ažda'ochon', cagua con nsa'acho to señy lao cuerp chechon'. Na' ša chonlilažə'achone', Diozən' əne' de que choncho güen, la'anə'əczə šə notono no nochlə əna de que choncho güen.

3

¹ ¿Bi de'e güen zedegua'an che chio'o beṇə' Izrael laogüe de'en naccho beṇə' Izrael? ¿Bi de'e güen de'e zedegua'an de'en zocho señy de'en ne' sirconsissionṇə'?

² De'e xen de'e zedegua'an. Na' to de'en zedegua'an ca de'en əbnežyw Diozən' ɣaxta'ocho ca' Xtižə'ena' de'en nyojən'.

³ Na' baḷe' cui gwse'ejle'e chei. Pero bito gwde Diozən' ca'azə cui gone' can' na Xtižə'ena' la'anə'əczə baḷe' cui gwse'ejle'e chei.

⁴ Goncze' can' ne'ena'. Yoguə' laste ənacze' de'e liṇə' la'anə'əczə šə yoguə'əloḷ beṇə' yesə'əne' dižə' güenlažə'əna'. Chac canə' bzoj to profet gože' Diozən':

Le' əgwlo'ido' beṇəchən' de que cho'o dižə' li.

Na' ca naquə beṇə' ca' chso'on xbab de que bito chono' complir can' na'onə', asa'ache'ine' de que choncoz' can' na'onə'.

⁵ Quinga chəsə'əna baḷə beṇə' cui chse'ejni'i che Diozən'. Chəsə'əne' de que de'e mal de'en choncho chlo'in beṇəchən' de que Diozən' naque' beṇə' chon de'e güen. Na' chəsə'əne' de que Diozən' bito zde' liča de'en goṇe' castigw che de'e mal de'en chonchon'.

⁶ Lechguale clelən' chso'one' xbaban'. Žalə' de'e li can' chsa'aque'ne'ena' bitoczə gaquə gon Diozən' yelə' jostis che chio'o beṇəch can' cheyalə'əna'. Pero la' goncze'en.

⁷ Na' beṇə' ca' chso'on xbaban' ca' leczə chəsə'əne' de que cata' chso'onlažə'e chso'one' ca chesyə'əyache'be' beṇə' de que Diozən' naque' beṇə' güen ca naquən' cho'e por dižə' li. De'e na'anə' chsa'aque'ne' de que bito cheyalə' choglaio Diozən' chega'aque' de que zjanape' dolə' ca de'en chso'onlažə'e.

⁸ Baḷə beṇə' chso'one' contr neto', na' chso'one' cho'ato'onə' chəsə'əne' de que nato' ¿bixchen' cui goncho de'e malən' par niç gaquə de'e güenṇə'? Ca cheyalə'əczən' əgwnežjo Diozən' castigw che non' na ca'.

Notono nla' no cui napə dolə'

⁹ ¿Bixan' ža? ¿Enaquach chio'o beṇə' Izrael beṇə' güench cle ca chio'o cui naccho beṇə' Izrael? Bito. Can' bagwnia', tozəczə can' chac che chio'o beṇə' Izrael na' che chio'o cui naccho beṇə' Izrael, yoguə'əcho zocho xni'a de'e malən'.

¹⁰ Can' nyojczə Xtižə' Diozən' nan:

Notono zo beṇə' zda liča, ni tlišə'əze'.

¹¹ Notono nla' beṇə' chejni'i che Diozən',

na' notono nla' beṇə' cheylje'ene'.

¹² Yoguə' beṇəchən' bagosə'əque'e nez mal.

Yogue'e bitobi zjəzaque'e.

Ni tlišə'əzə beṇə' chon de'e güen notono nla'.

¹³ Len xtižə'əga'aque'ena' chəsə'əxoayaguene'en beṇə',

na' ca benen che bgüizə' gwxaquə'əlebe dižə' de'en chso'ena'.

Ca zbanṇə' chla' cuerp che bia guatən' catə'an bachožə'an, ca' zbanṇə' naquə xtižə'əga'aque'ena'.

¹⁴ Por dižə' mal dižə' əzban ža' cho'aga'aque'ena'.

¹⁵ Con bizə de'en choso'ode'ine' par chso'ote' beṇə'.

¹⁶ Gatə'ətezə chja'aque' con la' ggo'o yelə' yašə' yelə' zin' chja'aque'.

¹⁷ Na' bito chesə'əzo chesə'əbeze' binlo len ljuežjga'aque'ena'.

¹⁸ Bito chsa'ape' Diozən' respet.

¹⁹ Na' nezecho ca naquə yoguə' de'en na lei che Diozən' goncho, nyojən par chio'o na' ɣaxta'ocho ca' beṇə' ca' bnežjue' lein'. Pero ca naquə cui choncho can' nanṇə', ni tozə chio'o bito gaquə ənach de que naccho beṇə' güen. De'e na'anə' Diozən' əchoglaogüe'en checho de que si'icho castigw che xtolə'əchon' can' əchoglaogüe'en che yeziquə'əchla beṇəchən'.

²⁰ Ni to chio'o beṇəch bito na Diozən' checho de que naccho beṇə' güen por ni che bi de'en choncho de'en na lein', chedə' la' ni tocho bito choncho cayanə'an nanṇə'. Lei na'anə' chzejni'in chio'o de que choncho de'e malən'.

Cheyalə' gonlilažə'əcho Jesocristan' par niç gaccho beṇə' güen lao Diozən'

²¹⁻²² Diozən' bablo'e can' ne' che notə'ətezcho de que naccho beṇə' güen laogüe'ena' šə chonlilažə'əcho Jesocristan'. Lein' na' de'en boso'ozoj profet ca' beṇə' ca' gwso'e xtižə' Diozən' cana' leczə chso'en dižə' de que can' gone'. Chio'o chonlilažə'əcho Jesocristan' bito chon Diozən' cuent checho šə bi de'e choncho complir de'en na lei che'ena'. Na' notə'ətezcho tozəczə can' chon Diozən' len chio'o la'anə'əczə šə naccho beṇə' Izrael o šə cui naccho.

²³ Yogua'əlołcho babencho de'e mal na' de'e na'anə' ni tocho bito gaquə ənacho de que naccho beṇə' güen ca beṇə' güennə' naquə Diozən'.

²⁴ Nzi'ilaže'e chio'o chonlilažə'əcho Cristo Jeso'osən'. Na' caguə bi chzi' Dioz na'anə' ne' checho de que naccho beṇə' güen laogüe'enə', cheda' la' bagwdixjw Cristo Jeso'osən' xtolə'əchon'.

²⁵ Antslən' bagwdapə Diozən' yelə' chxenlažə'əna' bagwzoinə' bguo'o bcheje' che de'e mal de'en bagwso'on beṇə'əchən' tsi'i, na' bito blo'e can' chnežjue' castigw che notə'ətezə beṇə' chso'on de'e malən'. Pero na'a par blo'e de que le' chnežjwcze' castigw che beṇə' chso'on de'e malən', gwleje' Cristo Jeso'osən' par gwdixjue' xtolə' beṇə'əchən'. Na' Diozən' chñitlaogüe' xtolə' con beṇə' chso'onlilažə' Cristo Jeso'osən'.

²⁶ Na' de'en əbsele'ene'enə' nezecho de que Diozən' zdacze' licha de'en ne' che yogua' chio'o chonlilažə'əcho Jeso'osən' de que naccho beṇə' güen laogüe'enə'.

²⁷ Bito cheyalə' güe'elao' cuincho ənacho de que naccho beṇə' güen. Ni tocho cui naccho beṇə' güen por ni che bi de'e güen de'en choncho. Pero šə chonlilažə'əcho Jeso'osən' Diozən' ne' de que naccho beṇə' güen laogüe'enə'.

²⁸ Can' chejni'ichon, šə chonlilažə'əcho Jeso'osən' Diozən' ne' de que naccho beṇə' güen laogüe'enə' sin cui chone' cuent checho šə bi de'e choncho complir de'en na lein'.

²⁹ ¿EDiozən' naque' Xan chio'o beṇə' Izrael na'azən'? ¿Ecaguə leczə naque' Xan chio'o cui naccho beṇə' Izrael?

³⁰ Cle naque' Xan yogua'əloł beṇə'. Na' ne' che yogua'əcho šə bachonlilažə'əcho Jeso'osən' naccho beṇə' güen laogüe'enə'. Tozəczə can' chone' len chio'o nsa'əcho seṇy de'en ne' sirconsionnə' na' len chio'o cui nsa'əchon.

³¹ ¿Echoncho lei de'en bzoj de'e Moizezən' ca to de'e cui bi zaque'enə' laogüe chonlilažə'əcho Jeso'osən'? Bito chonchon ca to de'e cui bi zaque'e, sino cho'elechchon balorən'.

4

Abraannə' beṇlilažə'e Diozən' na' de'e nan' goque' beṇə' güen lao Diozən'

¹ De'e xaxta'ocho Abraam be'enə' naccho dia, žbixa ənacho che'enə'?

² Žalə' por ni che de'e güen de'en bene' na'anə' gwna Diozən' de que naque' beṇə' güen laogüe'enə', zaquə'əcze' par be'elao' cuine' žalə' ca'. Pero bito be'elao' cuine' lao Diozən'.

³ Le'e Xtižə' Diozən' de'en nyojan nan: "Abraannə' beṇlilažə'e Diozən' na' de'e nan' gwchoglaon che' de que naque' beṇə' güen lao Diozən'."

⁴ Catə' to beṇə' chone' žin chone' gan laxjue'enə' na' bito nacho de que xan žinnə' chone' to goclen catə'an chnežjue'ene' laxjue'enə'. Na' ca'aczən' naquən len chio'o, žalə' babencho cayəṇə'n non Diozən' mendad goncho bito naquən to goclen de'en chon Diozən' len chio'o catə'an ne' naccho beṇə' güen laogüe'enə' žalə' ca'.

⁵ Pero naquəczən to goclen. Diozən' ne' de que naccho beṇə' güen laogüe'enə' šə chonlilažə'əchone' sin cui choncho xbab de que de'e güen de'en choncho chaclənən par əne' de que naccho beṇə' güen laogüe'enə'. Na' Diozən' chone' par ničh chio'o cui be'ela'əchone' antslə chaccho beṇə' güen laogüe'enə' catə' chonlilažə'əchone'.

⁶ Leczə de'e Dabin' be'e dižə' che goclenə' de'en chon Diozən' len chio'o chonlilažə'əchone' ca de'en ne' naccho beṇə' güen laogüe'enə' sin cui chone' cuent šə bichlə de'e güen de'en choncho.

⁷ De'e Dabin' gwne':

Mba zocho šə babezi'ixen Diozən' checho che de'e malən' bencho.

Mba zocho šə babñitlaogüe' xtolə'əchon'.

⁸ Mba zocho šə chchoglaon Diozən' checho de que caguə bi xtolə'əcho denə'.

⁹ Chio'o nsa'əcho seṇy de'en ne' sirconsionnə' bito cheyalə' goncho xbab de que chio'ozən' gaquə socho mba can' gwne'enə'. Lenczə beṇə' ca' cui žənsa' seṇyən' guaquə nite'e mba can' gwne'enə'. Nezecho de'en beṇlilažə' de'e Abraannə' Diozən' de'e na'anə' gwne' che' de que naque' beṇə' güen laogüe'enə'.

¹⁰ Na' gwne' che de'e Abraannə' de que naque' beṇə' güen laogüe'enə' antslə ze'e soe' seṇy de'en ne' sirconsionnə', caguə beyožlən'.

¹¹ Na' gwdechlə gwzoe' seṇyən' par gwnezene' de que Diozən' bagwne' ca' che'. De'e Abraannə' gwzolaogüe' chonlilažə'e Diozən' catə'an ze'e sole' seṇyən' na' cana' gwna Diozən' naque' beṇə' güen laogüe'enə'. De'e na'anə' nezecho de que Diozən' ne' ca' che notə'ətezə beṇə' cui žəzo seṇy de'en ne' sirconsionnə' con šə chso'onlilažə'ene'. Na' lao Diozən' de'e Abraannə' naque' xaxtao' yogua' chio'o chonlilažə'əcho Diozən'.

¹² Na' leczə nezecho de que Diozən' ne' che chio'o nsa'əcho seṇyən' de que naccho beṇə' güen laogüe'enə' šə chonlilažə'əchone'. Na' ne' ca' caguə por ni che de'en zocho seṇyən' sino por ni che de'en chonlilažə'əchone' can' beṇlilažə' de'e Abraannə' le'.

Abraannə' benlilaže'e Diozən' na' de'e na'anə' Diozən' bene' lyebe de'e bene' len' le'

¹³ De'e Abraannə' benlilaže'e Diozən', na' de'e na'anə' Diozən' bene' lyebe gone' par niçh Abraannə' len xi'in dia che' ca' yesə'anabi'e doxenlə yežlyon'. Bito ben Diozən' cuent che Abraannə' šə bene' complir can' na lei che'enə' sino de'en benlilaže'e Diozən' na'anə' gwne' de que naque' beņə' güen laogüe'ena' na' lecəə de'e na'anə' bene' lyebe yesə'anabi'e yežlyon'.

¹⁴ Niṭə' beņə' čhsa'aquene' por ni che de'en zjənaoga'aque' leim' yesə'anabi'e yežlyon'. Žalə' na'acla lega'aque' yesə'anabi'e yežlyonə', bito bi zaquə' de'en chso'onlilažə' beņə' Diozən', na' lecəə ca' bito gon Diozən' complir can' bene' lyebe len xi'in dia che de'e Abraannə' žalə' chac ca'.

¹⁵ De'en gwđixjw Diozən' lei che'enə' na' beņəçən' cui choso'ozenague' čhei, Diozən' gwnežjue' lega'aque' castigw zejlicane che xtolə'əga'aque'ena'. Žalə' cui zjəneze' bi de'e ca' čheyalə' so'one', bitobi xtolə'əga'aque' de, pero zjənezcene'en.

¹⁶ Ca' chaquən', chio'o chonlilažə'əcho Diozən' nabi'acho yežlyon'. Tant nži'ilažə' Diozən' chio'o chone' ca nabi'achon par niçh gaquə can' bene' lyebe len yoguə' chio'o chone' cuent ca xi'in dia che de'e Abraannə'. Caguə gaquə ca' len beņə' ca' zjəsə'ənao lei na'azən' sino lecəə len notə'ətezə beņə' chso'onlilažə' Diozən' can' benlilažə' de'e Abraannə' le', la' lao Diozən' de'e Abraannə' naque' xaxtao' yoguə' chio'o chonlilažə'əcho Diozən'.

¹⁷ Can' nyojczə de'en gwna Diozən': "Banzo' le' gaco' xaxtao' beņə' ša' nasyon zan." Na' Diozən' nape' yeļə' guac par yosbane' beņə' guat ca' na' Diozən' chone' par niçh chac bitə'ətezən' ne'ena'. De'e na'anə' cho'e dižə' che beņə' ze'e za'ac ca chio'o beņəçh cho'echo dižə' che beņə' banitə'.

¹⁸ Bito gwneze Abraannə' nacxa gaquən' gaquə can' gwna Diozən'. Pero gwyejle'e che Diozən' na' gwzoe' lez de que Diozən' goncze' le' xaxtao' beņə' ša' nasyon zan. Con gwyejle'e de que gaquə can' gož Diozən' le': "Beņə' zan əsa'ac xi'in dia čio'."

¹⁹ Con gwzocze' benlilaže'e Diozən' la'anə'əczə gocbe'ine' banaque' beņə' golə par so xi'ine'. Bazoe' casi to gueyoa iz, na' no'ol che' Saran' bitoch zoe' xlaogüe'e sane'.

²⁰ Gwzoteze' benlilaže'e Diozən' na' bito goquə šejlaže'e che lyebe de'en ben Diozən' len le', sino que gwzoe' čech benlilaže'ene' na' be'elaogüe'ene'.

²¹ Abraannə' gwneze' de que Diozən' guac gone' ca de'en bene' lyeben'.

²² Na' laogüe de'en benlilaže'e Diozən' de'e nan' gwchoglaon che' de que naque' beņə' güen lao Diozən'.

²³ Na' nyojən de que de'en benlilaže'ene' na'anə' gwchoglaon che' de que naque' beņə' güen lao Diozən'. Pero caguə nyojən par de'e Abraam na'azənə'.

²⁴⁻²⁵ Lecəə nyojən par chio'o, la' lecəə de'en chonlilažə'əcho Diozən' nchoglaon čecho de que naccho beņə' güen laogüe'ena'. Diozən' bsele'e Xancho Jeso'osan' par gwso'ot beņə' le' na' bolis bosbane'ene' ladjo beņə' guat ca'. Goc ca' len Jeso'osan' par niçh gwđixjue' xtolə'əchon' na' par niçh Diozən' ne' che chio'o chonlilažə'əchone' de que naccho beņə' güen laogüe'ena'.

5

Zocho binlo len Diozən' šə chonlilažə'əcho Jesocristən'

¹ Diozən' ne' de que naccho beņə' güen laogüe'ena' čhedə' chonlilažə'əcho Jesocristən', na' Xancho Jesocrist na'anə' babene' par niçh zocho binlo len Diozən'.

² De'en chonlilažə'əcho Jesocristən' nži'ilažə' Diozən' chio'o na' gwzocze' əži'ilaže'e chio'o. Chebeicho nezecho goņ Diozən' chio'o yeļə' bala'aņ xen ca de'en de che'.

³ Na' lecəə chebeicho catə' chzaquə'əzi'icho, la' nezecho šə chgo'o chčhejlažə'əcho catə'an chzaquə'əzi'icho nachən' gwchejczecho catə'an de bichlə de'en saquə'əzi'icho.

⁴ Šə chgo'o chčhejlažə'əcho catə'an chzaquə'əzi'ichon', Diozən' chebeine' can' choncho. Na' catə' chebeine' can' choncho, nezecho de que gaquəlenche' chio'o.

⁵ Na' catə'an nezecho de que gaquəlench Diozən' chio'o, bito chža'a yichjo čhedə' nezecho babsele'e Spirit čhe'ena' par zon len chio'o, chņen lo'o la'azda'ochon' nan de que Diozən' chacchgüeine' checho.

⁶ Lao ne'e zocho xni'a de'e malən', Cristən' bnežjw cuine' gwso'ot beņə' le'. Ben Cristən' ca' par gwđixjue' xtolə' chio'o cui be'ela'ochio Diozən'. Na' gwso'ote'ene' catə' bžin orən' banžia' Diozən' bia'.

⁷ Ca naquə chio'o beņəçh, zdebə chonən par əchebcho gwnežjo cuincho so'ot beņə' chio'o lgu'a'a to beņə' yoblə la'anə'əczə šə lgu'a'a to beņə' zda licha. Pero gwchojla to beņə' yeyaxjene' gwnežjo cuine' so'ote'ene' lgu'a'a to beņə' naquə beņə' ži'ilažə'.

⁸ Pero catə'an chio'o nenaccho beņə' güen de'e mal, Diozən' bsele'e Cristən' bnežjw cuine' por ni čecho gwso'ot beņə' le'. De'e na'anə' nezecho lechguəle chaque Diozən' čecho.

⁹ Diozən' ne' de que naccho beṇə' güen laogüe'enə' çhedə' Cristən' blalj xçhene'enə' par gwdixjue' xtolə'achon'. Na' lecza ca' nezecho de que Cristən' bagoclene' chio'o chonlilažə'əchone' par niç ca' Diozən' bito gone' castigw çhecho zejlicane.

¹⁰ Beṇə' contr çhe Dioz nan' goçcho. Pero na' Xi'ine' Cristən' bnežjw cuine' por ni çhecho gwso'ot beṇə' le'. Ben Cristən' ca' par bozoe' chio'o binlo len Diozən'. Na' nezecho lecza zo Cristən' chone' par niç gaquə' yichjla'ažda'ochon' güen can' naquə' yichjla'ažda'ogüe'enə' çhedə' ngoda'əcho txen len le'.

¹¹ Na' lecza dech de'en çhebeicho. Lecza çhebeicho de'en nombi'acho Diozən', çhedə' la' Jesocrist na'anə' baçh bozoe' chio'o binlo len Diozən'.

De'e Adannə' bxi'e de'e malən' yežlyo nga, na' Jesocristən' bedəyene' par niç chac de'e güen

¹² Yelə' godenag çhe beṇə' nechən' ben' gwle Adannə', gwzolaog de'e malən' yežlyo nga, na' de'e mal nan' nsa' yelə' gotən'. Na' de'e nan' den de que yoguə' beṇə'achən' chsa'ate' na' yogue'e chso'one' de'e mal.

¹³ Gwso'onczə' beṇə'achən' de'en malən' dezd tyemp çhe Adannə' antslə' cuiṇə' çhiçjw Diozən' lei çhe'enə'. Na' catə' cuiṇə' çhiçjue' lei çhe'enə' nža'alə' can' gwçhoglaogüe'en çhe beṇə'achən' catə'an gwso'one' de'e malən'.

¹⁴ Pero na' gwzolaozən' dezd tyemp çhe de'e Adannə' bžinte tyemp çhe de'e Moizezən' benən byen yoguə' beṇə' gwsa'ate' can' chsa'ate' na'a, çhedə' yogue'e gwso'one' de'e malən', la'aṇə'əczə' de'e mal de'en gwso'one' bito naquən ca de'e mal de'en ben de'e Adannə'. De'e Adan na'anə' bedəyene' par niç gwxe yelə' gotən' yežlyo nga, pero na' Jesocristən' ben' banaquəczən yidə' dezd cana'ateczə, le'enə' bedəyene' par niç de yelə' mban zejlicane çhe nota'ətezcho chonlilažə'əchone'.

¹⁵ De'e xen nža' yelə' goclen de'en ben Diozən' len chio'o catə'an bsele'e Jesocristən' na' ca de'e malən' de'en ben de'e Adannə'. Por ni çhe de'e malən' de'en ben de'e Adannə' beṇə' zan gwsa'at. Pero na' Diozən' bene' to de'e zaque'e, bene' to yelə' ži'ilažə' xen na' to yelə' goclen xen par beṇə' zan. Diozən' chaclene' chio'o ca de'en bsele'e Jesocristən' par cheyašə' cheži'ilažə'e yoguə' chio'o beṇə'ach.

¹⁶ Nža' de'e malən' de'en ben de'e Adannə' ca goclen de'en ben Diozən' len beṇə'achən'. Por ni çhe de'e malən' de'en ben de'e Adannə', de'e na'anə' Diozən' gwçhoglaogüe'en çhe chio'o beṇə'ach de que si'icho castigw zejlicane. Pero na' dadzən' goclen Diozən' chio'o ca de'en bsele'e Xi'ine' Jesocristən', na' chio'o chonlilažə'əchone' ne' de que naccho beṇə' güen laogüe'enə' la'aṇə'əczə' babencho de'e zan de'e mal.

¹⁷ Por ni çhe tožə' be'enə' ben de'e malən' de yelə' got çhe chio'o beṇə'ach. Pero na' Diozən' leçhguale nži'ilažə'e chio'o, na' dadzə' ne' çhe chio'o chonlilažə'əchone' de que naccho beṇə' güen laogüe'enə'. De'e na'anə' de yelə' mban çhecho zejlicane na' nab'i'acho txen len Jesocristən'.

¹⁸ Can' naquən, por ni çhe de'e mal de'en ben de'e Adannə', Diozən' gwçhoglaogüe'en de que to chio'o beṇə'ach si'icho castigw çhe xtolə'achon'. Na' por ni çhe de'en naquə' Jesocristən' beṇə' güen laogüe'enə' Diozən', Dioz na'anə' ne' çhe yoguə' chio'o chonlilažə'əcho Jesocristən' de que naccho beṇə' güen laogüe'enə' na' chone' chio'o yelə' mban zejlicane.

¹⁹ Na' de'en cui əbzenag de'e Adannə' çhe Diozən', de'e na'anə' yoguə' chio'o beṇə'ach naccho beṇə' güen de'e mal. Pero na' de'en əbzenag Jesocristən' çhe Diozən', yoguə' chio'o chonlilažə'əcho Jesocristən' naccho beṇə' güen laogüe'enə'.

²⁰ Diozən' gwdixjue' lei çhe'enə' na' de'e na'anə' gwcha'o gwxench de'e malən' çhedə' beṇə'achən' bito boso'ozenague' çhei. Pero catə' gwcha'o gwxench de'e malən', de'e xen gwcha'o gwxench yelə' ži'ilažə' çhe Diozən' par niç bezi'ixene' çhe chio'o chonlilažə'əchone'.

²¹ Gwcha'o gwxench yelə' ži'ilažə' çhe'enə' par niç gwaquə'əne' çhe yoguə' chio'o beṇə'ach de que naccho beṇə' güen laogüe'enə' šə' gonlilažə'əcho Xancho Jesocristən'. Na' can' de yelə' got çhe yoguə' chio'o beṇə'ach de'en naccho beṇə' güen de'e malən' lecza nži'ilažə' Diozən' yoguə' chio'o beṇə'ach na' chone' chio'o yelə' mban zejlicane šə' chonlilažə'əchone'.

6

Diozən' bene' par niç cuiç šo'o çhazcho de'e malən'

¹ ĽNaxčan' cheyalə' goncho na'a banezecho de que nži'ilažə' Diozən' chio'o? ĽEcon šejczcho goncho de'e malən' par niç yezi'ixentežə' yezi'ixen Diozən' chechon'?

² Caguə' can' cheyalə' goncho. Diozən' babene' par niç cuiç šo'o çhazcho de'e malən' šə' gwzenagcho çhe'. De'e nan' bito cheyalə' soçcho əgwzenagcho çhe la'ažda'omalchon'.

³ Bagwchoacho nisən' par niç ca' nacbia' de que ngoda'əcho txen len Jesocristən'. Na' ca de'en gwchoacho nisən' zejen ca gotcho len Crist na'anə'.

⁴ Na' de'en zejen ca gotcho len Cristən', leczə zejen ca bgašə'əcho len le'. Goc ca' par nič ca de'en bolis bosban Xacho Diozən' le' len yelə' guac xen che'ena', gwšə'a'əcho yelə' chzo yelə' chbez chechon' na' socho ca beŋə' cobə.

⁵ Ndil ngoda'əcho Cristən' txennə' catə'an gwso'ote'ene', na' leczə ndil ngoda'əcho le' txennə' catə'an beyas bebane' ladjo beŋə' guat ca'. De'e na'anə' cheyalə' yocobə xbab chechon' par nič gaquə yichjla'ažda'ochon' can' naquə yichjla'aždaogüe'ena'.

⁶ Ca de'en ndil ngoda'əcho Cristən' txen catə'an gwso'ote'ene' le'e yag corozən', zejen de que la'ažda'omalchon' gotən. Gotən par nič bitoch ŋabia'an chio'o na' par nič bitoch šo'o čaz de'e malən' yichjla'ažda'ochon'.

⁷ Beŋə' bagot bitoch chnabia' la'ažda'omalen' le'.

⁸ Na' ca naquə gotlencho Cristən' chejle'echo de que zocho mbancho len le' na' de que sochcho əbancho len le'.

⁹ Nezecho de que Dioz nan' bosbane' Cristən' ladjo beŋə' guat ca'. Na' bitoch so'ote'ene' de'e yoblə. Yelə' gotən' bitoch so'in le' de'e yoblə.

¹⁰ Ca de'en gwso'ote' Cristən', ts'i'izən' bnežjw cuine' par nič bebeje' chio'o xni'a de'e malən'. Bitoch so'ote' le' yetlas. Na' na'a zoe' chnežjue' Diozən' yelə' bala'an.

¹¹ Legon xbab de que Diozən' babene' par nič cuich šo'o čazcho de'e malən'. Pero na' leczə legon xbab de que ndil ngoda'əcho txen len Cristən' catə'an beyas bebane' ladjo beŋə' guat ca'. De'e na'anə' mbancho par əgwnežjwcho Diozən' yelə' bala'an. Gonle xbabən' ca' cheda' ngoda'əcho txen len Xancho Cristo Jeso'osən'.

¹² Bito güe'echo latjə šo'o čaz de'e malən' cuerp chechon' de'en gat par goncho ca de'e malən' zelažə' la'ažda'ochon'.

¹³ Bito gon cuincho lao na' gwxiye'ena' par goncho de'e mal len cuerp chechon'. Cheyalə' gon cuincho lao na' Diozən' par goncho de'e güennə'. Gon cuincho lao ne'ena' cheda' bitoch nacco len yichjla'ažda'ochon' ca beŋə' guat, sino bade yelə' mban zejlicane chechon'.

¹⁴ Antslə goquecho goncho can' na lein', pero de'en cui goc goncho can' nannə', blo'in chio'o de que zocho xni'a de'e malən'. Pero na'a de'en nži'ilažə' Diozən' chio'o babebeje' chio'o xni'a de'e malən', na' de'e na'anə' chac chon cuincho lao ne'ena' par goncho de'e güennə'.

Cheyalə' cuejyichjcho cuich goncho de'e malən'

¹⁵ Ćegontezcho de'e malən' de'en nezecho nži'ilažə' Diozən' chio'o na' de'en bito chebeine' chio'o por ni che šə choncho can' na lei che'ena'? Bito.

¹⁶ Nezecho catə' chzenagcho che to beŋə' na' catə' cho'echo latjə chnabi'e chio'o, xni'a be'enan' zocho. Na' leczə ca' šə chdalcenzcho de'e malən' na' chzenagcho chei, xni'ei nan' zocho na' bito žjəyecho len Diozən' šə ca'. Pero šə chon cuincho lao na' Diozən' na' chzenagcho che' nachən' zdaczcho choncho de'e güennə'.

¹⁷ Antslən' gwzocho xni'a de'e malən'. Pero choxcwlen Diozən' lenczə le'e bachzenagle na'a do yichj do lažə'əle de'en bablo'ito' le'e.

¹⁸ Diozən' babebeje' chio'o xni'a de'e malən'. De'e na'anə' banon cuincho lao na' Diozən' par šejcho goncho de'e güennə'.

¹⁹ Cho'a dižə'ənə' can' zocho xni'a non' chzenagcho chei par nič šejni'ile. Ca'atezən' ben cuinle lao na' gwxiye'ena' par benle de'en naquə yelə' zto' na' bichlə de'en bito cheyalə' goncho, leczə can' cheyalə' gon cuincho lao na' Diozən' par goncho de'e güennə' nič gaquə yichjla'ažda'ochon' güen can' naquə yichjla'aždao' Diozən'.

²⁰ Catə'an ne'e zocho xni'a de'e malən', bito bzenagcho che Diozən' par goncho de'e güen.

²¹ Na' bitobi de'e güen ble'icho lao de'e mal ca' de'en jənaochonə'. Bacheto'icho na'a che de'e ca' benchonə'. Žalə' choncho de'e mal ca' žjanac ca' bito žjəyecho len Diozən'.

²² Pero Diozən' babebeje' chio'o xni'a de'e malən' na' babene' par nič non cuincho lao ne'ena'. De'e na'anə' zda chaquəch yichjla'ažda'ochonə' can' naquə yichjla'aždao' le'ena' na' žjəyecho len Diozən' zejlicane.

²³ Šə zocho choncho de'e malən' yeyejcho lao yi' gabilən'. Pero šə ngoda'əcho txen len Xancho Cristo Jeso'osən', Diozən' chone' chio'o dadzə yelə' mban zejlicanen'.

7

Lein' chnabi'an beŋəchən' žlac žjəmbane'

¹ Beŋə' bišə' le'e nombi'ale lein' na' nezele de que lein' chnabi'an chio'o žlac mbancho na'azə.

² To no'olə csad, žlac mban be'en che'ena' cheyalə' soe' len le', la' can' chon lein' mendad. Xte catə'əch gat be'en che'ena' cana'achən' babechoj latje' len lei de'en chon mendad soe' len be'en che'ena'.

³ Na' šə no'olən' yeque'e beṇə' yoblə len mban be'en che'enə', beṇə' ggo'o xtoin' naque'. Pero šə bagot be'en che'enə' babechoj latje' len lein'. Guaquə yošagna'alene' beṇə' yoblə, na' bito naxo naque' beṇə' ggo'o xtoi laogüe de'en yošagne'e de'e yoblə.

⁴ Can' naquan beṇə' bišə', ngoda'əcho txen len Cristan', na' de'e bnežjw cuine' gwso'ote'ene', de'e na'anə' banezecho bito chaccho beṇə' güen lao Diozən' por ni che choncho bi de'en na lei de'en bzoj de'e Moizezən'. Cristan' beyas bebane' ladjo beṇə' guat ca' na' chio'o baben cuincho lao ne'enə' par niç goncho can' chene'e Diozən'.

⁵ Antslə nezocho chzenagcho che la'ažda'omalchon'. Na' catə'an gwnezecho ca de'en non lei de'en bzoj de'e Moizezən' mendad goncho, nachlə be'elažə'əchcho bzenagcho che de'e malən' de'en yo'o yichjla'ažda'ochonə' na' bencho con can' gone'echo. Žala' ne'e choncho ca' bito žəyzecho len Diozən'.

⁶ Pero na'a babocobə Spirit che Diozən' yichjla'ažda'ochon' na' nezecho bito chaccho beṇə' güen lao Diozən' por ni che choncho bi de'en na lein'. Antslə bencho bi de'e güen parzə niç goncho complir can' byoj lein' gwlatə nan naquan cheyalə' goncho. Pero na'a choncho can' chene'e Diozən' cheda' babocobə Spirit che'enə' yichjla'ažda'ochon'.

Yo'o de'e malən' yichjla'ažda'ochon'

⁷ Bito cheyalə' goncho xhab de que lei de'en bzoj de'e Moizezən' naquan de'e mal. Bito gocbe'ida' nda' chona' de'e malən' žala' cui bzejni'i lein' nada' bi de'en cui cheyalə' gona'. Na' bito agwnežda' de que de'e malən' chona' chzelažə'a bitə'ətezə' de'e de che beṇə' žala' que lein' nan: "Bito seləžə'əle bitə'ətezə' de'e de che beṇə'."

⁸ Nach catə' gwnežda' can' na lein, de'e mal de'en yo'o yichjla'aždaogua'anə' nachle benən ca gwzelažə'əcha'. Na' bito gocbe'ida' de xtoła'a žala' cui bemb'i'a lein'.

⁹ Gwzoa' to tyemp sin cui bemb'i'a lei de'en bzoj de'e Moizezən'. Pero catə' gwnežda' bin' nonən mendad gona', nachle bzenaguəcha' che de'e malən' de'en yo'o yichjla'ažda'ogua'anə'. De'e na'anə' gwnežda' si'a castigw zejlicane che xtoła'a.

¹⁰ Na' ca naquə lei de'en bzoj de'e Moizezən', naquan par gwzenaga' chei niç ca' gatə' yelə' mban zejlicane chia'. Pero de'en cui bzenaga' chei de'e na'anə' gwnežda' si'a castigw zejlicane.

¹¹ Ca de'en nombi'a lein', de'e malən' de'en yo'o yichjla'aždaogua'anə' bxoayaguən nada', benən ca bito bzenaga' che de'en nonən mendad gona'. Na' de'e na'anə' gwnežda' si'a castigw zejlicane che xtoła'anə'.

¹² Ca naquə lei de'en bzoj de'e Moizezən', za'an che Diozən'. To to de'en nonən mendad goncho za'an che Diozən' na' žənaquan de'e lixa na' de'e güen.

¹³ ¿Elei de'en naquə de'e güenə' benən par niç si'a castigw zejlicane che xtoła'anə'? Bito naquə len. De'e malən' de'en yo'o yichjla'aždaogua'anə' bito be'en latjə gona' can' cheyalə' gona'. Na' de'en cui chona' can' na lein', de'e nan' gwnežda' si'a castigw zejlicane che xtoła'anə'. Ca chac nan' nla'alaon naca' beṇə' mal de'en cui chona' can' na lein', na' nla'alo de que de'e mal juisjən' chona' cui chona' can' none' mendad gona'.

¹⁴ Naquan clar de que lein' guaqualenən nada' len xhab de'en yo'o lo'o yichjla'aždaogua'anə' žala' chzenaga' chei. Pero nada' naca' beṇə' la'aždao' mal, zoa' yo'o yaza' de'e malən'.

¹⁵ Bito chona' de'e güen de'en che'enda' gona'. De'e mal de'en cui che'enda' gona' lelənnə' chona'. Bito cheyache'ida' chia' bixchen' chona' ca'.

¹⁶ Che'enda' gona' can' na lei de'en bzoj de'e Moizezən', pero bito chona'an yoguə' las. Na' catə' cui chona' can' nannə' lechguale de'e chacda', cheda' nežda' lein' naquan de'e güen.

¹⁷ Caguə nada'anə' chona' de'en cui che'enda' gona'. De'e mal de'en yo'o yichjla'aždaogua'a nan' chonən par niç chona' de'en cui che'enda' gona'.

¹⁸⁻¹⁹ Nežda' bito naca' beṇə' güen, cheda' yo'o de'e malən' lo'o yichjla'aždaogua'anə'. Che'enda' gona' de'e güenə', pero bito chona'an. De'e mal de'en cui che'enda' gona' lelənnə' chona'.

²⁰ Na' ca de'en chona' de'en cui che'enda' gona', caguə chona'an nada'anə'. De'e mal de'en yo'o yichjla'aždaogua'a nan' nžiguə'an nada' chona' de'e mal de'en cui che'enda' gona'.

²¹ Na' syempr catə'an che'enda' gona' de'e güenə', de'e mal de'en yo'o yichjla'aždaogua'anə' chžonən gona'an.

²² Chebeida' lei che Diozən' lo'o yichjla'aždaogua'anə'.

²³ Pero na' chache'ida' de de'en yo'o yichjla'aždaogua'anə' de'en cui cho'en latjə gona' can' nežda' cheyalə' gona'. De'e mal de'en yo'o yaz cuerp chia'anə' chnabi'an nada'.

²⁴⁻²⁵ Lo'o yichjla'ažda'ochon' chene'echo goncho de'en non lei che Diozən' mendad goncho, pero na' la'ažda'omalchon' choncžən ca choncho de'e malən'. ¿Prob chio'o! ¿No soi la'ažda'omalchon' de'enə' chnabia' chio'o? Nezecho si'icho castigw zejlicane šə soczcho gwzenagcho chei. Choçxwlen Diozən', chone' par niç Xancho Jesocristən' soine' la'ažda'omalchon'.

8

Cheyala' goncho can' chene'e Spirit che Diozan'

¹ De'e na'ana' Diozan' ne' che chio'o ša ngoda'echo txen len Cristo Jeso'osən' de que bito bi xtolə'əcho de. Chio'o ngoda'əcho txen len Cristo Jeso'osən' bachoncho can' chene'e Spirit che Diozan'. Bito choncho can' na la'ažda'omalchon'.

² Nežda' Spirit che Diozan' chnabi'an nada' na' chonən yelə' mban zejlicane čhia' laogüe de'en ngoda'a txen len Cristo Jeso'osən'. Cata' gwzoa' xni'a de'e malən' lennə' benən par nič gwchoglaio Diozan' čhia' si'a castigw zejlicane. Pero Spirit che Diozan' babebejan nada' xni'a de'e malən'.

³⁻⁴ Lei de'en bzoj de'e Moizezan' bito gwzoin par yebejan chio'o xni'a de'e malən' cheda' naccho beňə' la'aždao' mal. Diozan' gwzoinne' bebeje' chio'o xni'a de'e malən' de'en bsele'e Xi'ine'en golje' yežlyo nga, gocczə cuerp che'ena' ca cuerp che chio'o beňə' güen de'e mal. Na' Xi'in Dioz na'ana' gwduxje' xtolə'əchon' par nič chio'o beňəč gwaquə yečojcho xni'a de'e malən' na' gwaquə šejcho licha goncho can' non lein' mendad, con ša goncho can' chene'e Spirit che Diozan' na' bito goncho can' na la'ažda'omalchon'.

⁵ Ša zoczcho choncho can' na la'ažda'omalchonə', yo'o yichjcho de'en chene'en goncho. Pero ša zocho choncho can' na Spirit che Diozan' yo'o yichjcho can' nan na'ana'.

⁶ Na' ša con yo'o yichjcho de'en chene'e la'ažda'omalchonə', si'icho castigw zejlicane. Pero ša con yo'o yichjcho de'ena' chene'e Spirit che Diozan', guata' yelə' mban zejlicane checho na' so cuezcho binlo len xbab de'en yo'o lo'o yichjla'ažda'ochonə'.

⁷ Contr Dioz nan' choncho ša con yo'o yichjcho de'en chene'e la'ažda'omalchon' goncho. Na' ša con yo'o yichjcho len, bito chzenagcho che lei che Diozan', na' niqwe gaquəczə gwzenagcho che Diozan' ša ca'.

⁸ Ša zocho choncho can' na la'ažda'omalchon' bito gaquə naquəchlə goncho par nič yebei Diozan' chio'o.

⁹ Pero chio'o ža, ša zo Spirit che Diozan' lo'o la'ažda'ochonə', bitoch zocho choncho can' na la'ažda'omalchon', sino zocho chzenagcho che Spiritən'. Na' ša cui zo Spirit che Cristən' lo'o la'ažda'ochonə', de'en leczə naquən Spirit che Diozan', bito naccho xi'in Dioz.

¹⁰ Cristən' zoe' len chio'o chonlilažə'əchone', na' Diozan' ne' de que naccho beňə' güen laogüe'ena'. Na' de'e na'ana' de yelə' mban zejlicane checho la'ana'əczə gatcho len cuerp chechon' por ni che de'e malən'.

¹¹ Diozan' bolis bosbane' Cristo Jeso'osən' ladjo beňə' guatən'. Na' ša Spirit che Diozan' zon lo'o la'ažda'ochon', leczə gwžin ža cata' Diozan' yolis yosbane' chio'o len cuerp checho quinga de'ena' sa'at. Yolis yosbane' chio'o cheda' yo'o Spirit che'ena' lo'o la'ažda'ochon'.

¹² Can' ža beňə' biša', bito cheyala' goncho can' na la'ažda'omalchon'.

¹³ Si'icho castigw zejlicane ša zoczcho choncho de'en chene'e la'ažda'omalchonə'. Pero ša güe'echo latjə gaquən Spirit che Diozan' chio'o par nič cuič gwzenagcho che la'ažda'omalchon', nachən' gata' yelə' mban zejlicane checho.

¹⁴ Na' yoguə' chio'o ša chzenagcho che de'en chsed chzejni' Spirit che Diozan' chio'o goncho, naccho xi'in Dioz.

¹⁵ Diozan' bene' chio'o Spirit che'ena' cata'ən gwcue'e chio'o ca xi'ine'. Na' de'e na'ana' bito chžebcho Diozan' can' chžebcho to beňə' znia cata' choncho xšine'ena'. Lgua'a žebchone' cholgüižchone' che'echone': "Xa."

¹⁶ Spirit che Diozan' nan lo'o yichjla'ažda'ochon' de que chio'o naccho xi'in Dioz.

¹⁷ Na' ša naccho xi'in Dioz, gwžin ža cata' yoguə' de'en de che Cristən' gaquən checho txen lencho le'. Gaquən checho con ša gwsanlažə' cuincho yoso'oči' yoso'osaque' beňə' chio'o por ni che de'en chonlilažə'əcho Cristən', can' boso'oči' boso'osaque'e le'ena'. Na' ša yoso'oči' yoso'osaque'e chio'o, Diozan' gone' chio'o yelə' bala'an xen ca de'en babnežjue' che Cristən'.

¹⁸ Yežlyo nga de de'en chzaquə'əzi' chzaquə'əyašə'əcho. Pero nada' chona' xbab caguə de'e bi de'ena' ca de'en yebeicho cata'ən əžin ža gon Diozan' chio'o yelə' bala'an xen ca de'en napə Cristən'.

¹⁹ Diozan' bene' beňəč, bene' bia chsa'aš na' bene' cuantzə bi de'en zjəde. Na' yoguə'əcho len lega'aquən bazochio laio juisy bata'əquan' gon Diozan' yelə' bala'an de'en si' chio'o naccho xi'ine', na' leczə len yoguə' bia ca' chsa'aš chasə'əbezəb bata'əquan' əžin ža gone' ca'.

²⁰ Na' yoguə' de'e ca' ben Diozan' caguə zjənac ša'ona'. Na' caguə con ca gwse'ene'enna' zjənaquən. Ze'e gonša'oche' lega'aquanna', na' ze'e gonša'oche' yoguə' bia chsa'aš na' leczə ca' chio'o beňəč. Na' leczə Dioz nan' bene' par nič chasə'əbezən na' par nič chasə'əbezə beňəčan' na' par nič leczə chasə'əbezə bia ca' chsa'aš.

²¹ Chasə'əbezən bata'əquan' əžin ža yesyə'əyaquən binlo juisy na' bito te chega'aquən. Na' leczə can' chasə'əbezə bia ca' asa'ac chega'aquəb. Na' ca'aczən' gac che chio'o naccho xi'in

Dioz, catə'an si'icho yelə' bala'an xen de'en goṇ Diozən' chio'o, yeyac cuerp chechon' de'e cobə na' cuatəch soi yelə' gotən' chio'o.

²² Na' nezecho, xte ža neža yoguə' de'e ca' ben Diozən' chso'onən ca beṇə' chbežgüe', chesə'əžaglaon ca to no'olə beṇə' chzan. Na' lecəə yoguə' bia ca' chsa'aš chəsə'əbežgüe'eb chəsə'əžaglaob ca to no'olə beṇə' chzan.

²³ Na' caguə' de'e ca'azan'. Lecəə len chio'o chbežgüe'echo. Diozən' babene' chio'o Spirit che'enə' par nič nezecho gwžin ža gaquəch güen checho. Na' chbežgüe'echo lo'o la'ažda'ochon' chbezcho batə'əquən' goṇ Diozən' cuerp cobə chechon' par əgwlo'e de que banque'e chio'o ca xi'ine'.

²⁴ Catə'an bebej Diozən' chio'o xni'a de'e malən', ca nan' gwzolaob chbezcho gwžin ža gaquəch güen checho. To de'e bagoc bitoch socho lez cuezcho gaquən. Notono zo no nezo'e lez gaquə de'en nezene' bagoc.

²⁵ Pero ca naquə de'en zocho lez gwžin ža gaquəch güen checho, zocho chgo'o chchejlažə'əcho batə'əquən' gaquən.

²⁶ Ca naquə Spirit che Diozən' zon chaclenən chio'o chedə' bitotec bi chac goncho sin cui zon len chio'o. Bito chac goncho orasyon can' cheyalə' gonchon, poro na' Spirit che Diozən' chṇen fabor chio'o laogüe'enə' la'anə'əczə cui cheželecho naclə güe'elenchone' dižə' che de'en chnalazə'əcho.

²⁷ Na' Diozən' ngüia nye' la'ažda'ochon' na' lecəə ca' chejni'ine' bin' chene'e Spirit che'enə' catə'an chṇen fabor chio'o bagwleje' par naccho lažə' ne'enə'. Na' can' chene'e Diozən' ṇen fabor chio'o.

Diozən' de'e chio'o, de'e na'anə' notono no soi chio'o

²⁸ Na' nezecho de que lao yoguə' de'en chaquən', Diozən' chone' par nič gaquə güen che chio'o chaquecho che'. Chio'on bač gwleje' par chonlilažə'əchone' segon can' gwchoglaogüe'en.

²⁹ Nombia' Diozən' chio'o dezd gwlatte, na' əbsi'e xneze par nič tozə gaquə yichjla'ažda'ochon' len yichjla'aždao' Xi'ine' Jesocrisən'. Bene' par nič Jesocrisən' naque' beṇə' nech entr chio'o beṇə' biše'e zan.

³⁰ Na' ca naquə əbsi' Diozən' xneze par nič gaquə yichjla'ažda'ochon' tozə len yichjla'aždao' Xi'ine' Jesocrisən', lecəə gwleje' chio'o par chonlilažə'əchone' na' bagwchoglaogüe'en checho de que naccho beṇə' güen laogüe'enə'. Na' lecəə can' goṇcze' chio'o yelə' bala'anə'.

³¹ Catec güenṇə' chon Diozən' len chio'o de'en bsi'e xneze gac checho yoguə' de'e ca'. Na' nezecho Diozən' de'e chio'o, na' de'e na'anə' notono no soi chio'o.

³² Diozən' bito bžone' saquə'əzi' Xi'ine'enə' por ni che yoguə'əlo' chio'o ca de'en bsele'ene' gwso't beṇə' le'. Na' can' bsele'e Xi'ine' Jesocrisən' par chio'o, ca'acžən' gone' yoguə' de'e güenṇə' dadžə len chio'o.

³³ Diozən' bagwleje' chio'o par naccho xi'ine' na' bagwchoglaogüe'en checho de que bito bi xtolə'əcho de. De'e na'anə' notono no soi əgwcuš chio'o laogüe'enə'.

³⁴ Notono zo no gaquə gon par nič əna Diozən' checho de que de xtolə'əchon'. Por ni chechon' bsanlažə' cuin Cristən' gwso't beṇə' le' na' Diozən' bolis bosbane'ene' ladjo beṇə' guat ca'. Na' ṇa'a chi'e cuit Diozən' chnabi'e txen len le', na' chṇe' fabor chio'o.

³⁵ ŽEde de'e əgwžon par nič Cristən' cuich gaquene' checho? ŽEgwžon no de'e mal de'en gaquə checho? ŽEgwžon no de'e yašə' de'e zi' de'e gaquə checho? ŽEgwžon no yelə' xi'a che beṇə' chgue'i chio'o? ŽEgwžon no yelə' chbił chdon checho? ŽEgwžon laogüe de'en cui de xala'ancho? ŽEgwžon šə bi lxož de'e za' len chio'o? ŽEgwžon par nič Cristən' cuich gaquene' checho šə to beṇə'əclə noxe'e cwsšiyən' gote' chio'o? Bitobi bi de de'e əgwžon par nič Cristən' cuich gaquene' checho.

³⁶ Can' nyojczə Xtizə' Diozən' nan:

Por ni che chonlilažə'əto' le', chse'ene beṇə' so'ote' neto' do tyempte.

Chso'one' xbab de que neto' naquəto' ca to xilə' bia so'ote'.

³⁷ Pero catə'an za'ac bi de'e mal gac checho, bito chac čhop lažə'əcho, sino chebeichgüeicho la' nezecho zoczə Cristən' chaquene' chechon'.

³⁸ Nada' nežda' de que notono gaquə gwžon par nič Diozən' len Cristən' cuich əsa'aquene' checho. Yelə' gotən' bito gaquə bi gonən, ni yelə' mbanṇə', ni no angl bzelaob, ni nochlə beṇə' blao che angl bzelaob, ni angl bzelaob beṇə' gwnabia', ni de'e chac checho ṇa'a na' šə bichlə de'e ze'e za'ac.

³⁹ Ni de'e de le'e yoban', ni de'e de gabiłən', ni bichlə de'en ben Diozən' bito gaquə yesə'əžonən par nič Diozən' cuich gaquene' checho. Nic yesə'əžon no beṇə', nic yesə'əžon bitə'ətežə de'e gac checho par nič Diozən' cuich gaquene' checho, la' Diozən' bsele'e Xancho Cristo Jeso'osən' blo'ine' chio'o can' chaquene' checho.

9

Diozən' gwcue'e bene' Izrael ca xi'ine'

¹⁻² De'en ngoda'a txen len Cristən' cho'a dižə' li nia' de que zochgua trist, na' chacchgüeidä' lo'o la'ažda'ogua'anə' ca naquə zan bene' gwlaž chia' ca' bito chso'onlilaže'e Cristən'. Spirit che Diozən' chonən par niç nēzda' lo'o yichjla'ažda'ogua'anə' de que cho'a dižə' li catə' nia'

³ xte zelaža'a cuiay'i'a žala' na'anə' yecui'ižə' Diozən' nada' cuit Cristən' par niç bene' gwlaž chia' ca' so'onlilaže'ene'. Che'enda' so'onlilaže'ene' chedə' lega'aque' gwsa'alje' zjənaque' bene' Izrael ca nada'.

⁴ Diozən' gwcue'e chio'o bene' Izrael ca xi'ine'. Na' gwzoe' len de'e xaxta'ocho ca' to lo'o bejw de'en chey che'eni'. Na' bene' lyebe gaqualene' lega'aque'. Na' leczə bnežjue' lega'aque' lei de'en bzoj de'e Moizezən'. Na' Dioz nan' əblo'ine' lega'aque' naquən' se'ejni'alaže'ene'. Na' leczə benche' lyebe de'e bene' len lega'aque'.

⁵ Bene' golə blao bene' za' che'elte zjənaque' xaxtao' chio'o bene' Izrael. Cristən' ben' bselə' Diozən' par gaqualene' beñaçan' golje' lao dia che bene' Izrael. Le' naque' Dioz na' chnabi'e yoguə'əte, chnabi'e beñaç na' bia ca' chsa'aš, na' yoguə'əloj cuantzə de'e zjəde. Cheyałə' socho glən'ela'ochone' zejlicañe. Can' gonšgaczo.

⁶ Clelən' choncho xbabən' šə chaquecho de que Diozən' bito bene' complir ca lyebe de'en bene'. De'e li caguə yoguə' bene' ca' əgwsa'aljə lao dia che Izraelən' zjənaque' bene' Izrael lao Diozən'.

⁷ Na' caguə bene' ca' əgwsa'aljə lao dia che de'e Abraannə' chon Diozən' cuent zjənaque' xi'in dia che de'e Abraannə'. Quinga gož Diozən' Abraannə': "Xi'in dia che Isaac gona' cuent lao dia chio'onə'."

⁸ De'e nga chlo'in chio'o de que caguə ni che de'e goljcho lao dia che bene' Izraelən' naccho xi'in Dioz. Naccho xi'in Dioz chedə' chejle'echo che lyebe de'en bene' len de'e Abraannə', gwne' de que əque'e ca xi'ine' con bene' so'onlilažə' le'.

⁹ Catə'an ben Diozən' lyebe len de'e Abraannə' gwne': "Leczə ca tyemp nga na'a yida' yetgüiz, na' cana' bazo to bi'i che Sar ni."

¹⁰ Na' leczə be' Diozən' dižə' len de'e Rebequən' catə'an gwzoe' bi'e bi'i cuaš ca', xi'in de'e xaxta'ocho Isaaquən'.

¹¹ Ze'e sa'aljlə bi'i cuaš ca'anə, na' ni de'e güen ni de'e mal cuiñə' so'ombo'. Na' lao cuiñə' gata'əbia' naquən' so'ombo', gwlej Diozən' tobo' par caguə güen chebo'. Con bagwçhoglaogüe' can' gaquə chega'acbo' na' bene' can' bansi'e nxezen'.

¹² De'e na'anə' gože' de'e Rebequən': "Bi'in galjə nech sobo' xni'a bi'in yedenao lebo'."

¹³ Na' nyojczə de'en gwna Diozən' che bi'i cuaš ca': "Chacda' che Jacobən' na' chgue'ida' Esa'on'."

¹⁴ Bito cheyałə' goncho xbab de que Diozən' bito zde' licha de'en gwne' ca'. Zdacze' lican'.

¹⁵ Ze' Diozən' de'e Moizezən': "Yeyašə'əlaža'a len bene' che'enda' yeyašə'əlaža'a, na' əži'ilaža'a len bene' che'enda' əži'ilaža'a."

¹⁶ Quinga naquən: Diozən' nži'ilaže'e chio'o caguə por ni che che'enecho əži'ilaže'e chio'o'nə'. Na' caguə por ni che zocho lao juisy əži'ilaže'e chio'onə' əži'ilaže'e.

¹⁷ Nyojczə Xtižə' Diozən' can' gože' de'e Rei Faraonə': "Nada' beni' par niç naco' rei parzə niç gona' len le' ca yesə'əneze bene' can' naquə yelə' guac chia'anə'. Gona' par niç yoguə'əloj bene' ža' yežlyon' yesə'ənezene' non' naca' nada'."

¹⁸ Can' naquən, Diozən' cheyašə'əlaže'e bene' chene'ene' yeyašə'əlaže'e, na' chone' par niç nita' bene' žod bene' chene'ene' cui yoso'ozenague' che'.

¹⁹ Na' de'en chon Diozən' ca' de repent chonle xbab nale: "Chio'o beñaç choncho con can' banžia' Diozən' bia'. žBixchen' ne' de xtołə'əchon'?"

²⁰ Pero žno naquə chio'on ža par gaquəyožcho Diozən'? žEgüe' to yesə' ben' ben len: "žBixche nga beno' nada' quinga?" Nezecho bito ye'en le' ca'.

²¹ Bene' güen yesə' xguaguən', chac gone' no yesə' par gonən žin len de'e naquə de'e xoche. Na' le'e gon' na'atezə leczə gone' yesə' par gonən žin len de'e cui naquə xoche.

²² Ca cheyałə'əczən' nžia' Diozən' bia' gwnežjue' castigw zejlicañe che bene' ca' cui choso'ozenag che', na' can' nžie' bia' gone' bichlə par gwlo'ine' yelə' guac che'ena'. Na' de'e cheyałə'əczən' can' nžia' Diozən' bia' gone' chedə' bagwzoine' bagwdape' yelə' chxenlažə' len lega'aque' la'añə'əczə zjəzaque'e par yesə'əzi'e castigw zejlicañen', na' yesyə'əžine' lao yi' gabilən'.

²³⁻²⁴ Na' ca cheyałə'əczən' ca de'en bsi'e xnezenə' antslə par gone' chio'o chonlilažə'əchone' yelə' bala'añ, chio'o cheyašə' cheži'ilaže'e. Bene' ca' par niç nacbia' lechguale de'e güen juisy chone' chaclene' chio'o gwleje' par chonlilažə'əchone' entr bene' Izrael na' entr bene' cui zjənaquə bene' Izrael.

²⁵ Can' na le'e libr de'en bzoj de'e profet Oseasən', Diozən' gwne':

Benə' cui zjənaquə xi'ina' na' nia' lega'aque' xi'ina'.

Na' benə' ca' cui goquəda' chega'aque' yapəga'aca'ane' de que chacda' chega'aque'.

²⁶ Na' lecəə nan:

Gan' gož Diozən' benə' ca': "Le'e bito nacle xi'ina'",

lecəə na'anə' ye'e lega'aque' de que zjənaque' xi'ine', Dioz ben' zo zejlicane.

²⁷ Lecəə can' gwna de'e profet Isaiazən' che benə' Izrael ca': "La'ana'əczə chio'o benə' Izrael šancho ca' yox de'e chi' cho'a nisdəo' balgachon' yechojcho xni'a de'e malən'.

²⁸ La' Xancho Diozən' gone' can' bançhoglaogüe'en len chio'o benəçh, na' to žalñez gone' yoguə'əloł de'en bangüie' gone'."

²⁹ Lecəə de'e Isaiazən' gwne' antslə:

Žalə' Xancho Diozən' ben' napə le'ezelaogüe yelə' guac xen cui bocua'ane' to çhopə benə' lao nasyon Izrael chechon',

can' goc che benə' Sodoma na' benə' Gomorra ca' goc checho žalə' ca'.

Con benə' chso'onlilažə' Cristən' nchoglaon chega'aque' de que zjənaque' benə' güen lao Diozən'

³⁰ Quingan' naquən, benə' ca' cui zjənaquə benə' Izrael bito besyə'əyilje' naclən' so'one' par niçh Diozən' əne' de que zjənaque' benə' güen laogüe'ena', pero bale' baçh chso'onlilažə'e Cristən' na' Diozən' ne' chega'aque' de que zjənaque' benə' güen laogüe'ena'.

³¹ Na' benə' Izrael ca' jəsə'ənaogüe' to lei de'e chon mendad naclən' so'one' par niçh əsa'aque' benə' güen lao Diozən'. Pero bito gwsə'one' can' nanə'. De'e nan' Diozən' gwçhoglaogüe'en chega'aque' de que bito zjənaque' benə' güen laogüe'ena'.

³² Na' gwçhoglaogüe'en chega'aque' ca' chedə' caguə gwsə'onlilažə'e Dioz na'anə' con gwsa'aquene' so'one' can' na lein' par niçh əsa'aque' benə' güen laogüe'ena'. De'e na'anə' gwxaquə'əlebəga'aquene' ca benə' jti'i to yej.

³³ Goc can' nyojczə Xtižə' Diozən' nan:

Gan' nzi' Sion na' əselə'a to benə' gwxaquə'əlebene' ca to yej de'e əçhego'o benə' na' ca to yej de'en zjəsə'əzo'e na' yesə'əbiçxe'.

Na' benə' so'onlilažə' ben' gwxaquə'əlebe ca yejən' bitobi zto' əsa'aquene' che de'en so'onlilažə'ene'.

10

¹ Benə' bišə', do yichj do lažə'a che'enda' par niçh benə' Izrael gwlaž chia' ca' yesyə'əchoje' xni'a de'e malən', na' de'e na'anə' chona' orasyon chnəba' gaquəlen Diozən' lega'aque'.

² Nezda' can' chse'ene' de'e zan de'e so'one' chsa'aquene' par yebei Diozən'. Pero bito zjənezene' bin' chene'e Diozən'.

³ Bitə chse'ejni'ine' naquən' baben Diozən' par niçh ne' che benə' de que zjənaque' benə' güen laogüe'ena'. Le'e lega'acteze' chse'ene'ene' yesyə'əyilje' naquən' so'one' par niçh əsa'aque' benə' güen lao Diozən'. Bitə chse'ene'ene' so'onlilažə'ene' par niçh əne' chega'aque' de que zjənaque' benə' güen laogüe'ena'.

⁴ Pero notə'ətezə benə' çonlilažə' Cristən', Diozən' ne' che' de que naque' benə' güen laogüe'ena' la'ana'əczə sə cui chonyane'e can' na lein'.

⁵ De'e Moizezən' bzoje'en de que notə'ətezə benə' chone' cuasełol can' na lein' nachən' naque' benə' güen lao Diozən' na' gaquə bane' zejlicane.

⁶⁻⁷ Pero nža'alən' nyoj Xtižə' Diozən' che benə' ca' na Diozən' zjənaquə benə' güen laogüe de'en chso'onlilažə'ene'. Nan: "Bitə goncho xbab lo'o lažə'da'ochon' gaguecho: Notono no gaquə cue yoban' o notono no gaquə yetj gan' ža' benə' guat ca'", žalə' na'aclə chyažjecho žjəxi'icho Cristən' niçh gonlilažə'əchone'.

⁸ Na' lecəə nyojən' nan: "Banombia'əcho dižə' de'en chaclen chio'o. Choncho xbab çhei na' cho'echo dižə' can' nan." Na' lenə' dižə' de'en chzejni'tito' benə' par niçh so'onlilažə'e Cristən'.

⁹ Quingan' cheyalə' goncho par niçh Diozən' yebeje' chio'o xni'a de'e malən'. Cheyalə' güe'echo dižə' len benə' yoblə par niçh yesə'əneze' de que çonlilažə'əcho Xancho Jeso'osən', na' lecəə cheyalə' šejle'echo do yichj do lažə'əcho de que Dioz nan' bolis bosbane' Jeso'osən' ladjo benə' guat ca'.

¹⁰ Diozən' ne' de que naccho benə' güen laogüe'ena' sə chejle'echo do yichj do lažə'əcho de que cuine'ena' bolis bosbane' Jeso'osən' ladjo benə' guat ca'. Na' sə cho'echo dižə' len benə' yoblə par niçh yesə'əneze' de que bachonlilažə'əcho Xancho Jeso'osən', nachən' Diozən' yebeje' chio'o xni'a de'e malən'.

¹¹ Xtižə' Diozən' de'en nyojən' nan: "Notə'ətezə benə' chso'onlilažə' Diozən' bitobi zto' sa'aquene' che de'en chso'onlilažə'ene'."

¹² Chio'o beṇə' Izrael na' chio'o cui naccho beṇə' Izrael, tozæcə can' chon Diozən' len yoguə'əcho, la' Xancho Jeso'osan' naque' Xan yoguə'əloḷ beṇə'. Le' lechguale cheyašə' cheži'ilaže'e yoguə'əcho con šə chṇabcho gaqualene' chio'o.

¹³ Can' na Xtižə' Diozən' de'en nyojən': "Notə'ətezə beṇə' yesə'əṇab goclen laogua' nada' naca' Xanle, gualencza' lega'aque'."

¹⁴ Pero ḷnacxa so'on beṇə' yesə'əṇabe' goclen laogüe'ena' šə bito chso'onḷilaže'ene'? Na' ḷnacxa so'one'en so'onḷilaže'e le' šə cuiṇə' se'enene' xtiže'ena'? Na' ḷnacxa gaquə əse'enene' xtiže'e na'anə' šə cui zo beṇə' güe' xtiže'ena' len lega'aque'?

¹⁵ ḷNacxa so'on beṇə' yesə'əyixjui'e dižə'anə' šə bito zo no chselə' lega'aque' par yesə'əyixjui'en? Can' nyojczə Xtižə' Diozən' nan: "Chebeichgüeicho len beṇə' chesə'əyixjui'e guac socho binḷo len Diozən', chesə'əyixjui'e dižə' güen dižə' cobə che'ena'."

¹⁶ Pero la'anə'əczə catə' chse'ene beṇə' dižə' güen dižə' cobə che Diozən', caguə yogue'e choso'ozenague' chei. De'e Isaiazən' gwne': "Xana' casi notono no choso'ozenag dižə' de'en chyixjue'eto'onə'."

¹⁷ Cheyalə' əse'ene beṇə' dižə' güen dižə' cobə de'en gwzejni'in lega'aque' che Cristən' par so'onḷilaže'ene'.

¹⁸ Pero chṇaba': ḷəcabi ne'e se'ene beṇə' Izrael ca' dižə' güen dižə' cobə de'en chzejni'in che Cristən'? Baç gwse'ene'ene'en. Baç chac can' nyoj Xtižə' Diozən' nan:

Doxenḷə yežlyon' baç gosə' gwlaḷjə dižə'anə'.

Zbi'izcan yežlyon' babselə' Diozən' xtiže'ena'.

¹⁹ Na' chṇaba' de'e yoblə: ḷəcui gwse'ejni'i beṇə' Izrael ca' dižə' de'en chzejni'in che Crist na'anə'? Zse'ejni'iczen'en. De'e Moizezən' gwduxjui'e can' gwna Diozən', gwne':

Nada' Dioz gona' güen len beṇə' ca' cui zjənaquə ṇasyon chia'.

De'e na'anə' gue'ile lega'aque'.

Na' gona' güen len beṇə' ža' ṇasyon ca' beṇə' cui bi chse'ejni'i,

na' de'e na'anə' əža'ale.

²⁰ Na' de'e profet Isaiazən' bito bžebe' gwduxjui'e can' gwna Diozən':

Beṇə' cui besyə'əyilj nada', bedəsyə'ədi'e nada'.

Na' beṇə' cui gosə'əṇab nada', na' beṇə' par niç gwso'ombi'e nada'.

²¹ Na' de'e profet Isaiazən' leczə gwduxjui'e can' gwna Diozən' che beṇə' Izrael ca', gwne': "Do tyempte chaxa' beṇə' ca' cui choso'ozenag chia' par niç yoso'ozenague'. Beṇə' žod beṇə' godenag zjənaquəga'aque' len xtižə'anə'."

11

Diozən' bito bechojlaže'e beṇə' Izrael ca'

¹ Bito cheyalə' goncho xbab de que Diozən' bechojlaže'e chio'o naccho dia che Izraelən'. Leczə beṇə' Izrael nada', za'a lao dia che de'e Abraam, naca' xi'in xesoa de'e Benjamin.

² Bito bechojlaže' Diozən' chio'o naccho dia che Izraelən', chio'on gwleje' gwlaḷte par naccho ṇasyon che'ena'. Legon xbab can' nyojən le'e libr Xtižə' Diozən' can' ben Liazən' orasyonṇə' laogüe'ena' cana', gwne' contr beṇə' Izrael gwlaž che', gwne':

³ "Bagwso'ot beṇə' Izrael quinga profet chio' ca' Xana'. Bagosə'əgo'oniane'e mes de yej chio' gan' cheyalə' əso'elaogüe'e le'. Yetoga nada' zoa' na' leczə chse'ene'ene' so'ote' nada'."

⁴ Pero Diozən' boži'en gože'ene': "Ne'e nita' gaža mil beṇə' bagwleja' par zjənaque' lažə' na'anə' beṇə' cuiṇə' yesə'əzo xibe' to lao lguə'a lsaquə' de'en chse'ejni'alažə' beṇə' de'en nzi' Baal."

⁵ Leczə can' naquən xte ža neža, la'anə'əczə bito naccho beṇə' zan, pero Diozən' bagwleje' chio'o par cho'ela'ochone' chedə' nži'ilaže'e chio'onə'.

⁶ Diozən' gwleje' chio'o par cho'ela'ochone' chedə' chebeine' chaclene' chio'o. Gwleje' chio'o caguə por ni che bichlə de'e güen de'en benchona'. Žala' Diozən' gwleje' chio'o laogüe' bencho de'e güen, bito naquən con to goclenzə de'en gwleje' chio'o.

⁷ Ca naquə beṇə' Izrael gwlaž chia' ca', zane' bito besə'əzelene' naclən' so'one' par niç Diozən' yebeine' lega'aque'. Pero chio'o chonḷilažə'əcho Diozən', cuine'ena' gwleje' chio'o par cho'ela'ochone' na' chebeine' chio'o, la'anə'əczə beṇə' Izrael ca' yeḷa' bito gwse'ejni'ine' bi'in chene'e Diozən'.

⁸ Chac chegə'aque' cans' nyoj Xtižə' Diozən' nan: "Diozən' bene' par niç zjənaque' ca beṇə' cuiczə zjənanṇə' cuiczə zjəntei. Na' xte ža neža gwxaquə'əlebəga'aque'ne' ca beṇə' cui chəsə'əle'i len jlaoga'aquen' na' ca beṇə' ncuez nagga'aquen'."

⁹ Leczə bzoj de'e Dabin' gwne':

Gaquəšga yoguə' de'en chəsə'əbeine'ena' ca to ga gaon lega'aque'

na' ca to ga žjəsə'əxope' na' ca to ga sa'acšgue' castigw.

¹⁰ Yesə'əcholšga yichjla'ažda'oga'aque'ena',

na' yedote yesə'əzaquə'əzi'išgue' can' chzaquə'əzi' beṇə' nlegw cože'enə' no'e yoa' zi'i.

Diozən' babene' par niç balə beṇə' cui zjənaquə beṇə' Izrael chso'onlilaže'ene'

¹¹ Ca naquə bagwo'o yejən' ni'a beṇə' Izrael ca', bito cheyalə' goncho xbab de que leczə gosə'əbiçe'ena'. Pero ca de'en cui bosə'ozenague' che Diozən', goc ca' par niç lenczə le'e cui nacle beṇə' Izrael yechojle xni'a de'e malən' con le'e chonlilaže'əlene'. Na' leczə goc ca' par niç beṇə' ca' cuiṇə' so'onlilaže' Diozən', beṇə' gwsə'aljə lao dia che Izraelən', yesə'əzelaže'e gon Diozən' len lega'aque' can' bachone' len le'e cui nacle beṇə' Izrael, le'e chonlilaže'əlene'.

¹² Na' ca de'en cui bosə'ozenag beṇə' Izrael ca', goc ca' par niç yeziquə'əchlə beṇə' ža' yežlyon' nite'e mbalaz šə so'onlilaže'e Diozən'. Na' ca de'en cuich chon Diozən' cuent che zan beṇə' Izrael ca' de que zjənaque' nasyon che'enə', goc ca' par niç le'e cui nacle beṇə' Izrael zole mbalaz, le'e chonlilaže'əle Diozən'. Naquəchxa de'e mban' gaquə catə' yoguə'əlolte beṇə' Izrael ca' so'one' ca yebei Diozən' lega'aque' de'e yoblə.

¹³ Le'e cui nacle beṇə' Izrael, che'enda' ənezele de que nada' naca' apostol che Diozən' na' bsele'e nada' cho'a xtize'ena' entr le'e cui nacle beṇə' Izrael. Chona' xte ga zelao saquə'ada' par niç zan le'e cui nacle beṇə' Izrael gonlilaže'əle Diozən'.

¹⁴ Chona'an par niç leczə yeziquə'əchlə beṇə' Izrael gwlaž chia' ca' yesə'əzelaže'e gon Diozən' len lega'aque' can' chone' len le'e cui nacle beṇə' Izrael, na' con yoguə' no so'onlilaže' le', yebeje' lega'aque' xni'a de'e malən'.

¹⁵ Diozən' babnite'e zan beṇə' Izrael ca' ca'alə, na' laogüe de'en babnite'e lega'aque' ca'alə babozoe' zan le'e cui nacle beṇə' Izrael binlo len le'. Pero na' gwžin ža cats' gon Diozən' ca yesə'əbiguə' beṇə' Izrael ca' len le' de'e yoblə. Na' lechgualə de'e mban' gaquə catə' baben Diozən' ca besyə'əbigue'e de'e yoblə len le'.

¹⁶ Nezecho de costumbr che chio'o beṇə' Izrael catə' choncho yetxtil chnežwcho Diozən' to blol dao' cuazin', na' zejən de que dolol cuazi nan' naquən' che'. Can' naquən len chio'o beṇə' Izrael. Balcho banon Diozən' chio'o cuent ca xi'ine', pero na' chene'ene' de que yoguə'əcho gaccho xi'ine'. Na' catə' nacho de que to yag naquən che Diozən', leczə che' xoze'e ca'.

¹⁷ Chio'o beṇə' Izrael gwxaquə'əlebecho ca xozə' yag olibən' de'en naquə güen. Na' Diozən' bnite'e balcho ca'alə. Na' de'en bene' ca' gwxaquə'əleben ca de'en chon to beṇə' catə' chchogue' xozə' yaguən'. Na' yoguə' le'e cui nacle beṇə' Izrael gwxaquə'əlebele ca xozə' yag olibo de'en ze yiḅə', na' bene' le'e ca to yag de'e chone' injert, bozoe' le'e lao yag güennə'. Na' loin' noxə'ən le'e na' leczə noxə'ən xoze'e ca' yelə', na' xniže'in chguažə'n le'e na' chguažə'sten xoze'e ca' yelə'.

¹⁸ Bito gaquəle de que naquəchle beṇə' güen cle ca beṇə' Izrael ca', beṇə' ca' gwxaquə'əlebəga'aque' ca xozə' yag de'en gwchoguan'. Caguə le'e chnežwle yelə' mban che lo yag na'anə', sino que lo yag na'alən' chonən le'e yelə' mbanṇə'.

¹⁹ Le'e cui nacle beṇə' Izrael de repent nale: "Gwchogue' xozə' yaguən' par niç bene' neto' injert."

²⁰ Na' de'e liczə can' nalenə'. Na' laogüe de'e cui gwso'onlilaže' beṇə' Izrael ca' Dioz nan', bene' len lega'aque' ca xozə' yag de'en bagwchogue'ena'. Na' babozoe' le'e lguə'a lega'aque' laogüe de'en chonlilaže'əle Cristən'. De'e nan' ža, bito gonle xbab de que Diozən' chebeichene' le'e cle ca beṇə' Izrael ca', sino leso legon xbab par sotezə sole gonlilaže'əlene'.

²¹ Diozən' bito gwzi'ixene' che beṇə' ca' chsaquə'əlebene' ca xozə' yaguən' de'en zjənaquə doalje, na' leczə bito si'ixene' che le'e šə bito sotezə sole gonlilaže'əlene'.

²² Legonšc xbab chele can' nzi'ilaže' Diozən' beṇə' chso'onlilaže' le', na' can' chbejyichje' beṇə' cui chso'onlilaže'ene'. Diozən' gwlejyichje' beṇə' Izrael ca' besə'əxopə cui gwso'onlilaže'ene', na' nzi'ilaže' le'e cui nacle beṇə' Izrael laogüe de'en chonlilaže'əlene'. Pero šə cui sotezə sole gonlilaže'əlene', leczə cuejyichje' le'e.

²³ Na' de'e yoblə Diozən' yozoe' beṇə' Izrael ca' na' yeyone' lega'aque' injertar lao xozə' yaguən' šə so'onlilaže'e Cristən'. Diozən' nape' yelə' guac par gone' ca' len lega'aque'.

²⁴ Le'e nacle ca xozə' yag olibo de'e ze yiḅə', na' gwchog Diozən' le'e, na' bene' le'e injertar bozoe' le'e lao xozə' yag olibo güennə'. Bezole gocle injertar lao xozə' yag olibo güennə', len caguə nacle xoze'e doaljen'. Nezecho leczə gwžin ža cats' yeyon Diozən' injertar de'e yoblə xozə' yag olibo de'e ca' zjənaquə xoze'e doalje.

Gwžin ža yebej Diozən' yoguə' beṇə' Izrael ca' xni'a de'e malən'

²⁵ Beṇə' bišə', che'enda' ənezele de'e nga de'e cui no gwneze antslə par niç cui gaquəle de que yelə' beṇə' sin' chelen' nzi'ilaže' Diozən' le'e. Balə beṇə' Izrael ca' zjənaquə' beṇə' yichj žod, bito chse'ejni'ine' bi'in chene'e Diozən'. Na' nic se'ejni'iczene'en xte que catə'əch əžin ža bach de yelə' mban zejlicane che beṇə' ca' cui zjənaquə beṇə' Izrael, con yoguə' beṇə' ca' əgwnežjo Diozən' yelə' mban chega'aque'.

²⁶ Nach yoguə' beṇə' Izrael ca' yebej Diozən' lega'aque' xni'a de'e malən' can' nyojczə Xtize'ena', nan:

To beṇə' syoda Sion yebeje' beṇə' xni'a de'e malən'.

Na' yelə' güen de'e mal che xi'in dia che de'e Jacobən', le' yeque'en.

²⁷ Na' de'e ngan' chona' lyebe gona' len xi'in dia che de'e Jacobən', yeca'a de'e mal chega'aque'enə' de'en chso'one'enə'.

²⁸ Can' naquən. De'en chso'on beṇə' Izrael ca' contr Diozən', bito chse'ejle' che dižə' güen dižə' cobə che'enə', de'e na'anə' Diozən' gwleje' le'e cui nacle beṇə' Izrael par gone' le'e cuent len nasyon che'enə'. Pero Diozən' chaquene' chega'aque' laogüe de'en gwleje' de'e xaxta'oga'aque'enə' par gwsa'aque' nasyon che'.

²⁹ Na' Diozən' bito cheyeyene' che de'e ca' chnežjue' beṇə'chən', na' nic cheyeyene' che beṇə' ca' mbeje' par zjənaque' nasyon che'enə'.

³⁰ Ca naquə le'e, antslə bito bzenagle che Diozən', pero na'a ža bachzenagle che' na' bacheyašə' cheži'ilaže'e le'e laogüe de'en cui bosozə' beṇə' Izrael ca' che'.

³¹ Diozən' cheyašə' cheži'ilaže'e le'e laogüe de'en cui choso'ozə' beṇə' Izrael ca'. Pero gwžin ža catə' leczə yeyašə' yeži'ilaže'e beṇə' Izrael ca' de'e yoblə.

³² Diozən' gwlejiyichje' yoguə' beṇə'chən' par nič cui bosozə' beṇə' Bene' ca' par nič leczə yeyašə' yeži'ilaže'e yoguə'əlołga'aque'.

³³ Lechguale beṇə' sin' Diozən'. Nezene' yoguə'əloł. Bito gaquə ənezecho de'en nžie' bia' gaquə. Bito gaquə šejni'yaṇe'echo de'en chone'enə'.

³⁴ Nyoj Xtiže'enə' nan: "Bito gaquə ənezecho yoguə' xbab che Xancho Diozən'. Bito bi de de'e əgwsəd əgwlo'ichone' chio'o."

³⁵ Na' nan: "Bito gaquə goncho byen chixjw Xancho Diozən' šə biclə de'e babe'echone'."

³⁶ Diozən' bene' yoguə'əloł, bene' bia chsa'aš, bene' beṇə'ch, na' yeziqūə'əchlə de'e zjəde. Diozən' chgüia chye' yoguə'əloł, chgüia chye' beṇə'chən' na' bia chsa'aš na' yoguə' cuantza de'e zjəde. Len' bene' beṇə'ch na' yeziqūə'əchlə de'e zjəde par nič si'e yelə' bala'an. Ledoye'ela'ochə' zejlicaṇe. Can' gonšgaczho.

12

Cheyalə' gon cuincho lažə' na' Diozən'

¹ Beṇə' bišə', bacheyašə' cheži'ilažə' Diozən' chio'o. De'e na'anə' chneyoida' le'e legon cuerp chelen' lažə' na' Diozən' na'a mbanle. Le'e güe'en ca to regal. Cheyalə' gaccho beṇə' la'azda' xi'ilažə' par nič gon cuincho lažə' na' Diozən' chedə' can' cho'olaže'e. Šə choncho ca', do yichj do lažə'əchon' cho'ela'ochone'.

² Bito goncho can' chso'on beṇə' ca' cui zjənombia' Diozən'. Cheyalə' güe'echo latjə par nič Diozən' gwšə'e xbab chechon', par nič ənezecho bi'in chene'ene'. Diozən' chene'ene' goncho de'en naquə de'e güen na' con yoguə' de'en cho'olaže'e.

³ Diozən' bano'e čhia' naca' apostol na' de'e na'anə' zaquə'ən ənia' naquən' cheyalə' goncho. Bito cheyalə' gon cuincho xən, sino que syempr goncho xbab de que no'e che to tocho chonlilažə'əchone' bi xšine'enə' goncho na' bito gaquə goncho xšine'enə' žalə' le' cui claclene' chio'o.

⁴ Zan part nsa' cuerp chechon'. Pero to to partan' cagua tozə žin de'e chso'onən.

⁵ Leczə can' naquan len chio'o. Beṇə' zannə' naccho chonlilažə'əcho Cristən', pero yoguə'əcho ngoda'əcho t xen len le' na' gwxaquə'əlebecho ca tozə cuerp.

⁶ Diozən' lao yelə' chaclen chen' len chio'o, no'e checho de que gwde gwdele de'e gaquə gon to tocho. Šə bałcho chac chixjue'echo bi de'en bagwna Diozən' chio'o cheyalə' chixjue'echon segon can' bano'e Diozən' checho laogüe de'en chonlilažə'əchone'.

⁷ Šə Diozən' bano'e checho gaquəlencho beṇə', cheyalə' gaquəlenchone' do yichj do lažə'əcho. Na' šə Diozən' bano'e checho əgwsəd əgwlo'icho beṇə', cheyalə' əgwsəd əgwlo'iga'aquechone' binlə.

⁸ Šə Diozən' bano'e checho əneyoicho beṇə' yoblə par so'one' de'e güen, cheyalə' sotezə socho əneyoiga'aquechone'. Na' šə bano'e checho bi de'e əgwnežjwcho beṇə' yoblə, cheyalə' gwnežjwchon do yichj do lažə'əcho. Šə bano'e checho gaccho beṇə' bla' par əggüia əgwy'e ljuežj chio'o cho'ela'ochone', cheyalə' cue' yichjcho par əggüia əgwyega'acchone' can' chene'e Diozən'. Šə noe' Diozən' checho yeyašə' yeži'ilažə'əcho beṇə' yoblə, cheyalə' yebeicho na' yeyašə' yeži'ilažə'əchone'.

Can' cheyalə' gon nota'ətezcho chonlilažə'əcho Cristən'

⁹ Cheyalə' gaque che ljuežjcho do yichj do lažə'əcho. Na' cheyalə' cuejyichjcho de'e malən' na' gue'ichon, par nič ca' zejli goncho de'e güenna'

¹⁰ Can' cheyalə' gaquecho che bišə' goljcho, ca'aczən' cheyalə' gaque che ljuežjcho. Cheyalə' gapəchcho respet beṇə' ljuežjcho clezə ca cuincho.

¹¹ Bito gaccho beṇə' xagüed. Do yichj do lažə'əcho goncho bitə'əteza de'en goncho, con yogua' de'en chene'e Xancho Diozən' goncho.

¹² Na' cheyalə' yebeicho chedə' nezecho soch Diozən' gone' güen len chio'o. Lecza cheyalə' co'o gwchejlažə'əcho catə' chyi' chzaquə'əcho. Na' lecza cheyalə' gontezə goncho orasyon do tyempte.

¹³ Cheyalə' gaquəlencho šə bi de'e chesə'əyažje beṇə' ljuežjcho beṇə' ca' bagwlej Diozən' par zjənaque' lažə' ne'enə'. Na' cheyalə' yeyaše'echo beṇə' zita'.

¹⁴ Cheyalə' ṇabcho gaquə de'e šao' de'e güen che beṇə' choso'o'chi' choso'osaquə' chio'o. Cheyalə' ṇabcho gaquə de'e güen chega'aque', caguə de'e mal.

¹⁵ Cheyalə' yebeicho txen len beṇə' chasyə'əbei. Cheyalə' cuežcho len beṇə' chəsə'əbež.

¹⁶ Yogua'əcho cheyalə' goncho tozə xbab checho. Bito ga'alazə'əcho. Cheyalə' yolgüižicho beṇə' yašə' beṇə' cui bi chac, na' bito gon cuincho beṇə' sin'.

¹⁷ Šə bi de'e mal chon beṇə' len chio'o, bito əṇacho lecza de'e mal yoži'ichon len le'. Cheyalə' cue' yichjcho par niçh goncho de'e güen, par niçh yesə'əna yeziquə'əchlə beṇə' de que le naquəczə güen de'en chonchonə'.

¹⁸ Cheyalə' goncho xte ga zelao saquə'əcho par niçh ca' socho binlo len yogua'əloj beṇə'.

¹⁹ Beṇə' bišə' dao', cheyalə' əgwzej əgwdecho ca'alə bitə'əza de'en chso'one beṇə' chio'o. Gwyeczə Diozən' nac gone' len beṇə' ca' chçhi' chsaquə' chio'o. Xtize'ənə' nyojən nan: "Quinga na Xancho Diozən': Nadan' co'olažə'ane' na' nadan' gona'ane' castigw."

²⁰ Na' lecza nan: "Šə beṇə' contr chechonə' chbil chdone', cheyalə' güe'echone' de'e ye'ej de'e gaogüe'. Šə goncho güen len le' de repent lechguale yeyejene' che de'e malən' chone' len chio'o."

²¹ Catə' chso'on beṇə' de'e malən' len chio'o, bito güe'echo latjə ṇabia' de'e malən' chio'o par yoži'icho de'e mal len lega'aque'. Yoži'icho de'e güenṇə' len lega'aque' par niçh yesə'əyeyene' che de'e malən' chso'one'.

13

¹ To tocho cheyalə' əgwzenagcho che jostis ca' beṇə' ca' chəsə'ənabia', chedə' Dioz nan' nite'e yogua'əlojga'aque' par niçh chəsə'ənabi'e.

² Šə bito chzenagcho che jostis ca', choncho contr de'en nzia Diozən' bia' goncho. Na' šə bito chzenagcho chega'aque', chyljzə xtolə'əchon' par gaccho castigw.

³ Ca naquə jostis ca' beṇə' ca' chəsə'ənabia', bito cheyalə' žebga'acchone' šə choncho de'e güen, pero beṇə' ca' chso'on de'e mal, lega'aque' cheyalə' yesə'əžebe' jostis ca'. Šə chene'echo socho sin cui žebcho jostis ca', cheyalə' goncho de'e güen par niçh ca' yesə'əna jostis ca' de que de'e güenṇə' choncho.

⁴ Jostis ca' chso'one' xšin Diozən' par niçh socho güen. Pero šə choncho de'e mal, cheyalə' žebga'acchone'. Caguə con zjəndolə'alizene' yelə' chnabia' na'anə', par so'one' castigon' zjəndolə'ene'en, chedə' Diozən' banežjue'en ca xšin beṇə' jostis ca' chso'one' castigw beṇə' ca' chso'on de'e malən'.

⁵ De'e nan' cheyalə' əgwzenagcho che jostis ca' par niçh cui si'icho castigw, na' lecza par niçh gache'icho lo'o yichjla'ažda'ochon' de que de'e güenṇə' choncho.

⁶ Na' lecza de'e na'anə' cheyalə' çhixjwcho no che bien na' goncho no žinlao'. Con yogua' de'e yoso'ochixjue' chio'o na' šə bi de'e yoso'ogone' chio'o, cheyalə' gwzenagcho chega'aque' chedə' Dioz nan' chone' mendad goncho ca'.

⁷ Çhixjwcho šə bi chalə'əcho che beṇə'. Šə chalə'əcho gwzon che beṇə', yogu'o'ochon. Šə chalə'əcho che bien, çhixjwchon. Šə chalə'əcho che impuest, çhixjwchon. Na' gapcho respet beṇə' cheyalə' ədap respet. Na' güe'ela'ocho beṇə' cheyalə' əye'elao'.

⁸ Ni to cui no galə'əcho çhei sin cui çhixjwchon. Na' de'en naquə de'e žialao goncho, gaquecho che sa'aljuežjcho tocho yetocho. Na' šə bachaque che sa'aljuežjchon', bachonczcho can' non lei che Diozən' mendad goncho.

⁹ Lein' nan: "Bito co'o xtole na' bito cuejyichjle be'en chele o no'ol chele par solenle beṇə' yoblə, bito gotle beṇə', bito cuanle, bito gacle testigw fals, bito selažə'əle bitə'əteza de'e de che beṇə'." Na' dech de'en na lein', pero na' šə choncho can' nyojən nan: "Legaque che sa'aljuežjle catg chaque che cuinle", lecza chonczcho complir yogua' de'e ca' yelə' de'en nanṇə'.

¹⁰ Bazoczcho choncho cuaselol can' na lein' šə chaquecho che yeziquə'əchlə beṇə'. Chedə' šə chaquecho chega'aque' bitobi de'e mal goncho contr lega'aque'.

¹¹ Catə'an gwzolaə benlilažə'əcho Cristən' gwnezecho gwžin ža yide' de'e yoblə. Na' na'a bazon baözə əžin ža əžin orən' yide'. De'e na'anə' bitoch cheyalə' gaccho ca beṇə' chtas, beṇə' cui bi xbab chon.

¹² Na' ca naquən' bazon əzin ʒa par yide'enə, cheyalə' cuejyichjcho cuich goncho de'e malən' de'en bencho catə'an ne'e nchol lo'o yichjla'ažda'ochon'. Na' na'a bagwyo'o be'eni' che Diozən' lo'o yichjla'ažda'ochon' cheyalə' goncho de'e güen.

¹³ Le'e do gonch can' cheyalə' goncho na'a bayo'o be'eni' che'enə' lo'o yichjla'ažda'ochon'. Bito cheyalə' lencho lni gan' chac scandl, na' bito cheyalə' gaccho be'nə' güe'e zo, na' be'nə' zargat, na' be'nə' ggo'o xtoi. Na' leczə bito cheyalə' tilələn ljuējzjcho, na' bito gue'icho be'nə'.

¹⁴ Cheyalə' gon cuincho lažə' na' Xancho Jesocristən' par niç gaquə yichjla'ažda'ochon' can' naquə yichjla'ažda'ogüe'enə, na' bito goncho can' chene'e la'ažda'omalchon' goncho.

14

Bito cheyalə' ənacho che ljuējzjcho de que de'e malən' chso'one'

¹ Šə to be'nə' bachonlilažə'e Cristən' nechaczəjlažə'e na' bito ne'e šejni'ine' naquən cheyalə' gone', legwlene' par gaque' txen len le'e. Pero can' naquə xbab che'ena', bito cheyalə' gaquəyožlene'.

² Zo be'nə' chone' xbab de que bito nape' dolə' šə gaogüe' bitə'ətezə yelə' guao. Pero zo be'nə' bito ne'e šejni'ine' šə gwaquə gaogüe' bitə'ətezə yelə' guao sin cui gape' dolə', na' de'e na'anə' šə chaogüe' porzə yixə' cuan.

³ Ben' chao bitə'ətezə yelə' guao bito cheyalə' gue'ine' ben' cui chao bitə'ətezə yelə' guao. Na' ben' cui chao bitə'ətezə yelə' guao bito cheyalə' əne' che ben' che'ej chao bitə'ətezə de que malən' chone' che'ej chaoteze'. Nezecho de que Dioz nan' banone' çhopte' ca xi'ine'.

⁴ ¿Noxa naquə chio'o na'anə' par əgwlažə' checho šə nac chon ben' bagwcuə' Diozən' ca xi'ine'? Dioz nan' naque' Xan xi'ine' ca' na' le'enə' nezene' che to tocho šə choncho güen o šə choncho mal. Na' Xancho Cristən' gone' ca šejczcho goncho de'e güen çhedə' nape' yelə' guac par gone' ca'.

⁵ Nita' be'nə' chso'one' xbab de que nchoj to ʒa xen na' de'e žialao lao yoguə' ʒa ca' yelə'. Pero na' leczə nita' be'nə' chso'one' xbab de que tozəczə can' zjənaquə yoguə'əte ʒa ca'. To tocho cheyalə' socho do yichj do lažə'əcho gonlilažə'əcho de que choncho can' cheyalə' gonchonə'.

⁶ Be'nə' ca' chso'on xbab de que de ʒa de'e žialaoch cle ca ʒa ca' yelə' chso'one' xbabən' ca' par chso'elaogüe'e Xancho Cristən'. Na' be'nə' ca' chso'on xbab de que tozəczə can' zjənaquə yoguə'əte ʒa ca', leczə de'en chso'elaogüe'e Xancho Crist nan' chso'one' xbabən' ca'. Na' ben' chao bitə'ətezə yelə' guao, chaogüe'en par cho'elaogüe'e Xancho Cristən', çhedə' leczə yelə' choxçwlen che Dioz nan' cho'e. Na' ben' cui chao bitə'ətezə yelə' guao leczə par cho'elaogüe'e Xancho Crist na'anə' cui choe'ənen çhedə' leczə chnežjue' yelə' choxçwlen che Diozən'.

⁷ Ni to chio'o cui zocho par niç goncho con de'e bia'azəlažə'əcho. Na' ni to chio'o cui gatcho šə tant chene'echo gatcho.

⁸ Lao zocho mbancho, zocho par goncho can' chene'e Xancho Cristən'. Na' gatcho catə'an əne' gatcho. Can' naquən gatcho o mbancho, naquəczcho lao na' Xancho na'anə'.

⁹ Par nan' got Cristən' na' beyas bebane' de'e yoblə ladjo be'nə' guat ca' par niç ca' naque' Xan be'nə' zjəmban na' Xan be'nə' bagwsa'at.

¹⁰ Pero bito cheyalə' ənacho de que be'nə' bišə'əcho ca' zjənapə' dolə' šə por ni che de'en cui chso'one' can' choncho na'azən'. Na' leczə bito cheyalə' gue'icho be'nə' bišə'əcho ca'. Yoguə'əcho techo lao Cristən' par əçhogbi'en checho šə de xtolə'əcho o šə cui bi de.

¹¹ Nyojczə gan' na Xancho Diozən' ne':

De'e li nada' naca' Dioz zoa' mbanə',
na' de'e na'anə' yoguə' be'nə' desə'əzo xibe' laogua'anə'
na' yogue'e əso'elaogüe'e nada'.

¹² Can' naquən, yoguə'əchon' əgwdecho cuent lao Diozən' šə biquə' de'e babencho lao bguancho.

Bito goncho ca yesə'əxopə be'nə' yoblə so'one' de'e mal

¹³ Na' bito cheyalə' ənacho che ni to be'nə' bišə'əcho ca' de que zjənapə' dolə' šə por ni çhezə cui chso'one' can' choncho na'anə' ənacho çhega'aque' ca'. Pero chio'o cheyalə' cuejyichjcho cuich goncho bichlə de'en choncho šə chonan par niç be'nə' bišə'əcho ca' chsa'aczəjlažə'e o chesə'əxopə' chso'one' de'e malən'.

¹⁴ Bitobi yelə' guao de de'e chonən manch yichjla'ažda'ochon', nada' nezdə' çhedə' ngoda'a txen len Xancho Jeso'osən'. Pero šə to be'nə' chone' xbab de que de yelə' guao de'e chonən manch yichjla'ažda'ochon', par len' naquən mal šə gaogüe'en.

¹⁵ Šə por ni che bi yelə' guao de'en chaonənə' chaque be'nə' bišə'əchonə' tolə, bitoch cheyalə' gaochon, çhedə' por ni che be'nə' bišə'əcho na'anə' Cristən' bnežjw cuine' gwsə'ot be'nə' le'. De'e na'anə' cheyalə' gaquecho che' na' bito goncho ca cuejyichje' cuich gonlilažə'e Cristən' na' cuiayi'e.

¹⁶ Šə choncho to de'e chaquecho naquən güen par chio'o pero par beṇə' bišə'əcho ca' naquən mal, bito gonchon par niḅ cui yesə'əne' choncho de'e mal.

¹⁷ Šə bazocho chnabia' Diozən' chio'o, de'en che'ej chaochon' bito naquən de'e žialao xen. De'e naquə de'e žialao xen šejcho liĉha, socho binlo len beṇə' yoblə na' gon Spirit ĉhe Diozən' ca socho mbalaz.

¹⁸ Ben' zda liĉha, na' zoe' mbalaz, na' zoe' binlo len beṇə' yeziqə'əchlə, bena'anə' cho'elao' Cristən', na' bito cheyalə' chebeine' le', na' yeziqə'əchlə beṇə' leczə chəsə'əne' de'e güennə' chone'.

¹⁹ De'e na'anə' cheyalə' goncho ca socho binlo tocho yetocho, na' leczə ca' gaquəlen ljuėžjcho par niḅ ca' gonliĉlažə'əchcho Diozən'.

²⁰ Diozən' babebeje' ljuėžj chio'o chonliĉlažə'əchone' xni'a de'e malən' par niḅ so'one' de'e güen. Na' bito cheyalə' goncho par niḅ so'one' de'e malən'. De'e na'anə' šə por ni ĉhe de'en chaocho to de'en chaocho na'azən' gonən par niḅ beṇə' bišə'əchon' gone' de'e malən', bitoch cheyalə' gaochon. Bito bi yelə' guao de de'e chonən manch yichjla'ažda'ochon'. Pero malən' choncho šə chaocho de'en chon par niḅ beṇə' bišə'əchonə' gone' de'e malən'.

²¹ Nca' ala xnezen' cuich gaocho belə'anə' na' niqə'əch ye'ejcho binon', na' nic goncho bichlə de'en choncho šə chonən par niḅ beṇə' bišə'əchonə' gaquəžejlaže'e o əxope' gone' de'e mal o cui gwzenague' ĉhe Diozən'.

²² Šə choncho xbab de que bito naquən dolə' ca de'en choncho bitə'ətezə de'en choncho, ĉopzcho lencho Dioz nan' nezecho. Bito ye'echo beṇə' yoblə so'one' can' chaque chio'o güen goncho. Šə bito chacžejlažə'əcho ĉhe bitə'ətezə de'en choncho de que naquən güen, nachən' zocho mbalaz.

²³ De xtolə' ben' chao to yelə' guao šə chacžejlaže'e chaquene' de que bitolja cheyalə' gaogü'e'ennə', ĉedə' bito chonliĉlaže'e de que de'e güennə' chone' chaogü'e'en. De xtolə'əcho šə choncho bitə'ətezə de'en chaquecho bito cheyalə' goncho. Napcho dolə' ĉhedə' cabi chonliĉlažə'əcho de que de'e güennə' choncho par chio'o.

15

Bito goncho porzə de'en əna chio'o

¹ Chio'o bachejni'išaogü'e'echo na' banezecho naquən' cheyalə' goncho. De'e na'anə' cheyalə' gapcho yelə' chxenlažə' len beṇə' ca' chse'ejni'i lata'əlaszə. Bito cheyalə' goncho con porzə de'en əna chio'o.

² Cheyalə' goncho de'e güen de'e chsa'azlažə' sa'aljuėžjcho, par niḅ ca' so'onliĉlažə'əche' Diozən'.

³ Goncho ca' ĉhedə' ni Cristən' bito bene' con de'e gwyazlažə'əzə le'. Na' nyojczən de que Cristən' gože' Diozən': "Beṇə' contr ĉhio' ca' tant chəsə'əže'e le', na' lena' boso'ožia boso'onite'e."

⁴ Na' Xtižə' Diozən' de'en boso'ozoj beṇə' cana' nyojən chzejni'in chio'o, par niḅ zotezcho chgo'o ĉhĉejlažə'əcho catə' de de'en chsaquə'əzi'icho. Na' Xtižə' Diozən' de'en nyojən leczə ĉtipə'əchən lažə'əcho. De'e na'anə' zocho lez gaquə güen ĉhecho de'en gon Diozən' len chio'o.

⁵ Diozən' chone' par zotezcho chgo'o ĉhĉejlažə'əcho bitə'ətezə de'en chac ĉhecho na' ĉtipe' lažə'əcho. Na' na'a ĉhṇaba' gone' par niḅ tozə ca gaquə yichjla'ažda'olen', ĉhedə' can' ĉhene'e Cristo Jeso'osən'.

⁶ Chṇaba' gone' ca' par niḅ tozə ca nale güe'ela'ole Diozən', Xa Xancho Jesocristən'.

Cristən' bene' par niḅ beṇə' ca' cui zjənaquə beṇə' Izrael gaquə əso'elaogü'e Diozən'

⁷ Ca' ža, le'e so güen tole yetole can' ben Cristən' gwcue'e to tocho ca xi'ine'. Legon ca' par niḅ Diozən' si'e yelə' bala'an.

⁸ Echnia' le'e de que Cristo Jeso'osən' bide' par goclene' zgua'atec beṇə' Izrael ca'. Bedayene' complir ca lyebe de'en ben Diozən' len xaxtao' chio'o beṇə' Izrael, par niḅ blo'e de que Diozən' cho'e dižə' li.

⁹ Na' leczə bidə Cristən' par niḅ beṇə' ca' cui zjənaquə beṇə' Izrael guaquə əso'elaogü'e Diozən' de'en cheyašə' ĉheži'ilažə' Diozən' lega'aque'. Chac can' nyoj Xtižə' Diozən' nan:

De'e nan' ža güe'elaogua'a le',

gola' gan' ža' beṇə' ca' cui zjənaquə beṇə' Izrael par güe'elaogua'a le'.

¹⁰ Na' yeto gan' nan:

Le'e cui nacle beṇə' Izrael, leyebei txen len beṇə' Izrael ca', beṇə' ca' gwlej Diozən' par zjənaque' nasyon ĉhe'.

¹¹ Na' leczə nan:

Yoguə' le'e cui nacle beṇə' Izrael, legü'e'elao' Xancho Diozən'.

Yoguə'əle cheyalə' güe'ela'olene'.

¹² Na' leczə de'en bzoj de'e profet Isaiazən' nan:

To beṇə' yidə ben' za' lao dia che de'e Isain'.

Le' nabi'e yoguə'əloḷ beṇə'.

Na' balə beṇə' ca' cui zjənaquə beṇə' Izrael yesə'əbeze' gaquəlen be'ena' za'ana' lega'aque'.

¹³ Diozən' chone' par niç nezecho zotezə zoe' chaclene' chio'o. Na' gonšgue' par niç sole mbalaz juisy na' so cuezle binḷo juisy len xbab de'en yo'o lo'o yichjla'ažda'olen' laogüe de'en chonlilažə'əle Cristən'. Na' šə bazole mbalaz juisy na' bachzo chbezle binḷo juisy len xbab de'en yo'o lo'o yichjla'ažda'olen', nachən' Spirit che Diozən' gonən par sotezə sole yebeile de'en gaquəlench Diozən' le'e.

¹⁴ Beṇə' bišə, nezdə' de que Diozən' babene' par niç nacle beṇə' güenchgua' na' chejni'ichgüeile. Nezdə' chac choe' ljuēžjle consejw tole yetole.

¹⁵ Pero de'en gwlej Diozən' nada' par gona' xšine'ena' cheyaxjda' chzoja' le'e clar che de'e ca' banezczele par niç yosa'alažə'əga'aclen.

¹⁶ Gwleje' nada' par niç chona' xšin Jesocristən' ladjo beṇə' ca' cui zjənaquə beṇə' Izrael. Na' cho'elega'aca'ane' dižə' güen dižə' cobə che Diozən' par niç Diozən' yebeine' lega'aque' cats' so'onlilažə'ene'. Na' Spirit che'ena' gonən par niç əsa'aque' beṇə' la'aždao' xi'ilažə' par niç Diozən' šo'olažə'e lega'aque'.

¹⁷ De'en ngoda'a txen len Cristo Jeso'osən' chebeida' cho'a dižə' che xšin Diozən' de'en chona'.

¹⁸ Bito cheyaxjda' gua'a dižə' che bi de'e baben beṇə' yoblə, sino cho'a dižə' che de'en baben Cristən' ca' naquən' goclene' nada' chona' xšine'ena'. Le' bene' par niç bia'a dižə' len beṇə' ca' cui zjənaquə beṇə' Izrael, na' goclene' nada' bena' ca' par niç balə' bachoso'ozenague' che'.

¹⁹ Spirit che Diozən' goclenən nada' len yelə' guac cheina' par niç bena' miḷagr na' bichlə de'e zaquə' yesə'əbane beṇə'. Goclenən nada' par niç babi'a dižə' güen dižə' cobə de'e chzejni'in che Cristən' doxen, gwzolaozo' Jerosalennə' bi'an, nach bežintia' gan' nzi' Ilirico.

²⁰ Babena' byen baji'a dižə' güen dižə' cobə de'en chzejni'in che Cristən' gan' ža' beṇə' cuiṇə' se'ene len. Bitə gwya'a ga bajse'eczə beṇə' yoblə xtižə' Cristən'.

²¹ Can' nyojczə Xtižə' Diozən' nan:

Ca' naquə beṇə' ca' cui nonə' chixjue'i lega'aque' xtižə' Diozən', lega'aque' yesə'əneze'nen.

Na' beṇə' ca' cuiṇə' se'enen, se'ejni'ine'en.

Pabən' bene' xbab šeje' Roman'

²² Ca' chaquən' ža, zan las catə'an go'onda' yida' gan' nitə'əlen' bito goquə yida'.

²³ Cana'aten' zelažə'a yida', pero xte na'ach babeyož bena' de'en nžia' Diozən' bia' gona' latjə nga.

²⁴ Na' catə' ša'a Espanan' cana' che'enda' tia' əgwlanə'a le'e. Mbalaz soa' yeyož əgwlanə'a le'e, nach gaquəlenle nada' par ša'a Espanan'.

²⁵ Pero na'a yeya'a Jerosalennə' žjəyesana' de'e chəsə'əyažje beṇə' ca' nitə'əna', beṇə' ca' bagwlej Diozən' par zjənaque' lažə' ne'ena'.

²⁶ Beṇə' Masedonia ca' na' beṇə' Acaya ca' gwsa'azlažə'e boso'otobe' mechən' par beṇə' yašə' prob ca' ža' entr beṇə' ca' bagwlej Diozən' par zjənaque' lažə' ne'ena' beṇə' nita' Jerosalennə'.

²⁷ Na' de'en gwsa'azlažə'e boso'otobe' mechən' naquən to goclen de'e cheyalə' yesə'əyontocze' len beṇə' Izrael ca'ana'. Caguə beṇə' Izrael lega'aque', pero bazjəlene' beṇə' Izrael ca' chəsə'əzi'e de'en chaclen yichjla'ažda'oga'aque'ena', na' de'e na'ana' cheyalə' sa'aclene' beṇə' Izrael ca' len de'en chəsə'əyažj chəsə'əchinene'.

²⁸ Catə' yeya'a Jerosalennə' žjəyenežjoga'aca'ane' mechən' de'en bdbə'n', cana' tia' əgwlanə'a le'e catə'an ša'a Espanan'.

²⁹ Nada' nezdə' catə' la'a gan' nitə'əlen' na' güe'elencha' le'e dižə' güen dižə' cobə che Cristən', lechgualə mban' gon Diozən' len chio'o.

³⁰ Chaquecho che Xancho Jesocristən' na' Spirit che Diozən' chonən par niç gaque che ljuēžjcho tocho yetocho. De'e na'ana' ža beṇə' bišə, chnaba' goclen len le'e gacle nda' txen goncho orasyon lao Diozən' xte ga zelao saque'echo par niç gaquəlene' nda'.

³¹ Nabechone' gone' ca' cui gaca' lao na' beṇə' Jodea ca', beṇə' ca' cui chso'onlilažə' Cristən', na' leczə nabcho par niç beṇə' Jerosalen ca' beṇə' ca' bagwlej Diozən' par zjənaque' lažə' ne'ena' so'olažə'e de'en güe'ega'aca'ane'ena'.

³² Can' goncho orasyonə', na' šə Diozən' güe'e latjə, nada' yebeida' yida' delana'a le'e, na' gona' dezcanz gan' nitə'əlena'.

³³ Diozən' ben' chon par chzo chbezcho binḷo len xbab de'en yo'o lo'o yichjla'ažda'ochon', gaquəlene' yoguə'əle. Ca'ašgacən' gaquə.

16

Pabən' chguape' diox beṇə' ca' nombi'e

¹ Chñeyoida' le'e legon t xen len beṇə' zanco Febe catə'an le'e gan' zolenə'. Lene' nchoje' naque' comisyon che beṇə' ca' chəsə'əđopə chəsə'əžag chso'elaogüe'e Jesocristán' lao yež Sencrean'.

² Legon t xen len le', cheda' can' cheyałə' gon chio'o naccho lažə' na' Diozən'. Can' chonlilažə'əcho Xancho Jesocristán' leczə can' chonlilažə' Feben' le'. Legaclene' šə bi de'e chyažj chčhinene', cheda' beṇə' zan bagoclene', na' leczə ca' bagoclene' nada'.

³ Legguap Prisilan' na' be'en che' Aquilan' diox. Lega'aque' bagwso'one' žin che Cristo Jeso'osən' t xen len nada'.

⁴ Boso'osanlažə' cuinga'aque' sa'ate' par gwsa'aclene' nada' nič cui gwso'ot beṇə' nada'. Chsela'a yelə' choxcwlen čega'aque' can' gwso'one', na' leczə ca' yogua' beṇə' cui zjənaquə beṇə' Izrael beṇə' ca' chəsə'əđopə chəsə'əžag chso'elaogüe'e Diozən' ga yoblə leczə choso'osele'e yelə' choxcwlen čega'aque'.

⁵ Legguap diox beṇə' ca' chəsə'əđopə chəsə'əžag liž Prisilan' na' Aquilan' chso'elaogüe'e Diozən'. Leczə legguap diox Epeneton' be'ena' chacda' čhei. Le' naque' beṇə' nech beṇlilaže'e Cristən' entr beṇə' Acaya ca'.

⁶ Legguap diox Marian', la' babenchgüe' žin par le'e.

⁷ Legguap diox beṇə' gwlaž chia' Andronico na' Jonias. T xen gotə'əto ližya len lega'aque'. Na' lega'aque' zjənaque' beṇə' blao entr neto' apostol, na' lega'aque' byob gwso'onlilaže'e Cristən' ca nada'.

⁸ Legguap diox Ampliasən'. Chonlilaže'e Xancho Cristən', na' chacda' čhe'.

⁹ Legguap diox Orbano ben' chon t xen len chio'o choncho xšin Cristo Jeso'osən', na' leczə ca' Estaquis be'ena' chacda' čhei.

¹⁰ Legguap diox Apeles ben' bablo'echgua de que chonlilaže'e Cristən'. Leczə legguap diox beṇə' ca' nitə' liž Aristobolo.

¹¹ Legguap diox beṇə' gwlaž chia' Erodion, na' beṇə' nitə' liž Narsison' beṇə' chso'onlilažə' Xancho Cristən'.

¹² Legguap diox Trifena na' Trifosa beṇə' güen žin che Xanchon'. Na' leczə ca' legguap diox Persida be'ena' chacda' čhei. Babenchgüe' xšin Xanchon'.

¹³ Legguap diox Rofo. Le' naque' beṇə' blao entr chio'o chonlilažə'əcho Xanchon'. Na' leczə legguap diox xne'ena' be'ena' leczə naquə ca xna'a.

¹⁴ Legguap diox Asincrito, Flegonte, Ermas, Patrobas, Ermes na' len beṇə' bišə'əcho ca' nitə' len lega'aque'.

¹⁵ Legguap diox Filologo na' Jolia na' Nereo na' beṇə' zane', na' Olimpás, na' yogua' beṇə' yeziquə'əchlə nitə' len lega'aque' beṇə' ca' bagwlej Diozən' par zjənaque' lažə' ne'ena'.

¹⁶ Na' cata' chežagle leyolguiž ljuežjle dižə' šao' par nič gacbia' de que chaque che ljuežjle. Na' beṇə' ca' nitə' nga na' len beṇə' ca' nitə' ga yoblə chəsə'əđopə chəsə'əžag chso'elaogüe'e Cristən', yogua'əga'aque' choso'oguape' le'e diox.

¹⁷ Chñeyoida' le'e beṇə' bišə' par gapple cuidad len beṇə' ca' zjənaquə beṇə' gotil' na' chso'one' par nič beṇə' yeziquə'əchlə chso'one' de'e mal. Beṇə' ca' chso'on ca' chso'one' contr de'en babsedcho che Diozən'. Na' bito gonle t xen len lega'aque'.

¹⁸ Beṇə' ca' chso'on ca' bito choso'ozenague' che Xancho Jesocristán', con chso'one' de'e bia'azəlažə'əga'aque'. Xochechgua chso'e dižə' choso'opeine' beṇə' ca' chse'ejle'edaza, na' choso'oxoayague' lega'aque'.

¹⁹ Yoguə beṇə' zjənezene' de que le'e chzenagle che Diozən', na' de'e na'ana' chebeida'. Na' che'enda' sole cue' yichje par gonle de'e güen caguə par gonle de'e mal.

²⁰ Na' Diozən' ben' chon par chzo chbezcho binlo leczə le' gone' par nič lgüegwzə əgwlej əgwšošjle xtižə' gwxiye'ena'. Na' Xancho Jesocristán' sotezə soe' gaqualenšgacze' le'e.

²¹ Temtio' ben' chonlen nada' žin chguape' le'e diox. Na' leczə ca' bišə' ljuežja' quinga choso'oguape' le'e diox, Losion', Jasonə' na' Sosipaterən'.

²² Nada' Tersio chzoja' cart nga con can' na Pabən', leczə əchguapa' le'e diox, ca naquə le'e chonlilažə'əle Xanchon' can' chonlilažə'ane' nada'.

²³ Chguap Gayon' le'e diox. Nada' Pab zoa' liže'ena'. Na' leczə liže' na' chəsə'əžag beṇə' ca' chso'elao' Cristən'. Erasto ben' naquə tesorer che syodan' chguape' le'e diox, na' beṇə' bišə'əcho Cuarto.

²⁴ Chnaba' gaqualen Xancho Jesocristán' yogua'əlolle. Na' ca'ašgaczən' gaquə.

Cho'elaogüe'e Diozən'

²⁵⁻²⁷ Ledoye'ela'och Diozən' zejlicane, Dioz ben' naquə le'ezelaogüe beṇə' sin'. Len' nape' yelə' guac par chaclene' chio'o nič sotezə socho gonlilažə'əchone' na' chaclencze' can' na de'en əchyixjui'a che Jesocristán'. De'en əchyixjui'a na'ana' naquan to dižə' güen dižə' cobə de'en

cui no gwneze dezd ža gwlasda'ote, pero na'a Diozən' bablo'ine'en chio'o. Diozən' babene' ca banezechon, babzejni'ine' chio'o bi zejen de'en bos'o'ozoj de'e profet ca'. Dioz ben' zo zejlicaņe bene' mendad par ničh yoguə' chio'o beņach ənezecho dižə' güen dižə' cobə che Jesocristən' par əgwzenagcho che' na' gonlilažə'əcho Jesocristən'. Na' Jesocrist na'anə' gaquəlene' chio'o par güe'ela'ocho Diozən' zejlicaņe. Na' ca'ašgaczən' gaquə. *Pab*

Cart Nech De'en Bzoj San Pabən' Par Beṇə' Corinto Ca'

Pabən' chzoje' beṇə' ca' chso'elao' Cristən' Corinton'

¹⁻² Nada' Pab chzoja' le'e cart nga. Nezczele de que Diozən' gwleje' nada' par naca' apostol che Jesocristən', chedə' can' gwnalaže'e. Chzoja' cart nga par le'e bagwlej Diozən' niç chdopə chžagle cho'ela'ole Jesocristən' lao' syoda Corinton'. Nada' len beṇə' bišə'əcho Sostenesən' chguapto' le'e diox. Diozən' bagwleje' le'e can' gwleje' neto' par naccho lao ne'ənə' laogüe de'en ngoda'əcho txen len Cristo Jeso'osən'. Chzoja' cart nga par yoguə'əlol beṇə' gata'ətezə nite'e, beṇə' chso'on orasyon chso'olgüize' Xancho Jesocristən'. Naque' Xanga'aque' na' lecza naque' Xancho.

³ Chṇaba' lao Xacho Diozən' na' lao Xancho Jesocristən' əsa'aclenšgue' le'e na' so'one' par so cuezle binlo len xbab de'en yo'o lo'o yichjla'ažda'olen'.

Cristən' chone' par niç zocho mbalaz

⁴ Syempr cho'a yelə' choxcwlen che Diozən' can' chone' par niç Cristo Jeso'osən' chaclene' le'e.

⁵ De'en chonlilažə'əlene' chaclenchgüe' le'e par niç chejni'ile yoguə' de'e ca' babzejni'i Diozən' le'e na' cho'ele dižə' chei.

⁶ Na' bachonle ca nachia' de que xtižə' Cristən' de'en chejle'ele naquən de'e li.

⁷ Chaclen Diozən' le'e len xbab de'en yo'o lo'o yichjla'ažda'olen' par gonlilažə'əchlene' na' par niç gonchle can' chazlaže'əna' žlac chbezcho yida' Xancho Jesocristən' yetlas.

⁸ Diozən' gaquəlene' le'e soczle gonle can' chazlaže'əna' par niç catə'an yida' Xancho Jesocristən' yetlas notono gaquə əne' de que nape dolə'.

⁹ Diozən' zotezə zoe' chone' complir can' ne'ənə'. Le'əna' bagwleje' le'e par niç naquə yichjla'ažda'olen' toza len yichjla'aždao' Xi'ine' Jesocristən' ben' naquə Xancho'.

Beṇə' ca' chso'elao' Cristən' Corinton' bito zjənaque' tozə

¹⁰ Beṇə' bišə', laogüe de'en chonlilažə'əcho Xancho Jesocristən' chneyoida' le'e gonle txen len lježjle na' bito tiłə gwšašle. Tozə xbab gonle na' tozə can' əgwžiale bia'.

¹¹ Beṇə' bišə', beṇə' ca' nita' liž Cloe baboso'ozenene' nada' de que chdiłə chšašle.

¹² Enia' chdiłə chšašle, chedə' baļle nale: "Naogua' de'en chsed chlo'i Pab." Na' yebaļle nale: "Naogua' de'en chsed chlo'i Apolos." Na' yebaļle nale: "Naogua' de'en chsed chlo'i Bed." Na' yebaļle nale: "Naogua' de'en bsd blo'i Cristən'."

¹³ ¿Echaquele bseļə' Diozən' Cristən' par yebeje' to chopzle xni'a de'e malən'? ¿Ena' chaquele nada' Pabən' gwso'ote' le'e yag corozən' par gwdixjua' xtołə əle ca'? Na'alje žəpor la nada'anə' gwchoale nisən'? Bito.

¹⁴ Crispo na' Gayo na' azən' bcho'a nis. Na' choxcwlen Diozən' notoch no zo entr le'e beṇə' yesə'əne' de que lecza nada' bcho'aga'aca'ane' nis.

¹⁵ Bito che'enda' no əna de que por la' na'anə' gwchoe' nisən'.

¹⁶ Na' lecza nada' bchoa' beṇə' ca' nita' liž Estefanasən' nis. Na' bitoch chjsa'alaža'a šə noch zo beṇə' bcho'a nis.

¹⁷ Nežda' Cristən' bito bseļe'le nada' par gwcho'a beṇə' nis. Bseļe'le nada' par chyixjui'a dižə' güen dižə' cobə che'ənə'. Na' catə' chyixjui'an bito cho'a dižə' zdebə de'e cui se'ejni'i beṇə'. Bito che'enda' no gaque de que nada' naca' beṇə' sin', chedə' šə so'one' xbab che yelə' sin' chia'anə' bito əsa'acquene' de que de'e zaque'ənə' ca de'en bnežjw cuin Cristən' gwso'ot beṇə' le' le'e yag corozən'.

Cristən' bedalo'e yelə' chnabia' na' yelə' sin' che Diozən'

¹⁸ Beṇə' ca' cui choso'ozenag che Diozən' yesə'əbiayi'e zejlicane. Lega'aque' bito chse'ənene' no güe'elen lega'aque' dižə' can' gwso'ot beṇə' Cristən' le'e yag corozən'. Pero Cristən' babene' par niç chio'o cui yeyejcho lao yi' gabiłən'. Na' nezecho de que zaquə'əchgua dižə' de'en cho'echo de que gwso'ote'ene' le'e yag corozən', chedə' dižə' nan' chzejni'in beṇə' de que Diozən' nape' yelə' guac par chocobe' yichjla'aždao' notə'ətezcho chonlilažə'əchone'.

¹⁹ Chac can' na Xtižə' Diozən' de'en nyojən:

Nada' gona' par niç nachia' de que beṇə' sin' ca' caguə de'e li zjənsine'ənə',

na' gona' par niç beṇə' ca' chse'ejni'i de'e zan lao yežlyo nga bito bi bi de gon ca de'en chse'ejni'ine'ənə'.

²⁰ Nita' beṇə' bazjənsed yelə' sin' che beṇə'ənən', na' nita' beṇə' choso'osed choso'olo'i lei che Diozən', na' nita' beṇə' chso'e dižə' che de'en chac lao yežlyo nga. Beṇə' ca' chsa'acquene' chso'one' xbab sin', pero lao Diozən' bito bi bi zaquə' xbab chega'aque'əne'.

²¹ Diozən' naque' beṇə' sin' na' le' enə' bene' par niçh yelə' sin' che beṇəçən' bito chaclenən beṇə' par so' ombi' ene'. Pero na' con beṇə' se' ejle' xtiže' enə' de' en chyixjue' eto', Diozən' chazlaže' e yebeje' lega' aque' xni' a de' e malən', la' anə' əczə beṇə' ca' cui zjənombia' Diozən' chsa' aquene' de que bito bi bi zaquə' dižə' de' en chyixjue' eto'.

²² Ca naquə beṇə' Izrael ca' cui chso' onlilažə' Cristən', chsa' əṇabe' yesə' əle' ine' miłagr par yesə' ənezene' šə le Dioz nan' bsele' e Cristən', na' le' egatezə ca' beṇə' ca' cui zjənaquə beṇə' Izrael na' cui chso' onlilažə' e Cristən', zjəchi' yichjga' aque' porzə che bitə' ətezə dižə' cobə de' en chsa' aquene' naquən dižə' sin'.

²³ Pero na' neto' chyixjue' eto' can' gwso' ote' Cristən' le' e yag corozən'. Na' catə' chyixjue' eto' on beṇə' Izrael ca' bito chsa' azlaže' e na' bito chse' ejle' e chei. Na' leczə beṇə' ca' cui zjənaquə beṇə' Izraelən' catə' chse' enene' dižə' de' en chyixjue' eto', leczə chsa' aquene' de que bito bi bi zaquə' ən.

²⁴ Pero chio' o bagwlej Diozən' par naccho xi' ine', chio' o naccho beṇə' Izrael na' chio' o cui naccho beṇə' Izrael, nezecho de que Diozən' chlo' e yelə' chnabia' che' enə' na' yelə' sin' che' enə' ca' de' en bsele' e Cristən' gwso' ote' ene' por ni checho.

²⁵ Na' de' en bsele' ene' gwso' ot beṇə' le' por ni chechon' beṇəçən' chsa' aquene' de que bito bi zaquə' de' en chon Diozən', na' chsa' aquene' de que bito bi yelə' chnabia' napə Diozən'. Na' ca' de' en bsele' ene' chlo' en de que Diozən' lechguale beṇə' sin' naque' cle ca beṇəçən' na' lechguale chnabi' ache' ca beṇəçən'.

²⁶ Le' e gon xbab beṇə' bišə', Diozən' gwleje' chio' o par naccho xi' ine'. Bito naquə zancho beṇə' sin' segon can' chso' on beṇəçən' xbab checho, na' nic naquə zancho beṇə' gwnabia', na' nic naquə zancho beṇə' blao.

²⁷ Diozən' gwleje' chio' o par naccho xi' ine', la' anə' əczə bito naccho beṇə' sin' na' la' anə' əczə bito naccho beṇə' gwnabia'. Gwleje' chio' o par niçh chzejni' ine' beṇə' ca' cui zjənombi' ene' de que yelə' sin' na' yelə' gwnabia' chega' aque' enə' bito bi zjəzaquə' ən laogüe' enə'.

²⁸ Chio' o cui naccho beṇə' blao na' cui bi zaquə' əcho par beṇəçən'. De' e na' anə' beṇə' ca' cui zjənombia' Diozən' chsa' əgüe' ine' chio' o. Pero Dioz na' ana' gwleje' chio' o par naccho xi' ine' niçh sa' acbe' ine' de que bitobi bi zaquə' xbab chega' aque' enə' ca' de' en choso' ozoe' Diozən' ca' ələ.

²⁹ Na' Diozən' babene' par niçh notono no gaquə güe' elao' cuine laogüe' enə'.

³⁰ Dioz na' ana' babene' par niçh ngoda' əcho txen len Cristo Jeso' osən'. Diozən' banone' chio' o beṇə' sin' chedə' Cristən' naque' beṇə' sin'. Banone' par niçh naccho beṇə' güen laogüe' enə', chedə' Cristən' naque' beṇə' güen laogüe' enə'. Banone' la' aždə' ochon' xi' ilažə' chedə' Cristən' naque' beṇə' la' aždə' xi' ilažə'. Na' leczə le' enə' babene' par niçh cui bi xtələ' əchon' de, chedə' Cristən' gwduxje' xtələ' əchon'.

³¹ Na' nyoj Xtižə' Diozən' nan: "Bito cheyalə' güe' elao' cuincho sino cheyalə' güe' elə' oço Xancho Diozən'."

2

Parbən' be' e xtižə' Cristən' ben' gwso' ot beṇə' mal ca' le' e yag corozən'

¹ Beṇə' bišə', catə' bedəya' a xtižə' Diozən' gan' zolen' bito bi' a dižə' zdebə de' e cui šejni' ile, na' caguə bi' a dižə' par niçh gonle' xbab de que nada' naca' beṇə' sin'.

² Gwnia' lo' o la' aždə' ogua' a de que žlac soa' len le' e bito bi bichlə dižə' gua' a sino que gua' a dižə' che Jesocristən' na' can' gwso' ote' ene' le' e yag corozən', na' bena' can' gwnia' lo' o la' aždə' ogua' anə' catə' ən bida' gan' zolenə'.

³ Goche' ida' bito bi gaquə gona' par niçh šejle' ele dižə' de' en gua' ana' na' de' e na' ana' lechguale bžeba' na' golə' gwxyzə' catə' bena' xbab šə gwzenagle chia'.

⁴ Na' catə' bi' a dižə' che Cristən' bito bi' a dižə' len yelə' sin' chia' par niçh gonle' can' gwni' ana'. Spirit che Diozən' gocwlenən le' e len yelə' guac cheinə' par niçh goche' ile de que dižə' lin' bi' a.

⁵ Bi' a dižə' ən ca' par niçh notono no gaquə əna de que chonlilažə' əle Diozən' por ni che yelə' sin' chia' anə'. Nezczəcho de que Dioz nan' gocwlene' le' e len yelə' guac che' enə' par niçh chonlilažə' əlene'.

Spirit che Diozən' chonən par niçh chejni' ito'

⁶ Na' de' e li chaclen Diozən' neto' par niçh cho' eto' dižə' sin' len beṇə' ca' bachse' ejni' i xtiže' enə'. Pero na' yeziquə' əchlə beṇə' ža' yežlyo nga bito chsa' aquene' de que xtižə' əto' on naquən de' e sin'. Na' ni que chsa' aque beṇə' gwnabia' ca' ža' yežlyo nga de que cho' eto' dižə' sin'. Na' ca' naquə beṇə' gwnabia' ca' ža' yežlyo nga, gwžin ža' catə' te yelə' gwnabia' chega' aque' enə'.

7 Na' dižə' sin' de'en cho'eto', Dioz nan' babzejni'ine'en neto'. Notono gwņeze dižə' sin' che'ena' antslə, pero na'a babzejni'ine'en neto'. Lao yelə' beņə' sin' che Diozən' gwchoglaogüe'en nac gone' par niç gone' chio'o yelə' bala'an.

8 Na' ni tozə beņə' gwnabia' beņə' ža' yežlyo nga bito gwse'ejni'ine' yelə' sin' che Diozən'. La' žalə' gwse'ejni'ine'en, bito bos'o'ode'e Xancho Jesocristən' le'e yag corozən', ben' naquə le'eželaogüe beņə' zaque'e.

9 Na' Xtižə' Diozən' de'en nyojən nan:

Notono ņe'e le'i de'e šao' de'e güen de'en gon Diozən' len beņə' ca' chsa'aquene' che', na' nic noņə' yesə'əneze can' gone',

na' nic noņə' gon xbab chei lo'o yichjla'aždaogüe'ena'.

10 Pero na'a ža, Diozən' babene' par niç Spirit che'ena' bzejni'in chio'o ca naquə de'e güen de'en chone' len chio'o chaquecho che'. Tcho'a tšao' chejni'i Spirit che Diozən' can' chone'ena', na' leczə ņez nle'in de'en ngašə' len beņəçən'.

11 Notono no ņeze bi xbab chon beņə' yoblə, čhedə' con to tocho ņezecho bi xbabən' choncho. Na' nic no ņeze bi xbabən' chon Diozən'. Spirit che' na'azən' ņezen bi xbabən' chone'.

12 Na' Diozən' bsele'e Spirit che'ena' zon lo'o la'ažda'ochon' par niç chņezecho yoguə'əlo' de'e šao' de'e güen de'en chon Diozən' len chio'o laogüe de'en nži'ilaže'e chio'o. De'e na'ana' bitoch choncho xbab ca xbab de'en chso'on beņə' yeziquə'əchlə ža' yežlyo nga.

13 Neto' cho'eto' dižə' che de'e ca' chon Diozən' len chio'o, pero gaquə cho'eto'on lao yelə' beņə' sin' čheto'onə'. Spirit che Dioz nan' chzejni'in neto' dižə' de'en cho'eto'onə'. Na' beņə' ca' bayo'o Spirit che Diozən' lo'o yichjla'ažda'oga'aque'ena', lega'acze'ena' chse'ejni'ine' de'en chsed chlo'iga'aqueto'one'.

14 Na' beņə' ca' cui yo'o Spirit che Diozən' lo'o yichjla'ažda'oga'aque'ena', bito gaquə se'ejni'ine' de'en chsed chlo'i Spiritən' čhedə' chsa'aquene' bito bi bi zaquə'an par lega'aque'. Bito chse'ejni'ine'en čhedə' bito yo'o Spiritən' lo'o yichjla'ažda'oga'aque'ena' par gaquəlenən lega'aque' se'ejni'ine'en.

15 Chio'o bayo'o Spirit che Diozən' lo'o yichjla'ažda'ochon', de'e na'ana' chaclenən chio'o par niç chacbe'icho che bitə'etezə de'en goncho šə naquən güen o šə naquən mal gonchon. Pero na' beņə' yeziquə'əchlə bito chse'ejni'ine' de' que de'en chene'e Spirit che Diozən' gon chio'o naquən de'e güen.

16 Na' Xtižə' Diozən' de'en nyojən nan: "Notono zo no chejni'i xbab che Xancho Diozən' to gwłazze'. Na' Diozən' bito bi de de'e əgwšed əgwlo'i beņəçən' le'." Pero Diozən' babene' par niç choncho xbab can' chazlažə' Cristən'.

3

Txenə' gwso'one' xšin Diozən'

1 Beņə' bišə', catə' bi'a xtižə' Diozən' len le'e, bito bi'an can' cho'an len beņə' ca' bachoso'ozenag che Spirit che Diozən', čhedə' le'e ņe'e chzenagle che la'ažda'omallen'. La'anə'əczə bachonjilažə'əle Cristən' gwxaquə'əlebele ca bidao'.

2 Catə' ze'e gwzolaole chonjilažə'əle Cristən' gwxaquə'əlebele ca bidao' ņe'e chsa'ažə' laogüe de'en cuiņə' šejni'iša'ogüe'ele de'e ca' chene'e Diozən' šejni'ile. De'e na'ana' bšed blo'ida' le'e de'e ca' cui naquə zdebə šejni'ile, na' xte ža ņeža ņe'e chsed chlo'ida' le'e ca' čhedə' cuiņə' gac šejni'ile de'en naquə zdebə.

3 Nacbia' bitonə' gac šejni'ile de'en naquə zdebə, čhedə' ņe'e chzenagle che la'ažda'omallen'. De'en chgue'i hježjle na' chdılə chžašle zeje dižə' chzenagczle che la'ažda'omallen' can' chso'on beņə' ca' cui chso'onjilažə' Cristən'.

4 Chzenagle che la'ažda'omallen' ca de'en na balle: "De'en chsed chlo'i Pabən' naogua'", na' yeballe nale: "De'en chsed chlo'i Apolosən' naogua'." De'e na'ana' nia' chonle can' chso'on beņə' ca' cui chso'onjilažə' Cristən'.

5 ¿Noxa nada' Pab na' noxa Apolosən'? Neto' naquəto' beņə' güen xšin Diozən' na' neto' be'elento' le'e xtižə'ena'. Na' cuin Diozən' bene' par niç balle beñjilažə'əle Cristən' catə' bi'a dižə' güen dižə' cobə che'ena' len le'e na' leczə bene' par niç yeballe beñjilažə'əle Cristən' catə'an Apolosən' be'elene'en le'e.

6 Zgua'atec nadan' be'elena' le'e xtižə' Diozən' na' gwxaquə'əlebəda' ca to beņə' chaz. Na' laogüe de'en leczə bšed blo'i Apolosən' le'e, gwxaquə'əlebene' ca be'en chyl. Na' can' chon Diozən' niç chcha'o chxen de'en chazcho, leczə can' bene' par niç gwyejle'ele xtižə'ena' de'en be'elento' le'e.

7 Bitotec bi zaca'a nada' de'en be'elena' le'e xtižə' Diozən', na' nic Apolosən' de'en bšed blo'ichene'en le'e. Dioz nan' zaquə' čhedə' le'ena' bene' par niç gwyejle'ele xtižə'ena'.

⁸ Ben' chyixjue'e xtižā' Diozān' de'e neche na' ben' chyixjue'en de'e gwchope, txennā' chso'one' xšin Diozān' na' tozāczā can' cheyalā' gapāga'acchone' respet. Na' Diozān' gone' par niçh to toe' yesā'ānite'e mbalaz segon can' gwsō'one' xšine'ena'.

⁹ Neto' ža, txennā' chontō' xšin Diozān' entr le'e. De'e na'anā' gwxaquā'ālebeto' ca beņā' goz go'oņ na' le'e gwxaquā'ālebele ca yežlyon' gan' chac žinņā'.

Na' leczā le'e chdopā chžagle cho'ela'ole Cristān' yoguā'āle txen gwxaquā'ālebele ca to yo'o che Diozān' na' neto' gwxaquā'ālebeto' ca beņā' ben yo'ona'.

¹⁰ Diozān' goclene' nada' par niçh naca beņā' nech bena' xšine'ena' entr le'e. De'e na'anā' gwxaquā'ālebāda' ca beņā' bxe lan yo'o. Na' bena' xšine'ena' ca chon to mues beņā' chacchgua. Na' nitā' beņā' yoblā beņā' leczā bosō'osed bosō'olo'ine' le'e na' lega'aque' gwxaquā'ālebāga'aque' ca beņā' gosā'ābec ze'ena'. Na' šā nochlā beņā' yosō'osed yosō'olo'ine' le'e, cheyalā' so'one' xbab par niçh yosō'osed yosō'olo'ine' le'e porzā de'en naquā de'e li.

¹¹ Le'e chdopā chžagle cho'ela'ole Jesocristān' yoguā'āle txennā' gwxaquā'ālebele ca to yo'o de'en chac, na' Jesocristān' gwxaquā'ālebene' ca lan yo'ona'. Na' šā no chene'e āgwxe laneina' de'e yoblā, bitoch gaquā, chedā' tozā Jesocristān' zaque'e par gonlilažā'achone'.

¹² Nezecho chcheje bitā'ātežā ze'e de'e chxe beņā' lao lan yo'ona' segon šā none'en de or, de plat, de yej fin, de yag, de yix, o de dod. Can' gwxaquā'ālebe de'en yosō'osed yosō'olo'ī beņā' le'e.

¹³ Na' catā' āzin ža choglao Diozān' che yoguā'āloļ beņā', canā'ach la'alaon che to to beņā' bosō'osed bosō'olo'ine' le'e šā bosō'osed bosō'olo'ine' le'e de'en naquā de'e li, o šā cui. Na' šā bosō'osed bosō'olo'ine' le'e de'en naquā de'e li, gwxaquā'ālebāga'aque' ca to beņā' ben yo'o de or de plat o de yej fin chedā' de'e ca' bito chse'eyān. Pero na' šā bosō'osed bosō'olo'ine' le'e clelā, gwxaquā'ālebāga'aque' ca to beņā' ben yo'o de yag, de yix, o de dod chedā' de'e ca' chse'eyān. Catā' āzin žān' choglao Diozān' che yoguā'āloļ beņā', gone' ca la'alaon šā de'en ben to to beņā' güen xšine'ena' naquān de'e zaque'e o šā bito bi zaquā'ān. Ca'aczān' nla'alaon che to to yo'o segon naquān' zjānaquān.

¹⁴ Beņā' ca' bosō'osed bosō'olo'ine' le'e de'en naquā de'e li, cuin Diozān' gone' ca yesā'āzi' beņā' ca' yelā' bala'an.

¹⁵ Pero beņā' ca' bosō'osed bosō'olo'ine' le'e clelā gwxaquā'ālebāga'aque' ca beņā' šey ližen'. Na' nacchguaže gaquā yesā'āchoje' par cui se'eye', bito bi yelā' bala'an yesā'āzi'e chedā' bito bosō'osed bosō'olo'ine' le'e can' cheyalā'.

¹⁶ Chio'o chdopā chžagcho cho'ela'ocho Jesocristān', yoguā'ācho txennā' gwxaquā'ālebecho ca to yo'oda' gan' chso'elao' beņā' Diozān' chedā' Spirit che'ena' zon lo'o yichjla'āžda'ochon'.

¹⁷ Na' šā to beņā' gone' par niçh chio'o chdopā chžagcho cho'ela'ocho Cristān' cuejyichjcho dižā' li che Diozān', Diozān' gwnežjue' castigw zejlicaņā che ben' gon ca', chedā' bagwlej Diozān' chio'o par naccho lažā' ne'ena' na' zo Spirit che'ena' lo'o yichjla'āžda'ochon'.

¹⁸ Šā nocho chaquecho nsi'incho, bito cheyalā' xoayagcho. Chio'o yelā' sin' che'ena'.

¹⁹ Beņā' ca' cui zjānombia' Diozān' yelā' sin' chega'aque'ena' bitobi zaquā'ān lao Diozān'. La' nyojczā Xtižā' Diozān' nan: "Beņā' ca' chsa'aque' zjānaque' beņā' sin', Diozān' gone' par niçh yesā'ābiayi'e por ni che xbab mal chega'aque'ena'."

²⁰ Na' yeto gan' nyojan nan: "Xancho nan' neze de que xbab che beņā' sin' ca' bito gaquālenān lega'aque' par so'ombi'ene'."

²¹ Ca naquā neto' ābsed āblo'ito' le'e, bito gonle xbab de que naquāto' le'e beyože beņā' zaque'e. Dioz na'aczān' bsele'e yoguā'āto' par chaclento' le'e na' bsi'e xneze par niçh bitā'ātežāchlā de'e zjāde na' de'e ca' chac chsa'aclenān le'e.

²² Diozān' bsele'e nada' na' Apolosān' na' Bedān' par chaclento' le'e. Na' bene' yežlyon' par niçh leczā chaclenān chio'o. Na' chone' par niçh bitā'ātežā de'en chac checho lao mbancho o catā'ān gatcho āsa'aclenān chio'o na' na' batā'ātežāchlā.

²³ Na' laogüe de'en cho'ela'ocho Cristān' ngodā'ācho txen len le' can' ngode'e txen len Xe' Diozān'.

4

De'en gwlo'o Diozān' lao na' apostol ca' par gwsō'one'

¹ Cheyalā' gonle xbab de que naquāto' beņā' güen xšin Cristān'. Diozān' babzejni'ine' neto' de'en cui no gwneze antslā, de'e na'anā' Cristān' ngüe'e lao na'ato' chsed chlo'ito'on beņā'.

² Na' chonān byen gonto' complir de'en ngüe'e lao na'ato' gonto'.

³ Na' ca naca' nada' bitobi nonān len nada' la'ānā'āczā šā jostis o šā le'e chaquele de que bito chonā' can' cheyalā' gona'. Bitō nia' šā chonā' can' cheyalā' gona' o šā cui.

⁴ Nada' chacda' de que bito bi dołə' napa' len bita'ətezə de'e chona', pero caguə ni che de'e na'ana' əna Diozən' chia' de que bito bi xtola'a de. Xancho Cristən' əne' šə chona' can' cheyalə' gona' o šə cui.

⁵ De'e na'ana' bito cheyalə' bi ənacho che notə'ətezə beņə' šə chone' can' cheyalə' gone' o šə cui. Catə'əchən' yidə Xancho Cristən' yeto, ca na'achən' gone' par niçh ənezecho de'en cui nonə' neze na'a. Gone' par niçh yeyacbe'icho xbab de'en yo'o lo'o yichjla'azdao' to tocho, na' cana'achən' Diozən' əne' šə nochon' chon güen.

⁶ Beņə' bišə', babi'a xtižə' Apolosən' na' xtižə'a par niçh šejni'ile can' na xtižə' Diozən' de que bito cheyalə' güe'ela'ocho che to beņə' šə naquən' chsed chlo'ine' na' nique gue'icho che yetoe'.

⁷ ¿Echaquele de que zaquə'əchle cle ca beņə' ca' yelə'? ¿Ede bi de'e de chele de'e cui beņ Diozən'? Bito bi de. Nezele naquən de'e beņ Diozən' le'e, de'e na'ana' bito cheyalə' ga'alazə'əle len de'en deilen'?

⁸ Chacļeile bitoch bi chyažjele, na' de que bazole mbalaz la'anə'əczə cui chac cheto' ca'. Yebeito' žalə' de'e ličzə zole mbalaz na' soto' mbalaz txen len le'e žalə' ca'.

⁹ Diozən' bsele'e neto' apostol naquəto' ca to beņə' le'ezelaogüe cui zaque'e o ca beņə' nchoglaon che' gate'. Na' Diozən' bsi'e xņeze par niçh angl ca' na' beņə' ca' ža' yežlyon' chəsə'əgüie' can' chac cheto' can' chəsə'əgüia beņə' to comedy.

¹⁰ Beņachən' chsa'aquene' bito bi bi zaquə'əto' por ni che de'en chonto' xšin Cristən'. Pero na' le'e ža, chonle par niçh chsa'aquene' nacle beņə' sin' la'anə'əczə ngodə'əle txen len Cristən'. Neto' nezeto' caguə bi chac gonto', pero le'e chaquele chac gonle bita'ətezə. Chso'elao' beņə' le'e na' chəsə'əgue'ine' neto'.

¹¹ Xte ža neža zan las cui de de'e ye'ej de'e gaoto', na' bito bi xala'anto' de, na' chəsə'əbažə' beņə' neto', na' nic bi ližto' de.

¹² Na' len ni'a na'ato' chonto' žin par niçh chon cuinto' mantener. Na' catə' choso'ožia choso'onitə' beņə' neto', nachle chnabto' nite'e mbalaz, na' catə' choso'oçhi' choso'osaquə' beņə' neto', chgo'o' chçhejlažə'əto' ca de'en choso'oçhi' choso'osaque'e neto'.

¹³ Na' catə' beņə' chņe' clellə cheto', nachle cho'elenga'acto'one' dižə' šao'. Na' xte ža neža nitə' beņə' chəsə'əgue'ine' neto' ca chəsə'əgue'ine' no beb na' can' chsə'əgue'ine' no de'e naquə zban.

¹⁴ Na' ca naquə de'e ca' de'en bach bzoja' le'e, bito bzoja'an par niçh gaquele zto'. Nacle ca xi'ina' na' chacda' chele. De'e na'ana' chona' le'e consejw quinga.

¹⁵ Nita'əlja ši mil beņə' choso'osed choso'olo'ine' le'e che Cristən', pero toza' nada' naca' ca xale chedə' zgua'atec nada' gwduxju'a dižə' güen dižə' cobə che Cristo Jeso'osən' len le'e par niçh chonlilažə'əlene'.

¹⁶ Na' de'en naca' ca xale de'e na'ana' chņeyoida' le'e gonle can' chona'anə'.

¹⁷ De'e na'ana' bsela'a Temtion' gan' zolenə'. Banona'ane' ca xi'ina' beņə' chacda' chei laogüe de'e bsed blo'ida'ane' par chonlilaže'e Xancho Cristən'. Na' zoteze' chone' complir can' cheyalə' gone'. Na' Temtio na'ana' gone' par niçh əžjsa'alažə'əle de'en babsed bablo'ida' le'e che Cristən' ca de'en chsed chlo'ida' beņə' ca' chəsə'ədopə chəsə'əžag chso'elaogüe'e Cristən' gatə'ətezə nite'e.

¹⁸ Balle nale de que bito bi zaca'a parzə niçh chon cuinle xen na' chonle ca' laogüe de'en chonle xbab de que bitoch yida' gan' zolenə'.

¹⁹ Pero caguə chžach yida' gan' zolenə' šə Xancho Diozən' güe'le latjə. Na' catə' yida' cana' degüia' gonle can' nalenə'.

²⁰ Ca naquə beņə' ca' chnabia' Diozən' lega'aque', Diozən' chone' par niçh gaquə so'one' can' chso'e dižə'ən. Caguə can chəsə'anaze'enə'.

²¹ ¿Nac chene'ele gona'? ¿Egüida' gan' zolenə' par gona' le'e castigw o šə yida' gwlo'a can' chacda' chele sin cui bi dižə' ənia' le'e? Legon xbab naquən' chene'ele gona'.

5

To beņə' gwzolen no'ol che xe'enə' ca xo'olacze'

¹ Chso'echgua beņə' xtižə'əle de que zo to beņə' byo entr le'e beņə' zolene' no'ol che xe'enə' ca xo'olacze'. Beņə' ca' cui chso'elao' Diozən' bito chžinlaže'e de'e yelə' zton' chso'one' ca de'e yelə' zto'onə' chon be'enə'.

² Na' la'anə'əczə chac ca' cho'elao' cuinle. Bito güe'elao' cuinle. Cheyalə' yegüine'ele na' cuich güe'ele latjə gone' txen len le'e.

³ La'anə'əczə bito zoa' na' len le'e, bagwçhoglaogua'an can' cheyalə' gonle len be'en chon de'e malən'. Na' le'e ža, le'e gon cuent lažə'əle de que naquaczcho txenna' šə bachonle ca'.

⁴ Na' catə' bandopə nžagle cho'ela'ole Xancho Jesocristən', zoczə' chaclene' le'e len yelə' chnabia' che'enə', na' nada' choncza' txen len le'e.

⁵ Catá' bandopə nʒagle txen, ləgwʒon gon be'enə' txen len chio'o chonlilažə'əcho Jesocristán' na' le'e cueje' ca'alə par niçh gon Satanasan' con nac chene'en len le'. De repent šə chi' saque'e na'a len cuerp che'enə' goša'alja yichjla'aždaogüe'enə' niçh cui si'e castigw zejlicane catə'an əžin ža çhoglao Xancho Jesocristán' naquan' gac che to to benačən'.

⁶ Bito naquən güen can' chonle cho'elao' cuinle chaquele chebei Diozən' le'e. Nezele catə' choncho yetxtil latə' xne'in chonən par niçh cheyas doxen coazin'. Le'egatezəczə ca' catə' cho'ele latjə chcha'o chxench bitə'ətezə de'e mal entr le'e, yogua'alen' chaple dolə' çhedə' yogua'alen' chonlenle ben' chon de'e malən' txen.

⁷⁻⁸ Benə' Izrael gwlaž çheto' ca' chsa'ape' cuidad cui chsa'ogüe' yetxtil de'e nçhixə xne'i lao lni pascon' na' chsa'ape' cuidad par niçh cui bi bi xna' cuazin' chega'an lo'o yo'o ližga'aque' lao lnin'. Ca'atezəczən' chio'o chonlilažə'əcho Cristən' cheyalə' gapcho cuidad de tiyempe par niçh cui bi de'e mal goncho na' cui bi de'e mal ta' əchen yichjla'ažda'ochon'. Cheyalə' cuejyichjcho de'e malən' çhedə' Cristən' gwdixjue' xtolə'əchon' par bebeje' chio'o xni'a de'e malən'. Na' de'en gwso'ote' le' por ni çhecho gwxaquə'əlebene' ca xilə' daon' bian' chso'ot beənə' Izrael ca' lao lni pascon'. De'en chonlilažə'əcho Cristən' ža, cheyalə' cuejyichjcho de'e malən' na' goncho porzə de'e güen.

⁹ Bzoja' to cart par le'e na' gwnia' de que bito cheyalə' socho binlo len beənə' çgo'o xtoi na' be'enə' chbejyichj no'ol çhei o be'en çhe' par chzolene' beənə' yoblə.

¹⁰ Catə' nia' cabi cheyalə' socho binlo len lega'aque', bito cho'a dižə' çhe beənə' ca' cui naccho txen cho'ela'ocho Cristən' sino que cho'a dižə' çhe ljuəžjcho beənə' ləczə chso'elao' Cristən'. Na' ləczə ca' nia' bito socho binlo len beənə' çəsə'əzelažə' bi de'e de çhe beənə', nic len beənə' çəsə'əca'a bi de'e de çhe beənə', na' nic len beənə' chso'elao' lgu'a' lsaquə'. Nia' ca' çhe ljuəžjga' beənə' ca' naccho txen cho'ela'ocho Cristən'. Žalə' cui chac socho binlo len beənə' ca' cui chso'elao' Cristən', bitoch gac socho yežlyo nga žalə' ca'.

¹¹ Šə entr le'e nitə' beənə' nacho bišə'əcho beənə' çəsə'əža' xtoga'aque' o beənə' çəsə'əbejyichj no'ol chega'aquei o be'en chega'aquei par çəsə'əzolene' beənə' yoblə, o beənə' çəsə'əzelažə' bi de'e de çhe beənə', o beənə' chse'ejni'aləžə' lgu'a' lsaquə', o beənə' choso'ožia choso'onitə' ljuəžjga'aque', o beənə' güe'e zo, o beənə' bgüan, bito cheyalə' sole binlo len lega'aque'. Na' bito cheyalə' gaolenga'aclene' txen.

¹² Benə' ca' çəsə'ədotə çəsə'əžag chso'elaogüe'e Cristən' txen len chio'o cheyalə' çhoglaochon chega'aque' catə' əsa'ape' dolə', pero bito bi cheyalə' ənacho çhe beənə' ca' cui chso'elao' Cristən' txen len chio'o.

¹³ Diozən' əne' çhe beənə' ca' cui chso'elao' Cristən' de que zjənape' dolə'. Na' ca naquə be'enə' chon de'e malən' ben' cho'elao' Cristən' txen len chio'o, cheyalə' cuejchone' ca'alə.

6

Bito ye'echo beənə' cui zjənombia' Diozən' so'one' yelə' jostis chechon'

¹ Catə' chaole xya tole yetole chjənabele beənə' ca' cui choso'ozenag çhe Diozən' par so'one' yelə' jostis chelen' lgu'a' nabele beənə' ca' bagwlej Diozən' par zjənaque' lažə' ne'enə. ¿Ebito chachbe'ile clellən' chonle?

² ¿Ecabi nezele de que gwžin ža catə' chio'o naccho lažə' na' Diozən' goncho yelə' jostis çhe beənə' yeziqua'əchlə ža' yežlyo nga? Na' ca naquə goncho yelə' jostis chega'aque'en, ljuəžjga'goncho yelə' jostis çhe de'e ca' cuitec zjəzaque'e.

³ Ləczə əgwžin ža goncho yelə' jostis çhe angl'ca'. Na' naquəchxən' gaquə goncho yelə' jostis çhe de'e chso'on beənə' lao yežlyo nga.

⁴ Na' catə' gaquəyožə ljuəžjle, bito cheyalə' žja'acle lao beənə' ca' cui chso'onlilažə' Cristən' par so'one' yelə' jostis chelen', çhedə' bitotec bi zjəzaque'e par chio'o chdopə chžagcho cho'ela'ocho Cristən'.

⁵⁻⁶ Che'enda' gaquəchgüele lo'o yichjla'ažda'olen' ca de'en chja'acle lao jostis ca' cui chso'onlilažə' Cristən' chjətaole xya tole yetole le'e nacle bišə'əcho. ¿Eniga tole cui nacle beənə' si'innə' par gon yelə' jostis çhe ljuəžjle catə' bin' chac çhele?

⁷ Leçhguale clellən' chonle batə'əteza chaole xya tole yetole. Mbalazəch zole žalə' chdele ca'alə šə bi de'en chone ljuəžjlen' le'e, na' mbalazəch zole žalə' güe'ele latjə yesə'əque'e bi de'e de çhele.

⁸ Chebanda' can' chonle contr ljuəžjle na' chca'ale bi de'e de chega'aque' la'anə'əczə zjənaque' txen len chio'o chonlilažə'əcho Cristən'.

⁹ Bito goncho xbabən' clellə. Notə'ətezcho šə zotezcho choncho de'e malən' bito gaquə yežincho yoban' gan' zo Diozən' chnabi'e. Nitə' beənə' çəsə'əgo'o xtoi na' beənə' chso'on bichlə de'e yelə' zto' de'en nac ca'. Nitə' beənə' chso'elao' lgu'a' lsaquə'. Nitə' beənə' çəsə'əbejyichj no'ol çhei o be'en çhei par çəsə'əzolene' beənə' yoblə, na' beənə' çəsə'əzolentezə le'e ljuəžj

benə' byoga'aque' l'gua'a de'e yesə'aca'a no'ol çhega'aque', na' no'ol ca' çhasə'əzolentezə l'juežj no'olaga'aque' l'gua'a yesə'aque'e benə' byo.

¹⁰ Nita' benə' çhasə'əban na' benə' çhasə'əzelažə' bi de çhe benə'; na' benə' güe'e zo; na' benə' choso'ožia choso'onita' l'juežjga'aque'; na' benə' çhasə'əxoyague' par niç yesə'aque'e bi de'e de çhe benə'. Ni to benə' chon de'e mal ca' cui gaquə yesyə'əžine' yoban' gan' zo Diozən' çhnabi'e.

¹¹ Bałcho bencho de'e mal ca' antslə. Pero na'a de'en chonlilažə'əcho Xancho Jesocrisən', Spirit çhe Dioz çhechon' babocobən yichjla'ažda'ochon' par niç naccho benə' la'aždao' xi'ilažə', naccho lažə' na' Diozən' na' naccho benə' güen laogüe'ena'.

Cheyalə' goncho len cuerp çhechon' ca si' Diozən' yelə' bala'an

¹² Nita' benə' çhasə'əne' de que de lsens par goncho bitə'əteza, pero nezecho caguə yoguə' de'en gonchon' naquən' par chio'o. Na' la'ana'əczə šə çhasə'əna benə' de que de lsens par goncho bitə'əteza, bito cheyalə' güe'echo latjə par niç bi de'en goncho nabia'an chio'o.

¹³ Leczə nita' benə' çhasə'əne': "Nsa' le'echon' par yelə' guao, na' deczə yelə' guaon' par lennə." De'e liczə can' çhasə'əne'ena', pero na' le'echon' len yelə' guaon', əžin ža catə' gon Diozən' par niç te chega'aquən. Na' cuerp çhechon' bito naquən par niç co'o xtocho o par niç goncho bichlə yelə' zto' de'en nac ca'. Naquə cuerp çhechon' par niç socho güe'ela'ocho Xancho Crisən', na' Xancho' zoczə' par gaqualene' chio'o.

¹⁴ Diozən' bosbane' Xancho Crisən' ladjo benə' guatən', na' leczə ca' əžin ža catə' yosbane' chio'o ladjo benə' guatən' len yelə' guac çhe'ena'.

¹⁵ ĞEcabi nezele de que ngoda'əcho txen len Crisən' par niç nabi'e cuerp çhechon'? Na' de'en ngoda'əcho txen len le', bito cheyalə' so xtocho benə' gon cuerp çhechon' lao ne'e.

¹⁶ Catə' to benə' chatə'əlene' xtoe' cuerp çhega'aque'ena' chsa'aquən tozə, can' noyof de'en gwna Diozən': "Benə' ca' çhopə əsa'aque' tozə cuerp."

¹⁷ Pero chio'o ngoda'əcho txen len Xancho Crisən' na' naquə yichjla'ažda'ochon' tozə len le'.

¹⁸ De'e na'ana' bito co'o xtocho na' bito goncho bitə'ətezəchlə de'e ca' zjənac ca'. De'e mal ca' yeziquə'əchlə bitotec chso'onən' contr cuerp çhechon', pero šə co'o xtocho o šə goncho bichlə de'e yelə' zto' de'en nac ca', lega'aquən chso'onən' contr cuerp çhechon'.

¹⁹ Spirit çhe Diozən' zon lo'o yichjla'aždao' to tocho ca to benə' zo lo'o yo'o çhe'. Dioz nan' bsele'e Spirit çhe'ena' zon lo'o la'ažda'ochon' par çhnabia'an chio'o. Caguə chio'o ənacho naquən' gonchon'.

²⁰ Xancho Crisən' gwdixjue' xtolə'əchon' par niç naccho xi'in Dioz. De'e na'ana' cheyalə' goncho len cuerp çhechon' na' len yichjla'ažda'ochon' ca si' Diozən' yelə' bala'an.

7

Cho'e dižə' cheyelə' gošagna'ana'

¹ Na' de'e ca' bzojle nada' le'e cartən', de de'en che'enda' nia' le'e. Šə no benə' byo bito chene'ene' si'e no'olə gaque' xo'ole', güennə' chone'.

² Pero na' de'e nxož co'o xtole, de'e na'ana' naquəçhən güen əgwšagna'ale par niç ca' to to benə' byo so xo'ole' na' to to no'olə so be'en che'.

³ Na' le'e benə' byo, yeyatə'əlen no'olə çhe çhele. Le'egatezəczə ca' le'e no'olə yeyatə'əlen be'en che çhele.

⁴ Ca naquə no'olən' caguə le' əne' nac gone' len cuerp che'ena'. Le'egatezə ca' benə' byon' leczə caguə le'ena' əne' nac gone' len cuerp che'ena'. Çopte'en cheyalə' yoso'ozenag che l'juežjga'aque'.

⁵ Na' le'e benə' nšagna' bito əgwžonle yeyatə'əlen be'en çhele o no'ol çhele. Pero de'e gaquəczən' šə yelə' goxia che çhople cuezle to term güejə par niç sotezle gonle orasyon. Na' te termən' yeyatə'əlen be'en çhele o no'ol çhele de'e yoblə par niç Satanasən' cui gaquə co'oyelə'ən le'e gonle de'e malən' laogüe de'e tant nan solen l'juežjle.

⁶ De'e quinga nia' çhedə' de lsens par niç to to benə' byo si' xo'ole' na' to to no'olə si' be'en çhe', pero bito nacho de que chon Diozən' mendad goncho ca'.

⁷ Chebeida' žalə' yoguə'əle sole ca nada', cui no xo'ola' zo. Pero na' nža' can' baben Diozən' par zo to tocho na' nža' can' chene'ene' goncho.

⁸ Le'e cuinə' gwšagna'ale, çacda' naquəçhən güen yega'anle can' zoa' nada' na' cui əgwšagna'ale. Na' le'e bagot be'en çhele o no'ol çhele, çacda' leczə naquəçhən güen cui yošagna'ale.

⁹ Pero na' le'e benə' byo šə leçgualə nan solenle no'olən', na' le'egatezə ca' le'e no'olə šə leçgualə nan solenle benə' byo, mejor əgwšagna'ale par niç ca' bito nabia' yelə' çhzelažə'əna' le'e.

¹⁰ Le'e no'olə le'e nšagna'ale, chona' mendad bito yela'ale be'en chele. Na' bito gaquele de que nadəza'an ənia' ca'. Naquən to de'e chon Xancho Cristən' mendad cui goncho.

¹¹ Na' šə no'olən' yele'e be'en che'ena', cheyalə' yega'ane' sin cui yeque'e beṇə' yoblə o cheyalə' yeyeje' žjəyezolene' be'en che'ena' de'e yoblə. Na' le'e beṇə' byo le'e nšagna'ale, bito yela'ale xo'ollena'.

¹² Na' le'e beṇə' yeziqua'əchlə, ənia' can' chona' xbab cheyalə' gonle, la'ana'əczə Xancho Cristən' bito bi gwne' che de'e ca'. Šə entr le'e zo to beṇə' zo to xo'ole no'olə cuiṇə' gonlilažə' Cristən', na' šə zo no'olən' gan par soteze' yega'anlene' be'en che'ena', bito cheyalə' yela'a beṇə' byon' le'.

¹³ Na' šə entr le'e zo to no'olə na' cuiṇə' gonlilažə' be'en che'ena' Cristən', šə be'en che'ena' zoe' gan par yesə'anite'e, bito cheyalə' yesyə'ale'e.

¹⁴ Bito naquən mal lao Diozən' par no'olən' chonlilažə' Cristən' solene' be'en che'ena' la'ana'əczə šə be'en che'ena' cuiṇə' gonlilaže'e Cristən'. Leczə bito naquən mal lao Diozən' par beṇə' byon' chonlilažə' Cristən' solene' no'ol che'ena' la'ana'əczə no'olən' cuiṇə' gonlilaže'e Cristən'. Žalə' chgue'i Diozən' yesə'əzolen ljuəžjga'aque' leczə gwgüe'i Diozən' bi'i chega'aque'ena', pero Diozən' chaquene' che xi'inga'aque'ena'.

¹⁵ Pero na' šə beṇə' byon' o no'olən' ben' cui chonlilažə' Cristən' bitoch chene'ene' solene' be'en che' o no'ol che' ben' chonlilažə' Cristən', bito gwžonle yesyə'ala'aga'aque'. Bito chonan byen yesyə'aga'anlen ljuəžjga'aque' chedə' la' Diozən' chene'ene' socho binlo len be'en checho o no'ol checho.

¹⁶ Le'e no'olə le'e chonlilažə'ale Cristən', šə sotezle len be'en chele be'en cuiṇə' gonlilaže'e Cristən', de repent guaqualenlene' par ničh gonlilaže'e Cristən'. Na' le'e beṇə' byo le'e chonlilažə'ale Cristən', šə sotezle len no'ol chelen' la'ana'əczə cuiṇə' gonlilaže'e Cristən', de repent guaqualenlene' par ničh gonlilaže'ene'.

¹⁷ Na' ca naquə žin de'en nlanle catə' gwlej Diozən' le'e par chonlilažə'ale Cristən' gwaquəczə gonchlen. Na' šə banšagna'ale catə'an gwlej Diozən' le'e par chonlilažə'ale Cristən', con ca'aczan' cheyalə' so cuezle, chedə' can' no'e Xancho Cristən' chele gonle. Leczə can' babena' mendad len beṇə' ca' chəsə'ədopə chəsə'əžag chso'elaogüe'e Cristən' gatə'atezəchlə, leczə can' chona' mendad len le'e.

¹⁸ Šə bazole seṇy de'en ne' sirconsissionə' catə'an gwlej Diozən' le'e par chonlilažə'ale Cristən' bito gonle par ničh yenit seṇyan'. Na' šə balle cuiṇə' sole seṇy de'en ne' sirconsissionə' catə'an gwlej Diozən' le'e par chonlilažə'ale Cristən', bito gonle byen par solen.

¹⁹ Bito naquən to de'e žialao len chio'o šə nsa'acho seṇy de'en ne' sirconsissionə' o šə cui nsa'achon. De'en naquə de'e žialao len chio'o, goncho con can' non Diozən' mendad.

²⁰ Con can' naccho yoguə'əcho catə'an gwlej Diozən' chio'o par chonlilažə'əcho Cristən', šə nsa'acho seṇy de'en ne' sirconsissionə' o šə cui nsa'achon, ca'atezaczan' cheyalə' so cuezcho.

²¹ Šə nacle esclabo catə'an gwlej Diozən' le'e par chonlilažə'ale Cristən', bito bi gaquele che de'ena'. Pero na' šə guata' latjə chixjwle ničh əchojle xni'a xanlen', lechixjw ničh əchojle.

²² Na' la'ana'əczə nacle esclabo catə' Diozən' gwleje' le'e par chonlilažə'ale Xancho Cristən', nacle beṇə' zaque'e lao Xanchon'. Na' la'ana'əczə cui naccho esclabo catə' Diozən' gwleje' chio'o par chonlilažə'əcho Cristən', pero na'a ža Cristən' banaque' Xancho. De'e nan' cheyalə' gwzenagcho che'.

²³ Cristən' gwdixjue' xtolə'əchon' par ničh naccho xi'in Dioz. De'e na'ana' cheyalə' gwzenagachcho che' cle ca gwzenagcho che bi de'en chesə'ana beṇə'.

²⁴ Beṇə' bišə', šə nacle esclabo catə'an gwlej Diozən' le'e par chonlilažə'ale Cristən', bito bi gaquele. Gwaquə so cuezle ca' na'a ngodə'ale Diozən' t xen.

²⁵ Bito bi mendad ben Xancho Cristən' can' goncho par len no'ol güego' ca'. Pero nada ənia' le'e can' chacda' cheyalə' goncho par len lega'aque'. Na' laogüe de'en babeyašə' beži'ilažə' Xancho'nada' na' chaclene' nada' par chona' complir can' cheyalə' gona'ana', dižə' de'e nga cho'a naquən de'e zaque'e par əgwzenagle chei.

²⁶ De'en chacda' nada', notə'ətezə beṇə' šə nšagne'e catə'an gwlej Diozən' le' par chonlilažə'e Cristən', con can' cheyalə' so cueze', o šə bito nšagne'e, leczə can' chacda' naquən güen so cueze'. Nia' ca' por ni che can' chi' saquə'əcho tyemp nga zocho na'a.

²⁷ Le'e nšagna'ale bito yela'ale xo'olle, na' le'e cui no xo'olle zo, bito čhilje xo'olle.

²⁸ Pero na' notə'ətezle bito gape dolə' šə əgwšagna'ale, na' ni le'e no'ol güego' bito gape dolə' šə əgwšagna'ale. Pero de'en gac chele de'e zan de'e čhi' saquə'ale lao yežlyo ngan', lenṇə' cui che'enda' gac chele ənia' ca'.

²⁹ Beṇə' bišə', che'enda' nia' le'e de que bito socho zan iz par goncho xšin Diozən'. De'e na'ana' šə nitə' xo'olle, cheyalə' gwzenagle che Diozən' na' gonczle xšine'ena' can' gonlen žalə' cui no xo'olle zo.

³⁰ Na' ša chegüine'echo por ni che bi de'en chac checho, cheyalä' soczcho goncho xšin Diozän' caczä chon beñä' cui bi bi chac chei. Na' ša de de'en cheba chezaqua'alažä'ächo, cheyalä' gonczcho xšin Diozän' can' goncho žalä' cui chac to de'e güen checho de'en goncho xbab chei. Na' ša bagwxi'icho to de'e gwchincho, bito cheyalä' gonteccho xbab chei sino cheyalä' gonczcho xšin Diozän' can' goncho žalä' cui gwxi'ichon.

³¹ Ca naquä zocho yežlyo nga na' chčincho bi de'e ca' de'en de yežlyo nga, bito cheyalä' cue'echgua yichjcho che bi de'en deicho o bi de'en chac checho chedä' de'e te chei yežlyo nga chle'icho na'a.

³² Na' che'enda' bito bi cuec yichjle che de'en chac yežlyo nga. Šä to beñä' cui zo xo'ole', deczä latjä par gone' xbab che xšin Xancho Diozän' de'en chone', na' deczä latjä par güe'elaže'e gone' de'en yebei Xancho'.

³³ Pero ša to beñä' zo xo'ole', chbe' yichje' che de'en chac yežlyo nga na' can' gone' par nič yebei xo'olen'.

³⁴ Na' leczä nža' can' chac len no'olän' nšagna' na' no'olän' cui nšagna'. No'olän' cui nšagna' nlatje' par cue' yichje' che de'en chene'e Xancho Diozän' na' par gon cuine' lažä' ne'ena' nič gone' can' chene'e Diozän' len cuerp che'ena' na' len yichjla'azda'ogüe'ena'. Pero no'olän' zo be'en chei, chbe' yichje' che de'en chac yežlyo nga na' nac gone' par yebei be'en che'ena'.

³⁵ Bagwnia' le'e ca' par nič gaquälän' le'e, caguä de'e ägwžona' ägwšagna'alenä'. Con che'enda' güe'elažä'äle par gonle de'e güen na' güe'elažä'äle par gonle xšin Xancho' sin cui bi bi gwžon gonlen.

³⁶ Na' ša to beñä' chaquene' bito chone' güen ca de'en cui chšague' na' xi'ine' no'olän', na' ša no'olän' bangole' na' chene'ene' ägwšagne'e, naquäczän güen gwšag x'e'ena' ne'e ša can' chazlaže'e gone'. Bito chone' de'e mal ša ägwšague' na' xi'ine' no'olän' len ben' chnab le' par gague' xo'ole'.

³⁷ Pero ša to beñä' zoe' chaquene' chone' güen len xi'ine' no'olän' de'en bito chene'ene' no si' le', con ša cui chene'e xi'ine' en ägwšagne'e na' ša chaquene' cui de bichlä de'en chonän byen par ägwšagna' xi'ine'ena', de lsens par gone' can' chazlaže'e na' choncze' güen can' bagwchoglaže'e gone'.

³⁸ Na' leczä chon ben' güen be'ena' chšague' na' xi'ine' no'olän', pero güen chon be'ena' cui chšague' na' xi'ine' no'olän'.

³⁹ Na' ca naquä notä'äteza no'olä ca' zjänšagna', cheyalä' yesä'anite'e len be'en chega'aque' ca', chedä' can' chon lein' mendad. Pero ša sa'atclä be'en chega'aque' ca', guac yesyä'äque'e beñä' yoblä, con ša beñä' chso'onlilažä' Xancho Cristän'.

⁴⁰ Pero chacda' nada' yesä'anitä'äche' mbalaz ša yesyä'äga'äne' sin cui no yesyä'äque'e cle ca yesyä'äque'e beñä' yoblä. Na' chacda' xbab chian' naquan tozä len xbab che Spirit che Diozän'.

8

Yelä' guao de'en choso'ožia beñä' lao lgu'a lsaquä'an chse'ejni'alaže'e

¹ Balä nale bito cheyalä' gaoch yelä' guao de'en choso'ožia beñä' lao lgu'a lsaquä'an chse'ejni'alaže'e, na' yeballe nale bito gonän mal gaochon chedä' nezecho bito bi zjäzaquä' lgu'a lsaquä' ca'. Na' ächnia' le'e bito cheyalä' gon cuincho xen laogüe de'en chaquecho lechguale nezecho to de'en nezecho, sino cheyalä' gaguecho che yeziqä'ächlä beñä' chso'onlilažä' Cristän' na' gaquälenga'acchone'.

² Na' ša chaquecho lechguale nezecho to de'en nezecho, cheyalä' gache'icho de que bito bi bi de de'en chejni'icho can' cheyalä' šejni'ichon.

³ Pero ša chaquecho che Diozän', chebeine' chio'o.

⁴ Na' ca naquä gwñable ša guac gaoch yelä' guao de'en choso'ožia beñä' lao lgu'a lsaquä'an chse'ejni'alaže'ena', de'e liczä can' nalenä', lgu'a lsaquä' ca' caguä bi zjäzaquä'an. Diozän' naquä Xancho, na' le'ena' cheyalä' šejni'alažä'ächo.

⁵ De'e zan de'e de yoban' na' yežlyon' de'en chse'ejni'alažä' beñä' chäsä'äne' zjänaquan xanga'aque'.

⁶ Pero chio'o nezecho tozä Xacho Dioz nan' zo na' tozä Xancho Jesocristän' par güe'ela'ocho na' par güe'ega'acchone' yelä' bala'an. Na' Xacho Dioz na'anä' bene' par nič Xancho Jesocristän' bene' yoguä'älol beñä' na' yoguä' bia chsa'aš, na' yoguä' bichlä de'e zjäde.

⁷ Balä beñä' bišä'ächo bito chse'ejni'ine' ca de'en chejni'icho. Ne'e chsa'aque'ne' beñä' zaquä' lgu'a lsaquä' ca', na' de'e na'anä' chsa'aque'ne' chso'one' de'e mal cata' chsa'ogüe' yelä' guao de'en choso'ožia beñä' lao lgu'a lsaquä'an chse'ejni'alaže'e, chedä' cuiñä' se'ejni'išaogüe'ene' de que bito bi zjäzaquä' lgu'a lsaquä' ca'.

⁸ Bito bi zaquä' yelä' guaon' par nič Diozän' yebeichene' chio'o. Diozän' chebeine' chio'o caguä por ni che de'en chaoch bitä'äteza yelä' guaon' len caguä por ni che ša cui chaochon.

⁹ Pero bito cheyałə' goncho par nič beŋə' ljuəzjcho ca' yesə'əxope' so'one' de'e mal laogüe de'en cuiŋə' se'ejni'iša'ogüe'ene' de que bitobi zjəzaquə' lguə'a lsaquə' ca'.

¹⁰ Le'e nacle beŋə' chejni'i, na' šə cue'ele na' ye'ej gaole gan' chso'on beŋə' lni che lguə'a lsaquə', de repent no beŋə' chso'onlilažə' Jesocristən' yesə'əle'ine' le'e na' lecəə se'enene' sa'ogüe' de'en choso'ožia beŋə' lao lguə'a lsaquə'an chse'ejni'alažə'e. Na' bałe' əsa'aquene' de que əsa'ape' dolə' šə sa'ogüe'en chedə' ne'e chsa'aquene' beŋə' zaquə'e lguə'a lsaquə' ca'.

¹¹ Na' chio'o bachejni'icho de que bito bi zjəzaquə' lguə'a lsaquə' ca', bito cheyałə' goncho bitə'atezə de'e gon par nič beŋə' bišə'əcho ca' cuich so'onlilažə'e Cristən' na' yesə'əbiayi'e. Cristən' bnežjw cuine' gwso'ot beŋə' le' lecəə por ni che beŋə' bišə'əcho ca' beŋə' ca' cuiŋə' se'ejni'išaogüe'e de que bito bi zjəzaquə' lguə'a lsaquə' ca'.

¹² Contr beŋə' bišə'əcho can' choncho šə choncho par nič sa'ogüe' de'en choso'ožia beŋə' lao lguə'a lsaquə'an chse'ejni'alažə'ena'. Na' catə' choncho contr lega'aque', lecəə contr Cristən' choncho, na' chapcho dolə' laogüe'ena'.

¹³ De'e na'anə' nia' šə por ni che belə' de'en chaogua' gonən par nič beŋə' bišə'əcho ca' yesə'əxope' so'one' de'e mal, cuatəch gaogua'an par nič cui yesə'əxope' so'one' de'e malən'.

9

Pabən' be'e dižə' de que naque' doalje apostol

¹ Nezele de que nada' naca' apostol, na' napa' yelə' chnabia' par əŋia' naquən' gona'. Nezele de que bable'ida' Xancho Jeso'osən' na' de que chonlilažə'əlene' chedə' nada' be'elena' le'e dižə' güen dižə' cobə che'ena'.

² La'anə'əczə šə beŋə' ca' yelə' bito chse'ejle'e de que naca' apostol, pero le'e chejle'ele. Na' de'en chonlilažə'əle Xancho' ben' bselə' nada' chlo'ele de que de'e li naca' apostol che'ena'.

³ De'e nga nia' chzoa' rson lao beŋə' ca' chəsə'əne' cui bselə' Diozən' nada' par naca' apostol.

⁴ Nada' napa' yelə' chnabia' par naba' gonle nada' mantener žalə' ye'enda' gonle ca'.

⁵ Decəə lsens par əgwsəgna' a len no'olə chonlilažə' Cristən'. Na' žalə' gwsəgna' a decəə lsens par əchi'ane' con ga ša'a, can' chon Bedən' na' apostol ca' yelə' na' beŋə' ca' zjənaquə bišə' Xancho Jesocristən'.

⁶ Zaquə'əczə Bernaben' na' nada' par cuich gonto' žin len ni'a na'ato' nič gonle neto' mantener žalə' ca', la' yeziquə'əchlə beŋə' ca' choso'osed choso'olo'i xtižə' Diozən' bito chso'one' žin len ni'ana'aga'aque'.

⁷ Ca naquə soldad bito chyixjue' che gast che'ena' sino que ničə'əczə beŋə' chəsə'əyixjw len. Na' notono gaza zan yag oban' šə cui gaogüe' frot dao' chein' catə' yesə'əbian, na' nic no əgwyə xonj baquə' šə cui ye'ejə' latə' lech chebən'.

⁸ Ca de'en nia' ca' bito naquən xbab che beŋəch, sino lecəə can' na lei de'en bzoj de'e Moizezən'.

⁹ Quinga bzoje' le'e lein': "Bito əgwseyjwle cho'a go'on ca' žlac choso'olej choso'ošoşəb trigon' par chchoj xeinə'." Caguə' por ni che de'en chi' yichj Diozən' go'on ca'azən' bene' mendad par bzoj de'e Moizezən' ca'.

¹⁰ Chzejni'ine' chio'o de que naquəczən güen goncho mantener beŋə' ca' chso'on xšin Diozən' entr chio'o, na' lecəə de'e na'anə' nyojan de que ben' chgua'an go'on na' ben' chonšao' trigw cheyałə' yesə'əzi'e latə' güejə cwseš che de'en chso'one'.

¹¹ Bač golento' le'e par nič chejni'ile xtižə' Diozən' na' de'e na'anə' bito naquən mazəchlə de'en cheyałə' gonle žalə' nabto' gonle neto' mantener.

¹² Chonle mantener yeziquə'əchlə beŋə' choso'osed choso'olo'ine' le'e na' neto' zaquə'əchto' par gonle neto' mantener cle ca' lega'aque'.

Pero bito chnabto' gonle neto' mantener. Chgo'o chchejlažə'əto' bitə'atezə de'en chac cheto' par nič cui bi bi gwžon šancho chio'o chzenagcho che dižə' güen dižə' cobə che Cristən'.

¹³ Ca'acən' chac len beŋə' ca' chso'on mendad lo'o yo'odao' əblao che neto' beŋə' Izrael, chsa'aque' mantener len de'en chəsə'ənežjo beŋə' Izrael ca' lega'aque'. Na' bəxoz ca' choso'ozey bia yixə' par chso'elaogüe'e Diozən', chosyo'ocua'anə' latə' güejə de'e chsa'ogüe' che bia ca' chso'ote'ena'.

¹⁴ Na' ca'acən' baben Xancho Jesocristən' mendad de que beŋə' ca' choso'ozenag che dižə' güen dižə' cobə che'ena' cheyałə' so'one' mantener beŋə' ca' chəsə'əyixjui'en len lega'aque'.

¹⁵ Pero nada' ža, bitonə' naba' gonle nada' mantener, na' caguə chzoja' de'e nga na'a par nič gonle ca'. Yebeichləda' gata' caguə ca' naba' gonle nada' mantener, chedə' lechguale chebeida' can' guac əŋia' de que bito bi bi gan chona' de'en əchyixjui'a dižə' güen dižə' cobə che Jesocristən' len le'e.

¹⁶ Bito gaquə əŋia' de que to goclen xennə' chona' laogüe de'en chyixjue'ida' beŋə' dižə' güen dižə' cobə che Jesocristən'. Diozən' gwleje' nada' par chyixjui'an na' chonən byen gona'

con can' ne'enə', na' probchguazə nada' žalə' cui chzenaga' par chixjui'a dižə' güen dižə' cobə che'enə'.

¹⁷ Žalə' chyxjui'an por ni che de'en na xbab chia'an gona' ca', naba' gonle nada' mantener. Pero bito ənacho de que naquan xbab chia' gona' ca'. Diozən' gwleje' nada' par əchyixjui'an na' de'e na'anə' cheyalə' chixjui'an.

¹⁸ Na' cheba chezaquə' əlažə'a de'en cui chnaba' gonle nada' mantener ca de'en chyxjui'a dižə' güen dižə' cobə che Jesocristən' len le'e. Bitobi laxjua' chzi'a ca de'en chyxjui'an, la'anə'əczə zaca'a par gonle nada' mantener.

¹⁹ Chzexjw yichja' chon cuina' ca xmos yoguə'əlol beņə' par niç šanch beņə' so'onlilažə' Cristən', la'anə'əczə Diozən' none' nada' beņə' gwnabia'.

²⁰ Cata' zoa' len beņə' Izrael ca' chona' con can' chon neto' beņə' Izrael na' lecəə chona' yoguə' de'e ca' zjənyoj le'e lei de'en bzoj de'e Moizezən', la'anə'əczə nezdə' bito chyažjən gona' ca' par niç yebei Diozən' nada'. Pero naogua' costombr ca' par niç ca' lega'aque' yoso'ozenague' chia' na' so'onlilažə'e Cristən'.

²¹ Na' cata' zoa' len beņə' cui zjənombia' lei de'en bzoj de'e Moizezən' bito naogua' costombr ca' de'en chon lein' mendad naoto', par niç ca' beņə' ca' cui zjənombia' lei de'en bzoj de'e Moizezən' yoso'ozenague' chia' na' so'onlilažə'e Cristən'. Bito nacho cui chzenaga' che lei che Diozən', chedə' la' zoa' chzenaga' che Cristən'.

²² Cata' zoa' len beņə' cuiņə' se'ejni'isaogüe'ene' can' chene'e Diozən' goncho, bito chona' de'e sa'aque'ne' zjənaquan de'e mal goncho la'anə'əczə nezdə' bito zjənaquan mal. Chi' yichja' nachə gona' par niç yoso'ozenague' chia' na' so'onlilažə'əche' Cristən'. Chona' xte gan' zelao chzaquə'ada' par chaquə'lena' yoguə'əlol beņə' par niç ca' šə baļe' so'onlilažə'e Cristən'.

²³ Yoguə'əlol de'en chona', chona' an par niç se'ejle' beņə' dižə' güen dižə' cobə che Cristən', chedə' la' che'enda' šancho na' txen socho mbalaz.

²⁴ Nezecho cata' beņə' chso'one' carrer yogue'e chsa'acdoe' par niç chatə'əbia' noe' chon gan, na' tozə ben' chon gan chzi'e premio. Pero na' chio'o, to tocho cheyalə' güe'əlažə'əcho goncho cayaņə'an chene'e Diozən' par niç ca' gaquə gone' ca so to tocho mbalaz catə'an yežincho gan' zoe'enə'.

²⁵ Beņə' deportist ca' chasə'əgo'o chasə'əchejlažə'e cui chso'one' con can' na cuerp chega'aque'enə' par niç chsa'aque'che' beņə' gual. Chso'one' ca' chedə' chse'enene' so'one' competir na' yesə'əzi'e to premio, la'anə'əczə naquan to premio de'e te chei. Na' chio'o bito cheyalə' güe'echo latjə nabi'a' la'azda'omalchon' chio'o par niç Diozən' gone' ca socho mbalaz cata' yežincho gan' zoe'enə'. Na' premio de'en gon Diozən' chio'o cagua de'e te chein'.

²⁶ Ca naquə beņə' deportist ca', la'anə'əczə šə chsa'acdoe', bito so'one' gan šə cui zjəneze' ga zelao yesə'əžine'. Na' šə beņə' chso'one' bocsear, cheyalə' yesə'əneze' nac yoso'ochitje' ponetən' par niç so'one' gan. Na' nada' gwxaquə'əlebada' ca to deportist beņə' chacchgua laogüe de'en chona' do yichj do lažə'a yoguə'əlol can' na Diozən'.

²⁷ Na' bito chzenaga' che la'azda'omala'an bitə'ətezə de'e mal de'en nan gona' len cuerp chia'ana'. Žalə' chzenaga' che la'azda'omala'an bito yebei Diozən' nada' la'anə'əczə bag-wdixjui'a dižə' güen dižə' cobə che Jesocristən' len beņə' yoblə.

10

Bito cheyalə' goncho txen len beņə' ca' chse'ejni'alažə' lgu'a lsaquə'

¹ Beņə' bišə', che'enda' ənezele de que Diozən' gwzoe' len yoguə'əlol de'e xaxtao' neto' beņə' Izrael, beņə' ca' besyə'əchoj Egipton'. Yogue'e jəsə'ənaogüe bejon' gan' yo'o Diozən' na' yogue'e gosə'ədie' Nisdao' Exnan' lao goquən choplə par bla' yo biž.

² Na' yoguə'əlolə'e gwsa'aque' txen len de'e Moizezən' ca' de'en gwche'e lega'aque' gosə'ədie' nisda'onə' na' gata'ətezəchlə ja'aque' bedote gwzo Diozən' len lega'aque' lo'o bejon'.

³ Na' yoguə'əlol de'e xaxta'oto' ca' gwsa'ogüe' tozə cļas yeļə' guao de'en bnežjw Diozən' lega'aque'.

⁴ Na' yogue'e tozə nis de'en bnežjw Diozən' lega'aque' gwse'eje'. Na' Cristən' gwxaquə'əlebene' ca yejən' gan' bchoj nisən' de'en gwse'eje', chedə' Cristən' gwdalene' beņə' ca' na' goclene' lega'aque'.

⁵ Na' la'anə'əczə Diozən' bene' güen len yogue'e con to choppue' gwso'one' can' chazlažə' Diozən', na' de'e na'ana' Diozən' bene' par niç gosə'əbiayi' beņə' ca' yeļə' latjə dašən'.

⁶ Beņə' ca' gosə'əzelažə'e gata' bi de'e gata' chega'aque' de'en cui gone'e Diozən' gwnežjue' lega'aque'. Na' de'en goc chega'aque' chzejni'in chio'o de que bito cheyalə' selažə'əcho goncho bi de'en naquə de'e mal.

⁷ Bito cheyalə' šejni'alažə'əcho lgu'a lsaquə' nic bitə'ətezəchlə de'en chse'ejni'alažə' beņə' ca' cui zjənombia' Diozən'. Zan beņə' Izrael ca' gwse'ejni'alažə'e lgu'a lsaquə' na' nyoj Xtizə'

Diozən' cho'en dižə' can' gwso'one' lao lgu'a' lsaquə' go'oŋ dao' bian' gwse'ejni'alaž'e'e, nan: "Gosa'əbi'e gwse'ej gwsa'ogüe' na' gosa'ənite'e gwso'one' legr."

⁸ Na' lecza ca' bito cheyalə' co'o xtocho o goncho bichlə de'e yelə' zto' de'en nac ca'. To ža zan beŋə' Izrael ca' boso'oža' xtoga'aque', na' lao ža na' gwsa'at šonechoa milga'aque'.

⁹ Bito cheyalə' goncho Xancho Diozən' prueb šə leine' can' ne'enə'. Zan beŋə' Izrael ca' gwso'oneŋə' prueb šə leine' can' ne'enə', na' Diozən' bsele'e beļ əznia gwsa'ob lega'aque' na' zane' gwsa'at.

¹⁰ Zan beŋə' Izrael ca' besə'əze'eše'e len Diozən'. De'e na'anə' Diozən' bsele'e to angl bete' lega'aque'. Na' chio'o ža bito cheyalə' əze'ešə'əcho len Diozən'.

¹¹ Yogua' de'e ca' goc čega'aque' zjənyojən par čəsə'əzejni'in naquən' cheyalə' gon chio'o zocho tyemp nga babidə Xancho Jesocrisən'.

¹² De'e na'anə' notə'ətezcho šə chaquecho zocho chonlilažə'əcho Jesocrisən', cheyalə' gapcho cuidad par nič cui goncho de'e malən'.

¹³ Bitə'ətezə de'e mal de'en chgo'oyelə' gwxiye'en chio'o goncho, bito ŋacho zdebəchlə chac čecho cle ca čhe notə'ətezəchlə beŋə'. Na' Diozən' zocze' chaclene' chio'o can' ne'enə'. Čone' chio'o fuers balor par nič cui gwzenagcho čhe gwxiye'enə', na' čzejni'ine' chio'o naquən' goncho par nič soicho cui goncho de'e malən'.

¹⁴ De'e na'anə' xi'indaogua', bito gonle' txeŋ len beŋə' ca' chse'ejni'alažə' lgu'a' lsaquə'.

¹⁵ Bachejni'ile. De'e na'anə' legon xbab čhe de'e quinga čzejni'ida' le'e par nič ənezele de que čona' le'e to consejw güen.

¹⁶ Na' ca naquə de'en che'ej čaacho par čjəyeza'alažə'əcho bi zejen par chio'o de'en gwso'ote' Crisən', yelə' čoxwclen čhe Dioz nan' čho'echo catə'an che'ej čaochon. Na' ca de'en che'ej čaochon' zejen de que chio'o chonlilažə'əcho Crisən' naccho tozə, čhedə' Crist na'anə' bnežjw cuine' gwso'ote'ene' na' blalj xchene'enə' par gwdixjue' xtolə'əchon'.

¹⁷ Tozə yetxtilən' chzoxjcho na' yoguə'əcho čaacho latə' güejən par čjəyeza'alažə'əcho bi zejen de'en gwso'ote' Crisən'. La'anə'əczə naccho beŋə' zan, de'en čhao yoguə'əcho tozə yetxtilən' chlo'en de que yoguə' chio'o chonlilažə'əcho Crisən' naccho ca tozə family laogüe de'en ngodə'əcho txeŋ len le'.

¹⁸ Na' legon xbab čhe de'e nga. Beŋə' Izrael gwlaž čhia' ca' catə' chso'ela'ogüe'e Diozən' chso'ote' bia yižə' to lao mes de'en naquə par Diozən'. Na' baltezə beŋə' čsa'ogüe' xpelə' bian' chso'ote' lao mesən' naquəga'aque' txeŋ chso'ela'ogüe'e Diozən'.

¹⁹ Na' ca'aczən' naquən len chio'o, šə gaocho yelə' guao de'en choso'ožia beŋə' lao lgu'a' lsaquə'an chse'ejni'alažə'enə', so'one' xbab de que zocho lez gaquəlen lgu'a' lsaquə' ca' chio'ona'. Bito əŋacho de que lgu'a' lsaquə' ca' zjəzaquə'an par əsa'aclenən beŋə', na' nic bi zaquə' ca de'en čjəsə'əžie' yelə' guaoŋ' laoga'aqueŋ'.

²⁰ Čhe'enda' ənezele de que beŋə' ca' cui zjənombia' Diozən' catə' čjəsə'əžie' yelə' guaoŋ' lao lgu'a' lsaquə'an chse'ejni'alažə'enə', caguə par Dioz na'anə' čjəsə'əžie'en, sino par de'e xio' ca'anə'. Na' bito čhe'enda' gonleŋ de'e xio' ca' txeŋ.

²¹ Bito cheyalə' ye'ej gaocho de'en che'ej čaacho par čjəyeza'alažə'əcho bi zejen par chio'o de'en gwso'ot beŋə' Xancho Crisən' šə lecza ye'ej gaocho de'en čjəsə'əžia beŋə' par de'e xio' ca'.

²² Contr Dioz nan' choncho šə che'ej čaacho de'en čjəsə'əžia beŋə' par de'e xio' ca', na' šə che'ej čaochon choncho ca čža'a Diozən' chio'o. Na' bito əŋacho naquəčcho beŋə' gualəč cle ca Diozən' par nič cui bi gac čhecho šə goncho contr le'.

Bito goncho de'en naquə mal par ljezjcho

²³ Na' la'anə'əczə čəsə'əne': "De lsenš par goncho bitə'ətezə", cheyalə' žjəsə'alažə'əcho de que caguə yoguə' de'en gonchon' naquən güen par chio'o. Na' la'anə'əczə šə chaquecho deczə lsenš par goncho bitə'ətezə, caguə yoguə'əŋŋə' gaquəlenən chio'o.

²⁴ Ni tocho bito cheyalə' goncho bitə'ətezə de'en goncho šə naquən mal par ljezjcho, la'anə'əczə chaquecho naquən to de'e güen par chio'o.

²⁵ Bitə'ətezə belə' de'en chso'ote'e ya'anə' legaon sin cui əŋable šə boso'ožie'en lao lgu'a' lsaquə'an chse'ejni'alažə'e. Nia' ca' par nič cui gaquəzəjlažə'əle šə naple dolə' por ni čhe de'en gaolen.

²⁶ Nezecho de que guac si'icho bitə'ətezə belə' de'en chso'ote'e ya'anə', čhedə' Xtižə' Diozən' nyojən nan: "Čhe Xancho Diozən' yežlyo nga, beŋəčən', bia yižə' na' yoguə' de'e zjəde lao yežlyon'."

²⁷ Na' catə' beŋə' cui chso'onlilažə' Crisən' so'one' chio'o combid ližga'aque'enə' par əxjtaocho, šə šejcho con gaotezcho bitə'ətezə de'en so'one' gaocho. Bito əŋabga'aquechone' šə boso'ožie'en lao lgu'a' lsaquə'an chse'ejni'alažə'enə'. Diozən' bito čhene'ene' gaquəzəjlažə'əcho šə napcho dolə' por ni čhe šə bi de'en gaocho.

²⁸ Na' šə no ye' chio'o de que baboso'o'zie' belə'an to lao lgu'a' lsaquə'an chse'ejni'alaž'e'e, bito gaochon šə ca' par ničh be'en ye' chio'o ca' cui gone' xbab de que lenczchon' chejni'alažə'əcho lgu'a' lsaquə' ca' na' par ničh cui gone' xbab de que napcho dolə' šə gaochon.

²⁹ Bito ənacho de que naquən de'e mal gaochon, pero par ničh ben' gwna chio'o de que baboso'o'zie' en lao lgu'a' lsaquə'an cui gaquene' de que choncho de'e mal, de'e na'ana' cui gaochon.

De repent chonle xbab bixchen' cheyalə' cuejyichjcho cui goncho bitə'atezə de'en goncho šə por ni che de'en gonchon' əsa'aque be'nə' ljuežjchon' de que napcho dolə'.

³⁰ Na' de repent chonle xbab bixchen' əna ljuežjchon' choncho de'e mal chaocho to yelə' guao šə cho'echo yelə' choxcwlen che Diozən' por len.

³¹ Quinga naquən, bitə'atezə de'en goncho cheyalə' gonchon ca gaquəlenən be'nə' yoblə par ničh əso'elaogü'e Diozən', na' bito ye'ej gaocho de'en gonən par ničh be'nə' yoblə cui əso'elaogü'e Diozən'.

³² Na' bito goncho par ničh notə'atezə be'nə' yesə'əxope' so'one' de'e malən', la'anə'əczə šə be'nə' Izrael, o šə be'nə' cui zjənaquə be'nə' Izrael, na' la'anə'əczə naque' ljuežj chio'o bagwlej Diozən' par chdopə žzagcho cho'ela'ocho Cristən' o šə cui naque'.

³³ Ca'aczə nada' ža, bitə'atezə de'en chona' əchyliləlažə'a naclən' chona'an par ničh gaquəlenən be'nə' yoblə. Choncha' xbab che de'en gaquəlen be'nə' yeziquə'əchlə cle ca chona' xbab che de'en gaquəlen nada', chedə' che'enda' be'nə' zan yesyə'əchoj xni'a de'e malən'.

11

¹ Nada' ža chchojyichja' de'en che'enda' gona' par ničh chona' de'en naquə güen par be'nə' yeziquə'əchlə. Na' legonšga ca' chedə' nada' chona' can' ben Cristən'.

Can' cheyalə' so'on no'ol ca' lao coltən'

² Lechgualə chebeida' de que chonle xbab chia' yoguə' las na' de que chjsa'alažə'əle de'en bsed blo'ida' le'e. Güenchguan' chonle chzenagle che de'e ca' bsed blo'ida' le'e.

³ Na' che'enda' ənezele de que notə'atezə be'nə' byo cheyalə' əgwzəxjw yichje' par ničh Cristən' nabi'ene'. Na' no'ol ca' cheyalə' yesə'əzəxjw yichjga'aque' par ničh be'en chega'aque' ca' yesə'anabi'e lega'aque', can' chon Cristən' chzəxjw yichje' par ničh Diozən' chnabi'ene'.

⁴ Le'e be'nə' byo catə' gonle orasyon na' catə' chixjue'ele bi de'en bagwna Diozən' le'e, bito gwzo xlapə'əlen'. La' šə nzotezlen naquən to yelə' zto' par le'e na' zejen de que be'nə'chən' chnabi'e le'e, caguə Crist na'azən'.

⁵ Na' le'e no'olə catə' gonle orasyon o catə' chixjue'ele bi de'en bagwna Diozən' le'e, le'e gwcuəšə' yichje' can' choncze batə'atezə chchojle ničh nachbia' de que be'nə' byo ca' chəsə'anabi'e le'e. Yoguə'əcho nəzecho naquən to yelə' zto' che no'olən' catə'an nšib yichje'en pelon, na' ca'aczə naquən len le'e no'olə šə cui chcuəšə' yichjlen' catə'an chonle orasyon o catə'an chyixjue'ele bi de'en bagwna Diozən' le'e.

⁶ Na' šə cui chonle can' naquə costombr chele de'en chcuəšə' yichjlen' batə'atezə chchojle, yejni'a əgwšib yichjlen'. Na' šə chaquele zto' par əgwšiblen, mejor əgwcuəšə'əczlen can' chso'on no'ol ca' yelə'.

⁷ Na' ca naquə le'e be'nə' byo, bito cheyalə' əgwcuəšə' yichjlen' catə' gonle orasyon na' catə' chixjue'ele bi de'en bagwna Diozən' le'e, chedə' Diozən' bene' le'e par ničh naple yelə' chnabia' can' napə le'enə' na' par əgwlo'ele ca güənə' chone'enə'. Na' le'e no'olə, Diozən' bene' le'e par əgwlo'ele ca güənə' chso'on be'en chelen'.

⁸ Diozən' bito bene' be'nə' byon' len costiy che no'olən' sino que gwleje' costiy che be'nə' nechən' par bene'en no'olən'.

⁹ Na' Diozən' bito bene' be'nə' byon' par gaquəlene' no'olən' sino que bene' no'olən' par gaquəlene' be'nə' byon'.

¹⁰ De'e na'ana' no'ol ca' cheyalə' yesə'əlo'e de que chəsə'anabia' be'nə' byo ca' lega'aque'. Cheyalə' so'one' ca' chedə' angl ca' chəsə'əgüie' naquən' chon chio'o be'nə'ch.

¹¹ Pero ngodə'əczcho txen len Xancho Jesocrstən' la'anə'əczə šə naccho be'nə' byo o šə naccho no'olə, na' de'e na'ana' bito cheyalə' so'on no'olə ca' xbab de que bito chəsə'əyazjene' be'nə' byo na' nic neto' be'nə' byo gonto' xbab de que bito chyažjeto' no'olə.

¹² Naquən de'e li can' ben Diozən' gwleje' costiy che be'nə' byo nechən' par bene'en no'olə nechən', na' nəzecho yoguə'əte be'nə' byo gwxa'n no'olə lega'aque'. Na' Dioz na'ana' bene' be'nə'ch, bene' bia ca' chsa'aš, na' bene' bitə'atezəchlə de'e zjəde.

¹³ Legon xbab chele na' gacbe'ile de que caguə de'e šo'oləžə'əcho šə no'olə gone' orasyon sin cui əgwcuəšə' yichje'enə', chedə' can' naquə costombr chechon'.

¹⁴ Na' leczə nəzecho bito chazlazə'əcho šə be'nə' byon' cui əgwšib yichje'enə', con güe'e latjə ətonən. Naquən to yelə' zto' che' šə gone' ca'.

¹⁵ Pero na' no'olən' xochechgua yišə' yichje'en šə žian de'e toŋə. Diozən' none' par niçh yišə' yichj no'ol ca' chaquan de'e toŋə par chcuəšə'an yichjga'aque'ena'.

¹⁶ Na' šə nole bito chazlažə'əle de'e quinga babzoja' na' šə chaquele əgwšəšle çhei, ənia' le'e clar de que neto' apostol bito cho'eto' latjə so'on no'ol ca' orasyon lao ndopə nžagcho sin cui yoso'ocuašə' yichjga'aque'ena', na' nic chsoe' beŋə' ljuējzto' ca' latjə so'one' ca' gatə'ətezəchlə ža' beŋə' bagwlej Diozən' par chəsə'ədopə chəsə'əžague' chso'elaogü'e Cristən'.

Catə'an gwse'ej gwsa'ogü'e t xen bito jəsyə'əza'alazə'e can' bnežjw cuin Xancho Jesocristən' por ni chega'aque'

¹⁷ Leczə de de'e yoblə de'en ənia' le'e na' ca' naquə lennə' bito gaquə ənia' de que chonle güen. De'en chonle lao chdopə chžagle t xen par cho'ela'ole Cristən' chonən mal len le'e lguə'a de'e gaqualənən le'e.

¹⁸ Enia' ca' çhedə' babenda' dižə' de que catə' chdopə chžagle par cho'ela'ole Cristən' bito chonle t xen len beŋə' ljuējzle. Na' de repent dižə' de'en babenda' naquan de'e li.

¹⁹ De'e li nitə' balə beŋə' entr le'e cui chso'one' t xen len yoguə'əle. Na' de'en cui chso'one' t xen chlo'e'en non' chonlilažə' Cristən' do yichj do lažə'e na' non' cui.

²⁰ Na' catə' chežagle par chaole t xen, bito chonle ca' žjəyeza'alazə'əle de'en bnežjw cuin Xancho Jesocristən' por ni çecho catə'an gwsote'ene', la'ənə'əczə chedopə chežagle par žjəyeza'alazə'əlen.

²¹ To tole che'ej chaole de'en noxə'əle sin cui chbezə ljuējzle ca'. Bito chonlen tozə par niçh yoguə'əle gaolen. De'e na'anə' balə ne'e chdonle catə' chedaole na' yebalə chzožele de'e tant che'ej chaoxatle.

²² Nca'alə xneze yega'an ližle ye'ej gaole cle ca ye'ej gaole lao beŋə' cui de çhega'aque' šə cui əgwnežjwle chega'aque'. Chonga'aquele ljuējzle ca beŋə' cui bi zjəzaquə', la'ənə'əczə t xen len chio'o bagwlej Diozən' lega'aque' par chso'elaogü'e Jesocristən': Chonle ca chsa'aquene' tolə de'en cui de çhega'aque'. Bito gonle xbab ənia' de que güennə' chonle de'en chonle ca'.

Che'ej chaocho par chjəyeza'alazə'əcho de'en bnežjw cuin Xancho Jesocristən' por ni checho

²³ Xancho Jeso'osən' bene' par niçh nežda' can' chene'ene' goncho par žjəyeza'alazə'əcho de'en bnežjw cuine' por ni çecho catə'an gwsote'ene'. Na' babzejni'ida' le'e de que že'ənə' catə'an Jodən' bdie' Xancho Jeso'osən' lao na' beŋə' mal ca', Xancho na'anə' bexe'e to yetxtilən'.

²⁴ Na' lao noxə'en be'e yełə' choxcwlen çhe Diozən'. Nach bzojxe'en, na' gwne': "Legao yetxtil nga. Lennə' naquan cuerp çhia' de'en əgwnežjua' por ni çhele. Quinga gonle par žjəyeza'alazə'əle ca de'en gwnežjua'an."

²⁵ Beyož gwsa'ogü'e yetxtilən' bexe'e to tas nis oban' na' leczə be'e yełə' choxcwlen çhe Diozən'. Na' gože' beŋə' ca': "De'en yožə lo'o tas nga zejen de que Diozən' solao gone' de'e cobə de'en none' lyebe gone' par gaqualene' le'e. Na' gone'en çhedə' so'ote' nada' na' laljə xçhena'anə' por ni çhele. Na' batə'ətezə ye'ejlen can' ye'ejlen na'a, le'e yosa'alazə' ca de'e gwnežjo cuina' por ni çhele."

²⁶ Na' nada' Pab çhenia' le'e, yoguə' las catə'an gaocho yetxtilən' na' catə'an ye'ejcho nis oban' de'en che'ej chaocho par chjəyeza'alazə'əcho ca de'en bnežjw cuin Xancho Jesocristən' por ni çecho, choncho ca yesə'əneze beŋə' de que gwdixjue' xtołə'əchon' catə'an gwsote'ene'. Na' can' gonchcho xte catə'an yide' de'e yoblə.

Can' cheyalə' goncho catə' che'ej chaocho par chjəyeza'alazə'əcho de'en bnežjw cuin Xancho Jesocristən' por ni checho

²⁷ De'e na'anə' šə bito güe'ela'ocho Xancho Jesocristən' do yichj do lažə'əcho bito naquan güen ye'ej gaocho de'en che'ej chaocho par chjəyeza'alazə'əcho ca de'en bnežjw cuin Xancho Jesocristən' por ni çecho. Na' leczə bito naquan güen ye'ej gaochon catə' cui zocho binlo len Diozən' o len ljuējzcho. Gapcho dolə' šə ye'ej gaochon ca', çhedə' goncho ca cui bi zaquə' de'en bnežjw cuin Xancho Jesocristən' blalj xçhene'ena' por ni çecho.

²⁸ Catə'an che'ej chaocho par chjəyeza'alazə'əcho ca de'en bnežjw cuin Xancho Jesocristən' por ni çecho, to tocho cheyalə' gonyanə'əcho xbab šə zocho binlo len Diozən' na' len ljuējzcho ca' par niçh ye'ej gaocho de'en de ye'ej gaocho.

²⁹ Na' šə che'ej chaochon sin cui goncho xbab ca de'en bnežjw cuin Xancho' por ni çecho Diozən' gone' chio'o castigw.

³⁰ Na' de'en che'ej chaolen sin cui chonle xbab bi zejen, de'en na'anə' balə beŋə' ljuējzlen' bagwsa'at na' zanle chacšene.

³¹ Pero na' šə gonyanə'əcho xbab naquan' goncho par niçh socho binlo len Diozən' na' len ljuējzcho, nachən' bito gon Diozən' chio'o castigw por ni çhe can' che'ej chaochon'.

³² Catá' napcho dolá' na' che'ej chaochon, Xancho Diozán' chone' chio'o castigw par nich cheyache'icho de que de'e malán' choncho. Chone' ca' par nich cui si'icho castigw zejlicane can' gac che beñá' ca' cui chso'elao' le'.

³³ De'e na'ana' beñá' biśá', catá' adopá əžagle txen par ye'ej gaole, lecuezá ljuežjle ca' par nich ye'ej gao yoguá'le txen.

³⁴ Śá de'en chbil chdonle na'aza, nca'alá xneze yega'an ližle ye'ej gaole, caguá ca gon Diozán' le'e castigw can' chonle catá'an chdopá chžagle. Na' ne'e deczá de'en che'enda' gwzejni'ida' le'e naquán' gonle, pero catá' yida' de'e yoblá gan' zolená' cana'ach əgwzejni'ida' le'e che de'e ca'.

12

Spirit che Diozán' chaclenán to tocho par goncho bi de'en chene'en goncho

¹ Beñá' biśá', de de'en che'enda' ənezele che de'en chon Spirit che Diozán' chaclenán chio'o chonlilažá'əcho Jesocristán'.

² Nezele catá'an cuiñá'ale Diozán' banxoayagle par chejni'alažá'le lguá'a lsaquá' ca' con can' bzejni'i beñá' le'e, la'ana'əczá lguá'a lsaquá' ca' bito zjənye'en biś xne.

³ Pero na'a ža, che'enda' ənezele de que Spirit che Diozán' bito chonán par nich no əna de que Jeso'osán' naque' beñá' maldit. Na' notono no əna de que Jeso'osán' naque' Xane' śá cui chon Spirit che Diozán' par əne' ca'.

⁴ Tozá Spirit che Diozán' zon na' nža' nža' can' chaclenán to tocho par goncho bi de'en goncho na' par ənezecho bi de'en nezecho.

⁵ Tozá Xancho Jesocristán' cho'ela'ochó la'ana'əczá nža' nža' can' chac gon to tocho xšine'ená'.

⁶ Leczá tozá Dioz nan' zo la'ana'əczá nža' nža' can' chone' len to tocho par nich choncho xšine'ená'.

⁷ Na' Spirit che Diozán' zon len to tocho par nich ca' chac choncho de'en chaclenán ljuežjcho.

⁸ Spirit che Diozán' chonán par nich balcho cho'echo dižá' che Diozán' de'en naquán lechguale dižá' sin', na' leczá Spirit na'ana' chaclenán yebalcho par chejni'icho che Diozán' na' par cho'echo xtiže'ená'.

⁹ Na' Spirit na'ana' chonán ca balcho chonlilažá'əchguacho Diozán' par nich chac bitá'ətezá de'en chnabechone' gaquá. Na' leczá Spirit na'ana' chonán par nich balcho chac choncho ca chasyá'ayaque beñá' chsa'acšene.

¹⁰ Na' Spiritán' chonán par nich balcho choncho miłagr, na' balcho chyixjue'echo bi de'en bagwna Diozán' chio'o. Na' leczá Spirit nan' chaclenán yebalcho par nich chnezecho che bitá'ətezá de'en chso'on beñá' śá za'an che Spirit che Diozán' o śá che de'e xio'oná'. Na' Spirit na'aczón' chaclenán yebalcho par chchoj catá' cho'echo gwde gwdelá dižá' de'en cui chejni'icho, na' chaclenán yebalcho par chozejni'iga'aquechone' bi zeje dižá' de'en cho'echon'.

¹¹ Tozá Spiritán' chaclenán yoguá'əcho par nich choncho yoguá' de'e ca' chene'en gon to tocho.

Yoguá' chio'o chonlilažá'əcho Cristán' naccho tozá, can' naquá cuerp chechon'

¹² Cuerp chechon' nsa'an zan part pero de'en zjəngodá'an txen naquán tozá cuerp. Ca'aczá naquán len yoguá' chio'o chonlilažá'əcho Cristán', naccho tozá can' naquá cuerp chechon'.

¹³ Balá chio'o naccho beñá' Izrael na' yebalcho bito naccho beñá' Izrael. Balcho naccho beñá' esclabos na' yebalcho bito naccho. Pero yoguá'əcho gwchoacho nis par chlo'en de que Spirit che Diozán' babenán ca ngodá'əcho txen len Cristán'. Na' tozá Spirit na'ana' zon lo'o yichjla'azdao' yoguá'əcho.

¹⁴ Cuerp chechon' nsa'an zan part, na' nža' naquá to to partán'.

¹⁵ Žalá' ni'achon' ənan: "Bito naca' tozá len cuerpán' chedá' bito naca' ne'iná'", caguá ni che de'en ənan ca'ana' cui naquán tozá len cuerpán'.

¹⁶ Le'egatezá ca' žalá' nagchon' ənan: "Bito naca' nada' tozá len cuerpán' chedá' bito naca' jelaogüei."

¹⁷ Žalá' doxen cuerp chechon' naquán jelaochó, bito gaquá yenecho. Le'egatezá ca' žalá' doxen cuerpán' naquán nagcho, bito gaquá le'icho.

¹⁸ Pero Diozán' bsi'e xneze par nich cuerp chechon' nsa'an zan part de'e chso'on žim con can' gwyazlaže'e.

¹⁹ Bitó nya' cuerp chechon' žalá' nsa'an tozá part.

²⁰ Cuerp chechon' nsa'an zan part pero de'en zjəngodá'an txen naquán tozá cuerp.

²¹ De'e na'ana' jelaochon' bito gaquá ye'en na'achon': "Bitó chyažjda' le'." Na' nic gaquá ye' yichjchon' ni'achon': "Bitó chyažjda' le'."

²² La'anə'əczə cuerp chechon' nsa'an balə part de'e cuitec bi fuers chei de, bia'acza lechguale chyažjehchon.

²³ Na' part ca' nsa' cuerp chechon' de'en chaquecho cuitec bi zaquə', chi' yichjchon ca de'en cheyacw xacho. Na' part ca' de'e cui chene'echo le'i beṇə', chcuəšə'əchon len xacho de'en chacwcho.

²⁴ Pero part de'en nsa' cuerp chechon' de'en banaquə xoche bito chcuəšə'əchon. Na' Diozən' none' cuerp chechon' ca chi' yichjcho che part ca' de'en cui zjənaquə xoche.

²⁵ Ca'aczan' bsi'e xneze par nich chio'o cho'ela'ochō Cristən' goncho txen tocho yetocho na' cue' yichjcho gaquəlen ljuežjcho.

²⁶ Na' šə bin' chac che tocho, yoguə'əcho chi' saquə'əcho txen. Na' šə chac güen che yetocho, yoguə'əcho socho mbalaz.

²⁷ Yoguə'əcho ngoda'əcho txen len Cristən' na' to tocho gwxaquə'əlebecho ca to part cuerp che'ena'.

²⁸ Na' entr chio'o chdopə chžagcho cho'ela'ochō Cristən', Dioz nan' gwleje' neto' naquəto' apostol, na' de'en ngü'e' lao na'ato' gonto' naquən de'e zaquə'əchgüei. Na' lecze'en gwleje' yebale' par chasə'əyixjui'e de'en ne'ena'. Na' de'en chso'one'ena' leczə naquən de'e zaquə'e. Na' yebale' gwlej Diozən' par choso'osed choso'olo'ine' xtiže'ena'. Na' de'en choso'osed choso'olo'ine' xtiže'ena' leczə naquən de'e zaquə'e. Na' leczə gwlej Diozən' beṇə' chso'on miłagr na' beṇə' chso'on par chəsyə'əyaque beṇə' chsa'acšene, na' beṇə' chsa'acšen yeziquə'əchlə beṇə' šə bi de'en chəsə'əyažjene'. Na' gwleje' beṇə' chəsə'anabia' chio'o chdopə chžagcho cho'ela'ochō Cristən', na' gwleje' beṇə' chso'e gwde gwdełə dižə' de'en cui chse'ejni'ine' con catə' chon Spiritən' ca chso'en.

²⁹ Pero caguə yoguə'əcho naccho apostol. Na' Diozən' bito gwleje' yoguə'əcho par chixjue'echo bi de'en bagwne' chio'o, na' nic gwleje' yoguə'əcho par əgwsed əgwlo'icho xtiže'ena', na' nic gwleje' yoguə'əcho par goncho miłagr.

³⁰ Caguə yoguə'əcho chac goncho ca yesyə'əyaque beṇə' chsa'acšene, na' caguə yoguə'əchon' chon Spirit che Diozən' par güe'echo gwde gwdełə dižə' de'en cui chejni'icho, na' caguə yoguə'əchon' chac zozejni'icho bi zejen dižə' de'en chon Spiritən' ca chso'e.

³¹ Chonle güen šə chzelažə'əle gaquəlen Spirit che Diozən' le'e gonle de'e ca' de'en naquəch de'e zaquə'e. Pero əgwlo'ida' le'e yeto de'e gonle de'en naquə de'e žialao xench.

13

Cheyalə' gaque che ljuežj beṇəchcho

¹ La'anə'əczə šə chaccho gwde gwdełə dižə' de'en chsa'ac beṇəchən' na' de'en chsa'ac angl ca', pero šə bito chaquecho che ljuežj beṇəchcho, bito bi bi zaquə'əcho. Con gwxaquə'əlebecho ca pedas ya de'en chso'on sšag na' ca platiy de'en choso'osiž beṇə' gocuež ca' la' xtiže'əchon' bitobi bi zaquə'an.

² Na' la'anə'əczə šə bagocwlen Spirit che Diozən' chio'o par nich chyixjue'echo bi de'en bagwne' chio'o len yelə' guac che Spiritən', bito bi zaquə'əcho šə bito chaquecho che ljuežj beṇəchcho. La'anə'əczə šə nezecho yoguə'əloł de'en cui no gwneze antslə, len la'anə'əczə šə chejni'icho yoguə'əloł de'en naquə de'e zaquə'e, bitoczə bi zaquə'əcho šə cui chaquecho che ljuežj beṇəchchon'. Na' la'anə'əczə šə lechguale chonlilažə'əcho Diozən' par nich chone' bitə'ətezə de'e zdebə de'en chṇabechone' gone', bitoczə bi zaquə'əcho šə cui chaquecho che ljuežj beṇəchcho.

³ Na' šə cui chaquecho che ljuežj beṇəchchon' bito bi zedəgua'an par chio'o la'anə'əczə šə əgwnežjwcho beṇə' yašə'an yoguə' de'en deicho. Le'egatezə ca' šə cui chaquecho che ljuežj beṇəchchon' bitobi zedəgua'an par chio'o la'anə'əczə šə əgwnežjo cuincho yoso'ozeye'.

⁴ Šə chaquecho che ljuežj beṇəchcho, napcho yelə' chxenlažə' len lega'aque', na' choncho güen len lega'aque'; bito chgue'iga'aquechone' šə chac güen chega'aque'; na' bito cho'elao' cuincho; na' bito cha'alažə'əcho.

⁵ Na' catə' chaquecho che ljuežj beṇəchcho, bito choncho nacze len lega'aque', bito choncho xbab che cuincho, bito naccho beṇə' xtišjw, na' bito naccho beṇə' ggo'olažə'e.

⁶ Na' catə' chaquecho che ljuežj beṇəchcho bito chebeicho šə non' chon de'e mal, sino que chebeicho šə non' chon de'e güen.

⁷ Šə chaquecho che ljuežj beṇəchcho chapcho yelə' chxenlažə' bitə'ətezə de'en chso'one beṇə' chio'o, na' choncho xbab güen che yoguə'əloł beṇə', na' zocho lez so'on beṇə' güen yoguə' las, na' chgo'o chchejlažə'əcho len bitə'ətezə de'en chac.

⁸ Cuat əžin ža catə' cuich cheyalə' gaquecho che ljuežj beṇəchcho. Pero gwžin ža catə' cuich gon Diozən' par nich no chixjue' e bi de'en bagože'ene'. Na' gwžin ža catə' Spirit che'ena' gonən ca cuich əso'e gwde gwdełə dižə' de'e cui chse'ejni'i' beṇə' yoblə. Na' leczə gwžin ža catə' te che yoguə'əloł de'en neze chio'o beṇəch lao yežlyo nga.

⁹ Bitonə' nezecho yoguə'əloj de'e ənezecho na' niqunə' gac chixjue'echo yoguə'əloj de'en bagwna Diozən' chio'o.

¹⁰ Pero gwžin ža catə' gaquə cayaṇə'an chene'e Diozən' gaquə, na' cana'achən' cuich bi bi yega'an de'en cui gaquə cayaṇə'an chene'e Diozən'.

¹¹ Catə' goccho bidao' be'echo dižə' can' chsoe' notə'ətezə bidao' dižə', na' leczə xbab chechon' goquən ca xbab čega'acbo'onə', na' gweejni'icho con can' chse'ejni'ibo'. Na' ṇa'a bagwcha'ochito bitochoncho can' chso'on bidao'.

¹² Pero bitonə' šejni'icho binlo che Diozən'. De'e na'anə' gwxaquə'əlebecho ca beṇə' chgüie' beṇə' yoblə to lo'o spejw de'e cuitec chloe' binlo. Pero gwžin ža catə' šejni'iyane'echo che Diozən' can' chejni'ine' checho ṇa'a.

¹³ ṇa'a ža, de'e quinga šonə chon Diozən' mendad goncho zejlicane: gonlilažə'əchone', socho lez gaquə güen checho, gaquecho che Diozən' na' che ljuežj beṇəchcho. Pero de'en naquə de'e žialaoch goncho entr šonə de'e quinga, gaquecho che Diozən' na' che ljuežj beṇəchcho.

14

Beṇə' ca' chso'elen Diozən' gwde gwdeḷə dižə' de'en cui chse'ejni'ine'

¹ Cheyaḷə' güe'elažə'əcho par gaquechecho che Diozən' na' che ljuežj beṇəchcho, na' leczə cue' yichjcho gaquəlen Spirit che'ena' chio'o par goncho xšine'ena'. Na' mazəchlə cheyaḷə' cue' yichjcho par gaquəlen chio'o chixjue'echo de'en əṇa Diozən' chio'o.

² Balcho chon Spiritən' par nič chchoj catə' cho'elencho Diozən' gwde gwdeḷə dižə' de'en cui chejni'icho. Na' catə' cho'elencho Diozən' gwde gwdeḷə dižə'an ca', caguə beṇəch na'anə' cho'elenchon chedə' bito chse'ejni'ine' dižə'an. Spirit nan' chonən par nič cho'echo dižə' de'en chejni'i tozə Diozən'.

³ Pero catə' chyixjue'echo de'en bagwna Diozən' chio'o choncho par nič ljuežjcho ca' ṇitə'ətezə ṇite'e so'onlilaže'e le', na' chtipcho lažə'əga'aque', na' leczə cho'ega'acchone' balor par ṇite'e mbalaz.

⁴ Catə' Spirit che Diozən' chonən par nič cho'elenchone' gwde gwdeḷə dižə' de'en cui chejni'icho, yichjla'ažda'ochon na'agan' chaclenən. Pero catə' Spirit che Diozən' chaclenən par nič chyixjue'echo de'en bagwna Diozən' chio'o, chaclenən yoguə' chio'o chdopə chžagcho cho'ela'ochon Cristən'.

⁵ Yebeida' žalə' Spiritən' gonən par nič yoguə'əle güe'elenle Diozən' gwde gwdeḷə dižə', pero gobeichda' žalə' gaquəlenən yoguə'əle par chixjue'ele de'en ye'e le'e. Ben' chyixjue'e de'en bagož Diozən' le', chone' to de'e zaquə'əche cle ca de'en chon ben' cho'elen Diozən' gwde gwdeḷə dižə'. La' šə cui no zo no əgwzejni'i yeziquə'əchhlə beṇə' chso'elao' Cristən' bi dižə'an cho'e, bito no gaquəlenən.

⁶ Beṇə' bišə', nežda' bito gaquəlenən le'e šə güe'elena' Diozən' gwde gwdeḷə dižə' catə'an yida' dezlanə'a le'e. Pero guaquəlenən le'e šə əgwzejni'ida' le'e bi de'en babsed bablo'i Diozən' nada'. Na' guaquəlenczən šə əgwzejni'ida' le'e bichlə de'en nežda' che Diozən'. Guaquəlenczən šə chixjue'ida' de'en əṇa Diozən' nada'. Na' leczə guaquəlenən šə gwsed gwlo'ida' le'e bi zeje xtiže'ena'.

⁷ Ca naquə flaudən', šə tozə can' gwcuež beṇə' gocuežən' len dote tyemp, notono gacbe'i bi piesən' chcueže'. Le'egatezə ca' arpən' šə tozə can' ggoj beṇə' gocuežən' len dote tyemp, notono gacbe'i bi piesən' chgole'.

⁸ Catə' zo to beṇə' chcueže' cornetən' par nič chəsə'əneze soldad ca' naquən' so'one', šə bito əgwcueže'en clar, bito se'ejni'ine' naquən' cheyaḷə' so'one'.

⁹ Le'egatezə ca' chio'o ža, šə güe'elencho Diozən' dižə' de'en cui chse'ejni'i beṇə', bito gaquəlenən lega'aque'.

¹⁰ Nezecho de que beṇə' ža' doxen yežlyo nga gwde gwdeḷə dižə' de'e chsa'aque', na' to toga'aque' chse'ejni'i xtižə' ljuežjga'aque'.

¹¹ Na' šə chio'o bito chaccho dižə' de'e chac yeto beṇə', nezecho le' naque' beṇə' zita' na' chio'o naccho beṇə' zita'.

¹² Na' le'e chi' yichjle gaquəlen Spirit che Diozən' le'e, ca'aczən' co' yichjle gonle xšine'ena' par gaquəlen ljuežjle. Gonle ca' nič yoguə'əle chdopə chžagle cho'ela'ole Cristən' sotezə sole gonlilažə'əlene'.

¹³ Na' šə Spiritən' gonən ca əchoj catə' güe'elencho Diozən' gwde gwdeḷə dižə', cheyaḷə' ṇabecho Diozən' gaquəlenche' chio'o par nič əgwzejni'icho beṇə' bi zejen dižə' de'en cho'elenchone'ena'.

¹⁴ Na' catə' choncho orasyonṇə' šə Spirit che Diozən' chonən par cho'elenchone' dižə' de'e cui chejni'icho, bito bi xbab choncho lo'o yichjla'ažda'ochon' catə'an cho'echon, con chacbe'icho de que Dioz na'aczən' cho'ela'ochon.

¹⁵ Quingan' cheyalə' goncho, catə' goncho orasyonə' güe'echo dižə' de'en əgwzejni'i Spirit che Diozan' chio'o, pero goncho xbab che dižə' de'en cho'echon'. Na' catə' gəlcho, gəlcho bi de'en əgwzejni'i Spirit che Diozan' chio'o, na' leczə goncho xbab che de'en cho'echon'.

¹⁶ Legon xbab nac gaquə šə güe'echo yelə' cho'xcwlen che Diozan' len dižə' de'en cui chejni'i yoguə'əcho. Beņə' cuiņə' yesə'əneze naquən' choncho lao chdopə chžagcho cho'ela'ocho Cristən', bito se'ejni'ine' bin' nacho na' de'e na'anə' bito əso'e yelə' cho'xcwlen che Diozan' txen len chio'o.

¹⁷ Bito gaquəlenən lega'aque' šə goncho orasyon len dižə' de'e cui se'ejni'ine' la'anə'əczə šə de'e li güe'echo yelə' cho'xcwlen che Diozan' bin'lo.

¹⁸ Cho'a yelə' cho'xcwlen che Diozan' de que Spirit che'enə' chonən par niç cho'elencha'ane' gwde gwdele dižə' mazəchlə ca chonən len notə'ətezəchle.

¹⁹ Pero catə' ndopə nžagcho cho'ela'ocho Cristən' la'anə' gueyə'əzə dižə' de'en chejni'i yoguə'əcho gwsed gwlo'ida' le'e zejəchen cle ca gua'a ši mil dižə' de'en cui chejni'icho.

²⁰ Beņə' bišə, naquəczən güen gaccho ca bi'i che'en dao' laogüe de'en cui goncho de'e mal. Pero cheyalə' šo'əcho xbab che beņə' cha'o na' bito šo'əcho xbab che bi'i cuiņə' šejni'.

²¹ Xtižə' Diozan' nyojən nan: "Nada' Dioz gona' par niç beņə' zita' ca' əso'elene' beņə' Izrael ca' dižə' de'e cui se'ejni'ine', na' yesyə'əbane beņə' Izrael ca', pero bia'aczə bito yoso'ozenague' chia'." Can' na Xancho Diozan'.

²² Šə nita' beņə' cui chse'ejle' che Diozan' na' choso'ozenague' catə' güe'elenle Diozan' gwde gwdele dižə' de'en cui chejni'ile yesyə'əbanene' na' sa'ache'ljjeine' de que zoczə Diozan' len le'e. Na' ca naquə chio'o cho'ela'ocho Cristən', banezecho de que zoczə Diozan' len chio'o. Na' catə' to beņə' chyixjue'ine' bi de'en bagož Diozan' le', chaclenən chio'o chon'jilažə'əcho Cristən' la'anə'əczə cui chaclenən beņə' cui chso'onlilažə'ene'.

²³ Legon xbab nac gaquə šə lao ndopə nžagcho txen cho'ela'ocho Cristən' yoguə'əcho solao güe'elenchone' gwde gwdele dižə' de'e cui chejni'icho. Na' šə da'acclə beņə' cui chso'onlilažə' Cristən' o beņə' cuiņə' yesə'əneze naquən' choncho cho'ela'ochone', əse'enene' cho'elenchone' gwde gwdele dižə' na' so'one' xbab de que chac tontchon'.

²⁴ Pero nža'an šə to tocho chyixjue'echo bi de'en bagwna Diozan' chio'o. Šə yezidəclə to beņə' cuiņə' gon'jilažə' Cristən' o to beņə' cuiņə' neze naquən' choncho cho'ela'ochone', gacbe'ine' de que de xtole'e catə' to tocho chyixjue'echo bi de'en bagwna Diozan' chio'o.

²⁵ Na' catə' gacbe'ine' de que la'aždaogüe'ena' naquən mal lao Diozan' gwzolja xibe' güe'elaogüe'ene' na' əne' de que zoczə Diozan' len chio'o chon'jilažə'əcho Cristən'.

Cheyalə' gwsa'əcho coltən' bin'lo na' cui gonchon chac yazə

²⁶ Na'a ža beņə' bišə, catə'n chdopə chžagle txen bal'e golle to imno, na' bal'e de de'e əgwsed gwlo'i ljuežjle, na' bal'e güe'ele dižə' che to de'en bəbežni'i Spirit che Diozan' le'e, na' bal'e güe'ela'ole Diozan' güe'elenlene' gwde gwdele dižə' de'en cui chejni'ile, na' yeballe yozejni'ile dižə' de'en gwsə'elen beņə' ljuežjle ca' Diozan'. Naquəczən güen gonle yoguə' de'e ca' con šə gonlen ca sa'acclenən beņə' ljuežjle ca' so'onlilažə'əche' Cristən', beņə' ca' nacle txen cho'ela'olene'.

²⁷ Na' šə nole güe'elenle Diozan' gwde gwdele dižə' de'en cui chejni'ile, legüe'elene' en pero do chopzle o šonzle na' tgüejə tgüejle. Nach te na' əchoj to beņə' yozejni'ine' bi zeje dižə' de'en be'elenle Diozan'.

²⁸ Na' šə cui no zo no yozejni' bi zeje dižə' ca', bitoclə güe'elenle Diozan' dižə'n nac ca' zižjo lao ndopə nžagle txen. Con lo'o la'ažda'ole na'azə güe'elenlene'ena'.

²⁹ Na' le'e bagocwlen Spiritən' par chyixjue'i ljuežjle de'en bagwna Diozan' le'e, leczə do chopzle o šonzle əchojle chixjue'elen lao ndopə nžagle, niç beņə' ca' yelə' yoso'ozenague' na' so'one' xbab šə de'en na' to tole za'an che Diozan'.

³⁰ Na' šə lao choe' toe' dižə'n Diozan' əgwzejni'ine' yetoe' to de'e chixjui'e, ben' bacho'eczə dižə'n cheyalə' cueze' žlac güe' ben' yeto dižə'əna'.

³¹ Chaclenzə Spiritən' yoguə'əle par niç tgüejə tgüejle chyixjue'ele bi de'en bagwna Diozan' le'e, chozejni'i ljuežjle na' chtiplažə' ljuežjle.

³² Spirit che Diozan' chonən par niç bal'e chac chixjue'elen bi de'en bagwna Diozan' le'e. Na' chixjue'elen con catə'əzən' chache'ile naquən güen par chixjue'elen.

³³⁻³⁴ Diozan' chene'ene' əgwsa' colt chechon' bin'lo na' cui ša'əcho chac yazə.

Na' gatə'ətezə chəsə'ədotə chəsə'əžag beņə' bagwlej Diozan' par zjənaque' lažə' ne'ena', bito cheyalə' soe' no'ol ca' dižə' lao coltən'. Cheyalə' yesə'əlo'e de que choso'ozenague' che chio'o beņə' byo la' can' na Xtižə' Diozan' de'en nyojən'.

³⁵ Na' šə de bi de'e chse'ene'e no'ol ca' yesə'əneze', cheyalə' yesə'ənabe' be'en che to toga'aque' catə' yesyə'əžine' ližga'aque', chedə' naquən to yelə' zto' šə no'olən' güe'e dižə' lao ndopə nžagcho cho'ela'ocho Diozan'.

³⁶ Le'e beṇə' Corinto, bito cheyaḷə' gonḷe xbab de que le'ezən' zaquə'əle par əṇale naquən' gon chio'o chonḷilažə'əcho Cristən'. Caguə zgua'atec le'en gwdisle xtižə' Diozən', len caguə le'ezən' nombi'alēn.

³⁷ Balle nale chon Spirit che Diozən' par niçh chyixjue'ele bi de'en bagwna Diozən' le'e, na' balle nale de que Spirit che Diozən' chaclenən le'e par chonḷe bichlə de'en chene'e Diozən'. Šə de'e li chaclen Spiritən' le'e nachən' guacbe'iczele de que mendad che Xancho Crist na'anə' chzoja' le'e yoguə' de'e quinga.

³⁸ Šə nole cui chejle'ele de que Cristən' chone' par niçh chzoja' de'e quinga, bito chaclen Spirit che Diozən' le'e šə ca'.

³⁹ Na'a ža beṇə' bišə', de'e yoblə chnia' le'e, leṇabe Diozən' gaquəlen Spirit che'enə' le'e par niçh chixjue'ele de'en əṇa Diozən' le'e. Na' šə Spirit che Diozən' gonən par niçh beṇə' ljuežje ca' əso'elene' Diozən' gwde gwdeḷə dižə', bito gwžonḷe əso'elene'en le'.

⁴⁰ Pero bita'atezə de'en gonḷe lao coltən', leḡwsa'an binḷo, na' bito gonḷen chac yazə'.

15

Beban Jesocristən' ladjo beṇə' guat ca'

¹ Beṇə' bišə', che'enda' yosa'alažə'əle dižə' güen dižə' cobə che Cristən' de'en babe'elena' le'e antsə. Babzenagle chei na' zotezə zole chdalenḷen.

² Na' šə talenczle dižə' güen dižə' cobə che Cristən' de'en babe'elena' le'e, nezele de que žjəyezole len Diozən'. Pero šə bito talenḷe dižə' güen dižə' cobə che'enə' bitobi zejen de'en nale de que bachejle'ele che dižə' güen dižə' cobə che'enə'.

³ Diozən' bzenene' nada' de'en zjənaquə de'e žialao xençh ca bita'ətezəchlə na' baçh bsed blo'ida'an le'e. Gwnia' le'e de que gwso'ot beṇə' Cristən' gwduxjue' xtolə'əchon', con can' byoj Xtižə' Diozən' gaquə.

⁴ Leczə bgašə' Cristən' pero na' beyas bebane' ladjo beṇə' guat ca' beyon ža con can' byoj Xtižə' Diozən' gaquə.

⁵ Na' bi'a dižə' can' ben Cristən' beyož bebane' ladjo beṇə' guat ca', jəyeloe' laogüe' Bedən' na' gwde na' jəyeloe' laogüe' yeziquə'əchlə disipl che' ca' lao nite'e txen, beṇə' ca' gwsa'ac šižine' antsə.

⁶ Na' gwde na' jəyezloe' laogüe' mazlə gueyə' gueyoa beṇə' zjənità' tš'i'izə chso'elao' le'. Na' zan beṇə' ca' nežjamban na'a la'anə'əczə bagwsa'at bale'.

⁷ Le'egatezə ca' jəyezloe' laogüe' Jacobən' nach gwde na' jəyezloe' laogüe' yoguə' apostol ca'.

⁸⁻⁹ Na' le'ezelaogüe' bedeyloe' laogüe' nada'. Na' gwxaquə'əlebəda' ca to bi'i goḷjə sin cuiṇə' žin ža, chedə' ca tyempən' bitonə' gonḷilažə'a Cristən', gwda' bçhi' bsaca'a beṇə' ca' bagwlej Diozən' par chasə'ədopə chasə'əžaguə' chso'elaogüe'e Cristən'. De'e na'anə' chacda' naca' le'ezelaogüe' apostol beṇə' cui bi zaquə' entr beṇə' ljuežja' ca', na' chacda' bitoczə zaca'a par naca' apostolan'.

¹⁰ Pero bia'aczə nzi'ilažə' Diozən' nada'. De'e na'anə' gwleje' nada' par naca' apostol che'enə', na' de'e na'anə' bagocwlene' nada' par niçh choncha' xšine'ena' mazəchlə ca de'en chso'on yoguə' apostol ca' yela'. Pero bito əṇacho toza' nada' chona' xšine'ena' sino que Dioz na'aczən' chaclene' nada' par chona'an.

¹¹ Na' bachejle'ele che dižə' güen dižə' cobə che Cristən' de'en babzejni'ida' le'e na' de'en baboso'ozejni'i apostol ca' yela' le'e.

Yesyə'əban beṇə' guat ca'

¹² Na' baçh bsed blo'ito' le'e de que Cristən' beyas bebane' ladjo beṇə' guat ca'. Pero le'e ža, žbixçhen' na balle de que bito yesyə'əban beṇə' guat ca'?

¹³ Žalə' naquən de'e li can' nalen' de que Diozən' bito yosbane' beṇə' guat ca', bitolja bosbane' Cristən' žalə' ca'.

¹⁴ Na' žalə' cui bosban Diozən' Cristən' ladjo beṇə' guat ca', bito bi zaquə' xtižə'enə' de'en babe'elento' le'e na' bitobi zejen de'en chonḷilažə'əchone' žalə' cui bebane'.

¹⁵ De'en babsed blo'ito' le'e de que Diozən' bosbane' Cristən' ladjo beṇə' guat ca', babe'eto' dižə' güenlažə' žalə' bito naquən de'e li. Žalə' de'e li bito yosbane' beṇə' guat ca', bito bosbane' Cristən' žalə' ca'.

¹⁶ De'e na'anə' bito cheyaḷə' goncho xbab de que Diozən' bito yosbane' beṇə' guat ca', çhedə' la' bosbane' Cristən'.

¹⁷ Bito bi bi zedəgua'an de'en chonḷilažə'əcho Cristən' žalə' cui bosban Diozən' le' ladjo beṇə' guat ca'. Bito gaquə' əgwnitlaogüe' xtolə'əchon' žalə' cui bebane'.

¹⁸ Beṇə' ca' bagwsa'at beṇə' gwso'onḷilažə' Cristən' žlac gosa'əbane' bagosə'əbiayi'e na' bito nite'e len Diozən' ṇa'a žalə' cui beyas beban Cristən' ladjo beṇə' guat ca'.

¹⁹ Probchguazə chio' o žalə' yežlyo ngazən' zocho lez gaquəlen Cristən' chio' o. Chxoayagzə cuincho mazəchlə ca notə'atezəchlə beṇə' žalə' ca'.

²⁰ Na' de'e ličzə Dioz nan' bolis bosbane'ene' ladjo beṇə' guat ca', par nič nezecho de que ca'aczn' gone' len beṇə' yeziquə'əchlə beṇə' chso'onlilažə' le'.

²¹ To beṇə'an ben par nič chsa'at beṇə'əṇə', na' to beṇə'an gon par yesyə'əbane'.

²² Adan nan' ben par nič chsa'at yoguə' beṇə'əṇə', na' Crist nan' gon par yesyə'əban yoguə' beṇə' chso'onlilažə' le'.

²³ To tocho yebancho con catə'an babsi'e xneze. Zgua'atec Cristən' bebane' ladjo beṇə' guat ca', na' catə'an yide' yeto le'egatezəczə ca' yesyə'əban beṇə' ca' bagwsa'at, con beṇə' gwsə'onlilažə'ene'.

²⁴⁻²⁶ Cristən' chnabi'e doxenlə. Na' əgwlej əgwšošje' yoguə' beṇə' contr che' ca' na' bichlə de'e ca' chso'on contr le', na' que'e yelə' gwnabia' che de'e xio' ca' na' che angl bzelaο ca' na' che notə'atezəchlə beṇə' gwnabia' beṇə' cui chso'elao' le'. Na' catə' Cristən' babeyož blej bšošje' yoguə' beṇə' contr che' ca' na' bichlə de'e ca' chso'on contr le', nach gwceze' yelə' gotə'n na' šo'o fin che yežlyon'. Na' cana'achə'n' Cristən' cue'e lao na' Xə' Diozə'n' yoguə' de'en nlane' chnabi'e na' yoguə' non' chnabi'e.

²⁷ Xtižə' Diozə'n' de'en nyojə'n nan: "Diozə'n' bansi'e xneze de que gwžin ža catə' Cristən' nabi'e yoguə'əloj beṇə' na' biquə'əchlə de'en zjəde." Pero ca' de'en nan de que Cristən' nabi'e yoguə'əloj beṇə' na' biquə'əchlə de'en zjəde, bito nəcho zejen de que leczə Cristən' nabi'e Xə' Diozə'n'.

²⁸ Na' catə' Cristən' bagwlo'e lao na' Xə' Diozə'n' yoguə'əte beṇə' na' len yeziquə'əchlə de'e zjəde, cana'ach əgwlo'e de que leczə le' yo'e lao na' Xə' Diozə'n'. Nach yoguə'əloj beṇə' əsa'ache'ine' de que Diozə'n' naque' xanga'aque', na' leczə ca' sa'ache'i angl na' de'e xio' ca'.

²⁹ Nita' beṇə' chəsə'əchoe' nis de'e non che beṇə' ca' bagwsa'at. Bito so'one' ca' žalə' cui chse'ejle'e de que gwžin ža yesyə'əban beṇə' guat ca'.

³⁰ Nada' ža, do tyempte nita' beṇə' chse'enene' so'ote' nada' laogüe de'en cho'a xtižə' Cristən'.

³¹ Beṇə' bišə', de'e li yoguə' ža chsanlāžə' cuina' gaquə bitə'atezə de'e gaquə čhia'. Che'enda' nezecho de que chsanlāžə' cuina' can' banezele de que chebeichgüeida' de'en chonlilažə'əle Xə'ncho Jesocristən'.

³² Na' guac ənəcho de que por bež əznian' jətıləlena' catə'an jsoa' Efeson' chedə' gwsə'onchgua beṇə' ca' contr nada'. Pero ža'alə cui yesyə'əban beṇə' guat ca', bitobi bi zaquə' ca' de'en goquə čhia'. Na' žalə' bito yesyə'əban beṇə' guat ca' yejni'a gonecho che de'en na: "Ye'ej gaotezcho, la' gwžexə'cho, gatcho."

³³ Bito güe'ele latjə no əxoayag le'e, chedə' de'e li can' nyojə'n nan: "Šə socho txen len beṇə' chso'on de'e mal, la' solao goncho can' chso'one'ena'."

³⁴ Legwsə' xbab chelen' na' cuich gonle de'e malə'n'. Nia' ca' chedə' balle bitonə' gombi'ale Diozə'n' na' che'enda' gaquə'chgüeile lo'o la'azda'olen' de'en cui nombi'alene'.

De'e cobə'yeyac cuerp che beṇə' ca' yesyə'əban ladjo beṇə' guat ca'

³⁵ De repent gwṇabljeile nada' nac gaquə'n' yesyə'əban beṇə' guat ca' o nac gaquə cuerp chega'aque'ena' catə'an yesyə'əbane'.

³⁶ Nəhol' yičhjlə'azda'olen' šə chaquəle cui gaquə yesyə'əbane'. Nezecho de que to to xoa' dao' de'en chazcho cheyalə' yexinjə'n par yelə'an yel dao'.

³⁷ Na' bito ənəcho de que catə'an chazchonṇə' chazcho yel dao'. Na' can' šə biquə'əchlə de'e chene'echo la'ac, con xsei nan' gazcho.

³⁸ Na' Diozə'n' chone' par nič chla' de'en chazchon' na' to ton chaquə'n' segon bi de'en chazchon'.

³⁹ Ca'aczn' naquə'n' caguə tozə ca' naquə cuerp chechon' len cuerp che bia ca' chsa'aš. Nža'an naquə cuerp che beṇə'əṇə' na' nža'an naquə cuerp che bia žia tap ni'ane'i, na' nža'an naquə che bia chsa'aš lo'o nis, na' nža'an naquə che bia chsa'aš lao be'.

⁴⁰ Na' nža'an zjənaquə beṇə'əṇə' ca' na' bia ca' chsa'aš lao yežlyon', na' nža'an zjənaquə de'e ca' chle'icho le'e yoban'. Nža' yelə' xoche che de'e ca' chle'icho le'e yoban' na' nža' yelə' xoche che beṇə'əṇə' ca' na' bia ca' chsa'aš lao yežlyo nga.

⁴¹ Nža' can' chse'eni' bgüižə'n' na' nža' can' chse'eni' bio'onə' na' leczə nža' can' choso'ose'eni' to to beljw ca'.

⁴² Le'egatezəczə ca' catə' yesyə'əban beṇə' ca' gwsə'onlilažə' Cristən' žlac gosə'əbane', nža'an gaquə cuerp chega'aque'ena'. Cuerp chega'aque'ena' de'en besə'əgaša' lo'o ban' bagwsə'ožə'n, pero catə' yesyə'əbane' ladjo beṇə' guat ca' yeyac cuerp chega'aque'ena' de'e cobə na' bitoch sa'ate'.

⁴³ Bitobi bi zaquə' cuerp che beṇə' guat ca', la' zjənaquə'n' cuerp šen. De'e na'anə' chcuəšə'əchon. Pero catə'an yesyə'əbane' yetlas, šə gwsə'onlilažə'e Cristən' žlac gosə'əbane',

yesya'ayac cuerp chega'aque'ená' de'e zaquá'áche na' de'e gualäch clezá can' ágwsa'aquan antsla.

⁴⁴ Cuerp che beñá' guat ca' de'en hcuaśá'áchon' zjánaquan de belá' chen, pero nza'an yesya'ayaquan catá'an yesya'ábane' śá gwso'onlilaže'e Cristán'. Cana'achán' yesya'ayaquan por cuerp cobá de'en gon can' ana Spirit che Diozán'. Na'a zjánaquá cuerpán' de belá' chen, pero gwžin ža gatá' cuerp cobá de'en gon can' ana Spirit che Diozán'.

⁴⁵ Xtižá' Diozán' nyojan nan de que Adanná' ben' naquá beñá' nechán' gwzoe' bguane'. Pero na' zo yeto beñá' gwxaquá'álebene' ca Adanná', le'ena' Cristán'. Na' de'en bebane' ladjo beñá' guat ca' choñe' yelá' mban zejlicanen'.

⁴⁶ Na'a naccho beñá' belá' chen pero gwžin ža catá'an gatá' cuerp cobá chechon' de'en gon can' ana Spirit che Diozán'.

⁴⁷ Adanná' ben' goquá beñá' nech, Diozán' bene' le' len bište yo na' gwzoe' yežlyo ngaza. Pero ben' gwxaquá'álebe ca Adanná' de'en bxie' yelá' mban zejlicane bazocze' yoban' antsla ze'e yide' galje' yežlyo nga, le'ena' Xancho Cristán'.

⁴⁸ Na' chio'o beňach cuerp chechon' naquan can' goquá cuerp che de'e Adanná' de'en ben Diozán' len bište yon', na' de'e na'ana' naccho beñá' che yežlyo nga. Pero na' chio'o chonlilažá'ácho Cristán' gwžin ža catá' gatá' cuerp cobá checho de'en gaquá ca cuerp che Cristán' ben' zo yoban'.

⁴⁹ Na'a nenaccho ca ben' ben Diozán' len bište yon' pero gwžin ža gaccho ca Cristán' ben' zo yoban'.

⁵⁰ Beñá' biśá' áchnia' le'e catá'an yežincho žjáyezochó len Diozán' zejlicane bito gaquá ábanecho cuerp chechon' de belá' chenna'. De'e te che cuerp chechon' na' de'e na'ana' bito gaquá ábanechon catá' žjáyezochó len Diozán' zejlicane.

⁵¹ Na'a áchnia' le'e de'en cui noná' neze antsla, caguá yoguá'áchon' gatcho, pero yoguá'áchon' yeža' can' gacchon'.

⁵² Xtiťnez yeža' can' gacchon' catá'an cuež trompet che Diozán' par šo'o fin che yežlyon'. Cuež trompet che Diozán' par yesya'ában yoguá' beñá' bagwsa'at con beñá' gwso'onlilažá' Cristán'. Na' canan' yeyac cuerp chega'aque'ená' de'e cobá de'en cui te čhei na' leczá can' yeyac cuerp che chio'o ne'e mbancho.

⁵³ Cuerp checho de'en mbanecho yežlyo nga na'a de'e te čhein' čhedá' gožá'an catá'an gatcho. Pero catá'an yeyac cuerp chechon' de'e cobá bito gožá'an na' bito te čhei.

⁵⁴ Na' catá' bade cuerp cobá checho de'en cui gožá' na' de'en cui te čhei, cana'achán' bagoc complr can' nyoj Xtižá' Diozán' nan: "Diozán' gwzoiné' bcueze' yelá' gotán' čhedá' le'ena' choñe' yelá' mban zejlicane."

⁵⁵ Na' cana'achán' áňacho: "Bitoch soi yelá' gotán' chio'o na' bitoch gonán chio'o gan."

⁵⁶ De yelá' got che chio'o beňach čhedá' choncho de'e malán'. Na' de'en nezecho bin' non lei che Diozán' mendad goncho nachle chzenaguáčcho che de'e malán'.

⁵⁷ Chočwlen Diozán' bsele' Xancho Jesocristán' ben' chon par nič cuich chzoi de'e malán' chio'o, na' le'ena' babene' par nič chio'o chonlilažá'áchoné' śá gatcho leczá ážin ža yebancho ladjo beñá' guat ca'.

⁵⁸ De'e na'ana' beñá' biśá' dao', lesotezá leso legonlilažá' Xancho Jesocristán' sin cui žjaxaquá'álažá'ále na' sin cui gaquá'žjilažá'ále. Na' zejli legonchgua xšin Xančhon' la' nezczele de que bito gaquá dadán.

16

Choso'otobe' mech par čhsa'aclene' beñá' ca' čhso'onlilažá' Cristán' Jerosalenne'

¹ Na'a ža che'enda' ánia' le'e naquan' gonle catá' ágwtoble mechán' par gaquálenle beñá' Jerosalen ca' bagwlej Diozán' par zjánaquá' lažá' ne'ena'. Legon can' bena' mendad so'on beñá' ca' čhásá'ádojá čhásá'ážag čhso'elaogü'e Cristán' to to yež de'en zjáči' Galasian'.

² Na' yoguá' ža dmičw to tole cuejle lata' güeja mech segon ca de'en beňle gan lao xmanňá' na' co'óša'olen par nič den catá'an yida' dezłana'a le'e. Legon ca' par nič bito ágwtoblen catá'an yida'aná'.

³ Na' catá'an yida'aná' cana' áselá'a beñá' ca' bagwlejlen' par áxjsó'e xmečhlen' Jerosalenne', na' ágoxá'átega'aca'ane' to čhopá cart.

⁴ Pero śá gwxenłaza'ácho de que nada' ša'a na' sa'aclene' nada' txen.

Pabán' chone' xbab žjəlane'e lega'aque'

⁵ Na' yida' gan' zolen' catá' yeyož tia' Masedonian', čhedá' leczá čheyalá' ša'a žjəlana'a beñá' ca' čhásá'ádojá čhásá'ážag čhso'elaogü'e Cristán' na'.

⁶ Na' de repent yega'ana' len le'e do tbio' o čhop bio' o śa yega'ančza' dote tyemp zaguán'. Na' catá' yeža'a gan' zolen' le'e gaquálenle nada' par yeya'a ga yobla.

⁷ Bito yida' delana'a le'e na'a chedə to teza'an šə baza'a, la' che'enda' desoa' sša len le'e catə'an yida'ana' šə Xancho Diozən' güe'e latja.

⁸ Che'enda' yega'ana' Efeso nga xte catə' galə' lni de'en ne' Pentecostes.

⁹ Yega'ana' chedə' beņə' zan nitə' nga beņə' chse'ene'e yoso'ozenague' che xtižə' Diozən' pero leczə nitə' beņə' zan cui chse'enene' chixjui'an.

¹⁰ Na' cata' yidə Temtion' gan' zolen' cheyalə' gaplene' respet par nič cui žebe' əgwsed əgwlo'ine' le'e, chedə' leczə can' chona' nada' xšin Xancho Diozən' ca'aczən' chon le'.

¹¹ De'e na'anə' ža bito gonle xbab de que bitobi zaque'e, sino que cheyalə' sole güen len le' na' len beņə' ca' žague'ena' catə' la'aque' gan' zolena'. Na' catə' yesa'aque' cheyalə' gaqualenga'aclene' par deya'aque' gan' zoa' nga to šao' to güen la' chbezəga'aca'ane'ena'.

¹² Na' ca' naquə beņə' bišə'əcho Apolosən' ža, leczə gotə'əyoida'ane' par yidəlene' Temtion' na' len beņə' bišə'əcho ca' desə'alane'e le'e, pero bene' xbabən' mejor bito yide' na'a. Pero güide' catə' soe' to latja.

Yeto chopə de'en che Pabən' beņə' Corinto ca'

¹³ Cheyalə' gaple cuidad par nič cui xoayagle len de'e malən', na' cheyalə' sotezə sole gonlilažə'əle Diozən' con can' chonlilažə'əczlene'. Bito žeble sino leso legon can' chene'e Diozən'.

¹⁴ Na' legaque che Diozən' na' che beņəchən' bitə'ətezə de'en chonle.

¹⁵ Na' na'a ža beņə' bišə', de to de'e che'enda' ənia' le'e. Nezele de que family che Estefanas žjanaque' beņə' nech gwso'onlilaže'e Cristən' Acayan', na' baņezcele can' chso'oncze', lechguale chsa'aclene' notə'ətezəchlə beņə' bazjanaque' lažə' na' Diozən'.

¹⁶ De'e na'anə' əchnia' le'e de que cheyalə' əgwzenagle che lega'aque' na' lenczə che notə'ətezəchlə beņə' chso'onchgua xšin Diozən' na' che beņə' ca' chsa'aclenchgua beņə' bišə'əcho ca'.

¹⁷ Chebeida' babla'ac Estefanasən', Fortonaton' na' Acaicon' gan' zoa' nga, na' bagwsa'aclene' nada' par nič bitoch zoa' trist de'en cui zole nga len nada'.

¹⁸ Lechguale bagwsə'one' ca' chebeida', can' bagwsə'one' len le'e. De'e na'anə' cheyalə' gapəga'acchone' respet.

¹⁹ Na' na'a ža əchnia' le'e de que beņə' ca' chəsə'ədopə chəsə'əžag chso'elaogüe'e Cristən' doxen Asian' chəsə'əguape' le'e diox. Na' leczə len Aquila na' no'ol che' Prisi-lan' nach žjalenczə beņə' ca' chəsə'ədopə chəsə'əžag chso'elaogüe'e Cristən' ližga'aque'ena', leczə chəsə'əguapchgüe' le'e diox. Lega'aque' chso'onlilažə'əcze' Xancho Jesocristən' can' chonlilažə'əchone' chio'o.

²⁰ Na' yoguə'əloł beņə' bišə'əcho ca' nitə' nga chəsə'əguape' le'e diox. Na' catə' chežagle leyolgüiz ljuežjle dižə' šao' par nič gachia' de que chaque che ljuežjle.

²¹ Cuincza' nada' Pabən' chzoja' part dao' che cart nga par əchguapa' yoguə'əle diox.

²² Na' šə nənchišə nole cuinə' gonle cas par gaquele che Xancho Jesocristən', cuiayi'išazəchle zejlicanen'. Xancho Jesocristən' yide' de'e yoblə.

²³ Na' na'a ža, Xancho Jesocrist nan' sotezə soe' gaqualenšgacze' le'e.

²⁴ Na' chnia' le'e de que chacchgüeida' che yoguə'əle laogüe de'en chonlilažə'əle Cristo Jeso'osən'. De'e na'azən' əchnia' le'e. *Pab*

Cart Egwchope De'en Bzoj San Pabən' par Beṇə' Corinto Ca'

Pabən' chzoje' beṇə' ca' chso'onlilažə' Cristən' Corinton'

¹⁻² Nada' Pab naca' apostol che Jesocristən' con can' gwnalažə' Diozən'. Nada' chzoja' cart nga par le'e bagwlej Diozən' niçh chdopə chžagle cho'ela'ole Cristən' lao' syoda Corinton', na' notə'ətezəchle bagwlej Diozən' par nacle lažə' ne'enə', le'e nitə'əle doxen gan' mbane Acayan'. Nada' len beṇə' bišə'əcho Temtion' chonto' orasyon chṇabto' lao Xacho Diozən' na' Xancho Jesocristən' əsa'aclenšgüe' le'e na' so'one' ca so cuezle binlo len xbab de'en yo'o lo'o yiçhja'ažda'olen'.

De'e ca' gwdi' gwxaquə' Pabən'

³ Cheyalə' socho güe'ela'ocho Xacho Diozən'. Le' naque' Xa Xancho Jesocristən' na' Xancho Jesocristən' leczə cho'elaogüe'e le'. Xacho Diozən' cheyaša' cheži'ilaze'e chio'o na' le'enə' cheyonxenlažə'e chio'o šə bi de'en chac checho.

⁴ Ca naquə nada' ža, le'enə' cheyonxenlažə'e nada' catə' chyi' chzaca'a par niçh leczə chac cheyonxenlažə'a beṇə' yoblə catə' chəsə'əyi' chəsə'əzaque'e. Na' can' chon Diozən' cheyonxenlažə'e nada' leczə can' cheyonxenlažə'a beṇə'.

⁵ Lechgualə chyi' chzaca'a can' gwdi' gwxaquə' Cristən', pero na' con zoczə Diozən' cheyonxenlažə'əchgüe' nada' chedə' chonlilažə'a Cristən'.

⁶ Chyi' chzaca'a laogüe de'en chzejni'ida' le'e can' gonle par žjəyazole len Diozən'. Chac chia' ca' par niçh cheyonxenlažə'a le'e len bi de'en chyi' chzaquə'əle. Na' de'en cheyonxenlažə' Diozən' nada' catə' bin' chac chia', chone' ca' par niçh nada' cheyonxenlažə'a le'e. De'e na'anə' chonlilažə'əle Cristən' na' chgo'o chçhejlažə'əle catə'an chyi' chzaquə'əle can' chyi' chzaca'a nada'.

⁷ Na' zotezə zoa' chbeza' de que le'e co'o gwçhejlažə'əle catə' saquə'əzi'ile. Nezda' de que can' chyi' chzaca'anə' leczə can' chyi' chzaquə'əle, na' can' cheyonxenlažə' Diozən' nada', leczə can' cheyonxenlažə'e le'e.

⁸ Beṇə' bišə', che'enda' ənezele catequan' gwxaquə'əzi' gwxaquə'əyaša'a catə'an gwzoa' Asian' xte cuichczə bi goquə gona', con beyož bedolažə'a na' xte bžinczə catə' bena' xbab la' gatcz'a'anə'.

⁹ De'e li bena' xbab lo'o yiçhja'ažda'ogua'anə' de que la' gatcz'a'anə'. Pero na' goc chia' ca' par niçh cui bena' xbab de que gwzoiczəda' nada'əza' yocuizə'a de'en chyi' chzaca'anə'. Na' de'en goc ca' benən par niçh chonlilažə'əcha' Diozən', Dioz ben' yosban beṇə' guat ca'.

¹⁰ Na' catə'an bena' xbab la' gatcz'a'anə', Diozən' bosle' nada' par cui gota'. Na' nechoslacze' nada'. Na' con bazoczə' lez chbeza' yosle' nada' šə bazezocla' cho'a yelə' gotən'.

¹¹ Yosle' nada' chedə' lenczə le'e chaclenle nada' chonle orasyonṇə' laogüe'enə' chṇabelene' yosle' nada'. Na' beṇə' zan naccho choncho orasyon lao Diozən' par niçh gaquəlene' nada'. Na' te gaquəlene' nada', yoguə'əlołcho güe'echo yelə' choxcwlen che Diozən' de'en bagoclene' nada'.

Pabən' gwžeine' šeje' Corinton'

¹² Nezda' lo'o yiçhja'aždaogua'anə' de que chona' güen len yoguə'əloł beṇə' na' mazəchlə chona' güen len le'e. De'e na'anə' cho'a dižə' de que do yiçh do lažə'a chona' güen len yoguə'əloł beṇə' chedə' Diozən' babeyone' la'ažda'ogua'anə' xi'ilažə'. Bito chona' con can' na xbab chia'anə', sino chona' can' na Diozən' por yelə' chaclen che'enə'.

¹³ Cart quinga chzoja' le'e, bito cheyalə' gonle xbab šə naquəchlə zejen sino can' nyojan nan' šejni'ilen. Na' zoa' lez šejni'ilen.

¹⁴ Baghgaczə chejni'ile de que do yiçh do lažə'a chona' yoguə'əloł de'en chona', na' che'enda' šejni'ilen binlo. Na' catə'an əžin ža yidə Xancho Jeso'osən' de'e yoblə, che'enda' yebeile de'en babe'elena' le'e xtiže'enə', ca nada' chebeida' de'en chejle'ele chei.

¹⁵ Na' zoa' segor šejni'ile de que do yiçh do lažə'an chona' bitə'ətezə de'en chona'. De'e na'anə' gwzelažə'a yida' de'e yoblə delana'a le'e par niçh gaquəlencha' le'e.

¹⁶ Gwzelažə'a tia' əgwłana'a le'e catə'an gwya'a Masedonian' de'e yoblə, na' catə' beza'a Masedonian', leczə gwzelažə'a yedia' əgwłana'a le'e. Na' go'onda' le'e gaquəlenle nada' par yeya'a Jodean'.

¹⁷ De'e liczə go'onda' yedia' əgwłana'a le'e. Bito chaca' šayeçha šayen can' chsa'ac beṇə' ca' cui zjanombia' Diozən', to ənia' gona' to de'e gona' na' to ənia' cui gona'an. Lechgualə de'e chacda' catə' cui chac gona' can' bagwnia' gona'.

¹⁸ Diozən' chone' complir can' ne'ena'. Na' nezene' bito goca' šayechə šayen catə'an gwnia' yida' de'e yoblə delana'a le'e la'ana'acza' cui bida'.

¹⁹ Nada' len Silbanon' na' Temtion' gwdixjue'ito' le'e xtižə' Jesocrist Xi'in' Diozən'. Cristən' bito chaque' šayechə šayen. Syempr chone' complir can' ne'ena'.

²⁰ Yoguə' de'en ben Diozən' lyebe gone', babselə'e Jesocristən' par bedəyene'en. De'e na'ana' nacho "Amen" catə'an cho'ela'ocho Diozən' na' zejen de que nezecho chon Diozən' complir can' ne'ena'.

²¹ Baben Diozən' par niç le'e len nada' zotezə zocho chonlilažə'acho Cristən'. Na' bagwleje' chio'o par niç choncho xšine'ena'.

²² Bselə'e Spirit che'ena' zon lo'o yichjla'ažda'ochon' par niç nacbia' naccho xi'ine' na' par niç ənezecho de que gwžin ža catə' gaquə lao na'acho de'en gonəch Diozən' chio'o.

²³ Bito bida' Corinton' de'e yoblə delana'a le'e cheda' beyejda' bitolə detila' le'e. Diozən' nezene' dižə' lin' cho'a ənia' ca'. Šə chonlažə'a Diozən' gone' nada' castigw.

²⁴ Le'e bazotezə zole chonlilažə'əle Cristən', bito nato' le'e de'e niczən' šejle'ele. Lete de'en chonto' len le'e, chaclento' le'e par ničə'achle mbalaz.

2

¹ Ca naquə bechoglažə'a, bitolə bida' de'e yoblə delana'a le'e par niç cui gwdiləcha' le'e che de'e malən' chonlen', cheda' bito go'onda' socho trist.

² La' ža'alə bida' dezoa' le'e trist notono nla' no so'on ca soa' mbalaz.

³ Le'e cheyalə' gonle' par niç soa' mbalaz. De'e na'ana' bzoja' cartən' gotə'ayoida' le'e cuejyichjle de'e malən' par niç catə'an yida' de'e yoblə delana'a le'e cui soa' trist can' chonlen'. Bzoja' le'e cheda' nežda' de que yoguə'əle yebelə gonle' ca soa' mbalaz.

⁴ Tristchgua zoa' catə' bzoja' cart de'en bselə'a na' chegüi'inchgüeida' lo'o yichjla'aždaogua'ana' xte gwchežə'. Bzoja' cartən' caguə par niç sole trist sino par niç ənezele de que nada' chacchgüeida' chele.

Cheyalə' yezi'ixencho che beņə' ca' chso'on de'e malən'

⁵ De'e li gwzoa' trist can' ben tole, pero caguə nadə'əzan' gwzoa' trist, casi yoguə' le'e gwzole trist por ni che de'en ben be'ena'. Nia' casi yoguə'əle cheda' bito nežda' šə yoguə'acžle gwzole trist.

⁶ Ca naquə le'e gwyanle' par bchoj yelə' goxia' chelen' benlene' castigw, əchnia' le'e baçh goc to ca'atə'ətə' gaque' castigw.

⁷ Bito cheyalə' gonchlene' castigon'. Cheyalə' yezi'ixenle' che' na' güe'elene' yelə' chxenlažə' par niç cui cuejyichjle' Diozən' por ni che de'en zochgüe' trist.

⁸ Chneyoida' le'e leğon par niç ənezene' de que chaquele' che'.

⁹ Bzoja' le'e par nežda' šə gwzenagle chia' ca naquə yoguə'əlol de'en gwnia' gonle'.

¹⁰ Na' ca naquə chezi'ixenle' che be'ena', lencza' nada' chezi'ixena' che'. Na' šə bi de'en bene' len nada', nezcze Cristən' de que babezi'ixena' che' cheda' che'enda' gaquəlena' le'e.

¹¹ Cheyalə' yezi'ixencho che' par niç cui soi gwxiye'ena' chio'o par goncho bichlə de'e mal. Nezczecho ca naquən' chene'en əxoayaguən chio'o.

Pabən' go'onchgüeine' yežague' Titonə'

¹² Catə' bežina' Troas par chixjui'a dižə' güen dižə' cobə che Cristən', Xancho Diozən' bene' par niç gwnitə' beņə' gwse'enene' yoso'ozenague'en.

¹³ Pero benchgua' xbab che beņə' bišə'əcho Titonə' de'en cui bežaga'ane' na'. De'e na'ana' bzeida' beņə' bišə'əcho ca' dižə' nach beza'a beya'a Masedonian'.

Cristən' bebeje' chio'o xni'a de'e malən' par niç chnabi'e chio'o

¹⁴ Choxcwlen Diozən' babebej Cristən' chio'o xni'a de'e malən' par niç chnabi'e chio'o, na' na'a ngoda'əcho txen len le'. Na' leczə chon Diozən' par niç gatə'ətezə zocho na' gatə'ətezə chejcho choncho ca chsa'acbe'i beņə' ca beņə' güennə' naquə Cristən'.

¹⁵ Chebei Diozən' de'en choncho ca chsa'acbe'i beņə' ca beņə' güennə' naquə Cristən'. Balə beņə' ca' babesyə'əchoj xni'a de'e malən' na' yeba'le' bachəsə'əbiayi'.

¹⁶ Catə' choncho ca chsa'acbe'i beņə' ca beņə' güennə' naquə Cristən', beņə' ca' cui chso'onlilažə'ene' chsa'acbe'ine' de que yesə'əbiayi'e. Pero na' beņə' ca' chso'onlilažə' Cristən' chəsə'əbeine' de'en chlo'echo ca beņə' güennə' naque'ena', cheda' bade yelə' mban chega'aque' zejlicane' na' yesyə'əžine' gan' zo Diozən'. ¿No chio'o chonlilažə'əcho Cristən' zaquə'əcho par əgwlo'echo ca beņə' güennə' naque'ena' ža'alə cui zo Diozən' chaclene' chio'o?

¹⁷ Nita' beņə' zan choso'oxoayague' chəsə'əše'e can' na xtižə' Diozən' parzə niç beņə' ca' choso'opeine' len xtižə'əga'aque'ena' choso'onežjue' leğa'aque' mech. Nada' bito chona' ca'. Do lažə'a zotezəcza' chyixjui'a xtižə' Diozən' cheda' le'ena' bene' mendad chyixjui'an. Diozən' neze nle'ine' naquan' chona' chyixjui'a xtižə'ena', nada' ngoda'a txen len Cristən'.

3

De'e cobə de'en non Diozən' lyebe gone' par gaqualene' benachən'

¹ Chezonjlale xbab de que cho'elao' cuina' ca dižə' de'en cho'a, pero caguə ca'anə'. Nezczele de que chona' xšin Diozən' do lažə'a. Na' bito chonən byen goxə'a cart par niç ənezele nac naca', na' nic chonən byen gwzøjle cart de'e goxə'a cata' ša'a ga yoblə can' chonən byen len balə beņə'.

² Lechgualə chacda' chele. Nada' gwdixjue'ida' le'e dižə' güen dižə' cobə che Cristən' par bocobə yichjla'ažda'olen'. De'e na'anə' bito chyažjda' cart de'en na de que naca' beņə' güen, la' yoguə' no zjənombia' le'e zjənezele' can' goquələna' le'e par chonlilažə'əle Cristən'.

³ Cata'an be'elena' le'e xtižə' Cristən' benlilažə'əlene' na' bene' par niç Spirit che Dioz ben' zo zejlicane bocobən yichjla'ažda'olen'. Na' de'en nacbia' babocobə yichjla'ažda'olen' zaquə'əchən cle ca to cart de'en nyoj le'e yiš na' cle ca lei che Diozən' de'en byoj le'e çhopə yej ta'a.

⁴ De'en chonlilažə'əle Cristən' nezdə' de que le'ena' chaclene' nada' par chona' xšine'ena' can' chebei Diozən'.

⁵ Ca naquə nada' bito de cho'a ənia' de que to gwlažza' chona' xšin Diozən'. Bito gaquə ənia' ca', la' Dioz nan' zoe' chaclene' nada' na' chone' par niç chac chona' xšine'ena'.

⁶ Dioz na'anə' babene' par niç chac chyixjui'a can' naquə de'e cobə de'en none' lyebe gone' par gaqualene' chio'o beņach. De'e cobən' de'en none' lyebe gone' bito naquan ca lei che'ena' de'en nyojən chzejni'in chio'o de que cuiayi'icho de'en cui choncho complir yoguə'əloj can' nanņə'. Diozən' none' lyebe goņ Spirit che'ena' yelə' mban zejlicane che notə'ətezcho gonlilažə'əchone'.

⁷ Cata' bzoj Diozən' lei che'ena' le'e yej ta'a ca' na' bnežjue'en de'e Moizezən', de'e zan de'e bene' par gosə'əneze beņə' Izrael ca' catequan' zaquə' lei che'ena' de'en chzejni'in chio'o beņach de que cuiayi'icho. Na' de'e tant goctit cho'alaogü'e'ena'. Pero šo'olažə' bega'a yelə' chactit che cho'alaogü'e'ena'.

⁸ Zaquə'əczə lein' pero na' zaquə'əch dižə' güen dižə' cobə che Cristən' de'en chyixjue'ida', la' notə'ətezcho chonlilažə'əchone', Spirit che Diozən' chonən yelə' mban zejlicane checho.

⁹ Diozən' blo'e de que zaquə'əczə lein' la'aņə'əczə nan de que yoguə' chio'o beņach de xtołə'əcho de'en cui choncho complir can' nanņə'. Pero zaquə'əch dižə' güen dižə' cobə che Cristən' chedə' la' notə'ətezcho chonlilažə'əchone', Diozən' none' chio'o beņə' güen.

¹⁰ Na' na'a de'en bapidə Cristən', zaquə'əchgua dižə' güen dižə' cobə che'ena', na' de'e na'anə' lein' baç naquan ca to de'e cui bi zaquə'.

¹¹ De'e te chei lein' la'aņə'əczə naquan to de'e zaquə'e. Pero ca naquə dižə' güen dižə' cobə che Cristən' caguə de'e te cheina'. De'e na'anə' zaquə'əch dižə' güen dižə' cobə che'ena'.

¹² Nada' nezdə' de que caguə de'e te chei dižə' güen dižə' cobə che Cristən'. De'e na'anə' cho'a dižə' chei clar.

¹³ Moizezən' bcuašə' cho'alaogü'e'ena' len to lachə' niç cui besə'əle'i beņə' Izrael ca' nac goc bega'a yelə' chactit che cho'alaogü'e'ena'. Nada' bito chcuəša'a dižə' güen dižə' cobə che Cristən', sino chyixjui'an niç chəsə'əneze yoguə'əloj beņə'.

¹⁴ Beņə' Izrael ca' bito gwse'ejni'ine' de'en chebei Diozən' na' xte ža neža cata' choso'olabe' lei de'en bzoj de'e Moizezən', bito chse'ejni'ine' bi zejen. Con beņə' ca' chso'onlilažə' Cristən' chse'ejni'ine' bi zejen, na' casi yoguə' beņə' Izrael gwlaž chia' ca' bito chso'onlilažə'ene'.

¹⁵ De'e li xte ža neža yoguə' las cata' choso'olabe' lei de'en bzoj de'e Moizezən' bito chse'ejni'ine' bi zejen.

¹⁶ Pero cata'əch chzolaogü'e' Xancho Cristən', cana'achən' chse'ejni'ine' bi zejen lei de'en bzoj de'e Moizezən'.

¹⁷ Na' ca naquə chio'o chonlilažə'əcho Xancho Cristən', zo Spirit che Diozən' lo'o yichjla'ažda'ochon' chaclenən chio'o par choncho can' chene'e Diozən'. Bitoch choncho xbab de que por ni che ša choncho de'en na lein' chebei Diozən' chio'o. Na' Spirit che Diozən' leczə naquan Spirit che Xancho Cristən'.

¹⁸ Ca to spejw chlo'en cho'alaogü'e'ena', ca'aczə dižə' güen dižə' cobə de'en chzejni'in che Xancho Cristən' chlo'in yoguə' chio'o chonlilažə'əchone' de que naquə' le'ezelaogüe beņə' zaquə'e. Na' Spirit che Xancho Cristən' zon lo'o yichjla'aždao' chio'o chejni'icho dižə' güen dižə' cobə che'ena' chaclenən chio'o par niç zdach chaquə'əchcho beņə' šao' beņə' güen can' naquə Cristən'.

4

¹ Yelə' beņə' güen che Diozən' gwleje' nada' par chyixjui'a dižə' güen dižə' cobə che Jesocristən'. Na' de'e na'anə' bito chjəxaquə'əlažə'a ca de'en chyixjui'an.

² Bitobi chona' de'e əgwcuəša'a o de'e gaquada' zto' par yesə'əneze beṇə'. Bito chxoayaga' beṇə', na' bito chzejni'ida' xtižə' Diozən' clela. Nada' chsed chlo'ida' beṇə' xtižə' Diozən' tcho'a tšao' na' yoguə'əlole' zjəneze' lo'o yichjla'ažda'oga'aque'enə' de que cho'a dižə' li. Na' leczə neze nle'i Diozən' can' babena'.

³ Con beṇə' ca' bachəsə'əbiayi' por ni che de'en cui chso'onlilaže'ene' lega'acze' bito chse'ejni'ine' dižə' güen dižə' cobə che Jesocristən' de'en chyixjui'a.

⁴ Gwxiye' nan' chnabia'an lega'aque' na' chonən par nchol' yichjla'ažda'oga'aque'enə'. De'e na'ana' bito cho'o be'eni'in lo'o yichjla'ažda'oga'aque'enə' la'anə'əczə chzenga'acda'ane' dižə' güen dižə' cobə che Cristən'. Le'enə' naque' le'ezelaogüe beṇə' zaque'e, na' naquə yichjla'aždaogüe'enə' cayanə'an naquə yichjla'aždao' Diozən' na' toza can' chso'one'.

⁵ Bitobi dižə' cho'a par güe'elao' cuina'. Con chyixjui'a de que cheya'ə' gwzenagcho che Xancho Jesocristən'. Na' nada' con zocza' par gaquəlena' le'e xte ga zelao saquə'ada' cheda' chacda' che Jeso'osən'.

⁶ Chyixjue'eto' dižə' güen dižə' cobə che Jesocristən' cheda' Dioz ben' ben par ničh chatə' be'eni' yežlyo nga leczə le'enə' babene' par ničh be'eni' che'enə' yo'on lo'o yichjla'ažda'ochon'. Na' de'e na'ana' ca naquə chio'o banombi'acho Jesocristən' nezecho de que Diozən' naque' le'ezelaogüe beṇə' zaque'e cheda' yichjla'aždao' Diozən' naquən cayanə'an naquə yichjla'aždao' Jesocristən' na' toza can' chso'one'.

Apostol ca' gwnitə'ətezə gwnite'e gwso'onlilaže'e Diozən'

⁷ Chio'onlita'əzə cui zaquə'əcho par chzejni'icho beṇə' che Cristən', pero Diozən' chaclene' chio'o par chzejni'iga'aquechone'en. De'e na'ana' chsa'acbe'i beṇə' de que por yelə' guac xen che Dioz nan' choncho de'en choncho, caguə por ni che de'e zaquə'əcho gonchonna'.

⁸ Na' ca naquə nada' syempr chyi' chzaca'a pero bito chbejəyichja' xšine'ena'. Zan las catə' cuichczə chežlaža'a naclə gona', pero nežda' zo Diozən' chaclene' nada'.

⁹ Choso'olagzejə choso'olagzida beṇə' nada' pero Diozən' bito chbejyichje' nada'. Choso'očhi' choso'osaquə' beṇə' nada' pero bito choe' Diozən' latjə par so'ote' nada'.

¹⁰ Gatə'ətezə cha'a con do tyemp choso'očhi' choso'osaquə' beṇə' nada' na' chse'enene' so'ote' nada' can' gwso'ot beṇə' mal ca' Jeso'osən'. Diozən' cho'e latjə chyi' chzaca'a yoguə' de'e quinga par ničh nla'alaon de que zoczə Jeso'osən' chaclene' nada' par chona' can' chazlaže'enə'.

¹¹ Nada' žlac ne'e mbana' syempr chjti'a beṇə' choso'očhi' choso'osaque'e nada' laogüe de'en chse'enene' so'ote' nada'. Chəsə'əgue'ine' nada' cheda' əchyixjui'a xtižə' Jeso'osən'. Na' la'anə'əczə chac ca' na' la'anə' chaxə' cuerp chia'anə' zoczə Jeso'osən' chaclene' nada' par chona' can' chazlaže'enə'.

¹² Gwžinlja ža so'ote' nada', pero caguə de'e bi de'enə', con la' bade yelə' mban zejlicane chelen' de'en babzejni'ida' le'e xtižə' Diozən' na' banonen chele.

¹³ De'e Dabin' bzoje' to Salmo gan' nan: "Chonlilaža'a Diozən' na' de'e na'ana' cho'a dižə' che'." Can' benlilažə' de'e Dabin' Diozən', ca'acžən' chonlilaža'ane' nada'. De'e na'ana' cho'a xtižə'enə'.

¹⁴ Diozən' bosbane' Xancho Jeso'osən' ladjo beṇə' guat ca'. Na' nezecho can' bosbane'ene'enə', leczə can' yosbane' chio'o na' yeyejcho gan' zoe'enə' par ničh žjəyecho txen len le'.

¹⁵ Yoguə'əlole' de'en babžaglaogua', bžaglaogua'an par gaquəlena' le'e. De'e na'ana' bagwyanch chio'o chonlilažə'əcho Xancho Jeso'osən', na' banaccho beṇə' zan cho'echo yelə' choxcwlen che Diozən' catequan' nži'ilaže'e chio'o.

¹⁶ Na' bito chjxaquə'əlaža'a ca de'en chyixjui'a xtižə' Xancho Jeso'osən' la'anə'əczə tža tža zda chaxə' cuerp chia'anə'. Tža tža chonəch Diozən' nada' fuers balor par yichjla'aždaogua'anə'.

¹⁷ Yob te che bitə'ətezə de'e dao' de'en chžaglaochi' lao zocho yežlyo nga. Pero de'e ca' chžaglaochon' chsa'acwlen chio'o ničh socho probnid žjəyecho mbalaz juisy len Diozən' zejlicane.

¹⁸ Chio'o bito chi' yichjcho che de'e ca' chle'icho yežlyo nga, chi' yichjcho che de'e ca' cui chle'icho. De'e ca' chle'icho žjəde yežlyo nga, de'e yesə'əde cheina', pero de'e ca' cui chle'icho yežlyo nga caguə de'e yesə'əde cheina', žjənaquan par zejlicane.

5

¹ Ca naquə cuerp chechon' gwxaquə'əleben ca to ranšzə. Žalñez te chei catə'an gatcho. Pero na' nezecho Diozən' gone' par ničh žjəyecho zejlicane yoban' gan' zoe'enə'. Na' gan' žjəyechochon' gwxaquə'əleben ca to yo'o gual cheda' naquən to de'e ben Diozən' na' caguə de'e te cheina'.

² De'e li žlac nezoa' mbana' yežlyo nga chbežyaša'a lo'o la'aždaogua'anə' zelaža'a xte juisy gon Diozən' cuerp cob chia'anə' de'en gatə' chia' yoban'.

³ Zelaža'a gata' cuerp cobə chia' sin cui gata' chedə' bito che'enda' soa' sin cuerp.

⁴ Cuerp chechon' de'e te chein'. De'e na'anə' chbežayaša'a lo'o la'aždaogua'an, cagua de'en che'enda' gata', pero de'en zelaža'a goŋ Diozən' cuerp cobə chian' de'en cui te chei na' žjəyezoa' len le' zejlicane.

⁵ Dioz na'anə' babocobe' yichjla'ažda'ochon' na' le'ena' babsel'e'e Spirit che'ena' zon lo'o yichjla'ažda'ochon' par nič ca' nezecho gwžin ža gone' chio'o to cuerp cobe de'en cui te chei.

⁶ De'e na'anə' yichjla'aždaogua'anə' zon mba bita'etezə chac. Nežda' žlac zoa' mbana' len cuerp chia'anə', bito gaquə soa' yoban' gan' zo Xancho Jesocristən'.

⁷ Pero la'anə'əczə cui chle'ida' Xancho' zocza' chonjilaža'ane'.

⁸ Na' yichjla'aždaogua'anə' zon mba de'en nežda' žjəyezoa' len Xancho Jesocristən' catə'an gata'. De'e na'anə' yejni'a gata' na' gožə' cuerp chia'anə' cle ca socha' yežlyo nga.

⁹ Na' žlac ne'e mbana' cho'elaža'a chona' ca chebei Diozən' nada' na' ca yebeine' nada' catə'an bagota'.

¹⁰ Chona' ca' chedə' chonən byen yoguə'əcho techo lao Cristən' par əchogbi'en che to tocho segon naquən' bencho lao bguancho, šə bencho de'e güen o šə bencho de'e mal. Echogbi'en che to tocho šə socho mbalaz o šə si'icho castigw.

Notə'ətezə beŋə' chso'onjilaža' Cristən' nite'e binlo len Diozən'

¹¹ Na' nada' ža ca naquən' nežda' de que cheyalə' əgwdecho cuent lao Cristən' che yoguə'əlo de'en chonchon', chona' xte ga zelao saquə'əda' par se'ejle'e beŋə' che xtiže'ena'. Diozən' nezene' de que chona' xšine'ena' do laža'a, na' leczə zoa' lez de que le'e banezelen.

¹² De'e yoblə nia' de que bito cho'elao' cuina' sino che'enda' ənezele can' chona' nič yebeile na' güe'ele diža' len beŋə' ca' chəsə'anelao' chia' ye'ega'aclene' de que chona' xšin Diozən' do laža'a. Beŋə' ca' chəsə'anelao' chia' chso'elao' cuinga'aque' por ni che šə bi de'en bazjənsede', na' che seřyan' zjəzoa' na' che no lao dia chei gwsa'alje'. Na' bito bi nonən len lega'aque' nac zjənaquə yichjla'ažda'oga'aque'ena'.

¹³ Šə chaquele chac tonta'anə' por ni che can' babena', leğon xbab de que par be'elaogua'a Dioz nan' babena' bi de'en babena'. Na' šə chonle xbab zo ša'ocza' yichjla'aždaogua'anə', leğon xbab de que par chaquəlena' le'ena' chona' bi de'en chona'.

¹⁴ Lechguəle chaque Cristən' checho, na' de'e na'anə' bitobi chona' de'e bia'azəlaža'a. Chona' con can' chene'ene' chedə' bsanlaža' cuine' gwso'ote'ene' por ni che yoguə' chio'o benəč, na' de'e na'anə' guaquə ənačho de que yoguə'əcho gotcho.

¹⁵ Por ni che yoguə' chio'o beŋəčən' Cristən' bsanlaža' cuine' gwso'ote'ene' par nič bitoch goncho con de'e bia'azəlaža'əcho sino goncho can' chene'e le', chio'o bade yelə' mban zejlicane checho. Por ni che chio'on bsanlaža' cuin Cristən' gwso'ote'ene' na' leczə por ni chechon' bebane' ladjo beŋə' guatən'.

¹⁶ Catə'an cuinə' gonjilaža'a Cristən' bena' xbab de que cui zaque'e, chedə' bena' xbab che' na' che yoguə'əte beŋə' de que zjəzaque'e segon nac zjənaquə', na' nac chso'one', na' bi de'e de čega'aque'. Pero na'a bitoch chona' xbabən' ca' che Cristən' o che notə'ətezəchlə beŋə'.

¹⁷ Chio'o bandil ngoda'əcho len Cristən' Diozən' babocobe' yichjla'ažda'ochon'. Na' bitoch chebeicho de'e ca' bebeicho antslə, na' leczə bitoch choncho can' bencho antslə. Bazoch ca beŋə' cobə, na' banža' yelə' chzo yelə' chbez chechon'.

¹⁸ Ca de'en banaccho ca beŋə' cobə, goc ca' chedə' Diozən' bocobe' yichjla'ažda'ochon'. Ben Diozən' par bezoch binlo len le' ca de'en bnežjw cuin Cristən' por ni checho. Na' Diozən' no'e chia' chaquəlena' beŋə' par nič yesyə'anite'e binlo len le'.

¹⁹ Diozən' bsi'e xneze ben Cristən' par nič notə'ətezə beŋə' chso'onjilaža' le' chəsə'ənite'e binlo len Diozən', na' bitoch chone' cuent che de'e mal ca' bagwso'one'. Na' de'e na'anə' noe' Diozən' chia' chyixjue'ida' beŋəčən' naquən' so'one' par yesyə'anite'e binlo len le'.

²⁰ Cristən' bsel'e'e nada' ca lğüe'e, na' Diozən' chone' par nič chneyoida' le'e ca cuinczə Cristən', le'e cuinə' gonjilaža'əlene', par yezole binlo len Diozən'. De'e na'anə' leyenita' binlo len le'.

²¹ Cristən' bitobi de'e mal bene', pero par nič cui si'icho castigw che de'e mal chechon' de'en choncho, Diozən' bene' par nič Cristən' gwxaquə'əzi'e caczə načho lele'en bene' de'e malən'. Na' laogüe de'en gwxaquə'əzi' Cristən' lğua'a chio'o, Diozən' banone' chio'o beŋə' güen can' naquə cuine' chio'o chonjilaža'əcho Cristən'.

6

¹ Nada' chona' xšin Diozən' txen len le'. De'e na'anə' chneyoida' le'e leğon can' chazlaža' Diozən' par nič gacbia' de que chaclenən le'e ca de'en chonjilaža'əle Diozən' ben' nži'ilaža' le'e.

² Nyoj can' gwna Diozən':

Catə' bžin tyemp de'en bžia' bia' gona', bzenaga' chio'.

Na' catə' bžin ža bəna'an, cana'achən' goquələna' le'.

Can' nyojan. Na' ža neža babžin tyempən' gwne' ca', la' ža neža zocze' par yebeje' le'e xni'a de'e malən' le'e cuiṇə' gonlilažə'alene'.

³ Bito chona' de'e əgwžon par nič bəṇə' cui so'onlilaže'e Criston' nič ca' cui nono nelao' che xšin Diozən' de'en chona'.

⁴ Lgua'a de'e gona' ca', bitə'ətezə de'e chona' chona'an ca chsa'acbe'i bəṇə' de que chona' can' cheyalə' so'on bəṇə' güen xšin Diozən'. Chgo'o chčhejlaža'a catə' choso'oçhi' choso'osaquə' bəṇə' nada' na' catə' chzaquə'əzi' chzaquə'əyaša'a, na' catə' za'ac bichlə de'e mal len nada'.

⁵ Leczə chgo'o chčhejlaža'a catə' chjəti'a bəṇə' chəsə'əyin nada', na' catə' chəsə'əyixjue' nada' ližya, na' catə' chəsə'əbiadi'e nada' chəsə'əne' de que naca' bəṇə' mal, na' catə' chjxaquə'əda' por ni che yoguə'əlol de'en chona', na' catə' chžaglaogua' chbeja' yel bišgal, na' catə' chbil chdona'. Yoguə' de'e quinga chjti'a pero chgo'o chčhejlaža'a.

⁶ Chona' ca chsa'acbe'i bəṇə' de que chona' can' cheyalə' so'on bəṇə' güen xšin Diozən'. Chlo'a de que bito bi de'e mal da' əchen yichjla'aždaogua'anə'. Chlo'a de que chejni'ida' can' chene'ene' goncho, napa' yelə' chxenlažə' len bəṇə' yoblə, chona' güen len bəṇə' yoblə, chona' can' na Spirit che Diozən', na' do laža'a chacda' che bəṇə' yoblə.

⁷ Cho'a xtiže'enə' de'en naquə de'e li, na' de'en baben Diozən' par nič naca' bəṇə' güen laogüe'enə' de'e na'anə' chone' nada' yelə' guac che'enə' par chona' xšine'enə' na' par chdilələna' gwxiye'enə'.

⁸ Chona' ca chsa'acbe'i bəṇə' de que chona' can' cheyalə' so'on bəṇə' güen xšin Diozən' la'anə'əczə šə chso'elaogüe'e nada' o šə chəsə'əgue'ine' nada' na' la'anə'əczə šə chəsə'əne' güen chia' o šə chəsə'əne' mal chia'. Dižə' de'en cho'a naquən de'e li, la'anə'əczə nita' bəṇə' chəsə'əne' naca' bəṇə' goxoayag.

⁹ Na' la'anə'əczə nita' bəṇə' chsa'aquene' bito bselə' Diozən' nada', le'e nezele de que Diozən' bselə'e nada' naca' apostol. Zan las chona' xbab gatca'ana', pero nembana'. Ca de'en chon Diozən' par chac chia' yoguə' de'e quinga chžaglaogua', chone' ca' par nič gaquə'cha' bəṇə' güen, caguə chone' par nič gata'ana'.

¹⁰ La'anə'əczə de'e zan de'e chac par soa' trist, syempr chebeida' lo'o la'aždaogua'anə'. La'anə'əczə nga'an yaša'a, chona' ca bəṇə' zan nite'e mbalaz. La'anə'əczə bito bi de chia', Diozən' chone' bitə'ətezə de'en chyažda'.

¹¹ Con yoguə' dižə' de'en nežda' na' de'en naquə güen babi'an len le'e bəṇə' Corinto de'en chacchgüeida' chele.

¹² Na' ca naquən' cui zole binlo len nada', naquən por ni che de'en cuitec chaquəle chia', caguə de'en cui chacda' chele.

¹³ Chatə'əyoichgüeida' le'e can' chatə'əyoida' no xi'ina' leso legaque chia' can' chacchgüeida' chele.

Spirit che Diozən' zon lo'o yichjla'aždao' bəṇə' chso'onlilažə' le'

¹⁴ Bito cheyalə' əgwcodə' ljuežjcho len bəṇə' cui chso'onlilažə' Cristən'. Ben' zda liča bito gaquə gone' txen len ben' chon de'e mal. Na' ben' yo'o be'eni' che Diozən' lo'o yichjla'aždaogüe'enə' bito naquə yichjla'aždaogüe'en tozə len yichjla'aždao' ben' cui yo'o be'eni' che Diozən'.

¹⁵ Cristən' bito chac gone' txen len de'e gwxiye'enə'. Na' ben' chonlilažə' Cristən' bito cheyalə' gague' txen len ben' cui chonlilažə' Cristən'.

¹⁶ Na' chio'o cho'ela'och Dioz ben' zo zejlicane bito gaquə goncho txen len bitə'ətezə de'en naquə che lgua'a lsaquə' de'en chse'ejni'alažə' bəṇə', chedə' Spirit che Diozən' zon lo'o yichjla'ažda'ochon' ca bəṇə' zo liže'. Chac can' gwna Diozən':

Soa' len lega'aque' na' talenga'aca'ane'.

Gaca' ben' so'elaogüe'e, na' lega'aque' əsa'aque' xi'ina'.

¹⁷ De'e na'anə' cheyalə' goncho can' gwna Xancho Diozən':

Le'e yechoj entr bəṇə' ca' cui chso'elao' nada' na' bitoch gonle txen len lega'aque'.

Bitoch gonle de'e malən'.

Legon par nič yebeida' le'e.

¹⁸ Na' nada' gaca' Xale na' le'e gacle xi'ina'.

Can' na Dioz ben' napə le'ezelaogüe yelə' guac xənə'.

7

¹ Bəṇə' bišə'ədaogua'a, nezecho gon Diozən' len chio'o can' na lyebe quinga de'en babi'a dižə' chei. De'e na'anə' cheyalə' cuejyichjcho cuich goncho bitə'ətezə de'e mal na' bitə'ətezə xbab mal de'en choncho, par nič cui bi de'e mal ta' əchen cuerp chechon' o

yichjla'ažda'ochon'. Na' ca de'en napcho Diozən' respet, cheyałə' gwzenaguəchcho che' par nich yichjla'ažda'ochon' šejəch gaquəchən xi'ilaža'.

Beṇə' Corinto ca' gosa'əbejyichje' de'e malən'

² Na' chṇeyoida' le'e, legaue chia' can' chacda' chele. Ni to beṇə' cui bi bi chonda'ane'. Bito bi bi chona' par əgwɔxɔnɔn yichjla'aždao' beṇə' yoblə. Bito chxəoyaga' beṇə'.

³ La'anə'əczə balle nale de que chona' ca', bito chdila' le'e. Bagwnia'acza' antslə lechguale chacda' chele. Chacda' chele na'a mbana' na' leczə xte ža yełə' gota' ne'e gwaquəczada' chele.

⁴ Lechguale chebeida' le'e na' zoa' segor gonle can' chene'e Diozən'. Babeyacxenlaža'a de'en bla' rson ca güennə' chonle, na' zochgua' mbalaz, la'anə'əczə de'e zan de'e chy'i' chzaca'a.

⁵ Cata' bežina' Masedonian' de'e li bito gotə' latjə yezi'ilaža'a. Do tyempte boso'ochi' boso'osauə' beṇə' ca' nada', na' bžeba' lo'o yichjla'aždaogua'anə' gocda' nac gonle.

⁶ Pero Diozən' syempr cheyonxenlaže'e beṇə' nita' trist. Le' beyonxenlaže'e nada' de'en bela' Titonə'.

⁷ Beyacxenlaža'a caguə de'en bele'e na'azən' sino por ni che rson de'en zeno'enə' de que bebeichgüeine' can' chonle. Be'e dižə' de que zelažə'əchguale yida' de'e yoblə delana'a le'e. Na' leczə ne' de que chegüi'inchgüeile lo'o yichjla'ažda'olen' ca naqua de'e mal de'en benlen' na' chi' yichje gonle can' gwnia' le'e. Na' bebeichgüeida' de'en bele'enə' pero mazəchlə bebeida' dižə' de'en be'e chele.

⁸⁻⁹ Chacbe'ida' tristən' bzoa' le'e ca de'en gwnia' le'e le'e cartən'. Gwdechlə beyejda' ca naquən' bzoa' le'e tristən', pero na'a bitoch cheyejda' cheda' šlozən' gwzole trist. Caguə chebeidan' bosgüi'inda' yichjla'ažda'olen'. Con chebeida' de que lao zole chegüi'inlaža'əle lo'o yichjla'ažda'olena' bedinjle de'e mal chele de'en benle. Na' chebei Diozən' de que bedinjlen. Can' naquən bitobi de'e mal benən len le'e de'en bzoja' le'e cartən', sino goclenə' le'e.

¹⁰ Chebei Diozən' cata' nota'seteza beṇə' zo trist chedinjene' che de'e malən' babene', na' Diozən' chezi'ixene' che ben' chedinje xtole'enə' par nich cui yeyeje' lao yi' gabilən'. Na' šə babedinjecho xtołə'əcho ca' cuat socho trist de'en bedinjchon. Beṇə' zan ža' yežlyo nga bito chesyə'adinjene' xtołə'əga'aque'enə' cata' nite'e trist, na' de'e na'anə' gwžin ža žjəya'aque' lao yi' gabilən'.

¹¹ Chebei Diozən' can' bedinjle xtołə'əlen' catə'n gwzole trist. Na' de'en gwzole trist, lechguale gone'ele benle can' chene'e Diozən' gonle, na' lechguale gone'ele nežda' de que bito benle txen len ben' ben de'e malən', na' bža'ale por ni che de'e malən' ben be'enə', na' bžeble chaqule šə yida' yedeyena' le'e castigw. Lechguale gone'ele gonle ca yebeida'. Lechguale gwche' yichje gonle can' na Diozən'. Na' leczə de'en gwzole trist benən par nich bnežjwle castigw che ben' ben de'e malən'. Na' lao yogua'əłol de'e quinga bagoc, naquən clar de que bitoch bi xtołə'əle de.

¹² Bito bzoja' le'e parzə nich ben' ben de'e malən' si'e castigw, nique nacho parzə nich ben' goquə de'e mal chei yeyacxenlaže'e. Leczə bzoja' le'e par nich lao Diozən' gocbe'ile de que ne'e chaqule chia' na' ne'e chene'ele gonle can' nia'anə'.

¹³ Na' babeyacxenlaža'a de'en bzenagle chia'.

Na' bebeichgüeida' cheda' benle ca bebei Titonə'. Yogua'əle benle ca zoe' mbalaz.

¹⁴ Be'elaogua'a le'e cata' bi'a dižə' len Titonə' na' benle can' goža' Titon' gonle. De'e na'anə' bito chacda' tola. Yogua'əłol de'en bagwnia' le'e babi'a dižə' li, na' leczə catə'n bi'a dižə' len Titonə' be'elaogua'a le'e benle par nich nachbia' bi'a dižə' li.

¹⁵ Na' chaquəchene' chele cheda' chone' xbab can' yogua' le'e bzenagle che' na' chone' xbab can' gwche'echgua yichje par benle can' gože' le'e.

¹⁶ Na' chebeida' zoa' segor gonle yogua'əłol can' cheyałə' gonle.

8

Besə'əzanene' de'en gotə' chega'aque' par gwsa'aclene' beṇə' yoblə

¹ Beṇə' bišə', chene'eto' ənezele can' bagoclen Diozən' tcuen tcuen beṇə' ca' chəsə'əadopə chəsə'əžag chso'elaogüe'e Cristən' gan' mbane Masedonian'.

² Lao yełə' yašə' yełə' zi' chega'aque'enə' bagoclen Diozən' lega'aque' par nite'e mbalaz. Na' la'anə'əczə bazjənaquəchgüe' beṇə' yašə', besyə'əbeine' bosə'ənežjue' de'en besə'əyažje beṇə' chso'elao' Cristən' Jodean'.

³ Nežda' na' cho'a dižə' de que to to'e boso'onežjochgüe' de'e besə'əyažje beṇə' ca' la'anə'əczə cui bi gotə' par cuinga'aque', na' con xbab chega'aque'enə' gwsə'one' ca'.

⁴ Gosa'əneyoine' nada' gua'a latjə yoso'onežjue' mech par əsa'aclene' beṇə' Jodea' ca' bagwlej Diozən' par zjənaque' lažə' ne'enə'.

⁵ Na' gwsə'onche' mazəchlə can' bena' xbab so'one' de'en gwsə'on cuinga'aque' lažə' na' Xancho Cristən' na' lažə' na'anə' cheda' gwsa'acbe'ine' can' chene'e Diozən' so'one'. Na' leczə boso'onežjue' mechən'.

⁶ Nezecho de que Titon' bide' gan' zole na' btipe' lažə'əle par btoble mechən'. Na' catə' gwnežda' de'en gwsə'on beŋə' Masedonia ca', gotə'əyoida' Titonə' yeyede' yeto gan' zolen' par nič gaqulene' le'e yeyož əgwtole mechən'.

⁷ Güenchguan' chonle ca de'en lechguale chonlilažə'əle Cristən', na' cho'echgualē xtize'ena', na' de'e zan de'e chejni'ile che Diozan', na' chonle xšine'ena' do yichj do lažə'əle, na' chachgüeile čhetə'. Na' de'e na'ana' čhneyoida' le'e gonšgacze güen əgwtole de'e sčha'o par əgwnežjwle beŋə' Jodea ca'.

⁸ Bitə' chona' mendad əgwnežjwle mechən', con babi'a dižə' len le'e can' bosə'onežjo beŋə' mech. Na' šə gonle can' gwsə'on lega'aque' gwlo'ele de que do lažə'əlen' chaquele che Diozan'.

⁹ Nezele de que Xancho Jesocrisən' nape' yelə' gwnabia' na' yelə' bala'aŋ xen. Pero de'en nzi'ilažə'e chio'o bzanene' gwlejšyichje' yelə' gwnabia' na' yelə' bala'aŋ che'ena' par nič bedəyene' ca si'icho yelə' bala'aŋ xen.

¹⁰ Godgüize gone'ele gaqulene' beŋə' yašə' ca' na' gwzə'olao btoble mechən'. Na' na'a chnia' le'e de que naqəŋ güen yeyož əgwtole.

¹¹ Na' gwnežjwle de'en de čhele xte ga zelao saque'ele par nič yeyož gonle can' gone'ele gonle.

¹² Šə to beŋə' chene'ene' əgwnežjue' to de'e əgwnežjue', gobeicze Diozan' can' gone'ena' la'aŋə'əczə'latə'əzə' de'en gaqə'əgwnežjue', pero na' šə cui bi de che' bitə'əna' Diozan' cheyalə' əgwnežjue' de'e cui de che'.

¹³ Bitə' nia' de que gonle ca cuich bi bi yega'aŋ čhele na' gatə' che beŋə' yoblə'.

¹⁴ Con che'enda' gatə' de'e chyažje yogua'əle. Na'a de che le'e, na' cheyalə' gaqulene' lega'aque' chəsə'əyazjəne' na'a. Čhexa šə gwžin tyemp catə' gatə' che lega'aque' na' le'e əyazjele, lega'aque' cheyalə' sa'aclene' le'e par nič gatə' de'e chyažje yogua'əle.

¹⁵ Nach gaqə' can' nyoj Xtizə' Diozan', nan: "Ben' betobə de'e sčha'o bitə' gotə'əch mazə'člə ca de'en byažjəne', na' ben' betobə'latə' da'ozən' gotə' che' de'en byažjəne'."

Titon' na' beŋə' ljuēžje' ca'

¹⁶ Chočxwlen Diozan' bene' par nič Titonə' che'enchgüeine' gaqulene' le'e ca'aczən' che'enda' nada' gaqulena' le'e.

¹⁷ Catə' gotə'əyoida'ane' yeyede' gan' zolen' par gaqulene' le'e, le' gwne' ya'o, cagua de'en gotə'əyoida'ane' na'azə' sino de'en bache'enchgüeiczene' yeyede' gan' zolen' par gaqulene' le'e.

¹⁸ Čselə'a yeto beŋə' bišə'əcho len Titonə'. Na' tcuen tcuen beŋə' ca' chəsə'ədope' chəsə'əžag chso'elaogüe'e Jesocrisən' chso'e dižə' güen che beŋə' bišə'əchona' catequən' xoche chzejni'ine' beŋə' ca naqə' dižə' güen dižə' cobə' che Jesocrisən'.

¹⁹ Nachən' bagosə'əbeje'ene' par sa'alene' nada' catə' žjəyesana' mechən' de'en chtobcho par gaqulenchə beŋə' bišə'əcho yašə' ca' nitə' Jodean'. Čhtobchon par nič Xancho Diozan' chzi'e yelə' bala'aŋ na' par nič nla'alao de que chene'echo gaqulenchə beŋə' chyažj chčhine'.

²⁰⁻²¹ Yo'o yichja' gona' de'en naqə' güen lao Xancho Diozan' na' lao beŋə'chən'. De'e na'ana' le' sa'alene' nada' par nič notono əna de que bitə' chona' can' cheyalə' gona' len mech xen de'en gox'a'ana'.

²² Na' leczə' len Titon' čselə'əto' yeto beŋə' bišə'əcho. Zan las bable'ito' de que do yichj do lažə'e chone' xšin Diozan'. Nezene' de que le'e lechguale chene'ele gonle can' cheyalə' gonle, na' de'e na'ana' banachguan yide' gan' zolen' par gaqulene' le'e.

²³ Šə no nabe' le'e bixchen' za' Titon' na' beŋə' bišə'əcho ca' yechopə, leye'ega'aque' de que Titon' chone' txen len nada' chonto' xšin Diozan' par chaclento' le'e. Na' beŋə' ca' yechopə ža, tcuen tcuen beŋə' ca' chəsə'ədope' chəsə'əžag chso'elaogüe'e Cristən' chəsə'əsele' e' lega'aque' par sa'aclene' le'e, na' chso'one' ca' chzi' Cristən' yelə' bala'aŋ.

²⁴ Na'a ža čhneyoida' le'e legon güen len lega'aque' par nič yesə'əneze' tcuen tcuen beŋə' ca' chəsə'ədope' chəsə'əžag chso'elaogüe'e Cristən' de que chaquele che Diozan'. Na' legon par nič la'alaon de que dižə' lin' gwnia' catə'an be'elaogua' a' le'e.

9

Bosə'otobe' mech par gwsa'aclene' beŋə' ca' chso'onlilažə' Cristən' Jodean'

¹ Bitə' chonən byen gwzoja' le'e de que cheyalə' əgwnežjwle mech par gaqulene' beŋə' Jodea ca' bagwlej Diozan' par zjənaque' lažə' ne'ena',

² čhedə' nežda' de que le'e chene'ele gaqulenga'aclene'. Cho'elaogua' a' le'e cho'a dižə' len beŋə' Masedonia ca' čhapəga'aca'ane' de que le'e beŋə' Acaya gone'ele gaqulene' beŋə' yašə' ca' godgüize na' gwzə'olao btoble mechən'. Na' de'en benle' ca' do yichj do lažə'əle leczə' zan beŋə' Masedonian' chse'enene' sa'aclene' lega'aque'.

³ Na' n̄a'a chsel̄a'a ben̄a' biš̄ə'əcho ca' gan' zolen' na' sa'aclene' le'e yeyoż əgwtohlen par niç ca' sole probnid əgwnežjwlen. Che'enda' la'alaon de que diž̄ə' l̄in' bi'a be'elaogua'a le'e de que gaqualenle ben̄a' yaš̄ə' ca'.

⁴ Çhexa š̄ə əsa'ac̄l̄ə to çop̄ə ben̄a' Masedonian' cat̄a' yeyeda' gan' zolen'? Š̄ə bito ne'e yeyoż əgwtohle mech̄an' cat̄a' yeyeda', gaquada' zto' de'en gož̄aga'aca'ane' ca güenn̄ə' gonle' na' lecz̄ə le'e gaeque zto' de'en cui benle complir de'en gwzola benle.

⁵ De'e na'ana' zencuialaogua' ben̄a' biš̄ə'əcho ca' š̄onə zeya'aque' gan' nit̄ə'ələna' çhed̄a' chacda' chonən byen sa'aclene' le'e yeyoż əgwtohle mech̄ de'en benle lyebe əgwtohle par gaqualenle ben̄a' yaš̄ə' ca'. Legwtobən antsl̄ə cuiñ̄ə' yeyeda' par niç baden cat̄a' yeyeda', na' gachbia' de que gonlen do yich̄j do laž̄ə'əle caguə gonlen la fuers.

⁶ Ben' chaz lat̄ə'əzə, lat̄ə'əzə chelape', na' ben' chaz de'e scha'o, de'e scha'o chelape'. Ca'aczən' chac len chio'o, š̄ə zanecho de'e scha'o par gaqualencho ben̄a', nachən' socho mbalaz juisy.

⁷ To tole cheyal̄ə' əgwnežjwle ja'aquə'ət̄ə' de'e yebeile əgwnežjwle çhed̄a' lechguale chebei Diozən' ben' chebeine' chnežjue' de'e chnežjue' par x̄sin Diozən'. Bito cheyal̄ə' əgwnežjwcho de'e əgwnežjwcho la fuers sino əgwnežjwchon do laž̄ə'əcho.

⁸ Diozən' nape' yel̄ə' guac par chaclenchgüe' chio'o len bit̄ə'ətezə de'e chyažjecho. Na' chac gone' ca gat̄ə' yoguə'əlol de'e chyažjecho do tyempte par niç gaquə əgwnežjwcho bi de'e chyažje ben̄a' yobl̄ə na' goncho bichl̄ə de'en naquə güen.

⁹ Nyoj Xt̄iž̄ə' Diozən' can' ben to ben̄a' nan:
Bagoclene' ben̄a' zan, bnežjue' de'e bes̄ə'əyažje ben̄a' yaš̄ə'.
Na' cuat ganlaž̄ə' Diozən' de'e güenn̄ə' de'en ben be'ena'.

¹⁰ Diozən' chone' par niç chat̄ə' no xoa' bin na' bit̄ə'ətezachl̄ə de'en chazcho, na' le'ena' chone' par niç chat̄ə' de'e che'ej de'e chaocho. Le'egatezə ca' le'ena' gone' ca gat̄ə' bichl̄ə de'e chyažjecho na' gone ca çha'o xenchən par niç š̄ejəch gonchcho de'e güenna'.

¹¹ Na' bit̄ə'ətezə de'en chac chele Diozən' chone' par niç chebeile chnežjwle de'e scha'o de'e chas̄ə'əyažje ben̄a' yobl̄ə na' cat̄a' neto' ž̄jənežjoto' ben̄a' yaš̄ə' ca' de'en babbtohle, nach əso'e yel̄ə' choxcwlen che Diozən'.

¹² Na' cat̄ə' chio'o chnežjwcho de'e chas̄ə'əyažje yeziquə'əchl̄ə ben̄a' bagwlej Diozən' par zjənaque' laž̄ə' ne'ena' chaclenga'acchone' par niç chat̄ə' de'en chas̄ə'əyažjene', na' lecz̄ə ca' choncho par niç ben̄a' ca' chaclencho chso'echgüe' yel̄ə' choxcwlen che Diozən'.

¹³ Na' cat̄ə' yeyoż əgwtohle de'e scha'o de'en əgwnežjwcho ben̄a' yaš̄ə' ca' əgwlo'en de que do yich̄j do laž̄ə'əle chzenagle che diž̄ə' güen diž̄ə' cob̄ə che Cristən'. Na' cat̄ə' ben̄a' yaš̄ə' ca' yes̄ə'əzi'e de'en əgwnežjwle lega'aque' nach əso'elaogüe'e Diozən' can' chsel̄ə'əle de'e scha'o mech de'e gaqualenən lega'aque' na' əso'elaogüe'e Diozən' can' chaclenle not̄ə'ətezachl̄ə ben̄a' chso'elao' Cristən'.

¹⁴ Na' so'one' orasyon par yes̄ə'ənabe' yel̄ə' chaclen che Diozən' par le'e na' əsa'acquene' chele yes̄ə'əbeine' can' bagocwlenchgua Diozən' le'e len xbab de'en yo'o lo'o yich̄jla' ažd̄ə'olen' par niç chnežjwle de'en chas̄ə'əyažje ben̄a' yobl̄ə.

¹⁵ Choxcwlen Diozən' ca naquə goclen xen de'en bene' len chio'o ben̄ach cat̄ə'an bsel̄e'e Xi'in̄e'ena' por ni checho. Bito de diž̄ə' de'e güe'echo catec zaquə'an de'en bsel̄e'ene'.

10

Yel̄ə' chnabia' che Pabən' de'en naque' apostol

¹ Na' ca naca' nada' Pab de yeto de'e n̄ia' le'e can' gonle. Chas̄ə'əna ben̄a' de que nada' chžeba' par bi gona' o par bi n̄ia' le'e cat̄ə'an zoa' len le'e na' con cat̄ə' zoa' zit̄ə' chzoja' le'e ca ben̄a' cui chžeb. Bito naquan ca' sino chona' len le'e can' bentezə ben Cristən' len ben̄a' lao yel̄ə' chxenlaž̄ə' che'ena' na' yel̄ə' ben̄a' gaxjwlaž̄ə' che'ena'.

² De'e na'ana' chneyoida' le'e legon ca cui gonən byen til̄ə' le'e cat̄ə'an yida'. Bangüia' til̄ə' ben̄a' ca' chas̄ə'əne' chona' con can' na xbab çhia'an̄a'.

³ La'an̄ə'əczə naca' ben̄ach bito chona' con can' na xbab çhia'an̄a' ca de'en chonchgua' xte ga zelao saquə'əda' par niç ben̄a' yobl̄ə yoso'ozenague' che Cristən'.

⁴ Nezda' de que bit̄ə'ətezə de'en chac chon cuinza' bito chaclenən nada' par gona' ca yoso'ozenag ben̄a' che Cristən'. Pero Diozən' chaclene' nada' par chzoa' ca'alə bi de'en chžon par niç ben̄a' yoso'ozenague' che Cristən'.

⁵ Na' len yel̄ə' chnabia' che' de'en babene' nada', chona' ca chas̄ə'əzəx̄jwyich̄j ben̄a' lao Cristən' par choso'ozenague' che' na' chso'one' xbab güen can' chene'e Cristən'. Chona' ca cuich chso'on cuinga'aque' xen sino chas̄ə'əbejyich̄je' bit̄ə'ətezə de'en chžon par se'ejle'e diž̄ə' li che Diozən'.

⁶ Chbeza' par niç yoguə' le'e gwzenagle che Cristən' do yich̄j do laž̄ə'əle, pero na' not̄ə'ətezle š̄ə cui gwzenagle, zoa' dispuest par gona' le'e castigw.

⁷ Legon xbab šə de'en chəsə'əna beṇə' naquən de'e li. Nitə' beṇə' chəsə'əne' zjəneze' bsele' Cristən' lega'aque'. Beṇə' ca' cheyalə' so'one' xbab de que lecəzə Cristən' bsele'e nada'.

⁸ Žalə' güe'echa' dižə' mazachlə can' babi'an antslə ənia' de que Cristən' bsele'e nada' na' beṇe' yelə' chnabia' par bi de'en chona', guatə'əbia' de que cho'a dižə' li. Xancho Cristən' bsele'e nada' na' beṇe' nada' yelə' chnabia' par niç gaquəlena' le'e, caguə par gona' ca cuejyichjle cuich gonlilažə'əlene'əna'.

⁹ Echnia' ca' par niç cui gonle xbab de que chzoja' cart quinga par əgwšeba' le'əna'.

¹⁰ Beṇə' ca' chəsə'ənelao' chia' chəsə'əne' de que cart ca' chzoja' zjənaquən de'e žialao. Na' chəsə'əne' bito chžeba' bi ənia' le'e le'e cartən' pero bito cheyaxjda' par bi gona' catə' zoa' len le'e na' de que xtižə'ana' bito bi zaquə'ən.

¹¹ Beṇə' ca' chəsə'ənelao' chia' cheyalə' yesə'əneze' de que can' nia' le'e cart ca' de'en chzoja' le'e catə' zoa' zitə', lecəzə can' ənia' na' lecəzə can' gona' catə'ən soa' len le'e.

¹² Bito che'enda' gonlebada' beṇə' ca' chso'elao' cuinga'aque'. Beṇə' ca' chsa'aque' de que chso'onyaṇe'e can' cheyalə' so'one' na' chsa'aque' de que güenchguan' choso'osed choso'olo'ine' cheda' tozə can' choso'osed choso'olo'i yogue'e, len bito bi zaquə' de'en chso'one' xbabən' ca'.

¹³ Nada' bito güe'elao' cuina' ənia' de que bena' bi de'e güen šə cui bena'an cuina'. Con gua'a dižə' che de'en babena' gan' babselə' Diozən' nada', na' nəzda' de que lenczə gan' zole na'anə' bsele'e nada'.

¹⁴ Na' ca naca' nada' babida' be'elena' le'e xtižə' Diozən' catə'ən cui nonə' güe'elene'en le'e, de'e na'anə' naquəczən ənia' le'e can' cheyalə' gonle.

¹⁵ Bito cho'a dižə' che xšin Diozən' de'en ben beṇə' yoblə ga cui bsele' Diozən' nada' par chixjui'a xtižə'əna'. Nada' zoa' lez de que le'e gonlilažə'əchle Cristən' na' catə' cuich chyažjele əgğüia əgwya' le'e, nach ša'acha' ga yoblə gan' əselə' Diozən' nada' par chixjui'a xtižə'əna'.

¹⁶ Na' chixjui'a dižə' güen dižə' cobə che Cristən' ga yoblə gan' cui no ne'e chixjue'en. Na' gua'a dižə' che xšin Diozən' de'en baben cuina' lgua'a güe'elao' cuina' che de'en baben beṇə' yoblə.

¹⁷ Bito cheyalə' güe'elao' cuincho sino cheyalə' güe'ela'ochə Xancho Diozən'.

¹⁸ La'anə'əczə šə əna to beṇə' de que chone' güen, caguə de'e na' šejle'echo de que le güennə' chone'. Pero šə Diozən' güe'elaogüe'ene' nachən' nəzecho be'əna' chone' güen.

11

Pabən' na' beṇə' ca' gwso'on cuinga'aque' ca apostol

¹ Žalə'əšga əgwzenagle yeto çopə dižə' de'en ənia' le'e la'anə'əczə šə gaquele bito bi zjəzaquə'ən. Legwzenag žlac ənia'an.

² Nada' bzejni'ida' le'e xtižə' Cristən' na' de'e na'anə' che'enchgüeida' gaquele che tozə Cristən' ca to no'ol güego' naplažə' cuine' na' chaquene' che tozə ben' si' le'. Ca'acžən' chene'e Diozən' gaquele che Cristən'.

³ Chxožda' yesə'əxoayag beṇə' le'e par niç cuich gonlilažə'əle Cristən' do lažə'əle na' cuich gaquele che tozə le', can' bxoayag beḷən' de'e no'olə nechən' ben' gwle Eb yelə' bia bib chebən'.

⁴ ¿Egüenchguan' chonle ža? Babla'ac beṇə' gan' zolen' choso'ozejni'ine' le'e che Jeso'osən' nža'alə can' bzejni'ida' le'e. De'en choso'ozejni'ine'en zdan clelə len dižə' güen dižə' cobə che Cristən' de'en bagwyejle'əle chei. Pero le'e bito chaquele zdebə chzenagle chega'aque'.

⁵ Malən' chonle banonle beṇə' ca' ca apostol chele na' chonga'aclene' xen. ¿Ecabi lecəzə zaca'a nada' can' zjəzaquə'əna'?

⁶ La'anə'əczə cui chac cho'a dižə' güenchgua, chejni'ida' de'en cho'a dižə' chei. Bable'iczele yoguə'əte de'en babena' na' nəczzele de que chejni'ida' xtižə' Diozən' de'en cho'elena' le'e.

⁷ ¿Echaquele malən' bena' cui bi laxjua' gwxi'a catə'ən be'elena' le'e dižə' güen dižə' cobə che Diozən'? Nada' ben cuina' ca to beṇə' cui bi zaquə' de'en cui bi laxjua' gwxi'a parzə niç bena' ca zole mbalaz.

⁸ ¿Egwənacho malən' bena' gwxi'a mech de'en gwso'on beṇə' ca' chəsə'əadopə chəsə'əžag chso'elaogüe'e Cristən' ga yoblə? Gwxi'an par niç be'elena' le'e xtižə' Diozən' sin cui benle nada' mantener.

⁹ Catə' gwzoa' len le'e la'anə' cui gotə' de'en byažjda', bito gwṇabda'an le'e. Beṇə' bišə'əcho ca' zeya'ac Masedonian' lega'acle' gwso'one' de'en cui gotə' chia'. Na' gwdapa' cuidad cui bi zed benda' le'e par gonle nada' mantener, na' batə'ətezəchlə bitoczə bi bi zed gonda' le'e.

¹⁰ Can' nəzda' chaclen Cristən' nada' par cho'a dižə' li, ca'acžən' nəzda' de que cuat gonda' le'e zed par gonle nada' mantener. Chebeida' guaqua' nia' de que bito bi gan chona' de'en chyxjui'a xtižə' Diozən' len le'e o len beṇə' ža' gatə'ətezəchlə gan' mbane Acayan'.

¹¹ Caguə de'en cui chacda' chelen' cui gonzəda' le'e zed gonle nada' mantenerən'. Diozən' nezene' chacda' chele.

¹² Goncha' can' choncza' cui bi laxjua' chzi'a par niç benə' ca' chəsə'əna cui naca' apostol cuiç yesə'əzelene' bi yesə'əne' chia'.

¹³ Lega'aque' chse'enene' goncho xbab de que zjənaque' apostol, pero bito zjənaque'. Choso'osed choso'olo'ine' dižə' güenlažə' na' chəsə'əxoayague' par niç chaquele de que Crist nan' əbsele'e lega'aque'.

¹⁴ Bito yebanecho de'en chəsə'əxoayague', chedə' la' ca'aczən' chxoayag gwxiye'en chio'o par niç chaquecho de que de'en chene'en goncho naquən to de'e güen.

¹⁵ Na' de'en chon gwxiye'ena' ca', benə' ca' choso'ozenag chei leczə choso'oxoayague' par niç gaquele de que choso'ozejni'ine' benə' de'en naquə de'e güen. Gwžin ža gon Diozən' par niç gatə' castigw chega'aque' segon de'e mal de'en chso'one'ena'.

De'en gwdi' gwxaquə' Pabən' de'en naque' apostol

¹⁶ De'e yoblə əchnia', bito gaquele de que chona' xbab de'e cui bi zaquə'. Le'e chzenagle che benə' ca' de'e liczə chso'on xbab de'e cui bi bi zaquə'. Ca'aczə legwzenag chia' žlac gonlebəda' lega'aque' gua'a to chopə dižə' che de'e güenna' de'en chona'.

¹⁷ Gua'a dižə'an ca' la'anə'əczə nəzda' Cristən' bito be'e dižə'an ca'. Gona' ca' benə' chon xbab de'e cui zaquə'e.

¹⁸ Benə' zan chso'e dižə' de que zjənaque' benə' güen por ni che can' zjənaque', o por ni che šə bi de'en bagwso'one' o bi de'en bagoc chega'aque'. Ca'aczən' nada' gua'a dižə' che cuina' chedə' zjəde de'en nac ca' de'e gua'a dižə' chei.

¹⁹ De'e tant non cuiñle benə' sin' de'e na'aljan' chebeile chzenagle che benə' ca' chso'on xbab de'e cui bi zaquə'e.

²⁰ De'en chzenagle chega'aque' bazjənzoe' le'e xni'aga'aque'ena' ca esclabos chega'aque' Choso'oxoayague' le'e par niç chnežjwle lega'aque' bi de'en de chele na' par niç chontezle bin' chəsə'əne'. Chso'elao' cuinga'aque' na' chəsə'əbaže'e le'e par niç chzenagle chega'aque', na' le'e chebeile chonle can' chəsə'əne'ena'.

²¹ Gobeichljeile žalə' chonda' le'e can' chso'on lega'aque'ena'.

Leczə gwaquəczə gua'a dižə' par əgwlo'ida' le'e de que naca' benə' blao can' chso'on benə' ca', la'anə'əczə šə gaquele de que bito bi zaquə'an.

²² Chso'elao' cuinga'aque' de que gwsa'aljalene' benə' chso'e dižə' ebreo. Leczə ca' nada' goljalena' benə' chso'e dižə' ebreo. Chso'elao' cuinga'aque' de que zjənaque' benə' Izrael. Pero leczə benə' Izrael nada'. Chso'elao' cuinga'aque' de que zjənaque' xi'in dia che de'e Abraanə'. Pero leczə xi'in dia che de'e Abraam na' nada'.

²³ Chəsə'əne' de que Crist nan' bsele'e lega'aque' par chso'one' xšine'ena'. Leczə len' əbsele'e nada'. Na' güe'ela'och cuina' can' chso'elao' cuin lega'aque' nia' can' bagoc chia'. Lechguale babena' xšin Diozən' mazəchlə ca lega'aque'. Na' zan las bagota'a ližya por ni che de'en əchyixjui'a xtižə' Cristən', na' leczə zan las bagosə'əyin jostis ca' nada'. Na' zan las babelazə cui gota' por ni che de'e ca' bagoc chia'.

²⁴ Gueya' las gosə'əyin benə' Izrael gwlaž chia' ca' nada' yid sot tğualjechoa las.

²⁵ Šon las benə' jostis ca' gosə'əyine' nada' xis. Na' yetlas bosə'ošizə' benə' nada' yej xte yelatə'əzə cui gwso'ote' nada'. Na' lao zya'a yež zita' to lo'o barcw, leczə šon las bochinj nisda'on barcon' na' canə bžina' yo biž. Na' lao šon lasən' beyinjənnə' tši'i gwxoə lao nisda'onə' tža tyel to lao yag.

²⁶ Na' lao gwya'a jətiçjui'a xtižə' Cristən' zan las bela' cui gota' o so'ot benə' nada'. Zan las goc zdeba tia' yao ca', zo cata' goca' lao na' benə' bguan, na' zo cata' benə' Izrael gwlaž chia' ca' gwse'enene' so'ote' nada', na' leczə zo cata' benə' cui zjənaquə benə' Izrael gwse'enene' so'ote' nada'. Na' yelatə'əzə cui gota' do syodan' na' do ga cui no benə' ža'. Na' bašə gata' lao nisda'onə'. Na' do tyemp chxožda' cuiayi' xšin Diozən' por ni che benə' ca' chsa'aš chəsə'əne' de que žjəlene' chio'o pero caguə do lažə'əga'aque'ena'.

²⁷ Na' lao bena' xšin Diozən' zan las jxaquə'əchgüeida' na' zan las bguo'o bçheja' cui gwtasa'. Nombi'a yeļa' chbil chdon chedə' zan las cui gotə' de'e ye'ej gaogua'. Na' zan las beyaga' cui gotə' xa' de'e byažjda'.

²⁸ Na' de'e zanch de'e chy'i chzaca'a de'en cui cho'a dižə' chei. Pero mazəchlə chy'i chzaca'a, de'en chi'ichgua' yičhja' yoguə' ža nac chac che le'e chdopə chžagle cho'ela'ole Cristən' to to yež.

²⁹ Na' notə'ətezle cata' cui choile par gonyanə'əle can' chene'e Diozən', chzochgua' trist ca'aczə ənacho nada'an cui chona'an. Le'egatezə ca' cata' benə' chəsə'əxope' le'e par chonle de'e mal, lechguale de'e chacda' de'en che'enchgüeida' yebeja' le'e lao de'e malən'.

³⁰ Chacda' chyažjele gua'a dižə' che cuina', na' de'e na'anə' güe'ešaza' dižə' che de'e ca' chəsə'olo'e can' chac fałt' fuers balor chia', na' can' bito zaca'a bi gona' žals' cui zo Diozən' len nada'.

³¹ Dioz ben' cheyalə' güe'ela' ocho zejlicane nezcene' cho'a dižə' li. Len' naque' Xa Xancho Jesocrisən' na' Xancho Jesocrisən' leczə' cho'elaogüe'e le'.

³² Na' catə'ən gwzoa' Damasən' ben' goquə' gobernador žlac gwnabia' Rei Aretas bnite'e beņə' gwsa'apə' cho'a puert de'en zo le'e ze'e de'en nyečjy syodan' par yesə'əzene' nada' catə' yechoja'.

³³ Pero beņə' bišə'əcho ca' gosə'əgüe'e nada' to lo'o zomə' soa na' bosyo'oletje' nada' le'e ze'e che syodan' cho'a to bentan par nič ca' cui gwsa'acbe'ine' par yesə'əzene' nada'.

12

Pabən' be'e dižə' che de'en ble'ida'ogüe'ene' na' de'en bzejni'i Jesocrisən' le'

¹ Chonən byen gua'a dižə' che cuina' la'anə'əczə' cui gaquəlenən nada'. Na' gua'a dižə' che bałə' de'en bable'idaogüe'eda' na' che bałə' de'en babzejni'i Xancho Jesocrisən' nada'.

²⁻³ Goc žda' iz ben Diozən' par nič gwya'a yoban' na' nezdə' bžina' gan' zo'enə', na' bachonlilaža'a Cristən' ca orən'. Pero bito gocbe'ida' šə' gwya'a do cuerp chia' o šə' cui. Dioz na'azən' nezene' naquən' goquə'.

⁴ Con nezdə' de que bžina' mer gan' zo Diozən' na' benda' chsoe' beņə' ca' ža' na' dižə' de'e cui chsa'ac beņə'chən' yežlyo nga na' naquən dižə' de'en cui de lsens əgwzejni'ida' beņə'.

⁵ Žals' nan chia' güe'elao' cuina' güe'elao' cuina' de'en baben Diozən' len nada'. Pero con gua'a dižə' che de'e ca' choso'olo'e can' bito zaca'a bi gona' žals' cui zo Diozən' len nada'.

⁶ Žals' gua'a dižə' ca mban' baben Diozən' len nada' catə'ən gwya'a yoban' naquən dižə' li, pero so'onlja beņə' xbab de que naquacha' beņə' zaque'e mazəchlə' can' naca'. Bito gue'echa' dižə' che de'enə' chedə' la' che'enda' yoguə' beņə' so'one' xbab chia' segon bin' chəsə'əle'ine' chona' na' segon can' chyixju'i a xtižə' Diozən'.

⁷ Diozən' bito chene'ene' gon cuina' xen por ni che de'e ca' ble'idaogüe'eda' na' de'e ca' bzejni'ine' nada' de'e cuinə' se'en yesə'əle'i yeziqə'əchlə' beņə'. De'e na'anə' bene' par nič chžaglaogua' len to de'en chac che cuerp chia' nga. De'en chžaglaogua' len len gwxaquə'əleben caczə' ga cha'a to yešə'. Na' lechgualə' chon gwxiye'en ca gaquəda' tolə' de'en chac chia' ca'. Dioz nan' chone' par nič chac chia' ca' nič cui gona' xbab de que lechgualə' zaca'a.

⁸ Šon las gwñabda' Xancho Cristən' gone' par nič yega'a de'en chžaglaogua' len cuerp čhi'anə'.

⁹ Nach Xancho'n gwne': "Bito gona' ca cuich əžaglaogo'. Con sotezə' soa gaquəlena' le'. Lezən de'en chyažjdo'. Na' ca naquan' cui chac bi gono', nada' gaquəlena' le' len yełə' guac chia'anə'." Ca' gože' nada'. De'e na'anə' chebeiləda' cho'a dižə' can' cui chac bi gona', chedə' de'en chac chia' ca' chlo'en ca yełə' gaquən' napə' Cristən' par chaclene' nada'.

¹⁰ De'en chonlilaža'a Cristən' chebeida' bitə'ətezə' de'en chlo'e' can' chyažjda' yełə' chaclen che'enə'. Chebeida' catə' choso'ožia choso'onite' beņə' nada'. Chebeida' catə' chac fałt' bi de'en chyažjda'. Chebeida' catə' choso'olagzejə' choso'olagzidə' beņə' nada'. Chebeida' catə' bichlə' de'e chžaglaogua'. Chebeida' chedə' catə' chac chia' ca' chaclench Cristən' nada' len yełə' guac che'enə'.

Pabən' gwche'echgua'yichje' beņə' ca' chso'onlilažə' Cristən' Corinton'

¹¹ Babenle byen bi'a dižə' che cuina' la'anə'əczə' nezdə' bitotec bi' zaquə'ən güe'echo dižə'ən ca'. Žals' le'e cho'e'le dižə' de que nada' naca' beņə' zaque'e, bito benən byen bi'a dižə' quinga. Nezdə' bitobi zaca'a žals' cui zo Diozən' len nada', pero lechgualə' zaquə'əcha' cle ca beņə' ca' banonele apostol čele, beņə' ca' chonle xen.

¹² Diozən' bablo'e de que naca' doalje apostol che'enə'. Bagoclene' nada' bguo'o bčejlaza'a bena' xšine'enə' entr le'e la'anə'əczə' de'e zan de'e bagoc chia'. Goclene' nada' bena' xšine'enə' len yełə' guac che'enə' na' leczə' len yełə' guac che'enə' bena' mīlagr na' bichlə' de'e zaquə' yesə'əbane beņə'.

¹³ Tozə' ca güennə' bena' len le'e na' can' bena' len beņə' ca' chəsə'ədopə' chəsə'əžag chso'ela'ogüe'e Cristən' ga yoblə. ¿Echaquele bencha' güen len lega'aque' cle ca can' bena' len le'e de'en cui gwñabda' le'e gonle nada' mantener? Lesi'ixen chia' šə' malən' bena'.

¹⁴ Bazoa' probnid par yida' dezlana'a le'e de'e gwyoñ lase. Na' catə' yida' bito gua'a latjə' gonle nada' mantener. Bito che'enda' gonle nada' bi de'en de chele, che'enda' gon cuinle lažə' na' Cristən'. Bito naquən par bidao' ca' so'ombo' mantener xaxna'aga'acbo', sino xaxna'aga'acbo' nan' cheyalə' so'one' lega'acbo' mantener.

¹⁵ Ca'aczən' naquən len nada' ža, yebeida' əzanda' bitə'ətezə de'en de chia' na' lente cuina' par gaquəlencha' le'e gwzenagle che Cristən'. La'anə'əczə lechguale chacda' chele, pero nachle bitotec chaquale chia'.

¹⁶ Balle chnelaole chia' nale de que chxoayaga' le'e de'en bito bi'a latjə gonle nada' mantener parzə niç cuejalana' mechən' de'en chtoble par gaquəlenle be'nə' bišə'əcho ca' zjənaque' be'nə' yašə'.

¹⁷ ĽEcabi nezele bito bxoayaga' le'e len nota'ətezə be'nə' babsela'a gan' zolen'?

¹⁸ Gwneyoida' Titon' bide' bedəlane'e le'e na' bsele'a be'nə' bišə'əchon' yeto len le'. ĽEcabi nezele de que bito bxoayag Titon' le'e? Na'aljə Ľecabi tozə can' chona' len can' bene'ənə'? Na' can' che'enda' gaquəlena' le'e ca'aczən' gone'ene'.

¹⁹ De repent chaquale cho'a dižə' quinga parzə niç le'e cui gonle xbab de que chona' bi de'e mal. Pero caguə ca'anə'. Nežda' ngoda'a txen len Cristən' na' de que Diozən' neze nle'ine' naquən' chona' na' bin' ənia'. De'e na'anə' cho'a dižə' quinga, be'nə' bišə' dao', par niç chaquəlena' le'e.

²⁰ Chžeba' əželda' šə bi de'en cui chonle güen can' che'enda' gonle catə'an yida' gan' zolen', na' šə əželda' chonle de'e malən' bito šo'olažə'əle can' gona' castigw chelen'. Chona' xbab, chexa šə chdiə chšašle na' chgue'i ljuəžjle, o šə əchloc ljuəžjle na' chonle parzə niç caguə güen che cuinze. Na' chexa šə chnele mal che ljuəžjle na' chexa šə nacle be'nə' goçhitj dižə' o šə chon cuinle xen o šə ža'ale chac yazə.

²¹ Chžeba' de que catə'an yida' dezlaņa'a le'e zanle cuinə' cuejyichjle ca de'en chgo'o xtole na' chbejyichjle be'en chele o no'ol chele par chzolenle be'nə' yoblə na' bitə'ətezəchlə yelə' zto' de'en chonle len cuerp chelen'. Na' Dioz chia'an gone' par niç yeto'ida' na' yegüi'inda' che nolen' cui gwlejyichjle de'e malən' chonle.

13

Pabən' gwđixjui'e de que gwnežjue' castigw che be'nə' ca' chso'on de'e malən', na' chguape' be'nə' Corinto ca' diox

¹ De'e gwyon lase dezlaņa'a le'e na'a. Na' caguə can' nyoj Xtizə' Diozən' nan: "Catə' no gao xyə che to be'nə' de que nape' dolə', choglaochon che' de que nape' dolə' šə yotlən ca yəsə'əna çopə o šonə testigw be'nə' chso'e dižə' de que babene' de'e mal."

² Bagoža' be'nə' ca' chso'on de'e malən' antslə catə'an bedəlaņa'a le'e de'e əgwchope de que bito yeyašə'ada' lega'aque' šə cui yesyə'ədinjəne' xtolə'əga'aque'ənə'. Na' de'e yoblə na'a lao cuinə' yezida' gan' zolen' nia' nota'ətezəchlə bachonle de'e malən' bito yeyašə'ada' le'e catə'an yida'.

³ Na' catə' gona' castigw che le'e cui chedinjele xtolə'əlen' cana'achən' ənezele de que de'en chnia' za'an che Cristən', can' nale chene'ele ənezele. Na' bito nacho de que Cristən' bito caguə gone' castigw chelen', la' nape' yelə' guac xen, na' bablo'e yelə' guac che'ənə' len le'e.

⁴ De'e li Cristən' ben cuine' ca be'nə' cui bi chac gon catə'an gwso'ot be'nə' le' boso'ode'ene' le'e yag corozən'. Pero zocze' na'a chedə' Diozən' bosbane'ene' len yelə' guac che'ənə'. Le'egatez ca' naca' nada' ca be'nə' cui bi bi chac gon. Pero nežda' ngoda'a txen len Cristən' na' catə'an yezida' gan' zolen' gwlo'ida' le'e can' zo yelə' guac che Diozən' len nada'.

⁵ Legonyə'nə' xbab chele šə de'e liczə chonlilažə'əle Jesocristən'. Na' sə de'e li chonlilažə'əlene' gacbe'ile de que zoe' len le'e. Pero šə chache'ile bito zoe' len le'e guacbe'iczele de que caguə chonlilažə'əlene'ənə'.

⁶ Pero zoa' lez gacbe'ile de que zocze' len le'e par niç ca' gacbe'iteile de que naca' doalje apostol che'.

⁷ Chona' orasyon chnaba' gaquəlen Diozən' le'e par niç cuejyichjle cuich gonle de'e malən'. Bitobi nonən len nada' šə gona' ca gacbe'ile de que bsele' Diozən' nada' o šə cui, con šə le'e sotezle gonle de'e güen.

⁸ La' šə chzenagle che dižə' li che Jesocristən' bito əyazjən gona' castigw chele. Con gwnežjua' castigw che be'nə' ca' cui choso'ozenag chei.

⁹ Chebeida' catə' le'e chonle de'e güen na' bito chyažjən gwlo'a yelə' chnabia' chia'anə' par gona' castigw chele, la' leczə chona' orasyon chnaba' gaquəlen Diozən' le'e par niç gonle xbabən' can' cheyalə' gonle de'e yoblə.

¹⁰ Babzoja' de'e quinga antslə ze'e yida' gan' zolenə' par niç yedinjele xtolə'əlen' na' cui gona' castigw chelen' catə'an yida'anə'. Diozən' bsele'e nada' naca' apostol che'ənə' par niç gona' ca so'onlilažə'əch be'nə' le', caguə par gona' ca yəsə'əbejyichje' cuich so'onlilažə'ene'.

¹¹ Na'a ža be'nə' bišə', babzoja' de'en go'onda' ənezele. Le'e gon xbab can' cheyalə' gonle de'e yoblə. Legwzenag consejw quinga chona' le'e. Legac tozə len ljuəžjle. Leso binlō tole yetole. Dioz ben' chaque checho na' ben' chon par chzo chbezcho binlō len xbab de'en yo'o lō'o yichjla'əžda'ochon' sošgue' len le'e.

¹² Catə' chežagle leyolgüiž ljuežjle dižə' šao' par niç gacbia' de que chaque che ljuežjle.

¹³ Yogua' beṇə' ca' nitə' nga beṇə' ca' bagwlej Diozən' par zjənaque' lažə' ne'enə' choso'oguape'e le'e diox.

¹⁴ Xancho Jesocristən' sotezə soe' gaqualenšgue' le'e. Na' Diozən' gonšgue' par niç gacbe'ichele de que chaquene' chele. Na' Spirit che Diozən' gonšgan par niç yogua'əle gonle tozə xbab. De'e na'azən' əchnia' le'e. *Pab*

Cart De'en Bzoj San Pabən' Par Benə' Galasia Ca'

Pabən' chguape' diox benə' ca' chso'elao' Cristən' Galasian'

¹⁻² Nada' Pab chzoja' le'e chdopə chžagle cho'ela'ole Cristən' yež ca' de'en zjəchi' gan' nzi' Galasia. Chguapto' le'e diox t xen len yogua' benə' bišə'əcho ca' nita' nga. Caguə beṇəch na'anə' gwlej nada' o bsele'e nada' par naca' apostol. Jesocristən' t xen len Xə' Diozən' ben' bosban le' ladjo benə' guat ca', lega' aque'en gosə'əbeje' nada' par naca' apostol.

³ Chona' orasyon par niç Xəcho Diozən' na' Xəncho Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yichjla'azda'olen'.

⁴ Benə' ca' za' yežlyo nga tyemp nga zocho na'a nite'e xni'a de'e malən'. Jesocristən' bnežjw cuine' gwso'ot benə' le' par gwduxjue' xtola'əchon' niç ca' bebeje' chio'o xni'a de'e malən'. Bene' ca' cheda' can' gwyazlažə' Xəcho Diozən' gone'.

⁵ Ledoye'ela'och Diozən' zejlicane. Can' gonsgaczcho.

Bitoch bi dižə' de de'e guac əṇacho dižə' güen dižə' cobə

⁶ Diozən' gwleje' le'e par niç Xi'ine' Cristən' chaclene' le'e. Na' chebanda' can' chonlen' lgüegwə bachbejyichjle Diozən'. Na' lgu'a de'e gwzenagle dižə' güen dižə' cobə de'en chzejni'in che Jesocristən' de'en be'elena' le'e, bachzenagzechle che yeto de'en chaquele naquə dižə' güen dižə' cobə.

⁷ Pero bito naquən dižə' güen dižə' cobə. Benə' ca' choso'osed choso'olo'ine' to de'e zda cələ na' chso'one' ca chaczejlažə'əle che de'en bsd əblo'ito' le'e.

⁸ Žalə' neto' əchyixjue'eto' yeto de'en bito naquən lebe len dižə' güen dižə' cobə de'en chzejni'in che Cristən' de'en babsed bablo'ito' le'e, Diozən' gone' par niç cuiayi'ito' zejlicane, na' la'anə' to angl benə' za' yoban' chixjui' e xtižə' Cristən' cələ, leczə cuiayi'e.

⁹ Can' bagwnia' antslə, leczə can' chnia' n'a'a. Notə'əteza benə' chixjui'e de'en bito naquən lebe len dižə' güen dižə' cobə de'en chzejni'in che Cristən' de'en babsed blo'ito' le'e, Diozən' gone' par niç cuiayi'e zejlicane.

¹⁰ Echnia' ca' par niç yebei Diozən' len nada', caguə par niç yebei beṇəchən' nada', na' caguə par so'olažə'e can' chona' na'anə'. Žalə' chi' yichja' naclə gona' par niç so'olažə' beṇəchən' can' chona' bito chzenaga' che Cristən' žalə' ca'.

Diozən' gwleje' Pabən' par goque' apostol

¹¹ Benə' bišə', che'enda' ənezele de que dižə' güen dižə' cobə de'en chzejni'in che Cristən' de'en babe'elena' le'e bito naquən xbab che beṇəch.

¹² Caguə beṇəch na'anə' bzenene' nada' dižə' güen dižə' cobə de'en chzejni'in che Jesocristən' na' niqə əṇacho beṇəch na'anə' bene' ca gwyejni'ichda'an. Cuin Jesocristən' bzejni'ine' nada' dižə' güen dižə' cobən'.

¹³ Babenczele dižə' can' bena' antslə catə'an ne'e naogua' costombr che neto' benə' Izrael. Lechuale blagzejə blagzida' benə' ca' chso'onjilažə' Cristən', go'onda' yonitlaoga'aca'ane'.

¹⁴ Na' gwche'echgua' yichja' che costombr de'en gosə'ənao de'e xaxta'ogua'a ca' can' gwse'ejni'alažə'e Diozən', na' bichlə de'en gwso'one' gwsa'aque' par yebei Diozən' lega'aque' laogüe de'en gosə'ənaogüe'en. Bsdəcha' de'e ca' mazəchlə can' bosə'osed zan benə' Izrael ljuežja' ca' benə' ca' gwsa'aljə ca tyempən' golja'anə'.

¹⁵ Catə' cuiṇə' galja' Diozən' bsi'e xneze gona' xšine'ena'. Gwleje' nada' par gona'an cheda' nzi'ilažə'e nada'.

¹⁶ Na' catə' bžin ža ben Diozən' can' gwchoglaogüe'en gone', nach bzejni'ine' nada' de que Jeso'osən' naque' Xi'ine'. Bzejni'ine' nada' par niç chjətičjui'a xtižə'ena' len benə' ca' cui zjənaquə benə' Izrael. Na' dezd ža na' notono gwṇabba' əgwzejni'ine'en nada'.

¹⁷ Na' nic gwya'a Jerosalennə' par niç benə' ca' zjənaquə apostol antslə ca nada' yoso'osed yoso'olo'ine' nada' che Jeso'osən'. Zgua'atec gwya'a gan' nzi' Arabia, na' Arabia na' beza'a bežina' Damascon'.

¹⁸ Gwde šon iz gwya'a Damascon' nach gwya'a Jerosalennə' jəlaṇa'a Bedən' na' jsoa' len le' žda'obiž.

¹⁹ Pero bito bžaga' apostol ca' yeļa' sino tozə Jacob benə' bišə' Xənchon'.

²⁰ Nezcze Diozən' de que de' nga chzoja' le'e naquən de'e li.

²¹ Nach gwya'a yež ca' zjəchi' gan' nzi' Siria na' Silisia.

²² Na' ca naquə benə' ca' chesə'ədoṇə chesə'əžag chso'elaogüe'e Cristən' yež ca' zjəchi' gan' nzi' Jodea, bitonə' so'ombi'e nada' ca orən'.

²³ Con bazjənenene' rson de que bitoch chlagzejə chlagzida' benə' ca' chso'onjilažə' Cristən' na' de que bachyixjui'a xtižə'ena', len antslə go'onda' gona' ca yesə'əbejyichj benə' ca' len.

²⁴ Na' beṇə' Jodea ca' chso'onlilažə' Cristən' gwso'ela'oche' Diozən' de'en bachonlilažə'a Cristən'.

2

Apostol ca' yela' gwza'azlaže'e can' ben Pabən'

¹ Na' gwde žda' iz gwy'a Jerosalennə' nach gwy'a de'e yoblə len Bernaben', na' leczə gwchi'a Titon'.

² Diozən' bene' mendad ša'a, na' de'e na'anə' gwy'a. Na' btoba' beṇə' ca' zjənaquə' blao entr beṇə' ca' chso'elao' Cristən' Jerosalennə' na' lega'acze' bzejni'ida' bin' chyixju'i'a len beṇə' ca' cui zjənaquə' beṇə' Izrael catə'an cho'elena' lega'aque' dižə' güen dižə' cobə de'en chzejni'in che Cristən'. Bzejni'iga'acda'ane' bin' chsed chlo'ida' chedə' go'onda' əsa'azlaže'e de'en chsed chlo'ida' beṇə' ca' par nič ca' cui yesə'əne' de que bito bi zaquə' de'en chona' na' de'en babena'.

³ Ca goquən' bito cholə gwso'one' byen so beṇə' lježja' Titon' seŋy de'en ne' sirconsision, la'anə'əczə cui naque' beṇə' Izrael.

⁴ Goc ca' la'anə'əczə gwnitə' beṇə' gosə'əne' cheyalə' soe' seŋyən'. Gwnitə' beṇə' gosə'əlen beṇə' bišə'əcho ca' Jerosalennə' ca orən', parzə nič yesə'əgüie' šə naoto' costombr ca' de'en nyoj le'e lei che neto' beṇə' Izrael. Gwse'enene' gwso'one' byen yoguə' beṇə' so'onlilaže'e Cristən' yesə'ənaogüe' costombr ca' len la' nezecho chebe' Diozən' chio'o por ni che de'en chonlilažə'əcho Cristən', caguə por ni che šə choncho complir bi de'en na lein'.

⁵ Pero nada' na' Bernaben' ni latə'əzə bito bzenagto' che beṇə' ca'. Con gwzočhečtezəto' bento' par nič gaquə talenchle dižə' güen dižə' cobə de'en chzejni'in che Cristən' de'en babe'elento' le'e na' de'en naquə de'e li, sin cui bi bichlə gonle.

⁶ Na' beṇə' ca' gwsa'ac blao entr beṇə' ca' chso'onlilažə' Cristən' Jerosalennə', bito gwse'enene' gwša'a can' chsed chlo'ida' che Cristən'. Eni'a' ca' la'anə'əczə bito bi nonən len nada' šə gwsa'aque' beṇə' blao o šə cui gwsa'aque', la' par len Diozən' tozəczə can' zaquə' yoguə'əlol beṇə'.

⁷ Gwsa'ache'ine' de que Diozən' ngüe'e lao na'a əchyixju'i'a dižə' güen dižə' cobə de'en chzejni'in che Cristən' len beṇə' ca' cui zjənaquə' beṇə' Izrael can' ngüe'en lao na' Bedən' chyixju'i'en len beṇə' Izrael gwlaž cheto' ca'.

⁸ Diozən' len yelə' guac che'enə' chaclene' Bedən' par nič chyixju'i'e xtižə' Cristən' len beṇə' Izrael gwlaž cheto' ca'. Na' lecze'enə' chaclene' nada' len yelə' guac che'enə' par nič əchyixju'i'a xtižə' Cristən' len beṇə' ca' cui zjənaquə' beṇə' Izrael.

⁹ Jacobən' len Bedən' na' len Juannə' zjənaquə'che' beṇə' blao entr beṇə' ca' chəsə'ədopə chəsə'əžag chso'elaogüe'e Cristən' Jerosalennə'. Na' catə' lega'aque' gwsa'ache'ine' can' chaclen Diozən' nada' par chona' xšine'enə' nach gwso'oxe'e na'anə' len na' Bernaben' par boso'olo'e de que chsa'azlaže'e can' chonto' txen len lega'aque'. Na' gwsa'aquene' güenczən' gonto' xšin Diozən' entr beṇə' ca' cui zjənaquə' beṇə' Izrael na' lega'aque' so'one'en entr beṇə' Izrael gwlaž cheto' ca'.

¹⁰ Tozə de'en gwse'e neto' gonto', gaquə'elento' beṇə' yaša' ca' chso'elao' Cristən'. Na' de'e ličzə chi'ichgua yichja' gaquə'elena' beṇə' yaša' ca'.

Pabən' gwdi'le' Bedən' Antioquian'

¹¹ Na' gwdechlə gwy'a Antioquian'. Na' žlac zoa' na' bidə Bedən' gan' nitə' beṇə' ca' chəsə'ədopə chəsə'əžag chso'elaogüe'e Cristən' na' gwdi'la'ane' can' chone', chedə' bla'alaon chone' de'e mal.

¹² Quingan' goquə catə' ze'e bžine' Antioquian', gwzolaogüe' che'ej chaogüe' txen len beṇə' ca' chso'onlilažə' Cristən' la'anə'əczə cui zjənaquə' beṇə' Izrael, pero gwdechlə catə' besə'əžin beṇə' Jerosalen ca' beṇə' ca' bselə' Jacobən', bitoch gone'ene' ye'ej gaogüe' txen len beṇə' ca' cui zjənaquə' beṇə' Izrael. Bžebe' bi yesə'əna beṇə' ca' chso'on xbab de que notə'ətezə beṇə' chonlilažə' Cristən' cheyalə' soe' seŋy de'en ne' sirconsision.

¹³ Nach beṇə' Izrael ca' yela' nitə' Antioquian' chso'onlilaže'e Cristən' leczə besyə'əbiže'e cuich əgwse'ej əgwsa'ogüe' txen len beṇə' ca' cui zjənaquə' beṇə' Izrael, na' gosə'əgo'oye'le'e Bernaben' par nič lencze' bebiže'e. Na' besyə'əbiže'e parzə nič yesyə'əbei beṇə' Jerosalen ca' lega'aque', la'anə'əczə gosə'əneze'ne' naquən güen əse'ej əsa'ogüe' txen len beṇə' ca' cui zjənaquə' beṇə' Izrael.

¹⁴ Gocbe'ida' bitoch chso'one' can' cheyalə' gon chio'o nombi'acho dižə' güen dižə' cobə de'en chzejni'in che Cristən' na' de'en naquə de'e li. De'e na'anə' gwdi'la' Bedən' lao yoguə' beṇə' ca' chəsə'ədopə chəsə'əžag chso'elaogüe'e Cristən', goža'ane': "Le' naco' beṇə' Izrael, pero bagwlejyichjo' costombr che chio'o beṇə' Izrael par chono' txen len beṇə' ca' cui zjənaquə' beṇə' Izrael. De'e na'anə' bito cheyalə' gono' byen so'on beṇə' ca' cui zjənaquə' beṇə' Izrael can' na costombr che chio'o beṇə' Izrael."

Con beṇə' chso'onlilaža' Jesocristən' zjənaque' beṇə' güen lao Diozən'

¹⁵ Neto' goljəto' naquəto' beṇə' Izrael, na' bito goljəto' entr beṇə' ca' cui chso'elao' Diozən'.

¹⁶ Diozən' bito əne' de que naccho beṇə' güen laogüe'ena' por ni che bi de'en choncho. Con beṇə' ca' chso'onlilaža' Jesocristən' zjənaque' beṇə' güen lao Diozən'. Lenczə neto' bachonlilaža'əto' Cristən' par ničh Diozən' ne' cheto' de que banaquəto' beṇə' güen laogüe'ena'. Bito ne' ca' che notə'ətezcho por ni che šə choncho bi de'en na lein' goncho.

¹⁷ Na' notə'ətezə chio'o naccho beṇə' Izrael, antslə ze'e əna Diozən' de que naccho beṇə' güen laogüe'ena', bzejni'ine' chio'o de que tozə ca beṇə' malən' naccho len yeziquə'əchlə beṇə' güen de'e mal ca', pero la'əṇə'əczə bzejni'ine' chio'o de que tozə ca beṇə' malən' naccho len yeziquə'əchlə beṇə' güen de'e mal ca' bito əṇacho de que Crist nan' bene' par ničh naccho beṇə' mal. Na' šə can' chaquecho lechgualə clelən' choncho xbabən'.

¹⁸ Chio'o babechojcho xni'a costombr ca' de'en zjənyoj le'e lei chechon' na' šə yozo cuincho xni'aga'aqueina' de'e yoblə, le'e nachbia'ate de que de'e malən' choncho.

¹⁹ Lein' chzejni'in chio'o de que naccho beṇə' mal par ničh nezecho bito naccho beṇə' güen lao Diozən' por ni che de'en choncho bi de'en na lein'. Na' ṇa'a chio'o chonlilaža'əcho Cristən' con yo'o yichjcho sotezə socho gwzenagcho che Diozən'.

²⁰ Nada' nezda' de que ndil'ngoda't xten len Cristən' catə'ən gwso'ote'ene' le'e yag corozən'. Na' bitoch zoa' to gwłaza' sino Cristən' zolene' nada'. Na' de'en chona' ṇa'a chona'an con can' na Xi'in Diozən' ben' chonlilaža'a. Len' chaqueene' checho na' bnežjw cuine' gwso'ote'ene' por ni checho.

²¹ Diozən' nzi'ilaza'e chio'o na' bsele'e Cristən' par ničh gonlilaža'əchone' na' gaccho beṇə' güen lao Diozən'. Na' bito che'enda' gwzoa' ca'alə de'en bene' ca', gaquəda' de que por ni che bi de'en chona' naca' beṇə' güen lao Diozən'. Žalə' por ni che de'en choncho bi de'en na lein' əna Diozən' de que naccho beṇə' güen laogüe'ena' bito byažjən əgwnežjo cuin Cristən' por ni checho žalə' ca'.

3

Naccho beṇə' güen lao Diozən' chedə' chonlilaža'əcho Cristən', caguə por ni che de'en choncho complir can' na lein'

¹ Le'e beṇə' Galasia, nchöl' yichjla'ažda'olen' ca de'en baboso'oṅoayag beṇə' le'e par chaquele cheyałə' naole costombr ca' de'en na lein'. Clar juisy babzejni'ida' le'e can' gwso'ote' Cristən' le'e yag corozən' por ni checho.

² De'e ngazən' chṇabda' le'e: ¿Ezo Spirit che Diozən' lo'o yichjla'ažda'olen' por ni che de'en chonle complir can' na lein'? Bito, sino zon lo'o yichjla'ažda'olen' por ni che de'en bachonlilaža'əle Cristən'.

³ Spirit che Diozən' zon lo'o yichjla'ažda'olen' dezd catə'ən gwzolao chonlilaža'əle Cristən'. Na'alje žade'e tant nchöl' yichjla'ažda'ole na'anə' chaquele chyažjən so seṇyan' lao cuerp chelen' par yeyož gonle can' chene'e Diozən'?

⁴ De'e zan de'e baboso'ochi' bosos'osaquə' beṇə' le'e laogüe de'en chonlilaža'əle Cristən'. Na' žbixa parən' bguo'o bchejlaža'əle len de'e ca' šə ṇa'a sole seṇy de'en ne' sirconsision? Pero bitolja əṇacho de que sole seṇyan', la' šə solen cuejyichjle de'en chonlilaža'əle Crist na'anə'.

⁵ Nezczele de que Diozən' babene' Spirit che'ena' zon lo'o yichjla'ažda'olen' na' chone' miłagr entr le'e, chedə' bachonlilaža'əle Cristən' na' bachzenagle che', caguə chac ca' por ni che de'en chonle complir bi de'en na lein'.

⁶ Na' ca'aczən' nyoj Xtizə' Diozən' cho'en dižə' che de'e Abraannə' nan de que benlilaže'e Diozən' na' de'e na'anə' Diozən' gwne' che' de que naque' beṇə' güen laogüe'ena'.

⁷ Cheyałə' ənezele de que yoguə' beṇə' chso'onlilaža' Diozən' can' benlilaža' de'e Abraannə' le', lao Diozən' zjənaque' xi'in dia che de'e Abraannə'.

⁸ Diozən' bsi'e xneze par ničh chone' len le'e cui nacle beṇə' Izrael can' chone' len neto' beṇə' Izrael, ca de'en ne' che notə'ətezcho chonlilaža'əchone' de que naccho beṇə' güen laogüe'ena'. De'e na'anə' gože' de'e Abraannə' dižə' güen dižə' cobə'nga: "Gona' güen len beṇə' ca' ža' yoguə' ṇasyon, beṇə' ca' so'onlilaža' nada' can' chonlilažo'o nada'."

⁹ Na' can' naquən, Diozən' chone' güen len beṇə' ca' chso'onlilaža' le' can' bene' güen len de'e Abraannə' por ni che de'en benlilaža' de'e Abraannə' le'.

¹⁰ Na' notə'ətezə beṇə' chon xbab de que gague' beṇə' güen lao Diozən' por ni che šə chone' bi de'en na lei de'en bzoj de'e Moizezən', de'e mal juisy gaquə che' šə ca', chedə' notono no yesə'əzoi par so'one' cayaṇə'n nannə'. Can' nyoj Xtizə' Diozən' nan: "De'e mal juisy gaquə che notə'ətezə beṇə' šə cui ni'tə'ətezə ni'te'e so'one' complir yoguə'əloł can' na lein' dote tyemp'."

¹¹ Na' Xtizə' Diozən' nyojən nan: "Diozən' ne' che beṇə' chso'onlilaža' le' de que zjənaque' beṇə' güen laogüe'ena', na' de'e na'anə' guatə'əczə yelə' mban chega'aque' zejlicane." Na'

de'en nan ca' nezecho de que Diozæn' bito æne' che notá'atezcho de que naccho beñá' güen laogüe'ena' por ni che ša choncho bi de'en na lein' goncho.

¹² Beñá' zan chsa'aque' so'one' can' na lein' sin cui chso'onlilaže'e Diozæn', con yo'o yichjga'aque' de'en nan: "Notá'atezə beñá' chon cuaselol can' na lein' gaquə bane' zejlicane."

¹³ Cristan' gwduxjue' xtolə'əchon' par nich ca' cui gaquə de'e mal juisy checho ca de'en cui choicho par goncho cuaselol can' na lein'. Bnežw cuine' goc de'e mal juisy che' lgua' a chio'o. Goc che' can' nyojən nan: "De'e mal juisy chac che notá'atezə beñá' chso'ote' choso'ode'ene' le'e yag."

¹⁴ Goc ca' par nich lenczə beñá' ca' cui zjənaquə beñá' Izrael so'onlilaže'ene' na' nite'e mbalaz ca mbalazæn' gwzo de'e Abraannə' laogüe de'en benlilaže'e Diozæn'. Na' chio'o chonlilažə'əcho Jesocristán' ža, Diozæn' bsele'e Spirit che'ena' zon lo'o yichjla'ažda'ochon' can' bene' lyebe.

Lei de'en bzoj de'e Moizezæn' na' lyebe de'en ben Diozæn' len de'e Abraannə'

¹⁵⁻¹⁶ Ca naquə Diozæn' bene' lyebe len de'e Abraannə' can' gone' güen len xi'in dia che'ena', be'e dižá' che tozə xi'in dia che de'e Abraannə', na' che Crist nan' be'e dižə'an ca'. Beñá' bišə', quingan' naquən len notá'atezə beñá' choso'ozá' yiš, catá' babeyož bosó'oze'en bito gaquə əna toe' de que cui gone' can' nannə' na' bito gaquə gwzanch yetoe' can' nannə'.

¹⁷ Na' lyebe de'en ben Diozæn' len de'e Abraannə' ža, gwxaquə'əleben ca to yiš de'en choso'ozá' beñá', chedə' la' Diozæn' bito gwše'e can' bene' lyebe len de'e Abraannə'. Ne'e choncze' con can' gože'ene'ena'. Na' bagwde tap gueyoa šichoa iz ben Diozæn' lyebe len de'e Abraannə' nach bene' par nich bzoj de'e Moizezæn' lei che'ena'. Na' la'əna'əczə Diozæn' bnežjue' lein' bito anacho cuich gone' can' bene' lyebe len de'e Abraannə'.

¹⁸ Žalə' Diozæn' ne' de que beñá' ca' chso'on cuaselol can' na lein' zjənaque' beñá' güen, bito chaclene' beñá' can' bene' lyebe gaqualene' žalə' ca'. Pero cuine'en ne' che chio'o chonlilažə'əchone' de que naccho beñá' güen laogüe'ena' por ni che lyebe de'en bene' len de'e Abraannə'.

¹⁹⁻²⁰ Leczə byažje lei de'en bzoj de'e Moizezæn'. Diozæn' bnežjue'en par beñá' ca' gwnitə' bedote catə'an cuinə' yidə Cristæn' par nich gwsa'ache'ine' de que chso'one' contr can' non Diozæn' mendad so'one'. Cristæn' golje' lao dia che de'e Abraannə' na' che le'ena' be' Diozæn' dižá' catə'an bene' lyebe len de'e Abraannə'. Na' ca naquə lein' Diozæn' bene' par nich angl ca' bosó'onežjue'en de'e Moizezæn'. Na' Diozæn' bchine' de'e Moizezæn' par bzejni'ine' beñá' Izrael ca' can' na lein'. Pero catə' ben Diozæn' lyebe len de'e Abraannə' notono no bchine' par əgwzejni'ine' de'e Abraannə'.

Lein' chzejni'in chio'o de que choncho de'e mal

²¹ Na' bito cheyalə' goncho xbab de que lei de'en bzoj de'e Moizezæn' chonən contr can' non Diozæn' lyebe gone'. Pero lein' bito gaquə yocobən yichjla'ažda'ochon'. Žalə' gaquə yocobən yichjla'ažda'ochon' guaquə goncho can' na lein' nach gaccho beñá' güen lao Diozæn' žalə' ca'.

²² Pero Xtizə' Diozæn' de'en nyojən nan de que yoguə'əlol benachən yesə'əči'e castigw zejlicane por ni che xtolə'əga'aque'ena'. Na' nyojən ca' par nich con beñá' so'onlilažə' Jesocristán' bito yesə'əzi'e castigon', sino gaquə güen chega'aque' can' ben Diozæn' lyebe len de'e Abraannə'.

²³ Ca naquə neto' beñá' Izrael catə'an bitonə' əgwzejni'i Diozæn' neto' de que cheyalə' gonlilažə'əto' Cristæn', nchoglaon cheto' de que si'ito' castigw zejlicane chedə' nombi'ato' lei de'en bzoj de'e Moizezæn' na' bito chonto' can' nannə'.

²⁴ Par neto' lein' gwxaquə'əleben ca to mos əznia beñá' chgüia chye' xi'in beñá', de'e zan de'e che'əbo' gombo' len de'e cui gombo'. Pero na'a babidə Cristæn' na' baltezəto' chonlilažə'əto'one' Diozæn' ne' de que naquəto' beñá' güen laogüe'ena' na' can' ne' che notá'atezcho.

²⁵ Na' de'en babidə Cristæn' bitoch gwxaquə'əlebe lein' ca to mos əznia par neto' beñá' Izrael, neto' bachonlilažə'əto'one'.

²⁶ Yoguə' chio'o chonlilažə'əcho Jesocristán' naccho xi'in Diox.

²⁷ Na' notá'atezcho šə bagwchoacho nisən' par blo'echo de que ngodə'əcho txen len Jesocristán', bachzolao chac yichjla'ažda'ochon' can' naquə yichjla'ažda'ogüe'ena'.

²⁸ Na' tozəczə can' zaquə'əcho lao Diozæn' šə naccho beñá' Izrael o šə cui naccho, šə naccho beñá' esclabo o šə cui naccho, na' šə naccho beñá' byo o šə naccho no'olə. Yoguə'əcho banaccho tozə laogüe de'en ngodə'əcho txen len Jesocristán'.

²⁹ Na' de'en ngodə'əcho txen len Jesocristán', lao Diozæn' naccho xi'in dia che de'e Abraannə' na' len chio'onə' gon Diozæn' güen can' bene' lyebe gone' len xi'in dia che de'e Abraannə'.

4

1 To beṇə' gwni'a šə zo xi'ine', bi'inan' si' byen che'ena'. Pero na' žlac ne'e nacho' bidao' bito nacho mbalazəch chac chebo' cle ca che to mos la'anə'əczə gwžin ža gaquə lao na'abo' yoguə' de'en de che xabo'onə'.

2 Beṇə' ca' nita' lo'o yo'o ližbo'onə' ne'e choso'ogüia choso'oye'ebo' na' ne'e chesa'anabi'ebo' žlac cuiṇə' cha'obo' na' žlac əžin ža co'o xabo'onə' lao na'abo' de'en deine'ena'.

3 Can' goquə len neto' beṇə' Izrael, žlac cuiṇə' yida' Cristən' gwxaquə'əlebetə' ca xi'in beṇə' gwnia'anə'. Diozən' bene' mendad naoto' yoguə'əlo' costombr de'en na lein'. Na' de'e na'anə' par neto' lein' gwxaquə'əleben ca beṇə' ca' chəsə'anabia' xi'in beṇə' gwni'anə' žlac cuiṇə' žin ža si'ibo' de'en de che xabo'onə'.

4 Pero catə' bžin ža bžia Diozən' bia' bsele'e Xi'ine'ena' yežlyo nga, gwxa to no'olə le'. Na' Xi'in Diozən' leczə bzenague' che lein'.

5 Na' le'ena' bedəyene' par ničh yoguə' chio'o chonžilažə'əchone' zocho mbalaz ca mbalazən' so xi'in beṇə' gwni'anə' catə'an əžin ža gaquə lao na'abo' byenna'. Cristən' bedəyene' par ničh nezecho bitoch chonən byen naocho costombr ca' de'en zjənyoj le'e lei che neto' beṇə' Izrael.

6 Na' de'en bagwcuə' Diozən' chio'o ca xi'ine', babsele'e Spirit che'ena' zon lo'o yichjla'ažda'ochon' de'en leczə naquə Spirit che Xi'ine' Cristən'. Na' Spiritən' chaclenən chio'o par ničh cholgüižcho Diozən' che'echone': "Xa."

7 Diozən' bagwcuə'e chio'o ca xi'ine' caguə par cue'e yichjcho costombr ca' de'en non lein' mendad. Gwcue'e chio'o ca xi'ine' par ničh chac güen checho can' bene' lyebe gaquə che xi'in dia che de'e Abraanna'.

Pabən' chi' yichje' naquan' chso'on beṇə' ca' chso'onžilažə' Cristən'

8 Antslə catə'an cuiṇə' gombi'ale Diozən' gweyeni'alaza'əle bi de'e ca' cui zjəzaquə' par šejni'alaza'əcho, na' lega'aquan gos'anabi'an xbab chelen'.

9 Pero na'a banombi'ale Diozən' o šə güench ənacho de que Diozən' banombi'e le'e. Chebachgüeida' chele de'en chebiguə'əle gosxanə na' bachezo cuinle xni'a costombr ca' che biquə' de'en ye'ej gaocho, che ža ca', na' che cuerp chechon'. Costombr ca' bito gwsa'aquan par yesyə'əbejan chio'o xni'a de'e malən' na' leczə caguə bi zjəzaquə'an na'a par əsa'aclenən chio'o.

10 Bagwzolaə naole costombr che neto' beṇə' Izrael che lni ca', che ža ca', che bio' ca', che tyemp ca' na' che iz ca'.

11 Chžeba' šə cuich əgwzenagle che de'en babsed blo'ida' le'e, la' šə cuich gwzenagle chei, cuiayi' de'en bena' entr le'e.

12 Beṇə' bišə', chatə'əyoida' le'e gonle can' babena' nada' de'en babchoyichjla' costombr che neto' beṇə' Izrael de'en zjənyoj le'e lein' ničh zoa' chona' žin entr le'e: Na' ca' naquə bedəsoa' len le'e bito nacho de que babenle mal len nada'.

13 Nezczele chacšenda' de'en bida' de'e neche, na' gwdixjui'a dižə' güen dižə' cobə de'en chzejni'in che Cristən' len le'e.

14 Na' de'en chacšenda' ca orən' zaquə'an par gue'ile nada', pero bito bgue'ile nada', sino bzenagcze xtiža'anə'. Na' do yichj do lažə'əle bgüialaole nada' ca'aczə chgüialaogüe to angl che Diozən' o ca'aczə cuin Jesocristən'.

15 Mbalaz gwzole de'en benle ca' len nada', na' žbixchen' cuich chonle ca' na'a ža? Nežda' de'e tant goquele chia' xte bebeile bzanele bitə'ətezə de'en deile na' lente cuinle par goclenle nada'.

16 ŽEpor ni che de'en cho'elena' le'e dižə' lin' bachaquele de que naca' beṇə' contr chele ža?

17 Beṇə' ca' choso'osed choso'olo'i le'e na'a lechguale zjəchi' yichjga'aque' le'e, pero caguə par ničh so'one' güen len le'ena' sino par ničh yesyə'əbeje' le'e cuich gonle txen len neto'onə' na' par ničh cue'e yichjle lega'acze'ena'.

18 Naquəczən güen yesə'əbe'eyichj beṇə' le'e do tyempte, caguə catə'əzən' zoa' len le'e na' con šə so'one' güen len le'e.

19 Xi'indaogua'a, de'e yoblə chžaglaogua'a lo'o la'ažda'ogua'anə' por ni che le'e can' chžaglaə to no'olə beṇə' chzan, na' əžaglaochca' xte catə'əch gaquə yichjla'ažda'olen' can' naquə yichjla'aždao' Cristən'.

20 Žalə'əšga zoa' len le'e na'a, nža'alə can' gaquə nia' le'e. De'e li lechguale chaczejlaža'a chele.

De'e Agar na' de'e Sarən'

21 Le'e chene'ele naole costombr che neto' beṇə' Izrael de'en zjənyoj le'e lei de'en bzoj de'e Moizežən', žəbitonə' yenele can' na de'en nyožənnə'?

22 Nan de que gwnitə' čopə xi'in de'e Abraanna' bi'i byo, tobo gwxa to no'olə naquə esclabo che' na' yetobo' gwxa no'ol checze' no'olan' bito naquə esclabo.

²³ Na' bi'in gwıxan no'olá esclabon' goljbo' chedá' gwzolen de'e Abraanná' le' pero bi'in gwıxan no'ol chęczęe' goljbo' chedá' Diozán' bene' par niçh goc complir can' bene' lyebe de que sane' la'ana'ęczęe' naque' beńa' güiż.

²⁴ Na' de'en goc che no'ol ca' chzejni'in chio'o che chopte lyebe de'en ben Diozán' naclán' gaquálene' beńa' Izrael ca'. No'olá esclabo ben' le Agar gwıxaquá'álebene' ca lei de'en ben Diozán' mendad bzoj de'e Moisezán'. Bzoje'en par de'e xaxta'o neto' beńa' Izrael lao ya'a Sinain' beńa' ca' gwıxaquá'álebe ca esclabos.

²⁵ Na' doxen nasyon Izraelán' gwıxaquá'áleben ca de'e Agaran' no'olá esclabo che de'e Abraanná'. Diozán' bneżjue' de'e xaxta'oto' ca' lein' lao ya'a Sinain' gan' nzi' Arabia, na' xte ža neža beńa' Izrael gwılaż chęto' ca' zjanaque' ca esclabos chedá' chsa'aquene' chonán byen yesá'anaogüe' yoguá' costombr ca' de'en na lein'.

²⁶ Pero yoguá' chio'o chonlilažá'ęcho Cristán', babozoe' chio'o binlo len Diozán', na' naquan to goclen de'en bene'. De'e na'aná' nezecho bito chonán byen naocho costombr ca' de'en na lein'.

²⁷ Diozán' bene' par niçh to profet beńa' be' xtiže'ena' cana' bzoje'en de que beńa' zanch so'onlilažá' Cristán' cle ca beńa' ca' yesá'anao costombr ca' de'en na lein'. Na' quinga na de'en bzoje'ena'.

Bebei no'olá güiż, no'olá cui no chzan,

Bisya'a yelá' chebei chio', le' cuińa' gaco' bes che yelá' sanná', chedá' sano' bi'i zan.

Na' le' cui no xi'ino' ne'e so,

Nitá'ęch xi'ino' cleza can' nitá' xi'in no'olán' bagwıxan to xi'in be'en chio'oná'.

²⁸ Ca naquá' Isaaquán' xi'in de'e Abraanná' goljbo' por yelá' guac che Diozán' chedá' can' bene' lyebe len de'e Abraanná'. Le'ęgatež ca' chio'o ža, por yelá' guac che Diozán' na'aná' bachone' chio'o cuent ca xi'in dia che de'e Abraanná' chedá' can' bene' lyebe gone'.

²⁹ Bi'i che de'e Agaran', bi'in goljþa por ni che de'en gwzolen de'e Abraanná' le' blagzejþa blagzidbo' Isaaquán' bi'in ben Spirit che Diozán' par gwıxan de'e Sarán' no'olán' goquá beńa' güiż. Le'ęgatež ca' ža neža beńa' Izrael ca' chesá'anao costombr ca' de'en na lein' choso'olagzejþa choso'olagzide' chio'o chonlilažá'ęcho Cristán'.

³⁰ Na' Xtižá' Diozán' de'en nyoþan nan de que Diozán' gože' de'e Abraanná': "Bebei no'olá esclabon' len bi'i che'ena', chedá' bi'i che'ena' bito ęgwneżjua'abo' de'en nona' lyebe ęgwneżjua' bi'in gwıxan no'ol chio'oná'."

³¹ De'e na'aná' beńa' biša' nezecho laogüe de'en chonlilažá'ęcho Cristán' gwıxaquá'álebecho ca xi'in de'e Sarán' no'olán' bito goquá esclabo, caguá ca xi'in de'e no'olá esclabon'.

5

Bito chonán byen naocho costombr de'en na lein'

¹ Catá'an benlilažá'ęcho Cristán' le' bebeje' chio'o lao yoguá' de'en choncho chaquecho chebei Diozán' chio'o laogüe de'en chonchon'. De'e na'aná' bito anacho yebeiche Diozán' chio'o ša naocho costombr ca' can' na lei che neto' beńa' Izrael.

² Nada' Pab achnia' le'e to de'e žialao. Ša sole seńy de'en ne' sirconsisionńa' na'a bachonlilažá'ále Cristán', bito bibi zaquá'an de'en bagwzolao chonlilažá'álene' ša ca'.

³ Echnia' clar de que notá'ętezþa beńa' soe' seńy de'en ne' sirconsision, leczþa cheyalá' gone' complir yoguá'ęlol bitá'ętezþchlá de'en na lein'.

⁴ Na' ša chaquele gonle cuasełol can' na lein' par niçh gacle beńa' güen lao Diozán', bachzole Cristán' ca'ala ša can' chaquele, na' bitoch chonle cas can' nzi'ilažá' Diozán' chio'o.

⁵ Chio'o chonlilažá'ęcho Jesocristán' zo Spirit che Diozán' lo'o la'azda'ochon' na' chonán ca banezecho de que Diozán' ęne' naccho beńa' güen laogüe'ena' catá' yežincho gan' zoe'ena'.

⁶ Ca naquá' chio'o chonlilažá'ęcho Jesocristán' bito bi nonán len Diozán' ša socho seńy de'en ne' sirconsision, o ša cui zochon. La' de'en naquá' de'e žialao xen len Diozán', sotežþa socho gonlilažá'ęcho Cristán' na' gaquecho che ljezejþcho par niçh gachia' de que chonlilažá'ęchone'ena'.

⁷ To tyemp babenle can' chebei Diozán', pero na'a chebanda' babe'ele latjþa chasa'ęžon beńa' cuich naole de'en naquá' de'e lein'.

⁸ Dioz ben' gwlej le'e par nacle xi'ine', bito naocho le'ena' chone' par niçh chzenagle che beńa' ca'.

⁹ Na' de'en bachzenagle che consejw malán' yobęch ęgwzenagle che bitá'ętezþchlá de'e chon contr xtižá' Diozán'. Chonle can' na dicho nga: "Latá'ęžþ xna' cuazin' chonán par niçh cheyas doxen cuazin'."

¹⁰ Pero na' zoa' lez gon Xancho Jesocristán' par niçh yezolao naole de'e ca' babzejni'ida' le'e. Na' notá'ętezþ žjanaquá beńa' ca' chso'on par niçh chaczejlažá'ále, Diozán' ęgwneżjue' castigw chęga'aque'.

¹¹ Na' ca naca' nada', nita' beṇə' chəsə'əne' chsed chlo'ida' de que yoguə' chio'o chonlilažə'əcho Cristən' cheyałə' socho señy de'en ne' sirconsision. Bitolja zjənlagzejə zjənlagzidə beṇə' nada' žalə' chsed chlo'ida' ca'. Len bito gaquə zdebə no gwzenag žalə' ca', cheda' bitoch gonən byen so'onlilažə'e Cristən' ben' gwsə'ote' boso'ode'ene' le'e yag corozən'.

¹² Yebeichləda' žalə' beṇə' ca' chso'on par ničh chaczejlažə'əle šə chebei Diozən' le'e de'en cui zole señyən' yesə'əchog cuinga'aque' yelata'.

¹³ Beṇə' bišə', Diozən' gwleje' chio'o par chonlilažə'əcho Cristən'. De'e na'anə' bitoch chonən byen naocho costombr ca' can' na lei che neto' beṇə' Izrael. Pero bito de lsens goncho bitə'ətezə de'e mal de'en na la'ažda'omalchon' goncho. De'en chene'e Diozən' goncho, gaque che ljuējzcho na' gaquəlen ljuējzcho tocho yetocho.

¹⁴ Na' bazoczcho choncho yoguə'əlol can' na lein' šə choncho can' nyojən nan: "Goque che sa'aljuējzjo' catg chaque che cuino'."

¹⁵ Pero šə chacyožə ljuējzcho o chdiləlen ljuējzcho chžiai'i'cho de'en non Diozən' par naccho toza.

Can' goncho šə gwzenagcho che Spirit che Diozən'

¹⁶ De'en naquə de'e žialao xen goncho, cheyałə' sotezə socho goncho can' chene'e Spirit che Diozən'. Na' šə goncho ca' bito gwzenagcho che la'ažda'omalchon'.

¹⁷ Cata' chzenagcho che la'ažda'omalchon' bito cho'en latjə əgwzenagcho che Spirit che Diozən'. Na' ca naquə de'en chene'e la'ažda'omalchon' goncho naquən contr de'en chene'e Spirit che Diozən'. Pero šə choncho can' chene'e Spirit che Diozən', bito choncho can' na la'ažda'omalchon'. Na' de'en zo Spiritən' len chio'o bito choncho can' goncho žalə' cui zon len chio'o.

¹⁸ Na' šə chzenagcho che de'en chsed chzejni'i Spirit che Diozən' chio'o goncho, bitoch naocho costombr ca' de'en na lei de'en bzoj de'e Moizezən'.

¹⁹ Šə chzenagcho che la'ažda'omalchon' choncho nota'ətezən de'e mal quinga: Chbejyichjo no'ol checho o be'en checho par chzolencho beṇə' yoblə; chgo'o xtocho; chebeicho bichlə de'e yelə' zto' de'en zjənac ca';

²⁰ chejni'alažə'əcho lguə'a lsaquə'; naocho de'en chso'on beṇə' ca' chesə'ənelen de'e xio'; bito zocho binlo len ljuējzcho; chdilə chšəšcho; chgue'i ljuējzcho; chloccho; chi' yichjcho gaquə güen che cuinzcho sin cui choncho xbab nac gaquə che ljuējzcho; naccho beṇə' gotil; bito choncho txen len ljuējzcho;

²¹ chzelažə'əcho bi de'en de che beṇə' yoblə; chotcho beṇə'; naccho beṇə' güe'e zo; chlencho no lni gan' chac scandl; na' choncho bichlə de'e mal de'en zjənaquə ca de'e mal quinga bagwnia'. Na' de'e yoblə chnia' le'e can' bagwnia'acza' antslə, bito yežincho yoban' gan' zo Diozən' chnabi'e šə choncho de'e mal ca' zjənac ca'.

²² Na' šə chzenagcho che Spirit che Diozən', goncho yoguə' de'e quinga: Gaquecho che ljuējz beṇəchcho; socho mbalaz de'en nombi'acho Diozən'; socho binlo len xbab de'en yo'o lo'o yichjla'ažda'ochon'; gapcho yelə' chxenlažə' len ljuējz beṇəchcho bitə'ətezə de'en chso'onene' chio'o; goncho güen len beṇə' yeziqə'əchlə na' əži'ilažə'əga'acchone'; goncho complir šə bin' ye'echo beṇə' goncho;

²³ gaccho beṇə' gaqxwlažə'; bito güe'echo latjə ṇabia' la'ažda'omalchon' chio'o. Na' šə bachzenagcho che Spirit che Diozən', bito bi bi lei de de'en əṇa choncho de'e mal.

²⁴ Na' chio'o bangodə'əcho txen len Cristo Jeso'osən' bitoch cho'echo latjə ṇabia' la'ažda'omalchon' chio'o par goncho bi de'en chzelažə'ən.

²⁵ Spirit che Diozən' babəṇən yelə' mban zejlicəne chechon', na' de'e na'anə' cheyałə' socho goncho can' chene'əṇṇə'.

²⁶ Na' bito cheyałə' gon cuincho xen gaquecho lechguale chebei Diozən' chio'o, la' šə goncho ca' yesə'əža'a beṇə' ljuējzchon' chio'o na' yesə'əgue'ine' chio'o.

6

Cheyałə' gaquəlen ljuējzcho

¹ Beṇə' bišə', šə to beṇə' ljuējzchon' babxope' bene' to de'e mal, chio'o chzenagcho che Spirit che Diozən' cheyałə' gaquəlenchone' par ničh yezo'e binlo len Diozən' de'e yoblə. Na' güe'echone' consejw dižə' šao' əžjsə'alažə'əcho de que leczə ca' chio'o nxož əxopcho goncho de'e malən'.

² To tocho cheyałə' gaquəlen beṇə' ljuējzcho ca' bitə'ətezə de'e chsa'ac chega'aque'. Šə goncho ca' goncho complir can' chene'e Cristən' gonchon'.

³ Na' šə goncho xbab de que naccho beṇə' blao len cui naccho, chxəoyagzə cuinchon' šə ca'.

⁴ To tocho cheyałə' goncho xbab šə de'en babenchon' naquən de'e güen o de'e mal. Na' yebeicho šə babencho de'en naquə güen, pero bito goncho xbab de que güench chon chio'o clezə ca beñə' yoblə.

⁵ La' to tochon' choglaio Diozən' checho šə bencho güen o šə bencho mal.

⁶ Šə no choso'osed choso'olo'i chio'o xtižə' Diozən', bito goncho rgüin len lega'aque'. Cheyałə' əgwnežjoga'acchone' lata' šə bi de'e šao' de'e güen de'e de checho.

⁷ Bito güe'ele latja no əxoayag le'e, bito gaquə əgwzochio Diozən' ca'alə. La' segon de'en chonchon' gone' par niç socho mbalaz o par niç si'icho castigw. Can' chac, con de'en chazcho nan' chelapcho.

⁸ Ben' chon con can' chene'e la'ažda'omale'ena' gwžin ža cuiayi'e zejlicane, pero ben' chon can' chene'e Spirit che Diozən', Spiritən' gonən par niç əbane' zejlicane.

⁹ Na' bito cheyałə' žjəxaquə'aləžə'əcho par goncho de'e güenna', chedə' la' gwžin ža catə' Diozən' gone' par niç socho mbalaz juisy, con šə cui cuejyichjo goncho can' chene'ene'ena'.

¹⁰ Cheyałə' goncho güen len yoguə'əloł beñə' batə'ətezə zo latja, pero mazəchlə cheyałə' goncho güen len yeziquə'əchlə beñə' chso'onlilažə' Cristən'.

Yeto chopə de'en che' Pabən' lega'aque'

¹¹ Le'e güiašč letr cha'o quinga, la' cuina'an chzoja'an le'e.

¹² Beñə' ca' chso'on byen sole señy de'en ne' sirconsision chso'one' ca' chedə' chse'enene' yesyə'əbei beñə' lega'aque' šə baboso'ozoe' le'e señyan'. Chso'one' byen solen par niç cui no gwlagzejə gwlagzidə lega'aque' can' choso'olagzejə choso'olagzidə beñə' neto' laogüe de'en chzeneto' ca naquən' bnežjw cuin Cristən' gwso'ote'ene' le'e yag corozən' por ni checho.

¹³ Beñə' ca' zjəzo señy de'en ne' sirconsisionə' zjəchi' yichjga'aque' lei de'en bzoj de'e Moizezən', pero ni lega'aque' cui chso'one' can' nannə'. Con chse'enene' sole señyan' par niç əso'elao' cuinga'aque' na' yesyə'əbei beñə' lega'aque'.

¹⁴ Ca naca' nada', bitoczə güe'elao' cuina', na' bitobi nonən len nada' šə beñəchən' yebeine' nada'. Güe'ela'ogua'a Xancho Jesocristən' na' le'ena' che'enda' yebeine' nada'. De'en nezda' bnežjw cuine' gwso'ot beñə' le' le'e yag corozən' por ni checho bitobi nonən len nada' šə beñəchən' yesyə'əbeine' nada'.

¹⁵ Nezda' bito bi nonən šə zochio señy de'en ne' sirconsisionə' o šə cui zochon, pero de'e zaquə'əchgüei de'en babocobə Diozən' yichjla'ažda'ochon'.

¹⁶ Chio'o naccho doaljə beñə' Izrael' lao Diozən' šə bachonlilažə'əcho Jesocristən' na' šə cuich naocho costombr de'en zjənyoj le'e lein'. Na' le'e šə bachi' yichjle tlozə can' chene'ene'ena', Diozən' gonšgue' par so cuezəchle binlo len xbab de'en yo'o lo'o yichjla'ažda'olen' na' soteze' yeyašə' yeži'ilaže'e le'e.

¹⁷ Na' par delant bitoch bi xbab clelə gonle che de'en babzoja' le'e. Legwzenag chia' chedə' cuerp chia'anə' nsa'an yiž che de'en baboso'ochi' baboso'osakuə' beñə' nada' por ni che de'en əchyixjui'a xtižə' Xancho Jeso'osən'.

¹⁸ Beñə' bišə', Xancho Jesocristən' sotezə soe' gaquəlenšgacze' le'e len xbab de'en yo'o lo'o yichjla'ažda'olen'. De'e na'azən' chzoja' na'a. *Pab*

Cart De'en Bzoj San Pabən' Par Benə' Efeso Ca'

Apostol Pabən' bzoje' cart par benə' ca' chso'elao' Jesocristán' Efeson'

¹ Nada' Pab naca' apostol che Jesocristán' con can' gwnalažə' Diozən'. Na' chzoja' cart nga par le'e nita'əle Efeson', le'e bagwlej Diozən' par nacle lažə' ne'ena'. Zotezə zole chzenagle che' na' ngoda'əle txen len Cristo Jeso'osən'.

² Chona' orasyon chnaba' lao Xacho Diozən' na' Xancho Jesocristán' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Diozən' chaclene' chio'o ngoda'əcho txen len Jesocristán'

³ Ledoye'ela'och Diozən' ben' naquə Xa Xancho Jesocristán' na' leczə cho'elao' Xancho Jesocristán' le'. Ca naquən' ngoda'əcho len Cristən', Diozən' bagoclene' chio'o len xbab de'en yo'o lo'o yichjla'ažda'ochon' par niçh baçh chzo chbezcho binlo can' socho cata'ən yežincho yoban'.

⁴ Chio'o ngoda'əcho txen len Cristən', catə' cuiñə' xe yežlyon' Diozən' gwleje' yogua' chio'o par niçh gaquə la'ažda'ochon' xi'ilažə' na' par niçh cui bi xtołə'əcho gatə' laogüe'ena'.

⁵ Chaque Diozən' checho. De'e nan' bsi'e xnezenə' antslə par niçh gwcue'e chio'o ca xi'ine', na' de'e na'anə' bsele'e Jesocristán' por ni checho. Diozən' gwcue'e chio'o chedə' can' gwyazlažə'e na' can' gone'ene'.

⁶ Bsele'e Xi'ine' Jesocristán' ben' chaquene' chei par goclene' chio'o par niçh ca' güe'ela'ochone' laogüe de'ena' nži'ilažə'əteque' chio'o.

⁷ Tant nži'ilažə' Diozən' chio'o, bsele'e Jesocristán' bnežw cuine' blalj xchene'ena' par gwdixjue' xtołə'ochon' catə'an gwso'ote'ene' par niçh ca' Diozən' bezi'ixene' xtołə'əcho ca'.

⁸ Diozən' nži'ilažə'əchgüe' chio'o, bene' chio'o zan clas yelə' sin' na' bene' par niçh chacbe'icho ca güennə' chone' len chio'o.

⁹ Na' bzejni'ine' chio'o de'en cui no gwneze antslə de'en gone'ene' gaquə, ca naquə de'en bžie' bia' gon Cristən'.

¹⁰ Bžie' bia' de que gwžin ža catə' Cristən' nabi'e doxenlə na' gone' par niçh yogua'əloł benə' ža' yoban' na' benə' ža' yežlyon' txen yoso'ozenague' che'.

¹¹ Na' chio'o ngoda'əcho txen len Cristən', Diozən' bsi'e xneze par gwcue'e chio'o ca xi'ine' par niçh gaquə lao na'əcho de'en gone' chio'o naccho xi'ine'. Na' zoe' chone' par niçh gaquə yogua'əloł can' gwçhoglaogüe'en na' can' chene'ene' gaquə.

¹² Na' ca naquə neto' chbezəto' yidə Cristən' na' chonjilažə'əto'one' antslə ca le'e, bsi'e xneze par niçh zgua'atec neto' be'ela'oto'one' laogüe de'en naque' le'ezelaogüe benə' zaque'e.

¹³ Na' le'e ngoda'əle txen len Cristən', chedə' leczə bzenagle che dižə' güen dižə' cobə de'en naquə de'e li. Na' nan de que cui yeyejcho lao yi' gabilən' šə gonjilažə'əcho Cristən'. Na' catə'an benjilažə'əle Cristan' bla' Spirit che Diozən' zon lo'o yichjla'ažda'olen'. Zon len chio'o chonjilažə'əchone' can' bene' lyebe par niçh nezecho bagwcue'e chio'o ca xi'ine'.

¹⁴ Na' zon lo'o yichjla'ažda'ochon' par niçh nezecho de que gwžin ža catə' gaquə lao na'əcho de'en gonəch Diozən' chio'o naccho xi'ine'. Na' gaquən lao na'əcho catə' gone' cuerp cobə chechon'. Bene' chio'o Spirit che'ena' par niçh güe'ela'ochone' de'en naque' le'ezelaogüe benə' zaque'e.

Pabən' gwñabe' de que Diozən' əgwsed əgwlo'ine' benə' ca' chso'onjilažə' Cristən'

¹⁵ Babenda' dižə' ca naquən' chonjilažə'əle Xancho Jeso'osən' na' ca naquən' chaquele che yogua' benə' ca' yelə' benə' ca' bagwlej Diozən' par zjənaque' lažə' ne'ena'.

¹⁶ De'e na'anə' nada' catə' chona' orasyonnə' yogua' laste cho'a yelə' choxçwlen che Diozən' can' chonjen'.

¹⁷ Na' chnaba' de que Diozən' gone' par niçh šejni'ichele che' na' gombi'achlene'. Xancho Jesocristán' leczə cho'elaogüe'e Diozən' ben' naquə Xə' na' ben' naquə le'ezelaogüe benə' zaque'e.

¹⁸ Chnabda' Diozən' šo'o be'eni' che'ena' lo'o yichjla'ažda'olen' par niçh ənezele bi de'e güennə' zocho lez gone' len chio'o bagwleje' naccho xi'ine'. Na' chnaba' gone' par niçh šo'o be'eni' che'ena' lo'o yichjla'ažda'olen' par niçh ənezele catec yelə' bala'an xen juisy gone' chio'o bagwleje' par naccho lažə' ne'ena'.

¹⁹ Leczə chnabda'ane' šo'o be'eni' che'ena' lo'o yichjla'ažda'olen' par niçh ənezele de que yelə' guac xennə' nape' par gaquəlene' chio'o chonjilažə'əchone'. Bablo'ine' benəçənan' can' naquə yelə' guac xen che'ena'.

²⁰ Blo'en ca de'en bosbane' Cristən' ladjo benə' guatən' na' nzo'ene' cuiten' gan' chi'e chnabi'e par niçh ca' Cristən' chnabi'e txen len le'.

²¹ De'e na'anə' Cristən' chnabi'ache' ca notə'ətezə angl. Chnabi'ache' ca beṇəçh, na' ca de'e xio', na' ca bi de'en chse'ejni'alaže'e na' ca notə'ətezəchlə napə yeļə' gwnabia' ŋa'a na' tyemp de'en ze'e za'.

²²⁻²³ Diozən' bene' par niçh zoczə Cristən' chnabi'e yogua'əloļ benə' na' biquə'əchlə. Na' can' zoczə Cristən' chnabi'e doxenlə, leczə ben Diozən' par niçh zoczə Cristən' chnabi'e chio'o cho'ela'ochone'. De'e na'anə' chio'o cho'ela'ochone' gwxaquə'əlebecho ca to cuerp. Na' Cristən' gwxaquə'əlebene' ca yichj cuerpən', çhedə' chnabi'e chio'o can' chon xbab de'en yo'o lo'o yichjchon' chnabi'an cuerp çhechon'.

2

Chio'o chonġilažə'əcho Diozən' bito yeyejcho lao yi' gabilən' çhedə' nzi'ilaže'e chio'o

¹ Diozən' babocobe' yichjla'ažda'olen' can' babocobe' çheto'onə'. Antslə goczho len yichjla'ažda'ochon' ca beṇə' guat laogüe de'en cui bzenagcho çhe Diozən'.

² Con gwzoczcho bencho de'e malan' can' chso'on yeziquə'əchlə beṇə' ca' ža' yežlyo nga. Bencho can' chene'e gwxiye'ena' de'en chnabia' de'e xio' ca'. Lega'aquən zjənyechj zjəmbi'in beṇəçhən' na' çhəsa'ənabi'an yichjla'aždao' beṇə' ca' cui chse'ene yoso'ozenag çhe Diozən'.

³ Ca'aczən' ben yogua'əcho antslə, bito bzenagcho çhe Diozən'. Con gwdaczcho bencho con can' gwna la'ažda'omalchon', na' bencho con can' gwna xbab çhechon'. De'e na'anə' gwchoglaogüe'en çhecho goṇe' chio'o castigw zejlicane, can' gone' len yeziquə'əchlə beṇəçh de'en cui choso'ozenague' çhe'.

⁴⁻⁶ Goczho ca beṇə' guat len yichjla'ažda'ochon' çhedə' bito bzenagcho çhe Diozən'. Pero Diozən' lechguale cheyaša' cheži'ilaže'e chio'o na' çhacchgüeine' çhecho. Na' de'en nzi'ilažə' Diozən' chio'o, de'e nan' bene' par niçh cui yeyejcho lao yi' gabilən'. Bžin ža ben Diozən' len chio'o can' bene' len Cristən' catə'an bosbane'ene' ladjo beṇə' guat ca'. Diozən' bocobe' yichjla'ažda'ochon' par niçh cuich naccho ca beṇə' guat na' bene' ca ndil ngoda'əcho Cristən' txen par niçh baçh chzo chbezcho binļo can' socho catə'an bachi'ilenchone' yoban' gan' çhi'ena'.

⁷ Bene' ca' par niçh tyemp de'ena' ze'e za' əgwlo'e catequan' nzi'ilaže'e chio'o na' catec de'e güenna' chone' len chio'o ngoda'əcho txen len Cristo Jeso'osən'.

⁸⁻⁹ De'en nzi'ilažə' Diozən' chio'o bene' par niçh chio'o chonġilažə'əchone' bito yeyejcho lao yi' gabilən'. Con to goclenna' bene' ca', caguə por ni çhe bencho bi de'e güenna'. De'e na'anə' notono chio'o cheyałə' güe'elao' cuincho de'en cui yeyejcho lao yi' gabilən'.

¹⁰ Na' par niçh goncho de'e güen Diozən' bocobe' yichjla'ažda'ochonə' na' bene' par niçh ndil ngoda'əcho txen len Cristo Jeso'osən'. Bsi'e xņezenə' antslə par niçh sotezə socho goncho de'e güen.

Cristən' bene' par niçh beṇə' Izrael ca' na' beṇə' ca' cui zjənaquə beṇə' Izrael nite'e binļo toe' yetoe'

¹¹ Le'e gon xbab ca naquə neto' goljəto' naquəto' beṇə' Izrael zoto' seṇy de'en ne' sirconsision na' zejen de que Diozən' gaquəlene' neto' can' none' lyebe. Antslə neto' gwṇeto' çhe le'e goljle cui nacle beṇə' Izrael: "Le'e cui zole seṇy de'en ne' sirconsision". Na' seṇyən' naquan con to seṇy de'en choso'ozo beṇə' lao cuerp çheto'onə'.

¹² Na' le'e gon xbab de que tyemp de'en bagwde bito bembiale Cristən'. Bito nacle ṇasyon çhe Diozən' can' naquə neto' beṇə' Izrael. Bito bi lyebe ben Diozən' par gaquəlene' le'e ca lyebe de'en bene' len neto' beṇə' Izrael. Bito gwzole lez gaquəlen Diozən' le'e na' bito bembiale Diozən'.

¹³ Antslə bito gwzole binļo len Diozən', pero ŋa'a le'e len neto' bangoda'əcho txen len Cristo Jeso'osən' na' Diozən' chaclene' chio'o çhedə' Cristən' bnežjw cuine' blalj xçhene'ena' por ni çhe xtoļə'əchon' catə'an gwso'ote'ene'ena'.

¹⁴ Na' antslə neto' beṇə' Izrael na' le'e cui nacle beṇə' Izrael goczho beṇə' contr tocho yetocho. Pero ŋa'a Cristən' babene' par niçh naccho tozə na' zocho binļo tocho yetocho.

¹⁵ De'en bnežjw cuin Cristən' por ni çhecho catə'an gwso'ote'ene', bitoch chonən byen cue' yichjcho par goncho yogua'əloļ can' na lei de'en bzøj de'e Moizezən', ca costomb' ca' de'en nan na' bichlə de'en chonən mendad goncho. Yogua' chio'o chonġilažə'əcho Cristən' bene' chio'o ca tozə yež, neto' beṇə' Izrael na' le'e cui nacle beṇə' Izrael. De'e na'anə' zocho binļo tocho yetocho.

¹⁶ Cristən' bnežjw cuine' gwso'ote'ene' le'e yag corozən' par bozoe' chio'o binļo len Diozən'. De'e na'anə' naccho tozə na' bito chgue'i lježjcho.

¹⁷ Par le'e cui nacle beṇə' Izrael na' neto' naquəto' beṇə' Izrael, Cristən' bedəye'e dižə' can' gaquə socho binļo len Diozən'.

¹⁸ Na' de'en chonġilažə'əcho Cristən', tozə Spirit çhe Diozən' chaclenən chio'o par niçh çac cho'elencho Xaço Diozən' dižə'.

¹⁹ De'e na'anə' le'e cui nacle beṇə' Izrael bitoch nacle ca beṇə' zits' len neto', sino banacle beṇə' l'juežjto' na' banactele beṇə' family che Diozən' t xen len neto' bagwlej Diozən' par naccho lažə' ne'enə'.

²⁰ Na' yoguə'əcho gwxaquə'əlebecho ca to yo'o de yej. Neto' chsed chzejni'ito' le'e che Cristən' naquəto' ca laneina', neto' apostol na' len yeziquə'əchlə beṇə' chso'e xtižə' Cristən'. Na' Jesocristən', gwxaquə'əlebene' ca yej squin nech che to yo'o.

²¹ Na' de'en ngoda'əcho t xen len Cristən', gwxaquə'əlebecho ca yej ca' de'en zjəncua' zjəngoda'ən gan' chac yo'o de yejən'. Zjəngoda'ən t xen par nič ša' yo'onə' na' par nič gaquən gual. Can' naquən gwxaquə'əlebecho ca to yo'o gan' zo Diozən', cheda' ngoda'əcho t xen len Xancho Jesocristən'.

²² Neto' len le'e t xenṇə' naccho ca to yo'o gan' zo Diozən' cheda' zo Spirit che'enə' lo'o yichjla'aždao' chio'o chonlilažə'əcho Cristən'.

3

Diozən' bsele'e Apostol Pabən' jetixjui'e xtižə'enə' len beṇə' cui zjənaquə beṇə' Izrael

¹ Nada' Pab dia' ližya nga cheda'ən əchyixjui'a xtižə' Cristo Jeso'osən' len le'e cui nacle beṇə' Izrael.

² Le'e chache'ile chia' ca naquən' nži'ilažə' Diozən' nada' na' bsi'e xneze par nič chzejni'ida' le'e xtižə'enə'.

³ Chache'ile ca naquə Diozən' blo'ine' nada' de'en cui no gwneze antslə, can' chzoja' le'e to chəpə dižə' le'e cart nga.

⁴ Na' catə' gwlable de'en chzoja' nga gache'ile de que nada' chejni'ida' de'en cui no gwneze che Cristən'.

⁵ Antslə Spirit che Diozən' bito bzejni'in beṇə' de'en cui no gwneze che Cristən', pero na'a neto' apostol che Diozən' babzejni'in neto' len, na' lecə babzejni'in yeziquə'əchlə beṇə' chso'e xtižə' Cristən'. Babzejni'in neto' bagwlej Diozən' par naquəto' lažə' ne'enə'.

⁶ Babzejni'in neto' de que notə'ətezcho šə bachejle'echo che dižə' güen dižə' cobə de'en chzejni'in che Cristən', nachən' bangoda'əcho t xen len Cristo Jeso'osən'. De'e na'anə' le'e cui nacle beṇə' Izrael na' len neto' beṇə' Izrael t xenṇə' si'icho de'en gonəch Diozən' chio'o naccho xi'ine', na' t xenṇə' ngoda'əcho naccho ca tozə family, na' t xenṇə' chaclen Diozən' chio'o can' babene' lyebe.

⁷ Diozən' gwleje' nada' len yelə' guac che'enə' par nič əchyixjui'a dižə' güen dižə' cobəna'. Na' bano'e chia' chyixjui'an cheda' nži'ilažə'e nada'.

⁸ Nada' chacda' ni latə'əza cui zaca'a entr chio'o bagwlej Diozən' par naccho lažə' ne'enə', pero Diozən' no'e chia' chyixjue'ida' beṇə' cui zjənaquə beṇə' Izrael catec de'e güen juisy gone' len yoguə'əloł chio'o chonlilažə'əcho Cristən'. Tant de'e šao' de'e güen gaquə' checho, cabi bi de de'e saquə'əlebe de'e güen de'en gone' len chio'o.

⁹ Diozən' bene' yoguə'əloł beṇə', yoguə'əloł bia chaš, na' yoguə'əloł de'e de. Na' dezd ža gwlasda'ote bito be' Diozən' latja yesə'əneze beṇəchən' bin' babžie' bia' gaquə. Pero na'a no'e chia' chzejni'ida' yoguə'əloł beṇə' de que bachac can' nžie' bia'.

¹⁰ Na' Diozən' chlo'ine' angl əblao ca' na' angl gwnabia' ca' beṇə' nita' yobana' de que nape' de'e zan clas yelə' sin', chlo'ine' lega'aque' de'e güenṇə' de'en chone' len chio'o ncodə' l'juezjcho cho'ela'ocho Cristən'.

¹¹ Chone' can' nžie' bia' dezd nechte catə'ən gwchoglaogüe'en sele'e Xancho Jesocristən'.

¹² Na' chio'o ngoda'əcho t xen len Cristən' bito chzebecho Diozən', sino chebeicho nezecho de que chac cho'elencho Diozən' dižə' cheda' chonlilažə'əcho Cristən'.

¹³ La'anə'əczə dia' ližya nga laogüe de'en bagwdixjue'ida' le'e dižə' güen dižə' cobə de'en chzejni'in che Cristən', chatə'əyoida' le'e bito yeyašə'alažə'əle ca naquə nga chy'i' chzaca'a. Leyebei cheda' chac chia' ca' par nič chaquəlena' le'e.

Cristən' lechquale chaquene' che chio'o chonlilažə'əchone'

¹⁴ Catə' chona' xbab ca güenṇə' baben Diozən' par nič nacle tozə len neto' beṇə' Izrael, chzo xiba' chona' orasyon lao Xa Xancho Jesocristən'.

¹⁵ Le'enə' bxie' yoguə' family che chio'o zocho lao yežlyo nga na' che beṇə' ža' yoban'.

¹⁶ Chṇaba' lao Xacho Diozən' gon Spirit che'enə' fuers balor par yichjla'ažda'olen' par nič gonle yoguə'əloł can' chene'ene'. Na' Dioz na'anə' gone' par nič gatə' fuers balor che yichjla'ažda'olen' cheda' naque' le'ezelaogüe beṇə' zaque'e na' nape' le'ezelaogüe yelə' guac xen.

¹⁷ Chṇaba' soczle gonlilažə'əle Cristən' par nič sotezə soe' len le'e. Na' lecə ca' le'e sotezə sole gaquele che Diozən' can' cheyałə' gaquele che', na' gaquele che l'juezjle can' cheyałə' gaquele chega'aque'.

¹⁸ Chnaba' de'e quinga par nich le'e txen len yeziqwa'achlā beṇa' bagwlej Diozān' par zjēnaque' laža' ne'ena' šejni'ile de que lechguale chaque Cristān' che chio'o. Na' yela' chaque che'ena' len chio'o gwxaqua'āleben caczā gan' nžiljw nisda'onā, pero mazāchlā can' nžiljw nisda'onā' chaquene' checho. Na' nezecho de que tonchgua de yežlyon', pero mazāchlā can' denṇā' chaque Cristān' checho. Na' lechguale zitjw minṇā, pero mazāchlā ca zitjōn' naquānā' chaque Cristān' checho. Le'egatezā can' yoban' lechguale sibā zen, pero mazāchlā ca sibān' zennā' chaque Cristān' checho.

¹⁹ Chnaba' gon Diozān' par nich ānezele de que Cristān' chaquechene' checho mazāchlā ca de'en chon notā'atezcho xbabān'. Na' leczā gon Diozān' par nich gaquē yichjla'ažda'olen' tozā can' naquā yichjla'ažda'ogūe'ena' par nich ca' gacle can' naque'ena'.

²⁰ Diozān' chac chone' yoguā'āloj. De'e na'anā' chac chone' mazāchlā ca de'en chnabechone' o de'en choncho xbab gone'ena'. Na' chone' par nich Spirit che'ena' zon lo'o yichjla'ažda'ochon' chaclenān chio'o len yela' guac che'ena'.

²¹ Chio'o ncodā' ljuēžjcho cho'ela'ochō Cristān', lēdoye'ela'och Diozān' na' na' zejlicāne chedā' ngodā'ācho txen len Cristo Jeso'osān'. Na' can' gonšgacžcho.

4

Spirit che Diozān' babeyonān yichjla'ažda'ochon' tozā

¹ Nada' dia' ližya nga chedā' āchyixjui'a xtižā' Xāncho Jesocristān'. Bagwlej Diozān' le'e par nacle xi'ine' can' gwleje' neto'. De'e na'anā' chatā'ayoida' le'e šejšgacžle gonle can' cheyalā' gon yoguā' chio'o bagwlej Diozān' par naccho xi'ine'.

² Chatā'ayoida' le'e bito gon cuiṇle xen. Legac beṇā' gaxjwlažā' na' legapā yela' chxenlažā' len beṇā' yoblā. Chatā'ayoida' le'e gaque che ljuēžjle na' gwdele ca'ālā šā bi chac chele entr tole yetole.

³ Babeyon Spirit che Diozān' yichjla'ažda'olen' tozā. Na' chatā'ayoida' le'e lešo binlo tole yetole par nich sotezā sole gaquā yichjla'ažda'olen' tozā.

⁴ Yoguā' chio'o cho'ela'ochō Diozān' naccho ca tozā family. Na' tozā Spirit che Diozān' zon lo'o yichjla'aždao' yoguā'ācho, na' tozā can' zocho lez gon Diozān' gūen len chio'o chedā' bagwleje' yoguā'ācho par naccho xi'ine'.

⁵ Tozā Xāncho Jesocristān' naquā, na' tozā can' chonlilažā'āchone', na' tozā can' zejen de'en gwchoacho nisān'.

⁶ Tozā Diozān' zo ben' naquā Xā yoguā' chio'o. Le'ena' chnabi'e yoguā'ācho, na' chchine' yoguā'ācho par choncho xšine'ena', na' zocze' len yoguā'ātecho.

⁷ Na' segon can' chaclen Cristān' chio'o, no'e checho gwde gwdele de'e gaquā gon to tocho.

⁸ Chac can' nyoj de'en gwna Diozān' che Cristān':

Catā'n beyepe' yoban' bene' de'e xio' ca' gan,

na' be'e che beṇāchān' gwde gwdele de'e gaquā so'on to toga'aque'.

⁹ Na' de'en gwne: "Beyepe' yoban'", zejen de que betje' na' blē'e lao yežlyo nga antslā ze'e yeyepe' yobanā'.

¹⁰ Na' ben' betjān' leczā le'ena' beyepe' yoban' gan' zo Diozān'. De'e na'anā' zoe' chnabi'e doxenlā.

¹¹ Le'egatezā le'ena' no'e che baļā chio'o par nich naccho apostol, na' baļcho no'e checho chyixjue'echo bi de'en bagwne' chio'o. Yebaļcho no'e checho chje'echo dižā' gūen dižā' cobā de'en chzejni'in che'. Yebaļcho no'e checho chgūia chyecho beṇā' chso'elao' le' na' chsed chlo'iga'aquechone'.

¹² Cristān' no'e checho chaclen ljuēžj chio'o bagwlej Diozān' par naccho lažā' ne'ena' par nich yoguā'ācho choncho xšine'ena' na' zda chonlilažā'āchcho Cristān', chio'o naccho ca family che'.

¹³ Na' zocho chaclen ljuēžjcho tocho yetocho par nich gaccho tozā gonlilažā'ācho Xi'in Diozān' na' gombi'achone'. Cana' gacyanā'ācho can' cheyalā' gaccho, gaccho beṇā' šao' beṇā' gūen can' naquā Cristān'.

¹⁴ Bito cheyalā' šo'ochō xbab ca che to bidao', šejcho qui šejcho ca'ālā naochō to to yela' chejni'alažā' de'en chsa'aljažā' beṇā' gūenlažā' na' beṇā' gwxiye' ca' par chsa'āxoayague' chio'o.

¹⁵ Cheyalā' naochō de'en naquā de'e li, na' zejli gaque che ljuēžjcho tocho yetocho. Cheyalā' šejcho gaguāchcho beṇā' šao' beṇā' gūen can' naquā Cristān' ben' chnabiā' chio'o.

¹⁶ Ca naquā cuerp chechon', to to partān' ngodā'an na' noxā' ljuēžje len belā' na' len bin de'en nca'an nich to to partān' chonān žin che chei na' nich cuerpān' naquān gual. Ca'aczān' chio'o cho'ela'ochō Cristān' ngodā'ācho txen tocho yetocho. Na' catā' to tocho choncho de'en noe' Diozān' checho goncho, nachān' Cristān' chone' par nich yoguā'ācho txen zda chaquāchcho beṇā' šao' beṇā' gūen na' zda chaquechecho che ljuēžjcho.

Diozən' babocobe' yichjla'azdao' chio'o chonlilažə'əchone'

¹⁷ Na'a əchnia' le'e de'en non Xancho Jesocristan' mendad əgwzejni'ida' le'e de que bito cheyałə' goncho can' chso'on beṇə' ca' cui zjənombia' Diozən'. Xbab čhega'aque'ena' bito bi zaquə'ən.

¹⁸ Nčoḷ yichjla'azda'oga'aque'ena'. Na' laogüe de'en zjənaque' beṇə' godenag, bito chse'ejni'ine' bin' chazlažə' Diozən'. De'e na'ana' bitobi yelə' mban zejlicane čhega'aque' de ca naquə de'en choṅ Diozən' chio'o.

¹⁹ Bito bi zto' zjənombi'e che de'e malan' chso'one'. Chso'onteze' bita'ətezə de'e mal de'en nan so'one'. Do tyempte con chso'elažə'e chso'one' yogua' cłaste yelə' zto'.

²⁰ Le'e nezele de que Cristən' bito chene'ene' goncho de'en nac ca'.

²¹ La' babzenagle čhe dižə' li de'en chzejni'in čhe Jeso'osan' na' babletje' xbabən' yichjla'azda'olen'.

²² Antslə gwdacho bencho con can' na la'azda'omalchon'. La'azda'omalchon' chebein de'e malan' na' de'e na'ana' čxoayaguan chio'o par nič goncho de'e mal can' chzelažə'ənṇə'. Pero baṇezele de que cheyałə' cuejyichjcho cuich gwzenagcho čhe la'azda'omalchon'.

²³ Na' leczə nezele de que cheyałə' gwša'acho xbab de'en choncho lo'o yichjla'azda'ochon'.

²⁴ Cheyałə' güe'echo latjə yocoba' Diozən' yichjla'azda'ochon' par nič sotezə socho goncho de'e güen can' chon le', na' par nič gaccho beṇə' la'azdao' xi'ilažə' can' naquə le'. Goncho ca' čhedə' banombi'acho xtižə' Diozən' de'en naquə de'e li.

²⁵ De'e na'ana' bitoch gonlažə'əcho sino güe'elen ljuējžcho dižə' li čhedə' ncodə' ljuējžcho naccho ca tozə family.

²⁶ Cats' chža'acho bito cheyałə' goncho de'e mal. Cheyałə' yeyacxenlažə'əcho lğüegwzə lao yelə' chža'a čhechon', bito ža'acho do ža.

²⁷ Bito güe'echo latjə ṇabia' gwxiye'ena' chio'o par goncho de'e mal.

²⁸ Šə nocho naccho beṇə' bguan, bitoch cheyałə' cuancho. Cheyałə' so tacho goncho žin de'en naquə de'e güen, par nič gatə' de'e əgwnežjwcho beṇə' čhyažj čchine.

²⁹ Bito güe'echo dižə' zban dižə' de'e cui zaque'e. Cheyałə' güe'echo dižə' güen dižə' de'e zaque'e par gaquəlen latə'an beṇə' əse'ene len. Güe'echo dižə' de'e gaquəlen beṇə' ljuējžcho ca' par nič so'onlilažə'əche' Jesocristan'.

³⁰ Na' bito goncho ca so Spirit čhe Diozən' trist, la' zo Spiritən' lo'o yichjla'azda'ochon' par nič nezecho gwžin ža gon Diozən' chio'o cuerp cobən' na' gone' par nič gaquə yichjla'azda'ochon' cayaṇə'an chene'ene'.

³¹ Cheyałə' cuejyichjcho yogua' de'e malən'. Bitoch co'olažə'əcho. Bitoch əloccho. Bitoch əža'acho. Bitoch güe'echo dižə' loc dižə' lžej. Bitoch əgwžia gwnitə'əcho beṇə'. Na' bitoch gaccho beṇə' xi'a.

³² Cheyałə' goncho güen len ljuējžcho na' leczə cheyałə' yeyaše'e ljuējžcho tocho yetocho. Cristən' bagwdixjue' xtolə'əchon' par nič babezi'ixen Diozən' čhecho. Na' can' babezi'ixene' čhecho, ca' aczən' cheyałə' yezi'ixen čhe ljuējžcho tocho yetocho cats' bi de'en chso'one beṇə' ljuējžchon' chio'o.

5

Chio'o naccho xi'in Dioz cheyałə' goncho can' chon Diozən'

¹ Na'a ža cheyałə' goncho can' chon Diozən' čhedə' banaccho xi'ine' na' chaquene' čhecho.

² Cheyałə' sotezcho gaquecho čhe ljuējžcho can' chaque' Cristən' čhecho. La' por ni čhechona' bnežjw cuine' gwduxjue' xtolə'əchon' cata'an gwso'ote'ene'ena', na' chebei Diozən' de'en bene' ca'.

³ Bito cheyałə' co'o xtocho na' bito cheyałə' cuejyichj be'en čhecho o no'ol čhecho par solencho beṇə' yoblə, na' bito goncho bichlə de'e yelə' zto'. Na' cuat seləžə'əczcho goncho de'e mal ca' de'en zjənac ca'. Bagwlej Diozən' chio'o par naccho lažə' ne'ena'.

⁴ Na' de'en banombi'acho Diozən' bito cheyałə' goncho de'en naquə de'e yelə' zto' yelə' zla'an na' bito güe'echo dižə' zban na' nic güe'echo dižə' de'e cui nca'a xneze. De'en cheyałə' goncho, güe'echo yelə' choxcwlen čhe Diozən'.

⁵ Baṇezecho de que be'ena' chgo'o xtoi na' be'ena' chbejyichj no'ol čhei o be'en čhe' par chzolene' beṇə' yoblə, na' leczə ca' be'ena' chzelažə' gon bichlə de'e yelə' zto', ni to beṇə' ca' bito bi de'e güen yesə'əzi' ca' de'en si' chio'o cho'echo latjə čnabia' Cristən' na' Diozən' chio'o. Na' šə no chebeine' chone' de'e yelə' zto', tozəczə ca mal naquən len de'en chso'on beṇə' chse'ejni'alažə' lgua'a lsaquə'.

⁶ Bito güe'echo latjə no əxoayag chio'o len dižə' güenlažə'. Diozən' gwnežjue' castigw zejlicane čhe beṇə' ca' cui choso'ozenague' čhe', chso'ela'ozeche' chso'one' de'e mal ca' bagwnia' ca'.

⁷ Bito gonga'acchone' txen goncho de'e malən'.

⁸ Antslən' n̄chol̄ yichjla' aẏda' ochon', pero n̄a' a bayo'o be'eni' che Xancho Jesocrisṭən' lo'o yichjla' aẏda' ochon'. De'e na'anə' ledoyen de'e güennə' can' cheyalə' gon chio'o bayo'o be'eni' che Xancho' lo'o yichjla' aẏda' ochon'.

⁹ Na' de'en bayo'o be'eni' che'enə' lo'o yichjla' aẏda' ochon' goncho de'e güen na' goncho de'e zda licha na' güe'echo diẏə' li.

¹⁰ Na' cheyalə' gwsedcho par ənezecho bin' chazlaẏə' Xancho' niç gonchon.

¹¹ Bito goncho txen len beṇə' ca' zjəṅchol̄ yichjla' aẏda' oga' aque'enə' na' chso'one' de'e cui bi zaquə'ən. Cheyalə' ye'ega'acchone' de que de'e malən' chso'one'.

¹² Na' ca de'en chso'on beṇə' ca' do bgašə'əzə, naquən de'e cheyalə' gaquecho zto' güe'echo diẏə' çhei.

¹³ Pero chio'o yo'o be'eni' che Diozən' lo'o yichjla' aẏda' ochon', catə' ye'ega'acchone' de que de'e malən' chso'one', yesyə'əyacbe'ine' de que le malən' chso'one'. Be'eni' che Dioz na'anə' chlo'in chio'o šə de'en choncho naquən de'e güen o šə naquən de'e mal.

¹⁴ De'e na'anə' che'echo beṇə':

Nacle len yichjla' aẏda' olen' ca beṇə' guat de'en cui chzenagle che Diozən'.

De'e na'anə' le'e gwzenag che' par niç Cristən' gone' le'e be'eni' che'enə'.

¹⁵ Cheyalə' ggüiacho naquən' chzo chdacho. Cui tacho ca beṇə' cuiczə nacbe'i sino tacho ca chda beṇə' chejni'i.

¹⁶ Do tyempte cheyalə' goncho de'e güen, çhedə' tyemp nga n̄a' a zan beṇə' nitə' chso'one' de'e mal.

¹⁷ Bito goncho ca beṇə' cui bi xbab nye'. Cheyalə' šejni'icho na' goncho can' chene'e Xancho Jesocrisṭən'.

¹⁸ Bito gaccho beṇə' güe'e zo beṇə' cui bi yelə' zto' nombia'. De'en cheyalə' gonchon', güe'echo latjə' nabia' Spirit che Diozən' yichjla' aẏda' ochon'.

¹⁹ Cata' chdopə chzəgcho txen cheyalə' golcho no imno na' gwlabcho no salmo na' golcho no de'en na Spirit che Diozən' golcho. Leczə golcho lo'o la' aẏda' ochon' par güe'ela'ocho Xancho Jesocrisṭən'.

²⁰ Cheyalə' güe'echo yelə' choxcwlen che Xacho Diozən' zejli bitə'atezə de'e chac checho na' lao yoguə'əlol̄ de'en babene' chio'o, çhedə' la' chonlilaẏə'əcho Xancho Jesocrisṭən'.

To tocho cheyalə' solencho family checho can' chazlaẏə' Cristən'

²¹ Ca de'en napcho Diozən' respet cheyalə' əgwzəxjw yichjcho tocho yetocho.

²² Na' ca naquə le'e no'olə le'e nšagna'ale, le'e gwzenag che be'en çhele. Šə gonle ca' lenczə che Xancho Jesocrisṭən' chzenagle.

²³ Le'e gwzenag che be'en che to tole çhedə' lega'aque' chəsə'anabi'e le'e ca Cristən' chnabi'e chio'o cho'ela'ochone'. Chio'o gwxaquə'əlebecho ca to to part che cuerp che Cristən' na' le'enə' babebeje' chio'o xni'a de'e malən'.

²⁴ Na' ca naquə chio'o cho'ela'ocho Cristən' cheyalə' gwzenagcho che', le'egatezə ca' le'e no'olə le'e nšagna'ale, legwzenag yoguə' bin' na be'en che to tole.

²⁵ Na' le'e beṇə' byo le'e nšagna'ale, le'e gaque che no'ol çhelen' to tole can' chaque Cristən' che yoguə' chio'o cho'ela'ochone' na' bnežjw cuine' por ni checho catə'an gwso'ote'ene'.

²⁶ Bnežjw cuine' par niç beya'a beyibe' la'aẏdao' chio'o chonlilaẏə'əchone'. Na' catə' gwchoacho nisən' be'echo diẏə' gwnacho de que chonlilaẏə'əcho Cristən'. De'e na'anə' bene' la'aẏda'ochon' xi'ilaẏə'.

²⁷ Na' bene' par niç əžincho laogüe'enə' sin cui bi manch da' əchen la'aẏda'ochon', na' sin cui bi xtolə'əcho de, na' nic bichlə de'e mal yo'o yaz lo'o la'aẏda'ochonə' de'e cui chazlaẏə' Diozən'. Cristən' bene' par niç chio'o cho'ela'ochone' gaquə la'aẏda'ochon' xi'ilaẏə' na' bito bi xtolə'əcho gata'.

²⁸ Can' nzi'i Cristən' chio'o, ca'aczən' le'e beṇə' byo le'e nšagna'ale cheyalə' ži'ile no'ol che to tole can' nzi'ile cuerp çhelen'. Ben' nzi'i xo'ole nzi'icze' cuine' ca de'en chone' ca'.

²⁹ Notono to beṇə' chgüe'ine' cuerp che'enə' sino nzi'ine'en na' chapəši'en, can' chon Cristən' nzi'ine' chio'o na' chapəši'e chio'o cho'ela'ochone'.

³⁰ Cristən' nzi'ine' chio'o na' chapəši'e chio'o çhedə' la' to to chio'o gwxaquə'əlebecho ca to to part che cuerp che'enə', ca žit de'en yo'e na' ca xpele'enə'.

³¹ Na' nyojczə Xtüzə' Diozən' nan: "Beṇə' byonə' le'e xaxne'e par əgwšagne'e si'e to no'olə na' əsa'aque' tozə."

³² De'en babzoja' nga naquən de'e cui no gwneze antslə na' naquən de'e žialao xen par chio'o. Na' zejen de que chio'o cho'ela'ocho Cristən' naccho tozə len le'enə'.

³³ Na' leczə zejen de que to le'e beṇə' byo cheyalə' gaquele che no'ol çhelen' can' chaquele che cuinle. Na' leczə ca' le'e no'olə le'e nšagna'ale, to tole cheyalə' gaple respet be'en çhelen'.

6

¹ Le'e bidao' bi'i xcuidá', le'e əgwzenag che xaxna'ale. Gonle ca' chedá' le'e len neto' ngodá'əcho t xen len Xancho Cristán' na' naquəczən de'e cheyalá' gonlen'.

²⁻³ Na' de'e nga ben Diozán' mendad goncho gwne': "Łegwnežjo yelá' bala'an xaxna'ale. Na' šə gonle ca' gaquə güen chele na' gaquə banle šša lao yežlyo nga." Na' entr yoguə de'e ca' bene' mendad goncho de'e nğan' naquə de'e žialao de'en nsa' lyebe, nan de que gaquə güen che beňə' choso'ozenague' chei na' de que gaquə yesə'əbane' šša lao yežlyon'.

⁴ Na' le'e xaxna' bidao', leyosgol leyosčha'o bi'i chele ca' par yoso'ozenagbo' che Xancho Cristán'. Bito con gonle ca yesə'əža'a yesə'əlocho', pero legüe'ega'acbo' consejw šao' consejw güen.

⁵ Na' le'e mos legwzenag yoguə'əlol can' na xan žinnə' na' legapəga'aque' respet. Na' legon xšinga'aque'enə' do yichj do lažá'əle. Legon ca' chedá' leczə che Crist nan' chzenagle catə'an chzenagle chega'aque'.

⁶ Bito gonleile xan žinnə' gonlizle ca beňə' chonchgua žinnə' catə'əzən' chgüie' le'e. Legon žinnə' do yichj do lažá'əle can' chene'e Diozán' chedá' nacle beňə' güen xšin Cristán'.

⁷ Na' cheyalá' güe'elažá'əle gonle žin che beňə' nič yebel Xancho Cristán' le'e, caguə par nič yebel ben' naquə xan žin na'azəna'.

⁸ Nezecho šə choncho de'e güen le'egatezəczə ca' gon Xancho Cristán' güen len chio'o notə'ətezə naccho, la'anə'əczə šə syempr choncho xšin beňə' yoblə o šə cui.

⁹ Na' le'e beňə' xan žin, leczə cheyalá' gonle güen len beňə' güen žin chelen'. Bito co'oga'aclene' šeb, chedá' nezele Xancho' ben' zo yoban' leczə Xan beňə' güen žin ca'anə'. Na' lao Diozán' ben' zo yobana' tozə can' zaquə' chio'o beňəč.

Naquən' cheyalá' goncho par nič de'e malən' cui gonən chio'o gan

¹⁰ Na'a ža beňə' bišə', cheyalá' gwčhincho fuers balor de'en choň Cristán' par yichjla'azda'ochon', na' cheyalá' güe'echo latjə gaqualenə' chio'o len yelá' guac xen che'enə'.

¹¹ Cheyalá' goncho yoguə'əlol can' chene'e Diozán' par nič socho cheč cui šejle'echo che gwxiye'enə' catə'an chyljlažá'ən naclən' gonən par əxoayaguən chio'o.

¹² Caguə chdiləlencho beňəč beňə' naquə belə' chennə' sino que chdiləlencho de'e xio' ca', na' angl bzalao ca', na' de'e ca' yeziquə'əchlə de'en chəsə'ənabia' beňə' mal ca' ža' yežlyo nga, beňə' ca' chsa'aš lo'o de'e žchołən'. Chdiləlencho de'e mal ca' gan' chsa'ašən par nič ca' cui šejle'echo chega'aquən.

¹³ De'e na'anə' cheyalá' goncho yoguə'əlol can' chene'e Diozán' par nič socho gwxiye'enə' len bichlə de'e mal ca' catə'an se'ene'en yesə'əgo'oyelə'ən chio'o par goncho de'e malən'. Nach cheyalá' sotezə socho cui šejle'echo chega'aquən. Na' šə goncho yoguə'əlol can' chene'e Diozán', saquə'əlebecho ca to soldad beňə' noxə' spad che'enə' na' nyaze' xe' de'en naquə de'e ya par chcue'ejan le' catə' chdiləlene' beňə' contr che' ca'.

¹⁴ Na' par nič sozcho cui šejle'echo che gwxiye'enə' na' bichlə de'e mal ca', cheyalá' güe'echo por dižə' li. Na' de'en güe'echo dižə' lin' saquə'əleben ca dobey de'en chchej soldadən' lsinə'enə'. Na' cheyalá' goncho porzə de'e güen nič gwcue'ejan chio'o ca xa soldadən' de'en naquə de ya chcue'ejan cho'alcho'enə'.

¹⁵ Leczə ca' cheyalá' sotezə socho šejle'echo che dižə' güen dižə' cobə de'en chzejni'in chio'o par zocho binlo len Diozán'. Na' šə sotezə socho šejle'echo chei, gaaqualenczən chio'o socho probnid par tiləlencho gwxiye'enə' na' bichlə de'e mal ca' ca spat de'en nlej soldadən' chaclənən le'.

¹⁶ Pero na' de'en naquən de'e žialao xench ca biquə'əchlə de'en choncho, cheyalá' sotezə socho gonjilažə'əcho Diozán'. Na' ca de'en gonjilažə'əcho Diozán' gaaqualenczən chio'o ca to escodo de'en chcue'ej soldadən' par nič xis goxita' ca' de'en chsa'alə'ənjin cui chəsə'əyidjon le'. Gwxiye'enə' bito gaquə co'on xbab mal lo'o yichjla'azda'ochon' šə sotezə socho gonjilažə'əcho Diozán'.

¹⁷ Na' cheyalá' yosa'alazə'əcho de que Diozán' bach bebeje' chio'o xni'a de'e malən'. Na' šə yosa'alazə'əcho de que babebeje' chio'o xni'a de'e malən' gaqualenən chio'o ca to lapə' de ya de'en zo yichj soldadən' chaclənən le' nič beňə' contr che' ca' bito chso'one' le' gan. Na' leczə cheyalá' güe'echo xtižə' Diozán' de'en chzejni'i Spirit che'enə' chio'o. Na' de'en güe'echon gaqualenən chio'o par nič gwxiye'en cui soin chio'o, can' chaclən spad che soldadən' le' par chdiləlene' beňə' contr che' ca'.

¹⁸ Do tyemp cheyalá' goncho orasyon lao Diozán' na' nabcho gaqualene' chio'o can' chzejni'i Spirit che'enə' chio'o goncho. Cheyalá' gaccho beňə' banlažə' par nič goncho orasyonə' sin cui žjəxəquə'əlažə'əcho, ənabcho gaqualen Diozán' yoguə' beňə' ca' yelə' bagwleje' par zjənaquə' lažə' ne'enə'.

¹⁹ Na' lenab gaquālen Diozān' nada' par niĉh ənezda' bin' chayałə' əñia' na' par niĉh bito žeba' gua'a dižə' gwzejni'ida' beñə' yoblə ĉhe Cristān', na' naquān to de'e güen de'e cobə de'en cui no gwñeze antslə.

²⁰ Par niĉh gua'a dižə' güen dižə' cobə na'anə' bselə' Diozān' nada' ca lgüe'e, na' por ni ĉhe de'e na'anə' zoa' nga naca' pres. De'e na'anə' lenabe Diozān' gaquālene' nada' par gua'a xtižə' Cristān' sin cui žeba' ĉhedə' can' cheyałə' gua'anñə'.

Apostol Pabən' btipe' lažə'əga'aque'

²¹ Na' par niĉh ənezele can' chac ĉhia' na' bin' chona', əchseła'a beñə' bišə'ada'ocho Tiqicon'. Le'enə' zotezə zoe' chone' can' cheyałə' gone' par chaclene' nada' chona' xšin Xancho Jesocristān'.

²² Echseła'ane' par niĉh əgwzejni'ine' le'e əñe' yoguə'əte can' chac ĉheto' ni, na' par niĉh güe'e le'e balor.

²³ Beñə' bišə', chonlilažə'əle Xancho Jesocristān' na' Xe' Diozān'. De'e na'anə' so'onšgue' par niĉh yoguə'əle so cuezle binło len xbab de'en yo'o lo'o yičhja'ažda'olen' na' so'onšgue' ca gaquele ĉhe lježjle.

²⁴ Na' Diozān' sotezə soe' gaquālenšgacze' yoguə' le'e chaquele ĉhe Xancho Jesocristān' tozə can' chaquele ĉhe'. De'e na'azən' chzoja' ŋa'a. *Pab*

Cart De'en Bzoj San Pabən' Par Benə' Filipos Ca'

Pabən' chzoje' benə' ca' ža' Filiposən' lao die' ližyan'

¹⁻² Nada' Pab chzoja' cart nga par le'e nita'əle Filiposən' yoguə' le'e nacle lao na' Diozən' laogüe de'en ngoda'əle txen len Cristo Jeso'osən'. Na' leczə chzoja'an par le'e naquə lao na'ale chgüia chyele yeziquə'əchlə benə' ca' chso'onlilažə' Cristən' na' le'e nchojle nacle comision che le'e chonlilažə'əle Cristən' na'. Temtion' na' nada' chnabto' sa'aclenšga Xacho Diozən' na' Xancho Jesocristən' le'e na' so'one' ca so cuezle binlo len xbab de'en yo'o lo'o yichjla'ažda'olen', neto' naquəto' benə' güen xšin Jesocristən'.

Pabən' chone' orasyon par benə' ca' chso'onlilažə' Cristən' Filiposən'

³ Bata'ətezə chona' xbab chele cho'a yelə' choxcwlen che Diozən' can' chonlen'.

⁴ Na' yoguə' las chebe'i la'žda'ogua'ana' catə' chnaba' gaquəlen Diozən' le'e.

⁵ Cho'a yelə' choxcwlen che' de que dezd catə'an gwzolo chonlilažə'əle Jesocristən' xte ža neža, choncho txen par nič benə' zan se'ejle' che dižə' güen dižə' cobə de'en chzejni'in che'enə'.

⁶ Diozən' bagwzolaogüe' chone' to de'e güen lo'o yichjla'ažda'olen'. Na' nežda' gwzoteze' goncze' ca' par nič babeyožən catə'an əžin ža yidə Jesocristən' de'e yoblə.

⁷ Na' naquəczən güen de'en nežda' gwzotezə Diozən' goncze' de'e güen lo'o yichjla'ažda'olen' chedə' chacchgüeida' chele. Diozən' nži'ilažə'e chio'o txen na' le'e chonle txen len nada' la'ana'əczə dia' ližya nga chsed chlo'ida' de que dižə' güen dižə' cobə de'en chzejni'in che Jesocristən' naquən de'e li, na' chona' par nič benə' zanch chso'onlilažə'ene'.

⁸ Nezcze Diozən' chacchgüeida' che yoguə'əle can' chaque Jesocristən' checho.

⁹ Na' chona' orasyon par le'e chnaba' gonšgaczə Diozən' par nič šejəch gaquəchele che ljuežjle, na' gonšgue' le'e yelə' sin' par nič šejni'ile bin' chazlažə' Diozən' yoguə' las.

¹⁰ Gonšgue' ca' par nič gacbe'ile noquə'ənnə' naquə güenchgua gonle yoguə' laste nič yichjla'ažda'olen' gaquan xi'ilažə', na' cui bi dolə' gaple catə'an əžin ža yidə Cristən' yeto.

¹¹ Na' can' sotezə sole gonle de'e güen chedə' zo Jesocristən' chaclene' le'e. Na' šə sotezə socho goncho de'e güen, nachən' əyejlao Diozən' na' leczə əso'elao' benə' le'.

Pabən' cho'e dižə' de que naque' tozə len Cristən' de'en chi' yichje' tloozə de'en chene'e Cristən'

¹² Benə' bišə, che'enda' ənezele de'en dia' ližya nga benə' zan chso'ombi'e dižə' güen dižə' cobə de'en chzejni'in che Jesocristən'.

¹³ Yoguə' soldad ca' benə' ca' chsa'apə liž rein' bazjənezene' de que dia' ližya nga laogüe de'en əchyižjui'a xtižə' Cristən' na' benə' ža' doxenlə lao' syodan' bazjənezene'.

¹⁴ Na' casi yoguə' benə' bišə'əcho ca' bachsa'apəche' balor par chso'onlilažə'e Xancho Cristən' laogüe de'e bagwse'enene' de que bito chžeba' la'ana'əczə dia' ližya nga. Na' de'e na'ana' lega'aque' chso'eche' xtižə' Diozən' sin cui chəsə'əžebe'.

¹⁵ De'e li nita' balə benə' do lažə'əga'aque' chso'one' güen chəsə'əyixjui'e xtižə' Cristən'. Pero yebale' caguə do lažə'əga'aque'enə' chəsə'əyixjui'en, con chse'enene' yoso'ozenag benə' chega'aque' cle ca chia' nada'.

¹⁶ Benə' ca' chəsə'əgue'i nada' chəsə'əyixjui'e xtižə' Cristən' parzə nič əyejlao'ga'aque', caguə chəsə'əyixjui'en do lažə'əga'aque'enə'. Con chse'enene' so'one' par nič lechguale de'e gaquəda' lao dia' ližya nga.

¹⁷ Benə' ca' chsa'aque' chia' na' chsa'aquene' che Cristən' chəsə'əyixjui'e xtižə'enə' do lažə'əga'aque'. Žjənezene' de que Diozən' babe'e latjə dia' ližya nga par chsed chlo'ida' de que dižə' güen dižə' cobə de'en chzejni'in che Jesocristən' naquən de'e li.

¹⁸ Nita' benə' chəsə'əyixjui'e xtižə' Cristən' pero caguə do lažə'əga'aque'. Na' nita' benə' yoblə chəsə'əyixjui'en do lažə'əga'aque'. Pero naquətezə chəsə'əyixjui'e xtižə' Cristən' chebeida', na' bata'ətezəchlə gobeichczədə'.

¹⁹ Nežda' yechoja' güen len yoguə' de'e ca' chac chia' chedə' chonle orasyon chia' na' chaclen Spirit che Jesocristən' nada' de'en leczə naquən Spirit che Diozən'.

²⁰ Na' de'en che'enchgüeida' na' zoa' lez yeyož gona' yoguə'əlo' can' chene'e Diozən' nič cui gaquada' zto' laogüe'enə', na' cui žeba' bitə'ətezə gaquə chia', šə socha' o šə gata'. Na' ca' sa'acbe'i benə' can' bagwsa'acbe'ine' bedote de que Cristən' naque' le'eze-laogüe benə' šao' benə' güen.

²¹ Quinga naquən len nada': Na'a mbana' naca' tozə len Cristən' na' chi' yichja' tloozə de'en chene'ene', na' catə' gata' mbalazəchlə soa' len le'.

²² Šə socha' gvaquə goncha' xšin Diozən' par niç so'ombia' beṇə' le'. Pero bito gaquə əṇia' non' naquəch güen, šə socha' o šə gata'.

²³⁻²⁴ Che'enda' žjəyzoa' len Cristən', la' lechguale mbalazəch soa' len le', pero le'e chyažjele socha' par gaqualena' le'e. De'e na'anə' bito gaquə əṇia' šə güench socha' o šə güench gata'.

²⁵ Zoa' segor chyažjele socha' par gaqualena' le'e na' de'e na'anə' nəzda' socha' len le'e na' gona' par niç šejəch gonlilažə'əlene' na' sole mbalaz de'en chonlilažə'əlene'.

²⁶ Na' güe'ela'ochguale Cristo Jeso'osən' cata' babene' ca soa' len le'e de'e yoblə.

²⁷ Na' šə socha' len le'e o šə cui, legon byen legon can' cheyałə' goncho laogüe de'en bachzenagcho che dižə' güen dižə' cobə de'en chzejni'in che Cristən'. Legon par niç yenda' rson de que yoguə'əle nitə'əczle chech chzenagle che Spirit che Diozən' na' yenda' de que tozə can' chon yoguə'əle xbab na' de que txen chonle xte ga zelao saque'ele par se'ejle'e beṇə' che dižə' güen dižə' cobə de'en chzejni'in che Cristən'.

²⁸ Legon par niç yenda' rson de que bito chžeble beṇə' contr chele ca' bitə'ətezə de'e chso'one' par choso'ošebe' le'e. Na' šə bito chžeble beṇə' ca' choso'ošebe' le'e gwsa'acbe'iljeine' de que Diozən' əgwnežjue' lega'aque' castigw zejlicəne na' gone' par niç le'e cui yeyejle lao yi' gabilən'. Na' le'enə' gone' par niç cui žeble na' par niç əsa'acbe'ine' de'e ca'.

²⁹ De'en chaque Diozən' checho babsi'e xneze par niç chonlilažə'əcho Cristən' na' le'egatezə ca' de'en chaque Diozən' checho babsi'e xneze par niç chyi' chzaquə'əcho laogüe de'en cho'echo xtižə' Cristən'.

³⁰ Bable'ile can' bosə'ochi' bosə'osaquə' beṇə' nada' antslə laogüe de'en chona' xšin Diozən' na' chenczele rson de que leczə can' chac chia' na'a. Na' can' chac chia' nada' leczə can' chac che le'e de'en leczə chonle xšin Diozən'.

2

Cristən' gwlejšyichje' yoguə' de'e güen de'en de che' par bide' yežlyo nga, pero na'a naque' le'ezelaogüe beṇə' blaoch

¹ Cristən' chtipe' lažə'əle. Chaquene' chele na' de'e na'anə' chebeile chzenagle che'. Nəzczele bazo Spirit che Diozən' len le'e. Na' leczə bachon Cristən' par niç chaquale che ljuežjle na' cheyašə'əga'achelene'.

² De'e na'anə' chneyoida' le'e legac toza len ljuežjle. Na' le'e gaque che ljuežjle tole yetole na' tozə ca legon yoguə'əle xbab. Legon ca' par niç lechguale yebeida'.

³ Bitə gonle ca gaquə güen che cuinzle, na' nic gonle ca əso'elao beṇə' le'e. Bitə gon cuinle xen. Na' to tole legon xbab güen che notə'ətezə can' chonle len beṇə' žjənaquəch beṇə' blao ca le'e.

⁴ Na' to tole le'e yeyiljažə' naclə gonle par niç gaquə güen che ljuežjle caguə che cuinzle.

⁵⁻⁷ Naquə yichjla'aždao' Cristo Jeso'osən' cayaṇə'an naquə yichjla'aždao' Xe' Diozən' na' nape' yelə' gwnabia' na' yelə' bala'an tozəczə can' napə Xe'enə'. Pero bito que bchojyichj Cristo Jeso'osən' yelə' gwnabia' che'enə' na' yelə' bala'an che'enə'. Bchojyichje' de'e ca' par niç golje' goque' beṇəch na' goque' ca notə'ətezə beṇə' güen žin. Na' chio'o leczə cheyałə' goncho xbab ca xbabən' ben Cristo Jeso'osən'.

⁸ Bzenague' che Diozən', bžexjw yichje' be'e latjə gwso'ot beṇə' le' bosə'ode'ene' le'e yag corozən' can' chso'one' len beṇə' ca' žjənaquə beṇə' mal juisy.

⁹ Na' de'en bsanlažə' cuine', Diozən' be'ene' yelə' bala'an xen mazəchlə ca de'en gotə' che' antslə. Na' Diozən' bito cho'e notə'ətezəchlə beṇəch o angl yelə' bala'an xen ca de'en be'e Cristo Jeso'osən'. Na' bene' par niç naque' le'ezelaogüe beṇə' blao.

¹⁰⁻¹¹ Bene' ca' par niç yoguə' beṇə' ža' yoban' na' beṇə' ža' yežlyo nga na' nochlə beṇə' bagwsa'at, na' len yoguə' angl ca' yesə'əzo xibga'aque' lao Cristo Jeso'osən' yesə'əne' de que naque' Xanga'aque'. Na' len yoguə' de'e xio' ca' na' angl bzelao ca' yesə'əzo xibga'acquən laogüe'enə', yesə'ənan de que naque' Xanga'aquei. Na' Xacho Diozən' si'e yelə' bala'an catə'an gaquə ca'.

Chio'o chonlilažə'əcho Cristən' gwxaquə'əlebecho ca beljw de'en choso'ose'eni' lao naquə žčhol!

¹² Na'a ža chacda' chele na' chebeida' de que chzenagczle che Diozən' catə'an zoa' len le'e. Na' chatə'yoida' le'e gwzenagle che' mazəchlə na'a cui zoa' len le'e. Legon yoguə'alol de'en chene'e Diozən' par niç la'alaon de que babebeje' le'e xni'a de'e malən', na' legonən do yichj do lažə'əle na' con cuidad, la' nəzczele Diozən' gone' chio'o castigw šə cui goncho can' chene'ene'.

¹³ Dioz na'anə' chocobe' xbab chelen' par niç chene'ele chonle de'e güen can' chazlaže'enə' na' leczə'enə' chaclene' le'e par niç chonlen.

¹⁴ Legon bitə'ətezə əṇa Diozən' gonle sin cui əže'ešə'əle na' sin cui gaquəyožle.

¹⁵ Legon ca' par niçh cui bi dolə' gapple na' cui bi de'e mal šo'o lo'o yichjla'ažda'olen'. Diozən' chene'ene' de que chio'o naccho xi'ine' bitobi de'e mal ta' achen yichjla'ažda'ochon', la'ana'əczə yežlyo nga chdacho entr beŋə' ca' chso'on clelə na' beŋə' zjənaquə beŋə' mal juisy, na' de'e na'ana' gwxaquə'əlebecho ca beljw ca' de'en choso'ose'eni' lao naquə žčhol.

¹⁶ Na' legwzejni'i beŋə' dižə' güen dižə' cobə de'en chzejni'in che Cristan' par niçh se'ejle'e chei na' gatə' yelə' mban zejlicane chega'aque'. Šə gonlə ca' yebeida' le'e catə'an əžin ža yidə Cristan' de'e yoblə, čhedə' la' tzejne de que bzenagle che de'en bsed blo'ida' le'e, caguə con bendada' xšin Diozən' bedote.

¹⁷ Le'e chebeile de'en chonlilažə'əle Cristan', na' nada' chebeida' de'en babi'a xtižə' Cristan' len le'e par niçh chonlilažə'əlene'. Na' gwzocza' yebeida' len le'e la'ana'əczə šə so'ot beŋə' nada' por ni che de'en əchyixjui'a xtižə' Cristan'.

¹⁸ Le'egatezə ca' le'e yebei txen len nada'.

Temtion' na' Epafroditon'

¹⁹ Na' zoa' lez gon Xancho Jeso'osən' par niçh yob gaquə seļa'a Temtion' gan' zolen' par yeyo'e rson nac chac chele. Na' lechgualə yeyacxenlaža'a cata' bagwŋezda' nac chac chele.

²⁰ Notoch no zo no əseļa'a beŋə' gon xbab chele do yichj do laže'e can' chon Temtion'.

²¹ Beŋə' yeziquə'əchlə zjəchi' yichjga'aque' bi de'en chse'enene' gaquə chega'aque', na' bito zjəchi' yichjga'aque' əye'elao' Cristo Jeso'osən'.

²² Nezele can' bachon Temtion' güen yoguə' laste. Na' ca naquən' chona' par niçh so'ombia'ach beŋə' dižə' güen dižə' cobə de'en chzejni'in che Cristo Jeso'osən', chaclene' nada' can' chon to beŋə' len xə'.

²³ De'e na'ana' bagwleja'ane' par əseļa'ane' gan' zolen' na' əseļa'ane' lgüegwzə catə' bagotə'əbia' šə gochoja' ližyan' o šə cui.

²⁴ Na' chonlilaža'a de que Xancho Cristo Jeso'osən' gone' par niçh lencza' nada' yob yida' gan' zolen'.

²⁵ Pero na' por mientrzə chacda' chonən byen yoseļa'a beŋə' bišə'əcho Epafroditon' par yeyede' gan' zolen'. Bselə'əlene' nga par goclene' nada', na' babene' txen len nada' ca naquə xšin Diozən' de'en bento' na' len yoguə' can' bagwdiləlento' gwxiye'ena'.

²⁶ Che'enchgüeine' yežagle de'e yoblə, čhedə' zoe' trist de'en benele rson gocšenene'.

²⁷ De'e li bašə gate', pero na' Diozən' beyašə' beži'ilaže'ene' na' bene' par niçh beyaquene'. Na' caguə Epafrodito na'azən' beyašə' beži'ilaže'e sino lencza' nada'ana' par niçh bito gotə'əch de'e soa' trist.

²⁸ De'e na'ana' chosa'ane' yeyede' lgüegwzə par niçh ca' yebeile na' lencza' nada' cuitec soa' trist che le'e šə ca'.

²⁹ Legon güen len le' cata' yele'e na' legwlo'ine' de que chebeichgüeile can' babene'ena', čhedə' nacle txen chonlilažə'əle Xancho Cristo Jeso'osən'. Beŋə' ca' chso'on can' baben Epafroditon' zjəzaque'e par güe'ega'acchone' yelə' bala'an.

³⁰ Epafroditon' bsanlažə' cuine' gate' par gone' xšin Cristan' de'en bselə'əlene' nga gone', na' de'e li gocšenchgüeine' xte yelatə'əzə cui gote'. Gocwlenchgüe' nada' can' gon le'e žalə' zole nga.

3

Can' goncho par gaccho beŋə' güen lao Diozən'

¹ Na'a ža beŋə' bišə', nedech de'en əŋia' le'e. Cheyalə' sotezə socho yebeicho čhedə' ngodə'əcho txen len Xancho Cristan'. Bito chacda' zed chzoja' che de'en babzoczca' antslə, čhedə' chyazjele gonchle xbab chei.

² Legapə cuidad niçh cui gwzenagle che beŋə' ca' chšə'əne' cheyalə' sole seŋy de'en ne' sirconsionə. Lega'aque' lechgualə zjənaljəga'acquene' na' chso'one' de'e mal.

³ Na' chio'o de to seŋy checho par nezecho naccho xi'in Dioz. Seŋyan' naquən ca de'en baben Diozən' chio'o Spirit che'ena' par chaclenan chio'o cho'ela'ochone'. Chebeicho de'en chonlilažə'əcho Cristo Jeso'osən' na' nezecho bito chyazjecho seŋy lao cuerp chechon' par gaccho xi'in Diozən'.

⁴⁻⁶ Nada' naca' beŋə' Izrael na' golja' lao dia che de'e Benjaminə' na' boso'ozoe' nada' seŋy che sirconsionə to xmanzəda'. Na' goljəlena' dižə' ebreo laogüe de'en zjənaquə xaxna'a ca' beŋə' ebreo. Na' ca naquə lei de'en bzoj de'e Moizezən', goca' txen len beŋə' fariseo ca' beŋə' ca' zjəchi'ichgua yichjga'aque' to to pont che lein'. Na' de'e tant gwche' yichja' che de'e ca' zjəšə'ənao beŋə' Izrael gwlaž čhia' ca' xte blagzejə blagzida' beŋə' ca' chso'onlilažə' Cristan'. Na' ca naquə de'en na lein' cheyalə' goncho na' de'en nan cui goncho, bzenaga' che yoguə'an xte ga zelao gwxaquə'əda'. Žalə' chacda' chebei Diozən' nada' por de'e ca', guaquə gona' xbab de que chebeichene' nada' mazəchlə can' chebeine' len beŋə' ca' yeziquə'əchlə.

⁷ Yoguə'ənnə' bəna' xbab əsa'aclenən nada' par niç Diozən' yebeine' nada', pero n̄a'a bachache'ida' bito gwsa'aclenən nada'. Na' benən byen gwlejejiçhğa'aca'an par niç benlilaža'a Cristən'.

⁸ De'en banombi'a Cristo Jeso'osən' ben' naquə Xana' zaquə'əchguan par nada'. De'e na'anə' bitoch bibi zjəzaquə' yoguə'əloł de'e ca' goquəda' antslə əsa'aclenən nada'. De'en banombi'ane' na'anə' bagwnit yoguə' de'e ca' bebeida' antslə, na' n̄a'a nona' lega'aquən ca to beb de'e gwcho'ona' par niç gombia'acha'ane'.

⁹ Na' lecza nona' lega'aquən ca to beb de'e gwcho'ona' par niç gacbia' de que ngoda'a txen len Cristən'. Che'enda' əna Diozən' chia' de que naca' beñə' güen laogüe'enə'. Eñe' ca' por ni che de'en chonlilaža'a Cristən', caguə por ni che de'en chona' complir bi de'en na lein'.

¹⁰ Che'enda' gombia'acha' Cristən', na' che'enda' yocobəche' yiçhja'aždaogua'anə'. De'en beyas bebane' ladjo beñə' guat ca'anə' chac yocobe' yiçhja'aždaogua'anə'. Na' che'enda' chi' saca'a de'en chona' xšin Cristən' can' gwdi' gwxaque'enə' na' lecza che'enda' gacbe'ichda' bi zejen de'en ngoda'a txen len le' catə'ən gwsə'ot beñə' le'.

¹¹ Can' chzo chbeza' n̄a'a çhedə' leçhguale che'enda' yolis yosban Diozən' nada' ladjo beñə' guat ca' catə' bagota'.

Cho'elaža'a chona' par niç gaquə yiçhja'ažda'ogua'an can' naquə yiçhja'aždao' Cristo Jeso'osən'

¹² Bito ənia' de que baç naquə yiçhja'aždaogua'anə' can' che'enda' gaquən, la' bito n̄e'e gaquən can' naquə yiçhja'aždao' Cristo Jeso'osən'. Pero na' cheyiłjalaža'a naclə gona' par niç ca' gaquə yiçhja'ažda'ogua'anə' can' naquə yiçhja'aždao' Cristo Jeso'osən', la' par nan' gwleje' nada' naca' xi'ne'.

¹³ Beñə' bišə' nežda' bitonə' gac yiçhja'ažda'ogua' can' che'enda' gaquən, pero babchojiçhja' yoguə'əloł de'en goquə de'e zaquə'e par nada' antslə, len bi de'en bəna', çhedə' bagocbe'ida' bitobi zjəzaquə'ən. Na' tlaozə de'en chi' yiçhja' n̄a'a de'en cho'elaža'a chona' can' chene'e Diozən' par niç gaquə yiçhja'ažda'ogua'anə' can' naquə yiçhja'aždao' Cristo Jeso'osən'.

¹⁴ Zaquə'əchguan par nada' de'en gwlej Diozən' nada' par yežina' yoban' gan' zo'enə' laogüe de'en chonlilaža'a Cristo Jeso'osən'. Na' de'e na'anə' cho'elaža'a chona' can' chsa'azlaže'ena' par niç gon Diozən' ca gaquə yiçhja'ažda'ogua'anə' can' naquə yiçhja'aždao' Cristo Jeso'osən'.

¹⁵ Na' baltezcho šə bazda chaccho can' chene'e Cristən' gaccho cheyalə' cuejiçhjo de'e ca' goquecho zjənaquən de'e zaquə'e par chio'o antslə na' cheyalə' cue' yiçhjo par goncho ca gaquə yiçhja'ažda'ochon' can' naquə yiçhja'ažda'ogüe'ena'. Na' šə nole n̄e'e yo'ole bichlə xbab yoblə Diozən' gone' ca gacbe'ile.

¹⁶ Na' cheyalə' šejəchcho goncho can' babzejni' Diozən' chio'o goncho.

¹⁷ Beñə' bišə' yoguə'əle legon can' chona' nada', na' can' chso'on yeziquə'əchlə beñə' ca' bachso'on can' chonto'ona'.

¹⁸ De'e yoblə ənia' le'e can' bagwnia' zan las antslə, de que nitə' beñə' zan beñə' chso'one' ca çnezecho de'en chsa'aquene' bito bi zaquə'ən de'en gwdiçjw Cristən' xtolə'əchon' le'e yag corozən'. Chbeža' de'en nitə' beñə' chso'on ca'.

¹⁹ Yesə'əbiayi' beñə' ca' çhedə' la' lguə'a so'ela'ogüe'e Diozən' con chso'elažə' chse'ej chsa'ogüe' na' chso'one' bichlə de'en na cuerp çhega'aque'ena'. Chesyə'əbeine' chso'one' de'en naquə de'e yełə' zto', na' zjəchi' yiçhja'aque' tlaozə de'en chac yežlyo nga.

²⁰ Na' chio'o ža, bitoch choncho xbab de que yežlyo nga naquən lažcho, sino choncho xbabən' de que lažchon' naquan yoban' gan' za' Xancho Jesocristən' ben' babebej chio'o xni'a de'e malən' na' yide' nga de'e yoblə.

²¹ Na' catə'ən yide'ena' gone' par niç cuerp çhecho de belə' chenna' yeyaquən to cuerp cobə de'en gaquə leçhguale güen can' naquə cuerp che le'ena'. Gone' ca' çhedə' nape' yełə' guac par niç bitə'ətezə de'e zjəde yoso'ozenaguən che'.

4

Cheyalə' yebeicho de'en chonlilaža'əcho Xancho Jesocristən'

¹ Beñə' bišə' dao', chacda' chele na' che'ençgüeida' le'i lježjcho. Chebeichgüeida' de'en zotezə zole chonlilaža'əle Jesocristən', na' por le'e soçhguə' mbalaz. De'e na'anə' gonçhechlažə'əšgacze gonlilaža'əle Xancho Jesocristən'.

² Na' chatə'əyoida' le' Ebodia na' lecza ca' le' Sintique, lešoğa binlə legon txen tole yetole çhedə' çoptele chonlilaža'əle Xancho'.

³ Na' le' Sinsigos, len' babeno' xšin Diozən' do yiçh do lažo'o txen len nada', lecza çhneyoida' le' gaquəleno' beñə' zancho Ebodian' na' Sintiquen' çhedə' lega'aque' lecza gwsə'one' xšin Diozən' txen len nada' catə'ən gwdiçjju' a dižə' güen dižə' cobə de'en çzejni'in che Jesocristən'

gan' zolen'. Na' lenczə Clementən' na' yebałə beņə' ljuəzjcho ca' gwso'one' txen len nada'. Na' zjənyoj laga'aque'ena' le'e libr che Diozən' gan' zjənyoj la yogua' beņə' bazjənapə yelə' mban zejlicane.

⁴ Le'e yebei do tyempte de'en chonlilažə'əle Xancho Jesocrisən'. De'e yoblə əchnia', le'e yebei.

⁵ Legon par ničh yogua'əloł beņə' yesə'əneze' de que nacle beņə' gačjwlažə' čhedə' bazon yidə Xančon' de'e yoblə.

⁶ Bitə gaqule tolə bitə'əteze de'en chac chele. Legon orasyon lao Diozən' che yogua' de'en chac na' nable yelə' chaclen che'ena' na' leczə güe'elene' yelə' chočwlen catə' bi de'en ənabelene'.

⁷ Šə gonle ca' Diozən' gaquəlene' le'e par so cuezle binlo len xbab de'en yo'o lo'o yichjla'ažda'olen' do tyempte xte ni que gache'ile bixčhen' bazo chbezle ca'. Gaquəlene' le'e čhedə' ngoda'əcho txen len Cristo Jeso'osən'.

Cue' yichjcho che de'e ca' zjənaquə de'e güen

⁸ Na' yeto' consejw de'en nga čona' le'e beņə' bišə', cue' yichjle par güe'ele por dižə' li, par gonle ca beņə' yoblə əsa'ape' le'e respet, par gonle de'e zda licha, na' par gonle de'e cui bi de'e mal nsa'. Cue' yichjle par gacle beņə' šao', na' par gonle de'en zjəneze beņəčən' zjənaquən de'e güen. Bitə'əteze de'e zaque'e lao Diozən' na' bitə'əteze de'en chebei Diozən', che lega'aquənnə' cue' yichjle.

⁹ Bzenagle čhia' catə' bzejni'ida' le'e bin' cheyałə' gonle, na' baben bable'iczele čona' ca'. Lesoteza leso legon can' bagwnia' le'e. Na' šə gonle ca', Dioz ben' čon par chzo chbezcho binlo len xbab de'en yo'o lo'o yichjla'ažda'ochon' soteze soe' gaquəlene' le'e.

Can' gwsa'aclen beņə' Filipos ca' Apostol Pabən'

¹⁰ Chebeichgüeida' lao Xancho Cristo Jeso'osən' de que de'e yoblə na'a bač blo'ile can' čonle xbab čhia' ca' de'en bselə'əle de'en goquəlen nada'. Na' nezda' čonczle xbab čhia'ana', pero cuiņə' goņən gaquəlenle nada' antslə.

¹¹ Na' chebeida' de'en bselə'əlennə', caguə por ni che de'e byažjda' bi de'en byažjda'. Diozən' babzejni'ine' nada' par ničh zoa' mbalaz catə' de de'en čhyažjda' na' catə' cui bi bi de.

¹² Yo'olaocza' yelə' yašə' yelə' zi', na' yo'olaocza' yelə' šao'. Diozən' babzejni'ine' nada' par zoa' mbalaz bitə'əteze chac la'anə' catə' de de'e che'ej čaogua' o la'anə' catə' chdona', na' la'anə' catə' de bichlə de'en čhyažjda' o catə' cui bi bi de.

¹³ Chac čona' bitə'əteze de'e cheyałə' gona', čhedə' ngoda'a txen len Cristən' ben' čon nada' fuers balor.

¹⁴ Pero ca naquən' goclenle nada', naquən de'e güenčgua de'en čonle txen len nada' lao de'en čhi' čzaca'a.

¹⁵ Na' le'e nitə'əle Filiposən' nezele can' goquəlenle nada' catə'en bagoc to tyemp dao' bedatixjue'ida' le'e dižə' güen dižə' cobə de'en chzejni'in che Cristən' de'e neche, na' babenən byen beza'a Masedonian'. Caguə nochlə beņə' ca' chesə'ədopə chesə'əžag par čso'elaogüe' Cristən' gwso'on txen len nada' par yoso'osele'e mech de'en gaquəlen nada', pero na' le'e bselə'əle de'en bčhina'.

¹⁶ Na' caguə ca na'azən' bselə'əlen, leczə bselə'əlen yeto čop las catə' gwzoa' Tesalonican' par bi de'en byažjda'.

¹⁷ Caguə de'e čzelaža'a bi de'en čonle nada' sino čzelaža'a gončle de'e güen par ničh Diozən' yebeichene' le'e.

¹⁸ Doxen de'en bselə'əle len Epafroditon' bač gwxi'an na' bitoch bi bi čhyažjda', de'e sčha'o bade čhia' na'a. Na' de'en bselə'əlen' gwxaquə'əleben ca to yal de'en čhla' zix de'e čzey bčozən' lao Diozən'. Diozən' chebeichgüeine' can' babenlen'.

¹⁹ Yo'o lao na' Dioz čechon' yogua'əlołte de'en de par əgwnežjue'en con non' čene'ene'. Na' gone' de'e güen juisy par ničh gatə' yogua'əloł de'e čhyažjele, čhedə' ngoda'əle txen len Cristo Jeso'osən'.

²⁰ Ledoye'elaoch Xacho Diozən' zejlicane. Can' gonšgacžcho.

Bzeine' lega'aque' dižə'

²¹ Le'e gguap diox yogua'əloł beņə' Filipos ca' beņə' zjənaquə lažə' na' Diozən' laogüe de'en zjəngode'e txen len Jesocrisən'. Na' beņə' bišə'əcho ca' nitə' txen len nada' nga čoso'oguape' le'e diox.

²² Na' leczə ca' yogua' beņə' Roma quinga beņə' bagwlej Diozən' par zjənaque' lažə' ne'ena' čoso'oguape' le'e diox, na' mazəchlə beņə' ca' čso'on zin liž rein' čoso'oguape' le'e diox.

²³ Xancho Jesocrisən' sošgüe' gaquəlenšgacze' le'e len xbab de'en yo'o lo'o yichjla'ažda'olen'. De'e na'azən' de'en čzoja' na'a. *Pab*

Cart De'en Bzoj San Pabən' Par Benə' Colosas Ca'

Pabən' chzoje' benə' ca' chso'elao' Jesocristán' Colosasən'

¹⁻² Nada' Pab naca' apostol che Jesocristán' con can' gwnalaza' Diozən'. Nada' chzoja' le'e nita'əle Colosasən' le'e banacle laža' na' Diozən' laogüe de'en ngoda'əle txen len Cristən', chedə' txen len neto' naccho family che'enə'. Benə' bišə'əcho Temtion' na' nada' chnabto' lao Xacho Diozən' sotezə soe' gaquälənsğacze' le'e na' gonšgüe' ca so cuezle binlo len xbab de'en yo'o lo'o yichjla'ažda' olen'.

Pabən' chone' orasyonna' par benə' ca' chso'onlilažə' Cristən' Colosasən'

³ Yoguə' las catə' chona' orasyon par le'e cho'a yelə' choxcwlen che Diozən' par le'e, Dioz ben' naquə Xa Xancho Jesocristán'.

⁴ Babenda' rson can' chonlilažə'əle Jesocristán' na' can' chaquele che yeziqə'əchlə benə' bagwlej Diozən' par zjənaque' laža' ne'enə'.

⁵ Cho'a yelə' choxcwlen che Diozən' de que lenle zocho lez žjəyechocho len Diozən', can' gweyjni'ile catə'an gwzola bzenagle che dižə' güen dižə' cobə che Jesocristán' de'en naquən de'e li.

⁶ Dižə' li che Jesocristán' de'en chzenagle chei bagosə'əlasən doxenlə na' benə' ca' choso'ozənağ chei ga yoblə leczə chso'one' güen na' choso'ozəjni'ine'en benə' yoblə can' chon le'e dezd žan' catə'an bzenaglen de'e nech na' gwnezele de que de'e li nzi'lilažə' Diozən' le'e.

⁷ Epafras da'onə' bzejni'ine' le'e xtižə' Cristən' l'gua'a nada'. Chone' xšin Cristən' can' chona' par chaclene' le'e na' zotezə zoe' chone' complir can' cheyalə' gone'.

⁸ Epafras na'anə' bagwne' nada' can' baben Spirit che Diozən' par niçh chaquele che ljuežjle na' chachteile chia'.

⁹ De'e na'anə' dezd catə'an gwnezdə' can' chonlen', yoguə' laste chona' orasyon lao Diozən' par le'e chnaba' gon Spirit che'enə' le'e yoguə' claste yelə' sin' na' yelə' chejni'i par niçh ca' ənezele tcho'a tšao' can' chene'ene' gonle.

¹⁰ Chnaba' ənezele can' chene'ene' gonle par niçh ca' šejəchle gonle can' cheyalə' gon chio'o nombi'əcho Xanchon' na' gonle doxen can' chazlažə'enə', gonle yoguə' claste de'e güen, na' šejəch gombia'achle Diozən'.

¹¹ Na' chnaba' gaquälən Diozən' le'e len yelə' guac xen che'enə' par niçh gaple yelə' chxenlažə' na' sotezə sole gonlilažə'əlene' bitə'ətezə de'en chac na' sole mbalaz. Chnaba' gaquäləne' le'e ca' chedə' nape' le'ezelaogüe yelə' guac xen.

¹² Na' leczə güe'ele yelə' choxcwlen che Xacho Diozən' chedə' le'enə' bene' par niçh txen len yeziqə'əchlə benə' ca' bagwleje' par zjənaque' laža' ne'enə' gaquə žjəyechocho len le' gan' chey che'eni'ichgua.

¹³ Diozən' babebeje' chio'o xni'a gwxiye'enə' de'en chnabia' benə' ca' chsa'aš lo'o de'e žcholən' na' bene' par niçh chnabia' Xi'ine' Jesocristán' chio'o ben' chaquene' chei.

¹⁴ Xi'ine' Jesocristán' na'anə' gwduxjue' xtolə'əchon' par niçh Diozən' chezi'ixene' checho.

Cristən' chozoe' chio'o binlo len Diozən'

¹⁵ Yichjla'aždao' Cristən' naquən cayaṇə'an naquə yichjla'aždao' Xə' Diozən' ben' cui no chle'i, na' tozə can' chso'one'. Bazoczə Cristən' catə'an cuiṇə' xə yežlyon', catə'an cuiṇə' nita' angl ca' na' benəçh ca', na' catə' cuiṇə' gatə' bitə'ətezə de'en zjəde.

¹⁶ Le'enə' bene' yoban' na' yežlyon' na' bene' benə' ža' yoban' na' benə' ža' yežlyon', na' bia yixə' ca', na' biquə'əchlə de'en zjəde yoban' na' yežlyon'. Bene' par niçh zjəde de'e ca' chle'icho na' de'e ca' cui chle'icho. Bene' par niçh nita' angl əblao ca', nita' spirit mal ca' chəsə'anabia'an benə' ca' cui choso'ozənağ che Diozən', nita' de'e xio' na' nita' biquə'əchlə de'e ca' zjənapə poder. Na' Crist nan' bene' par niçh nita' de'e ca', na' nita' benə' ca', niçh si'e yelə' bala'an.

¹⁷ Cristən' bazoczə' catə'an cuiṇə' nita' benəçh, angl, bia yixə' na' biquə'əchlə de'en zjəde, na' noe' che to toe' zjənaque' can' zjənaque' na' to ton zjənaquən can' zjənaquən, chedə' Cristən' none' mendad par chac ca'.

¹⁸ Na' Crist na'anə' chnabi'e chio'o chdopə chžagcho cho'ela'ochone' na' len' benə' chio'o yelə' mban zejlicanən'. Len' naque' benə' nech bebane' ladjo benə' guat ca' par chnabi'e na' de'e na'anə' naque' le'ezelaogüe benə' blao na' chnabi'e yoguə'əlol benə' na' biquə'əchlə.

¹⁹ Diozən' chazlažə'e de que cayaṇə'an naquə yichjla'aždaogüe'enə' ca'aczən' naquə yichjla'aždao' Xi'ine' Cristən', cayaṇə'an naquə yelə' guac che Diozən' ca'aczən' naquə yelə' guac che Cristən', na' tozəczə can' chso'one'.

²⁰ Na' leczə chazlažə' Diozən' de que yoguə' benə' ža' yoban' na' benə' ža' yežlyo nga guac yəsə'ənite'e binlo len le' laogüe de'en blalj xchen Cristən' le'e yag corozən'.

²¹⁻²² Goccho beṇə' contr che Diozən' antslə por ni che xbab malən' de'en gwyo'o lo'o yichjla' aʒda'ochon' na' por ni che de'e malən' bencho. Pero ṇa'a Cristən' babozoe' chio'o binlo len Diozən' ca de'en bnežjw cuine' por ni checho catə'an gwso'ote'ene'ena'. Babozoe' chio'o binlo len Diozən' par niç ca' gaccho beṇə' la'aʒdao' xi'ilažə' na' bito bi dolə' gapcho catə'an yežincho gan' zo Diozən' na' catə'an əche'e chio'o laogüe'ena', na' notono soi əgwcuış chio'o lao Diozən'.

²³ Na' yežincho laogüe'ena' sin cui bi dolə' napcho šə zotezə zocho chonlilažə'əcho Cristən', šə zocho len tozə xbab, na' šə zocho lez žjəyechocho len Diozən' laogüe' de'en babzenagcho che dižə' güen dižə' cobə che Cristən'. Dižə' güen dižə' cobə che' na'ana' bagosə' gwlałjən gatə'ətezə ža' beṇəçhən' na' Dioz nan' gwleje' nada' Pab par niç əchyixjui'an.

Pabən' chaclene' beṇə' ca' chesə'əadopə chesə'əžag chso'elaogüe'e Cristən'

²⁴ Chebeida' la'ana'əczə chyi' chzaca'a laogüe' de'en əchyixjui'a xtižə' Cristən' len le'e cui nacle beṇə' Izrael, na' che'enda' gaquə'chia' bichlə de'en ne'e chac falt par yeyož gaquəlena' le'e. Cristən' gwdi' gwxaque'e par goclene' chio'o chdopə chžagcho cho'ela'ochone', chio'o gwxaquə'əlebecho ca cuerp che'ena', na' can' chac chia' par chaquəlena' le'e.

²⁵ Diozən' gwleje' nada' par chona' xšine'ena' entr le'e cui nacle beṇə' Izrael par niç ca' gwzejni'ida' le'e doxen can' na' xtižə'ena'.

²⁶ Dezd gwlałte de de'en bito no gwyejni'i can' na' xtižə'ena' pero ṇa'a babzejni'i Diozən' chio'o len, chio'o bagwleje' par naccho lažə' ne'ena'.

²⁷ Diozən' chene'ene' ənezecho de que lechgualə de'e güen juisy chone' len notə'ətezcho chonlilažə'əchone' la'ana'əczə sin naccho beṇə' Izrael. De'e na'ana' bachzejni'ine' chio'o de'en cui no gwneze antslə de que chio'o chonlilažə'əcho Cristən' ngoda'əcho txen len le' na' de'e na'ana' zocho lez žjəyechocho len Diozən' gan' chey che'eni'ichgua.

²⁸ Cho'elento' yoguə'əloł beṇə' dižə' che Cristən' chatə'əyoiga'aqueto'one' par niç yoso'ozenague' che' na' chzejni'iga'aqueto'one' naquan' ne'. Cho'eto' xtižə'en len yoguə' clas yelə' sin' par niç ca' catə' yežincho lao Diozən' yoguə' beṇə' ca' bosə'ozenag cheto' əsa'aque' cayaṇə'an chene'e Diozən' əsa'aque' laogüe' de'en zjəngode'e txen len Cristən' can' ngoda' chio'o.

²⁹ Na' de'e na'ana' chonchgua' xte ga zelao chzaquə'əda' əchyixjui'a xtižə'ena' len doxen fuers balor de'en chon Cristən' nada'.

2

¹⁻² Na' che'enda' ənezele can' chona' xte ga zelao chzaquə'əda' par niç əchtipa' lažə'əle na' lažə' beṇə' ca' nitə' Laodisean' na' yeziquə'əchlə beṇə' ca' chso'onlilažə' Cristən' do na', beṇə' cuina' gombi'aga'aca'. Chona' xte ga zelao chzaquə'əda' par niç yoguə'əle gaque che ljuəžjle tole yetole na' par niç nezele tcho'a tšao' can' cheyałə' gonle xbab yoguə' laste na' par niç šejni'ile che Cristən'. Cui no gwneze antslə de'en bachzejni'i Diozən' chio'o che Cristən'.

³ Na' šə bin' chene'echo nezecho, doxen yelə' sin' na' yelə' chejni'i che Diozən' napə Cristən' len par chzejni'ine'en chio'o.

⁴ Echnia' ca' par niç cui no yopei le'e len dižə' yoblə par xoayagle.

⁵ La'ana'əczə bito zoa' na' len le'e, syempr chona' xbab chele na' chebeida' de'en chonle can' cheyałə' gonle na' zotezə zole chonlilažə'əle Cristən'.

⁶ De'e na'ana' con can' babsedle che Jesocristən' na' can' bachonlilažə'əlene' ca Xanle, con ca'ašgaczan' sotezə sole len le'.

⁷ Na' le'e sotezə lešo legonlilažə' Cristən' can' babzejni'i Epafrasən' le'e par niç gacle ca to yag de'e chaz loina' zitjw na' chcha'ochguan. Na' le'e güe'echgua yelə' choxcwlen che Diozən' can' chaclene' le'e.

Cristən' babocobe' yichjla' aʒda'ochon'

⁸ Le'e gapə cuidad par niç notono yesə'əxoayag le'e len xbab chega'acze' par ṇaole de'en choso'osed choso'olo'ine'. Lega'aque' choso'osed choso'olo'ine' de'en cui bi zaquə' che costombr gol ca' de'en zjədə, che de'en ye'ej gaocho, che ža ca' na' che cuerp chechon' lguə'a yoso'osed yoso'olo'ine' che Cristən'.

⁹ Cristən' lao goque' beṇə' belə' chen goc yichjla'aʒdaogüe'ena' doxen can' naquə yichjla'aʒdao' Diozən' na' ca'acznən' naque' ṇa'a. Gwdape' yelə' guac cayaṇə'an napə Diozən' na' ca'acznən' nape'en ṇa'a. Bene' tozəczə can' chon Diozən' na' ca'acznən' chone' ṇa'a.

¹⁰ Na' Cristən' chnabi'ache' ca notə'ətezə angl əblao na' notə'ətezə de'e xio'. Na' chio'o laogüe' de'en ngoda'əcho txen len Cristən' bitoch bi bi chyažjəchecho par so cuzcho binlo.

¹¹ Na' leczə de'en ngoda'əcho txen len le' zocho to señy de'en zəjen ca señy de'en ne' sirconsionṇə'. Bito naquan señy de'en bzo beṇə' lao cuerp chechon', sino de'en bagwlejiyichjcho cuich chzenagcho che la'aʒda'omalcho na'ana'. Cristən' babocobe' yichjla'aʒda'ochon'.

¹² Na' ca de'en bagwchoacho nisen' zejen ca gotcho na' bgašə'əcho txen len Cristən' na' leczə zejen ca bolis bosban Diozən' chio'o ladjo beṇə' guat ca'. Diozən' bolis bosbane' Cristən' ladjo beṇə' guat ca', na' catə'an beṇiləžə'əchone' par bocobe' yichjla'ažda'ochon', canan' bene' par nič cuich naccho ca beṇə' guat.

¹³ Antslə gwxaquə'əlebecho ca beṇə' guat len yichjla'ažda'ochon' chedə' bito bzenagcho che Diozən', bzenagzecho che la'ažda'omalchon'. Pero na' can' ben Diozən' par nič Cristən' bebane' ladjo beṇə' guat ca', leczə can' bocobe' yichjla'ažda'ochon' par nič cuich naccho ca beṇə' guat na' babezi'ixene' yoguə'əte xtolə'əchon'.

¹⁴ Diozən' bsele'e Cristən' gwdixjue' xtolə'əchon' le'e yag corozən' par nič cui si'icho castigw por ni che de'en cui bencho complir yoguə'əlol can' na' lei che'ena' de'en nyojən'. De'e na'anə' lein' bitoch güe'en dižə' contr chio'o can' benən antslə.

¹⁵ Diozən' beque'e yelə' gwnabia' che angl bzelaο ca' na' de'e xio' ca' par nič cuich yesə'anabia'an chio'o. Blo'ine' benəchən' de que banitə'an xni'ena' catə'an Cristən' gwdixjue' xtolə'əchon' le'e yag corozən'.

Cheyalə' cuec yichjcho de'e ca' zjəzaquə' len Diozən'

¹⁶ De'e na'ana' bito gwzenagle che beṇə' ca' chəsə'ana chonle de'e mal ca de'en bito naole costombr ca' de'en na' lei de'en bzoj de'e Moizezən' na' bichlə costombr chega'aque'ena' de'en chəsə'ane' cheyalə' ye'ej gaocho, o goncho lni, o can' goncho catə' naquə bio' che'en, o de'en cheyalə' gomba'ancho ža de'en chsa'aque'ena' naquən de'e žialao.

¹⁷ Diozən' bene' par nič de'e Moizezən' bzoje' che costombr ca' parzə nič bzejni'ine' chio'o lata' dao' che Cristən' antslə ze'e yide'. Pero na'a babidə Cristən' na' costombr ca' bito zjəzaquə'an can' zaquə' de'en nombi'acho Cristən'.

¹⁸ Nitə' beṇə' choso'osed choso'olo'ine' de que cheyalə' gon cuincho ca to de'e cui bi zaquə' na' cheyalə' güe'ela'ochon' no angl na' goncho bichlə de'en chəsə'ane' besə'ale'idaogüe'ena'. Bito gwzenagle chega'aque' catə' əse'e le'e de que cui chonle can' cheyalə' gonle. Con chso'on cuinga'aque' xen chedə' choso'ozenague' che la'ažda'omalga'aque'ena'.

¹⁹ Lega'aque' bito zjəngode'e txen len Cristən' ben' chnabiə' chio'o chdopə chžagcho cho'ela'ochone'. Pero chio'o chdopə chžagcho cho'ela'ochone' ngoda'accho txen len le' na' len ljuəžjcho ca' ca to to part che cuerp chechon' ngoda'an txen len bečj bnia' ca'. Na' de'en ngoda'əcho txen len Cristən' Diozən' chaclene' chio'o par nič chaquəchcho beṇə' šao' beṇə' güen.

²⁰ Ca naquən' ngoda'əcho txen len Cristən' catə'an gote', bito cheyalə' cue'ech yichjcho che costombr de'en zjəsə'anao beṇə' ca' cui choso'ozenag che Diozən', costombr che de'en ye'ej gaocho, che ža ca' na' che cuerp chechon'. La' chio'o bitoch naccho txen len beṇə' ca' cui choso'ozenag che Diozən' na' de'e na'anə' bito cheyalə' goncho can' chso'one'ena'.

²¹ De'e na'anə' bito gwzenagle che beṇə' ca' chəsə'ana: "Bito goxə'əle de'e nga, bito ye'ej gaole de'e na', na' bito canle de'en yeto."

²² Costombr ca' za'aque' che benəchən', la' yoguə' de'e ca' de'en chəsə'ane' cui goxə'əcho, cui ye'ej gaocho na' cui cancho, de'en chchinchon chəsə'əde chei.

²³ Chsa'aque beṇə' de que costombr ca' zjənaquan de'e sin'. Len de'e chsa'aljlažə' benəch ca'azənə' par chse'ejni'aləže'e angl ca' na' par chso'on cuinga'aque' ca to de'e cui bi zaquə' na' par chəsə'əžaglaogüe' len cuerp chega'aque'ena', pero bito sa'aclenen chio'o par nič cui əgwzenagcho che la'ažda'omalchon'.

3

¹ Can' bolis bosban Diozən' Cristən' ladjo beṇə' guat ca', leczə can' babocobe' yichjla'ažda'ochon'. De'e na'ana' cheyalə' cuec yichjcho che de'e ca' zjənaquə de'e zaquə'e gan' zo Cristən' chnabi'e txen len Diozən'.

² Cheyalə' cue' yichjcho che de'e ca' zjəzaque'e len Diozən' caguə de'e ca' zjəzaque'e len benəchən'.

³ Bagwlejyichjcho cuich chzenagcho che la'ažda'omalchon' na' mbancho par goncho can' chene'e Diozən'. Na' zocho txen len Diozən' laogüe de'en ngoda'əcho txen len Cristən' la'ana'əczə cui chsa'acbe'i beṇə'.

⁴ De yelə' mban checho zejlicane chedə' chonjilažə'əcho Cristən' na' Cristən' zotezə zoe' len chio'o. Na' catə' yide' de'e yoblə gone' par nič yichjla'ažda'ochon' yeyož gaquan ca yichjla'aždaogüe'ena' na' gone' par nič cuerp chechon' yeyaquən to cuerp cobə de'en gaquə lechuale güen can' naquə cuerp che le'ena'.

Can' bencho antslə na' can' cheyalə' goncho na'a

⁵ Na' laogüe de'en babocobe' yichjla'ažda'ochon', cheyalə' cuejyichjcho de'e mal ca' de'en chene'e la'ažda'omalchon' goncho žlac zocho yežlyo nga. Bito co'o xtocho nic cuejyichjcho no'ol checho o be'en checho par solencho beṇə' yoblə. Bito goncho bichlə de'e yelə' zto'.

Bito yebeicho bitə'ətezə de'en naquə de'e yelə' zto'. Bito selažə'əcho goncho bitə'ətezə de'e mal. Na' bito selažə'əcho de'e zan de'e gata' checho, cheda' tozəczə ca mal naquən len de'en chso'on beṇə' chse'ejni'alaže'e lgu'a lsaquə'.

⁶ Gwžin ža cata' Diozən' gone' castigw zejlicane che beṇə' ca' chso'ela'ozeche' chso'one' de'e mal ca' zjənac ca'.

⁷ Antslə gwdaczele benle de'e malən' ca de'e ca' bagwni'anə'.

⁸ Pero na'a cheyalə' cuejyichjle yoguə' de'e mal ca'. Bito əža'a ljuēžjle na' bito locle. Bito gaquəxi'i ljuēžjle, bito gwžia əgwnitə' ljuēžjle, na' bito güe'ele dižə' zban.

⁹ Bito güe'ele dižə' güenlažə' len ljuēžjle. Bitoch gonle de'e ca' cheda' bagwzola chbejyichjle cuich chzenagle che la'ažda'omallen' len de'e mal ca' de'en nan gonle.

¹⁰ Diozən' ben' ben yoguə'əcho babocobe' yičhja'ažda'ochon', na' chzejni'ine' chio'o par ničh zda chaquəch yičhja'ažda'ochon' can' naquə yičhja'aždaogüe'ena'.

¹¹ Bitobi nonən par len Diozən' šə naccho beṇə' Izrael o šə cui naccho beṇə' Izrael. Bitobi nonən par le' šə zocho sefny de'en ne' sirconsision o šə cui zochon. Na' leczə bitobi nonən par le' šə naccho beṇə' zitə' la'ənə'əczə šə za'acho yež de'e lechgualə ne'e naquə serrado. Na' le'egatezə ca' bitobi nonən par le' šə naccho esclabos o šə cui naccho esclabos. De'en naquə de'e žialao xen, gonlilažə'əcho Cristən'. Na' notə'ətezə naccho šə bachonlilažə'əchone' ngodə'əcho txen len le'.

¹² Diozən' bagwleje' chio'o par naccho lažə' ne'ena' na' chaquene' checho. De'e na'anə' leğon can' cheyalə' gon chio'o bagwlej Diozən' par naccho xi'ine'. Le'e yeyašə' leyeži'ilažə' ljuēžjle na' leğon güen len ljuēžjle. Bito gon cuinle xen. Le'e gac beṇə' gačjwlažə', na' le'e gapə yelə' chxenlažə' len ljuēžjle.

¹³ Na' le'e gwde ca'alə šə bi chac chele entr tole yetole, na' le'e yezi'ixen che ljuēžjle šə chaqule bi babenene' le'e. Con can' babezi'ixen Cristən' checho ca'aczən' cheyalə' yezi'ixencho che ljuēžjcho.

¹⁴ Na' de'en naquəch de'e žialao xench lao yoguə' de'e ca', cheyalə' gaque che ljuēžjcho cheda' šə chaquəcho che ljuēžjcho nachən' leczə goncho bitə'ətezəchlə de'en chene'e Diozən' goncho.

¹⁵ Diozən' gwleje' chio'o par so cuezcho binlo len xbab de'en yo'o lo'o yičhja'ažda'ochon' na' par socho binlo len ljuēžjchon'. De'e na'anə' leğon ca gaquəlen Diozən' le'e so cuezle ca', la' yoguə' chio'o chonlilažə'əcho Cristən' banaccho ca tozə family. Na' le'e güe' yelə' chočwlen che Diozən' can' chaclene' le'e.

¹⁶ Lešotezə lešo leğon xbab che de'e ca' babzejni'i Cristən' chio'o. Le'e gwzejni'i beṇə' ljuēžjle ca' na' le'e gata'əyoiga'aque' len yoguə' clas yelə' sin' par yoso'ozenague' che Cristən'. Leğol no salmos na' no imnos, na' bichlə de'en na Spirit che Diozən' golle, güe'ele yelə' chočwlen che' lo'o yičhja'ažda'olen' can' chaclen Xančon' le'e.

¹⁷ Na' bitə'ətezə de'e gonle na' bitə'ətezə dižə'an güe'ele, leğonən na' le'e güe'en par ničh Xancho Jeso'osən' si'e yelə' bala'an. Na' do tyempte güe'ele yelə' chočwlen che Xancho Diozən' can' chaclen Xancho Jeso'osən' le'e.

Quingan' cheyalə' gon chio'o babocobə Diozən' yičhja'ažda'ochon'

¹⁸ Le'e no'olə le'e nšagna'ale, le'e gwzenag che be'en che to tole can' cheyalə' gon chio'o chonlilažə'əcho Xancho Cristən'.

¹⁹ Na' le'e beṇə' byo le'e nšagna'ale, legaque che no'ol che to tole na' bito gonle znia len lega'aque'.

²⁰ Na' le'e bi'i xcuidə', le'e gwzenag che xaxna'ale yoguə'əloj bin' se'e le'e, cheda' can' chazlažə' Xančon' gonle.

²¹ Na' le'e nacle xaxna' bi'i xcuidə', bito con gonle ca yesə'əža'a yesə'əlocbo', la' šə gonle ca' bitobi de gost ničə'əbo' na' bitoch yoso'ozenagbo' chele.

²² Na' le'e nacle mos, cheyalə' əgwzenagle yoguə'əloj can' na xan žinṇə'. Bito gonleile xan žinṇə' gonlizle ca beṇə' chonchgua žinṇə' cata'əzən' chgüie' le'e. Pero le'e do yičhj do lažə'əle leğon žinṇə' laogüe de'e chaple Diozən' respet na' cui chene'ele əže'le'e.

²³ Na' bitə'ətezə de'en gonle, gonlen do yičhj do lažə'əle par ničh yebei Xancho Cristən' le'e, caguə par ničh yebei xan žin na'azənə'.

²⁴ Leğon ca' cheda' nezczele de que Xancho Cristən' gone' par ničh chio'o choncho can' chazlaže'ena' yežincho gan' zoe'ena'. Na' de'en gone' par ničh yežincho gan' zoe'ena' zaquə'əchən ca laxjwchon'.

²⁵ Na' notə'ətezə zjənaquə beṇə' ca' chso'on de'e malən', Xančon' əgwnežjue' castigw che to toga'aque' seğon naquən' gwso'one'.

4

¹ Na' le'e xan žin, legon güen len beṇə' ca' chso'on xšinlen', cheda' nezele lezə zo Xanle ben' zo yoban'.

² Legac beṇə' banlažə' par niç sotezə sole gonle orasyon, gü'e'ele yelə' choxcwlen çe Diozən' can' chaclene' le'e.

³ Na' lenabe Diozən' gone' par niç gaquə latjə gü'e'elencha' beṇə' xtiže'enə' niç yesə'ənezene' de'en cui no gwneze antslə çe Cristən'. La' por ni çe de'en bi'a xtiža' Crist na'anə' dia' ližya nga.

⁴ Lenabe Diozən' əgwzejni'ine' nada' niç ənezda' naquən' yapəga'aca'ane' par niç se'ejni'ine'en.

⁵ Na' žlac na'a ne'e de tyemp par gonlen, legon güen len beṇə' ca' cui zjənaquə txen len chio'o can' chejni'ile cheyalə' goncho.

⁶ Legü'e' dižə' šao' dižə' güen na' dižə' de'en naquə de'e zaqu'e' yoguə' laste. Na' legon xbab par niç ənezele naclən' cheyalə' yoži'ile xtiža' to to beṇə'.

Chguape' beṇə' migw çe' ca' diox

⁷ Tiquicon' əne' le'e yoguə'əloł can' chac chia'. Le' naque' beṇə' bišə'əcho na' chacda' çe'. Zotezə zoe' chone' complir can' cheyalə' gone' par chaclene' nada' chona' xšin Xancho Cristən'.

⁸ Echselə'ane' par niç ənezele can' chac chia' na' par niç əgwtip'e' lažə'əle.

⁹ Na' txen len le' choselə'a beṇə' bišə'əcho Onesimon' ben' naquə beṇə' gwlaž çe'le na' ben' chaquecho çe'i. Lenczə le' zotezə zoe' chone' complir can' cheyalə' gone'. Echselə'əga'aca'ane' par niç yesə'əne' le'e yoguə' de'en chonto' nga.

¹⁰ Aristarcon' ben' de ližya nga len nada' chguape' le'e diox. Na' Marcos beṇə' sobrin çe Bernaben' leczə chguape' le'e diox. Bagwnia' can' cheyalə' gonle güen len Marcosən' catə' le'e gan' zolen'.

¹¹ Na' Jeso'os ben' zjənsi'e Josto leczə chguape' le'e diox. Caguə nochlə beṇə' Izrael chsa'aclene' nada' len de'en chona' par niç nabia' Diozən' beṇə' zanch sino beṇə' ca' šonza. Na' zocha' mbalaz laogüe de'e chsa'aclene' nada'.

¹² Nach leczə beṇə' gwlaž çe'le Epafrašan' ben' chon xšin Cristən' chguape' le'e diox. Yoguə' laste catə' chone' orasyonna' chnəbchgüe' əgwzejni'i Diozən' le'e yoguə'əloł de'en chene'ene' gonle na' par niç yeyož gonlen na' gacle cayanə'an chene'e Diozən' gacle.

¹³ Che'enda' ənezele can' chonchgüe' orasyon par le'e chonliləžə'əle Cristən' Colosas, Laodisea na' Ierapolis.

¹⁴ Na' lenczə Locas ben' naquə beṇə' güen rmech ben' chacda' çe'i chguape' le'e diox na' leczə' ca' Demasan' chguape' le'e diox.

¹⁵ Le'e gguapšga diox beṇə' bišə'əcho ca' ža' Laodisean', len Ninfas na' beṇə' ca' chesə'ədoṇə chesə'əžag chso'elaogüe'e Diozən' liže'enə'.

¹⁶ Na' catə' yeyož gwlabl cart nga, əgwnežjwlen beṇə' ca' chesə'ədoṇə chesə'əžag chso'elaogüe'e Diozən' Laodisean' par niç yoso'olabe'en. Na' leczə le'e gwlab cartən' de'en bselə'a par beṇə' Laodisea ca'.

¹⁷ Na' le'e ye' Arquipon' de que chneyoida'ane' gone' seguir len xšin Diozən' de'en chone'enə' par niç yeyož gone' yoguə'əloł de'en gwlej Xancho Cristən' le' gone'.

¹⁸ Part dao' çe cart nga nada' Pab chzoja'an cuincza'. Bito ganlažə'əle can' dia' ližya nga. Diozən' sošgüe' gaquəlenšgacze' le'e. De'e na'azə chzoja' na'a. *Pab*

Cart Nech De'en Bzoj San Pabən' Par Benə' Tesalonica Ca'

Pabən' len benə' ljuəzje' ca' boso'ozoje' benə' ca' chso'elaogüe'e Jesocristən'

¹ Nada' Pab chzoja' le'e nitə'əle Tesalonican', le'e chdopə chzagle cho'ela'ole Xacho Diozən' na' Xancho Jesocristən' laogüe de'en ngodə'əle t xen len lega'aque'. Na' nada' lena' Silbano na' Temtion' chnabto' lao Xacho Diozən' na' lao Xancho Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Besə'əloe' benə' Tesalonica ca' de que chso'onlilažə'e Jesocristən'

² Yoguə' laste cata' chonto' orasyon cho'eto' yelə' choxcwlen che Diozən' par yoguə'əle, na' chnabto' gaquəlene' le'e.

³ Na' cata' chonto' orasyon lao Xacho Diozən' chjsa'alaza'əczəto' yoguə'əloj de'e güen de'en chonle laogüe de'en chonlilažə'əle Diozən' na' chaquele che'. Na' chjsa'alaza'əczəto' can' chgo'o chchejlažə'əle catə'an chzaquə'əzi' chzaquə'əyaša'əle cheda' zole lez yidə Xancho Jesocristən' yeto.

⁴ Nezeto' benə' biša', de que Diozən' chaquene' chele na' bagwleje' le'e par nacle xi'ine'.

⁵ Na' Spirit che Diozən' goclenən le'e len yelə' guac chein' par niç gwnezele de que dižə' güen dižə' cobə de'en bzejni'ito' le'e che Jesocristən' naquan de'e li. Caguə naquan con to dižə'. Na' nezczele can' bentezə bento' de'e güen entr le'e par niç gocleno' le'e.

⁶ Na' le'e zole chonle can' bento' na' can' ben Xancho Jesocristən'. Na' Spirit che Diozən' chonən ca chebeile la'anə'əczə de'e zan de'e bagwdi' bagwxaquə'əle por ni che de'en babzenagle de'en gwdixjue'ito' le'e che Jesocristən'.

⁷ Benə' ca' chso'onlilažə' Jesocristən' Masedonian' na' Acayan' bazjəneze' can' chonle na' de'e na'anə' zjəneze' naquan' cheyalə' so'one'.

⁸ Babenle ca zjəneze benə' che Xancho Jesocristən' cheda' doxenlən' banasə' nɔlɔn, caguə Masedonian' na' caguə Acaya na'azən'. Na' le'egateza ca' yoguə'əzə benə' bazjəneze' can' chonlilažə'əle Diozən', na' de'e nan' bitoch bi de anato' chele.

⁹ Na' benə' zan chso'e dižə' ca güenə' benle len neto' catə'an bedalañə'əto' le'e na' can' goquə gwzoloa chonlilažə'əle Diozən'. Bagwlejyichjle cuich chejni'alaza'əle lguə'a lsaquə' chele ca' na' na'a bachonlilažə'əle Diozən', na' bacho'ela'ole Diozən' ben' zo zejlicəne. Len' zaquə' par güe'ela'ochə.

¹⁰ Na' chso'e dižə' can' chbezle əchoj Xi'ine' Jeso'osən' yoban' yide' yežlyo nga yetlas, be'en bosban Diozən' ladjo benə' guat ca'. Na' de'en chonlilažə'əcho Jeso'osən', Diozən' bito goñe' chio'o castigw catə'an əzin ža gone' castigw zejlicəne che benə' ca' cui chso'onlilažə' Jeso'osən'.

2

Xšin Diozən' de'e ben Pabən' Tesalonican'

¹ Le'e nezczele benə' biša', catə'an bedalañə'əto' le'e na' gwdixjue'ito' le'e dižə' güen dižə' cobə che Diozən' zochgua yelə' guac che'enə' len neto'.

² Nezele can' gwdi' gwxaquə'əto' Filiposən', can' boso'ožia boso'onitə' benə' ca' neto' lao gwdixjue'ito' che Jesocristən'. Pero na' Diozən' bene' ca cui bžebto' gwdixjue'ito' le'e dižə' güen dižə' cobə che'enə' la'anə'əczə de'e zan de'e besə'əžon par chixjue'eto'on.

³ De'en chatə'əyoito' le'e gwzenagle che Diozən', bito nacho chonto' clelə na' nic chze-lažə'əto' gonto' bi de'e mal, na' nic chene'eto' əxoayagto' le'e.

⁴ Diozən' nezene' de que zotežə zoto' chzenagto' che', na' de'e na'anə' gwleje' neto' par chyxjue'eto' dižə' güen chonle neto' bi de'en de chele. Cuiñ Diozən' nezene' de que can' naquan.

⁵ Nezele can' chonto', ni šlinza cuiñə' gwpeito' le'e len dižə' de'en cho'eto'onə', na' niqunə'ə xoayagto' le'e par niç gonle neto' bi de'en de chele. Cuiñ Diozən' nezene' de que can' naquan.

⁶ Na' nic chyiljažə'əto' naclə gonto' par niç əso'elao' benə' neto'. Nique ənacho chene'eto' par niç le'e güe'ela'ole neto', na' nic chene'eto' yeziquə'əchlə benə' əso'ela'ogüe'e neto'. Zaquə'əto' par gonto' ca gwzenagle cheto' la fuers por ni che de'en bselə' Cristən' neto' par cho'eto' xtižə'ənə', pero bito chonto' ca gwzenagle cheto' la fuers.

⁷ Nži'ito' le'e caczə nži'i to no'olə xi'ine' bi'i chosgol choscha'ogüe'.

⁸ Na' de'en chaqueto' chele, cho'elento' le'e dižə' güen dižə' cobə che Diozən'. Na' caguə de'e na'azən' chonto', sino leczə chsanlažə' cuinto' chonto' xte ga zelao chzaque'eto' par chaclento' le'e cheda' chaqueto' chele.

⁹ Za'alaza'æczle beṇə' bišə', catə'an gwzoto' len le'e lechgwale bento' žin xte jxaque'eto' par ben cuinto' mantener. Bento' žin teža na' do še'elə par ničh cui bi gast əbzoto' le'e. Can' bento' gwɔixjue'ito' le'e dižə' güen dižə' cobə che Diozən'.

¹⁰ Txenczən' nacle len Diozən' nezele ca güennə' bento' catə'an gwzolento' le'e chonlilažə'əle Jesocrstən'. Benczəto' con can' chazlažə' Diozən'. Bento' par ničh ni to cui no gwna de que napəto' dolə'.

¹¹ Nezele can' gotə'əyoito' le'e gwzenagle che Diozən' na' can' əbtipto' lažə' to tole can' chon to beṇə' byo len xi'ine'.

¹² Bento' mendad de que gonšgacze de'e güen can' cheyałə' gon chio'o bagwlej Diozən' par nabi'e chio'o na' par gone' chio'o yelə' bala'an.

¹³ Bito chbezəto' cho'eto' yelə' choxcwlen che Diozən' can' bzenagle xtiže'ena' catə'an gwɔixjue'ito'on le'e. Zache'iczele bito naquən xtižə' beṇə'chən' sino naquən dižə' de'en chon Diozən' par cho'eto'. Na' de'en gwyeyjle'ele xtižə' Dioz na'anə' chša'an xbab de'en yo'o lo'o yichjla'azda'olen'.

¹⁴ Beṇə' bišə', le'e bagoc chele can' goc che beṇə' ca' chəšə'ədopə chəšə'əžag cho'elaogüe'e Jesocrstən' zan part Jodean', beṇə' ca' chso'onlilažə' Jesocrstən' ca chio'o chonlilažə'əchone'. Na' le'egateza ca' baboso'oči' boso'osaquə' beṇə' Izrael ca' beṇə' gwlaž chega'aque' ca' chso'onlilažə' Jesocrstən', na' can' boso'oči' boso'osaquə' beṇə' gwlaž chele ca' le'e.

¹⁵ Beṇə' Izrael ca'anə' gwso'ote' Xancho Jeso'osən' beṇə' ca' gwso'elene' lega'aque' xtižə' Diozən' cana'. Na' leczə can' gwso'one' boso'olagzejə boso'olagzide' neto'. Na' xte ža neža por de'e cui chazlažə' Diozən' chso'one', na' leczə chso'one' contr yoguə'əloł beṇə'chən'.

¹⁶ Beṇə' Izrael ca' choso'ožone' əgwzejni'ito' beṇə' cui zjənaquə beṇə' Izrael bi de'en cheyałə' goncho par ničh cui yeyejcho lao yi' gabilən'. Can' chso'one' de'e na'anə' do tyemp choso'ozanch xtolə'əga'aque'ena'. Bagwchoglaio Diozən' chega'aque' de que zejlicane yesə'əzi'e castigon'.

Pabən' gone'ene' žjezlane'e beṇə' ca' nitə' Tesalonican'

¹⁷⁻¹⁸ Na' neto' beṇə' bišə', bachacchgüeito' chedə' bitochəṇə' le'i ljuežjcho, pero chonto' xbab chele. Nada' Pab zan las go'onda' delana'a le'e, na' bchoj catə' beyiljlažə'əto' nacle gonto' par ničh yežagcho de'e yobla. Pero catə' gone'eto' yidəto' par delana'əto' le'e, Satanəsən' de'en chnabia' de'e xio' ca' bito be'en latjə.

¹⁹ Zoto' lez sotezə sole gonlilažə'əle Xancho Jesocrstən'. Na' leczə chebeito' can' chonlilažə'əlene' na'a. Na' catə'an yide' yeto, soto' mbalaz güe'eto' dižə' can' chonlen'.

²⁰ Le'e chonle ca si'ito' yelə' bala'an na' le'e chonle ca zoto' mbalaz.

3

¹⁻² Na' cuich bchejeto' laogüe de'en cui chle'i ljuežjchon'. De'e na'anə' bselə'əto' beṇə' bišə'əcho Temtion' gan' zolenə' na' bega'an netəzəto' Atenas nga. Temtion' naque' beṇə' güen xšin Diozən' na' chone' txen len neto' chyixjue'eto' dižə' güen dižə' cobə de'en chzejni'in beṇə' che Cristən'. Bselə'əto'one' btipəche' lažə'əle na' bedəyene' ca beṇlilažə'əchle Cristən'.

³ Bselə'əto'one' gan' zolenə' par ničh ni tole cui gaquə'əjlažə'əle bixchen' chyi' chzaquə'əle, chedə' la' baṇezele Diozən' nsi'e xneze techo yelə' yašə' yelə' zi' yežlyo nga.

⁴ Catə'an gwzolento' le'e antslə bzeneto' le'e de que yoso'oči' yoso'osaquə' beṇə' chio'o. Na' nezele de que bachac can' gwnato'onə'.

⁵ Na' laogüe cuich chchejda' de'en cuichəṇə' le'i ljuežjcho, bselə'a Temtion' gan' zolenə' par ničh gwnežda' šə zdaczle chonlilažə'əle Cristən'. Go'onda' ənežda' šə bagwzoi gwxiye'ena' bxoayaguan le'e. La' šə babxoayaguan le'e, bendadto' xšin Dioz na'anə' entr le'e šə ca'.

⁶ Beyacxenlaza'əteto' catə' belə' Temtion' de'en bide' gan' zolenə'. Bedəyzejni'ine' neto' ca güenna' chonle chonlilažə'əle Cristən' na' chaquele che yoguə'əloł beṇə'. Na' leczə gwne' can' chi' yichjle neto' na' can' zelažə'əle yežagcho de'e yobla leczə can' chene'e neto'.

⁷ Ca'aczən' beṇə' bišə', ne'e chžaglaoto' na' ne'e chyi' chzaquə'əto' pero babeyondiplažə'əto' gwnežeto' de que zotezə zole chonlilažə'əle Cristən'.

⁸ De'e li babeyacxenlaza'əto' na' zoto' mbalaz de'en zotezə zole chonlilažə'əle Xancho Cristən'.

⁹ Na' de'e na'anə' lechgwale chebeito' lao Diozən' can' chonle na' cho'echguato' yelə' choxcwlen che' can' chaclene' le'e.

¹⁰ Lechgwale chonto' orasyon do ža do yel chnabeto'one' gone' ca le'i ljuežjcho ničh əgwzejni'icheto' le'e par ničh šejəchle gonlilažə'əchlene' chedə' bitonə' gonlilažə'əlene' can' chene'e Diozən'.

¹¹ Chnabeto' Xacho Diozən' na' len Xancho Jesocrstən' əso'e latjə yedəzlanə'əto' le'e.

¹² Na' chḡabeto' Xanchoḡ gone' ca gaquæche che ljuežjle tole yetole na' gone' ca gaquæchele che yogua' beḡaç con catežan' chaqueto' che le'e.

¹³ Chḡabcžato'one' gone' ca gaquæ la'ažda'olen' xi'ilažæ' lao Xacho Diožan' sin cui bi dołæ' gapple catæ'an yida Xancho Jeso'osan' de'e yoblæ nche'e yogua'æłol beḡæ' bagwlej Diožan' par žžnaquæ' lažæ' ne'ena'.

4

Pabøn' bzejni'ine' can' chene'e Diožan' yesæ'æzo yesæ'æbeze'

¹ Na'a ža beḡæ' bišæ', baç bsd blo'ito' le'e gonle can' chene'e Diožan', na' baç zole chonle ca'. Na' de'en chonlilažæ'æle Xancho Jesocrisḡan' chatæ'æyoito' le'e na' chonto' mendad æžja'aquæchle gonchle de'en chene'e Diožan'.

² Banežzele de que de'en bento' mendad gonle naquæn de'en na Xancho Jeso'osan'.

³ Diožan' chene'ene' sotežæ socho gaccho beḡæ' la'aždao' xi'ilažæ'. Na' bito chene'ene' cuejyichjcho no'ol checho o be'en checho par solencho beḡæ' yoblæ, na' bito chene'ene' æžwža' xtocho.

⁴ Na' læczæ chene'ene' æneze totole naquæn' cheyałæ' çhiljle xo'ollen' sin cui gapple dołæ' na' sin cui no æna de que chonle de'e mal.

⁵ Bito gonlebele beḡæ' ca cui chso'onlilažæ' Diožan' na' çhiljle xo'olle par gonle can' chzelažæ' la'ažda'omallen', sino çhiljlene' par solenlene' can' chene'e Diožan'.

⁶ Ni tole bito cheyałæ' solenle no'ol che beḡæ' yoblæ çhedæ' la' contr be'en che' na' gonle šæ gonle ca'. Babe'eto' dižæ' antslæ par bosniseto' le'e de que Xanchoḡ chnežjue' castigw che beḡæ' chso'on bitæ'ætežæ de'e malæn' žžnac ca'.

⁷ Diožan' gwleje' chio'o par gaccho beḡæ' la'aždao' xi'ilažæ', caguæ par co'o xtocho o goncho bichlæ de'e mal ca' žžnac ca'.

⁸ De'e na'anæ notæ'ætežle šæ nacle beḡæ' godenag len de'e ca' chsed chlo'ito' le'e, che Diož nan' cui chzenagle, caguæ che netæžato'. Le'ena' beḡæ' chio'o Spirit che'ena' çhedæ' chene'ene' gaccho beḡæ' la'aždao' xi'ilažæ'.

⁹ Bito chyažjele gwzoja' le'e par ænezele de que cheyałæ' gaque che ljuežj chio'o chonlilažæ'æcho Diožan'. Diož na'anæ' babsedene' le'e par niç chaque che ljuežjle tole yetole.

¹⁰ Na' can' bacheaquele che yogua' beḡæ' bišæ'æcho ca' nitæ' doxen Masedonian'. Na' chatæ'æyoito' le'e beḡæ' bišæ', lægaquæche çhega'aque'.

¹¹ To tole le'e yeyiljlažæ' naclæn' gonle žin par niç sole binlo len xbab de'en yo'o lo'o yichjla'ažda'olen' na' bito con ggiuale bi chso'on beḡæ' yoblæ. Na' gonle bitæ'æžæ žin yixæ' o žin de'e de yo'o can' bento' mendad.

¹² Le'e gon ca' par niç beḡæ' ca' cui žžnaquæ txen len chio'o bito yesæ'æne' mal chele, na' læczæ par niç cui gaquæ fałt šæ bi de'en chyažj chchinele.

Can' gaquæ catæ'an yida Jesocrisḡan' de'e yoblæ

¹³ Le'egatežæ ca' beḡæ' bišæ', chene'eto' ænezele can' gac che beḡæ' guat ca', beḡæ' ca' gwso'onlilažæ' Diožan' lao gosæ'anite'e yežlyon'. Chene'eto' ænezelen par niç cui sole trist ca' trisḡan' chæsæ'anitæ' beḡæ' yeziquæ'æchlæ catæ' chat no chat çhega'aque' la' cui nite'e lež žžsyæ'æzo'e' len Diožan'.

¹⁴ Nezecho gwso'ot beḡæ' Jeso'osan' na' bebane' ladjo beḡæ' guat ca'. Le'egatežæ ca' nezecho de que Diožan' gone' par niç yida Jeso'osan' de'e yoblæ na' nche'e beḡæ' ca' bagwsa'at con beḡæ' gwso'onlilažæ' le'e.

¹⁵ Na' dižæ' nga chzeneto' le'e naquæn xtižæ' Xancho Jeso'osan' de'en none' mendad gwzeneto'. Chio'o mbancho na'a chonlilažæ'æchone', šæ ne'e mbancho catæ'an yide' de'e yoblæ, bito nacho yobæch yežglaochone' cle ca' beḡæ' ca' bagwsa'at.

¹⁶ Na' ca' naquæ Xancho Jeso'osan', cuine'en yetje' le'e yoban', na' æne' zižjo gone' mendad yesyæ'aban beḡæ' guat ca', na' to anglæ'ablaonæ' æne', na' yenecho cuež trompet che Diožan'. Nach beḡæ' ca' bagwsa'at beḡæ' ca' gwso'onlilažæ' Crisḡan' læga'actequæ' yesyæ'abane' ladjo beḡæ' guat ca'.

¹⁷ Na' te na' chio'o chonlilažæ'æchone' šæ ne'e mbancho yežlyo nga, gon Diožan' par niç txen len læga'aque' šepcho le'e yobana' to lo'o bejw na' yežglaochæ Xancho Jeso'osan' le'e yobana'. Nach žžyeyozcho len le' zejllicane.

¹⁸ De'e na'anæ' ledogwtipæchlažæ' ljuežjcho tocho yetocho güe'echo dižæ' can' gaquæ.

5

¹ Beḡæ' bišæ', bito chyažjen gwzoja' le'e par gwzenda' le'e bi ža bi oræn' yida Xancho Jeso'osan' yeto.

² Nezele de que gwžin ža ægwnežjue' castigw che beḡæ' ca' chso'on de'e malæn'. Senyale' læga'aque' can' chon to beḡæ' bguan beḡæ' chda še'elæ.

³ Na' šlac chəsə'əna beṇə' zan: "Mban' zocho, bitobi gaquə checho", catə' to de repentzə əžin ža əgwnežjue' castigw chega'aque' enə'. Can' chac che no'ola cata' to de'e repentzə chaque' bes che yełə' sannə', ca'atezəczən' gaquə che beṇə' ca' cui zjənitə' probnid catə'an əgwnežjo Xancho Jeso'osən' castigw chega'aque' enə'. Bitə gaquə yoso'oxonje'.

⁴ Pero chio'o beṇə' bišə', chio'o cui nchoł yichjla'ažda'ochon', de'e na'anə' bito ədolə'əcho senyal Xancho'n' chio'o catə'an əžin ža əgwnežjue' castigw che beṇə' ca' cui chso'onlilaže'ene', na' bito gac checho can' chac che beṇə' chzenyal bguannə' le' to de repentzə.

⁵ Bayo'o be'eni' che Diozan' lo'o yichjla'aždao' yoguə' chio'o, na' de'e na'anə' bito choncho de'e mal can' chso'on beṇə' ca' ne'e nchoł yichjla'ažda'oga'aque'.

⁶ Cheyalə' gonyanə'əcho xbab naquan' chene'e Diozan' goncho na' năbia' cuincho par goncho can' chazlaže' enə' par nič bito bi gac checho catə' əgwnežjo Xancho Jeso'osən' castigw che beṇə' ca' cui chso'onlilaže'ene'. Beṇə' ca' cui chso'on cas che' gwxaquə'əlebəga'aque' ca beṇə' zjəntas.

⁷ De'en zjənchoł yichjla'ažda'oga'aque' enə' gwxaquə'əlebəga'aque' ca beṇə' zjəntas na' ca beṇə' chəsə'əzože.

⁸ Pero chio'o bayo'o be'eni' che Diozan' lo'o la'ažda'ochon'. De'e na'anə' cheyalə' năbia' cuincho par goncho can' chazlaže' enə'. Cheyalə' gonlilaže'əcho Diozan' na' gaque che ljuežjcho na' yebeicho de'en nezecho žjəyecho len Diozan'. Šə goncho yoguə' de'e ca' gaquəlenən chio'o par nič bitobi gac checho catə' gwnežjo Xancho Jeso'osən' castigw che beṇə' ca' cui chso'onlilaže'ene'. Gaquəlenən chio'o ca xa soldad de'en naquə de'e ya chaclenən le' par nič cui bi chac che' catə' chdīləlen beṇə' le'.

⁹ Caguə gwlej Diozan' chio'o par nič gone' castigw chechon'. Gwleje' chio'o par nič chonlilaže'əcho Xancho Jesocristən' na' cui yeyejcho lao yi' gabīlan'.

¹⁰ Jesocrist na'anə' bnežjw cuine' por ni checho catə'an gwso'ot beṇə' le' par nič sotezə socho len le' lao mbancho na' lecza ca' catə' bagotcho.

¹¹ De'e na'anə' le'e gwtiplažə' ljuežjle tole yetole na' le'e gaclen ljuežjle par nič sotezə sole gonlilažə'əchle Jesocristən' con can' chonczle.

Pabən' bzejni'ine' beṇə' ca' chso'onlilaže' Jesocristən' can' cheyalə' so'one'

¹² Chatə'əyoito' le'e beṇə' bišə', gapple respet beṇə' ca' chso'on xšin Xancho Jesocristən' entr le'e choso'ogūia choso'oye' le'e na' choso'ozejni'ine' le'e naquan' cheyalə' so cuezle.

¹³ Gapəchguaga'aclene' respet na' gaquəchgūeile chega'aque' chedə' la' xšin Xancho nan' chso'one'. Na' le'e len lega'aque' le'e so binlo tole yetole.

¹⁴ Le'egatezə ca' beṇə' bišə', le'e güe' consejw beṇə' cui chse'ene so'on žin, na' le'e gwtiplažə' beṇə' chsa'aque'ene' zdebə choso'ozenague' che Jesocristən', na' le'e gaclen beṇə' cuiṇə' se'ejni'išaogüe'ene' naquan' cheyalə' so'one'. Leso legapə yełə' chxenlažə' len yoguə'əloł beṇə'.

¹⁵ Šə bi de'e mal chso'on beṇə' len le'e legon byen cui yoži'ile de'e mal len lega'aque'. Zejli leyeyiljlažə' naclən' gonle güen len ljuežjle tole yetole na' len notə'ətezəchlə beṇə'.

¹⁶ Do tyempte le'e yebei.

¹⁷ Lesotezə lesə legon orasyon.

¹⁸ Legüe' yełə' choxcwlen che Diozan' bitə'ətezə de'en chac chele, chedə' can' chene'ene' gon chio'o chonlilaže'əcho Cristo Jeso'osən'.

¹⁹ Bitə gwžonle gon Spirit che Diozan' can' chene'en len le'e o len beṇə' yoblə.

²⁰ Le'e gon xbab de que to de'e zaque'e chso'on beṇə' chəsə'əyixjui'e de'en bagož Diozan' lega'aque'.

²¹ Na' legonyanə' xbab che yoguə'əloł dižə' de'en chso'e par nič gonən chele yoguə' de'en naquə güen.

²² Na' bito gonle bitə'ətezə de'e naquə de'e mal.

²³ Diozan' chone' ca chzo chbezcho binlo len xbab de'en yo'o lo'o yichjla'ažda'ochon'. Na' chnăbda'ane' gone' par nič gacle beṇə' la'aždao' xi'ilažə'. Na' lecza gonšgüe' par nič bito bi de'e mal gonle len yichjla'ažda'olen' na' nic len cuerp chelen' par nič bito bi dolə' gapple catə'an yidə Xancho Jesocristən' yeto.

²⁴ Diozan' ben' bagwleje' chio'o par naccho xi'ine' chone' complir can' ne'enə', na' de'e na'anə' gone' par nič güe'elažə'əle gonle can' chazlaže' enə', na' gone' par nič cui gapple dolə'.

Pabən' gwṇabe' gaquəlen Diozan' beṇə' Tesalonica ca'

²⁵ Beṇə' bišə' le'e so le'e gon orasyon par neto'.

²⁶ Na' catə' chežagle leyolgüiž ljuežjle dižə' šao' par nič gabcia' de que chaque che ljuežjle.

²⁷ Can' na Xancho Jesocristən', chona' mendad gwlable cart nga par əse'ene yoguə'əloł beṇə' bišə'əcho ca' nitə' gan' zolenə'.

²⁸ Na' sotezə sošga Xancho Jesocristən' gaquəlenšgüe' le'e. De'e na'azan' chzoja' nă'a. *Pab*

Cart Egwchope De'en Bzoy San Pabən' Par Benə' Tesalonica Ca'

Pabən' len benə' l'juežje' ca' boso'ozoje' benə' ca' chso'elaogüe'e Jesocristan'

¹⁻² Nada' Pab chzoja' le'e chdopə chžagle cho'ela'ole Xacho Diozən' na' Xancho Jesocristan' lao'syoda Tesalonican'. Na' nada' lena' Silbanon' na' Temtion' chnabto' lao Xacho Diozən' na' Xancho Jesocristan' əsa'aclenšgue' le'e na' so'onšgue' ca so cuezle binlo len xbab de'en yo'o lo'o yichjla'ažda'olen'.

Catə'an yidə Cristən' de'e yoblə Diozən' əgwnežjue' castigw che benə' ca' chso'on de'e malən'

³ Benə' bišə', neto' cheyalə' soteza soto' güe'eto' yelə' choxcwlen che Diozən' por le'e can' chonczo'to'. Naquən güen chonto' ca' la' zda chonlilažə'əchle Diozən' na' zdach chaquele che l'juežjle.

⁴ De'e na'anə' chebeito' cho'eto' xtižə'əlen' len yeziqə'əchle benə' ca' bagwlej Diozən' par chəsə'ədopə chəsə'əžague' chso'elaogüe'e Jesocristan' ga yoblə. Cho'eto' dižə' ca güenə' chonle de'en chgo'o chchejlažə'əle len de'en choso'olagzejə choso'olagzida benə' le'e na' can' zoteza zole chonlilažə'əle Diozən' la'anə'əczə de'e zan de'e chžagle.

⁵ Na' ca naquə zotezə zole chonlilažə'əle Diozən' nəzecho de que zdacze' liča par choglaogüe'en nac gaquə che to to benəch. Na' le' cho'e latjə chyi' chzaquə'əle par nič əne' de que zaquə'ele par yeyejle yoban' gan' zoe' chnabi'e.

⁶ Na' naquəczən liča can' chon Diozən' chchi' chsaque'e benə' chosə'əchi' chosə'əsaquə' le'e.

⁷ Le'e na' len neto' chyi' chzaquə'əcho na'a, pero Diozən' gone' ca cuezə yoguə'ate de'en chyi' chzaquə'əchon' catə'an le'icho yetj Xancho Jesocristan' le'e yoban' len angl che' ca' benə' ca' zjanapə yelə' guac. Yide' nyechje' yi' bel.

⁸ Na' gwnežjue' castigw che benə' ca' cui zjənombia' Diozən', na' nic gwse'ejle'e che dižə' güen dižə' cobə de'en chzejni'in chio'o che Xancho Jesocristan'.

⁹ Lega'aque' əsa'aque' castigw zejlicane. Cuat yesyə'əžine' lao Diozən', nic əse'en yesə'əle'ine' yelə' guac xen che'ənə' na' yelə' chey che'eni' che'ənə'.

¹⁰ Yidə Jesocristan' de'e yoblə catə'an əžin žanə', par nič chio'o chonlilažə'əchone' na' bagwlej Diozən' chio'o par naccho lažə' ne'ənə' yoguə'əcho güe'echone' yelə' bala'an na' yebanecho ca güenə' naque'. Txen len le'e güe'echone' yelə' bala'an na' yebanecho ca güenə' naque', chedə' lenle chejle'ele che dižə' de'en be'elento' le'e.

¹¹ De'e na'anə' chontezəto' orasyon par le'e. Chnabeto' Diozən' gaquəlene' le'e gonle ca əne' de que zaquə'əle par de'en gwleje' le'e nacle xi'ine'. Na' chnabto' gaquəlene' le'e len yelə' guac che'ənə' par nič yeyož gonle yoguə' de'e güen de'en bagwchoglaole gonle na' len biquə'əchle de'en chene'ele gonle laogüe de'en chonlilažə'əlene'.

¹² Chnabto' gonle ca si' Xancho Jesocristan' yelə' bala'an, na' le' gone' ca si'ile yelə' bala'an chedə' Xacho Diozən' na' Xancho Jesocristan' chsa'aclene' le'e.

2

Ečoj ben' gonchgua de'e malən'

¹ Benə' bišə', de'e yoblə əchnia' le'e ca naquən' yidə Xancho Jesocristan' yeto par deyetobe' chio'o žjəyecho txen len le'.

² Babzejni'ito' le'e can' gaquə, na' de'e yoblə chatə'əyoito' le'e legonyanə' xbab par nič cui cuejyichje de'en babsed bablo'ito' le'e. Na' leczə bito gaquəžejlažə'əle šə no yidəclə dezejni'ine' le'e de que Spirit che Diozən' bagwnan de que babžin ža əgwnežjo Xancho Jeso'osən' castigw che benə' ca' cui chso'onlilažə'ene'. Na' nic gaquəžejlažə'əle šə bi rson yenele o šə la'aclə no cart fałs de'e chon choa'a ənia' de que babžin žan'.

³ Bito güe'ele latjə no xoayag le'e šə bi əne' o šə bi de'e gone'. La' catə'an ze'e yidə Xancho Jeso'osən' par əgwnežjue' castigon' benə' zan əsa'ase' contr Diozən' na' leczə cana' əchoj to benə' blao benə' gonchgüe' de'e mal contr Cristən'. Be'enan' əgwnežjo Xancho Jeso'osən' castigw che' zejlicane.

⁴ Gon cuine' xen na' gone' contr Diozən' na' contr bitə'ətezəchlə de'en chse'ejni'alazə' benə'. Na' cui'e lo'o yo'odao' əblao gan' chse'ejni'alazə' benə' Diozən' na' əne' de que naque' Dioz.

⁵ Cheyalə' əžjsa'alazə'əle de que catə'an gwzoa' len le'e bzejni'ida' le'e can' gaquə catə'an yidə Jesocristan' de'e yoblə na' can' gaquə catə'an ze'e yide'.

⁶ Na' nəczzele de'en chžon əchoj ben' gonchgua de'e malən', pero catə'an babžin ža bžin or nan' əchoje'.

⁷ Bachac de'e malən' n̄a'a de'en naquə contr Diozən' pero n̄engašə'ən. Na' gwžin ža la'alaon catə' cuich zo de'en chžon gaquə de'e malən'.

⁸ Cana'achən' əchoj beṇə' blao ben' gonchgua de'e malən'. Pero Xancho Jeso'osən' yide' nse'e yelə' guac xen che'ena' na' yonitlaogüe'ene' la' catə' le'ine' Xancho' na' yenene' dižə' de'en güe' Xancho' nach gate'.

⁹ Na' ca naquən' əchoj ben' gonchgua de'e malən', Satanas de'en chnabia' de'e xio' ca' gonən par niç' əchoje' na' gonən par niç' gapəchgüe' yelə' guac na' par niç' gone' miłagr na' bichlə de'e zaque'e yesyə'əbane beṇə' parzə əxoayague' lega'aque'.

¹⁰ Yoguə' claste de'e mal gone' əxoayague' beṇə' ca' banaquən' əgwnežjo Xancho Jeso'osən' castigon' zejlicane. Na' ca naquə dižə' li de'en zaquə' par se'ejle' par niç' cui žžəya'aque' lao yi' gabilən', bito yesyə'əbeine'en. De'e na'anə' əgwnežjue' lega'aque' castigw zejlicanen'.

¹¹ Na' de'e na'anə' Diozən' gone' par niç' gaquə yichjla'ažda'oga'aque'ena' žchol' na' yoso'ozenagzeche' che dižə' güenlažə'ənə'.

¹² Nach Xancho Jeso'osən' əgwnežjue' lega'aque' castigon' zejlicane čhedə' besyə'əbeichene' de'e malən' na' bito gwse'ejle' che dižə' li che Xancho'.

Diozən' chbeje' beṇə' par gone' ca cui žžəya'aque' lao yi' gabilən'

¹³ Beṇə' bišə', chaque Xancho Jesocrisən' chele. Na' ca naquə neto' ža, cheyalə' sotezə soto' güe'eto' yelə' choxcwlen che Diozən' de'en gwleje' le'e catə'an cuinə' x̄e yežlyon' par niç' bene' ca cui yeyeje' lao yi' gabilən'. Na' catə'an gwzolaole cheje'ele che dižə' li che Diozən' nach bsele'e Spirit che'ena' chonən par niç' nacle beṇə' la'ažda' xi'ilažə'.

¹⁴ Par cui yeyeje' lao yi' gabilən' gwlej Diozən' le'e. Na' de'en gwyeje'ele che dižə' güen dižə' cobə che Diozən' de'en be'elento' le'e, əžin ža catə'an cuin Diozən' gone' le'e yelə' bala'an ca de'en de che Xancho Jesocrisən'.

¹⁵ De'e na'anə' beṇə' bišə', lesotezə leso legonlilažə' Diozən'. Na' le'e talentezə de'en bzejni'ito' le'e, ša dižə' de'en be'elento' le'e o ša de'en babzožto'.

¹⁶⁻¹⁷ Xacho Diozən' chaquene' checho. Na' de'en nži'ilažə'e chio'o na'anə' bsele'e Xi'ine'ena'. Can' ben Diozən' par niç' zocho mbalaz zejlicane na' par niç' zocho lez gone' güen len chio'o. Na' chṇabda' cuin Xancho Jesocrisən' txen len Xacho Diozən' yoso'otipšgue' lažə'əle na' əsa'aclenšgue' le'e par niç' gonle porzə de'e güen na' güe'ele por dižə' güen.

3

Gwnab Pabən' so'one' orasyon par le' len beṇə' lježje' ca'

¹ Na'a ža beṇə' bišə', gonšgale orasyon par neto' niç' yob žžətixjue'ito' che Xancho Jesocrisən' doxenlə na' par niç' beṇə' yeziquə'əchlə yob so'one'en čhega'aque' catə' se'enenen' can' baben le'e.

² Bia'acczə nitə' beṇə' mal beṇə' cui so'onlilažə' Xancho Jesocrisən' na' zjənaljəga'aquene'. De'e na'anə' leczə n̄abšgale par niç' beṇə' ca' bito yesə'əžone' chixjue'eto' xtižə' Xancho Jesocrisən'.

³ Xancho Jesocrisən' zotezə zoe' chone' complir can' ne'ena' na' leczen' gaquəlene' le'e par niç' sotezə sole gonlilažə'əlene'. Na' leczə le'ena' əgwcuasə' gwcue'eje' le'e len de'e malən'.

⁴ Na' zoto' segor de que chalcencze' le'e par niç' chonle can' babento' mendadən' na' zoto' lez gaquəlene' par niç' nitə'əczle gonle ca'.

⁵ Na' chṇabda' Xancho Jesocrisən' gone' ca gaquəchele che Diozən'. Na' leczə chṇabda'ane' gone' ca sotezə sole gonlilažə'əlene' can' ben Jesocrisən' gwzotezə gwzoe' benlilažə'əchgüe' X̄e' Diozən' lao yoguə'əlojte de'en gwdi' gwxaque'e yežlyo nga.

Pabən' bene' mendad so'one' žin par so'on cuinga'aque' mantener

⁶ Beṇə' bišə', chzeneto' le'e can' chon Xancho Jesocrisən' mendad. Bito cheyalə' gonle txen len no beṇə' bišə'əchon' šə'naque' beṇə' xagüed o šə' bito chzenague' che de'en əbsed əblo'ito' le'e.

⁷ Neto' syempr bento' žin catə'an gwzoto' len le'e, na' de'e na'anə' n̄ezzele de que cheyalə' sole gonle žin.

⁸ Bito be'eto' latjə no gon neto' mantener, sino que bento' žin pesad teža na' lente do še'elə par niç' ben cuinto' mantener na' niç' ca' bito əbsoto' le'e gast.

⁹ Zakuə'əczəto' par gonle neto' mantener catə'an gwzoto' bento' xšin Diozən' gan' zolena' pero ben cuinto' mantener niç' blo'ito' le'e de que can' cheyalə' gonle.

¹⁰ Catə'an gwzoto' len le'e bento' mendad gwnato': "Šə' no cui gone' žin, bito güe'ele latjə gaogüe'."

¹¹ Pero na' babeneto' dižə' de que balle bito bi žin chonle, con nitə'əle chgüiale bin' chso'on beṇə' yobla.

¹² Na' šə nole chgüedle na' bito bi bi žin chonle, chonto' mendad na' chatə'əyoito' le'e gonle can' chene'e Xancho Jesocristən'. Legonšazə byen leyezolao legon žinnə' par nič gon cuinle mantener, na' leso lecuezə binlo len xbab de'en yo'o lo'o yičhja'ažda'olen'.

¹³ Na' yoguə'əle beṇə' bišə', bito žjxaquə'əlažə'əle gonle de'e güen.

¹⁴ Chonto' mendad əgwzenagle che yoguə' de'en babzolto' le'e. Na' šə no gon godenag, le'e gwzoe' to šla'alə. Bitoch gonle txen len le' par nič gaquene' zto' che de'en chone'enə'.

¹⁵ Pero la'anə'əczə šə babzolene' to šla'alə, bito gue'ilene', sino əgwzejni'ilene' dižə' šao' čhedə' la' naque' beṇə' bišə'əcho.

Pabən' gwnabene' Diozən' gaquəlene' beṇə' Tesalonica ca'

¹⁶ Xancho Jesocristən' chone' ca chzo chbezcho binlo len xbab de'en yo'o lo'o yičhja'ažda'ochon'. Na' le'enə' gonšgacze' par nič so cuezle binlo len xbab de'en yo'o lo'o yičhja'ažda'olen' dote tyemp bitə'ətezə de'en chac. Sošgacze' len yoguə'əle.

¹⁷ Na' chzenda' le'e de que cuincza' nada' Pabən' chzoja' part dao' che cart nga əchguapa' le'e diox. Can' choncza' len yoguə' cart de'en əchsela'a par nič nacbia' de que nadan' chsela'an, la' banombi'acze can' chzoja'.

¹⁸ Xancho Jesocristən' gaquəlenšgue' yoguə'əle. De'e na'azən' chzoja' ṇa'a. *Pab*

Cart Nech De'en Bzoj San Pabən' Par Temtion'

Pabən' chzoje' cart par Temtion'

¹ Nada' Pab naca' apostol che Jesocristən'. Diozən' babebeje' chio'o xni'a de'e malən' na' zocho lez gonho Cristo Jeso'osən' par niçh žjayezocho len Diozən'. Lega'aque'ena' gwso'one' mendad par naca' apostol.

² Na' chzoja' le' Temtio dao'. Banona' le' ca xi'ina' laogüe de'en bsd blo'ida' le' par chonlilažo'o Xancho Cristo Jeso'osən'. Chona' orasyon chnaba' lao Xacho Diozən' na' lao Xancho Cristo Jeso'osən' asa'aclenšgue' le', na' yesya'ayaša' yesya'azi'ilaže'e le', na' so'onšgue' ca so cuezo' binlo len xbab de'en yo'o lo'o yichjila'azda'ogo'ona'.

Nitə' beṇə' choso'osed choso'olo'ine' dižə' güenlažə'

³ Catə'an gwza'a Efeson' par gwya'a Masedonian', goža' le' yega'ano' Efeson'. Bena' mendad yega'ano' par niçh əgwzejni'ido' balə beṇə' nitə' na' de que cuich yoso'osed yoso'olo'ine' bitə'atezə dižə' de'en cui zdan txen len xtižə' Diozən'. Na' che'enda' sotezo' gono' ca'.

⁴ Na' leczə bzejni'iga'aque' de que bitoch cue' yichjga'aque' che de'e xaxta'ocho ca'. Dia chega'aque' ca' zjanaque' beṇə' zan. Na' de'e zan cuent chso'e chega'aque'. Gaqayozcho šə cue' yichjcho che de'e ca'. Na' bito chsa'aclenən chio'o par niçh gonlilažə'əcho Diozən' can' chene'ene' goncho.

⁵ Cheyalə' əgwzejni'icho beṇə' par niçh so'onlilaže'e Diozən' do yichj do lažə'aga'aque' na' so'e latja yeya' yeyib Diozən' yichjila'azda'oga'aque'ena'. Na' šə so'one' ca' nachən' sa'acbe'ine' lo'o yichjila'azda'oga'aque'ena' de que bito bi de'e mal chso'one'. Egwzejni'icho lega'aque' so'one' ca' par niçh asa'aque'ne' che Diozən' na' che ljuəžjga'aque'.

⁶ Nitə' beṇə' bagosa'aque'e nez malən'. Bito chso'onlilaže'e Diozən' do yichj do lažə'aga'aque'. Bito chso'e latja yeya' yeyibe' yichjila'azda'oga'aque'ena' na' zjəneze' de que chso'one' de'e mal. De'e na'anə' chso'echgüe' dižə' de'e bito bi zaquə'an.

⁷ Chse'ene'ne' yoso'osed yoso'olo'ine' beṇə' yoblə lei de'en bzoj de'e Moizezən' len bito chse'ejni'ine' bi dižə'an chso'e na' nic chse'ejni'ine' bi zeje de'e ca' chasə'ane' zjanaquən de'e žialao xen goncho.

⁸ Na' nezecho de que lein' naquən güen con šə gwchinchon par əgwzejni'icho beṇə' de que bito cheyalə' so'one' de'e mal.

⁹ Cheyalə' nezecho de que beṇə' ca' bachso'on can' chene'e Diozən' bito chasə'ayəžjene' to lei de'e gwzejni'in lega'aque' de que cheyalə' so'one' de'e güen. Diozən' bnežjue' lein' par beṇə' ca' cui chso'on can' nan na' par beṇə' godenag ca' na' par beṇə' ca' cui chso'elao' le', na' par beṇə' ca' chso'ontezə chso'one' de'e malən', na' par beṇə' ca' cui chso'on cas che Diozən', na' par beṇə' ca' chesə'əgue'i de'en naquə de'e zaque'e lao Diozən', na' par beṇə' ca' chso'ot xaxna'aga'aque', na' par yeziqwa'əchlə beṇə' güet beṇə'.

¹⁰ Na' leczə bnežjue' lein' par beṇə' ca' chesə'əgo'o xtoga'aque' na' par beṇə' ca' chesə'əbejyichje' no'ol chega'aque' o be'en chega'aque' par chasə'əzolene' beṇə' yoblə, na' par beṇə' byo ca' chesya'əzolentezə ljuəžj beṇə' byoga'aque', na' par beṇə' chasə'əche'e beṇə' yoblə la fuers na' chesə'adi'ene' lao na' beṇə' yoblə, na' par beṇə' güenlažə', na' par beṇə' ca' chsa'ac testigw fals contr ljuəžjga'aque' lao jostis, na' par notə'atezəchlə beṇə' chso'on contr dižə' güen de'en chsd chlo'icho che Diozən'.

¹¹ Lei na'anə' chonən txen len dižə' güen dižə' cobə che Diozən' ben' cho'ela'ocho. Na' le'ena' babene' lao na'a par chyixjui'a dižə' cobə che'ena' de'en naquə de'e güen juisy.

Pabən' be'e yelə' choxwlen che Diozən'

¹² Cho'a yelə' choxwlen che Xancho Jesocristən', cheda' le'ena' chone' fuers balor chia' par chyixjui'a xtiže'ena'. Na' le'ena' gwleje' nada' par gona' xšine'ena' cheda' gwneze' de que zotezə zoa' chona' complir can' cheyalə' gona'.

¹³ Lechgualə' bachaclene' nada', len antslə ze'e gombi'ane' bžia bnita'ane' na' gwzi'ichižə'ane', na' bchi' bsaca'a beṇə' ca' chso'onlilaže'ene'. Beyašə' beži'ilaže'e nada' la'ana'aczə bena' ca' cheda' cuiṇə' gonlilažə'ane' na' bito goche'ida' bin' chona'.

¹⁴ Na' Xancho Cristo Jeso'osən' blo'ine' nada' catequən nži'ilaže'e nada' ca de'en chaclene' nada' par niçh bachonlilažə'ane' na' bachacda' che yeziqwa'əchlə beṇə' laogüe de'en ngoda'a txen len Cristo Jeso'osən'.

¹⁵ Dižə' quinga naquən de'e li na' zjəzaquə'an par šejle'echo, de que "Jesucristən' bide' yežlyo nga par niçh chebeje' beṇə' xni'a de'e malən'." Na' nada' chacda' goca' le'eze'laogüe beṇə' güen de'e mal.

¹⁶ Pero la'ana'aczə goca' le'eze'laogüe beṇə' güen de'e mal, Jesocristən' beži'ilaže'e nada' par niçh blo'e catec yelə' chxenlažə' nape'. Na' de'en beži'ilaže'e nada' yoguə' beṇə'

ze'e so'onlilaže'ene' na' ze'e yesə'əzi'e yelə' mban zejlicane sa'acbe'ine' de que nape' yelə' chxenlaža' xen.

¹⁷ Ledoye'elaoch Rei chechon' na' na' zejlicane, ben' cui te chei na' zoe' zejlicane. Cheyalə' güe'echone' yelə' bala'an. Le'ena' cui no chac le'i, na' naque' beṇə' sin'. Tozə' le' zaque'e par güe'ela'ochone'. Na' can' naquəczən.

¹⁸ Xi'inda'ogua'a Temtio, de'e quinga chzoja' le' le'e cart nga, chona' mendad gono' xšin Diozən' do yichj do lažo'o la'ana'əczə' cats' naquən zdebə. Che'enda' žjəsa'alazažo'o can' gwso'on beṇə' golə' blao entr chio'o chonlilaža'əcho Cristən', bagwso'e diža' boso'ozenene' chio'o de que bagwlej Diozən' le' par gono' xšine'ena'. Benšga xšin Diozən' can' gosə'əne'.

¹⁹ Na' lecza gwzo chech gonlilažo'o Cristən', na' gono' ca ənezdo' lo'o yichjla'aždaogoo' de que bitobi de'e mal chono'. Balə beṇə' bito besyə'ədinjene' xtolə'əga'aque'ena' la'ana'əczə' gosə'ənezene' lo'o yichjla'aždaoga'aque'ena' de que bagwso'one' de'e malən', na' de'e na'ana' bitoch chso'onlilaže'e Diozən'.

²⁰ Can' bagwso'on Imeneo na' Ljandr. Chžona' so'on beṇə' ca' txen len chio'o chonlilaža'əcho Cristən' na' chṇabda' Diozən' güe'e latjə gon Satanasa'n con nac chene'en len lega'aque' par nič əsa'acbe'ine' de que bito cheyalə' yoso'ožia yoso'onite'e Diozən'.

2

Nac cheyalə' goncho orasyonṇə'

¹ Na' chnia' le' de yeto de'en naquə de'e žialao gon yoguə'əcho. Cats' ndopə nžagcho par cho'ela'ochio Diozən' cheyalə' goncho orasyon par yoguə'əlo' beṇə', nabcho gaquəlen Diozən' lega'aque', na' güe'echo yelə' choxcwlen che Diozən' por lega'aque'.

² Leczə cheyalə' goncho orasyonṇə' par no rei na' par yoguə' beṇə' gwnabia' ca', par nič gaquə so cuezcho biṇlo, na' par nič bitobi əgwžon güe'ela'ochio Diozən'. Cheyalə' goncho de'en naquə güen laogüe'ena' na' lao beṇəchən'.

³ Naquən güen goncho orasyonṇə' ca', la' Diozən' ben' babebej chio'o xni'a de'e malən' cho'olaže'e goncho ca'.

⁴ Diozən' chene'ene' yebeje' yoguə' beṇə' xni'a de'e malən'. Leczə chene'ene' yesə'ənezene' na' se'ejle'e diža' li che'ena'.

⁵ Tozə Diozən' zaque'e par güe'ela'ochone', na' tozə ben' zo fabor chio'o lao Diozən', le'ena' Jesocrisən' ben' goljə beṇəch.

⁶ Jesocrisən' nan' bnežjw cuine' gwduxjue' xtolə' yoguə' beṇəch. Dezd gwlatte Diozən' bsi'e xneze niṭə' beṇə' yesə'əyixjui' e che Jesocrisən' na' cats'ən bžin žan' bžie' bia'ana', gosə'əyixjui' de que Jesocrisən' bnežjw cuine' gwso'ote'ene' por ni checho.

⁷ Na' lecza de'e na'ana' gwlej Diozən' nada' par naca' apostol che' na' par əchyxjui'a diža' li che'ena'. Bsele'e nada' chsed chlo'ida'an beṇə' ca' cui zjənaquə beṇə' Izrael par nič so'onlilaže'ene'. Cho'a diža' li notono chxoayaga' əṇia' ca'.

⁸ Na' yeto de'e che'enda' gonle, yoguə' latjə gan' chdopə chžagle par cho'ela'ole Diozən', beṇə' byo ca' cheyalə' so'one' orasyonṇə' lao ndopə nžagle. Cheyalə' gaquə la'ažda'oga'aque'en xi'ilaža', na' notono yesə'əže'e na' notono sa'acyože' par nič Diozən' əgwzenague' chega'aque' cats' so'one' orasyonṇə'.

⁹ Na' lecza no'ol ca' cheyalə' yoso'opa'a cuinga'aque' ca cui niṭe'e zban. Pero bito cheyalə' cue' yichjga'aque' porzə par niṭe'e xoche, o par yesə'əgual'e bga o ret de or o de perlas. Na' bitotec yesə'əbe' yichjga'aque' gaquə yišə' yichjga'aque'en xoche o par yesə'əzi'e xaga'aque' de le'eyə'.

¹⁰ Cheyalə' niṭe'e so'one' de'e güen, can' chene'e Diozən' so'on notə'ətezəchlə no'olə bagwso'on lyebe de que əso'elaogüe'ene'.

¹¹ No'olə ca' cheyalə' yesə'əzəxjw yichjga'aque' yoso'ozenague' che beṇə' ca' choso'osed choso'olo'ine' xtižə' Diozən' na' bitobi diža' əso'e lao coltən'.

¹² Bito cho'a latjə par nič no'ol ca' yoso'osed yoso'olo'ine' xtižə' Diozən' lao coltən', con niṭə'teze' žizə. Na' bito yesə'ənabi'e beṇə' byo.

¹³ Chnia' ca' la' Diozən' zgua'atec bene' Adanṇə' na' techlə bene' Ebən'.

¹⁴ Na' cats' gwxiye'en benən par nič beṇə' nech ca' gwso'one' de'e malən' bito bxoayaguən Adanṇə', sino bxoayaguən no'ol che'ena' par nič besə'əxope' gwso'one' de'e malən'.

¹⁵ De'e na'ana' no'ol ca' chəsə'əžaglaogüe' cats' chəsə'əzane'. Pero žjəsyə'ənite'e len Diozən' zejlicane šə niṭə'ətezə niṭe'e so'onlilaže'ene'. Leczə cheyalə' sa'aque'ne' che Diozən' na' əsa'ac la'ažda'oga'aque'ena' xi'ilaža' na' bito so'e latjə ṇabia' la'ažda'omalga'aque'ena' lega'aque'.

3

Nac cheyalə' so'on beṇə' ca' choso'ogüia choso'oye' beṇə' ca' chso'onlilaže' Jesocrisən'

¹ De'e li can' chesə'əne': "Notə'ətezə beṇə' šə chene'ene' əggüia əgwy'e yeziquə'əchlə beṇə' chso'onlilažə' Jesocrisṭən', chene'ene' gone' to žin de'en zaquə'əchgua."

² Catə' cuejle to beṇə' par əggüia əgwy'e yeziquə'əchlə beṇə' chso'onlilažə' Jesocrisṭən', lecuej to beṇə' zotezə zoe' chone' ca notono gaquə'əne' de que de'e malən' chone'. Lecuej beṇə' zo tozə' no'ol chei, beṇə' cui choe' latjə' nābia' la'azda'omale'ena' le', beṇə' chnābia' cuine' par chone' can' chazlažə' Diozən', beṇə' chon ca beṇə' yoblə' chsa'ape'ene' respet, beṇə' chebei chgüialaogüe' beṇə' liže'ena', na' beṇə' ņeze nac əgwse əgwlo'ine' xtižə' Diozən' binlo.

³ Bito cuejle beṇə' güe'e zo, o beṇə' naquə' beṇə' gotil, o beṇə' chzelažə' gone' gan mechən', o beṇə' chon znia par nič yoso'ozenag beṇə' che', sino cuejle beṇə' naquə' gaqxwlažə'.

⁴ Lecuej beṇə' chnābia' xi'ine' ca' binlo len notə'ətezəchlə beṇə' nita' liže'ena'. Lecuej beṇə' chon byen yoso'ozenag xi'ine' ca' che' na' beṇə' chon ca chsa'apbo' le' respet bitə'əteza de'en chone'.

⁵ La' šə to beṇə' bito chac nābi'e family che'ena' binlo, bito ņezene' nac gone' par əggüia əgwy'e beṇə' ca' bagwlej Diozən' par chesə'adopə chesə'əžague' chso'əlaogüe'e Jesocrisṭən'.

⁶ Bito cuejle to beṇə' ze'e gwzolaon chonlilaže'e Diozən', la' šə cuejle to beṇə' cobə' gonlja cuine' xen can' ben de'e gwxiye'ena' na' si'e castigw ca castigon' si' lenṇə'.

⁷ Cuejle beṇə' chon par nič beṇə' ca' cui zjənaque' txen len chio'o yesə'əņezene' de que chone' de'e güen, la' šə cui zotezə zoe' chone' de'e güen, gwžinlja ža catə' yoso'ožia yoso'onitə' beṇə' le' na' əxope' lao na' de'e gwxiye'ena'.

Nac cheyalə' sa'ac beṇə' ca' əsa'aque' comisyon che chio'o chonlilažə'əcho Jesocrisṭən'

⁸ Na' catə' cuejle beṇə' ca' əsa'ac comisyon che le'e chonlilažə'əle Jesocrisṭən' gan' zolen', lecuej beṇə' zjəzaquə' par gapəga'achone' respet, na' beṇə' bito zjənaquə' beṇə' goxoayag, beṇə' cui zjənaquə' beṇə' güe'e zo, beṇə' cui chesə'əzelažə' so'one' gan mechən' len xšin Diozən'.

⁹ Lecuej beṇə' nitə'əteza nite'e chse'ejle'e che de'en babzejni'i Diozən' chio'o che Jesocrisṭən' de'en cui no gwņeze antslə, beṇə' chso'on ca chesə'əņezene' lo'o yičhja'la'azda'oga'aque'ena' de que chso'one' can' chazlažə' Diozən'.

¹⁰ Cheyalə' ggüiale can' chso'on beṇə' ca' chaquele cuejle par əsa'aque' comisyon chele šə chso'one' can' bagwnia' cheyalə' so'one', na' šə yesə'əchoje' binlo sin cui bi bi falt' chega'aque' əžel, nachən' cuejle lega'aque' par əsa'aque' comisyonnə'.

¹¹ Leczə ca' no'ol ca' chso'on xšin Diozən' cheyalə' əsa'aque' beṇə' zjəzaque'e par gapəga'acchone' respet, cheyalə' əsa'aque' beṇə' cui choso'ožia choso'onite'e beṇə' yoblə', cheyalə' əsa'aque' beṇə' cui chso'e latjə' nābia' la'azda'omalgə'aque'ena' lega'aque', na' cheyalə' əsa'aque' beṇə' nitə'əteza nite'e chso'one' complir con can' chene'e Diozən'.

¹² Na' catə' cuejle beṇə' ca' əsa'ac comisyon che le'e chonlilažə'əle Jesocrisṭən' gan' zole, lecuej beṇə' zjəzo tgüejzə no'ol chei na' lecuej beṇə' chesə'anābia' xi'inga'aque' na' notə'ətezəchlə beṇə' nita' ližga'aque' can' chazlažə' Diozən'.

¹³ Beṇə' ca' zjənchoj par zjənaque' comisyonnə' šə so'one' binlo yesə'əzi'e yelə' bala'an xen, na' leczə so'onlilažə'əchgüe' Jesocrisṭən' na' bito yesə'əžebe' laogüe'ena'.

Notono gwņeze antslə de'en babzejni'i Diozən' chio'o

¹⁴⁻¹⁵ Zoa' lez yob yida' delana'a le', pero bzoja' de'e ca' chedə' bito ņezda' batən' gaquə' yida' na' che'enda' ənezdo' nac cheyalə' gon chio'o naccho family che Diozən'. Dioz ben' zo zejlicane bagwleje' chio'o par chdopə chžagcho cho'ela'ochə Jesocrisṭən' na' de'e na'anə' naccho family che'. Na' Diozən' babzejni'ine' chio'o dižə' li che'ena' par chzejni'ichon beṇə'.

¹⁶ Notono gwņeze antslə de'en babzejni'i Diozən' chio'o nā'a, na' chejle'echon na' naquən de'e žialao xen.

Jesocrisṭən' bide' golje' beṇə'ach,

na' Spirit che Diozən' blo'en de que naque' doalje xi'in Dioz.

Angl ca' besyə'əbeine' besə'əle'ine' le'.

Na' bžin ža beyepe' yoban' bezi'e yelə' gwnābia' che'ena' na' yelə' bala'an che'ena'.

Na' beṇə' ca' chso'e xtiže'ena' bagosə'əyičxjui'en yoguə' nasyon,

na' zan beṇə' ža' doxen yežlyo nga bachso'onlilaže'ene'.

4

Ežin ža yesə'əbejyichj beṇə' dižə' li che Diozən'

¹ Clar bagwna Spirit che Diozən' de que əžin ža balə beṇə' yesə'əbejyichje' dižə' li che Diozən'. Yesə'əbejyichje'ena' ca de'en yoso'ozenague' che beṇə' ca' yoso'osed yoso'olo'i dižə' güenlažə', na' yoso'ozenague' che beṇə' ca' yoso'osed yoso'olo'i dižə' de'en za'ac che de'e xio' ca'.

² Benə' goxoayag ca' benə' ca' yoso'osed yoso'olo'i dižə' güenlažə' na' bitoch bibi əsa'aque' lo'o yichjla'ažda'oga'aque'ena' cata'an yesə'əxoayague' o cata'an so'one' bichlə de'e mal.

³ Yoso'ožone' no yoso'ošagna', na' yesə'ane' de que bito gaquə gaocho balə yelə' guao la'anə'əczə Diozən' bene' par niç zjaden. Na' bene' yoguə yelə' guao ca' par niç chio'o chonlilažə'əchone' na' nombi'acho de'en naquə de'e li gaoga'acchon na' güe'echone' yelə' choxcwlen.

⁴ Na' de'en bene' yoguə de'e ca' nezecho zjənaquən güen na' bito zjənaquən par gue'iga'aquechon, con güe'echo Diozən' yelə' choxcwlen par de'e ca' chone' chio'o.

⁵ Zjənaquən güen par gaoga'acchon chedə' cho'echo Xtiže'ena' cata' choncho orasyon cho'echo yelə' choxcwlen che' par lega'aquən.

Nac cheyalə' so'on benə' ca' yoso'osed yoso'olo'ine' xtižə' Jesocrisən'

⁶ Na' Temtio, par niç yebeichgüei Jesocrisən' can' chono' xšine'ena' cheyalə' əgwzejni'ido' benə' bišə'əcho benə' ca' chso'onlilažə' Jesocrisən' de'e ca' bagwnia' le'. Šə gono' ca' gaquəlenən le' par sotezə so' gonlilažə'əcho' Jesocrisən' na' talencho' dižə' li che Diozən' de'en bachdaleno' na'a.

⁷ Bito gone chio' dižə' güenlažə' de'en chsa'aljlažə' benə' ca' cui chso'elao' Diozən'. Chso'e dižə' ca' dižə'an chsoe' balə no'olə gol ca' len bidao' ca' de'e cui zaquə' šejle'echo chei. Pero na' le' bsd par niç šejəch goncho' can' chene'e Diozən'.

⁸ Nezecho de que cata' choncho jersisy chaclenən cuerp chechon', na' cata' choncho can' chene'e Diozən' caguə cuerp checho na'azən' chaclenən, sino chaclenzən chio'o par zocho mbalaz na'a lao mbancho na' ca'aczə cata' žjəyecho len Diozən'.

⁹ Naquən de'e li na' zaquə'an par šejle'echo chei.

¹⁰ Na' Diozən' chone' par niç de yoguə de'e chyažje yoguə benə' par niç zjəmbane', na' chone' yelə' mban zejlicəne che chio'o chonlilažə'əchone'. Na' de'en zocho lez žjəyecho len Dioz ben' zo zejlicəne, chonchguacho xšine'ena' na' chgo'o chchejlažə'əcho cata' chəsə'əzi'ichizə' benə' chio'o.

¹¹ Bsd blo'i benə' de'e quinga babzejni'ida' le' na' gono' mendad so'one' can' bagwnia'.

¹² La'anə'əczə ne'e naco' benə' xcuida' bito go'o latjə yesə'əzo benə' le' ca'alə cui yoso'ozenague' chio'. Len bitə'ətezə ənao' na' len yoguə de'en chono' blo'i benə' ca' chso'onlilažə' Jesocrisən' nac cheyalə' so'one', na' naquən' cheyalə' sa'aque' che Diozən' na' che ljuežjga'aque' na' nac cheyalə' nitə'ətezə nite'e so'onlilažə'e Jesocrisən', na' nac cheyalə' so'one' par niç la'ažda'oga'aque'ena' əsa'quən xi'ilažə'.

¹³ Mientr yida' gan' zo'onə' gwlec yichjo' blab Xtižə' Diozən' de'en nyojən len benə' ca' chesə'ədope chesə'əžag chso'elaogüe' Jesocrisən' na' gwdixjue'i dižə' güen dižə' cobə che'ena', na' bzejni'i benə' bi zeje xtižə' Diozən'.

¹⁴ Ben yoguə'əlol de'en gwlej Diozən' le' par gono' cata'an boso'oəxoə na' benə' golə benə' blao ca' yichjo'on na' boso'ozenene' le' de que Diozən' gwleje' le' par gono' xšine'ena'.

¹⁵ Gwlec yichjo' ben yoguə' can' gwnia' par niç yoguə' benə' yesə'əle'ine' can' zdach chono' can' chene'e Diozən'.

¹⁶ Gwdapə cuidad ben con can' chazlažə' Diozən', na' bsd blo'i benə' so'one' ca'. Šə gono' ca' gaquəlenən benə' ca' choso'ozenag xtižə'onə' par yesyə'əchoje' xni'a de'e malən' na' leczə gaquəlenən le'.

5

Can' cheyalə' goncho len benə' ca' chso'onlilažə' Cristən'

¹ Šə bi de'en chon to benə' golə, bito tilo'one' sino gwneyoine' can' cheyalə' gone', ben can' chono' len xəo'. Na' šə bi de'en chon to benə' xcuida' bzejni'ine' ca' bišo'o.

² Na' šə bi de'en chon to no'olə golə, bzejni'ine' can' chono' len xna'o, na' šə bi de'en chon to no'olə xcuida' bzejni'ine' ca' to zano' par niç notono gaquə əne' de que de'e malən' chono'.

³ Cheyalə' goncho mantener no'ol ca' bagwsa'at be'en chega'aque', šə zjənaque' doalje gozebə.

⁴ Pero šə nitə' xi'inga'aque' o xesoaga'aque' bzejni'i benə' ca' de que cheyalə' so'one' lega'aque' mantener chedə' benə' gol ca' babosyo'osgole' lega'aque'. Chazlažə' Diozən' goncho mantener benə' golə lao family che checho.

⁵ No'ol ca' zjənaquə doalje gozebə, benə' ca' notono family chega'aque' nitə', nite'e lez gaquəlen Diozən' lega'aque' na' chso'ontezə chso'one' orasyon teža na' še'elə. De'e na'anə' zjəzaque'e par goncho lega'aque' mantener.

⁶ No'olə gozeb ca' chso'on xbab so'one' con can' chse'enene' zjənaquəga'aque' ca' benə' guat len yichjla'ažda'oga'aque'ena' de'en cui choso'ozenague' che Diozən'.

⁷ Yoguá' de'e ca' bagwni'aná' gono' mendad so'on beñá' ca' chso'onlilažá' Cristán' par niç notono gaquá' ãne' de que chio'o chonlilažá'echo Cristán' bito choncho can' cheyalá' goncho.

⁸ Šá' nocho cui gaqualencho no parient checho len de'en chásá'əyážjene', bito choncho can' cheyalá' gon chio'o chonlilažá'echo Cristán' na' napəchcho dolá' cle ca beñá' ca' cui zjənonbia' Cristán'. Na' peorəch šá' cui choncho mantener no'ol checho, xi'ıncho, na' xaxna'acho.

⁹ Quinga nezele noe' no'olá gozeb ca' cuejle par niç le'e chdopə chžagle cho'ela'ole Cristán' gonle lega'aque' mantener. Šá' banite'e gyon iz o mazlá, na' šá' gwnitá' tgüejzə be'en chega'aque',

¹⁰ na' šá' beñá' zan chásá'əne' bagwso'onchgüe' de'e güen ca de'en bosá'əsgole' no bidao' o chásá'əgüialaogüe' beñá' zitə' ližga'aque'ena', o chsa'aclenchgüe' yeziqú'əchlə beñá' bagwlej Diozán' par zjənaque' lažá' ne'ena', o chsa'aclene' beñá' chásá'əyi' chásá'əzaque'e, o šá' bagwso'onchgüe' bita'ətezachlə de'e güen nachən' zjəzaque'e par cuejga'aclene'.

¹¹ Pero bito cuejle no'olá gozeb ca' zjənaquə beñá' xcuidá' la' gwžinlja ža se'enene' yesá'əbejyichje' xšin Cristán' na' se'enene' yesyá'əšagne'e de'e yoblə.

¹² Na' šá' yesá'əbejyichje' xšin Cristán' əsa'ape' dolá' de'en cuich so'one' can' gwso'one' lyebe.

¹³ Na' no'olá gozebə xcuidá' ca' bito gonga'aclene' mantener. De'en yesá'əlaže'e liž beñá', so'olaogüe' cui so'one' žin na' əsa'aque' beñá' güilj gwıan dižá' na' yesá'əgüiazeche' bin' chso'on beñá' yoblə, na' so'e dižá' che de'en cui cheyalá' so'e dižá' chei.

¹⁴ Chacda' güen šá' no'olá gozebə xcuidá' ca' yesyá'əšagne'e de'e yoblə na' yesá'əzane' na' yosyo'osgol xi'ınga'aque', na' yosá'əgüia yoso'oye' xmendadga'aque' de'e de ližga'aque', par niç notono beñá' contr checho gaquá' ãne' de que de'e malən' choncho.

¹⁵ Balə no'olá gozebə xcuidá' ca' bagosá'əbejyichje' Cristán' par zjəsá'ənaogüe' Satanasən' de'en chnabia' de'e xio' ca'.

¹⁶ Nota'ətezə beñá' chso'onlilažá' Cristán' šá' lao family chega'aque'ena' nitə' no'ol ca' bagwsa'at ben' chega'aque', cheyalá' so'one' lega'aque' mantener par niç beñá' ca' chásá'ədopə chásá'əžag chso'elaogüe'e Jesocristán' bito so'one' lega'aque' mantener, sino so'one' mantener no'ol ca' zjənaquə doalje gozebə.

¹⁷ Beñá' ca' bagwleje par zjənaque' beñá' golə beñá' blao lao le'e chonlilažá'əle Cristán' šá' chso'one' binlo de'en ngo' o lao na'aga'aque' so'one', zjəzaque'e par gaple lega'aque' respet na' par chixjwle che gast chega'aque'ena', na' mazachlə šá' noe' chesá'əyixju'i'e xtižá' Diozán' na' choso'osed choso'olo'ine' bi zejennə'.

¹⁸ Zjəzaque'e par gonle ca' la' nyojən le'e Xtižá' Diozán' nan: "Bito agwseyjwle cho'a go'ın ca' par niç cui gaquá' sa'ob žlac choso'olej choso'ošoşjəb trigon' par chchoj xaina'." Na' lecza nyojən nan: "To beñá' güen žin cheyalá' si'e laxjue'."

¹⁹ Bito gono' cas šá' no gao xyan' contr to beñá' golə beñá' blao lao le'e chonlilažá'əle Cristán' šá' cui zo yeto o yechopə testigw beñá' əso'e dižá' de que de'e malən' chon be'ena'.

²⁰ Pero šá' de'e li chone' de'e malən', cheyalá' tiło'one' lao yoguá' beñá' ca' chásá'ədopə chásá'əžag chso'elaogüe'e Jesocristán' par niç yeziqú'əchlə beñá' ca' chso'elao' Jesocristán' yesá'əzebe' so'one' de'e malən'.

²¹ Diozán' na' Xancho Jesocristán' na' angl beñá' ca' zjənchoj par chso'one' mendad che Diozán' zjənaque' testigw chia' de'en chona' mendad gono' can' bagwnia' le' le'e cart nga. Tozəczə can' gono' len notá'ətezə beñá', ni toe' cui gono' xench.

²² Bito yob cuejo' notá'ətezə beñá' par gaque' beñá' golə beñá' blao lao le'e chonlilažá'əle Cristán', la' šá' əxope'one' de'e mal lenczo' le' gapo' dolá' šá' ca'. Ben par niç gactezə gaquá' yichjla'azda'ogo'onə' xi'ılažá'.

²³ De'en chacšendo' telizə, bitoch ye'ejə' sleza nis, sino güe'ej latə' bino par niç gaqualenən li'onə'.

²⁴ Nacbiaxejə de'e mal de'en chso'on balə beñá' antslə ze'e əžin ža əsa'aque' castigw che xtolə'əga'aque'ena'. Pero na' yebalə' bito yob gache'icho šá' chso'one' de'e mal.

²⁵ Na' lecza can' naquən len beñá' chso'on de'e güennə'. Balə' nacbiaxejə de'e güennə' chso'one', na' yebalə' bito nacbia' pero gwžin ža la'alaon.

6

¹ Yoguá' mos beñá' ca' chso'onlilažá' Cristán' cheyalá' əsa'ape' xanga'aque'ena' respet, par niç xanga'aque' ca' bito yesá'əne' contr Diozán' ben' cho'ela'ocho na' contr de'en chsed chlo'icho.

² Na' šá' xanga'aque' ca' lecza chso'onlilaže'e Cristán', mos ca' bito cheyalá' so'one' xbab cui yoso'ozenague' chega'aque' por ni che de'en zjənaque' txen chso'onlilaže'e Cristán'. Mazachlə cheyalá' so'one' žinnə' do yichj do lažá'əga'aque' chedə' xanga'aque' beñá' ca'

chso'one' žin čhei chso'onlilaže'e Cristən' na' Diozən' chaquene' čhega'aque'. Gwdixjue'e de'e ca' babzejni'ida' le' na' bsd blo'in.

Cheyla' socho content len de'e de čecho laogüe de'en chonlilaža'əcho Jesocristən'

³ Niťa' beņa' choso'osed choso'olo'ine' diža' de'en cui zdan lebe len de'en bagwnia' le' na' len diža' güen čhe Xancho Jesocristən' na' len bitə'ətezəchlə de'en chzejni'icho beņa' par chso'elaogüe'e Diozən'.

⁴ Beņa' ca' choso'osed choso'olo'ine' clelə chso'on cuinga'aque' xen chsa'aque'ne' zjənezene' len la' bitobi chse'ejni'ine'. Beņa' ca' chso'on ca' con zjəchi' yichjga'aque' chesə'ədilə chesə'əšašlene' beņa' yoblə, na' chso'e diža' čhe no pont dao' de'en choso'osed choso'olo'ine' de'en cui naquə de'e žialao. De'en chesə'ədilə chesə'əšaše' čhe bizə de'en nac ca' chonən par nič chsa'acxi'i ljuəzjga'aque', na' chsa'acyože' beņa', na' choso'ožia choso'onite'e beņa', na' chso'one' xbab mal čhe beņa',

⁵ na' chesə'əža'a ljuəzjga'aque' toe' yetoe'. Beņa' ca' chso'on ca' choso'ozenague' čhe la'ažda'omalga'aque'ena' na' bito zjənombi'e de'en naquə de'e li. Malən' chso'one' choso'osed choso'olo'ine' čhe Diozən' parzə nič so'one' gan. Bito gono' txen len beņa' ca' chso'on ca'.

⁶ De'e žicə de'e xen de'e zedegua'an par chio'o šə cho'ela'ochio Diozən' na' šə zocho mbalaz len de'e dao' de čecho.

⁷ Can' na dicho nga: "Ga'alchon' catə'an bla'acho yežlyo nga na' ga'alchon' yeza'acho."

⁸ Cheyla' socho mbalaz šə de de'en che'ej de'en chaochio, na' šə de xala'ancho, na' gan' čhtascho.

⁹ Beņa' ca' zjəchi' yichjga'aque' gatə' de'e zan šinlazga'aque', de'e zan bien čhega'aque' o mech xen čhega'aque' choso'ozenague' čhe de'e malən'. Can' chac chesə'əxope' lao na' gwxiye'en. Choso'ozenague' čhe la'ažda'omalga'aque'ena' par chso'one' de'e zan de'e cui zjəzaqua' na' de'en chso'on mal len lega'aque'. Beņa' ca' chso'on ca' yesə'əbiayi'e na' əsa'aque' castigw zejlicane.

¹⁰ La'ažda'omalchon' gwzenaguən čhe bitə'ətezə de'e mal šə chebeichgüeicho mechən'. Balə beņa' de'en chesə'əbeichgüeicho mechən' bagosa'əbejyichje' diža' li čhe Diozən' na' de'e zan de'en chesə'əžaglaogüe' yelə' güen de'e mal čhega'aque'ena'.

Cheyla' cuec yichjcho goncho xšin Diozən' do yichj do laža'əcho

¹¹ Pero na' le' naco' beņa' güen xšin Diozən', bito yebeido' de'e ca' zjənac ca', sino güe'elažo'o gono' de'en naquə güen lao Diozən', na' šejəch goncho' can' chene'ene'ena' na' gonlilaža'əcho'one', na' gaquəchdo' čhe' na' čhe beňachən', na' sotezə so' gonlilažo'o Diozən' catə' de de'e saquə'əzi'o, na' gaquə'əcho' beņa' gažjwlažə'.

¹² Ca to deportist chone' do yichj do laže'e yoguə de'en cheyla' gone' par nič si'e premio, le'egatezə ca' le' gwlec yichjo' ben xšin Diozən' do yichj do lažo'o laogüe de'en chonlilažo'one'. Gwlec yichjo' de'en zjəyezo' len Diozən' zejlicane čhedə' Diozən' gwleje' le' par zjəyezo' len le', na' bi'o diža' li lao beņa' zan de que chonlilažo'one'.

¹³ Ca'aczən' be' Jesocristən' diža' li lao Ponsio Pilatən' de que chonlilaže'e Diozən'. Na' ņa'a lao Jesocristən' na' lao Diozən' ben' chnežjo yelə' mban čhe beňachən', na' bia chsa'aš, na' biquə'əchlə de'e zjəmban,

¹⁴ chona' mendad gono' yoguə de'en nezdə' chene'e Diozən' gono'. Benən xte ca yidə Xancho Jesocristən' de'e yoblə par nič notono gaquə əna de que cui chono' can' chene'e Diozən'.

¹⁵ Yidə Jesocristən' de'e yoblə catə' əžin ža əžin or əgwžia Diozən' bia' yide'. Tozə Diozən' chnabi'e doxenlə, na' le'ena' cho'ela'ochio. Le'ena' naque' Rei ben' chnabia' yoguə rei ca' yelə', na' naque' Xancho ben' chnabia' yoguə' beņa' gwnabia' ca' yelə'.

¹⁶ Tozə le' choņe' chio'o yelə' mban zejlicane na' tant yo'o yelə' čhey čhe'eni' čhe'ena' gan' zo'ena' xte notono nochlə gaquə bigue'e gan' zo'ena'. Notono beņa' lao yežlyo nga ne'e le'ine' le' na' notono no gaquə le'ine' le'. Cheyla' güe'ela'ochone' la' le'ena' chnabi'e zejlicane. Na' can' gonšgaczcho.

¹⁷ Na' ca naquə beņa' ca zjənaque' beņa' gwni'a yežlyo nga, ben mendad bito əsa'aque' beņa' ya'alaza', na' bito so'one' xbab ņite'e mbalaz por ni čhe yelə' gwni'a čhega'aque'ena' čhedə' ca naquə yelə' gwni'ana' de'e te čhein'. Cheyla' ņite'e lez gon Diozən' ca ņite'e mbalaz, la' le'ena' choņe' chio'o yoguə de'en naquə de'e güen par nič yebeichon.

¹⁸ Beņa' gwni'a ca' cheyla' cue' yichjga'aque' par so'one' porzə de'e güen, so'one' de'en chebei Diozən', yesə'əchine' xmechga'aque'ena' par əsa'aclene' beņa', na' bito əsa'aque' beņa' rgüin.

¹⁹ Šə bač chso'one' ca', bachso'one' can' chene'e Diozən' gon chio'o de yelə' mban zejlicane čecho na' gaquəlenən lega'aque' tyemp de'en zeza'.

Yeto de'en gože' Temtion'

²⁰ Temtio dao' gwlecchgua yichjo' yoguə' de'en babzejni'i Diozən' le'. Bitobi cas gono' che bitə'atezə de'en yesə'əna beŋə' ca' chso'onlāžə' chəsə'əne' de que xtižə'əga'aque'ənə' naquən de'e sin', chedə' bitobi zaquə'an lao Diozən'.

²¹ Beŋə' ca' chesə'əna ca' bagosə'əbejyichje' dižə' li che Diozən' na' bitoch chso'onlilaže'ene'. Na'a ža gaquəlenšga Diozən' le'. De'e na'azən' chzoja'. *Pab*

Cart Egwchope De'en Bzoj San Pabən' Par Temtion'

Pabən' chzoje' Temtion'

¹ Nada' Pab naca' apostol che Jesocristán' con can' gwnalažə' Diozən'. Gwleje' nada' par naca' apostol par ničh chyixju'i' a can' bene' lyebe de que gatə' yelə' mban zejlicane che notə'ətezə' beŋə' gonlilažə' Jesocristán'.

² Na' chzoja' le' Temtio dao', len' banona' ca xi'ina'. Chona' orasyon chnaba' lao Xacho Diozən' na' lao Xancho Jesocristán' əsa'aclenšgue' le' na' yesyə'əyašə' yesyə'əži'ilažə'e le' na' so'onšgue' ca so cuezo' binlo len xbab de'en yo'o lo'o yichjla'ažda'ogo'onə'.

Cheyalə' gü'e'echo dižə' che Jesocristán'

³ Do yichj do laža'a cho'elaogua'a Diozən' can' gwso'on de'e xaxtaogua'a ca', na' nəzda' lo'o yichjla'ažda'ogua'an de que chona' can' chazlažə' Diozən'. Na' yoguə' laste catə' chona' orasyonə' cho'a yelə' choxcwlen che' par le'.

⁴ Chjza'alaza'a can' gwchežə' catə' beza'a gan' zo', teža na' še'elə' chzelaza'əchgua' le'i lježjcho par ničh yebeichgü'eida' lo'o yichjla'aždaogua'an.

⁵ Na' chona' xbab can' chonlilažo'o Diozən' do yichj do lažo'o can' chso'on xna'agolo' Loida na' xna'o Eunise bedote, na' zoa' segor de que chonlilažo'one' can' chso'on lega'aque'.

⁶ De'e na'ana' chneyoida' le', ben xte ga zelao saquə'ədo' par gono' ca de'en ben Diozən' lao na'o gono' catə'an bxoə na'ato'onə' yichjo'onə' par blo'eto' de que Diozən' gwleje' le' par gono' xšine'ena'.

⁷ Diozən' babene' chio'o Spirit che'ena' zon lo'o yichjla'ažda'ochon'. De'e na'ana' bito cheyalə' žebcho. Na' de'en zo Spirit che'ena' len chio'o, nezecho chaclen Diozən' chio'o len yelə' guac che'ena' na' chactezə' chaquecho che lježjcho na' chnabia' cuincho par choncho can' chazlažə' Diozən'.

⁸ De'e na'ana' bito yeto'ido' go'o xtižə' Xancho Jesocristán' na' nic yeto'ido' chia' de'en naca' pres laogüe de'en chyixju'i' a xtiže'ena'. Cheyalə' co'o gwchejlažə'əcho əžaglaochə' ca de'en gac checho laogüe de'en chyixjue'echo dižə' güen dižə' cobə' che Jesocristán', na' Diozən' gaquəlene' chio'o len yelə' guac che'ena' catə'an əžaglaochə'.

⁹ Cata' cuiŋə' xe yežlyon' Diozən' bsi'e xneze gwleje' chio'o par naccho lažə' ne'ena'. Na' catə' gwzolaə' benlilažə'əcho Jesocristán' Diozən' bebeje' chio'o xni'a de'e malən'. Na' de'en gwleje' chio'o par naccho lažə' ne'ena', bito bene' ca' por ni che bilə' de'e güenə' bencho. Gwleje' chio'o chedə' nži'ilažə'e chio'o.

¹⁰ Diozən' bablo'ine' chio'o can' nži'ilažə'e chio'o de'en bsele'e Jesocristán' ben' bebej chio'o xni'a de'e malən'. Jesocristán' na'ana' bene' par ničh əžin ža cuezə' yelə' gotən'. Na' de'en chejle'echo dižə' güen dižə' cobə' che'ena' nezecho de que deczə' yelə' mban zejlicane checho.

¹¹ Diozən' gwleje' nada' par ničh əchyixju'i' a dižə' güen dižə' cobə' che Jesocristán' na' par ničh naca' apostol che'ena' na' chsed chlo'ida' xtiže'ena' beŋə' ca' cui zjənaquə' beŋə' Izrael.

¹² Na' de'en chsed chlo'ida' xtiže'ena' de'e na'ana' chžaglaogua' nga. Pero bito cheto'ida' che de'en chžaglaogua' dia' ližya nga, chedə' nombi'a Diozən' ben' chonlilažə'a. Baben cuina' lao ne'ena' na' nəzda' de que nape' yelə' guac par gone' ca sotezə' soa' gonlilažə'ane' xte catə'əch əžin ža yidə' Jesocristán' de'e yoblə'.

¹³ Gwnaošga yoguə' de'en babsed bablo'ida' le', la' lenŋə' naquən güen, na' bito cuejyichjo' de'en chonlilažo'o Jesocristán' na' de'en chacdo' che' na' che beŋachən'.

¹⁴ Be' latjə' gaquəlen Spirit che Diozən' le' par ničh sotezə' so' əgwsed əgwlo'ido' dižə' li de'en babzejni'ida' le', chedə' Spirit nan' zon lo'o yichjla'ažda'ochon'.

¹⁵ Nəzdo' de que Figelon' na' Ermogenesən' na' yezan beŋə' lježjcho ca' nitə' Asian' bagosə'əbejyichje' nada'.

¹⁶ Pero na' Onesiforon' bito beto'ine' chia' de'en dia' ližya nga, sino btipe' lažə'a zan las. Xancho Diozən' gwlo'e'əšgue' can' nži'ilažə'e le' na' family che'ena'.

¹⁷ Cata' bide' Roma nga bene' byen beyilje' nada' na' beželene' nada' dia' ližya nga.

¹⁸ Na' nəzdo' can' goclenchgüe' nada' Efeson'. Chnaba' lao Xancho Diozən' əgwlo'ine' le' can' nži'ilažə'ene' catə' əžin ža choglaə' Xancho Diozən' che yoguə' beŋə' šə' zjənape' dolə' o šə' cui zjənape' dolə'.

2

Cheyalə' co'o gwchejlažə'əcho len de'en əžaglaochə' lao goncho xšin Jesocristán'

¹ Na'a xi'indaogua'a, de'en chaclen Jesocristán' le' benchechlažo'o ben xšine'ena'.

² Na' yoguá' de'en babsed bablo'ida' le' lao beñá' l'juežjcho zan ca', bsd blo'in beñá' ca' nita'atezá nite'e chso'one' complir can' cheyalá' so'one', beñá' gaquá yoso'osed yoso'olo'ine'en beñá' yoblá.

³ Bguo'o bchej len bitá'atezá de'en əžaglaogo' lao gono' xšin Jesocristán' par ničh ca' saquá'əlebádo' ca to soldad gual.

⁴ Nezecho de que ben' notad beñá' gaquá gone' xšine' žlac zde' yelá' soldadán', čhedá' cheyalá' gone' con can' na ben' chnabía' le'.

⁵ Na' nezecho de que ben' naquá deportist bito gaquá si'e premio šá bito chzenague' čhe yoguá' reglas ca' catá'ən chytjé'.

⁶ Na' leczá nezecho de que ben' chelale chon žin yižá'əná' chzi'e part nech čhe cwsešán' par cuine' antslá ze'e chnežjue' che beñá' yoblá.

⁷ Ben xbab čhe de'en chžejni'ida' le', na' Xancho Jesocristán' gaqualene' par ničh šejni'ido' can' cheyalá' gono' xšine'ena'.

⁸ Na' ben xbab čhe Jesocristán' ben' goljə yežlyo nga lao dia čhe de'e Rei Dabin', na' bebane' ladjo beñá' guat ca' can' chyixjui'a dižá' güen dižá' cobá čhe'ena'.

⁹ Na' de'en chyixjui'a dižá' güen dižá' cobá čhe'ena' de'e na'aná' chžaglaogua' na' dia ližya nga ca to beñá' mal juisy. Pero la'añá'əczá nada' dia ližya nga, bitobi gaquá so'on beñá' par ničh cui gasá' laljə xtižá' Diozán' dozežá.

¹⁰ La'añá'əczá chžaglaogua' nga zotežá zoa' chyixjui'a xtižá' Diozán'. Chyixjui'an par ničh yeziqúə'əchlá beñá' bagwlej Diozán' par əsa'aque' xi'ine' so'onlilaže'e Jesocristán'. Na' šá so'onlilaže'ene', yebeje' lega'aque' xni'a de'e malán' na' gwnežjue' lega'aque' yelá' mban zejlicane.

¹¹ Dižá' quinga zjənaquən de'e li:

Šə ngodá'əcho txen len Cristán' ca de'en gwso'ot beñá' le', leczá ngodá'əcho txen len le' ca de'en bebane' ladjo beñá' guat ca' par ničh žjəyecho len le'.

¹² Šə chio'o chonlilažá'əcho Cristán' chgo'o chčhejlažá'əcho catá'ən chžaglaoch, leczá nabi'acho txen len le'.

Šə cuejyichjcho Cristán' leczá ca' le' cuejyichje' chio'o.

¹³ Na' la'añá'əczá šə chio'o cui goncho complir can' nacho goncho, bia'aczá zo le' gone' con can' ne'ena',

la' naquacze' beñá' chon complir len bitá'atezá de'en ne'.

Can' goncho xšin Jesocristán' binlo

¹⁴ Ben par ničh beñá' l'juežjcho ca' chso'onlilažá' Cristán' žjəsyə'əzalaže'e de'e ca' bagwnia', na' ben mendad cui yesá'ədilá yesá'əšaše' entr l'juežjga'aque' por ni čhe bizá dižá' de'e cui zeje. Xancho Diozán' naque' testigw can' chso'one'. Na' šə yesá'ədilá yesá'əšaše' beñá' ca' chso'ozenag čhega'aque' cui se'ejle'e xtižá' Diozán'.

¹⁵ Bentežá ben xte ga zelao saquá'ado' par ničh yebei Diozán' can' chono'oná' na' par ničh bito gaquádo' zto' de'en chono' xšine'ena'. Na' əgwseďəgwlo'ido' cayañá'ən zeje xtižá' Diozán'.

¹⁶ Bitobi cas gono' čhe bitá'atezá dižá' de'en yesá'əna beñá' de'en cui naquá de'e zaque'e lao Diozán', čhedá' dižá' ca' chxoayaguən beñá' par ničh chyalá'əch chso'onche' de'e malán'.

¹⁷ Na' xtižá' beñá' ca' chso'osed chso'olo'i de'e ca' žjənac ca' chonán' par ničh beñá' ca' chso'ozenag čhega'aque' chəsá'əbejyichje' de'en chso'onlilaže'e Cristán', ca chen de'en naquá mal chytjən doxen lao cuerp čhechon' na' chžiai'yin len. Imeneon' na' Fileton' chso'osed chso'olo'ine' dižá' güenlažá' de'en nac ca'.

¹⁸ Lega'aque' bagosá'əbejyichje' de'en naquá de'e li čhedá' chso'osed chso'olo'ine' de que chio'o chonlilažá'əcho Cristán' babebancho ladjo beñá' guat ca' ca de'en bocobe' yichjla'azda'ochon' na' cuat əžin ža yolis yosbane' chio'o len cuerp čhechon'. Na' de'en chso'osed chso'olo'ine' ca', balá beñá' chso'onlilažá' Cristán' chsa'aczejlaže'e šə xtižá' Cristán' naquən de'e li.

¹⁹ Chio'o chonlilažá'əcho Cristán' gwxaquá'əlebecho ca to lan yo'o de'en naquá de'e gual. Na' nyoj Xtižá'ena' čhecho nan: "Diozán' nezene' non' zjənaquá xi'ine'." Na' leczá nyožən nan: "To to beñá' chesá'əne' de que chso'onlilaže'e Xancho Diozán' cheyalá' yesá'əbejyichje' cuich so'one' de'e malán'."

²⁰ Nezecho de que lo'o liž beñá' gwni'a ca' zjəde no yesá' xguaguá na' no ša' de or na' de plat, na' leczá zjəde no xguaguá na' no ša' de yag na' de gon'. Balən chso'onən žin par len de'en zjənaquá xoche na' yebałən chso'onən žin par len de'en zjənaquá de'e zban.

²¹ Notá'atezcho šə bito naocho de'en chso'osed chso'olo'i beñá' güenlažá' ca' gwxaquá'əlebecho ca to yesá' o to xguaguá de'e chon žin len de'en naquá xoche čhedá' guaquá goncho xšin Cristán' de'en zaquá'əchgua. La' šə cui naocho de'en chso'osed chso'olo'i beñá' güenlažá'əná' nachən' guaquá gon cuincho lažá' na' Diozán' na' socho probnid par goncho bitá'atezá de'e güen de'en chene'e Cristán' goncho.

²² De de'en chene'e la'azda'omalchon' goncho žlac ne'e naccho beṇə' xcuida', pero le' bito gono' bitə'ateza de'e ca'. Be'elaža' ben de'en naquə güen lao Cristən', na' gwzoteza gwzo ben'ilaža' le', na' goque che ljuežj beṇə'cho', na' leczə gwzo gwleza binlo len lega'aque'. Be'elaža' ben yogua' de'e ca' can' chso'on yeziquə'achlə beṇə' chso'on'ilaža' Xancho Cristən' beṇə' ca' zjənaquə yichjla'azda'oga'aque'enə' xi'ilaža'.

²³ Bito əgwzenago' che beṇə' ca' zjənčol yichjla'azda'oga'aque'enə' na' chesə'ədiłə chəsə'əšaše' por ni che bizə dižə', chedə' šə əgwzenagcho che dižə' ca' zjənac ca' gonən par nič gaquəyožcho beṇə'.

²⁴ Chio'o naccho beṇə' güen xšin Xancho Cristən' bito cheyalə' tilə gwšašlencho beṇə'. Cheyalə' goncho güen len yogua' beṇə', na' cheyalə' nezecho nac əgwsed əgwlo'icho beṇə' xtižə' Diozən' binlo, na' cheyalə' co'o gwčhejlažə'əcho bitə'ateza de'en chso'one beṇə' chio'o.

²⁵ Cheyalə' gaccho beṇə' gačjwlažə' cata' güe'echo consejw beṇə' ca' chso'onczə yichjlaoga'aque' cui chse'ejle'e dižə' li che Cristən'. Šə can' goncho, de repent gaquəlen Diozən' lega'aque' par nič yesyə'ədinjene' xtolə'əga'aque'enə' na' sa'acbe'ichene' de'en naquə de'e li.

²⁶ Na' šə yesyə'ədinjene' xtolə'əga'aque'enə' yesyə'əchoje' xni'a gwxiye'en gan' nite'e na'a chso'one' con can' chazlažə'ənnə'.

3

Naquən' so'on beṇə' catə' bazon yidə Xancho Cristən' de'e yoblə

¹ Cheyalə' šejni'ido' de que catə' bazon yidə Xancho Cristən' de'e yoblə, lechguale de'e zan de'e žaglaio chio'o chon'ilažə'əchone'.

² Ca tyemp na' nita'əchgua beṇə' yesyə'əbeine' so'onchgüe' con can' na la'azda'omalga'aque'enə', na' yesyə'əbeichgüeine' mech, na' so'elao cuinga'aque', na' sa'alaze'e. Yosozia yoso'onite'e beṇə' na' Diozən', na' bito yoso'ozenague' che xaxna'aga'aque'. Bito so'e yelə' choxcwlen che Diozən' na' bito sa'ape'ene' respet.

³ Na' xte bito güe'en latjə'əsa'aque'ne' che beṇə' yoblə, əsa'aque' beṇə' ggo'olažə', əsa'aljlaže'e par yoso'oxie' gwldil, bito gaquə yesə'əbeze' cuich so'one' bitə'ateza de'e malən' de'en nan so'one'. So'one' znia len ljuežjga'aque' can' chso'on bia yixə', na' yesə'əgue'ine' bitə'ateza de'en naquə de'e güen.

⁴ Yesə'əxoayague' beṇə' parzə nič yoso'odie' lega'aque' lao na' beṇə' contr čhega'aque' ca', na' yesə'əne' dižə' loc dižə' lžej na' so'onteze' de'e malən' sin cui bi xbab so'one'. So'on cuinga'aque' xen, na' yesyə'əbeine' so'one' legr lgu'a' əsa'aque'ne' che Diozən'.

⁵ Na' so'one' ca' əsa'aque' beṇə' yeziquə'achlə de que chso'elaogüe'e Diozən', pero bito so'e latjə' yocobə Diozən' yichjla'azda'oga'aque'enə'.

Bito gono' txen len beṇə' ca' so'on de'e ca' bagwnia'.

⁶ So'one' can' chso'on balə beṇə' ca' čhja'ac liž beṇə' par choso'osed choso'olo'ine' dižə' güenlažə'. Na' choso'oxoayague' no'ol ca' chsa'ac šayechə šayen len xtižə' Diozən', no'ol ca' nyan xtolə'əga'aque'enə'. Choso'ozenagteza no'ol ca' che bitə'ateza de'en na la'azda'omalga'aque'enə' so'one'.

⁷ De'e na'anə' choso'ozenague' che notə'ateza beṇə' goxoayag, bitə'ateza de'en choso'ozejni'ine' lega'aque', na' bito chžin ža əse'ejni'ine' de'en naquə de'e li.

⁸ Can' gwsə'on de'e Janes na' de'e Jambres contr de'e Moizezən' catə'an cui gwse'enene' yoso'ozenague' che dižə' li de'en be'elen de'e Moizezən' lega'aque', leczə can' chso'on beṇə' goxoayag quinga' contr Diozən' por ni che de'en cui choso'ozenague' che dižə' li che'enə'. Zjənčol yichjla'azda'oga'aque'enə' yelə' güen de'e mal čhega'aque'enə' na' bito chso'on'ilaže'e Diozən' par yebeine' lega'aque'.

⁹ Pero cagua yosə'əxoayague' beṇə' sša, la' əžin ža catə' yogua' beṇə' sa'acbe'ine' de que zjənčol yichjla'azda'oga'aque' na'anə' can' gwsa'acbe'i beṇə' de que gosə'əčol yichjla'azdao' de'e Janesən' na' de'e Jambresən' catə'an gwsə'one' contr de'e Moizezən'.

Consejw le'ezelaogüe de'en bzop Pabən' par Temtion'

¹⁰ Na' le' Temtio, banezdo' binlo yogua' de'en chsed chlo'ida' che Diozən', na' yogua' can' chona'. Nezdə' can' čhi' yichjja' par nič gona' porzə de'en chazlažə' Diozən'. Nezdə' can' zoteza zoa' chon'ilažə'a Diozən' na' can' chgo'o chčhejlažə'a len de'en čhyi' chzaca'a. Nezdə' can' zoteza zoa' chacda' che Diozən' na' che beṇə'čən', na' can' bito chbejə'yichjja' xšin Diozən' catə' choso'ochi' choso'osaquə' beṇə' nada'.

¹¹ Nezdə' can' bosə'ochi' bosə'osaquə'e nada' catə'an gwzocho Antioquian' na' Iconion' na' Listran', na' nezdə' bichlə de'en babžaglaogua'. Na' leczə nezdə' can' bosla Xancho Cristən' nada' lao yogua' de'e ca' bžaglaogua'.

¹² De'e li nita' beṇə' yoso'ochi' yoso'osaquə'e notə'atezcho ngodə'əcho txen len Cristo' Jesə'osən' na' čhi' yichjcho chzenagcho che Diozən'.

¹³ Na' ca naquə beṇə' mal ca' na' beṇə' goxoayag ca' zja'aque' so'onche' de'e malən'. Yoso'oxoayague' beṇə' yoblə na' se'ejle'e che dižə' güenlažə' de'en soe' beṇə'.

¹⁴ Pero ca naco' le' Temtio dao', gwzotezə gwzo bzenag che yoguə' de'en bachejni'ido' che Cristo Jeso'osən' na' de'en bachejli'o chei, la' nezcədo' noquə'əto'on bzejni'ito'on le'.

¹⁵ Dezd xcuidə'ətio'onə' nombi'o Xtižə' Diozən' de'en nyojən. Na' Xtižə' Diozən' de'en nyojən chzejni'in chio'o de que cheyalə' gonlilažə'əcho Cristo Jeso'osən' par niçh Diozən' yebeje' chio'o xni'a de'e malən'.

¹⁶ Cuiñ Diozən' bzejni'ine' beṇə' ca' boso'ozoj Xtižə'ena' xbab che'ena' par niçh ca' boso'ozoje'en. De'e na'anə' doxen Xtižə' Diozən' de'en nyojən zaquə'əchguan par chzejni'in chio'o che Diozən', na' par chdiñ chio'o catə'an choncho de'e malən', na' par chonən chio'o consejw, na' par chzejni'in chio'o naquən' goncho de'en naquə' güen lao Diozən'.

¹⁷ Xtižə' Diozən' de'en nyojən chaclenən chio'o chzenagcho che Diozən' par niçh ca' chnezecho yoguə'əlol de'en cheyalə' ənezecho par sotezə socho goncho yoguə' claste de'en naquə' güenə'.

4

¹ Yidə' Xancho Jesocristən' de'e yoblə deçhoglaogüe'en naquən' gaquə' che to to beṇəçh beṇə' ñe'e zjəmban na' beṇə' bagwsa'at, na' techlə ñabi'e. Na' Temtio dao', Jesocristən' na' Xancho Diozən' zjənaquə' testigw chia' de que chona' mendad

² sotezə so' chixjui'o xtižə' Diozən'. Gwdixjue'en catə' nlatjo' na' catə' chacdo' cui nlatjo'. Be'elen beṇə' dižə' par niçh yesə'əneze' de que de'e malən' chso'one', gwdiəga'aque' che de'e malən' chso'one' par niçh yesə'ədinjene'en, be'ega'aque' consejw, na' gwzotezə gwzo bzejni'iga'aque' sin cui zjəxaquə'əlažə'o.

³ Gwžin ža catə' cuich əse'ene beṇəçhən' yoso'ozenague' che no əgwzejni'i lega'aque' de'en naquə' de'e güen. De'e na'anə' yoso'otobe' beṇə' zan beṇə' yoso'osed yoso'olo'i lega'aque' dižə' de'en chesyə'əbeine'.

⁴ Yesə'əbejyichje' cuich yoso'ozenague' che dižə' lin' na' yoso'ozenagzeche' che dižə' güenlažə' de'en chsa'aljlažə' beṇə'.

⁵ Pero ca naquə' le' ža, do tyempte gwnabia' cuino' par gono' can' chazlažə' Diozən', na' gwzotezə gwzo bguo'o bchejlažə' catə'an de de'e chžaglaogo', na' gwzotezə gwzo be' dižə' güen dižə' cobə' che Jesocristən', na' ben doxen de'en baben Diozən' lao na'ona' gono'.

⁶ Gwzotezə gwzo ben xšin Diozən', çhedə' la' bazon bəozə so'ote' nada' na' žjəyēzoa' len Diozən'.

⁷ Nada' babena' xte ga zelao gwxaquə'əda' par chona' can' chazlažə' Diozən'. Babena' yoguə'əlol de'en ngo'o Diozən' lao na'a gona', na' zotezə zoa' chonlilažə'a Jesocristən'.

⁸ Na' catə' žjəyēzoa' len Diozən', gone' par niçh soa' mbalaz çhedə' bentezə beṇə' de'e güen laogüe'ena'. Xancho Jesocristən' zdacze' liçha na' catə' əžin ža əñe' bin' gaquə' che yoguə' beṇəçhən', caguə' nada'əzan' soa' mbalaz, leczə mbalaz ñite' notə'ətezəchlə beṇə' chesyə'əbeine' ñite'e lez yidə' Jesocristən' de'e yoblə.

De'en chene'e Pabən' gon Temtion'

⁹ Ben byen par niçh yob yido' nga.

¹⁰ Nia' ca' çhedə' Demasən' bagwlejyichje' nada' na' bazjəyede' Tesalonican' de'en chi'ichgua yichje' bin' gatə' che' lao yežylo nga. Na' ca naquə' beṇə' ca' yela' ža, Cresentən' bazde' Galasian', na' Titon' bazde' Dalmasian'.

¹¹ Yetoga Locasən' nga'anlene' nada'. Çhe'ešgo' Marcon' catə'an yido', la' leçhguale' chaclene' nada'.

¹² Babsela'a Tiqicon' Efeson'.

¹³ Na' catə' yido' goxə'əšgo' xadon' chia' de'en bocua'anə' Troasən' liž Carpon', na' beṇə' lib' ca' pero na' de'e žialao xench beṇə'əšga rollos ca' de'en zjənyoj.

¹⁴ Ljandr ben' chon žin len cobre babenchgüe' contr nada'. Xancho Diozən' əgwnežjue' le' castigw che de'en babene'.

¹⁵ Gapəšgo' cuidad len le', la' babenchgüe' contr nada' par niçh cui chixjui'a xtižə' Diozən'.

¹⁶ Catə' boso'odie' nada' lao jostis ca' de'e nech, ni toza cui no bidə' par əñe' fabor nada'. Yoguə' beṇə' ca' beṇə' xbab əñe' fabor nada' gosə'əbejyichje' nada'. Chona' orasyon lao Diozən' chñaba' yezi'ixene' çhega'aque' de'en gosə'əbejyichje' nada'.

¹⁷ Bia'aczə zoczə Xancho Diozən' len nada'. Len' goquəlene' nada' par niçh bi'a xtižə'ena' clar na' bene' par niçh zan beṇə' cui zjənaquə' beṇə' Izrael gwse'ene' xtižə'ena'. Na' Xancho Dioz na' bosle' nada' lao na' beṇə' contr chia' ca'.

¹⁸ Na' nezdə' goslaczə Xançon' nada' lao bitə'ətezə de'e gaquə' chia', na' əgwcuasə' gwcue'ejcze' nada' len de'e malən' par niçh žjəyēzoa' len le' gan' chnabi'e. Ledoye'ela'oche' ña'a na' zējlicane. Na' can' gonšgaczo.

Chguape' diox yeto chope' na' chnablaže'e gaquəlen Diozən' lega'aque'

¹⁹ Eguapšgo' Priscan' na' be'en che' Aquilan' diox, na' lecə family che Onesiforon'.

²⁰ Eraston' bega'ane' Corinton', na' bocua'ana' Trofimon' syoda Mileton' chacšenene'.

²¹ Ben xte ga zelao saquə'ədo' par yido' antslə ze'e gaquə zag. Lecə Eubolon' chguape' le' diox, len Podenten', na' Linon' na' Claudian' na' len yoguə' beṇə' bišə'əcho ca' nitə' nga.

²² Xancho Jesocristən' gaquəlenšgue' le' len xbab de'en yo'o lo'o yichjla'ažda'ogo'onə', na' gaquəlenšgue' yoguə'əle. De'e na'azən' chzoja'. *Pab*

Cart De'en Bzoj San Pabən' Par Titon'

Pabən' chzoje' Titon'

¹ Nada' Pab naca' beṇə' güen xšin Diozən' na' naca' apostol che Jesocristan'. Diozən' gwleje' nada' niçh chiyixjui'a xtize' enə' len beṇə' ca' bagwleje' par əsa'aque' xi'ine', par niçh so'onlilaže' ene' na' se'ejni'ine' de'en naquə de'e li na' par niçh so'one' can' chene'e Diozən'.

² Na' chaquəlenga'aca'ane' par niçh yesə'əneze' de que žjəsyə'ənite'e len Diozən' zejlicane. Ze'e xe yežlyon' Diozən' bene' lyebe de que beṇə' so'onlilaže' le' žjəsyə'ənite'e len le' zejlicane. Na' nezecho de que bito chonlaža' Diozən'.

³ Na' na'a catə' bžin ža bžin or can' bžie' bia'anə', Diozən' ben' babebej chio'o xni'a de'e malən' bzejni'ine' chio'o dižə' güen dižə' cobə che'enə'. Na' gwleje' nada' na' bene' mendad chixjui'an len beṇə' yoblə.

⁴ Chzoja' le' Tito, len' naco' ca doalje xi'ina' chedə' bzejni'ida' le' par niçh chonlilažo' Xancho Jesocristan' can' chonlilaža' ene' nada'. Chona' orasyon lao Xancho Diozən' na' lao Xancho Jesocristan' ben' babebej chio'o xni'a de'e malən', chnaba' əsa'aclenšgue' le' na' yesyə'ayaša' yesyə'əži'ilaže'e le' na' so'onšgue' par niçh so'cuezo' binlo len xbab de'en yo'o lo'o yichjla'ažda'ogonə'.

Xšin Diozən' de'en chon Titon' gan' nzi' Creta

⁵ Bocua'ana' le' Cretan' par niçh yeyož gono' xšin Diozən' de'en gwzolaogua' beṇə'. Na' leczə' beṇə' mendad cuejo' beṇə' yoso'ogüia yoso'oye' yeziqə'əchlə beṇə' chso'onlilaže' Jesocristan' to to yež.

⁶⁻⁷ Šə no beṇə' chso'on ca notono əna chso'one' de'e malən', šə nitə' tgüejəzə no'ol chega'aque', na' šə xi'inga'aque' ca' chso'onlilaže'e Jesocristan' na' šə xi'inga'aque' ca' bito chso'onditjeine' mech par so'one' legr na' nic žjənaque' beṇə' godenag, ca beṇə' can' cuejo' par yoso'ogüia yoso'oye' yeziqə'əchlə beṇə' chso'onlilaže' Jesocristan'. Gwlej beṇə' so'on ca notono əna chso'one' de'e malən', chedə' la' xšin Dioz na'anə' so'one'. Bito cuejo' beṇə' žjənaquə godenag, beṇə' loc, beṇə' güe'e zo, o beṇə' chso'on znia par yoso'ozenag beṇə' chega'aque', na' nic cuejo' beṇə' zjəzelaže' so'one' gan mech len xšin Diozən' de'en so'one'enə'.

⁸ Gwlej beṇə' chəsyə'əbeine' choso'ogüialaogüe' beṇə' yoblə ližga'aque'enə' na' beṇə' chəsyə'əbei de'e güenə' lgua'a de'e malən', beṇə' chesə'anabia' cuingə'aque' par chso'one' can' chazlaže' Diozən', na' beṇə' chso'on güen len ljuežjga'aque', na' beṇə' chso'on can' chebei Diozən', na' beṇə' cui chso'e latjə năbia' la'ažda'omalga'aque'enə' lega'aque'.

⁹ Beṇə' ca' yoso'ogüia yoso'oye' yeziqə'əchlə beṇə' chso'onlilaže' Cristən', cheyalə' nitə'ətezə nitə'e yoso'ozenague' che dižə' lin' de'en chsed chlo'icho che Jesocristan' la' naquən de'e güen. Šə yoso'ozenague' chei, gaquə yoso'ozejni'ine'en beṇə' ca' chəsə'əne contr, na' gacbia' de que beṇə' contr ca' chso'e dižə'an clelə.

¹⁰ Gwlej beṇə' ca' chso'on can' bagwni'anə' par yoso'ogüia yoso'oye' yeziqə'əchlə beṇə' chso'onlilaže' Cristən' chedə' nitə' zan beṇə' Izrael na' balə beṇə' cui žjənaquə beṇə' Izrael chso'one' txen len chio'o chonlilaže'əcho Jesocristan', pero bito chse'enene' năbia' Diozən' lega'aque'. Chso'echgüe' dižə' de'en bitobi žjəzaquə' na' chesə'əxoayague' beṇə'.

¹¹ Cheyalə' gono' par niçh beṇə' ca' chso'on ca' Cretan' nitə'e žizə cuich yoso'osed yoso'olo'ine' dižə' güenlaže'anə' chedə' chso'one' par niçh zan family bito nite'e binlo len ljuežjga'aque'. Na' parza niçh so'one' gan mechən' choso'osed choso'olo'ine' de'e ca' cui cheyalə' yoso'osed yoso'olo'ine'.

¹² To profet chega'aque' leczə beṇə' Creta bzoje' chega'aque' gwne': "Beṇə' Creta ca' syempr žjənaque' beṇə' güenlaže' na' gwxaquə'əlebəga'aque'ne' ca' bia znia yelə' güen de'e mal chega'aque'enə', na' leczə žjənaque' beṇə' lia na' beṇə' xagüed."

¹³ De'en bzoje' chega'aque' naquən de'e li. De'e na'anə' cheyalə' tilo' lega'aque' che de'e malən' chso'one' par niçh yesə'adalene' dižə' güen che Jesocristan'.

¹⁴ Na' tiləga'aco'one' par niçh cui yoso'ozenague' che dižə' güenlaže' de'en chsa'aljlaže' beṇə' Izrael ca', na' cui yoso'ozenague' che beṇə' ca' bagosə'əbejyichje' de'en naquə de'e li bitə'ətezə de'e əse'e lega'aque' so'one'.

¹⁵ Beṇə' ca' žjənaque' beṇə' la'aždao' xi'ilaže' guaquə sa'ogüe' bitə'ətezə yelə' guao sin cui so'onən manch yichjla'ažda'oga'aque'enə'. Pero na' beṇə' ca' cui chso'onlilaže' Jesocristan' bitə'ətezə de'e so'one', yichjla'aždaoga'aque'enə' žjənaquəchguan manch lao Diozən'. Choso'ozenagteze' che la'ažda'omalga'aque'enə' na' bitobi chsa'aque'ne' catə'an chso'one' de'e malən'.

¹⁶ Chəsə'əne' de que zjənombi'e Diozən' pero laogüe de'en chso'ontezə chso'one' de'e malən' nacbia' de que bito zjənombi'ene'. Chso'one' de'en chgue'i Diozən'. Na' zjənaque' beñə' godenag, na' bito chac so'one' bitə'ətezə de'en naquə güen.

2

De'e güen de'en chsed chlo'icho che Jesocristán'

¹ Pero na' le' Tito, bsd blo'i porzə de'en chonən txen len de'en chsed chlo'ida' che Jesocristán', la' naquən de'e güen.

² Ben mendad de que beñə' byo gol ca' cui so'e latjə năbia' la'ažda'omalga'aque'enə' lega'aque'. Cheyalə' so'one' par niç beñə' yoblə əsa'apəga'acquene' respet, na' cheyalə' yesə'anăbia' cuinga'aque' par so'one' can' chazlažə' Diozən'. Cheyalə' yesə'adalene' dižə' güen che Jesocristán', cheyalə' nita'ətezə nite'e əsa'acquene' che lježjga'aque', na' cheyalə' nita'ətezə nite'e so'onlilaže'e Diozən' cats' chesə'əyi' chesə'əzaque'e.

³ Na' leczə ca' ben mendad de que no'olə gol ca' nita'ətezə nite'e so'elaogüe'e Diozən' bitə'ətezə de'e so'one'. Na' ben mendad cui yoso'oziə yoso'onite'e beñə' na' bito əsa'aque' beñə' güe'e zo. Cheyalə' yoso'osed yoso'olo'ine' beñə' bin' naquə de'e güen so'one'.

⁴ Cheyalə' yoso'osed yoso'olo'ine' no'olə xcuidə' ca' can' cheyalə' yesə'əzi'ilaza'e be'en chega'aque' na' xi'in chega'aque' ca'.

⁵ Na' leczə no'olə gol ca' cheyalə' yoso'osed yoso'olo'ine' no'olə xcuidə' ca' can' yesə'anăbia' cuinga'aque' par so'one' can' chazlažə' Diozən', na' can' cheyalə' so'one' par niç gactezə gaquə yichjla'ažda'oga'aque'enə' xi'ilaza', na' can' cheyalə' yoso'ogüia yoso'oye' ližga'aque'enə' na' so'on xšinga'aque'. Yoso'osed yoso'olo'ine' lega'aque' can' cheyalə' so'one' güen len yoguə'əloj beñə' na' can' cheyalə' yoso'ozenague' che be'en chega'aque'. No'olə gol ca' cheyalə' yoso'osed yoso'olo'ine' no'olə xcuidə' ca' can' so'one' par niç bito yesə'əne beñə' contr xtižə' Diozən'.

⁶ Na' leczə ca' cheyalə' əneyoido' beñə' xcuidə' ca' par niç yesə'anăbia' cuinga'aque' par so'one' can' chazlažə' Diozən'.

⁷ Na' bitə'ətezə de'e gono' le', gono'on güen par niç sa'acbe'i beñə' de que leczə cheyalə' so'one' ca'. Na' cats' əgwsed əgwlo'ido' beñə', cheyalə' əgwsed əgwlo'iga'acdo'one' porzə de'e güen na' əgwsed əgwlo'iga'acdo'one' binlo par niç əsa'ape' le' respet.

⁸ Na' bsd blo'iga'acquene' dižə' li par niç notono gaquə əne' de que xtiž'o'ona' naquən mal. Gono' ca' par niç beñə' contr checho ca' yesyə'ato'ine' na' bito gaquə yesə'əneche' contr chio'o.

⁹ Ben mendad de que mos ca' yosə'əzəxjw yichjga'aque' par yoso'ozenague' che xanga'aque'enə' na' so'one' bitə'ətezə de'e gon xanga'aquen' mendad sin cui yosyo'ozi' yosyo'olebe' xtiže'enə'.

¹⁰ Ben mendad cui yesə'əque'e bi de'e de che xanga'aque'enə', sino nita'ətezə nite'e so'one' can' cheyalə' so'one'. Bitə'ətezə de'e so'one' cheyalə' so'one'en güen par niç əsa'acbe'i beñə' yoblə de que de'en chsed chlo'icho che Diozən' naquən de'e güen, Dioz ben' babebej chio'o xni'a de'e malən'.

¹¹ Diozən' bablo'e de que nzi'ilaza'e chio'o beñəç na' nape' yelə' guac par yebeje' chio'o xni'a de'e malən'.

¹² De'e na'anə' nezecho de que cheyalə' cuejyichjcho yoguə' de'en chso'on beñə' mal ca' de'en chzelažə' la'ažda'omalchon' goncho na' bitə'ətezəchlə de'en cui chazlažə' Diozən'. Na' nezecho naquən' cheyalə' so cuezcho yežlyo nga, cheyalə' năbia' cuincho par goncho can' chazlažə' Diozən', cheyalə' goncho de'e güen, na' cheyalə' əgwzenagcho che Diozən'.

¹³ Na' zocho mbalaz de'en nezecho əžin ža yidə Jesocristán' de'e yoblə nse'e yelə' bala'an xen che'enə'. Jesocristán' naque' Dioz checho, naque' le'ezelaogüe beñə' zaque'e, na' babebeje' chio'o xni'a de'e malən'.

¹⁴ Bnežjw cuine' gwso'ot beñə' le' par gwdixjue' xtola'əchon' niç bebeje' chio'o xni'a yoguə' de'e mal, na' bene' par niç la'ažda'ochon' naquən xi'ilaza'. Bene' de'e ca' par niç naccho xi'in Diozən', na' par niç chebeicho choncho de'e güenə'.

¹⁵ Le' Tito, be' dižə' che de'en babzejni'ida' le', gwneyoi beñə' par yoso'ozenague' chei, na' be'ega'aque' consejw par niç yesə'əbeyjichje' de'e malən', chedə' la' Diozən' bagwleje' le' par gono' de'e ca'. Bito go'o latjə yesə'əzo beñə' le' ca'alə' cui yoso'ozenague' chio'o.

3

De'en cheyalə' gon chio'o chonlilažə'əcho Jesocristán'

¹ Ben par niç žjəsə'əza'alaza'e de que cheyalə' yoso'ozəxjw yichjga'aque' yoso'ozenague' che jostis ca' na' che beñə' gwnăbia' chega'aque' ca', na' cheyalə' nite'e probnid par so'one' bitə'ətezə de'e güen de'e so'one' mendad.

² Gožga'aque' de que bito yesə'əne' mal che notə'ətezə beṇə, na' bito yesə'ədilə yesə'əšaše' len beṇə' yobla. Cheyalə' əsa'aque' gaṅjwlažə' na' cheyalə' əsa'ape' yeṭə' chxenlažə' len yogua'əṭəṭ beṇə'.

³ Antslən' gwčhol' yichjla'ažda'ochon', na' goccho beṇə' godenag. Gwxoayagcho len de'e malən' na' gwzochon xni'a la'ažda'omalchon' ca naquən' bencho bitə'ətezən' gwzelažə'ən na' bitə'ətezən' gwnan parza niç gwdacho legr. Con gwdacho bencho mal len beṇə' na' gocxi'i ljuəžjcho. Besə'əgue'i beṇə' chio'o na' bgue'iga'aquechone'.

⁴ Pero na' bžin ža cata' Diozən' ben' babebej chio'o xni'a de'e malən' blo'ine' chio'o ca beṇə' güəṇə' naque' na' catequən' chaquene' che chio'o beṇəch.

⁵ Na' bałtezcho chonlilažə'əcho Jesocristən', Diozən' bebeje' chio'o xni'a de'e malən' chedə' cheyašə' cheži'ilažə'e chio'o. Bito bebeje' chio'o por ni che bilə de'e güen de'e bencho. Beya'a beyibe' yichjla'ažda'ochon' na' bene' par niç Spirit che'ena' bocobən len.

⁶ Diozən' bsele'e Spiritən' zon lo'o yichjla'ažda'ochon' par chaclenchguan chio'o chedə' Jesocristən' babebeje' chio'o xni'a de'e malən'.

⁷ De'en cheyašə' cheži'ilažə' Diozən' chio'o bsele'e Spirit che'ena' zon lo'o la'ažda'ochon' par niç gaquə əne' checho de que naccho beṇə' güen laogüe'ena'. Na' leczə bsele'en par niç nezecho žəyecho len le' zejlicane.

⁸ De'e ca' bagwnia' nga zjanaquən de'e li. Na' che'enda' soteza so' chixjui'o de que de'e ca' babzejni'ida' le' zjanaquən de'e žialao xen gwzenagcho chei. Gono' ca' par niç yogua' beṇə' ca' chso'onlilažə' Diozən' nitə'ətezə nite'e so'one' de'e güen. De'e ca' bagwnia' zjanaquən de'e güen na' sa'aclenən notə'ətezə beṇə' yoso'ozenag chei.

⁹ Pero na' bito gwzenago' che beṇə' ca' zjančhol' yichjla'ažda'oga'aque'ena' na' chesə'ədilə chesə'əšaše' por ni che bižə dižə'. Na' bito cue' yichjo' che dia che de'e xaxta'oto' ca'. Bito gwzenago' che beṇə' ca' chsa'acyožə na' chesə'ədilə chesə'əšaše' por ni che can' chse'ejni'ine' to to pont dao' che lei de'en bzoj de'e Moizezən'. Dižə' ca' zjanac ca' bito chaclenən beṇə' na' bitobi zaquə'ən.

¹⁰ Be' consejw che notə'ətezə beṇə' chsed chlo'ine' xtižə' Diozən' clelə beṇə' chene'e yesə'ənao beṇə' de'en chzejni'ine'. Šə' babi'one' consejw to čop las na' cui chzenague', bebeje' ca'alə.

¹¹ De'en bito bzenague' chio' nachən' neždo' naljene'. Na' de'e malən' chone' chlo'en de que nape' dolə'.

De'en chon Pabən' mendad gon Titon'

¹² Cata' əselə'a Artemasən' o Tiquicon' gan' zo', yob yidəšgo' par yežagcho syoda Nicopolisən', chedə' bagwčhoglažə'a yega'ana' Nicopolisən' lao tyemp zaguən'.

¹³ Ben xte ga zelao saquə'ədo' par gaquəleno' Zenas ben' babsed lein' gaṅjw gwche' na' Apolosən' cata' yesa'aque' gan' zo' par niç bitobi yesə'əyazjene' tnezən'.

¹⁴ Na' bzejni'išguei beṇə' ljuəžjcho ca' chso'onlilažə' Diozən' par niç yesə'əbe' yichjga'aque' porzə par so'one' de'e güen. Cheyalə' sa'aclen ljuəžjga'aque' šə de bi de'en chesə'əyazje to toga'aque', na' cheyalə' so'one' con can' chazlažə' Diozən'.

Beṇə' ca' nitə'əlen Pabən' chesə'əguape' Titon' diox

¹⁵ Yogua' beṇə' ca' chso'on xšin Diozən' txen len nada' nga chesə'əguape' le' diox. Na' beṇə' ca' zoleno' txen beṇə' ca' chsa'aque' checho chedə' chonlilažə'əcho Diozən' əgguapšgaga'aco'one' diox.

Gaquəlenšga Diozən' yogua'əle. De'e na'azən' chzoja' na'a. Pab

Cart De'en Bzoj San Pabən' Par Filemón

Pabən' chguape' Filemonnə' diox

¹ Nada' Pab dia' lizya nga chedə' chyixjui'a xtižə' Cristo Jeso'osən'. Na' txen len beṇə' bišə'əcho Temtion' chzojto' le' Filemon. Chaqueto' chio' na' naco' txen len neto' choncho xšin Diozən'.

² Na' chzojto' le' zanda'oto' Apia, nach le' Arquipo len' chono' xšin Xanchon' txen len neto'. Nach leczə ca' chzojto' le'e chdopə chžagle liž Filemonnə' par cho'ela'ole Jesocristán'.

³ Chonto' orasyon lao Xacho Diozən' na' lao Xancho Jesocristán' chṇabto' əsa'aclenšgue' le'e, na' so'one' ca so cuezle binlo len xbab de'en yo'o lo'o yichjla'ažda'olen'.

Can' chonlilažə' Filemonnə' Jesocristán' na' chaque che ljuēžje'

⁴ Na' le' Filemon, yoguə' laste catə' chona' orasyon cho'a yelə' choxcwlen che Diozən' can' chono'.

⁵ Babenda' dižə' ca naquən' chonlilažo'o Xancho Jesocristán', na' can' chacdo' che notə'ətezəchlə beṇə' bagwlej Diozən' par zjənaque' lažə' ne'enə'.

⁶ Na' chona' orasyon chṇaba' de que sotezə so' gono' güen len lega'aque' laogüe de'en chonlilažo'o Xancho Jesocristán', par niç yogue'e sa'acbe'ine' de que Cristo Jeso'osən' babenchgüe' güen len chio'o chonlilažə'əchone'.

⁷ Beṇə' bišə' catə' benda' can' chacdo' che yeziquə'əchlə beṇə' bagwlej Diozən' par zjənaque' lažə' ne'enə' na' can' chacleno' lega'aque' par niç nite'e mbalaz, lechguale bebeida' na' zoa' mbalaz.

Pabən' gwṇabe' yezi'ixen Filemonnə' che Onesimon'

⁸ Laogüe de'en naca' beṇə' güen žin che Cristən' napa' yelə' chṇabia' par gona' mendad can' cheyalə' gono',

⁹ pero laogüe de'en chaquecho che Cristən' na' che ljuēžjcho chṇeyoida' le' gono' to de'en che'enda' gono'. Nada' Pab banaca' beṇə' golə, na' leczə na'a dia' ližyan' chedə' chyixjui'a xtižə' Jesocristán'.

¹⁰ Chṇaba' goclen laogo'on par Onesimon' ben' banona' ca xi'ina'. Lao dia' ližya nga bsd blo'ida'ane' par niç chonlilažə'e Jesocristán'.

¹¹ Antslə bito goque' mos güen par le', pero ṇa'a banaque' mos güen par le' na' leczə par nada'.

¹² Chosseja'ane' laogo'onə', na' chṇabda' le' yogüialaogo'one' na' so' binlo len le' chedə' lechguale chacda' che'.

¹³ Yebeida' žalə' gaquə yega'anlene' nada' par niç gaquəlene' nada' can' gaquəleno' nda' lao dia' ližyan' žalə' zo' nga.

¹⁴ Pero bito gwṇabda'ane' yega'anlene' nada' chedə' che'enda' əṇao' le' bin' gone'. Bito che'enda' gona' byen gaquəleno' nada' pero yebeida' šə can' chazlažo'o gono'.

¹⁵ De repent Diozən' be'e latjə beze'e ližo'on par to tyemp par niç gacle tozə zejlicane.

¹⁶ Na'a bitoch gaque' con to mos na'azə, la' naque' bišə'əda'ochə. Lechguale chacda' che' na' mazəchlə gaquədo' che' de'en banaque' txen len chio'o chonlilažə'əcho Xancho Jesocristán' na' leczə naque' xmoso'.

¹⁷ Na' ca naquə chono' nada' cuent de que naca' txen len le', yogüialaošgo'one' caczən' chgüialaogo' nada' catə' chedeləṇa'a le'.

¹⁸ Na' šə bi de'e malən' bene' contr le', o šə bi de'en chələ'e chio', nada' chixjua'an.

¹⁹ Cuincza' nada' Pab chzoja' le', nada' chixjwczə'an. Na' bitobi əchnia' che de'en chało'o che yelə' mban zejlicane chio' laogüe de'en bsd blo'ida' le' par niç chonlilažo'o Jesocristán'.

²⁰ Beṇə' bišə' dao', laogüe de'en chaquecho che Xancho Jesocristán' che'enda' gono' de'e nga par niç soa' mbalaz. De'en chaquecho che Xanchon', benšga par niç yebeida'.

²¹ Chzoja' le' chedə' zoa' lez gwzenago' chia', na' ṇezda' de que gono' mazəchlə ca de'en nia' le'.

²² Na' leczə chṇabda' le' gonšgo' probnid to quart par nada'. Zoa' lez yesə'əsane' nada' šə gonchle orasyon par nada' par niç gaquə deyelaṇa'a le'e.

Benə' ca' nita' len Pabən' chəsə'əguape' Filemonnə' diox

²³ Epafrasən' die' ližya nga txen len nada' de'en chyixjui'e xtižə' Cristo Jeso'osən' na' chguape' le'e diox.

²⁴ Na' Marcosən', len Aristarcon', len Demasən', na' len Locasən', beṇə' ca' chso'on xšin Diozən' txen len nada', leczə chəsə'əguape' le'e diox.

²⁵ Xancho Jesocristán' sošgue' gaquəlenšgacze' le'e len xbab de'en yo'o lo'o yichjla'ažda'olen'.
De'e na'azən' chzoja' le'. *Pab*

Cart De'en Nyoj Par Benə' Ebreo Ca'

Diozən' babe'elene' chio'o dižə' ca de'en bsele'e Xi'ine'ena'

¹ Tyemp de'en bagwde, Diozən' bsele'e zan profet beṇə' gwsoe' xtiže'ena' len de'e xaxta'ocho ca'. Zan las profet ca' gwso'e xtiže'ena' len de'e xaxta'ocho ca', nža' nža' can' gwso'en.

² Pero tyemp nga zochə' na'a nža'alə babene'. Na'a babe'elene' chio'o dižə' ca de'en bsele'e Xi'ine'ena' ben' ben yoban', yežlyon' na' de'e ca' chle'icho le'e yoban', na' bengaque'en con can' ben Diozən' mendad. Na' gwžin ža catə' gaquə' lao na Xi'in Diozən' yoguə' beṇəç, yoguə' bia ca' chsa'aš, na' biquə'əchlə de'e ca' bene'.

³ Xi'in Diozən' nse'e doxen yelə' chey che'eni' che Xe'ena' na' cayanə'an naquə' yichjla'aždao' Xe' Dioz nan' naquə' yichjla'aždaogüe'ena'. Na' Xi'in Diozən' chone' par niçh yoban', yežlyon' na' de'e ca' chle'icho le'e yoban' chso'onən žin, chedə' nape' yelə' guac par niçh chac con can' ne'ena'. Bsanlažə' cuine' gwso'ot beṇə' le' par niçh chnitlaogüe' xtolə' yoguə' chio'o chonliłažə'achone'. Na' gwde na' beyepe' yoban' žjəyechi'e cuit Xe' Diozən' ben' naquə' le'e zelaogüe' beṇə' zaque'e par chnabi'e txen len le'.

Xi'in Diozən' naquə'che' beṇə' zaquə'əche cle ca angl ca'

⁴ Na' nla'alao de que Xi'in Diozən' naquə'che' beṇə' zaquə'əche cle ca angl ca', chedə' Diozən' babnežjue'ene' yelə' bala'an mazəchlə ca de'en babnežjue' angl ca'. Na' babene' par niçh naquə'che' beṇə' blaoch.

⁵ Diozən' bitonə' ye'e ni tozə angl can' gože' Xi'ine'ena', gože'ene':

Len' naco' xi'ina'.

Neža babena' par niçh solao nabi'o len nada'.

Na' nic ne'e güe'e dižə' che notə'atezə angl can' gwne' che Xi'ine'ena', gwne':

Nada' gona' par niçh gacbia' naca' Xe',

na' gona' par niçh gacbia' de que naque' Xi'ina'.

⁶ Xi'in Diozən' naque' le'e zelaogüe' beṇə' zaque'e. De'e na'ana' catə'an Diozən' bsele'ene' yežlyon' gwne':

Yoguə'əlol angl chia' ca' cheyalə' əso'elaogüe'ene'.

⁷ Nach gozne' che angl ca':

Chona' par niçh angl chia' ca' beṇə' ca' chso'on mendad chia'

chsa'aque' ca be' de'en cheçhj na' ca yi' beļ.

⁸ Na' nža'alə can' be'e dižə' len Xi'ine'ena' gože'ene':

Len' naco' Dioz na' chnabi'o zejlicane.

Na' lechgualə güen chnabi'o.

⁹ Chebeido' de'en zda licha na' chgue'ido' de'e malən'.

De'e na'ana' nada' Diozən' ben' cho'elaogo'o

babena' par niçh zochə' mbalazəch cle ca beṇə' ljuežjo' ca'.

¹⁰ Na' de'e yoblə gož Diozən' Xi'ine'ena':

Le' naco' Xan yežlyon'.

Len' beno'on ža gwlasda'ote.

Na' yoguə' de'en chle'icho le'e yoban', leczə len' beno'on.

¹¹⁻¹² Na' gwžin ža catə' te che yoguə' de'en chle'icho le'e yoban' na' yežlyo nga.

Pero le' bito te chio'; sympr soczo' zejlicane.

Na' gwša' le'e yoban' na' yežlyon' ca to beṇə' chša' xe' catə' babeyoin na' chaze' yeton.

Gono' len le'e yoban' na' yežlyon' can' chon to beṇə' catə' chetobə xe'.

Pero le', tozəczə can' gaco' zejlicane, na' bito əžin iz nacho te chio'.

¹³ Diozən' bitonə' ye'e ni to angl ca de'en gože' Xi'ine'ena', gože'ene':

Gwche'edo' cuita' nga nabi'acho txen,

na' gona' par niçh nitə' de'e ca' chso'on contr le' na' beṇə' contr chio' ca' xni'ona'.

¹⁴ Ca naquə' angl ca', yogue'e zjonaque' beṇə' chso'on mendad che Diozən', chsele'e lega'aque' par chsa'aclene' chio'o bagwlej Diozən' par niçh žjəyecho len le'.

2

Cheyalə' əgwzenagcho che xtižə' Diozən' par niçh žjəyecho len le'

¹ Na' laogüe' de'en naquə' Xi'in Diozən' beṇə' blaoch na' beṇə' zaquə'əche ca angl ca', do yichj do lažə'əcho cheyalə' əgwzenagcho xtiže'ena' de'en babenecho, chedə' la' šə bito əgwzenagcho chei do yichj do lažə'əcho, guanlažə'əchon na' cuejyichjchon.

² Lei che Diozən' de'en gosa'ayixjue'e angl ca' naquəczən de'e žialao xen. Na' de'e na'anə' Diozən' bnežjue' castigw che de'e xaxta'ocho ca' batə'ətezə cui bos'ozenague' chei segon de'e mal de'en gwso'on to toga'aque'.

³ Na' naquən segor de que Diozən' gone' chio'o castigw šə bito goncho can' na Xancho Jesocristən'. Zgua'atec Xancho Jesocristən' be'e dižə' güen juisy can' cheyalə' goncho par nič žjəyzocho len le'. Nach gwdenə' beŋə' ca' gosə'ədalen le' leczə bos'ozejni'ine' chio'o can' gwne'ena', chedə' gosə'ənezene' de que naquən güen.

⁴ Na' Diozən' bene' par nič gwso'one' miłagr na' bichlə de'e zaqua' yebanecho, na' Diozən' bnežjue' lega'aque' zan člas yelə' guac, na' Spirit che'ena' benən par nič gwso'one' de'e zan de'e güen len yelə' guac chein' segon can' gwyazlažə' Diozən', par nič ənezecho de que xtižə'əga'aque'ena' naquən de'e li.

Goc Jeso'osən' doxen can' naquə chio'o beŋəch

⁵ Catə' te che yežlyo nga na' gatə' yežlyo cobə de'en cho'a dižə' chei, Diozən' bito gone' ca yesə'anabia' angl ca'.

⁶ Na' nyoj can' gwna de'e Rei Dabin' gože' Diozən':

žBixčhen' chacdo' che beŋəchən'? ca naquə bitotec bi zjəzaque'e.

Na' žbixčhen' chaclenga'aco'one'?

⁷ Beno' par nič beŋəchən' bito zjənaque' beŋə' blao can' zjənaquə angl ca' pero caguə syempr gaquən ca'.

Bia'accə beno' par nič zjəzaquə' beŋəchən' na' bnežjwga'aco'one' yelə' bala'an.

⁸ Beno' par nič yoguə'əlołte de'e zjəde əsa'acquən lao na' beŋəchən',

na' len yoguə'əloł bia ca' chsa'aš, leczə əsa'aquəb lao na'aga'aque'.

Na' ca naquə ben Diozən' par nič yoguə'əlołte de'e zjəde əsa'acquən lao na' beŋəchən' na' yoguə' bia ca' chsa'aš leczə əsa'aquəb lao na'aga'aque', de'e na'anə' beŋəchən' yesə'anabi'e lao yoguə'əte de'en zjəde, la'anə'əczə na'a nezecho bitonə' yesə'anabi'e.

⁹ Na' ca naquə Jeso'osən', žlac goque' beŋəch bito goque' beŋə' blao can' zjənaquə angl ca'. Na' de'e tant nži'ilažə' Diozən' chio'o beŋəch bene' par nič Jeso'osən' bsanlažə' cuine' por ni checho catə'an gwso'ot beŋə' le', na' de'e na'anə' Jeso'osən' banzi'e yelə' bala'an xen na' banaquəchgüe' beŋə' zaque'e.

¹⁰ Diozən' bene' bia chsa'aš, bene' beŋəch na' yeziquə'əchlə de'e zjəde par nič chzi'e yelə' bala'an. Na' bene' güen ca de'en bsi'e xneze par nič gwxaquə'əzi' Jesocristən' ben' babebej chio'o xni'a de'e malən'. Na' de'en gwxaquə'əzi'ena' chac chone' par nič beŋə' zan əsa'aque' xi'in Diozən' na' žjəsyə'anite'e len le' yoban'.

¹¹ Jeso'osən' bagwleje' chio'o par naccho lažə' na' Diozən'. De'e na'anə' txen len le' naccho xi'in Diozən' na' bito cheto'ine' par əŋe' che chio'o de que naccho beŋə' biš'e'e na' beŋə' zane'.

¹² Quinga gwna Jeso'osən' gože' Diozən':

Gua'a dižə' par nič beŋə' biš'a'a ca' na' beŋə' zana' ca' yesə'ənezene' non' naco'.

Na' lao zjəndopə zjənžague' chso'elaogüe'e le',

nada' gua'a dižə' ca beŋə' güennə' naco'.

¹³ Nach gwne':

Sotezə soa' gonlilažə'a Diozən'.

Na' de'e yoblə gozne':

Nga zoa' txen len beŋə' ca' beŋ Diozən' nada' par nič zjənaquə' xi'ina'.

¹⁴ Na' chio'o naccho beŋə' belə' chen, chio'onə' naccho xi'ine'. De'e na'anə' leczə le' golje' goque' beŋə' belə' chen na' bsanlažə' cuine' gwso'ot beŋə' le' par nič bñitlaogüe' yelə' gwnabia' che gwxiye'en de'en chon par nič chatcho.

¹⁵ Bene' par nič chio'o chonlilažə'əchone' bitoch žebcho gatcho. Beŋə' ca' cui chso'onlilažə'ene' syempr chəsə'əžebe' sa'ate'.

¹⁶ Jeso'osən' bide' yežlyo nga caguə par goclene' angl ca', sino par goclene' beŋə' ca' chso'onlilažə' Diozən' can' benlilažə' de'e Abraannə' Diozən'.

¹⁷ Benən byen goc Jeso'osən' doxen can' naquə chio'o beŋəch par nič ca' chaclene' chio'o lao Diozən' can' gwso'on de'e bxož əblao ca' len de'e xaxta'o chio'o beŋə' Izrael gwsa'aclene' lega'aque'. Cheyašə' cheži'ilažə' Jeso'osən' chio'o na' chone' complir can' ne'ena'. Can' chon Jeso'osən' be'ena' checa'a xtolə' chio'o chonlilažə'əchone'.

¹⁸ Jeso'osən' cuat bene' de'e mal pero bžaglaogüe' catə'an gwlo'oyelə' gwxiye'en le' par gone' de'e malən' na' catə' goc bitə'ətezəchlə de'e mal len le'. De'e na'anə' nezene' naclən' chone' chaclene' chio'o catə' chgo'oyelə' gwxiye'en chio'o par goncho de'e malən' na' catə' chac bitə'ətezə de'e mal len chio'o.

3

Jeso'osən' zaquə'əche' cle ca de'e Moizezən'

¹ Beṇə' bišə', laogüe de'en bagwlej Diozən' yoguə' chio'o par naccho lažə' ne'enə', cheyalə' goncho xbab che Cristo Jeso'osən' ben' bsele' Diozən' par naque' b̄xoz əblao checho. Diozən' bsele'ene' bedatixjui'e xtiž'e'enə' de'en chejle'echo chei.

² Diozən' gwleje' le' par chaclene' chio'o ca to b̄xoz əblao. Na' Jeso'osən' lao bide' yežlyon' na' ṇa'a chone' con can' na Diozən', ca'aczən' ben de'e Moizezən' ben' leczə' goclene' yoguə' bene' gwsa'ac family che Diozən'.

³ Pero na' Jeso'osən' zaquə'əche' cle ca Moizezən'. Jeso'os na'anə' b̄xie' family che Diozən' ca de'en bene' par niçh chio'o chonlilažə'əcho Diozən' ṇa'a na' len beṇə' ca' gwso'onlilažə' le' cana' naccho family che Diozən'. Na' ca naquə' de'e Moizezən' ža, goque' con to beṇə' lao family che Diozən'.

⁴ Na' gwnitə' beṇə' b̄xe to to family nitə' lao yežlyon', pero Jeso'osən' caguə' b̄xie' family che Diozən' azən', sino leczə' b̄xie' yoguə'ate de'e zjəde, chedə' len' naque' Dioz.

⁵ Na' ca naquə' de'e Moizezən', bene' can' gwna Diozən' par goclene' yoguə' beṇə' gwsa'ac family che Diozən' la'anə'əczə' goque' con to xmos Diozən'. Na' de'e Moizezən' be'e dižə' che de'e ca' ze'e əsa'ac ca tyempən' de'e ca' bagwsa'acquən ṇa'a.

⁶ Cristən' leczə' bene' complir can' gwna Diozən' par goclene' beṇə' zjənaquə' family che Diozən'. Na' bene' ca' chedə' naquə'czə' Xi'in Diozən', caguə' ca to mos. Na' family che Diozən' na'anə' naquə' chio'o šə zotezə' zocho chonlilažə'əcho Diozən' do yichj do lažə'əcho catə'an yidə Cristən' de'e yoblə, na' šə chebeicho de'en yidə Cristən'.

Guaquə socho mbalaz len Diozən'

⁷⁻⁸ Cheyalə' goncho xbab can' gwna Spirit che Diozən' de'en nyojən nga:

Catə' Diozən' əne' to de'e gonle ṇa'a,

bito gacle beṇə' godenag can' gwsa'ac beṇə' Izrael ca' cana'

catə' gwso'one' contr Diozən' latjə dašən'.

Gwso'one' prueb šə leine' de que gwnežjue' castigw chega'aque'enə'.

⁹ Nach Diozən' gwne':

De'e xaxta'ole ca' bito gwse'ejle'e chia' la'anə'əczə' choa iz besə'əle'ine' de'e ca' beṇə' par goqualengə'aca'ane'.

Con gwso'one' prueb šə leida'anə'.

¹⁰ De'e na'anə' bito bebeiga'acda'ane',

na' gwnia: "Do tyemp naquə'ga'aque' beṇə' yichjla'aždao' žod,

bitonə' se'enene' se'ejni'ine' can' chona'."

¹¹ Na' de'en bžə'a lega'aque' de'e nan' gwnia' chega'aque' de que cuat nite'e mbalaz len nada'.

¹² Legapə' cuidad beṇə' bišə', par niçh ni tole cui gacle beṇə' yichjla'aždao' mal. Lesotezə' Jeso' legonlilažə' Diozən' par niçh cui cuejyichjlene' chedə' le'ena' zoe' zejlicane.

¹³ Žlac ṇa'a ne'e de tyemp par əgwzenagle che Diozən', legwtiplažə' ljuežjle tža tža par niçh cui gonle de'e malən', la' catə' choncho de'e malən' ch̄xoayaguən chio'o par niçh cuich bi bi chaquecho catə'an chonchchon.

¹⁴ Ngodə'əcho txen len Cristən' šə ne'e zotezə' zocho chonlilažə'əchone' catə'an yide' de'e yoblə con can' gwzolaoczcho chonlilažə'əchone'.

¹⁵ Na' nyoj Xtižə' Diozən' par chio'o gan' nan:

Catə' Diozən' əne' to de'e gonle ṇa'a

bito gacle beṇə' godenag can' gwsa'ac beṇə' Izrael ca' cana'.

¹⁶ Na' de'en nyojən nan ca' cho'en dižə' che beṇə' ca' jəsyə'ənao de'e Moizezən' catə'an jəyeleje' lega'aque' Egipton'. Bos'ozenague' can' ben Diozən' mendad par besyə'əchoje' Egipton', pero beyozə' besyə'əchoje'ena' bitoch bos'ozenague' che'.

¹⁷ De'e na'anə' bžə'e lega'aque' choa iz de'en gwso'one' de'e malən' cuich bos'ozenague' che', na' gwsa'ate' latjə dašən'.

¹⁸ Na' Diozən' gwne' de que cuat nite'e mbalaz len le' chedə' cui bos'ozenague' che'.

¹⁹ Na' nezecho de que yelə' godenag chega'aque'ena' cui goquə' nite'e mbalaz len le'.

4

¹ Na'a ža, nezecho can' goc che beṇə' godenag ca' beṇə' ca' gwsa'at latjə dašən'. De'e na'anə' cheyalə' žebcho par niçh cui goncho can' gwso'one'ena', chedə' šə goncho can' gwso'one'ena' bito gaquə' socho mbalaz len Diozən' can' bene' lyebe.

² Babenecho to dižə' güen dižə' cobə' de que guaquə' socho mbalaz len Diozən' ca dižə' de'en gwse'ene' lega'aque'. Pero ca naquə' lega'aque' de'en cui gwse'ejle'e chei, de'e nan' bito goquə'lenən' lega'aque'.

³ Na' chio'o chejle'echo che de'en na Diozən' bazochə' mbalaz len le'. De'e na'anə' bito na Diozən' checho can' gwne' che beṇə' ca' gwne':

De'en bžə'a' lega'aque' na' gwnia' de que cuat nite'e mbalaz len nada'.

Na' ca naquə Diozən' nezecho babeyož bxi'e yoban' na' yežlyon' na' de'e na'anə' zoe' mbalaz.

⁴ Can' nyoj to part Xtiže'ena' nan:

Χορ za ben Diozən' yoban', yežlyon', benachən', bia yixə'an na' biquə'əchlə de'e zjəde.

Na' cata' bžin za gažən', bitoch bi bi bene', con zoe' mbalaz.

⁵ Na' de'e yoblə goncho xbab che de'en gwne':

Cuat nite'e mbalaz len nada'.

⁶ De'e li baļə beņə' nite'e mbalaz len Diozən'. Pero ca naquə beņə' ca' gwse'ene' dižə' güen dižə' cobə che'ena' cana'ate, bito goquə nite'e mbalaz len le' chedə' bito boso'ozenague' che'.

⁷ Na' cata' bagwde zan iz Diozən' gwne' de'e yoblə de que gwaquə nita' beņə' mbalaz len le'. Bene' par nič bzoj de'e Rei Dabin' dižə' de'en na:

Catə' Diozən' əne' to de'e gonle na'a bito gacle beņə' godenag.

⁸ De'e Josuen' gwche'e de'e xaxta'o chio'o beņə' Izrael gan' gosə'əzi'e yežlyon' de'en bnežjw Diozən' lega'aque'. Pero lega'aque' bito gwnite'e mbalaz len Diozən'. De'e na'anə' gwdechlə Diozən' bene' par nič de'e Dabin' bzoje' gwne' de que gwžin ža nita' beņə' mbalaz len le'.

⁹ Nachən' nezecho de que chio'o chonlilažə'əcho Diozən' chac socho mbalaz len le'.

¹⁰ Na' beņə' ca' banita' mbalaz len Diozən' bitoch chso'one' can' na xbab chega'aque'ena', sino que chso'one' can' na Diozən'. De'e na'anə' nacho de que nite'e mbalaz can' zo Diozən' de'en beyož bxi'e yoguə' de'e ca' zjəde.

¹¹ Na' cheyalə' yejiljažə'əcho nac goncho par nič socho mbalaz len Diozən'. Cheyalə' gwzenagcho che' par nič ca' ni tocho cui gac checho can' goc che de'e xaxta'ocho ca' de'en cui boso'ozenague' che Diozən'.

¹² Xtižə' Diozən' chazan lo'o yichjla'aždao' beņə', na' chaclenən nota'ətezə choso'ozenag chei. Na' gwxaquə'əleben ca to spad de'en nłachgua chopə la'ate. Pero mazočhlə can' chon to spad chon Xtižə' Diozən', chedə' chlo'in chio'o no čein' chzenagcho, əche Spirit che Diozən' o šə che la'ažda'omalchon'. Leczə ca' chzejni'in chio'o che xbab de'en yo'o lo'o yichjla'ažda'ochon' na' che yoguə'əloj de'en chzelažə'əcho šə naquən güen o šə naquən mal. De'e na'anə' gwxaquə'əleben ca to spad de'e chchog entr bechj bnia ca' na' entr bin ca'.

¹³ Diozən' neze nle'ine' to to benač, na' to to angl, na' to de'e xio', na' cuantzə bi de'en zjəde. Diozən' neze nle'ine' yichjla'ažda'ochon'. Na' laogüe' na'anə' əgwdecho cuent šə biquə' de'e babencho.

Jeso'osan' naque' bχoz əblao chechon'

¹⁴ Jeso'os Xi'in Diozən' babeyepə' yoban' gan' zo Diozən' par gaquəlene' chio'o. De'e na'anə' Jeso'osan' naque' bχoz əblao checho, ben' naquə le'ezelaogüe beņə' zaque'e. Na' de'e na'anə' cheyalə' sotezə socho gonlilažə'əchone' can' chonczech.

¹⁵ Na' Jeso'osan', ben' naquə bχoz əblao chechon', chacbe'ine' catə' chaquecho zdebə goncho to de'e güen. Gwxiye'en gwlo'oyelə'an le' gone' de'e mal pero bito bene'en na' bžaglaogüe' cayanə'an chžaglaio chio'o benač.

¹⁶ Na' cheyalə' güe'elencho Diozən' dižə' sin cui žebcho, ənabechone' yezi'ixene' checho na' gaquəlene' chio'o bats'ətezə chyažjecho yelə' chaclen che'ena', chedə' le'ena' nži'ilažə'e chio'o.

5

¹ Beņə' ca' besə'əchoj gwsa'aque' bχoz əblao che nasyon Izrael chechon' tyemp de'en bagwde jso'e bi de'en jso'e lao Diozən' na' gwso'ote' bia yixə' besə'əlalje' xchenga'acquəbən' par nič Diozən' bezi'ixene' xtolə' de'e xaxta'ocho ca'. Na' yoguə' bχoz ca' gwsa'aque' con to beņə'.

² Na' bχoz əblao ca' gwsa'ape' yelə' chxenlažə' len beņə' ca' cuiņə' se'ejni'i can' cheyalə' so'one' na' len beņə' ca' bazjənxoayag len de'e malən', chedə' leczə benačən' zjənaque' na' naquən zdebə par so'one' de'e güenə'.

³ Na' de'en zjənaque' benačən' benən byen gwso'ote' bia yixə' na' besə'əlalje' xchenga'acquəbən' par gosə'ənabe' yezi'ixen Diozən' xtolə'əga'aque'ena' can' gosə'ənabe' yezi'ixene' xtolə' beņə' ca' yelə'.

⁴ Na' notono gwlej cuine' par gague' bχoz əblao, sino Diozən' gwlejga'aquene' can' gwleje' de'e Ronnə'.

⁵ Le'egatezə ca' Cristən' bito ben cuine' xen cuejlize cuine' par gague' bχoz əblao. Diozən' gwleje'ene' na' Dioz na'anə' gože'ene':

Len' naco' Xi'ina'.

Neža babena' par nič solao nabi'o len nada'.

⁶ Na' ga yoblə nyoj yeto de'en gože'ene':

Naco' bχoz beņə' zo zejlicane,

na' naco' ca bχoz Melquisedequən'.

⁷ Na' Jeso'osən' catə' gwzoe' yežlyo nga bene' orasyon lao Xē' Diozən' ben' gac yosle'ene' par niçh cui gate'. Jeso'osən' gwne' zizjo na' gwcheže' gwnabe' yelə' chaclen che', na' Diozən' bzenague' na' bene' par niçh yelə' gotən' cui gwnabi'an le' çhedə' ben'ilaže'ene'.

⁸ Na' la' ana'əczə' Jeso'osən' naque' Xi'in' Dioz, Diozən' bzejni'ine' le' de que cheyalə' əžlaglaogüe' par yeyož gone' yogua'əloł de'e ca' naquən gone'. De'e na'ana' Jeso'osən' bžlaglaogüe' len yogua'əloł de'en goc che' yežlyo nga.

⁹ Na' beyož goc che' Jeso'osən' yogua'əloł can' gone'e Diozən', nach gwzolao chone' par niçh yogua'əloł beṇə' ca' choso'ozenag che', nite'e len le' zejlicane.

¹⁰ Diozən' gwleje' le' par naque' bχoz əblao checho na' gwxaqua'əlebene' ca bχoz Melquisedequən'.

Gapcho cuidad par niçh cui cuejyichjcho xtižə' Diozən' de'en bachejle'echo çhei

¹¹ Na' ne'e dech de'e zan de'en che'enda' ənia' le'e che de'en naqua' Jeso'osən' bχoz çhechon', pero naquən zdebə əni'an par šejni'ilen, çhedə' bitoch chebeile gwzenagle che Diozən'.

¹² Bagolə' əgwšed əgwlo'ile beṇə' yeziquə'əchlə xtiže'ena', pero latje de'e gonle ca', chyažjele to beṇə' par əgwšed əgwlo'ine' le'e de'e yoblə ca de'en babsedle de'e nechan'. Na' laogüe de'en chyažjele əgwšedachle de'e ca', gwxaqua'əlebele ca bidao' ca' ne'e chsa'ažə', bi'i cuiṇə' gac sa'o.

¹³ Na' ben' naquə ca bidao' ne'e chažə', bitonə' šejni'ine' xtižə' Diozən' de'en naquəch zdebə.

¹⁴ Na' xtižə' Diozən' de'en naquəch zdebə gwxaqua'əleben ca yelə' guao de'en chao beṇə' cha'o. Na' beṇə' ca' chse'ejni'i len chsa'acbe'ine' che bitə'atezə dižə šə naquən de'e li o šə naquən dižə' güenlažə'. Chsa'acbe'ine' çhedə' la' bazjəyo'olaogüe' choso'ozenague' che Diozən'.

6

¹ Na' ca bidao' ca' çəsə'əzolao chsa'obo' yelə' guao catə' bazjəncha'obo' ca'aczən' chio'o cheyalə' solaocho cue' yichjcho che xtižə' Diozən' de'en naquəch zdebə par niçh gaquəch yichjla'ažda'ochon' can' naqua' yichjla'aždao' Cristən'. Catə'an gwzolao ben'ilažə'əcho Cristən' gwyejini'icho can' yedinjecho xtolə'əchon' na' bedinjechon. Na' na'a bitoch chyažjən yedinjecho che de'e ca' de'e yoblə, na' nic chyažjən yezolaocho gonlilažə'əchone' de'e yoblə.

² Banezczecho bi zejen catə'an chcho'acho nisən', na' leczə can' banezecho bi zejen catə'an chxoə na'achon' yichj beṇə' yoblə chnabcho yelə' chaclen che Diozən' par lega'aque' na' bitoch chyažjən no gwzejni'iche chio'o bi zeje de'e ca'. Le'egatezə ca' bitoch chyažjecho no gwzejni'iche chio'o can' yolis yosban Diozən' beṇə' guat ca' o can' gone' yelə' jostis che beṇə' ca' chso'on de'e malən'. Banezcze'aga'aquechonṇə'.

³ Pero ṇa'a ža, šə Diozən' güe'e latjə yeyiljažə'əcho nac goncho par niçh gaquə yichjla'ažda'ochon' can' naqua' yichjla'aždao' Cristən'.

⁴ Nita' beṇə' bachse'ejni'i xtižə' Diozən' na' bazjənape' yelə' mban zejlicane de'en chon Diozən' chio'o chonlilažə'əchone', na' leczə ca' bazo Spirit che Diozən' lo'o yichjla'ažda'oga'aque'ena'.

⁵ Bazjənezene' ca güenṇə' naqua' xtižə' Diozən' na' bazjənombi'e miłagr na' bichlə yelə' guac che Diozən' la'ana'əczə ze'e yesə'əle'ichene' yelə' guac de'en gwlo'echə' catə' əžin ža gatə' yežlyo cobə.

⁶ Na' šə gwžincla ža yesə'əgue'i beṇə' ca' Diozən' šə yesə'əbejyichjcle' xtiže'ena', bitoch gaquə yesyə'ədinjene' xtolə'əga'aque'ena' de'e yoblə, çhedə' lo'o yichjla'ažda'oga'aque'ena' so'one' txen len beṇə' ca' bosə'oda' Xi'in' Diozən' le'e yag corozən', na' so'one' par niçh beṇə' yeziquə'əchlə leczə yesə'əgue'ine' le'.

⁷ Ca naquə yežlyo güen gan' chsa'az beṇə', šə chacchgua yejon', nach chac de'en chsa'aze'ena' na' chata' de'en chsa'əyazjene', na' Diozən' chebeine' de'e chac cwseš çhega'aque'ena'. Can' gwxaqua'əlebecho šə zotezə zocho chzenagcho che Diozən'.

⁸ Pero šə bagwlejyichjcho cuich chzenagcho che Diozən' gwxaqua'əlebecho ca yežlyon' gan' chlə'ac por yag yešə' na' no yixə' cuan de'e cui chac gaoccho. Yežlyon' de'en nac ca' bito bi bi zaquə'n par xan yežlyon', nach chbejyichje'en na' chžin ža catə' chzeye' de'e ca' chla'ac laogüenṇə'.

Zotezə zocho chonlilažə'əcho Diozən' çhedə' nezecho žjəyecho len le'

⁹ Na' ca naquə le'e, la'ana'əczə' babi'a dižə'an ca', chacda' chele, na' zoa' segor bito gonle can' bagwnia' chso'on beṇə' ca'. Nežda' gonšgacze can' cheyalə' goncho laogüe de'en babebej Diozən' chio'o xni'a de'e malən'.

¹⁰ Diozən' naque' beṇə' güen. Na' bito ganlaže'e can' babenle xšine'ena', na' can' ne'e chonczen ṇa'a chaclenle yeziquə'əchlə beṇə' bagwleje' par zjənaque' lažə' ne'ena', chonlen laogüe de'en chaquəle che'ena'.

¹¹ Nezele žjəyezole len Cristən'. Na' de'e na'anə' yedote žlac cuiṇə' yide' de'e yoblə cheyaḷə' cue' yichjle de'en žjəyezole len le', can' bachi' yichjle na'a par chaclen ljuežjle.

¹² Bito gacle beṇə' godenag len xtižə' Diozən'. Legonlilažə' Diozən' can' bagwso'on beṇə' ca' bagwnitə', beṇə' ca' gosə'əzi' de'en ben Diozən' lyebe əgwnežjue' lega'aque'. La'anə'əczə cui gosə'əzi'en cate, con gwso'onlilažə'əteze'ene'.

¹³ Diozən' bene' lyebe de que xi'in dia che de'e Abraannə' əsa'aque' beṇə' zan. Na' de'en naque' Dioz na' notoch no no nla' beṇə' yoblə beṇə' napəch yelə' gwnabia' cle ca le', de'e na'anə' bzo cuine' testigw gwne': "Guaquəczə can' nia'anə' chedə' zoa' naca' Dioz."

¹⁴ Gwne': "De'e li gonczə' par nič gaquə güen chio'. Na' de'e li gonczə' par nič xi'in dia chio'onə' əsa'aque' beṇə' zan."

¹⁵ Na' sša gwzo de'e Abraannə' benlilažə'əteze' Diozən' xte que bžin ža goc can' ben Diozən' lyebe len le'.

¹⁶ Benəchən' chəsə'əzoe' jorament chəsə'əne' de que be'enə' chnabia'ach ca lega'aque' gwnežjue' castigw chega'aque' šə cui so'one' complir can' choso'ozoe' jorament. Chso'one' ca' par nič beṇə' ca' chsa'acyožə' lega'aque' se'ejle'e chega'aque' na' yesyə'yacxenlažə'e.

¹⁷ Beṇə' ca' chon Diozən' cuent zjənaque' xi'in dia che de'e Abraannə' laogüe de'en chso'onlilažə'e Diozən', Diozən' bene' par nič nitə'əchgüe' segor de que guaquəczə can' bene' lyebe, na' bito chš'e'e can' bansi'e xneze gone'. De'e na'anə' bzo cuine' testigw gwne': "Guaquəczən chedə' zoa' naca' Dioz."

¹⁸ Ca naquə Diozən' bene' lyebe na' leczə bzo cuine' testigw gwne': "Guaquəczə can' nia'anə' chedə' zoa' naca' Dioz", bene' ca' par nič nezecho de que caguə de'e te can' gwne'enə'. Na' bito chac güe'e dižə' güenlažə'. Diozən' bene' lyebe na' bzo cuine' testigw par nič bito žebcho sino yebeicho de'en nezecho žjəyecho len le', chio'o bagwṇabechone' bezi'ixene' xtolə'əchon'.

¹⁹ Na' de'en nezecho žjəyecho len Diozən' bito chac chop lažə'əcho sino zotežə zochononlilažə'əchone' chedə' la' nezecho de que Jeso'osən' chṇe' fabor chio'o lao Diozən' ca bžox əblao checho.

²⁰ Jeso'osən' bazjəyecho gan' zo Diozən' na' chone' par nič leczə chio'o žjəyecho len le'. Na' Jeso'osən' naque' bžox əblao checho, ben' gwxaquə'əlebe ca bžox Melquisedequən'.

7

Jeso'osən' naque' ca bžox Melquisedequən'

¹ Na' Melquisedequən' goque' rei gan' nzi' Salem na' Diozən' ben' naquə le'ezelaogüe beṇə' blao gwleje' le' par goque' bžox. Na' catə' beza' de'e Abraannə' beyož bene' gan lao rei ca' beṇə' ca' gosə'ədiləlen beṇə' Sodoma ca', bžox Melquisedequən' jəšəgue' le' na' len yelə' guac che Diozən' bene' par nič goc de'e šao' de'e güen che de'e Abraannə'.

² Na' de'e Abraannə' botobe' de'e ca' gosə'əban rei ca' che beṇə' Sodoma ca' na' bnite'en ši cuen de'e naquə lebe nach gwleje' tcuenən par bnežjue'en bžox Melquisedequən'. Melquisedequən' zeje dižə' "rei beṇə' chnabia' güen". Na' gwnabi'e gan' nzi' Salem, na' Salemən' zeje dižə' "gwnitə' beṇə' binlo'".

³ Bito nyojən šə no goquə de'e xaxna' Melquisedequən' na' nique nyojən šə no goquə de'e xaxta'ogüe'e, na' nic nyojən batə'əquə' golje' na' batə'əquə' gote'. De'e na'anə' nezecho cuiṇə' te yelə' naquə bžox che'enə' na' leczə de'e na'anə' gwxaquə'əlebene' ca Xi'in Diozən'.

⁴ Le'e gon xbab de que bžox Melquisedequən' goque' beṇə' blao. De'e na'anə' de'e xaxta'ocho Abraannə' lao ši cuen güejə de'e ca' gwleje', bnežjue' tcuenən bžox Melquisedequən'.

⁵ Na' beṇə' ca' gwsa'aljə lao dia che de'e Lebin', beṇə' ca' besyə'əyalə' par gwsa'aque' bžox, nyojən le'e lei de'en bzoj de'e Moizezən' de que yesə'əzi'e tcuen lao ši cuen yoguə' cuantžə de'e gotə' che beṇə' Izrael ca' yelə' la'anə'əczə yoguə'əlolga'aque' zjənaque' xi'in dia che de'e Abraannə'.

⁶ Melquisedequən' bito ənacho golje' lao dia che de'e Lebin', pero gwxi'e tcuen lao ši cuen de'en botobə de'e Abraannə' na' len yelə' guac che Diozən' bene' par nič goc güen che de'e Abraannə' ben' ben Diozən' lyebe əsa'ac xi'in dia che'enə' beṇə' zan.

⁷ Na' nachbia' de que Melquisedequən' zaquə'əche' cle ca de'e Abraannə' chedə' Melquisedec na'anə' gwdape' yelə' guac che Diozən' na' bene' par nič goc de'e güen che de'e Abraannə'.

⁸ Na' beṇə' ca' gwsa'ac bžox segon can' na lei de'en bzoj de'e Moizezən' gosə'əzi'e tcuen lao ši cuen cuantžə bi de'en gotə' che beṇə' Izrael ca' yelə'. Bžox ca' gwsa'aque' benəch na' gwsa'ate'. Pero Melquisedequən' ben' gwxi' tcuen lao ši cuen de'en botobə de'e Abraannə', cho'en dižə' che' ca beṇə' ne'e zoczə.

⁹⁻¹⁰ Na' ca naquæ de'e Abraannæ' bnežjue' Melquisedequæn' tcuen lao ši cuen de'e ca' botobe' de'en gosæ'aban rei ca', de'en na'anæ' gwaquæ anacho de que de'e Lebin' lecæ bnežjue' Melquisedequæn' tcuen gūejæ lao ši cuen de'e ca' botobæ de'e Abraannæ'. Guac anacho ca' chedæ' de'e Lebin' golje' lao dia che de'e Abraannæ' la'anæ'æczæ bitonæ' galje' catæ'an Melquisedequæn' jæšague' de'e Abraannæ'. De'e Lebin' goque' xa beņæ' nech ca' ægwsa'ac bχoz che beņæ' Izrael gwlaž checho ca' cana', na' lei de'en bzoj de'e Moizezæn' nan de que yesæ'æzi'e tcuen lao ši cuen cuantzæ bi de'en de che beņæ' Izrael ca' yelæ'.

¹¹ Žalæ' bχoz ca' beņæ' ca' gwsa'aljæ lao dia che de'e Lebin' goc so'one' par niç yichjla'aždao' beņæ' gwlaž checho ca' æsa'aquæn can' chene'e Diozæn', bito byažjecho yeto bχoz žalæ' ca'. Pero de'en cui goquæ so'one' par niç æsa'ac yichjla'aždao' beņæ' can' chene'e Diozæn', de'e na'anæ' bidæ' Jeso'osæn' par naque' bχoz chechon' na' gwxaquæ'ælebene' ca Melquisedequæn'.

¹² Jeso'osæn' naquæcze' bχoz chechon' la'anæ'æczæ cui naque' dia che de'e Lebin'. De'e na'anæ' nezecho banža' lei de'en choe' dižæ' che bχoz che nasyon Izrael chechon'.

¹³ Bχoz checho ben' cho'echo dižæ' chei, golje' lao dia che de'e Jodan', na' bitoch bchoj no gaque bχoz entr beņæ' ca' ægwsa'aljæch lao dia che de'e Jodan'.

¹⁴ Nezczecho de que Xançon' golje' lao dia che de'e Jodan', pero de'en bzoj de'e Moizezæn' le'e lein' nan de que beņæ' ca' gwsa'aljæ lao dia che de'e Lebin' æsa'aque' bχoz.

¹⁵⁻¹⁶ Bχoz checho Jeso'osæn' naque' ca bχoz Melquisedequæn'. Bito golje' lao dia che de'e Lebin' na' bito naque' bχoz can' na lei de'en bzoj de'e Moizezæn'. Naque' bχoz chedæ' bito gwzoi yelæ' gotæn' le', na' zocze' zejlicane.

¹⁷ Na' de'e nga nyožen can' gož Diozæn' Jeso'osæn' nan:

Naco' bχoz beņæ' zo zejlicane

na' naco' ca bχoz Melquisedequæn'.

¹⁸ Ca naquæ bχoz ca' beņæ' ca' ben Diozæn' mendad gwnitæ' cana', bitoch none' mendad nite'e na'a chedæ' de'en gwso'one'ena' bito zaguæ'an par æsa'ac yichjla'aždao' beņaçæn' can' chene'e Diozæn', na' bito nsa'an yelæ' guac che Diozæn'.

¹⁹ Leina' bito zaguæ'an gonan par niç yichjla'aždao' beņæ' æsa'aquæn can' chene'e Diozæn'. Pero na'a bazo Jeso'osæn' chone' par niç chac yichjla'ažda'ochon' can' chene'e Diozæn'. Na' nezecho chaquæch güen checho cle ca che beņæ' ca' zjænombia' lein'. Jeso'osæn' chone' par niç zocho binlo len Diozæn'.

²⁰ Na' par niç nezecho de que Jeso'osæn' naque' bχoz chechon', Diozæn' bzo cuine' testigw gwne':

Naquæcze' bχozæn' chedæ' zoa' naca' Dioz.

²¹ Beņæ' ca' gwsa'aque' bχoz segon can' bzoj de'e Moizezæn', Diozæn' bito gože' lega'aque' can' gože' Jeso'osæn'. Nyožæn' can' gože'ene', nan: Diozæn' bzo cuine' testigw gwne':

"Naquæczo' bχozæn' chedæ' zoa' naca' Dioz.

Na' bito gwša'a can' ni'anæ'.

Le' naco' bχoz ben' zo zejlicane.

Naco' ca Melquisedequæn'."

²² Nezecho de que Jeso'osæn' bedælo'ine' chio'o de que Diozæn' choncze' con can' none' lyebe par gaquælene' chio'o. Na' de'en none' lyebe gone' na'a naquæchæn güen cle ca de'en bene' lyebe gone' antsla.

²³ Beņæ' ca' gwsa'aque' bχoz segon can' na lei de'en bzoj de'e Moizezæn', gwsa'aque' beņaçæn' na' gwsa'ate', pero benitæ'ætecæ lguæ'aga'aque'. De'e na'anæ' gwsa'aque' beņæ' zan.

²⁴ Pero Jeso'osæn' zoe' zejlicane na' de'e na'anæ' zejlicane naquæcze' bχoz chechon'.

²⁵ Na' notæ'ætezæ beņæ' chse'ene'ene' nite'e binlo len Diozæn', Jeso'osæn' nape' yelæ' guac par chocobe' yichjla'ažda'oga'aque'en con šæ chso'onlilaže'ene'. Nape' yelæ' guac par gone' ca' chedæ' zocze' zejlicane chnabe' goclen lao Diozæn' par yoguæ' chio'o chonlilažæ'æchone'.

²⁶ Na' Jeso'os nan' naque' bχoz æblao chechon' na' zaque'e par gaquælene' chio'o chedæ' chone' cayaņæ'an chazlažæ' Diozæn'. Bito bi dolæ' nape', na' bito bi de'e mal chone', na' nic chone' xbab mal. Zoe' gan' zo Diozæn', chnabi'e txen len le'.

²⁷ Bito bi xtole'e de na' de'e na'anæ' bito cheyaļæ' gote' bia yixæ' par yezi'ixen Diozæn' xtole'ena' can' gwso'on beņæ' ca' gwsa'ac bχoz segon can' na lei de'en bzoj de'e Moizezæn'. Yoguæ' ža zgua'atec gwso'ote' bia yixæ' par niç gosæ'anabe' bezi'ixen Diozæn' xtole'æga'aque'ena' na' techlæ lecæ gwso'ote' bia yixæ' par gosæ'anabe' bezi'ixen Diozæn' xtole' beņæ' Izrael ca' yelæ'. Šlinzæ bnežjw cuin Jeso'osæn' por ni checho catæ'an gwso'ot beņæ' le' le'e yag corozæn' na' bitoch gate' yeto.

²⁸ Beņæ' ca' gwsa'ac bχoz æblao segon can' na lei de'en bzoj de'e Moizezæn' gwsa'aque' beņæ' güen de'e mal can' zjænaquæ yeziqua'æchlæ beņæ'. Zan iz bagoc bzoj de'e Moizezæn' lei che Diozæn' catæ' Diozæn' bzo cuine' testigw de que seļe'e Xi'ine'ena' par gaque' bχoz æblao

chechon' na' gwne': "Gaquæcze' b̄xoz əblao'n chedə' zoa' naca' Dioz." Na' Xi'ine' na'anə' zocze' zejlicane, na' naquə yichjla'aždaogüe'enə' cayanə'an chene'e Diozən'.

8

Cristən' chone' par niç hac de'e cobə de'en non Diozən' lyebe gone' par gaquəlene' chio'o

¹ Na'a ža zo b̄xoz əblao chechon', na' chi'e yoban' chnabi'e txen len Diozən' ben' naquə le'ezelaoğüe benə' blao. Lenne' naquan de'e žialaoch lao yogua' de'en babe'echo dižə' chei.

²⁻³ B̄xoz əblao ca' benə' ca' gwso'ot bia yixə' lo'o yo'odao' de'en gwso'on de'e xaxta'o chio'o benə' Izrael žso'e xchenga'aquəbən' gan' nzi' "Latjə gan' zo Diozən'" par niç Diozən' bezi'ixene' xtolə'əga'aque'enə' len che benə' ca' yelə'. Na' de'en gwso'one'enə' naquan ca de'en chac yoban' gan' zo Diozən'. De'e na'anə' benən byen bnežjw cuin Jeso'osən' gwso'ot benə' le' par niç naque' b̄xoz əblao chechon' gan' zo Diozən', na' chone' par niç Diozən' chezi'ixene' xtolə' chio'o chonjilažə'əchone'.

⁴ Na' bito naque' b̄xoz žala' ne'e zoe' lao yežlyon', chedə' banitə' b̄xoz ca' benə' ca' chjsoa' bi de'en chjsoa' lao Diozən' segon can' na lein'.

⁵ Na' yogua'əloj de'en chso'on b̄xoz ca' benə' ca' chso'on can' na lein', naquan latə' laszə ca naquə de'en chac yoban'. Diozən' bene' mendad len de'e Moizezan' antslə ze'e so'on de'e xaxta'o chio'o benə' Izrael yo'o de'e lachə'anə' gan' gwso'o b̄xoz ca' par gwso'elaogüe'e Diozən', gože'ene': "Yogua' de'en bagwnia' gonle, legonən cayanə'an blo'ida' le' catə'an gwzocho lao ya'anə'."

⁶ Pero na' de'en chon Cristən' zaquə'əchan cle ca de'en gwso'on b̄xoz ca' benə' ca' gwso'on can' na lein'. Na' leczə de'e cobə de'en chon Diozən' len chio'o naquə'əchan güen cle ca de'en bene' antslə, chedə' de'e xench de'en non Diozən' lyebe gone' par gaquəlene' chio'o na'a.

⁷ Žala' de'en ben Diozən' par goclene' benə' Izrael gwlaž checho ca' de'e nech benən par niç gwsa'ac yichjla'ažda'oga'aque'enə' can' chene'ene', bito bsele'e Cristən' žala' ca'.

⁸ Pero nachia' Diozən' bito bebeine' lega'aque', nachən' gwne':

Chona' lyebe gona' to de'e cobə par gaquəlena' le'e benə' Izrael catə' əžin ža, nada' Xanle Dioz ənia' ca'.

⁹ Nža'an benə' len de'e xaxta'ole ca' ca tyemp catə'an goquəlenga'aca'ane' par niç besyə'əchoje' Egipton'.

Legaque' bito gwso'one' can' gwso'one' lyebe len nada'.

De'e na'anə' nada' Xanle Dioz bitoch bengə'aca'ane' cas.

¹⁰ Quinga gona' par gaquəlena' le'e benə' Izrael catə'an əžin žan':

Nada' Dioz gona' par niç šo'o yichjle de'e ca' nona' mendad gonle,

na' gona' par niç yebeilen lo'o la'ažda'olen'.

Na' toza' nada' güe'ela'ole na' le'e gacle xi'ina'.

¹¹ Na' ni tole cui chyažjən əgwsed əgwlo'i ljuežjle par niç gombi'ale nada'

chedə' cana' yogua'əle gombi'ale nada',

le'e cuitec bi zaquə'əle na' len le'e nacle benə' blao.

¹² Cana'ach bitoch gona' xbab che de'e mal ca' de'en babenlənə'

chedə' ca orən' babezi'ixena' xtolə'əlenə'.

¹³ Na' ca naquan' be' Diozən' dižə' che de'e cobən' de'en gwne' gone' par gaquəlene' nasyon chechon', nezecho chde che de'en bene' mendad so'one' antslə chedə' banaquan' de'e golə' na' bitoch cheyalə' gonchon.

9

Yo'odao' de lachə' de'en gwso'on benə' Izrael ca gwxaquə'əleben ca gan' zo Diozən'

¹ Cana'ate ben Diozən' mendad naclə so'on benə' Izrael gwlaž checho ca' par so'elə'ogüe'ene'. Na' leczə bene' mendad so'one' to yo'odao' par le'.

² Yo'oda'onə' goquan de lachə'. Na' lo'o cuart nechən' bosozoe' to candler na' to mes gan' bosozoe' de' yextxl de'en naquə par Diozən'. Na' cuart nechən' nzi'in "Latjə che Dioz".

³ Na' cuart əgwchopen' nzi'in "Latjə gan' zoczə Diozən'". Na' entr cuart ca' çhopə gwze to lachə'.

⁴ Na' lo'o cuart əgwchopen' bosozoe' yeto mes de or gan' bosozoye' yal. Na' gosə'əyixjue' to caj na' bosozoguzje' doxenən or. Na' lo'o caj na' bosozoe' to yesə' de or gan' bosozoe' yelə' guao de'en gwza' yoba de'en nzi' mana, na' leczə lo'o caj na' gosə'əgüe'e garrot che de'e Ronnə' de'en bexejə. Na' leczə na' bosozoe' yej ta'a ca' gan' byoj de'en ben Diozən' mendad so'one' par niç gaquəlene' lega'aque'.

⁵ Na' lao tap che cajan' bosonite'e çhopə lguə'a lsaquə' angl benə' gosə'əzi' querobines. Na' gan' zjəzəcha querobines ca' chey che'eni'in, par niç nachia' de que Diozən' zoe' na'. Toe' gwzəcha šyichjən na' yetoe' yešyichjən. Na' lao tap che cajan' entr lega'aque' nzi'in "Latjə

che yelə' cheyašə' cheži'ilažə' che Diozən'". Pero bitoch che'enda' güe'echa' dižə' che to to de'e ca'.

⁶ Na' beyož banits' cuart ca' na' beyož boso'onite'e yogua' de'e ca' lo'inə', yogua' za ja'ac bχoz ca' lo'o cuart nechən' gan' gwsə'one' can' ben Diozən' mendad so'one' par əso'ela'ogüe'ene'.

⁷ Na' cuart əgwchopen' tozə' bχoz əblaon' goc gwyo'e ze tгүйe güeje. Na' catə'an gwyo'ena' benən byen bəxe'e chen che bia yixə' bže'en lao cəjan par nič Diozən' bezi'ixene' xtolə'ena' na' bezi'ixente' xtolə' beņə' ca' yelə'.

⁸ Na' de'en cui gotə' lsens šo'o nochlə beņə' lo'o cuartən', Spirit che Diozən' chzejni'in chio'o de que bito gaquə šo'ocho gan' zo Diozən' žalə' ne'e chone' mendad gaquə yogua'əloj de'en gwsə'one' lo'o yo'odao' de'en nsa' chopə cuart.

⁹ Na' yo'oda'onə' len yogua' de'e ca' gwsə'on bχoz ca' lo'inə' chlo'in chio'o zocho nā'a can' naquə yoban' gan' zo Diozən'. De'e zan de'en gwsə'on de'e xaxta'ocho ca' gwsə'ela'ogüe'e Diozən' lo'o yo'oda'onə' pero bito beyac yichjla'ažda'oga'aque'en can' chene'e Diozən' la'anə'əczə boso'onežjue' Diozən' bi de'en boso'onežjue'ene' na' la'anə'əczə gwsə'ote' bia yixə' par gwsə'elaogüe'ene'.

¹⁰ De'e ca' boso'onežjue' Diozən' gwsə'aquən no nis yelə' guao na' no bia yixə'. Na' de'e zan costomb' chega'aque' gotə' par gwsə'a gosə'əyib cuinga'aque'. Na' yogua' de'e ca' gwsə'one' nič cuerp chega'aque'ena' goquən xi'ilažə' can' na lein'. Yogu' de'e ca' gwsə'one'ena' gwsə'onən žin xte catə'an bselə' Diozən' Cristən' par bene' de'e zaquə'əche.

¹¹⁻¹² Pero bazo Cristən' nā'a naque' bχoz əblao chechon' na' chone' par nič chac güen can' gwnits' de'e xaxta'ocho ca' lez gaquə. Babeyep' yoban' na' zoe' gan' zo Diozən'. Na' gan' zoe'ena' gwxaquə'əleben ca cuart əgwchope che yo'odao' che beņə' Izrael ca', pero naquəčan de'e zaquə'əche na' de'e güenč clezə ca de'en gwzo che bχoz ca' cana', la' bito naquən de'e ben beņəch. Na' Cristən' zaque'e par gwyo'e gan' zo Diozən' čhedə' bnežjw cuine' gwsə'ot beņə' le' na' blalj xchene'ena' le'e yag corozən'. Bito nācho bete' no šib o no go'on dao' na' blalje' xchembən' par nič be'en Diozən'. Šlinzən' gwdixjue' xtolə'əchon' len xchene'ena' par zejlicane.

¹³ Ca naquə de'e xaxta'ocho ca' bito gwsə'aque' xi'ilažə' can' na lein' šə bagosə'əgane' no beņə' guat. Na' par nič besyə'əyac cuerp chega'aque'ena' xi'ilažə' de'e yoblə can' na lein', bχoz ca' boso'ože'e lega'aque' no xchen šib o no xchen go'on na' len de de'en gwche' catə'an cheyož choso'ozeye' baquə' dao'.

¹⁴ Pero xchen Jesocristən' de'en bedəlalje' par beque'e xtolə'əchon' zaquə'əčan ca xchen bia yixə' ca'. Xtolə'əcho na'anə' benən par nič goccho ca beņə' guat len yichjla'ažda'ochon', pero nā'a baben Jesocristən' par nič naquə yichjla'ažda'ochon' xi'ilažə' nič cho'ela'ocho Diozən' ben' zo zejlicane. Spirit che Dioz nan' goclenə Jeso'osən' par ben cuine' lažə' na' Diozən' par gwdixjue' xtolə'əchon'. Na' ca naquə Jeso'osən' bitoczə bi bi xtolə'ena' gotə'.

¹⁵ Na' de'en bedəlalj xchen Cristən' gwzəolao chac de'e cobən' de'en chon Diozən' lyebe gone' par chaclene' chio'o. Na' bachac de'e cobən' par nič ca' baltezə beņə' bagwlej Diozən' žəsyə'ənite'e len le' zejlicane. De'en bedəlalj xchen Cristən' gwdixjue' lente de'e mal ca' bencho žlac ne'e chac de'e neche de'en ben Diozən' lyebe gone' par goclene' de'e xaxtao' chio'o beņə' Izrael.

¹⁶ Catə' to beņə' babene' testament, bito gaquə can' na testamentən' xte catə'əch nezecho de que bagote'.

¹⁷ Na' ca naquə testamentən' bito gaquə can' nannə' žlac ne'e mban be'ena' ben len. Catə' bagote' cana'anə' gaquə can' nannə'.

¹⁸ Na' par nič gwzəolao goc de'e neche de'en ben Diozən' lyebe gone' par goclene' de'e xaxta'ocho ca', bene' mendad boso'olalje' xchen bia yixə'.

¹⁹ De'e na'anə' catə' de'e Moizezən' beyož be'elene' beņə' ca' dižə' che yogua'əloj de'en ben Diozən' mendad so'one' can' na lei che'ena', nach de'e Moizezən' bže'e lega'aque' xchen go'on dao' na' xchen šib nach nis. Bže'e lega'aque' de'e ca' len lats' yišə' xa xils' de'en mben color əxna na' len to xis yixə' dao' de'en naquə ca gwreg. Na' leczə bže'en librən' gan' nyoj leinə'.

²⁰ Na' de'e Moizezən' gože' lega'aque': "Chen ni ben Diozən' mendad əgwž'a le'e par nič gone' can' none' lyebe gone' par gaqualene' chio'o."

²¹ Nach bžə'ate'en yo'odao' de lachə'an na' len yesə' ca' na' ša' ca' de'en boso'oçhine' gan' gwsə'ela'ogüe'e Diozən'.

²² Lei de'en bzoj de'e Moizezən' benən mendad boso'ože'e chennə' par nič zan de'en boso'oçhine' gwsə'aquən xi'ilažə' can' na lein'. Diozən' bito bezi'ixene' xtolə' beņə' žalə' cui boso'olalje' chen che bia yixə'.

De'en bnežjw cuin Cristən' gwsə'ote'ene' chac cheque'e xtolə' chio'o chon'ilažə'əchone'

²³ De'e na'anə' benən byen boso'ože'e xchen bia yixə'an de'e ca' besə'əçhine' lo'o yo'oda'onə' par nič gwsə'aquən xi'ilažə' can' na lein'. Pero xchen bia yixə' ca' bito gaquə gonən ca gaquə

yichjla'ažda'ochon' can' chene'e Diozən' par ničh šo'ochō gan' zoe'enə'. Tozə xčhen Jesocrist nan' zaquə'an par chonən ca chac yichjla'ažda'ochon' can' chene'e Diozən'.

²⁴ Cata' Cristən' gwdixjue' xtolə'əchon' bito gwyo'e lo'o cuart əgwchope che yo'oda'onə' can' gws'o'on bħoz ca' cana' sino beyepe' yoban' gan' zo Diozən', na' na' zocze' na'a chne' fabor chio'o lao Diozən'. Na' cuart əgwchope che yo'odao' che beņə' Izrael na'ana' gwzon par bzejni'in chio'o can' naquə gan' zo Diozən'.

²⁵ Bħoz əblao ca' ze tgüiz güejə gws'o'e lo'o yo'oda'onə' gan' nzi' latjə gan' zoczə Diozən' boso'ože'e chen che bia yixə'. Pero Cristən' bito byažjən əgwnežjo cuine' so'ote'ene' zan las. Šlinzən' blalj xčhene'ene' par gwdixjue' xtolə'əchon'.

²⁶ Žalə' byažjən laljə xčhene'en zan las, babnežjw cuine' zan las dezd catə'an gwxe yežlyon' žalə' ca'. Pero caguə ca'ana'. Bnežjw cuine' šlinzə catə'an bžin or čhe'ena', na' de'en gws'ote'ene' šlinzə cana', gwdixjue' xtolə'əchon' zejlicane.

²⁷ Na' Diozən' bansi'e xneze de que əžin ža sa'at to to benačən' na' šlinzən' sa'ate'. Na' techlə əna Diozən' che to toga'aque' šə yesə'əzi'e castigw o šə nite'e mbalaz len le'.

²⁸ Na' ca' de'en sa'at benačən' šlinzə leczə šlinzən' bnežjw cuin Cristən' gws'ote'ene' gwdixjue' xtolə' benačən'. Nach əžin ža yide' de'e yoblə, caguə par čhixjoche' xtolə'əchon' sino par ničh deyexi'e beņə' ca' chasə'əbezə batə'əquan' yide'ena'.

10

¹ Lei de'en bzoj de'e Moizezən' chzejni'in chio'o latə'əlaszə che de'e güen de'en gaquə checho cata' yežinčo yoban' gan' zo Diozən'. Pero leina' bito goquə gonən par ničh yichjla'aždao' beņə' ca' gws'o'on can' nannə' əsa'əquan' can' chene'e Diozən', la'ana'əczə gws'ote' bia yixə' yoguə' iz par bezi'ixen Diozən' xtolə'əga'aque'ena'.

² Žalə' de'en gws'ote' bia ca' benən par ničh cuich so'one' de'e malən' bitoch besə'əyažjene' so'otəche'eb žalə' ca'. Pero de'en gwsa'acbe'ine' ne'e chso'one' de'e malən' nachən' yoguə' iz gws'ote'eb.

³ Na' de'en gws'one' ca' bito gwsa'anlaže'e de que zjənapə' dolə'.

⁴ Na' gws'one' ca' yoguə' iz čhedə' chen che no go'on dao' o no šib bito zaquə'an par yeca'an xtolə' beņə'.

⁵ De'e na'ana' catə' Cristən' bide' yežlyo nga gože' Xe' Diozən': Nežda' to de'en chazlažə'əcho' mazəchlə ca' bia yixə' bian' chso'ot beņə' par chso'ela'ogüe' le',

na' mazəchlə ca' bichlə de'en chso'one' le'.

De'en chazlažə'onə' əgwnežjo cuina' par čhixjua' xtolə' benačən'.

⁶ Lennə' de'en chebeido' mazəchlə ca' bian' chso'ote' par choso'ozeye',

na' mazəchlə ca' xčhen bia yixə' de'en chasə'əlalje' catə' chasə'ənabe' yezi'ixeno' xtolə'əga'aque'ena'.

⁷ De'e na'ana' goža' le' can' nyojən le'e libran' gan' nan:

"Dioz čhia', za'a nga zedəyena' con can' chazlažə'onə'."

⁸ Zgua'atec Cristən' gože' Xe' Diozən': "Nežda' de'en chazlažə'əcho' na' de'en chebeichdo' ca' de'en chso'ote' bia yixə' na' ca' bichlə de'en chso'one' le', na' ca' de'en choso'ozeye' bia ca' chso'ote' na' leczə ca' de'en chasə'əlalje' xčhenga'acobən' par chasə'ənabe' chezi'ixeno' xtolə'əga'aque'ena'." Gwne' ca' la'ana'əczə lei de'en bzoj de'e Moizezən' benən mendad gws'ote' bia yixə' na' gws'one' bichlə de'e ca' gws'one'ena'.

⁹ Nach Cristən' gože' Diozən': "Nada' za'a zedəyena' con can' chazlažə'onə'." De'e na'ana' nezecho de que Diozən' bitoch chene'ene' gotcho bia yixə' can' na' lein' čhedə' Cristən' bagwdixjue' xtolə'əchon'.

¹⁰ Cristən' bene' con can' gwyazlažə' Diozən'. Šlinzən' bnežjw cuine' gws'ot beņə' le' par beyone' yichjla'aždao' yoguə' chio'o chonjilažə'əchone' xi'ilažə'.

¹¹ Beņə' ca' zjənaquə bħoz, yoguə' ža nitə'ətezə nite'e chso'ote' bia yixə' par xtolə' beņə' Izrael ca' yeļa', len la' xčhen bia yixə'an bito gaquə yeca'an xtolə' beņə'.

¹² Pero na' Cristən' bnežjw cuine' šlinzə par gwdixjue' xtolə'əchon'. Na' beyožən' zjəyechi'e gan' chnabi'e len Diozən'.

¹³ Na' zoe' na' chbeze' əžin ža nitə' yoguə' de'e ca' chso'on contr le' na' beņə' contr che' ca' xni'ena'.

¹⁴ Na' de'en gwdixjw Cristən' xtolə'əchon' šlinzə cana', na' beyone' yichjla'aždao' yoguə' chio'o chonjilažə'əchone' xi'ilažə', leczə babene' par ničh chac yichjla'ažda'ochon' can' chene'e Diozən' gaquən zejlicane.

¹⁵ Na' caguə nadə'əza' cho'a dižə' che de'e ca'. Leczə Spirit čhe Diozən' benən ca' byojən ca' par ničh nezecho naquən de'e li, nan:

¹⁶ Quinga nona' lyebe gona' len lega'aque' catə' əžin žan':

Nada' Dioz gona' par niĉ ŝo'o yiĉhĵga'aque' de'e ca' nona' mendad so'one',
na' gona' par niĉ yesy'əbeine'en lo'o la'ažda'oga'aque'ena'.

¹⁷ Nach nyoj yeto de'en nan:

Cuatəch žjsa'alaža'a ĉhe de'e mal ca' bagwso'one' na' ĉhe xtolə'aga'aque'ena'.

¹⁸ Na' catə' babezi'ixen Diozən' xtolə'əchon', bitoch chyažjecho gotcho bia yiĉə' par ənabcho yezi'ixene'en.

Cheyalə' socho güe'ela'ochio Diozən' na' goncho orasyon laogüe'ena'

¹⁹ Na'a ža beŋə' bišə', laogüe de'e blalj Jesocristən' xĉhene'ena' par gwdixjue' xtolə'əchon' gaquəczə šo'ochio gan' zo Diozən' sin cui žebcho.

²⁰ De'en ben Jesocristən' par niĉ šo'ochio gan' zo Diozən' naquən to de'e cobə la' antslə "Latjə gan' zo Diozən'" lo'o yo'oda'onə' bgašə'an len to lachə'. Pero na'a de'en bnežjw cuin Jesocristən' por ni ĉhechon' bito bi de de'en ĉcuašə'an latjə gan' zo Diozən' yoban' len ĉio'o ĉhonlilažə'əcho Jesocristən'.

²¹⁻²² Na' de'en naquə Jesocristən' bĉox əblao ĉhecho, na' de'en ĉaclene' ĉio'o naccho ca family ĉhe Diozən', de'e na'anə' cheyalə' socho güe'ela'ochio Diozən' na' goncho orasyon laogüe'ena' do yiĉhĵ do lažə'əcho, gonlilažə'əchone' sin cui gaquəžejlažə'əcho. Goncho ca' laogüe de'en blalj xĉhen Jesocristən' par beque'e xtolə'əchon'. Na' leczə bagwchoacho nisən'.

²³ Na' can' gwzolaochio ĉhonlilažə'əcho Jesocristən', ca'acžən' cheyalə' sotezə socho gonlilažə'əchone' na' yebeicho de'en žjəyezochio len le', ĉhedə' la' Diozən' ben' ben lyebe žjəyezochio len le', chone' complir can' ne'ena'.

²⁴ Na' leczə cheyalə' güe'e ljuežjcho balor par niĉ gaquəchecho ĉhe ljuežjcho na' gonchcho de'e güen to yetochio.

²⁵ Na' bito cuejyichjcho de'en ĉhdopcho txen par ĉo'ela'ochio Diozən', can' ĉso'on balə beŋə' ĉhəšə'əbejyichje'en. Cheyalə' gwtiplažə' ljuežjcho par niĉ sochcho ĉheĉh gonlilažə'əcho Cristən'. Gonchcho ca' ĉhedə' bazon baozə yidə Cristən' yeto.

²⁶ Na' šə ĉio'o cuejyichjcho dižə' li ĉhe Diozən' de'en banombi'acho par gontezcho de'e malən', bitoch gaquəlenən ĉio'o de'en blalj xĉhen Jesocristən' par beque'e xtolə'əchon'.

²⁷ Na' šə goncho ca', cheyalə' žebcho castigw de'en gon Diozən' ĉio'o, ĉhedə' notə'ətezcho ĉoncho contr le' əsele'e ĉio'o lo'o yi' gan' cuiayi'icho.

²⁸ Ca naquə beŋə' ca' ĉsa'acquene' bitobi zaquə' lei de'en bzoj de'e Moizežən' na' bito ĉoso'ozenague' ĉhei, beŋə' gwlaž ĉhecho ca' ĉso'ote' lega'aque' sin cui ĉesyə'əyaše'ene' lega'aque', con šə nita' ĉhopə o šonə testigw beŋə' ĉso'e dižə' de que de'e malən' bagwso'one'.

²⁹ Pero ĉio'o ža šə gue'icho Xi'in Diozən' na' Spirit ĉhe'ena' de'en nzi'ilažə' ĉio'o, zaquə'əczən par si'icho castigw gualəch, na' le'egatežə ca' šə gaquecho cui bi zaquə' xĉhene'ena'. Lenə'ə' bedəlalje' par niĉ gwzolaochio ĉac de'e cobə de'en ben Diozən' lyebe gone' par ĉaclene' ĉio'o na' bedəlalje'en par niĉ yiĉhĵla'aždao' ĉio'o ĉhonlilažə'əchone' beyaquən xi'ilažə'.

³⁰ Nezecho de que Diozən' gwne': "Nadan' co'olažə'a beŋə' ca' ĉso'on contr nada' na' nadan' gonga'aca'ane' castigw." Na' leczə nyojən nan: "Diozən' gwnežjue' castigw ĉhe beŋə' ca' bagwcue'e ca' xi'ine' šə so'one' de'e malən'."

³¹ Na' šə cuejyichjcho Diozən' ben' zo zejlicane, lechguale de'e žebcho ca naquə castigon' de'en gone' ĉio'o.

³² Le'e žjsa'alažə' can' bĉhejele la'anə'əczə de'e zan de'e gwdi' gwxaquə'əle ca tyempən' cata'ən ze'e gwzolaochio gwejmi'ile ĉhe Cristən'.

³³ Besyə'əbe beŋə' contr ĉhele ca' boso'ogüie' can' bžaglaole cata'ən boso'ožia boso'onite'e le'e na' cata'ən gosa'aque'e de'en gote' ĉhelen'. Na' leczə bĉhejele par benle txen len beŋə' ljuežjcho ca' cata'ən goc ĉhega'aque' ca'.

³⁴ Beyašə' beži'ilažə'əle ljuežjcho ca' beŋə' ca' gwsa'atə' ližya na' gwzole mbalaz la'anə'əczə gosa'aca' beŋə' de'en gote' ĉhele, ĉhedə' la' gwnezele de que laogüe de'en ĉhonlilažə'əle Cristən' de de'e zaquə'əche ĉhele yoban' de'e cui te ĉhei.

³⁵ Na'a ža, bito cuejyichjje ca de'en ĉhonlilažə'əlene', ĉhedə' gwžin ža cata' sole mbalaz.

³⁶ Bito žjxaquə'əlažə'əle par yeyož gonle yoguə'əloj can' ĉhene'e Diozən' la' šə gonle can' ĉhene'ene'ena' žjəyezole len le' zejlicane can' bene' lyebe.

³⁷ Nyojən can' gwna Diozən' nan:

Lechguale lgüegwzə əžin ža catə' yidə ben' əsele'a, na' bito šeichene'.

³⁸ Na' beŋə' ca' žjənaque' beŋə' güen laogua'anə' cheyalə' nite'e so'onlilažə'e nada'.

Na' beŋə' ca' ĉesyə'əbižə' cuich ĉso'onlilažə'e nada', bitoczə yebeiga'acda'ane'.

³⁹ Pero na' ĉio'o ža, bito naĉo naccho ca beŋə' ca' ĉesyə'əbižə' cuich ĉso'onlilažə'e Diozən', beŋə' ca' yesə'əbiayi'. ĉio'o zotezə zocho ĉhonlilažə'əchone' na' de'e na'anə' nezecho žjəyezochio len le' zejlicane.

11

Diozən' chebeine' beṇə' laogüe de'en chso'onlilaže'ene'

¹ De'en chonlilažə'əcho Diozən' nezecho gwaquə de'en chbezcho gaquə, na' nezecho de'e liczə can' na Diozən' che de'e ca' cui chle'icho.

² Na' beṇə' ca' gwnita' gwlatte, bebei Diozən' lega'aque' laogüe de'en gwso'onlilaže'ene'.

³ Na' de'en chonlilažə'əchone' chejni'icho de que con bene' mendad goc yoban' na' yežlyon'. Bito bi bĉhine' par bene'en.

⁴ Na' ca naquə de'e Abelən', de'en benlilaže'e Diozən', goque' beṇə' güen lao Diozən' na' bebei Diozən' de'en bnežyw de'e Abelən' le' cle ca de'en bnežyw de'e Cainə'. Na' la'əṇə'əczə cuich zo de'e Abelən', de'en benlilaže'e Diozən' chzejni'in chio'o de que can' cheyalə' goncho.

⁵ Na' Enoquan' leczə benlilaže'e Diozən', na' de'e na'anə' Diozən' bezi' beque'ene' sin cui gote'. Notoch no ble'ile'. Na' nyojan che' de que chebei Diozən' le' antslə ze'e yezi' yeque'ene'.

⁶ Diozən' bito chebeine' notə'əteza beṇə' cui chonlilažə' le'. Na' šə no güe'elao' le', cheyalə' šejle'e de que zoczə Diozən' na' de que gwzenagczə Diozən' che' šə bi de'en əṇabene' le' do yichj do laže'e.

⁷ Na' ca naquə de'e Noen' ža, leczə benlilaže'e Diozən'. Na' Diozən' bosnisene' le' can' ze'e gaquə na' de'e Noen' gwyejle'e che'. De'e na'anə' Noen' bene' to barcw gan' gwyo'e len family che' ca' par niĉ bito gwsa'ate' len nisan'. Na' yełə' chonlilažə' che'ena' len Diozən' blo'in beṇə' ca' yeziquə'əchlə gwža' yežlyon' de que gwsa'ape' dolə'. Na' leczə de'en benlilaže'e Diozən', de'e na'anə' Diozən' gwne' che' de que naque' beṇə' güen laogüe'ena'.

⁸ Na' de'en benlilažə' de'e Abraannə' Diozən', bzenague' cats' Diozən' bene' mendad šejje' zita'. Na' gan' gwyeje' Diozən' blo'ine' le' yežlyon' de'en gaquə che'. Na' gwyeje' la'əṇə'əczə bito nombi'e latjən' ca orən'.

⁹ Na' de'en benlilažə' de'e Abraannə' Diozən', gwzoe' laž beṇə' zita' gan' ben Diozən' lyebe gwnežje' xi'in dia che' ca'. Na' de'e Abraannə' gwzoe' lo'o yo'o de lachə'əzə, na' leczə lo'o yo'o de lachə'əzə gosə'anita' de'e xi'ine' Isaaquan' na' de'e xi'in xesoe' Jacobən', beṇə' ca' leczə gosə'əbeze' gwnežjo Diozən' xi'in dia čega'aque' ca' yežlyon'.

¹⁰ Bito bi goque de'e Abraannə' de'en gwnite'e lo'o yo'o de lachə'əzə, čeda' gwzoe' lez əžin ža soe' gan' zo Diozən', gan' naquə to syoda güen de'e cui te čei, syoda de'en ben Diozən'.

¹¹ Na' ca naquə de'e Sar no'ol che de'e Abraannə', benlilaže'e Diozən' na' de'e na'anə' Diozən' bene' par niĉ bi'e bdao' na' gwxane'ebo' la'əṇə'əczə cuich zoe' xlaogüe'e sane'. Diozən' bene' ca' len de'e Sarən' čeda' Sarən' gwyejle'e de que Diozən' gone' can' bene' lyebe.

¹² De'e na'anə' la'əṇə'əczə de'e Abraannə' naque' beṇə' gola' par so xi'ine', xi'in dia che' ca' gwsa'aque' beṇə' zan can' zjənaquə beljw ca' de'en zjəzia le'e yoban' na' can' naquə yox de'en čhi' cho'a nisdə'onə', notono no gaquə gwlabə' xi'in dia che'ena'.

¹³ De'e Abraannə', de'e Isaaquan' na' de'e Jacobən', na' nochlə beṇə' ca', ne'e chso'onlilažə'əcze' Diozən' cats' bžin ža gwsa'ate' la'əṇə'əczə cuiṇə' gac can' ben Diozən' lyeben'. Bito gwsa'aczejlaže'e, sino que gwse'ejle'ecze' de que gwžin ža gone' can' gwne'ena'. Na' lega'aque' gwsa'acbe'ine' de que zjənaque' ca beṇə' zita' len beṇə' ža' lao yežlyon' na' de que bito bi lažga'aque' de lao yežlyo nga.

¹⁴ Na' de'en gwsa'aquene' cui bi lažga'aque' de lao yežlyon', nachbia' de que gwse'enene' yesə'əžine' ga yoblə gan' gaquə lažga'aque'ena'.

¹⁵ Žalə' gwso'one' xbab che yežən' gan' gwsa'alje' de que naquan lažga'aque'ena', zjəsyə'anitə'əlje' na' žalə' ca'.

¹⁶ Pero gwso'one' xbab de que yoban' naquan lažga'aque'ena' na' gwse'enčgüeine' yesyə'əžine' na', čeda' la' güenč naquan cle ca yežlyon'. De'e na'anə' Diozən' bito četo'ine' čega'aque' par əṇe' de que naque' Dioz čega'aque' ben' chso'elaogüe'e, na' le' babənšaogüe'e to syoda par lega'aque'.

¹⁷⁻¹⁸ Na' ca naquə de'e Abraannə' benlilaže'e Diozən', de'e na'anə' bzenague' cats' Diozən' benene' prueb gože'ene': "Bet xi'ino' Isaaquan' can' choto' bia yixə' ca' na' chlalj' xčhenga'acquəbən' par cho'elaogo'o nada.'" Na' gwneze de'e Abraannə' de que Diozən' bene' lyebe len le' de'e zan de'e güen de'e gaquə por xi'in dia che'ena'. Na' che bi'i nan' gož Diozən' de'e Abraannə': "Xi'in dia che Isaac na'azə gona' cuent lao dia čio'onə'." Pero bia'aczə bzenag de'e Abraannə' ca de'en gož Diozən' le' got xi'ine' tlišə'ənə'. Na' bžin orən', Diozən' bito be'e latjə gote'ebo'.

¹⁹ De'e Abraannə' bzenague' par gote'ebo' čeda' gwnezene' de que Diozən' chac yosbane' beṇə' guat ca'. Na' ca naquə Diozən' bito be'e latjə gote' xi'ine'ena' guac əṇacho de que Diozən' bosbane'ebo' ladjo beṇə' guat ca'.

²⁰ Nach leczə de'e Isaaquan' benlilaže'e Diozən', na' de'e na'anə' gwṇabene' Diozən' gone' güen len xi'ine' ca' de'e Jacobən' na' de'e Esa'on'.

²¹ Leczæ de'e Jacobæn' benlilaže'e Diozæn', na' de'e na'anæ' catæ' bazon gate' gwñabene' Diozæn' gone' güen len xi'in xesoe' ca', xi'in de'e Jwsen'. Na' bchequa' yichje'ena' be'ela'ogüe'e Diozæn' ziaša'atezæ garrot che'ena'.

²² Na' de'e Jwsen' leczæ benlilaže'e Diozæn' na' gweyjele' de que ašin za yesyæ'achoj beña' Izrael ca' Egipton' can' ben Diozæn' lyebe. De'e na'anæ' cats' bazon gate' bene' mendad yesyæ'ayo'e žit che cuerp che'ena' cats' žjæya'aque' Canaanæ'.

²³ Na' cats' goljæ de'e Moizezæn', de'e tant gwso'onlilaže' de'e xaxne'e ca' Diozæn', bito besæ'æžebe' so'one' contr can' ben de'e rein' mendad so'one' ca de'en gože' beña' Izrael ca' so'ot bi'i chega'aque' ca'. Šonæ bio' bosocuaše'e de'e Moizezæn' ližga'aque'ena', cheda' gwsa'aquene' nacho' xochechgua. Na' cats' bitoch goquæ yoso'ocuaše'ebo', xi'in rein' beque'ebo' boscha'ogüe'ebo'.

²⁴ Na' cats' bagwcha'o de'e Moizezæn', benlilaže'e Diozæn' na' de'e na'anæ' bito gone'ene' gague' cuent ca bi'i che de'e xi'in Rei Faraonna'.

²⁵ Gwyazlažæ'æche' bžaglaogüe' txen len beña' Izrael ca' ca de'en gosæ'æzaquæ'æzi' gosæ'æzaquæ'æyaše'e, cle ca gone' bi de'en chasyæ'æbei beña' mal ca' chso'one', la' de'e te chei de'e ca'.

²⁶ De'en bžaglaog de'e Moizezæn' gwxaquæ'æleben ca de'en gwxaquæ'æzi' Cristæn'. Na' gocbe'ine' de que de'e zaquæ'æche æzaglaogüe' yogua' de'e ca' cle ca si'e doxen yelæ' gwni'a che Egipton'. Gwnezene' gwžin ža cats' gon Diozæn' par ničh soe' mbalaz.

²⁷ Na' de'en benlilaže'e Diozæn' bito bžebe' rein' cats' bžin ža besyæ'achojæ' Egipton' la'anæ'æczæ rein' bža'achgüe' lega'aque'. Na' de'e Moizezæn' gwlo'o gwchejlaže'e len de'e ca' bžaglaogüe' lao bene' par besyæ'achojæ' Egipton' cheda' gwnezene' zoczæ Diozæn' len le' ca nacho chle'iczene' le'. La'anæ'æczæ Diozæn' cui no chac le'i le'.

²⁸ Na' de'e Moizezæn' de'en benlilaže'e Diozæn' bene' mendad len to to family beña' Izrael ca' gwso'ote' xila' dao' ca' can' gož Diozæn' le' na' bosoože'e xchenga'acquæbæn' ližga'aque'ena' par ničh anglæn' ben' bsela' Diozæn' bito bete' bi'i nech ca' lao yogua' family chega'aque'ena'.

²⁹ Na' beña' Izrael ca' de'en gwso'onlilaže'e Diozæn', Diozæn' bene' par ničh Nisdao' Exnan' goquæn' choplæ xte bla' yo biž par ničh goc gosæ'adie' yešla'ala. Pero na' beña' Egipto ca' cats' gwsa'aclaže'e yesæ'adie', beyeyjw nisæn' gan' chæsæ'adi'ena' na' gwsa'ate' gwse'eje' nisæn'.

³⁰ Na' leczæ de'en gwso'onlilaže' beña' Izrael ca' Diozæn', de'e na'anæ' Diozæn' bene' par ničh bebixæ ze'e de'en gwyechj doxen syoda Jericon' cats' beña' Izrael ca' jæsæ'æzechje'en yogua' ža lao gaža ža.

³¹ Na' de'e Raabæn' no'olæn' goquæ sargat antslæ, leczæ benlilaže'e Diozæn'. Na' de'en benlilaže'ene' bito gwžiyæ'e len beña' Jerico ca' beña' ca' cui bosoozenag che Diozæn', cheda' le' ža bgüialaogüe' beña' Izrael ca' liže'ena' beña' ca' jæsæ'ægüia jæsæ'aye' laže'ena'.

³² Bichxan' ænia' ža? Bito latja' par gua'a dižæ' che de'e Gedeonna', che de'e Baraquæn', che de'e Sansonna', che de'e Jeften', che de'e Dabin', che de'e Samuelæn' na' che yeziqua'achlæ beña' ca' gwsoe' xtižæ' Diozæn' cana'.

³³ Na' laogüe de'en gwso'onlilaže'e Diozæn' baļe' besæ'achojæ' gwso'one' gan cats' gosæ'ædilælene' no rei, na' yebale' gwso'one' byen par ničh beña' yoblæ gwso'one' de'en naquæ de'e güen. Na' yebale' ben Diozæn' lyebe gone' to de'e gone' len lega'aque' na' goc can' bene' lyeben', nach leczæ yebale' Diozæn' bene' par ničh bež æznia ca' cui bi gwso'one'eb lega'aque'.

³⁴ Na' leczæ de'en gwso'onlilaže'e Diozæn', baļe' bito gwse'eye' lo'o yi'ina', na' yebale' besyæ'ala cats' gwse'ene'e beña' so'ote' lega'aque' len spadæn', na' yebale' bnežjw Diozæn' lega'aque' fuers balor cats' cui bi fuers chega'aque' gotæ', na' yebale' gwsa'aque' soldad gual, na' yebale' gwso'one' gan soldad zita' beña' besæ'æžin gosæ'ædilælene' lega'aque'.

³⁵ Gwnita' no'olæ gwso'onlilaže' Diozæn' na' laogüe de'en gwso'onlilaže'ene'ena' bosbane' no family chega'aque' ladjo beña' guat ca'.

Na' gwnita' beña' gwso'onlilaže' Diozæn' na' bito gwse'ene'e yesæ'æbejyichje'ene' par yesyæ'achojæ' lao de'en chæsæ'æchi' chæsæ'æsaquæ' beña' lega'aque', cheda' gwnite'e lez yolis yosban Diozæn' lega'aque' ladjo beña' guat ca' par žjæsæ'ænite' e len le'.

³⁶ Na' gwnita' beña' lechgualæ gosæ'æzi'ichižæ' beña' lega'aque' na' gwso'ot gosæ'ayine' lega'aque' na' bosoocheje' lega'aque' gden, na' gosæ'æyixjue' lega'aque' ližya.

³⁷ Na' beña' mal ca' bosoošiže'e baļæ beña' ca' chso'onlilaže' Diozæn' yej, na' bosoozoxje' cuerp che yebale' len syer, na' gosæ'ægo'oyele'e yebale' par yesæ'æbejyichje' Diozæn', pero bito gosæ'æbejyichje'ene', na' gwso'ote' yebale' len spad. Na' baļæ beña' ca' gwso'onlilaže' Diozæn' gwsa'æše' yixæ' žjænyaze' no xa xila' na' no xa šib. Bitobi bi gotæ' chega'aque'. Lechgualæ nyašæ' goc chega'aque'. Na' lechgualæ bosoochi' bosooşaquæ' beña' lega'aque'.

³⁸ Gosæ'ælaže'e do latja dašæn' na' do ya'adao' na' do ga ze bļoj na' ga zo no liž bia yixæ'. Yogua' de'e ca' goc che beña' ca' gwso'onlilaže' Diozæn', len la' žjæzaquæ'æche' lao Diozæn' cle ca yogua' beña' ca' cui gwso'onlilaže'ene'ena'.

³⁹ Na' la'ana'eczə bebei Diozən' yoguə' beṇə' ca' gwso'onlilažə' le', bito bene' ca gaquə' yoguə'əlol de'e ca' bene' lyebe žlac gwnita' lega'aque'.

⁴⁰ Diozən' bito gone'ene' gaquə' che lega'acze' de'en bene' lyebe, sino bene' par nič txen len lega'aque' bagoc checho can' bene' lyebe gaquə' par nič chac yichjla'ažda'ochon' can' chene'ene'enə', na' lechguale mbalaz can' bene'enə'.

12

Cheyałə' sotezə socho goncho xbab che Jeso'osən'

¹ De'en gwso'on yoguə' beṇə' ca' gwso'onlilažə' Diozən' žlac gosə'əbane' yežlyo nga chzejni'in chio'o can' cheyałə' gonlilažə'əchone'. De'e nan' cheyałə' gwcui'izəcho ca'alə' šə bi de'en chžon par gonlilažə'əchcho Diozən', na' cuejyichjo šə bi de'e mal de'en choncho. Na' cheyałə' co'o gwchejlažə'əcho len bitə'atezə de'e chac checho par nič sotezə socho gonlilažə'əcho Diozən' na' goncho can' ne'enə'.

² Cheyałə' sotezə socho goncho xbab che Jeso'osən' chedə' tozə le' chonlilažə'e Diozən' cayanə'an cheyałə' gonlilažə'əchone' chio'o. Gwneze Jeso'osən' ze'e gon Diozən' par nič soe' mbalaz len le', na' de'e na'anə' gwlo'o gwchejlažə'e de'en gwxaquə'əzi'e catə'an gwso'ot beṇə' le' le'e yag corozən' na' be'e latjə beya' gwso'one beṇə' ca' le'. Pero na'a chi'ilene' Diozən' yoban' na' chəsə'anabi'e txen.

³ Cheyałə' goncho xbab che Jeso'osən' can' gwlo'o gwchejlažə'e len yoguə' de'en gwso'on beṇə' mal ca' contr le' par nič co'o gwchejlažə'əcho na' cui gaquecho zdebə goncho can' chene'e Diozən'.

⁴ Na' chio'o ža, de'e zano babžaglaochcho chedə' choncho xte ga zelao chzaque'echo par cui choncho de'e malən', pero notonə' got chio'o.

⁵ Cheyałə' žjsa'alazə'əcho de' que Diozən' chone' chio'o consejw can' chso'on beṇə' len xi'inga'aque'. Na' consejon' chone' chio'o nyojan nan:

Xi'indaogua'a, bito gaquele de' que cui bi zejen ca de'en chona' castigw chelen' catə' chonle bi de'e malən',

na' bito gaquele tolə catə' chdila' le'e, nada' naca' Xanle.

⁶ De'e na'anə' nada' chnežjua' castigw che beṇə' ca' chacda' chei catə' chso'one' de'e malən', na' chona' par nič chəsə'əžaglae beṇə' ca' bagwcu'a ca xi'ina' catə' cui choso'ozenague' chia'.

⁷ De'e nan' ža, Diozən' chone' chio'o castigw chedə' chosgole' chio'o can' chso'on beṇə'achən' chosyo'osgole' xi'inga'aque'enə' bi'i chsa'aque' chei, chso'one' castigw chega'acbo' catə' chso'ombo' de'e malən'.

⁸ Na' šə cui bi castigw chechon' chon Diozən' catə' choncho de'e malən', zeje dižə de' que bito naccho xi'ine', la' yoguə' chio'o bagwcue'e ca xi'ine' catə' choncho de'e malən' chone' castigw checho.

⁹ Xaxna'acho ca' bosyo'osgole' chio'o yežlyo nga na' gwso'one' castigw checho che bi de'e mal de'en bencho na' bzenagcho chega'aque'. Naquəchxe cheyałə' əgwzəxjw yichjchon' gwzenagcho con bin' əna Xaacho Diozən' ben' chon yelə' mban zejlicane' che chio'o chonlilažə'əchone'.

¹⁰ Na' xaxna'acho ca' lao to chop izən' gwso'one' castigw checho con can' gwnan chega'aque'enə'. Pero na' Diozən' chone' chio'o castigw parzə nič gaquəlene' chio'o, par nič ca' gaccho beṇə' la'aždao' xi'ilažə' can' naque'enə'.

¹¹ Na' lao orən' bito chazlažə'əcho bitə'atezə castigw de'en chaccho. Pero galj chdelə cheyabe'icho naquan' goncho chedə' castigw de'en chaccho chaclenən chio'o par nič sotezə socho goncho de'e güennə'.

Diozən' gone' castigw checho šə cui gwzenagcho che'

¹² De'e na'anə' lesotezə leso legonlilažə' Diozən' na' le'e co'o gwchejlažə' bitə'atezə de'en chyi' de'en chzaquə'əle.

¹³ Leso legon con can' chene'e Diozən'. Legonən par nič beṇə' ljuəžjle ca' yoso'ozenaguəche' che Diozən' caguə ca yesə'əxope' so'onche' de'e malən', chedə' bale' cuinə' yoso'ozenague' che yoguə'əlol de'en chene'e Diozən' so'one'.

¹⁴ Legon ga zelao saque'ele par nič sole binlo len yoguə' beṇə' chso'onlilažə' Jesocristən'. Na' leczə legü'e latjə par nič Diozən' gone' la'ažda'olen' xi'ilažə', chedə' notono no yežin gan' zo Diozən' šə cui naquə la'ažda'ogü'e en xi'ilažə'.

¹⁵ Bito güe'ele latjə par nič tole cuejyichjle cuich talenle Diozən', la' Diozən' nži'ilažə'əchgü'e yoguə'əcho. Na' šə tole cuejyichjle Diozən', nxož yoguə'əle gonle ca'.

¹⁶ Bito co'o xtole o cuejyichjle be'en chele o no'ol chele par solenle beṇə' yoblə. Na' bito gue'ile de'en naquə de'e zaque'e lao Diozən'. Nezecho de'e Esa'on' por to yelə' guao na'azə bete'e de'en banaan gwnežjo Diozən' le' de'en golje' naque' beṇə' nech.

¹⁷ Nezele de que gwdechla gone'ene' yeyac lao ne'e de'en bdie' lao na' beṇə' biše'enə', pero bito goqua bi gone' par nich yeyaquən lao ne'enə' la'anə'əczə gwcheže' tant gone'ene' yeyaquən lao ne'enə'.

¹⁸ N'za'alə chac che chio'o na'a cle ca can' goc che de'e xaxta'ocho ca' cata'an Diozən' bnežjue' lega'aque' lei che'enə'. Betje' lao ya'a Sinain' na' gwyechj yi' beḷ' lao ya'anə', na' gwxoan žen, na' beyaquən žchol, na' gwyechjhgua be'.

¹⁹ Na' gwse'enene' gwchež to trompet, na' leczə gwse'enene' be' Diozən' dižə' len lega'aque'. Pero de'e tant besə'əžebe' xte gwsa'ata'əyoine' de'e Moizezən' par nich ye'e Diozən' cuich güe'elene' lega'aque' dižə'.

²⁰ Lechgualə besə'əžebe' por ni che de'en gož Diozən' lega'aque' antslə de que šə no beṇə' žjəbigue'e ya'anə' par yesə'əgüie' laogüen' yoso'ošizē'ene' yej, na' leczə ca' so'onene' šə bia yixə'.

²¹ Na' nezecho lechgualə de'e zaquə' žebchon' goquəczə lao ya'a Sinain', chedə' len de'e Moizezən' gwne': "Lechgualə chaž chžeba' can' chac."

²² Pero na'a ža chio'o banaccho txen len Diozən' ben' zo zejlicane na' len yoguə' angl zan che' ca' beṇə' ca' že' yoban. Na' yoban' gwxaquə'əleben ca syoda Jerosalennə' na' ca ya'a Sionnə'.

²³ Na' naccho txen len yoguə'əlotte beṇə' yeziquə'əchlə beṇə' ca' leczə chəsə'ədopə chəsə'əžag chso'elaogüe'e Jesocristən', na' yoguə'əcho len lega'aque' gwxaquə'əlebecho ca to beṇə' goljə nech lao to family laogüe de'en naccho beṇə' blao lao Diozən', na' yoguə'əcho nyof lachon' le'e libr che Diozən' de'en de yoban'. Naccho txen len Diozən' ben' əchoglaogüe'en che yoguə'əlol benəchon' šə zjanaque' beṇə' güen o šə zjanaque' beṇə' mal. Leczə naccho txen len beṇə' ca' bagwsa'at, beṇə' ca' gwso'onlilažə' Cristən' lao gwnite'e yežlyon'. Diozən' babene' par nich yichjla'aždao' lega'aque' enə' banaquən' cayana'an chene'ene' əsa'quən.

²⁴ Na'a ža zocho txen len Jeso'osən' chedə' le'enə' bedələl xchene'ena' par nich gwzolao chon Diozən' de'e coba de'en none' lyebe gone' par gaquəlene' chio'o. Na' xchen Jeso'osən' de'en bedələlje' catə'an gwso'ote'ene' chlo'in de que Diozən' chezi'ixene' xtoḷə' con beṇə' chso'onlilažə' Jeso'osən'. Caguə can' naquən len xchen de'e Abelən' de'en gwllajən', chedə' lennə' con blo'en de que de'e malən' ben beṇə' biše'enə' bete'ene'.

²⁵ Naquən de'e žialao xen gwzenagcho che xtižə' Diozən'. Nezecho de que bnežjue' castigw che de'e xaxta'ocho ca' cata'an gwsa'aque' godenag len xtižə' enə' de'en be' de'e Moizezən' len lega'aque'. Pero gonche' castigw che chio'o šə cui gwzenagcho che xtižə' enə' de'en bedəzejni'i Xi'ine' ben' zo yoban'.

²⁶ Lechgualə gwxo' cata' Diozən' betje' yoban' par bžine' lao ya'a Sinain' gan' be'elene' beṇə' Izrael ca' dižə'anə'. Na' gwdechla gwne': "Gwžin ža catə' yossi'inša' yežlyon' de'e yoblə, pero caguə yežlyo na'azən' sino que lenczə de'e ca' chle'icho le'e yoban'."

²⁷ Na' de'en gwne' de que yossi'inše'en de'e yoblə, zejən de que cana'achən' te che yoguə' de'e ca' ben Diozən' de'en chle'icho, ca naquə yežlyon' na' de'e ca' chle'icho le'e yoban'. Na' catə' babesyə'anit yoguə' de'e ca' chle'ichon' Diozən' ne'e zocze' chone' par nich chac de'e güen de'e cui te chei.

²⁸ De'e na'anə' cheyaḷə' güe'echo yelə' choxcwlen che Diozən' ca de'en cui te che de'e mbalaz de'en chac lo'o yichjla'aždao' chio'o chonlilažə'əchone'. Na' leczə güe'etecho yelə' choxcwlen che' ca de'en cui te che de'en žjəyecho len le' zejlicane. Cheyaḷə' gapcho Diozən' respet na' güe'ela'ochone' can' chazlaže'enə'.

²⁹ Nezecho ca naquə yi'inə' chzeyən bitə'ətezə, na' ca'aczən' chon Diozən', chone' castigw che bitə'ətezə de'e mal de'en chon chio'o beṇəch, chedə' lechgualə chgue'ine' bitə'ətezə de'e malən'.

13

De'en chazlažə' Diozən' goncho

¹ Cheyaḷə' sotezə socho gaquecho che yeziquə'əchlə beṇə' chso'onlilažə' Jesocristən', chedə' yoguə' e zjənaquə bišə'əcho na' zanchə.

² Cheyaḷə' əgüialaocho beṇə' zita' ližchon' na' gonga'acchone' goclen. Baḷə xaxta'ocho ca' catə' bosə'əgüialaogüe' beṇə' zita' na' bosə'əgüialaogüe' angl che Diozən' sin cui gwsa'ache'ine'.

³ Cheyaḷə' gaquəlencho beṇə' ljuežjcho ca' chsa'ata' ližya chedə' txennə' chžaglaolenga'acchone' šə bi de'e chac chega'aque'. Na' leczə ca' gaquəlencho beṇə' ljuežjcho ca' šə no choso'ochi' choso'osaquə' lega'aque'. Leczə gwžinlja ža chi' saquə' chio'o zocho yežlyo nga.

⁴ Na' le'e nšagna'ale yoguə'əle leso do lažə'əle len no'ol chele o be'en chele, can' chene'e Diozən', na' bito talenle notə'ətezəchlə beṇə'. Diozən' əgwnežjue' castigw che beṇə' ca' chəsə'əgo'o xtoi, na' beṇə' ca' chəsə'əbejyichj no'ol chega'aque' o be'en chega'aque' par chəsə'anitə'əlene' beṇə' yoblə.

⁵ Bito cheyałə' selažə'əcho gaccho beŋə' gwni'a. Cheyałə' socho mbalay len de'en de checho, čhedə' cuin Diozən' bagwne' chio'o: "Bito ganlaža'a le'e na' bito cuejəyichja' le'e."

⁶ De'e na'anə' bito de de'e žebcho. Quinga guac əŋa to tocho:

Χana' Diozən' zoe' chaclene' nada'.

Na' bito žeba' šə bi de'en gone beŋəçən' nada'.

⁷ Legon xbab čhe beŋə' ca' bosə'osed bosə'olo'i le'e xtižə' Diozən', beŋə' ca' cuich nita' ŋa'a. Lega'aque' gosə'əzo gosə'əbeze' binlo yežlyo nga, na' cheyałə' sole gonlilažə'əle Diozən' can' gwni'ta' lega'aque' gwso'onlilažə'ətezene'.

⁸ Can' naquə' yichjla'ažda' Jesocristən' nej nase, ca'acžən' naquən ŋa'a, na' ca'acžən' gaquən zejlicane.

⁹ Beŋə' zan choso'osed choso'olo'ine' čhe Cristən' pero na' nža' xen can' choso'osed choso'olo'i bale'. Bito güe'ele latjə yesə'əxoayague' le'e len xtižə'əga'aque'ena'. Zauquə'əçən si'icho yełə' chaclen čhe Diozən' lo'o yichjla'ažda'ochon' par niçh sotezə socho gonlilažə'əchone' cle ca cue' yichjcho čhe bi de'en čhasə'əna beŋə' cheyałə' ye'ej gaoccho. De'en che'ej chaochon' bito chaclenən' yichjla'ažda'ochon'.

¹⁰ Nezecho de que Jesocristən' bagwdixjue' xtolə'əchon' le'e yag corozən'. Pero na' beŋə' ca' ŋe'e chso't bia yixə' na' choso'ozeye'eb čhas'aquene' par yezi'ixen Diozən' čhega'aque'ena', bito chaclenən' lega'aque' ca de'en gwdixjw Jesocristən' xtolə' chio'o beŋəçh.

¹¹ Bxoz ca' chso'ote' bia yixə' ze'tgüiz güe'je čhasə'əŋabe' yezi'ixen Diozən' xtolə' yoguə' beŋə' lao ŋasyon chechon', na' čhjua' bxoz əblaon' čhenŋə' lo'o cuart gan' nac čhe Diozən', pero cuerp čhega'acquəbən' choso'ozeye'en fuerlə syoda.

¹² Na' can' goc čhe Jeso'osən', gwso'ote'ene' fuer syodan', na' yoguə' beŋə' so'onlilažə' Jeso'osən' yeyac la'ažda'oga'aque'en xi'ilažə' por ni čhe de'en blalj xchene'ena'.

¹³ De'e na'anə' cheyałə' gonlilažə'əcho Jesocristən' na' bitoch ŋaoccho de'e ca' la'əŋə'əczə šə beŋə' zan yesə'əgue'ine' chio'o de'en cuich ŋaochon.

¹⁴ Gata'əteza zocho yežlyo nga, de'e te čhein', pero chbezcho yežincho yoban' na' žjəyecho syodan' de'e cui te čhei.

¹⁵ Laogüe de'en babocobə Jesocristən' yichjla'ažda'ochon' cheyałə' güe'echo yełə' choxçwlen čhe Diozən' dote tyemp na' güe'ela'ochone' len xtižə'əcho.

¹⁶ Cheyałə' sotezə socho goncho yoguə' claste de'en naquə' güen na' cheyałə' əgwnežjwcho con ja'aque' guac əgwnežjwcho par gaquəlencho beŋə' ca' cui de čhega'aque', čhedə' can' čhene'e Diozən' goncho.

¹⁷ Le'e əgwzewjw yichjle na' le'e gwzenag čhe beŋə' ca' bagwlej Diozən' par choso'osed choso'olo'ine' le'e na' par čhasə'əgüia čhasə'əye' le'e. Lega'aque' čhas'aclene' le'e par niçh ca' gonlilažə'əchle Diozən', na' cheyałə' yoso'odie' cuent laogüe'ena' can' chonle. Legwzenag čhega'aque' par niçh yesə'əbeine' cata' yoso'odie' cuentən' na' cui yesə'ənite'e trist. Na' šə cui gwzenagle čhega'aque' bitobi de'e güen gaquə' čhele.

¹⁸ Legon orasyon par neto'. Zoa' segor de que chonto' can' chazlažə' Diozən', na' čhene'eto' gonto' porzə de'e güen.

¹⁹ Čhe'enchgüeida' gonle orasyon čhia' par niçh yob gaquə' yidəcha' gan' zolen'.

Čhəbe' gaquəlen Diozən' lega'aque'

²⁰ Laogüe de'en bnežjw cuin Χancho Jesocristən' blalj xchene'ena', chac chon Diozən' de'en none' lyebe gone' par gaquəlene' chio'o. Na' cuat əžin ža cuich gone' can' bene' lyebe gone'. Χancho Jesocristən' gwxaquə'əlebene' ca to beŋə' goye xilə' tant nži'ilažə'e chio'o. Diozən' bolis bosbane'ene' ladjo beŋə' guat ca', na' Dioz na'acžən' chone' par niçh chzo chbezcho binlo len xbab de'en yo'o lo'o yichjla'ažda'ochon'.

²¹ Laogüe' nan' chona' orasyon čhəbaba' əgwletje' xbab güen lo'o yichjla'ažda'olen' na' gaquəlene' le'e par niçh gonle yoguə'əloł can' čhene'ene' gonle. Na' čhəbaba' gone' ca gombi'achle Jesocristən' par niçh ca' gaquə' yichjla'ažda'olen' con can' chazlažə' Diozən'. Ledoye'ela'och Jesocristən' ŋa'a na' zejlicane. Na' can' gonšgacžcho.

²² Legon xbab čhe yoguə' consejw quinga de'en babeŋa' le'e, čhedə' bitotec bzoja' dižə' zan čhe to ton.

²³ Na' chyixjue'ida' le'e de que Temtion' babechoje' ližyan' na' chbeza'ane' nga. Na' šə yob yełə'e nach čhi'ane' cata' delana'a le'e.

²⁴ Por part nada' le'e gguap diox beŋə' ca' bagwlej Diozən' par choso'osed choso'olo'ine' le'e na' par choso'ogüia choso'oye' le'e. Na' leczə ca' le'e gguap diox yoguə' noquə'əchle beŋə' nita' na' beŋə' bagwlej Diozən' par zjənaque' lažə' ne'ena'. Na' beŋə' ljuəžjcho ca' za'ac Italian' choso'oguape' le'e diox.

²⁵ Diozən' gaquəlenšgüe' le'e. De'e na'azə de'e əchnia'.

Cart De'en Bzoj Santiagon'

Santiagon' chguape' diox benə' ca' zjənasəlas zan yež

¹ Nada' Santiago naca' benə' güen žin che Diozən' na' che Xancho Jesocristán'. Echguapa' le'e diox, le'e nacle xi'ın dia che family ca' šižin che de'e Izraelən', le'e chonlilažə'əle Jesocristán' na' nasəlasle zan part yežlyon'.

Naquən' nezecho can' chene'e Diozən' goncho

² Benə' bišə' dao', le'e yebeichgüei bitə'ətezə de'e chac chele la'añə'əczə šə chyi' chzaquə'əle. ³ Nezecho bitə'ətezə de'en chac checho chonan chio'o prueb šə chonchechlažə'əcho chonlilažə'əcho Jesocristán'. Na' catə' chonchechlažə'əcho chonlilažə'əcho Jesocristán' zeje dižə' chgo'o chchejlažə'əcho len de'en chac checho.

⁴ De'e na'anə' cheyałə' co'o gwchejlažə'əcho len bichlə de'en chac checho par nič sotezə socho gonlilažə'əcho Jesocristán', əgwzenagcho che' can' cheyałə' əgwzenagcho che' na' yeyož gaccho can' chene'ene'ənə'.

⁵ Notə'ətezcho catə'an cui nezecho bin' chene'e Diozən' goncho o šə naquən' chene'ene' goncho, cheyałə' ənabechone' əgwzejni'ine'en chio'o. La' chebeine' chaclene' chio'o, na' bito chdile' chio'o catə' chnabechone' gaquəlene' chio'o.

⁶ Pero na' catə' chnabechone' əgwzejni'ine' chio'o, cheyałə' gonlilažə'əcho de que chzenagcze' chechon' na' bito gaquəžejlažə'əcho. Be'ənə' chacžejlažə' šə chzenag Diozən' che' gwxaquə'əlebene' ca nisdə'onə' de'en chas chatə' catə' chechj be' laogüen' na' chjta'an ni' na'ələ.

⁷ Ben' chacžejlažə' šə chzenag Diozən' che', bito gaquə əgwnežjo Xancho Diozən' le' bitə'ətezə de'en chnabe'ənə'.

⁸ Na' ben' chon ca' bito nezene' bi xbabən' chone', con šayečə šayen chaque' len bitə'ətezə de'en chone'.

⁹ Le'e benə' bišə' le'e nacle benə' yašə' le'e so mbalaz, chedə' la' Diozən' chone' par nič nacle benə' zaquə'e.

¹⁰ Na' le'e benə' bišə' le'e nacle benə' gwni'a, le'e yebei de que lao Diozən' bito zaquə'əchle mazəchlə can' zaquə' benə' yašə' ca' chedə' bitə'ətezə de'en deicho yežlyo nga yob te chega'aquei can' chac len yej ca' de'en chla'ac do yiğə'.

¹¹ Catə' chzo bgüižən' zniachgua, chesə'əcuad yiğə' ca', nach chəsə'əyinj lojei ca' na' bitoch choso'olo'en xoche. Can' chac len yej ca' leczə can' gaquə len le'e, nit yelə' gwni'a chelen' lao chelə' chežejele.

Cheyałə' sotezə socho gonlilažə'əcho Jesocristán' bitə'ətezə de'en chac checho

¹² Šə chgo'o chchejlažə'əcho len de'en chac checho na' chonchechlažə'əcho chonlilažə'əcho Jesocristán' nachən' lechgualə mbalaz zocho. Na' catə' te de'en chyi' chzaquə'əchon' Diozən' gone' par nič əbancho len le' zejlicane can' bene' lyebe əban yoguə'əcho chaquecho che'.

¹³ Na' notə'ətezcho catə' nan goncho de'e malən' bito gaquə ənacho de que Dioz na'anə' chgo'oyele'e chio'o goncho de'e malən', la' Diozən' bito chgo'oyele'e benə' so'one' de'e malən'. Le'egatezə ca' le' bito bi bi de de'e co'oyelə' le' par gone' de'e malən'.

¹⁴ La'ažda'omalchon' chonan par nič chene'echo goncho de'e malən'.

¹⁵ Na' bachoncho de'e malən' šə chzenagcho che la'ažda'omalchona'. Na' šə con zocho choncho de'e malən' gwžin ža catə' cuejyichj Diozən' chio'o na' bito žjəyecho len le'.

¹⁶ Benə' bišə' dao', bito əxoayag cuinle gonle xbabən' de que Dioz na'anə' chgo'oyele'e le'e par gonle de'e malən'.

¹⁷ Yoguə' de'en chon Diozən' len chio'o na' yoguə' de'en chone' chio'o zjənaquən güen, bitobi de'e mal zjənsa'an, la' dezd yoba na'ate za'aquən. Xacho Dioz ben' ben de'e ca' chle'icho le'e yoban' chone' par nič gaquə güen checho, na' bito chš'e can' chone' len chio'o, syempr zocze' chone' güen.

¹⁸ Gwyazlažə' Diozən' bocobe' yichjla'ažda'ochon' catə'an gwyejle'echo che dižə' li che'ənə'. Bocobe' yichjla'ažda'ochon' par nič gonəche' chio'o yelə' bala'an mazəchlə can' gwnežjue'en yeziquə'əchlə benəchən'.

Can' goncho par yebei Diozən' chio'o

¹⁹ Benə' bišə' dao', le'e gwzenag che Diozən' do yichj do lažə'əle. Na' bito güe'elize dižə' sin cui gonle xbab, na' nic le'e əža'atele.

²⁰ Catə' chž'a'acho, bito chac goncho güen can' chene'e Diozən' goncho.

²¹ De'e na'anə' cheyalə' cuejyichjcho yoguə'əloj de'en naquə mal na' bitə'ətezə de'en na la'ažda'omalchon' goncho. Cheyalə' əgwzəxjw yichjcho na' gwzenagcho dižə' li che Diozən' de'en bayo'o lo'o yichjla'ažda'ochon', par nič ca' yebejən chio'o xni'a de'e malən'.

²² Na' cheyalə' goncho de'en na dižə' li che Diozən' goncho, caguə con chenecho can' nannə'. La' šə con chenecho can' nannə' sin cui gonchon cas, chxoayagzə cuinchon' šə ca'.

²³ Ben' chene dižə' li che Diozən' šə bito chone'en cas gwxaquə'əlebene' ca to beņə' chgüia cho'alaogüe'en lo'o spejw,

²⁴ la' con chgüie' can' naquə cho'alaogüe'en na' cata' babeyož bgüie'en le'e cheyanlažə'əte' can' naquənnə'.

²⁵ Xtižə' Diozən' de'en nyojən' chsed chlo'in chio'o can' babebej Diozən' chio'o xni'a de'e malən'. Na' de'en chsed chlo'in chio'o goncho naquən de'e güenchgua. Na' šə əgwzədchon na' sotezə socho goncho can' nannə' sin cui ganlažə'əchon nachən' socho mbalaz.

²⁶ Notə'ətezcho šə choncho xbabən' de que choncho can' chebei Diozən' pero šə con cho'echo dižə' de'en na la'ažda'omalchon', chxoayagzə cuinchon'. La' xtižə'əchon' bito naquən güen lao Diozən', na' bito chebeine' bitə'ətezə de'en choncho šə ca'.

²⁷ Šə choncho can' chebei Xacho Diozən', chaclencho no'olə gozeb ca' na' bi'i gozeb ca' šə biclə de'en chesə'əyažjene' na' chbejyichjcho cuich choncho de'e mal de'en chso'on beņə' ca' cui zjənombia' Diozən'.

2

Tozəczə can' cheyalə' goncho len yoguə' beņə'

¹ Beņə' bišə' dao', Xancho Jesocristən' naque' le'ezelaogüe beņə' zaque'e, na' šə de'e liczə chonlilažə'əcho Xancho Jesocristən', bito nacho balə beņə' gonchguaga'acchone' xen, na' yebalə' gonga'aquechone' naccze.

² Šə la'ac chopə beņə' gan' chdopə chžagcho cho'ela'ocho Jesocristən', na' toe' naque' beņə' gwni'a na' nyaze' lachə' šao' lachə' xoche, na' nde xbene'ens' to niy de or, na' ben' yeto naque' beņə' yašə' na' nyaze' lachə' golə lachə' bedo beda', tozə can' cheyalə' goncho len choptega'aque'.

³ Bito naquən güen šə goncho beņə' gwni'anə' xen na' ye'echone': "Gwche'edo' lao yag siy nga." Na' nique naquən güen šə ye'echo beņə' yašə'anə': "Gwzechatezə do de'e na'alə", o šə ye'echone': "Gwche'edo' lao yon'."

⁴ Bito naquən güen lao Diozən' šə gon cuincho ca juez par ənacho noen' zaque'e na' noen' cui zaque'e. Xbab' chechon' naquən de'e mal šə goncho ca'.

⁵ Beņə' bišə' dao', Diozən' bagwleje' zan beņə' yašə' par zjənaque' xi'ine' na' par chso'onlilažə'əchgüe' le'. Na' cata' yesyə'əžine' gan' zo'enə' gone' par nič yesə'anabi'e txen len le' la' can' bene' lyebe gon notə'ətezə chio'o chaquecho che'.

⁶ Pero na' le'e chonle beņə' yašə' ca' ca beņə' cui bi bi zjəzaque'e. Na' beņə' gwni'a ca' chonga'aclene' ca beņə' zjəzaquə'əchgua, len la' lega'aque'enə' chesə'əchi'i chesə'əsaque'e le'e, na' chasə'əche'e le'e do lao jostis ca'.

⁷ Na' le'egatezəczə' lega'aque'enə' choso'ožia choso'onite'e Jesocristən' ben' chonlilažə'əchon' lgua'a so'ene' yelə' bala'an.

⁸ Lein' de'en naquə de'e žialao lao yoguə' de'e ca' yelə' de'en nyojən le'e Xtižə' Diozən' nan: "Legaque che sa'aljuežj beņəchle catg chaquele che cuinle." Šə de'e liczə chonle can' nannə' choncze güenə'.

⁹ Pero de'e malən' chonle šə balə beņə' chonga'aquele' xen na' yebalə' chonga'aclene' ca beņə' cui bi zaque'e. Lei che Diozən' chchoglaon chele de que naple dolə' de'en chonle ca'.

¹⁰ Can' naquən, notə'ətezə beņə' zoe' chone' cuaseləj can' na lein', pero na' la'anə' tozə pontən' chchoe', doxen lei na'anə' chape' dolə'.

¹¹ Diozən' ben' gwna: "Bito co'o xtole, na' cui cuejyichj be'en chele o no'ol chele par solenle beņə' yoblə", lecze'en gwne": "Cui gotle beņə'", na' bene' mendad bichlə de'e cui goncho. Šə bitonə' goncho to de'e mal de'e na lein' cui goncho pero babencho yeto de'e nan cui goncho, bia'aczə napcho dolə' len lein'.

¹² Cheyalə' güe'echo dižə' con can' chene'e le'enə' na' goncho con can' chazlažə'ena' chedə' la' le' əne' che to tocho šə choncho can' na Xtižə'ena' de'en nyojən o šə bito choncho can nannə'. Xtižə' Dioz na'anə' chzejni'in chio'o can' babebeje' chio'o xni'a de'e malən' par goncho can' chene'ene'ena'.

¹³ Diozən' əgwnežjue' castigw che beņə' ca' cui chesyə'əyašə' chesyə'əži'ilažə' ljeužj beņəchga'aque'. Pero beņə' ca' chesyə'əyašə' chesyə'əži'ilažə' ljeužj beņəchga'aque', Diozən' yeyašə' yeži'ilažə'e' lega'aque'.

Bitobi zejen šə con chonlilažə'əcho Jesocristən' de'e dižə'əzə

¹⁴ Beṇə' bišə' dao', šə to beṇə' bito chaquene' che ljuežje' na' bito chone' yeziquə'əchlə de'e naquə de'e güen, bitobi zaquə' de'en ne': "Chonlilaža'a Jesocristən'." Yeyeje' lao yi' gabilən' šə de'e dižə'əzən' ne' ca'.

¹⁵ Balə beṇə' ljuežjcho beṇə' chso'onlilaža' Jesocristən' cui de de'en əse'ej əsa'ogüe' na' cui de xala'anga'aque'.

¹⁶ Na' šə bito gaquə'lenga'acchone' len de'en chesə'əyazjene'ena', šə con ye'ega'acchone': "Ležjəya'ac to šao' to güen na' Diozən' gaquə'lene' par niçh əže'ele de'en chyažjelen'", bitobi zejen de'en nacho chonlilaža'əcho Jesocristən' šə goncho ca'.

¹⁷ De'e na'anə', šə con nacho de que chonlilaža'əcho Jesocristən', pero bito chaquecho che ljuežjcho na' bito choncho yeziquə'əchlə de'en naquə de'e güen, bitoczə bi zejen de'en nacho de que chonlilaža'əchone'.

¹⁸ Nitə' beṇə' chesə'ane' de que guaquə so'onlilaže'e Jesocristən' sin cui so'one' de'en naquə de'e güen. Na' leczə nitə' beṇə' chesə'ane' con chso'one' de'e güennə' pero na' bito chso'onlilaže'e Jesocristən'. Na' nada' əchnia' le'e šə nacho de que chonlilaža'əcho Jesocristən' pero bito choncho de'e güen, bito debia' šə chonlilaža'əchone'ena'. Pero šə de'e li chonlilaža'əchone' choncho de'e güennə' na' nachbia' de que chonlilaža'əchone'ena'.

¹⁹ Chejle'echo de que tozə Diozən' zaque'e par güe'ela'ochone', na' ca'aczən' cheyałə' šejle'echo. Pero caguə de'e ca'azən' cheyałə' goncho. De'e xio' ca' chse'ejle'en de que tozə Diozən' naque' beṇə' zaque'e na' chesə'əxizən tant chesə'əžebən.

²⁰ Choncho de'e cui zeje šə con nacho chonlilaža'əcho Jesocristən' na' bito choncho de'e güennə'. Bito gatə yelə' mban zejlicəne checho šə con nacho chonlilaža'əchone'.

²¹ De'e xaxta'ocho Abraannə' blo'e de que benlilaže'e Diozən' de'en bzenague' con bi gožzə Diozən' le'. De'e na'anə' bxoə xi'ine' Isaaquən' lao me de yejən' par gote'ebə' güe'ela'ogüe'e Diozən', pero na' Diozən' bito be'e latjə gote'ebə'. Na' de'en bzenague' che Diozən', de'e na'anə' Diozən' gwne' che' de que naque' beṇə' güen laogüe'ena'.

²² Naquən clar de que de'e Abraannə' caguə con benlilaže'əze' Dioz na'anə', sino leczə bzenague' che'. Na' de'en bene' ca' blo'e de que benlilaže'e Diozən'.

²³ De'e na'anə' nyoj Xtizə' Diozən' che' nan: "De'e Abraannə' benlilaže'e Diozən' na' de'e nan' Diozən' gwne' che' de que naque' beṇə' güen laogüe'ena'." Na' leczə nyojan de que Abraannə' naque' beṇə' migw che'.

²⁴ Clar naquən de que caguə ni che de'en nacho chonlilaža'əcho Dioz na'anə' ne' naccho beṇə' güen laogüe'ena', sino que de'en chzenagcho che' na'anə' ne' checho de que naccho beṇə' güen laogüe'ena'.

²⁵ De'e Raabən' ben' goquə no'olə sargatən', bzenague' che Diozən' catə'an bgüialaogüe' beṇə' chop ca' bselə' nasyon Izraelən' par jəsə'əgüia jəsə'əye' laže'ena'. Na' blo'ine' lega'aque' yetolə nez par jəya'aque' par niçh bito jəsə'əxen soldad che rein' lega'aque'. Na' de'en goquə'lene' beṇə' ca' blo'e de que benlilaže'e Diozən'. Na' gwna Diozən' che' de que naque' beṇə' güen laogüe'ena'.

²⁶ Šə to beṇə' bitoch nye'e biš xne nezecho naque' beṇə' guat. Ca'aczən' gwxaquə'əlebe chio'o, šə bito choncho de'e güen, nezecho bito de yelə' mban zejlicəne chechon' la'anə'əczə šə nacho de que chonlilaža'əcho Jesocristən'.

3

Choncho de'e xinj len xtižə'əchon'

¹ Beṇə' bišə' dao', nezecho de que neto' chsed chlo'ito' beṇə' yoblə xtižə' Diozən' si'ichto' castigw šə bito gonto' can' nanə'. De'e na'anə' əchnia' le'e, bito seləžə'tecle əgwswed əgwlo'ile beṇə' yoblə xtižə' Diozən'.

² Zan las yoguə'əcho choncho de'e xinj. Pero šə to beṇə' bito chone' de'e xinj len xtiže'ena' naquə'chgüe' beṇə' güen na' gwzoiczene' nabia' doxen cuerp che'ena' šə ca'.

³ Chgo'ocho frennə' cho'a cabey ca' par niçh yosə'əzenaguəb checho na' žja'aquəb con gatə'ətezə chene'echo šejlenga'acchob.

⁴ Na' leczə beṇə' ca' choso'osa' barcw xen ca' choso'oghine' yag da'ozə de'en chsa' lega'aquən liča par niçh chja'aquən gatə'ətezə chse'enene' la'anə'əczə šə chžiguə' be' gualən' lega'aquən.

⁵ Ca'aczən' naquən len ložə'əchon'. Tozə de'e dao' rizə'an naquən par len cuerp chechon' pero chac chnelenchon dižə' par gon cuincho xen. Na' ca naquə to yi' bzi' dao' guaquə əgwzeyən to ya'adao' xen, ca'aczən' naquən len ložə'əchon' catə' chnelenchon dižə' mal.

⁶ Gwxaquə'əleben ca to yi'. Šə bito chzenagcho che Diozən' cho'echo yoguə' cłaste dižə' mal, chedə' ložə'əchon' chonchən de'e mal cle ca bitə'ətezə'chlə part che cuerp chechon'. Na' šə cho'echo dižə' malən' chyałə'əch yoguə'əlołte de'e mal de'en chonchon', na' bitoczə bi güen socho yedote lao əbancho. La' che gwxiye' nan' chzenagcho catə'an cho'echo dižə' mal ca'.

⁷ Chsa'ac max yoguə' claste bia yixə', bia žia tap ni'a ne'i, bia žia xile'e, bia chda nxobə le'i, na' bia ca' ža' lo'o nis. Bagwnita' beṇə' gwso'onmaxga'aque'eb.

⁸ Pero ni to chio'o bito soicho ložə'a'chon' par ničh bito güe'elenchon dižə' mal. Do tyempte cho'echo dižə' na' dižə' de'en chchoj lo'o la'ažda'omalchon' naquən de'e mal juisy. Gwxaquə'əleben ca benen che to beļ əznia.

⁹ Len xtižə'a'chon' cho'ela'ocho Xacho Diozən' ben' lecžə naquə Xancho. Na' lecžə len xtižə'a'chon' chžia chnita'əcho ljuējž beṇəchcho, beṇə' ca' ben Diozən' can' naquə cuine'.

¹⁰ Na' cho'acho na'anə' chchoj dižə' šao' catə'ən cho'ela'ocho Diozən' na' lecžə na'anə' chchoj dižə' mal catə'ən chžia chnita'əcho ljuējž beṇəchcho. Beṇə' bišə' bito choncho can' cheyaļə' goncho.

¹¹ Nezecho de que bito žia nis šao' na' nis əzbapj tozə bej.

¹² Na' lecžə ca' beṇə' bišə', nezecho de que to yag yixguion' bito chbian güi na' nic zapjən' chbian' yixgüio. Na' lecžə ca' bito šejcho bej gan' žia nis əzbapjən' par žjəxi'icho nis šao'. Ca'aczən' naquən len chio'o ža, bito cheyaļə' güe'echo dižə' mal txen len dižə' güen, sino cheyaļə' güe'echo por dižə' güen.

Can' goncho šə Diozən' babene' chio'o yelə' sin' che'enə'

¹³ Notə'ətezcho šə chaquecho naccho beṇə' sin' na' chejni'icho xtižə' Diozən' par əgwsed əgwlo'ichon beṇə' yoblə cheyaļə' goncho yoguə'əloļ can' chene'e Diozən' goncho par ničh gacbia' naccho beṇə' sin', na' bito gon cuincho xen de'en naccho beṇə' sin'.

¹⁴ Pero na' šə chgue'i ljuējžcho na' chene'echo gaccho beṇə' blaoch cle ca lega'aque' bito cheyaļə' əṇacho de que naccho beṇə' sin' par əgwsedecho beṇə' yoblə. Nacia' bito naccho beṇə' sin' šə choncho ca'.

¹⁵ Na' šə chgue'i ljuējžcho na' chene'echo gaccho beṇə' blaoch ca lega'aque' bito naccho beṇə' sin' par əgwsedecho beṇə' yoblə, con choncho can' na' la'ažda'omalchon' na' can' chso'on beṇə' ca' cui zjənombia' Diozən', la' xbab chechon' za'an che de'e gwxiye'enə'.

¹⁶ Šə chgue'i ljuējžcho na' chene'echo gaccho beṇə' blaoch ca lega'aque', bito zocho binļo len lega'aque' šə ca', na' choncho porzə de'e mal.

¹⁷ Catə' Diozən' chone' chio'o yelə' sin' che'enə', choncho porzə de'e güen, na' bito chxecho gwdiļə entr ljuējžcho. Na' catə' chone' chio'o yelə' sin' che'enə' naccho gaxjwlažə' na' chzexjw yichjcho par ničh chzenagcho che ljuējžcho. Na' lecžə cheyašə' cheži'ilažə' ljuējžcho na' tozə can' chaclencho yogue'e na' cho'echo por dižə' li.

¹⁸ Pero catə'əch zo chbezcho binļo na' chaclencho beṇə' yeziquə'əchlə par yesə'əzo yesə'əbezaga'aque' binļo, nachən' beṇə' ca' chsed chlo'icho so'onļje' de'e güenə'.

4

Bito gaquə goncho txen len beṇə' ca' cui zjənombia' Diozən'

¹ De'en chdiļə chšašle entr ljuējžle chonle ca' chedə' yo'o yaz de'e malən' lo'o yichjla'ažda'olen' na' chnabi'an le'e par chonle con can' nan chele.

² Yo'o yaz de'e malən' lo'o yichjla'ažda'olen'. De'e na'anə' chene'ele de'en de che beṇə' ljuējžle na' catə' cui chac ca'alēn, xte chotga'aclene' par ničh gaquən lao na'ale. Na' lecžə catə' chzelažə'ale gatə' de'e cui de chele chdiļəlenļe beṇə' na' chšašlenga'aclene'. Bito de de'en chyažjele chedə' bito chṇabele Diozən' par gone' ca gatə'ən.

³ Na' tgüejə catə' chṇabecho Diozən' gone' par gatə' bi de'en gatə' checho bito chone'en chedə' con chene'echo gatə' šə bin' na' la'ažda'omalchonə', na' choncho con nactezə nan.

⁴ Šə cho'echo latjə chnabia' la'ažda'omalchon' chio'o par choncho con can' chene'ennə', choncho can' chso'on beṇə' ca' cui zjənombia' Diozən' na' choncho contr Diozən'. De'e na'anə' notə'ətezcho šə chene'echo goncho txen len beṇə' mal ca', naccho beṇə' contr che Diozən' na' de'en cuich chaquecho che Diozən' gwxaquə'əlebecho ca to no'olə go'o xtoi, no'olan' cuich chaque che be'en che'enə'.

⁵ Chonļjale xbab de que Xtižə' Diozən' bitobi zaquə'ən gan' nyojən nan: "Diozən' beṇə' Spirit che'enə' zon lo'o la'ažda'ochon'. Na' Spiritən' lechgualə nzi'ilažə'ən chio'o, na' chze-lažə'əchgvan gaquecho che tozə Diozən'."

⁶ Diozən' chaclenchgüe' chio'o par ničh cuich chzenagcho che la'ažda'omalchon'. De'e na'anə' nyojən le'e Xtižə' Diozən' nan: "Diozən' chone' contr beṇə' ca' chso'on cuinga'aque' xen, pero chaclene' beṇə' ca' chso'on xbab de que bitotec bi zjəzaque'e."

⁷ De'e na'anə' cheyaļə' gon cuincho lažə' na' Diozən' na' co'o gwchejlažə'əcho cui šejle'echo che gwxiye'enə'. Šə goncho ca' yebižə'ən šlož.

⁸ Cheyaļə' goncho xbab can' chaque Diozən' checho na' güe'elenchone' dižə' can' cho'elencho beṇə' migw checho ca' dižə'. Šə goncho ca', Diozən' gaque' beṇə' migw checho. Na' šə choncho de'e malən' cheyaļə' cuejyichjchon. Na' šə choncho xbabən' de que gaaquə

güe'ela'ochō Diozən' na' gonzecho can' chene'e la'ažda'omalchon', clelən' choncho xbabən' šə ca' na' cheyalə' güe'echo latjə yocoba Diozən' yichjla'ažda'ochon'.

⁹ Catə' babencho de'e malən' cheyalə' yegüine'echo na' cuežyašə'echo na' gaquəchgüeicho lo'o la'ažda'ochon' por ni che de'e mal de'en babenchon'. Bitō cheyalə' goncho legr na' nic cheyalə' yebeicho, chedə' la' babencho de'e malən'. Cheyalə' yegüine'echo por ni che de'e malən' babenchon' na' yedinjechon.

¹⁰ Cheyalə' əgwzəxjw yichjcho lao Xancho Diozən' gacbe'icho de que bitō naccho beṇə' zaquə'əchgüei par niçh gone' chio'o yalə' bala'an.

Bitō cheyalə' ənacho che ljuējzcho de que nape' dolə'

¹¹ Beṇə' bišə' dao', bitō cheyalə' ənecho che ljuējzcho. Ben' chne' che ljuējze' na' chnelaote', lei na'anə' chzoe' ca'alə, la' lennə' nan gaque che ljuējzcho. Na' nezecho de que ben' chon ca' bitō chzenague' che lein'. Na' de'en chon cuine' ca beṇə' zaque'e par əne' che ljuējze' de que nape' dolə', chone' lei che Diozən' ca to de'e cui bi zaque'e.

¹² Tozə Dioz nan' bnežjue' lein' na' tozə le'enə' zaque'e par əne' che to tocho šə napcho dolə'. Na' lecze'enə' chac gone' par niçh cui žjəya'ac beṇə' lao yi' gabilən' na' chacte seļe'e beṇə' lao yi' gabilən'. Pero chio'o bitō zaquə'əcho ənacho che ljuējzcho de que zjənape' dolə'.

Bitō nezecho bin' gaquə gwxe güižj

¹³ Na' leczə tgüejə chchogbi'achon šejcho to ga šejcho par goncho negosy niçh goncho gan. Na' chbejcho to žan' par šejcho na' chchogbi'achon de que yega'anchoṇə' tgüiz.

¹⁴ Bitō güen əchogbi'achon ca' la' bitō nezecho bin' gaquə checho o nac goncho gwxe güižj. Yelə' mban chechon' gwxaquə'əleben ca to bejw, la' bejon' šlozə chle'ichon' na' cheyasən.

¹⁵ Cheyalə' ənacho: "Šə Xancho Diozən' güe'e latjə əbancho na' goncho to de'e goncho."

¹⁶ Pero na' de'e malən' choncho šə chon cuincho xen par chžiacho bia' naquən' goncho sin cui ənabecho Diozən'.

¹⁷ Na' šə nezecho de'en naquə güen goncho na' bitō chonchon, napcho dolə' lao Diozən' de'en cui chonchon.

5

Lechgualē de'e mal gaquə che beṇə' gwni'a ca' beṇə' cui chso'onlilažə' Jesocrisən'

¹ Na' le'e beṇə' gwni'a le'e cui chonlilažə'əle Jesocrisən', le'e so trist, na' le'e cuežyašə, la' lechgualē de'e mal gaquə chele.

² Bachbiayi' de'en deilen', na' leczə bachsa'o bel zilə lachə' šao' chelen'.

³ Mech chele de'en naquə de or na' de plat bachesə'əzen xche'i na' de'en zjənzen xche'inə' nacia' de que bitō bchinlen par gaquəlenle beṇə'. De'e na'anə' əžin ža əžaglaoguale lao yi' gabilən'. Bagwche' yichjle tlaozə bəbtole de'e scha'o xmechlen', la'anə'əczə bazon gon Diozən' le'e castigw.

⁴ Le'e gon xbab can' beṇle len beṇə' güen žin chelen' beṇə' yašə' ca' besyə'əlap cwseš chelen'. Bxoayagle lega'aque' de'en bitō gwduxjwga'aclene' can' cheyalə'. Na' de'en cui bnežjwle laxjwga'aque'en can' cheyalə', chlo'en de que nacle beṇə' güen de'e mal. Diozən' chzenague' che beṇə' güen žin ca' de'en chesyə'əgüine'ene', Dioz ben' napə le'ezelaogüe yelə' guac xen.

⁵ Zotezle che'ej chaoša'ole na' chonditjeile de'en deile chonle con can' nan chele. Na' laogüe de'en chonle con can' nan chelen' na' bitō chacbe'ile bazon gon Diozən' castigw chelen', gwxaquə'əlebele ca to bia yixə' bian' chgüe'ej chguaōša'ochō par niçh chaṇə'əb antslə ze'e gotchob.

⁶ Babenle par niçh beṇə' yoblə gwso'ote' beṇə' ca' gwso'on de'e güen, na' bitobi goquə so'one' par niçh cui bi gonga'aquelenē'.

Cuežcho batə'aquən' yidə Xancho Jesocrisən' de'e yoblə, na' goncho orasyon

⁷ Ca naquə le'e beṇə' bišə' dao', le'e co'o le'e gwchejlažə' len de'en chyi' chzaquə'əle chedə' bazon yidə Xancho Jesocrisən' de'e yoblə. Beṇə' ca' chsa'az chnité'e chesə'əbeze' cwsešən', chedə' cwsešən' naquən de'e zaque'e. Na' chesə'əbeze' chedote lao chac yejon' na' catə' chbezə yejon' cana'ach chesyə'ətobe' cwsešən'.

⁸ De'e na'anə' bitə'ətezə de'e chyi' chzaquə'əle cheyalə' gonchechlažə'əle gonlilažə'əle Xancho Jesocrisən' chedə' nezecho bazon yide' de'e yoblə.

⁹ Beṇə' bišə' dao', bitō yosbague'ele ljuējzle šə bin' chac chele. Šə bin' yosbague'ele ljuējzle Xancho' choglaogüe'en chele de que naple dolə'. Na' bazon baozə yide' de'e yoblə.

¹⁰ Le'e gon xbab che de'e profet ca' beṇə' ca' gwsoe' xtižə Xancho Diozən' cana'. Lechgualē besə'əžaglaogüe' pero bia'aczə gwnité'e chech gwso'onlilažə'e Diozən'.

¹¹ Mbalaz nitə' beṇə' ca' gwnitə'ətezə gwnitə' gwso'onlilažə' Diozən' la'anə'əczə besə'əžaglaogüe'. Babenele xtižə' de'e Jobən' can' benchechlažə'e benlilažə'e Diozən'

la'anə'əczə de'e zan de'en gwdi' gwxaque'e. Pero na' catə' gwde de'en gwdi' gwxaque'enə', Diozən' bene' par niç gwzochē' mbalaz clezə can' gwzoe' antslə. Can' ben Diozən' blo'e de que lechgualē chene'ene' gaquəlene' chio'o na' lechgualē cheyašə' cheži'ilaže'e chio'o.

¹² Benə' bišə' dao', bito əgwsocho jorament por yoba, nic por yežlyo nga, na' nic por bitə'ətezəchlə. Cheyalə' güe'echo por dižə' li de'e se'ejle' benə' sin cui əgwzochō testigw de que leiczehon', par niç Jesocrisən' cui choglaogüe'en checho de que cheyalə' si'icho castigw.

¹³ Notə'ətezcho catə' chy' chzaquə'əcho, cheyalə' goncho orasyon. Na' notə'ətezcho catə' zocho mbalaz, cheyalə' golcho güe'ela'ocho Jesocrisən'.

¹⁴ Notə'ətezcho catə' chacšenecho cheyalə' gaxcho benə' gol ca' gwlejcho par niç zjənaque' benə' blao che chio'o chdopə chzagcho cho'ela'ocho Jesocrisən'. Na' yesə'əyebē' chio'o setən', na' so'one' orasyon lao Diozən' yesə'əñabe' yeyaquecho chedə' lega'aque' na' chio'o chonlilažə'əcho Xancho Jesocrisən'.

¹⁵ Na' chio'o choncho orasyonnə' cheyalə' šejle'echo de que chzenagczə Xancho Diozən' checho par niç ca' yeyaque šə no chio'o chacšene, la' Xancho nan' yeyone' chio'o. Na' šə babencho de'e mal, gozi'ixenczə Xancho' checho.

¹⁶ De'e na'anə' cheyalə' güe'echo dižə' len benə' ljuežjcho che bitə'ətezə de'e mal babencho contr lega'aque' na' goncho orasyon tocho yetocho par niç ca' yezochō güen šə bin' chac checho. Na' šə naccho benə' güen lao Diozən', Diozən' chzenagczə' checho catə' choncho orasyonnə' do yichj do lažə'əcho na' chone' de'e zan de'e güen de'en chñabechone' gone'.

¹⁷ Le'e gon xbab che Liazən'. Goque' benəç cayanə'an naquə chio'o. Na' catə' bene' orasyon do yichj do laže'e gwñabene' Diozən' cui gaquə yejw, Diozən' bzenague' che' na' bito bsele'e yejon' lao šon iz yo'o gašja.

¹⁸ Na' catə' bene' orasyonnə' gwñabene' Diozən' əsele'e yejon' de'e yobla, nach Diozən' bsele'en. Na' goc cwseš che benə' ca' de'e yobla.

¹⁹ Benə' bišə' dao', catə' to benə' ljuežjcho bagwlejjyichje' de'en naquə de'e li de'en bzejni'i Diozən' chio'o, cheyalə' gaquəlenchone' par niç yediñjene' xtole'enə' na' yeyaque' tozə len chio'o.

²⁰ Che'enda' ənezele de que catə' choncho par niç notə'ətezə benə' chedinjene' xtole'enə', chaclenchone' par niç chezi'ixen Diozən' xtole'enə' la'anə'əczə šə naquən de'e zan, na' cui yeyej be'enə' lao yi' gabilən'.

De'e na'azən' chzoja' n'a. *Santiago*

Cart Nech De'en Bzoj San Bedan'

Bedan' chzoje' cart par bena' ca' chso'onlilaža' Cristan' bena' ca' zjanasalas

¹ Nada' Bed naca' apostol che Jesocristan'. Na' chzoja' cart nga par le'e nasə'elasle distrit che Ponto, Galasia, Apodasia, Asia na' Bitinia. Chio'o chonlilaža'acho Jesocristan' naccho ca bena' zita' len yeziqwa'achla bena' za' lao yežlyon'.

² Xacho Diozan' gwleje' chio'o pa nich naccho xi'ine' can' bsi'e xneze dezd gwalte. Spirit che Diozan' chonan par nich naqwa la'ažda'ochon' xi'ilaža' par nich chzenagcho che Jesocristan' na' par nich chnitlao xtolə'achon' cheda' le' blalj xchene'ena'. Chnaba' soteza so Diozan' gaqwalenche' le'e na' gone' par nich so cuezəchle binlo len xbab de'en yo'o lo'o yichjla'ažda'olen'.

Zocho lez žjəyecho len Diozan'

³ Ledoye'ela'och Diozan'. Le' naque' Xa Xancho Jesocristan' na' leczə cho'elao' Xancho Jesocristan' le'. Lechgwale cheyaša' cheži'ilaža' Diozan' chio'o ca de'en bocobe' yichjla'ažda'ochon' na' bene' par nich zocho lez žjəyecho len le'. Na' nezecho gaqwa can' zocho lez cheda' Jesocristan' bebane' ladjo bena' guat ca'.

⁴ Diozan' gone' de'e šao' de'e güen par chio'o de'e cui te chei, na' bena' güen de'e mal ca' bito gaqwa yesə'əzone' gaqwa güen par chio'o. Diozan' babsi'e xneze gone' de'e ca' par chio'o cata'an yežincho yoban'.

⁵ Na' na'a Diozan' len yela' guac xen che'ena' chcuasə' chcue'eje' chio'o len de'e malan' cheda' chonlilaža'achone'. Na' chbezcho batə'əquən' yida' Cristan' de'e yoblə nich gone' de'e güen ca' par chio'o.

⁶ De'e na'anə' zocho mbalazchgua la'anə'əczə de de'e zan de'en chy' chzaqwa'əcho šlož güejə lao zocho yežlyo nga.

⁷ Benəchan' choso'ozeye' oran' par nich chesə'əneze' šə naqwan doalje na' par nich chesya'əbeje' bitə'əteza de'en nchixan. Na' oran' gwžin za te chei. Na' ca'aczan' chon Diozan' len chio'o, cho'e latjə chy' chzaqwa'əcho par nich nacbia' šə de'e li chonlilaža'achone'. Na' šə de'e li chonlilaža'achone' zaqwa'əchan cle ca can' zaqwa' oran'. Na' šə ca' cata' yida' Jesocristan' de'e yoblə, Diozan' ane' checho de que bencho de'e güen, na' gone' par nich gagcho bena' blao na' gone' chio'o yela' bala'an xen.

⁸ Na' le'e chaquele che Jesocristan' la'anə'əczə bitonə' le'ilene'. Na' la'anə'əczə bito chle'ichone' na'a chonlilaža'achone'. Na' de'e na'anə' zocho mbalaz na' clegazə chebeicho.

⁹ Na' de'en chonlilaža'acho Jesocristan', gone' par nich žjəyecho len Diozan'.

¹⁰⁻¹¹ Na' ca naqwa bena' ca' bosə'ozoj Xtižə' Diozan' cana', Spirit che Diozan' de'en leczə naqwan Spirit che Cristan' gwzon lo'o yichjla'ažda'oga'aque'ena', bzejni'in lega'aque' can' saqwa'əzi' ben' əsele' Diozan' par yosle' bena' lao de'e malan' na' can' yezi'e yela' bala'an xen che'ena' cata'an te de'en saqwa'əzi'ena'. Gosa'əneze' na' bosə'ozoje' can' chaclen Diozan' chio'o na'a. Na' bosə'osediyane'e na' besya'əyiljyože' non' əsele' Diozan' par gone' ca žjəyecho len le' na' batan' əsele'ene'.

¹² Spiritan' bzejni'in lega'aque' de que de'en bosə'ozoje'ena' bito gaqwan complir tyemp chega'aque'ena' sino tyemp che chio'onə'. Na' ca naqwa neto' babzeneto' le'e dižə güen dižə' cobə de'en chzejni'in che Cristan', gwdixjue'ito' le'e de que bach goc complir can' bosə'ozoj bena' ca' cana'. Spirit che Diozan' de'en bsele'e goclenan neto' gwdixjue'ito'on le'e. Na' angl ca' lechgwale chse'enene' se'ejni'ine' de'e ca' bagwdixjue'ito' le'e.

Cheyalə' gaqwa la'ažda'ochon' xi'ilaža' len yogua' de'en choncho

¹³ De'e na'anə' cheyalə' socho len tozə xbab na' nabia' cuincho par goncho can' chazlažə' Diozan'. Cheyalə' socho yebeicho ca de'e güen de'en gon Diozan' par chio'o cata'an yida' Jesocristan' de'e yoblə.

¹⁴ Laogüe de'en naccho xi'ine' cheyalə' soteza socho əgwzenagcho che'. Bitoch cheyalə' əgwzenagcho che de'e malan' de'en chene'e la'ažda'omalchon' goncho can' bencho cata'an cuina' šo'o be'eni' che Diozan' lo'o yichjla'ažda'ochon'.

¹⁵ Diozan' gwleje' chio'o par naccho xi'ine'. Le' naque' bena' la'ažda' xi'ilaža'. De'e na'anə' chio'o leczə cheyalə' gaqwa la'ažda'ochon' xi'ilaža' len yogua' de'en choncho.

¹⁶ Xtižə' Diozan' nyojan nan: "Cheyalə' gaqwa la'ažda'olen' xi'ilaža' cheda' nada' Dioz naqwa la'ažda'ogua'anə' xi'ilaža'."

¹⁷ Chio'o choncho orasyon lao Diozan' che'echone' "Xato' Dioz". Na' Dioz nan' chchoglaogüe'en che chio'o benəch šə nocho napcho dolə' segon naqwan' chon tocho. Na' tozəczə can' chon Diozan' len yogua' benəchan'. De'e na'anə' cheyalə' gapphone' respet na' soteza socho gapcho cuidad par nich cui goncho de'e mal lao socho yežlyo nga.

18-19 Nezecho de que costumbr ca' de'en bosso'ozejni'i de'e xaxta'ocho ca' chio'o bitobi zjəzaquə'a'n. Na' Cristən' gwdixjue' xtolə'a'chon' cata' blalj'xchene'ena' par nič cuich naocho costumbr ca'. Bitō gwdixjue'en len mech de or o de plat o len bichlə de'en zjəde lao yežlyon' de'en yesə'ade chei. Na' xchene'ena' de'en blalje' zaquə'a'chguan lao Diozən'. Cristən' gwxaquə'əlebene' ca xilə' dao' bian' cui bi bi yižgüe' da' na' cui bi bi naquei, ca bia ca' gwso'ot beŋə' Izrael gwlaž checho ca' par bezi'ixen Diozən' xtolə'aga'aque'ena'.

²⁰ Na' ze'e xē yežlyon' cata' Diozən' gwleje' Cristən' par čixijue' xtolə'a'chon'. Na' Diozən' bsele'ene' laochon' tyemp nga zocho na'a par chaclene' chio'o.

²¹ Na' de'en bosban Diozən' Cristən' ladjo beŋə' guat ca' na' bnežjue'ene' yełə' bala'aŋ xen, de'e na'ana' chonlilažə'a'cho Diozən' na' chebeicho nezecho gon Diozən' güen len chio'o.

²² Na' de'en bachzenagcho che dižə' li che'ena', Diozən' bene' ca' naquə' la'ažda'ochona' xi'ilažə', par nič chaquecho che yeziquə'a'chlə beŋə' chso'onlilažə' Cristən'. De'e na'ana' cheyałə' gaquə'a'chgüeicho čhega'aque' do yičj do lažə'a'cho, caguə de'e dižə'əza.

²³ Diozən' babene' par nič goljcho de'e yoblə čedə' gwyejle'cho che xtižə' Diozən'. De'e na'ana' bade yełə' mban zejlicane' checho. Bitō den por ni čhe de'en goljcho por xaxna'a'cho beŋə' ca' čsa'at, sino por Diozən' ben' zo zejlicane'.

²⁴ Xtižə' Diozən' nyojən, nan:

Chio'o beŋə'ch gwxaquə'əlebecho ca yičə' de'en chla'ac do yoba, čhedə' šložgan' zocho.

Na' yoguə' de'en de yežlyo nga de'en chebeicho gwxaquə'əleben ca lojei ca', čhedə' te čhega'aguən'.

Can' chac len yičə' ca', česə'əbižən nach česə'əyiŋj lojei ca', ca'atezəczən' chac len chio'o na' len de'e ca' zjəde yežlyo nga.

²⁵ Pero na' caguə de'e te che Xtižə' Xancho Diozən'.

Dižə' güen dižə' cobən' de'en gwdixjue'ito' le'e naquən xtižə' Xancho Diozən' de'en cui te čhe.

2

¹ Na' laogüe de'en banaccho xi'iq' Dioz, cheyałə' cuejyichjcho yoguə' claste de'e mal de'en choncho. Bitō əxoayagcho beŋə', bitō goncho ca əsa'aque beŋə' naquə'chcho beŋə' güenč can' naccho, bitō gaquə'xi'icho beŋə' na' nic ənecho dižə' mal che beŋə'.

² Na' ca bi'i che'eŋ dao' ca' čəsə'ədombo' xižə'əga'acbo' ca'aczən' cheyałə' selažə'a'cho šejni'ichecho Xtižə' Diozən' de'en nyojən par nič gaquə'lenən chio'o gaccho can' čene'e Diozən' gaquə' chio'o chonlilažə'a'chone'. Na' Xtižə' Diozən' bitō čxəoyaguən notə'əteza beŋə'.

³ Cheyałə' selažə'a'cho šejni'ichecho Xtižə' Diozən' čhedə' bachacbe'icho de que Xancho Jesocrisən' chonchgüe' güen len chio'o.

Cristən' gwxaquə'əlebene' ca to yej squin čhe to yo'o

⁴ Chio'o chonlilažə'a'chone' čhedə' zoe' zejlicane' na' chone' chio'o yełə' mban zejlicane'. Diozən' gwleje' le' par chone' chio'o yełə' mban zejlicane' na' lechguale zaque'e len Diozən'. De'e na'ana' Jesocrisən' gwxaquə'əlebene' ca to yej de'en gwlej beŋə' par gaquən yej squin ližə'ena' na' zaquə'a'chguan len be'ena' gwlej lenŋə', la'ana'əczə beŋə' ca' yeziquə'a'chlə gwsa'aquene' cui bi zaquə' yejən' na' bosso'ozo'en ca'ala'.

⁵ Na' de'en ngoda'a'cho txen len Jesocrisən' gwxaquə'əlebecho ca yej ca' de'en zjəncua' zjəngoda'a'gan gan' chac yo'o de yejən'. Pero zaquə'a'chcho ca yejən' la' de yełə' mban zejlicane' čechon', na' yoguə'a'cho txenŋə' naccho liž Diozən' čhedə' zoe' len chio'o. Na' gwxaquə'əlebecho ca bxož čhe beŋə' Izrael gwlaž checho ca' can' gwnitə'əteza gwnite'e gwse'ejni'alazə'e Diozən', čhedə' Jesocrisən' chone' par nič zoteza zocho čo'ela'ocho Diozən' lo'o yičjla'ažda'ochon' can' čazlažə' Diozən'.

⁶ Na' Xtižə' Diozən' nyojən' čhe Jesocrisən' nan:

Gan' nzi' Sion na' əselə'a to beŋə' gwxaquə'əlebene' ca to yej de'en gwlej beŋə' par gaquən yej squin, na' zaquə'a'chguan par le'.

Na' beŋə' so'onlilažə' ben' gwxaquə'əlebe ca yejən' bitō bi zto' əsa'aquene' čhe de'en so'onlilažə'ene'.

⁷ Na' par chio'o chonlilažə'a'chone', naque' le'ebeyože beŋə' zaque'e. Pero na' beŋə' ca' cui čso'onlilažə' le', čoso'ozoe' le' ca'ala', na' par lega'aque' nyojczə Xtižə' Diozən', nan:

Yej de'en bosso'ozo mues ca' ca'ala,

len banaquən yej squin na'a.

⁸ Na' le'egateza ca' nan:

Ben' əselə'a gwxaquə'əlebene' ca to yej de'e əčhego' beŋə',

na' ca to yej de'en žjəsə'əžo'e na' yesə'əbičə'.

Yesə'əčhegüe'e čhedə' čso'onczə yičjlaoga'aque' cui čoso'ozenague' Xtižə' Diozən'. De'e na'ana' yesə'əbiayi'e can' babsi' Diozən' xneze.

Chio'o chonlilaža'əcho Diozən' naccho xi'ine'

⁹ Pero na' chio'o chonlilaža'əcho Diozən' bagwleje' chio'o par naccho family che'. Na' lao Diozən' naccho rei na' b̄xoz, na' naccho nasyon che' na' nactecho xi'ine'. Diozən' gwleje' chio'o par niçh çixjue'echo catec de'e güennə' chone'. Na' le'ena' bebeje' chio'o lo'o de'e žcholən' gan' gwdacho antslə. Na' gwlo'o be'eni' che'ena' lo'o yichjla'ažda'ochon'. Na' be'eni' che'ena' naquan de'e güen juisy par chio'o.

¹⁰ Antslə bito goccho xi'in Diozən', pero na'a banaccho xi'ine'. Na' antslə bito gwnezecho de que cheyaša' cheži'ilaža' Diozən' chio'o, pero na'a banezecho de que cheyaša' cheži'ilaže'e chio'o.

Zoczcho par goncho can' chazlaža' Diozən'

¹¹ Beṇə' biša' dao' chio'o naccho ca beṇə' zita' len beṇə' ža' lao yežlyo nga na' par chio'o lažchon' naquan gan' zo Diozən'. Na' chata'əyoida' le'e bito əgwzenagle che de'en chzelaža' la'ažda'omallena' cuent cui nabi'an le'e par gonle de'e malan'.

¹² Le'e sotezə leso legon de'e güen par niçh beṇə' ca' cui zjənombia' Diozən' yesə'əle'ine' de'e güennə' chonle na' gwžin ža baļe' so'onlilaže'e Diozən' əso'ene' yelə' bala'an, la'aṇə'əczə na'a chesə'əne' nacle beṇə' mal.

¹³ To tocho cheyalə' əgwzenagcho che jostis ca' beṇə' ca' chesə'ənabia' chedə' Xancho Jesocristan' bene' mendad goncho ca'. Cheyalə' əgwzenagcho che rein' ben' chnabia'ach.

¹⁴ Na' leczə cheyalə' əgwzenagcho che goberṇador ca' beṇə' ca' chselə' rein'. Chselə'e lega'aque' par choso'onežjue' castigw che beṇə' chso'on de'e mal, na' par chso'e yelə' bala'an che beṇə' chso'on de'e güen.

¹⁵ Diozən' chene'ene' goncho de'e güen par niçh bito gaquə yesə'əna beṇə' ca' cuinə' so'ombia' le' de que choncho de'e mal, beṇə' ca' nežnə'chol yichjla'ažda'oga'aque'ena'.

¹⁶ Bitoch chonən byen naocho costombr che beṇə' Izrael ca' can' na lein'. Pero bito cheyalə' goncho xbab de que de lsens checho par goncho bitə'əteza de'e mal, chedə' la' naccho beṇə' güen xšin Diozən' na' zoczcho par goncho can' chazlaže'ena'.

¹⁷ Cheyalə' gapcho respet yogua' beṇə'. Na' cheyalə' gaquecho che yeziqə'əchlə beṇə' chso'onlilaža' Diozən'. Cheyalə' güe'ela'ocho Diozən', na' žebcho goncho de'en cui chazlaže'ena', na' cheyalə' gapcho rein' respet.

Cristən' bguo'o bchejlaže'e len de'en gwxaquə'azi'ena'

¹⁸ Le'e nacle mos che beṇə', legwzenag che xanlen' laogüe de'en chaple Diozən' respet. Gwzenagle caguə tlaozə che beṇə' zjənaquə beṇə' güen beṇə' gaxjwlaža', sino que lenczə che beṇə' znia ca'.

¹⁹ Cata' beṇə' choso'oçhi' choso'osaque'e chio'o sin cui bibi de'e mal noncho, Diozən' chebeine' šə chgo'o chchejlaža'əcho len de'en choso'oçhi' choso'osaque'e chio'o, chedə' can' chene'ene' goncho.

²⁰ Bitobi zaquə' lao Diozən' ca de'en chgo'o chchejlaža'əcho cata' chesə'əbaža' beṇə' chio'o šə de'en chonchon' naquan mal. Pero na' šə choso'oçhi' choso'osaque' beṇə' chio'o laogüe de'en choncho de'e güen, Diozən' chebeine' de'en chgo'o chchejlaža'əcho len de'en choso'oçhi' choso'osaque'e chio'o.

²¹ Diozən' bagwleje' chio'o par niçh goncho de'e güennə' na' par niçh co'o gwchejlaža'əcho len bitə'əteza de'e yoso'oçhi' yoso'osaque' beṇə' chio'o. Bguo'o bchejlaža' Cristən' len de'en goc che'ena' catə'n gwxaquə'əzi'e por ni checho, na' bguo'o bchejlaže'e par niçh ənezecho naquan chene'ene' goncho na' par niçh goncho can' bene'ena'.

²² Na' Cristən' bitobi de'e mal bene', na' ni que əb̄xoayague' beṇə' len dižə' de'en be'e.

²³ Na' cata' gwsa'ada' beṇə' le' dižə' bito ṇacho boži'e dižə' mal len lega'aque'. Na' le'egateza ca' catə'n bosə'oçhi' bosə'osaque'ene' bito gwne' gone' mal len lega'aque'. Ben cuine' lao na' Diozən', chedə' benlilaže'e Diozən' ben' zdaczə liça par əṇe' non' napə dolə' na' non' chon de'e güen.

²⁴ Bito bi de'e mal ben Cristən' pero gwduxje' che de'e mal de'en ben chio'o. Bnežjw cuine' gwso'ot beṇə' le' le'e yag corozən', par niçh notə'ətezcho chonlilaža'əchone' cui si'icho castigw che de'en benchon'. Bnežjw cuine' par niçh cuich šo'o çhazcho de'e malən' sino sotezə socho goncho de'e güen. Na' be'e latjə gwso'onene' le' ca' par niçh bebeje' chio'o xni'a de'e malən'.

²⁵ Gwxaquə'əlebecho ca xilə' ca' zjənasəlas laogüe de'en bencho con can' gwna la'ažda'omalchon'. Pero na'a bitoch chzenagcho che la'ažda'omalchon', sino que bachzenagcho che Cristən'. Na' Cristən' gwxaquə'əlebene' ca to beṇə' goye xilə' de'en chcuasə' chcue'eje' chio'o len de'e malən'.

3

Can' cheyalə' so'on beṇə' ca' zjənšagna'

¹⁻² Na' le'e no'olə le'e nšagna'ale, to tole cheyałə əgwzenagle che be'en chele. Na' šə be'en chelen' bito chzenague' che xtižə' Diozən' gwaquəlenljaga'aclene' ničh yoso'ozenague' chei. Cata' yesə'əle'ine' can' zdaczele chonle de'e güennə' na' can' chaple Diozən' respet do yichj do lažə'əle gwzinja ža se'enene' yoso'ozenague' che', la'anə'əcəzə šə cui bi ye'ele lega'aque'.

³ Na' le'e no'olə, bito gonle xbab de que zaquə'əchgua de'en gonle par sole xoche. Bito cuec yichjle gaquə yišə' yichjlen' xoche, na' bito cue' yichjle porzə par əgwpa'a xale o par əgualə'əle bga o ret o par əgwdele niy.

⁴ De'en naquə de'e zaquə'əchgua lao Diozən' gaquə yichjla'ažda'olen' can' naquə yichjla'aždao' Cristən' na' gacle beənə' gačjwlažə' na' so cuezele binlo len xbab de'en yo'o lo'o yichjla'ažda'olen', cheda' lega'aquan žjənaquən par zejlicane.

⁵ Cana' gwnitə' no'olə gwso'onližə' Diozən' na' gwso'on cuinga'aque' lažə' ne'enə'. Lega'aque' gwsa'aque' beənə' gačjwlažə' na' bosozenague' che be'en chega'aque'. Na' zaquə'əchguan lao Diozən' can' gwso'one'enə'.

⁶ De'e Sarən' no'ol che de'e Abraanna' sympr bzenague' che be'en che'enə' na' gož'e'ene' ya'o con bin' gož'e'ene'. Na' šə sotezə sole gonle de'e güennə' na' bito žeble par gonlen bitə'ətezə gaquə, yesə'əna beənə' de que nacle xi'in de'e Sarən' cheda' chonle can' bene'enə'.

⁷ Na' chio'o beənə' byo chio'o nšagna'acho, leczə can' cheyałə goncho güen len no'ol checho, can' nezecho chazlažə' Diozən'. Cheyałə güe'ega'achone' yelə' bala'an' na' cheyałə goncho xbab de que bito žjənaque' beənə' gual can' naquə chio'o. Na' əžsa'aləžə'əcho de que Diozən' bagoclene' lega'aque' par ničh de yelə' mban zejlicane chega'aque' can' bagoclene' chio'o. De'e na'anə' cheyałə goncho yoguə'əte de'e ca' par ničh bitobi bi əgwžon cui əgwzenag Diozən' checho cata' goncho orasyonə'.

Chchoj cata' chyi' chsaquə'əcho laogüe de'en choncho de'e güen

⁸ Yoguə'əcho cheyałə goncho tozə xbab na' cheyałə gaqueche ljuəžj chio'o la'ažda'ochon' šə bi de'en chac che ljuəžjcho. Cheyałə gaqueche ljuəžj chio'o chonližə'əcho Diozən' na' cheyałə yeyašə'əlažə'e ljuəžjcho. Bito cheyałə gon cuincho xen.

⁹ Šə bi de'e mal chso'on beənə' len chio'o, bito nacho leczə de'e mal yoži'ichon len lega'aque'. Na' šə chsa'ada' beənə' chio'o dižə' leczə bito cheyałə yoži'icho dižə' mal len lega'aque'. Lgua'a yoži'icho de'e mal len lega'aque', cheyałə ənabcho gaquə de'e güen chega'aque'. Diozən' gwleje' chio'o par ničh chone' ca zocho mbalaz.

¹⁰ Can' nyoj Xtižə' Diozən' nan:

Šə chene'echo əbancho šša na' socho mbalaz
bito cheyałə ənecho bitə'ətezə dižə' de'e naquə mal.
Na' bito güe'echo bitə'ətezə dižə' goxoayag.

¹¹ Cheyałə cuejyichjcho yoguə' de'e mal, na' goncho de'e güen.

Cheyałə chiljlažə'əcho nac goncho par socho binlo len ljuəžjcho, na' sotezə socho gonchon.

¹² Xancho Diozən' chgüia chye' beənə' ca' chso'on de'e güen,
na' chzenague' cata' chso'one' orasyon laogüe'enə'.

Pero na' beənə' ca' chso'on de'e malən' chž'e' lega'aque'.

¹³ Notono no gaquə so'on par ničh cuiayi'icho šə sotezə zocho chonchguacho de'e güen.

¹⁴ Pero na' šə beənə' ca' cui žjənombia' Diozən' yoso'oči' yoso'osaque'e chio'o laogüe de'en chontezcho de'en naquə güen lao Diozən', gone' ca socho mbalaz. Na' bito cheyałə gaquəžjlažə'əcho o žebcho lega'aque'.

¹⁵ Cheyałə güe'ela'ochon Cristən' do yichj do lažə'əcho na' güe'echo latjə nabi'e chio'o. Cheyałə sotezə socho probnid par yoži'icho xtižə' notə'ətezə beənə' ənabene' chio'o bixchen' chejle'echo che Cristən'. Cheyałə yoži'icho xtižə'əga'aque'enə' dižə' šao' na' con respet.

¹⁶ Do tyempťe legon ca ənezele lo'o la'ažda'olen' de que chonle can' chazlažə' Diozən'. Nach cata' beənə' yesə'əne' de que chonle de'e mal laogüe de'en chonle can' cheyałə gon chio'o chonližə'əcho Cristən', əsa'aque'ne' zto' de'en chəsə'əne' ca'.

¹⁷ Chchoj cata' Diozən' chazlažə'e chyi' chzaquə'əcho na' güenchlə čhi' saquə'əcho laogüe de'en choncho de'e güen cle ca čhi' saquə'əcho laogüe de'en choncho de'e mal.

¹⁸ Cristən' ben' ben porzə de'e güen gwdi' gwxaque'e por ni che chio'o beənə' güen de'e mal cata'an gwso'ote'ene' šlinzə cana', na' cuat gate' de'e yobla. Gwdi' gwxaque'ena' par ničh babozoe' chio'o binlo len Diozən'. Na' de'en bidə Cristən' goque' beənə' belə' chen, de'e na'anə' beənə' mal ca' gosə'əzoinə' gwso'ote'ene'. Pero de'en naque' Xi'in Diozən' beyas bebane' ladjo beənə' guat ca'.

¹⁹ Na' de'en naque' Xi'in Diozən' gwyeje' gan' ža' angl bzelaο ca' gan' bseyjw Diozən' lega'aquan na' gwdixjui'e xtiže'ena' len lega'aquan.

²⁰ Angl bzelaο ca' dezđ cana' bito choso'ozenaguən che Diozən'. Gwso'onən can' gwso'on beənə' ca' gwnitə' ca tyempən' gwzo de'e Noen'. Diozən' gwzoinə' gwđape' yelə' chxenlažə' len lega'aque' de'en bito bnežjue' castigw chega'aque'ena' cate, gwleze' xte cata'əch beyož

ben de'e Noen' barcon'. Na' x̄o'onzə beñə' gwso'e lo'o barcon' na' lega'acze' bito gosə'əbiayi'e lo'o nisan'.

²¹ Ca'aczən' naquan len chio'o bagwcho'acho nisan' na' Diozən' gone' par nich cui yeyejcho lao yi' gabilən'. Na' chcho'acho nisan' cagua par nich nisan' gonən cuerp chechon' xi'ilažə', sino chcho'achon de'en bezi'ixen Diozən' xtolə'əchon' catə'an gwnabechone' gone' ca gaquə yichjla'ažda'ochon' xi'ilažə'. Na' Diozən' babezi'ixene' checho laogüe de'en beban Jesocristən' ladjo beñə' guat ca'.

²² Jesocristən' babeyepe' yoban' gan' zoe' chnabi'e txen len Diozən'. Na' chnabi'e angl əblao ca' na' notə'ətezəchlə angl, na' notə'ətezəchlə napə yelə' gwnabia'.

4

Diozən' no'e checho de'e gon to tocho par gaquəlen ljuežjcho

¹ Cristən' goque' beñə' belə' chen na' bsanlažə' cuine' gwxaquə'əzi'e catə'an gwdixjue' xtolə'əchon'. De'e na'anə' cheyalə' əgwspanlažə' cuincho saquə'əzi'icho. Šə goncho ca' zejzen de que bitoch chnabia' la'ažda'omalchon' chio'o.

² Na' chio'o lao yedote əbancho bito cheyalə' əgwzenagcho che de'en chzelažə' la'ažda'omalchon', cheyalə' goncho can' chazlažə' Diozən'.

³ Antslə bencho can' chso'on beñə' ca' cuinə' so'ombia' Diozən'. Lega'aque' chso'elaže'e chso'one' de'e naquə de'e yelə' zto' na' chso'onteze' bin' chzelažə' la'ažda'omalga'aque'ena', na' zjanaque' beñə' güe'e zo, na' chso'one' lni gan' chac scandl, na' chso'elaže'e chsa'aše' güe'ena', na' chse'ejni'alaže'e lgu'a lsaquə' de'en na lei che Diozən' cui šejni'alažə'əcho. Pero bitoch cheyalə' goncho ca'.

⁴ Beñə' ca' cuinə' so'ombia' Diozən' chesyə'əbanene' de'en cuich choncho txen len lega'aque'. Bitoch choncho de'e mal ca' de'en chso'onchgua lega'aque'. De'e na'anə' choso'ožia choso'onite'e chio'o.

⁵ Pero yosə'ədie' cuent lao Cristən' che yoguə' de'en chso'one'ena', chedə' la' Cristən' chbeze' par əchoglaogüe'en naquan' gaquə che to to benachən', la'anə'əczə šə bagwsa'ate'.

⁶ De'e na'anə' Diozən' bsele'e beñə' bedəsə'ədixjui'e xtiže'ena' len chio'o par nich chonlilažə'əcho Cristən', na' len yeziquə'əchlə beñə' gwso'onlilaže'ene' antslə ze'e sa'ate'. Na' nchoglaon che yoguə' chio'o benəch de que gatcho, pero beñə' ca' gwso'onlilažə' Diozən' la'anə'əczə gwsa'ate', bia'aczə zjəmbane' len Diozən'.

⁷ Bazon baozə šo'o fin che yežlyon', na' de'e na'anə' to tocho cheyalə' socho len tozə xbab na' nbia' cuincho par goncho can' chazlažə' Diozən'. Cheyalə' goncho ca' par nich güe'elažə'əcho goncho orasyonə'.

⁸ Na' de'en naquə de'e žialao xench ca bitə'ətezəchlə de'en choncho, cheyalə' gaquecho che ljuežjcho do yichj do lažə'əcho. La' catə' chaquecho che ljuežjcho, bito choncho xbab šə de xtolə'əga'aque' la'anə'əczə šə zjanaquan de'e zan.

⁹ Cheyalə' yebeicho əgüialaocho ljuežjcho ca' catə' da'aque' ližchon'.

¹⁰ Diozən' lao yelə' chaclen che'ena' no'e checho gwde gwdele de'e gaquə gon to tocho. Na' de'en no'e gon to tocho cheyalə' gonchon par gaquəlen ljuežjcho. Na' šə goncho ca' saquə'əlebecho ca to mos əblao ben' chon can' chene'e xane'ena'.

¹¹ Šə Diozən' bano'e checho chixjue'echo xtiže'ena', cheyalə' žjəsə'alažə'əcho de que xtiže'e na'anə' chyixjue'echo. Na' šə bano'e checho gaquəlencho beñə', cheyalə' gaquə'əga'acchone' do yichj do lažə'əcho chedə' nezecho Diozən' chone' chio'o fuers balor na' bichlə de'e chchincho par chaclenga'acchone'. Diozən' bsele'e Jesocristən' chaclene' chio'o, na' bitə'ətezə de'en goncho cheyalə' gonchon par nich Diozən' si'e yelə' bala'an. Ledoye'ela'och Jesocristən' na'a na' zejljcañe ben' chnabia' zejljcañe. Na' can' gonšgaczcho.

De'en chy'i' chzaquə'əcho chonən chio'o prueb šə chonlilažə'əcho Diozən'

¹² Beñə' bišə' dao' bito cheyalə' yebanecho catə' choso'oçhi' choso'osaquə'əchgua beñə' chio'o. De'e ca' chy'i' chzaquə'əcho chso'onən chio'o prueb šə de'e li chonlilažə'əcho Diozən'. De'e na'anə' bito cheyalə' goncho xbab de que de'en chy'i' chzaquə'əcho naquan to de'e zakuə' yebanecho.

¹³ Cheyalə' yebeicho catə'an choso'oçhi' choso'osaque'e chio'o chedə' chac checho can' goc che Cristən' catə'an gwdi' gwxaque'ena'. Na' catə' əžin žə əgwlo'i Diozən' de que Cristən' nape' yelə' bala'an xen, lechgualə yebeicho na' mbalaz socho.

¹⁴ Na' na'a zocho mbalaz la'anə'əczə šə choso'ožia choso'onite' beñə' chio'o de'en chonlilažə'əcho Cristən', la' Spirit che Diozən' de'en napə yelə' bala'an xen zon lo'o yichjla'ažda'ochon' par nich nezecho zoe' len chio'o. Beñə' mal ca' choso'ožia choso'onite'e Cristən', na' chio'o nombi'achone' cho'ela'ochone'.

¹⁵ Bito cheyalə' gaccho beṇə' güet beṇə', beṇə' bguan, beṇə' güen bitə'ətezə de'e mal, na' bito cheyalə' əgwziacho bia' bin' so'on beṇə' yobla, par niçh ca' šə çhi' saquə'əcho bito çhi' saquə'əcho laogüe de'en choncho de'e malən'.

¹⁶ Šə çhi' saquə'əcho laogüe de'en chonlilažə'əcho Cristən' bito cheyalə' gaquecho zto' de'en çhi' saquə'əcho sino nachle cheyalə' güe'ela'əcho Diozən' na' sozccho gonlilažə'əcho Cristən'.

¹⁷ Chio'o chonlilažə'əcho Diozən' naccho ca family che'enə'. Na' babžin ža lechgualə chyi' chzaquə'əcho çhedə' Diozən' bachzola chone' chio'o prueb šə de'e li chonlilažə'əchone'. Na' ca naquən' chyi' chzaquə' chio'o chonlilažə'əchone', nezecho gwžin ža catə' gaquə de'e mal juisy che beṇə' ca' cui choso'ozenag dižə' güen dižə' cobə che Diozən'.

¹⁸ Can' nyoj Xtižə' Diozən' nan: "Chio'o banaccho beṇə' güen lao Diozən' na' bia'aczə nacchguaze gaquə cui yeyejcho lao yi' gabilən', na' beṇə' mal ca' beṇə' ca' cui chso'elao' Diozən', naquən segor de que lega'aque' žžəya'aque' lao yi' gabilən'."

¹⁹ Chio'o chyi' chzaquə'əcho segon can' chzi' Diozən' xneze gac checho, na' cheyalə' gon cuincho lao na' Diozən' na' gonczcho de'e güen. Le'enə' bene' chio'o beṇəçh, na' de'e na'anə' chaclene' chio'o can' ne'enə' la'anə'əczə chyi' chzaquə'əcho.

5

De'en cheyalə' gon chio'o chonlilažə'əcho Cristən'

¹ Na'a de to de'e ənia' le'e nchojle nacle beṇə' golə beṇə' blao par len beṇə' ca' chesə'ədopə chesə'əžag chso'elaogüe'e Diozən'. Txenczə len le'e na' nada' bagwlej Diozən' par naccho beṇə' golə beṇə' blao. Ble'ida' na' cho'a dižə' can' gwxaquə'əzi' Cristən', na' nezdə' gon Cristən' chio'o yelə' bala'an xen catə' yide' de'e yobla.

² Na' chatə'yoida' le'e leyebei əgğüia əgwyele beṇə' ca' bagwlo'o Diozən' lao na'ale, caguə gonlen parzə niçh gonle complir de'en gwsə'on beṇə' mendad gonle. Leggüia legwyega'aque' do yichj do lažə'əle, caguə por ni che šə bi gan gonlen'.

³ Na' ca naquə beṇə' ca' zjənaquə lao na'ale, bito gonle byen yoso'ozenague' çhele šə cui chse'enene', sino len bitə'ətezə de'e gonle, legwlo'iga'aque' can' chene'e Diozən' goncho.

⁴ Šə gonle ca' catə'an yidə Xançhon' de'e yobla, ben' chapə chye' yoguə'əcho, gone' chio'o yelə' bala'an xen de'e cui te çhei.

⁵ Leczə ca' le'e nacle beṇə' xcuidə', chatə'yoida' le'e legwzenag che beṇə' golə beṇə' blao çhelen'. Yoguə'əcho cheyalə' gwzəxjw yichjcho tocho yetocho na' goncho xbab de que bitotec bi zaquə'əcho. La' Xtižə' Diozən' nyojən nan:

Diozən' chone' contr beṇə' ca' chso'on cuinga'aque' xen, na' chaclene' beṇə' ca' chso'on xbab de que bitotec bi zžəzaquə'e.

⁶ De'e na'anə' cheyalə' gwzəxjw yichjchon' lao Diozən' ben' napə yelə' guac xen, par niçh ca' gone' chio'o yelə' bala'an catə' cheyalə' si'ichon.

⁷ Cheyalə' goncho lao na' Diozən' yoguə'əloj de'en çhžebcho gaquə na' bitoch cue' yichjcho çhei, la' le' nži'ilažə'e chio'o.

⁸ Cheyalə' nabia' cuincho par goncho can' chazlažə' Diozən' na' gapcho cuidad cui co'o gwxiye'en chio'o nez mal. De'e gwxiye'en chonən contr chio'o na' gwxaquə'əleben ca to bež əznia la' bežən' syempr chosya'ab chdab chyljjob non' gaob, na' de'e gwxiye'en syempr cheyljlažə'an naclən' gonən par niçh əgwžiyai'in chio'o.

⁹ Cheyalə' gonçhechlažə'əcho cui šejle'echo che gwxiye'enə'. Cheyalə' sotezə socho gonlilažə'əcho Cristən', na' əžjsa'alažə'əcho de que caguə chio'ozənə' chyi' chzaquə'əcho sino lenczə yoguə' beṇə' bišə'əcho ca' ža' doxenlə yežlyo ngan', beṇə' ca' chso'onlilažə' Cristən'.

¹⁰ Na' catə' bagwde de'en chyi' chzaquə'əcho to tyemp dao' na'a, Diozən' gone' par niçh gaquəch yichjla'azda'ochon' can' naquə yichjla'azdaogüe'enə', na' gone' par niçh gonlilažə'əchchone'. Gone' fuers balor checho par goncho can' chene'ene' goncho, na' gaquəlene' par niçh to tocho socho len tozə xbab. Dioz na'anə' chaclencze' chio'o len yoguə' de'en çhyažjecho na' bagwleje' chio'o par niçh gapcho yelə' bala'an xen len le' zejlicane laogüe de'en chonlilažə'əcho Cristən'.

¹¹ Ledoye'ela'och Diozən' na'a na' zejlicane, ben' chnabia' zejlicane. Na' can' gonšgaczcho.

Bedən' chguape' diox beṇə' ca' yoso'olabe' cartən'

¹² Cart dao' nga ngox'an Silbanon' par le'e. Naque' bišə'əcho na' nezdə' de que zotezə zoe' chone' complir can' cheyalə' gone'. Babzoja' cart nga chneyoida' le'e sotezə sole šejle'ele de que de'e li Diozən' nži'ilažə'e chio'o can' babzenda' le'e. De'e na'anə' le'e sotezə leso legonlilažə'e.

¹³ Syoda Roma ngan' gwxaquə'əleben ca syoda Babilonian' çhedə' beṇə' ca' ža' nga chso'onchgüe' de'e malən'. Na' neto' cho'ela'oto' Diozən' nga chguapto' le'e diox. Diozən' gwleje' neto' par naquəto' xi'ine' can' gwleje' le'e. Leczə Marcos ben' nona' ca xi'ina' chguape' le'e diox.

¹⁴ Catə' chežagle ləyolğüiž ljuěžjle dižə' šao' par niç gacbia' de que chaque che ljuěžjle.
Yogua' le'e chonlilažə'əle Jesocristən' chḡaba' lao Xancho Diozən' gone' ca so cuezle binlo
len xbab de'en yo'o lo'o yiçhja'ažda'olen'.
De'e na'azə de'e chnia'. *Bed*

Cart Egwchope De'en Bzoj San Bedən'

Bedən' chzoje' cart par beṇə' ca' chso'onlilažə' Cristən'

¹ Nada' Simon Bed naca' apostol na' beṇə' güen žin che Jesocristən'. Na' chzoja' le'e bagoclen Diozən' par chonlilažə'əle Jesocristən'. Jesocristən' naque' Dioz chechon' ben' babebej chio'o xni'a de'e malən'. Tozə can' chone' güen len yoguə' chio'o chonlilažə'əchone' chedə' la' zdacze' licha, tozə can' chone' len neto' naquəto' apostol na' len le'e cui nacle apostol.

² Chnaba' lao Diozən' gaquəlenche' le'e na' gone' ca so cuezəchle binlo len xbab de'en yo'o lo'o yichjla'ažda'olen' laogüe de'en nombi'alene' na' de'en nombi'ale Xancho Jeso'osən'.

Can' cheyaḷə' gon chio'o chonlilažə'əcho Cristən'

³ Banombi'əcho Xancho Jeso'osən' na' de'e na'anə' lao yelə' guac xen che'enə' babebej chio'o yoguə' de'en chyažjecho par sotezə socho goncho can' chene'e Diozən' na' güe'ela'ochone'. Xancho Jeso'osən' bagwleje' chio'o par naccho xi'ine' laogüe de'en naque' le'ezealaogüe beṇə' zaque'e na' nape' yelə' guac xen.

⁴ Na' laogüe de'en naque' le'ezealaogüe beṇə' zaque'e na' nape' yelə' guac xen, babene' lyebe gone' de'e zan de'e güen juisy na' de'e zaque'e len chio'o. Bene' lyebe gone' güen len chio'o par nič ca' gaquə yichjla'ažda'ochonə' cayanə'an naquə yichjla'ažda'ogüe'enə', na' par nič cuich goncho de'e mal can' chso'on beṇə' ca' cui zjənonmbia' Diozən' con choso'ozenagteze' che de'en chesə'ezelažə' la'ažda'omalga'aque'enə'.

⁵ Bachonlilažə'əcho Xancho Jeso'osən', na' de'en bachzolao chac yichjla'ažda'ochon' can' naquə yichjla'aždaogüe'enə' cheyaḷə' goncho xte ga zelao saquə'əcho par nič sotezə socho goncho de'e güen na' par nič šejni'ichecho de'en chazlažə'enə'.

⁶ Na' bito cheyaḷə' güe'echo latjə nabi'a' la'ažda'omalchon' chio'o. Cheyaḷə' sotezə socho gonlilažə'əcho Diozən' catə' chyi' chzaquə'əcho, na' cheyaḷə' güe'ela'ochone' na' goncho can' chene'ene'enə'.

⁷ Na' leczə cheyaḷə' gaquecho che beṇə' ljuəžjcho beṇə' chso'onlilažə' Cristən' can' chonlilažə'əchone' na' cheyaḷə' gaquecho che yeziquə'əchlə beṇə'.

⁸ Šə zdacho chonchguacho yoguə' de'e ca', chaclenən chio'o par nič nezecho can' chene'e Xancho Jesocristən' goncho na' par nič sotezə socho goncho can' chene'ene'.

⁹ Pero na' notə'stezcho šə bito choncho de'e ca' bagwnia' cheyaḷə' goncho, nchoj yichjla'ažda'ochon' na' bito chejni'išaogüe'echo che Diozən' na' bagonlažə'əcho de que Diozən' babnitlaogüe' de'e mal de'en babencho antslə.

¹⁰ De'e na'anə' beṇə' bišə', cheyaḷə' goncho yoguə'əloj can' bagwnia' chene'ene' par nič ənezecho de'e li bagwlej Diozən' chio'o par naccho xi'ine', na' bsi'e xnezenə' antslə par nič gwcue'e chio'o ca xi'ine'. Šə can' goncho cuat cuiayi'icho.

¹¹ Nachən' bitobi bi de de'e gaquə əgwžonən žjəyecho len Xancho Jesocristən' gan' chnabi'e zejlicəne, Jesocrist ben' babebej chio'o xni'a de'e malən'.

¹² Na' la'aṇə'əczə banezele de'e ca' bagwnia' le'e na' bazole cheč chejle'ele dižə li che Diozən', bi'a'aczə che'enda' gontezə gona' par nič žjəyeza'alaza'əlen.

¹³ Chacda' naquən güen ṇa'a nembana' gona' par nič žjəyeza'alaza'əle de'e ca' na' gonle xbab chega'aquən.

¹⁴ Nezdə' de que yob əžin ža gata' segon can' bablo'i Xancho Jesocristən' nada'.

¹⁵ De'e na'anə' chona' xte ga zelao saquə'əda' par nič catə' bagota' guaquə yosa'alaza'əle de'e ca' bagwnia' cheyaḷə' goncho.

Apostol ca' besə'əle'ine' yelə' chey che'eni' che Jesocristən'

¹⁶ De'en babzejni'ito' le'e can' əgwlo'i Jesocristən' yelə' guac xen che'enə' catə'an yide' de'e yobla, bito naquən de'e chaljažə'əto' par əxoayagto' le'e. Neto' apostol che'enə' ble'ito' yelə' chey che'eni' che'enə' na' de'e na'anə' nezetə' de que naque' le'ezealaogüe beṇə' zaque'e.

¹⁷ Xəcho Diozən' bnežjue' Xi'ine'en yelə' bala'an xen na' bene' par nič cho'alaogüe'enə' goquən ca de'en chey che'eni'. Na' Xəcho Diozən' ben' naquə le'ezealaogüe beṇə' blao na' ben' chnabi'a' doxenlə, gwne' che': "Bengan' Xi'ina' ben' chacchgüeida' chei, na' cheba chezaquə'əlažə'a len le'."

¹⁸ Na' neto' beneto' can' gwna Diozən' che', Dioz ben' zo yoban', la' gwzoto' len Jesocristən' lao ya'anə' de'en gwlej Diozən' par goc ca' laogüeinə'.

¹⁹ Na' de'en bable'ito' yelə' chey che'eni' che Jesocristən' blo'ichən neto' de que Xtiz'e'enə' de'en boso'ozoj de'e profet ca' beṇə' ca' gwso'e xtižə' Diozən' cana' naquən de'e li. Na' de'e güennə' gonle šə əgwzenagle chei. Xtižə' Diozən' de'en nyojən chse'eni'in lo'o

yichjla'azda'ochon' can' chon to lampara chse'eni'in to lo'o cuart gan' naquæ žčhoj. Na' de'en nyojan' agwse'eni'in lo'o yichjla'azda'ochon' yedote xte catæ'an æžin žan' yidæ Cristan' de'e yobla.

²⁰ Pero na' de'en naquæ de'e žialao šejni'icho, de'e profet ca' beŋæ' ca' bosu'ozoj Xtizæ' Diožan' cana' bito bosu'ozoje' con xbab čhega'acze' che bi de'e ca' bachac o čhe de'e ze' gaquæ.

²¹ De'en bosu'ozoje' bito načo naquæn to de'e gwnan yosu'ozoje', sino de'en gwlej Diožan' lega'aque' par gwsa'aque' lažæ' ne'ena, Spirit čhe'ena' benæn par nič bosu'ozoje' de'en gone'ene'.

2

Beŋæ' ca' choso'osed choso'olo'i xtižæ' Diožan' clela

¹ Na' tyemp catæ'an gwnita' profet ca' leczæ cana' gwnita' profet güenlažæ' entr beŋæ' Izrael ca'. Na' ca'aczan' nita' beŋæ' yosu'osed yosu'olo'i xtižæ' Diožan' clela entr le'e. Lega'aque' se'enene' yesæ'æxoayague' le'e par nič cui gacbe'ile de que de'en choso'osed choso'olo'ine' bito naquan de'e li. Na' lega'aque' yesæ'æzoe' Xancho Jesucristan' ca'alæ ben' gwdixjw xtola' chio'o beŋač. Na' šæ no yosu'ozenag čhe de'en choso'osed choso'olo'i beŋæ' goxoayag ca', žjæya'aque' lao yi' gabilæn'. Na' ca' de'en so'on beŋæ' goxoayag ca' gonæn par nič leczæ æžin ža catæ' lega'aque' yesæ'æbiayi'e to de repentžæ.

² Beŋæ' zan yosu'ozenague' čhega'aque' na' so'one' yogua' claste yelæ' zto' ca' de'en chso'on beŋæ' ca'. Na' por ni čhe de'en so'one', beŋæ' ca' cuiŋæ' so'ombia' Diožan' yesæ'æne' contr dižæ' li čhe Diožan' de'en načo.

³ Na' beŋæ' goxoayag ca' laogüe de'en se'enčgüeine' yesæ'æzi'e mech æso'e de'e zan dižæ' güenlažæ' de'en sa'aljaže'e paržæ nič ægwnežjoga'aclene' xmechlen'. Dezd cana' Diožan' babži'e bia' yesæ'æzi'e castigw, na' naquan segor yesæ'æbiayi'e.

⁴ Nezecho can' goquæ cana'. Diožan' bnežjue' castigw čhe angl ca' gwsu'on de'e malæn' bsele'e lega'aque' lo'o yech gabil gan' lechguale naquæ žčhoj, na' na' žjænite'e xte ca' æžin ža yesæ'æzi'e castigw zejlicane.

⁵ Na' leczæ ca' Diožan' bžiyi'e yogua'æte beŋæ' ca' cui gwsu'elao' le' cana' catæ'an bsele'e yejw sio' juisyæn'. De'e na'anæ' gwsa'ate' gwse'eje' nisæn'. Pero na' Diožan' bosle' Noe ben' gwdixjue'i beŋæ' ca' nac so'one' par nič Diožan' æne' žjænaque' beŋæ' güen laogüe'ena', na' leczæ bosla Diožan' yegažæ beŋæ' yobla.

⁶ Na' leczæ bžiyi'e beŋæ' ca' gwža' syoda Sodomán' na' syoda Gomorran', bene' par nič syoda ca' gwse'eyæn besyæ'nittecžæn. Na' bene' ca' len syoda ca' par chosnisene' yogua' beŋæ' ze' e za'ac beŋæ' cui so'elao' le' de que gwnežjue' castigw čhega'aque'.

⁷ Na' catæ' Diožan' bnežjue' castigw čhe beŋæ' Sodoma na' beŋæ' Gomorra ca', bosle' ben' le Lot čhedæ' Lotæn' goque' beŋæ' güen laogüe'ena', na' Lotæn' goquene' pesad ca' yelæ' zton' gwsu'on beŋæ' mal ca'.

⁸ La' beŋæ' güen na'anæ' gwzoe' entr beŋæ' mal ca', na' yogua'æte ža ble'ine' na' benene' de'e malæn' gwsu'one' na' goquene' en pesad lo'o yichjla'azda'ogüe'ena'.

⁹ Na' yogua' de'e ca' de'en ben Diožan' cana' čzejni'in chio'o cho'ela'ochone' de que Diožan' nezczene' nac gone' par yebeje' chio'o lao bitæ'ætežæ de'e gonæn ca' æxopcho goncho de'e malæn'. Na' leczæ čzejni'in chio'o de que chone' par nič beŋæ' mal ca' čhesæ'æzi'e castigw na'a na' æžin žan' gwnežjue' castigw čhega'aque'ena' zejlicane.

¹⁰ Na' gončgüe' castigw čhe yogua' beŋæ' ca' chso'onzeche' yelæ' zto' čhega'aque' con can' na la'azda'omalga'aque'ena', na' bitobi respet čhsa'ape' Xancho Diožan'. Bitu čhesæ'æžebe' par so'one' de'e malæn'. Chso'one' con can' chse'enene', na' choso'ožia choso'onite'e angl ca'.

¹¹ Na' la'anæ'æczæ angl ca' žjænapæche' yelæ' guac na' žjænaquæche' beŋæ' gual cle ca' beŋæ' ca' choso'osed choso'olo'i dižæ' güenlažæ', bito čhsyæ'æyaxje angl ca' yosu'ožia yosu'onite'e beŋæ' güenlažæ' ca' lao Xančon'.

¹² Pero beŋæ' ca' choso'osed choso'olo'i dižæ' güenlažæ'ænæ' choso'ožia choso'onite'e de'e ca' cui chse'ejni'ine'. Yesæ'æbiayi'e čhedæ' žjænaque' ca' bia yixæ' de'en chso'one' con can' nan čhega'aque' na' bito choso'ozenague' čhe Diožan'.

¹³ Na' yesæ'æzi'e castigw por ni čhe de'en choso'očhi' choso'osaque'e beŋæ'. Bitu chso'one' žin, con chse'ej čhsa'oteze' bi chse'enene' do ža do yel. Na' catæ' che'ej čhaole txen chso'elažæ'æzeche' chse'ej čhsa'oxate' lgu'a žjæsya'æzalaže'e bi zejen de'en bnežjw cuiŋ Cristæn' por ni čhečo catæ' beŋæ' gwsu'ote'ene'. De'e na'anæ' gwxaquæ'ælebæga'aque' ca' to manch lao lachæ' xi'ilazæ' na' ca' to yiž xen lao cuerpæn'.

¹⁴ Na' con čhesæ'æzelažæ'æzeche' notæ'ætežæ no'olæ čhesæ'æle'ine', nita'ætežæ nite'e chso'one' de'e malæn', na' čhsæ'ægo'oyele'e beŋæ' ca' čhsa'ac sayečhæ šayen len xtižæ' Diožan' par chso'one' de'e malæn' txen len lega'aque'. Beŋæ' mal ca' bazjyö'olaogüe' čhesæ'æzelaže'e bi de čhe beŋæ'. Diožan' babžie' bia' yesæ'æbiayi'e.

¹⁵ Beṇə' goxoayag ca' bagosə'əbejyichje' nez de'en naquə de'e güen, na' bazjəyo'e nez malən'. Chso'one' can' ben de'e profet Balaam xi'in de'e Beor. Lechguale bebei Balaannə' gan de'en gwxi'e por de'e malən' bene'.

¹⁶ Pero na' ben Diozən' par niç to bia yixə' bian' cui chac neḅ gwɔɔlɔlɔb le' che de'e malən' chone'. Borr che'ena' bšillemb le' len xne che beṇə', na' bʒomb gon Balaannə' de'e malən' chene'ene' por ni che xbab clelən' de'en yo'o yichjla'aždaogüe'ena'.

¹⁷ Beṇə' ca' choso'osed choso'olo'i dižə' güenlažə'an gwxaquə'əlebəga'aquene' ca bej de'en cui bi nis žia na' gwxaquə'əlebəga'aquene' ca bejw biž de'en nžiguə' to be' gual chedə' cui zjəzaque'e. Babžia Diozən' bia' yesə'əbiayi'e zejlicane lo'o yech gabıl gan' lechguale naquə žchol.

¹⁸ Žižjo chso'e dižə' güenlažə' chso'elao' cuinga'aque'. Na' de'en chso'one' yelə' zto' che cuerp chega'aque'ena', chəsə'əgo'oyele'e beṇə' ca' ze'e gwzolaog chso'onlilažə' Cristən' par leczə chso'one' yelə' zto' che cuinga'aque', la'ana'əczə beṇə' ca' ze'e besyə'əchoje' ladjo beṇə' ca' chso'on de'e malən'.

¹⁹ Chse'e beṇə' ca' ze'e gwzolaog chso'onlilažə' Cristən': "De'e malən' bito nabi'an chio'o", pero beṇə' ca' chəsə'əna ca' nite'e xni'a de'e malən'. Na' nezecho šə chzenagcho che bitə'ətezə, xni'ei nan' zocho.

²⁰ Na' beṇə' ca' bagwso'ombi'e Xancho Jesocristən' na' bebeje' lega'aque' xni'a de'e mal ca' de'en chso'onən manch yichjla'aždao' nota'ətezə beṇə' cui zjənombia' Diozən'. Pero de'en babesyə'əzolaogüe' chosyo'ozenague' che de'e malən' babesyə'ənite'e xni'eina' de'e yoblə, na' maləch chac chega'aque' na' ca antslə.

²¹ Na' de'en babesyə'əzolaogüe' chosyo'ozenague' che de'e malən', nca'alə xneze žalə' cui gwso'ombi'e nez de'e naquə de'e güen, cle ca gosə'əbejyichje' de'en ben Xancho Diozən' mendad goncho de'en naquən de'e güen.

²² Šə cuejyichjcho de'en bene' mendad goncho, goncho can' na dicho nga: "Beco'on cheyaob de'en cheyebəb, na' cošən' catə'an babguazjchob cheyo'ob lo'o beṇjon' de'e yoblə." Na' de'e li can' na dicho nga.

3

Yidə Jesocristən' de'e yoblə

¹ Beṇə' bišə' dao', de'e nagan' naquən cart əgwchope de'en chzoja' le'e. Na' babzoja' cart quinga chedə' chebeile chzenagle che dižə' lin', na' che'enda' gona' par niç əžjsə'aləžə'əle na' gonle xbab che de'en baboso'ozoj profet ca' beṇə' ca' gonle xbe'e xtižə' Diozən' cana', na' de'en babsed blo'i neto' naquəto' apostol.

² Diozən' gwleje' profet ca' par gwsa'aque' lažə' ne'ena' na' bosə'ozoje' che de'e ca' ze'e za'ac. Na' neto' naquəto' apostol babzejni'ito' le'e bin' non Xancho Jesocristən' mendad goncho, Jesocrist ben' babebej chio'o xni'a de'e malən'.

³ Naquən de'e žialao ənezele na'a cuiṇə' yidə Xancho Jesocristən' de'e yoblə, nita' beṇə' so'onzeche' con can' chesə'əzelažə' la'ažda'omalga'aque'ena' na' so'one' borl che de'en na Diozən' gaquə.

⁴ Yesə'əne': "Ca naquə lyebe de'en ben Jesocristən' de que yide' de'e yoblə, con gwne'ena'. Bagwsa'at de'e xaxta'ochə ca' beṇə' gwso'onlilažə' Diozən' antslə. Na' tozəczə can' chac dezd gwxete yežlyon' xte ža neža."

⁵ Beṇə' ca' chesə'əna ca', bito chse'ene'ne' so'one' xbab de que catə' gwxe yoban' na' yežlyon', con ben Diozən' mendad əsa'aquən, na' goc can' bene' mendadan'. Bchoj yežlyon' lao nisən' de'en nyechj mbi'i len na' bchin' Diozən' nisən' catə'an bene'en.

⁶ Na' catə' goc yejw sio' juisyən' cana'an gwžiyai' yoguə' bia yixə' na' beṇəch nita' lao yežlyon'.

⁷ Na' de'e ca' chle'icho le'e yoban' len yežlyon' zjənita'ən na' ca'aczən' yesyə'əga'anən xte catə'əch əžin ža gaquə juisyən'. Cana'ach əse'eyən chedə' can' ben Diozən' mendad. Na' leczə cana'achən' choglaog Diozən' che beṇə' ca' cui chso'elao' le' de que əsa'aque' castigw zejlicane.

⁸ Pero na' le'e beṇə' bišə' dao', che'enda' ənezele de'e nga, len beṇəchən' žalnež chde tža na' lechguale sša chsa'aquene' tmil iz, pero caguə can' len Xancho Diozən'.

⁹ De'en cuiṇə' yidə Jesocristən' de'e yoblə balə beṇə' chso'one' xbab cui gon Xancho Diozən' can' bene' lyebe, pero yidə Jesocristən' catə'an əžin or che'ena'. De'en nape' yelə' chxenlažə' len yoguə' chio'o beṇəch cui le'e chontie' chio'o castigw. Chene'ene' yedinjecho xtolə'əchon' na' bito chene'ene' cuiayi' nota'ətezcho.

¹⁰ Na' can' cho'o beṇə' bguannə' liž beṇə' še'elə chzenyale'ene', leczə can' gaquə che beṇə' ca' cui chso'onlilažə' Xancho Jesocristən' catə' əžin ža yide' de'e yoblə. Nach gaquə to sšag xen la' te che yoguə' de'e ca' chle'icho le'e yoban', na' te che yežlyon' len yoguə' de'e zjəde laogüen' chedə' yoguə'ən əse'eyən, xte yesyə'ənit de'e ca' chle'icho le'e yoban'.

¹¹ Laogüe de'en ñezecho yesyá'ənit yoguá' de'e ca', cheyalá' gon cuincho lažá' na' Diozán' na' sotezə socho güe'ela'ochone'.

¹² Na' cheyalá' cuezcho batə'əquən' əžin ža babžia Diozán' bia' yidə Jesocristán' de'e yoblə, na' goncho par yob gaquən. Nach yoguá' de'en chle'icho le'e yoban' əse'eyən na' tant yi' gual gaquən xte yesyá'əyonə'ən na' yesyá'ənitən.

¹³ Pero na' zocho lez gaquə le'e yoban' de'e cobə na' gaquə yežlyon' de'e cobə gan' űitə' porza beűə' zjənaquə beűə' güen lao Diozán', can' none' lyebe gaquə.

¹⁴ De'e na'anə' beűə' bišə' dao', laogüe de'en zocho lez gaquə yoguá' de'e ca', cheyalá' goncho xte ga zelao saquə'əcho par nič catə'ən yidə Jesocristán' de'e yoblə bitobi manch da' chen la'azda'ochon' na' par nič ca' bitobi xtolə'əcho de na' chzo chbezcho biűlo len Diozán'.

¹⁵ Na' de'en napə Xancho Diozán' yełə' chxenlažə' len chio'o beűəch cui le'e chontie' chio'o castigw. Chone' ca' par nič baltezcho yedinjecho xtolə'əchon' cui yeyejcho lao yi' gabilən'. Leczə can' babzəj beűə' bišə'əda'əcho Pabən' le'e, čhedə' Diozán' bnežjue'ene' yełə' sin'.

¹⁶ Leczə ca' yoguá' cart čhe' ca' chso'en dižə' čhe de'e ca' babzəja' le'e. Na' le'e cart ca' de'en bzoj Pabən' zjəlen de'en naquə zdebə šejni'icho. Na' bałə beűə' cuiűə' se'ejni'ine' bi zeje de'e ca' na' šayečə šayen chsa'aque' len xtižə' Diozán'. Chse'ejni'ine' clelə de'en bzoje'ena' can' chso'one' len bitə'ətezəchlə Xtižə' Diozán' de'en nyojən. Na' de'en chso'one' ca' yesə'əbiayi'e.

¹⁷ De'e na'anə' beűə' bišə' dao', laogüe de'en banezele can' chso'on beűə' ca', cheyalá' gapple cuidad par nič cui šejle'ele dižə' güenlažə' de'en choso'osed choso'olo'i beűə' mal ca'. Šə šejle'ele dižə' güenlažə'əno' bitoch sole čech talenle de'en naquə de'e li.

¹⁸ Legüe' latjə gaquəlen Xancho Jesocristán' le'e par nič gaquəch yičjla'azda'olen' can' naquə yičjla'azda'ogüe'ena' na' le'e šejəch gombia'achle Xancho Jesocristán' ben' babebej chio'o xni'a de'e malən'. Ledoye'ela'oche' űa'a na' zejlicəne. Na' ca'ašgacžən' gaquə.

De'e na'azan' de'e chzoja'. *Bed*

Cart Nech De'en Bzoj San Juannə'

Jesocristən' chone' yelə' mban zejlicane

¹ Chyixjue'ida' le'e che Jesocristən' ben' naquə Dižə'ənə, ben' chon yelə' mban zejlicanən'. Bazocze' catə'an gwxe yežlyon'. Neto' apostol bzenagto' xtiže'ənə, ble'ito'one', bgüiato'one' na' gwdanto'one'.

² Le'ənə' golje' beṇəch na' ble'ito'one' na' cho'eto' dižə' de que mbancze' zejlicane. Na' chyixjue'ida' le'e de que le' zoe' len Xacho Diozən' na' bedəsoe' len chio'o beṇəch.

³ Ben' ble'ito' na' bzenagto' xtiže'ənə, che le'ənə' chyixjue'ida' le'e par ničh tozə can' goncho xbab. Na' catə' tozə can' gon chio'o xbabən' cana'ach gonle xbab ca xbabən' chon Xacho Diozən' na' len Xi'ine' Jesocristən' chedə' xbab cheto' zjənaquən tozə len xbab chega'aque'ənə'.

⁴ Na' chzoja' le'e cart nga par ničh ca' sole mbalaz juisy.

Diozən' len yelə' chon de'e güen che'ənə' naque' ca be'eni'

⁵ Bzenagto' be' Jesocristən' dižə' na' chyixjue'ito' le'e can' gwne' de que Diozən' len yelə' chon de'e güen che'ənə' naque' ca be'eni'. Ni latə'əzə de'e mal cui chone'.

⁶ Na' šə nacho de que xbab chechon' naquən tozə len xbab che Diozən' pero ne'e chdaczcho choncho de'e malən', con chonlažə'əchon', na' cabi zdalencho de'e lin'.

⁷ Diozən' naque' ca be'eni' chedə' chdalenə' de'e güen. Na' šə chio'o leczə chdalencho de'e güenə', nachən' tozə naquə xbab chechon' tocho yetocho. Na' šə chdalencho de'e güenə' yichjla'ažda'ochon' nactezə naquən xi'ilažə' chedə' Jesocrist Xi'in' Diozən' blalj xchene'ənə' par beque'e yogua'əte xtolə'əchon' catə'an gwso'ote'ene'.

⁸ Šə nacho cabi bi xtolə'əcho de, chxoayagzə cuinchon' na' cabi cho'echo dižə' li.

⁹ Pero catə' chxoadołə'əcho lao Diozən' ca naquə de'e mal ca' de'en chonchon', chezi'ixene' che xtolə'əchon' na' chnitlaogüe' yogua'əlołte de'e mal de'en chonchon' chedə' la' chone' complir can' ne'ənə' na' lichen' zde'.

¹⁰ Šə nacho bito bi de'e mal ne'e goncho, choncho Diozən' ca to beṇə' güenlažə' na' cabi zdalencho xtiže'ənə'.

2

Cristən' chne' fabor chio'o chonlilažə'əchone' lao Diozən'

¹ Xi'in' daogua'a, chzoja' le'e cart nga par ničh cui gonle de'e malən'. Pero na' šə no chio'o goncho de'e malən', zo beṇə' chne' fabor chio'o lao Xacho Diozən', le'ənə' Jesocristən' ben' zdaczə lichen'.

² Gwdixjue' xtolə'əchon' par ničh chio'o chonlilažə'əchone' zocho binlo len Diozən'. Na' caguə xtolə' chio'o na' azənə' gwdixjue' sino xtolə' yogua'əloł benəchən'.

³ Na' šə choncho can' non Diozən' mendadən' nezecho de que banombi'achone'ənə'.

⁴ Šə nacho de que nombi'achone' na' cabi choncho can' none' mendadən', naccho beṇə' güenlažə' na' bito zdalencho dižə' lin'.

⁵ Pero nezecho ngodə'əcho txen len Diozən' šə choncho con can' ne'ənə'. Na' catə' choncho con can' ne'ənə' de'e liczə chaquecho che' can' cheyalə'.

⁶ Šə nacho de que zotezə zocho len Diozən', cheyalə' sotezə socho goncho de'e güen can' ben Jesocristən'.

De'en non Cristən' mendad goncho

⁷ Beṇə' bišə, chzoja' le'e par əniə' de'en non Cristən' mendad goncho. De'en none' mendad goncho caguə naquən de'e cobənə' sino de'e nezczele dezd catə'an gwzolao chonlilažə'əlene' na'anə'. Guaquə əṇacho de que naquən de'e golə chedə' leczənə' babenele bedote.

⁸ Pero leczə guaquə əṇacho de que de'en none' mendad goncho de'en chzoja' chei nga naquən de'e cobə chedə' babla' be'eni' che Cristən' len beṇəchən' na' de'e malən' de'en gwxaquə'əlebe ca de'e žcholən' bachzolao chde chei. Cristən' blo'ine' chio'o de que chaque'ne' checho. De'e na'anə' nezecho naquən de'e žialao xen gaque che ljuežjcho can' none' mendadən'.

⁹ Šə nacho de que yo'o be'eni' che Cristən' lo'o yichjla'ažda'ochon' pero šə chgüe'i ljuežjcho, ne'e nčhol yichjla'ažda'ochon'.

¹⁰ Na' šə chaquecho che ljuežjcho yo'oczə be'eni' che Cristən' lo'o yichjla'ažda'ochon' na' bitolja əxopcho goncho de'e malən'.

¹¹ Pero ša zocho chgue'i ljuetzjcho, nchol yichjla'ažda'ochon' na' zdalenczcho de'e malən'. Na' ša can' choncho, bito choncho xbab gan' yežincho cheda' nchol yichjla'ažda'ochon' por ni che de'e mal de'en chonchon'.

¹² Chzoja' le'e xi'indaogua'a cheda' Diozən' babezi'ixene' checho laogüe de'en bagwdixjw Jesocrisən' xtolə'əchon'.

¹³ Chzoja' le'e xaxna' bi'i xcuidə' cheda' nombi'ale Jesocrisən' ben' bazoczə catə'an gwxe yežlyon'. Chzoja' le'e beṇə' güego' beṇə' cheban cheda' baç gwzoile cui chejle'ele che gwxiye'enə'.

Chzoja' le'e bidao' bi'i xcuidə', cheda' banombi'ale Xacho Diozən'.

¹⁴ Chzoja' le'e xaxna' bi'i xcuidə' cheda' banombi'ale Jesocrisən' ben' bazoczə catə'an gwxe yežlyon'. Leczə chzoja' le'e beṇə' güego' beṇə' cheban cheda' bachchinje fuers balor de'en chon Cristən' par yichjla'ažda'ochon'. Ngo'o yichjtezle Xtižə' Diozən' na' bagwzoile cui chejle'ele che gwxiye'enə'.

¹⁵ Bito selažə'ale gacle tozə len beṇə' ca' cui zjənombia' Diozən', na' leczə bito selažə'ale gonle can' chso'one'enə'. Notə'atezcho ša chzelažə'əcho goncho can' chso'on beṇə' ca' cui zjənombia' Diozən', bitonə' gaquecho che Xacho Diozən'.

¹⁶ Beṇə' ca' cui zjənombia' Diozən' chso'one' de'e mal de'en chzelažə' la'ažda'omalga'aque'enə', na' chso'one' de'e mal de'en chasə'əzelažə'e so'one' por ni che ša bi de'en chasə'əle'ine', na' leczə chsa'alažə'e. Yoguə' de'e ca' chso'one' bito za'aquən che Xacho Diozən', sino za'aquən che gwxiye'enə'.

¹⁷ De'e te chei yežlyo nga na' lecza de'e te chei de'e ca' chasə'əzelažə' beṇə' ca' cui zjənombia' Diozən'. Pero ša choncho can' chene'e Diozən' nachən' socho zejlicane.

Nezecho de'en naquə de'e li

¹⁸ Xi'indaogua'a, bazon əžin ža əžin or yidə ben' gonchgua contr Cristən'. Babzeneto' le'e de que ze'e, na' na'a beṇə' zan bachso'one' contr Cristən'. De'e nan' nezecho bazon əžin ža əžin or yidə be'ena' gonchgua contr Cristən'.

¹⁹ Entr chio'onə' besə'əchoj beṇə' ca' chso'on contr Cristən', caguə do lažə'əga'aque'enə' gwso'one' txen len chio'o. Žalə' do lažə'əga'aque' gwso'one' txen len chio'o, ne'e nite'e len chio'o žalə' ca'. Pero besə'əchoje' par niç bla'alaon de que caguə de'e li zjənaque' chio'o txennə'.

²⁰ Pero na' Cristən' babeṇe' le'e Spirit che Diozən' can' babene' len neto'. De'e na'anə' yoguə'əcho nezecho can' na' Xtižə' Diozən'.

²¹ De'e nga babzoja' le'e cheda' nombi'ale dižə' li che Diozən'. Bito ənacho cui nezecho de'en naquə de'e lin'. Na' nezczecho bitobi de'e güenlažə' nsa' Xtižə' Diozən'.

²² Beṇə' güenlažə'əna' ben' na che Jeso'osən' de que caguə le'enə' Cristən' Xi'in Diozən', cheda' chzoe' Xacho Diozən' ca'alə na' len Xi'ine'enə'. Be'enan' chon contr Cristən'.

²³ Notə'atezə beṇə' chzo Xi'in Diozən' ca'alə, bito zo Xacho Diozən' len le'. Ben' nezene' na' cho'e dižə' de que Jeso'osən' naque' Xi'in Dioz, zo Xacho Diozən' len le'.

²⁴ Le'e gontezə legon xbab che de'e ca' babzeneto' le'e dezd catə'an gwzolaon chonlilažə'əle Cristən'. Ša ca' gonle, sotezə sole len Xacho Diozən' na' len Xi'ine'enə'.

²⁵ Na' de'e nga ben Jesocrisən' lyebe len chio'o, de que gone' chio'o yelə' mban zejlicanen'.

²⁶ De'e ngan' babzoja' le'e bi'a dižə' che beṇə' ca' chse'ene'e yesə'əxoayag le'e.

²⁷ Jesocrisən' babeṇe' le'e Spirit che Diozən' na' zotezə zon chzejni'in le'e yoguə'əlo de'en cheyałə nezele che cuine'. Dižə' lin' choe' Spiritən', bito chonlažə'ən. Na' de'en zon chzejni'in le'e, bito chyažjele nochlə gwsede le'e par ənezele bin' naquə de'e li. De'e na'anə' lesotezə leso len Jesocrisən' can' babsed bablo'i Spiritən' le'e.

²⁸ Na' na'a xi'indaogua'a, cheyałə sotezə socho len Jesocrisən' par niç catə'an yide' de'e yoblə cui žebcho na' cui gwcuašə'əchone' yeto'icho catə'an le'ichone'.

²⁹ Ca naquə nezele de que Jesocrisən' zdacze' licha, le'egatezə ca' cheyałə ənezele de que yoguə'əcho ša zotezə zocho choncho de'e güen naccho xi'in Dioz.

3

Naquən goncho ša naccho xi'in Dioz

¹ Le'e gonšc xbab catequən' chaque Xacho Diozən' checho. Lechgualə chaquene' checho ca de'en bene' par niç guaquə əne' xi'ine' chio'o. Beṇə' ca' cui zjənombia' Diozən' bito chse'ejni'ine' de que naccho xi'in Dioz, cheda' cabi chse'ejni'ine' non' naquə Diozən'.

² Le'e beṇə' chacda' chei, chio'o chonlilažə'əcho Jesocrisən' baç naccho xi'in Dioz. Na' bito ne'e la'alao naquən' gaccho, pero na' nezecho catə'an Jesocrisən' yide' de'e yoblə, le'icho can' naque'enə' na' gone' par niç gaquə yichjla'ažda'ochon' can' naquə yichjla'aždaogüe'enə'.

³ Na' to tocho ša zocho lez de que Diozən' gone' par niĉ gaquə yichjla'ažda'ochon' can' naquə yichjla'aždao' Jesocristən', goncho par niĉ la'ažda'ochon' gactezə gaquən xi'ilažə' ca xi'ilažə'an naquə la'aždao Jesocristən'.

⁴ To tocho ša choncho de'e mal bito chzi'icho can' na Diozən', ĉhedə' de'e mal de'en chonchonə' chonən contr can' na Diozən'.

⁵ Na' nezecho de que Jesocristən' bide' par beque'e xtolə'əcho ca', na' caguə bi xtolə' le' denə'.

⁶ To tocho ša zotezə zocho len le', bito choncho de'e mal. Na' to tocho ša choncho de'e malən', bito ne'e šejni'icho non' naquə Jesocristən', nic ne'e gombi'achone'.

⁷ Xi'indaogua'a, bito güe'echo latə no əxoayag chio'o. Ša choncho can' cheyalə' goncho, zdacho liĉa can' zda Jesocristən'.

⁸ Šə yo'olaocho choncho de'e malən' naccho xi'in gwxiye', ĉhedə' gwxiye'enə' naquən güen de'e mal dezd nechte. Na' bidə Xi'in Diozən' par chnitlaogüe' de'en chon gwxiye'enə'.

⁹ To tocho ša naccho xi'in Dioz bito yo'ola'ocho goncho de'e mal, ĉhedə' la' Diozən' babocobe' yichjla'ažda'ochonə' par niĉ bagwzolao chaquən ca yichjla'aždaogüe'enə'. Na' bitoch gaquə sotezcho goncho de'e malən' ĉhedə' xi'in Dioz chio'o.

¹⁰ De'e nga chlo'en non' xi'in Diozən' na' non' xi'in gwxiye'enə'. Notə'ətezcho ša cui zocho choncho de'e güen, bito naccho xi'in Dioz. Na' notə'ətezcho ša cui chaque ĉe ljuėžjcho, bito naccho xi'in Dioz.

Cheyalə' gaque ĉe ljuėžjcho

¹¹ Na' dižə' nin' babenele dezd gwzolao chonlilažə'əle Cristən', de que cheyalə' gaque ĉe ljuėžjcho tocho yetocho.

¹² Cui goncho can' ben Cainnə', goque' xi'in gwxiye'enə' na' bete' beņə' biše'enə'. ĹEnezele bixĉen' bete'ene' ža? Bete'ene' ĉhedə' biše'enə' bene' de'e güen na' le' gwyejlene' de'e malən'.

¹³ Beņə' biše', bito yebanele ša beņə' ca' cui zjənbombia' Diozən' ĉasə'əgue'ine' le'e.

¹⁴ Na' ca naquə chio'o ža, de'en chaquecho ĉe ljuėžjcho nachən' nezecho bitoch naccho len yichjla'ažda'ochon' ca beņə' guat. De yelə' mban zejlicəne' ĉecho na'a. Pero ša cui chaque ĉe ljuėžjcho nachən' ne'e naccho ca beņə' guat len yichjla'ažda'ochonə'.

¹⁵ Notə'ətezcho ša ĉgue'i ljuėžjcho, lao Diozən' naccho beņə' güet beņə'. Na' nezecho de que ni to beņə' güet beņə' bito de yelə' mban zejlicəne' ĉe'.

¹⁶ De'en chaque Jesocristən' ĉecho na' bsanlaza' cuine' por ni ĉecho catə'an gwsə'ote'ene', de'e na'anə' nezecho can' cheyalə' gaque ĉe ljuėžjcho. Ša chonən byen cheyalə' gwsanlaza' cuincho gatcho par gaquəlen beņə' ljuėžjcho.

¹⁷ Ša bade de'e de ĉecho na' nezecho de que ljuėžjchon' ĉyazjəne'en gwĉhine'en, na' ša bito cheyašə'əchone', bito gaquə ənacho de que chaquecho ĉe Diozən'.

¹⁸ Xi'indaogua'a, bito cheyalə' gaque ĉe ljuėžjcho de dižə'əzə, sino cheyalə' gaque ĉe ljuėžjcho do yichj do lažə'əcho na' gaquəlen ljuėžjcho.

Bito ĉžebcho Diozən'

¹⁹⁻²⁰ Nezecho de que naccho xi'in Dioz ben' choe' dižə' li ša chaque ĉe ljuėžjcho do yichj do lažə'əcho. Na' ša ĉchoj catə' choncho xbab lo'o yichjla'ažda'ochon' de que bito zaquə'əcho par əna Diozən' xi'ine' chio'o, cheyalə' əgwzenaguəchcho ĉe Diozən' cle ca ĉe xbab ĉechon'. Diozən' nombi'e yichjla'ažda'ochon', na' yelə' beņə' xenlaza' ĉe'enə' bagwcu'e' chio'o ca xi'ine'.

²¹ Le'e beņə' ĉacda' ĉhei, ša lo'o yichjla'ažda'ochon' nezecho de que bito napcho dolə', bito ĉžebcho Diozən'.

²² Na' bitə'ətezə de'e ənabechone' gonĉze'en ĉhedə' la' choncho can' none' mendadən' na' can' ĉazlaze'enə'.

²³ Na' de'e nin' de'en none' mendad goncho, gonlilažə'əcho Xi'ine' Jesocristən', na' gaque ĉe ljuėžjcho tocho yetocho can' none' mendadən'.

²⁴ Ša choncho can' none' mendadən' zotezə zocho len Diozən' na' Diozən' zotezə zoe' len chio'o. Na' nezecho de que le' zotezə zoe' len chio'o ĉhedə' babene' chio'o Spirit ĉe'enə' zon lo'o la'ažda'ochon'.

4

Caguə yoguə' benə' yo'o Spirit ĉe Diozən' lo'o yichjla'ažda'oga'aque'enə'

¹ Le'e beņə' ĉacda' ĉhei, bito šejle'ele xtižə' notə'ətezə beņə' ne' de que zo Spirit ĉe Diozən' lo'o yichjla'aždaogüe'enə', sino legonga'aque' prueb ša zo Spirit ĉe Diozən' lo'o yichjla'ažda'oga'aque'enə'. Zan beņə' bachaš yežlyo nga ĉhsə'onlaza'e' ĉasə'əne' de que ĉasə'əyixjui'e' de'en bagož Diozən' lega'aque'.

² Quinga gwaquã goncho prueb par ñezecho šã zo Spirit che Diozãn' lo'o yichjla'aždao' beña': Yoguã' beña' chso'e dižã' chasã'ane' de que Jesocristãn' naque' Dioz na' golje' beñaçh yežlyo nga, ñezecho yo'o Spirit che Diozãn' lo'o yichjla'ažda'oga'aque'ena'.

³ Beña' ca' cui chso'e dižã' de que Jesocristãn' naque' Dioz na' golje' beñaçh yežlyo nga, bito yo'o Spirit che Diozãn' lo'o yichjla'ažda'oga'aque'ena' na' chso'one' contr Cristãn' len xbab chega'aque'ena'. Babzeneto' le'e de que yidã beña' gonchgua contr Cristãn', na' ña'a banita' beña' yežlyo nga chso'one' ca'.

⁴ Xi'indaogua' a chzoile cui chejle'ele xtižã' beña' ca' chso'onlažã' chasã'ane' chasã'ayixjui'e de'en bagož Diozãn' lega'aque'. Chio'o naccho xi'in Dioz bagwzoicho cui chejle'echo chega'aque' cheda' Diozãn' ben' zo len chio'o chnabi'ache' ca gwxiye'ena' de'en zo len beña' ca' cui chse'ejle'e che Diozãn'.

⁵ Beña' ca' cui choso'ozenag che Diozãn' choso'ozenague' che ljeužjga'aque' cheda' yogue'e chso'e dižã' de'en chazlažã' la'ažda'omalga'aque'ena'.

⁶ Chio'o naccho xi'in Dioz na' yeziqũ'ãchlã beña' ca' zjãnombia' Diozãn' choso'ozenague' checho, na' beña' ca' cui zjãnaquã xi'in Dioz bito choso'ozenague' checho. Can' chac ñezecho noquã' beña' ca' yo'o lo'o yichjla'ažda'oga'aque'ena' Spirit che Diozãn' de'en choe' dižã' li na' noquã'ãga'aque'ena' yo'o lo'o yichjla'ažda'oga'aque'ena' gwxiye'ena' de'en choe' dižã' gũenlažã'.

Diozãn' chaquene' che beñaçhãn'

⁷ Le'e beña' chacda' chei, cheyalã' gague che ljeužjcho tocho yetocho cheda' Diozãn' chone' par niçh chio'o naccho xi'ine' chaque che ljeužjcho. Na' šã chaque che ljeužjcho naccho xi'in Dioz na' nombi'achone'.

⁸ Šã cui chaque che ljeužjcho, bitonã' gombi'acho Diozãn' cheda' bito choncho can' chone'ena'. Diozãn' chaquene' che beñaçhãn'.

⁹ Na' blo'e can' chaquene' checho ca de'en bsele'e Xi'ine' tlišã'ãna' yežlyo nga par niçh gatã' yela' mban zejlicãne che notã'ãtezcho gonlilažã'ãchone'.

¹⁰ Bito goquecho che Diozãn', lelen' goquene' checho na' bsele' Xi'ine'ena' gwdixjue' xtolã'ãchon' par niçh gaquã socho binlo len Diozãn'. Can' chaque Diozãn' checho.

¹¹ Le'e beña' chacda' chei, can' chaque Diozãn' checho, leczã can' cheyalã' gague che ljeužjcho tocho yetocho.

¹² Notono zo beña' bable'ine' Diozãn'. Pero šã chio'o chaque che ljeužjcho tocho yetocho, Diozãn' zotezã zoe' len chio'o na' chaquecho che' can' cheyalã'.

¹³ Ñezecho de que zotezã zocho len le' na' le' zotezã zoe' len chio'o cheda' Spirit che' nan' bsele'e par niçh zon lo'o yichjla'ažda'ochon'.

¹⁴ Na' neto' apostol ñezeto' na' cho'eto' dižã' de que Xacho Dioz na'ana' bsele' Xi'ine'ena' par niçh yoguã' no so'onlilažã' le' cui žjãya'aque' lao yi' gabilãn'.

¹⁵ Na' šã cho'echo dižã' de que Jeso'osan' naque' Xi'in Dioz, Diozãn' zotezã zoe' len chio'o na' chio'o zotezã zocho len le'.

¹⁶ Na' chio'o banezecho na' chejle'echo ca naquãn' chaque Diozãn' checho. Diozãn' chaquene' che beñaçhãn' na' šã zotezã zocho chaquecho che Diozãn', nachãn' zotezã zocho len Diozãn' na' le' zotezã zoe' len chio'o.

¹⁷ Bachaquecho che Diozãn' can' cheyalã' gaguecho che' šã zotezã zocho chaquecho che' do tyemp. Šã choncho ca' bito žebcho cata' ãžin žã choglaogũe'en che yoguã' chio'o beñaçh šã nocho napcho dolã', cheda' can' naquã yichjla'aždao' Jeso'os na'ana' can' banaquã yichjla'ažda'ochon' ña'a zocho yežlyo nga.

¹⁸ Šã chaquecho che Diozãn' can' cheyalã'ãna' bito bi de de'e žebcho, la' ca to castigon' naquãn checho chžebcho. Na' šã de bi de'e chžebcho, bito chaquecho che Diozãn' can' cheyalã'ãna'.

¹⁹ Chio'o chaquecho che Diozãn' cheda' zgua'atec le'ena' gwzolaogũe' chaquene' checho.

²⁰ Šã nacho de que chaquecho che Diozãn' na' chgue'itei ljeužjcho, chonlažã'ãchonã'. ¿Nacxa gonchonã' par gaguecho che Diozãn' ben' cui chle'icho? len chle'itei ljeužjcho na' cui chaquecho chega'aque'.

²¹ De'e ngan' non Diozãn' mendã gon chio'o chaquecho che', leczã cheyalã' gaguecho che ljeužjcho.

5

Chcuizã'cho de'e malãn' ca'alã

¹ Notã'ãtezcho naccho xi'in Dioz šã chejle'echo de que Jeso'os nan' Cristãn' ben' naquã Dioz. Na' yoguã'ãcho šã chaquecho che Xacho Diozãn' le'egatezãczã can' gaguecho che ljeužjcho, la' leczã xi'in Dioz ljeužjcho ca'.

² Chio'o naccho xi'in Diozən' nezecho de que chaque che ljuježcho chedə' chaquecho che Diozən' na' choncho can' none' mendad.

³ Šə chaquecho che Diozən', choncho can' none' mendadən'. Na' de'en none' mendad goncho bito naquən zdebə gonchon.

⁴ Šə naccho xi'in Dioz chzoicho chcuizə'əcho de'e malən' de'en de yežlyo nga par cui chonən chio'o gan. Na' de'en chonlilažə'əcho Jeso'osən' de'e na'anə' chzoicho chcuizə'əcho de'e malən' de'en de yežlyo nga par cui chonən chio'o gan.

⁵ Caguə nochlə chzoi chcuizə' de'e malən' de'en de yežlyo nga par cui chonən le' gan sino chio'o chejle'echo de que Jeso'os nan' naque' Xi'in Diozən'.

Diozən' cho'e dižə' de que Jesocristən' naque' Xi'ine'

⁶ Jesocristən' bide' yežlyo nga gwchoe' nis na' blalj xchene'enə' catə'an gwso'ote'ene'. Caguə bide' na' con gwchoaze' nisən', sino leczə blalj xchene'enə' catə'an gwso'ote'ene'. Na' Spirit che Diozən' cho'en xtižə'enə' na' dižə' de'en cho'en naquən de'e li.

⁷ Šonə testigw nitə' yoban' chso'e dižə' che Jesocristən', Xacho Diozən' na' ben' naquə Dižə'anə', na' Spirit che Diozən'. Na' tozə can' na Xacho Diozən' len can' na ben' naquə Dižə'anə', na' len can' na Spirit che Diozən'.

⁸ Leczə šonə testigw nitə' yežlyo nga, Spiritən' cho'en dižə' che Jesocristən'. Na' de'en gwchoa Jesocristən' nisən' leczə cho'en dižə' che'. Na' de'en blalj xchene'en catə'an gwso'ote'ene' le'egatezə chezo'en dižə' che'. Na' dižə' de'en chsoe' de'e quinga chotilən len dižə' de'en choe' Spiritən'.

⁹ Chejle'echo xtižə' beṇačən', len la' zaquə'əche xtižə' Diozən' de'en cho'e ne' de que Jesocristən' naque' Xi'ine'enə'.

¹⁰ Šə chonlilažə'əcho Xi'in Diozən', Diozən' cho'e dižə' che Xi'ine'enə' lo'o yichjla'ažda'ochonə'. Šə cui chonlilažə'əcho Diozən' chonchone' ca beṇə' güenlažə' chedə' cui chejle'echo dižə' de'en cho'e che Xi'ine'enə'.

¹¹ Dižə' nga choe' Diozən', de que babene' par nič de yelə' mban zejlicəne che notə'ətezcho ngodə'əcho txen len Xi'ine'enə'.

¹² De'e na'anə' šə chonlilažə'əcho Xi'in Diozən' de yelə' mban checho zejlicəne. Na' sə cui chonlilažə'əchone' ža, bito de yelə' mban zejlicəne checho.

Can' beyož cart nga de'en bzoj Apostol Juanna'

¹³ Cart nga babzoja' le'e bachonlilažə'əle Xi'in Diozən' par nič ənezele de que de yelə' mban zejlicəne chele.

¹⁴ Na' bito chžebcho goncho orasyon lao Diozən', chedə' la' Diozən' chzenagcze' checho con šə de'en chṇabechone' naquən de'e zaquə' nabechone'.

¹⁵ Na' ca naquən' nezecho de que le' chzenague' checho bitə'ətezə de'en chṇabechone', leczə ca' nezecho de que gone' de'en bagwṇabechone'enə'.

¹⁶ Šə nezecho to beṇə' ljuježcho beṇə' chonlilažə' Cristən' chone' de'e mal, cheyalə' nabecho Diozən' gaquəlene' le', na' Diozən' gone' par nič yezoe' binlə len le' de'e yoblə. Can' goncho par beṇə' chso'on de'e malən' de'en cui naquən par žjəya'aclene'en lao yi' gabilən'. De de'e mal de'en chso'on beṇə' de'en žjəya'aclene' lao yi' gabilən', na' bito nia' əṇabecho Diozən' gaquəlene' beṇə' chso'on len.

¹⁷ Chio'o beṇač napcho dolə' šə choncho bitə'ətezə de'e mal. Pero de de'e mal de'e choncho de'e cui chonən par yeyejcho lao yi' gabilən'.

¹⁸ Nezecho de que notə'ətezcho šə naccho xi'in Dioz bito choncho de'e mal, chedə' Jesocrist Xi'in Diozən' chcuasə' chcue'eje' chio'o nič gwxiye'enə' cui chzoin chio'o par šejle'echo chei.

¹⁹ Na' nezecho de que chio'o naccho xi'in Dioz, pero na' ca naquə yoguə'əlol beṇə' ca' cui choso'ozenag che Diozən', lega'aque' nite'e xni'a gwxiye'enə'.

²⁰ Na' nezecho de que Xi'in Diozən' babide' na' bagwlo'o be'eni' che'enə' lo'o yichjla'ažda'ochon' nič nombi'əcho Diozən' ben' zaquə' par güe'ela'ochə. Na' ngodə'əcho txen len Diozən' laogüe de'en ngodə'əcho txen len Xi'in Diozən' Jesocristən'. Dioz na'anə' zaquə'əcze' par güe'ela'ochone'. Le' chone' yelə' mban zejlicənən'.

²¹ Xi'in daogua'a bito nochlə šejni'alažə'əle mas que tozə Diozən' len Xi'ine' Jesocristən'.

De'e na'azən' chzoja' ṇa'a. *Juan*

Cart Egwchope De'en Bzoj San Juannə'

Nombi'acho de'en naquə de'e li na' cheyalə' gaque che ljuežjcho

¹ Diozən' gwleje' nada' par cho'a xtiže'enə' len le'e. Na' lao yelə' beṇə' golə chia' chzoja' le' no'olə len xi'ino' ca'. Diozən' gwleje' le'e par žjəyēzole len le'. De'e li chacda' chele, na' caguə toza' nada'anə', lenczə yoguə'əloj beṇə' ca' yelə' beṇə' ca' bazjənombi'e de'en naquə de'e li.

² Chaqueto' chele chedə' chio'o nezecho de'en naquə de'e li na' talenchon zejlicane.

³ Chṇaba' lao Xacho Diozən' na' Xi'ine' Xancho Jesocristən' sa'aclenšgue' le'e na' yesyə'əyaša' yesyə'əži'ilažə'əšgue' le'e na' so'onšgue' ca so cuezle binlo len xbab de'en yo'o lo'o yichjla'ažda'olen' chedə' la' nombi'ale de'en naquə de'e li na' chaquele che ljuežjle tole yetole.

⁴ Lechgualē bebeida' catə' gwnežda' de que balə xi'ino' ca' chso'one' can' ben Xacho Diozən' mendad goncho, əzja'aque' choso'ozenague' che de'en naquə de'e li.

⁵ Na' de'e cheyalə' goncho no'olə, gaque che ljuežjcho tocho yetocho, la' can' non Diozən' mendad goncho. Ca de'e nga nia' cheyalə' goncho, caguə naquən ca to mendad cobənə', de'e nezczecho dezd gwzolaacho chonjilažə'əcho Cristən'.

⁶ De'e ngan' goncho šə chaquecho che Diozən', goncho can' none' mendadən'. Catə'ən gwzola chonjilažə'əle Cristən' canan' gwnezele de que none' mendad gaque che ljuežjcho.

Zan beṇə' goxoayag chsa'aš yežlyo nga

⁷ Zan beṇə' goxoayag babesə'əchoj entr chio'o na' chaše' yežlyo nga. Lega'aque' chso'e dižə' chesə'əne' de que Jesocristən' ben' bidə na' golje' yežlyo nga bito naque' Dioz. Beṇə' can' zjənaque' beṇə' goxoayag na' chso'one' contr Cristən'.

⁸ Bito šejle'ele chega'aque', la' šə šejle'ele chega'aque' bito si'ile yelə' bala'aṇ de'en chene'e Diozən' gone' le'e laogüe de'en benle xšine'enə'. Legon par nič si'ile doxen yelə' bala'aṇ de'en chene'e Diozən' gone' le'e.

⁹ Notə'ətezcho šə chbejyichjcho de'en bsd əblo'i Cristən' na' chca'acho nez yoblə, bito zo Diozən' len chio'o. Pero šə zotezə zocho chzenagcho che de'en bsd əblo'i Cristən', Xacho Diozən' len Xi'ine'enə' nite'e len chio'o.

¹⁰ Šə no beṇə' yide' gan' zole par əgwšed əgwlo'ine' le'e, pero bito əgwšed əgwlo'ine' ca de'en bsd əblo'i Cristən', bito əgğüialaolene' ližlenə', na' bito ye'elene': "Gwyo'o ngalə beṇə' bišə'."

¹¹ Šə ye'echo le': "Gwyo'o ngalə beṇə' bišə'", zejen de que txenṇə' choncho de'e malən'.

Gone'ene' žjəlane'e lega'aque'

¹² De'e zan de'en de əṇia' le'e, pero bito che'enda' gwzojəcha'an le'e yiš chedə' yida' gan' zolenə' na' socho txen güe'elena' le'e dižə' cho'a par nič socho mbalaz juisy.

¹³ Xi'in' no'olə bilo'onə' chəsə'əguape' le'e diox beṇə' ca' leczə bagwlej Diozən' par žjəsyə'ənite'e len le'. De'e na'azən' chzoja' na'a. Juan

Cart Egwyõe De'en Bzoj San Juannə'

Apostol Juannə' ne' de que Gayon' chone' güen

¹ Diozən' gwleje' nada' par cho'a xtiže'enə' len le'. Na' lao yelə' beñə' golə' chia' chozoja' le' Gayo dao'. De'e li chacda' chio'.

² Gayo dao', chnaba' lao Diozən' de que syempr gaquə de'e güen len le', na' so' güen ca güennə' zo' lo'o yichjla'aždaogo'onə'.

³ Lechgualə bebeida' catə' besyə'ala'ac balə beñə' bišə'əcho ca' na' gwso'e dižə' can' chono' le' banone chio' de'e lin' na' bazdalenon'.

⁴ Bito bi bichlə de'e de de'e chebeida' ca de'e nga nezda' zdalenle de'e lin', le' na' len beñə' ca' yelə' nacle ca xi'ina'.

⁵ Le' Gayo dao', catə' chacleno' beñə' bišə'əcho ca' beñə' zjənaquə beñə' zita', chono' can' cheyalə' gon chio'o chonlilažə'əcho Jesocristən'.

⁶ Lega'aque' bagwso'e dižə' lao neto' chdopə chžagto' cho'ela'oto' Jesocristən' nga can' chacdo' chega'aque'. Na' batə'ətezə chəsə'ala'aque' gan' zo'onə' cheyalə' güe'ega'acco'one' šə bi de'en chəsə'əyāžjene' par yesyə'əgüe'e nezən' de'e yoblə. Can' cheyalə' goncho len yogua' beñə' ca' chso'e xtižə' Diozən'.

⁷ Bito bi chəsə'əzi'e che beñə' cui chse'ejle'e che Jesocristən' lao chaše' chəsə'əyixjui'e xtižə' Jesocristən'.

⁸ Chio'o ža, cheyalə' gaquəlencho yogua' beñə' bišə'əcho ca' chaš ca' na' ca' goncho txen len lega'aque' ca de'en chəsə'əyixjui'e de'en naquə de'e li.

Juannə' gwne' de que Diotrefesən' bito chone' güen

⁹ Bač bzoja' le'e chdopə chžagle cho'ela'ole Jesocristən'. Pero Diotrefesən' chene'ene' gaque' le'ezelaogüe beñə' blao entr le'e na' bito chzenague' chia'.

¹⁰ De'e na'ana' šə yida' dezlana'a le'e, lao ndopə nžagle gona' par yosa'alaže'e can' chone' contr neto' lao yelə' güilj gwrxan dižə' che'enə'. Na' caguə de'e na'azən' chone'. Leczə ca' bito chgüialaogüe' beñə' bišə'əcho ca' liže'enə' na' catə' balə chene'ele ggüialaoga'aclene' ližlenə' chžone' ggüialaoga'aclene'. Na' le'e chene'ele ggüialaole lega'aque'enə', chebeje' le'e ladjo beñə' ljuežjle ca' chəsə'ədopə chəsə'əžag chso'elaogüe'e Jesocristən'.

¹¹ Le' Gayo dao', bito gono' de'e mal can' chso'on beñə' mal ca', con gonczo' de'e güennə'. Šə choncho de'e güen nacbia' naccho xi'in' Dioz, pero šə choncho de'e mal bito ñe'e gombi'acho Diozən'.

Juannə' be'e dižə' ca güennə' chon Demetrian'

¹² Yogua'əlol beñə' chso'e dižə' güen che Demetrian'. Nla'alaon de que zdalene' de'e lin'. Le'egatezə ca' neto' cho'eto' dižə' can' chone' de'e güen. Na' nezele dižə' lin' cho'eto'.

Bene' xbab yesyə'əžaque' de'e yoblə

¹³ Bena' xbab gwzoja' le' de'e zan, pero bito che'enda' gwzojəcha'an le'e yiš.

¹⁴ Chbeza' yežagcho lgüegwzə na' socho txen güe'elen ljuežjcho dižə' cho'a.

¹⁵ Sošgo' binlo len xbab de'en yo'o lo'o yichjla'ažda'ogo'onə'. Beñə' migw chio'on nitə' nga chəsə'əguape' le' diox. Bguapšga beñə' migw cheto' ca' diox to toe'. De'e na'azən' chzoja' ña'a.
Juan

Cart De'en Bzoj San Jodasən'

Chzoje' beṇə' ca' zjənaque' lažə' na' Diozən'

¹ Nada' Jodas naca' beṇə' güen žin che Jesocristən', na' naca' beṇə' bišə' Jacobən'. Chzoja' le'e bagwlej Xacho Diozən' par nacle lažə' ne' enə' can' bagwleje' nada', le'e chcuasə' chcu'e'ej Jesocristən' len de'e malən' can' chone' len nada'.

² Chona' orasyon lao Xacho Diozən' chṇaba' gone' ca gacbe' ichele can' cheyašə' cheži' ilaže'e le'e na' can' chone' par chzo chbezle binlo len xbab de'en yo'o lo'o yichjla'ažda' olen' na' can' chaquene' chele.

Beṇə' ca' choso'osed choso'olo'ine' dižə' güenlažə'

³ Xi'indaogua'a, bachonchgua' xbab naquan' gwzoja' le'e to cart gwzejni'ichda' le'e can' babebej Jesocristən' yogua' chio'o chonlilažə'a chone' xni'a de'e malən'. Pero na' babenda' yeto rson chele na' na'a chonən byen chzoja' le'e chṇeyoida' le'e sole chech šejle'ele che dižə' li che Diozən'. Diozən' bene' par niç nyojan par chio'o bagwleje' niç naccho lažə' ne' enə', na' bito gwšə'en.

⁴ Banitə' baļə beṇə' entr le'e, beṇə' ca' chso'on t xen len le'e pero caguə do lažə'əga'aque'enə'. Bito choso'ozenague' che Diozən' na' chsa'əne' de que decza lsen goncho bitə'əteza yelə' zto' len cuerp chechon', chedə' nži'ilažə' Diozən' chio'o na' chezi'ixene' checho. Na' leczə chesə'əzoə' Xancho Jesocristən' ca'alə, len toza le' zaque'e par nabi'e yogua' beṇə'chan'. Cana'ate byoj Xtizə' Diozən' nan de que beṇə' ca' chso'on ca' yesə'əzi'e castigw che xtolə'əga'aque'enə'.

⁵ Na' la' anə'əczə baneze binlo can' goquan', che'enda' žjəsa'alazə'əle de que Diozən' bosle' beṇə' Izrael ca' lao na' beṇə' Egipto ca' cana' pero gwdechlə bnežjue' castigw che beṇə' ca' cui gwso'onlilaže'ene'.

⁶ Na' baļə angl ca' bito gwsa'azlaže'e de'en gwlo'o Diozən' lao na'aga'aque' so'one', na' de'e na'ana' gosə'əbejyichje' gan' gwnite'enə'. Na' Diozən' gwlo'e lega'aque' lo'o yech gabil gan' naquə lechgualə žchol, na' zjənga'ane' xte catə'əch əžin ža xen catə' gwnežjue' castigw chega'aque'enə' zejlicane, la' zjənaque' pres che Diozən' zejlicane.

⁷ Nach beṇə' ca' gwnitə' syoda Sodoman' na' syoda Gomorran' na' syoda' ca' zjənyechj žjəmbi'i lega'aquən gwsə'one' yelə' zto' len cuerp chega'aque'enə' na' besyə'əyiljze' ljuēžj beṇə' byoga'aque' par niç gwso'one' yelə' zto' chega'aque'. Na' ca de'en ben Diozən' bsele'e yi'insə' bzeyən syoda ca' na' cuich no gwnitə' na', chosnisən beṇə'chan' de que yogua' beṇə' cui choso'ozenag che Diozən' əsa'aque' castigw lao yi' gabilən' zejlicane.

⁸ Na' beṇə' ca' choso'osed choso'olo'i le'e dižə' güenlažə'əna' chso'one' can' gwso'on beṇə' Sodoma na' beṇə' Gomorra ca'. Chso'one' yelə' zto' che cuerp chega'aque'enə'. Bito chse'enene' nabi'a' Diozən' lega'aque'. Choso'ožia choso'onite' angl ca'. Chsa'əne' de que besə'əle'idaogüe'ene' de'e nan de lsen par so'one' de'e ca'.

⁹ Ca naquə angl əblaonə' ben' le Miguel catə'an gocyoze' de'e gwxyie'en por cuerp che de'e Moizezən', bito beyaxjene' tilə' de'e gwxyie'en de'en gwnen contr de'e Moizezən', con gože'en: "Xancho Diozən' tilə' le'."

¹⁰ Pero na' beṇə' ca' choso'osed choso'olo'i le'e dižə' güenlažə'əna' choso'ožia choso'onite'e bitə'əteza de'en cui chse'ejni'ime'. Gwxaquə'əlebəga'acquene' ca bia yixə' chedə' chso'one' porzə de'en na cuerp chega'aque'enə'. Na' de'en chso'ontezə chso'one' can' nannə' yesə'əbiayi'e zejlicane.

¹¹ Probchguazə beṇə' ca'. Chso'ontezə chso'one' de'e mal can' ben de'e Cainnə', na' chesə'əzelaže'e yesə'əzelene' mech əsçha'o can' ben de'e profet Balaannə'. Chso'one' contr Diozən' na' yesə'əbiayi'e can' gwžiyai' de'e Coren' ben' ben contr de'e Moizezən' cana'.

¹² Gwxaquə'əlebəga'acquene' ca to manch lao lachə' xi'ilažə'əna', la' žlac che'ej chaole t xen len lega'aque' par cho'ela'ole Xanchon', chso'elažə'əzeche' che'ej chsa'oxate'. Con chse'ej chsa'oteze' bi chse'enene'. Gwxaquə'əlebəga'acquene' ca bejw biž de'en nžiguə' be', na' ca yag frot de'en cui bi frot chbia catə' chžin tyemp chei, chedə' babgüizən na' banlažə' do loi. Gwxaquə'əlebəga'acquene' ca bejw biž na' ca yag frot de'e cui bi frot chbian chedə' bito zjəzaque'e.

¹³ Na' gwxaquə'əlebəga'acquene' ca nisdəon' de'en chas chatə' na' checho'onən bžin' lao yon' cho'a nisdə'ona'. Can' gwxaquə'əlebəga'acquene' chedə' de'en chso'one' na' dižə' de'en chso'echgüe' choso'olo'en yelə' zto' chega'aque'enə'. Na' leczə gwxaquə'əlebəga'acquene' ca to beljw de'en chde šalteza, chedə' Diozən' babžie' bia' yesyə'əžine' lo'o yech gabil gan' lechgualə naquə žchol na' gan' yesə'ənite'e zejlicane.

¹⁴ Gwzolaon tyemp che de'e Adannə' xte tyemp che Enoquan' goc gažə dia che Adannə'. Na' Enoquan' be'e dižə' che beņə' ca' chso'on can' chso'on beņə' ca' choso'osed choso'olo'i dižə' güenlažə', gwne': "De'e li Xancho Diozən' yide' len angl zan juisy che' ca'.

¹⁵ Na' əchoglaogüe'en che to to beņach šə zjanape' dolə' o šə cui zjanape' dolə'. Na' gone' ca sa'acbe'i yogua' beņə' ca' cui boso'ozenag che' de que lechgualə de'e mal juisy bagwso'one'. Na' gone' par nič žjəsyə'əza'alažə'e yogua' de'e malən' bagwso'one' de'en cui boso'ozenague' che'. Na' lecza gone' par nič žjəsyə'əza'alažə'e yogua' de'e mal de'en bagosa'əne' contr le'. Na' əgwnežjue' castigw che to toga'aque'."

¹⁶ Beņə' ca' cui choso'ozenag che Diozən' chəsə'əže'eše'e che', bitobi chesyə'əbeine', con chso'onteze' can' na la'ažda'omalga'aque'en, chso'on cuinga'aque' xen, na' choso'opeine' beņə' la' chse'enene' yoso'onežjo beņə' ca' lega'aque' mech.

Consejw de'en chnežjue' beņə' ca' chso'onlilažə' Jesocrisən'

¹⁷ Pero na' le'e xi'indaogua'a, cheyalə' žjəsa'alažə'əle de'en gwse' apostol che Xancho Jesocrisən' le'e antsla.

¹⁸ Gosə'əne': "Na'a cuina' yidə Xančon' de'e yoblə nitə' beņə' so'onzeche' yelə' zto' chega'aque' con can' na la'ažda'omalga'aque'enə', na' so'one' borl che de'en na Diozən'."

¹⁹ Beņə' ca' chso'one' par nič gwde gwdele can' chejni'ile xtižə' Diozən'. Con chso'one' can' chene'e la'ažda'omalga'aque'enə' chedə' bito yo'o Spirit che Diozən' lo'o yichjla'ažda'oga'aque'enə'.

²⁰ Pero na' le'e xi'indaogua'a, chejle'ele che dižə' li che Diozən' de'en naqə de'e güenchgua. Na' cheyalə' sotezə sole gonle can' nanna' par nič gaquə gonle can' chazlažə' Diozən'. Na' legon orasyon can' əgwzejni'i Spirit che Diozən' le'e.

²¹ Na' le'e so le'e gon par nič gacbe'ile de que chaque Diozən' chelen'. Xancho Jesocrisən' gone' par nič əbanle len le' zejlicane laogüe de'en cheyaša' cheži'ilažə'e le'e. Leso leyebi de'en gone' ca'.

²² Balə beņə' chso'onlilažə' Jesocrisən' chsa'aczejlažə'e šə cheyalə' yesə'ənaogüe' dižə' li che Diozən'. Legon par nič sa'acbe'ine' de que cheyalə' yesə'ənaogüe'en.

²³ Na' balə' ze'e gwzolaon chesə'ənaogüe' de'en choso'osed choso'olo'i beņə' güenlažə' ca'. Le'e yeyaše'e lega'aque' na' le'e co'oga'aque' nez güennə' lgüegwza. Na' le'e gapə cuidad par nič cui gonle de'e mal de'en chso'on lega'aque'.

Jodasən' cho'elaogüe'e Diozən'

²⁴ Cheyalə' güe'ela'ochio Diozən' la' le'enə' chac chone' ca cui əxopcho goncho de'e malən', na' chac chone' par nič bitobi de'e mal da' əchen yichjla'ažda'ochon' catə' əžin žan' le'icho yelə' chey che'eni' che'enə'. Na' cana' lechgualə yebeicho.

²⁵ Tozə Diozən' zaque'e par güe'ela'ochone', na' naque' le'ezelaogüe beņə' sin'. Babebeje' chio'o xni'a de'e malən' ca de'en bsele'e Xancho Jesocrisən' gwdixjue' xtolə'əchon'. Ledoye'ela'ochə' chedə' naque' le'ezelaogüe beņə' zaque'e na' beņə' blao na' chnabi'e doxenlə. Zocze' dezd catə'an cuina' xə yežlyon' na' par zejlicane. Na' naque' Xan yogua' beņach, yogua' bia chsa'aš na' yogua' biquə'əchlə de'e zjəde. Ca'ašgacə gaquə.

De'e na'azən' chzoja' n'a. *Jodas*

De'en Bzejni'i Jesocristán' San Juannə' Nič Bzoje'en Par Chio'o

Diozən' bene' par nič Jesocristán' bzejni'ine' San Juannə' de'e quinga

¹ Nada' Juan naca' beṇə' güen xšin Jesocristán'. Diozən' blo'ine' Jesocristán' de'e quinga de'en bzejni'ine' nada' par gwlo'ida'an yeziqwa'əchlə beṇə' chso'elaogüe'ene'. Bsele'e angl che'enə' par bzejni'ine' nada' de'e quinga par nič ənezecho de'e ca' gaquə'lgüegwza.

² Na' bacho'a dižə' che yoguə'əlol de'e quinga de'en blo'ine' nada', na' yoguə'əlol de'en bzene Diozən' nada' na' de'en bzejni'i Jesocristán' nada'.

³ Mbalaz nıtə' beṇə' ca' yoso'olabe' de'e nga chzoja' nga de'en bzene Diozən' nada'. Na' mbalaz nıtə' beṇə' ca' əse'ene len catə' beṇə' yobla yoso'olabe'en. Mbalaz nıte'e šə yoso'ozenague'en, chedə' bazon gaquə' de'e ca' blo'ine' nada'.

Juannə' chzoje' beṇə' ca' chso'elao' Jesocristán' yež ca' gažə

⁴ Nada' Juan chzoja' le'e chdopə chžagle cho'ela'ole Jesocristán' Asian', le'e nıtə'əle yež ca' gažə. Diozən' sošgue' gaquəlene' le'e na' gone' ca so cuezle binlo len xbab de'en yo'o lo'o yichjla'ažda'olen', Dioz ben' bazoczə catə'an bxi'e yežlyon', na' ca'aczən' soe' catə'an yeyož yedon. Na' Spirit che Diozən' de'en naquə ca gažə Spirit zon lao Diozən' gan' chi'e chnabi'e na' sošgan gaquəlenən le'e na' gonən ca so cuezle binlo len xbab de'en yo'o lo'o yichjla'ažda'olen'.

⁵ Na' leczə Jesocristán' sošgue' gaquəlene' le'e na' gone' ca so cuezle binlo len xbab de'en yo'o lo'o yichjla'ažda'olen'. Jesocristán' be'e dižə' che Diozən' na' xtiže'ena' naquən de'e li. Len' naque' beṇə' nech bebane' ladjo beṇə' guat ca' par chnabi'e. Jesocristán' chnabi'e notə'əteza beṇə' chəsa'anabia' yežlyo nga. Chaque Jesocristán' checho na' babnitlaogüe' xtolə' chio'o chonlilažə'əchone' ca de'en blalj xchene'ena' catə'an bnežjw cuine' gwso'ote'ene'.

⁶ Gwleje' chio'o par nič nabi'acho txen len le' ca no rei na' par nič sotezə socho güe'ela'ocho Xe' Diozən' can' gwnıtə'əteza gwnıtə' bəxoz che beṇə' Izrael ca' gwse'ejni'alaže'e Diozən'. Jesocristán' chnabi'e zejlıcaṇe. Ledoye'ela'oche' na'a na' zejlıcaṇe. Can' gonšgaczo.

⁷ Le'e gon xbab, la' Jesocristán' yetje' to lo'o bejw. Na' yoguə'əlol beṇə' yesə'ale'ine' le', lente beṇə' ca' gwso'ot le', na' beṇə' ca' ža' doxen yežlyon' yesə'əbežyaše'e de'en cui gwso'onlilaže'ene'. Can' na Diozən', na' ca'aczən' gaquə.

⁸ "Nadan' naca' ben' ben yežlyon' na' ben' gon par nič te chei." Can' na Xancho Diozən' ben' napə le'ezelaogüe' yelə' guac xenṇə', ben' bazoczə catə'an bxi'e yežlyon', na' ca'aczən' soe' catə'an yeyož yedon.

Juannə' ble'idaogüe'ene' Cristən' len yelə' chey che'eni' che'ena'

⁹ Nada' Juan naca' beṇə' bišə'əle chedə' naccho txen cho'ela'ocho Cristən' na' txenṇə' choso'ochi' choso'osaquə' beṇə' chio'o. Txenṇə' chnabia' Diozən' chio'o na' txen chgo'o chchejlažə'əcho len yoguə' de'en chac checho chedə' ngodə'əcho txen len Jesocristán'. Zoa' isla nga de'en ne' Patmos la' naca' pres por ni che de'en bagwdixjui'a xtižə' Diozən' na' babi'a dižə' che Jesocristán'. De'e na'anə' baboso'osele'e nada' nga.

¹⁰ Na' to ža dmiğw Spirit che Diozən' benən par nič ble'idaogüe'eda' to de'en ble'idaogüe'eda'. Na' benda' gwne to beṇə' coža'anə' zižjochgua ca zižjon' chbež trompet.

¹¹ Na' gože' nada': —Nadan' naca' ben' ben yežlyon' na' ben' gon par nič te chei. Bzoj dižə' che de'e quinga le'idaogüe'edo'ona' to le'e libr na' selo'o libran' lao beṇə' ca' chesa'ədoṇə chesa'əžag chso'elaogüe'e nada' Asia, beṇə' ža' Efeson' na' Esmirna, na' Pergamo, na' Tiatira, na' Sardis na' Filadelfia na' Laodisea.

¹² Na' gwyechja' bgüia' non' cho'elen nada' dižə' na' ble'ida' gažə candelər de or.

¹³ Na' gwchol' candelər ca' gažə ble'ida' Xi'in Diozən' ca to beṇəch. Na' nyaze' to lachə' toṇə de'e bžinte yen ni'e. Na' nchej cho'alcho'ena' to sinš de or.

¹⁴ Na' yišə' yichje'ena' naquən ca xa xilə' šyiš na' ca be'eyə'. Na' jelaogüe' ca' chsa'actitən ca to yi' de'e chalə'ənin.

¹⁵ Na' ble'ida' ni'ena' chactitən ca to brons de'e nıachgua catə' xoan lao yi'. Na' xne che'ena' nenən ca chziž yaon' catə' dechguan.

¹⁶ Na' noxə'e gažə beljw len ne'e lıchan', na' cho'ena' zo to spad de'e nla chopə la'ate. Na' ble'ida' cho'alaogüe'ena' can' chle'icho bgüizən' catə'an chnıachguan.

¹⁷ Na' beyož ble'ida'ane' bgüixa' xni'ena' gota' šlat. Nach blı ne'e lıchanə bexe'e na'anə' na' gože' nada': —Bito žebo'. Nadan' naca' ben' ben yežlyon' na' ben' gon par nič te chei.

¹⁸ Nada' naca' Dioz ben' zo zejlicane. Ca de'en bida' goca' beṇach gwso'ote' nada', pero na' bebana' ladjo beṇə' guat ca' na' soa' zejlicane. Nada' napa' yelə' gwnabia' par əṇia' batən' sa'at to to beṇə' na' napa' yelə' gwnabia' par əṇia' non' žjəya'ac gabilən'.

¹⁹ Na' ža bzoj dižə' che de'e ca' bable'ido', na' che de'e ca' chac na'a na' che de'e ca' ze'e za'ac.

²⁰ Bito gwyejni'ido' che beljw ca' gažə de'en noxa' na' che candeler de or ca' gažə. Beljw ca' gažə zejen gažə beṇə' ca' zjəyo'o lao ne'i beṇə' ca' chesə'ədopə chesə'əžag chso'ela'ogüe'e nada' yež ca' gan' mbane Asia. Na' candeler ca' gažə zejen gaž cuen beṇə' ca' chso'onlilažə' nada'.

2

Dižə' de'en be'e par beṇə' ca' chso'elao' Jesocrisən' yež ca' gažə: De'en gože' beṇə' Efeso ca'

¹ Bzoj de'e nga par ben' naquə lao ne'i beṇə' ca' chesə'ədopə chesə'əžag chso'ela'ogüe'e nada' Efeson' na' yo'one' de que nada' ben' ble'ido' noxa' gažə beljw ca' na' chgüia chya' candeler de or ca' gažə, əchnia' dižə' quinga:

² “Neze nle'ida' ca güennə' chonle, can' zotezə zole chonle xšina'anə' sin cui chjəxaquə'əlažə'əle, na' can' cui chzenagle che beṇə' mal ca' chsə'əna zjanaque' apostol. Babgüiale can' chso'one' na' chacbe'ile de que bito bselə'əga'aca'ane'.

³ Chgo'o chchejlažə'əle len de'en chyi' chzaquə'əle na' zotezle chonle xšina'anə' sin cui chjəxaquə'əlažə'əle.

⁴ Pero de to de'en cui chazlažə'a can' chonle, cuich chaquele chia' can' bagoquele chia' antslə.

⁵ Le'e gon xbab can' gocchgüeile chia' antslə na' cuich chachtequele chia' na'a. Le'e gon xbabən' par nič yedinjele de'en cuich chachtequele chia' na' legonch can' benle antslə. Na' šə cui yedinjele de'e malən', yedayena' le'e castigw nach yebižə'a len le'e. Bitoch gacle candeler chia' šə cui yedinjele xtolə'əlen'.

⁶ Pero la'anə'əczə bito chonle doxen can' chazlažə'anə', chebeida' de que chgue'ile de'e malən' chso'on beṇə' ca' zjanzi' nicolaitos, la' leczə nada' chgue'ida' can' chso'one'ənə'.

⁷ Le'e žia nagle de'e chene, le'e gwzenag che de'en bagwna Spirit che Diozən' par le'e chdopə chžagle cho'ela'ole nada'. Notə'ətezle chzoile cui chzenagle che de'e malən', gua'a latjə gaole froṭən' de'en chbia lao yag yelə' mbannə' de'en zo gan' zo Diozən'."

De'en gože' beṇə' Esmirna ca'

⁸ Na' leczə bzoj ben' naquə lao ne'i beṇə' ca' chesə'ədopə chesə'əžag chso'ela'ogüe'e nada' Esmirnan'. Bzoje' gože' de que nada' naca' ben' ben yežlyon' na' ben' gon par nič te chei. Na' gwso'ote' nada' lao bida' goca' beṇach pero bebana' ladjo beṇə' guat ca'. Na' leczə yo'one' de que nada' əchnia' dižə' quinga:

⁹ “Neze nle'ida' ca güennə' chonlen', na' neze nle'ida' can' choso'ochi' choso'osaquə' beṇə' le'e na' can' nyašə'achgua chac chele. Pero la'anə'əczə banga'anyašə'əle lechgualə mbalaz zole. Nezda' can' choso'ožia choso'onita' beṇə' gwlaž chele ca' le'e, beṇə' ca' gwsa'alje' lao dia che de'e Izraelən'. Lao Diozən' bito zjanaque' beṇə' Izrael sino zjəncodə' ljuežje par chso'one' txen len gwxiye'ənə' de'en le Satanas.

¹⁰ Bito žeble de'e ca' ze'e za'ac de'en saquə'əzi'ile. Gwxiye'ənə' gonən' ca yessə'yixjue' balle ližya par nič ca' co'oyelə'ən le'e cüejiyichjle xtižə'anə'. Lao ši ža saquə'əzi' saquə'əyašə'əle. Pero na' lesotezə leso legwzenag chia' la'anə'əczə šə so'ote' le'e por ni che de'en chzenagle chia'. Na' šə sotezə sole gwzenagle chia' nachən' gona' ca əbanle len nada' zejlicane.

¹¹ Le'e žia nagle de'e chene, le'e gwzenag che de'en bagwna Spirit che Diozən' par le'e chdopə chžagle cho'ela'olene'. Notə'ətezle chzoile cui chzenagle che de'e malən', bito gac chele can' gac che beṇə' ca' yesə'əzaquə'əzi'e zejlicane, de'en nacho yelə' got əgwchope."

De'en gože' beṇə' Pergamo ca'

¹² Na' leczə bzoj ben' naquə lao ne'i beṇə' ca' chesə'ədopə chesə'əžag chso'ela'ogüe'e nada' Pergamon'. Bzoje' gože' de que nada' ben' ble'ido' zo spadən' cho'anə' de'e nla' chopə la'ate əchnia' dižə' quinga:

¹³ “Nezda' de que zole lao syodan' gan' chnabia' Satanasən' na' gan' lechgualə choso'ozenag beṇə' chei. Neze nle'ida' ca güennə' chonle, can' zotezə zole chonlilažə'əle nada' na' can' cui chbejiyichjle xtižə'anə' de'en chejle'ele chei, na' nic catə'an gwso'ote' Antipasən' gan' zolen', ben' gwzotezə gwzo be'e dižə' li' chia'anə' lao syoda chele gan' zo Satanasən'.

¹⁴ Pero de to chopə de'en chonle de'en cui chazlažə'a. Niṭə' balle chonle de'e malən' ca de'en bzejni'i de'e profet Balaannə' de'e Rei Balaquən'. Na' Balac na'anə' bene' ca bessə'əxopə beṇə' Izrael ca' gwso'one' de'e malən', zane' gwsa'ogüe' yelə' guao de'en naquə che lgu'a lsaquə'ən gwse'ejni'alaze' e na' boso'oža' xtoga'aque' lao gwse'ejni'alaze' e lgu'a lsaquə' che beṇə' Moab ca'.

¹⁵ Leczə can' chac len le'e, baļle naole de'en nac ca' de'en chsed chlo'i beņə' ca' zjənzi' nicolaitos de'enə' chgue'ida'.

¹⁶ De'e na'anə' le'e yedinjele de'e malən' chonļe. Šə cui yedinjele de'e malən' chonļe, yida' lġuegwəzə na' gona' par gacle castigw, la' xtiža'anə' gwxaquə'əleben ca to spad.

¹⁷ Le'e žia nagle de'e chene, le'e gwzenag che de'en bagwna Spirit che Diozən' par le'e chdopə chžagle cho'ela'ole nada'. Notə'ətezle chzoile cui chzenagle che de'e malən', gona' le'e yogua'əļoļ de'en chyažjele par sole mbalaz yoban' zejlicaņe, na' gona' yej fin par to tole niç əņezele de que chebeida' le'e. Na' le'e yejən' nyoj to la de'e cobə na' ben' goxə' yej na'azə əņezele' bin' nyojən."

De'en gože' beņə' Tiatira ca'

¹⁸ Bzoj de'e nga par ben' yo'o lao ne'i beņə' ca' chesə'adopə chesə'əžag chso'ela'ogüe'e nada' Tiatiran'. Bzoje' gože' de que nada' naca' Xi'in Diozən' ben' ble'ido' chsa'actit jəlaogua'anə' ca to yi' de'en chalə'əniņ na' ni'anə' ca to brons de'en lachgua. Na' yo'one' de que nada' əchnia' dižə' quinga:

¹⁹ "Neze nļe'ida' de'e güenna' chonļe, na' can' chaquele chia' na' che ljeužj beņachle, can' chonļilažə'əle nada' na' can' chaclen ljeužjle. Nezdə' can' chgo'o chchejlažə'əle len bitə'ətezə de'e chac chele, na' nezdə' chonchle güen nā'a cle ca can' babenļe catə'an gwzolaole chonļilažə'əle nada'.

²⁰ Pero na' chonļe de'e cui chazlažə'a can' cho'ele latjə par niç no'olən' gwxaquə'əlebene' ca de'e Reina Jesabelən' chsed chlo'ine' le'e ne' de que cho'e xtižə' Diozən'. Chxoayague' balə le'e chonļilažə'əle nada', che'e le'e de que naquən güen əgwšə' xtab de'en yo'o lo'o la'azda'olen' na' bin' chebeile. Na' gona' par niç to tole sole mbalaz o si'ile castigw segon naquən' babenļe.

²¹ Babnežjua'ane' tyemp par yedinjene' de'e mal ca' chone', pero bito chene'ene' yedinjene'en.

²² De'e na'anə' gona' par niç gaquə'šenene', na' le'e chonļe txen len le', gona' par niç əžaglaochgualə šə cui cuejyichjle cuich gonļe de'e mal de'en chsedene' le'e chonļe.

²³ Na' ca naquə beņə' ca' bagosə'əbejyichje' xtiža'anə' par choso'osed choso'olo'ine' de'e malən' gožga'aque' de que gotga'aca'ane'. Na' catə' gona' ca' yogua'əļoļ le'e chdopə chžagle cho'ela'ole nada' gata'ətezə, gacbe'ile de que neze nļe'icžada' xtab de'en yo'o lo'o la'azda'olen' na' bin' chebeile. Na' gona' par niç to tole sole mbalaz o si'ile castigw segon naquən' babenļe.

²⁴ Pero na' le'e yelə'ale zole Tiatiran', le'e cui naole de'en chsed chlo'i no'olən' na' cui nsedle de'en chəsə'əne' chse'ejni'ine' che Satanasən' de'en ngašə'an len beņə' yeziquə'əchlə, bito nia' bichlə de'e cheyalə' gonļe.

²⁵ Con sotezə sole gonļe de'e güenna' par niç bachonļe ca' catə'an yida' de'e yoblə.

²⁶ Notə'ətezle chzoile cui chzenagle che de'e malən' na' zotezə zole chonļe can' chazlažə'anə' xte catə'an yida' de'e yoblə, gona' par niç nabi'ale nasyon ca' txen len nada'.

²⁷ Ca Xa'anə' babene' par niç chnabia'aga'aca'an, leczə can' le'e nabi'alen txen len nada' na' goncho ca yesə'əzəxjwyichj beņə' nasyon ca', na' əgwžiyai'iga'acchone'.

²⁸ Na' gona' par niç gombi'ayanə'əle nada' len yelə' chey che'eni' chia'anə', nadan' gwxaquə'əlebada' ca beljw xsilən'.

²⁹ Le'e žia nagle de'e chene, legwzenag che de'en bagwna Spirit che Diozən' par le'e chdopə chžagle cho'ela'ole nada'."

3

De'en gože' beņə' Sardis ca'

¹ Bzoj de'e nga par ben' naquə lao ne'i beņə' ca' chesə'dopə chesə'əžag chso'elaogüe'e nada' Sardisən'. Bzoje' gože' de que Spirit che Diozən' de'en naquə ca gažə spirit zon len nada' na' gože' de que naca' ben' ble'ido' noxə'a gažə beljw ca', na' nada' əchnia' dižə' quinga: "Neze nļe'ida' can' chonļen'. Nezdə' can' chəsə'əna beņə' de que nable yelə' mban zejlicaņen', pero zanļe nacle ca beņə' guat par len nada' de'en cui chzenagle chia'.

² Leyeban bin' chonļe, legonļilažə'əch nada' na' legaquəche chia' na'a žlac cuinə' yeyož cuejyichjle nada'. Nezdə' de que Diozən' bito chebeine' can' chonļe, Dioz ben' leczə cho'elaogua'a.

³ Le'e žjsa'alažə' xtiža'anə' de'en bosozejni'i beņə' le'e na' de'en bzenagle chei antslə. Le'e gwzenag chei de'e yoblə na' yedinjele de'e malən' chonļe. La' šə cui gonļe xbab yedinjele de'e malən' yedəyena' le'e castigw na' senyala' le'e can' chon to beņə' bguan ben' chidə ca orən' cui chonļe xbab yide'.

⁴ Na' la'anə'əczə zanļe zole Sardisən' cui chonļe can' chazlažə'anə', bia'aczə ne'e nitə' baļle cui da əchen de'e malən' yichjla'azda'olen'. Na' le'e cui bi de'e mal da chen yichjla'azda'olen',

gwžin ža catə' le'e talenle nada' gan' zoa'anə' na' chazle lachə' šyış, chedə' le'e zaquə'əle par talenle nada'.

⁵ Notə'ətezle chzoile cui chzenagle che de'e malən', guacua' le'e lachə' šyış na' bito yoxia' lalen' le'e libr' chia' gan' nyoj la beṇə' ca' zjənapə' yelə' mban zejlicane. Na' gua'a dižə' len Xə' Diozən' na' len angl' che' ca' de que bagwcuə'a le'e ca xi'ina'.

⁶ Le'e žia nagle de'e chene, legwzenag che de'en bagwna Spirit che Diozən' par le'e chdopə' chžagle cho'ela'ole nada'."

De'en gože' beṇə' Filadelfia ca'

⁷ Bzoj de'e nga par ben' naquə' lao ne'i beṇə' ca' chesə'ədopə' chesə'əžag chso'elaogüe'e nada' Filadelfian'. Bzoje' gože' de que nada' naca' beṇə' la'aždao' xi'ilažə' juisy na' syempr' chona' can' ania'anə'. Nada' chnabia' doxenle can' bagwnabia' de'e Rei Dabin' Izraelən'. Napa' yelə' chnabia' par əṇia' non' yedəso len nada' na' non' cui yedəso len nada'. Na' notono gaquə' gon par niç gwš'a'a can' əṇia'anə'.

⁸ Bzoje' gože' de que nada' əchnia' dižə' quinga: "Neze nle'ida' ca güenṇə' chonle. Na' la'aṇə'əczə' cui naquə' zanle, zotezə' zole chonle can' əṇia'anə' na' bito chbejyichjle de'en chonlilažə'əle nada'. De'e na'anə' babena' par niç nitə' beṇə' zan beṇə' chse'enene' yoso'ozenague' che xtižə' Diozən' de'e güe'elenle lega'aque' na' notono no gaquə' gwžon par cui chixjue'ilen lega'aque'.

⁹ Na' ca naquə' beṇə' ca' gwsə'aljə' lao dia che de'e Izraelən' beṇə' ca' zjəncodə' ljuežje chso'one' txen len Satanəsən', lao Diozən' bito zjənaque' beṇə' Izrael. Chso'onlažə'e chəsə'əne' chebei Diozən' lega'aque'. Na' gona' par niç yesə'əzo xibga'aque' laolen' yesə'əne' de que nacle beṇə' zaquə'e len nada' na' sa'acbe'ine' de que chacda' chelen'.

¹⁰ Na' ca naquə' zotezə' zole chzenagle che xtižə'ana' de'en cho'en dižə' can' bguo'o bchejlažə'a len de'e mal de'en goquə' chia', nada' gona' par niç yechojle güen catə' əžin or saquə'əzi'ichgua yoguə' beṇə'əchən'. Cana' la'alao nac chon to to beṇə'əchən', šə' chzenague' chia' o šə' chzenague' che de'e malən'.

¹¹ Bazon əžin ža yida' de'e yoblə. Lesotezə' leso legon de'e güenṇə' par niç ca' bito bi gwžon gona' ca əbanle len nada' zejlicane.

¹² Notə'ətezle chzoile cui chzenagle che de'e malən', gona' par niç sole txen len Diozən' zejlicane, Dioz ben' cho'elaogua'a. Na' zejlicane yega'anlenlene'. Na' gona' par niç gacle xi'in' Diozən' zejlicane, na' sole syoda Jerosalen de'e naquə' de'e cobə, syoda che Diozən' de'en chi' yoban' de'en gwletje' lao yežlyon'. Na' gwzoja' lao xga to tole la'anə' de'en naquə' de'e cobə.

¹³ Le'e žia nagle de'e chene legwzenag che de'en bagwna Spirit che Diozən' par le'e chdopə' chžagle cho'ela'ole nada'."

De'en gože' beṇə' Laodisea ca'

¹⁴ Bzoj de'e nga par ben' naquə' lao ne'i beṇə' ca' chesə'ədopə' chesə'əžag chso'elaogüe'e nada' Laodisean'. Bzoje' gože' de que nada' naca' ben' chon par niç chac can' che'enda'anə'. Cho'a dižə' de'en bagwna Diozən' nada' na' naquən de'e li. Nada' bena' yoban' na' yežlyon', beṇə'əch, angl, bia chsa'aš na' yeziqwa'əchlə de'e zjəde.

¹⁵ Bzoje' gože' de que nada' əchnia' dižə' quinga: "Neze nle'ida' can' chonlen', bito chgue'ile nada' pero ni que chaquele chia' do yichj do lažə'əle. Yebeichləda' žalə' chgue'ile nada' o žalə' chaquele chia' do yichj do lažə'əle.

¹⁶ Na' laogüe de'en cuitec chonle cas' chia' na' cui chaquele chia' do yichj do lažə'əle, la'aṇə'əczə' bito chgue'ile nada', bia'acəzə' žin ža cuejeyichja' le'e cuich gonada' le'e ca xi'ina'.

¹⁷ Le'e nale zole mbalaz, na' de que chonle de'e güen juisy, na' de que bito bi bi chac fal't chele par niç yebei Diozən' le'e. Bito chache'ile de que de'e malchguan' chonle na' de'e malchguan' gaquə' chele. Bito chebei Diozən' le'e. Nchoj yichjla'ažda'olen' na' nacbia'axejə chonle de'e malən'.

¹⁸ De'e na'anə' chona' le'e consejw legonlilažə' nada' par niç gona' ca gacle beṇə' güen can' naca'anə'. Le'e yedinje xtolə'olen' par niç gaquə' la'ažda'olen' xi'ilažə' na' cuich gonle de'e malən' lao Diozən'. Na' le'e güe' latjə' yocobə' Diozən' xbab' chelen' par niç šo'o be'eni' che'ena' lo'o yichjla'ažda'olen'.

¹⁹ Notə'ətezə' beṇə' chacda' chei cho'ane' consejw na' chona'ane' castigw cata' chone' de'e mal. De'e na'anə' le'e cuec yichjle par yedinjele xtolə'əle ca'.

²⁰ Gwxaquə'əlebəda' ca to beṇə' zecha cho'a puert' chelen' chne' na' chsiže' le'e puertən'. Notə'ətezle šə' gwzenagle chia' na' šə' əsaljwle par šo'a, yedəso'a len le'e na' gona' par niç sole mbalaz txen len nada'.

²¹ Na' notə'ətezle šə' chzoile cui chzenagle che de'e malən', gona' par niç cue'elenle nada' gan' chi'a chnabi'a, ca nada' chi'ilena' Xə'anə' chnabi'ato' dezd catə'an beyož' bzoa' gwxiye'enə' xni'anə'.

²² Le'e žia nagle de'e chene, legwzenag de'en bagwna Spirit che Diozən' par le'e chdopə chžagle cho'ela'ole nada'."

4

Ble'idaogüe'ene' Diozən' chi'e chnabi'e yoban'

¹ Beyož bzoja' de'e ca' gwne' nada', bgüia' na' ble'ida' nyaljo to puert yoban' na' benda' cho'elen ben' nada' dižə, ben' benda' de'e nechən' ben' naquə xne che'ena' žižjochgua ca žižjon' chbež trompet. Lecze'en gwnechcze' nada' de'e yoblə, gwne': —Gwyep gan' zoa' nga par nič gwzejni'ida' le' de'e ca' ze'e gaquə.

² Nach ca orən' ben' Spirit che Diozən' par nič ble'idaogüe'eda' Diozən' gan' chi'e yoban' chnabi'e.

³ Na' ble'ida' ben' chi' chnabia' naque' ca to de'e chactit, ca yej fin de'en nzi' jasje na' cornalina. Na' to de'en naquə ca to yitə' gwychjən gan' chi'ena' de color ga' ca yej fin de'en ne' esmeralda.

⁴ Na' cuit cue'ej Diozən' gan' chi'e zjəchi' tapechoa beṇə' golə beṇə' blao beṇə' chəsə'anabia' txen len le'. Zjənyaze' lachə' šyiš na' zjəzo coron de or yičj to toga'aque'.

⁵ Na' gan' chi' Diozən' chep yes na' chac sšag, na' chašjw chtin. Na' laogüe'ena' nitə' gažə yi' de'e chalə'anin. Na' yi' ca' gažə zjənaquən Spirit che Diozən'.

⁶ Na' laogüe' gan' chi'ena' nžiljw to de'e chle'icho ca to nisdao' de bidr o de be'eyə'.

Na' nitə' tap bia gan' chi' Diozən', tgüjəb nitə' cuiten' čopə la'ate, yetob čože'ena' na' yetob laogüe'ena', na' žia de'e zan jəlaoga'acquəb delant na' traslə.

⁷ Bia nechən' naquəb ca to leon, na' bia əgwchopen' ca to go'on, na' cho'aloa bia əgwyonən' naquən ca cho'aloa beṇəč, na' bia əgwdapən' naquəb ca to bsia bian' chzo.

⁸ Na' to to bia ca' tap žia xop güejə xilə'əga'acquəb, na' doxen cuerp chega'acquəbən' žia de'e zan jəlaoga'acquəb lo'olə na' fuerlə. Na' do ža do yel bito chəsə'əbezəb, yapəyoe chəsə'anab: Lečgualə beṇə' la'aždao' xi'ilažə' juisy naquə Xancho Diozən' ben' napə le'ezelaogüe yelə' guac

xen.

Bazocze' catə'an bxi'e yežlyon', na' ca'aczən' soe' catə'an yeyož yedon.

⁹ Na' yoguə' las catə' bia ca' chso'eb dižə' chso'ela'ob Diozən' ben' chi' chnabia' ben' zocə zejlicane, yoguə' laste catə'an chso'eb yelə' bala'an na' yelə' choxčwlen che',

¹⁰ beṇə' golə beṇə' blao ca' tapechoa chəsə'əzo xibga'aque'en lao Diozən' ben' zo zejlicane chso'elaogüe'ene' na' choso'onite' coron chega'aque'en xni'ena', chəsə'əne':

¹¹ Xantə' Dioz, len' beno' beṇəč, angl, bia ca' ža', na' biquə'əchlə de'en zjəde, čhedə' can' gwyazlažə'o na' čhedə' go'ondo' nitə' beṇəč, angl, bia ca' ža' na' biquə'əchlə de'en zjəde.

De'e na'anə' zaquə'əczo' par chnabi'o, par si'o yelə' bala'an, na' par əyjejaogüo'o.

5

Ben' gwxaquə'əlebe ca xilə' dao' gwso'ot beṇə' Izrael ca' par gwnitlao xtolə'əga'aque'ena'

¹ Na' ble'ida' Dioz ben' chi' chnabia' noxə'e to rollo de'en nyoj čopə la'ate na' nyeyjon len gažə sey.

² Na' ble'ida' to angl gual na' gwne' žižjo: —žNon' zaquə' par əgwzoxje' sey ca' par nič šaš rollon'?

³ Pero ni que no nitə'əzə yoban', ni lao yežlyon' ni gan' ža' beṇə' guat ca' no gaquə gwzaše' rollon' na' ni par əggüiaze'en.

⁴ Na' lečgualə gwchežə' de'en cui no de beṇə' zaquə' par əgwzaše' rollon' na' par gwlabə'en na' ni par əggüiaze'en.

⁵ Nach to beṇə' golə beṇə' blao entr beṇə' ca' zjəchi' cuit cue'ej Diozən' gože' nada': —Bito cuežə'. Jesocrisən' ben' gwxaquə'əlebe ca to leon laogüe de'en babzoe' gwxiye'ena' xni'ena', le'ena' zaque'e par əgwzaše' rollon' na' par əgwzoxje' sey ca' gažə. Len' golje' lao dia che de'e Jodan' can' goljə de'e xaxta'ogüe'e Rei Dabin'.

⁶ Nach ble'ida'ane' zeche' entr Diozən' gan' chi'e chnabi'e na' bia ca' tap. Na' beṇə' golə beṇə' blao ca' zjənyechj zjəmbi'e lega'aque'. Ble'ida'ane' ca to xilə' dao' bian' bagwso'ote', to xilə' bia žia gažə loze na' gažə jəlaob. Na' jəlaob ca' gažə zjənaquən Spirit che Diozən' de'en chon xšine'ena' doxenlə lao yežlyon'.

⁷ Na' Jesocrisən' ben' ble'ida' ca to xilə' bian' bagwso'ote', jəxi'e rollon' de'en noxə' Diozən' len na' liche' gan' chi'e chnabi'e.

⁸ Na' catə' jəxi'e rollon' bia ca' tap besə'əzo xibga'acquəb laogüe'ena' na' beṇə' golə beṇə' blao ca' tapechoa leczə besə'əzo xibga'aque'ena' laogüe'ena'. Na' beṇə' golə beṇə' blao ca' zjənoxə'e tgüejə arpa na' tgüejə tas de or gan' chey yalən', na' yalən' zejen orasyon ca' de'en chso'on beṇə' ca' bagwlej Diozən' par zjənaque' lažə' ne'ena'.

⁹ Na' gwso'olē' to immo cobə de'en nan:
 Zaco'o par jəxi'o rollon' na' par bzoŋjo' sey chei ca',
 chedə' bnežjw cuino' par gwso'ote' le'
 na' blalxcheno'onə' gwduxjo' xtolə'əto'onə' par niç naquəto' xi'in Dioz.
 Neto' naquəto' to to nasyon, to to yež, na' to to dia na' cho'eto' gwde gwdeleə dižə'.
¹⁰ Na' gwlejo' neto' par chnabi'ato' txen len le' ca no rei
 na' zotezə zocho cho'ela'ocho Xacho Diozən' can' gwnitə'ətezə gwnitə' bəzož che beŋə' Izrael
 ca' gwse'ejni'alazē'e Diozən'.
 Na' gwžin ža nabi'acho yežlyon'.

¹¹ Nach bgüia' na' ble'ida' angl zan juisy zjənyechje' gan' chi' Diozən' chnabi'e na' gan' ža'
 bia ca' tap na' beŋə' golə beŋə' blao ca'. Na' benda'

¹² chso'e dižə'an zizjo chəsə'əne':
 Jesocristən' gwxaquə'əlebene' ca xilə' dao' ca' gwso'ot beŋə' Izrael ca' par gwnitlao
 xtolə'əga'aque'enə'.

Na' zaquə'əcze' par chnabi'e doxenlə,
 na' par naquə che' yoguə'əte de'en zjəde,
 na' par nape' yoguə' claste yelə' sin',
 na' par nape' yelə' guac xen, na' par nzi'e yelə' bala'an,
 na' par nse'e yelə' chey che'eni' che Diozən' na' par cho'ela'ochone'.

¹³ Nach benda' yoguə' beŋə'ch ca' ža' yoban' na' yežlyon' na' len beŋə' ža' latjə che beŋə' guat
 ca' chso'e dižə' chəsə'əne':

Zejlicane güe'ela'ocho Diozən' ben' chi' chnabia'
 na' güe'ela'otecho Xi'ine' Jesocristən'
 ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə'.
 Zejlcanə güe'ega'acchone' yelə' bala'an
 na' zejlicane güe'echo dižə' can' zjənsə'e yelə' chey che'eni'
 na' can' zjənapə' le'ezelaogüe yelə' guac xen.
 Na' lecza can' gosə'əna bia ca' chaš yežlyon', na' bia ca' chaš le'e yoban' na' lo'o nis, na' len
 bitə'ətezəchla de'e zjəde.

¹⁴ Nach bia ca' tap gosə'ənan: —Ca'ašgacə gaquə.
 Na' beŋə' golə beŋə' blao ca' tapechoa besə'əzo xibga'aque' na' gwso'elaogüe'e Diozən' ben'
 zoczə zejlicane.

6

Sey ca' gažə

¹ Na' ca naquə sey ca' gažə ble'ida' catə' Jesocristən' ben' ble'ida' ca to xilə' dao' bian'
 bagwso'ote' bzoŋje' ton. Na' benda' entr bia ca' tap tob gwneb zizjo ca zizjon' chašjw chtün,
 gwnab: —Da bgüia de'e nga.

² Na' catə'an bgüia', ble'ida' to cabey bia šyiš na' ben' žia cožə' cabeyən' noxə'e to xis goxi'tə'.
 Na' zo to coron yichje'enə' na' bchoje' chzo'e zan beŋə' xni'enə'. Na' zde' par yeyož əgwzo'e'
 beŋə' xni'enə'.

³ Na' catə' Jesocristən' bzoŋje' sey əgwchopen', benda' gwne bia əgwchopen' gwnab: —Da
 bgüia de'e nga.

⁴ Nach bchoj to cabey cua yin', na' ben' žia cožə'əbən' nape' yelə' chnabia' par niç gone'
 ca cuich nita' beŋə' ca' ža' yežlyon' binlo len ljuežjga'aque', na' so'ot ljuežjga'aque'. Na' ben' žia
 cabeyən' noxə'e to spad xen.

⁵ Na' catə' Jesocristən' bzoŋje' sey əgwyonən' benda' gwne bia əgwyonən' gwnab: —Da
 bgüia de'e nga.

Na' catə' bgüia' ble'ida' to cabey gasj na' ben' žia cožə'əbən' noxə'e to xigonz.

⁶ Na' benda' to de'en gocda' gwna to beŋə' gan' ža' bia ca' tap gwne': —Ben par niç tkilzə
 trigon' o tyagzə sebadan' guac yesə'əzi'e len laxjwga'aque' de'en chso'one' gan tža tža; pero
 bito gono' par niç cui əžel set na' binon'.

⁷ Na' catə' Jesocristən' bzoŋje' sey əgwdape, benda' gwne bia əgwdapən', gwnab: —Da na'
 bgüia de'e nga.

⁸ Na' catə' bgüia' ble'ida' to cabey bia naquə ca color gašə' na' ben' žia cožə' cabeyən' le' Yelə'
 Got, na' yeto beŋə' naogüe'ene' le' Gabil. Na' goquən lao na'aga'aque' gwso'one' par niç goc
 gwdiə, gocchgua yižgüe', goc falt de'e əse'ej əsa'o beŋə'chən', na' gwso'ot bia znia ca' beŋə'
 zan. Na' lao goc ca', beŋə' zan ža' yežlyon' gwsa'ate'.

⁹ Na' catə' bzoŋje' sey güeye'e ble'ida' mes gan' chso'elao' beŋə' ca' ža' yoban' Diozən'. Na'
 xni'a mesən' ble'ida' beŋə' guat ca' beŋə' ca' gwso'ot beŋə' mal ca' lega'aque' por ni che de'en
 boso'ozenague' xtižə' Diozən' na' gwso'e dižə' de que chso'onliäžə'e Jesocristən'.

¹⁰ Na' beṇə' guat ca' gosə'əne' zizjo gosə'əne': —Xanto', le' naco' beṇə' la'aždao' xi'ilažə' juisy, na' syempr chono' can' na'onə'. iBatə'əquan' gwnežjo' castigw che beṇə' mal ca' ža' yežlyon' ca de'en gwso'ote' neto'.

¹¹ Nach Diozən' bnežjue' to to beṇə' guat ca' xala'anga'aque' de'e šyiš de'e gwsa'aze', na' gože' lega'aque' so'one' dezcanz yeto tyemp dao' xte catə'əch babeyož gwso'ot beṇə' mal ca' beṇə' ljeužjga'aque' ca' chso'elao' Cristən' con ca'ate'ena' nžia Diozən' bia' sa'at.

¹² Na' catə' Jesocristən' bzoxje' sey de'e gwxope, goche'ida' lechguale gwxo' na' bgüižən' beyaquan ca to lachə' gasj, na' bio'onə' beyaquan ca chen.

¹³ Nach beljw ca' besə'əyinjən besə'əžinten lao yežlyon' can' chac len frot de'e žia lao yag catə' chechjchgua be'.

¹⁴ Na' le'e yoban' benittecən ca to rollo de'en chedobə na' yoguə' ya'a ca' na' islas ca' boso'oša' xišne'i.

¹⁵ Nach rei ca' beṇə' ca' chəsə'anabia' lao yežlyon', len beṇə' blao ca' na' beṇə' gwni'a ca', len capitan ca', len nota'ətezachlə beṇə' napə yelə' chnabia', na' len beṇə' zjanaquə esclabos txen len beṇə' ca' cui zjanaquə, yogue'e boso'ocuašə' cuinga'aque' do lo'o bloj na' entr yej xen ca' de'en žia lao ya'a ca'.

¹⁶ Na' gosə'əne': —Žalə'əšga əca'a bdiņj na' yej quinga na' ya'a quinga yesə'əyenən chio'o nič cui le'i Diozən' chio'o, Dioz ben' chi' chnabia', na' nič cui goṇ Jesocristən' castigw checho, Jesocrist ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

¹⁷ Gosə'əne' ca' cheda' gwsa'acbe'ine' babžin ža gaquə juisyən' na' lechguale yesə'əžaglaogüe' len castigon' de'en əgwnežjo Diozən' lega'aque'.

7

Beṇə' Izrael ca' beṇə' ca' zjənyišə' sey che Diozən'

¹ Gwde na' ble'ida' tap angl gosə'əzeche' tap part lao yežlyon' boso'ozague'e be'ena' par nič cui gwyechjən lao yežlyon', lao nisdə'onə' o gan' ze yag ca'.

² Nach ble'ida' yeto angl ze'e galan' chla' bgüižən' noxe'e to de'e gwčhine' par gwčhiš'e sey che Diozən' ben' zo zejlicəne' lao xga beṇə' ca' chso'elao' le'. Nach anglən' gwne' zizjo belgüiže' angl ca' tap, beṇə' ca' naquan lao na'aga'aque' so'one' par nič gaquə de'e mal lao yežlyon' na' lao nisdə'onə'.

³ Gože' lega'aque': —Bito gonle par nič gaquə de'e mal lao yežlyon', lao nisdə'onə' o gan' ze yag ca' xte catə' babeyož bchišə'əto' sey che Diozən' lao xga beṇə' ca' chso'elao' le'.

⁴ Nach gwdechlə benda' gwna anglən' de que to gueyoa tapeyon mil beṇə' bchiš'e seyən', yogue'e za'aque' lao dia ca' šižin che xi'in de'e Izraelən'.

⁵ Na' šižina mile' lao dia che de'e Jodan', šižina mile' lao dia che de'e Robenna', šižina mile' lao dia che de'e Gadən',

⁶ na' šižina mile' lao dia che de'e Aserən', šižina mile' lao dia che de'e Neftalin', šižina mile' lao dia che de'e Manasesən',

⁷ na' šižina mile' lao dia che de'e Simeonna', šižina mile' lao dia che de'e Lebin', šižina mile' lao dia che de'e Isacarən',

⁸ na' šižina mile' lao dia che de'e Sabolonna', šižina mile' lao dia che de'e Jwsen' na' šižina mile' lao dia che de'e Benjaminə'.

Beṇə' zan zjənyaze' lachə' šyiš

⁹ Nach gwde na' bgüia' na' ble'ida' beṇə' zan juisy zjəzeche' lao Diozən' gan' chi'e chnabi'ena' na' lao Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'. Tant beṇə' zan zjəzecha xte notono no goquə gwlab lega'aque', beṇə' naquə to to nasyon, to to yež, to to dia na' chso'e gwde gwdele dižə'. Na' yogue'e zjənyaze' lachə' šyiš na' zjənoxe'e zin.

¹⁰ Na' tant besyə'əbeine' yogue'e gosə'əne' zizjo, gosə'əne':

Diozən' ben' chi' chnabia', na' Jesocristən'

ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena', bagwso'one' par nič cui yeyejcho lao yi' gabilan'.

¹¹ Na' yoguə'əloj angl ca' zjənyechj zjəmbi'e beṇə' golə beṇə' blao ca' na' bia ca' tap bian' nitə' gan' chi' Diozən' chnabi'e, nach angl ca' besə'əzo xibga'aque' lao Diozən' na' bchequə' yichjga'aque'ena' lao yon' gwso'ela'ogüe'ene',

¹² gosə'əne':

Gaquəšgan quinga. Zejlicəne güe'ela'ocho Dioz chechon'.

Zejlicəne güe'echo dižə' can' nse'e yelə' chey che'eni', can' chnabi'e, can' nape' yelə' guac xen, na' can' nse'e yoguə' cłaste yelə' sin'.

Zejlicəne güe'echo yelə' choxcwlen che' na' güe'echone' yelə' bala'aṇ.

Ca'ašgacžan' gaquə.

¹³ Nach to beṇə' golə beṇə' blao ben' naque' txen len beṇə' tapechoa ca' gože' nada': —¿Eneždo' no beṇə' quinga zjənyaz lačə' šyišən'? ¿Eneždo' gan' za'aque'?

¹⁴ Na' goža'ane': —Le' neždo' beṇə' gol dao'.

Nach gwne' nada': —Jesocrisṭən' gwxaquə'əlebene' ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə', čhedə' blalj xčhene'ena' par gwdixjue' xtolə' beṇəčəṇ'. Na' beṇə' quingan' gosə'əṇabene' le' bnitlaogüe' xtolə'əga'aque'enə'. Na' bitoch bi de'e mal da' əchen yichjla'ažda'oga'aque'enə'. Lega'aque' besə'əžaglaochgüe' lao yežlyon' de'en chso'onjilaže'e Jesocrisṭən'.

¹⁵ Na' de'e na' ana' nite'e lao Diozən' gan' chi'e chnabi'e chso'e yelə' choxcwlen čhe' do ža do yel gan' chso'elaogüe'ene' yoban'. Na' Dioz ben' chi' chnabia' zoe' len lega'aque' par chcuasa' chcue'eje' lega'aque' len de'e malən'.

¹⁶ Bitoch yesə'əbil yesə'ədonga'aque'. Bgüižən' bitoch gonən mal len lega'aque' na' bitoch yesə'əžaglaogüe' len de'e zeyə'əna'.

¹⁷ čhedə' Jesocrisṭən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə' čhapa čhye' lega'aque'. Zoe' gan' chi' Diozən' chnabi'e na' chone' par nitə'əcze' mbalaz len Diozən' zejlicəṇe. Na' Diozən' gone' par nič cuich yesə'əbeže' na' cuich ŋite'e trist.

8

Sey gažən'

¹ Nach Jesocrisṭən' ben' ble'ida' ca to xilə' dao' bian' bagwso'ote' bzoxxje' sey gažən', na' catə' beyož bzoxxje'ennə' lechguale žizə goquə yoban' do gašj or.

² Nach ble'ida' gažə angl ca' beṇə' ca' zjəzecha gan' zo Diozən'. Diozən' bnežjue' lega'aque' tgüejə trompet.

³ Nach yeto anglən' bedəseche' cho'a mesən' gan' chso'elaogüe'e Diozən', mes de or de'en zo lao Diozən' gan' chi'e chnabi'ena'. Anglən' noxe'e to barser de or gan' yo'o de'e zan yal na' bcuase'en lao yi' ya'alj de'en žia lao mesən'. Bene' ca' par nič Diozən' gwle'ine' žen čhe yalən' catə' beṇə' chso'one' orasyonṇə' beṇə' ca' bagwlej Diozən' par zjənaque' lažə' ne'ena'.

⁴ Na' lao gwyas žen čhe yalən' de'en noxə' anglən' gwle'i Diozən' len catə' gwso'on beṇə' ca' orasyonṇə'.

⁵ Nach anglən' gwxi'e ya'alj de'en žia lao mesən' gwlo'en lo'o barserən' na' bzale'en lao yežlyon' na' gošj gwtin, na' goc bichlə sšag xen, gwyep yes, na' gwxo'.

Trompet ca'

⁶ Nach angl ca' gažə, beṇə' ca' zjənoxx' trompet ca', bosə'ozo'en cho'aga'aque'enə' par bosə'ocueže'en.

⁷ Angl nechən' bcueže' trompet čhe'ena'. Na' beyož bcueže'ennə' gwche'echgua yej de'en nchixə yi' na' chen lao yežlyon'. Na' yo de'en de lao yežlyon' casi gašjən gwžiai'i'in tant gwyeyən, na' yag ca' zjəze lao yežlyon' casi gašjə de'e ca' gosə'əbiayi'in, na' yoguə'əlol yixə' ga' chi' lao yežlyon' gosə'əbiayi'in.

⁸ Na' angl əgwchopen' catə' bcueže' trompet čhe'ena' to de'en naquə ca to ya'a xen bxoṇən lo'o nisdə'ona' čhalə'əniṇən, na' casi gašjə nisdə'ona' beyaquən čhen.

⁹ Na' casi gašjə bia ca' ža' lo'o nisən' gwsə'atəb, leczə gosə'əbiayi' casi gašjə barcw ca' de'e čhaš lao nisən'.

¹⁰ Nach angl əgwyonen' bcueže' trompet čhe'ena' na' to beljw xen de'en žia le'e yoban' bxoṇən čhalə'əniṇən ca to yi' yech. Na' bxoṇən lo'o nis čhe zan yao ca' na' bej ca'.

¹¹ Na' beljən' nzi'in De'e Zla'. Na' lo'o nis ca' gan' jəčhazəṇṇə' besyə'əyaquən žla', na' beṇə' zan gwsə'at por ni čhe de'en gwse'eje' nisən'.

¹² Nach angl əgwdapən' bcueže' trompet čhe'ena' na' casi gašjə bgüižən' beyaquən žčhol, na' leczə casi gašjə bio'ona' beyaquən žčhol, na' leczə ca' gwsə'ac casi gašjə beljw ca'. Na' de'e na'ana' part ca' de'en besyə'əyac žčhol bito bosə'əse'eni'in teža na' ni še'ela.

¹³ Nach ble'ida' čhda to angl lao be'ena' gwčhol yoban' na' benda' gwṇe' zižjo gwne': — Probchguaza beṇə' ca' ža' lao yežlyon', ca' naquən' gac čhega'aque' catə' yosə'ocuež trompet čhe angl ca' yešəṇə.

9

¹ Nach angl güeyə'ena' bcueže' trompet čhe'ena' na' to angl beṇə' zo yoban' ble'ida' betje' lao yežlyon' ca to beljw. Na' le' yo'o lao ne'e saljue' yech gabilən'.

² Na' bsaljue' yech gabilən' na' gwyasčgua žen lo'o yechən' can' chas žennə' catə' čhəsə'əbeque' yi' xen lo'o orn. Na' žennə' de'en gwyas lo'o yech gabilən' bcuašə'ən bgüižən' can' chac catə'ən čhi'ichgua žen dao'.

³ Na' gan' gwyas žennə' besə'əchoj bišə' zan gwyasəb lao yežlyon'. Na' bišə' ca' gwso'omb znia can' chso'on bexgoni bian' chsa'aš lao yežlyon'.

⁴ Na' Diozən' bene' mendad cui sa'ob yixə' ga' o bi de'en zjənazē' na' ni yag ca', sino yesə'əyižəb beŋə' ca' cui nyišə' sey che Diozən' lao xgaga'aque'ena'.

⁵ Bito be'e latjə so'otəb lega'aque' sino gwyasəb gueyə' bio' gwso'omb par besə'əžaglaochgüe'. Na' beŋə' ca' gosə'əyižəbən' besə'əžaglaochgüe' can' chžaglaocho cata' chyiž bexjoni'in chio'o.

⁶ Na' catə' əžin ža gaquə can' ble'idaogüe'eda'anə' beŋə' ca' ža' yežlyon' yesə'əŋablaže'e sa'ate', pero bito sa'ate', na' se'enene' cuich nite'e, pero bito yesyə'əželene' nac so'one'.

⁷ Na' quinga zjənaquə bišə' ca' ble'ida', zjənaquəb ca cabey bia žja'ac lao gwdilə. Nach yichjga'acquəbən' zo de'e naquə ca coron de or. Na' cho'alaoga'acquəbən' ble'ida'an ca cho'alaobənačh.

⁸ Na' zjəžiab yišə' de'en naquə ca yišə' yichj no'olə, na' leyga'acquəbən' zjənaquən ca ley leon.

⁹ Na' cuerp čhega'acquəbən' zjənazjən de'en naquə ca de'e ya de'en chcuasə' chcue'ej lega'acquəb. Na' sšag de'en chso'omb len xilə'əga'acquəbən' nenən ca sšag de'en chso'on zan cabey catə' chsa'acdob chja'acquəb lao gwdilən' zjənxobəb caretən'.

¹⁰ Na' xbangə'acquəbən' zjənaquən ca xban bexgoni nič bosə'očhimb len gosə'əyižəb beŋə' lao gueyə' bio'onə'.

¹¹ Na' angl bzelaο de'en chnabia' gabilən' leczə chnabia'an bišə' ca', lenŋə' nzi' Abadon dižə' ebreο na' leczə nzi'in Apolion dižə' griego, zeje dižə' "čžiayi'in".

¹² Bagwde de'e mal nechən' na' ze'e za'ac yečhopən.

¹³ Nach angl əgwroxpe bcueže' trompetən' na' benda' gwne angl ben' zecha cho'a mes de orən' de'en zo lao Diozən' mes de'en žia lozei dap squinte gan' chso'elaogüe'e Diozən'.

¹⁴ Na' anglən' bolgüiže' angl əgwroxpen' ben' noxə' trompetən', gože'ene': —Bosež angl bzelaο ca' tap de'e ca' zjənčej cho'a yao xen de'en nzi' Eofrates.

¹⁵ Nach anglən' boseže' angl bzelaο ca' tap par nič gwso'otən' casi gašjə beŋəčən'. Diozən' bito be'e latjə sa'aš angl bzelaο ca' antslə. Bzague'e lega'acquən par bi izən', na' bi bio'onə' na' bi žan' na' bi orən' gone' mendad sa'ašən.

¹⁶ Na' gwnežda' nitə' chopə gueyoya millon soldad čhega'acquən de'en zjəžia cabey.

¹⁷ Na' quinga ble'idaogüe'eda' cabey ca' na' de'e xio' ca' zjəžia cožə'əga'acquəbən'. De'e xio' ca' zjənazjən to ya de'e chcuasə' chcue'ej cho'alcho'oga'acquən na' yan' naquən de šonə color, de'e xna, de'e asol na' de'e gašə'. Na' yichj cabey ca' zjənaquən ca yichj leon, na' cho'aga'acquəbən' chchoj yi' na' len žen na' len sofr de'en chalə'ənin.

¹⁸ Na' casi gašjə beŋəčən' gwsa'ate' por ni čhe yi' na' žen na' sofr de'en besə'əchoj cho'a cabey ca'.

¹⁹ Bosə'očhimb cho'aga'acquəbən' par gwso'otəb beŋə' na' leczə ca' xbangə'acquəbən', la' xbangə'acquəbən' zjənaquən ca bej, zjənsa'an yichjei par nič gwsa'on beŋə'.

²⁰ Na' beŋə' ca' besyə'əga'an cui gwsa'at catə'an gwyas cabey ca' lao yežlyon', bitoczə besyə'ədinjəne' de'e malən' chso'one' ca naquən' chso'elaogüe'e de'e xio' ca' na' chse'ejni'alaže'e lgua'a lsaquə' de or, de plat, de brons, de yej na' de yag. Na' lgua'a lsaquən' chse'ejni'alaže'ena' bito chəsə'əle'in, nic chse'enen, na' nic chac yoso'ota cuinga'aquei.

²¹ Na' bitoczə besyə'ədinjə beŋə' ca' besyə'əga'anən' čhe de'e malən' chso'one'ena' ca naquən' chso'ote' beŋə', na' ca naquən' chəsə'ənaogüe' de'en chso'on beŋə' goža' ca', na' choso'oža' xtoga'aque' na' chso'one' bitə'ətezəchlə de'e yelə' zto' de'en zjənac ca', na' chəsə'əbane' bi de čhe beŋə'.

10

Angl ben' noxə' librən'

¹ Nach ble'ida' yeto angl gual, gwze'e yoban' betje' lao yežlyon' to lo'o bejw. Na' gwyechj to yita' yichje'ena'. Na' cho'alaogüe'ena' gwnatitən can' chna bgüižən' na' ni'e ca' ble'ida'an ca yag bye de'en chalə'ənin.

² Anglən' noxə'e to libr dao' de'en nyaljo na' ni'e lican' bsoe'en lao nisdə'onə' na' de'e yeglən' lao yežlyon'.

³ Na' bisye'e zizjochgua can' chosya'a leon ca', na' catə' bisye'ena' gošj gwtin gaž las.

⁴ Na' ca naquə dižə' de'en benda' lao gošj gwtinŋə' bazon gwzoja'an catə'əczla to beŋə' zo yoban' gwne' nada': —Bito gwzojo' dižə' de'en bendo' lao gošj gwtinŋə', con gwdapən lo'o yichjla'azdaogo'onə'.

⁵ Nach anglən' ben' zo šla'a ni'ena' lao nisdə'onə' na' yešla'an lao yežlyon', gwlis ne'e lican' yobalə

⁶ na' bzoe' Dioz ben' zo zejlicane testigw de que cho'e dižə' li, Dioz ben' ben beŋəčh, bene' bia ca' ža', na' len bitə'ətezəchlə de'e zjədə yoban', lao yežlyon' na' lo'o nisən'. Gwne': —Bitoch cuezə Diozən' par gone' can' bžie' bia' gone'.

⁷ Catə' angl gažən' solao əgwcuəže' trompet che'enə' cana'achən' gaquə complir de'en nžia Diozən' bia' gaquə ca naquən' babzejni'ine' profet che' ca' beṇə' ca' gwsə'elao' le', bzejni'ine' lega'aque' de'enə' cuiṇə' se'ejni'i beṇə' yeziquə'əchlə.

⁸ Na' ben' zo yoban' be'elenche' nada' dižə' de'e yoblə gwne': —ǰəxi' libr da'onə' de'en nyaljo de'en noxə' anglən' ben' zecha zo šla'a ni'enə' lao nisdə'onə' na' de'en yešla'a lao yežlyon'.

⁹ Nach gwy'a gan' zecha anglən' na' gwṇaba' libr da'onə'. Na' anglən' gože' nada': —Beṇə'an na' gwdaon. Na' lo'o cho'onə' gaquədo'on zix ca ši'in bia ser, pero lo'o li'onə' yeyaquən zla'.

¹⁰ Na' gwxi'a libr da'onə' noxə' anglən' na' gwdaogua'an. Na' lo'o cho'ana' goquən zix ca ši'in bia ser, pero beyož gwdaogua'anṇə' beyaquən zla' lo'o li'anə'.

¹¹ Nach anglən' gože' nada': —De'e yoblə cheyalə' go'o dižə' nac gaquə che zan yež, na' che zan ṇasyon, na' che beṇə' chsa'ac gwde gwdele dižə', na' che zan rei.

11

Chopə testigw

¹ Nach Jeso'osən' beṇə' nada' to ya de'e gwchixəda' yo'onə' na' gože' nada': —ǰəxi'o medid che yo'odao' əblao che Diozən' na' che mesən' gan' cho'ela'ochone', na' gwlabo' baḷə beṇə' chso'elaogü'e'ene'.

² Pero bito si'o medid chyo'onə', chedə' naquən par beṇə' ca' cui chso'onḷilažə' Diozən', na' beṇə' ca' cui chso'onḷilažə' le' so'onchene' syoda che'enə' con nac chse'enene' lao yechopəyon bio'.

³ Ešəla'a chopə testigw chia' so'e xtižə'anə' tmlil chopə gweyoa gyon ža. Na' sa'aze' lachə' gasj.

⁴ Testigw ca' chopə gwxaquə'əlebəga'aque'enə' ca yag olibo ca' chopə de'en zo lao Xancho Diozən' na' ca candler ca' chopə de'en zjəzo laogü'e'enə'.

⁵ Na' notə'ətezə beṇə' yene'e gon mal len lega'aque' əchoj yi' cho'a testigw ca' na' əgwzeyən beṇə' ca' so'on ca'. Ca' gaquə əsa'at beṇə' ca' šə bi so'onene' testigw ca'.

⁶ Na' testigw ca' naquən lao na'aga'aque' so'one' ca cui gaquə yejw yedote lao so'e xtižə' Diozən', na' naquən lao na'aga'aque' so'one' ca yeyac nis ca' chen, na' lecza naquən lao na'aga'aque' so'one' ca gaquə bitə'ətezəchlə de'e mal de'en se'enene' gaquə.

⁷ Na' catə' yeyož əso'e xtižə'anə' cana'ach əchoj lo'o yech gabilən' to de'e xio' de'en naquə ca to bia znia na' əxitə'an nižən lega'aque' na' gotten lega'aque'.

⁸ Na' cuerp chəga'aque'enə' yega'anən' šonə ža šgobiž lao lquey syoda əblaona' gan' gwsə'ote' nada' naca' Xanḷe. Na' syodan' gan' gwsə'ote' nada' gwxaquə'əleben ca syoda Sodomān' na' ca ṇasyon Egipton'.

⁹ Na' lao šonə ža šgobiž yesə'əžag beṇə' zjənaquə zan ṇasyon, beṇə' za'ac zan yež, beṇə' zjənaquə zan dia na' chsa'aque' gwde gwdele dižə', desə'əgü'e' de'e beṇə' guat ca' zjəde' lao lqueyən' na' bito so'e latjə no əgwcuəšə' lega'aque'.

¹⁰ Na' beṇə' ca' ža' lao yežlyon' yesyə'əbeine' catə' bagwsa'at testigw chia' ca', tant zed əgwsa'aquene' xtižə'anə' de'en gwsə'elene' lega'aque'. Nach so'one' legr, na' yoso'onežjo ljuəzjga'aque' no regal.

¹¹ Nach ble'idaogü'e'eda' goc doxen can' gwne'enə'. Na' catə' goc šonə ža šgobiž gwsa'at testigw ca', cana'ach Diozən' bosbane' lega'aque' na' gosə'əzeche' de'e yoblə. Na' yoguə' beṇə' ca' besə'əle'i can' besyə'əban testigw ca' besə'əžebchgü'e'.

¹² Nach testigw ca' chopə gwse'enene' gož Diozən' lega'aque' zizjo: —Le'e yeda, le'e yeyep nga.

Nach besyə'əyepə' yoban' to lo'o bejw, na' besə'əle'i beṇə' contr chəga'aque' ca'.

¹³ Na' ca orən' lechgualə gwxo' na' gwžiyai' to part syodan' na' gaža mil beṇə' gwsa'ate' catə'an gwxo'. Na' beṇə' ca' besyə'əga'an cui gwsa'ate' lechgualə besə'əzebe' na' gwsə'ela'ogü'e' Diozən' ben' zo yoban'.

¹⁴ Bagwde de'e mal əgwchopen' na' ze'e gaquə de'e əgwyonən'.

Can' goquə catə' angl beṇə' gažən' bcueže' trompet che'enə'

¹⁵ Nach angl beṇə' gažən' bcueže' trompet che'enə' na' beṇə' ca' ža' yoban' gosə'əṇə' zizjo gosə'əne':

Xancho Diozən' na' Xi'ine' Cristən' bagwsə'one' ca zo gwxiye'enə' xni'aga'aque'enə', na' lega'acze'enə' yesə'ənabi'e beṇə' ža' yežlyon' zėjlicane.

Crist na'anə' gwlej Diozən' par chaclene' beṇə'achən'.

¹⁶ Nach beṇə' golə beṇə' blao ca' tapechoa, beṇə' ca' zjəchi' chəsə'ənabia'alene' Diozən', besə'əzo xibga'aque' laogü'e'enə' na' besə'əchequə' yichjga'aque'en lao yon' gwsə'elaogü'e' Diozən',

¹⁷ gosə'əne':

Choṇto' yelə' choxcwlen chio', Xanto'.

Len' naco' Dioz ben' napə le'ezelaogüe yelə' guac xen.

Bazoczo' cata'an bxi'o yežlyon', na' ca'aczən' so' cata'an yeyoż yedon.

Na' len yelə' guac chio'onə' chnabi'o.

¹⁸ Beṇə' nasyon ca' ža' yežlyon' besə'əže'e le',

pero na'a babžin ža əgwnežjo' castigw čhega'aque'.

Babžin ža əchoglaogo' che yoguə' beṇə' bagwsa'at šə non' napə dolə'.

Na' gwnežjo' yelə' bala'an čhe beṇə' ca' gwsə'on xšino'onə' ca de'en gwso'e xtizo'onə',

na' len yeziquə'əchlə beṇə' ca' bagwlejo' par zjənaque' lažə' na'onə' na' gwsa'ape' le' respet.

Egwnežjo' lega'aque' yelə' bala'an la'anə'əczə šə gwsa'aque' beṇə' blao o la'anə'əczə šə cui gwsa'aque' beṇə' blao žlac gosə'anite'e yežlyon'.

Lečzə gono' par ničh beṇə' ca' choso'ožiayi' ljuēžjga'aque' o chso'one' bichlə de'e mal lao yežlyon' əsa'aque' castigw lao yi' gabilən'.

¹⁹ Nach ble'ida' nla'axejə gan' chso'elaogüe'e Diozən' yoban' na' ble'ida' caj gan' ža' de'en nyoj can' ben Diozən' mendad so'on beṇə' Izrael ca' par ničh gaquəlene' lega'aque'. Na' lao ble'ida' de'e ca' gwyep yes, gocchgua sšag na' gošj gwtin, na' lečzə gwxo' na' gwche'echgua yejən'.

12

No'olan' na' gwxiye'enə'

¹ Na' ben Diozən' par ničh ble'ida'ogüe'eda' le'e yoban' to de'e zaquə' yebanecho, ble'ida' to no'olə' nyaze' bgüižən' ca xe'. Na' zeche' lao bio'onə' na' yičhe'enə' zon to coron de šiziņ beljw.

² No'e bdao' na' bachaque' bes che yelə' sanṇə' na' bisye'e tant chžaglaogüe' lao chzane'enə'.

³ Na' ble'idaogüe'eda' yeto de'e zaquə' yebanecho le'e yoban', ble'ida' gwxiye'enə' beyaquən to bel' gaž yičj bia xen na' bia xṇa, na' žia ši ložəb na' tgiejə coron nita' yičjəb ca'.

⁴ Na' cata' gwda xbambən' bchinjən' casi gašjə beljw ca' zjəžia le'e yoban' na' besə'əyinjən' lao yežlyon'. Nach belən' bian' beyaque gwxiye'enə' gotə'əb xni'a no'olan', gwlezəb par šebəb bda'onə' cata' sane'əbo'onə'.

⁵ No'olan' gwxxane' to bi'i byo, bi'i nabiə' yoguə' nasyon. Na' gombo' ca' yoso'ozexjw yičj beṇə' nasyon ca' yoso'ozenague' čhebo'. Diozən' bezi' beque'əbo' beče'əbo' gan' či'e chnabi'enə'.

⁶ Nach no'olan' boxonjene' gwxiye'enə' par šeje' to latjə gan' cui no ža' gan' banonšao' Diozən' par so no'olan', na' lao soe' na' Diozən' gone' le' mantener tmil čopə gueyoa gyon ža.

⁷⁻⁸ Gwde na' goc gwdilən' yoban', na' angl əblao ben' le Miguel na' soldad che' ca' gosə'ədiləlene' belən' bian' beyaque gwxiye'enə'. Na' gwxiye'enə' na' angl bzəlao čhei ca' bito gosə'əzoin anglən' len soldad che' ca'. Besyə'əbeje' lega'aquən yoban' na' bitoch chso'e latjə žjəya' aquəchən yoban' de'e yobla.

⁹ Na' bosyo'ozalə'e gwxiye'enə' len angl bzəlao čhei ca' lao yežlyon'. Ca' goc čhe de'en beyaque bel' xennə', de'en le Satanə. Zon dezd cata'an gwxe yežlyon' chxoayaguən yoguə' beṇəch.

¹⁰ Nach benda' to beṇə' zo yoban' gwne' zižjo gwne': —Bačh bžin ža bosla Diozən' beṇəchən' lao na' gwxiye'enə' len yelə' guac de'en nape'enə' na' chnabi'e lega'aque'. Na' babžin ža či' Cristən' chnabi'əlene' Diozən', Crist nan' beše'le' par goclene' beṇəchən'. Babesyə'əbeje' gwxiye'enə' de'en bcuiš beṇə' bišə'əcho ca' lao Diozən' do ža do yel nan de que de xtolə'əga'aque', na' na'a baboso'ozalə'en lao yežlyon'.

¹¹ Beṇə' bišə'əcho ca' beṇə' ca' bagwsa'at, gosə'əzoinə' cui bosə'ozenague' čhe gwxiye'enə' lao gosə'anite'e chedə' gwsə'onlilažə'e Jesocrisən' ben' blalj xčhene'enə' por ni čhecho. Na' lečzə gosə'əzoinə'en chedə' gwso'e dižə' de que chso'onlilažə'e Jesocrisən'. Gwsa'acbe'ine' yejni'a sa'ate' cle ca yesə'əbejyichje' Jesocrisən' ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'enə'.

¹² De'e na'anə' ledoyeṇi chio'o zocho yoban'. Probchguazə beṇə' nita' doxen lao yežlyon'. Probchguazəga'aque' chedə' babžin gwxiye'enə' gan' nite'enə'. Lechgualə chžə'an de'en čhega'ən yetožə tyemp dao' par gonən can' chene'enṇə' na' de'e na'anə' gonchguan contr beṇəchən'.

¹³ Na' belən' bian' beyaque gwxiye'enə' cata' gočhe'ib de que babesyə'əbeje'eb yoban' na' babžimb lao yežlyon', nach belagdob no'olan' ben' gwxxan bi'i byo da'onə'.

¹⁴ Pero Diozən' goclene' no'olan', bene' ca gwzo čopə xile'e de'e xen caczə čhe to bsia dao' par ničh cui gwxxen belən' le'. Na' gwzoe' bžinte' latjə dašən' gan' banonšao' Diozən' soe' na' gan' gone' le' mantener soṇ iz yo'o gašjə.

¹⁵ Nach bchoj nis zil cho'a belən' caczə to yao la' gone'eb əzinten gan' zo no'olən' par gua'an le'.

¹⁶ Pero na' Diozən' goclene' no'olən', bene' par niçh yežlyon' gü'e'ejən nisən' de'en bchoj cho'a belən'.

¹⁷ Na' belən' b'za'achguab no'olən' nach jəyemb contr xi'ine' ca' yela', beṇə' ca' chso'on can' non Diozən' mendad goncho, beṇə' ca' leczə chso'e dižə' de que chso'onližə'e Jeso'osən'.

13

Chopə bež bia əznia

¹ Na' gwzecha' cho'a nisdə'onə' na' ble'ida' bchoj to bež əznia lo'o nisdə'onə'. Na' nitə' gažə yichjəb na' žia ši lozəb na' lao to to lozəb ca' nitə' tgüejə coron. Na' lao to to yichjəb ca' nyoj to la de'en chlo'e' de que chon cuimb ca' Dioz.

² Ble'ida' bežən' ca' to tigr na' ble'ida' ni'ana'ab ca' zjənaquən ca' ni'ana' os, na' cho'abən' naquən ca' cho'a leon. Na' belən' bian' beyaque gwxiye'enə' bemb par niçh gwnabia' bežən', na' bnežjw belən' leb yełə' guac par niçh bemb ca' gosə'anitə' yoguə'əloł beṇəçh xni'abən'.

³ Na' ble'ida' to yichj bežən' naquəçhguan gü'e', na' naquən ca' to de'e' gatlemb pero bito gotəb. Na' yoguə'əloł beṇə' besyə'əbanene' de'en beyaquebən' na' gwnitə'əcze' xni'abən'.

⁴ Na' gwso'elaogü'e' belən' bian' beyaque gwxiye'enə', gwsa'ache'ine' de que belən' bemb par niçh chnabia' bežən'. Na' leczə gwso'elaogü'e' bežən', gosə'əne': —Bež nga chnabi'achəb ca' notə'ətezəçhlə beṇə', na' notono no soi tilsən leb.

⁵ Na' bežən' be'eb dižə' de que naquəb ca' Diozən' na' be'eb bichlə dižə' b'zia bnitə'əb Diozən' lao çhəpeyon bio' gwnabi'ab.

⁶ Gwneçhguab contr Diozən', b'zia bnitə'əb le' na' leczə b'zia bnitə'əb yoban' na' len beṇə' ca' ža' na'.

⁷ Na' gwyo'o lao na' bežən' gwdiləlemb beṇə' ca' bagwlej Diozən' par zjənaque' lažə' ne'enə' na' b'zəb lega'aque' xni'abən' par b'çhi' bsaquə'əb lega'aque'. Nach gwnabi'ab beṇəçhən' yoguə' nasyon yoguə' yež, yoguə' dia na' yoguə' beṇə' chso'e gwde gwde la dižə'.

⁸ Na' yoguə' beṇə' ca' cui zjənyoj laga'aque'enə' le'e' lib' che Jesocristən' gwso'elaogü'e'eb. Catə'an ze'e' xə yežlyon' banyoj la beṇə' ca' zjənapə yełə' mban zejlicəne le'e' lib' che Jesocristən' ben' gwxaquə'əlebe ca' xilə' dao' ca' gwso'ot beṇə' Izrael ca' par gwnitlao xtolə'əga'aque'enə'.

⁹ Le'e' žia nagle de'e' chene leğwzenag de'e' nga.

¹⁰ Beṇə' ca' choso'ozo beṇə' yoblə xni'aga'aque'enə' ca' pres o ca' esclabos, can' chso'one' ca' gac çhega'aque'. Na' beṇə' ca' chso'ot beṇə' len yes ya, leczə can' sa'ate'. De'e' na'anə' çhonən byen sotezə so' chio'o bagwlej Diozən' par naccho lažə' ne'enə' gonližə'əçhone' bitə'əteza çac çhecho.

¹¹ Na' ble'ida' yeto bež bchojəb lo'o yon'. Na' bežən' žia çhopə lozəb ca' loz xilə' dao' pero be'eb dižə' goxoayag can' çhon belən' bian' beyaque gwxiye'enə'.

¹² Na' bežən' bian' ble'ida' de'e' neche bemb par niçh bež əgwçhopen' gwnabia'ab lao leb na' bnežjəb leb doxen yełə' gwnabia' de'en gwdapəbən'. Nach bia əgwçhopen' bemb par niçh beṇə' ca' ža' yežlyon' gwso'elaogü'e' bia nechən' bian' naquə gü'e' yichjəinə', gü'e' de'en goquə ca' to de'e' gatlemb.

¹³ Na' bia əgwçhopen' bemb de'e' zan de'e' zaquə' yesyə'əbançhü'e' beṇə', xte bemb par niçh beṇəçhən' bess'əle'ine' yi' le'e' yoban' na' betjən lao yežlyon'.

¹⁴ Na' laogü'e' de'en bemb de'e' besyə'əbanene'enə' lao bež nechən', b'xoayaguəb beṇə' ža' yežlyon' par niçh ca' gwso'elaogü'e' bia nechən' bian' goquə gü'e' yichjəbən' len yes yanə', gü'e' de'en bašə gatlemb. Na' bež əgwçhopen' bemb mendad par gwso'one' to l'gua'a lsaquə' bež nechən'.

¹⁵ Na' goquən lao na' bež əgwçhopen' bemb par niçh gwyo'o l'gua'a lsaquə' bež nechən' biš xne. Na' l'gua'a lsaquə'ənə' be'eczən dižə' na' benən ca' gwso'ote' beṇə' ca' cui gwso'elao' len.

¹⁶ Na' leczə beṇən byen par niçh gosə'ozo yoguə' beṇə' señy che bežən' na'aga'aque' liçha o lao xgaga'aque', beṇə' blao na' la'anə' beṇə' cui zjənaquə' blao, na' la'anə' beṇə' gwni' a o beṇə' yašə', na' la'anə' beṇə' zjənaquə' esclabos o beṇə' cui zjənaquə' esclabos.

¹⁷ Bitobi bi goquə' so'ote'e' na' nic goquə' bi yesə'əzi'e' šə' cui zjəzoe' señy che bežən' o šə' cui zjəzoe' numero de'en zejən labən'.

¹⁸ Na' nga de to yełə' sin' de'e' əgwzejni'in' chio'o che bežən', na' šə' no çhejni'in' çheyałə' gwlabə' numero çhebən'. Na' numero çhebən' naquən can' çhlab chio'o beṇəçh, çop gweyoya gyon çop.

14

De'en gwso'ol beṇə' ca' to gueyoa tapeyon mil gwso'elaogü'e' Diozən'

¹ Nach bgüia' na' ble'ida' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ənə', zeche' lao ya'a Sionnə' len togueyoa tapeyon mil beṇə' yoblə. Na' nyoj le'enə' na' len la Xē' Diozən' lao xga beṇə' ca'.

² Na' bēnda' chso'ol beṇə' zan beṇə' ža' yoban'. Na' bēnda'an ca chsiž catə' dechgua yaon' na' ca nen catə' lechgualē chniṇ, na' bēnda' nenən can' choj arpan' catə' chəsə'əgole' de'e zan tši'iza.

³ Na' bēnda' chso'ole' to imno cobə lao Diozən' gan' chi'e chnabi'ənə' gan' nitə' bia ca' tap na' beṇə' gola blao tapechoa ca'. Pero beṇə' ca' to gueyoa tapeyon mil na'aza goc bososede' imnon' par gwso'ole'en. Beṇə' ca'anə' zjənchoje' entr beṇə'chən' chse'ejle'e de que Jesocristən' gwdixjue' xtolə'əchon'.

⁴ Beṇə' ca' chsa'aque'ne' che tozə Jesocristən', na' de'e na'anə' gwxaquə'əlebəga'aque'ne' ca beṇə' cui chgo'o xtoi. Beṇə' ca' chso'one' con can' na' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ənə'. Lega'aque'en zjənchoje' entr beṇə'chən' chse'ejle'e de que Jesocristən' gwdixjue' xtolə'əchon'.

⁵ Chso'e por dižə' li, na' bitobi bi de'e mal da achen yichjla'azda'oga'aque'ənə'.

De'en gosə'ana šonə angl

⁶ Nach ble'ida' yeto' angl gwchoj yoban' chde' lao be'. Gwdixjue'ine' beṇə' ža' yežlyon' to dižə' güen dižə' cobə che Diozən' de'e zaquə' zejlicane. Na' gwdixjui'en len beṇə' zjənaquə to to nasyon, to to yež, to to dia, na' beṇə' chso'e gwde gwdele dižə'.

⁷ Gwne' zižjo gože' lega'aque': —Le'e gapə Diozən' respet, le'e güe' Diozən' yelə' bala'an, chedə' babžin or gone' castigw beṇə' ca' cui chso'elao' le'. Le'e güe'elao' Diozən' ben' ben yoban', yežlyon', nisda'onə' na' bej ca'.

⁸ Na' gwde na' bchoj yeto angl, na' gwne': —Bač bžin ža cuiayi' syoda Babilonian' la' beṇə' gwnabia' ca' ža' syodan' bagwso'one' par nich beṇə' ca' ža' yoguə' nasyon ca' choso'ozoe' Diozən' ca'alə cuič chso'elaogüe'ene'.

⁹ Nach gwde na' bchoj angl əgwyone, na' leczə gwne' zižjo gwne': —Notə'atezə beṇə' chso'elao' bežən' na' lgu'a'lsaquə' de'en naquə ca leb na' notə'atezə bagwso'e latjə bososozoe' seŋy che bežən' lao xgaga'aque' o na'aga'aque',

¹⁰ lega'aque'ənə' gon Diozən' castigw gual zejlicane tant chže'e che de'e malən' chso'one'. Yesə'əzaquə'əzi'e gan' chalə' yi' na' sofr. Na' angl che Diozən' na' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ənə' yešə'əle'ine' can' gac che beṇə' ca'.

¹¹ Na' chas žen che yi'inə' gan' yešə'əžaglaogüe' zejlicane, na' do ža do yel bito bi dezcanz gatə' chega'aque'. Can' gaquə' che beṇə' ca' chso'elao' bežən' na' lgu'a'lsaquə' de'e naquə ca leb beṇə' ca' zjzo seŋy che labən' lao xgaga'aque' o na'aga'aque'.

¹² De'e na'anə' chonən byen sotezə so chio'o bagwlej Diozən' par naccho lažə' ne'ənə' goncho can' none' mendadən' na' sotezə socho gonlilažə'əcho Jeso'osən'.

¹³ Na' bēnda' to beṇə' zo yoban' gože' nada': —Bzoj de que dezd na'a beṇə' ca' chso'onlilažə' Xancho Jesocristən' nite'e mbalaz catə'an sa'ate'. Bzoj de que Spirit che Diozən' nan de que de'e li nite'e mbalaz chedə' Diozən' gwceze' de'en gwlo'e lao na'aga'aque' so'one' na' Diozən' əžjsa'alaze'e yoguə' de'e güen de'en bagwso'one'.

Catə' Diozən' yotobe' cwseš che'ənə'

¹⁴ Nach bgüia' na' ble'ida' to bejw šiš le'e yoban' na' chi' Xi'in Diozən' cožə' bejon', naque' ca to beṇə'ch. Na' zo to coron de or yichje'ənə' na' noxe'e to oz de'en nlačhua.

¹⁵ Na' bchoj yeto angl lo'i gan' chso'elaogüe'e Diozən' yoban' na' gwne' zižjo gože' ben' chi' cožə' bejon': —Babžin or yetobo' trigw de'en goquə lao yežlyon', la' bagolən. Na' bečhoguən.

¹⁶ Nach ben' chi' cožə' bejon' bečhogue' trigon' len ozən' par bezi'e cwsešən'.

¹⁷ Na' bezchoj yeto anglən' gan' chso'elaogüe'e Diozən' yoban' na' leczə noxe'e to oz de'en nlačhua.

¹⁸ Nach bezchoj yeto anglən' beṇə' zo gan' zo mes gan' chso'elaogüe'e Diozən', ben' chapə yi' de'en chalə' lao mesən'. Na' anglən' gwne' zižjo bolgüize' angl əgwchopen' ben' leczə noxə' ozan', gože'ene': —Bagüe obas ca' de'en žia lao yežlyon'. Bechogga'aquən len oz chio'onə' nich yetobəga'aco'on.

¹⁹ Nach anglən' bechogue' obas ca' de'en žia lao yežlyon' na' bzalə'en lo'o ša' xen de yej gan' choso'osi'en par chechoj xisein'. Na' zejen dižə' de que Diozən' botobe' beṇə' ca' cui bososozenag che' par benchgüe' lega'aque' castigw.

²⁰ Beṇə' zan juisjən' botobe' na' bnežjue' castigw chega'aque'ənə', na' tant besə'əžaglaoga'aque' xte ble'ida' xchenga'aque'ənə' ca nis oban' de'en bososie' lo'o šan' de'en chi' fuerlə syodan'. Na' gwžian de'e zil lao yežlyon', bžinten ca tmetr yo'o gašjə yelə' zitjw na' bšiljon šonə gueyoa kilometros.

15

Angl ca' gwso'on par nič gotá' gažá castigw de'en bselá' Diozán' le'ezelaogüe

¹ Na' ble'ida' yeto de'e lechguale zaquá' yebanecho le'e yoban', to de'e žialao xen. Ble'ida' gažá angl bena' naquá lao na'aga'aque' so'one' par nič gaquá yegažá de'e mal par yeyož agwlo'e Diozán' can' chnežjue' castigw che beňá' chso'on de'e malán'.

² Na' ble'ida' to de'en naquá ca to nisdao' de bidr nchixán len yi' na' lao nisdá'ona' zjəzecha beňá' ca' gwso'on gan cui gwso'elaogüe'e bežán' na' lguá'a lsaquá' de'e naquá ca leb na' lecza cui gwso'e latjə yesə'ənite'e seňy cheb o nomero de'en zejen labən'. Na' beňá' ca' zjənoxe'e tgüejə arpa de'en bnežjw Diozán' lega'aque'.

³ Na' chso'ole' to imno de'en naquá ca de'en bzejni'i de'e Moizezán' beňá' Izrael ca', Moizez ben' goquá beňá' güen xšin Diozán'. Jesocristán' ben' gwxaquá'əlebe ca xilá' dao' ca' gwso'ot beňá' Izrael ca' par gwnitlao xtolá'əga'aque'ena' bzejni'ine' beňá' ca' ble'ida' nič chso'ole'en, na' nan:

Ḳanto' Dioz, le' chono' mīlagr xen na' bichlə de'e zaquá' yebaneto'.

Len' napo' le'ezelaogüe yelá' guac xen.

Na' zdaczo' licha na' chono' can' na'ona'.

Len' chnabi'o nasyon ca'.

⁴ Gwžin ža catá' yoguá' beňachən' əsa'ape' le' respet na' əso'elaogüe'e le'.

Len' naco' beňá' la'aždao' xi'ilazá' juisy.

Na' beňá' ža' yoguá'əlol nasyon əso'elaogüe'e le' catá' la'aque' laogo'ona',

chedá' babesa'əle'ine' de que yoguá'əlol de'en babeno'ona' beno'on can' cheyalá' gaquən.

⁵ Na' gwde de'e ca' ble'ida' nla'axejə gan' chso'elaogüe'e Diozán' yoban' na' naquən ca yo'o de lachá' de'en gwso'on beňá' Izrael ca' latjə dašən' gan' gwzo Diozán' len lega'aque'.

⁶ Na' angl ca' gažá, beňá' ca' ble'ida' antslá, besyá'əchoje' gan' chso'elaogüe'e Diozán' yoban', beňá' ca' naquən lao na'aga'aque' so'one' par nič gaquá gažá de'e mal ca' lao yežlyon'. Na' zjənyaze' lachá' fin de'en naquá de'e šyiš xilá' juisy, na' cho'alcho' to toga'aque' zjənyechjən sinš de or:

⁷ Nach to bia ca' tap bia ca' nits' lao Diozán' bnežjob angl ca' gažá tgüejə tas de or gan' yo'ožá to de'en gwxaquá'əleben ca castigw gual de'en əgwnežjo Diozán' beňá' ca' chso'on de'e malán', Dioz ben' zoczə zejlicane.

⁸ Na' de'e tant chey che'eni' gan' zo Diozán' na' tant yelá' guac xen nape' xte goc ca to ga chas žen gan' chso'elaogüe'ene' yoban'. De'e na'aná' notono no goc šo'o gan' chso'elaogüe'ene' xte que catá'əch beyož goc de'e mal ca' gažá de'en naquá lao na' angl ca' gažá.

16

Tas ca' gan' yo'ožá de'en gwxaquá'əlebe ca castigw de'en gwnežjo Diozán' beňá' mal ca'

¹ Nach benda' gwne Diozán' zizjo gan' chso'elaogüe'ene' yoban' gože' angl ca' gažá: — Le'e žja'ac le'e zjəcuasa de'en yo'ožá lo'o tas chele ca' lao yežlyon', la' de'en zjəyo'ožánnə' gwxaquá'əleben ca castigw gual de'en əgwnežjua' beňá' ca' chso'on de'e malán'.

² Nach gwwey angl nechən' jəcuase' de'en yo'ožá lo'o tas che'ena' lao yežlyon' na' yoguá' beňá' ca' zjəzo seňy che bežán' na' chso'elaogüe'e lguá'a lsaquá' de'en naquá ca leb gosə'əbie' to cłas yežá' əzbhan na' gwlachguan.

³ Nach angl əgwchopen' bcuase' de'en yo'ožá lo'o tas che'ena' lao nisdá'ona' na' nisdá'ona' beyaquan ca chen che beňá' guat. Na' gwsa'at yoguá' bia ca' ža' lo'o nisan'.

⁴ Nach angl əgwwoŋen' bcuase' de'en yo'ožá lo'o tas che'ena' lao yao ca' na' bej ca' na' lecza besyá'əyaquən chen.

⁵ Na' benda' de'en gož anglən' ben' chapə nisan' de'en de lao yežlyon', gože' Diozán': — Ḳanto' Dioz, len' naco' beňá' la'aždao' xi'ilazá' juisy. Len' bazoczə' catá'an bxi'o yežlyon' na' zoczə' na'a. Na' zdaczo' licha ca de'en chnežjo' beňá' mal ca' castigw quinga de'en chsa'aque'.

⁶ Lega'aque' bagwso'ote' profet ca' beňá' ca' gwso'e xtizo'ona' na' bagwso'ote' nochlə beňá' gwlejo' par gwsa'aque' lažá' na'ona'. De'e na'aná' babeno' par nič əse'eje' nis de'en babeyac chen. Ca'aczən' cheyalá' gac chega'aque'.

⁷ Na' benda' yeto angl ben' zecha cho'a mes gan' chso'elaogüe'e Diozán' gwne': —Ḳanto' Dioz, lən' napo' le'ezelaogüe yelá' guac xen. De'e li zdaczo' licha can' chnežjo' castigw che beňá' mal ca' na' chono' can' na'ona'.

⁸ Na' angl əgwdapən' bcuase' de'en yo'ožá lo'o tas che'ena' lao bgüižən' na' benən par nič bgüižən' bzeyən beňachən' len yi' cheina'.

⁹ Lechguale bzeyən beňachən', pero bito besyá'ədinjene' xtolá'əga'aque'ena' par əso'elaogüe'e Diozán'. Nachle boso'ožia boso'onite'e Diozán' ben' chon par nič chasə'əžaglaogüe'.

¹⁰ Na' angl güey'e'ena' bcuase' de'en yo'ožə lo'o tas che'ena' gan' chi' bežən' chnabi'ab na' beyac žchol doxen gan' chnabi'abən'. Na' beņə' ca' ža' gan' chnabi'abən' gwsa'oya'a ložə'əga'aque'e'ena' tant besə'əyiya'a cuerp chega'aque'e'ena'.

¹¹ Na' bitocza besya'adinjene' de'e malən' gwso'one'ena' la'ana'əcza besə'əzaglaochgüe', nachle boso'ožia boso'onite'e Dioz ben' zo yoban' por ni che de'en chse'ey chasə'ala' cuerp chega'aque'e'ena' na' por ni che de'en zjəžie' yežə'əna'.

¹² Na' angl əgwɔxopen' bcuase' de'en yo'ožə lo'o tas che'ena' lao yao xen de'en nzi' Eofrates na' bebiž nis yaon' na' beyaljo to nez par nič rei ca' za'ac gan' chla' bgüižən' yesə'əžine' gan' gaquə' gwdilən'.

¹³ Nach šonə de'e xio' ca' besya'əyaquan blož. Na' to bložən' ble'ida' bchojəb cho'a beļən' bian' beyaque gwxiye'ena', na' yetob bchojəb cho'a bežən', na' yetob bchojəb cho'a bež əgwchope bian' choe' dižə' goxoayaguən' par nič beñačən' chso'elaogüe'e bež nechən'.

¹⁴ De'e xio' quinga gwso'onən miłagr na' jəsə'ətobən yogua' beņə' ca' chasə'anabia' doxenlə lao yežlyon'. Jəsə'ətobən lega'aque' tožə latjə par nič ni'te'e probnid yesə'ədiləlene' Diozən' ben' napə le'ežlaogüe yeļə' guac xen catə'ən əžin žan' nžie' biā' yesə'ədiləlene'ene'.

¹⁵ Nach benda' gwna Xi'in' Diozən': —Le'e gon xbab de que nada' yida' əgwnežjua' castigw che beņə' ca' chso'on de'e malən', na' senyala' lega'aque' can' chon to beņə' bguan. Mbalaz sole šə bazole probnid chbezle nada' catə'ən yida'anə'. Pero šə cuinə' yedinjele de'e malən' chonle catə'ən yida'anə', gona' ca sa'acbe'i yogua'əlol beñačən' ca naquə yogua' de'e mal ca' babenlen'.

¹⁶ Nach bezle'ida' to latjə gan' nzi' Armagedon dižə' ebreo. Latjən' nzi' ca'anə' əbtob de'e xio' ca' beņə' ca' chasə'anabia' lao yežlyon'.

¹⁷ Na' angl gažən' bcuase' de'en yo'ožə lo'o tas che'ena' lao be', na' benda' gwne Diozən' zižjo gan' chso'elaogüe'ene' yoban' gan' leczə chi'e chnabi'e, gwne': —Bač bseļa'a yogua' castigw ca' de'en nžia bia' əseļa'a.

¹⁸ Nach gwypə yes, goc sšag, na' gošj gwtin, na' lechgualə gwxo' mazəchlə can' bagwxo' bats'ətezəchlə lao ža' beñačən' yežlyon'.

¹⁹ Na' le'ežlaogüe syoda blaoch de'en chi' lao yežlyon' gwžiyai'in goquən šonlə, na' leczə gwžiyai' syoda ca' yeziqə'əchlə de'en zjəchi' lao yežlyon'. Diozən' bitoch gwleze' par bnežjue' castigw che de'e malən' bagwso'ontec beņə' ca' chasə'anabia' Babilonian' na' de'e na'anə' bnežjue' lega'aque' castigw gual zejlicane tant chž'e e che de'e malən' gwso'one'ena'.

²⁰ Na' de'e tant gwxo'ochgua xte benittecza yogua'əlol islas ca' na' ya'a ca'.

²¹ Na' leczə gwche'echgua yej ži'a lao yežlyon' na' cha'aga'aguən tapa rob güejə to ton. Besə'əzaglaochgua beņə' ca' ža' yežlyon' na' boso'ožia boso'onite'e Diozən' de'en bene' par nič gwche' yejən'.

17

Castigw de'en bnežjw Diozən' no'olə sargatən'

¹ Na' lao angl ca' gažə beņə' ca' gwso'oxə' tas de orən', toe' gože' nada': —Da gwlo'ida' le' castigw de'en əgwnežjo Diozən' no'olə blaō no'olə sargatən' chi' lao nisdao' ca'.

² Yogua' beņə' chasə'anabia' lao yežlyon' bagosə'əzolene'ene'. Na' yogua' beņə' ža' yežlyon' bagwse'eje' bino de'en bnežjue' lega'aque' par nič gosə'əzelažə'e gosə'anitə'əlene' le'.

³ Nach lao ben Spirit che Diozən' par ble'idaogüe'eda' de'e quinga, anglən' gwchi'e nada' latjə dašən'. Na' ble'ida' to no'olə žie' cožə' to bež əxna bia gažə yichjən' na' žia š'i ložəb. Na' nyoj zan dižə' lao cuerp chebən' de'en chloe' de que chon cuimb ca Dioz.

⁴ Na' no'olan' nyaze' lachs' morad na' de'e xna na' non cuine' xoche len or, len yej fin, na' len perlas. Na' noxə'e to tas de or gan' yo'ožə to bino. Na' binon' zejen dižə' de que chebeine' chone' yogua'əlol de'en chgue'i Diozən' na' de'en naquə contr Diozən'.

⁵ Na' lao xgue' na' nyoj le'ena', na' ngašə' can' zejen, chedə' nan quinga: “Syoda Babilonia de'en naquə de'e blaō. Nada' chona' par nič beņə' ža' yežlyon' bito chso'elaogüe'e Diozən' na' chso'one' bichlə de'en chgue'i Diozən'.”

⁶ Na' ble'ida' de que chzože no'olə na'anə'. Chzožene' chedə' güe'eje' xchen beņə' ca' gwso'ote'ena' beņə' ca' gwsa'aque' lažə' na' Diozən' na' gwso'e dižə' de que chso'onlilažə'e Jeso'osən'. Na' cats' ble'ida' no'olanə' lechgualə bebanda' can' naque'ena'.

⁷ Nach gož anglən' nada': —Bito yebando'. Na' gwzejni'ida' le' bi zejen ca de'en ble'ido' žia no'olan' bežən' bia gažə yichjən' na' žia š'i ložəb.

⁸ Bežən' bian' ble'ido'on gwzob to tyemp. Bitoch zob na'a, pero güidəb de'e yoblə la' əchojəb lo'o yech gabilən' gan' yo'ob na'a, na' leczə na'an yeyo'ob gaquəb castigw zejlicane. Na' beņə' ca' ža' yežlyon' beņə' ca' cui zjənyoj laga'aque'ena' le'e lib' gan' nyoj la beņə' ca' zjənapə yeļə' mban zejlicanen', yesə'ənaogüe' bežən' na' yesə'əbanene' can' gwzob antslə, na' ca'aczən'

sob nabi'ab de'e yoblə la'anə'əczə cui zob n'a. Catə'an cuiṇə' xə yežlyon' banyoj la beṇə' ca' zjənapə yelə' mban zejlicane le'e libran'.

⁹ Na' nga de to yelə' sin' de'e agwzejni'in chio'o che bežan'. Yichjəb ca' gažə zejen gažə ya'a gan' chi' no'olən'.

¹⁰ Na' leczə yichjəb ca' gažə zejen gažə rei. Gueye'e bagosə'anabi'e na' bagwnit yelə' gwnabia' chega'aque'ena'. Toe' chnabia' n'a, na' ben' yeto ze'e yide' par nabi'e pero na' šložgan' nabi'e.

¹¹ Na' bežan' bian' gwzo antslə na' bitoch zob n'a a zejen yeto rei beṇə' gaquə ca beṇə' ca' gažə. Gone' yoguə'əlol de'e mal ca de'en gwso'one'ena' na' nabi'e xte cats' gon Diozən' par nič cuiayi'e zejlicane.

¹² Na' lozəb ca' ši de'en ble'ido' zejen ši rei beṇə' ze'e za'ac par yesə'anabi'e. Na' bežan' gomb par nič yesə'anabi'e txen len leb tš'i'izə pero šložgan' yesə'anabi'e len leb.

¹³ Rei ca' ši tozə can' so'one' xbab na' tozə can' so'one' de'e malən'. Na' yelə' guac de'en gatə' chega'aque'ena' na' len yelə' gwnabia'anə' yesə'əchine'en par so'one' con can' yene'e bežan'.

¹⁴ Yesə'ədiləlene' Jesocrisən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena', na' Jesocrisən' gone' lega'aque' gan na' nite'e xni'ena', chedə' le'ena' chnabi'e notə'ətezachlə beṇə' blao na' notə'ətezachlə rei. Na' beṇə' ca' so'on txen len Jesocrisən' zjənaque' beṇə' ca' bagwlej Diozən' par zjənaque' xi'ine', na' nita'əteza nite'e chso'onlilažə'ene' na' choso'ozenague' che'.

¹⁵ Na' anglən' gozne' nada': —Nisda'onə' gan' chi' no'olə sargatən' zejen dižə de que beṇə' zan juisy beṇə' zjənaquə' zan yež na' zan nasyon na' beṇə' chsa'ac gwde gwdele dižə' choso'ozenague' che no'olən'.

¹⁶ Na' bežan' bian' zie'ena' gue'ib le', na' leczə can' so'on rei ca' ši, beṇə' ca' ble'ido' che ši loz bežan', leczə yesə'əgue'ine' no'olən' na' txen len bežan' yesyə'əque'e bitə'əteza de'en de che' na' yesə'əcua'ane' ga'alyide'. Na' so'ote'ene' nach əsa'ogüe' xpele'ena' txen len bežan' na' de'en yega'anən' yoso'ozeye'en.

¹⁷ So'one' ca' chedə' Diozən' cue'e xbabən' lo'o yichjla'əžda'oga'aque'ena' par yoso'oziaiye no'olən'. De'e na'anə' nacho de que tozə naquə xbab che ši rei ca' par so'one' con can' yene'e bežan' xte so'one' yoguə' can' babžia' Diozən' bia' gaquə.

¹⁸ Na' no'olə sargatən' ble'ido'on naque' syoda de'en naquə le'ezelaogüe de'e blao lao yežlyon' na' de'en chnabia' rei ca' beṇə' ca' ža' yežlyon'.

18

Can' gaquə cats' cuiayi' syoda Babilonian'

¹ Na' gwde na' ble'ida' yeto angl ze'e yoban' betje' lao yežlyon'. Na' nape' yelə' chnabia' xen par chac can' ne'ena', na' yelə' gwey che'eni' che'ena' bse'eni'in lao yežlyon'.

² Na' anglən' gwne' zizjo' gwe: —Babžin ža cuiayi' syoda Babilonian'. Gaquən latjə che angl bzela' ca' na' de'e xio' ca' na' latj che yoguə' claste bia zo xile'e bia zjənaquə' bia zban par len beṇə'chən'.

³ Cuiayi'in chedə' beṇə' gwnabia' che syodan' bagwso'one' par nič beṇə' ca' ža' yoguə' nasyonə' baboso'ozoe' Diozən' ca' alə na' cuich chso'elaogüe'ene', na' beṇə' ca' chəsə'anabia' doxen lao yežlyon' choso'ozenagzeche' che beṇə' gwnabia' che syodan' cle ca che Diozən'. Na' beṇə' güen dilgens ca' ža' lao yežlyon' bagwso'onchgüe' gan chso'ote'e bi de'en chəsə'əzi' beṇə' gwnabia' ca' par gwso'onche' de'e malən'.

⁴ Nach benda' gwne yeto beṇə' zo yoban' gwne': —Le'e nacle xi'ina' le'e yechoj syoda Babilonian' par nič cui gonle txen len de'e malən' chso'on beṇə' Babilonia ca', na' par nič cui si'ile castigon' txen len lega'aque' na' len yeziquə'əchlə beṇə' ca' choso'ozenag chega'aque'.

⁵ Lechguale de'e zan juisy xtolə' beṇə' Babilonia ca'. De'e na'anə' bitoch cuezə Diozən' par əgwnežjue' castigw chega'aque' zejlicane.

⁶ Na' beṇə' gwnabia' che Babilonian' na' len beṇə' ca' choso'ozenag chega'aque' yesə'əyi' yesə'əzaque'e can' bosə'oči' bosə'osaque'e beṇə' yoblə, yesə'əžaglaogüe' mazəchlə can' bosə'oči' baboso'osaque'e beṇə' yoblə. Lechguale castigw gualəch gaquə' de'en yesə'əzi'ena' clezə ca de'en gwso'onene' beṇə' ca' bosə'oči' bosə'osaque'e.

⁷ Na' ca naquə beṇə' gwnabia' che Babilonian' lechguale bagwso'on cuinga'aque' xen na' lechguale bagwso'one' con bin' na la'əžda'omalga'aque'ena', ca'aczən' yesə'əyi' yesə'əzaque'e na' yesyə'əgüine'ene'. So'one' xbab lo'o yichjla'əžda'oga'aque'ena' de que cuat te cuich yesə'anabi'e na' syempr yoso'ozenag beṇə' chega'aque'.

⁸ Pero lao tozə ža gaquə yoguə' de'e ca' so'one' xbab cuat gaquə chega'aque'. Beṇə' zan sa'ate' na' gatə'əchgua de'e yesyə'əgüine'ene' na' gatə' yelə' chbil chdon na' syodan' šeyən na' cuiayi'in. Can' gac che syoda Babilonian', chedə' la' Xancho Diozən' len yelə' guac che'ena'

gone' par nič beṇə' gwnabia' chei ca' na' len beṇə' ca' choso'ozenag čhega'aque' yesə'əzi'e castigon'.

⁹ Na' beṇə' gwnabia' ca' ža' lao yežlyon' beṇə' ca' bosoz'ozenag čhe beṇə' Babilonia ca' par bosoz'ozoe' Diozən' ca' alə na' par gwsow'one' con can' na' la' ažda'omalga'aque'ena' yesə'əbeže' na' yesyə'əgüine'ene' cata' yesə'əle'ine' šey syodan' na' čhas žen čhein'.

¹⁰ Yesə'əžebe' par yesyə'əbigue'e galə'əza. De'e na'ana' yesyə'əga'ane' zitə'alə yesə'əgüie', na' yesə'əne': —De'e mal juisy bachac che syoda Babilonia nga de'en naquə de'e blaoch ca syoda ca' yela' lao yežlyon'. Bachbiayi' syodan' de'en bagwnabia'ach lao de'e ca' zjachi' yežlyon'. Lao tozə or baben Diozən' par chbiayi'in.

¹¹ Nach beṇə' güen dilgens ca' ža' lao yežlyon' leczə yesə'əbeže' na' yesyə'əgüine'ene' cata' cuiyai' syodan'. Yesyə'əgüine'ene' čhedə' cuich no əžel no yesə'əzi' de'en so'ote'ena'.

¹² Bito əžel no yesə'əzi' de'en se'ene' so'ote'e de'en naquə de or, de plat, de yej fin, de perlas, na' no lachə' fin de lino na' de sed, lachə' morad na' lachə' xṇa, na' no yag de'e chla' zix, na' yogua' de'e ca' chso'one' de marfil, de yag fin, de brons, de ya na de marmol,

¹³ na' no canel na' bichlə rcaud ca', no yal, no mirra, no perfome, no bino, no set, no yezj fin, no trigw, no go'on, no xila', no cabey, no carret, na' len no beṇə'ca' ca' so'ote'e par əsa'aque' esclabos.

¹⁴ Na' yesə'əne' čhe syodan': —Yogua' de'e ca' de'en gwsa'azlažə'əchgua beṇə' Babilonia ca' yesə'əzi'e lao yelə' gwni'a čhega'aque'ena' cuich gaquə yesə'əzi'en na'a. Cagua no beṇə' gwni'a ša'ach Babilonian' na'a par zejlicəne, na' notoch no no so no yesə'əzi' de'e šao' de'e güen ca' de'en gosə'əzi' beṇə' Babilonia ca' antslə.

¹⁵ Na' ca' naquə beṇə' güen dilgens ca' beṇə' ca' chso'ote'e de'e šao' de'e güen ca' chəsə'əzi' beṇə' Babilonia ca', bazjənaque' beṇə' gwni'a por de'en chəsə'əzi' beṇə' Babilonia ca'. Lega'aque' yesə'əžebe' cata' yesə'əle'ine' can' gaquə čhe syodan' na' yesə'əzeche' zitə'alə yesə'əbeže' na' yesyə'əgüine'ene'.

¹⁶ Na' yesə'əne': —De'e mal juisyən' bagoc čhe syoda nga de'en goquə blaoch lao syoda ca' yela' de'en ža' yežlyon'. Beṇə' ca' gwža' syodan' gwsa'aze' lachə' fin na' lachə' de'e color morad na' de'e xṇa. Gwsow'on cuinga'aque' xoche len no or, no yej fin na' no perlas.

¹⁷ Na' lao tozə or bagwnit yogua' de'e šao' de'e güen čhega'aque' ca'.

Nach yogua' xan barcw ca' na' nochlə beṇə' ca' choso'osa' barcw ca' na' beṇə' ca' chso'on žin lo'o barcw ca', na' beṇə' ca' chja'ac ga yoblə lo'o barcon', yogue'e yesə'əzeche' zitə'alə yesə'əgüie'.

¹⁸ Na' cata' yesə'əle'ine' čhas žennə' lao syodan' əsa'acbe'ine' de que cheyənṇə', na' yesə'əne': —Bitoch bi syoda yoblə chi' lao yežlyon' de'e naquə can' goquə syoda nga.

¹⁹ Nach yoso'ožia yichjga'aque'en bište yon' tant nite'e trist, na' yesə'əbežyaše'e na' yesyə'əgüine'ene', yesə'əne': —De'e mal juisy bagoc čhe syoda nga de'en goquə blaoch ca syoda ca' yela' lao yežlyon'. Por yelə' gwni'a čhe beṇə' ca' gwža' na' yogua' chio'o bencho gan xen ca' naquə žinnə' babencho len barcw čhecho quinga. Na' na'a lao tozə or bagwžiyai' syodan'.

²⁰ Na' to beṇə' zo yoban' gwne': —Ledoyebei chio'o zocho yoban', na' le'e yebei le'e apostol na' le'e profet na' len le'e yeziquə'əchlə bagwlej Diozən' par nacle lažə' ne'ena', čhedə' Diozən' gone' castigw čhe beṇə' Babilonia ca' por ni čhe de'en baboso'ochi' baboso'osaque'e le'e.

²¹ Nach to angl gual bcose' to yej xen ca yej ca' chso'on žin gan' ža' molin, na' bzalə'en lo'o nisdə'onə'. Nach gwne': —Can' gaquə čhe syoda Babilonian', nitan can' gwnit yej xennə' de'en bzala'a lo'o nisdə'onə', cuatəch le'ichon de'e yoblə.

²² Cuatəch yesə'əcuež beṇə' gocuež ca' Babilonian'. Na' cuatəch əso'ole' lao lquey čhe syodan'. Cuatəch yoso'ogole' arpa o yoso'ocueže' bžejo lao syodan'. Notoch no nita' no so'on žin lao syodan', na' cuatəch yenecho sšag čhe yišə de'en chso'ote no'ol ca'.

²³ Ni quech le'icho be'eni' čhe lampara lao syodan', na' ni que yenecho beṇə' so'on legr' lao yelə' gošagna', čhedə' notoch no ša'ach na'. Cuiyai' syoda čhe beṇə' güen dilgens ca', la'anə'əczə'lega'aque' zjənaque' beṇə' blao lao yežlyon'. Beṇə' Babilonia ca' babesə'əxoayague' beṇə' ža' yogua' nasyon ca' naquən' gwsow'one'ena'.

²⁴ Bagwsow'ote' profet ca' na' notə'ətežəchlə beṇə' gwlej Diozən' par gwsa'aque' lažə' ne'ena', na' beṇə' Babilonia ca' zjənapə' dolə' čhe yogua' nochlə beṇə' bagwsow'ote' doxen lao yežlyon'. De'e na'anə' cuiyai' syoda čhega'aque'ena'.

19

¹ Gwde na' benda' angl zan juisy beṇə' ža' yoban' chso'elaogüe'e Diozən' na' zižjo nen cata'an gosə'əne':

Beṇə' güen juisy naquə Dioz čhechon'.

Le'ena' babene' par nič beṇə' ca' chso'onlilažə' le' cui žjəya'aque' lao yi' gabiłən'.

Chey che'eni'ichgua gan' zoe'ena' na' nape' yelə' guac xen.

² Zdacze' licha ca de'en chnežjue' castigw che beṇə' ca' chso'on de'e malən', na' chone' complir can' ne'ena'.

Baben Diozən' castigw che syoda əblao de'en gwxaquə'əlebe ca to no'olə' sargat laogüe de'en gwso'on beṇə' gwnabia' chei ca' par niç beṇə' ža' doxen lao yežlyon' bosozoe' Diozən' ca'alə' cui gwso'elaogüe'ene'.

De'e na'anə' Diozən' balsele'e castigw de'en cheyalə' yesə'əzi'e ca naquən' gwso'ote' beṇə' ca' chso'elao' le'.

³ Nach de'e yoblə' gosə'əne': —Beṇə' güen juisyən' naquə' Diozən'. Zejlīcanen' chas žennə' gan' chey syodan'.

⁴ Nach beṇə' golə' beṇə' blao ca' tapechoa besə'əzo xibe' gwso'elaogüe'e Diozən' gan' chi'e chnabi'ena', gosə'əne': —Ca'əšgacə' gaquə. Beṇə' güen juisyən' naquə'cə' Diozən'.

Na' leczə' ca' gwso'on bia ca' tap, bia ca' nitə' lao Diozən' gan' chi'e chnabi'ena'.

⁵ Nach benda' gwne' to angl do gan' chi' Diozən' chnabi'e, na' gwne':
Ledoye'ela'och Dioz chechon', chio'o naccho beṇə' güen žin che' na' chapchone' respet, chio'o naccho beṇə' blao na' len chio'o cui naccho beṇə' blao.

Yelə' gošagna' che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'

⁶ Nach leczə' benda' xne' che yezan beṇə' chso'elaogüe'e Diozən'. Na' xnen' nenən can' chsiž yaon' cata' dechguan na' ca nen cata'an lechguale' chašjw' chtin. Na' gosə'əne':

Beṇə' güen juisy' naquə' Xancho Diozən'.

Nape' le'ezaogüe' yelə' guac xen na' chnabi'e.

⁷ Ledoyebei, ledoso mbalaz, na' ledoye'ela'och le',

chedə' babžin ža' əgwšagna' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

Bazo no'olən' si'e par gague' xo'ole'.

⁸ Na' baben Jesocristən' par niç no'olən' nyaze' lachə' fin de'en naquə' šyiš xilə' juisy na' de'en cui naquə' manch.

Na' lachə' fin de'en nacho nyaz no'olən' de'en naquə' de'e šyiš zejen dižə' de que chio'o bagwlej Diozən' par naccho lažə' ne'ena' zotezə' zocho choncho de'e güenna'.

⁹ Nach anglən' bolgüiže' nada' de'e yoblə' gwne': —Bzoj de que mbalaz beṇə' ca' bazjanaquə' combid par əžja'aque' gan' gaquə' yelə' gošagna' che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

Na' anglən' leczə' gože' nda': —Diozən' babene' par niç gwnia' ca', na' naquən de'e li.

¹⁰ Nach bzo xiba' par güe'elaogua'a anglən', pero anglən' bito be'e latjə, gwne': —Bito gonon' ca'. Be'elao' Diozən'. Nada' naca' to beṇə' güen xšine' can' naco' le' na' ljuəzjo' ca' beṇə' ca' leczə' chso'e dižə' de que chso'onlilaže'e Jeso'osən'.

Na' ca'aczən' naquən, notə'ətezcho cho'echo dižə' de que chonlilažə'əcho Jeso'osən', zo Spirit che Diozən' len chio'o chonan ca cho'echo xtiže'ena'.

Ben' žia cožə' cabey šyišən'

¹¹ Nach ble'idaogüe'eda' nla'axejə yoban' na' ble'ida' to cabey šyiš na' Jeso'osən' žie' cožə'əbən'. Len' chone' par niç chac can' ne'ena' na' le' syempr choe' dižə' li. Zdacze' licha ca de'en chchoglaogüe'en che yogua'əloj beṇə' šə non' napə' dolə', na' zdacze' licha can' chdiləlene' de'e malən'.

¹² Jelaogüe' ca' chsa'actitən ca to yi' de'e chala'əniṇ, na' zan coron nitə' yichje'ena', na' lao xgue'ena' nyoj yeto le' de'en cui nombia' nochlə beṇə'.

¹³ Na' nyaze' to lachə' de'e dopə' chen, na' yoso'osi' beṇə' le' Xtižə' Diozən'.

¹⁴ Na' angl ca' ža' yoban' beṇə' zjanaquə' soldad che Diozən' gosə'ənaogüe'ene', zjənyaze' lachə' fin de'en naquə' de'e šyiš na' de'e cui naquə' manch, na' yogue' e zjəžie' cabey šyiš.

¹⁵ Na' cho'ena' zo to spad de'e nlachguan par niç gwzo'e beṇə' ca' ža' yogua' nasyon xni'ena'. Nabi'e lega'aque' na' gone' ca yesə'əzəxjw' yichjga'aque' laogüe'ena'. Le'ena' əgwnežjue' castigw che beṇə' ca' chso'on de'e malən', chedə' chžə'achgua Diozən' lega'aque', Dioz ben' napə' le'ezaogüe' yelə' guac xen.

¹⁶ Na' le'e xadon che Jeso'osən' na' len le'e ni'ena' nyoj dižə' quinga: “Nada' chnabi'a notə'ətezachlə rei na' notə'ətezachlə beṇə' blao.”

¹⁷ Nach ble'ida' to angl zeche' lao bgüižən' na' bolgüiže' yogua' claste šod ca' bia ca' chaš le'e yoban' na' gože' lega' aquab zižjo: —Le'e da leyedobə' nga par gaole to xšə' xen de'e gon Diozən' le'e.

¹⁸ Gatə' xpelə' rei, na' xpelə' no comandant na' no beṇə' gual. Gatə' xpelə' cabey na' xpelə' beṇə' ca' gosə'əbia lega' aquab. Gatə' xpelə' yogua' claste beṇə', beṇə' gwsa'ac esclabos na' beṇə' cui gwsa'ac esclabos, beṇə' gwsa'ac beṇə' blao na' beṇə' cui gwsa'ac beṇə' blao.

¹⁹ Na' ble'ida' bež gaž yichjən' na' bežən' yeto len yoguə'əloł rei ca' na' yoguə' soldad zan che rei ca'. Bačh nite'e probnid par yesə'ədiləlene' Jeso'osən' ben' zia cožə' cabey šyišən' na' len soldad che' ca'.

²⁰ Na' bež nechən' len bia əgwchopen' bian' choe' dižə' goxoayag par ničh benəchən' chso'əlaogüe'e bež nechən', čhopteb besə'ədolə' na' gwsə'əquəb lao na' Jeso'osən'. Bež əgwchope na'ana' bian' ben de'e zan de'e besyə'əbane beņə' lao bež nechən' par bxoayaguəb beņə' ca' nitə' seņy che bež nechən' na' beņə' ca' chse'ejñi'alažə' lguə'a lsaquə' de'en naquə ca ləb. Na' nežəmbanga'əquəb bzalə' Jeso'osən' lega'əquəb lo'o yi' gabilən' gan' čhalə' sofrən', to yi' xen de'en naquə ca to nisdao'.

²¹ Na' Jeso'osən' ben' zia cožə' cabey šyišən' bete' rei ca' na' soldad zan čhega'aque' ca' len spadən' de'en zo cho'ənə' de'en nłachgua. Nach yoguə'əloł šod ca' gwsə'əxatəb xpelə'əga'aque'ənə'.

20

Can' gaquə lao tml iz

¹ Na' ble'ida' to angl beņə' zo yoban' betje' par bsaljue' yech gabilən', na' noxe'e to gden xen.

² Na' anglən' bnize' belən' bian' beyaque gwxiye'ənə' ža gwlasda'ote, de'en le Satanas, na' bcheje'eb gdenə' par tml iz.

³ Nach bzalə'eb lo'o yech gabilən' na' le'e bseyjwte' cho'a yechən', na' bchiše'en to sey. Bene' ca' par ničh cuich xoayaguəb beņə' ža' yežlyon' xte cata' te tml iz. Cana'ach yoseže'eb yečhojəb yeto tyemp dao'.

⁴ Nach ble'ida' zjachi' beņə' čhasə'anabia' txen len Cristən' na' yogue'e len le' gosə'əchoglaogüe'en che beņəchən' šə non' napə dolə'. Na' beņə' ca' čhasə'anabia' len le' zjənaque' beņə' ca' cui əgwso'əlao' bežən' nic lguə'a lsaquə' de'en naquə ca ləb, na' bito gwso'e latjə yoso'ozoe' seņy čhebən' lao xgaga'aque'ənə' o na'aga'aque'ənə'. Gwso'e dižə' de que chso'onlilaže'e Jeso'osən', na' bosə'ozenague' che xtižə' Diozən'. De'e na'ana' beņə' ca' čhasə'əgüe'i Diozən' gwso'ote' lega'aque' gosə'əchogue' yenga'aque'ənə'. Pero babesyə'əbane' ladjo beņə' guat ca' ničh čhasə'anabi'e txen len Cristən' tml iz.

⁵ Cristən' bolis bosbane' lega'aque' ladjo beņə' guat ca' antslə ca beņə' yeziquə'əchlə. Na' cata' te yesə'anabi'e tml iz, cana'ach yeziquə'əchlə beņə' ca' bagwsa'at yesyə'əbane' ladjo beņə' guat ca'.

⁶ Mbalaz par beņə' ca' babolis bosban Cristən' ladjo beņə' guat ca' antslə ze'e solao tml izən', beņə' ca' bagwlej Diozən' par zjənaque' lažə' ne'ənə'. Bito gac čhega'aque' can' gac che beņə' ca' yesə'əžaglaochgua zejlicəne. Na' de'en yesə'əžaglaochgüe' zejlicəne lenə' nacho yelə' got əgwchopen'. Na' beņə' ca' zjənaque' lažə' na' Diozən' nita'ətezə' nite'e əso'əlaogüe'ene' na' əso'əlaogüe'e Cristən' can' gwnita'ətezə' gwnita' bxož che beņə' Izrael ca' gwse'ejñi'alažə'e Diozən'. Na' beņə' ca' zjənon cuinga'aque' lažə' na' Diozən' lega'aque' yesə'anabi'e txen len Cristən' tml iz.

⁷ Na' cata' bagoc tml iz čhasə'anabi'e, Diozən' güe'e latjə yečhoj gwxiye'ənə' de'en le' Satanas lo'o yech gabilən' gan' yo'on.

⁸ Na' yečhojən par əxoayaguən beņə' ca' ža' doxenlə lao yežlyon' de'e yoblə, beņə' ca' čhasə'əne' Gog na' Magog. Gwxiye'ənə' əxoayaguən lega'aque' na' əgwtoəbən lega'aque' par yesə'ədiləlene' Cristən'. Na' beņə' zan juisy əgwtoəbən contr Cristən' ca yox zannə' de'en čhi' cho'a nisdao'.

⁹ Nach ble'idaogüe'eda' chac ca', za'ac beņə' zan doxenlə lao yežlyon' na' gwse'echje' syodan' chaque Diozən' čhei gan' ža' beņə' ca' bagwleje' par zjənaque' lažə' ne'ənə'. Nach Diozən' bene' par ničh bchoj yi'ina' yoban' bžinten lao yežlyon' par bžiyai'in beņə' ca' bəbtoəb gwxiye'ənə'.

¹⁰ Na' ca naquə gwxiye'ənə' de'en bxoayag beņə' ža' yežlyon', Cristən' bzalə'en lao yi' gabilən' gan' čhalə' sofrən', lo'o yi' xen de'en naquə ca to nisdao'. Bzalə'en gan' bzalə'e bež nechən' na' bež əgwchope bian' bxoayaguəb beņəchən' len dižə' güenłazə' čhebən'. Na' čhasə'əžaglaogüe' gwxiye'ənə' len bež ca' lo'o yi' gabilən' do ža do yel par zejlicəne.

Diozən' gwchoglaogüe'en che beņə' ca' bagwsa'at šə non' napə dolə'

¹¹ Nach ble'ida' čhi' Diozən' lao to siy xen de'en naquə de'e šyiš na' čnabi'e. Na' leczə ble'ida' benittecza yežlyon' na' de'e ca' chle'icho le'e yoban' čhedə' bitoch byažjga'aquən.

¹² Na' ble'ida' beņə' ca' bagwsa'at sin cui gwso'onlilaže'e Jesocristən', beņə' ca' gwsa'ac beņə' blao na' len beņə' ca' cui gwsa'ac beņə' blao. Yogue'e zjəzeche' lao Diozən'. Nach Diozən' bzaše' lībr ca' gan' zjənyoj yoguə' de'e ca' gwso'on to toga'aque'. Nach gwde na' bzaše' yeto lībr gan' zjənyoj la beņə' ca' zjənapə' yelə' mban zejlicənen'. Na' yoguə' beņə' ca' gwsa'at

sin cui gwso'onlilaže'e Jesocrisťan' gwchoglaogüe'en chega'aque' de que yesa'azi'e castigw segon bin' gwso'on to toga'aque', con can' nyoj le'e libr ca'.

¹³ Na' yogua' beña' bagwsa'at lo'o nisdá'ona' sin cui gwso'onlilaže'e Jesocrisťan' lenczaga'aque' besya'áchoje' par gosa'ázeche' lao Diozán' na' le'egatezā ca' yogua' beña' bagwsa'at gatá'atezāchlā lecza besya'áchoje' latj che beña' guat ca'. Na' Diozán' gwchoglaogüe'en che to toga'aque' de que yesa'azi'e castigw segon can' gwso'one'.

¹⁴ Nach Diozán' bcueze' yelá' gotán' de'en nácho de'e neche. Bene' par ničh cuich no yežin latjā che beña' guat ca'. Na' de'en yesa'azaquá'azi' beña' güen de'e mal ca' lo'o yi' gabilán' zejlicane, lennā de'en nácho yelá' got ágwchopen'.

¹⁵ Yogua' non' nui nyoj leina' le'e libr gan' nyoj la beña' ca' zjanape' yelá' mban zejlicane, bosozalé'ene' lo'o yi' gabilán' de'en naquā de'e xen ca nisdáo'.

21

Yežlyon' beyaquan de'e cobā len de'e ca' chle'icho le'e yoban'

¹ Gwde na' ble'ida' de'e ca' chle'icho le'e yoban' zjanaquān de'e cobā, na' lecza ble'ida' yežlyon' de'e cobā. Ca naquā de'e ca' zjanlā' le'e yoban' antslā, na' ca naquā yežlyon' de'en banombi'ácho, bagwde chega'aquān. Na' lecza nisdá'ona' bagwde chei.

² Nada' Juan ble'ida' syoda che Diozán', syoda Jerosalennā' de'en naquā de'e cobā de'en chi' yoban' gan' zo Diozán', ble'ida' bletje'en lao yežlyon'. Banonšāogüe'en na' banone'en xochē ca to no'olā čpa'a cuine' catā' chšagne'e.

³ Nach do gan' chi' Diozán' chnabi'e benda' gwne to anglán' zizjo gwne: —Syoda che Diozán' babžinan gan' ža' beňachán' na' Diozán' soe' len lega'aque'. Beňach ca' asa'aque' xi'ine' na' le' gaque' Dioz chega'aque' ben' aso'elaogüe'e.

⁴ Na' Diozán' gone' par ničh cuich nite'e trist, notoch no gat, na' notoch no no yegüine'e, ni que gaquā bi de'en yesa'ážaglaogüe' o bi de'en gon par yesa'ábeže'. Bagwde che yogua' de'e ca' zjanac ca' de'en gotā' lao yežlyo nechán'.

⁵ Nach Diozán' ben' chi' chnabi'a' gwne': —Nada' chocoba' yogua'áol' de'en de.

Na' lecza gwne': —Bzoj de'e quinga chedā' nada' chona' can' nia'anā' na' syempr cho'a dižā' li.

⁶ Nach gozne' nada': —Bačh goc can' gwni'anā'. Nadan' naca' ben' ben yežlyon' na' nada' naca' ben' gon par ničh te chei. Nadan' bazocza' catā'an bxi'a yežlyon' na' ca'acznā' soa' catā'an yeyoz yedon. Notá'atezā beña' chene'ene' si'e de'en gwnežjua'ane', gwnežjua'ane' yelá' mban zejlicane de'en gwxaquā'álebe ca nis ya'a de'en che'ejcho catā'an chbilecho, na' gwnežjua'ane'en sin cui bi yesa'ayixjue' chei.

⁷ Na' notá'atezā beña' šā chasā'əzoine' cui choso'ozenague' che de'e malán', gac chega'aque' yogua' de'e güen ca' de'en babi'a dižā' chei, na' caguā de'e te cuich gaca' Dioz ben' aso'elaogüe'e na' caguā de'e te cuich asa'aque' xi'ina'.

⁸ Pero na' ca' naquā beña' ca' chasā'əžeb par yoso'ozenague' chia', na' beña' ca' cui chso'onlilažā' nada', na' beña' ca' chso'on bitá'atezā de'en chgue'ida', na' beña' ca' chso'ot beña' yoblā, na' beña' ca' chasā'əbejyichj no'ol chega'aque' o be'en chega'aque' par chesā'əzolene' beña' yoblā, na' beña' chasā'əžā' xtoga'aque', na' beña' ca' chasā'ənao de'en chso'on beña' ca' chasā'ənelen de'e xio', na' beña' ca' chse'ejni'alažā' lgua'a lsaquā', na' yogua' beña' ca' chso'e dižā' güenlāžā', yogua'əga'aque'ena' yesa'azaquā'azi'e zejlicane lo'o yi' gabilán' gan' chalā' sofrán', na' yi' gabilán' naquān ca to nisdáo'. Na' de'en gac chega'aque' lennā' yelá' got ágwchopen'.

Syoda Jerosalen de'en naquā de'e cobā

⁹ Na' ble'ida' angl ca' gažā beña' ca' gwso'oxā' gažā tas gan' yo'ožā de'en gwxaquā'áleben ca gažā castigw de'en bnežjw Diozán' beña' mal ca'. Na' toe' bgüiguā' gan' zoa'anā' na' gože' nada': —Da gwlo'ida' le' no'olán' ze'e si' Jesocrisťan' par gaque' xo'ole', Jesocrisťan' ben' gwxaquā'álebe ca xilā' dao' ca' gwso'ot beña' Izrael ca' par gwniłlao xtola'əga'aque'ena'.

¹⁰ Na' Spirit che Diozán' benān par ničh anglán' gwche'e nada' to lao ya'a xen de'en naquā de'e siba par ničh blo'ine' nada' syoda əblao che Diozán', syoda Jerosalennā' de'en gwche' yoban' gan' zo Diozán' de'en babetje' lao yežlyon'.

¹¹ Na' ble'ida' chey che'eni' syodan' len yelá' chey che'eni' che Diozán', na' ble'ida'an ca to yej fin de'e chactit, ca yej de'en ne' jaspe de'en chle'icho ca bidr.

¹² Na' ble'ida' to ze'e xen de'e siba de'en nyechj syodan', na' nita'an šižin puert, na' to to cho'a puertān' zjāzecha tgüejā angl. Na' ca naquā puert ca' zjanoyonā la šižin family che beña' Izrael ca' beña' ca' za'ac lao dia che to to xi'in de'e Izraelān'.

¹³ Le'e ze'e galān' chla' bgüizān' nita' šonā puert, na' yešonān cuitān licha, na' yešonān cuitān yegla, na' yešonān galān' chen bgüizān'.

¹⁴ Na' ble'ida' lan ze'enə' de'en nyechj syodan', naquən šižin yej xen na' zjənyoj le'e yej ca' la šižin apostol che Jesocristan' ben' gwxaquə'əlebe ca xilə' dao' ca' gwso't beṇə' Izrael ca' par gwnitlao xtolə'əga'aque'enə'.

¹⁵ Na' anglən' ben' be'elen nada' dižə'anə' noxə'e to ya de or par gws'i medid che syodan' na' len ze'e cheinə' na' puert chei ca'.

¹⁶ Syodan' naquə de'e cuadrad, na' tozə can' naquə yelə' zlague'i len yelə' ltonəi na' len yelə' sib chein'. Na' medid che syodan' goquən chopa mil chopa gueyoa kilometros.

¹⁷ Nach gwde na' gwxi'e ze'e de'en nyechj syodan' medid, na' goquən gyon tap metr yelə' sib chein' segon metr de'en chesə'əchin beṇə'chən' na' lənnə' bchin anglən'.

¹⁸ Ze'e de'en nyechj syodan' naquən de yej de'en nzi' jasje, na' ble'ida' de que yo'o ca' ža' syodan' zjənaquən porzə de or na' nla'an ca bidr de'en naquə xi'ilažə'.

¹⁹ Na' le'e to to yej xen ca' de'en zjənaquə lan ze'e de'en nyechj syodan' zjənone'en xoche len yoguə' claste yej fin. De'e nechən' da'an jasje, de'e gwchopen' safiro, de'e gwyone agata, de'e gwdape esmeralda,

²⁰ de'e güeyə' onise, de'e gwxope cornalina, de'e gažə crisolito, de'e əgwəxone'e berilo, de'e güei topasio, de'e ši crisoprasa, de'e šnejei jasinto, na' de'e šižine amatista.

²¹ Nach puert ca' šižin de'e nitə' che syodan' to toga' aquən zjənaquən de to perla. Na' lquey che syodan' zjənaquən porzə de or na' nla' le'ine' can' nla' le'i to de'en naquə de bidr.

²² Bitobi yo'odao' ble'ida' lao' syodan' cheda' la' do tyempte beṇə' ca' ža' syodan' nite'e lao Xancho Diozən' ben' napə le'ezelaogüe yelə' guac xennə' na' lao Xi'ine' Jesocristan' ben' gwxaquə'əlebe ca xilə' dao' ca' gwso't beṇə' Izrael ca' par gwnitlao xtolə'əga'aque'enə', na' beṇə' ca' ža' syodan' chso'elaogüe'e lega'aque'.

²³ Bito chyažje bgüižən' ni bio'onə' par yoso'ose'eni'in lao syodan' cheda' nye'eni' syodan' len yelə' chey che'eni' che Diozən' na' che Xi'ine' Jesocristan'.

²⁴ Na' be'eni' che syodan' gwse'eni'in yedote par beṇə' ca' chso'onlilažə' Jesocristan', beṇə' ca' zjənaquə to to nasyon. Na' rei ca' chə'anabia' yežlyon', beṇə' ca' chso'onlilažə' Diozən', yoso'onežjue'ene' yelə' gwnabia' na' yelə' bala'an de'en de chega'aque'.

²⁵ Bito šeyjw puert ca' teža na' caguə bata'əquə gaquə žəchol.

²⁶ Na' yelə' xoche na' bitə'ətezəchlə de'e zaque'e de'en gotə' che nasyon ca' gatə'an lao' syodan'.

²⁷ Bitobi de'e mal gaquə lao' syodan', na' notono gaquə yesyə'əžin syodan' no chon de'e ca' chgue'i Diozən' o no choe' dižə' güenlažə'. Caguə no yesyə'əžin syodan' sino beṇə' ca' zjənyoj laga'aque'en le'e libr che Jesocristan' ben' gwxaquə'əlebe ca xilə' dao' ca' gwso't beṇə' Izrael ca' par gwnitlao xtolə'əga'aque'enə'. Le'e libr na'anə' zjənyoj la beṇə' ca' zjənapə yelə' mban zejlicanən'.

22

¹ Nach blo'ine' nada' yao de'en yožə nis de'en chnežjon beṇə'chən' yelə' mban zejlicanən'. Na' nisan' naquən clar juisy ca be'eyə', na' yaon' chchojən gan' chi' Diozən' na' Xi'ine' Jesocristan' chəsə'anabi'e, Jesocristan' ben' gwxaquə'əlebe ca xilə' dao' ca' gwso't beṇə' Izrael ca' par gwnitlao xtolə'əga'aque'enə'.

² Na' yaon' chden gwchol lquey xen che syodan' na' ze yag chopə la'a cho'a yaon', yag de'en chnežjon beṇə'chən' yelə' mban zejlicanən'. Na' yoguə' bio' chəsə'əbian frot, šižin las lao tğüiz. Na' beṇə' ca' ža' syodan' beṇə' zjənaquə to to nasyon chəsə'əchine' xlague'i ca' par nič nite'e güen.

³ Cuat gatə' de'e gue'i Diozən' lao' syodan'. Diozən' len Xi'ine' Jesocristan' ben' gwxaquə'əlebe ca xilə' dao' ca' gwso't beṇə' Izrael ca' par gwnitlao xtolə'əga'aque'enə' zjəchi'e syodan' chəsə'anabi'e, na' yoguə' beṇə' ca' ža' syodan' chso'onlilažə'e Diozən' na' nitə'ətezə nite'e chso'elaogüe'ene'.

⁴ Nitə'ətezə nite'e gan' chesə'əle'ine' cho'alo Diozən', na' nyoj le'ene' lao xgaga'aque'enə'.

⁵ Cuat gaquə žəchol lao' syodan'. De'e na'anə' bito yažje be'eni' che lampara, nique yažje be'eni' che bgüižən', cheda' yelə' chey che'eni' che Xancho Diozən' chse'eni'in gan' ža' beṇə' ca' chso'elao' le' na' chəsə'anabi'e len le' zejlicanə.

Bazon əžin ža yida Cristən' de'e yoblə

⁶ Nach anglən' gwne' nada': —Yoguə' de'en bagwna Diozən' zjənaquən de'e li na' gaquə can' ne'enə'. Xancho Dioz nan' chbeje' beṇə' par chso'e xtiže'enə' na' le'ene' bsele'e nada' par chzejni'ida' beṇə' ca' chso'elao' le' de'e ca' baza' gaquə.

⁷ Jeso'osən' ne' de que bazon əžin ža yide' de'e yoblə, na' mbalaz nitə' beṇə' ca' yoso'ozenag che de'e ca' babzojo' le'e librən' noxo'onə', ca naquə de'e ca' ze'e gaquə.

⁸ Nada' Juan bzoja' de'en benda' na' ble'ida', na' cats' benda' na' ble'iga'acda'an bzo xiba' xni'a anglən' par güe'elaogua'ane', ben' ben par nič ble'ida'ogüe'eda' yoguə' de'e ca'.

⁹ Pero anglən' bito be'e latjə, na' gwne': —Bito gono' ca'. Be'elao' Diozən'. Nada' naca' to beṇə' güen xšine' can' naco' le' na' ljuežjo' ca' beṇə' ca' leczə bagwlej Diozən' par chso'e xtiže'ena', na' ca'aczən' yogua' beṇə' ca' yoso'ozenag che de'e ca' babzojo' le'e librən' noxo'ona'.

¹⁰ Na' leczə gwne' nada': —Bito gwcušašo'o che de'e ca' ze'e za'ac can' na' libr nga bzojo', cheda' bazon əžin ža gaquə yogua' de'e ca' bzojo' le'ina'.

¹¹ Bazon əžin ža catə' beṇə' ca' chso'on de'e malən' yesyə'əga'anlencə de'e mal čhega'aque'ena' gabilən'. Na' beṇə' ca' chso'on de'en naquə yelə' zto' yesyə'əga'anlene' yelə' zto' čhega'aque'ena' gabilən'. Na' beṇə' ca' zjənaque' beṇə' güen lao Diozən' so'onche' de'e güenna' zejlicane. Bagwlej Diozən' lega'aque' par zjənaque' lažə' ne'ena' na' zejlicane yesyə'əga'ane' lažə' ne'ena'.

¹² Nach Jeso'osən' gwne': —Bazon əžin ža yida' de'e yoblə, na' gona' castigw che to to beṇəch o gona' par nič gaquə de'e güen che to toga'aque' segon nac gwso'one'.

¹³ Nada' naca' beṇə' beṇə' yezlyon' na' ben' gon par nič te čhei. Bazocza' catə'an bxi'a yezlyon' na' ca'aczən' soa' catə'an yeyož yedon.

¹⁴ Mbalaz nita' nota'ətezə beṇə' bagosə'əṇabe nada' beca'a xtola'əga'aque'ena'. Na' gua'a latjə so'e cho'a puert che syodan' gan' zoa'anə' na' gwnežjua' lega'aque' frot che yag yelə' mban zejlicanen'.

¹⁵ Pero na' bito gua'a latjə so'o beṇə' ca' cui chso'onlilažə' nada' cho'a puert che syodan'. Bito gaquə so'o beṇə' ca' chesə'ənelen de'e xio', na' beṇə' chəsə'əbejyichj no'ol čhega'aque' o be'en čhega'aque' par chnita'əlene' beṇə' yoblə o beṇə' chəsə'əžə' xtoga'aque'. Bito gaquə so'o beṇə' chso'ot beṇə' beṇə' chse'ejni'alaza' lgua'a lsaquə' na' nota'ətezə beṇə' chəsya'əbeine' chso'e dižə' güenlažə'.

¹⁶ Nada' Jeso'os bseļa'a angl čhia'anə' par bzenene' le' yogua' de'en babzojo' par beṇə' ca' zjəncoda' ljuežje chso'elaogüe'e nada'. Nada' golja' lao dia che de'e Rei Dabin', na' naca' ben' ben Diozən' lyebe əsele'e lao dia che de'e Rei Dabin'. Na' gwxaquə'əlebada' ca' beljw xsilən'. Nezecho catə' chla' beljw xsilən' bazon še'eni', na' de'en babida' yezlyon' nezecho bazon gaquə yogua' de'e güen ca' zjənyoj le'e libr nga.— Can' gwna Jeso'osən' nada'.

¹⁷ Chio'o chonlilažə'əcho Jesocristən' naccho ca to no'olan' si'e, na' chio'o txen len Spirit che Diozən' chnablažə'əcho yob yide' de'e yoblə. Na' yogua' no yene catə' yoso'olabe' libr nga, leczə yesə'əṇablažə'əšgue' yob yide' de'e yoblə.

Na' nota'ətezə beṇə' se'ene'ene' so'onlilaže'e Jeso'osən' gatə' yelə' mban zejlicane čhega'aque' sin cui bi yesə'əyixjue' čhei.

¹⁸ Nach gozna Jeso'osən': —De'e ngan' əchnia' par yogua' le'e gwlable o yenele catə' beṇə' yoso'olabe' de'e quinga ben Diozən' mendad zjənyoj le'e libr nga. Nota'ətezle šə gwzanchle ca de'en na' libr nga catə' əgwzejni'ile beṇə' che de'e ca' ze'e za'ac, Diozən' gone' par nič gac čhele yogua' de'e mal ca' de'en zjənyoj le'e libr nga.

¹⁹ Na' nota'ətezle catə' əgwzejni'ile beṇə' che de'e ca' ze'e za'ac šə cui yene'ele əgwzejni'ile lega'aque' yogua' de'e ca' ben Diozən' mendad zjənyoj le'e libr nga, Diozən' yoxi'e lalen' le'e libr che'ena' na' bito güe' e latjə yezinle syoda che'ena'. Na' le'e libr che Dioz nan' zjənyoj la yogua' beṇə' ca' zjənapə' yelə' mban zejlicanen'.

²⁰ Nach Jeso'osən' ben' bzejni'ine' nada' yogua' de'e quinga ne': —De'e li yida' lgüegwza. Na' nada' goža'ane': —Ca'ašgacə gaquə. Yob yidašgo' Xana' Jeso'os.

²¹ Xancho Jesocristən' sotezə soe' gaquəlenšgacze' yogua'əle. De'e na'azən' de' chzoja'. Juan